

四部
備要
集部

宋別集
(七)

陸放翁全集

079

中 行

劍南詩藁

前輩有欲補詩史一字之闕終莫適其當者夫發言寓意未必惟一字之工或者窮思畢慮之弗逮人才相去乃爾遠耶

太守山陰陸先生劍南之作傳天下眉山蘇君林收拾尤富適官屬邑欲鋟本爲此邦盛事迺以纂次屬師尹亦旣斂衽肅觀則浩渺閱肆莫測津涯掩卷太息者久之獨念吾儕日從事先生之門間有疑闕自公餘可以從容質正幸來者見斯文大全用是不敢辭劍南詩稿六百九十四首續稿三百七十七首蘇君於集外得一千四百五十三首凡二千五百二十四首又□七首釐爲□十卷總曰劍南因其舊也文字傳襲失真類不滿意其如此書得之所見有

以傳信而無疑若夫發乎情性充乎天地見乎事業忠憤感激憂思深遠一念不忘

君先生之志且有當世巨公爲之發揮非師尹敢任淳熙十有四年臘月幾望門人迪功郎監嚴州在城都稅務括蒼鄭師尹謹書

宋板翻雕

劍南詩稿目錄

卷第一

別會學士 送仲高兄官學秩滿赴行在 題
 閩郎中溧水東亭 和陳魯山十詩以孟
 夏草木長遶屋樹扶疎為韻十首 看梅絕句
 五首 春晚簡陳魯山 寄酬會學士學宛陵
 先生體比得書云所寓廣教僧舍有陸子泉每
 對之輒奉懷 夜讀兵書 二月二十四日作
 送會學士赴行在 霽夜觀月 新夏感事
 留題雲門草堂 送韓梓秀才十八韻 送
 陳德邵宮教赴行在二十韻 朱子雲園中觀
 花 酬妙湛閣梨見贈妙湛能棋其師璘公蓋
 嘗與先君遊云 次韻魯山新居絕句二首 寄
 陳魯山二首 戲題江心寺僧房壁 泛瑞安
 江風濤貼然 平陽驛舍梅花 渡浮橋至南
 臺 出縣 還縣 雨晴遊洞宮山天慶觀坐
 間復雨 寄陳魯山正字 航海 海中醉題
 時雷雨初霽天水相接也 溪行二首 自來
 福州詩酒殆廢北歸始稍稍復飲至永嘉括蒼
 無日不醉詩亦屢作此事不可不記也 東陽
 道中 東陽觀醮醮 送李德遠寺丞奉祠歸
 臨川 送王嘉叟編修出佐南昌 送王龜齡
 著作赴會稽大宗丞二首 送杜起莘殿院出
 守遂寧 和曾特制遊兩山三首 雨中出遊
 夜歸 謝李平叔郎中問疾 聞武均州報已
 復西京 喜小兒輩到行在 病起寄會原伯
 兄弟 送湯岐公鎮會稽 周洪道學士許折
 贈館中海棠以詩督之 送七兄赴揚州帥幕
 閏二月二十日遊西湖 劉太尉挽歌辭二
 首 過林黃中食柑子有感學宛陵先生體
 玉牒所迎駕望見周洪道舍人 送梁諫議
 以石芥送劉韶美禮部劉比釀酒勁甚因以為

戲二首 出都 會原伯屢勸居城中而僕方
 欲自梅山入雲門今日病酒偶得長句奉寄

村居 看山 夏夜泛舟書所見 秋陰 盆
 池 比從人覓酒皆酸薄戲作此詩 買魚二
 首 秋雨 晨起偶題 悲秋 寄張真父舍
 人二首 幽居 法寶禪師求竹軒詩 欲遊

五峯不果住小詩寄瑩老 謝王彥光提刑見
 訪并送茶 送查元章赴夔槽 逍遙 病中

簡仲彌性唐克明蘇訓直 送王景文 送呂
 彥升參謀 无咎兄郡齋燕集有詩末章見及

敬次元韻 次韻无咎別後見寄 晚泊慈姥
 磯下二首 七月十四夜觀月 夜宿陽山磯

將曉大雨北風甚勁俄傾行三百餘里遂抵雁
 翅浦 望江道中 秋夜讀書每以二鼓盡為

節 住在都下時與鄒德章兵部同居百官宅
 無日不相從僕來佐豫章而德章亦謫高安感

事述懷作歌奉寄 寄答綿州楊齊伯左司
 送全州趙都曹 病中作 夜夢從數客雨中

載酒出遊山川城闕極雄麗云長安也因與客
 馬上分韻作詩得遊字 去年余佐京口遇王

嘉叟從張魏公督師過焉魏公道免相嘉叟亦
 出守莆陽近辱書報魏公已葬衡山感歎不已

因用所遺柱頰亭詩韻奉寄 自詠示客 醉
 中歌 寄陶茂安監丞 燒香 寒食臨川道

中 上巳臨川道中 寄別李德遠二首 初
 夏道中 示兒子 重五同尹少稷觀江中競

渡 過玉山辱芮國器檢詳留語甚勤因寄此
 詩兼呈韓无咎右司 隨意 寄龔實之正言

遊山西村 觀村童戲溪上 雨霽出遊書
 事 殘春 家園小酌二首 寄王嘉叟吏部

夜讀隱書有感 上虞逆旅見舊題歲月感
 懷 舜廟懷古 題十八學士圖 統分稻晚

歸二首 衰病二首 霜風 小酌 十月苦
蠅二首 了頭巖見周洪道以進士入都日題
字 獨學 霜月 寄黃龍升老 贈進賢劉
令 書室名可齋或問其義作此告之 寄謝
楊齊伯少卿

劍南詩稿卷第一

宋陸游務觀

別會學士

兒時聞公名謂在千載前稍長誦公文雜之韓杜編
夜輒夢見公皎若月在天起坐三數息欲見亡繇緣
忽聞高軒過驩喜忘食眠袖書拜轅下此意私自憐
道若九達衢小智妄鑿穿所願瞻德容頑固或少痊
公不謂狂疎屈體與周旋騎氣動原隰霜日明山川
匏繫不得從瞻望抱恨惜畫石或十日刻楮有三年
賤貧未即死聞道期華顛他時得公心敢不知所傳

送仲高兄官學秩滿赴行在

兄去游東閣才堪直北扉莫憂持橐晚姑託乞身歸
道義無今古功名有是非臨分出苦語不敢計從違

題閩郎中溧水東臯園亭

省中地禁清晝長侍史深注薰籠香榮名挽公公不
住東臯歸去栽花忙旒旒華髮映朱絨同舍半已排
雲翔正如少陵入嚴幕本自不用尚書郎向令封侯
佩金印不然草詔直玉堂萬鍾會作夢幻過三徑空
嘆松菊荒樂天十年履道宅贊皇一夕平泉莊公看
富貴定何物一笑乃復坐此妨東臯樂哉日成趣簪
花起舞當自強知公能容賤子狂請賦式微之二章

和陳魯山十詩以孟夏草木長遶屋樹扶疎為韻

言語日益工風節顧弗競杞柳為桮棬此豈真物性
病夫背俗馳梁甫時一詠奈何七尺軀貴賤視趙孟
又

唐虞亦人耳四海可高謝哀哉斗升故詔妄兩憑架
心明物自賓能整故能暇會當棄人事面壁度九夏

又
大父昔在朝騰上唯恐早淡然清班中灰寒而木槁

議論主中和人才進者老至今下馬墳不生刺人草
又

櫻酪事已過角黍配夏熟尚憶少小時綵縷繫腕玉
此生本幻戲衰態轉眼足二郎老無慘始解數絲木

又

門無容車高庭止旋馬廣富貴固易耳正恐卿慚長
時情競脂韋家法獨駘麟靜處看紛紛枯樛勞頽仰

又

至人貴其身不使事物遶捐身易富貴明珠彈飛鳥
我願稱善人題作墓上表從來尺鷃樂不羨飛鴻矯

又

匆匆過三十夢境日已蹙誰知數亡羊但有喜得鹿
本來作何面認此逆旅屋逢人吹布毛出世不忍獨

又

杜門殊省事百巧輸一粗燒香淨掃地袖手了朝莫
君看瓦樞手端自勝金注塵機早見貸不待雞竿樹

又

萬物備於我本來無欠餘婁儒可憐生西抹復東塗
斯文如大廈傾壞要力扶夫子真鼠輩辛苦賣子虛

又

風花憐寂莫起舞為我娛舉酒謝風花吾道殊不疎
汝開何自有汝落何自無居然會此理吾汝皆如如

看梅絕句

梅花宜寒更宜陰摩挲拄杖過溪尋幽香著人索管
領不信如今鐵石心

又

梅花樹下黃茆丘古人尚能愛花不月淡煙深聽牧
笛死生常事不須愁

又

荒陂十畝浴鳧鴨折葦枯蒲寒意深何處得船滿載
酒醉時繫著古梅林

又

一物不向胃次橫醉中談話坐中傾梅花有情應記
得可惜如今白髮生

又
老子舞時不須拍梅花亂插烏巾香尊前作劇莫相
笑我死諸君思此狂

春晚簡陳魯山

春工我輩人可許不待面欲老更增奇原野紅綠遍
向來苦摧傷零雨雜飛霰豈知袖此手天定乃徐見
吾齋萬花間輕衫稱團扇飛花點書冊戲蝶遊几研
吾衰未忘情小句亦情綯持問陳元龍試乞語一轉

寄酬曾學士學宛陵先生體比得書云所寓廣
教僧舍有陸子泉每對之輒奉懷

庭中下乾鵲門外傳遠書小印紅屈蟠兩端黃蠟塗
開絨展矮紙滑細疑卵膚首言勞良苦後問逮妻孥
中間勉以仕語意極動渠字如老瘠竹墨淡行疎疎
詩如古鼎篆可愛不可摹快讀醒人意垢癢逢肥梳
細讀味益長炙敷出膏腴行吟坐臥看廢食至日脯
想見落筆時萬象聽指呼亦知題詩處綠井石髮麤
公閑計有客煎茶置風爐倘公無客時濯纓亦足娛
井名本季疵思人理豈無居然及賤子媿謝恩意殊
幾時得從公舊學鋤荒蕪古文講聲形誤字辨魯魚
時時酌井泉露芽奉瓢盂不知公許否因風報何如

夜讀兵書

孤燈耿霜夕窮山讀兵書平生萬里心執戈王前驅
戰死士所有恥復守妻孥成功亦邂逅逆料政自疎
陂澤號飢鴻歲月欺貧儒數息鏡中面安得長膚腴

二月二十四日作

棠梨花開社酒濃南村北村鼓擊寒且祈麥熟得飽
飲敢說穀賤復傷農崖州萬里窺酷吏湖南幾時起
臥龍但願諸賢集廊廟書生窮死勝侯封

送曾學士赴行在

二月侍燕鷓紅杏寒未拆四月送入都杏子已可摘

流年不貸人俯仰遂成昔事賢要及時感此我心惻
欲書加餐字寄之西飛翻念公為民起我得怨乖隔
蓋搖跋前旌去去望車軌亭郭鬱將莫落日澹陂澤
敢忘國士風涕泣效臧獲敬輸千一慮或取二三策
公歸對廷英清問方側席民瘼公所知願言寫肝膈
向來酷吏橫至今有遺螫織羅士破膽白著民碎魄
詔書已屢下宿蠹或未革期公作醫和湯劑窮絡脈
士生恨不用得位忍辭責併乞謝諸賢努力光竹帛
雲重真愁無散時可憐不奈一風吹清輝如此那休
得誰誤虛空作許癡

新夏感事

百花過盡綠陰成漠漠爐香睡晚晴病起兼旬疎把
酒山深四月始聞鶯近傳下詔通言路已卜餘年見
太平聖主不忘初政笑小儒唯有涕縱橫

留題雲門艸堂

小住初為旬月期二年留滯未應非尋碑野寺雲生
屨送客溪橋雪滿衣親滌硯池餘墨漬臥看爐面散
煙霏他年遊宦應無此早買漁蓑未老歸

送韓梓秀才十八韻

束髮走場屋始得從君遊燈火都城夜風雨湖上秋
追隨不隔日巖壑窮探搜摩挲石屋背搖兀闌門舟
酒酣耳頰熱意氣蓋九州夜臥相蹋語狂笑雜嘲謳
但恐富貴逼肯懷貧賤憂人事信難料百戰竟不侯
我老農圃間君落天南阪相逢會稽市感歎歲月遒
君從上都來倘逢舊朋傳我窮本天命於人寧有求
但念侯君房不知尚癡不君聞拊手笑怪我狂未廖
共談平生舊只欲苦死留如何忽決去病瘧送無由
秋風墜桐葉新霜犯貂裘君聽馬蹄聲中有千里愁

送陳德邵宮教赴行在二十韻

相從何必早白頭或如新登門雖尚疎數面自成親
昨者始見公凜然鬚如銀敗席留黃茗寒廳無雜賓

平生事賢意寸心渴生塵樂哉得所從貧病忘吟呻
恭惟大雅姿信是邦國珍廣文舊官長二紀轉鴻鈞
恩仇快報復禍福出笑矍同舍事容悅腰佩玉麒麟
羣詠更得志後來如積薪於時公淡如位屈道則伸
法宮親決事收召極海濱人才方雜沓公仕益逡巡
欲以貴祝公公豈慕要津欲以窮託公公豈私賤貧
頗欲述古誼勸公勿愛身此又公所存豈待賤子陳
高飄泊江渚歲晚風雨頻願言添衣裘寒陰能薄人

朱子雲園中觀花

我鬢忽已白君顏非復朱花前一盃酒不樂復何如
莫看枝上花已覺不如早富貴當及時吾輩奈何老
我歌君起舞竟日爲君留安知花無情不解替人愁
長安二三月花滿上林中祝君早得意歸轡聽瓊瓏
酬妙湛閣梨見贈妙湛能棋其師璘公蓋嘗與

先君遊云

昔侍先君故里時僧中最喜老璘師高標無復鄉人
識妙寄惟應弟子知山店煎茶留小語寺橋看雨待
幽期可人不但詩超絕玉子紋枰又一奇

次韻魯山新居絕句

求得軒車心愧天不如窮死却陶然君曾布衣尚可
活那有日與須萬錢

又

短牆缺處插疎籬巷劣容車堂對陂天下有公殊可
賀坐中著我不妨奇

寄陳魯山陳時調官都下

諸公貴人識面稀胸中璀璨漫珠璣即今舉手遮西
日應有流塵化素衣舊學極知難少貶吾儕持此欲
安歸夜來風雨空堂靜忽憶燈前語入微

又

天下無虞國論深書生端合老山林平生力學所得
處政要如今不動心舊友幾年猶短褐謫官萬里少
來音願公思此寬羈旅靜勝炎曦豈易侵

戲題江心寺僧房壁

史君千騎駐霜天主簿孤舟冷不眠也與史君同快
意臥聽鼓角大江邊是夕新禾嘉守亦宿此寺

泛瑞安江風濤貼然

俯仰兩青空舟行明鏡中蓬萊定不遠正要一颿風
平陽驛舍梅花

江路輕陰未成雨梅花欲過半沾泥遠來不負東皇
意一絕清詩手自題

度浮橋至南臺

客中多病廢登臨聞說南臺試一尋九軌徐行怒濤
上千艘橫繫大江心寺樓鐘鼓催昏曉墟落雲煙自
古今白髮未除豪氣在醉吹橫笛坐榕陰

出縣

凶凶薄領不堪論出宿聊寬久客魂稻壠牛行泥活
活野塘橋壞雨昏昏權籬護藥纜通徑竹篔分泉自
遍村歸計未成留亦好愁腸不用遠吳門

還縣

霽色清和日已長綸巾蕭散意差強飛飛鷗鷺陂塘
綠鬱鬱桑麻風露香南陌東村初過社輕裝小隊似
還鄉哦詩忘却登車去枉是人言作吏忙

雨晴遊洞宮山天慶觀坐間復雨

近水松篁鎖翠微洞天宮殿對清暉快晴似爲醱醱
計急雨還妨燕子飛道士晝閑丹竈冷山童曉出藥
苗肥拂床不用勤留客我因文書自怕歸

寄陳魯山正字

平生交遊中陳子我所敬初猶似豪舉晚乃抱淵靜
獨觀心地初皎若虛室鏡人知自渠事道行君有命
青衫二十年老色上鬚鬢偶然預收召瘦馬趁朝請
退食輒杜門不省求捷徑似聞石渠書雖黃久未定
丁字猶恨曲朋字竟須正願君試思之魚魯何足訂

航海

我不如列子神遊御天風尚應似安石悠然雲海中

臥看十幅蒲鸞彎若張弓潮來湧銀山忽復磨青銅
飢鷗掠船杼大魚舞虛空流落何足道豪氣蕩肺腑
歌罷海動色詩成天改容行矣跨鵬背弭節蓬萊宮
海中醉題時雷雨初霽天水相接也

羈遊那復恨奇觀有南溟浪蹴半空白天浮無盡青
吐吞交日月瀆洞戰雷霆醉後吹橫笛魚龍亦出聽

溪行

篷翳鳴春雨帆蒲掛莫煙買魚尋近市覓火就隣船
愁臥醒還醉難行却復前長年殊可念力盡逆風牽

又

冒雨牽何急爭風力不餘逢人問虛市計日買薪蔬
煙寺高檐出山舍一老鋤枕書醒醉裏短髮不曾梳

自來福州詩酒殆廢北歸始稍稍復飲至永嘉
括蒼無日不醉詩亦屢作此事不可不記也

尊酒如江綠春愁抵草長但令閑一日便擬醉千場
柳弱風禁絮花殘雨漬香客遊還役役心賞竟茫茫

東陽道中

風軟烏帽送輕寒雨點春衫作碎斑小吏知人當著
句先安筆硯對溪山

東陽觀醮醮

福州正月把離杯已見醮醮壓架開吳地春寒花漸
晚北歸一路摘香來

送李德遠寺丞奉祠歸臨川

送騎擁東城煙帆如鳥輕道行端有命身隱更須名
盱食煩明主胡沙暗舊京臨分一襟淚不獨為交情

送王嘉叟編修出佐南昌

玉殿求衣早鸞臺退食遲君看多故日寧是葉言時
小作南州計方觀憲詔追歸來上霄漢莫遺此心移

送王龜齡著作赴會稽大宗丞

有越踰千載何人不宦遊向來惟一范真足壯吾州
高躅今誰繼先生獨再留登堂吊興廢想像氣橫秋

又

大將上兵符軍容備掃除恭惟陛下聖方采直臣書
忽報分司去還尋入幕初宗藩雖舊識莫遺得親疎

送杜起莘殿院出守遂寧

羽檄聯翩晝夜馳臣憂顧不在邊睡軍容地密寧當
議陛下思深不忍欺白簡萬言幾慟哭青編一傳可
前知平生所學今無負未數還鄉兩鬢絲

和曾待制遊兩山

翰林碑立崔嵬上待制詩題香竊聞人天八萬四千
塔便合推為第一山

右題育王山明月堂

疎鐘迎客到溪亭碧瓦朱欄相照明明想得松陰排萬
衲籃輿放處恰詩成

右題天童山宿鷲亭

攀石捫蘿到更幽玲瓏咫尺懶窮搜旁人不會當時
意為欠門生作伴遊

右題天童山更幽亭且以未到玲瓏為恨

小雨南山路今朝思出遊難從子規請寧遺竹雞憂
野店寒饒柿煙津晚喚喚舟歸來對燈火未恨溼衣裘

謝李平叔郎中問疾

吏部朝回早幽人病始蘇過門迂問訊軟枕聽傳呼
緣瘦重裁帽因衰學染鬚投詩發公笑試想此形模

聞武均州報已復西京

白髮將軍亦壯哉西京昨夜捷書來胡兒敢作千年
計天意寧知一日回列聖仁恩深雨露中興赦令疾

風雷懸知寒食朝陵使驛路梨花處處開

喜小兒輩到行在
阿綱學書蚓滿幅阿繪學語鸞轉木截竹作馬走不
休小車駕羊聲陸續書窗宛壁誰忍嗔嗔呼也復可
憐人却思胡馬飲江水敢道春風無戰塵傳聞賊棄
兩京走列城爭為朝廷守從今父子見太平花前飲
水勿飲酒

病起寄會原伯兄弟

意象殊非昨筋骸劣自持衰如霜後木愁抵盎中絲
風雲書來少江山夢到遲出門還惘惘倚杖獨移時
送湯岐公鎮會稽

吳越東西州浙江限其中黃旗高十丈大舟凌虛空
都人送留守郡吏迎相公江心波濤壯帳下鼓角雄
樂哉公何憾廷論則未同永懷前年秋羣胡方嘯兇
闕左發劔北戈船滿山東舊盟顧未解誰敢嬰其鋒
公時立殿上措置極雍容南荒竄驕將京口起元戎
舊勳與宿貴屏氣聽指蹤規模一朝定強虜終歸窮
當時謂易耳未見回天功及今始大服咨嗟到兒童
天心佑社稷主聖肖祖宗旌節早來朝笑談折還衝
周洪道學士許折贈館中海棠以詩督之
嬾嬾柔絲不自持更禁日炙與風吹仙家見慣渾閑
事乞與人間看一枝

送七兄赴揚州帥幕

初報邊烽照石頭旋聞胡馬集瓜州諸公誰聽芻蕘
策吾輩空懷吠敵憂急雪打窗心共碎危樓望遠涕
俱流豈知今日淮南路亂絮飛花送客舟
閏二月二十日遊西湖

西湖二月遊人稠鮮車快馬巷無留梨園樂工教坊
優絲竹悲激雜清謳追逐逐下上莫始休外雖狂醒樂
則不豈如吾曹淡相求酒肴取具非預謀青梅苦筍
助獻酬意象簡樸足鎮浮尚慚一官自拘囚未免足
馬從兩鬪南山老翁亦出遊百錢自挂竹杖頭
劉太守挽歌辭

又

羌胡志覆育師旅備非常南服更旄節中軍鑄印章
馳書諭燕趙開府冠侯王赫赫今何在門庭冷似霜
又
堅壁臨江日人疑制敵疎安知百萬虜銳盡浹旬餘
智出常情表功如定計初二何媚公者不置篋中書
過林黃中食柑子有感學宛陵先生體

博士得黃柑甚愛不忍擘持獻太夫人遠附海上船
故山饒氛霧可使酒盃窄豈無荔枝好饜飫恐不摘
相去三千里無異娛旁側乃知母子意更遠未嘗隔
我昨往見君從容弄書冊藥分臘劑香茶泛春芽白
主意顧未厭筐筥自搜索敢謂甘旨餘亦及此下客
霜包纔三四氣可壓千百重是慈孝物不敢吐其核
甘寒雖遠齒悲感已橫臆半生無歡娛初不為涇阮
玉牒所迎駕望見周洪道舍人

送梁諫議

自卜河橋宅清談喜屢陪今年見騰踔不恨老氣埃
曉放宮門鑰霜彫影輦路槐班回獨小立為待繡鞍來
湖海還朝白髮生懶隨年少事聲名極知憂國人誰
及細看無心語自平歸訪鄉人志位重乍辭言責覺
身輕籃輿避暑雲門寺應過幽居聽水聲游有菴居在
雲門流泉遠屋諫議舊所愛賞

戲

以石芥送劉韶美禮部劉比釀酒勁甚因以為
古人重改陽城驛吾輩欣聞石芥名風味可人終骨
鯁尊前真見魯諸生

長安官酒甜如蜜風月雖佳懶舉觴持送盤蔬還會
否與公新釀鬪端方

出都

重入修門甫歲餘又攜琴劍返江湖乾坤浩浩何由
報犬馬區區正自愚緣熟且為蓮社客伴來喜對艸
堂圖西廂屋了吾真足高枕看雲一事無

曾原伯屢勸居城中而僕方欲自梅山入雲門
今日病酒偶得長句奉寄

借得僧房似釣船兼旬散髮醉江天酒能作病真如
此窮乃工詩却未然閑似白鷗雖自許健如黃犢已
無緣秋高更欲移家去先葺雲門屋數椽
村居

富貴功名不擬論且浮舴艋寄煙村生憎快馬隨鞭
影寧作癡人記劍痕樵牧相詰欲爭席比鄰漸熟約
論婚晨春夜績吾家舊正要遺風付子孫

看山

小葺茆茨紫翠間今年偷得半年閑門前木落須霜
曉且看西南一角山

夏夜泛舟書所見

山房猶復畏炎蒸長掩柴門媿老僧兩槩去搖東浦
月一龕回望上方燈驚飛宿鳥時呼侶騰起長魚有
脫罾夜半歸來步松影真成赤脚踏層冰

秋陰

陂澤秋容淡郊原曉氣清雨來鳩有語社近燕無情
拄杖扶腰痛漁舟照眼明苦吟緣病輟隨意或詩成
盆池

門外江濤湧雪堆埋盆作沼亦何哉兒曹不解渠翁
意新脫風波嶮處來

比從人覓酒皆酸薄戲作此詩

酒盡聊憑折簡求不知人要博涼州牆隅棄置空二
數露下螢飛奈此秋

買魚

臥沙細肋何由得出水纖鱗却易求一夏與僧同粥
飯朝來破戒醉新秋

又

兩京春蔘論斤賣江上鱸魚不直錢斫膾搏齏香滿
屋兩窗喚起醉中眠

秋雨

漫道秋來雨那無一日晴只供高枕臥不放小窗明
書冊頻開闔山瓢任濁清長年詰世味不是故逃名

晨起偶題

城遠不聞長短更上方鐘鼓自分明幽居不負秋來
睡末路偏諳世上情大事豈堪重破壞窮人難與共
功名風爐歛鉢生涯在且試新寒芋糝羹

悲秋

煙艸淒迷八月秋荒村絡緯戒衣裘道人久欠修行
力平地閑生爾許愁

寄張真父舍人

諸公方袞袞無地著斯人萬里夔州守中朝禁省臣
孤帆秋上峽五馬曉班春想見懷明主登臨白髮新

又

天上紫微省鸞花繞直廬逢時身鼎貴憂國鬢先疎
顛顛元當棄牽聯也得書猶能下榻否擬卜漢西居
幽居

翳翳桑麻巷幽幽水竹居紉縫一獠婢樵汲兩蠻奴
兩挾清砧急籬懸野蔓枯鄰村有鬻子吾敢數空無

法寶璉師求竹軒詩

南軒竹色映谿光不減吾州五月涼猶恨秋來鷗鷺
少須君更爲築橫塘

欲遊五峯不果住小詩寄瑩老

東來恨不見湯休千首清詩儻許求要與茶山燈下
讀莫令侍者作蠅頭茶山老人謂曾待制

謝王彥光提刑見訪并送茶

通英帷幄舊儒臣肯顧荒山野水濱不怕客嘲輕薄
尹要令我識老成人飄回鼓轉東城莫酒冽橙香一
笑新遙想解醒須底物隆興第一壑源春

送查元章赴夔漕

柳色西門路看公上馬時亦知非久別不奈自成悲
白髮劉賓客青衫杜拾遺分留端有待刺賦竹枝詞
逍遙

道遙

臺省諸公日造朝放慵別駕媿道遙州如斗大真無
事日抵年長未易消午坐焚香常寂寂晨興署字亦
寥寥時平更喜戈船靜閑看城邊帶雨潮

病中簡仲彌性唐克明蘇訓直

移疾還家暫曲肱依然耐久北窗燈心如澤國春歸
雁身是雲堂日過僧細雨佩壺尋廢寺夕陽下馬弔

荒陵小留莫厭時，追逐勝社年來冷。欲冰三君皆有歸志，故云。

送王景文

張公遂如此海內，共悲辛逆虜猶遺種。皇天奪老臣，深知萬言策不愧。九原人君近書奏，策風雨津亭莫辭君淚滿巾。

送呂彥升參謀

楚塞蕭條久，宿師參謀承詔上。丹墀苦言到口真，當發聖度如天莫。自疑萬里寄聲長不達，一尊相屬豈前期。遙憐霜曉朝衣冷，深愧江城睡足時。

无咎郡齋燕集有詩末章見及敬次元韻

城樓畫角吹晚晴，梅花墮地艸欲生。綺盤翠杓春滿眼，我胡不樂君將行。君歸吾黨共增氣，往往怪我衰涕橫。我來江干交舊少，見君不啻河之清。北風共愛地爐暖，西日同賞油窗明。微吟劇醉不知倦，坐閱漢臘逾周正。君文雄麗擅一世，凜凜武庫藏五兵。酸寒如我每自笑，顧辱刻畫為虛聲。乃知好士如好色，遇合不必皆傾城。君方與世作水鏡，如此過許人將驚。千金敝帚有定價，周玉鄭鼠難強名。失言譏罰不可緩，敬白府主浮金觥。君看失脚踏落塵土，豈復毫髮餘詩情。自傷但似路旁埃，兩剝風摧供送迎。

次韻无咎別後見寄

平日盃行不解辭，長亭況是送君時。幾行零落僧窗字，何限流傳樂府詩。歸思恰如重醞酒，歡情略似欲殘棋。龍蛇飛動無由見，坐媿文園屬思遲。詩來彌月乃能和答，故云。

晚泊慈姥磯下二首

山斷峭崖立，江空翠靄生。漫多來往客，不盡古今情。月碎知流急，風高覺笛清。兒曹笑老子，不睡待潮平。

又

慈姥磯頭月，纖纖照酒盃。素秋風露重，久客鬢毛催。宿鳥驚還定，飛螢闔復開。平生四方志，老去轉悠哉。

七月十四夜觀月，不復微雲。洋太清浩然，風露欲三更。開簾一寄平生快，萬頃空江著月明。

夜宿陽山磯將曉大雨北風甚勁俄頃行三百

五更顛風吹急雨，倒海翻江洗殘暑。白浪如山發入船，家人驚怖篙師舞。此行十日苦滯留，我亦蘆叢厭鳴榔。書生快意輕性命，十丈蒲帆百夫舉。星馳電騫三百里，坡隴聯翩雜平楚。船頭風浪聲愈厲，助以長笛撼鼙鼓。豈惟澎湃震山嶽，直恐頰洞連后土。起看草木盡南靡，水鳥號鳴集洲渚。稽首龍公謝風伯，區區未禱煩神許。應知老去負壯心，戲遣窮途出豪語。

望江道中

吾道非邪來曠野，江濤如此去何之。起隨烏鵲初翻後，宿及牛羊欲下時。風力漸添帆力健，鶻聲常雜雁聲悲。晚來又入淮南路，紅樹青山合有詩。

秋夜讀書每以二鼓盡為節

腐儒碌碌數無奇，獨喜遺編不我欺。白髮無情侵老境，青燈有味似兒時。高梧策策傳寒意，壘鼓寥寥迫睡期。秋夜漸長飢作祟，一盃山藥進瓊糜。

懷作歌奉寄

巷南巷北秋月明，東家西家讀書聲。官閑出局各無事，冷落往往思同盟。出門相尋索一笑，亦或邂逅因俱行。黃中掀髯語激烈，韶美堅坐書縱橫。子充清言喜置酒，赤梨綠柿相扶檠。寒燈耿耿地爐暖，宮門風順聞疎更。故交一作霜葉散外物，已付秋毫輕兩窮。

相遺世果有我與鄰子俱南征豫章高安本一郡挂帆起柂無三程簿書袞袞不少借懷抱鬱鬱何由傾

明年君歸我亦去，早卜三畝開柴荆。軟紅舊路莫重躡，二升脫粟同煨燻。

明年君歸我亦去早卜三畝開柴荆軟紅舊路莫重躡二升脫粟同煨燻

明年君歸我亦去，早卜三畝開柴荆。軟紅舊路莫重躡，二升脫粟同煨燻。

明年君歸我亦去，早卜三畝開柴荆。軟紅舊路莫重躡，二升脫粟同煨燻。

寄答綿州楊齊伯左司

磊落人為磊落州，滕王閣望越王樓。欲憑夢去直虛語，積有詩來寬旅愁。我老一官書紙尾，君行千騎試遨頭。遙知小寄平生快，春酒如川炙萬牛。

送全州趙都曹

霜葉無停聲，脂車有行色。正悲南浦秋，又送清湘客。啼飢兒頰紅，待養親髮白。努力事上官，世路日已迫。病中作。

豫章顛大江，氣候頗不令。孟冬風薄人，十室八九病。外寒客肺胃，下溼攻脚脛。俗巫醫不藝，嗚呼安託命。我始屏藥囊，治疾以清靜。幻妄消六塵，虛白全一性。三日體遂輕，成此不戰勝。長年更事多，苦語君試聽。夜夢從數客，雨中載酒出遊山。川城闕極雄麗，云長安也。因與客馬上分韻作詩得遊字。

有酒不謀州，能詩自勝侯。但須繩繫日，安用地埋憂。射雉侵星出，看花秉燭遊。殘春杜陵雨，不恨溼貂裘。去年余佐京口，遇王嘉叟從張魏公督師過焉。魏公道免相，嘉叟亦出守蒲陽。近辱書報魏公已葬衡山，感歎不已。因用所遺柱頰亭詩韻奉寄。

河亭挈手共徘徊，萬事寧非有數哉。黃閣相君三黜去，青雲學士一麾來。中原故老知誰在，南嶽新丘共此哀。火冷夜窗聽急雪，相思時取近書開。

自詠示客

衰髮蕭蕭老郡丞，洪州又看上元燈。羞將枉直分尋尺，寧走東西就斗升。吏進飽諸籍，紙尾客來苦勸撲。淋稜歸裝漸理君，知否笑指廬山古澗藤。廬山僧近寄藤杖甚奇。

醉中歌

吾少貧賤真臞儒，食嗜味老不除折腰斂版日。走趨歸來聊以醉，自娛長餅巨榼羅盃孟。不須漁翁勸三閭，牛尾膏美如凝酥。貓頭輪困欲專車，黃雀萬里。

行頭顛白鵝作鮓，天下無潯陽糖蟹徑尺餘。吾州之蔞尤嘉蔬珍盤，鉅釘百味俱不但。項鬪與腹腴，悠然一飽自笑愚。願為口腹勞形軀，投効行矣歸園廬。莫厭糲飯嘗黃菹。

寄陶茂安監丞

永州太守鬢毛殘，鬢猶能起據鞍。徵士雖思賦松菊，隱居未可挂衣冠。功名夢境元非實，歌舞山城且自寬。也勝鐘陵窮別駕，閉門無客遣憂端。

燒香

茹芝却粒世無方，隨食江湖每自傷。千里一身鳧泛，泛十年萬事海茫茫。春來鄉夢憑誰說，歸去君恩未敢忘。一寸丹心幸無愧，庭空月白夜燒香。

寒食臨川道中

百卉千花了，不存墮溪飛絮。看無痕家人自作清明節，老子來穿綠暗村。日落啼鴉隨野祭，雨餘荒蔓上顏垣。道邊醉飽休相避，作吏堪羞甚乞墦。

上巳臨川道中

二月六夜春水生，陸子初有臨川行。溪深橋斷不得渡，城近臥聞吹角聲。三月三日天氣新，臨川道中愁殺人。纖纖女手桑葉綠，漠漠客舍桐花春。平生怕路如怕虎，幽居不省遊城府。鶴軀苦瘦坐長飢，龜息無聲惟默數。如今自憐還自笑，斂版低心事年少。儒冠未恨終自誤，刀筆最驚非素料。五更欹枕一悽然，夢裏扁舟水接天。紅蕖綠芰梅山下，白塔朱樓禹廟邊。

寄別李德遠

蕭蕭風雨臨川驛，邂逅連床若有期。自起挑燈貪夜話，疾呼索飯療朝飢。皆記前日相從時事，即今明月共千里。已占深林巢一枝，惜別自嫌兒女態。夢騎羸馬度芳陂，德遠所居名稅渡。

又

李侯不恨世賣友，陸子那須錢買山。出牧君當千里去，歸耕我判一生閑。中原亂後儒風替，黨禁興來士

氣屨復古主盟頽老手勉追慶曆數公間
初夏道中

桑間甚熟麥齊腰鶯語惺惚野雉驕日薄人家晒鷺
子雨餘山客買魚苗豐年隨處俱堪樂行路終然不
自聊獨喜此身強健在又搖團扇著綈蕉

示兒子

父子扶攜返故鄉欣然擊壤詠陶唐墓前自誓寧非
隘澤畔行吟未免狂雨潤北窗看洗竹霜清南陌課
剝桑秋毫何者非君賜回首修門敢遽忘

重五同尹少稷觀江中競渡

楚人遺俗閱千年簫鼓喧呼鬪畫船風浪如山蛟鱉
橫何心此地更爭先

過玉山辱芮國器檢詳留語甚勤因寄此詩兼
呈韓无咎右司

遼東歸老白襦帚名字何堪遣世間便謂與公長契
闊不知留語故慙慙詩章有便猶應寄稜米無多切
莫分舊見檢詳律甚障故有此戲倘見右司煩說似每因
風月愴離羣

隨意

隨意上漁舟幽尋不預謀清溪欣始泛野寺憶前遊
豐歲雞豚賤霜天柿栗稠餘生知有幾且置萬端憂

寄龔實之正言

臺省諸公歲歲新平生敬慕獨斯人山林不恨音塵
遠夢寐時容笑語親學道皮膚雖脫落憂時肝膽尚
輪囷至和嘉祐須公了乞向升平作幸民

遊山西村

莫笑農家臘酒渾豐年留客足雞豚山重水複疑無
路柳暗花明又一村簫鼓追隨春社近衣冠簡朴古
風存從今若許閑乘月拄杖無時夜叩門

觀村童戲溪上

雨餘溪水掠堤平閑看村童戲晚晴竹馬踉蹌衝岸
去紙鳶跋尾挾風鳴三冬暫就儒生學村人惟冬三月

遭兒童入小學千耦還從父老耕識字粗堪供賦役不
須辛苦慕公卿

雨霽出遊書事

十日苦雨一日晴拂拭拄杖西村行清溝冷泠流水
細好風習習吹衣輕四鄰蛙聲已閣閣兩岸柳色爭
青青辛夷先開半委地海棠獨立方傾城春工遇物
初不擇亦秀燕麥開蕪菁菁花如雪又爛熳百草紅
紫那知名小魚誰取置道側細柳穿頰危將烹欣然
買放寄吾吾意草萊無地蘇疲氓

殘春

殘春醉著釣魚菴花雨娛人落半巖豈是天公無皂
白獨悲世俗異酸鹹妄身似夢行當覺談口如狂未
易緘已作沉舟君勿數年來何止闕千帆

家園小酌

旋作園廬指顧成柳陰已復著啼鶯百年更把幾盃
酒一月元無三日晴鷗鷺向人殊耐久山林與世本
無營小詩漫付兒曹誦不用韓公說有聲

又

滿林春筍生無數竟日鷗鷺來百回衣上塵埃真一
洗酒邊懷抱得頻開池魚住者憂奇禍社稷終然幸
散材世事紛紛心本懶閉門豈獨畏嫌猜

寄王嘉叟吏部

宿負煩公議隆寬荷聖時江湖真送老藥餌且扶衰
撫事驚年住懷人有夢知敢嗟貧到骨飲水誦君詩

嘉叟有漁隱堂詩
夜讀隱書有感

平生志慕白雲鄉俯仰人間每自傷倦鶴摧頽寧望
料寒龜蹙縮且支牀力探鴻寶尋奇訣剩采青精試
祕方常鄙臞仙老山澤要令仰首看飛翔

上虞逆旅見舊題歲月感懷

昨猛爲家東復西今朝破曉下前溪青山缺處日初
上孤店開時鷺亂啼倦枕不成千里夢壞牆閑覓十

年題漆園傲吏猶非達物我區區豈足齊

舜廟懷古

雲斷蒼梧竟不歸江邊古廟鎖朱扉山川不為興亡
改風月應憐感慨非孤枕有時驚喚夢斜風無賴客
添衣千年回首消磨盡輪與漁舟送落暉

題十八學士圖

隋日昏隴東南傾雷塘風吹草木腥平時但忌黑色
兒不知乃有虬鬚生晉陽龍飛雲滄滄關洛萬里即
日平東征歸來脫金甲天策開府延豪英琴書閑暇
永清畫簷履光彩明華星高參伊呂列佐命下者才
氣猶崢嶸但餘一恨到千載高陽繆公來竄名老奸
得志國幾喪李氏誅徒連孤嬰向令亟念履霜戒危
亂安得存勾萌衆賢一佞禍尚爾掩卷涕淚臨風橫
統分稻晚歸

出裹一簞飯歸收百把禾勤勞解堪忍餘暇更吟哦
歲惡增吾困家貧積汝多村醪莫辭醉羹芋學岷峩
是日作芋羹

又

薄酒不自酌夕陽須汝歸橘包霜後美豆莢雨中肥
路遠應加飯天寒莫減衣老懷憂自切道眼看皆非

衰病

衰病不須出閉門煙雨中葦花添絮暖葑火試爐紅
湖村采老葑作火甚妙仕宦燈檠夢功名馬耳風山翁但
更事人看作神通

又

病除猶老健雨止得冬晴覓句嗟心在鈔書試眼明
朝寒添布褐晚步出柴荆外慕終無益兒曹且力耕
霜風

十月霜風吼屋邊布裘未辦一絳綿豈惟飢索隣僧
米真是寒無坐客甦身老慵歌悲永夜家貧撐柱過

凶年丈夫經此寧非福破涕燈前一粲然

小酌

榮箸貧猶設杯孟老更耽宗文樹雞柵靈照挈蔬籃
徑醉眼花亂高眠鼻息酣覺來寒日晚落葉擁茆菴

十月苦蠅

村北村南打稻忙浮雲吹盡見朝陽不宜便作晴明
看撲面飛蠅未退藏

又

十月江南未擁爐癩蠅擾擾莫嫌渠細看豈是堅牢
物付與清霜為掃除

了頭巖見周洪道以進士入都日題字

烏巾白紵蹋京塵瑤樹瓊林照路人西省歸來名蓋
代兩行墨色尚如新

獨學

師支影零身白首杜門獨學就誰評秋風棄扇知安
命小姓留燈悟養生睡息無聲酣午枕舌根忘味笑

晨烹少年妄起功名念豈信身閑心太平黃庭經閑暇
無事心太平

霜月

枯草霜花白寒窗月影新驚鴉時繞樹吠犬遠隨人
出仕讓銷骨歸耕病滿身世間輪壞衲切莫勸冠巾

寄黃龍升老

讀書萬卷裂儒衣黃金可成棄不為快哉天馬不可
羈開口便呼臨濟兒諸方蹴踖莫支持吾州一老偶

得之升嗣佛魯裕公閉門夜付僧伽黎明日聲價羽檄
馳弟子不必不如師黃龍所立尤瑰奇空山鬼火號

狐狸築屋千礎食萬縑癡人不解公遊嬉嫉怒欲碎
門前碑世衰道喪士自欺山林亦復踐駭機長謠寄

公公試思吾輩救此當何施

贈進賢劉令

簿領塵埃裏超然見鳳麟性疎志願忌學大有經綸
正論雖頻接高標豈易親向來相識晚吾黨欠斯人

書室名可齋或問其義作此告之

得福常廉禍自輕坦然無媿亦無驚平生秘訣今相

付只向君心可處行

寄謝楊齊伯少卿

楊卿人材金百鍊坡公座上初識面十年萬事不須
說猶喜歸來且強健題詩想見初削瓜寄到茆堂已
歸燕辭嚴意密敢輕讀呼兒炷燈重把卷卽今相望
幾千里何日蟬聯語忘倦就令有使卽寄書豈如無
事長相見

劍南詩稿卷第一終

劍南詩稿目錄

卷第一

自笑 夜聞松聲有感 十二月一日二首
 春日二首 僧房假榻 聞雨 休日有感
 題徐子禮宗丞自覺齋 送張叔潛編修造朝
 四首 有感 潤松 將赴官夔府書懷 送
 芮國器司業二首 春陰 投梁參政 宿楓
 橋 晚泊 金山觀日出 吊李翰林墓 兩
 中泊趙屯有感 黃州 武昌感事 夜思
 哀郢二首 江陵道中作 石首懸雨中繫舟
 戲作短歌 初寒 醉歌 秋風 塔子磯
 重陽 早寒 公安 沙頭 大寒出江陵西
 門 江夏與章冠之遇別後寄贈 題江陵村
 店壁 馬上 水亭有懷 移船 將離江陵
 六言 江上 旅食 滄難 松滋小酌
 晚泊松滋渡口二首 荆門冬夜 繫舟下牢
 溪游三游洞二十八韻 三游洞前巖下小潭
 水甚奇取以煎茶 扇子峽山腹有草閣小亭
 極幽邃意其非俗人居也 蝦蟆碚 黃牛峽
 廟 過夷陵適值祈雪與葉使君清飲談括蒼
 舊游既行舟中雪作戲成長句奉寄 泊虎頭
 灘下 過東瀟灘入馬肝峽 新安驛 秭歸
 醉中懷都下諸公示坐客 憩歸州光孝寺寺
 後有楚冢近歲或發之得寶玉劍佩之類 飲
 罷寺門獨立有感 泛溪松至巴東 巴東過
 小雨二首 秋風亭拜寇萊公遺像二首 巴
 東令麻白雲亭 謁巫山廟兩廡碑版甚衆皆
 言神佐禹開峽之功而詆宋玉高唐賦之妄予
 亦賦詩一首 聞猿 瞿唐行 入瞿唐登白
 帝廟 登江樓 雪中臥病在告戲作 雪晴
 玉笈齋書事二首 記夢 瀟西 山寺
 躡磧 寒食 晚晴書事呈同舍 鄉中每以

寒食立夏之間省墳客夔適逢此時懷然感懷
 二首 試院春晚 倚闌 自詠 午興 風
 雨中望峽口諸山奇甚戲作短歌 夜坐庭中
 新蔬 初夏懷故山 初夏新晴 定拆號
 日喜而有作 睡起 四月二十九日作 苦
 熱 拆號前一日作 暴雨 西齋雨後 急
 雨 晚晴聞角有感 夏夜起坐南亭達曉不
 復寐 夜登白帝城樓懷少陵先生 假日書
 事 林亭書事二首 遊臥龍寺 久病灼艾
 後獨臥有感 秋晚病起 秋思 一病四十
 日天氣遂寒感懷有賦 登城 夔州重陽
 追懷曾文清公呈趙教授趙近嘗示詩 謝張
 廷老司理錄示山居詩二首 秋晴欲出城以
 事不果 南窗 遺興 九月三十日登城門
 東望悽然有感 初冬野興 東屯呈同遊諸
 公 別王伯高 書驛壁二首 醉中到白崖
 而歸 十二月十九日晚巫山送客歸回望西
 寺小閣縹緲可愛遂與趙郭二教授同遊抵夜
 乃還楚鄉偶得長句呈二君

劍南詩稿卷第二

宋陸游務觀

自笑

自笑平生醉後狂，千鍾使氣少年場。那知病葉先摧落，却羨寒龜巧縮藏。藥物及時希老健，山家隨日了窮忙。凶年坐待新春麥，莫厭清吟雪夜長。

夜聞松聲有感

清晨放船落星石，大風吹颿如箭激。回頭已失廬山雲，却上吳城觀落日。夜深龍歸擘祠門，入木數寸留爪痕。明朝就視心尚慄，腥風卷地雷霆奔。歸船買酒持自慰，性命平生驚屢戲。固知神怒有定時，波紋蹙作魚鱗細。如今衰病臥林垌，霜覆茆蒼月滿庭。松聲驚破三更夢，猶作當時風浪聽。余丙戌七月自京口移官豫章，冒風濤自星子解舟，不半日至吳城山小龍廟。

十二月一日

病愈都忘老晴和，已似春畦蔬青長。甲塘水綠生鱗酒，盤論交密丹爐作夢新。窮居那敢恨，幸遠庚公廬。又

春日

東風吹斗柄，暖律變嚴凝。草色迷殘燒，溪流帶斷冰。兒書春日勝，女翦上元燈。莫笑蒲龕睡，山翁怯歲增。

又

老夫一臥三山下，兩見城門送土牛。貧舍春盤還草草，莫年心事轉悠悠。湖光漲綠分煙浦，柳色搖金暎市樓。藥餌及時身尚健，無風無雨且閑遊。

僧房假榻

久拋朝幘懶重彈，華髮蕭然二寸冠。不恨淒涼侵晚境，猶能語笑向春盤。銀盃酒色家家綠，筍笠煙波處處寬。一片梅花無復在，却嫌新淺換餘寒。

願更結來生熟睡緣，吞啄漸稀如老鶴。鳴聲已斷似寒蟬，旁觀莫苦嘲癡鈍。此妙吾宗祕不傳。

聞雨

慷慨心猶壯，踈跔鬢已秋。百年殊鼎鼎，萬事祇悠悠。不悟魚千里，終歸貉一丘。夜闌聞急雨，起坐涕交流。休日有感

又

少年從宦地，休日喜無涯。坐上強留客，街頭旋買花。開軒催汛掃，脫帽共誼譁。村巷朋遊絕，逢春祇自嗟。

題徐子禮宗丞自覺齋

未俗紛紛只自謾，惟公肯向靜中觀。閒看此事從何得，正自它人著力難。茶熟松風生石鼎，香殘雲縷遶蒲團。江湖多少癡禪衲，蹋破青鞵覓話端。

送張叔潛編修造朝

此士名高北斗南，眼中獨許我同參。窗窗却作臨分恨，一月何曾笑二三。

又

簡牘清閑勝校讎，題詩應肯寄夔州。東廚羊美聊堪飽，北面鈴稀莫強愁。東廚密院廚也，烹羊最珍。北面房行邊事，每聞鈴聲馳至，則知有警。

又

北窗銅碾破雲腴，捫腹脩然一事無。安用雁行排院吏，正須魚貫看胡奴。院吏視屬官，倨甚每軍中。解降胡至密院，屬官先見之。

又

芒屨年來漸懶穿，閉門日日只高眠。今朝出送張夫子，借得南隣放鴨船。

有感

雲睡重重不易尋，庖廚性命走山林。但令有月同幽夢，更用何人識苦心。流輩漸稀知死近，鬢毛無色覺愁侵。平生自許忘情者，頗怪燈前感慨深。

澗松

藥出山來為小草，檝成樹後困長藤。澗松鬱鬱何勞

數却是人間奈廢興

將赴官夔府書懷

病夫喜山澤抗志自年少有時緣龜飢妄出巧鶴料亦嘗廟朝紳退懦每自笑正如怯酒人雖愛不敢醜一從南昌免五歲嗟不調朝廷每哀矜幙府誤辟召終然飲孤迹萬里遊絕徼民風雜莫徭封域近無詔淒涼黃魔宮峭絕白帝廟又嘗聞此邦野陋可嘲諷通衢舞竹枝誰門對山燒浮生一夢耳何者可慶吊但愁纒纒把鏡羞自照 夔民多瘵無者十對一二耳

送芮國器司業

此心知我豈非天雙鬢皤然氣浩然曾見灰寒百僚底真能山立萬夫前洛城霜重聽宮漏雪水雲深著釣船拈起吾宗安樂法人生何處不隨緣

又

往歲淮邊虜未歸諸生合疏論危機人材衰靡方當慮士氣蟬噪未可非萬事不如公論久諸賢莫與衆心違還朝此段宜先及豈獨遺經賴發揮

春陰

春風浩蕩作春陰弱燕歸來不自禁白塔昏昏纔半露青山淡淡欲平沉衰茸細雨初驚溼屐齒新泥忽已深直怕樓高生客恨不因病起倦登臨

投梁參政

浮生無根株志士惜淚死雞鳴何預人推枕中夕起游也本無奇腰折百僚底流離鬢成絲悲咤淚如洗殘年走巴峽辛苦為斗米遠衝三伏熱前指九月水回首長安城未忍便萬里袖詩叩東府再拜求望履平生實易足名幸汚黃紙但憂死無聞功不挂青史頗聞匈奴亂天意矜她豕何時嫖姚師大刷渭橋恥士各奮所長儒生未宜鄙覆甑草軍書不畏寒墮指宿楓橋

七年不到楓橋寺客枕依然半夜鐘風月未須輕感慨巴山此去尚千重

晚泊

半世無歸似轉蓬今年作夢到巴東身遊萬死一生地路入千峯百嶂中鄰舫有時來乞火叢祠無處不祈風晚潮又泊淮南岸落日啼鴉戍堞空

金山觀日出

繫船浮玉山清晨得奇觀日輪擘水出始覺江面寬遙波蹙紅鱗翠靄開金盤光彩射樓塔丹碧浮雲端詩人窘筆力但詠秋月寒何當羅浮望湧海夜未闌

吊李翰林墓

飲似長鯨快吸川思如渴驥勇奔泉客從縣令初何有醉忤將軍亦偶然駿馬名姬如昨日斷碑喬木不知年浮生今古同歸此回首桓公亦故阡 桓温冢亦在當塗

雨中泊趙屯有感

歸燕羈鴻共斷魂荻花楓葉泊孤村風吹暗浪重添曉雨送新寒半掩門魚市人煙橫慘淡龍祠蕭鼓鬧黃昏此身且健無餘恨行路雖難莫更論

黃州

局促常悲類楚囚遷流還數學齊優江聲不盡英雄恨天意無私草木秋萬里羈愁添白髮一帆寒日過黃州君看赤壁終陳迹生子何須似仲謀

武昌感事

百萬呼盧事已空新寒擁褐一衰翁但悲鬢色成枯艸不恨生涯似斷蓬煙雨淒迷雲夢澤山川蕭瑟武昌宮西遊處處堪流涕撫枕悲歌興未窮

夜思

露泣啼螢草潮生宿雁汀經年寄孤舫終夜託丘亭楚澤無窮白巴山何處青四方男子事不敢恨飄零

哀郢

遠接商周祚最長北盟齊晉勢爭強章華歌舞終蕭瑟雲夢風煙舊莽蒼草合故宮惟雁起盜穿荒冢有狐藏離騷未盡靈均恨志士千秋淚滿裳

又

荆州十月早梅春，徂歲真同下阪輪。天地何心窮壯士，江湖從古著羈臣。淋漓痛飲長亭暮，慷慨悲歌白髮新。欲吊章華無處問，廢城霜露溼荆榛。

江陵道中作

山川雜吳楚，氣候接秋冬。水落魚可拾，霜清裘欲重。鄉遙歸夢短，酒薄客愁濃。白帝何時到，高吟醉臥龍。

石首縣雨中繫舟戲作短歌

庚寅去吳西適楚，秋晚孤舟泊江渚。荒林月黑虎欲行，古道人稀鬼相語。鬼語亦如人語悲，楚國繁華非昔時。章華臺前小家住，茆屋雨漏秋風吹。悲哉秦人真虎狼，欺侮六國囚侯王。亦知興廢古來有，但恨不見秦先亡。開窗酌汝一盃酒，等爲亡國秦更醜。驪山冢破已千年，至今過者無傷憐。

初寒

船尾寒風不滿旗，江邊叢祠常掩扉。行人畏虎少晨起，舟子捕魚多夜歸。茆葉翻翻帶宿雨，葦花漠漠弄斜暉。傷心到處聞砧杵，九月今年未授衣。

醉歌

老夫檣竿插蒼石，水落岸沙痕數尺。江南秋盡未搖落，樹葉離離離楓葉。赤楚人自古多悲傷，道傍行歌猶感激。野花碧紫亦滿把，澗果青紅正堪摘。客中得酒薄亦好，江頭爛醉真不惜。千古興亡在目前，鬱鬱關河含恨色。飢鳴垂翅掠舟過，此意與我同悽惻。三撫關干恨未平，月明正照鵝鳥曠。

秋風

秋風吹客檣，節物數還方。歲事忽云莫，吾行殊未央。霜清漢水綠，日落楚山蒼。此去三巴路，無猿亦斷腸。

塔子磯

塔子磯前艇子橫，一窗秋月爲誰明。青山不減年年恨，白髮無端日日生。七澤蒼茫非故國，九歌哀怨有遺聲。古來撥亂非無策，夜半潮平意未平。

重陽

照江丹葉一林霜，折得黃花更斷腸。商略此時須痛飲，細腰宮畔過重陽。

早寒

沔鄂猶殘暑，荆巫已早寒。潦收灘正白，霜重葉初丹。節物元非惡，情懷自鮮歡。莫年更世事，唯有醉江干。

公安

地曠江天接，沙隕市井移。避風留半日，買米待多時。蝶冷停菰葉，鷗馴傍蘆枝。昔人勸業地，搔首數吾衰。

沙頭

游子行愈遠，沙頭逢莫秋。孫劉鼎足地，荆益犬牙州。鼓角風雲慘，江湖日夜浮。此生應袞袞，高枕看東流。

大寒出江陵西門

平明羸馬出西門，淡日寒雲久吐吞。醉面衝風驚易醒，重裘藏手取微溫。紛紛狐兔投深莽，點點牛羊散遠村。不爲山川多感慨，歲窮遊子自消魂。

江夏與章冠之遇別後寄贈

騎鶴仙人不可呼，一樽猶得與君俱。未應湖海無豪士，長恨乾坤有腐儒。壯歲光陰隨手過，晚途衰病要人扶。淒涼江夏秋風裏，况見新豐舊酒徒。

題江陵村店壁

青旂三冢市，黃茆十里岡。蓬飛風浩浩，塵起日茫茫。馳騁多從獸，鋟耨少破荒。行人相指似，此路走襄陽。

馬上

燈前薄飢陳鹽齏，帶睡強出行江隄。五更落月移樹影，十月清霜侵馬蹄。荒陂噉噉已度雁，小市嗷嗷初鳴雞。可憐萬里覓歸夢，未到故山先自迷。

水亭有懷

漁村把酒對丹楓，水驛憑軒送去鴻。道路半年行不到，江山萬里看無窮。故人草詔九天老，子題詩三峽中。笑謂毛錐可無恨，書生處處與卿同。

移船

沙際舟銜尾相依作四鄰莫年多感慨分路亦酸辛
折竹占行日吹簫賽水神無勞問亭驛久客自知津

將離江陵

莫莫過渡頭日且走隄上舟人與關吏見熟識顏狀
癡頑久不去常恐遭誚讓昨日倒檣干今日聯百丈
買薪備雨雪儲米滿瓶益明當遂去此障袂先側望
卽今孟冬月波濤幸非壯潦收出奇石霧卷見壘嶂
地嶮多崎嶇峽束少平曠從來樂山水臨老愈跌宕
皇天憐其狂擇地令自放山花白似雪江水綠於醴
竹枝本楚些妙句寄悽愴何當出清詩千古續遺唱
六言

三巴亦有何好萬里翩然獨尋本意為君說破消磨
夢境光陰

江上

江上霜寒透客衣閉窗羸臥不支持羈孤形影真相
弔衰颯頭顱已可知潦縮穩經行兩峽竹疎賸見挂
猿枝清樽可置須勤醉莫望功名老大時

旅食

霜餘漢水淺野迥朔風寒炊黍香浮甑烹蔬綠映盤
心安失粗糲味笑出難難惟恨虛捐日無書得縱觀
滄灘

百夫正誰助鳴鑼舟中對面不得語須臾人散寂無
譁惟聞百丈轉兩車嘔嘔啞啞車轉急舟人已在沙
際立霧斂蘆村落照紅雨餘漁舍炊煙溼故鄉回首
已千山上峽初經第一灘少年亦慕宦遊樂投老方
知行路難

松滋小酌

西遊六千里此地最凄涼騷客久埋骨巴歌猶斷腸
風聲撼雲夢雪意接瀟湘萬古茫茫恨悠悠然付一觴

晚泊松滋渡口

此行何處不難難寸寸強弓且旋彎懸近歡欣初得

萊江回徙倚忽逢山繫船日落松滋渡跋馬雲埋灑
頽關未滿百年均是客不須數日待東還

又

小難拍拍鷗鷺飛深竹蕭蕭杜宇悲看鏡不堪衰病
後繫船最好夕陽時生涯落魄惟耽酒客路蒼茫自
詠詩莫問長安在何許亂山孤店是松滋

荆門冬夜

常飢龜老欲無腸臥聽寒更自短長香碗得閑聊作
伴酒盃因病頗相忘有情窗罅恰通月耐冷鵝枝多
得霜歷盡風波知險阻平生錯羨捕魚郎

繫舟下牢溪游三游洞二十八韻

舊觀三峽圖常謂非人情意疑天壤間豈有此崢嶸
畫師定戲耳聊欲窮丹青西游過沔鄂莽莽千里平
昨日到峽州所見始可驚乃知畫非妄却恨筆未精
及茲下牢戍峯嶂畢自呈下入裂坤軸高騫插青冥
角勝多列峙擅美有孤撐或如釜上甑或如坐後屏
或如倨而立或如喜而迎或深如螺房或疎如窗櫺
峨巍冠冕古婀娜髻鬟傾其間絕出者虎搏蛟龍搏
崩崖凜欲墮脩梁架空橫懸瀑瀉無底終古何時盈
幽泉莫知處但聞珞珞鳴怪怪與奇奇萬狀不可名
久聞三游洞疾走忘病嬰寶穴初漆黑偃僕捫壁行
方虞觸蟄蛇類見一點明扶接困僮奴恍然出瓶罌
穹穹廈屋寬滴乳成微泓題名歐與黃雲蒸蒼蘚平
穿林走驚鷹拂面逢飛鷗息倦盤石上拾樵置茶鐺
長嘯答谷響清吟和松聲辭卑不堪刻猶足寄友生
三游洞前巖下小潭水甚奇取以煎茶

二游洞前巖下小潭水甚奇取以煎茶

苔徑芒屨滑不妨潭邊聊得據胡床巖空倒看峯巒
影彌遠中含藥草香汲取滿瓶牛乳白分流觸石珮
聲長囊中日鑄傳天下不是名泉不合嘗

居也

絕境慰人心誰家住玉岑亂雲生翠竇密雪灑青林

高閣臨空豁孤亭隱邃深定知非俗士驕急不容尋
蝦蟆碚

不肯肥沙桂樹邊朵頤千古向巖前巴東峽裏最初
峽天下泉中第四泉蓄雪飲冰疑換骨掬珠弄玉可
忘年清游自笑何曾足疊鼓擊擊又解帆

黃牛峽廟

三峽東江流崖谷互吐納黃牛不負重雲表恣蹴躡
吳船與蜀舸有請神必答誰憐馬遭刑百歲創未合
施師浪奔奔走烹堯陳酒榼紛然餒神餘羹餉爭嘖嘖
空庭多落葉日莫聲颯颯奇文粲可辨高古篆籀雜
村女賣秋茶簪花髻髮匝襁兒著背上帖妥若在榻
山寒雪欲下虎出門早闔我行忽至此臨風久嗚咤
過夷陵適值祈雪與葉使君清飲談括蒼舊游
既行舟中雪作戲成長句奉寄

巴楚夷陵酒最醇使君風味更清真少年恨不從豪
飲薄宦那知託近隣本擬笙歌娛病客却催兩雪惱
行人朝來凍手題詩寄莫笑欹斜字不勻

泊虎頭灘下

大舟已泊燈火明小舟猶行聞騰聲虎頭崖鬼鹿角
橫人生實難君勿輕

過東瀟灘入馬肝峽

書生就食等奔逃道路崎嶇信所遭船上急難如退
鷄人緣絕壁似飛孫口誇遠嶺青千疊心憶平波綠
一篙猶勝溪丁絕輕死無時來往駕扁舸峽中小船謂
之舸槽

新安驛

孤驛荒山與虎鄰更堪風雪暗南津羈遊如此真無
策獨立悽然默愴神木盍汲江人起早銀釵簇髻女
妝新蠻風弊惡蛟龍橫未敢全誇見在身
秭歸醉中懷都下諸公示坐客

長謠爲子說天涯四座聽歌且勿譁蠻俗殺人供鬼
祭敗舟觸石委江沙此身長是滄浪客何日能爲鮑

暖家坐憶故人空有夢尺書不敢到京華
憩歸州光孝寺寺後有楚冢近歲或發之得寶

玉劍佩之類

秭歸城畔鷓鴣斜陽古寺無僧晝閉房殘珮斷劍陵公
變苦茆架竹井閭荒虎虎行欲與人爭路猿嘯能令客
斷腸寂寞倚樓搔短髮剩題新恨付巴娘

飲罷寺門獨立有感

一邑無平土邦人例得窮淒涼遠嫁婦顛顛獨醒翁
今古闌干外悲歡酒醞中三巴不搖落搔首對丹楓
州有屈大夫及明妃祠

泛溪船至巴東

溪舫莫嫌迮船迮始相宜兩槳行何駛重難過不知
荒村遇相縣破屋屈平祠不奈新愁得啼淚挂冷枝
巴東遇小雨

暫借清溪伴釣翁沙邊微雨溼孤篷從今詩在巴東
縣不屬灞橋風雪中

又

西遊萬里亦何爲欲就騷人乞棄遺到此宛然詩不
進始知才分有窮時
秋風亭拜寇萊公遺像

江上秋風宋玉悲長官手自葺茅茨人生窮達誰能
料蠟淚成堆又一時

又

豪傑何心後世名材高遇事卽崢嶸巴東詩句澶州
策信手拈來盡可驚
巴東令解白雲亭

寇公壯歲落巴蠻得意孤亭縹緲間常倚曲闌貪看
水不安四壁怕遮山遺民雖盡猶能說老令初來亦
愛閑正使官清貧至骨未妨留客聽潺湲
謁巫山廟兩廡碑版甚衆皆言神佐禹開峽之

功而詆宋玉高唐賦之妄予亦賦詩一首
真人翳鳳駕蛟龍一念何曾與世同不爲行雲求弭

謗郎因治水欲論功期翔想見虛無裏毀譽誰知瀟濁中讀盡舊碑成絕倒書生惟慣詔王公

聞猿

瘦盡腰圍不為詩良辰流落自成衰也知客裏偏多感誰料天涯有許悲漢塞角殘人不寐渭城歌罷客將離故應未抵聞猿恨况是巫山廟裏時

瞿唐行

四月欲盡五月來峽中水漲何雄哉浪花高飛暑路雪難石怒轉晴天雷千艘萬舸不敢過篙工柁師心膽破人人陰拱待勢衰誰敢輕行犯奇禍一朝時去不自由山腹空有沙痕留君不見陸子歲莫來夔州瞿唐峽水平如油

入瞿唐登白帝廟

曉入大豁口是為瞿唐門長江從蜀來日夜東南奔兩山對崔嵬勢如塞乾坤峭壁空仰視欲上不可捫禹功何巍巍尚觀鑄鑿痕天不生斯人人皆化魚鼈於時仲冬月水各歸其源灑灑訖中流百尺呈孤根參差層巒屋邦人祀公孫力戰死社稷宜享廟貌尊丈夫貴不撓成敗何足論我欲伐巨石作碑累千言上陳躍馬壯下斥乘驟昏雖慚豪偉詞尚慰雄傑魂君王昔玉食何至敢雞豚願言采芳蘭舞歌薦清尊

登江樓

已過瞿唐更少留小松聊繫古夔州瞿唐關即唐夔州也簿書未破三年夢杖屨先尋百尺樓日暮雲雲迷峽口歲窮奮火照關頭野人不解微官縛尊酒應來此散愁

雪中臥病在告戲作

面裂愁出門指直但藏袖誰云三峽熱有此凜冽候殷勤愧雪片飛舞為我壽方驚四山積已見萬瓦覆豈惟寒到骨遂覺疾在膝地爐熾薪炭噤坐連昏晝梅花真強項不肯落春後俗人愛桃李苦道太疎瘦清芬終見賞此事非速售已矣吾何言高枕聽蒼溜

雪晴

臘盡春生白帝城俸錢雖薄勝躬耕眼前但恨親朋少身外元知得喪輕日映滿窗松竹影雪消竝舍鳥聲老來莫道風情減憶向煙蕪信馬行

玉笈齋書事

莫笑新霜點鬢鬢老來却得少工夫晨占上古連山易夜對西真五嶽圖叔夜曾聞高士嘯孔賓豈待異人呼眉間喜色誰知得今日新添火四鉢

又

雪霽茆堂鐘磬清晨齋枸杞一杯羹隱書不厭千回讀大藥何時九轉成孤坐月魂寒徹骨安眠龜息浩無聲剩分松屑為山信明日青城有使行時傳道人欲歸青城

記夢

夢裏都忘困晚途縱橫艸疏論遷都不知盡挽銀河水洗得平生習氣無

瀋西

千載瀋西路今年著腳行匆匆衰已具渺渺恨難平絕壁猿啼雨深枝鶻報晴亦知憂吏責未忍廢詩情

山寺

盤輿送客過江村小寺無人半掩門古佛負牆塵漠漠孤燈照殿雨昏昏喜投禪榻聊尋夢懶為啼猿更斷魂要識人間盛衰理岸沙君看去年痕峽漲時水高數十丈至冬盡落

踞磧

鬼門關外逢人日踞磧千家萬家出竹枝慘戚雲不動劍器聯翩日將夕行人十有八九癭見慣何曾羞顧影江邊沽酒沙上臥峽口月出風吹醒人生未死信難知顛顛夔州生鬢絲何日畫船搖桂楫西湖却賦探春詩

寒食

峽雲烘日欲成霞瀼水生紋淺見沙又向蠻方作寒

食強持卮酒對梨花身如巢燕年年客心羨游僧處
處家積有春風能領略一生相伴遍天涯

晚晴書事呈同舍 以下十七首皆試院作

魚復城邊夕照紅物華偏解惱衰翁巴鷲有恨啼芳
樹野水無情入故宮許國漸疎悲壯志讀書多忘媿
新功因君共語增惆悵京洛交遊欲半空

鄉中每以寒食立夏之間省墳客夢適逢此時
悽然感懷

松陰繫馬啓朱扉粒救青紅正此時守墓萬家猶有
日及親三釜永無期詩成謾寫天涯感淚盡何由地
下知富貴賤貧俱有恨此生長廢蓼莪詩

又

手持綠酒醉蒼苔今歲何由足馬來清淚不隨春雨
斷孤吟欲和莫猿哀皂貂破弊歸心切白髮淒涼老
境催誓墓只思長不出松門日日手親開

試院春晚

病思蕭條掩綠罇閑坊寂歷鎖朱門故人別久難尋
夢遠客愁多易斷魂漫漫晚花吹灑岸離離春艸上
宮垣此生飄泊何時已家在山陰水際村

倚闌

故山未敢說歸期十口相隨又別離小雨初收殘照
晚闌干西角立多時

自詠

朝衣無色如霜葉將奈雲安別駕何鐘鼎山林俱不
遂聲名官職兩無多低昂未免聞雞舞慷慨猶能擊
筑歌頭白伴人書紙尾只思歸去弄煙波

午興

漸轉廊腰日徐來峽口風殘殺便北客淖粥稱衰翁
槐晚纖纖綠榴殘續續紅責輕仍飽食三數愧無功
風雨中望峽口諸山奇甚戲作短歌

白鹽赤甲天下雄拔地突兀摩蒼穹凜然猛士撫長
劍空有豪健無雍容不令氣象少滯滯常恨天地無

全功今朝忽悟始歎息妙處元在煙雨中太陰殺氣
橫慘澹元化變態含空濛正如奇材遇事見平日乃
與常人同安得朱樓高百尺看此疾雨吹橫風

夜坐庭中

人靜風寒慢更闌露泫衣暗窗飢鼠齧空廡冷螢飛
歲月背人去鄉閩何日歸脫巾還感歎殘髮不勝稀

新蔬

黃瓜翠苣最相宜上市登盤四月時莫擬將軍春著
句兩京名價有誰知

初夏懷故山

鏡湖四月正清和白塔紅橋小艇過梅雨晴時插秧
鼓蘋風生處采菱歌沉迷簿領吟哦少淹泊蠻荒感
慨多誰謂吾廬六千里眼中歷歷見漁蓑

初夏新晴

曲徑泥新晚照明小軒纔受一床橫翩翩乳燕穿簾
影蔌蔌新篁解籜聲藥物屏除知病減夢魂安穩覺
心平深居不恨無來客時有山禽自贊名

定拆號日喜而有作

小雨如絲落復收悄無人語但鳴鳩挽鬢預想諸兒
喜倒指猶爲五日留滿案堆書惟引睡侵天團棘不
遮愁爲農父子長相守誤計隨人學宦遊

睡起 時閉試院中已月餘矣

深閉重門謝簿書日長添得睡工夫水紋竹簟涼如
洗雲碧紗幮薄欲無半吐山榴看著子新來梁燕見
將雛夢回茗椀聊須把自掃桐陰置瓦爐

四月二十九日作

假館猶三日還家甫四句昏眸雲霧隔衰鬢雪霜新
尊酒雖慵近 病目止酒 囊詩却未貧但愁門有客流
汗強冠巾

苦熱

萬瓦鱗鱗若火龍日車不動汗珠融無因羽翮氣埃
外坐覺蒸炊釜甑中石礪寒泉空有夢冰壺團扇欲

無功餘威向晚猶堪畏浴罷斜陽滿野紅
拆號前一日作

飄零隨處是生涯斷梗飛蓬但可嗟稚子歡迎先入
夢從兵結束待還家食眠屢失身多病憂愧相乘髮
易華隔日寄聲為薄具石榴應有未開花

暴雨

風怒欲掀屋雨來如決隄孤燈映窗滅羈鳥就簷棲
暑令方炎赫秋聲忽慘淒傳聞漲江水已斷瀆東西

西齋雨後

香梳灰深微炷火茶鐺聲細緩煎湯百年浮世幾人
樂一雨虛齋三日涼簾外微風斜燕影池邊殘照斂
萱房紗櫺石枕蕭然臥付與今宵幽夢長

急雨

陰雲屯峽口急雨過城頭白舫投沙峽青帝捲市樓
漂搖爭闔戶壅溢共疏溝抽得驅蠅手題詩慰旅愁
晚晴聞角有感

暑雨初收白帝城小荷新竹夕陽明十年塵土青衫
色萬里江山畫角聲零落親朋勞遠夢淒涼鄉社負
歸耕議郎博士多新奏誰致當時魯二生
夏夜起坐南亭達曉不復寐

風露青冥近九秋脫巾扶杖冷颼颼曲闌影外巴山
月畫角聲中楚塞愁巢燕竝棲高棟穩潛魚時躍小
池幽悠然坐待江城曉紅日將昇碧霧浮
夜登白帝城樓懷少陵先生

拾遺白髮有誰憐零落歌詩遍兩川人立飛樓今已
矣浪翻孤月尚依然升沉自古無窮事憑智同歸有
限年此意淒涼誰共語夜闌鷗鷺起沙邊

假日書事

萬里西來為一飢坐曹日日汗霑衣但嫌憂畏妨人
樂不恨疎慵與世違離檻迎陽花併發畫梁避雨燕
雙歸放懷始得閑中趣下馬何人又叩扉

林亭書事

吏退林亭夏日長烏紗白紵自生涼
面覆水青萍錦一方約束蠻僮收藥富催呼稚子曬
書忙平生幽事還拈起未覺巴山異故鄉

又

期會文書日日忙偷閑聊得臥方床
在風度疎簾特地涼野艇空懷菱蔓滑冰盆誰弄藕
絲長角聲喚覺東歸夢十里平湖一草堂
峽中絕無菱藕

遊臥龍寺

曉發魚復走瞿唐沙頭喚渡倚胡床
市我亦來退六月涼殘星欲盡尚歷落明河已淡餘
蒼茫翻翻林表鴉鶻語渺渺煙邊鷗鷺行過江走馬
十五里小寺殘僧真最爾投鞭入門為一笑解陋稱
雄有如此君不見天童徑山金碧浮虛空千衲梵唄
層雲中

久病灼艾後獨臥有感

白帝城高莫柝傳幽窗搔首意蕭然
雁牆下桐疎不庇蟬計出火攻傷老病臥聞鳶墮數
蠻煙諸賢好試平戎策斂退無心競著鞭
秋晚病起

秋晚病起

心靜病良已脩然巾履輕灰深地爐煖日出紙窗明
宿雨全消瘴新霜賸得晴井梧殊可念無葉送秋聲

秋思

魚復城邊逢雁飛白頭羈客恨依依遠遊眼底故交
少晚歲人間樂事稀雲重古關傳夜柝月斜深巷擣
秋衣官閑况是頻移疾藥鼎熒熒臥掩扉

一病四十日天氣遂寒感懷有賦

幽人病起鬢毛殘破口樓臺九月寒
斷早霜初染一林丹鄉閭乖隔知誰健懷抱淒涼用
底寬麴米春香雖可醉瀟西新橘尚餘酸

登城

簿領無時了登臨亦快哉樓危壓城起
底寬麴米春香雖可醉瀟西新橘尚餘酸

病瘴拋書快思鄉泥酒盃天寒水盡落灑灑已崔嵬
夔州重陽

夔州鼓角晚凄悲恰是幽窗睡起時但憶社醅投菊
蕊敢希朝士賜黃枝山川信美吾廬遠天地無情客
鬢衰佳日掩門君莫笑病來紗帽不禁吹

追懷曾文清公呈趙教授趙近嘗示詩

憶在茶山聽說詩親從夜半得玄機常憂老死無人
付不料窮荒見此奇律令合時方帖妥工夫深處却
平夷人間可恨知多少不及同君叩老師

謝張廷老司理錄示山居詩

顛顛經年客瘴鄉把君詩卷意差強古人三語猶嗟
賞况是珠璣滿錦囊

又

老覺人間萬事非但思茆屋映疎籬秋衾已是饒歸

夢更讀山居二首詩

秋晴欲出城以事不果

古人已去不可回今人日夜歸泉臺浮生細看只此
是到死自苦何為哉矜名飾詐竟一世忍寒觸熱忘
其骸不令金樽映翠杓坐待白骨生蒼苔清秋九月
瘴如洗白鹽千仞高崔嵬荒庭落葉不可掃惟有叢
菊爭先開瀼西黃柑霜落爪溪口赤梨丹染腮熊肪
玉潔美香飯鮮鸞花慘宜新醅南窗病起亦蕭散甚
欲住探城西梅一官底處不敗意正用此時持事來

南窗

流落逢知少疎慵近俗多悶拈如意舞狂吟唾壺歌
巴酒禁愁得金丹奈老何南窗好風月聊復此婆娑

遣興

酒量愁翻減詩聲老轉低日高羹馬齒霜冷駕雞栖
已判功名近寧論簿領迷賴無權入手軟弱實如泥

九月三十日登城門東望悽然有感

減盡腰圍白盡頭經年作客向夔州流離去國歸無
日瘴癘侵人病過秋菊蕊殘時初把酒病中久止酒秋

末方能少飲雁行橫處更登樓蜀江朝莫東南注我獨
胡為淹此留

初冬野興

關北關南霜露寒瀼東瀼西山谷盤盤紋細細吹殘
水龜背時時出小灘衰髮病來無復綠寸心老去尚
如丹逆胡未滅時多事却為無才得少安

東屯呈同遊諸公

十月霜影楓樹林清溪白石稱幽尋按行老子諒茆
地憫悵孤臣許國心走馬平沙嫌路近傳盃小閣喜
寒侵也思試索梅花笑凍蕊疎疎欲不禁

別王伯高

冷落何人肯見尋斷豈塵匣愧知音傾家釀酒猶嫌
少入海求詩未厭深薄宦簿書常袞袞中年光景易
駸駸香醞贈別非無意共約踟躕看此心

書驛壁

猿叫鋪前雪欲作鬼門關頭路正惡泥深三尺馬蹄
弱霜厚一寸客衣薄朝行過棧莫渡竿夜投破驛火
煜燻人生但要無媿怍萬里竄身元不錯

又

破中山多甲天下萬嶂千峯通一罅峒民無地習耕
稼射麋捕虎連晝夜女兒薄命天不借青燈獨宿江
邊舍黎明賣薪勿悲吒女生豈有終不嫁

醉中到白崖而歸

醉眼朦朧萬事空今年痛飲瀼西東偶呼快馬迎新
月却上輕輿御晚風行路八千常是客丈夫五十未
稱翁亂山缺處如橫綫遙指孤城翠靄中

十二月十九日晚巫山送客歸同望西寺小閣

縹緲可愛遂與趙郭二教授同遊抵夜乃還楚
鄉偶得長句呈二君

送客沙頭落日催遙看重閣更同來清尊與閱都傾

盡是日所攜酒俱飲盡倦馬和詩總勒回顛顛遠遊悲
騎省豪華前事記章臺歸時燈火參差晚自脫征衣

拂帽埃

劍南詩稿卷第二終

劍南詩稿目錄

卷第二

飯三折舖舖在亂山中 小市 酒無獨飲理

長虎 戲題 蟠龍瀑布 題梁山軍瑞豐

亭 馬上 鄰山縣道上作 鄰水延福寺早

行 岳池農家 過廣安吊張才叔諫議 果

州驛 留樊亭三日王覺民檢詳日攜酒來飲

海棠下比去花亦衰矣二首 柳林酒家小樓

南池 唐長慶中南池新亭碑在漢高帝廟

側亭已失所在矣 聞杜鵑戲作 鼓樓舖醉

歌 登慧照寺小閣 春雨 風雨中過龍洞

閣 驛舍海棠已過有感 籌筆驛 嘉川舖

遇小雨景物尤奇 老君洞 大安病酒留半

日王守復來招不住送酒解醒因小飲江月館

金牛道中遇寒食 曉發金牛 山南行

南鄭馬上作 和高子長參議道中二絕 次

韻張季長題龍洞 次韻子長題吳太尉雲山

亭 送劉戒之東歸 周元吉蟠室詩 送范

西叔赴召二首 寄鄧公壽 簡章德茂 自

三泉泛嘉陵至利州 木瓜舖短歌 夜抵陵

萌惠照寺寓榻小閣 太息二首 閩中作二

首 遊錦屏山謁少陵祠堂 仙魚舖得仲高

兄書 自閩復還漢中次益昌 驛亭小憩遣

興 再過龍洞閣 自笑 三泉驛舍 嘉川

舖得檄遂行中夜次小柏 歸次漢中境上

泗陽夜行 道中累日不肉食至西縣市中得

羊因小酌 初離興元 自興元赴官成都

書事 雨中過臨溪古堠 南沮水道中 長

木晚興 遣興 長木夜行抵金堆市 赴成

都泛舟自三泉至益昌謀以明年下三峽 壬

辰十月十三日自閩中還興元遊三泉龍門十

一月二日自興元適成都復攜兒曹往遊賦詩

子行蜀漢間道出潭壽關下每憩羅漢院山

光軒今復過之悵然有感 棧路書事 雪晴

行益昌道中頗有春意 思歸引 誌公院在

劍門東五里院東石壁間有若僧負杖者杖端

髻髯有刀尺拂子之狀 劍門道中遇微雨

劍門關 劍門城北回望劍關諸峯青入雲漢

感蜀亡事慨然有賦 丹芝行 過武連縣北

柳池安國院袁泉試日鑄顧諸茶院有二泉皆

甘寒傳云唐僖宗幸蜀在道不豫至此飲泉而

愈賜名報國靈泉云三首 宿武連縣驛 初

入西州境述懷 綿州魏成縣驛有羅江東詩

云芳草有情皆礙馬好雲無處不遮樓戲用其

韻 卽事 青村寺 行綿州道中 越王樓

二首 東津 東山 綿州錄參軍廳觀姜楚

公畫鷹少陵爲作詩者 羅江驛翠望亭讀宋

景文公詩 鹿頭關過龐士元廟 遊漢州西

湖 嚴君平卜臺 梅花 拜張忠定公祠二

十韻 成都歲莫始微寒小酌遣興 再賦梅

花 登塔 先主廟次唐貞元中張儼詩韻三

首 睡起書事 西郊尋梅 分韻作梅花詩

得東字 宇文子友聞予有西郊尋梅詩以詩

借觀次其韻 海棠 簡南禪勤長老 和譚

德稱送牡丹二首 初到蜀州寄成都諸友

自蜀州暫還成都奉簡諸公 摩訶池 三月

十七日夜醉中作 嘉祐院觀壁間文湖州墨

竹 春晚書懷三首 偶憶萬州戲作短歌

驛舍見故屏風畫海棠有感 思政堂東軒偶

題 荔枝樓小酌二首 嘉陽官舍奇石甚富

散棄無領略者予始取作假山因名西齋曰小

山堂爲賦短歌 望雲樓晚興 護國天王院

故神霄玉清萬壽宮也廢圯略盡而規模尚極

壯麗過之有感 登荔枝樓 再賦荔枝樓

能仁院前有石像丈餘蓋作大像時樣也

劍南詩稿卷第三

宋陸游務觀

飯三折舖舖在亂山中

平生愛山每自歎舉世但覺山可玩皇天憐之足其願著在荒山更何怨南窮閩粵西蜀漢馬蹏幾歷天下半山橫水掩路欲斷崔嵬可陟流可亂春風桃李方漫漫飛棧凌空又奇觀但令身健能強飯萬里只作遊山看

小市

小市門前沙作堤杏花雖落不霏泥客心尚壯身先老江水方東我獨西覽憩軒窗仍汛掃遠遊書劍亦提攜子規應笑飄零慣故傍茆蒼盡意啼

酒無獨飲理

酒無獨飲理常恨欠佳客忽得我輩人豈計晨與夕少年事虛名歲月駒過隙自從老大來一日亦可惜糟丘未易辦小計且千石頽然置萬事天地為幕帟人生如刀礪磨盡要有日不須荷鋤隨况問幾兩屐

畏虎

滑路滑如苔澀路澀若梯更堪都梁下一雪三日泥泥深尚云可委身餓虎蹊心寒道上跡魄碎茆葉低常恐不自免一死均豬雞老馬亦甚畏憐憫不敢嘶吾聞虎雖暴未嘗窺汝棲孤行莫不止取禍非排擠彼讒實有心平地生溝谿哀哉馬新息蕙苾成珠犀

戲題

走馬平欺刺繡坡放船橫截亂絲渦從來倚箇心平穩遇險方知得力多

蟠龍瀑布

遠望紛珠纓近觀轉雷霆人言水出奇意使行人驚人驚我何得定非水之情水亦有何情因物以賦形處高勢趨下豈樂與石爭退之亦隘人強言不平鳴

古來賢達士初亦願躬耕意氣或感激邂逅成功名
題梁山軍瑞豐亭

我行都梁窘風雪史君喜事能留客瑞豐亭上一尊酒渺渺郊原水初白峽中地福常苦貧政令愈簡民愈淳本來無事只畏擾擾者才吏非庸人都梁之民獨無苦須晴得晴雨得雨史君心愛稼如雲時上新亭按歌舞歌闌舞罷史君醉父老羅拜豐年賜聖朝尚寶抑虛文縱產芝房非上瑞

馬上

殘年流轉似萍根馬上傷春易斷魂烘煖花無經日蕊漲深水過去年痕迷行每問樵夫路投宿時敲竹寺門不信太平元有象牛羊點點散煙村

鄰山縣道上作

微雨晴時出驛門亂鶯啼處過江村挽花醉袖露餘靄迎日征鞍借小温客路一身真吊影故園萬里欲招魂鬢毛無色心猶壯藉草悲歌對酒尊

鄰水延福寺早行

化蝶方酣枕聞雞又著鞭亂山徐吐日積水遠生煙
淹泊真衰矣登臨獨惘然桃花應笑客無酒到愁邊
酒偶盡市酤不可飲

岳池農家

春深農家耕未足原頭叱叱兩黃犢泥融無塊水初渾雨細有痕秧正綠綠秧分時風日美時平未有差科起買花西舍喜成婚持酒東鄰賀生子誰言農家不入時小姑畫得城中眉一雙素手無人識空村相對看繅絲農家農家樂復樂不比市朝爭奪惡宦遊所得真幾何我已三年廢東作

過廣安弔張才叔諫議

春風正馬過孤城欲弔先賢涕已傾許國肺肝知激烈照人眉宇尚崢嶸中原成敗寧非數後世忠邪自有評歎息知人真未易流芳遺臭盡書生

果州驛

驛前官路埃纍纍歎息何時送我歸池館鶯花春漸老窗扉燈火夜相依孤鸞怯舞愁窺鏡老馬貪行強受轡到處風塵常撲面豈惟京洛化人衣

留樊亭三日王覺民檢詳日攜酒來飲海棠下

比去花亦衰矣
留落猶能領物華名園又作醉生涯何妨海內功名士共賞人間富貴花

又
石衛尉家錦步障移在樊家園館中醉到花殘呼馬去聊將俠氣壓春風

柳林酒家小樓

桃花如燒酒如油緩轡郊原當出遊微倦放教成午夢宿醒留得伴春愁遠途始悟乾坤大晚節偏驚歲月道記取晴明果州路半天高柳小青樓

南池 杜詩所謂安知有蒼池萬頃浸坤軸者今已盡廢

二月鶯花滿闌中城南搔首立衰翁數莖白髮愁無那萬頃蒼池事已空陔復豈惟民食足渠成終助霸圖雄眼前碌碌誰知此漫走叢祠乞歲豐 池上有漢高

帝廟

唐長慶中南池新亭碑在漢高帝廟側亭已失所在矣

池廢新亭亦已無遺碑半滅臥春蕪文章綺靡雖非

古今代詞人不辦渠
聞杜鵑戲作絕句

半世羈遊厭路岐憑鞍日日數歸期勞君樹杪丁寧語似勸飢人食肉糜

鼓樓舖醉歌

書生迫飢寒一飽輕三巴三巴未云已北首趨衰斜

肉肉出門去裘馬不復華短帽障赤日烈風吹黃沙

飯裝先晨雞投鞭後昏鴉壯哉利闕間崖谷何餘鈔地荒多牧卒往往聞蘆笳我行春未動原野今無花稚子入旅夢挽鬚勸還家起坐不能寐愁腸如轉車

四方丈夫事行矣勿咨嗟
登慧照寺小閣

少年富貴已悠悠老大功名定有不歲月消磨閣亭傳山川遼邈弊衣裘殺身有地初非惜報國無時未免愁局促每思舒望眼雖非吾土強登樓

春雨

江頭一夜雨曉路無新花我今為陳人感此重歎嗟義和挾兩曜疾走不可遮古今俛仰間那暇惜物華

風雨中過龍洞閣

飄然醉袖怒人扶箇裏何曾有畏塗卷地黑風吹慘澹半天朱閣插虛無闌邊歸鶴如爭捷雲表飛仙定可呼莫怪衰翁心膽壯此身元是一枯株

驛舍海棠已過有感

淒涼古驛官道傍朱門沈沈春日長暗妍光景老海棠顛風吹花滿空廊物生榮頓固其常惜我無與持一觴遊蜂戲蝶空自忙豈知美人在西廂我雖已老猶能狂吟立為爾悲容光盛時不遇誠可傷零落逢知更斷腸

籌筆驛有武侯祠堂

運籌陳迹故依然想見旌旗駐道邊一等人間管城子不堪誰叟作降牋

嘉川舖遇小雨景物尤奇

一春客路厭風埃小雨山行亦樂哉危棧巧依青嶂出飛花併下綠巖來面前雲氣翔孤鳳腳底江聲轉疾雷堪笑書生輕性命每逢險處更徘徊

老君洞 有石刻載唐明皇幸蜀見老君於此

丹鳳樓頭語未終崎嶇蜀道復相逢太清宮闕俱煨燼豈亦南來避賊鋒

大安病酒留半日王守復來招不住送酒解醒

因小飲江月館

江驛春醒半日留更煩送酒為扶頭柳花漠漠嘉陵岸別是天涯一段愁

金牛道中遇寒食

乍換春衫一倍輕況逢寒食十分晴
鶯穿驛樹怪惚語馬過溪橋蹀躞行
畫柱綵繩喧笑樂豔妝麗服角鮮明
誰知此日金牛道非復當時鐵馬聲
紹興初虜大入至金牛而遜

曉發金牛

客枕何時穩恩恩又束裝快晴生馬影
新暖折花房沮水春流綠嶠山曉色蒼
阿瞞狼狽地千古有遺傷
自金牛以西皆明皇幸蜀路

山南行

我行山南已三日如繩大路東西出
平川沃野望不盡麥隴青青鬱鬱地
近函秦氣俗豪鞦韆蹴鞠分朋曹首
稽連雲馬蹄健楊柳夾道車聲高古來
歷歷興亡處舉目山川尚如故將軍壇
上冷雲低丞相祠前春日莫國家四紀
失中原師出江淮未易吞會看金鼓從
天下却用關中作本根

南鄭馬上作

南鄭春殘信馬行通都氣象尚崢嶸
迷空遊絮憑陵去曳綫飛鳶跋扈鳴
落日斷雲唐闕廢德宗詔山南北兩京
淡煙芳草漢壇平近郊有韓信拜大將
壇猶嫌未豁胸中氣日斷南山天際橫
城中望見長安南山

和高子長參議道中二絕

梁州四月晚鸞啼共憶扁舟罨畫
谿莫作世間兒女態明年萬里駐安西

又

豐年食少厭兒啼覓得微官落五谿
大似無家老禪衲打包還度棧雲西

次韻張季長題龍洞

我昔謁紫皇翳鳳駝虬龍俯不見
塵世浩浩萬里空謫墮尚遠遊忽到
漢始封西望接蜀道北顧連秦中壯哉
形勝區有此蜿蜒宮雷霆自鞿鞞環玦
亦璵璠石屋如建章萬戶交相通來者
各有得盡取知無從

憑高三數息自古幾英雄老我文字衰
揮毫看諸公次韻子長題吳太尉雲山亭

參謀健筆落縱橫太尉清鑄賞快晴
文雅風流雖可愛關中遺虜要人平

送劉戒之東歸

去國三年恨未平東城况復送君行
難憑魂夢尋言笑空向除書見姓名
殘日半竿斜谷路西風萬里玉關情
蘭臺粉署朝回晚肯記麤官數奇聲

周元吉蟠室詩

天下有廣居非阿房建章賓餞日及
月闔關陰與陽山川坦然平何者為藩
牆孔公暨瞿聃同坐此道場哀哉世日
隘肝膽分界疆蹙縮戰蝸角崎嶇走羊
腸周先早得道所證非復常小室古城
隅宛如野僧房能容人天衆雜沓來燒
香三萬二千人各據獅子牀實際正如
此切忌錯商量須彌芥子話今夕當舉
揚送范西叔赴召

天涯流落過重陽楓葉搖丹已著霜
衰病強陪蓮幕客淒涼又送石渠郎
杜陵雁下悲徂歲笠澤魚肥夢故鄉
便恐從今長隔關舊交新貴例相忘

又

欲駕征車勸小留南山南畔更逢秋
數聲過雁催行色一醺昏燈話別愁
自昔文章關治道即今臺閣要名流
白頭尚作書癡在賸乞朱黃與校讎

寄鄧公壽

高標瑤樹與瓊林靈府清寒出苦吟
海內十年求識面江邊一見即論心
紛紛俗子常成市躑躅微言孰賞音
聞道南池梅最早要君攜手試同尋

簡章德茂

殊方邂逅豈無緣世事多乖復悵然
造物無情吾輩老古人不死此心傳
冷雲黯黯朝橫棧紅葉蕭蕭夜滿船
箇裏約君同著句不應輸與灞橋邊
自三泉泛嘉陵至利州

日日遭途處處詩書生活計絕堪悲江雲垂地難風
急一似前年上碇時

木瓜舖短歌

鼓樓坡前木瓜舖歲晚悲辛利州路當車礪礪石如
屋百里夷途無十步溪橋缺斷水齧沙崖崩頽頽風
拔樹虎狼受尾擇肉食狐狸豎毛啼日莫冢丘短草
聲窸窣往往精靈與人遇我生胡為忽在此正坐一
飢忘百慮五更出門寒裂面半夜燎衣泥滿袴妻孥
八月離夔州寄書未到今何處餘年有幾百憂集日
夜朱顏不如故即今臺省盛諸賢細思寧是儒冠誤
夜抵葭萌惠照寺寓榻小閣

亭驛驅馳驛肉消故山歸夢愈迢迢夜行觸尉那能
避日過隨僧不待招雨後風雲猶慘澹霜前草木已
蕭條衰遲事事非平日醉裏題詩亦復聊

太息 宿青山舖作

太息重太息吾行無終極冰霜迫殘歲鳥獸號落日
秋砧滿孤村枯葉擁破驛白頭鄉萬里墮此虎豹宅
道邊新食人膏血染草棘平生鐵石心忘家思報國
即今冒九死家國兩無益中原久喪亂志士淚橫臆
切勿輕書生上馬能擊賊

又

凄凄復凄凄山路窮攀躋僕病臥草間馬困聲酸嘶
脫兔截道奔窮狄上樹啼崩湍一何哀下落萬仞谿
昏黑投孤戍洗我衣上泥下懸不可遷大惑終身迷
仕宦十五年曾不飽糠粃客路少睡眠月白聞號雞
欲行且復止虎來茹葉低

閬中作

殘年作客遍天涯下馬長亭便似家三疊淒涼涓城
曲數枝閑澹閣中花雙棧投管相逢晚理鬢熏衣一
笑誰俱是邯鄲枕中夢墜鞭不用憶京華

又

挽住征衣為濯塵閬州齋釀絕芳醇鬻花舊識非生

客山水曾遊是故人遊樂無時冠巴蜀語音漸正帶
咸秦平生賸有尋梅債作意城南看小春

遊錦屏山謁少陵祠堂

城中飛閣連危亭處處軒窗臨錦屏涉江親到錦屏
上却望城郭如丹青虛堂奉祠子杜子眉宇高寒照
江水古來磨滅知幾人此老至今元不死山川寂寞
客子迷草木搖落壯士悲文章垂世自一事忠義凜
凜令人思夜歸沙頭雨如注北風吹船橫半渡亦知
此老憤未平萬竅爭號泄悲怒

仙魚舖得仲高兄書

病酒今朝載臥輿秋雲漠漠雨疎疎閬州城北仙魚
舖忽得山陰萬里書

自閬復還漢中次益昌

北首衰斜又幾程驕雲未放十分晴馬經斷棧危無
路風掠枯茆颯有聲季子貂裘端已弊吳中菰菜正
堪烹朱顏漸改功名晚擊筑悲歌一再行

驛亭小憩遣興

淡日微雲共陸離曲闌危棧出參差老松臨道閱千
載杜宇號山連四時漢水東流那有極秦關北望不
勝悲郵亭下馬開孤劍老大功名頗自期

再過龍洞閣

天險龍門道霜清客子遊一筇緣絕壁萬仞俯洪流
著脚初疑夢回頭始欲愁危身無補國忠孝兩堪羞
自笑

自笑

自笑謀生事事疎年來雖與地俱無平章春韭秋菘
味拆補天吳紫鳳圖食肉定知無骨相珥貂空自誑
頭顱惟餘數卷殘書在破篋蕭然笑捺奴

三泉驛舍

殘鐘斷角度黃昏小驛孤燈早閉門霜氣峭深摧草
木風聲浩蕩卷郊原故山有約頻回首末路無歸易
斷魂短鬢蕭蕭不禁白強排幽恨近清樽
嘉川舖得檄遂行中夜次小柏

黃旗傳檄趣歸程，急服單裝破夜行。肅肅霜飛當十月，離離斗轉欲三更。酒消頓覺衣裘薄，驛近先看炬火迎。渭水函關元不遠，著鞭無日涕空橫。

歸次漢中境上
雲棧屏山闕，月遊馬蹄初。喜踞梁州地，連秦雍川原。壯水下荆揚，日夜流遺虜。孱孱寧遠略，孤臣耿耿獨私憂。良時恐作他年恨，大散關頭又一秋。

泗陽夜行
夜發泗陽驛，坡陀岡阜重。月斜欹帽影，霜重溼裘茸。野岸鳴枯葉，煙林度曉鐘。梁州明日到，一笑解衰容。

道中累日不肉食，至西縣市中得羊，因小酌。一洗窮邊恨，重招去國魂。客中無晤語，燈燼爲誰繁。初離興元

夢裏何曾有去來，高城無奈角聲哀。連林秋葉吹初盡，滿路寒泥蹋欲開。笠澤決歸猶小憩，錦城未到莫輕回。炊菘斫脯明年事，却憶斯遊亦壯哉。

自興元赴官成都
平生無遠謀，一飽百念已。造物戲飢之，聊遣行萬里。梁州在何處，飛蓬起孤壘。憑高望杜陵，煙樹略可指。今朝忽夢破，跋馬臨漾水。此生均是客，處處皆可死。劍南亦何好，小憩聊爾爾。舟車有通塗，吾行良未止。

書事
生長江湖狎釣船，跨鞍塞上亦前緣。雲埋廢苑呼鷹處，雪暗荒郊射虎天。醪酒芳醇偏易醉，胡羊肥美了無羶。揚州雖有東歸日，閉置車中定悵然。

雨中過臨溪古墩
道邊相送驛邊迎，水隔山遮似有情。歲晚無聊莫相笑，君方兩立我泥行。

長木晚興
沮水嶠山名，古今聊將行役當。登臨斷橋煙雨梅花瘦，絕壑風霜櫛葉深。末路清愁常袞袞，殘冬急景易駸駸。故巢東望知何處，空羨歸鴉解滿林。

遣興
貂裘破弊色淒涼，塞上歸來路更長。老驥嘶鳴常伏櫪，寒龜藏縮正支牀。彫零客路新霜鬢，掃灑先師舊草堂。九折阪頭休絕歎，世間何地不羊腸。

長木夜行抵金堆市
夜行長木村，重霧雜零雨。溼螢粘野蔓，寒犬吠雲塢。道壤交細泉，亭廢立遺堵。時時過農家，燈火照鳴杼。嗟予獨何事，無歲得安處。卽今窮谷中，性命寄豺虎。三更投小市，買酒慰羈旅。高詠東山詩，悵望懷往古。赴成都泛舟自三泉至益昌謀以明年下三峽

詩酒清狂二十年，又摩病眼看西川。心如老驥常千里，身似春蠶已再眠。莫雪烏奴停醉帽，秋風白帝放歸船。飄零自是關天命，錯被人呼作地仙。

壬辰十月十三日自閬中還興元遊三泉龍門
十一月二日自興元適成都復攜兒曹往遊賦詩
勝地惜輕別，短筇成後遊。門呀一境異，木落四山秋。野鷓翔深竇，蟠蛟擅古湫。棧危縈峭壁，橋迴跨奔流。白雨穿林至，腥風卷地浮。真成起衰病，不但洗孤愁。登陟知難再，吟哦爲小留。回頭卽萬里，雪滿戴谿舟。

予行蜀漢間道出潭毒關下每憩羅漢院山光軒今復過之悵然有感
山光軒上幾閑遊，潭毒關前又小留。麥隴雪苗寒剡剡，柘林風葉莫飈飈。馬行劍閣從今始，門泊吳船亦已謀。醉眼每嫌天地迳，盡將萬里著吾愁。

棧路書事
危閣聞鈴馱湍流，見磴船汲江人負。盜騎馬客蒙氈梨，美來秦地橙香接。楚天癡頑殊耐事，隨處一欣然。

雪晴行益昌道中頗有春意
杜陵雁下歲將殘
疋馬西游雪擁關
顛顛敢忘雙鬢
路淹遲遍看兩川
山春回柳眼
梅鬢裏愁在
鞭絲帽影間
安得黃金成大藥
爲人千載駐顏顏

思歸引

善泐不如穩乘舟
善騎不如謹持轡
妙於服食不如寡欲
工於揣摩不如省事
在天有命誰得逃
在我無求直差易
散人家風脫糾纏
煙蓑雨笠全其天
蕪絲老盡歸不得
但坐長飢須俸錢
此身不堪阿堵役
寧待秋風始投檄
山林聊復取熊掌
仕宦真當棄雞肋
錦城小憩不淹遲
卽是輕舸下峽時
那用更爲麟閣夢
從今正有鹿門期

誌公院在劍門東五里院東石壁間有若僧負杖者杖端髣髴有刀尺拂子之狀

江東爭奪纏妖殺哀哉斯民亂方甚
錦幪老人蓋古佛現身爲作大慈蔭
蕭翁八十尚兒癡
旛蓋鍾螺關中禁當時此老默笑渠
大法棟梁身獨任
杖頭示人三轉語
開口喪身如飲鴆
紛紛放弒但可憐
何曾爲汝陳符讖

劍門道中遇微雨

衣上征塵雜酒痕
遠遊無處不消魂
此身合是詩人未
細雨騎驢入劍門

劍門關

劍門天設險
北鄉控函秦
客主固殊勢
存亡終在人
棧雲寒欲雨
關柳暗知春
羈客垂垂老
憑高一槍神
劍門城北回
望劍關諸峯青
入雲漢
感蜀士事

慨然有賦

自昔英雄有屈信
危機變化亦逡巡
陰平窮寇非難禦
如此江山坐付人

丹芝行

劍山峨峨插穹蒼
千林萬谷蟠其陽
大丹九轉古所藏
靈芝三秀夜吐光
如火非火森有芒
朝陽欲升尚

煌煌何由斷取換
肝腸往駕素虬朝紫皇

過武連縣北柳池安國院袁泉試日鑄顧渚茶

院有二泉皆甘寒傳云唐僖宗幸蜀在道不豫至此飲泉而愈賜名報國靈泉云

滴瀝珠璣翠壁間
遭時曾得奉龍顏
欄傾甃缺無人管
滿院松風晝掩關

又

行殿凄凉迹已陳
至今父老記南巡
一泓寒碧無今古
付與閑人作主人

又

我是江南桑苧家
汲泉閑品故園茶
只應碧缶蒼鷹爪
可壓紅囊白雪芽
日鑄貯以小餅蠟
紙丹印封之顧渚貯以

紅藍綠囊皆有歲貢

宿武連縣驛

平日功名浪自期
頭顱到此不難知
宦情薄似秋蟬翼
鄉思多於春繭絲
野店風霜做裝早
縣橋燈火下程遲
鞭寒斂手戎衣窄
忽憶南山射虎時

初入西州境述懷

我無飛仙術
御氣周八極
寸步常依人
難哉萬里役
自行劍關南
大道平如席
日高徐駕車
薄莫亦兩驛
及茲山愈遠
原野若加闢
茂樹冬不凋
寒花晚猶拆
昔我卜遠遊
至蜀龜輒食
馳裝有定處
嗚呼豈人力

頗傳岷山下
清淑無癘疫
士風尚豪舉
意氣喜遠客
薪米家可求
借書亦易得
思吳雖不忘
所願少休息
吾聞古達人
雅志在山澤
豈無及物心
但恨俗褊迫
攬德雖成留
引去常勇決
駭機滿人間
著脚無上策

綿州魏成縣驛有羅江東詩云芳草有情皆礙馬好雲無處不遮樓戲用其韻

老夫乘興忽西遊
遠跨秦吳萬里秋
尊酒登臨遍山寺
歌辭散落滿江樓
孤城木葉蕭蕭下
古驛難聲灑灑

灑流未許詩人誇
此地茂林脩竹憶吾州
卽事

渭水岐山不出兵，却攜琴劍錦官城。醉來身外窮通小，老去人間毀譽輕。捫蝨雄豪空自許，屠龍工巧竟何成。雅聞曙下多區芋，聊試寒爐玉糝羹。

青村寺

十年淹泊望修門，臨水登山幾斷魂。短鬢星星身欲老，小樓微月宿青村。

行綿州道中

三年客江疎萬死，脫魚鼃平地從今始。窮塗敢復論國哇，棋局整坡壠海濤。翻瘦憤應多恨泥塗，伏短轆越王樓。

越王樓

上盡江邊百尺樓，倚欄極目莫江秋。未甘便作衰翁在，兩脚猶堪躡九州。

又

蒲萄酒綠似江流，夜燕唐家帝子樓。約住箏絃呼羯鼓，要渠打散醉中愁。

東津

歲莫涪江水歸壑，白沙渺然石犖角。蜀天常煥少雲霜，綠樹青林不搖落。闌干詰曲臨官道，煙靄參差望城郭。打魚斫膾修故事，豪竹哀絲奉歡樂。樂莫樂於新相知，笑人一笑回春姿。四方本是丈夫事，安用一生無別難。

東山

今日之集何佳哉，入關劇飲始此回。登山正可小天下，跨海何用尋蓬萊。青天肯爲陸子見，妍日似趣梅花開。有酒如涪綠可愛，一醉直欲空千巒。馳酥鵝黃出隴，右蔗肪玉白黔南。來眼花耳熱，不知夜但見銀燭。高花摧京華，故人死大半。歡極往往潛生哀，聊將豪縱壓憂患。應鼓吹動地聲如雷。

綿州錄參廳觀姜楚公畫鷹少陵爲作詩者

我來訪古涪之濱，不辭百回冀一真。走馬朝尋海樓館，斫膾夜醉魴魚津。越王高樓亦已換，俯仰今古堪悲辛。督郵官舍最卑陋，棟撓楹腐知幾春。歸然此壁

獨亡恙老槎勁，翻完如新向。來劫火何自免，叱呵守護疑有神。妖狐九尾穴中國，共置不問如越秦。天時此物合致用，下轄指呼端在人。會當原野灑毛血，坐令萬里清煙塵。老眼還憂不及見，詩成肝膽空輪囷。

羅江驛翠望亭讀宋景文公詩

撲馬征塵拂不開，高亭軟帽一徘徊。蜀山地曠稀逢雪，閨歲春遲未見梅。陂水近人無鷺下，煙林藏寺有鐘來。宋公出牧曾題壁，錦段雖殘試剪裁。

鹿頭關過龐士元廟

士元死千載，淒惻過遺祠。海內常難合，天心豈易知。英雄今古恨，父老歲時思。蒼蘚無情極，秋來滿斷碑。

遊漢州西湖

房公一跌叢衆毀，八年漢州爲刺史。遶城鑿湖一百頃，島嶼曲折三四里。小菴靜院穿竹入，危榭飛樓壓城起。空濛煙雨媚松楠，顛倒風霜老葭葦。日月苦長身，苦閑萬事不理看。湖水向來愛琴雖，一癖觀過自足知。夫子畫船載酒凌湖光，想公樂飲千萬揚。歎息風流今未泯，兩川名醜避鵝黃。鵝黃漢中酒，名蜀中無能及者。

嚴君平卜臺

先生久已蛻氛埃，道上猶傳舊卜臺。乞得寒泉濯肝肺，真成萬里不虛來。臺後有大井，名通仙井，相傳君平所浚。

梅花

家是江南友，是蘭水邊月。月底怯新寒，畫圖省識驚春早。玉笛孤吹怨夜殘，冷淡合教閑處著。清臞難遣俗人看，相逢剩作樽前恨。索笑情懷老漸闌。

拜張忠定公祠二十韻

張公世外人，與蜀偶有緣。天將靖蜀亂，生公在人間。厥初大盜興，樂禍迭相挺。天子輟玉食，貴臣擁戎旃。生殺出喜怒，死者常差肩。公曰：此何哉？從之吾欺天。河流觸地軸，砥柱屹不遷。脅從盡縱捨，飛章交帝前。上意竟開悟，至仁勝兇殘。貴臣不極賞，追還黜其權。

安危關社稷豈惟蜀民全後來有阿童握兵事開邊
晚策睦州功上公珉金蟬勢張不可禦北鄉挑幽燕
神京遂上墟迄今天步艱時無忠定公孰能折其奸
我來拜遺祠喬木含蒼煙死者不可作愀然衰涕潸
憤切感虜禍慷慨思公賢春秋送迎神誰為歌此篇
成都歲莫始微寒小酌遣興

革帶頻移紗帽寬茶鐺欲熟篆香殘疎梅已報先春
信小雨初成十月寒身似野僧猶有髮門如村舍強
名官鼠肝蟲臂元無擇馮酒猶能罄一歡
再賦梅花

老來愛酒賸狂顛况復梅花到眼邊不怕幽香妨靜
觀正須疎影伴癡仙松筠共歎冰霜晚桃李從教雨
露偏此去西湖八千里破愁一笑得無緣

登塔

冷官無一事日日得閑遊壯哉千尺塔攝衣上上頭
眼力老未減足疾新有瘳幸茲濟勝具俯仰隘九州
雪山西北橫大江東南流畫棟雲氣涌鐵鐸風聲遶
旅懷忽惻愴涕下不能收十年辭象魏萬里懷松楸
仰視去天咫絕叫當聞不帝閣守虎豹此計終悠悠
先主廟次唐貞元中張儼詩韻

猾賊挾至尊天命矜在己豈知高帝業煌煌漢中起
又

吳蜀本脣齒悲哉乃連兵盡銳下三硤誰使復兩京
又

洛陽化為灰棘生銅駝陌討賊志不成父老泣陵柏
廟在惠陵側

睡起書事

京華豪飲酬千鍾濯錦江邊怯酒濃烈士壯心雖未
滅狂奴故態有誰容折梅著句聊排悶閉戶焚香剩
放慵午枕如雷君莫怪西風吹夢過吳松

西郊尋梅

西郊梅花矜絕豔走馬獨來看不厭似羞流落蒙市

塵寧墮荒寒傍坊店儵然自是世外人過去生中差
一念淺孽常鄙桃李學獨立不容鸞蝶覘山礬水仙
晚角出大是春秋吳楚僭餘花豈無好顏色病在一
俗無由矜朱欄玉砌渠有命斷橋流水君何欠嗟余
相與頗同調身客劍南家在剡凄涼萬里歸無日蕭
颯二毛衰有漸尚能作意晚相從爛醉不辭盃激灑

分韻作梅花詩得東字

淺寒籬落清霜後疎影池塘淡月中北客同春俱稅
駕南枝與我兩飄蓬從來馮酒千鍾少此外評花四
海空惟恨廣平風味減坐看徐庾擅江東

韻 宇文子友聞予有西郊尋梅詩以詩借觀次其

拾遺遺跡付緇郎槁葉凝塵欲滿堂已恨罇罍孤勝
踐更堪風雨病幽芳蘭蓀千古有同調蜂蝶一春空
自忙馬上得詩歸絕歎故園三徑久成荒

海棠苑希元園

誰道名花獨故宮 謂故蜀燕王宮 東城盛麗足爭雄橫
陳錦障闌干外盡吸紅雲酒醜中貪看不辭持夜燭
倚狂直欲擅春風拾遺舊詠悲零落瘦損腰圍擬未
工老杜不應無海棠詩意其失傳爾

簡南禪勤長老

宦遊處處是君思歸去無期莫更論眼正修行新有
力空心憂患已無根鉢盂分我雲堂飯拄杖敲君竹
院門屈宋向來堪一笑故鄉何戀更招魂

和譚德稱送牡丹

洛陽春色擅中州檀暈鞋紅總勝流顛顛劍南人不
管問渠情味似儂不

又

吾生何拙亦何工憂患如山一笑空猶有餘情被花
惱醉搔華髮倚屏風

初到蜀州寄成都諸友

流落天涯鬢欲絲年來用短始能奇無材藉作長閑

地有憐留爲劇飲資萬里不通京洛夢一春最負牡丹時
雙牋報與諸公道
番畫亭邊第一詩

自蜀州暫還成都奉簡諸公

不染元規一點塵
行歌偶到錦江濱
淋漓詩酒無虛日
判斷鶯花又過春
客路柳陰初墮絮
還家梅子欲生仁
更須作意勤相過
要信年光屬散人

摩訶池

摩訶古池苑一過一消魂
春水生新漲
煙蕪沒舊痕
年光走車載人事
轉萍根
猶有宮梁燕
銜泥入水門
蜀宮中書泛舟入此池
曲折十餘里
今府後門雖已爲平陸
然猶號水門

三月十七日夜醉中作

前年膾鯨東海上
白浪如山寄豪壯
去年射虎南山秋
夜歸急雪滿貂裘
今年摧頹最堪笑
華髮蒼顏羞自照
誰知得酒尚能狂
脫帽向人時大叫
逆胡未滅心未平
孤劍床頭鏗有聲
破驛夢回燈欲死
打窗風雨正三更

嘉祐院觀壁間文湖州墨竹

石室先生筆有神
我來拂拭一酸辛
敗牆慘澹欲無色
老氣森嚴猶逼人
慣閱冰霜元耐久
恥隨兒女更爭春
紛紛可笑空摹擬
爾輩毫端萬斛塵

春晚書懷

吹盡郊原萬點紅
燕梁考室亦匆匆
老來偏覺歲華速
客裏忽驚春事空
病有藥方傳肘後
懶無詩句付囊中
歸心日夜隨江水
只欲東門覓短篷
入吳者皆自小東郭登舟

又

經春淹泊錦官城
作箇歸期苦未成
老向軒裳增力量
病於風月減心情
官閑有味錄高臥
酒貴無憂爲細傾
憶探梅花如昨日
西齋榆莢與階平

又

老客天涯心尚孩
惜春直欲挽春回
長繩縱繫斜陽

住右手難移故國來
暑近蚊雷先隱鱗
雨前燈堦正
崔嵬茹芝却粒終
無術萬事惟須付一盃

偶憶萬州戲作短歌

峽中天下最窮處
萬州蕭條誰肯顧
去年正月偶過之
曾爲巴人三日住
南浦尋梅雪滿舟
西山載酒雲生屨
至今夢聽竹枝聲
燈火紛紛驛前路
殘春猶客蜀江邊
陳迹回思一愴然
漸老定知歡漸少
明年還復憶今年

驛舍見故屏風畫海棠有感

厭煩只欲長面壁
此心安得頑如石
杜門復出數習氣
止酒還開漸定力
成都二月海棠開
錦繡裏城迷巷陌
燕宮最盛號花海
霸國雄豪有遺迹
猩紅鸚綠極天巧
墨萼重附眩朝日
繁華一夢忽吹散
閉眼細思猶歷歷
憂樂相尋豈易知
故人應記醉中詩
夜闌風雨嘉州驛
愁向屏風見折枝

思政堂東軒偶題

羈愁酒病兩無聊
小篆吹香已半消
喚起十年閩嶺夢
蘋桐花畔見紅蕉
蘇州謂之百日紅

荔枝樓小酌

碧瓦朱欄已半摧
強呼歌舞試樽罍
邦人莫訝心情嬾
新出鸞花海裏來

又

病與愁兼怯酒船
巴歌聞罷更悽然
此身未死長爲客
回首夔州又二年

嘉陽官舍奇石甚富散棄無領略者予始取作假山因名西齋曰小山堂爲賦短歌

昔人何人愛巖壑
爲山未成儲犖確
散落支床壓酒槽
大或專車小拳握
幽人邂逅爲絕歎
脩綆趣取寒泉濯
峭峯幽竇相吐吞
翠嶺丹崖渺聯絡
石不能言意可解
問我胡爲憐寂寞
人間興廢自有數
昔棄何傷今豈樂
斯言妙矣予則陋
敢對石友辭罰爵
爲君寬作十日留在眼
便同真著脚

望雲樓晚興

小閣東南獨詠詩此生終與世差池夕陽明處蒼煙
合樓燕歸時畫角悲人與江山均是夢心非風月尚
誰知舊交幾歲音塵隔三撫闌干有所思

護國天王院故神霄玉清萬壽宮也廢圯略盡
而規模尚極壯麗過之有感

大霄帝君神霄府一日璽書行海寓築宮奔走誰敢
後萬牛挽材山作礎步虛夜半落雲間玉磬滲滲鸞
鶴舞帝師丞相領使名侍晨披籍紛如雨洛陽臨淮
小睥睨御史立奏投裔上從來桑門喜嘲競舉國冠
巾禁無語古傳東海會揚塵君看此地亦荆榛霓旌
仙仗空遺堵黻缺臺傾知幾春牧兒驅牛齧庭草誰
記劍佩來朝真斜陽却上筍輿去溝水泠泠愁殺人
登荔枝樓

平羌江水接天流涼入簾櫳已似秋喚作主人元是
客知非吾土強登樓閑憑曲檻常忘去欲下危梯更
小留公事無多廚釀美此身不負負嘉州 薛能詩不負
嘉州只負身

再賦荔枝樓

只道文書撥不開未妨高處獨徘徊山橫瓦屋披雲
出水自泮桐裂地來暝入簾陰吹細雨涼生樓角轉
輕雷癡頑也擬忘鄉國不奈城頭暮角哀

能仁院前有石像丈餘蓋作大像時樣也

江閣欲開千尺像雲龕先定此規模斜陽徙倚空三
數嘗試成功自古無

劍南詩稿卷第三終

劍南詩稿目錄
卷第四

謁凌雲大像 凌雲醉歸作 獨遊城西諸僧舍 西林院 聽事前紫薇花二本甚盛戲題

絕句 同何元立蔡肩吾至東丁院汲泉煮茶二首 癸巳夏旁郡多苦旱惟漢嘉數得雨然

未足也立秋夜三鼓雨至明日晡後未止高下霑足喜而有賦二首 晚登望雲二首 立秋後

十日風雨凄冷獨居有感 晦日西窗懷故山 秋日懷東湖二首 小山之南作曲欄石磴

線繞如棧道戲作二篇 得成都諸友書勸少留嘉陽戲作 道院 醉中感懷 玻瓈江

夜思 雨夜懷唐安 迎詔書 秋夜遣懷 送客至江上 雨中至西林寺 休日登花將

軍廟小樓 深居 秋夜獨醉戲題 感事 醉鄉 夜讀岑嘉州詩集 次韻師伯渾見寄

社前一夕未昏輒寢中夜乃得寐 晚雨 社日 夜雨感懷 八月二十二日嘉州大閱

九月六夜夢中作笑詩覺而忘之明日戲追補一首 重九會飲萬景樓 久客書懷 初

報嘉陽除官還東湖有期喜而有作 聞勾龍司戶會客山亭送酒餞及橄欖并簡諸同僚

九月十六日夜夢駐軍河外遣使招降諸城覺而有作 何元立示九日詩臥病累日乃能次

韻 成都行 聞虜亂有感 醉歌 初寒 木山 寒夜遣懷 嘉陽絕無木屋偶得一枝

戲作 雨後登西樓獨酌 喜晴 曉出城東 寶劍吟 十月一日浮橋成以故事宴客凌

雲 聞王嘉叟計報有作 出城至呂公亭按 視修堤 登樓 醉中作四首 觀大散關圖

有感 嘉州守宅舊無後圃因農事之隙為種 花築亭觀甫成而歸戲作長句 連日扶病領

客殆不能支枕上懷故山偶成 余往與宇文叔介同客山南今年叔介客死臨安十月十一

日夜忽夢相從取架上書共讀如平生讀未竟 忽辭去留之不可曰欲歸披藥方既覺法然不

能已因賦此詩 金錯刀行 言懷 十月十日 九日與客飲忽記去年此時自錦屏歸山南道

中小臘今又將去此矣 冬日 十月十四夜 月終夜如晝 下元日五更詣天慶觀寶林寺

梅花四首 西園 胡無人 公無渡河 長門怨 長信宮詞 銅雀妓 得韓無咎書

寄使虜時宴東都驛中所作小闕 曉坐 斷碑數 夜行至平羌憩大悲院 迺益帥馬上

作 蜀酒歌 十一月八日夜燈下對梅花獨酌累日勞甚頗自慰也 醉後草書歌詩戲作

古藤杖歌 歲晚書懷 累日倦甚不能鶴客睡起戲作 種花 雨中登樓望大像 迎

赦呈王志夫李德孺師伯渾 冬日 雨中睡起 十二月初一日得梅一枝絕奇戲作長句

無題 快晴 獨坐 十二月十一日視築隄 題龍鶴菜帖 春愁曲 荀秀才送蠟梅

十枝奇甚 離嘉州宿平羌 瑞草橋道中作 遊修覺寺 晚步湖上 莫春 池上醉歌

四月五夜見螢 塞上曲 夜聞塔鈴及泉聲

劍南詩稿卷第四

宋陸游務觀

謁凌雲大像

出郭幽尋一笑新徑呼艇子截煙津不辭疾步登重閣聊欲今生識偉人泉鏡正涵螺髻綠浪花不犯寶
跌塵一泉泓然正在壑下每歲漲水不能及佛足始知神力無窮盡丈六黃金果小身觀無量壽經云或現小身丈六八尺
凌雲醉歸作

峨眉月入平羌水數息吾行俄至此謫仙一去五百年至今醉魂呼不起玻璃春滿琉璃鍾玻璃春眉州酒名宦情苦薄酒興濃飲如長鯨渴赴海詩成放筆千觴空十年看盡人間事更覺麴生偏有味君不見蒲
萄一斗換得西涼州不如將軍告身供一醉
獨遊城西諸僧舍

我是天公度外人看山看水自由身蘚崖直上飛雙屐雲洞前頭岸幅巾萬里欲呼牛渚月一生不受庾公塵非無好客堪招喚獨往飄然覺更真
西林院

一邦盡對江邊像試比西林總不如院門對大像最正羣玉蕭森開士宅五雲飛動相君書寺額五字唐相裴微書適美可愛磴危漸覺山爭出屐響方驚閣半虛安得棄官長住此一盃香飯薦珍蔬

聽事前紫薇花二本甚盛戲題絕句
紅藥紫薇西省春從來惟慣對詞臣問囚自是羸官分無奈名花解笑人
同何元立蔡肩吾至東丁院汲泉煮茶

一州佳處盡裴回惟有東丁院未來身是江南老桑苧諸君小住共茶盃
又
雪芽近自峨眉得不減紅囊顧渚春旋置風爐清樾

下它年奇事記三人

癸巳夏旁郡多苦旱惟漢嘉數得雨然未足也
立秋夜二鼓雨至明日晡後未止高下霑足喜而有賦

畫簷鳴雨早秋天不喜新涼喜有年眼裏香杭三萬頃寄聲父老共欣然

又
五十衰翁髮半華猶能把酒醉天涯絲毫美政何曾有惟把豐年贈漢嘉
晚登望雲

一出修門又十年輩流多已珥金蟬衰如蠹葉秋先覺愁似鰥魚夜不眠輦路疎槐迎駕處苑城殘日泛湖天君恩未報身今老徒倚危樓一泫然
又

晚來煙雨暗江干烽火遙傳畫角殘看鏡功名空自許上樓懷抱若為寬青楓搖落新秋令白髮淒涼舊史官飽見少年輕宿士可憐隨處強追歡
立秋後十日風雨凄冷獨居有感

急雨鳴瓦溝尖風入窗罅紗籠耿青燈寂寂新秋夜誰言簿領中乃復有此暇稍繙書冊讀已念灰火跨那知是羈客恍若在家舍睡晚且熟眠洗沐官有假
明日晦日也

晦日西窗懷故山
今朝休日仍無客茶罷西窗臥解衣白髮已侵殘夢境綠苔應滿舊漁磯桃源雞犬塵凡隔杜曲桑麻夢想歸賴有小山聊慰眼幽篁叢桂雨霏霏

秋日懷東湖
小閣東頭罨畫池秋來長是憶幽期身如巢燕臨歸日心似堂僧欲動時病思羈懷惟付酒西風落日更催詩故知歲莫常多感不獨當年宋玉悲
又

罨畫池邊小釣磯垂竿幾度到斜暉青蘋葉動知魚

過朱閣簾開看燕歸歲晚官身空自閑途窮世事巧
相違邊州客少巴歌陋誰與愁城略解圍

小山之南作曲欄石磴繚繞如棧道戲作二篇
羈遊隨處得哦詩掃澗軒窗每恨遲已幻小山寬客
恨更添危磴作兒嬉偶留塞上寧無數徑返湖邊已
有期誰遣化工娛此老幽花微拆綠苔滋

又

吏退庭空剩得閑一窗如在翠微間半崖縈棧遊秦
路疊嶂生雲入剡山真有巖居臨絕壑但無漁艇繫
寒灣躡攀自苦君休笑寸步何曾不險難

得成都諸友書勸少留嘉陽戲作

一坐五十日癡頑良可哀新涼為醉地少認作慵煤
市柳風煙慘汀蘋歲月催遠官從漫浪垂老賴低回
市柳汀蘋皆屬唐安

道院

四壁長苔痕經旬掩綠樽雨聲清夢境燈影伴吟魂
搖落悲徂歲漂流憶故園擬驅無傑語千古愧湘沅

醉中感懷

早歲君王記姓名只今顛顛客邊城青衫猶是鶴行
舊白髮新從劍外生古戍旌旗秋慘淡高城刁斗夜
分明壯心未許全消盡醉聽檀槽出塞聲

玻璃江 眉州共飲亭蓋取東坡共飲玻璃江之句追懷舊遊

戲作以補西州樂府

玻璃江水千尺深不如江上離人心君行未過青衣
縣妾心先到峨眉陰金罇共酌不知曉月落煙渚天
橫參車輪無角那得住馬蹄不方何處尋空憑尺素
寄幽恨縱有綠綺誰知音愁來只欲掩屏睡無奈夢
斷聞疎磬 古樂府安得雙車輪一夜生四角唐人詩云長安塵土
中馬蹄圓重重郎馬蹄不方何處認郎蹤

夜思

蒼顏華鬢久低摧歎息何堪歲月催殘暑已隨團扇
去新涼還傍短檠來月痕澹澹侵苔砌雲葉蕭蕭覆

水臺簿領沈迷無日了試憑詩思洗氛埃

兩夜懷唐安

歸心日夜逆江流官柳三千憶蜀州小閣簾櫳頻夢
蝶平湖煙水已盟鷗螢依溼草同為旅雨滴空階別
是愁堪笑邦人不解事區區猶借陸君留 蜀人舊語謂
唐安有三千官柳四千琵琶溼螢依草沒梅宛陵詩

迎詔書

憶瞻鸞仗省門前扇影鞭聲下九天寂莫嘉州迎詔
處忽聞鼓吹却悽然

秋夜遣懷

江雲傍簷山雨細羈客空堂臥荒翳心如秋燕不安
巢迹似春萍本無抵官身奔走何時定病眼蒙籠惟
欲閉壯遊不復記墜鞭夜語誰能懷擁髻詩情已減
但微吟酒戒漸堅纔小嘖從今更擬著幽禪半世佞
俚真誤計

送客至江上

多事經旬不出城今朝送客此閑行郊原遠帶新晴
色人語中含樂歲聲天際斂雲山盡出江流收漲水
初平故園社友應惆悵五歲無端棄耨耕

雨中至西林寺

胸中荆棘費鉏耘正藉幽尋暫解紛不盡長江來畫
玉半空飛閣對凌雲昏昏橫靄憑軒見杳杳疎鐘隔
岸聞珍重山僧迎客意螭奩一縷起微熏 小軒下臨羊
江發源自大渡河

休日登花將軍廟小樓

林間繚緲出層樓欄角蒼茫萬頃秋曾是胸中著雲
夢不妨此地少遲留

深居

作吏難堪簿領迷深居聊復學幽棲病來酒戶何妨
小老去詩名不厭低零落野雲寒傍水霏微山雨晚
成泥自憐甫里家風在小摘殘蔬遠廢畦

秋夜獨醉戲題

弊袍羸馬遍天涯恰似伶優著處家社裏嫩醅初泛
蟻寒缸殘燼自成花幽窗照影烏巾折醉手題詩淡
墨斜莫恨久爲峨眉下客江湖歸去得雄誇

感事

清班曾見六龍飛晚落天涯遠日畿邊月空悲新雪
鬢京塵猶染舊朝衣江山壯麗詩難敵風物蕭條醉
絕稀賴有東湖堪吏隱奇聲籬菊待吾歸

醉鄉

醉鄉卜築亦佳哉但苦無情白髮催癡欲煎膠黏日
月狂思入海訪蓬萊辭巢歸燕先秋去泣露幽花近
社開莫惜傾家供作樂古人白骨有蒼苔

夜讀岑嘉州詩集

漢嘉山水邦岑公昔所寓公詩信豪偉筆力追李杜
常想從軍時氣無玉關路公詩多從戎西邊時所作至今
盡簡傳多昔橫槊賦零落財百篇崔嵬多傑句工夫
刮造化音節配韶護我後四百年清夢奉中履晚途
有奇事隨牒得補處羣胡自魚肉明主方北顧誦公
天山篇流涕思一遇

次韻師伯渾見寄

眉山漢嘉東西州估船日日到津頭不得講書一行
字倚遍臨江百尺樓黃鐘大呂忽復見繡段英瑤何
足酬願約青神王夫子來醉萬景作中秋

社前一夕未昏輒寢中夜乃得寐

祠事當行懼不任未昏強臥擁孤衾三更自笑元無
睡萬事從來忌有心簷角河傾耿耿秋耿耿床頭蟲語夜
悄悄若耶溪上蘋花老倦枕何人聽越吟

晚雨

蕭瑟度橫塘霏微映綠牆壓低塵不動灑急土生香
聲入楸梧碎清分枕簟涼回頭忽陳迹簷角挂斜陽

社日

百穀登場酒滿卮神林簫鼓晚清悲蟬依疎柳長言
處燕委空巢大去時幼學已忘那用忌鄉俗小兒女社

日忘習業微聾自樂不須醫古謂社酒治聾傷心故里雞
豚集父老逢迎正見思

夜雨感懷

老來每惜歲崢嶸幾爲巴歌判宿醒白帝草生時入
夢錦官花重更關情簾疎夜雨侵燈暈枕冷秋風遞
角聲定許何時理歸棹酒狂猶解賦蕪城

八月二十二日嘉州大閱

陌上弓刀擁寓公水邊旌旆卷秋風書生又試戎衣
窄山郡新添畫角雄郡署止角四枝近方增如式早事樞
庭虛畫策晚遊幕府媿無功草間鼠輩何勞磔要挽
天河洗洛嵩

九月六夜夢中作笑詩覺而忘之明日戲追補

一首

吾家笑疾自士龍我才雖卑笑則同紛紛世事何足
計盡付撫掌掀髯中清樽可醉風月好虛空萬象皆
絕倒問君此笑是喜不道得老夫輪一籌

重九會飲萬景樓

粲粲黃花手自持登高聊答此佳時纖雲不作看山
祟斗酒聊寬去國思落日樓臺頻徙倚西風鼓笛倍
淒悲彭城戲馬平生意強爲巴歌一解頭是日作竹枝
歌舞

久客書懷

行役飽看山沉綿刺得閑忘憂緣落魄耐老爲癡頑
射虎臨秦塞騎驢入蜀關芳洲蘭可佩幽磴桂堪攀
欸乃聲饒楚阪隅句帶蠻嘉州帶袁童諸蠻悠然長自
遣故里幾時還

初報嘉陽除官還東湖有期喜而有作

塞上經秋幾醉醒羈愁滅盡鬢邊青烽傳入詔登樓
看歌奏三巴忍淚聽好語忽聞還印綬歸心先已繞
林垌呼兒結束從今日鶯語燈花故有靈累夕燈有花
今早鶯聲遠舍皆紀實事

聞勾龍司戶會客山亭送酒殺及椒醪并簡諸

同僚

東山如高人吾輩豈易見君獨不出門終日與相面
陰晴煙雨月朝莫知幾變聞君交不瀆冠佩未嘗燕
弛張要有時一笑山未譴高秋得佳日折簡喚諸彥
風流非俗飲歌舞參筆硯但恨五日尹阻造三語掾
余方臥疾清樽遣分似霜果亦可薦爛醉君勿辭光景
真掣電

九月十六日夜夢駐軍河外遣使招降諸城覺
而有作

殺氣昏昏橫塞上東竝黃河開玉帳晝飛羽檄下列
城夜脫貂裘撫降將將軍懸上汗血馬猛士腰間虎
文韋階前白刃明如霜門外長戟森相向朔風卷地
吹 雪轉盼玉花深一丈誰言鐵衣冷徹骨感義懷
恩如挾纊腥臊窟穴一洗空太行北嶽元無恙更呼
斗酒作長歌要遣天山健兒唱

何元立示九日詩臥病累日乃能次韻

何郎戲寫菊花秋落筆縱橫豈易酬豪士乃能為老
伴寓公那得稱遺頭早衰不耐危亭冷 夜冷憑浩翁亭
欄杆得疾數日 獨臥空驚畫角愁病起尚思尋宿約一
樽從子醉東樓

成都行

倚錦瑟擊玉壺吳中狂士遊成都成都海棠十萬株
繁華盛麗天下無青絲金絡白雪駒日斜馳遣迎名
姝燕脂褪盡見玉膚綠鬟半脫嬌不梳吳綾便面對
客書斜行小草密復疎墨君秀潤瘦不枯風枝雨葉
筆筆殊月浸羅韞清夜徂滿身花影醉索扶東來此
歡墮空虛坐悲新霜點鬢鬢易求合浦千斛珠難覓
錦江雙鯉魚

聞虜亂有感

前年從軍南山南夜出馳獵常半酣玄熊蒼兕積如
阜赤手曳虎毛穆穆有時登高望鄠杜悲歌仰天淚
如雨頭顱自揣已可知一死猶思報明主近聞索虜

自相殘秋風撫劍淚沈瀾維陽入陵那忍說玉座塵
昏松柏寒儒冠忽忽垂五十急裝何由穿袴褶羞為
老驥伏櫪悲寧寧作枯魚過河泣 古樂府枯魚詩云枯魚過
河泣何時復還入作書與魴鱖相教謹出入

醉歌

我飲江樓上闌干四面空手把白玉瓶身遊水精宮
方我吸酒時江山入胸中肺肝生崔嵬吐出為長虹
欲吐輒復吞頗畏驚兒童乾坤大如許無處著此翁
何當呼青鸞更駕萬里風

初寒

江路常逢雨山城早得寒蘭凋初解佩菊老尚加餐
嘉陽有崇蘭以八九月感開 節物知何負情懷自鮮歡浮
生看已熟不必夢邯鄲

木山

枯楠千歲遭風雷披枝折幹吁可哀輪困無用天所
赦秋水初落浮江來嵌空宛轉若耳鼻峭瘦拔起何
崔嵬珠宮貝闕留不得忽出洲渚知誰推書窗正對
雲洞啓叢菊初傍幽篁栽是間著汝頗宜稱摩挲朝
莫真千回天公解事雨十日洗盡泥滓滋莓苔一丘
一壑吾所許不須更慕明堂材

寒夜遣懷

臨觴本不飲憂多自成醉四方行萬里不見埋憂地
憶昔入京都寶馬搖香鬃酣飲青樓夜歌聲在半空
去日不可挽華髮忽忽垂領娟娟蛾眉月相對作凄冷
月落照空床不寐聽寒蟬早知憂隨人何用去故鄉
嘉陽絕無木犀偶得一枝戲作

久客紅塵不自憐眼明初見廣寒仙只饒籬菊同時
出尚占江梅一著先重露溼香幽徑曉斜陽烘蕊小
窗妍何人更與蒸沉水金鴨華燈澹酒醉眠

雨後登西樓獨酌

老覺人間無一欣強尋高處看歸雲天空列嶂開圖
畫水落寒江學篆文四海道途行太半百年光景近

中分交遊賴有繼生在正向愁時能策勳

喜晴

西風吹雨冷凄凄道上行人白晝迷聊扶重雲取朝
日未容嘉穀臥秋泥年豐郡府疎文檄蠻道邊亭息
鼓聲奇語農家莫遊情冬閑正要飽鉏犁

曉出城東

渺渺長江下估船亭亭孤塔隱蒼煙不堪異縣蕭條
地更遇初寒慘澹天巾褐已成歸有約簞瓢未足去
無緣包羞強索侏儒米豪舉何人記少年

寶劍吟

幽人枕寶劍殷殷夜有聲人言劍化龍直恐與風霆
不然憤狂虜慨然思退征取酒起醉劍至寶當潛形
豈無知君者時來自施行一匣有餘地胡為鳴不平
十月一日浮橋成以故事宴客凌雲

陰風吹雨白晝昏誰掃雲霧升朝暾三江水縮獻洲
渚九頂秀色欲塞門西山下竹十萬箇江面便可馳
車轅巷無居人亦何怪釋未來看空山村竹枝宛轉
秋猿苦桑落瀲灩春泉渾衆賓共醉忘燭跋一徑却
下綠雲根走沙人語若潮卷爭橋炬火如星繁肩輿
睡兀到東郭空有醉墨留衫痕十年萬事俱變滅點
檢自覺惟身存寒燈夜永照耿耿賦長句招羈魂
聞王嘉叟訃報有作

嗚呼嘉叟今信死哭君寢門淚如水我初入都不妄
交傾倒如君數人耳籠燈躡雪夜相過劇論懸河駭
隣里地爐燔栗美芻豢石鼎烹茶當醪醴上書去國
何勇決作詩送君猶壯偉十年偶復過都門君方草
制西垣裏鬢鬢斑白面骨生心頗疑君遽如此西來
例不候達官每欲寄聲中輒止隻雞絮酒縱有時雙
魚素書長已矣生前客屢紛滿尸身後人情薄於紙
懸知海內莆陽公謂陳丞相獨念遺孤為經紀

出城至呂公亭按視修堤

翠靄橫山澹日昇孤亭聊借曲欄憑霜威漸重江初

縮農事方休役可與重阜護城高歷歷千夫在野築
登登寓公僅踵前人迹伐石西山恨未能西州築堤織
竹貯江石不三年輒壞意謂如吳中取大石甃成則可支久異日當有
辦此者

登樓

從來好境遍人間無奈勞生自欠閑江近時時吹白
雨樓高面面看青山歌聲哀怨傳三峽行色淒涼帶
百蠻嘉陽近諸蠻流落愛君心未已夢魂猶綴紫宸
班

醉中作

晚途豪氣未低摧一飲猶能三百盃爛爛目光方似
電動動鼻息忽如雷

又

駕鶴孤飛萬里風偶然來憩大峨東持盃露坐無人
會要看青天入酒中

又

曾賜琳腴白玉京狂歌起舞蜀人驚却騎黃鶴橫空
去今夕垂虹醉月明

又

畫角三終夜未闌醉憑飛閣喜天寬月明滿地江風
急吹落幽人紫綺冠

觀大散關圖有感

上馬擊狂胡下馬草軍書二十抱此志五十猶癯儒
大散陳倉間山川鬱盤紆勁氣鍾義士可與共壯圖
坡陀咸陽城秦漢之故都王氣浮夕靄宮室生春蕪
安得從王師汛掃迎皇輿黃河與函谷四海通舟車
士馬發燕趙布帛來青徐先當營七廟次第畫九衢
偏師縛可汗傾都觀受俘上壽大安宮復如正觀初
丈夫畢此願死與螻蟻殊志大浩無期醉膽空滿軀
嘉州守宅舊無後園因農事之隙為種花草亭

觀甫成而歸戲作長句

吾州山水西州冠正欠雄樓并傑觀奇峯秀嶺待彈

歷明月清風須判斷三峨舊不到郡齋創為詩人供
几案煙雲舒卷水墨圖草木青紅錦繡段一時冠蓋
共登臨百年父老俱驚惋繁回舞袖試弓彎宛轉歌
聲學珠貫佳人蜂蝶爭繞鬢上客龍蛇看揮翰寓公
雖作一月留梅發東湖歸思亂兒戲聊成此段奇陳
迹應留後人數明朝艇子泝平羌却伴謫仙遊汗漫
連日扶病領客殆不能支枕上懷故山偶成
已強迂疎假印章更扶衰病主孟觴功名已判初心
負豪俠都無故態狂靜覺此身猶外物賴思與世永
相忘清泉白石生來事曲几明窗味最長

余往與宇文叔介同客山南今年叔介客死臨
安十月十一日夜忽夢相從取架上書共讀如
平生讀未竟忽辭去留之不可曰欲歸投藥方
既覺泫然不能已因賦此詩

羈魂顛顛遠相尋髡斷肩寒帶苦吟歸投藥方緣底
事知君死抱濟時心

金錯刀行

黃金錯刀白玉裝夜穿窗扉出光芒丈夫五十功未
立提刀獨立顧八荒京華結交盡奇士意氣相期共
生死千年史策取無名一片丹心報天子爾來從軍
天漢濱南山曉雪玉嶙峋嗚呼楚雖三戶能亡秦豈
有堂堂中國空無人

言懷

蘭碎作香塵竹裂成直紋炎火熾崑岡美玉不受焚
孤生抱寸志流離敢忘君釀桂餐菊英潔齋三沐熏
孰云九關遠精意當徹聞捐軀誠有地賈勇先三軍
不然齎恨死猶冀揚清芬願乞一棺地葬近要離墳
十月十九日與客飲忽記去年此時自錦屏歸

山南道中小獵今又將去此矣

去年縱獵韓壇側玉鞭自探南山雪今年痛飲蜀江
邊金盃却吸峨眉月竹枝歌舞新教成凄怨傳得三
巴聲城頭築觀出雲雨峨眉眉正與闌干平酒酣詩就

擲盃去醉蹋玻璃江上路懸知幽磴斷橋邊已有梅
花開半樹

冬日

短景忽忽過新寒疊疊來客遊聊戲耳世事亦悠悠
綠動連村麥香吹到處梅錦城花柳窟歸去看春回
十月十四夜月終夜如晝

月從海東來徑尺鏗銀盤西行到峨眉玉宇萬里寬
幽人耿不寐弄影清夜闌五城十二樓縹緲香霧間
不知何仙人亭亭倚高寒欲語不得往悵望冰雪顏
叩頭儻見哀容我躡素鸞掬露以為漿屑玉以為餐
冷泠漱齒頰皓皓濯肺肝逝將從君遊人間苦無歡
下元日五更詣天慶觀寶林寺

朝罷琳宮謁寶坊強扶衰疾具簪裳擁裘假寐籃輿
穩夾道吹煙樺炬香樓外曉星猶磊落山頭初日已
蒼涼鳴鶴應有高人笑五斗驅君早夜忙

梅花

老厭紛紛漸鮮歡愛花聊復客江干月中欲與人爭
瘦雪後偷憑笛訴寒野艇幽尋驚歲晚紗巾亂插醉
更闌尤憐心事淒涼甚結子青青亦帶酸

又

月地雲階暗斷腸知心誰解賞孤芳相逢只怪影亦
好歸去始驚身染香渡口耐寒窺淨綠橋邊凝怨立
昏黃與卿俱是江南客剩欲尊前說故鄉

又

玄冥行令肅冰霜牆角疎梅特地芳屑玉定煩修月
戶堆金難買破天荒了知一氣環無盡坐笑千林凍
欲僵力量世間誰得似挽回歲律放春陽

又

折得名花伴此翁詩情恰在醉魂中高標不合塵凡
有尤物真窮造化功霧雨更知仙骨別鉛丹那悟色
塵空前身姑射疑君是問道端須順下風

西園

半掩朱門薛徑斜翠屏繡谷忽發銜高高下下天成
景密密疎疎自在花江近夕陽迎宿鷺林昏殘角促
歸鴉吾舟已繫津南岸喚客猶能一笑諱
胡無人

鬢如蠟毛磔面如紫石稜丈夫出門無萬里風雲之
會立可乘追奔露宿青海月奪城夜蹋黃河冰鐵衣
度磧雨颯颯戰鼓上隴雷憑憑三更窮虜送降款天
明積甲如丘陵中華初識汗血馬東夷再貢霜毛鷹
羣陰伏太陽昇胡無人宋中興丈夫報主有如此笑
人白首蓬窗燈

公無渡河聞雅安守獨死於嘉陵江代其家人作
大莫大於死生親莫親於骨肉河不可馮今非有難
知言之不從今繼以痛哭望雲九井兮白浪嗟峨劍
肝瀝血兮不從奈何秋風颯颯兮紙錢投波從公於
死今下鮑蛟鼉
長門怨

寒風號有聲寒日慘無暉空房不敢恨但懷歲莫悲
今年選後宮連娟千蛾眉早知獲譴速悔不承恩遲
聲當徹九天淚當達九泉死猶復見思生當長棄捐
長信宮詞

憶年十七兮初入未央獲待步輦兮恭承寵光地寒
祚薄兮自貽不祥讒言乘之兮辜釁日彰禍來嗟峨
兮勢如壞牆當伏重誅兮鼎耳劍鉞長信雖遠兮匪
棄路旁歲給絮帛兮月賜稻梁君舉玉食兮犀箸誰
嘗君御朝衣兮誰進熏香婕妤才人兮儼其分行千
秋萬歲兮永奉君王妾雖益衰兮尚供蠶桑願置蘭
館兮組織玄黃欲訴不得兮仰呼蒼蒼佩服忠貞兮
之死敢忘

銅雀妓
武王在時教歌舞那知淚灑西陵土君已去兮妾獨
生生何樂兮死何苦亦知從死非君意偷生自是慚
天地長夜昏昏死實難孰知妾死心所安

得韓无咎書寄使虜時宴東都驛中所作小闕
大梁二月杏花開錦衣公子乘傳來桐陰滿第歸不
得金轡玲瓏上源驛上源驛中搥畫鼓漢使作客胡
作主舞女不記宣和妝盧兒盡能女真語書來寄我
宴時詩歸鬢知添幾縷絲有志未須深感慨築城會
據拂雲祠唐中受降城在拂雲祠

曉坐
低枕孤衾夜氣存披衣起坐默忘言餅花力盡無風
墮爐火灰深到曉溫空臺時時聞鼠齧小窗一一送
鴉翻悠然忽記幽居日下榻先開水際門

斷碑歎興元姚節度圍以折碑爲石荀文潛可識蓋梁蕭懿
墓碑隨文爲太子時撰書法道美可愛
二蕭同起南蘭陵正如文叔與伯升至今人悲大蕭
死齋恨不見梁家與崇崇之陵久爲谷豈惟羣盜分
珠玉斷碑槎牙棄道邊文字班班猶可讀剝剝苔蘚
一悽然俯仰人間幾變遷世人作碑君勿晒千載園
林須石荀

夜行至平羌憩大悲院
憶昨遊天台夜投石橋宿水聲亂人語炬火散山谷
穿林有驚鶻截道多奔鹿今夕復何夕此境忽在目
蒼茫破十里清淺溪數曲微霜結衰茸落葉拂帽屋
下馬憩村寺頽然睡清熱覺來窗已白殘燈猶煜煜
迂益帥馬上作

蜀酒歌
漢州鵝黃鸞鳳雛不驚不搏德有餘眉州玻黎天馬
駒出門已無萬里塗病夫少年夢清都曾賜虛皇碧
琳腴文德殿門晨奏書歸局黃封羅百壺十年流落
狂不除遍走人間尋酒壚青絲玉瓶到處酤鵝黃玻
黎一滴無安得豪士致連車倒瓶不用杯與盃琵琶
如雷聒坐隅不愁渴死老相如

十一月八日夜燈下對梅花獨酌累日勞甚頗自慰也

犇走人間無已時夜窗喜對出塵姿移燈看影憐渠瘦掩戶留香笑我癡冷豔照杯欺麴蘖孤標逼硯結冰澌本來難入繁華社莫向春風怨不知

醉後草書歌詩戲作

朱樓矯首隘八荒綠酒一舉累百觴洗我堆阜崢嶸之胸次寫為淋漓放縱之詞章墨翻初若鬼神怒字瘦忽作蛟螭僵寶刀出匣揮雪刃大舸破浪馳風檣紙窮擲筆霹靂響婦女驚走兒童藏往時草檄喻西域颯颯聲動中書堂余書草丞相魯公以下與夏國主書於政事堂一收朝跡忽十載西掠二巴窮夜郎山川荒絕風俗異積有酒笑猶能狂醉中自脫頭上曠綠髮未許侵微霜人生得喪良細事孰謂老大多悲傷

古藤杖歌

我有古藤杖天矯蛟龍形生於峭壁絕欄上乃是會稽山陰之蘭亭歷吳入楚上巴峽北遊直看秦山青夜飛或隨暴雨去日歸常帶流潦腥與子扶攜各老大勿復狡獪誇神靈惜惜從此常倚壁聽我夜誦黃庭經

歲晚書懷

殘歲堂堂去新春鼎鼎來夢移鄉國近酒挽壯心回暖律初催柳晴光併上梅東湖有歸日衰抱得頻開已遣人逐新守

累日倦甚不能觸客睡起戲作

粉闌紅蕩罇俎薄不如止酒得安眠無心已破浮生夢有力聊輕造化權脫髮滿梳真老矣斷香縈几故脩然晚知古佛中邊語正合蒙莊內外篇

種花

西園作戲喚春回桃李陰陰二萬栽不是無心看開

遍錦江煙柳待歸來時將還成都

雨中登樓望大像

去年寒雨中騎驢度劍閣今年當此時臥聽邊城柝巍巍千尺像與我兩寂寞交遊闊四海此老差可託但當頻自省諸惡誓莫作時時一憑高相望要不怍桑間戒三宿堅坐豈渠樂却應輸老夫新春買芒屨

迎赦呈王志夫李德孺師伯渾

平明置騎傳詔函帝意欲與東皇參青城回仗國人喜金鷄銜赦天恩覃吾君愛民靡不到黃紙字密如吳蠶紀元故事極用九聖政盡美方登三赦書改明年元嗟余久已去魏闕夢想豹尾猶珍穆過郊一月方拜赦始知身落天西南歡呼已怪衰病愈蹈舞更覺春風酣何當與子歸共載二月起枕江如藍

冬日

幸是元無了事癡偷閑聊復學兒嬉午窗弄筆臨唐帖夜几研朱勘楚詞山暖已無梅可折江清猶有蟹堪持舊交乖隔音塵斷安得歌呼共一卮蜀中惟嘉州有蟹

雨中睡起

磔磔寒禽無定棲纖纖小雨欲成泥松鳴湯鼎茶初熟雪積爐灰火漸低一氣推移均野馬百年蒙覆等醴鷄青山黃葉蘭亭路憶喚鄰翁共架犁

十二月初一日得梅一枝絕奇戲作長句今年於是四賦此花矣

高標已壓萬花羣尚恐嬌春習氣存月兔擣霜供換骨湘娥鼓瑟為招魂孤城小驛初飛雪斷角殘鐘半掩門盡意端相終有恨夜寒娥玉倩誰溫

無題

畫閣無人晝漏稀離悰病思兩依依釵梁雙燕春先到竿柱羈鴻暖不歸迎得紫姑占近信裁成白紵奇征衣晚來更就隣姬問夢到遼陽果是非

快晴

地闌天開斗柄回今朝紅日遍池臺新陽蘇醒春前柳輕暖醫治雪後梅瓦屋螺青披霧出錦江鴨綠抱

山來衰翁也逐兒童喜旋撥文書近酒盃
獨坐

巾帽軟傾短髮稀青燈照影夜相依窮邊草木春遲
到故國湖山夢自歸茶鼎松風吹謾謾香奩雲縷散
穉辭羸驂敢復和鑿望只願連山首耜肥
十二月十一日視築隄

江水來自蠻夷中五月六月聲摩空巨魚穹龜牙鬚
雄欲取闐市爲龍宮橫隄百丈臥霧虹始誰築此東
平公今年樂哉適歲豐吏不相倚勇赴功西山大竹
織萬籠船舸載石來土窮橫陳屹立相疊重置力尤
在水廟東我登高原相其衝一盾可受百箭攻蜿蜒
其長高隆隆截如長城限羌戎安得椽筆記始終插
江石崖堅可礮

題龍鶴菜帖 東坡先生元祐中與其里人史彥明主簿書

云新春龍鶴菜羹有味舉箸想復見憶邪

先生直玉堂日羞太官羊如何夢故山曉枕春蔬香
春蔬尚云爾况我舊朋友萬里一紙書殷勤問安否
先生高世人獨恨不早歸坐令龍鶴菜猶愧首陽薇

春愁曲 客話成都戲作

慮羲至今三十餘萬歲春愁歲歲常相似外大瀛海
環九洲無有一洲無此愁我願無愁但歡樂朱顏綠
鬢常如昨金丹九轉徒可聞玉兔千年空擣藥蜀姬
雙鬢姪姪嬌醉看恐是海棠妖世間無處無愁到底
事難過萬里橋

荀秀才送蠟梅十枝奇甚爲賦此詩

與梅同譜又同時我爲評香似更奇痛飲便判千日
醉清狂頓減十年衰色疑初割蜂脾蜜影欲平欺鶴
膝枝插向寶壺猶未稱合將金屋貯幽姿

離嘉州宿平羌

初挈囊衣宿水村蕭然一掃舊業痕本來信手忘工
拙却爲無心少怨恩自笑遠遊諸馬上已營小築老
雲根淡煙疎雨平羌路便恐從今入夢魂

瑞草橋道中作

經年簿書無少暇款段今朝欣一跨瑞草橋邊水亂
流青衣渡口山如畫老翁醉著看龍鍾小婦出窺閨
姪姪荒陂吹笛晚呼牛古路倚梯晨采柘殘花零落
不禁折香草丰茸如可藉郵亭慈竹筍穿籬野店蒲
萄枝上架功名垂世端有數利欲昏心喜乘罽羈窮
自笑豈人謀閒放每欲從天借草根蟲語祇自悲風
裏蓬征安稅駕祖師補處浣花村會傍清江結茆舍

遊修覺寺

上盡蒼崖百級梯詩囊香椀手親攜山從飛鳥行邊
出天向平蕪盡處低花落忽驚春事晚樓高剩覺客
魂迷興闌掃榻禪房臥清夢還應到剡溪

晚步湖上

雲薄漏春暉湖空弄夕霏沾泥花半落掠水燕交飛
小倦聊扶策新晴旋減衣幽尋殊未已畫角喚人歸
莫春

忙裏偷閑慰晚途春來日日在東湖凭欄投飯看魚
隊挾彈驚鴉護雀難俗態似看花爛慢病身能鬪竹

清癯一樽是處成幽賞風月隨人不用呼

池上醉歌

我欲築化人中天之臺下視四海皆飛埃又欲造方
士入海之舟破浪萬里求蓬萊取日挂向扶桑枝留
春挽回北斗魁橫笛三尺作龍吟腰鼓百面聲轉雷
欽如長鯨海可竭玉山不倒高崔嵬半酣脫幘髮尚
綠壯心未肯成低摧我妓今朝如花月古人白骨生
蒼苔後當視今如視古對酒惜醉何爲哉

四月五夜見螢

蜀州官居富水竹四月螢火燒梁飛流年迫人不相
貸客子倦遊何日歸

塞上曲

三尺鐵如意一枝玉馬鞭笑把出門去萬里行無前
當道何崔嵬云是玉門關方當置屯守征人何時還

馬色如雜花，鏗光若流水。肅肅不敢譁，遙望但塵起。
日落戍火青，煙重塞垣紫。回首五湖秋，西風開芡觜。

夜聞塔鈴及泉聲

山泉瀉幽竇，塔鈴搖天風。清音無時盡，靜夜尤瓌瓏。
嗟我走紅塵，市聲聒欲聾。多生耳根業，賴此一洗空。
夢騎白鳳皇，佩玉朝珠宮。覺來撫枕歎，月滿草堂中。

劍南詩稿目錄

卷第五

曉數 苦筍 月下作二首 小宴 小閣納涼 晨雨 湖上荷盛出戲作長句 雨後集

湖上 過大蓬嶺度繩橋至杜秀才山莊 宿杜氏晨起遇雨 翠園院 野飯 化成院

慈雲院東閣小憩 遊靈鷲寺堂中僧闌然獨作禮開山定心尊者尊者唐人有問法者輒點

曾示之時號點點和尚 桃源 白塔院 急雨 東湖新竹 睡起試茶 五月五日蜀州

放解勝第一人楊鑑具慶下孤生愴然有感 病酒新愈獨臥蘋風閣戲書 神君歌 讀胡

基仲舊詩有感 夏日湖上 對酒數 病後暑雨書懷 雨聲 同何元立賞荷花追懷鏡

湖舊遊 小樓 怡齋 龍湫歌 月夕 蒸暑思梁州述懷 湖上晚歸 秋聲 觀小孤

山圖 飲酒 北窗梧葉坐間落四五有感 神山歌 久雨 古意 自唐安之成都 度

作 故袍 寓寶相有作 寓驛舍 題宇文子友所藏薛公鶴 宴西樓 月中歸驛舍

江濱池醉歸馬上作 離成都後却寄公壽子友德稱 晨至湖上二首 池上見魚躍有懷

姑熟舊遊 六月二十五日曉出郊 作雨不成終夜極涼時去立秋五日也 池上晚雨

五十 記夢 凭欄 聽琴 秋思 醉書樊氏莊龜泉 書懷二首 秋思三首 東園

晚步 秋夜讀書戲作 太平花 日莫至湖上 秋興 秋色 秋聲 觀長安城圖 雨

中作 夜讀了翁遺文有感 雷 龍眠畫馬 秋夜池上作 秋雨 臥病 夢入禪林有

老宿方陞座或云通悟禪師 蜀州大閱 放懷亭獨立有感 九月三日同呂周輔教授遊

大邑諸山 次韻周輔道中二首 憩黃秀才書堂 夜宿鶴鳴山 次韻周輔霧中作 山

中得長句戲呈周輔并簡朱縣丞 擣藥鳥出山 平雲亭 高秋亭 九日小疾不出

九日試霧中僧所贈茶 我有美酒歌 次韻師伯潭見寄 自江源過雙流不宿徑行之成

都 過綠楊橋 五鼓自簇橋入府 客多福院晨起 雨中出謁歸晝臥 長歌行 夜食

炒栗有感 秋夜懷吳中 遊三井觀 僂遊閣 寓居小養纔表丈戲作 送華師從劍州

張祕書之招

劍南詩稿卷第五

宋陸游務觀

曉數

一鴉飛鳴窗已白推枕欲起先歎息翠華東巡五十年赤縣神州滿戎狄主憂臣辱古所云世間有粟吾得食少年論兵實狂妄諫官劾奏當竄極不為孤囚死嶺海君恩如天豈終極容身有祿愧滿顏滅賊無期淚橫臆未聞舍桃薦宗廟至今銅駝沒荆棘幽并從古多烈士悒悒可令長失職王師入秦駐一月傳檄足定河南北安得揚鞭出散關下令一變旌旗色

苦筍

藜藿盤中忽眼明駢頭脫襖白玉嬰極知耿介種性別苦節乃與生俱生我見魏徵殊媚嫵約束兒童勿多取人才自古要養成放使干霄戰風雨

月下作

池上迎微風柏間躡涼月冷然醉夢醒一洗煩惱熱嗟予世外人火食常嘔噎易求雲表露難覓大古雲沉欲試秘方瓊漿和玉屑俛首居俗間愁若鷹在隄惟茲服月芒比歲稍得訣但令天無雲豈復計圓缺玉鉤定誰挂冰輪了無轍詩成獨高詠靈府炯澄澈

又

畏暑不巾襪步月楮短筇瘦身髮鬢蒼顧影如孤松徑幽螢闔開池漲魚險噉飛泉穿北垣珠玉相撞春東湖更奇絕百畝銀初鎔但能抱琴往絕恨欠鶴從重露傾荷盤微風墮芙蓉歡言笑清夜縹渺吹疎鐘空中飛僊人粲然冰雪容笑我老塵世不記瑤臺逢

小宴

洗君鸚鵡盃酌我蒲萄醅冒雨鷺不去過春花續開英雄漫青史富貴亦黃埃今夕湖邊醉還須秉燭回

小閣納涼

侵牀月白病全蘇掠面風清酒欲無渺渺塘陰下鷗鷺蕭蕭秋意滿菰蒲縱輪煙渡橫孤艇也勝京塵暗九衢莫遣良工更摹寫此詩端是臥遊圖

晨雨

揮汗驅蚊廢夜眠清晨一雨便偷然涼生池閣衣巾爽潤入園林草木鮮青蕚雲映開闌茗翠襲玉液取寒泉飯餘一枕華胥夢不怪門生笑腹便

湖上筍盛出戲作長句

艤鱗穿苔瑋瑋簪按行日夜待成林養渠百尺千霄氣見我平生及物心剩插藩籬憂玉折豫期風雨聽龍吟明年又徙囊衣去誰與平安報好音

雨後集湖上

野水交流自滿畦芳池新漲恰平堤花藏密葉多時在鶯占高枝盡日啼繡袂寶帚催結束金尊翠杓共提攜白頭自喜能狂在笑雙鬢殘落醉題

過大蓬嶺度繩橋至杜秀才山莊

度笮臨千仞梯山躡半空溼雲朝暮雨陰壑古今風亭觀參差見闌干詩曲通柳空叢篠出松偃翠蘿蒙負籠銀釵女鋤畬鶴髮翁何由有餘俸小築此山中宿杜氏晨起遇雨

怪藤十圍蔽白日老木千尺干青霄水泛夏難竹作舫陸行跨空繩繫橋陰陰古屋精靈語慘慘江雲蛟

鶴騎吾道非耶行至此諸公正散紫宸朝

翠團院

曉入翠團寺擁門千萬峯山空鳥自命林茂鹿相從嫋嫋風中作昏昏雲外鐘將歸興未盡清嘯倚長松

野飯

蕙實炊明珠苦筍饌白玉輪囷斷區芋芳辛采山藪山深少鹽酪淡薄至味足往往八十翁登山逐犇鹿可憐城南社零落依澗曲面餘作詩瘦趨拜尚不俗杜氏自譜以爲子美下硤留一子守院花舊業其後避成都亂徙眉州大堰或徙大蓬云病夫益倦遊願顧老窮谷是家吾所

暮食菜如食肉時能喚隣里小甕酒新漉何必懷故鄉下箸厭雁鶩

化成院

翠園至化成七里幾千盤肩輿掀海淖歎息行路難
綠坡忽入谷蜿蜒蒼龍蟠孤塔插空起雙栴當夏寒
飛展到上方漸覺所見寬前山橫一几稻陂白漫漫
肥僧大腰腹呀喘趨迎官走疾不得語坐定汗未乾
高人遺世事跡穴蒲團作此望塵態豈如返巾冠
日落聞鹿鳴感我平生歡客遊殊未已芳歲行當闌
慈雲院東閣小憩

橫閣院東偏倚然拂榻眠香濃煙穗直茶嫩乳花圓
巖倚團團柱筒分細細泉憑誰為題版勝作小壺天

遊靈鷲寺堂中僧闐然獨作禮開山定心尊者
尊者唐人有問法者輒點胸示之時號點點和尚

半世吳松理釣絲蜀山著脚豈前知雲堂已散三三
衆卯塔空尋點點師戴雪數峯臨峭絕浮花一水舞
淪漪寺西望雪山下臨桃源勞生未盡能重到應掃流塵

讀此詩
桃源
木缺橋橫一徑微斷煙殘鷺晚霏十年勸客明雙
眼五月遊人換夾衣翠峽束成寒練靜蒼崖澗落素
皎飛爾來自笑癡頑甚著處吟哦不記歸

白塔院 時小雨初霽
冷翠千年玉浮嵐萬幅屏凭欄遊微雨挈笠遇歸僧
殘日明樓角屯雲擁塔層溪山屬閑客隨意倚枯藤

急雨

炎炎赤日當空燒簿書圍坐如居窰黑雲壓蒼忽
堯急雨鼎來風駕潮彈壓旱氣蘇枯焦祝融退聽不
敢驕父老歌舞看稻苗殺雞買酒更相邀我亦巾褐
涼蕭蕭酒醒點滴聞梧蕉珍簟不御扇罷搖安用萬
里登凌敲

東湖新竹

插棘編籬謹護持養成寒碧映淪漪清風掠地秋先
到赤日行天午不知解箨時聞聲箨箨放梢初見葉
離離官閑我欲頻來此枕簟仍教到處隨

睡起試茶

笛材細織含風漪蟬翼新裁雲碧帷端谿硯璞斲作
枕素屏畫出月墮空江時朱欄碧甃玉色井自候銀
餅試蒙頂門前剝啄不嫌渠但恨此味無人領

五月五日蜀州放解榜第一人楊鑑具慶下孤
生愴然有感

甲午五月之庚寅淵魚躍起三江津震雷霖雨夜達
晨我知決定非凡鱗人生富貴不逮親萬鍾五鼎空
酸辛少年得祿差常珍調節滋味躬爨薪徹食奉盟
授悅巾此樂豈復論賤貧嗟我不孝負鬼神俯仰二
紀悲如新仕宦空飽息與嬪左右供養無復辰子行
射策對楓宸絲衣楚楚華紳泝江亟歸娛老人切
勿著意長安春

病酒新愈獨臥蘋風閣戲書

用酒驅愁如伐國敵雖摧破吾亦病狂呼起舞先自
困閉戶垂帷真廟勝今朝屏事臥湖邊不但心空兼
耳靜自燒沉水淪紫筍聊遣森嚴配堅正紫筍蒙頂之
上者其味尤重 追思昨日乃可笑倚醉題詩恣豪橫逝
從屈子學獨醒免使曹公怪中聖

神君歌 謁英顯廟作

泰山可為礪東海可揚塵惟有壯士志死生要一伸
我夢神君自天下威儀奕奕難具陳飛龍駕車不用
馮訶前殿後皆鬼神奇形詭狀密如魚鱗鱗鱗鱗鱗
爭扶車輪黑霧白旄其來無垠黃霧紫氣合散輪困
考錄魑魅號呼吟呻約束蛟螭天矯服馴後車百兩
載笑人中禱鮮麗工笑鑿金尊翠杓溢芳醇琵琶篋
篋飾怪珍世間局促常悲辛神君歡樂千萬春嗚呼
生不封侯死廟食丈夫豈得抱志長默默

讀胡基仲舊詩有感

少日飛騰翰墨場，莫年相見尚昂昂。藏沈沙舟畔千帆過，翦翻籠邊百鳥翔。訪古每思春並轡，說詩仍記夜連牀。凶凶去日多於髮，不獨悲君亦自傷。

夏日湖上

烏帽筇枝散客愁，不妨胥史雜沙鷗。迎風枕簟平欺暑，近水簾櫳探借秋。茶竈遠從林下見，釣筒常向月中收。江湖四十餘年夢，豈信人間有蜀州。

對酒歎

鏡雖明不能使醜者妍，酒雖美不能使悲者樂。男子之生，桑弧蓬矢射四方，古人所懷何磊落。我欲北臨黃河，觀禹功；犬羊腥羶塵漠漠，又欲南適蒼梧，弔虞舜。九疑難尋，眇聯絡，惟有一片心，可受生死託。千金輕擲，重意氣，百舍孤征，赴然諾。或攜短劍，隱紅塵，亦入名山燒大藥。兒女何足顧，歲月不貸人。黑貂十年弊白髮，一朝新半酣。耿耿不自得，清嘯長歌裂金石。曲終四座慘悲風，人人掩淚無人色。

病後暑雨書懷

髮毛蕭颯疾初平，雲物輪囷氣未清。水漲小亭無路到，雨多幽草上牆生。窗昏頓減讎書課，屋老時聞墮瓦聲。止酒亡聊還自笑，少年豪飲似長鯨。

雨聲

暑氣滿天地，薄莫加煩促。清風吹急雨，集我北窗竹。竹聲蕭蕭固自奇，況得雨聲相發揮。令人忽憶雲門寺，半夜長松墮雪時。

同何元立賞荷花追懷鏡湖舊遊

少狂欺酒氣，吐虹一笑未了千觴空。涼堂下簾人似玉，月色冷透湘竹。三更畫船穿藕花，花為四壁船為家。不須更踏花底藕，但嗅花香已無酒。花深不見畫船行，天風空吹白紵聲。雙槳歸來弄湖水，水往湖邊人已起。卽今憔悴不堪論，賴有何郎共此尊。紅綠疎疎君勿數，漢嘉去歲無荷看。

小樓

吾州近在西山麓，雪山萬仞臨冰谷。小樓森森闕三伏，清簾疎簾對棋局。肌膚凄凜起芒粟，肝肺蟬噪塵瓊玉。香泉向夕初罷浴，桐竹生風吹細縠。九衢憧憧車擊轂，黃塵赤日汗可掬。還家欲休客，陸續借與此詩令一讀。

怡齋

東湖仲夏草樹荒，屋古無人亭午涼。萱房微呀不見日，筍籜自解時吹香。野藤蟠屈入窗罅，溼菌扶疎生屋梁。跨溝數椽最幽翳，漲水及檻雨敗牆。靜涵青蘋舞藻荇，閑立白鷺浮鴛鴦。芙蓉藥雖瘦，亦瀾漫照眼翠。蓋遮紅妝水紋珍，簟欲卷却團團素扇。扇復將天風，忽送塔鈴語喚覺，清夢遊瀟湘。

龍湫歌

環湫巨木老不花，齋淪千尺龍所家。爪痕入木欲數寸，觀者心掉不敢譁。去年大旱綿千里，禾禾不立苗麥垂死。林神社鬼無奈何，老龍欠伸徐一起。隆隆之雷浩浩風，倒卷江水傾虛空。鱗間出火作飛電，金蛇夜掣層雲中。明朝父老來，賽雨大巫吹簫小巫舞祠門。人散月娟娟，龍歸抱珠湫底眠。

月夕

我昔隱天台，夜半遊句曲。弄月過垂虹，萬頃一片玉。煙艇起菱唱，水風吹釣絲。更欲小徙倚，恐失初平期。今年遊青城，三十六峯巒白雲。反在下，使我毛骨寒天如玻璃，鐘倒覆溼銀海素壁行。其間草木盡光彩，姍娥顧我笑手撫玉兔兒。莫怪世人生白髮，秋風柱老欲無枝。

蒸暑思梁州述懷

宣和之末予始生，遭亂不及遊。司并從軍梁州亦少慰，土脈深厚泉流清。季秋嶺谷浩積雪，二月草木初抽萌。夏中高涼最可喜，不省舉手驅蟲蝨。藏冰一出賣滿市，玉璞堆積寒蟬噪。柳陰夜臥千駟馬，沙上露

宿連營兵胡笳吹墮濛水月烽燧傳到山南城最思
出甲戌秦隴戈戟徹夜相摩聲兩年劍南走塵土肺
熱煩促無時平荒池昏夜蛙閣閣食案白日蠅營營
何時王師自天下雷雨瀕洞收擒槍老生衰病畏暑
溼思上鄆杜開柴荆

湖上晚歸

地僻多幽事官閑慰古心晚花藏密葉新筍補疎林
碩果哇丁獻芳醪稚子斟碧雲遮日盡歸路更蕭森

秋聲

人言悲秋難為情我喜枕上聞秋聲快鷹下韝爪鶯
健壯士撫劍精神生我亦奮迅起衰病唾手便有擒
胡興放開雁落詩亦成筆力未饒弓力勁五原草枯
首著空青海蕭蕭風卷蓬草罷捷書重上馬却從鑿
駕下遼東

觀小孤山圖

江平風不生鏡面渺千里軻峨萬斛舟遠望一點耳
大孤江中央四面峭插水小孤特奇麗丹翠凌雲起
重樓邃殿神之家帳中美人粲如花遊人徒倚欄干
處俊鶻橫江東北去

飲酒

陸生學道欠力量胸次未能和益益百年自笑足悲
歡萬事聊須付酣暢有時堆阜起蟬噪大呼索酒燒
使平世間豈無道師與禪老不如閉門參麴生朋舊
年來散如水惟有鐫朽同生死一日不見令人慙晝
夜共處終無尤世言有毒在麴葉腐脅穿腸凝血脈
人生適意即為之醉死愁生君自擇

北窗梧葉坐間落四五有感

高梧一葉脫便覺秋不遠晨起髮滿梳吾衰孰云晚
古來追電足歷塊或小跪金鼓噪陳間此任豈驚寒
女子則多怨丈夫當自反默觀憂患機推見生死本
山林嫌獨住臺省亦袞袞會稽歸去來皋橋住差穩

神山歌

吾聞海中五神山其根戴以十五鼇一朝六鼇被釣
去岱真員嶠沉洪濤尚餘三山巋然在當時不沒爭
秋毫如何蓬萊又已淺忽見平地生藜藿伏義迄今
幾萬歲世事如火煎油膏娶妻不敢待翁命治水無
暇憐兒號避讓弄楚僅得免歷聘返魯終不遭老聃
關尹亦又死人實危脆無堅牢有口惟可飲醇醪有
手惟可持霜螯勿令他人復笑汝後有萬世來滔滔

久雨

昏昏風雨暗東湖恰似梅黃四月初高樹送聲驚客
枕小池分溜入清渠飛蚊蚊屏迹知何在團扇生塵已
暗疎須信西遊有奇事今年三伏夜觀書

古意

繼足飼飢鷹鷹飽意未平伏櫪豈不安老驥終悲鳴
士生固欲達又懼徒富貴素願有未伸五鼎淡無味
茅屋秋雨漏稻陂春水深長歌傾濁酒舉世不知心

自唐安之成都

出門猶苦兩度壘喜新晴日正車無影風高蓋有聲
疎疎稚苗立鬱鬱晚桑生宿醉行猶倦無人為解醒
度笮江原縣
翩翩飄飄笮受風行人疾走緣虛空同觀目眩淚花
上小跌身裏蛟涎中汗沾兩握色如菜數乘此險私
自怪九折元非叱馭行千金空犯垂堂戒此身老大
足悲傷歲歲天涯憶故鄉安得畫船明月夜滿川歌
吹入盤閭盤閭姑蘇二門各

故袍

青衫猶是國工裁破篋塵侵手自開莫笑渾如霜葉
闌兩朝曾見聖君來

寓寶相有作

掃地鏡面清燒香雲氣潤道人敬愛客危坐目不瞬
童子髡兩髦經禪亦精進我來願同龕歡喜無少吝
臨堂坐夜分佛燈看墮燼清晨爽如秋攝衣相問訊
道在氣埃表此語其殆信永愧小阮高超然棄鬢鬢

從子綽素其婦爲僧廬山

寓驛舍 子三至成都皆館于是

閑坊古驛掩朱扉又憩空堂綻客衣九萬里中鯤自
化一千年外鶴仍歸遠庭數竹饒新筍解帶量松長
舊圍惟有壁間詩句在暗塵殘墨兩依依

題宇文子友所藏薛公鶴

仙人騏驎絕世稀卯生凡禽似而非宮保妙筆窮化
機縞衣玄裳真令威千年華表聊一歸回首幸脫乘
軒譏喙吞不恨菘米微從吾曹遊安得肥

宴西樓

西樓遺跡尚豪雄錦繡笙簫在半空萬里因循成久
客一年容易又秋風燭光低映珠幃麗酒暈徐添玉
頰紅歸路迎涼更堪愛摩訶池上月方中

月中歸驛舍 六月十四日

歲歲常爲錦水行驛前雙埃慣逢迎草深閑院蟲相
語人靜空廊月自明病起酒徒嘲小戶才衰詩律媿
長城何時却泛耶溪路臥聽菱歌四面聲

江濱池醉歸馬上作

久住西州似宿緣笙歌叢裏著華顛每嗟相見多生
客却憶初來尚少年迎馬綠楊爭拂帽滿街丹荔不
論錢浮生何處非羈旅休問東吳萬里船

離成都後却寄公壽子友德稱

蕭條常閉爵羅門點檢朋儕幾箇存吾道將爲天下
裂此心難與俗人言逢時尚可還三代掩卷何由作
九原寄語龜城舊交道新涼殊憶共清尊

晨至湖上

劍南無劇暑長夏更宜人啼鳥常終日幽花不減春
荷香浮綠酒藤露落烏巾莫作天涯想儵然夢裏身

又

園古逢秋好身閑與懶宜空堂賞疎豁重閣望參差
竹粉有新意松風含古姿低回慚祿米官事少於詩
池上見魚躍有懷姑熟舊遊

雨過回塘漲碧漪幽人閑照角巾欹銀刀忽裂圓波
出宛似姑溪晚泊時

六月二十五日曉出郊

劍南作客歲再淹正如病翼遭精黏短衣射虎性所
樂不耐艱礙垂車轡今晨偶出得一快欣然意若脫
楚鉗曉星已疎更磊磊殘月欲盡猶纖纖雞鳴已與
夜漏斷鴉起似逐朝陽暹揚鞭走馬忘老憊自笑狂
疾何由破

作雨不成終夜極涼時去立秋五日也

雲映星芒澹風闌雨脚回體輕知病去氣爽喜秋來
疎放拋烏帽歌呼覆綠盃東歸定何日豔頰欲崔嵬
池上晚雨

烏紗白葛一枝筇審畫池邊遡晚風雲葉初生高樹
外雨聲已到亂荷中憑闌頓覺氣埃遠回首方知暑
毒空闌世萬端惟小忍何人更事似衰翁

五十

記夢
五十未名老無如衰疾何肺肝空激烈顏鬢已蹉跎
夜宴看長劍秋風舞短蓑此身如砥柱猶足閱頽波

夢泛扁舟禹廟前中流拂面風冷然樓臺縹緲知幾
壘雲物點綴多餘妍蓮房艾蒿采無主漁歌菱唱聲
滿川夢中了了知是夢却恐燕語來驚眠弄橈顧謂

共載客乖離不記經幾年即今相逢兩幻質轉盼變
滅如飛煙斯言未竟客大笑人生寓世豈獨堅元章
嘉叟君所見一別丹旄俱翩翩君知夢覺本無異勿
爲晝燄流饑涎我慚俯首夢亦斷尚覺細浪鳴船舷

凭欄

蟬嘒晚尤壯鴉栖久未安不成浮舴艋故作凭闌干
露重傾荷益風尖蹙艾盤新秋動歸思更覺五湖寬
聽琴

疎簾曲檻蘋風涼細腰美人藕絲裳綠藤水文穿矮
牀玉指纖纖彈履霜高林鶯囀日正長幽澗泉鳴夜

未央哀思不怨和而莊有齊淑女禮自防世人但惑青樓倡琵琶笙篴雜胡羌試聽一曲醒汝狂文姬指

法傳中郎

秋思

烈日炎天欲不禁喜逢秋色到園林雲陰映日初蕭瑟露氣侵簾已峭深衰髮凋零隨槁葉苦吟凄斷雜疎礎鴈來不得中原信撫劍何人識壯心

醉書

似閑有俸錢似仕無簿書似長免事任似屬非走趨病能加餐飯老與酒不疎婆娑東湖上幽曠足自娛時時喚客醉小閣臨紅蕖釣魚斫銀絲擘荔見玉膚檀槽列四十遺聲傳故都豈惟豪兩川自足誇東吳但恨詩不進榛荒失耘鋤何當掃纖豔傑作追黃初

樊氏莊龜泉

曳尾穹龜不負圖一泓寒碧照庭除醉中只合長來此臥聽蠻童放轆轤

書懷

楚澤巴江兩鬢殘夕陽又是倚闌干敢言日與長安遠惟恨天如蜀道難客枕五更歸夢短新詩千首後人看青簾白舫何時發醉聽琵琶興已闌

唐安弦索為

兩川冠

又

西風蕭瑟晚吹衣又見亭臯木葉飛已是中年頗作惡更堪秋日送將歸時何守還青城黃塵顏鬢無人識青史功名與願違彊把一盃還徑醉羈懷何必不依依

秋思

大面山前秋笛清細腰宮畔莫離平吳檣楚柁動歸思隴月巴雲空復情萬里風塵舊朝士百年鉛槧老書生水村漁市從今始安用區區海內名

又

巢燕成歸秋景奇頗容老子醉哦詩山晴更覺雲含

悲風定閑看水弄姿痛飲何由從次道竝遊空復憶安期天涯又作經年客莫對青銅恨鬢絲

又

西風吹葉滿湖邊初換秋衣獨慨然白首有詩悲蜀道清宵無夢到鈞天迂疎早不營三窟流落今寧直一錢把酒未妨餘興在試憑絲管錢流年

東園晚步

久客天涯憶故園疆名官寺只衡門秋桐蠹遍無全葉古柳吹斜出半根痛飲每思尊酒窄微官空羨布衣尊何時定下三巴去思臥孤舟聽斷猿

秋夜讀書戲作

別駕生涯似蠹魚簡編垂老未相疎也知賦得寒儒分五十燈前見細書

太平花

花出劍南似桃四出千百包駢萃成朵天聖中獻至

京師仁宗賜名太平花

扶牀踉蹌出京華頭白車書未一家宵旰至今勞聖主淚痕空對太平花

日莫至湖上

藍輿晚繞湖樂此新秋涼粉落竹方老紅凋荷更香天宇無纖雲仰視鴻鵠翔小樓久不登撫檻悲慨懷浮生寄一夢共盡無彭殤况我數月客轉眼促去裝顧作兒女態裴徊惜流光簷角迎夜月林間送斜陽四年已五遷終歲常違違安得一茆屋歸老樵風旁

會稽山南有溪名樵風涇其上即若耶

秋興

無處逢秋不黯然驛前斜日渡頭煙吟肩雅與寒臚稱歸夢頻爭社燕先百歲猶穿幾兩屐千詩不及一囊錢故應身世如團扇已向人間耐棄捐

秋色

一段淒涼傍酒盃中年剩作楚囚哀迢迢似伴明河出慘慘如隨落照來客路半生常淚眼鄉關萬里更危臺夢汀荻浦江南岸自入秋來夢幾回

秋聲

蕭瑟拂樹過中庭何處人間有此聲漲水雨餘晨放
剛騎兵戰罷夜還營閑憑曲几聽雖久疆撫哀我寫
不成暑退涼生君勿喜一年光景又崢嶸

觀長安城圖

許國雖堅鬢已斑山南經歲望南山橫戈上馬嗟心
在穿壘環城笑虜孱謀者言虜穿壘三重環長安城日莫
風煙傳隴上秋高刁斗落雲間二秦父老應惆悵不
見王師出散關

兩中作

方驚歲更端不覺秋已孟雖云暑毒埃無奈風雨橫
荷空湖面闊葉脫樹枝勁百卉亦已衰非復昔華盛
遊子老忘歸一榻臥衰病欲談無客來向壁弄塵柄
夜讀了翁遺文有感

秋雨蕭蕭夜不眠挑燈開卷意凄然吾曹自欲期千
載世論何曾待百年當日公卿笑迂闊即今河洛汚
腥擅陰陽消長從來事玩易深知屢絕編公有易傳

雷

君不見冬月雷深藏九地底寂默如寒灰紛紛槁葉
木盡脫蠢蠢蟄戶蟲爭坯堅冰積雪一朝盡風搖天
邊斗柄回雷聲却擊九地出殷殷似挾春俱來魚龍
振鱗熱睡醒桃李一笑韶顏開候耕老農喜欲舞掀
泥百艸知誰催惟嗟婦女不解事深屋揜耳藏嬰孩
吾聞陰陽有常數非時動靜皆為蓄無人為報阿香
道時來何至勞脚推

龍眠畫馬

國家一從失西睡年年買馬西南夷瘴鄉所產非權
奇邊頭歲入幾番一作數皮崔嵬瘦骨帶火印離立
欲不禁風吹圍人太僕空列位龍媒汗血來何時李
公太平官京師立仗慣見渥洼姿斷續歲久墨色暗
逸氣尚若不可羈賞奇好古自一癖感事憂國空餘
悲鳴呼安得毛骨若此三千疋銜枚夜度桑乾磧

秋夜池上作

短髮聽聽病骨輕臨池閑看露荷傾月明何與浮雲
事正向圓時故故生

秋雨

西山雲千重東園泥一尺可憐牆下路十日無履迹
空庭桐葉盡古甃土花碧坐懷江湖間病鴈溼羽翻
寒窗向人青衰髮垂領白孤吟更不寐聊伴候蟲嘖

臥病

人生寓一氣血脈日夜流秋毫或墜隔百體若相仇
嗟予少多難衣食拙自謀方寸叢百慮如箭集射侯
奔走連數歲呻吟劇茲秋生死亦何有成壞同一漚
胡為不自愛森然起戈矛一笑衆妄滅霜天鷹睨鷄
呼兒屏藥囊吾疾今其瘳

夢入禪林有老宿方陞座或云通悟禪師也

塵埃車馬何憧憧羣頭鼠目厭安庸樂哉夢見德人
容巍巍堂堂人中龍舉頭仰望太華峯攝衣欲往路
無從忽然夢斷難再逢空記說法聲如鐘

蜀州大閱八月二十七日

曉束戎衣一悵然五年奔走遍窮邊平生亭障休兵
日慘澹風雲閱武天戎隴舊遊真一夢渡遼奇事付
他年劉琨晚抱聞雞恨安得英雄共著鞭

放懷亭獨立有感

葦叢枯倒蓼花紅小立東湖更向東委肉本知居几
上翦翎何恨著籠中一筇信脚乾坤迮百榼燒愁寵
辱空誰道窮途知舊少此心念念與天通

九月三日同呂周輔教授遊大邑諸山

大邑知名杜叟詩山中仍值菊花時節旄落盡羈臣
老髀肉生來壯士悲豪舉每嫌盃綠淺癡頑頗怪鬢
絲遲廣文別乘官俱冷相伴寬為五日期

次韻周輔道中

山靈喜我馬蹄聲正用此時秋雨晴日淡風斜江上
路蘆花也似柳花輕

又
從來重九如寒食天氣微陰正自佳莫問茱萸賜朝

士一尊隨處有黃花
憩黃秀才書堂

吾生如虛舟萬里常泛泛終年厭作客著處思繫纜
道邊何人居花竹頗閑淡門庭淨如拭窗几光可鑑

堂上滿架書朱黃方點勘把茅容卜隣老死更誰憾
夜宿鶴鳴山山蓋張天師學道之地事與史合

西遊萬里已關天采藥名山亦宿緣老柏千霄如許
壽幽花泣露為誰妍苔黏石磴攔蘿上燈耿雲房掃

榻眠安得仙翁索米術一生留此弄寒泉索米謂五斗米法

次韻周輔霧中作
一日盤輿十過溪丹黃黃菊及佳時端居恐作他年

恨聯轡聊成此段奇側磴下臨重澗黑亂雲高出一
峯危何時關輔胡塵靜大華山頭更上期

山中得長句戲呈周輔并簡朱縣丞
鶴鳴山空無鶴來青霞嶂深天壁開千巖角逐互吞

吐一峯拔起矜崔嵬日光微漏潭見底青霞嶂碧玉潭皆霧中佳處水氣上薄雲成堆幽禽飛鳴報客至奇樹

璀璨知誰栽花藤怪蔓白晝暗犇緩落欵無時哀路
窮尚躡一千級忽見密竹藏樓臺共言神僧昔住此

至今光景如天台措筇負笠出復沒喜動婦人驚提
孩高人何至作狡獪無乃說世聊相談不然學道窮

實際詎捨正大崇奇環儒林丈人學擅世餘事尚壓
蔡與崔名山未死可再到此士一失難重陪贊府摘

山事如織擺撥領客何奇我境幽神槍不可住歸情
玉手傳金盃朱君有侍兒許為客出

擣藥鳥霧中有此鳥鳴聲清絕正如杵藥
白髮無情日日生巖愁聊復作山行幽禽似欲朝衰

病故學禪房杵藥聲
出山

出山似與高人別回首時時一悵然它日再來錄要
熟遍題名姓綠巖邊

平雲亭 大邑

滿榼芳醪何處傾金鼇背上得同行天垂綠野三邊
盡雲與朱蘭一樣平煙樹微茫疑誤墨風松蕭瑟有

新聲黃花未吐無多恨也勝湘纍拾落英
高秋亭 大邑

三日山中醉復醒徑歸回首愧山靈從今惜取觀書
眼長看天西萬疊青

九日小疾不出
病厭追遊懶舉觴今年閉戶作重陽香煙裊裊閑縈
几書卷紛紛靜滿牀斜日更增秋慘淡黃花應怪客

凄涼長安光景還如昨誰醉醉城南杜曲旁昔官都下每
以九日遊西園諸寺

九日試霧中僧所贈茶
少逢重九事豪華南陌雕鞍擁鈿車今日蜀州生白

髮瓦爐獨試霧中茶
我有美酒歌

我有美酒起自斟勸君一卮為君吟素衣未遂京塵
化綠鬢已受吳霜侵三巴塗路何嶽崕五溪霧潦多

毒淫虎豹夜嘯裂崖谷魑魅晝出矜山林身如槁葉
墮幽竅竅何啻千尺深無因剖胸出此心一寸孤

忠天寶臨
次韻師伯渾見寄

窮鄉久客易消魂短髮秋來白幾分夢泛扁舟鏡湖
月身騎瘦馬劍關雲萬釘寶帶知何用九轉金丹幸

有聞欲與先生同此計會營茅舍近江濱伯渾憶龍山
僕亦有結茅蟻津之意

自江源過雙流不宿徑行之成都
斷作飄飄挂渡頭臨江立馬喚漁舟少城已被繁華

夢老境聊尋汗漫遊斜日驛門雙埃立早霜風葉一
林秋詩材滿路無人取準擬歸驂到處留

過綠楊橋

過縣東馳十里遙行吟不覺度谿橋磴輪激水無時
息酒旆迎風盡日搖半掩店門燈煜煜橫穿村市馬
蕭蕭秦吳萬里行幾遍莫恨尊前綠鬢凋

五鼓自簇橋入府

曉月有餘光秋樹無濃影野煙浩無際陂路行愈永
堰聲何澎湃露氣正凄冷忽然客愁破更覺詩律整
昔人千載意忙裏一笑領山林豈難歸吾計自不猛

客多福院長起

萬鯨傳響徹修廊喚起衰翁曉夢長萬事可憐隨日
出一生常是伴人忙馳驅深厭交飛蓋息偃何時靜
炷香四到錦城身愈老更堪重入少年場

雨中出謁歸晝臥

宿雨盈車轍秋風漲帽帚愛閑惟兀兀應俗苦紛紛
病眼添花暈醜顏顰紋歸來炷香臥窗底看微雲
長歌行

人生不作安期生醉入東海騎長鯨猶當出作李西
平手梟逆賊清舊京金印煌煌未入手白髮種種來
無情成都古寺臥秋晚落日偏傍僧窗明豈其馬上
破賊手哦詩長作寒蟬鳴興來買盡市橋酒大車磊

落堆長餅哀絲豪竹助劇飲如鉅野受黃河傾平時
一滴不入口意氣頓使千人驚國讎未報壯士老匣
中寶劍夜有聲何當凱還宴將士三更雪壓飛狐城
夜食炒栗有感漏舍待朝朝士往往食此

齒根浮動數吾衰山栗炮燂療夜飢喚起少年京輦

夢和寧門外早朝來

秋夜懷吳中

秋夜挑燈讀楚辭昔人句句不吾欺更堪臨水登山
處正是浮家泛宅時巴酒不能消客恨蜀巫空解報
歸期灞橋煙柳知何限誰念行人寄一枝

遊三井觀

三井久知名暇日偶一訪棟宇壞欲盡基址尚闕壯

畫橋皆園工煙雲儼天仗旌旄亞戈戟佩玉雜弓鞬
太古寶傑作筆落九天上吳生名擅世睥睨未肯讓

規模遠有考意象豪不放棄奇老癯仙骨立神愈王
石恪雖少怪用筆亦跌宕兩姝淡蛾眉非復火食狀
塵埃久侵蝕風雨無蓋障好事未易逢寧能久亡恙
雍洛劫火餘妙迹盡凋喪斯遊恐難繼佇立增悵悵

僊遊閣

張公一去二百載傑閣依然橫闕中徙倚看碑仍看
畫時聞柏子落秋風

寓居小菴纔表丈戲作

早衰甚畏寒颼颼厭空館登閣望東菴亭亭長一繳
欣然願暫寓竹底門可款外看磔蝟毛仰視覆鵝卵
席纔置雖地隔若窺天管瓦爐香不去管寢衾易暖
頗疑漁菴結又類土室竅家具止囊衣弛擔著亦滿
客來勿嗤陋老我善用短猶能設胡牀相喚共茗椀

送華師從劍州張祕書之招

三年相伴錦江頭一日翩然不可留官冷蓬門無客
戀時清劍閣有僧遊關山默數來時路風月懸知別
後愁禪版經龕有餘暇頻登高處望西州

劍南詩稿卷第五終

劍南詩稿目錄
卷第六

江上對酒作 自嘲 莫歸馬上作 臨別成
 都悵飲萬里橋贈譚德稱 夜宿二江驛 涉
 白馬渡慨然有懷 瑞艸橋 將之榮州取道
 青城 丈人觀 題丈人觀道院壁 宿上清
 宮 自上清延慶歸過丈人觀少留 長生觀
 觀月 儲福觀 龍門洞 布金院 離堆伏
 龍祠觀孫太古畫英惠王像 登灌口廟東大
 樓觀岷江雪山 郫縣道中思故里 宿江原
 縣東十里張氏亭子未明而起 戲詠西州風
 土 宿彭山縣通津驛大風隣園多喬木終夜
 有聲 眉州郡燕大醉中間道馳出城宿石佛
 院 雙柏 戍卒說沉黎事有感 平羌道中
 望我眉山慨然有作 次韻何元立都曹贈行
 次韻楊嘉父先輩贈行 入榮州境 井研
 道中 賴牟鎮早行 初到榮州 城上二首
 西樓夕望 醉中懷眉山舊遊 登城望西
 崦 甲午十一月十三夜夢右臂踊出一小劍
 長八九寸有光既覺猶微痛也 齋中夜坐有
 感 晚登橫溪閣二首 昭德堂晚步 龍洞
 客中夜寒戲作長謠 高齋小飲戲作 太
 液黃鵠歌有引 自唐安徙家來和義出城迎
 之馬上作 乙未元日 別榮州 聞仲高從
 兄計 夏日過摩訶池 早行 天中節前三
 日大聖慈寺華嚴閣燃燈甚盛遊入過於元夕
 喜雨 夜聞浣花江聲甚壯 暑行憩新都
 驛 早發新都驛 謁諸葛丞相廟 自漢州
 之金堂過沈氏竹園小憩坐間微雨 自小雲
 頂上雲頂寺 馬上微雨 彌牟鎮驛舍小酌
 遊彌牟菩提院庭下有凌霄藤附古楠其高
 數丈花已零落滿地 樓上醉歌 伏日獨遊

城西 五鼓送客出城馬上作 寓舍書懷
 夜登城樓 試茶 成都大閱 書懷 遊大
 智寺 看月睡晚戲作 成都書事二首 雙
 溪道中 牛飲市中小飲呈坐客 自警 午
 寢 白髮 明日午睡至莫復次前韻 醉中
 長歌 對酒 人日飲昭覺 上元前一日
 上元二首 喜譚德稱歸 春感 春晴暗甚
 遊西市施家園 花時遍遊諸家園十首 曉
 過萬里橋 自合江亭涉江至趙園 春晴

劍南詩稿卷第六

宋 陸游 務觀

江上對酒作

把酒不能飲苦淚滴酒觴醉酒蜀江中和淚下荆揚樓櫓壓溢口山川蟠武昌石頭與鍾阜南望鬱蒼蒼戈船破浪飛鐵騎射日光胡來即送死詎能犯金湯汴洛我舊都燕趙我舊疆請書一尺檄為國平胡羌

自嘲

華子中年百事忘愁生仍坐癩為妨病於榮宦冥心久老向端閑得味長對客欲談還憤憤讀書纔過已茫茫青練帳暖黃紬穩聊借東菴作睡鄉

莫歸馬上作

石筍街頭日落時銅壺閣上角聲悲不辭與世終難合惟恨無人薦見知寶馬俊遊春浩蕩江樓豪飲夜淋漓醉來剩欲吟梁父千古隆中可與期

臨別成都帳飲萬里橋贈譚德稱

成都城南萬里橋蘆根蘋末風蕭蕭映花碾草鈿車小駐坡驀瀾青驄驕入門翠徑絕窈窕臨水飛觀何岩巖判無功名著不朽惟仗詩酒寬士聊迎霜早已足雉兔微冷便欲思狐貂喜看縷膾映盤箸恨欠斫蟹加橙椒坐中譚侯天下士龍馬毛骨矜超遙烏犀白紵謫傳樣但可邂逅不可招今年一戰敵餘子風送六翻凌青霄美人再拜乞利市醉墨飛落生蛟蜃我衰於世百無用十年不趁含元朝華纓肯傍蕭颯鬢寶帶那束龍鍾腰祝君好去事明主日望分喜來漁樵遊談引類亦細事寄酒且解相如消

夜宿二江驛

雞鳴原前風折樹夜到雙流雨如注樺皮溼透點不明旋設篝爐燎衣袴重城回首一夢散錦障駉車渺無處新聲猶傍耳邊來殘酒半隨風力去飛鷺縱欲

亦何樂憤憤不堪長閉戶丈夫要為國平胡俗子豈識吾所寓

涉白馬渡慨然有懷

我馬顧影嘶忽涉白馬津雖非黃河上撫事猶悲辛太行之下吹虜塵燕南趙北空無人袁曹百戰相持處犬羊堂堂自來去

瑞草橋

柘葉颼颼雪意驕檐頭雙兔邁歸樵宿醒未解題詩懶虛過風流瑞草橋

將之榮州取道青城

倚天山作海濤傾看遍人間兩赤城青城山一名赤城而天台之赤城乃予舊遊自笑年年隨宦牒不如處處得閑行草痕沙際猶餘綠楓葉霜餘已帶頰歸去還堪吃兒輩錦囊二十六崢嶸

丈人觀

黃金篆書扁朱門夾道巨竹屯蒼雲崖嶺劃若天地分千柱耽耽壓其垠纓冠肅謁丈人君廣殿空庭吹寶熏摩挲畫橋手為戰異哉山堯與土穰物怪鬻鬻冠丘墳仙人佩玉雜悅怗手整貂冠最不羣欲去不忍恨日曛道翁采藥晝夜勤松根根扶苓獲兼斤人之植立疆骨勛狗杞羣吹聲狷狷山爐小甑吹幽芬朱顏不飲常自醺我亦宿誦五千文一念之差隨世紛逝將從翁走如麋隱書秘訣何由聞

題丈人觀道院壁

斷香浮月磬聲殘木影如龍布石壇偶駕青鸞塵世窄閑吹玉笛洞天寒奇香滿院晨炊藥異氣穿巖夜浴丹却笑飛仙未忘俗金貂猶著侍中冠 孫太古畫苑長生作舉手整貂蟬像神氣尤奇逸

宿上清宮

九萬天衢浩浩風此身真是一枯蓬盤蔬采掇多靈藥閣道拳騰出半空累盡神僊端可致心虛造化欲無功金丹定解幽人意散作山椒百炬紅 夜中山谷火

煙然俗謂聖燈意古藏丹所化也

自上清廷慶歸過丈人觀少留

再到蓬萊路欲平却吹長笛過青城空山霜葉無行
迹半嶺天風有嘯聲細棧跨雲縈峭絕危橋飛柱插
澄清玉華更控青鸞住要倚欄干待月明 玉華樓名

長生觀觀月

碧天萬里月正中清夜弭節長生宮廣寒忽墮人間
世但怪步虛聲散瑤臺空四山沉沉萬籟寂天矯髯
龍舞娛客弭貂老仙期不來獨倚欄干吹玉笛道人
不怕九霄寒銀闕冰壺處處看天台四萬八千丈明
年照我扶藜杖

儲福觀唐玉真公主修真之地

路轉屏風壘雲藏帝子家窮幽行峯峭息倦倚槎牙
綠蘚封茶樹清霜折藥花世無勾漏令誰此養丹砂

龍門洞

我來香積寺清晨歷龍門孤峯撐蒼昊大壑裂厚坤
古穴吹腥風峭壁挂爪痕水浮石楠花崖絡菖蒲根
橫策意未饜褰裳探其源絕境豈可名恨我詩語煩
須臾蒼雲合便恐白雨驟東走得平野萬里扶桑暎
布金院

萬里西來了宿緣憑鞭軟帽過年年山寒院落開爐
月霜重郊原斷芋天淺碧鱗鱗人度約長空杳杳鳥
衝煙夜投蕭寺清無寐樓角三更月滿川

離堆伏龍祠觀孫太古畫英惠王像

岷山導江書禹貢江流蹴山山為動嗚乎秦守信豪
傑千年遺迹人猶誦決江一支溉數州至今禾黍連
雲種孫翁下筆開生面岷業高冠摩屋棟徙木遺風
雖峭刻取材尚足當世用寥寥後世豈乏人尺寸未
施讒已衆要官無責空賦祿軒蓋傳呼真一闕奇勳
偉績曠世無仁人志士臨風慟我遊故祠九頓首夜
遇神君了非夢披雲激電從天來赤手騎鯨不施整
登灌口廟東大樓觀岷江雪山

我生不識柏梁建章之宮殿安得峨眉冠待遊宴又不
及身在滎陽京索間擐甲橫戈夜酣戰胸中迫隘思
遠遊泝江來倚岷山樓千年雪嶺闌邊出萬里雲濤
坐上浮禹迹茫茫始江漢疏鑿功當九州半丈夫生
世要如此齋志志空死能無數白髮蕭條吹北風手持
卮酒醉江中姓名未死終磊磊要與此江東注海

郫縣道中思故里

衰髮不勝簪馳驅豈復堪客魂迷劍外歸思滿天南
江路難聲壯雲停雪意酣空懷小叢碧細酌破吳柑
宿江原縣東十里張氏亭子未明而起

征袍客愁相續無時斷那得并州快剪刀

戲詠西州風土

衍沃綿千里融和被四時蠶叢角歌吹石室盛書詩
綠樹藏漁市清江遶佛祠吾行更堪樂載酒上蕃頤

宿彭山縣通津驛

木欲靜風不止子欲養親不留夜誦此語涕莫收吾
親之沒今幾秋尚疑捨我而遠遊心冀乘雲反故丘
再拜奉觴陳膳羞陶盜洽米聲叟叟木甌炊麩香浮
浮茸薑屑桂調甘柔雅蠶煮臠長魚膾夜敷枕席視
衾裯晨起熏籠進衣裘哀樂此志終莫酬有言不聞
九泉幽北風歲晚晚號松楸哀哉萬里為食謀

眉州郡燕大醉中間道馳出城宿石佛院

玻璃春作江水清紫玉簫如雛鳳鳴漏聲不聞看地
燭依氣未滅欺飛觥單車萬里信有數二年三過寧
忘情釵頭玉茗妙天下坐上見白山茶格韻高絕瓊花一
樹真虛名酒酣忽作檀公策間道絕出東關城清歌
未斷去已遠回首樓堞空崢嶸貂裘狐帽醉走馬陌
上應有行人驚徑投野寺睡正笑魚鼓忽報江天明

雙柏

雙柏屹相向剛嚴如巨人龍吟風雨夕山立雪霜晨

閱世易成古剝心不復春扶顛要力量歲晚莫全身
戊卒說沉黎事有感

亭障曾無閱歲寧頻聞夷落犯王靈孤城月落冤魂
哭百里風吹戰血腥瘴重厭看茅葉赤春殘不放柳
條青焦頭爛額知何補弭患從來貴未形

平羌道中望峨眉山慨然有作

白雲如玉城翠嶺出其上異境忽墮前心目久蕩漾
別來二百日突兀喜亡恙飛僊遙舉手喚我一稅鞅
此行豈或使屏迹事幽曠何必故山歸更破萬里淚

次韻何元立都曹贈行元立用陳後山送蘇公詩韻

嘉榮東西川此別不為遠徘徊凌雲寺決去未遽忍
登高望故人煙樹參差見懸知今日夢不隔重城鍵
平生相從意百年有未滿結巢青城雲期子在歲晚
次韻楊嘉父先輩贈行

貞元舊朝士太學老諸生半世不偶諧殘年正飄零
危坐但愁悲一笑黃河清佳客如晨星俗子如春萍
奇哉今日事諸賢送東征吸酒盃當空綴詩筆勿停
明發復百憂君聽馬蹄聲

入榮州境

一起一伏黃茅岡崔嵬破丘狐兔藏烟烟寒日清無
光單單終日行羊腸村落聚看如鷲聲亦有銀釵伏
短牆黃旗翻翻鼓其鏗畫角鳴咽吹斜陽長筒汲井
熬雪霜輓轡啞官道傍渺然孤城天一方傳者或
云古夜郎其民簡朴士甚良千里鬱為詩書鄉閉閣
掃地焚清香老人處處是道場

井研道中

窮冬景方促下嶺路微平地瘦竹無葉風乾茅有聲
客遊空自歎歸計與誰評尚喜長亭下雲穿夕照明
賴牟鎮早行
孤燈照影聽初雞攬轡情懷倍慘悽雪作未成雲意
闌茅荒無際客魂迷觸寒手指藏猶裂裂長嶮圖書棄
不攜老去有文無賣處等閑題遍蜀東西

初到榮州

亂山缺處城樓呀雙旗蕭蕭晚吹笳煙深綠桂臨絕
壑霜落殘瀨瀨鳴寒沙廢臺已無隱士嘯遺宅上有高
人家鈴齋下榻約僧話松陰枕石放吏衙盃羹最珍
慈竹筍餅水自養山薑花地爐堆獸熾石炭瓦鼎號
剗煎秋茶少年遠遊無百里一飢能使行天涯豈惟
慣見蓬婆雪直恐遂泛星河槎故巢肯作兒女戀異
境會向鄉閭誇一盃徑醉憤自墮燈下髮影看鬢影

城上

雙雙黃犢臥斜陽葉葉丹楓著早霜沙水自鳴如有
恨野花無主為誰芳郵筒味曠愁濡甲巴曲聲悲怯
斷腸賴有生平管城子不妨驅使荅風光

又

濯錦豪華夢不通歸然孤壘亂山中行歌滿道知人
樂露積連村見歲豐萬瓦新霜掃殘瘴一林丹葉換
青楓鵝黃名醞何由得且醉盃中琥珀紅榮州酒赤而
勁甚鵝黃廣漢酒名

西樓夕望

夜郎城裏歎途窮賴有西樓著此翁溪鳥孤飛寒露
外野人參語夕陽中蒼天可恃何曾老白髮緣愁却
未公俗態十年看爛熟不如留眼送歸鴻

醉中懷眉山舊遊

勁酒少和氣哀歌無歡情故鄉不敢思登高望錦城
錦城那得去髣髴驢頭路遙知尊前人指我題詩處
我雖流落夜郎天遇酒能狂似少年想見東郊攜手
日海棠如雪柳飛綿漢嘉術者袁牧童謂予明年春分後當還

西州

登城望西岷

登城望西岷數家斜照中柴荆畫亦閉乃有太古風
慘淡起炊煙寂歷下釣筒土瘦麥苗短霜重桑枝空
恐是種桃人或有采芝翁何當宿樓上月明照夜春
甲午十一月十三夜夢右臂踊出一小劍長八

九寸有光既覺猶微痛也

少年學劍白猿翁曾破浮生十歲功玉具拄頤誰復
許劍鏃彈缺老猶窮牀頭忽覺蛟龍吼天上方驚牛
斗空此夢怪奇君記取佩刀猶得世三公

齋中夜坐有感

荒山為城溪作壕風鼓巨木聲翻濤鳴臬乘屋彈不
去狐狸欺人怒豎毛雨來紅鶴更可惡爭巢一似嬰
兒號城孤屋老草木茂正坐人少此輩豪急呼五百
具番錘欲掀窟穴窮腥臊忽然語罷却自笑殘年何
至與汝墨浣花江色綠如黛春波濺濺浮輕艇行當
繫纜柳陰下仰聽鶯語傾香膠

晚登橫溪閣

樓鼓聲中日又斜憑高愈覺在天涯空桑客土生秋
草野渡虛舟集晚鴉瘴霧不開連六詔俚歌相答帶
三巴故鄉可望應添淚莫恨雲山萬疊遮

又

犖确坡頭筇竹枝西臨村路立多時賣蔬市近還家
早煮井人忙下麥遲 榮多鹽井秋冬收薪茅最急 病客情
懷常怯酒山城老景盡供詩晚來試問愁多少只許
高樓橫笛吹

昭德堂晚步

笑喚枯筇躡夕陽探春聊作靜中忙高枝鶻語如相
命幽徑梅開祇自香苔蝕斷碑驚世換鐘來廢寺覺
城荒謫仙未必無遺恨老欠題詩到夜郎

龍洞 在榮州東南一里許

峭崖磨天如立壁柁根橫走松倒植呀然一岫驚倒
人空洞坡陀三百尺幽陰宜為異物託角爪痕存猶
可識想當蟠墊未奮時腥風逼人雲觸石一朝偶為
早歲起卷海作雨飛霹靂向來伊呂正如此莘渭千
年有遺迹我欲酌酒招蜿蜒安用辛苦常行天太平

海內多豐年歸來故祠聽管絃
客中夜寒戲作長謔

孤翁癡鈍如寒蠅霜夕不眠愁嚴凝寢衣觸體起芒
粟鼻息噓潤成冰凌襲襲默數嚴譙鼓耿耿獨看幽
窗燈支牀龜老共夜永號月雞冷同晨與白狐紫貂
了不暖何況蜀錦并吳綾靜思忽得安樂法人生所
欠聚與繒十年一衲尚可過不信請視匡山僧

高齋小飲戲作

梅花又發鬼門關坐覺春風萬里寬荔子陰中時縱
酒竹枝聲裏彊追歡丁年漢使殊方老子夜吳歌昨
夢殘白帝夜郎俱不惡兩公補處得憑欄 予五年間自
樂客樂

太液黃鸝歌 有引

漢始元元年春二月黃鸝下建章宮太液池
中公卿上壽賜諸侯王列侯宗室金錢子夜
讀漢書追作歌一首

建章宮裏春風寒太液水生池面寬中人馳奏黃鸝
下龍旗約尾臨池看芹香藻暖鶻得意左右從官呼
萬歲須臾傳詔宴公卿驩聲如雷動天地時平宮省
遊樂多黃鸝刷羽涵恩波小臣珥筆龍墀下願繼前
朝天馬歌

自唐安徙家來和義出城迎之馬上作

身如林下僧處處常寄包家如梁上燕歲歲旋作巢
豈惟人所憐顧影每自嘲眼看佳山水不得結把茅
造物困豪傑如視餓虎哮要令出精神感激使叫嗷
頗思投筆去走馬盤雲旂三更冒急雪大戰梁楚郊
乙未元日 除夕得制司檄催赴官

別榮州 正月十日

浮生歲歲俱如夢一枕輕安亦可人偶落山城無事
處暫還老子自由身慵臺載酒雲生屢僊穴尋梅雨
墊巾便恐清遊從此少錦城車馬漲紅塵 嘯臺在富義

門外一里號孫登嘯臺雙溪王氏有石穴黃太史牌曰地仙洞

聞仲高從兄詩

去國萬里遊發書三日哭久矣吾已衰哀哉公不淑
寄書墨未乾玉立在我目天高鬼神惡生世露電速
丹心抱忠貞白首悲放逐九閩不可叫百身何由贖
文章果何罪一斥獨不復上壽阿母前悔不早碌碌

夏日過摩訶池

烏帽翩翩白紵輕摩訶池上試閑行淙潺野水鳴空
苑寂歷斜陽下廢城縱轡迎涼看馬影袖鞭尋句聽
蟬聲白頭散吏元無事却為興亡一愴情

早行

笮馬踐槐影紗籠吹蠟香憑鞭尋斷夢側帽受微涼
病骨更疎放衰懷罷激昂道邊雙石筍笑我伴人忙
天中節前二日大聖慈寺華嚴閣燃燈甚盛遊

人過於元夕

萬瓦如鱗百尺梯遙看突兀與雲齊寶簾風定燈相
射綺陌塵香馬不嘶星隕半空天宇靜蓮生陸地客
心迷歸途細踏槐陰月家在花行更向西予官居在
行距寺數里

喜雨 五月二十二日

黃塵赤日欲忘生一夜新涼滿錦城雨急驟增車轍
水泥深漸壯馬蹄聲蚊蠅斂迹知無地燈火於人頓
有情市遠雞豚不須問小畦稀甲已堪烹

夜聞浣花江聲甚壯

浣花之東當作橋奔流齧橋橋為搖分洪初疑兩蛟
舞觸石散作千珠跳壯聲每挾雷雨橫巨勢潛借龍
鼉驕夢回聞之坐太息鐵衣何日東征遼銜枚度磧
沙颯颯盤架斷隴風蕭蕭不然投檄徑歸去短篷臥
聽錢塘潮

暑行憩新都驛

細細黃花落古槐江寧不雨轉輕雷長空烏破蒼煙
去落日人從綠野來散策意行尋水石脫巾高臥避

氛埃羈遊未羨端居樂看月房湖又一回

早發新都驛

嗟嗟江村雞迢迢縣門漏河漢縱復橫繁星明如晝
愛涼趣上馬未曉閱兩埃高林起宿鳥絕澗落驚狝
寺樓插蒼煙沙泉瀉幽竇我行忽萬里坐數關河溜
官如廣文冷面作拾遺瘦今年盍歸哉勿落春雁後

謁諸葛丞相廟 彌牟八陳原上

漢中四百天所命老賊方持太阿柄區區梁益豈足
支不忍安坐觀異姓遺民亦知王室在閭位那干天
統正公雖已沒有神靈猶假賊手誅鍾鄩前年我過
沔陽祠再拜奠俎衰淚迸潔齋請作送迎詩精忠大
義神其聽

自漢州之金堂過沈氏竹園小憩坐間微雨

修修萬竹壓康莊碧玉椽圍一尺彊雪節煙梢誰暇
賞馬蹄車轍可憐忙帽邊忽墮吹香句肘後舊傳醫
俗方更覺清遊天所惜坐來飛雨度橫塘

自小雲頂上雲頂寺

素衣雖成緇不為京路塵躍馬上雲頂欲呼飛仙人
飛仙不可呼野僧意甚真煎茶清樹下童子拾墮薪
我少本疎放一出但坐貧縛袴屬囊韃哀哉水雲身
此地雖暫寓失喜忘吟呻故溪歸去來歲晚思鱸蓴
馬上微雨

馬上微雨

三日觸毒暑衣垢背汗浹今日殊蕭然涼雨吹醉頰
瘦松無橫枝蠹竹少全葉渚蓮乃可念泣泣如放妾
豈惟人意適我馬亦振鬣遠村有歸人清溪爭晚涉
彌牟鎮驛舍小酌

彌牟鎮驛舍小酌

郵亭草草置盤盂買果煎蔬便有餘自許白雲終醉
死不論黃紙有除書角巾墊雨蟬聲外細葛含風日
落初行遍天涯身尚健却嫌陶令愛吾廬

遊彌牟善提院庭下有凌霄藤附古楠其高數

丈花已零落滿地
絳英翠蔓亦佳哉零亂空庭碼璫盃遍雨新花天有

意定知閑客欲閑來 佛經云天風吹萎花更雨新好者
樓上醉歌

我遊四方不得意陽狂施藥成都市大瓢滿貯隨所
求聊為疲民起憔悴飄空夜靜上高樓買酒捲簾邀
月醉醉中拂劍光射月往往悲歌獨流涕刻却君山
湘水平斫却桂樹月更明 太白詩刻却君山好平鋪湘水流
老杜詩斫却月中桂清光應更多 丈夫有志苦難成修名未
立華髮生

伏日獨遊城西

幕府重來老令威山川良是昔人非癡兒已遣了官
事伏日元知當早歸避熱幽花房自飲迎秋高樹葉
先飛論詩敢補先師處僭拂江頭舊釣磯

五鼓送客出城馬上作

夜漏餘十刻涼颼如九秋灘聲聒酒醒月色照人愁
落魄悲孤宦龍鍾怯遠遊此生那可料六歲劍南州
寓舍書懷

借得茅齋近作橋羈懷病思兩無聊春從豆蔻梢頭
老日向擣菹齒上消叢竹曉兼風力橫高梧夜挾雨
聲驕書生莫倚身常健未畫凌煙鬢已凋

夜登城樓

上天何蒼蒼四序浩旋斡異哉今年熱炊鬻不可活
夜分睡復起搖蕙腕欲脫彊登城西樓月露渺空闊
憑欄弄清影涼颼入蕉葛溼螢沾草根驚鷗起木末
亦知難久留襟袍資一豁人事迭廢興天理交子奪
義和不停馭去若弦上筈此熱會當衰歲晚備裘褐

試茶

蒼爪初驚鷹脫鞵得湯已見玉花浮睡魔何止避三
舍歡伯直知輸一籌日鑄焙香懷舊隱谷簾試水憶
西遊銀餅銅碾俱官樣恨欠纖纖為捧甌

成都大閱

千步毬場爽氣新西山遙見碧嶙峋令傳雪嶺蓬婆
外聲震秦川渭水濱旗脚倚風時弄影馬蹄經雨不

霑塵屬囊縛袴母多恨久矣儒冠誤此身
書懷

萬里馳驅坐一飢自憐無計脫塵鞵身留幕府還家
少眼亂文書把酒稀客路更逢秋色晚故山空有夢
魂歸芋羹豆飯元堪飽錯用人言恨子威
遊大智寺

脫髮紛滿梳衰顏不堪照百年忽已半去日如過燒
平生功名心上馬無燕趙爾來閱世故萬事驚錯料
豈無舊朋傳聯翩半廊廟誰能伴此老沂峽聽猿叫
錦城得數公意氣如再少偷閑訪野寺繫馬追一笑
新糟厭玉狸畏酒亦復醜古殿醜醜豪壞壁冠佩肖
摩挲宋公詩句法數高妙正如霓裳曲零落得遺調
歸途綠長堤掠面霜氣峭佳遊不可忘落筆君勿諂
看月睡晚戲作

香火課夙興風月留晚睡直言散吏閑亦未盡無事
舊聞雲臺翁高枕閱塵世至今青嶂間鼻息亂松吹
平生寡嗜好所願究此味千年一欠伸笑看巖花墜
成都書事

劍南山水盡清輝濯錦江邊天下稀煙柳不遮樓角
斷風花時傍馬頭飛萋萋筍似稽山美斫膾魚如笠
澤肥客報城西有園賣老夫白首欲忘歸

又
大城少城柳已青東臺西臺雪正晴鶯花又作新年
夢絲竹常聞靜夜聲廢苑煙蕪迎馬動清江春漲拍
堤平尊中酒滿身疆健未恨飄零過此身
雙溪道中

曉山作橋門天低日未暝綠陂寒淡淡白霧遠昏昏
古路亂車轍行人驚雁羣征塗不須厭蓬轉本無根
牛飲市中小飲呈坐客

牛飲橋頭小市東店門繫馬一尊同已能自置功名
外尚欲相期意氣中褐擁紫茸迎曉日酒醲紅浪醉
春風從今共約無疎索竹外梅花欲惱公

自警

乳烹佛粥遠如許菜簇春盤行及時草木欣欣渠得意乾坤浩浩我何私懷材所忌多輕用學道當從不自欺日莫置規君勿怪修身三省自先師

午寢

眼澀朦朧不自支欠伸常恨到牀遲庭花著雨晴方見野客敲門去始知灰冷香煙無復在湯成茶椀徑須持頽然却自嫌疏放旋了生涯一首詩

白髮

我生實多遭九折行晚途憂傷日熏心驚見頰與顛稍生秋風時競出寒雨餘星星初尚稀臍臍不可除昔如春柳妍今作霜蓬枯蓬枯有再綠念我豈得如平昔樂方外固與功名疏投鐻三歎息金丹豈無書
明日午睡至莫復次前韻

醉中長歌

酒力醺然入四支華胥稅駕不應遲殘年已覺衰難彊萬事無如睡不知幸有琴書供枕籍安能冠帶更支持紅爐過盡灰如雪獨守青燈坐晝詩
闌干斗柄搖天東人間一夜回春風注桃染柳歲相似惟我衰顏非昔紅可憐逢春不自感更欲使氣驚兒童煙郊射雉錦臆碎水亭供鱸金盤空歸穿南市萬人看流星突過連錢總高樓作歌醉自寫墨光燭焰交長虹人生未死貴適意萬里作客元非窮故人夜直金鑾殿偃臥獨聽宮門鐘

對酒

扇邊生怕庾公塵索笑來遊錦水濱四野雲齊初釀雪一枝梅動已催春綠尊有味能消日白髮無情不貸人商略此生何所恨太平時得自由身

人日飲昭覺

天涯羈旅逢人日病起消搖集寶坊雪水初融錦江漲梅花半落綠苔香家山松桂年年長幕府文書日日忙自笑餘生有幾許一菴借與得深藏

上元前一日

異縣客遊久今年春事遲峭寒增酒價微雨惱燈期老態人未覺孤愁心自知停車呼病婦彊出伴諸兒
上元

細細香塵暗六街魚鱗淺碧莫雲開新妝褰幕全身見誤馬隨車一笑回酒釀頓忘風力峭夜長猶恨漏聲催京華舊侶彫零盡短鬢成絲心未灰

病起衰顏非昔紅偷閑聊與少年同一規寒玉挂樓角千點華星來坐中久戍遺民雖困弊承平舊鎮尚繁雄歸時瘦馬崔嵬影定有遊人笑此翁

喜譚德稱歸

少鄙章句學所慕在經世諸公薦文章頗恨非素志一朝落江湖爛熳得自恣討論極王霸事業親莘渭孔明景略間却立頗恥晚從人無一欣對食有三嚼譚侯信豪雋可共不朽事天涯再相見握手更拭淚欲尋西郊路斗酒傾意氣浩歌君和我勿作尋常醉
春感

少時狂走西復東銀鞍駿馬馳如風眼看春去不復惜只道歲月來無窮初遊漢中亦未覺一飲尚可傾千鍾又魚狼藉潦水濁獵虎蹴蹋南山空射棚命中萬人看毬門對植雙旗紅華堂却來弄筆硯新詩醉草誇坐中劍關南山纔幾日壯氣摧縮成衰翁雪霜蕭颯已滿鬢蛟龍鬱屈空蟠胸隣園杏花忽爛熳推枕疆起隨遊蜂遶看百匝幾歎息吹紅洗綠行恩恩莫年逢春尚有幾常恐春去尋無蹤青錢三百幸可辦且判爛醉酩酊郵筒

春晴暗甚遊西市施家園

稅駕名園半日留遊絲飛蝶晚悠悠驟暗不為海棠計長晝只添鸚鵡愁老去自驚詩酒減客中偏覺歲時適東風好為吹歸夢著我松江弄釣舟
花時遍遊諸家園

看花南陌復東阡曉露初乾日正妍走馬碧雞坊裏
去市人喚作海棠顛

又
為愛名花抵死狂只愁風日損紅芳綠章夜奏通明

殿乞借春陰護海棠

又
翩翩馬上帽簷斜盡日尋春不到家偏愛張園好風
景半天高柳臥溪花

又
花陰掃地置清尊爛醉歸時夜已分欲睡未成敬倦

枕輪困帳底見紅雲

又
宣華無樹著啼鸞惟有摩訶春水生故老能言當日
事直將宮錦裹宮城

又
枝上猩猩血未晞尊前紅袖醉成圍應須直到三更

看畫燭如椽為發輝

又
重萼丹砂品最高可憐寂寞蓬蒿會當車載金錢
去買取春歸亦足豪小東門外有千葉朱砂海棠一株奇麗絕

代在荒園中人罕見者

又
絲絲紅萼弄春柔不似疎梅只慣愁常恐夜寒花索
寞錦茵銀燭按涼州

又
飛花盡逐五更風不照先生社酒中輸與新來雙燕

子御泥猶得帶殘紅今年二月二日社而海棠已過

又
海棠已過不成春絲竹淒涼鎖暗塵眼看燕脂吹作
雪不須零落始愁人

曉過萬里橋

曉出錦江邊長橋柳帶煙豪華行樂地芳潤養花天

擁路看軟帽窺門笑墜鞭京華歸未得聊此送流年
自合江亭涉江至趙園

政為梅花憶兩京海棠又滿錦官城鴉藏高柳陰初
密馬涉清江水未生風掠春衫驚小冷酒潮玉頰見

微頰殘年飄泊無時了腸斷樓頭畫角聲

春晴
一庭舞絮鬪身輕百尺遊絲弄午晴靜喜香煙禁曲
几臥驚玉子落紋枰新春易失遽如許薄宦忘歸何
似生安得一船東下峽江南江北聽鸞聲

劍南詩稿卷第六終

劍南詩稿目錄
卷第七

題明皇幸蜀圖 春寒連日不出 馬上偶成

夜宴 觀音院讀壁間蘇在廷少卿兩小詩

次韻二首 錦亭 晚起 雨 春晚書懷

出朝天門諒長堤至劉侍郎廟由小西門歸

夜分讀書有感 中夜聞大雷雨 春殘 武

擔東臺晚望 行武擔西南村落有感 小飲

房園 飯昭覺寺抵莫乃歸 自芳華樓過瑤

林莊 書懷 遊東郭趙氏園 卜居二首

馬上 夜登江樓 書歎 三月一日府宴學

射山 對酒 題直舍壁 遊園覺乾明祥符

三院至莫 遊合江園戲題 三月十六日作

食齋三首 次韻范文淵 題醉中所作艸

書卷後 登子城新樓遍至西園池亭 小疾

謝客 歸耕 聞孫巖老挂冠歎仰之餘輒賦

長句 松驥行 遣興 野意 雨中登安福

寺塔 過野人家有感 幽居晚興 飯保福

觀華嚴閣簡齋 閒中偶題二首 病中戲

書三首 病起書懷二首 寺樓月夜醉中戲

作三首 晚過五門 躬耕 晚興 夏夜大

醉醒後有感 合江夜宴歸馬上作 齋居書

事 午夢 江濱池納涼 晚步 姚將軍靖

康初以戰敗亡命建炎中下詔求之不可得後

五十年乃從呂洞濱劉高尚往來名山有見之

者予感其事作詩寄題青城山上清宮壁間將

軍儻見之乎 客自鳳州來言岐雍間事悵然

有感 席上作 水亭偶題 避暑江上 夏

白紵拜序二首 久旱忽大雨涼甚小飲醉眠覺

而有作 明日開霽益涼復得長句 夜讀東

京記 感事 書歎 睡起 飯罷碾茶戲書

月下醉題 野外劇飲示坐中 與青城道人

飲酒作 銅壺閣望月 連日得雨涼甚有作

待青城道人不至 劍客行 夜宴即席作

宿沱江彌勒院 學射道中感事 遊學射

觀次壁間詩韻 昇僊橋遇風雨大至憩小店

龍挂 芳華樓夜宴 遺興 六月九日夜

步月至朝真觀 十日夜月中馬上作 百歲

獨飲醉臥比覺已夜半矣戲作此詩 蒙恩

奉祠桐柏 和范待制月夜有感 和范待制

秋興三首 和范待制秋日書懷二首

劍南詩稿卷第七

宋陸游務觀

題明皇幸蜀圖

天寶政事何披猖使典相國胡奴王弄權楊李不足
怪阿瞞手自裂紀綱八姨富貴尚有理何至詔書褒
五郎天寶末下詔雪張易之兄弟盧龍賊騎已淘淘丹鳳
神語猶琅琅人知大勢危曩卯天稔奇禍如崩牆臺
省諸公獨耐事歌詠功德卑虞唐一朝殺氣橫天未
正馬西奔幾不脫向來詔子知幾人賊前稱臣草間
活劍南萬里望秦天行殿春寒聞杜鵑老臣九齡不
可作魚蠹蛛絲金鑑編

春寒連日不出

海棠花入燕泥乾梅子枝頭已帶酸老去懶尋年少
夢春分不減社前寒著書敢望垂千載嗜酒猶須隱
一官正是閑時無客過小庭斜日倚闌干

馬上偶成

城南城北紫遊韁盡日閑行看似忙刺水離離葛葉
短連村漠漠豆花香夕陽有信催殘角春草無情上
綠牆我亦人間倦遊者長吟聊復愴興亡

夜宴

酒浪搖春不受寒燭花垂燼忽堆盤山川路邈人將
老絲管聲道夜向闌四海交朋更聚散百年光景雜
悲歡自憐病眼猶明在更把名花半醉看是夕得苑希
元家晚海棠數枝繁麗一城所無

觀音院讀壁間蘇在廷少卿兩小詩次韻

揚鞭莫出錦官城小院無僧有月明不信道人心似
鐵隔城猶送擣衣聲

又

老去癡頑不受鐫姓名身後更須傳世間商略無歸
處只合長齋繡佛前

錦亭

天公爲我齒頰計遣飲黃甘與丹荔又憐狂眼老更
狂令看廣陵芍藥蜀海棠周行萬里逐所樂天公於
我元不薄貴人不出長安城寶帶華纓真汝縛樂哉
今從石湖公大度不計聲丞孽夜宴新亭海棠底紅
雲倒吸玻璃鍾琵琶絃繁腰鼓急盤鳳舞衫香霧溼
春醪凸盞燭光搖素月中天花影立遊人如雲環玉
帳詩未落紙先傳唱此邦句律方一新鳳閣舍人今
有樣

晚起

新晴窗日弄春妍幌小屏深意自便長恨病多妨痛
飲却緣客少得安眠雖驚故故啼簷角飛絮翩翩墮
枕前欲著衣裳還嬾起重尋殘夢一悠然

兩

映空初作繭絲微掠地俄成箭鏃飛紙帳光遲鏡曉
夢銅鑪香潤覆春衣池魚鱗鱗隨溝出梁燕翩翩接
翅歸惟有落花吹不去數枝紅溼自相依

春晚書懷

萬里西遊爲覓詩錦城更付一官癡脫巾漉酒從人
笑拄笏看山頗自奇疎雨池塘魚遊釣曉鷺窗戶客
爭棋老來怕與春爲別醉過殘紅滿地時

出朝天門諒長堤至劉侍郎廟由小西門歸

曉從北郭過西城十里沙堤似席平澹日向人供帽
影微風傍馬助鞭聲歡情寂寂隨年減俗事紛紛逐
日生到處每求佳水竹晚途牢落念歸耕

夜分讀書有感

光陰百歲已中分擬結茅茨老白雲萬里誰憐新臥
疾九重猶記舊能文枕邊得句題屏墨馬上看山隔
帽帚終恨無勞瘵廩粟夜窗聊策讀書勳

中夜聞大雷雨

雷車駕雨龍盞起電行半空如狂矢中原腥羶五十
年上帝震怒初一洗黃頭女真魂魄魄面縛軍門爭

請死已聞三箭定天山何啻積甲齊熊耳捷書馳騎
委行宮近臣上壽天顏喜閣門明日催賀班雲集千
官摩劍履長安父老請移蹕願見六龍臨渭水從今
身是太平人敢憚安西九千里

春殘

石鏡山前送落暉春殘回首倍依依時平壯士無功
老鄉遠征人有夢歸昔藉苗苗侵官道合蕪菁花入麥
畦稀倦遊自笑摧頽甚誰記飛鷹醉打圍

武擔東臺晚望

顛顛西窗已一翁登高意氣尚豪雄關河霸國興亡
後風月詩人醉醒中病起頓驚雙鬢改春歸一掃萬
花空欄邊徙倚君知否直到吳天日未窮

行武擔西南村落有感

騎馬悠然欲斷魂春愁滿眼與誰論市朝遷變歸蕪
沒礪谷鈺銜互吐吞一徑松楠遙見寺數家雞犬自
成村最憐高冢臨官道細細煙莎遍燒痕有大家高數
丈旁又一冢差小莫知何代人也俗號太子墓

小飲房園

宦遊到處即忘家況得閑身管物華疎索故人緣病
酒折除厚祿為看花泥新高棟初巢鷺萍匝荒池已
集蛙斟酌人生要行樂燈前起舞落烏紗

飯昭覺寺抵莫乃歸

身墮黃塵每慨然攜兒蕭散亦前緣聊憑方外巾盂
淨一洗人間七箸擅靜院春風傳浴鼓畫廊晚雨溼
茶煙潛光察裏明窗下借我消搖過十年

自芳華樓過瑤林莊

春晚江邊草過腰雨餘樓下水平橋名花未落如相
待佳客能來不費招欄角峭風羅袖薄柳陰斜日玉
驄驕此身醉死元關命敢笑聞雞趁早朝

書懷

詩不能工須得窮幾年衰衰看諸公摧頽已作驢伏
櫪留滯敢嫌船逆風消日劇棋疎竹下送春爛醉亂

花中倚樓看鏡俱癡絕贏取煙蓑伴釣翁
遊東郭趙氏園

清晨呼馬出馭吏請所之錦城浩如海我亦無與期
有花即入門莫問主人誰下馬據胡牀傲晚忘詞譏
人言白頭翁胡為尚兒癡老翁故不癡借花發吾詩
詩句帶花香東風不敢吹徘徊雙蝶許汝鼻端知

卜居

歷盡人間行路難老來要覓數年閑供家米少因添
鶴買宅錢多為見山池面紋生風細細花根土潤雨
班班借春乞火依隣里剩釀村醪約往還

又

南浮七澤弔沉湘西沂三巴掠夜郎自信前緣與人
薄每求寬地寄吾狂雪山水作中濡味蒙頂茶如正
焙香儻有把茅端可老不須辛苦念還鄉

馬上

春殘馬上意悵悵微吟過數坊綠樹成帷連藥
市清流如帶繞毬場城荒鼓角增悲壯苑廢雲煙尚
莽蒼堪笑年來向詩癩還家古錦只空囊

夜登江樓

平生曾中無滯留曠然獨與造物遊天風駕我周寓
縣夜半忽過江邊樓樓前茫茫天地闊萬頃月浸空
江秋雲階無塵鷺鶴舞玉笛裂石魚龍愁肺肝澄澈
納灑氣毛髮慘慄臨寒流世間回首真一夢誰能更
念酬恩讎

書數

早得虛名翰墨林謝歸忽已歲時侵春郊射雉朝盤
馬秋院焚香夜弄琴病酒閉門常兀兀哦詩袖手久
惜惜浮沉不是忘經世後有仁人識此心

三月一日府宴學射山

北出昇仙路少東據鞍自笑老從戎百年身世酣歌
裏千古功名感慨中天遠僅分山髻髯霧收初見日
瞳矐橫空我欲江湖去誰借冷然禦寇風

對酒

閑愁如飛雪入酒卽消融好花如故人一笑盃自空
流鶯有情亦念我柳邊盡日啼春風長安不到十四
載酒徒往往成衰翁九環寶帶光照地不如留君雙
頰紅

題直舍壁

文書那得廢哦詩羞作羣兒了事癡付與後人評此
老一丘一壑過元規

遊園覺乾明祥符三院至莫

成都再見春事殘雖名閑官實不閑門前車馬鬧如
市案上文檄高於山有時投鱗輒徑出略似齊客偷
秦關日斜僕夫已整駕顧景欲駐愁嘲訕豈知今朝
有此樂放浪一笑開衰顏抽身黃塵烏帽底得意翠
木清泉間褰裳危磴窮牽确洗耳古澗聽淙潺豈惟
頓覺宇宙廣政爾一散腰脚頑似聞青城縹緲處待
我歸綴仙官班俊鷹解條卽萬里豈比倦翼方知還

遊合江園戲題

朱朱白白池臺間好風妍日開未殘我來覓醉苦草
草常恨不如花意閑山雞飛起亂花落下上青林穿
翠壑世間動步卽有拘常恨不如禽意樂人言功名
恐不免我願倘伴娛歲晚熟計淫書理白魚何如縱
獵牽黃犬成都四郊如砥平安得雙鞬馳出城蹇飛
塵起望不見從騎尋我鳴鶻聲

二月十六日作

石筍街西風景幽醉眠萬事付悠悠倦遊我已七年
客促駕春無三日留枝上蝶稀紅藥老舍中蠶起綠
桑柔功名墮甌誰能問羞作飢鷹夜掣隼

食薺

日日思歸飽蕨薇春來薺笑忽忘歸傳誇真欲嫌茶
苦自笑何時得瓠肥

又

采采珍蔬不待畦中原正味壓蓴絲挑根擇葉無虛

日直到開花如雪時

小著鹽醃助滋味微加薑桂發精神風爐飲鉢窮家
活妙訣何曾肯授人

次韻范文淵

簞瓢氣已壓膏梁不傍朱門味更長細看高人志寵
辱始知吾輩可憐傷巖局勾漏新丹竈香火匡廬古
道場剩欲與君堅此約他年八十鬢眉蒼近有術者言

僕壽過八十

題醉中所作草書卷後

曾中磊落藏五兵欲試無路空崢嶸酒爲旗鼓筆刀
槩勢從天落銀河傾端溪石池濃作墨燭光相射飛
縱橫須臾收卷復把酒如見萬里煙塵清丈夫身在
要有立逆虜運盡行當平何時夜出五原塞不聞人
語聞鞭聲

登子城新樓遍至西園池亭

狂夫無計奈何何况登臨逸興多千疊雪山連瀟
博一支春水入摩訶吟餘騎省霜侵鬢釣罷玄真雨
滿蓑逐虜榆關期尚遠不妨隨處得婆娑

小疾謝客

小疾深居不喚醫消搖更覺勝平時癡人未害看周
易名士真須讀楚辭綠徑風斜花片片畫廊人靜雨
絲絲晚來頓覺清羸甚自置篝爐煮粟糜

歸耕

隨牒人間鬢欲疎歸耕且復補東隅甌炊地確新春
米衣拆天吳舊繡圖有圃免煩官送菜叩門翻喜吏
徵租不愁問字無來客惟欠楊雄宅一區

聞孫巖老挂冠數仰之餘輒賦長句

聖賢在世龍行天出處何至爲物牽後人競作駒伏
轅未死奄奄如九泉郭孫公者山澤僊巖巖玉骨寒
入肩哦詩調苦亂蟬燥墨瘦字醜不妍諸公好之
挽使前六丁力盡山巖然妻書告老不待年脫手徑

上岷山巔吾儕一官自糾纏俛首鞭箠不自憐疆欲作詩誦公賢事偉辭卑難竝傳

松驥行

驥行千里亦何得垂首伏櫪終自傷松閱千年棄瀾壑不如殺身扶明堂士生抱材願少試誓取燕趙歸君王閉門高臥身欲老聞雞相蹴涕數行正令咿嚶死牀簣豈若橫身當戰場半酣浩歌聲激烈車輪百轉盤愁腸

遣興

鶴料無多又掃空今年真是浣花翁放教綠酒關身事留得朱顏在鏡中挾彈園林芳徑雨投竿窗檻小溪風癡頑自笑歸何日家在東吳更向東

野意

小東門外曳筇枝白葛烏紗自一奇閑客逍遙無吏責茂陰清潤勝花時茶經每向僧窗讀菰米仍於野艇炊便覺眼邊歸路近鏡湖禹廟見參差

雨中登安福寺塔

俗謂之黑塔

平生喜登高醉眼無疆界北顧極幽并東望跨海岱喟然撫手數從古幾成敗英雄如過鳥城郭但遺塊今朝上黑塔千里曠無礙忽驚風雲掣坐覺天地晦急雨挾龍腥溽暑為摧壞皇天念蟠鬱令我寄一快那知書生狂自倚心眼大更思駐潼關黃河看如帶

過野人家有感

縱壘江皋送夕暉誰家井白映荆扉隔籬犬吠窺人過滿箔蠶飢待葉歸吳人直謂桑白葉世態十年看爛熟家山萬里夢依稀躬耕本是英雄事老死南陽未必非

幽居晚興

借鉏斷藥喜微香汲井澆花趁晚涼胃次何曾橫一物尊前尚欲笑千場錦江秋雨芙蓉老笠澤春風杜若芳歸去自佳留亦樂夢中何處是吾鄉飯保福

徒雨雲低未放晴閉門作病憶閑行攝衣丈室參耆宿曳杖長廊喚弟兄飽飯即知吾事了免官初覺此身輕歸來更欲誇妻子學煮雲堂芋糝羹

觀華嚴閣僧齋閣下自四月初至七月末日飯僧數千人

拂劍當年氣吐虹暗鳴坐覺朔庭空早知壯志成癡絕悔不藏名萬衲中

閑中偶題

楚澤巴山歲歲忙今年睡足向禪房只知閑味如茶永不放羈愁似草長架上漢書那復看牀頭周易亦相忘客來拈起清談塵且破西窗半篆香

又

久矣雲衢斂羽翰退飛更覺一枝安七千里外新閑客十五年前置史官花底清歌春載酒江邊明月夜投竿癡頑直為多更事莫怪曾懷抵死寬

病中戲書

五十忽過二流年消壯心避人便小疾移竹喜微陰洗甕閑酌酒焚香靜斲琴鏡中青鬢在切莫遣愁侵

又

微疾餘餘災時須藥裏開禽驚杵聲去蜂認蜜香來閉戶知長日全生幸散材晚涼幽興動疆到竹邊回

又

食筍動衰疾清羸逾兩旬藥囊隨臥起詩句雜吟呻架足書籤蠹窗凝酒榼塵免從官乞假且喜是閑身

病起書懷

病骨支離紗帽寬孤臣萬里客江干位卑未敢忘憂國事定猶須待闔棺天地神靈扶廟社京華父老望和鑿出師一表通今古夜半挑燈更細看

又

酒酣看劍凜生風身是天涯一秃翁捫蝨劇談空自許聞雞浩歎與誰同玉關歲晚無來使沙苑春生有去鴻人壽定非金石永可令虛死蜀山中寺樓月夜醉中戲作

素壁徐升天宇閑連峯積雪蒼茫間樓臺是處可見
月無此巉巖羣玉山

又
水精盞映碧琳腴月下泠泠看似無此酒定從何處
得判知不是文君壚

海山縹緲玉真妃貪看冰輪不肯歸樓上三更風露
冷旋圍步障換羅衣

晚過五門

五門路四月乳鴉啼綠樹閑遊但喜日初長薄暑始
知春已去樓頭風高舞雙旗畫角聲中日還莫馬蹄
特特無斷時老盡行人路如故

躬耕

莫笑躬耕老蜀山也勝菜把仰園官喚回癡夢塵機
息空盡閑愁酒地寬無復短衣隨李廣但思微雨過
蘇端十年世事茫如海輪與閑人靜處看

晚興

老病愁趨畫戟門天教高臥浣花村山林獨往雜屠
釣世界皆空誰怨恩禪祕要經言觀空之法自一城一國一世
界至三千大千世界皆空 千卷蠹書忘歲月一尊濁酒信
乾坤興來倚杖清江上斷角疎鐘正歛昏

夏夜大醉醒後有感

少時酒隱東海濱結交盡是英豪人龍泉三尺動牛
斗陰符一編役鬼神客遊山南夜望氣頗謂王師當
入秦欲傾天上河漢水淨洗關中胡虜塵那知一日
事大繆騎驢劍閣霜毛新却將覆甕草檄手小詩點
綴西州春素心雖願老巖壑大義未敢忘君臣雞鳴
酒解不成寐起坐肝膽空輪困

合江夜宴歸馬上作

零露中宵溼綠苔江郊縱飲亦荒哉引盃快似黃河
瀉落筆聲如白雨來纖指醉聽箏柱促長檠時看燭
花摧頭顱自揣應虛死馬上長歌寄此哀

齋居書事

慵養金丹換鬢微霜正要稱清癯平生風露充蟬
腹到處雲山寄鶴軀道室焚香勤守白虛窗點易靜
研朱自知世事難諧偶不待幽人夜見呼

午夢

苦愛幽窗午夢長此中與世暫相忘華山處士如容
見不見仙方覓睡方

江濱池納涼

雨過荒池藻荇香月明如水浸胡牀天公作意憐羈
客乞與今年一夏涼

晚步

屏居無俗事薄莫行溪園斷續風蟬噪俯仰露葉飄
月出照西壁參差見簷痕新沐懶不櫛清冷入髮根
臨流揮羽扇對月傾芳尊寄謝南昌尉何必隱市門
姚將軍靖康初以戰敗亡命建炎中下詔求之
不可得後五十年乃從呂洞賓劉高尚往來名

山有見之者予感其事作詩寄題青城山上清
宮壁間將軍儻見之乎

造物困豪傑意將使有為功名未足言或作出世資
姚公勇冠軍百戰起西陲天方覆中原殆非一木支
脫身五十年世人識公誰但驚山澤間有此熊豹姿
我亦志方外白頭未逢師年來幸廢放儻遂與世辭
從公遊五嶽稽首餐靈芝金骨換綠髓欻然松杪飛
客自鳳州來言岐雍間事悵然有感

表裏山河古帝京逆胡數盡固當平千門未報甘泉
火萬耦方觀渭上耕前日已傳天狗墮 去年十一月天
狗墮長安聲甚大 今年寧許佛狸生會領一洗儒酸態
獵罷南山夜下營

席上作

綠波畫槳浣花船清簟疎簾角黍筵一幅葛巾林下
客百壺春酒飲中仙散懷絲管繁華地寄傲江湖浩
蕩天浮世升沉何足計丹成碧落珥貂蟬 青城山中有

孫太古畫碧落侍中苑長生舉手整貂蟬像特妙

水亭偶題

涼榭閑拈玉笛吹十年疎放負明時溝中木斷誰曾問空裏蓬征自不知金井梧桐生晝寂綠池蘋藻弄風漪人生行樂從來事此理何須更細推

避暑江上

苦熱厭城市初夜臨江端風從西山來頗帶積雪寒
攄聲靜尤壯噴薄如急灘頓遠車馬喧更覺衣裳單
斷岸吐缺月恨不三更看且隨螢火歸城扉欲橫關

夏白紵并序

古有四時白紵亦有止作一時者丙申五月在成都烈暑可畏戲作夏白紵二首

雲母屏薄望如空水精簾疎不礙風美人獨立何所似白玉芙蓉秋水中素綃細織冰蠶縷清寒不受人間暑晚來浴罷綠窗閑自把新詩教鷓鴣

又

翔鸞矯矯離風塵眼明見此絕代人紗窗弄筆消永日臨得黃庭新逼真飛樓縹緲今何夕月與玉人同一色下簾不為九霄寒自要玲瓏看團壁

久旱忽大雨涼甚小飲醉眠覺而有作

暑雨蕭蕭滴夜長曉窗探借九秋涼金荷淺酌閑傳酒銀葉無煙靜炷香舒雁且為除死計鳴鳩便欲策勳忙散人亦未全無事枕籍琴書滿一牀

明日開霽益涼復得長句

睡起東窗照眼明朝陽爛熳作新晴已聞雨斷空階滴更覺風從細葛生蚊蝶飛來停酒榼石榴飄落移棋枰四時好處閑方覺不枉今年住錦城

夜讀東京記

海東小胡辜覆冒敢據神州竊名號幅員萬里宋乾坤五十一年讎未報煌煌藝祖中天業東都實宅神明隲即今犬豕穴宮殿安得旄頭下除掃寶玉大弓久不獲臣子義敢忘巨盜景靈太廟威神在北鄉慟

哭猶可告壯士方當棄軀命書生詎忍開和好孤臣白首困西南有志不伸空自悼

感事

青鬢當時映綠衣堯功曾預記魏魏玄都春老人何在華表天高鶴未歸流輩凋疎情話少年光遲莫壯心違倚樓不用悲身世倦鷓無風亦退飛

書數

三代藏寶器世守參河圖埋湮則已矣可使列市區文章有廢興蓋與治亂符慶曆嘉祐間和氣扇大鐘數公寶主盟渾灝配典謨開闢始歐王蓄畬逮曾蘇大駕初渡江中原皆避胡吾猶及故老清夜陪坐隅論文有脈絡千古著不誣俯仰四十年綠髮霜蓬枯孤生尊所聞秉節不敢渝久幽士固有速售理則無世方亂珉玉吾其老江湖

睡起

睡味清酣鼻息輕碧欄文簾喜涼生片雲過處失簾影急雨來時聞瓦聲索虜尚憑三輔險散關未下九天兵白頭漫倚詩豪在手掣鯨魚意未平

飯罷碾茶戲書

江風吹雨暗衡門手碾新茶破睡昏小餅戲龍供玉食今年也到浣花村

夢遊山水奇麗處有古宮觀云雲臺觀也

神遊忽到雲臺宮太華彩翠明秋空曲廊下闕白蓮沼小閣正對青蘿峯林間突兀見古碣雲外縹緲聞疎鐘褐衣紗帽瘦如削遺像恐是希夷翁窮搜未遍忽驚覺半窗朝日初瞳矓却思曠然五千仞可使常墮胡塵中小臣昧死露肝鬲願屬鑿鑿臨嶠潼何當真過此山下百尺嫋嫋龍旗風

月下醉題

黃鶴飛鳴未免飢此身自笑欲何之閉門種菜英雄老彈缺思魚富貴遲生擬入山隨李廣死當穿冢近要離一樽殭醉南樓月感慨長吟恐過悲

野外劇飲示坐中

悲歌流涕遣誰聽酒隱人間已半生但恨見疑非節
俠豈忘小忍就功名江湖舟楫行安往燕趙風塵久
未平飲罷別君攜劍起試橫雲海翦長鯨

與青城道人飲酒作

君不見太傅晚歲具海舟歸欲極意東山遊翰林偶
脫夜郎謫大醉賦詩黃鶴樓兩公窮達何足道同是
逸氣橫清秋我無一事行萬里青山白雲聊散愁有
酒不換西涼州無酒不典鸛鷗裘不作王猛傲晚坐
捫蝨不作甯戚悲歌起飯牛五雲覆鼎金丹熟笙鶴
飄然戲十洲

銅壺閣望月

銅壺閣上看明月身在千尋白銀闕十年肺渴今夕
平皓然曾次堆冰雪恨無僊掌出雲表更取墜露和
玉屑夜闌三歎下危梯明日人間火雲熱
連日得雨涼甚有作

九淵龍起跨蒼茫聊為西州洗亢陽曉看空濛知歲
稔夜聞點滴覺心涼紗幮不下蚊蠅靜焙火微温書
晝香睡足何須雲夢澤如雷鼻息撼隣牆
待青城道人不至

我亦從來薄世緣偶然采藥到西川慵追萬里騎鯨
客且伴千年化鶴僊金鼎養丹噉海日玉壺取酒醉
江天朝來坐待方平久讀盡黃庭內外篇

劍客行

我友劍依非常人袖中青蛇生細鱗騰空頃刻已千
里手決風雲驚鬼神荆軻專諸何足數正晝入燕誅
逆虜一身獨報萬國讎歸告昌陵淚如雨

夜宴即席作

宣華輦路牧羊羊摩訶龍池艸茫茫宮殿犁盡餘綠
牆南風遠吹禾黍香艸間白骨橫秋霜何由喚起醜
一觴癡人走死聲利場我獨感此惜流光蘋花開時
風榭涼美人縹緲如鸞翔亮年舜日樂未央非子之

故為誰狂

宿沱江彌勒院

兩足跛塘溢庭空艸樹荒衰年愁客路野寺憩衣囊
蛙吹喧孤枕蚊雷動四廊青燈照無寐寂寂數更長

學射道中感事

學射山前宿雨收盤輿咿軋自生愁得閑何惜傾家
贖漸老真須秉燭遊道廢尚書猶乞米時來技尉亦
封侯自憐白首能豪在車轍何因遍九州

遊學射觀次壁間詩韻

走遍人間鬢尚青爾來樂事滿餘齡傍潭秋爽鉏甘
菊登嶽春暄采茯苓閑倚松蘿論劍術靜臨窗几勤
丹經嚴光是逃名者安用天文動客星

昇僊橋遇風雨大至憩小店

觸熱真疑墮火灰雨如飛鏃亦佳哉空江魚鼈從龍
起平野雷霆擁馬來正怪橫吹屋茅盡俄聞下擊澗
松摧晚來日漏風猶急臥看柴扉闔復開

龍挂

成都六月天大風發屋動地聲勢雄黑雲崔嵬行風
中凜如鬼神塞虛空霹靂迸火射地紅上帝有命起
伏龍龍尾不卷曳天東壯哉兩點車軸同山摧江溢
路不通連根拔出千尺松未言為人作年豐偉觀一
洗芥蒂習

芳華樓夜宴

射虎將軍老不侯尚能豪縱醉江樓笙歌雜沓娛清
夜風露高寒接素秋少日壯心輕玉塞莫年幽夢墮
滄洲人間清絕沅湘路常笑靈均作許愁

遣興

老子從來薄宦情不辭落魄錦官城生前猶著幾兩
屐身後更須千載名樓外雪山森曉色井邊風葉戰
秋聲一尊尚有臨卭酒却為無憂得細傾卭州字文吏

部餉酒絕佳

六月九日夜步月至朝真觀

朝斗真人有舊祠，追涼老子曳筇枝。從來步月難爲客，此夕聽琴合有詩。竹院沉沉聞漏永，玉繩耿耿看星移。慙慙更作重來約，迨及冰輪未缺時。

十日夜月中馬上作

身遊碧海跨鯨魚，心似寒冰貯玉壺。衣溼三更清露墜，眼明萬里片雲無。橫空孤鶴曾相識，橫髮飛僊定可呼。老向人間無復意，逝將從此謁清都。

百歲

百歲紛紛易白頭，一年鼎鼎又清秋。壯心空似驪伏櫪，病骨敢懷狐首丘。屠釣論交成酒隱，山林高臥得天遊。莫悲晚節功名誤，卽死猶堪贈醉侯。

獨飲醉臥比覺已夜半矣戲作此詩

澤畔元非慕獨醒，蔽人一飲費經營。也知世少蘇司業，安得官如阮步兵。醉著面顏驚少壯，澆餘曾次失蟬聲。更闌莫厭殘燈火，臥聽空廊絡緯聲。

蒙恩奉祠桐柏

少年曾綴紫宸班，晚落危途九折艱。罪大初聞收郡印，恩寬俄許領家山。羈鴻但自思煙渚，病驥寧容著帝閑。回首颯稜渺何處，從今常寄夢魂間。

和范待制月夜有感

榆枋正復異鵬飛，等是垂頭受羶韉。坐客笑談嘲遠志，故人書札寄當歸。醉思蓴菜黏篙滑，饒憶鱸魚墜釣肥。誰遣貴人同此感，夜來風月夢苔磯。

和范待制秋興

策策桐飄已半空，啼螿漸覺近房櫳。一生不作牛衣泣，萬事從渠馬耳風。名姓已甘黃紙外，光陰全付綠尊中。門前剝啄誰相覓，賀我今年號放翁。

又

睡臉餘痕印枕紋，秋衾微潤覆爐熏。井桐搖落先霜盡，衣杵淒涼帶月聞。佛屋紗燈明小像，經奩魚蠹蝕真文。身如病驥惟思臥，誰許能空萬馬羣。

又

山澤沉冥氣尚豪，鬢絲未遽數蕭蕭。已忘海運鯤鵬化，那計風微燕雀高。萬里客魂迷楚峽，五更歸夢隔胥濤。故知有酒當勤醉，自古寧聞死可逃。

和范待制秋日書懷二首游自七月病起蔬食

止酒故詩中及之

閉窗貝葉對旁行，不覺城笳報夕陽。嗜酒步兵猶未達，拂衣司諫亦成忙。室無摩詰持花女，囊有娑婆等價香。欲與衆生共安隱，秋來夢不到鱸鄉。陳文惠公松江詩云西風斜日鱸魚鄉傳本或誤作香字張文潛嘗辨之

又

故人無字寄相思，敢向窮途怨不知。老病已全惟欠死，貪嗔雖斷尚餘癡。數莖雪鬢江湖遠，九轉金丹日月遲。畚粟山苗俱可飽，明年東去隱峨眉。

劍南詩稿卷第七終

劍南詩稿目錄

卷第八

遊學射山遇景道人 城東醉歸深夜復呼酒
作此詩 融州寄松紋劍 歲晚 玉京行

步出萬里橋門至江上 晚步 數日寒頓減
頗有春意感懷賦短歌 春秋 歲莫感懷

梅花 寺居夙興 萬里橋江上習射 關山
月 出塞曲 戰城南 讀書二首 晚過保

福 偶過浣花感舊遊戲作 夜讀唐諸人詩
多賦烽火者因記在 山南時登城觀塞上傳烽

追賦一首 平明出小東門觀梅 寺居睡覺
二首 樓上醉書 醉題 初春出遊 芳華

樓夜飲二首 東門外遍歷諸園及僧院觀遊
人之盛 城東馬上作二首 丁酉上元三首

後陵永慶院在大西門外不及一里蓋王建
墓也有二石幢猶當時物又有太后墓琢石為

人馬甚偉 小飲趙園 和范舍人書懷 和
范舍人病後二詩末章兼呈張正字二首 江

路見杏花 夜聞雨聲 海棠二首 張園海
棠 登劍南西川門感懷 和范舍人永康青

城道中作 宿上清宮 登上清小閣 小憩
長生觀飯已遂行 新津小宴之明日欲遊修

覺寺以雨不果呈范舍人二首 眉州驛舍睡
起 送范舍人還朝 過魚蛇市小寺 眉州

作 過修覺山不果登覽 青城縣會飲何氏
池亭贈譚德稱 題菴壁 幽居二首 浣花

女 七月八日馬上作 江樓 夜登小南門
城上 野步至青羊宮偶懷前年嘗劇飲于此

月夜江濱池納涼 華亭院僧房二首 乾
明院觀畫 登城 秋日登僊遊閣 自詠

雜詠四首 大醉歸南禪弄影月下有作 訪
楊先輩不遇因至石室 病酒戲作 訪昭覺

老 晝臥 晚步江上 夜坐 夜行 悲秋
城北青蓮院方丈壁間有畫鶯子者過客多
題詩予亦戲作二絕 睡起 天涯 暇日行

城上同行追不能及 感秋 雙流旅舍三首
早行至江原 安仁道中二首 八月十四

夜三叉市對月 豐橋旅舍作 文君井 白
鶴館夜坐 南津勝因院亭子 登邛州譙門

門三重其西偏有神仙張四郎畫像張蓋隱白
鶴山中 書寓舍壁二首 次韻使君吏部見

贈時欲遊鶴山以雨止 西巖翠屏閣 幽居
院 中溪 天台院有小閣下臨官道予為名

曰玉霄 山中小雨得宇文使君簡問嘗見張
僊翁乎戲作一絕 雨中山行至松風亭忽澄

霽 贈宋道人 自山中泛舟歸郡城 次韻
宇文使君山行 同王無玷羅用之訪臨印道

士墓 登太平塔 中夜投宿修覺寺 絕勝
亭 雲谿觀竹戲書二絕 九月十日如漢州

小獵於新都彌牟之間投宿民家 獵罷夜飲
示獨孤生三首 自廣漢歸宿十八里草市

東郊飲村酒大醉後作 九月十八夜夢避雨
叩一僧院有老宿年八十許邀留甚勤若舊相

識者夢中為賦此詩 秋晚登城北門

劍南詩稿卷第八

宋陸游務觀

遊學射山遇景道人

肩輿適青郊飛屐登翠麓餘霜未法瓦晨日初掛木
推門覓黃冠避客似犇鹿雖無與晤語清坐意亦足
豈知逢此土曠度超世俗欣然同一笑齒頰粲冰玉
探囊贈奇艸甘香勝芍菊試臨清鏡照衰髮森已綠
出門恣幽討老僮有遺躅丹竈雖已空藥丸遍山谷
嗟予迫遲莫冠蓋厭追逐結茅遠人境此計亦已熟
若人真我友玉宇當共讀客來不知處雞犬望雲屋

城東醉歸深夜復呼酒作此詩

冬夜走馬城東回追風逐電何雄哉五門鼓動燈火
鬧意氣忽覺如章臺歸來脫靴靴滿霜月明如水浸
野堂梅花滿手不可負催熾獸炭傳清觴書生所懷
未易料會與君王掃燕趙只愁漸老不禁寒臥載輜
車君勿笑

融州寄松紋劍

十年學劍勇成癖騰身一上三千尺術成欲試酒半
酣直躡丹梯削青壁青壁一削平無蹤浩歌却過蓮
花峯世人仰視那得測但怪雪刃飛秋空老胡畏誅
奉約束假息漁陽連上谷願聞下詔遣材官取作腐
儒常碌碌

歲晚

歲晚城隅車馬稀偷閑聊得掩荆扉征蓬滿野風霜
苦多稼連雲雁鶩肥報國有心空自信結茅無地竟
安歸浣花道上人誰識華表千年老令威

玉京行 觀煉丹作

玉京清都奉紫皇赤明開皇劫茫茫有路坦如馳康
莊惜哉背之趨死鄉絳陵朱兒朝吐光森然箭鏃攢
玉牀潔齋山棲被不祥朝餐夕食芝木香纏囊藥笈

出祕方日精月華鍊陰陽爐開沐浴時日良清夜玉
杵聞琳房服之刀圭換肝腸三十六帝參翱翔下視
一笑爭奪場纍纍枯冢壓北邙
步出萬里橋門至江上

久坐意不懌掩卷聊出遊一筇吾事足安用車與騶
浮生了無恨兩踵躡百州常憶航巨海銀山卷薄頭
一日新雨霽微茫見流求 在福州泛海東望見流求國 西
行亦足快縱獵南山秋騰身刺猛虎至今血濺裘命
薄每自笑技尉略已候短劍隱市塵浩歌醉江樓頗
疑屠博中可與共奇謀丈夫等一死滅賊報國讎徒
倚萬里橋寒日墮前洲

晚步

院荒有古意僧少無人聲徘徊徇楠陰下賞此落日明
著書亦何急寂寞身後名今年復止酒歌舞陳空觥
不如且消搖出門隨意行看竹入廢園望江上高城
織纖素月出靄靄蒼煙橫此夕當復奇緜山吹玉笙
數日寒頓減頗有春意感懷賦短歌

微陰寒不力破臘春暗動林梢報梅白水際聞鳥呀

羈鴻漸整翻一一勞目送應憐飛蓬客猶作浣花夢

平生江淮間裘馬事豪縱豈知老畏死齋鉢受蔬供

忍饒每自笑小飲未敢痛何以慰寂寥臥聽壓春甕

春愁

春愁茫茫塞天地我行未到愁先至滿眼如雲忽復
生尋人似瘴何由遊客來勸我飛觥籌我笑謂客君
罷休醉自醉倒愁自愁愁與酒如風馬牛

歲莫感懷

征塵十載暗戎衣虛負名山采藥期少日覆甌曾舛
檄即今橫槊尚能詩昏昏殺氣秋登隴颯颯飛霜夜
出師會有英豪能共此鏡中未用數吾衰

梅花

冰崖雪谷木未芽造物破荒開此花神全形枯近有
道意莊色正知無表高堅政要飽憂患放棄何遽愁

荒遐移根上苑亦過計竹籬茅屋真吾家平生自嫌亦自許妙處可識不可誇金樽翠杓未免俗篝火為

試江南茶

寺居夙興

閑居無一事睡少自夙興空庭翠霧合高樹紅日昇
曳杖遶四廊悄然不逢僧廚煙俄漠漠魚鼓亦登登
晨粥香滿堂梁肉坐可憎匡山在何許吾將買行滕
萬里橋江上習射

坡隴如濤東北傾胡牀看射及春晴風和漸減雕弓
力野迴遙聞羽箭聲天上攬槍端可落艸間狐兔不
須驚丈夫未死誰能料一筇他年下百城

關山月

和戎詔下十五年將軍不戰空臨邊朱門沉沉按歌
舞廐馬肥死弓斷弦戎樓刁斗催落月三十從軍今
白髮留裏誰知壯士心沙頭空照征人骨中原干戈
古亦聞豈有逆胡傳子孫遺民忍死望恢復幾處今
宵垂淚痕

出塞曲

佩刀一刺山為開壯士大呼城為摧三軍甲馬不知
數但見動地銀山來長戈逐虎祁連北馬前曳來血
丹臆却回射雁鴨綠江箭飛雁起連雲黑清泉茂艸
下程時野帳牛酒爭淋漓不學京都貴公子唾壺塵
尾事兒嬉

戰城南

王師出城南塵頭暗城北五軍戰馬如錯繡出入變
化不可測逆胡欺天負中國虎狼雖猛那勝德馬前
嗚呼爭乞降滿地縱橫投劍戟將軍駐坡擁黃旗遣
騎傳令勿自疑詔書許汝以不死股栗何為汗如洗

讀書

面骨嶙嶙鬢欲疎退藏只合臥蝸廬自嫌尚有人間
意射雉歸來夜讀書

又

歸老寧無五畝園讀書本意在元元燈前目力雖非
昔猶課蠅頭二萬言時方讀小本通鑑

晚過保福

堂靜僧閑普請疎爐紅氈暖放參餘蓮花池上容投
社椰子身中悔著書茶試趙坡如潑乳芋來犀浦可
專車放翁一飽真無事擬伴圓頭日把鉏

偶過浣花感舊遊戲作

憶昔初為錦城客醉騎駿馬桃花色玉人攜手上江
樓一笑鉤簾賞微雪寶釵換酒忽徑去三日樓中香
未滅市人不識呼酒仙異事驚傳一城說至今西壁
餘小草過眼年光如電掣正月錦江春水生花枝缺
處小舟橫閑倚胡牀吹玉笛東風十里斷腸聲

夜讀唐諸人詩多賦烽火者因記在山南時登城觀塞上傳烽追賦一首

我昔遊梁州軍中方罷戰登城看烽火川迴風裂面
青堞竝駱谷隱巖連鄂縣月黑望愈明雨急滅復見
初疑雲罅星又似山際電豈無酒滿尊對此不能噤
低頭媿虎嘖零落白羽箭何時復關中却照甘泉殿

平明出小東門觀梅

知心多別難慰眼易零落東風吹梅花爛漫照城郭
晴日千堆雪偏宜馬上看逢迎無幾日不惜犯春寒
明年花發時我在兩京道花香固無盡我亦未遽老
脫帽髮如漆看花心未灰平戎那得妨持酒會有詩
傳劍外來

寺居睡覺

虛窗寂寂夜三更燈斂殘光避月明老懶只貪春睡
美魂聞童子誦經聲

又

心地安平曉夢長忽聞魚鼓動修廊披衣起坐清羸
甚想像雲堂炷粥香僧雜菜餌之屬作粥名魚粥

樓上醉書

丈夫不虛生世間本意滅虜收河山豈知蹭蹬不稱

意八年梁益凋朱顏三更撫枕忽大叫夢中奪得松
亭關中原機會嗟屢失明日茵席留餘潛益州官樓
酒如海我來解旗論日買酒酣博塞爲歡娛信手梟
盧喝成采牛背爛爛電目光狂殺自謂元非狂故都
九廟臣敢忘祖宗神靈在帝旁

醉題

裘馬清狂錦水濱最繁華地作閑人金壺投箭消長
日翠袖傳盃領好春幽鳥語隨歌處拍落花鋪作舞
時茵悠然自適君知否身與浮名若箇規

初春出遊

春風初來滿刁州江水照人如潑油犢車芳艸南陌
頭家家傾貲事遨遊萬里橋西繫黃驄爲君一登散
花樓半年長齋廢觥籌興來忽典千金裘小桃婀娜
弄芳柔紅蘭茁芽滿春洲墟邊女兒不解愁鬪艸纔
罷還藏鉤可憐世人自拘囚益中乾坤舞蜉蝣百年
苦短去日適問君安用萬戶侯

芳華樓夜飲

春風射雉苑城旁走馬還來入醉鄉夜暖酒波搖燭
焰舞回妝粉鑠花光浮生一笑常難必此樂它年未
易忘莫作五陵豪俠看奚奴歸路有詩囊

又

結客追遊亦樂哉城南城北古池臺香生赭汗連錢
馬光溢金鞍撥雪醅難覓長繩縻日住且憑羯鼓喚
花開一春政使渾無事醉到清明得幾回

東門外遍歷諸園及僧院觀遊人之盛

馬上哦詩畫醉鞭東城南陌去翩翩微風颺水魚鱗
浪薄日烘雲卵色天隔屋鳩鳴閑院落爭門花簇小
鞦韆病來久已疎杯酌春物撩人又破禪

城東馬上作

古寺名園處處行翩然南陌復東城手柔弓燥獵徒
喜耳熱酒酣詩興生月似有情迎馬見鸞如相識向
人鳴摩挲病眼還三數猶擬中原看太平

又

割鮮藉艸醉春醪仰看鳴鶻百尺高杜老何妨希稷
蒿孔明本自陋袁曹邊頭插羽無傳檄篋裏盤鵬有
舊袍寄語長安衆年少妓圍不似獵圍豪

丁酉上元

突兀毬場錦繡峯遊人士女擁千重月離雲海飛金
鏡燈射冰簾掣火龍信馬隨車紛醉俠賣薪買酒到
耕農今年自笑真衰矣但覺憑鞍睡思濃

又

鼓吹連天沸五門燈山萬炬動黃昏美人與月正同
色客子折梅空斷魂寶馬暗塵思輦路釣舸孤火夢
江村古來漫道新知樂此意何由可共論

又

放翁也入少年場一笑燈前未歇狂翠袖成團欺月
冷氈車爭道覺塵香蠻酥點綴春風早楚餌留連夜
漏長結騎莫辭侵曉色昔人萬里看西涼

後陵承慶院在大西門外不及一里蓋王建墓
也有二石幢猶當時物又有太后墓琢石爲人

馬甚偉

陵闕淒涼俯舊邦恨流衰袂似長江穿殘已數金鳧
盡缺落空餘石馬雙攬飯飢鳥占寺鼓避人飛鼠上
經幢阿和乳臭崇韜耄堪笑昏童束手降

小飲趙園

少年結騎厭追歡漸老方知一笑難邂逅偶能成午
醉登臨未覺怕春寒高林橫靄丹青幅亂蝶爭花錦
繡團滿眼風光索彈壓酒盃須似蜀江寬

和范舍人書懷

歲月如奔不可遮卽今楊柳已藏鴉客中常欠尊中
酒馬上時看檐上花末路淒涼老巴蜀少年豪舉動
京華天魔久矣先成佛多病維摩尚在家

和范舍人病後二詩末章兼呈張正字

放衙元不爲春醴澹蕩江天氣未清欲賞園花先夢

到忽聞簷雨定心驚香雲不動熏籠暖蠟淚成堆斗
帳明關隴宿兵胡未滅祝公垂意在尊生

又

士生不及慶曆初下方元祐當勿疎請看蛟龍得雲
雨豈比鳥雀馴階除舍人起視北門艸學士歸著東
觀書劍外老農亦吐氣釀酒畦花常晏如

江路見杏花

我行浣花村紅杏紅於染數樹照南陂一林藏北嶺
雖慚嶺梅高繁麗豈易貶雨絲飛復止雲葉低未斂
似嫌風日緊護此燕脂點身閑得縱觀無語吾所歎

夜聞雨聲

高簷夜雨瀉淋漓浪起擁寒衾旋炷香春事豈堪頻破
壞客愁不可復禁當長餅磊落輸郵釀輕騎聯翩報
海棠著意物華君莫笑世間得喪更茫茫

海棠

十里迢迢望碧雞一城晴雨不曾齊今朝未得平安
報便恐飛紅已作泥

又

蜀地名花擅古今一枝氣可壓千林譏彈更到無香
處常恨人言太刻深

張園海棠

洛陽春信久不通姚魏開落胡塵中楊州千葉昔曾
見已數造化無餘功西來始見海棠盛成都第一推
燕宮池臺掃除凡木盡天地眩轉花光紅慶雲墮空
不飛去時有絳雪縈微風蜂蝶成團出無路我亦狂
走迷西東此園低樹猶三丈錦繡却在青天上不須
更著刀尺裁乞與齊奴開步障

登劍南西川門感懷

自古高樓傷客情更堪萬里望吳京故人不見莫雲
合客子欲歸春水生瘴癘連年須藥石退藏無地著
柴荆諸公勉畫平戎策投老深思看太平
和范舍人永康青城道中作

風驅雨壓無浮埃驂驪千騎東方來勝遊公自輩王
謝淨社我亦追宗雷岷山樓上一徙倚如地始闢天
初開廓然眼界三萬里山一蠹埵水一杯世間幻妄
幾變滅正自不滿吾曹哈丈夫本願布衣老達士詎
畏蒼顏催君看神君歲食羊四萬處處棄骨高成堆
西山老翁飽松麩造物賦予何遑哉

宿上清宮

永夜寥寥憩上清下聽萬壑度松聲屋辰頓覺去人
近風雨何曾敗月明是夕山下風雨絕頂月明建曉
早歲
文辭妨至道中年憂患博虛名一菴儻許西峯住常
就巢僊問養生上官道人巢居山中

登上清小閣

樓觀參差倚晚晴偶然信脚得閑行欲求靈藥換凡
骨先挽天河洗俗情雲作玉峯時特起山如翠浪盡
東傾何因從此橫空去笙鶴飄然過洛城

小憩長生觀飯已遂行

清絕長生觀再遊疑後身人間空石劫物外自壺春
道士青精飯先生烏角巾回頭增悵望倦馬撲征塵
新津小宴之明日欲遊修覺寺以雨不果呈范
舍人

風雨長亭話別離忍看清淚溼燕脂酒光搖蕩歌雲
暖不似西樓夜宴時

又

新津渡頭舫欲開山亭準擬把離盃不如意事十八
九正用此時風雨來
眉州驛舍睡起

平生百無能一懶每自喜胡為八年間逐食走萬里
身如盤汞轉心似爐丹死事君未免媿富貴不如已
雨餘古驛涼晝寐無錯履澹然得高臥睡思極清美
心平了無夢驚覺何自起尚嫌漆園蝶肯作南柯螳
斜陽生木影龍蛇滿窗紙煎茶儻已熟一笑問童子
送范舍人還朝

平生嗜酒不為味聊欲醉中遺萬事酒醒客散獨悽然枕上屢揮憂國淚君如高光那可負東都兒童作胡語常時念此氣生癭况送公歸觀明主皇天震怒賊得長三年胡星失光芒旄頭下掃在日莫嗟此大議知誰當公歸上前勉畫策先取關中次河北堯舜尚不有百蠻此賊何能穴中國黃扉甘泉多故人定知不作白頭新因公併寄千萬意早為神州清虜塵

過魚蛇市小寺

六月苦多兩肩輿走江村過市居人集陟險兵子喧日昧休野寺汛掃開北軒霧氣如蒼虬天矯出洞門溪清見白石糾結菖蒲根遊魚去甚健投餌棄不吞嗟予獨何為貪祿忘故園馳驅不自恤面有風沙痕俯仰二十年竟孤明主恩寄謝衆君子努力蘇元元

眉州作

扁舟久不泛葦津常恐黃塵解汚人爛醉破除千日薄予不至眉山三年矣狂吟判斷四州春此行自成都歷永康唐安至眉山汀洲漸歎蘋花老風露初嘗荔子新便欲騎鯨東海去勝遊未忍別峨岷

過修覺山不果登覽

前日泛江時雨昏失南山今日迎我馬鬃髻擁髻鬢白塔映朱閣間見青林間問我豈忘之揚鞭亟西還西還亦聊爾行矣來憑欄擾擾紅塵中豈無一日閑會復賡此詩大書榜其顏但恐厄風雨清遊天所慳

青城縣會飲何氏池亭贈譚德稱

赤日黃塵行路難青城縣裏得偷閑十年去國悲霜鬢六月登樓望雪山醉客千言猶落筆美人斗酒未醺顏憑誰喚住譚夫子更與徘徊水石間

題菴壁

偶向城南卜草廬二年浪迹寄樵漁大牀獨臥豪猶在萬衆橫行策竟疎清濁戲分春甕酒朱黃閑勘夜窗書衰顏安用頻看鏡日日元知有不如

幽居

殊方飄泊向誰論小住僧廬亦所欣得飽罷揮求米帖愛眠新著毀茶文摘蔬藍小露清露露藥鉏輕帶溼雲從此生涯足幽事宜遊虛用半生勤

又

剡曲故廬歸未得暫從地主借茅茨桃花春水夢不到菘菜秋風心自知彊健猶穿幾兩屐榮華正似一鉤絲此心炯炯無人會煙雨蒼茫獨立時

浣花女

江頭女兒雙髻丫常隨阿母供桑麻當戶夜織聲啞啞地爐豆蔞煎上茶長成嫁與東家柴門相對不上車青裙竹笥何所嗟插髻燁燁牽牛花城中妖姝臉如霞爭嫁官人慕高華青驪一出天之涯年年傷春抱琵琶

七月八日馬上作

溝水浸新月街槐生碧煙明河七夕後倦馬五門前小市燈初開高樓鼓已傳賦詩寬客恨哦罷却凄然

江樓

急雨洗殘瘴江邊閑倚樓日依平野汲水帶斷槎流擣紙荒村晚呼牛古巷秋腐儒憂國意此際入搔頭

夜登小南門城上

曳杖上江城清宵破二更月回高樹影風壯急難聲野艇魚留舉優場炬火明湖塘正如此回首憶柴荆

予故山在鏡湖之南

野步至青羊宮偶懷前年嘗劇飲于此

錦官門外曳枯筇此地天教著放翁萬事元無工拙處一官已付有無中拏雲柏樹瘦蛟立繞郭江流清鏡空欲把酒盃終覺懶緩歌曾醉落花風

月夜江濱池納涼

微逕荒城曲叢祠野水邊月能從我醉風欲駕人僮靜看黏螢艸遙聞采芡舩熱官那有此留滯莫尤天

華亭院僧房

半闔朱門見綠苔幽花仍傍小山開劍南七月暑未

退明日更攜棋算來

又

悠悠馬上困思茶休歇僧房到日斜殿背無人綠錢
滿小盆零落珊瑚花

乾明院觀畫

唐年蘭若占閑坊名畫蕭條半在亡簌簌踈篁常似
雨陰陰古屋自生涼入門疊鼓初催講喚馬斜陽欲
滿廊顯晦熟思真有數萬金奇跡棄頽牆院中有黃筌
花竹幾二十壁多已壞矣

登城

我登少城門四顧天地接大風正北起號怒撼危堞
九衢百萬家樓觀爭岌業臥病氣壅塞放目意頗愜
永懷河洛間煌煌祖宗業上天祐仁聖萬邦盡臣妾
橫流始靖康趙魏血可蹀小胡寧遠略為國恃剽劫
自量勢難久外復中已懾籍民備勝廣陸戰畏荆聶
誰能提萬騎大呼去擊擁馬鬣奇兵四面出快若霜
掃葉植旗朝受降馳驛夜奏捷豺狼一朝空狐兔何
足獵遺民世忠義泣血受汗膏繫箭射我詩往傲五
陵俠

秋日登僊遊閣

馬蹄連早莫車塵細如霧誰知此路邊高閣下風馭
頗傳秋月夕語笑聯杖屨始知僊與人混迹無異處
我來想鸞鶴稽首祈一顧飛僊不可見惟與白雲遇
白雲如有情傍我欄角住借問何山來雲驚却飛去

自詠

華髮蕭蕭居士身江頭風雨折烏巾無人問字尤宜
懶有吏徵租未是貧薄宦儻來難倚仗舊交漸少每
酸辛敲門且復尋僧話要結他生物外因

雜詠

青羊宮中竹暗天白馬廟畔柏如山琴尊處處可消
日車馬紛紛自欠閑

石犀廟壩江已回陵谷一變吁可哀即今禾黍連雲
處當日帆檣隱映來

又

微風飄飄芊葉白落日漠漠稻花香出門縱轡何所
詣萬里橋南追晚涼

又

世事盛衰誰得知惠陵煙草掩柴扉陵邊人家叢竹
裏燈火喧呼迎婦歸

大醉歸南禪弄影月下作

昔我變姓名釣魚散花洲有愁不用檝江急聽自流
即今客錦城醉過百花樓天風吹筍輿快若凌空遊
月露浩無際指點隘九州君看塵土中頗有此樂不
題詩碧玉簡飛僊相答酬酒醒墮何處樓臺海山秋
訪楊先輩不遇因至石室

訪客客已去追涼成獨行衣冠嚴漢殿草木拱秦城
古鬢蒼苔滑空庭落日明出門還憺恍列屋打碑聲
病酒戲作

病酒戲作

新秋風月佳數夕破酒戒飲少輒醉眠衰早頗自怪
高春未離枕眩轉疑屋壞家人具雞豚熟視不能噉
尚無千里蕙敢覓鏡湖蟹一盃苦蕒齋價直娑婆界
訪昭覺老

久矣耆年罷送迎喜聞革履下堂聲遊山笑我鷲直
去過夏憐君太瘦生庭際楠陰凝晝寂牆頭鵲語報
秋晴功名已付諸賢了長作閑人樂太平

書臥

秋暑侵人氣力微燒香高枕掩齋扉弄姿野鷲晴猶
斂作態江雲晚未歸身外極知皆夢事世間隨處有
危機故山松菊今何似晚矣淵明悟昨非

晚步江上

萬里橋邊帶夕陽隔江漁市似清湘山林獨往吾何
恨車馬交流渠自忙高柳陰中扶拄杖平沙穩處據

胡牀故人京國無消息安得相攜共此涼
夜坐

大風橫吹斗柄折迅雷下擊山壁裂放翁閉戶寂不
聞楞嚴卷盡燈花結

夜行

紅藤拄杖扶衰病村北村南破夜行閑繞長堤逐螢
火戲臨荒沼問鼃聲倦遊但有苓箸興久客真諳穢
穢情安得故人同一醉三更城上看河傾

悲秋

一拋蓑笠雪溪舟八載梁州復益州纔破繁華海棠
夢又驚搖落井梧秋曉班無復趨行殿晚境惟思老
癡丘病肺經旬疎酒盞愁來惟是上南樓

城北青蓮院方丈壁間有畫鷺子者過客多題
詩予亦戲作二絕句

一雙掠水鷺來初萬點飛花社雨餘辛苦成巢君勿
笑從來吾亦愛吾廬

又

明窗短壁拂蛛絲常是江邊送客時留滯錦城生白
髮不如巢鷺有歸期

睡起

閉身喜午睡睡起日猶早茂竹青入簷幽花紅出草
苔錢亦滿砌護惜不忍掃宦情本自疎此地可忘老

天涯

天涯到處自生愁游子征塵暗弊裘燈火青熒五門
夜風煙索莫二江秋帝城漫誦新詩句客路難逢舊
輩流送老把茅須早決此生何止四宜休

暇日行城上同行追不能及

疾步登城殊未衰欣然一笑擲筇枝正當閑似白鷗
處不減健如黃犢時秋野煙雲橫慘淡莫天樓閣倚
參差高吟醉舞忘歸去乞與丹青畫怪奇

感秋

西風繁杵擣征衣客子關情正此時萬事從初聊復

爾百年疆半欲何之畫堂蟋蟀怨清夜金井梧桐辭
故枝一枕淒涼眠不得呼燈起作感秋詩

雙流旅舍

孤市人稀冷欲冰昏昏一盞店家燈開門拂榻便酣
寢我是江南行脚僧

又

西風黃葉滿江村瘦馬來穿渡口雲動地傳呼逢醉
尉誰何禁殺故將軍

又

每因髀肉歎身閑聊欲勤勞鞍馬間黑稍黃旗端未
免會衝風雪出榆關

早行至江原

嗷嗷鳴雞促起程飄飄飛鷺導孤征旄盡落歸猶
遠帶眼頻移瘦自驚小市蕭條黃葉滿斷橋零落綠
苔生居人猶復多愁思何況天涯倦客情

安仁道中

千古臨邛路飄然偶獨遊病身那迫老遠客更禁秋
水退橋未葺渡閑船自流飛騰付年少回首思悠悠

又

三驛未爲遠衰翁愁出門貪程多卒卒失睡每昏昏
天大圍平野江回隔近村何時有餘俸小築占雲根
八月十四夜三义市對月

去年看月籌邊樓雲罽微光如玉鉤主人不樂客歎
息清歌空送黃金舟今年看月三义市纖雲不作良
宵崇素娥命駕洗客愁我亦傾杯邀共醉風露萬里
方渺然冰輪無轍行碧天盈盈耿耿意無盡月不忍
落人忘眠一言欲報廣寒殿茅簷華屋均相見明年
萬事不足論但願月滿人常健

豐橋旅舍作

我本山林入心期在塵表出門消底物兩屨萬事了
羣兒何足愠爲爾常悄悄今朝山中路更喜相識少
三义市人醉爭席豐橋逆旅留饋食小婦梳髻高一

尺椽聲札札當戶織

文君井

落魄西州泥酒盃酒酣幾度上琴臺青鞋自笑無羈束又向文君井畔來相如琴臺在成都城中文君井在邛州相

傳爲宣氏故宅

白鶴館夜坐

竹聲風雨交松聲波濤驟我坐白鶴館燈青無晤言廓然心境寂一洗吏卒喧袖手哦新詩清寒媿雄渾屈宋死千載誰能起九原中間李與杜獨招湘水魂自此競摹寫幾人望其藩蘭若看翡翠煙雨啼青猿豈知雲海中九萬擊鵬鯤更闌燈欲死此意與誰論

南津勝因院亭子

南江平無風如鏡新拂拭漁舟不點破微激千頃碧闌干西北角雲散山爭出坡陀競南走翠入窗戶窄江山不世情作意娛此客豈無尊中酒豪飲非宿昔明當還成都塵土埋馬跡後巖在眼中飛去無羽翼後巖在鳳凰山後七八里山水尤奇絕

登邛州譙門門三重其西偏有神仙張四郎畫

像張蓋隱白鶴山中

浮雲在脚底千里在眼邊攀躋忽至此倚柱眩欲顛車馬細如蠅紛紛衢路間嗟汝何爲者馳驅窮歲年我本澹蕩人此心實愛閑向來出處際不媿咫尺天風吹哦詩聲十里搖西山懸知老僊翁爲我一粲然

書寓舍壁

天與癡頑不解愁未埋病骨且閑遊山於拄杖橫時看路到芒屨破處休初擬燒丹住南嶽却因學劍客

西州秋風巾褐添蕭爽又作臨邛十日留

又

落魄頽冠慣放慵經旬寓館古臨邛西偏取路橫穿竹北向開門倒看松醉後蹇驢歸薄莫閑來支枕睡高春鷓鴣鳴山谷曾遊處剩欲扶犁學老農鷓鴣一名鷓鳴在邛之大邑縣

次韻使君吏部見贈時欲遊鶴山以雨止

墓頭江上約同行白鶴峯前辱寄聲青史功名男子事後堂歌舞故人情午甌誰致葉家白春甕旋撥郎官清登覽不嫌鳩喚雨十年共屬慣山程

西巖翠屏閣

把酒孤亭半日留西巖獨擅鶴山秋也知絕境終難賦且喜閑身得縱遊鷗起危巢時磔磔鹿鳴深澗莫呦呦人生適意方爲樂甲第朱門祇自囚

幽居院

久墮塵沙裏幽尋始此行侵雲千嶂合披草一僧迎蘚潤泉時滴崖傾竹倒生登高忽平曠回首失崢嶸老矣猶孤客歸哉念耦耕結廬殊未定此地頗關情

中溪

散人無俗事日日山中行今朝中溪寺妙絕不可名幽處萬木合忽然千頃平綠黛染晴嶂白雲如玉城巖花勸小酌天風吹獨醒雖無九臯鶴奇哉此松聲我如折翼鵬回盡九萬程脫屣擲拄杖於此錢餘生天台院有小閣下臨官道予爲名曰玉霄

竹輿衝雨到天台綠樹陰中小閣開勝作玉霄君會否要知散吏按行來予所領崇道觀蓋在天台中玉霄峯下

山中小雨得宇文使君簡問嘗見張僊翁乎戲作一絕

張僊挾彈知何往清嘯穿林但可聞拾得鐵丸無處用爲君打散四山雲張四郎常挾彈視人家有災疾者輒以鐵丸擊散之

雨中山行至松風亭忽澄霽

煙雨千峯擁髻鬢忽看青嶂白雲間卷藏破墨營丘筆却展將軍著色山

贈宋道人

我不如昔人騎鶴上九天玉簡奏事虛皇前平生嗇養氣羸全兩脚馳走輕如煙鳥道懸崖忽飛鸞戲擲短劍聲鏗然轉盼跳下千仞淵已復取劍升層巔騰

猿俊鵲爭後先飢食松花搦飛泉金骨綠髓漸凝堅
口哦七字黃庭篇西來欲訪挾彈僊丹經劍訣更精
研嗟哉一失五百年作詩付子勿妄傳

自山中泛舟歸郡城

我呼小艇浮南津落日亂山衝半輪背舩雙鷺低掠
水下灘峭風冷逼人中流回望始太息煙中白塔高
嶙峋適從彼來忽在此老夫拄杖捷有神尉曹堆盤
笠澤膾秀才瀉榼中山春豈惟外物不挂眼醉後兀
爾忘吾身朝冠行即挂神武買犢遂欲耕峨岷金丹
自喜日日長白髮未許年年新擁橋炬火遠已鬧歸
舍睡息清而勻明朝笑謂同載客有脚莫踏東華塵
次韻宇文使君山行

城中望西山爽氣固可致不如山中行衣屨染濃翠
使君資高逸鐵馬奏橫吹平郊何曠蕩修竹亦清閼
既聞蘇門嘯遂挹浮丘袂似嫌太清絕開宴盡主意
戲留楚臺雲寶鬢鬪姿媚珠貫按歌聲泉湧發詩思
歸來殊不倦吏牘閱千紙却笑江左人把酒輒遺事
下客亦未衰尚可提萬騎安能學胡公危苦寄鶴翅
仙人胡安學道西巖跨鶴上昇山以此得名

同王無玷羅用之訪臨邛道士墓

樂天詩句本嘲該那有人從碧海來五百年間逢好
事披榛來訪此崔嵬

登太平塔

我從平地來忽寄百尺巔眼力與脚力初不減少年
漸高山愈出杳杳浮雲煙舉手捫參旗日月磨螿旋
天風忽吹衣便欲從此僊且復下梯去著書未終篇

中夜投宿修覺寺

陸走崔嵬水下瀧客中更復客它邦晚離方井雲藏
市夜渡新津火照江人語紛紛投野寺牀敷草草寄
僧窗五更風雨妨歸夢臥看殘燈吐半缸

絕勝亭

蜀漢羈遊歲月侵京華乖隔少來音登臨忽據三江

會飛動從來萬里心地勝頓驚詩律壯氣增不怕酒
盃深一琴一劍白雲外揮手下山何處尋

雲谿觀竹戲書二絕句

氣蓋冰霜勁有餘江邊見此列僊癯清寒直入人肌
骨一點塵埃住得無

又

溪光竹色兩相宜行到溪橋竹更奇對此莫論無肉
瘦閉門可忍十年飢

九月十日如漢州小獵於新都彌牟之間投宿
民家

適從邛州歸又作漢州去天低慘欲雪遊子悲歲莫
十年辭京國疋馬厭道路野火炎高岡江雲暗空戍
角弓寒始勁霜鷗飢更怒避近成小獵尺箠聊指呼
北連武侯祠南竝稚子墓合圍蹙窮鹿設伏截狡兔
壯哉帶箭雉耿介死不顧吾寧暴天物戰法因得寓
黃昏過民家休馬燎裘袴割鮮盛燔炙毛血灑庭戶
老媪亦復奇汎掃邀我駐丈夫儻未死千金酬此遇
獵罷夜飲示獨孤生

客途孤憤只君知不作兒曹怨別離報國雖思包馬
革愛身未忍價羊皮呼鷹小獵新霜後彈劍長歌夜
雨時感慨却愁傷壯志倒瓶濁酒洗餘悲

又

關輔何時一戰收蜀郊且復獵清秋洗空狡穴銀頭
鶴突過重城玉腕驅賊勢已衰真大慶士心未振尚
私憂一樽共講平戎策勿爲飛鳶念少游

又

白袍如雪寶刀橫醉上銀鞍身更輕帖草角鷹掀兔
窟憑風羽箭作鷗鳴關河可使成南北豪傑誰堪共
死生欲疏萬言投魏闕燈前攬筆涕先傾

自廣漢歸宿十八里草市

月黑叩店門燈青坐牀簾飯麤雜沙土菜瘦等草棘
泰然均一飽未覺異玉食我豈兒女哉口腹爲怨德

古人恥懷祿不仕當力穡從今扶犁手終老謝翰墨

東郊飲村酒大醉後作

丈夫無苟求君子有素守不能垂竹帛正可死隴畝

邯鄲枕中夢要是念所有持枕與農夫亦作此夢否

今朝櫟林下取醉村市酒未敢羞空囊爛熳詩千首

九月十八夜夢避雨叩一僧院有老宿年八十

許邀留甚勤若舊相識者夢中爲賦此詩

晝簷急雨傾高秋夜投丈室燈幽幽者年擁毳雪滿

頭拂拭牀敷邀我留雛貌戲擲香出喉蓬蓬結成蒼

玉球蠻童揭簾侍者憂觸散香煙當罰油

秋晚登城北門

幅巾藜杖北城頭卷地西風滿眼愁一點烽傳散關

信兩行雁帶杜陵秋山河興廢供搔首身世安危入

倚樓橫槊賦詩非復昔夢魂猶繞古梁州

劍南詩稿目錄

卷第九

秋興 夜飲 莫秋二首 夜雨有感 道室
 飯罷戲作 初冬夜宴 冬夜醉歸復小飲
 病酒述懷 數日暗妍頗有春意予閒居無
 日不出遊戲作 遣興 趙將軍并序 江樓
 醉中作 曳策 謁漢昭烈惠陵及諸葛公祠
 宇 遙夜 遠遊 大雪歌 簡譚德稱 排
 悶 夜意三首 玉局觀拜東坡先生海外畫
 像 心太平養 訪客至西郊 得都下八月
 書報蒙恩牧敘州 晚起二首 江樓吹笛飲
 酒大醉中作 晚登子城 夙興出謁 十一
 月三日過升仙橋作三絕 遣興 草堂拜少
 陵遺像 青羊宮小飲贈道士 夜寒二首
 書懷 記夢二首 醉中出西門偶書 訪客
 不遇 劍客行 故蜀別苑在成都西南十五
 六里梅至多有兩大樹天橋若龍相傳謂之梅
 龍予初至蜀嘗爲作詩自此歲常訪之今復賦
 一首丁酉十一月也 閒意 飲罷夜歸 江
 亭冬望 大風登城 書雨 一笑 歲晚懷
 鏡湖舊隱慨然有作 華髮 歎息 冬至
 城南尋梅四首 書數 感興二首 莫冬夜
 宴 枕上 謁石犀廟 江上散步尋梅偶得
 三絕 漣漪亭賞梅 芳華樓賞梅 浣花賞
 梅 蜀苑賞梅 大醉梅花下走筆賦此 之
 廣都憩鐵像院 廣都江上作 宿龍華山中
 寂然無一人方丈前梅花盛開月下獨觀至中
 夜 次韻張季長正字梅花 次韻季長見示
 廣都道中呈季長 看梅歸馬上戲作五首
 別後寄季長 中夜對月小酌 客愁 詩
 酒 道室夜意 道室晨起 城南王氏莊尋
 梅 遊萬里橋南劉氏小園 過笮橋道中龍

祠小留 道上見梅花 倚樓 寄王季夷
 丁酉除夕 正月二日晨出大東門是日府公
 宴移忠院 小飲落梅下戲作送梅 立春
 初春出遊戲作 初春遣興三首 予年十六
 始識葉晦叔於西湖上後二十七年晦叔之弟
 聲叔來爲臨卽守相遇於成都晦叔沒久矣訪
 其遺文略無在者乃賦此詩 初春探花有作
 遊諸葛武侯書臺 觀花 張園觀海棠
 月夕 夜飲卽事 夜宴賞海棠醉書 二月
 十六日賞海棠 卽席 東歸有日書懷 眉
 州披風榭拜東坡先生遺像

劍南詩稿卷第九

宋陸游務觀

秋興

成都城中秋夜長燈籠蠟紙明空堂高梧月白繞飛
鵲衰草露溼啼寒螢堂上書生讀書罷欲眠未眠偏
斷腸起行百匝幾數息一夕綠髮成秋霜中原日月
用胡曆幽州老酋著柘黃滎河温洛底處所可使長
作旂裘鄉百金戰袍鵬鷲盤三尺劍鋒霜雪寒一朝
出塞君試看日發寶雞莫長安

夜飲

引劍酣歌亦壯哉要君共覆手中盃秋鴻陣密橫江
去莫角聲酣戰雨來莫恨皇天無老眼請看白骨有
青苔中年倍覺流光速行矣西郊又見梅

莫秋

時序中年速風霜客路長孤愁巴月白清夢楚山蒼
燈暗秋銜壁鐘疎夜殷床端居有微祿不敢恨殊方

又

萬里歸無策八年淹此留羞蒙子公力寧倦長脚遊
聽雨瀟湘夜飛鷹鄂杜秋更須論富貴此計亦悠悠

夜雨有感

北風吹雨暗江郊十月僧廬旋補苧病馬敢希三品
料驚禽聊借一枝巢少時諸老爭求識晚歲殊方罕
定交閉戶不妨新得趣丹經盈篋手親抄

道室

一室冷如冰人疑在定僧手稱丹竈火紗護佛龕燈
食減形雖槁心虛氣自凝平生坐忘論字字欲銘膺

飯罷戲作

南市沽濁醪浮螳甘不壞東門買豉骨醃醬點橙橙
蒸雞最知名美不數魚蟹輪困犀浦芋磊落新都菜
欲康老饕賦畏破頭墮戒況予齒日疎大嚼敢屢嚼

杜老死牛角千古懲禍敗閉門餌朝霞無病亦無債
初冬夜宴

絲管紛紛燭滿堂臬盧擲罷夜飛觴帷屏風定歌雲
暖香獸煙濃漏箭長泛菊已成前日夢探梅又續去
年狂醉歸自笑摧頽甚冷逼貂裘怯曉霜

冬夜醉歸復小飲

野外歸來晚空庭露氣新乍晴雲妬月多病酒欺人
倚杖行吟久投盃起舞頻早梅消息動春事漸關身

病酒述懷

閑處天教著放翁艸廬高臥笮橋東數莖白髮悲秋
後一醜青燈病酒中李廣射歸關月墮劉琨嘯罷塞
雲空古人意氣憑君看不待功成固已雄

數日暄妍頗有春意予閑居無日不出遊戲作
小春花蕾索春鏡已有暄風入紫貂村路雨晴鳩婦
喜射場草綠雉媒嬌苑邊結客飛金勒樓上誰家弄
玉簫莫怪夕陽歸獨後早梅喚我度谿橋蜀宣華苑在

摩訶池上

遺興

耆舊日凋謝將如此老何憊拈如意舞狂叩唾壺歌
郡縣輕民力封疆恃虜和功名莫看鏡吾意已蹉跎

趙將軍并序

客為予言靖康建炎間關中奇士趙宗印者
提義兵擊虜有衆數千所向輒下虜不敢當
會王師敗於富平宗印知事不濟大慟於王

景略廟盡以金帛散其下被髮入華山不知
所終予感其事為作此詩

我夢遊太華雲開千仞青擘山瀉黃河萬古仰巨靈
住者稱亂初氛禔干太寧豈無臥雲龍一起奔風霆
時事方錯謬三秦盡羶腥山河銷王氣原堊失大刑
將軍散髮去短劍斷茯苓定知三峯上爛醉今未醒

江樓醉中作

淋漓百榼宴江樓秉燭揮毫氣尚道天上但聞星主

淋漓百榼宴江樓秉燭揮毫氣尚道天上但聞星主

淋漓百榼宴江樓秉燭揮毫氣尚道天上但聞星主

淋漓百榼宴江樓秉燭揮毫氣尚道天上但聞星主

淋漓百榼宴江樓秉燭揮毫氣尚道天上但聞星主

酒人間寧有地理憂生希李廣名飛將死慕劉伶贈
醉侯戲語佳人頰一笑錦城已是六年留 退之詩云越

女一笑三年留
曳策遊房園作

慈竹蕭森拱廢臺醉歸曳策一徘徊紛紛落日牛羊
下黯黯長空霰雪來三峽猿催清淚落兩京梅傍戰
塵開客懷已是淒涼甚更聽城頭畫角哀

謁漢昭烈惠陵及諸葛公祠宇

兩止風益豪雪作雲不動淒涼漢陵廟衰草臥翁仲
畫妓空笙竽土馬闕羈鞅壤沃黃犢耕柏密幽鳥呀
尚想忠武公身任社稷重整整渭上營氣已無岐雍
少須天意定破賊寧患衆興亡信有數星隕事可痛
陵邊四五家茆竹居接棟手鞞紙上箔 居民皆以造紙
爲業 醅熟酒鳴甕雖嗟生理微亦足道飢凍劉葛固
雄傑閱世均一夢論高常近迂才大本難用九原不
可作再拜臨風慟

遙夜

遙夜兩聲急惜惜窗戶幽開編堯舜在得句鬼神愁
同俗愚儒臯容身壯士羞燈殘不成睡曉角動南樓
遠遊

遠遊行復歲華新懶學劉郎問大鈞一點不蒙稽古
力十分合作臥雲身苦寒與酒頓增價小雨爲梅先
辟塵擬佩一壺江路去花邊醉墮白綸巾

大雪歌 累日作雪竟不成戲賦此篇

長安城中三日雪潼關道上行入絕黃河鐵牛僵不
動承露金盤凍將折虬鬚豪客狐白裘夜來醉眠寶
釵樓五更未醒已上馬衝雪却作南山遊千年老虎
獵不得一箭橫穿雪皆赤空爭死作雷吼震動山
林裂崖石曳歸擁路千人觀觸體作枕皮蒙鞍人間
壯士有如此胡不來歸漢天子

簡譚德稱

幼真骨相稱山巖自要閑遊不避讒錦里先生爲老

伴玉霄散吏是頭銜探春苑路花蓼帽看月江樓酒
滿衫惟恨題詩無逸氣媿君陣馬與風颿

排悶

世事何知與願違十年高臥看羣飛獵圍花市無人
問漁艇煙村有夢歸銀燭焰長搖酒浪寶刀佩穩壓
戎衣君看白首寒窗客俠氣縱橫亦未非

夜意

名姓人誰記形骸老漸侵酒慳停劇飲詩退負高吟
雨隔疎更斷雲藏古院深衰遲常兀兀惆悵少年心
又

心清知睡少氣定覺神凝但有一無媿何妨百不能
燈昏如隔霧研冷欲生冰兀爾遺身世東窗待日升

又

瘴地晨霜薄郊墟暮雨昏啼螿如有恨微火解相溫
末路真無策孤忠敢自言輪困肝膽在白首倚乾坤
玉局觀拜東坡先生海外畫像

又

商周去不還盛哉漢唐宋蘇公本天人滿墮爲世用
太平極嘉祐珠玉始包貢公車三千牘字字岌飛動
氣力倒犀象律呂諧鸞鳳天驥西極來矯矯不受韉
飛騰上臺閣廢放落雲夢至寶不侵蝕終亦老侍從
晚途遷海表萬里天宇空豈惟騎鯨魚遂欲跨螭
心空物莫撓氣老筆愈縱批糠郊祀歌遠支清廟頌
我生雖後公妙句得吟諷整衣拜遺像千古尊正統

心太平菴 余取黃庭語名所寓室

天下本無事庸人擾之耳曾中故湛然忿欲定誰使
本心倘不失外物真一蠟困窮何足道持此端可死
空齋夜方中窗月淡如水忽有清磬鳴老夫從定起
訪客至西郊

撼撼敗葉飛黯黯寒雲低村墟與市里觸目一慘悽
今日病體輕駕言適城西丹柿滿野店青帘出江隄
獵騎載雉兔樵擔懸鷄雞居人各自得使我念故窳
故窳不敢說況復朝金閨傷哉鬻雪翁歲晚猶牧豕

下愚不自還大惑終身迷君恩何由報力耕愧黔黎
得都下八月書報蒙恩牧敘州

鳳城書到錦江邊故里歸期愈渺然掌上山川初入
夢壺中日月尚經年方輪落落難推轂倦馬駸駸怕
著鞭未佩魚符無吏責看花且作拾遺顛 戊期尙在明
年冬

晚起

賣劍捐書絕世緣掩關高枕送流年久從道士學睡
息誰管門生嘲腹便化蝶飛時嗟昨夢睡蛇去後喜
安眠欠伸看起東窗日也似金鑿過八甌

又

學道逍遙心太平幽窗鼻息撼牀聲柳花無蒂蠻甌
煖龜甲有紋繒帳明候起兒童陳盥櫛笑衰人客闌
柴荆此生睡足無餘念安用元戎報五更

江樓吹笛飲酒大醉中作

世言九州外復有大九州此言果不虛僅可容吾愁
許愁亦當有許酒吾酒釀盡銀河流酌之萬斛玻瓈
舟酣宴五城十二樓天爲碧羅幕月作白玉鉤織女
織慶雲裁成五色裘披裘對酒難爲客長揖北辰相
獻酬一飲五百年一醉三千秋却駕白鳳驂班虬下
與麻姑戲玄洲錦江吹笛餘一念再過劍南應小留
晚登子城

江頭作雪雪未成北風吹雲如有營驅車出門何所
詣一放吾目登高城城中繁雄十萬戶朱門甲第何
崢嶸錦機玉工不知數深夜窮巷聞吹笙國家自從
失河北煙塵漠漠暗兩京胡行如鬼南至海寸地尺
天皆苦兵老吳將軍獨護蜀坐使并絡無攙槍名都
壯邑數千里至今不聞戎馬聲安危自古有倚伏相
持默默非敵情棘門灞上勿兒戲犬羊豈憚渝齊盟

夙興出謁

嗜酒狂無敵居家懶有餘苦寒愁手版笑睡付肩輿
覓句吟哦慣逢人省識疎亦知歸去好無地著蝸廬

十一月三日過升仙橋作
早過升仙不暇炊橋邊買麩療朝飢紛紛滿座誰能
識大似新豐獨酌時

又

慰手金鞭天馬駒冰河雪谷笑談無只言燕趙多奇
士豈必書生盡腐儒

又

橋邊沙水綠蒲老原上煙蕪黃犢閑老子真成興不
淺憑鞍歸夢遶家山

遣興

蓬壺舊隱已微茫浪迹紅塵樂未央縱酒山南千日
醉看花劍外十年狂新詩刻燭驚詞客駿馬追風戲
鞠場要是世間男子事不須臺省競飛翔
艸堂拜少陵遺像

清江抱孤村杜子昔所館虛堂塵不掃小徑門可款

公詩豈紙上遺句處處滿人皆欲拾取志大才苦短
計公客此時一飽得亦罕阨窮端有自寧獨坐房瑄
至今壁間像朱綬意蕭散長安貂蟬多死去誰復算

青羊宮小飲贈道士

青羊道士竹爲家也種玄都觀裏花微雨晴時看鶴
舞小窗幽處聽蜂衙藥鑪宿火熒熒煖醉袖迎風獵
獵斜老我一官真漫浪會來分子淡生涯

夜寒

清夜焚香讀楚詞寒侵貂褐歎吾衰輕冰滿研風聲
急急記山陰夜雪時

又

斗帳重茵香霧重膏梁那可共功名三更騎報河冰
合鐵馬何人從我行

書懷

武擔山上望京都誰記黃公舊酒壚宿負本宜輪左
校寬恩猶聽補東隅一官漫浪行將老萬卷縱橫只
自愚甫里松陵在何許古人投劾爲尊鱸

記夢

烏巾白紵憶當年抵死尋春不自憐
顛顛劍南雙鬢改夢中猶上暗門船

又

團臍霜蟹四腮鱸樽俎芳鮮十載無
塞月征塵身萬里夢魂也復醉西湖

醉中出西門偶書

古寺閑房閉寂寥幾年就酒負公朝
青山是處可埋骨白髮向人羞折腰
末路自悲終老蜀少年常願從征遼
醉來挾箭西郊去極目寒蕪雉兔驕

訪客不遇

風急斜吹帽泥深亂濺衣杜門常畏
罵訪客却空歸老馬舉蹄癩枯槐無
葉飛馳驅幾時了散髮憶昔磯劍客行

劍客行

世無知劍人太阿混凡鐵至寶棄泥
沙光景終不滅一朝斬長鯨海水赤
三月隱見天地間變化豈易測國家
未滅胡臣子同此責浪迹潛山海歲
晚得劍客酒酣脫匕首白刃明霜雪
夜半報讎歸班班腥帶血細繡何足
問大恥同憤切臣位雖卑賤臣身可
屠裂誓當函胡首再拜奏北闕逃去
變姓名山中餐玉屑

故蜀別苑在成都西南十五六里梅
至多有兩大樹天矯若龍相傳謂之
梅龍子初至蜀嘗為

作詩自此歲常訪之今復賦一首丁
酉十一月也

昔年會賦西郊梅茫茫去日如飛埃
即今衰病百事懶陳迹未忘猶一來
蜀王故苑犁已遍散落尚有千雪堆
珠樓玉殿一夢破煙蕪牧笛遺民哀
兩龍臥穩不飛去鱗甲脫落生莓苔
精神最遇雪月見氣力苦戰冰霜開
羈臣放士耿獨立淑姬靜女知誰媒
摧傷雖多意愈厲直與天地爭春回
蒼然老氣壓桃杏笑我白髮心尚孩
微風故為作嫵媚一片吹入黃金壘

閑意

柴門雖設不曾開為怕人行損綠苔
妍日漸催春意動好風時捲市聲來
學經妻問生疎字嘗酒兒對澁灣
盃安得小園寬半畝黃梅綠李一時栽

飲罷夜歸

老病畏多酌退閑愁夜行市燈疎
欲盡樓月澹初生露冷莎蛩咽天
高塞雁征歸來羞自喜擁被聽疎
更

江亭冬望

霜落江清水見魚偶來徙倚草亭
孤雲天黯淡常如晚煙樹微茫直
欲無下澤乘車終碌碌上方請劍
漫區區擬將疎逸消豪氣尋罷酒
徒尋獵徒

大風登城

風從北來不可當街中橫吹人馬
僵西家女兒午未妝帳底爐紅愁
下牀東家喚客宴畫堂兩行玉指
調絲簧錦繡四合如垣牆微風不
動金猊香我欲登城望大荒勇欲
為國平河湟才疎志大不自量西
家東家笑我狂

書雨
仲冬候始寒丙夜天正黑雨來挾
風助吼擊不遺力聲如拔高山勢
若伐強國初憂老柏折遂恐石筍
踣乾坤本無心百神各効職蛟龍
鬪歲莫豪橫理莫測農功幸已成
龍怒亦會息屋漏何足言袖手姑
默默一笑

半醉微吟不怕寒江邊一笑覺天
寬莫愁艇子急衝雨何遜梅花頻
倚闌萬事任從皮外去百年聊作
夢中觀放翁縱老狂猶在倒盡金
壺燭未殘歲晚懷鏡湖舊隱慨然
有作

公府還家鬢未秋鏡湖南畔決歸
休讀書精舍豈輕出采藥名山成
遠遊白墮興來猶小醉青精材足
更何求俗間毀譽惟堪笑常隘韓
公咎斗牛

華髮

華髮蕭蕭老蜀關倦飛可笑不知
還人生只似駒過隙世事莫驚雷
破山光景半銷樽酒裏英豪或隱
博

徒問車帷閉置真何樂書劍飄然未厭閑
歎息

國家圖籙合中興歎息吾寧粥飯僧賣劍買牛衰可笑壞裳爲袴老猶能曉過射圃雲藏壘夜讀兵書兩灑燈安得龍媒八千騎要令窮虜畏飛騰

冬至

歲月難禁節物催天涯回首意悲哀十年人向三巴老一夜陽從九地來上馬出門愁斂版還家留客強傳杯探春漫道江梅早盤裏酥花也鬪開

城南尋梅得

老子今年懶賦詩風光料理鬢成絲青羊宮裏春來早初見梅花第一枝

又

黯淡江天雪欲飛竹籬數掩傍苔磯清愁滿眼無人說折得梅花作伴歸

又

青煙漠漠暗西村問訊梅花置一尊冷淡生涯元不惡却嫌歌吹合江園成都故事合江園官梅開及五分即府尹領客來遊

又

籬邊細路竹間庵一段風流擅劍南吾國以香爲佛事客來試向鼻端參

書數

歷盡危塗井與參鬢毛飽受雪霜侵平生不可俗子眼後世誰知吾輩心河洛方行胡正朔山林虛度醉光陰浩歌未闕先投枕衰病常憂感慨深

感興

少小遇喪亂妄意憂元元忍飢臥空山著書十萬言賊亮負函貸江北煙塵昏委記本兵府大事得具論請治故臣罪深絕衰亂根言疎卒見棄袂有血淚痕爾來十五年殘虜尚遊魂遺民淪左衽何由雪煩冤我髮日益白病骸寧久存常恐先狗馬不見清中原

又

高帝王蜀漢天下豈易圖幡然用其鋒項羽不支梧嗟余昔從戎久戍南鄭墟登高望夕烽只尺咸陽都羣胡本無政剽奪常自如民窮訴蒼天日夜思來蘇連年沉枯旱關輔尤空虛安得節制帥弓刀肅馳驅父老上牛酒善意不可孤諸將能辦此機會無時無

莫冬之夜宴

官機錦茵金蹙鳳舞娃釵墮雙鬟重寶爐三尺香吐霧畫燭如椽風不動主人愛客情無已箏聲未斷歌聲起亦知百歲等朝露便恐一歡成覆水爐紅酒綠春爲回坐上梅花連夜開堂前只尺異氣候冰合平池霜壓階

枕上

枕上三更雨天涯萬里遊蟲聲憎好夢燈影伴孤愁報國計安出滅胡心未休明年起飛將更試北平秋

謁石犀廟

閑過石犀祠登堂一歎秋江回陵谷變碑斷市朝非有王蜀時修廟碑銘荒園連寒壠斜陽映夕霏興亡俱昨

夢惆悵跨驢歸

江上散步尋梅偶得三絕句
小園風月不多寬一樹梅花開未殘剝啄敲門嫌特地緩拖藤杖隔離看

又

鐘殘小院欲消魂漠漠幽香伴月痕江上人家應勝此明朝更出小南門萬里橋門一名小南門

又

小南門外野人家短短疎籬綠白沙紅稻不須鸚鵡啄清霜催放兩三花

漣漪亭賞梅

判爲梅花倒玉卮故山幽夢憶疎籬寫真妙絕橫窗影徹骨清寒蕪水枝苦節雪中逢漢使高標澤畔見湘纍詩成怯爲花拈出萬斛塵襟我自知

芳華樓賞梅

素娥竊藥不奔月化作江梅寄幽絕天工丹粉不敢施雪洗風吹見真色出籬藏塢香細細臨水隔煙情脈脈一春花信二十四縱有此香無此格放翁年來百事情唯見梅花愁欲破金壺列置春滿屋寶髻斜簪光照坐百榼淋漓玉翠飛萬人辟易銀鞍過不惟豪橫壓清驪聊為詩人洗寒餓

浣花賞梅

老子人間自在身插梅不惜損烏巾春回積雪層冰裏香動荒山野水濱帶月一枝低弄影背風千片遠隨人石家樓上貪吹笛肯放朝朝玉樹新

蜀苑賞梅

十里溫香撲馬來江頭還見去年梅喜開剩欲邀明月愁落先教掃綠苔跌宕放翁新醉墨淒涼廢苑舊歌臺盛衰自古無窮事莫向昆明數劫灰

大醉梅花下走筆賦此

閉門坐歎息不飲輒千日忽然酒興生一醉須一石檐頭花易老旗亭酒常窄出郊索一笑放浪謝形役把酒梅花下不覺日既夕花香襲襟袂歌聲上空碧我亦落烏巾倚樹吹玉笛人間奇事少頗謂二勅敵酒闌江月上珠樹挂寒壁便疑從此便朝市長掃迹醉歸亂一水頓與異境隔終當騎梅龍海上看春色

梅龍蓋蜀苑中故物也

之廣都憩鐵像院

歲莫天苦寒風雨復乘之道邊得古寺欣然具晨炊瘦樹立中庭斷蔓絡短籬小僧為設爐童子燒槁枝坐令手足柔髭間失冰漸敬禮龕中像盡讀廡下碑少年志四方故里了不思晚知行路難更覺遊子悲一官始巴棘剡曲歸何時置之勿復道爛醉忘天涯

廣都江上作

微波不搖江纖雲不行天我來倚杖立天水相澄鮮平遠望不盡日落自生煙梅花耿獨立雪樹明前川

好風吹我衣春色已粲然東村聞酒笑買醉上漁船

宿龍華山中寂然無一人方丈前梅花盛開月

下獨觀至中夜

梅花如高人枯槁道愈尊君看空谷豈比倚市門我來整冠佩潔齋三沐熏亦思醉其下燕嬾恐瀆君敬抱綠綺琴玄酒挹古罇月明流水閑一洗世濁昏摸寫香與影計君已厭聞老我少傑思尚喜非陳言

次韻張季長正字梅花

倚橋臨水似催詩戲伴鵝黃上柳絲萬里西湖驚斷夢二年東閣憶幽期 游嘗官唐安 插瓶直欲連全樹簪帽憑誰揀好枝一味淒涼君勿數平生初不願春知

次韻季長見示

倚遍南樓十二欄長歌相屬寓悲歡空懷鐵馬橫戈意未試冰河墮指寒成敗極知無定勢是非元自要徐觀中原阻絕王師老那敢山林一枕安

廣都道中呈季長

天上石渠郎能來伴楚狂風霜朝竝轡燈火夜連牀江水不勝綠梅花無賴香劇談那得住出處要平章 看梅歸馬上戲作

平明南出竿橋門走馬歸來趁未昏漸老更知閑有味一冬強半在梅村

又

本為梅花判痛飲却嗅梅香消宿醒日欲落時始上馬青羊宮前聞發更

又

一點不雜桃李春一水隔斷車馬塵恨不來為清夜飲月中香露溼烏巾

又

江路疎籬已過清月中霜冷若為情不如折向金壺貯畫燭銀燈看到明

又

江郊車馬滿斜暉爭趁南城未闔扉要識梅花無盡
藏人人襟袖帶香歸

別後寄季長

俗子俗到骨一揖已溷人不知此曹面何處得許塵
我非作崖塹汝自不可親道途逢使君令我生精神
頓增江山麗更覺風月新對牀得晤語傾倒夜達晨
亟起忘縛綺小醉或墮巾繚出錦城南問訊江梅春
煎茶憩野店喚船截煙津淒涼吊廢苑蕭散誇閑身
莫歸度略約月出水鱗鱗思君去已遠此會何由頻
中夜對月小酌

今夕復何夕素月流清輝徘徊入我堂化作白玉墀
栖鳥滿高樹空庭結煙霏可憐如許景早眠人不知
我幸與周旋一醉那得辭整我接羅巾斟我翡翠卮
清愁不可耐三嗅梅花枝

客愁

騎馬出門無所詣端居正爾客愁侵蒼顏白髮入衰
境黃卷青燈空苦心天下極知須雋傑書生何恨死
山林消磨未盡胸中事梁甫時時尚一吟

詩酒

酒隱凌晨醉詩狂徹日歌憫憐蝸左角嘲笑蠹南柯
風月隨長笛江湖入短蓑平生會心處最向漆園多
道室夜意

寒泉漱酒醒午夜誦仙經茶鼎聲號蚓香盤火度螢
齋心守玄牝閉目得黃寧奇語山中友因人送茯苓

道室晨起

紙帳晨光透山爐宿火燃雞鳴猶啞啞鴉起已翩翩
形槁寒巖木心凝古澗泉何須更臨鏡斷是一癡僊
城南王氏莊尋梅

涸池積槁葉茆屋圍疎籬可憐庭中梅開盡無人知
寂寞終自香孤貞見幽姿雪點滿綠苔零落尚爾奇
我來不須晴微雨正相宜臨風兩愁絕日莫倚筇枝
遊萬里橋南劉氏小園

佳園寂無人滿地梅花香閑來曳拄杖臘月日已長
朱橋架江面欄影搖波光奇哉小垂虹夢破鱸魚鄉

汀鷺一點白煙柳千絲黃便欲喚釣舟散髮歌滄浪
可憐隔岸人車馬日夜忙我歸門復掩寂歷挂斜陽

過笮橋道中龍祠小留

江邊龍廟何年作白浪花中插朱閣朝暾漸上宿霧
收春氣已動晨霜薄我來倚欄一悵然蘆花滿空如
柳綿安得身為雙白鷺飛上灘頭却飛去

道上見梅花

載酒房湖風日美探梅喜折一枝新今朝忽向街頭
見萬萼千跗俗却春

倚樓

減盡朱顏白髮新高樓徙倚默傷神未酬馬上功名
願已是人間老大身太史周南方臥疾拾遺劍外又
逢春一杯且爲江山醉百萬呼盧迹已陳

寄王季夷

平生吾子最知心巴隴飄零歲月侵萬里喜聞身尚
健五更惟有夢相尋插花意氣狂如昨中酒情懷病
至今共約莫年須強飯天台盧阜要登臨

丁酉除夕

浮生過五十光景如飛鴻寒暑倏仰問四序忽已終
殊方感飄泊晚境嗟龍鍾桃符與爆竹懶復隨兒童
不寐非守歲燕坐夜過中氣定神自凝海日何曠曠
豈惟三彭逃坐覺六入空徂年勿惆悵閱世方無窮

正月二日晨出大東門是日府公宴移忠院

成都春事早開歲已暄妍熾尾傳盃後遨頭出郭前
爭門金駮覆滿野繡轡駢白髮花邊醉何妨似少年
小飲落梅下戲作送梅一首

零落梅花不自由斷腸容易付東流與人又作經年
別問月應知此夜愁已是狂風卷平野更禁橫笛起
危樓何時小雪山陰路處處尋香繫釣舟
立春

鬢毛蕭颯寸心灰生怕新年節物催幸是身閑朝睡
笑忽聞鼓吹打春回

初春出遊戲作

綠窗百舌喚春眠問柳尋花意已便京洛化衣無夢
去邯鄲觀伎有詩傳銅壺閣下閑軟帽石鏡坊前戲
墜鞭酒隱人間君勿謂定勝山澤作臞僂

初春遣興 始於志退休而終於倦倦許國之忠亦臣子大
義也

爛熟思來怕熱官退飛心地喜輕安捨魚正可取熊
掌食肉何須知馬肝放眼柳梢初暗動褪花梅子已
微酸典衣剩作江頭醉莫謂天涯苦鮮歡

大隱悠悠未棄官俸錢雖薄却心安人方得意矜蝸
角天豈使予為鼠肝佳日劇棋忘旅恨短衣馳射壓
儒酸小桃楊柳爭時節載酒江頭罄一歡

白髮淒涼故史官十年身不到長安即今天未吊形
影何日上前傾肺肝孤憤書成詞激烈五噫歌罷意
辛酸此懷欲說無人共安得相攜素所歡

予年十六始識葉晦叔於西湖上後二十七年
晦叔之弟聲叔來為臨邛守相遇於成都晦叔
沒久矣訪其遺文略無在者乃賦此詩

故人零落久山丘誰記京華第一流曹霸揮毫空萬
馬庖丁投刃解千牛相逢夢境何勞記追想清言未
免愁雷電取將遺稿盡他年虛有茂陵求

初春探花有作

燈山昨夢歎忽忽便恐新春過眼空千縷未搖官柳
綠一梢初放海棠紅金羈絡馬閑遊處彩筆題詩半
醉中流落天涯何足道年年常策探花功

遊諸葛武侯書臺

沔陽道中草離離臥龍往矣空遺祠當時典午稱獨
賊氣喪不敢當王師定軍山前寒食路至今人祠丞

相墓松風想像梁甫吟尚憶幡然答三顧出師一表
千載無遠比管樂蓋有餘世上俗儒寧辨此高臺當
日讀何書

觀花

我遊西川醉千場萬花成圍柳著行紅錦地衣舞霓
裳翠帶繡袂天寶妝清歌一發無留鶻媚媚餘聲繁
杏梁黃金絡馬照路光自護羃羃觀海棠搜奇選勝
日夜忙不惟燕宮碧雞坊莫歸奚奴負錦囊路人爭
看放翁狂

張園觀海棠

朝陽照城樓春容極明媚走馬蜀錦園名花動人意
嚴妝漢宮曉一笑初破睡定知夜宴歡酒入妖骨醉
低鬟羞不語困眼嬌欲閉雖豔無俗姿太息真富貴
結束吾方歸此別知幾歲黃昏廉纖雨千點裏紅淚

月夕

醉從東郭歸散髮臨前楹呼僮淨掃地勿使魏月明
庭空臥松影簷迥送鐸聲鐘斷心境寂露下毛髮清
出門碧霧合九陌無人行坐令錦官城化作白玉京

夜飲卽事

天涯久客我何堪聊喜燈前得縱談磊落金盤薦糖
蟹纖柔玉指破霜柑燭圍寶馬人將起花墜紗巾酒
正酣更作茶甌清絕夢小窗橫幅畫江南

夜宴賞海棠醉書

便便癡腹本來寬不是天涯強作歡燕子歸來新社
兩海棠開後却春寒醉誇落紙詩千首歌費纏頭錦
百端深院不聞傳夜漏忽驚蠟淚已堆盤

二月十六日賞海棠

常年春半花事竟今年春半花始盛衰翁不減少年
狂走馬直與飛蝶競妍華有露洗愈明纖弱無風搖
不定莫放飄零作紅雨剩看倩笑臨妝鏡溪梅枯槁
墮巖谷山杏輕浮真妾媵欲誇絕豔不勝說縱欠濃
香何足病華燈銀燭搖花光翠杓金瓶豪酒與夜闌

感事獨凄然繁枝空折誰堪贈

卽席

解鞅名園眼倍明殷勤翠袖勸飛觥海棠紅杏欲無
色蚊蝶黃鸝俱有情去日不留春漸老歸舟已具客
將行倦遊短鬢無多綠生怕尊前唱渭城

東歸有日書懷

萬里橋邊白版扉三年高臥謝塵韉半窗竹影棋僧
去滿棹蘋風釣伴歸看鏡已添新雪鬢聽雞重拂舊
朝衣故人零落今無幾華表空悲老令威

眉州披風榭拜東坡先生遺像

蜿蜒回顧山有情平鋪十里江無聲孕奇蓄秀當此
地鬱然千載詩書城高臺老仙誰所寫仰視眉宇寒
崢嶸百年醉魂吹不醒飄飄風袖筇枝橫爾來逢迎
厭俗子龍章鳳姿我眼明北扉南海均夢耳謫墮本
自白玉京惜哉畫史未造極不作散髮騎長鯨故鄉
歸來要有日安得春江變酒從公傾

劍南詩稿卷第九終

劍南詩稿目錄

卷第十

訪青神尉解借景亭蓋山谷先生舊遊也 舟
過玉津 敘州三首 瀘州使君巖在城南一

里深三丈有泉出其左音中律呂木龍巖相距
亦里許黃太史所嘗遊憩也 南定樓遇急雨

夜泊合江縣月中小舟謁西涼王祠 風順
舟行甚疾戲書 舟中對月 漁翁 涪州道

中 涪州 北巖 平都山 忠州禹廟 忠
州醉歸舟中作 雨中遊東坡 龍興寺吊少

陵先生寓居 遊萬州岑公洞 萬州放船過
下巖小留 白帝泊舟 醉中下瞿唐峽中流

觀石壁飛泉 莫次秭歸 歸州重五 屈平
廟 楚城 新灘舟中作 舟出下牢關 峽

口夜坐 峽州甘泉寺 峽州東山 江上觀
月 初發夷陵 舟中夜坐 初到荊州 醉

歸 出遊 大堤 阻風 初發荊州 泊公
安縣 劉郎浦夜賦 小雨極涼舟中熟睡至

夕 岳陽樓 再賦一絕 乘大風發巴陵
通濟口 醉書 南樓 黃鶴樓 頭陀寺觀

王簡栖碑有感 夜熱 舟中偶書 燈下讀
書 泊三江口 自雪堂登四望亭因歷訪蘇

公遺迹至安國院 月下步至臨臯亭 發黃
州泊巴河遊馬祈寺 舟行斬黃間雨霽得便

風有感 南烹 泊蘄口泛月湖中 初見廬
山 六月十四日宿東林寺 舟過小孤有感

雁翅夾口小酌 長風沙 泛小舟姑熟溪
口 明日再遊又賦 過采石有感 將至金

陵先寄獻劉留守 登賞心亭 夜泊龍廟回
望建康有感 將至京口 荆谿館夜坐 泝

谿 歸雲門 月下自三橋泛湖歸三山 懷
成都十韻 湖村秋曉 夜夢與宇文子友譚

德稱會山寺若錢子行者明日黎明得子友書
感歎久之乃作此詩 寒夜 偷閒 冬夜聞

雁有感 書懷 湖中莫歸 題齋壁 新葺
門屋 吾廬 冬夜泛舟有懷山南戎幕 夢

至成都悵然有作二首 月夕 將入閩夜行
之雲門 山中觀殘菊追懷眉山師伯渾 自

雲門之陶山肩輿者失道行亂山中有茅舍小
塘極幽邃求見主人不可意其隱者也 冬夜

聽雨戲作二首 適閩 欲行雨未止 比作
陳下瓜麴釀成奇絕屬病瘍不敢取醉小啜而

已 大雨中離三山宿天章寺 早飯于溪蓋
干吉故居也 贈楓橋化城院老僧 雙橋道

中寒甚 行牌頭奴寨之間皆建炎未避賊所
經也 早發奴寨 題繡川驛 夜行宿湖頭

寺 衡州道中作 過靈石三峯二首 宿僊
霞嶺下 道中病瘍久不飲酒至魚梁小酌因

賦長句 宿魚梁驛五鼓起行有感二首 夢
藤驛二首 梅花絕句十首

劍南詩稿卷第十

宋陸游務觀

訪青神尉廨借景亭蓋山谷先生舊遊也

造朝下白帝弔古遊青神城頭二間屋聊得岸我中
元祐太史公世寧有斯人瘴煙侵玉骨老作宜州民
至今杖屨地來者猶酸辛密竹翦已空喬木亦半薪
陂池獨渺然中有鷗鷺馴人生能自足一尉可終身
三數下城去振施春江津

舟過玉津

玻璃江上送殘春疊鼓催飄過玉津蜀苑鶯花初破
夢巴山風月又關身幅巾久已忘朝幘短劍惟思隱
市塵莫倚諸公容此老西曹那許吐車茵

敘州

畫船衝雨入戎州縹緲山橫杜若洲須信時平邊堠
靜傳烽夜夜到西樓州治西樓

又

文章何臯觸雷震風雨南谿自醉醒八十年間遺老
盡壞堂無壁艸青青無等院山谷故居

又

楚梅吳檣又遠遊浣花行樂夢西州千尋鐵鎖還堪
恨空鎖長江不鎖愁鎖江亭

瀘州使君巖在城南一里深三丈有泉出其左

音中律呂木龍巖相距亦里許黃太史所嘗遊
憩也

雲間刁斗過邊州沙際丘亭巖客舟漲水方憂三峽
嶮短筇猶作兩巖遊蛟龍矯矯挈雲起琴筑泠泠繞
榻流未死人生誰料得會來攜客試茶甌

南定樓遇急雨

行遍梁州到益州今年又作度瀘遊江山重複爭供
眼風雨縱橫亂入樓人語朱離逢峒獠棹歌欸乃下

劍南詩稿 卷之十

吳舟天涯住穩歸心懶登覽茫然却欲愁
夜泊合江縣月中小舟謁西涼王祠

懸瀑雪飛舞奇峯玉嶙峋崑崙碎一江月來謁西涼神
我雖不識神知是山水人不敢持笏來極褻整幅巾
出我囊中香羞我南谿蘋杯湛玻璃春盤橫水精鱗
出門意愉悅煙波浩無津安得結茆地與神永為隣

風順舟行甚疾戲書

昔者遠戍南山邊軍中無事酒如川呼盧喝雉連莫
夜擊兔伐狐窮歲年壯士春燕臥白骨老夫晨鏡悲
華顛可憐使氣尚未滅打鼓順流千斛船

舟中對月

百壺載酒遊凌雲醉中揮袖別故人依依向我不忍
別誰似蛾眉半輪月月窺船窗挂凄冷欲到渝州酒
初醒江空裊裊釣絲風人靜翩翩葛巾影哦詩不睡
月滿船清寒入骨我欲仙人間更漏不到處時有沙
禽背船去

漁翁

江頭漁家結茆廬青山當門畫不如江煙淡淡雨疎
疎老翁破浪行捕魚恨渠生來不讀書江山如此一
句無我亦衰遲慚筆力共對江山三歎息

涪州道中

遠客喜歸路清遊逾昔聞雨添山翠重舟壓浪花分
洛叟經名世張侯勇冠軍郡境有伊川先生故居及張益德
祠懷人不可觀袖手對爐熏

涪州

古壘西偏曉繫舟倚欄搔首思悠悠欲登丹竈竟無
地地產丹砂不見荔枝空遠遊官道近江多亂石人
家避水半危樓使君不用勤留客瘴雨蠻雲我欲愁
太守招飲辭不住

北巖有程正叔先生祠堂

巖船涪州岸攜兒北巖遊密幟橫大江寒裳躡高樓
雨昏山半失江漲地欲浮老矣寧再來為作竟日留

鳥帽程丈人閉戶本好修駭機一朝發議罪至竄投
黨禁久不解胡塵暗神州修怨以稔禍哀哉誰始謀
小人無遠略所懷在私讎後來其鑑茲賦詩識巖幽
平都山 忠州豐都縣

名山近江步蠟屐得閑行犇鹿衝人過藏丹徹夜明
唐碑多斷蝕梁殿半欹傾洞口雲常湧簷牙柏再榮
行逢負籠客臥聽送船聲乞我誅茆地靈苗得共烹
忠州禹廟

古郡巴蠻國空山夏禹祠鴉歸暗庭柏巫拜薦江蘿
艸蔓青綠壁苔痕紫滿碑欲歸頻悵望回棹夕陽時
忠州醉歸舟中作

耿耿船窗燈火明東樓飲罷恰三更不堪酒渴兼消
渴起聽江聲雜雨聲垂首道塗悲驥老滿懷風露覺
蟬清蘭亭禹廟山如畫安得飄然送此生

雨中遊東坡
木蓮花下竹枝歌歡意無多感慨多更恐他年有遺
恨曉來衝雨上東坡
龍興寺吊少陵先生寓居

中原艸艸失承平戊火胡塵到兩京尾躡老臣身萬
里天寒來此聽江聲以少陵詩考之蓋以秋冬間寓此州也寺
門闌江聲甚壯

遊萬州岑公洞 岑公隋時人居此二十年得道仙去
大業征遼發閩左軍興書檄煎膏火此時也復有閑
人自引巖泉拾山果後六百歲吾來遊洞中正夏凄

如秋乳石床平可坐臥水作珠簾月作鉤十年神遊
八極表浮名坐覺秋豪小試問岑公迎我不鶴飛忽
下青松杪

萬州放船過下巖小留
畫船四月滿旗風飲散匆匆鷓首東醉裏偏憐江水
綠意中已想荔枝紅斷碑零落莓苔遍幽澗淙潺略

約通一疋寧無好東絹憑誰畫此碧玲瓏
白帝泊舟

客路閑無事津亭爽有餘峽江春漲減讓岸夜燈疎
老矣孤舟裏依然十載初倦遊思稅駕更覺愛吾廬
醉中下瞿唐峽中流觀石壁飛泉
吾舟十丈如青蛟乘風翔舞從天下江流觸地白鹽
動灑灑浮波真一馬主人滿酌白玉盃旗下畫鼓如
春雷回頭已失讓西市奇哉一削千仞之蒼崖蒼崖
中裂銀河飛空裏萬斛傾珠璣醉面正須迎亂點京
塵未許化征衣

莫次秭歸
朝披南陵雲夕揖建平樹啼鴉隨客檣落日滿孤戍
惡難不可說石芒森如鋸浪花一丈白吹沫入窗戶
是身初非我底處著憂怖酒酣一枕睡過盡蛟鱓怒

欣然推枕起曳杖散予步殷勤沙際柳記我維舟處
歸州重五

鬪舸紅旗滿急湍船窗睡起亦閑看屈平鄉國逢重
五不比常年角黍盤屈平祠在州東南五里歸鄉沱蓋平故
居也
屈平廟

委命仇讎事可知章華荆棘國人悲恨公無壽如金
石不見秦嬰係頸時
楚城

江上荒城猿鳥悲隔江便是屈原祠一千五百年間
事只有灘聲似舊時
新灘舟中作 三峽新灘尤險今已平矣

江路桃花浪已生新灘穩過失崢嶸九年行半九州
地三峽歸無三日程繫纜便增筇杖與倚窗時聽棹
歌聲衰遲未覺詩情減又裝吳牋賦楚城
舟出下牢關

大舸凌驚濤飛度青玉峽虛壁雲濛濛陰洞風颯颯
拂天松蓋偃入水山脚插炎曦忽摧破亭午手忘筆
懸知今夜喜月白宿沙夾曠哉七澤遊盟鷗不須敵

峽口夜坐

三峽至此窮兩壁猶峭立估船無時行婦盍有夜汲
風生樹影動月碎水流急艸根綴微露螢火飛熠熠
吾行已四旬纔抵楚西邑浩歌散鬱陶還舟覺衣溼
峽州甘泉寺

江上甘泉寺登臨擅一州山亭喜無恙老子得重遊
難急常疑雨林深欲借秋歸途更清絕倚杖喚漁舟

峽州東山

十年不踏東山路今日重爲放浪行老矣判無黃鶴
舉歸哉惟有白鷗盟新秧刺水農家樂修竹環溪客
眼明已駕巾車仍小駐綠蘿亭下聽鶯聲

江上觀月

暗浪衝舟輕鞞聲夷陵城下正三更十分傾酒禁風
力一點無雲祟月明久坐不知衣露溼浩歌時有水
禽驚詩成莫駕長鯨去自是虛皇白玉京

初發夷陵

雷動江邊鼓吹雄百灘過盡失途窮山平水遠蒼茫
外地關天開指顧中俊鷗橫飛遙掠岸大魚騰出欲
凌空今朝喜處君知否三丈黃旗舞便風

舟中夜坐

風露浩無際星河淡欲傾遙知竝船客聞我詠詩聲
水鳥橫江去漁舟背月行神清不成寐隱几待窗明
初到荊州

萬里泛仙槎歸來鬢未華蕭蕭沙市雨淡淡渚宮花
斷岸添新漲高城咽晚笳船窗一樽酒半醉落烏紗

醉歸

持酒江頭到夕霏愁城頓覺解重圍澄波宜月移船
看醉面便風走馬歸末路已驚添白髮故人頻報上
黃扉疆隨官簿真成懶乞我吳松舊釣磯

出遊

萬里崎嶇蜀道歸荊州非復壯遊時行吟自怪詩情
減坐睡人驚酒量衰卷地風號雲夢澤黏天艸映伏
波祠一枝藤杖平生事擊鼓開帆未恨遲

大堤

日晚大堤行莽然千里平天低垂曠野風壯撼高城
列肆居茶估連營宿戍兵纍纍北門埃淚盡望神京
荊州距東都纔十七八程

阻風

沙市三日風萬鼓鳴船頭欲去不得發臥對青燈幽
聽兒誦離騷可以散我愁微言入孤夢恍與屈宋遊
睡起銅瓶響欣然喚茶甌吾道無淹速風伯非所尤

初發荊州

淋漓牛酒起檣干健鶻飛如插羽翰破浪乘風千里
快開頭擊鼓萬人看鷗聲不斷朝陽出旗脚微舒宿
雨乾堪笑塵埃洛陽客素衣如墨據征鞍

泊公安縣

秦關蜀道何遼哉公安渡頭今始回無窮江水與天
接不斷海風吹月來船窗簾捲螢火鬧沙渚露下蘋
花開少年許國忽衰老心折枕樓長笛哀

劉郎浦夜賦

平生遠遊心此晚萬里窄今年下三巴放浪浮七澤
菰蒲無遠近但覺風索浪高星辰溼天碧河漢白
十年散醉髮未易著朝幘守符倘可乞來作瀟湘客

小雨極涼舟中熟睡至夕

舟中一雨掃飛蠅半脫綸巾臥翠藤清夢初回窗日
晚數聲柔艣下巴陵

岳陽樓

身如病鶴短翅翎雨雪飄灑號沙汀天風忽吹不得
住東下巴峽泛洞庭軒皇張樂雖已矣此地至今朝
百靈雄樓岌業鎮吳楚我來舉手捫天星帆檣纔放
已隱隱雲氣亂入何冥冥龍鬣出沒蛟鱗橫浪花遮

盡君山青黃衫仙翁喜無恙袖劍近到城南亭眼前
俗子敗人意安得與翁同醉醒

再賦一絕

江風吹雨濯征塵百尺闌干爽氣新不向岳陽樓上

醉定知未可作詩人

乘大風發巴陵

雪濺浪方作翠巖山欲浮奇哉萬頃湖著我十丈舟
三老請避風叱去非汝憂神物識忠信壯士憎滯留
擊鼓催挂帆揮手別岳州仰視羣鵝翔下闔百怪囚
衡湘清絕地恨不從此遊聊須百斛酒往醉庚公樓

通濟口

朝發嘉魚縣晚泊通濟口睡起喜微涼船窗一盃酒
長魚吹浪聲恐人巨鼉露背浮齋淪今夕風生月復
暗寄語舟人更添纜

醉書

青艸渡頭波接天山翁吟嘯自悠然朝餐偶過賣魚
市晚泊時逢迎荻船投老未除遊俠氣平生不作俗
人緣一樽酌罷玻璃酒高枕窗邊聽雨眠 偶餘眉州酒

一樽獨酌遂醉

南樓

十年不把武昌酒此日關邊感慨深舟楫紛紛南復
北山川莽莽古猶今登臨壯士興懷地忠義孤臣許
國心倚杖黯然斜照晚秦吳萬里入長吟

黃鶴樓

手把仙人綠玉枝吾行忽及早秋期蒼龍鬬角歸何
晚黃鶴樓中醉不知江漢交流波渺渺晉唐遺迹艸
離離平生最喜聽長笛裂石穿雲何處吹

頭陀寺觀王簡栖碑有感

舟車如織喜身閑獨訪遺碑艸棘間世遠空驚閱陵
谷文浮未可敵江山老僧西逝新成塔舊守東歸正
掩關笑我驅馳竟安往夕陽飛鳥亦知還 庚寅過武昌
與太守張之彥遊累日時頭陀有老僧持律精苦

夜熱

觸熱行萬里煩促詎可論泊船鄂州步終日如炮燂
搖扇腕欲脫揮汗白雨翻推枕再三起散髮臨前軒
秋近更漏長天旱星宿繁甘樹何時來太息憂元元

鄂州頗閱雨

舟中偶書

老子西游萬里回江行長夏亦佳哉晝眠初起報茶
熟宿酒半醒聞雨來漢口船開催疊鼓淮南帆落亞
高梳四方本是丈夫事白首自憐心未灰

燈下讀書

少年喜書策白首意未足幽窗燈一點樂處超五欲
而況黃州路小雨漁村宿蕭蕭葭葭聲為我洗暑毒
現然誦經史少倦兒為續何必效萊公長夜醉畫燭
泊三江口

遲明離武昌薄莫次黃岡勿言觸熱行一雨三日涼
北窗荻蕭蕭南窗江茫茫玄雲一池墨碧綫半篆香
尚無車馬塵沉復爭奪揚徐行勿挂帆此樂殊未央
自雪堂登四望亭因歷訪蘇公遺迹至安國院

我醉飛屐登孱顏拄杖出沒風煙間三山葱曠蛟鱗
靜九關蕭穆虎豹閑幾年金骨煉綠髓此日始得窮
躋攀老僊歸侍紫皇案空有野水流淙潺蛇蟻翠阜
圍綠野似嶺非嶺山非山向來龍蛇滿雪壁雷電下
取何時還名花亦已天上去居人指似題詩處九十
一翁不識公我抱此恨知無窮 定惠院已廢海棠亦不復
在安國老僧景滋年九十一自言東坡去黃後四年方生

月下步至臨臯亭

芒屨踏松陰迨此船未發清遊豈無伴三友風露月
山川鬱盤紆鷗鷺浩滅沒當年老先生想像散醉髮
浮生等昨夢久已埋玉骨吾儕幸彊健何事拘簪笏
發黃州泊巴河遊馬祈寺

南望武昌山北望齊安城楚江萬頃綠著我畫舫橫
雲帆不須挂鼙鼓不須鳴淡然隱曲几山水相逢迎
疎雨漏薄日非陰亦非晴晚泊巴河市小陌聞屐聲
紫髯刑馬地一怒江漢清中原今何如感我白髮生
舟行蘄黃間雨霽得便風有感
天青雲白十分晴帆飽舟輕盡日行江底魚龍貪晝

睡淮南州木借秋聲好山縹緲何由住華髮蕭條只
自驚莫怪時人笑疎懶宦情元不似詩情

南烹

十年流落魄南烹初見鱸魚眼自明堪笑吾宗輕許

可坐令羊酪借尊羹

泊蘄口泛月湖中

炎天倦長路月夕泛平湖晃漾披銀鬪清寒住玉壺
釣絲縈藻荇蓬艇入菰蒲自別蜻蜒浦斯遊十載無
子故廬在蜻蜒港東南暑月常與客泛舟至中夜

初見廬山

從軍憶在梁州日心擬西征艸捷書鐵馬但思經太
華布帆何意拂匡廬計謀落落知誰許功業悠悠定
已疎尚喜東林尋舊社月明清露溼芙蓉

六月十四日宿東林寺

看盡江湖千萬峯不嫌雲夢芥吾胸戲招西塞山前
月來聽東林寺裏鐘遠客豈知今再到老僧能記昔
相逢虛窗熟睡誰驚覺野碓無人夜自春

舟過小孤有感

小孤山畔峭帆風又見煙鬟縹緲中萬里客經三峽
路千篇詩費十年功未嘗滿著蒲芽白先看堆盤鱸
縷紅商略人生爲何事一蓑從此入空濛

雁翅夾口小酌

墟煙淡將散江雨細欲無回風吹衣襟晴光滿菰蒲
隱几樂此時清和如夏初犬吠船丁歸小市得美蔬
歡言酌清醪侑以案上書雖云泊江渚何異歸林廬

長風沙

江水六月無津涯驚濤駭浪高吹花瀟聲已出雁翅
浦菰夾喜入長風沙長風自古三巴路檣竿參差雜
煙樹南船北船各萬里淒涼小市相依住歌呼雜沓
燈火明黃昏風死浪亦平勞苦舟師剩沾酒安穩明

朝到池口

泛小舟姑熟溪口

姑溪綠可染小艇追晚涼棹進破樹影波動搖星芒
菰深漁火明風遠水艸香尚想錦袍公醉眼隘八荒
坡陀青山冢斷碣臥道旁悵望不可逢乘雲遊帝鄉
溪東南即青山太白墓

明日再遊又賦

舟中如甌炊端坐畏喝死未能踏增冰且復呼艇子
纖纖新月低玉鉤沈野水微風生蘋末塵抱真一洗
可憐黃山塔突兀莫煙裏依然十年前看我行萬里
兩槳且勿搖橫舟小灘尾得詩偶長吟宿鷺爲驚起
過采石有感

短衣射虎早霜天歎息南山又七年唾手每思雙羽
箭快心初見萬樓船平波漫漫看浮馬一作深鳥高
柳陰陰聽亂蟬明日重尋石頭路醉鞍誰與共聯翩
將至金陵先寄獻劉留守

梁益羈遊道阻長見公便覺意差彊別都王氣半空
紫大將牙旗三丈黃江面水軍飛海鶴帳前羽箭射
天狼歸來要了活溪頌莫笑狂生老更狂
登賞心亭

蜀棧秦關歲月道今年乘興却東遊全家穩下黃牛
峽半醉來尋白鷺洲黯黯江雲瓜步兩蕭蕭木葉石
城秋孤臣老抱憂時意欲請遷都涕已流
夜泊龍廟回望建康有感

我醉行水上身輕如飛煙魚龍互悲嘯伴我夜不眠
羽扇揮浮雲月挂牛斗間河漢橫復斜風露方浩然
坡陀石頭城寂莫七百年世事感予懷竦身入青天
將至京口

臥聽金山古寺鐘三巴昨夢已成空船頭坎坎回帆
鼓旗尾舒舒下水風城角危樓晴靄碧林間雙塔夕
陽紅銅瓶愁汲中濡水不見茶山九十翁頃在京口嘗
取中濡水寄曾文清公

荆谿館夜坐

河漢無聲天正青三三五五滿天星艸根冷露黏溼

螢幽人岸巾坐津亭憶下瞿唐浮洞庭陽臺繫船夢
娉婷朱門重重夜不扃四山猿鳥啼青冥人生無蒂
風中萍幸我夢斷狂已醒繡鞵金絡帶萬釘何如故
山鋤茯苓

沂谿

射的峯前禹廟東短蓬三扇臥衰翁閑攜清聖濁賢
酒重試朝南莫北風水落痕留紅蓼節雨來聲滿綠
蒲叢衝煙莫作匆匆去擬看溪丁下釣筒

歸雲門

萬里歸來值歲豐解裝鄉墅樂無窮甌炊飽雨湖菱
紫蕨絡迎霜野柿紅壞壁塵埃尋醉墨孤燈餅餌對
隣翁微官行矣闕山去又寄千巖夢想中

月下自三橋泛湖歸三山

素壁初升禹廟東天風為我送孤蓬山橫玉海蒼茫
外人在冰壺縹緲中茅舍燈青聞吠犬蘋汀煙淡見
驚鴻白頭尚耐清寒在安得終年伴釣翁

懷成都十韻

放翁五十猶豪縱錦城一覺繁華夢竹葉春醪碧玉
壺桃花駿馬青絲鞵鬪雞南市各分朋射雉西郊常
命中壯士臂立綠條鷹佳人袍畫金泥鳳椽燭那知
夜漏殘銀貂不管晨霜重一梢紅破海棠回數藥香
新早梅動酒徒詩社朝莫忙日月匆匆送賓送浮世
堪驚老已成虛名自笑今何用歸來山舍萬事空臥
聽糟牀酒鳴瓮北窗風雨耿青燈舊遊欲說無人共

湖村秋曉

劍閣秦山不計年却尋剡曲故依然盡收事業漁舟
裏全付光陰酒榼邊平野曉聞孤唳鶴澄湖秋浸四
垂天九關虎豹君休問已向人間得地仙

夜夢與字文子友譚德稱會山寺若錢予行者
明日俾明得子友書感歎久之乃作此詩

夜夢集山寺二三佳友生相顧慘不樂若有千里行
在門僕整整駕臨道離嘶鳴我友顧謂我天寒戒晨征

遲速要當到徐驅勿貪程丁寧及藥餌依依有餘情
隣鐘忽驚覺鴉鵲窗欲明作詩謝我友有使頻寄聲

寒夜

小隱謝城市新寒尋褐袍秋燈依壁暗夜雨挾風豪
俗自隨時異身寧與世塵殘年更何事持蟹酌松醪

偷閑

老向人間未拂衣偷閑聊喜息塵機丹楓斷岸秋來
早淡日孤村客到稀偶憶雪溪攜鶴去却從雲肆買
養歸酒徒莫笑生涯別久矣淵明悟昨非

冬夜聞雁有感

從軍昔戍南山邊傳烽直照東駱谷軍中罷戰壯士
閑細艸平郊恣馳逐洮州駿馬金絡頭梁州毬場日
打毬玉杯傳酒和鹿血女真降虜彈箜篌大呼拔幟
思野戰殺氣當年赤浮面南遊蜀道已低摧猶據胡
牀飛百箭豈知蹭蹬還江邊病臂不復能開弦夜聞
雁聲起太息來時應過桑乾磧

書懷

愁向東華蹋軟紅暫歸舊隱樂無窮石池洗藥涓涓
水漁艇投竿嫺嫺風盡日醉醒菱唱裏隣家來往竹
陰中何須列戟長安第四面雲山擁此翁

湖中莫歸

弄檝漁舟水濺衣興闌却傍柳邊歸風平別浦沈新
月日落前村鎖夕霏乍起鷺行橫野去欲栖鴉陣暗
天飛詩情自合江湖老敢恨功名與願違

題齋壁

葺得湖邊屋數椽茅齋低小竹窗妍墟煙寂歷歸村
路山色蒼寒釀雪天性懶杯盤常偶爾地偏雞犬亦
偷然早知栗里多幽事虛走人間四十年

新葺門屋

林棲四壁空百事從簡易缺籬寒未補幽戶夜不閉
東偏欲廣屋厚費敢輕議設關力可具稚子請遂事
呀然兩竹扉寧復志容駟西山正當前浩蕩納空翠

下臨漁樵路橫鎖風月地惟愁俗客來剝啄驚午睡
吾廬

吾廬雖小亦佳哉新作柴門斷綠苔拄杖每闌歸鶴
入釣船時帶夕陽來墟煙隔水霏霏合籬菊凌霜續
續開千里安期那可得笑呼鄰父共傳杯

冬夜泛舟有懷山南戎幕

釣船東去掠新塘船走篷低露籜香十里澄波明白
石五更殘月伴清霜飄飄楓葉無時下嫋嫋菱歌盡
意長誰信梁州當日事鐵衣寒枕綠沉槍
夢至成都悵然有作

春風小陌錦城西翠箔珠簾客意迷下盡牙籌閑縱
博刻殘畫燭戲分題紫艷甃暖帳中醉紅叱撥驕花
外嘶孤夢淒涼身萬里令人憎殺五更雞

又

宦途元不羨飛騰錦里豪華壓五陵紅袖引行遊玉
局華燈圍坐醉金繩階前汗血兆河馬架上霜毛海
國鷹世事轉頭誰料得一官南去冷如冰

月夕

開戶滿庭雪徐看知月明微風入叢竹復作雪來聲
俗塵不待掃凜然肝肺清村深無漏鼓鶴唳報三更
將入閩夜行之雲門

東鶩竝偏門籃輿兀睡昏紡燈穿壁罅吠犬闐籬根
久客悲行役清愁怯夢魂餘生猶幾出回首付乾坤
山中觀殘菊追懷眉山師伯渾

空山菊花瘦如棘傾倒滿地枝三尺陰風冷雨不相
貸爛艸蒼苔共狼藉人雖委棄渠自香詎必泛酒登
華堂君不見仁人志士窮死眉山陽空使後世傳文
章

自雲門之陶山肩輿者失道行亂山中有茅舍
小塘極幽邃求見主人不可意其隱者也

陂池幽處有茅堂井白蕭條艸樹荒小鴨怯波時聚
散病蔬傷蠹半青黃童兒衝雨收魚網婢子聞鐘上

佛香我亦莫年思屏迹數椽何計得連牆

冬夜聽雨戲作

少年交友盡豪英妙理時時得細評老去同參惟夜
雨焚香臥聽書簷聲

又

澹簷點滴如琴筑支枕幽齋聽始奇憶在錦城歌吹
海七年夜雨不曾知

適園

春殘猶看少城花雪裏來嘗北苑茶未恨光陰疾駒
隙但驚世界等河沙功名塞外心空壯詩酒樽前髮
已華官柳弄黃梅放白不堪倦馬又天涯

欲行雨未止

幽慢依燈影空階送雨聲暫歸仍客路投老倍鄉情
眼澀書難讀心搖夢易驚病多常怕醉酒盡却思傾
比作陳下瓜麴釀成奇絕屬病瘍不敢取醉小
啜而已

翠蔓扶疎采擷忙麴生系出古淮陽躡成明月團團
白釀作新鵝淡淡黃醅甕秋淒淒驚凜冽糟牀夜注愛
淋浪西齋幽事新成譜首爲高人著此方酒方昔得之
胡基仲

大雨中離三山宿天章寺

苦雨催寒不肯晴晚來餘勢更縱橫雲如山壤長空
黑風似潮回萬木傾要借關河供遠眼不辭泥淖困
初程解衣一笑僧窗下幾兩青鞵了此生

早飯于溪蓋于吉故居也

劍外歸來席未溫南征浩蕩信乾坤峯回內史曾遊
地竹暗仙入舊隱村白髮孤翁鉏麥壠苦帚小婦闌
籬門行行莫動鄉關念身似流槎豈有根

贈楓橋化城院老僧

老宿禪房裏深居罷送迎爐紅豆萸火糝白芋魁羹
毳衲年年補紗燈夜夜明門前霜半寸笑我事晨征
雙橋道中寒甚

裂面霜風快似鎌重重裘袴晚仍添梅當官道香撩
客山逼籃輿翠入簾男子坐為衣食役年光常向道
途淹古來共說還家樂豈獨全軀畏楚針

行牌頭奴寨之間皆建炎未避賊所經也

今朝霜薄風氣和霽色滿野行人多沙平水淺木葉
下搖穢渡口生微波建炎避兵奔竄地誰料白首重
經過四十餘年萬事改惟有青嶂高嵯峨安得西國
蒲萄酒滿酌南海鸚鵡螺脩以吳松長絲之玉鱠送
以邯鄲皓齒之清歌向來喪亂汝所記大地凜凜憂
干戈偶然不死到老為底若惜朱顏醜

早發奴寨

暖徹衣篝蠟炬明鄰雞嗷嗷促殘更丈夫雖有四方
志客子終悲千里行月落龍蛇蟠木影山空風雨起
難聲上車莫恨晨霜冷又得脩途一日晴

題繡川驛

繡川池閣記曾遊落日欄邊特地愁白首即今行萬
里淡煙依舊送孤舟歸心久負鱸魚膾春色初回杜
若洲會買一蓑來釣雨憑誰先為謝沙鷗

夜行宿湖頭寺

臥載籃輿黃葉村疎鐘杳杳隔谿聞清霜十里伴微
月斷雁半行穿亂雲去國不堪心破碎平戎空有膽
輪困泗濱樂石應如舊誰勒中原第一勳

衡州道中作

耿耿孤忠不自勝南來清夢遶觚稜驛門上馬千峯
雪寺壁題詩一硯冰疾病時時須藥物衰遲處處少
交朋無情最恨寒沙雁不為愁人說杜陵

過靈石二峯

奇峯迎馬駭衰翁蜀嶺吳山一洗空拔地青蒼五千
仞勞渠蟠屈小詩中

曉日曛曛雪未殘三峯傑立插雲間老夫合是征西
將胸次先收一華山

宿僊霞嶺下

吾生真是一枯蓬行徧人間路未窮暫聽朝雞雙闕
下又騎羸馬萬山中重裘不敵晨霜力老木爭號夜
谷風切勿重尋散關夢朱顏改盡壯圖空連日風霜可
畏自去梁州未嘗有此寒也

道中病渴久不飲酒至魚梁小酌因賦長句

我行浦城道小疾屏杯酌解亦何足言亦復妨作樂
此身會當壞百歲均電電胡為過自惜憊臥困鍼烙
未嘗膾喉嚼况敢烹郭索今朝寓空驛窗戶寒寂寞
悠然忽自笑頭解貪愛縛紅燭映綠樽奇哉萬金藥

宿魚梁驛五鼓起行有感

憶從南鄭客成都身健官閑一事無分騎霜天伐狐
兔張燈雪夜擲梟盧百憂忽墮新衰境一笑難尋舊
酒徒投宿魚梁溪遠屋五更聽雨擁篝爐

又

少時談舌坐生風管葛奇才自許同閑戶著書千古
計變名學劍十年功酒醒頭覺狂堪笑睡起方知夢
本空它日故人能憶我葛僊磯畔覓漁翁若耶溪有葛

僊公釣磯

夢藤驛

倦馬投孤驛一峯青壓門蕭條秋浦路荒陋夜郎村
地瘴霜常薄林深日易昏百年常作客排悶近清樽

又

又入千山去真成萬里行今年自成都八千餘里赴行在又
千餘里入閩履霜常早駕秉炬或宵征古驛怪藤合荒
陂羣鴈鳴客中常少睡歸夢若為成

梅花絕句

空谷佳人洛浦仙洗妝真態更嬋娟廣平莫倚心如
鐵撩起清愁又破禪

月中疎影雪中香只為無言更斷腸曾與詩翁定花
品一丘一壑過姚黃曾文靖公嘗問予梅與牡丹孰勝予以此

蒼

又

折得梅花愧滿顏
文書堆案正如山
翰君一覺條然
夢長在清泉白石間

又

濯錦江邊憶舊遊
纏頭百萬醉青樓
如今莫索梅花
笑古驛燈前各自愁

又

蜀王小苑舊池臺
江北江南萬樹梅
只怪朝來歌吹
鬧園官已報五分開
成都合江園蓋故蜀別苑梅最盛自初開
監官日報府報至開五分則府主來宴遊人亦競集

又

湖上梅花手自移
予所居在山陰鏡湖
小橋風月最相
宜主人歲歲常為客
莫怪幽香怨不知

又

吾州古梅舊得名
雲蒸雨瀆綠苔生
一枝只好僧窗
看莫售千金入鳳城
山陰古梅枝幹皆苔蘚都下甚貴重之

又

探春歲歲在天涯
醉裏題詩字半斜
今日谿頭還小
飲冷官不禁看梅花

又

池館登臨雪半消
梅花與我兩無聊
青羊宮裏應如
舊腸斷春風萬里橋

又

今年真負此花時
醉帽何曾插一枝
漸老情懷多作
惡不堪還作送梅詩
去年在成都書賦詩送梅

劍南詩稿卷第十終

劍南詩稿目錄
卷第十一

對酒 遣興 建安雪 雪晴至後園二首
開元莫歸 書懷 遊鳳皇山 園中雜書四

首 烹茶 病中久止酒有懷成都海棠之盛
北齋 出塞曲 思故山 送錢仲耕修撰

建寧重五 雨晴至園中 夏日三首 發
書畫還故山戲書 白髮 懷譚德稱 客思

二首 建安遣興 六首 病起偶到復菴 前
有樽酒行二首 遊南塔院 感懷 雨夜

夜坐偶書 長歌行 雨夜不寐觀壁間所張
魏鄭公砥柱銘 客談荆渚武昌慨然有作

書懷 平生 自詠 池亭夜賦 雨夜偶書
思歸 客懷 伏中官舍極涼戲作 夢與

劉韶美夜飲樂甚 暑夜 客意 夜香 柴
懷叔殿院世綵堂 月夜 雙清堂夜賦 采

蓮三首 橋南納涼 芒屨 荔子絕句二首
官舍夙興 書懷 風月 大將出師歌

婕妤怨 移疾 病中懷故廬 夏夜不寐有
賦 綠淨亭晚興 憶山南二首 夕雨二首

試茶 莆陽餉荔子 初秋書懷 建州絕
無艾意頗思之戲作 憶昔 客思 初秋夢

故山覺而有作四首 寓歎 雙清堂醉臥
醉書 憶唐安 秋懷二首 晝臥聞碾茶

月下獨行橋上 夜意 秋夜書懷 思故廬
雨夜 北窗哦詩因賦二首 傲裝 追感

梁益舊遊有作 莆陽昭武延平送兵漸集戲
書 別建安絕句三首 初發建安 宿北巖

院 書感 長汀道中 黃亭夜雨 遊武夷
山 泛舟武夷九曲溪至六曲或云灘急難上

遂回二首 崇安縣驛 過建陽縣以雙鵝贈
東觀道士為長生鵝觀俯大溪鵝得其所矣武

夷險絕處有仙船架崖壁間數日前大風吹墮
船木數寸堅硬如石子偶得之皆此行奇事也

各賦一詩 右雙鵝 右墮木 紫谿驛二首
鵝湖夜坐書懷 信州東驛晨起 玉山縣

南樓晚望 玉壺亭 步過縣南長橋遊南山
普寧院山高處有塔院及小亭縹渺可愛恨不

能到 枕上感懷 晚過招賢渡 臥輿 奏
乞奉祠留衢州皇華館待命 寓舍偶題 夙

興 夜坐 偶得石室酒獨飲醉臥覺而有作
午睡 贈柯山老人 寓館晚興 葉相最

高亭 婺州州宅極目亭 謝演師送梅二首
訪毛平仲問疾與其子适同遊柯山觀王質

爛柯遺跡 月巖 弋陽縣驛 弋陽道中遇
大雪 雪中感成都 雪後苦寒行饒撫道中

有感 對酒二首 梅花 雪中尋梅二首
江上梅花

劍南詩稿卷第十一

宋陸游務觀

對酒

識字記姓名擊劍一人敵孫吳相研書了解亦何益
不如黃金鑿漱漱春波碧欣然對之笑未飲愁已釋
白頭生黑絲蒼顏桃李色金丹空九轉正恐無此力
朝飲續五斗莫飲髡一石寄謝采芝翁無爲老青壁
遺興

西州落魄九年餘濯錦江頭已結廬誰遣徑歸朝鳳
闕不令小住奉魚書余將赴楚道被命東歸塵埃眯目詩
情盡疾病侵人酒興疎寄語鶯花休入夢世間萬事
有乘除

建安雪

建谿官茶天下絕香味欲全須小雪雪飛一片茶不
憂何況蔽空如舞鷗銀瓶銅碾春風裏不枉年來行
萬里從渠荔子腴玉膚自古難兼熊掌魚

雪晴至後園

病扶藤杖覓殘梅牢落情懷怕酒盃約束園丁勤灑
掃新年作意待春來

又

寶馬東風擁犢車碧雞坊裏擅豪華南來強作尋春
夢何處如今更有花

開元莫歸

白髮書生不自珍天涯又作宦遊身谿橋煙淡偏宜
晚埜寺花遲未覺春日暝登山思謝屐病餘漉酒負
陶巾茹芝却粒平生事回首巖扉一愴神寺在紫芝山

下

書懷

濯錦江頭成昨夢紫芝山下又新年久因多病疎雲
液近爲長齋進玉延啼鳥傍簷春寂寂飛花掠水晚

翩翩支離自笑生涯別一炷爐香繡佛前
遊鳳皇山

窮日文書有底忙幅巾蕭散集山堂一樽病起初浮
白連焙春遲未過黃坐上清風隨塵柄歸途微雨發
松香臨溪更覓投竿地我欲時來小作狂
園中雜書

蕭蕭慈竹烏呼風宛似山光小閣東剩欲杖藜尋昨
夢更添紅綻綠陰中山光閣在潭華閣下

又

北窗看鏡意凄然夢斷梁州已七年獵獵綵旗春日
晚不堪花外見鞦韆山南鞦韆最感巷陌處處有之

又

筍生密密復疎疎來看偏宜曉雨餘乞與人間作圖
畫幅巾短褐小籃輿

又

殘花委地筍掀泥香椀詩囊到處攜幽夢欲成誰喚
覺半窗斜日鷓鴣啼

烹茶

麴生可論交正自畏中聖年來衰可笑茶亦能作病
噎嘔廢晨發支離失宵眠是身如芭蕉寧可與物競
兔甌試玉塵香色兩超勝把玩一欣然爲汝烹茶竟
病中久止酒有懷成都海棠之盛

病中久止酒有懷成都海棠之盛

碧雞坊裏海棠時彌月兼旬醉不知馬上難尋前夢
境樽前誰記舊歌辭日窮落日橫千嶂腸斷春風把
一枝說與故人應不信茶煙禪榻鬢成絲

北齋

新竹侵幽幔疎疎蓮散遠汀研朱朝點易搗葉夜潢一
作橫經巖壑知心賞琴樽樂性靈會當煩太史一奏

少微星

出塞曲

千騎爲一隊萬騎爲一軍朝踐狼山雪莫宿榆關雲
將軍羽箭不虛發直到祈連無雁羣巖巖春雷收陣

鼓蜿蜒驚蛇射生弩落蕃遺民立道邊白髮如霜淚
加兩襖魄胡兒作窮鼠競裏胡頭改胡語陣前乞降
馬前舞檄書夜入黃龍府

思故山

千金不須買畫圖聽我長歌歌鏡湖湖山奇麗說不
盡且復爲子陳吾廬柳姑廟前魚作市道士莊畔菱
爲租一彎畫橋出林薄兩岸紅蓼連菰蒲陂南陂北
鴉陣黑舍西舍東楓葉赤正當九月十月時放翁艇
子無時出舡頭一束書舡後一壺酒新釣紫鱖魚旋
洗白蓮藕從渠貴人食萬錢放翁癡腹常便便莫歸
稚子迎我笑遙指一抹西村煙

送錢仲耕修撰

姑熟溪邊識勝流十年重見豈人謀自應客路難爲
別不是陽關作許愁倬直公看鼇禁月倦遊我夢鏡
湖秋殷勤爲報中朝舊睡足平生是建州

建寧重五

霏微入戶黃梅雨磊落堆盤碧筒黍病來一滴不飲
酒但嘆菖蒲作端午人生忽忽東逝波白頭奈此節
物何去年已作歸州客今年建州更愁絕歸州猿吟
鳥啼裏屈沱醉歸詩滿紙屈沱蓋屈原故居楚人謂江之別
流爲沱 卽今憶此那可得西望歸州三嘆息

雨晴至園中

入夏經月雨園路久已荒今朝偶一到蒿艾如人長
豈惟蠹距豪頗覺蜂蝶狂悵然懷故山舍東百本桑
迨此積雨餘枝葉沃以光父老適相遇藉草揮一觴
一觴頽然醉笑語相扶將賦詩示兒子此樂未易忘

夏日

微風過中庭庭樹蠅有聲穿簾徐入座巾屨有餘清

又

展畫發古香弄筆娛晝寂是中亦何好使我喜忘食

又

呼兒整吾鴛鴦言返林廬可使臨老眼常親吏文書

發書畫還故山戲書

昨日遣書筒今日發書篋空齋惟一牀窗影亂風竹
平生鑽故紙夙好老尤篤奇哉掃除盡蟬蛻三萬軸
豈惟息煩心亦足養病目從渠襤襪生自獻公車牘

白髮

白髮千莖綠鬢稀臥看鸚鵡刺天飛平生竊鄙貢公
喜故里但思陶令歸清坐了無書可讀 近盡遣書筒歸
殘年賴有佛堪依君看世事皆虛幻屏酒長齋豈必
非

懷譚德稱

譚子文章舊有聲幾年同客錦官城江樓列炬千鍾
飲花市聯鞍一字行人世絕知非昨夢天真堪笑博
浮名空齋獨夜蕭蕭雨枕上詩成夢不成

客思

千里關山道路賒可憐客子費年華杯觴灑灑紅燒
酒風露盈盈紫笑花孤月有情來海嶠雙魚無信到
天涯此生那得常飄泊歸臥東溪弄釣車

又

兩鬢星星久倦遊淒涼況復寓南州未甘蟋蟀專清
夜已嘆梧桐報素秋綺語安能敵生死熱官正欲快
恩讎空堂飽作東歸夢夢泊巖灘月滿舟舟行還山陰
道出七里灘

建安遺興

建安酒薄客愁濃除却哦詩事事慵不許今年頭不
白城樓殘角寺樓鐘

又

錦城重到嘆無期忽憶書臺步月時白淚黏天鮫鱗
橫夢中識路亦何爲

又

今歲清詩欠百篇強尋筆硯意茫然秋風有句君知
否合在巖光釣瀨邊

又

古今清絕沅湘路臥想蒲帆十幅開不是遊人思遠
適肺肝塵土要詩才

又

綠沈金鎖少時狂幾過秋風古戰場夢裏都忘閩嶠
遠萬人鼓吹入平涼

又

刺虎騰身萬目前白袍濺血尚依然聖時未用征遼
將虛老龍門一少年

病起偶到復菴

經旬羸臥怯登臨偶憶東菴試一尋新竹初成迷棧
路巷後依古城有小棧百步斷雲不散抱城陰陂池綠靜
龜魚樂亭館蒼涼草樹深欲把一盃無奈癩病來觸
目動歸心

前有樽酒行

虛堂雨過生涼颼勸君一醉君勿辭去年不知今歲
事明年萬事今得知舊時扶床同戲兒還鄉問訊令
人悲冢丘累累在者誰紙錢兩溼抱樹枝君去六十
有幾時更望七十何其癡求師學道亦已遲謝客努
力從臨夷

又

綠酒益盈盈芳樽清歌媚媚留行雲美人千金織寶
帚水沈龍腦作燎焚問君胡為慘不樂四紀妖氛暗
幽朔諸人但欲口擊賊茫茫九原誰可作丈夫可為
酒色死戰場橫屍勝牀第華堂樂飲自有時少待擒
胡獻天子

遊南塔院

小破文書夢閑成杖履遊澗幽泉激激院靜竹修修
病骨涼如洗歸心浩莫收翹輕不載石一葉亂沙鷗

感懷

半年建安城士友闕還往出門每太息還舍猶愴况
有酒誰與傾得句空自賞疎直觸人情低回此吾額
豈無佳山水正爾寄夢想何當載親朋煙浦搖兩槳

雨夜

一雨遂通夕安眠失百憂窗扉淡欲曉枕簟凜生秋
晝燭爭暮道金尊數酒籌依然錦城夢忘却在南州
夜坐偶書

衰髮蕭疎雪滿簪莫年光景易駸駸已甘身作溝中
斷不願人知爨下音病鶴摧頽分薄俸悲蛩斷續和
微吟向來誤有功名念欲挽天河洗此心

長歌行

人生宦遊亦不惡無奈從來宦情薄既不能短衣射
虎在南山又不能鬪雞走馬宴平樂惟有釣船差易
具問君胡為不歸去片雲兩暗玉筍峯斜日人爭石
旗渡渡頭酒壚堪醉眠白酒醇醲鱸魚鮮菰米如珠
炊正熟尊羹似酪不論錢翁唱菱歌兒舞擢醉耳那
知朝市鬧城門幾度送迎官睡擁亂衰呼未覺

雨夜不寐觀壁間所張魏鄭公砥柱銘

疾風三日橫吹雨竹倒荷傾可憐汝空堂無人夜向
中臥看床前燭花吐壯懷耿耿誰與論檣床老龜不
能語世間豈無一好漢叱咤嗚氣吞虜壁間三丈
砥柱銘貞觀太平如更覩何當鼓吹渡河津下馬觀
碑馳馬去

客談荆渚武昌慨然有作

去歲出蜀初東遊我舸大艫下荊州便風轉頭五百
里吟嘯已在黃鶴樓戲拈鐵笛吹出塞水涌月落魚
龍愁明朝喧傳古仙過碧玉帶束黃絕裘豈知一官
自桎梏簿書期會無時休豐城寶劍已化久我自吐
氣冲斗牛洞庭四萬八千頃蟹舍正對蘆花洲速脫
衣冠挂神武散髮爛醉垂虹秋

書懷

青城結雲巢擬住三千年御風偶南遊萬里棲紫煙
翠裘綠玉杖白日凌青天招呼方瞳翁邂逅鳥爪仙
朝詠陰陽歌莫誦道德篇玉童持碧簡笙鶴來翩翩
海邊武夷山小留賞宿緣火食非所樂巾褐常儵然

清時未免出頗息世俗傳行矣秋風高去采玉井蓮

平生

平生涉世似虛舟不著胸中一點愁已用浮雲看富貴肯錄華屋嘆山丘戴溪寒釀千峯雪嚴瀨聲酣七里秋好景人間隨處有未埋白骨且閑遊

自詠

遊戲人間歲月多癡頑將奈此翁何放開繩筆牛初熟照破乾坤鏡未磨日落苔磯閑把釣雨餘蓬舵亂堆蓑明朝不見知何處又向江湖醉踏歌

池亭夜賦

池上小亭幽清宵秉燭遊荷盤時瀉露螢火早知秋有歲歲時速無聲河漢流殊方不堪任歸夢繞滄洲

兩夜偶書

高臥空堂風雨來更闌頻看燭花摧新涼蕭爽秋期近多病侵尋老境催萬事極知終變滅一官那得久低回床頭幸有楞伽在更炷爐香手自開

思歸

平生無宦情方外久浪迹往來梁益間一笑頗自得花樓錦城酒月白瞿唐笛啞啞下江艣跌宕登山屐巴東煙雨秋渭上風雪夕至今客枕夢萬里不能尺誰知建安城觸目非夙昔冥冥瘴霧細徹瀘蠻江碧出門無交朋嗚呼吾何適歸哉故山路詎必須暖席

客懷

客懷耿耿向誰語世事茫茫空自知堅坐懶窮牛渚怪倦遊何恨雁門蹄眼前客共一盃酒身後人傳千首詩報與故交當賀我計歸猶及菊花時

伏中官舍極涼戲作

盡障東西日洞開南北堂漏從閑處永風自遠來涼客愛炊菰美僧誇瀹茗香曉來秋色起肅肅滿筠床夢與劉韶笑夜飲樂甚

死生契闊十年餘欲話交情涕已濡夢裏偶同清夜宴醉中猶攬故人鬚岸巾談笑今誰記滿腹詩書只

自愚我亦與公同此病早收身世老江湖

暑夜

毒暑彌三伏微涼起二更月窗風竹亂煙渚露荷傾寂莫借書讀清羸扶杖行無功耗官廩太息負平生

客意

山行曳杖水擊舟走遍茫茫禹畫州蝴蝶夢魂常是客芭蕉身世不禁秋早因食少妨高臥晚憶茶甘作遠遊龍焙一嘗端可去無心更為荔枝留

夜香

投老誤乘傳竊食慚無功清夜一炷香實與天心通忤物雖至愚許國猶孤忠一念倘自欺百年寧有終上帝職造化生殺操至公稽首矢此心其敢累兒童

柴懷叔殿院世綵堂

卷服貂冠世間有榮悴紛紛翻覆手不如御史老萊衣世綵堂中奉春酒北斗為鷓鴣山作豆鳳竹鸞絲太中壽今年宗祀降恩綸太中拜前公拜後嗚呼人誰無父母盛事有及公家否萬鍾苦晚三釜薄人生此恨十八九我欲殺青書孝友愧非太史馬牛走聖朝若遣采詩官尚可為公圖不朽

月夜

小醉初醒月滿床玉壺銀鬪不勝涼天風忽送荷香過一葉飄然憶故鄉

雙清堂夜賦

陸子病少間獨臥谿上堂人靜魚自躍風定荷更香素月行中天流螢失孤光歸鳥飛有聲度此十里塘嗟我獨何事遲莫客異鄉太息搔短髮起視夜未央

采蓮

蘼水朱扉不上關采蓮小舫夜深還一樽何處無風月自是人生苦欠閑

又

雲散青天挂玉鉤石城艇子近新秋風鬟霧鬢歸來晚志却荷花記得愁

又
帝青天映麴塵波時有遊魚動綠荷回首家山又千
里不堪醉裏聽吳歌

橋南納涼

曳杖來追柳外涼畫橋南畔倚胡床月明船笛參差
起風定池蓮自在香半落星河知夜久無窮草樹覺
城荒碧筒莫惜頽然醉人事還隨日出忙

芒屨

芒屨一雙青筇杖九節輕登山猶健在投檄太遲生
滿意竹風冷入懷溪月明清秋故不遠回首憶蓴羹

荔子絕句

驛騎星馳亦快哉筠籠露溼手親開不應相與無平
素曾忝戎州刺史來

又

放翁遊蜀十年回病眼茫茫每懶開怪底酒邊光景
別方紅江綠一時來

官舍夙興

朝陽淡淡挂窗櫺桐葉無風忽自零不復扶頭傾白
墮但知臨目養黃寧新蔬帶露來幽圃脩綆飛泉灑
廣庭一出文書又圍繞正應高臥盡頽齡

書懷

功名富貴兩茫茫惟有躬耕策最長吏牘沈迷妨養
疾囊衣結束待還鄉洲中未種千頭橘宅畔先栽百
本桑書寄子公吾自懶故人不是總相忘

風月

老來苦無伴風月獨見知未嘗費招呼到處相娛嬉
披襟萬里快弄影三更奇淋漓蜀苑酒散落江樓詩
狂歌撼山川醉墨飛蛟螭聊將調俗子更遣半生疑

大將出師歌

將軍北伐辭前殿恩詔催排苑中宴紫陌驚塵中使
來青門立馬羣公餞繡旗雜沓三十里畫鼓敲鏗五
千面行營莫宿咸陽原滿朝太息傾都羨天聲一震

胡已亡捷書奕奕如飛電高秋不閉玉關城中夜罷
傳青海箭可汗垂泣小王號不敢跳犇那敢戰山川
圖籍上有司張掖酒泉開郡縣還朝策勛兼將相詔
假黃鉞調金鉉丈夫未遇誰得知昔日新豐笑貧賤

婕妤怨

妾昔初去家鄰里持車箱共祝善事主門戶望寵光
一入未央宮顧盼偶非常穉齒不慮患傾身保專房
燕婉承恩澤但言日月長豈知辭玉陛翻若葉隕霜
永巷雖放棄猶慮重謗傷悔不待宴時一夕稱千觴
妾心剖如丹妾骨朽亦香後身作羽林爲國死封疆

移疾

朝來移疾臥虛堂暫屏文書日更長鷗鷺近人情漸
熟簾櫳欲雨意先涼紗巾自照清池影蕊笈閑銷古
篆香莫恨微霜侵綠鬢爲渠歇盡少年狂

病中懷故廬

我家山陰道湖山淡空濛小屋如舴艋出沒煙波中
天寒橘柚黃霜落穉程紅祈蠶蕭鼓鬧賽雨雞豚空
義魚有竭作刈麥無遺功去年一月留行役嗟匆匆
今年歸興動艤舟待秋風社飲可欠我寄書約鄰翁
夏夜不寐有賦

綠淨亭晚興

急雨初過天宇溼大星磊落纔數十飢鶻掠蒼飛磔
磔冷螢墮水光熠熠丈夫無成忽老大箭羽凋零劍
鋒鏖徘徊欲睡復起行三更猶凭闌干立

憶山南

綠淨亭邊物色奇放翁睡起曳筇杖新涼已似雁來
後微雨却如梅熟時綠竹成陰藏細棧朱闌倒影入
清池登臨獨恨非吾土不爲城頭畫角悲

又

貂裘寶馬梁州日盤槊橫戈一世雄怒虎吼山爭雪
刃驚鴻出塞避雕弓朝陪策畫清油裏莫醉笙歌錦
幄中老去據鞍猶矍鑠君王何日伐遼東

醉墨淋漓酒百盃，轅門山色碧崔嵬。
打毬駿馬千金買，切玉名刀萬里來。
結客漁陽時遣簡，踏營渭北夜銜枚。
十年一夢今誰記，閉置車中只自哀。

夕雨

屣履行莎徑，移牀臥草亭。
風聲雜溪瀨，雨氣挾龍腥。
奕奕空中電，昏昏雲罅星。
徂年又如許，吾鬢得長青。

又

獨夜初傳漏，空齋半掩扉。
候蟲燈下語，水鳥雨中歸。
客舍愁彈劍，京塵怯化衣。
故人招隱意，字字莫相違。

試茶

北窗高臥，軒如雷。誰遣香茶挽夢回。
綠地毫甌，雪花乳不妨也。道入閩來。

莆陽餉荔子

江驛山程日夜馳，筠籠初拆露猶滋。
星毬數玉雖奇品，終憶戎州綠荔枝。

初秋書懷

二十年前已二毛，卽今何恨鬢蕭蕭。
孤燈自伴詩情苦，俗子從嫌醉眼高。
煙外莫鐘來遠寺，雨餘秋漲集空壕。
思歸更向文書嬾，此手惟堪把蟹螯。

建州絕無艾意頗思之戲作

鄉國雞頭賣，早秋綠荷紅。
縷最風流，建安城裏西風冷。
白棗堆盤看却愁。

憶昔

憶昔西遊變姓名，名獵圍屠肆押豪。
英淋漓縱酒滄溟窄，慷慨狂歌華岳傾。
壯士有心悲老大，窮人無路共功名。
生涯自笑惟詩在，旋種芭蕉聽雨聲。

客思

裘馬平生喜遠遊，莫年顛顛向南州。
文書與睡中分日，衰病和愁總怕秋。
無復雪郊看射虎，但思煙浦聽呼牛。
還家誰道無餘俸，倒橐猶堪買釣舟。

初秋夢故山覺而有作

陂水白茫茫，艸煙溼霏霏。
牧童一聲笛，落日無餘暉。

遙山已漸隱，村巷亞竹扉。
老翁延我入，苦謝柿栗微。
幸逢歲有秋，一醉君勿違。
念此動中懷，命駕吾將歸。

又

犬吠舍前後，月明村東西。
岸草蛩亂號，庭樹鳥已栖。
我僕城中還，擔頭有懸雞。
小兒勸我飲，村酒拆赤泥。
我醉不自覺，頽然葛巾低。
著書笑蒙莊，茗芋物自齊。

又

昔我東歸時，父老迎船頭。
開篷相勞苦，怪我領雪稠。
故山何負君，且作數月留。
豈知席未煖，疋馬來南州。
蠻花四時紅，瘴霧日夜浮。
歸哉不可遲，勿與婦子謀。

又

杜宇真吾交，勸去恨不速。
忠告輸肝肺，厚意均骨肉。
陋哉鷓鴣語，揣我貧念祿。
竹雞更鄙淺，泥淖憂車軸。
秋風嚴瀨清，春雨戴溪綠。
行矣勿復疑，照影巾一幅。

寓嘆

千載前人每暗同，眼邊俗客馬牛風。
作文要可張子布，飲酒思從陳孟公。
半世氛埃成潦倒，幾時蓑釣入空濛。
一番處處皆堪老，莫怕無山著此翁。

雙清堂醉臥

客裏逢秋醉似泥，空堂獨臥意凄凄。
迷亂號庭樹，西風急斜掛城樓。
北斗低末路，敢貪請鶴料，微官久厭駕。
雞棲平生玉局經，行地擬乞冰銜隱剡溪。

醉書

半年愁病劇，一雨喜涼新。
稍與藥囊遠，初容酒醜親。
浩歌驚世俗，狂語任天真。
我亦輕餘子，君當恕醉人。

憶唐安

南鄭戍還初，過蜀朝衫與鬢猶爭綠。
逢春飲酒似長鯨，醉裏千篇風雨速。
唐安池館夜宴頻，瀲灩玉船搖畫燭。
紅索琵琶金縷花，百六十絃彈法曲。
曲終却看舞霓裳，嬾嬾宮腰細如束。
明朝解醒不用酒，起尋百畝東湖竹。
歸吳寂莫時，自笑縱有詩情誰省錄。
今年二頃似可謀，去斷雲根結茅屋。

秋懷

莫年身世轉悠悠又向天涯見早秋昨夜月明今夜
雨關人何事總成愁

又

星斗闌干河漢流建州風物更禁秋年來多病題詩
懶付與鳴蛩替說愁

晝臥聞碾茶

小醉初消日未晡幽窗催破紫雲腴玉川七盃何須
爾銅碾聲中睡已無

月下獨行橋上

新秋未再旬月露已浩然放翁一幅巾與影俱翩僂
飛橋挂澄谿幽竇鳴細泉開歲纔僂仰已近搖落天
殊方久滯留感此歲月遷歸來看青燈悄悄不得眠
夜意

火雲夕方收艸露秋已白堂空燈欲翳壁壞蟲自噴
四顧寂無人獨立岸吾憤窮通何足論等是百年客
何能爲一飽半世出下策布帆幸無恙誰謂江海迹

秋夜書懷

斷香漠漠繞藤牀新月娟娟轉畫廊鄉遠每勞千里
夢雨慳未放九秋涼衰遲分作驥伏櫪斂退敢求錐
出囊剩喜今年有奇事嚴遵難下繫歸航

思故廬

平生一束書不爲屋廬計微官寄郵傳俯仰閱半世
艸堂白雲邊日夜長松桂柴門入幽夢落日亂蟬嗥
宦遊有何好海角愁瘴癘拂衣便可耳勿使老春蕘

雨夜

小雨初涼夜殘燈欲暗時病多愁近酒心弱怯題詩
舊友殊方少歸耕晚歲宜回頭語孤影此意有君知

北窗哦詩因賦

二十來年賦遠遊一窗又復寄南州雙鷓戲雨波塘
曉亂葉飄風院落秋顏鬢蹉跎愁覽鏡江山重復怯
登樓平生事業詩千首殘稿從教處處留

又

露下螢飛仲秋月山圍水繞建安城病多不辨酒中
聖身遠且令心太平數卷蠹書行老矣一盂蔬飯太
憎生白雲只在簷間宿聽我清宵詠句聲

傲裝

絕物離人恨未能聊爲日過打包僧蹇蹇渺渺秋山
兩孤榻昏昏夜店燈酒量已隨詩共退客愁仍與病
相乘頽然衰颯嗟誰識俠氣當年蓋五陵

追感梁益舊遊有作

西遊萬里倚朱顏肯放尊前一笑怪蜀苑妓圍欺夜
雪梁州獵火滿秋山晚途忽墮塵埃裏樂事渾疑夢
寐間浮世變遷君勿歎劇談猶是詫鄉關

莆陽昭武延平送兵漸集戲書

鼓聲晨統紱角聲莫鳴嗚作官了何事空數歲月徂
送兵稍稍集秣馬脂吾車風霜迫搖落殘暑亦已無
野渡明丹楓破驛吹黃榆聊收作詩料未用厭征途

別建安

三十年來雲水僧常挑鉢帶繫行滕信緣不作癡業
窟卽是吾家無盡燈

又

楚澤吳山已慣行武夷從昔但聞名北巖小寺長汀
驛且喜遊山第一程

又

敬帽揚鞭晚出城驛亭燈火向人明多情葉上蕭蕭
雨更把新涼送客行

初發建安

小雨初收雲未歸吾行迨及晚秋時寒沙新雁無人
問露井殘桐有客悲征袂拂霜晨喚馬驛窗剪燭夜
題詩悠然且作尋山想夢裏功名莫自期

宿北巖院

車馬紛紛送入朝北巖燈火夜無聊中年到處難爲
別也似初程宿灞橋岑參詩云初程莫早發且宿灞橋頭語意

至工

書感

溪路人家尚闔扉，疆扶衰備著征衣。百年朝露古所歎，一櫂秋風吾欲歸。楚客長號沾白壁，漢宮太息遣明妃。鍊金消骨從來事，老矣何心踐駭機。

長汀道中

晚過長汀驛，溪山乃爾奇。老夫惟坐歎，造物為陳詩。鳥送穿林語，松垂拂澗枝。憑鞍久忘發，不是馬行遲。

黃亭夜雨 去武夷四十里

未到名山夢已新，千峯拔地玉嶙峋。黃亭一夜風吹雨，似為遊人洗俗塵。

遊武夷山

少讀封禪書，始知武夷君。晚乃遊斯山，秀傑非昔聞。三十六奇峯，秋晴無纖雲。空巖難晨號，峭壁丹夜暎。巢居寄千仞，鴻荒想羲軒。風雨蛻玉骨，難以俗意論。丹梯不容躡，修蔓亦畏捫。泝難進小艇，媿驚白鷺羣。學道雖恨晚，養氣敢不勤。宦遊非本志，寄謝鶴與猿。泛舟武夷九曲溪，至六曲或云難急難上，遂回莫年脚力倦，躡攀借得扁舟，臥看山怪怪奇奇，何所似綠蘿溪入下牢關。

又

一葉凌風入硤來，山童指點幾崔嵬。急流勇退平生意，正要船從半道回。

崇安縣驛

驛外清江十里秋，雁聲初到荻花洲。征車已駕晨窗白，殘燭依然伴客愁。

過建陽縣以雙鵝贈東觀道士為長生鵝觀俯大溪鵝得其所矣武夷險絕處有仙船架崖壁間數日前大風吹墮船木數寸堅硬如石予偶得之皆此行奇事也各賦一詩

閑泛晴波啜綠萍，却衝微雨傍煙汀。會稽內史如相遇，換取黃庭一卷經。

右雙鵝

斷崖幽洞白雲深，縹渺仙槎無古今。飛下一峯相勞苦，却疑天外有知音。

右墮木

紫谿驛 信州鉛山縣
它鄉異縣老何堪，短髮蕭蕭不滿簪。旋買一尊持自賀，病身安穩到江南。

又

雲外丹青萬仞梯，木陰合處子規啼。嘉陵棧道吾能說，略似黃亭到紫谿。

鵝湖夜坐書懷

士生始墮地，孤矢志四方。豈若彼婦女，齷齪藏閨房。我行環萬里，險阻真備嘗。昔者戍南鄭，秦山鬱蒼蒼。鐵衣臥枕戈，睡覺身滿霜。官雖備莫府，氣實先顏行。

擁馬涉沮水，飛鷹上中梁。勁酒舉數斗，壯士不能當。馬鞍挂狐兔，燔炙百步香。拔劍切大肉，哆然如餓狼。時時登高望，指顧無咸陽。一朝去軍中，十載客道傍。看花身落魄，對酒色淒涼。去年忝號召，五月觸瞿唐。青衫暗欲盡，入對衰涕滂。今年復詔下，鴻雁初南翔。俯仰未閱歲，上恩實非常。夜宿鵝湖寺，槁葉投客牀。寒燈照不寐，撫枕慨以慷。李靖聞征遼，病憊更激昂。裴度請討蔡，奏事猶衷創。我亦思報國，夢繞古戰場。

信州東驛晨起

衣上征塵鬢畔霜，信州古驛憩歸裝。悲歌未肯彈長劍，豪氣猶能臥大牀。半暗殘燈搖北壁，常飢老馬臥東廂。隣雞唱罷衣篝暖，自笑行人日日忙。

玉山縣南樓晚望

小樓在何許，正在南溪上。空濛過釣船，斷續聞漁唱。征途苦偏仄，舒嘯喜清曠。安得此溪水，為我變春醪。

玉壺亭

玉壺亭上小徘徊，閑對殘荷把一盃。冠蓋交馳期會急，長官未必辦頻來。

步過縣南長橋遊南山普寧院山高處有塔院
及小亭縹渺可愛恨不能到

偶扶藤杖過南津野寺長橋發興新暫就清溪照鬢
鬢不妨翠霧溼衣巾山縈細棧疑無路樹落崩崖欲
壓人朝莫有程常碎碎何因攜酒上嶙峋

枕上感懷

五更攬轡山路長老夫誦書聲琅琅古人已死心則
在度越秦漢窺虞唐三更投枕窗月白老夫哦詩聲
嘖嘖淵源雅頌吾豈敢屈宋藩籬或能測一代文章
誰汝數老不能閑真自苦君王雖賞于薦于無奈宮
中須羯鼓

晚過招賢渡

老馬骨嶮然虺虺不受鞭行人爭晚渡歸鳥破秋煙
湖海淒涼地風霜搖落天吾生半行路搔首送流年

臥輿

白首躬耕已有期鳳城歸路却遲遲臥輿擁被聽秋
雨占盡人間好睡時

奏乞奉祠留衢州皇華館待命

世念蕭然冷欲冰更堪衰與病相乘從來幸有不材
木此去真爲無事僧 見丹霞錄 耐辱豈惟容唾面寡
言端擬學銘膺尚餘一事猶豪舉醉後龍蛇滿剡藤
寓舍偶題

寓舍偶題

轉徙身飄梗淹留等繫匏雁孤依遠渚鳩拙寄空巢
寒日頰梨頰清霜長橋包平生麴道士歲晚欲深交

夙興

客中睡眠少常以雞鳴興新炭熾宿火膏油續殘燈
焚香倚蒲團外靜中已凝榮辱兩不到淡如秋水澄
出定窗已白炯炯寒日昇厨人作芋糝供此在家僧

夜坐

老知世事謾紛紛紙帳蒲團自策勳一夜北風吹裂
屋石樓無耳不曾聞
偶得石室酒獨飲醉臥覺而有作

初寒思小飲名酒忽墮前素鬢手自傾色若秋澗泉
浩歌復起舞與影俱翩僊一笑遺宇宙未覺異少年
詩人不聞道苦數歲月遷豈知汝南市自有壺中天
河洛久未復銅鞮棘森然秋風歸去來虛老玉井蓮

午睡

風霜踐殘歲我乃羈旅人如何得一室牀敷暖如春
午枕挾小醉鼻息撼四隣心安了無夢一掃想與因
逡巡起類面覽鏡正幅巾聊呼蟹眼湯淪我玉色塵

贈柯山老人

柯山老人九十餘亂髮不櫛瘦如枯百穿千結一布
袴得酒一吸輒倒壺自言少年不蓄孥有錢徑付酒
家壚人生辦此真良圖棄官從翁許我無

寓館晚興

隨牒人間不自憐衢州孤驛更蕭然百年細數半行
路萬事不如長醉眠短髮經秋真種種腹寬耐事只
便便晚窗商略唯當飲安得黃花到眼邊 今年九月將
盡竟未見菊

葉相最高亭

高亭新築冠鼇峯眼力超然信不同膚寸油雲澤天
下大千沙 一作法 界納曾中春遊到處羣花擁夜宴
歡時百榼空劉白老來忘世味只思詩酒伴裴公裴
晉公留守東都白樂天劉夢得以分務與晉公偕酬

婺州州宅極目亭

尚書曳履上星辰小爲東陽作主人朱閣凌空雲縹
緲青山繞郭玉嶙峋似聞旋教新歌舞且慰重臨舊
吏民莫倚闌干西北角卽今河洛尚胡塵

謝演師送梅

早梅時節到江南已判樽前酒滿衫輪與西鄰明上
座解從大庾嶺頭參

又

折送江梅意不疎要教相對鬪清臞爲君著向明窗
下試問山翁具眼無

訪毛平仲問疾與其子适同遊柯山觀王質爛柯遺跡

籃輿訪客過仙村千載空餘一局存曳杖不妨呼小友還家便恐見來孫林巒巉絕秋風瘦樓堞參差暮氣昏酒美魚肥吾事畢一菴那得住雲根

月巖

幾年不作月巖遊萬里重來已白頭雲外連娟何所似平羌江上半輪秋

弋陽縣驛

大雨山中采藥回了頭巖畔覓詩來喚船野渡逢迎雪攜酒溪頭領略梅久客愁心端欲折何時笑口得頻開慙勤記著今朝事破驛空廊葉作堆

弋陽道中遇大雪

我行江郊莫猶進大雪塞空迷遠近壯哉組練從天來人間有此堂堂陣少年頗愛軍中樂跌宕不耐微官縛憑鞍寓目一悵然思為君王掃河洛夜聽簌簌窗紙鳴恰似鐵馬相磨聲起傾斗酒歌出寒潭壓胸中十萬兵

雪中感成都

憶在西州遇雪時繡筵處處百花圍烏絲闌展新詩就油壁車迎小獵歸感事鏡鸞悲獨舞寄書箏雁恨慵飛愁多自是難成醉不為天寒酒力微

雪後苦寒行鏡撫道中有感

殘雪莫還結朔風晴更寒重裘猶粟膚連酌無辭顏指直不可握終日縮袖間十年走萬里何適不艱難附火財須臾攬轡復慨歎恨不以此勞為國戍玉關

對酒

溫如春色爽如秋一棹燈前自獻酬百萬愁魔降未得故應用爾作戈矛

又

歎息人真未易知莫年始覺麴生奇個中妙趣誰堪語最是初醺未醉時

梅花 臨州道中見梅數樹憔悴特甚

我與梅花有舊盟即今白髮未忘情不愁索笑無多子惟恨相思太瘦生身世何曾怨空谷風流正自合傾城增冰積雪行人少試倩羈鴻為寄聲

雪中尋梅

莫遣扁舟興盡回正須衝雪看江梅楚人原未知真色施粉何曾太白來

又

幽香淡淡影疎疎雪虐風饕亦自如正是花中巢許輩人間富貴不關渠

江上梅花

老年樂事少關身猶喜尊前見玉人豈是淒涼偏薄命自緣纖瘦不禁春娟娟月上明江練黯黯天低慘玉塵絕礪斷橋幽獨處護持應有主林神

劍南詩稿卷第十一終

劍南詩稿目錄
卷第十二

擬峴臺觀雪 舊在成都初春無事日訪昭覺保福正法諸刹甚可樂也追懷慨然因賦長句

園中賞梅二首 正月十五日出郊至金石臺二首 六日小飲園中光景鮮妍紅梅已拆恍

記在果州偶得絕句 聞雁 撫州上元 登擬峴臺 燈夕有感 庚子正月十八日送梅

初春懷成都 春雨 雨中遣懷二首 晚晴 春晚 春晚坐講忽夢泛舟飲酒樂甚既

覺悵然有賦 遣興 老去 雨夜 簡黎道士 臨川絕無佳酒時得一醉戲書 醉中懷

江湖舊遊偶作短歌 三月二十一日 天祺節日飯罷小憩 思歸 齒痛有感 南窗睡

起二首 初夏 讀程秀才詩 晨起 雨夜 得京書或怪久不通問 水亭 醉眠 感

舊七首 晝臥聞百舌 寄呂博士 遊疎山 疎山東堂晝眠 山中作 觀蔬圃 東堂

晨起有感 金谿道中 小憩前平院戲書觸目 遣興 雨後獨登擬峴臺 數日訴牒苦

多憊甚戲作 與黎道士小飲偶言及曾文清公慨然有感 念歸 五月十一日夜且半夢

從大駕親征盡復漢唐故地見城邑人物繁麗云西涼府也喜甚馬上作長句未終篇而覺乃

足成之 雨夜二首 焚香晝睡比覺香猶未散戲作二首 仲夏小旱方致禱忽大雨連日

江水為漲喜而有作 冒雨登擬峴臺觀江漲 薤庭草 蛺蝶詞 大雨踰旬既止復作江

遂大漲二首 燒丹示道流 書感 夏日寄統 自訟 夏日晝寢夢遊一院闌然無人

自嘲 長歌行 對酒 自詠 夏日睡起 所居堂極涼雖三伏常有秋意也偶得長句

雨後露坐小酌 日莫南窗納涼 中夜起登堂北小亭 登擬峴臺 夜意 道院遣興

夜行至白鹿泉上 堂中以大盆漬白蓮花石菖蒲儵然無復暑意睡起戲書 初秋 書懷

五首 狂吟 聞雨 初秋小疾効俳諧體 雨後極涼料簡篋中舊書有感 秋夜 鈔書

晚自白鹿泉上歸 秋旱方甚七月二十八夜忽雨喜而有作 秋日小雨有感 書李商

叟秀才所藏曾文清詩卷後 碧海行 道院遣興 夜酌 言懷 送客城西 雨夜 病

中作 社日小飲 晚到東園 秋晚登擬峴望祥符觀 秋思 病目廢書 感昔二首 視

陂至崇仁村落 馬上 寄周洪道參政二首 北窗 登擬峴 休日 別張教授歸獨登

擬峴 晚晴至索笑亭 新釀熟小酌索笑亭 乾道初子自臨川歸鍾陵李德遠范周士送

別是日宿戰平風雨終夕今自臨川之高安復以雨中宿戰平悵然感懷二首 村舍小酌

白塔道中乘臥輿行 宿城頭鋪小飲而睡 豐城村落小憩 再題 發豐城縣 豐城高

安之間憩民家景趣幽邃慨然懷歸 宿華嚴寺 寄奉新高令 高安州宅三詠三首 與高安劉丞遊大愚觀壁間兩蘇先生詩

劍南詩稿卷第十二

宋陸游務觀

擬峴臺觀雪

垂虹亭上三更月擬峴臺前清曉雪我行萬里跨秦
吳此地固應名二絕山川滅沒雪作海亂墜天花自
成態狂歌痛飲豪不除更憶銜枚馳出塞蘆摧葦折
號飢鴻欲傅粉墨無良工摩挲東絹三數息收入放
翁詩卷中明朝青天行日較萬瓦生煙失瓊玉世間
成壞本相尋却看晴山暈眉綠

舊在成都初春無事日訪昭覺保福正法諸刹

甚可樂也追懷慨然因賦長句

憶在西川集寶坊幅巾蕭散日初長伊蒲塞饌分香
積優鉢羅花散道場客路逢春增感慨舊遊回首已
微涼新晴強作尋幽計有底文書作許忙

園中賞梅

閱盡千葩百卉春此花風味獨清真江邊曉雪愁欲
語馬上夕陽香趁人慰眼紅苞初報信回頭青子又
生仁羈遊偏覺年華速徙倚闌干一愴神

又

行遍茫茫禹畫州尋梅到處得閑遊春前春後百回
醉江北江南千里愁未愛繁枝壓紗帽最憐亂點糝
貂裘一寒可賀君知否又得幽香數日留

正月十五日出郊至金石臺

漸老惜時節思遊郎可忘雪晴天淺碧春動柳輕黃
笑語寬衰疾登臨到夕陽未須催野渡聊欲據胡床

又

開歲多休暇官身亦暫閑樓臺先畫杏花柳向春慳
啼鳥隨遊轡和風愜醉顏更憐歸路好破墨數峯山
晚歸見西南諸山如畫

六日小飲園中光景鮮妍紅梅已拆恍記在果

州偶得絕句

輕裘駿馬金泉路金泉蓋謝自然輕舉之地默數新春又
九年風景不殊人自老忽驚作夢到臨川

聞雁

過盡梅花把酒稀熏籠香冷換春衣秦關漢苑無消
息又在江南送雁歸

撫州上元

江月微雲外街泥小兩餘人如虛市散燈似曉星疎
羈雁同身世新霜上鬢鬢明年更清絕魚火對茅廬

登擬峴臺

層臺縹緲壓城闌倚杖來觀浩蕩春放盞樽前千里
目洗空衣上十年塵縈迴水抱中和氣平遠山如醜
藉人更喜機心無復在沙邊鷗鷺亦相親

燈夕有感

笑渠紅綠亦參差睡起燒香強賦詩萬里錦城無夢
到豈惟虛負放燈時

庚子正月十八日送梅

滿城桃李爭春色不許梅花不成雪世間尤物無盛
衰萬點繁風愈奇絕我行柯山眠酒家初見窗前三
四花恨無壯士挽斗柄坐令東指催年華今朝零落
已可惜明日重尋更無迹情之所鍾在我曹莫倚心
腸如鐵石

初春懷成都

我昔薄遊西適秦歸到錦城逢早春五門收燈藥市
近小桃妖妍狂殺人蜀中入春惟小桃先開似垂絲海棠
霓裳法曲華清譜燕妬妬身輕鸞學語歌舞更休轉盼間
但見宮衣換金縷世上悲歡豈易知不堪風景似當
時病來幾與麴生絕禪榻茶煙雙鬢絲

春雨

冬旱土不膏愛此春夜雨四郊農事興老穉送歌舞
相呼長沮耕分喜樊遲圖豐年已在目亭障靜桴鼓
我歸未有期一官寄倉庾幸復寬簡書不敢恨羈旅

雨中遣懷

病中草草度年華
睡起昏昏日易斜
抵死愁禁千斛酒
薄情雨送一城花
鏡湖煙水搖朱舫
錦里香塵走鈿車
此夢即今都打破
不妨寂寞住天涯

又

霏霏春雨細如絲
正是春寒欺客時
心向宦途元淡薄
夢尋鄉國苦參差
樓前新漲綠三尺
牆外尚餘紅幾枝
擺撥簿書呼酒榼
南湖西塔有幽期

晚晴

水聲瀼瀼赴回塘
簾影疎疎遶四廊
靜院數盃傾白墮
幽窗一枕夢清湘
潤侵書笥深防蠹
暝徹衣篝剩得香
解組徑歸應更樂
偷閑猶足傲羲皇

春晚

五十六翁身百憂
年來轉覺此生浮
山川信美故鄉遠
天地無情雙鬢秋
社後燕如歸客至
春殘花不為人留
一觴一詠從來事
莫笑扶衰又上樓

春晚坐講忽夢泛舟
飲酒樂甚既覺悵然有賦
夢泛扁舟逸興多
畫橈搖蕩麴生波
微風款款生蒲葦
小雨霏霏溼芰荷
舞落烏紗從歲去
歌酣白紵奈情何
年來惟覺華胥樂
莫遣茶甌戰睡魔

遣興

老子癡頑慣轉蓬
殘年懶復問窮通
赦書雖未除詩債
盟府猶當策酒功
桐嶺市回人踏月
柘岡日落鳥呼風
浮生觸處無真實
豈獨南柯是夢中

老去

老去時時病
春來日日陰
文書有期會
山水負登臨
倦客風埃眼
孤臣狗馬心
餘寒欺短褐
莫惜酒盃深

雨夜

百紫千紅占歲華
又隨風雨捲泥沙
即今空有夢為蝶
當日曾將命乞花
倦枕殘燈人寂寞
幽窗小草字欹斜
悲歡變滅何窮已
學得山僧自一家

簡黎道士

滿箔吳蠶繭漸稠
四郊膏雨麥方秋
道人昔是茶山客
病叟新為藥市遊
昔者舊凋零誰晤
語篇章璀璨尚風流
蘭亭刻曲春光好
倘肯相從弄釣舟
臨川絕無佳酒時
得一醉戲書

醉中懷江湖舊遊偶作短歌

有酒時劇飲
無酒徒浩歌
庭花五六株
老子獨婆娑
誰云苦寂莫
在我亦已多
莞菰萬二千
一笑謝天魔
夢作青城去
翠磴捫松蘿
又為平羌遊
素月沉煙波
覺來撫几歎
奈此桎梏何
流年不貸人
去去如飛梭

三月二十一日作

蹴踘牆東一市譁
鞦韆樓外兩旗斜
及時小雨放桐葉
無賴餘寒開楝花
明月吹笙思蜀苑
軟塵騎馬夢京華
懽情滅盡朱顏改
節物催人只自嗟

天祺節日飯罷小憩

臥聽午漏隔花傳
簾裏花殘有斷煙
莫放鞦韆鳴玉井
偷閑要補五更眠
思歸

齒痛有感

白髮滿青鏡
悵然山水身
那因五斗米
常作半塗人
涉世風波惡
思歸懷抱真
會當求鐵斧
送老鏡湖濱
眼暗頭童負聖時
齒牙欲脫更堪悲
莫年漸解人間事
蒸食哀梨亦自奇

南窗睡起

夢中忘却在天涯
一似當年錦里時
狂倚寶箏歌白紵
醉移銀燭寫烏絲
酒來郫縣香初壓
花送彭州露尚滋
起坐南窗成絕嘆
玉樓乾鶴誤歸期

又

尚滋起坐南窗成絕嘆
玉樓乾鶴誤歸期

晝漏迢迢暑氣清不妨小倦帶餘醒夢從隴客聲中
斷愁向湘屏曲處生風度簾旌紅浪颭窗明香岫碧
雲橫閑情賦罷憑誰寄悵望壺天白玉京

初夏

百葉盆榴照眼明桐陰初密暑猶清深深深簾幕度香
縷寂寂房櫳聞燕聲細煖詩聯憑几靜思棋劫對
楸枰浣花光景應如昨回首西州一愴情浣花四月十
九日也

讀程秀才詩

程子晚相得居然一坐傾新詩欲飛動病眼爲開明
英妙非凡質衰遲畏後生吾徒可相賀五字有長城
晨起

一官又寄汝江頭落魄文園故倦遊榻上鐸聲悲破
夢簷邊桐葉冷生秋莫年作吏寧長策薄祿磨人尚
小留晨起凭欄嘆衰甚接羅紗薄髮颯颯

兩夜

兩鬢新霜換舊青客遊身世等浮萍少年樂事消除
盡兩夜焚香誦道經

得京書或怪久不通問

慣向江湖鍛羽翰雲霄那敢接鸞鸞百年未必如炊
久萬事真須作夢看白首據鞍慚俠氣清燈顧影嘆
儒酸手遮西日成何味還我平生舊釣竿

水亭

日淡暑猶薄雨餘風更清儵然水亭立試此葛衣輕
晒粉憐孤蝶穿枝喜晚鷺誰知簿書裏也復得吾生

醉眠

達士如鷗夷無客亦自醉癡人如撲滿多藏作身祟
放翁亦何長偶自遠聲利胸中白如練不著一毫僞
醉來酣午枕晴日雷起鼻寄謝敲門人予方有公事
感舊絕句

鴨翎埃前山簇馬雞蹤橋下水連天金丹煉成不肯
服且戲人間五百年

又
鵝黃酒邊綠荔枝 鵝黃廣漢酒名綠荔枝出敘州 摩訶池
上納涼時冰紈不畫驂鸞女却寫江南白紵辭

又
南市夜夜上元燈西鄰日日是清明青甌犢車碾花
去黃金馬鞭穿柳行

又
十月新霜兔正肥佳人駿馬去如飛纖腰嫋嫋戎衣
窄學射山前看打圍

又
半紅半白官池蓮 江濱廟池 半醒半醉女郎船鴛鴦
驚起何曾管折得雙頭喜欲顛

又
紅葉琵琶出嘉州四絃彈盡古今愁胡沙漫漫紫塞
曉漢月娟娟青冢秋

又
美人傳酒清夜闌欲歌未歌愁遠山蒲萄一斗元無
價換得涼州也是閑

又
晝臥聞百舌
雨後郊原已遍犁陰陰簾幙燕分泥閑眠不作華胥
計說與春鳥自在啼 江南謂百舌爲春鳥

又
寄呂博士
薄宦東西蜀僑居太少城休論九年謫喜識萬人英
別久心常折書來眼未明功名君自力丘壑我平生

又
遊疎山
我願匹馬飛騰遍九州如今苦無腰裏與驂騑葛陂
之龍又難致兀兀安得忘吾愁幸餘一事差可喜雲
山萬里芒屨底曳杖行穿蟠冢雲試茶手挹香溪水

又
江西山水增怪奇疎山之名舊所知惜哉不見侏儒
師尚想薪水俱空時寺門欲近山若拆老樹蒼崖含
古色挂包便住吾豈能一來要是疎山客

又
疎山東堂晝眠

又

又

又

又

飯飽眼欲閉心閑身自安樂超六欲界美過八珍盤
香縷縈簷斷松風通枕寒吾兒解原夢為我轉雲團
是日約子分茶

山中作

朱墨紛紛訟滿庭半年初得試山行燒香掃地病良
已飲水飯蔬身頓輕日落三通傳浴鼓雨餘千耦看
農耕故業光景還如此為底淹留白髮生 余書堂在雲
門寺西

觀蔬圃

菘芥可蔬芹可羹晚風呼颯枯棹聲白頭孤宦成何
味悔不畦蔬過此生
東堂晨起有感

不解飛車越九州青鞵處處為山留百年未盡且作
夢三日閑行聊散愁世上幾經華表柱尊前好在黑
貂裘龍泉幸是無人斷莫露光芒上斗牛

金谿道中

雲間苦竹市雨來烏石岡駕犁雙犢健鬻蘭一村香
天地君恩重風埃吏責忙敢辭坡路滑且領筍輿涼

小憩前平院戲書觸目

道邊小寺名前平殘僧二三屋半傾旁分千畦畫楸
局正對一山橫翠屏修纖弱蔓上幽援 一作拔 堅瘦
穉柏當前榮稻秧正青白鷺下桑樾爛紫黃鸝鳴村
虛賣茶已成市林薄打麥惟聞聲泥行扶犁叱新犢
野筴燒笋炊香粒十年此樂發夢想忽然到眼難為
情上車欲去復回首那將莫境供浮名

遣興

小麥登場雨熟梅閉門病眼每慵開酒盃不解為愁
敵書卷纔開作睡煤骨朽空名垂斷簡家荒殘碣臥
蒼苔紛紛傾奪知何得老覺人間但可哀

雨後獨登擬峴臺

高城斷處閣橫空目力雖窮興未窮燕子爭泥朱檻
外人家曬網綠洲中誰能招喚三秋月我欲憑陵萬

里風更比峴山無湛輩論交惟是一枝筇
數日訴牒苦多億甚戲作

江南五月暑猶薄梅子正黃風雨惡庭中認獠不貸
人急甚常如虎遭縛空齋鼠迹留几塵賦詩飲酒疑
前身脫歸徑臥與壁語敢恨無人問良苦
與黎道士小飲偶言及曾文清公慨然有感

臨川稅駕忽數月嗜睡愛閑常閉門君詩始慙病僧
意吾道難為俗人言秋雨凄凄黃葉寺春風酣酣綠
樹村曾公九原不可作一尊破涕誦招魂
念歸

江城五月初莫雨兩腳纔收水流礎酒盃未把愁作
病塵柄欲拈誰共語有時暫解簿書圍獨坐藤床看
香縷林塘渺渺鴻正懽簾幙陰陰燕新乳湖山舊隱
入我夢白首忘歸獨安取一生花裏醉春風即今願
作扶犁翁

五月十一日夜且半夢從大駕親征盡復漢唐
故地見城邑人物繁麗云西涼府也喜甚馬上
作長句未終篇而覺乃足成之

天寶胡兵陷兩京北庭安西無漢營五百年間置不
問聖主下詔初親征熊羆百萬從鑿駕故地不勞傳
檄下築城絕塞進新圖排仗行宮宣大赦岡巒極目
漢山川文書初用淳熙年駕前六軍錯錦繡秋風鼓
角聲滿天昔者峯前盡停障平安火在交河上涼州
女兒滿高樓梳頭已學京都樣

雨夜

牆西泥三寸牆東草三尺可憐白鹿泉蛙黽紛狼籍
溼螢如隕星入戶黏几席病夫本嗜睡況此風雨夕
永懷灑西寺更憶山南驛陳迹不可追昏然墮吾憤

又

簷高雨聲壯堂豁霧氣入飛螢照畫棟相逐光熠燿
向來經春早蒼耳暗原隰微官又厚責撫事百憂集
三日雨不休四野苗盡立登高思賦詩簿書縛人急

焚香晝睡比覺香猶未散戲作
小屏煙樹遠參差吏散身閑與睡宜誰似爐香念幽
獨伴人直到夢回時

燕梁寂寂篆煙殘偷得勞生數刻閑三疊秋屏護琴
枕臥遊忽到瀟西山

仲夏小旱方致禱忽大雨連日江水爲漲喜而
有作

早苗垂槁歎何堪大雨誰知變立談翠麓青林吞欲
盡惡風白浪戰方酣江翻龜窟連雲澤雷挾龍腥起
雪潭從此年豐真少事炷香終日坐蒲龕

冒雨登擬峴臺觀江漲

雨氣分千嶂江聲撼萬家雲翻一天墨浪蹴半空花
噴薄侵虛閣低昂泛斷槎壯遊思夙昔乘醉下三巴

薤蕨草

露草煙蕪與砌平羣蛙得意亂疎更微涼要作安眠
地放散今宵鼓吹聲

蛺蝶詞

蛺蝶子去復來草長齊腰花亂開蜜蜂辛苦爲人計
林鶯百轉胡爲哉嗟爾蛺蝶獨得意飛來飛去無嫌
猜追花逐絮闌干角人生安得如汝樂

大雨踰旬既止復作江遂大漲

牆角蚊雷喧甲夜溼星昏昏出雲罅臨堂仰占久數
咤懸知龍君未稅駕行人困苦泥沒脍居人悲啼江
入舍便晴猶可望秋稼努力共禱城南社

又

一春少雨憂早暵熟睡秋潭坐龍懶以勤贖懶護其
短水浸城門渠不管傳聞霖潦千里遠榜舟發粟敢
不勉空村避水無雞犬茆舍夜深螢火滿民家避水多
依丘阜以小舟載米賑之

燒丹示道流

昔燒大藥青牛谷磊落玉床收箭鏃扶桑朝暾謹火

候仙掌秋露勤沐浴帶間小瓢鬼神衛異氣如虹夜
穿屋點成黃金棄山海揮手人間一裘足明年服丹
徑仙去洞庭月冷吹橫玉相逢只恐驚倒君毛髮甦
甦垂地綠

書感

半世狂疎踐駭機莫年持此欲安居會憑香火消前
業已築茆茨認昨非余村居築小軒以昨非名之薄俗慣
看翻覆手憂心空復倒顛衣煙蓑雪笠家風在送老

湖邊一釣磯

夏日

病退身初健時清吏更休渴蜂窺硯水慵燕息簾鉤
碁局每坐隱屏山時臥遊真成愛長日未用憶新秋

寄統

大兒挈藥囊小兒負書笈共作蘭亭遊詎必羣賢集
言此二十年白首終未踐汝復守荆扉經年不相見
楚越天一涯書疏何由頻諸弟亦可憐說兄輒酸辛
江城秋尚遠桐葉落可掃悵然懷故谿菱絲雨中老
自訟

家弊須徵祿年衰尚遠遊未逃朋友責更遣吏民羞
采藥思長住傳書却小留微風入桐葉分我一簾秋

夏日晝寢夢遊一院闌然無人簾影滿堂惟燕
踴筆致有聲覺而聞鐵鐸風響璆然殆所夢也

邪因得絕句

桐陰清潤雨餘天蒼鐸搖風破晝眠夢到畫堂人不
見一雙輕燕蹴筆竒

虛堂

暑氣虛堂一點無爽如秋露貯冰壺滄州未遽浮腫
艇碧井聊聽放轆轤肅肅清風生薤簟酣酣美睡付
紗幮惱人不奈奴兵輩環抱文書待日晡江西率以申
初治文書至莫夜乃已

夢仙

夢朝謁大官殿仰視去天甚近星皆大如月氣候清寒
如十月間時庚子六月一日也

中宵遊帝所廣殿綴仙官天逼星辰大霜清劍珮寒
賦詩題碧簡侍宴跨青鸞惆悵塵緣重夢殘更未殘

自嘲

夜作看花夢朝賦飲酒詩吾夢固忘矣詩亦聊自欺
荒園無佳花牽牛漫疎籬給酒月四斗官供酒月止四斗耳
一觴難屢持悲歡有定數未至誰得知願從大
鈞問一笑在何時

長歌行

燕燕尾涎涎橫穿乞巧樓低入吹笙院鳴鴨背啜啜
朝浮杜若洲莫宿蘆花夾嗟爾自適天地間將傳命
侶意甚閑我今獨何為一笑乃爾慳世上悲歡亦偶
然何時爛醉錦江邊人歸華表三千歲春入笠篔簹十

四絃

對酒

簷鐸鳴雜珮簾旌動微波我老懶讀書如此長日何
名酒來清江嫩色如新鵝奇菹映玉盤珍鮪開綠荷
萬事姑置之適然酣且歌宦遊亦何好且復小婆娑
秋風雲門道踏月捫青蘿

自詠

夢歸不恨故山深霜雪今年已滿簪報國有心身潦
倒養生無術病侵尋晨興聊取經遮眼夜坐時憑易
洗心安用更為逃暑飲虛堂三復自蕭森

夏日睡起

簾紋似秋水含風颯微漪帳幅如春煙縹緲不受吹
團扇墮枕邊皎皎素月暉非睡復非覺心定息自遲
茶熟我亦起寒泉掬珠璣浮瓜空把玩甚矣今年衰
所居堂極涼雖三伏常有秋意也偶得長句
高棟虛簷六月涼野人誰遣寄華堂炎威自避重重
幙清吹時生曲曲廊白芋出箱開疊雪甘瓜隨刃落
輕霜憑誰為報金羈客滿帽京塵有底忙

雨後露坐小酌

閉門誰與樂頽年旋掃桐陰近酒邊病久一春稀見

蝶雨多六月始聞蟬官倉求飽真聊爾山墅懷歸每
惘然從此讀書仍復懶惟留白眼望青天

日莫南窗納涼

冠蓋塵沙得我憎脫巾聊喜髮鬢髻素娥東湧行空
闌清吹南來掃鬱蒸團扇正閑看破墨矮牀軟臥怯
文藤扁舟歸去應尤樂莫羨金盤賜苑冰

中夜起登堂北小亭

幽人曳杖上青冥掠面風輕宿醉醒朱戶半開迎落
月碧溝不動浸疎星禽聲格磔頻移樹花影扶疎自
滿庭歎息明年又安往此身何啻似浮萍

登擬峴臺

顛顛思吳客淒涼擬峴臺一年秋欲到兩鬢老先催
身裊菱歌斷翩翩水鳥來倚闌哦五字未穩莫輕回
夜意

灑地移床曲檻前葛衣蕭爽接離偏庭空秋近露沾
草月落夜闌星滿天靜待微風停素扇旋消殘酒漱
寒泉翛然自與氛埃遠安用騎鯨學水仙
道院遣興

微官不復嘆頭顛

高棟虛窗樂有餘中夜塔鈴空際
語望秋庭樹月中疎飈吹青飯留巖客露點朱亭
玉書猶恨未成歸剡曲小舟閑采白芙蓉
夜行至白鹿泉上

小兩病良已

新秋夜漸長隔城聞鶴唳出戶逐螢光
荒徑穿蒙密遙空望莽蒼泉聲落環珮肝肺為清涼
堂中以大盆漬白蓮花石菖蒲翛然無復暑意
睡起戲書

海東銅盆面五尺中貯澗泉涵淺碧豈惟冷浸玉芙蓉
葉青青菖蒲絡奇石長安火雲行日車此間暑氣一
點無紗櫺竹簾睡正美鼻端雷起驚僮奴覺來隱几
日初午碾就壑源分細乳却拈燥筆寫新圖八幅冰
綃瘦蛟舞

初秋

閉門誰與樂頽年旋掃桐陰近酒邊病久一春稀見

溼螢相逐照高棟又見一年風露秋流落江湖常蹕
蹕掃平河洛轉悠悠簿書終日了官事尊酒何時寬
客愁擬倩天風吹夢去浩歌起舞散花樓

書懷絕句

不到天台三十年草菴猶記宿雲邊老僧曉出松門
去手挈軍持取澗泉

又

憶過棲賢見蜀僧雲堂十月冷生冰定回菽菽聞窗
雪一椀琉璃照佛燈蜀僧左慈海辨也

又

丈人祠西山谷盤麻姑洞前松欒寒仙翁欲覓渺無
處聞在青溪浴大丹仙翁謂謙先生

又

早佩黃庭兩卷經不應靈府雜羶腥憑君爲買金鴉
觜歸去秋山斷茯苓

又

未駕青鸞返帝鄉三江七澤路茫茫看山看水無程
數漁艇爲家文作糧

狂吟

浮世何須宇宙名一狂自足了平生秋風湘浦綉蘭
佩夜月綠山聽玉笙學劍慣曾遊紫閣結巢終欲隱
青城年來自笑彌耽酒百斛蒲萄未解醒

聞雨

潭底垂龍喚不響驕陽似欲敗西成虛堂永夜耿無
睡起聽四郊車水聲

初秋小疾効俳諧體

宿疾逢秋劇衰容逐日添專房一竹几列屋萬牙籤
今年傳書頗多遺悶憑清聖忘情付黑甜晚來風月好
一笑捲疎簾

雨後極涼料簡篋中舊書有感

日映小雨不至脯雨雖未足涼有餘細泉冷泠咽幽
竇清吹策策驚高梧笠澤老翁病蘇醒欣然起理西

齋書十年燈前手自校行間顛倒黃與朱區區樸學
老自信要與萬卷歸林廬爾來世俗喜變古鑿空飾
詐無根株慨然撫几三太息力薄抱恨何由祛蘭臺
漆書非己責且爲籤勝除蠹魚

秋夜

湖海秋初到房櫳夜轉幽露濃驚鶴夢月冷伴蛩愁
生計依微祿年光墮遠遊巖難已在眼早晚放孤舟
去年欲自三衢舟行泛七里溯歸山陰今竟當爲此行也

抄書

書生習氣重見書喜欲狂擣藥漬刺藤辛苦補散土
且作短檠伴未暇名山藏故家借籤帙舊友餉朱黃
借書于王韓晁曾諸家而呂周輔字文子友近寄朱黃墨 皇墳探
入索奇字窮二蒼儲積山崇崇探求海茫茫一笑語
兒子此是却老方

晚自白鹿泉上歸

坐穴藜牀愧未能酌泉聊喜曳枯藤詩從病後功殊
少酒到愁邊量自增事業何由垂竹帛笑談空覺負
交朋興闌却逐棲鴉返寂寞西窗已上燈

秋旱方甚七月二十八夜忽雨喜而有作

嘉穀如焚稗艸青沉憂耿耿欲忘生鈞天九奏蕭韶
樂未抵虛蒼瀉瀉雨聲

秋日小雨有感

七月江邊暑已微虛窗臥看雨霏霏淒涼蛩伴艸根
語憔悴鵲從天上歸志士酒酣看寶劍美人淚盡倚
鸞機嗟予亦有新秋感遙憶蒼苔滿釣磯

書李商叟秀才所藏曾文清詩卷後

隴蜀歸來兩鬢絲茶山已作隔生期西風落葉秋蕭
瑟淚灑行間讀舊詩

碧海行

碧海如鏡天無雲衆真東謁青童君九奏鏗鏘洞庭
樂八角森茫龍漢文共傳上帝新有詔蚩尤下統旄
頭軍徑持河洛還聖主更度遼碣清妖氛幽州蠃垓

一炬盡安用咸陽三月焚藝祖騎龍在帝左世上但策雲臺動

道院遺興

滿鏡新霜老可驚十年煙隴廢春耕黃絲黑黍有歸夢白髮蒼顏無宦情浮世不堪供把玩安心隨處是修行尚嫌未到無為地酷愛朝鐘莫磬聲

夜酌

遙夜燒愁賴麴生燈前忽見臥長瓶比紅有句狂猶在染白無方老已成園徑露螢粘溼艸塔簷風鐸亂疎更悲秋要是騷人事未必忘情勝有情

言懷

莫笑生涯似斷蓬向來諸俠避豪雄報仇使氣風塵裏吹竹彈絲錦繡中樂事眼看成昨夢倦遊心伏作衰翁論交尚喜筇枝在白鹿泉邊遡晚風

送客城西

倦客憑鞍半醉醒秋光滿眼歎頽齡日斜野渡放船小風急漁村攤網醒客思不堪聞斷雁詩情疆半在郵亭歸來更恨城笳咽烟火昏昏獨掩屏

兩夜

庭院蕭條秋意深銅爐一炷海南沉幽人聽盡芭蕉雨獨與青燈話此心

病中作

浮世寄酣枕勞生居漏船已悲身老大更著病沈綿親舊動千里歡娛無百年牀頭周易在端擬絕韋編

社日小飲

社日西風吹角巾一尊殢醉汝江濱杏梁燕子還堪恨歸去匆匆不報人

晚到東園

岸曠尋青士憑軒待素娥官身苦日短荒圃得秋多醉眼輕浮世羈懷激浩歌功名從踏蹬詩酒且婆娑

秋晚登擬峴望祥符觀

放翁局促留江干愛此樓前煙水寬雨昏同望殿突

兀秋晚剩覺山蒼寒中原未復淚橫臆故里欲歸身屬官雲外飛仙故不遠喚渠小為駐青鸞

秋思

黃落梧桐覆井牀莎根日夜泣寒蟄老生窺鏡鬢成雪俊鶻擊韝天欲霜破虜誰持白羽扇從軍曾擁綠沈槍壯心自笑何時豁夢遶祁連古戰場

病目廢書終日危坐

肺渴常止酒目昏復捐書蒲團坐袖手一窗寬有餘心知世緣薄分與鐘鼎疎澁然千仞淵養此徑寸珠光明照憂患何適不自娛白雲可與支晴空閑卷舒

感昔

常記東園按舞時春風一架晚薔薇尊前不展鴛鴦錦只就殘紅作地衣成都小東門外趙氏園

又

八陣原頭縱獵歸割鮮籍草酒淋漓誰知此夕西窗裏一盞青燈獨詠詩八陣原在成都廣漢之間

視陂至崇仁村落

津亭徙倚客衣單秋盡江南亦已寒雁翅不禁疎雨溼楓林初染早霞丹少年已歎儒冠誤莫境更知行路難倦馬歸來踏殘日長吟聊得寫憂端

馬上

客遊多感慨老病少歡欣去去穿村市翻翻吹帽羣天低落平野雁遠入寒雲漸覺江城近秋笳馬上聞

寄周洪道參政

半生蓬艇弄煙波最愛三湘欸乃歌擬作此行公勿怪胸中詩本漸無多

又

菱舟煙雨久思歸貪戀明時未拂衣乞與一城教睡足猶能覓句寄黃扉

北窗

白首微官只自囚青燈明滅北窗幽五更風雨夢千里半世江湖身百憂壯志已孤金鎖甲倦遊空攬黑

貂裘灞亭夜獵猶堪樂敢恨將軍老不侯
登擬峴

翠阜圍平野朱樓壓綠牆風回半汀雁雲護一天霜
有地聊容拙無方可療狂白頭詩興在吟罷意差彊

休日

賜休暫許養衰殘靜院翛然晝掩關釀酒移花調護
悶弄琴洗硯破除閑與人多忤讒消骨報國無功愧
滿顏一寸歸心向誰說小屏依約刻中山

別張教授歸獨登擬峴

小閣敞朱扉停車暫息機行人呼晚渡幼婦浣秋衣
霜樹欹危堞風鴉滿落暉登臨客愁裏況是送將歸
晚晴至索笑亭

中年苦肺熱贖喜見新霜登覽江山笑經行艸樹荒
堂空響棋子盞小聚茶香興盡扶藜去斜陽滿畫廊

新釀熟小酌索笑亭

新酒黃如脫殼鵝小園持盞暫婆娑文章不進技止
此仕宦忘歸人謂何宿業簿書昏病眼夢遊煙雨溼
漁蓑醉中笑向兒童說白髮今年添幾多

乾道初予自臨川歸鍾陵李德遠范周士送別
于西津是日宿戰平風雨終夕今自臨川之高

安復以雨中宿戰平悵然感懷

故人已作山頭土倦客猶郭陌上塵十五年間真一
夢又騎羸馬涉西津

十五年前宿戰平長亭風雨夜連明無端老作天涯
客還聽當時夜雨聲

村舍小酌

野性安衡茅傑屋愁耽耽上不補縣官下有肉食慚
雖非策雲驥實鄙作醜蠹失計不容悔漁蓑換朱藍
少壯尚可力老大真難堪今朝意頗豁村舍寄半酣
玉版烹雪筍金苞擘霜柑豈惟寫我憂亦以稅我驂
弄筆作一笑何用與客談逡巡上車去溼翠浮煙嵐

白塔道中乘臥輿行

小疾載臥輿獨飲亦薄醉朝離戰平館午過白塔市
清寒正宜賴搖兀更益睡所嗟下程早不得究此味
忽憶從軍時雪夜馳鐵騎壯心誰復識撫事有餘愧

宿城頭舖小飲而睡

亭傳臨江泝牀敷息我勞屋茅殘月冷庭樹北風塵
虛市饒新兔村場有濁醪氣衰仍病著小飲不能豪

豐城村落小憩

霜信催寒力尚微郵亭繫馬旋添衣平郊極目冬耕
遍小婦簪花晚餉歸孤宦每隨征雁遠故人已似曉
星稀上書自劾真須猛菰正堪炊蟹正肥

再題

發豐城縣

柴門數頃秋半日爲遲留老驥厭伏櫪飢鷹思下韉
野橋危欲斷山雨落還收何許丹青手端能寫此愁
豐城古縣已再遷出郭十步江渺然冷雲四合欲下
雪柔櫓數聲初放船孤村燈火照破驛客子何以娛
今夕不辭金盃醉十分要看玉花深一尺

歸 豐城高安之間憩民家景趣幽邃爲之慨然懷

宿華嚴寺

數家聚雲根細路入叢薄濺濺石渠水來往一略約
有無鄰里通笑語婦子樂濁醪時相就青蔬缺鹽酪
日莫歸閉門續火星煜燐先期畢租稅老不入城郭
嗟予獨何事早插紅塵脚故山未成歸悵望有餘忤

寄華嚴寺

夜宿華嚴寺人扶到上方喚僧同看畫避佛旋移牀
小雨不成雪烈風還作霜鍾殘燈漸暗跌坐默焚香

寄奉新高令

小爾催寒著客袍艸行露宿敢辭勞歲饑民食糟糠
窄吏情官倉鼠雀豪只要閭閻寬筆楚不須亭障肅
弓刀九重屢下丁寧詔此責吾曹未易逃

高安州宅三詠

丹井神仙李八百煉丹處

丹成人已仙遺竈亦已平尚餘松根井鏘然環玦聲
我來試一覷橋面還童嬰祝君勿關鑰人人遣長生
井有闌楯護之

劍池李八百洗劍處

我壯喜學劍十年客峨岷毫髮恐未盡屠釣求隱淪
今年獨何幸見此度世人夜深來較術雷雨戰江津
偃松

巨松偃青蓋闕世歸獨存頗疑古仙翁藏丹在其根
或是結靈藥百尺有伏龍終隨風雨化不死何足言
與高安劉丞遊大愚觀壁間兩蘇先生詩

野性縱壑魚官身墮奔虎適得建溪春頗憶松下翁
微霜初變寒短景已過午佳客能聯翩老宿相勞苦
懷哉兩蘇公去日不可數泉局一埋玉世事幾炊黍
吾儕生苦晚佇立久惻楚尚想來遊時黃鍾賡大呂

劍南詩稿目錄

卷第十三

宿黃僊觀兵火焚蕩之餘惟一殿突兀猶在黃
僊蓋與許旌陽同時飛昇者 玉隆得丹芝

贈西山老人 病酒宿土坊驛 十一月十七
日蔬飯驛嶺小店 進賢驛感懷 入臨川境

馬上作 別楊秀才 發臨川 早行 白干
舖別傳用之主簿 過茶黃舖青松朱戶前臨

大道絕似西陲亭驛悵然有作 青溪道中行
古松間因少留滄茶而行 弋陽縣江上書觸

目 乾封驛早行 過江山縣浮橋有感 衢
州早行書懷 杭頭晚興二首 行至嚴州壽

昌縣界得請許免入奏仍除外官感恩述懷
桐廬縣泛舟東歸 予欲自嚴買船下七里難

謁嚴光祠而歸會難淺陸行至桐廬始能泛江
因得絕句二首 漁浦二首 蕭山 辛丑正

月二日雪 正月二十八日大雪過若耶溪至
雲門山中 雪中登雲泉上方 衝雪至餘慶

覺林雪連日不止 大雪歌 雪霽歸湖上過
千秋觀少留 二月四日作 新築山亭戲作

春晴出遊 題山家壁 春晚風雨中作
北窗 山中晚興 夜登山亭 西村醉歸

自詠 閒中頗有四方之志偶得長句 遣興
二首 醉題 小園四首 步虛四首 醉中

登避俗臺 立秋前三日夜坐庭中偶賦 南
堂臥觀月 夜坐獨酌 夜興 月夜泛小舟

湖中三更乃歸 無題二首 自山中夜行還
湖上 大風 新秋 月夕睡起獨吟有懷建

康參政 病瘧後偶書 秋日聞蟬 感秋
南軒 夜坐 新涼書事 聞蟬思南鄭 憶

昔 病中夜興 秋夜 謝張時可通判贈詩
編 酬莊器之賢良見贈 舟過樊江聽民家

具食 舟中作 九月三日泛舟湖中作 霜
天晚興 九月六日小飲醒後作 書悲二首

中夜起出門月露浩然歸坐燈下有賦 新
寒 幽居 醉中步月湖上 東村 西村

題張幾仲所藏醉道士圖二首 山園坤間菊
數枝開席地獨酌 湖村月夕四首 卯酒徑

醉走筆 山中望籬東楓樹有懷成都 莫秋
有懷王四季夷 幽居 有懷 對酒 初冬

晝寢夢一客相過若有舊者夷粹可愛既覺
作絕句記之 書數 督下麥雨中夜歸 霜

曉肩輿行湖上 杜門 橫塘 書事寄良長
老 食齋十韻 冬暖頗有春意追憶成都昔

遊悵然有作 忽忽 醉書山亭壁 十月日
日至近村 蔬圃絕句七首 冬夜不寐至四

鼓起作此詩 蔬圃 夢中作 村居酒熟偶
無肉食煮菜羹飲酒 辛丑十月諸公餽酒偶

及百榼戲題長句 灌園 幽居 日出入行
午醉徑睡比覺已甲夜矣 簡蘇訓直判院

莊器之賢良 醉眠曲 冬夜二首 夜話贈
華師 臥病書懷 病中絕句六首 蔬園雜

詠五首 卯飲醉臥枕上有賦二首

劍南詩稿卷第十三

宋陸游務觀

宿黃僊觀兵火焚蕩之餘惟一殿突兀猶在黃僊蓋與許旌陽同時飛昇者

拔宅翛然上碧虛神僊豈亦愛吾廬重門不改雲山色古殿猶存劫火餘翠木蕭森高蔽日黃冠貧窶自哇蔬殘年安得長來此一椀松肪讀隱書

玉隆得丹芝

何用金丹九轉成手持芝艸已身輕祥雲平地擁笙鶴便自西山朝玉京

贈西山老人

生世不把筆殘年惟灌園賃春來並舍賣晝到前村勤苦供租稅清貧遺子孫從來棲遁志剩欲與翁言

病酒宿土坊驛

少時見酒喜欲舞老大畏酒如畏虎一日飲酒三日病客路那堪夜聞雨兩聲蕭蕭宿空堂不寐始知更漏長賣藥思從伯休隱愛花却笑拾遺狂

十一月十七日蔬飯驛嶺小店

新杭炊飯白勝玉枯松作薪香出屋水蔬雪菌競登槃瓦鉢氈巾俱不俗曉途微雨壓征塵午店清泉帶脩竹建谿小春初出碾一碗細乳浮銀粟老來畏酒厭芻豢却喜今朝食無肉尚嫌車馬苦糜人會入青雲騎白鹿

進賢驛感懷明日當歸至臨川

環走幾千里馳歸亦再旬征途鏡感慨認牒費精神風雪常欺客文章本謾身小詩無傑思猶得當吟呻

入臨川境馬上作

投老糜身簿領間却因馬上得偷閑兼旬敢恨常為客一飯何曾不對山銅鏡無情欺白髮霜風有力散酡顏今宵要看浮橋月儘放征驂晚入關

別楊秀才

歲莫江頭又語離淡煙衰艸不勝悲俗人憤憤寧知子心事悠悠欲語誰燈暗想傾澆悶酒路長應和贈行詩人生但要身彊健一笑相從自有時

發臨川

見客道傍店添衣江上村陂長風浩浩山遠霧昏昏虛日人聲合凶年菜色繁扶衰歸北闕何以報君恩

早行

江路迢迢馬首東臨川一夢又成空日高未泫晨霜白風勁先消卯酒紅山市人經饑饉後孤生身老道途中著身穩處君知否射的峯前臥釣篷

白干舖別傅用之主簿

我行忽百里送客亦已空傅子獨眷眷日莫隨此翁謝之不肯去瘦馬衝北風泥濘及馬臆霜飛逼裘茸茅店得小語慨然念年凶不作兒女悲道義相磨礪我歸亦何為魚鳥愁池籠君乃臺閣人鸞鳳儀笙鏞若耶遶青山子艸堂在若耶溪上天祿摩蒼穹此別各努力出處何必同

過茱萸舖青松朱戶前臨大道絕似西陲亭驛悵然有作

茱萸小驛夕陽愁搔首臨風感舊遊渾似軍行散關路但無鼓吹動涼州

青溪道中行古松間因少留淪茶而行

露溼青松細細香旋呼拄杖踏斜陽三生舊發遊山願一卷新傳辟穀方雲外未論笙鶴近塵中實厭簿書忙拾樵汲澗俱清絕聊為煎茶一據牀

弋陽縣江上書觸目

縣前奇哉一江水日莫風吹碧鱗起客恨征塵忽如洗不用金篋刮眸子丹楓岸邊雪色蘆下有老翁方捕魚欲求妙思貌畫圖王維鄭虔今世無

乾封驛早行

己已被驛書乙亥戒徂兩扶衰犯霜露疲憊不可狀

夜行星滿天晨起雞初唱
檣枝燒代燭凍菜擷供餉
三年走萬里天幸苟亡恙
深知賦材薄自笑得名妄
宣溫望玉座何以待諮訪
春江色如藍歸舟行可榜
過江山縣浮橋有感

堪笑行人日日忙
又扶衰病過浮梁
難流急處水禽下
桑葉空時村酒香
枯枿敢懷貪雨露
飢鴻自憫犯風霜
宦途商略無安處
早晚歸耕剡曲旁

衢州早行

隣雞已三號殘燭無一寸
參差發行棗迢遞望前頓
滿靴霜若雪破面風抵刃
敢辭行路難漸喜京邑近
少年奉朝請親見堯授舜
飄然如脫葉蹭蹬垂七閩
風埃暗征袍歲月集衰鬢
餘生迫歸休周行愧英俊

杭頭晚興 嚴州

山色蒼寒野色昏
下程初閉驛亭門
不須更把燒愁酒
行盡天涯慣斷魂

又

落葉孤村晚下程
癡雲殘日半陰晴
篝爐火煖牀敷穩
臥聽黃鸝穀穀聲

行至嚴州壽昌縣界得請許免入奏仍除外官
感恩述懷

曉傳尺一到江村
拜起朝衣漬淚痕
敢恨帝城如日遠
喜聞天語似春溫
翰林惟奉還山詔
湘水空招去國魂
聖主恩深何力報
時從天末堊修門

桐廬縣泛舟東歸

桐江艇子去乘月
笠澤老翁歸放慵
一尺輪困霜蟹美
十分湊灑社醅濃
宦遊何啻路九折
歸臥恨無山萬重
醉裏試吹蒼玉笛
為君中夜舞魚龍

予欲自嚴買船下七里灘
謁嚴光祠而歸會難

淺陸行至桐廬始能泛江
因得絕句

客星祠下渺煙波
欠我扁舟舞短蓑
不為窮冬怕灘

惡正愁此老笑人多

又

桐廬縣前鶻聲急
蒼煙茫茫白鳥雙
亂山日落潮未落
勝絕不減吳松江

漁浦

桐廬處處是新詩
漁浦江山天下稀
安得移家常住此
隨潮入縣伴潮歸

又

漁翁持魚叩舷賣
炯炯綠瞳雙臉丹
我欲從之遊已遠
菱歌一曲莫江寒

蕭山

素衣已免染京塵
一笑江邊整幅巾
入港綠潮深蘸岸
披雲白塔遠招人
功名姑付未來劫
詩酒何孤見在身
會向桐江謀小築
浮家從此往來頻

辛丑正月三日雪

開歲尚殘冬佳哉
雪意濃潤歸千里
麥聲亂五更鍾簾
隙收初密牆隅積
已重龍團笑羔酒
狐腋襲駝茸危檻
臨歌竹幽窗聽墮
松忽思西戌日憑
堞待傳烽予從戎
日嘗大雪中登興
元城上高興亭待
平安火至

正月二十八日大雪過若耶溪至雲門山中

山中看雪醉騎驄
曉清賞真成十載
無高壓孤峯增峭
絕斜傾叢竹失枝
梧松助火暖眠僧
榻芋糝羹香擁地
爐病骨雖癯猶健
在未應遽作以遊
圖

雪中登雲泉上方

滄滄雲堆上茫茫
雪海中煎茶誇坐
客打竹課蠻童水
谷鳴飢鶴煙汀立
斷鴻歸來更堪喜
葑火滿爐紅僧以
封為火

衝雪至餘慶覺林雪連日不止

策蹇清吟涉若耶
灞橋猶恨近京華
山前千頃誰種玉
座上六時天散花
林雀無聲溪約斷
炊煙不動竹籬斜
勝遊更覺平生少
未羨銀河泛客槎

大雪歌

若耶溪頭朝莫雪
鴉鵲墮死長松折
橫飛忽已平屐齒
亂點似欲妝簾額
放翁憑閣喜欲顛
摩娑拄杖向

渠說莫辭從我上嵯峨此景與子同清絕銀盃拌蜜
非老事石鼎煎茶且時啜題詩但覺退筆鋒把酒未
易生耳熱扶衰忍冷君勿笑報國寸心堅似鐵漁陽
上谷要一行馬蹄踏踏河水裂

雪霽歸湖上過千秋觀少留

縱轡不嫌遠逢山猶一登夕陽陂渺渺殘雪塔層層
折竹橫遮道飢鳥下啄冰欲歸還小駐倚杖對峻嶒
二月四日作

早春風力已輕柔瓦雪消殘玉半溝飛蝶鳴鳩俱得
意東風應笑我閑愁

新築山亭戲作

危檻凌風出半空怪奇造化欲無功天垂綠白縈青
外人在紛紅駭綠中日月匆匆雙轉轂古今杳杳一
飛鴻酒酣獨臥林間石未許塵寰識此翁

春晴出遊

一春彊半病頗廢山澤遊今晨忽良已風日亦清柔
朝飡具冷餅瘦骨辭重裘穉荷出溝港芳杜滿汀洲
勿言酒苦薄一笑失百憂且當詠尋壑詎必賦登樓

題山家壁

山中無傳漏猿鳴知既夕芳藤上幽援素月照高壁
主人殊喜事歡若有夙昔稚子擎竹漿炊黍持銅客
卜隣雖未辨清嘯聊自適衰病久廢詩筆端數荆棘

春晚風雨中作

箕踞藜牀岸幅巾何妨病酒住湖濱駕風浪作連三
日掃地花空又一春樂事清宵當秉燭畏途平地有
推輪類然耐辱君無怪元是人間澹蕩人

北窗

九陌黃塵早莫忙幽人自愛北窗涼清吟微變舊詩
律細字閑抄新酒方艸木扶疎春已去琴書蕭散日
初長破羌臨罷楮頭久又破銅匱半篆香

山中晚興

薄酒亦陶然偃蹇澗石側巾墮拄杖橫意象頗自得

青山受落日忽作玻璃色躊躇不忍去下磴天已黑
夜登山亭

飛觀崢嶸天宇寬幽人半醉凭闌干三山渺渺鸞鶴
遠七澤茫茫蓑笠寒清吹拂林橫玉笛紫雲覆鼎熟
金丹童顏綠鬢無人識回首塵寰一夢殘

西村醉歸

俠氣崢嶸蓋九州一生常恥爲身謀酒寧剩欠尋常
債劍不虛施細碎鱗 見孟東野詩 岐路凋零白羽箭
風霜破弊黑貂裘陽狂自是英豪事村市歸來醉跨
牛

自詠

二十年前接俊遊即今身世寄滄洲俚聲不辦諧韶
護莫氣寧能徹斗牛綠酒可人消永日黃鸝多事管
閑愁吹笙跨鶴何時去剩欲平章太華秋

閑中頗有四方之志偶得長句

世論紛紛枉見仇吾身自計本悠悠讀書漸懶惟思
睡壓酒初成不怕愁蜀棧冷雲侵瘦馬楚江籠月繫
孤舟興來會作飄然去更續騷人賦遠遊

遣興

綠髮凋零白髮多山林未死且婆娑無端忤俗坐狂
耳甚欲讀書如懶何雨過亂葦堆野艇月明長笛和
菱歌此中得意君須領莫愛車前印幾窠

又

遠簷新葉著啼鶯睡起東窗一榻橫愁衰來疑有
約春堂堂去恨無情鶻飛局上新棋勢龍吼牀頭古
劍聲莫歎柴荆無客到綠尊還對莫山傾

醉題

坎止流行五十秋曾中不解著閑愁浩歌野渡鷺雲
起狂舞空庭挽月留性本自然憎截鶴器非大受愧
函牛平生最愛嚴難路早晚貂裘換釣舟

小園

小園煙艸接鄰家桑柘陰陰一徑斜臥讀陶詩未終

卷又乘微雨去鋤瓜

又

歷盡危機歌盡狂殘年惟有付耕桑麥秋天氣朝朝
變蠶月人家處處忙

又

村南村北鶉鳴聲水刺新秧漫漫平行遍天涯千萬
里却從隣父學春耕

又

少年壯氣吞殘虜晚覺丘樊樂事多駿馬寶刀俱一
夢夕陽閑和飯牛歌

步虛

微風吹碧海細細生龍鱗半醉騎一鶴去謁青華君
歸來天風急吹我過嶽山鏘然哦詩聲清曉落人間
人間仰視空浩浩遠孫白髮塵中老初見姬翁禮樂
新千九百年如電掃

又

瀛海日月淵蓬壺仙聖宅駕鶴一時遊海面日夜窄
人生蜉蝣耳一闕瓦甕中天地廣如許誰能發其蒙
丹書千卷藏一塵子能求之勿從人晴窗跌坐春滿
腹崑崙待得丹芝熟

又

曩者過洛陽宮闕侵雲起今者過洛陽蕭然但荒壘
銅駝臥深棘使我惻愴多可憐陌上人亦復笑且歌
世事茫茫幾成壞萬人看花身獨在北邙秋風吹野
蒿古冢漸平新冢高

又

一瓢小如蘭芳醪溢其中醉此一市人吾瓢故無窮
不言術神奇要是心廣大觴豆有德色笑子乃爾監
岳陽樓中橫笛聲分明爲子說長生金丹養成不自
服度盡世人朝玉京

醉中登避俗臺

半醉行歌上古臺脫巾散髮謝氛埃但知禮豈爲我

設莫管客從何處來剡曲煙波菱蔓滑耶溪風露藕
花開老來世事渾成癩一權幽尋未擬回

立秋前三日夜坐庭中偶賦

絳闕清都待宴還天風搖珮夜珊珊月輪桂滿蟾初
冷星渚橋空鷓尚閑一鶴每臨雲雨上幾人虛老市
朝間試將綠髮窺清鏡未愧僂僂玉鍊顏 李文饒詩云
河漢女玉鍊顏雲辮往住到人間

南堂臥觀月

河漢橫斜星宿稀臥看涼月入窗扉恍如北戍梁州
日睡覺清霜滿鐵衣

夜坐獨酌

玉宇沉沉夜向闌跨空飛閣倚高寒一壺清露來雲
表聊爲幽人洗肺肝

夜興

鶴瘦龜飢與靜宜更闌徙倚竝清池月當三五初盈
夜河直西南欲落時浩浩醉歌羣鷺起翩翩孤影角
巾歌飛僂授我青瑤簡索賦山中夜興詩

月夜泛小舟湖中三更乃歸

落日愁思把釣鉤南隣借得采菱舟湖心月上明如
畫樹杪風生冷逼秋壯歲功名慚汗馬莫年心事許
沙鷗桐江一葉真奇策莫爲兒曹作滯留

無題

半醉凌風過月旁水精宮殿桂花香素娥定赴瑤池
宴侍女皆騎白鳳凰

又

出繭脩眉淡薄妝丁東環佩立西廂人間浪作新秋
感銀闕瓊樓夜夜涼

自山中夜行還湖上

火雲嶂嶻水車鳴行人畏熱不敢寧蕭然一馬兩園
丁缺月照我影伶俜荒鷄起早忽再唱北斗低盡餘
三星扁舟菱歌正嫋嫋叢豕鬼火何熒熒迎人漸見
鏡湖白回首已失秦山青道邊野店得小憩一盃濁

酒傾殘瓶登盤絕愛畦韭美轅金未厭路鱗腥丈夫
所要飽辛苦文叔尚困蕪蕪亭

大風

今年毒熱不可支白汗如雨愁織綺皇天悔福爲一
洗秋風作意來如期聲如怒濤撼坤軸夜半折我南
齋竹幽人晨起得奇觀鳳尾襪襪一窗綠

新秋

天河漸近鷓橋時一夜風吹斗柄移金井梧桐元未
覺畫廊蟋蟀已先知青燈耿耿還相伴白髮蕭蕭只
自悲猶勝玉門關外客臥聽沙雁數歸期

月夕睡起獨吟有懷建康參政

月上虛堂一榻橫斷香漠漠欲三更隔簾清露挾秋
氣繞樹驚鴉啼月明只怪夢尋千里道不知愁作幾
重城苦吟更恨知心少西望金陵闕寄聲

病瘧後偶書

秋色已蕭然曲肱清夜眠孤燈欺病後薄酒慰愁邊
藥物從人乞文章畏客傳惟應一蓬艇湖海送凋年
秋日聞蟬

感秋

斷角斜陽觸處愁長亭搔首晚悠悠世間最是蟬堪
恨送盡行人更送秋

南山射虎漫豪雄投老還鄉一禿翁世味掃除和蠟
盡生涯零落併誰空秋驚蠹葉凋殘綠病著衰顏失
舊紅笠澤松陵家世事一竿惟是待西風

南軒

今年秋早涼七月已蕭然南軒修竹下枕簟終日眠
時將半殘夢聽此欲斷蟬推枕起太息四序忽已遷
功名墮渺莽衰疾方沈緜新月獨多情窺窗澹娟娟

夜坐

虛堂夜無寐顧影歎吟嬾露溼螢黏艸雲迷雁落汀
舊書開蠹簡濁酒倒殘餅流落知無憾危機實飽經
新涼書事

臥看烏篆印蒼苔窗戶涼生亦樂哉鳴樹亂蟬催日
落拂墻飛葉報秋來病餘已覺身如寄醉裏却憐心
尚孩排日從今占幽事折殘籬菊探溪梅

聞蟬思南鄭

昔在南鄭時送客褒谷口金羈叱撥駒玉盃蒲萄酒
醉歸涉漾水鳴蟬在高柳回鞭指秦中所懼壯心負
人生豈易料踏踏十年後蟬聲恍如昔而我已白首
逆胡亡形具輿地淪陷久豈無好少年共取印如斗

憶昔

憶昔浮江發劍南夕陽船尾每相銜補陰暗處尋高
寺荔子紅時宿下巖高寺在瀘州下巖在雲安軍 硤口烹
猪賽龍廟沙頭伐鼓挂風帆區區陳迹何由記惟有
征塵尚滿衫

病中夜興

病瘧秋來久未平艸堂遙夜不勝清疾風遞響驚林
葉列宿收芒避月明百計不能逃白髮一生堪笑役
虛名釣車且作桐江夢莫念安西萬里行

秋夜

秋氣侵帷夢不成一燈西壁翳還明風高露井無桐
葉雨急煙村有雁聲擊筑誰同燕市飲賃春方作會
稽行從來自許知何等堪歎江湖白髮生

謝張時可通判贈詩編

聖朝中興六十年君家文武何聯翩先生劍履冠麟
閣後嗣馨橐陪甘泉流傳到君愈卓犖投我千篇皆
傑作未分玉帳萬籟絃且擅詩人一丘壑爾來士氣
日靡靡文章光燄伏不起君今已似驥籟雲更看他
年鯤擊水

酬莊器之賢良見贈

先朝六科親策士事業功名何壯偉元祐復科財數
年所得四三俄復止中興思賢形夢想屢認自是朝
廷美統袴小兒壞人事賜帛西歸困嘲詆諸公相視
歎才難一士臥雲誰挽起跨驢過我時共語晁董千

年元不死高談疊疊有脈絡橫得虛名吾可恥烏巾
白紵塞路衝砥柱頽波望吾子

舟過樊江憩民家具食

旅食何妨美蕨薇夕陽來叩野人扉蕭蕭短鬢秋初
冷寂寂空村歲薦饑蓼岸刺船驚雁起煙波吹笛喚
牛歸詩情剩向窮途得踏蹀人間未必非

舟中作

斷岸欹檣鯨清波跳險囓紅橋未斜日白塔已昏鐘
詩律與年邁客愁如酒濃宋公題壁處橫靄抱孤峯
稱心寺有宋考功詩而予未到蓋之慨然

九月三日泛舟湖中作

兒童隨笑放翁狂又向湖邊上野航魚市人家滿斜
日菊花天氣近新霜重重紅樹秋山晚獵獵青帝社
酒香隣曲莫辭同一醉十年客裏過重陽予自庚寅至

辛丑始見九日于故山

霜天晚興

薄霜門巷不勝清小立湖邊夕照明紅穎帶芒收晚
稻綠苞和葉摘新橙閑評琴價留僧話靜聽松聲領
鶴行壯志消磨渾欲盡西風莫動玉關情

九月六日小飲醒後作

短劍悲秦俠高歌憶楚狂酒醒愁袞袞香冷夢悵悵
屋老垣衣茂池深石髮長地爐須早計衰病怯新霜

書悲

今日我復悲堅臥腳踏壁古來共一死何至爾寂寂
秋風兩京道上有胡馬跡和戎壯士廢憂國清淚滴
關河入指顧忠義勇推激常恐埋山丘不得委鋒鏑
立功老無期建議賤非職賴有墨成池淋漓豁胸臆

又

丈夫孰能窮吐氣成虹霓釀酒東海乾累麴南山齊
平生舉旗手頭白歸扶犁誰知蓬窗夢中有鐵馬嘶
何當受詔出函谷封丸泥築城天山下北開府蕭關西
萬里掃塵煙二邊無鼓擊此意恐不遂月明號荒雞

中夜起出門月露浩然歸坐燈下有賦

月白萬瓦霜露重四山雨開門忽驚數秋色已如許
去蜀如昨日坐閱四寒暑無才屏朝蹟有罪宜野處
平生萬里心收斂臥環堵朱顏逝不留白髮生幾縷
人言尺蠖屈要有黃鵠舉功名非老事歲晚忍羈旅

新寒

病法新寒欲不禁南窗擁褐夜惜惜江湖跌宕送餘
日書劍蕭條孤壯心杜曲新愁隨斷雁遼陽遺恨入
疎砧此懷擬向何人說賴有昏燈伴苦吟

幽居

松陵甫里舊家風晚節何妨號放翁衰極睡魔殊有
力愁多酒聖欲無功一編蠹簡晴窗下數捲一作掩
疎籬落木中退士所圖惟一飽諸公好為致年豐

醉中步月湖上

閨餘時節早天氣已凄冷悠悠曳杖行樂此清夜永
霜風鏤病骨林月寫孤影新詩得復忘薄酒吹易醒
浮生役聲利百歲常鼎鼎清遊倘可繼終老謝人境

東村

塘路東頭烏柏林偶攜藤杖得幽尋桃源阡陌自來
往輞口雲山無古今遠浦過帆供極目莫天橫雁入
微吟歸來更覺愁無那剩放燈前酒椀深

西村

湖塘西去兩三家杖履經行日欲斜慶慶水紋生細
穀蜿蜿沙路臥修蛇旱餘蟲鏤園蔬葉寒寒淺蜂爭野
菊花老去郊居多樂事脫巾未用數蒼華

題張幾仲所藏醉道士圖

千載風流賀季真畫圖髣髴見精神邇來祭酒皆巫
祝眼底難逢此輩人

又

臥聽牀頭壓酒聲起行籬下摘新橙一尊久欠敲門
客風味何人似麴生
山園艸間菊數枝開席地獨酌

屋東菊畦蔓艸荒瘦枝出艸三尺長碎金狼藉不堪
摘掃地爲渠持一觴日斜大醉叫墮墮野花村酒何
曾擇君不見詩人跌宕劍如此蒼耳林中留太白

湖村月夕

客路風塵化素衣閑愁冉冉鬢成絲平生不負月明
處神女廟前聞竹枝

又

錦城曾醉六重陽回首秋風每斷腸最憶銅壺門外
路滿街歌吹月如霜

又

金尊翠杓猶能醉狐帽貂裘不怕寒安得驂騑二萬
疋月中鼓吹渡桑乾

又

誰持綠酒醉幽人鶴警筇枝發興新今夜湖邊有奇
事青山缺處涌冰輪

卯酒徑醉走筆

少時憑酒剩狂顛摘宿緣雲欲上天才盡氣衰空自
笑一盃纔放已頽然

山中望籬東楓樹有懷成都

五門西角紅樓下一樹丹楓馬上看回首舊遊如夢
裏西風吹淚倚闌干

莫秋有懷王四季夷

鏡湖西畔小茅茨紅葉黃花秋晚時天闊素書無雁
寄夜闌清夢有燈知功名踏蹬初何憾朋舊乖離未

免悲遙想扁舟五湖口阻風中酒又成詩

幽居

老子堪吟老轉癡幽居喜及早寒時芋魁加糝香出
屋菰首芋羹甘若飴

菰首菜白也

顛倒朱黃思誤字

縱橫黑白戲拈棋此懷敢向今人說骨朽諸賢却見

有懷

筇杖斜倚素屏北窗遙夜冷如冰何時得與平生

友作字觀書共一燈

對酒

醫從和扁來未著却老方吾晚乃得之莫如麴蘗良
一盃臉生春況復累十觴坐令桃花紅換盡霜葉黃
看鏡喜欲舞追還少年狂但恨寶釵樓胡沙隔咸陽
芳華雖無恙萬里遙相望

初冬

鉏犁滿野及冬耕時聽兒童叱犢聲逐客固宜安散
地閑民何幸樂昇平雪花漫漫蓄將熟綠葉離離薺
可烹飯飽身閑書有課西窗來趁夕陽明

絕句記之

畫寢夢一客相過若有舊者夷粹可愛既覺作
夢中何許得嘉賓對影胡牀岸幅巾石鼎烹茶火煨

栗主人坦率客情真

書數

多病文園苦滯留時時浩歎攬貂裘縱無夜雨何曾
寐不爲秋風也自愁今歲頓驚絲鬢改此生難繼錦

江遊欲談舊事無人共日落鴉歸又倚樓

督下麥雨中夜歸

細雨闌村墟青煙溼廬舍兩兩犢並行陣陣鴉續下
紅稠水際蓼黃落屋邊柘力作不知勞歸路忽已夜

犬吠闌籬隙燈光出門罇豈惟露沾衣乃有泥沒膝
誰憐甫里翁白首學耕稼未言得一飽此段已可畫

霜曉肩輿行湖上

去去出柴關巾車古陌間晨霜染丹葉宿霧淡青山
登覽身猶健歌呼酒每慳殷勤鏡湖水聊爲照衰顏

杜門

寂寞山深處崢嶸歲莫時燒灰除菜蝗

遲莫少新知

橫塘

橫塘南北埭西東拄杖飄然樂未窮農事漸興人滿野霜寒初重雁橫空參差樓閣高城上寂歷村墟細雨中新買一蓑苔樣綠此生端欲伴漁翁是日偶買蓑衣甚妙

書事寄良長老

素屏烏几野人廬山色蒼寒十月初雨足四郊耕欲遍霜高萬木脫無餘一尊窗下澆愁酒數卷牀頭引睡書寄語住菴劉老宿不應隨俗向人疎

食薺十韻

舍東種早韭生計似庾郎舍西種小菓戲學蠶叢鄉惟薺天所賜青青被陵岡珍美屏鹽酪耿介凌雪霜采擷無闕日烹飪有祕方候火地爐煖加糝沙鉢香尚嫌雜筍蕨而沉汗膏梁炊菰及鷲麩得此生輝光吾饒寶易足捫腹喜欲狂一掃萬錢食終老稽山旁

冬煖頗有春意追憶成都昔遊悵然有作

濯錦江邊罨畫樓金鞭曾護犢車遊紛紛萬事反乎覆落落一身淹此留刻燭賦詩空入夢傾家釀酒不供愁探春歌吹應如昨亦有朋儕記我不

忽忽

忽忽復悠悠頻驚歲月遁若無船貯酒將奈斛量愁列炬燕宮夜成都故蜀時燕王宮今屬張氏海棠為一城之冠呼鷹漢廟秋南鄭漢高帝廟予從戎時多獵其下湘年莫多

感夢境付滄洲

醉書山亭壁

物外陽狂五百年扁舟又繫鏡湖邊飛昇未抵簪花樂遊宦何如聽雨眠綠蟻灑尊芳醞熟黑蛟落紙州書顛忽拈玉笛橫吹去說與傍人是地仙

十月日日近村

鴨脚葉黃烏白丹艸煙小店風雨寒荒年人家鷄黍走芋羹豆飯供時節村童上牛踏牛鼻吹笛聲長入雲際今年雖飢却少安縣吏不來官放稅

蔬圃絕句

擬種蕪菁已是遲晚菘早韭恰當時老夫要作齋盂備乞得青秧趁雨移

又

百錢新買綠蓑衣不羨黃金帶十圍枯柳坡頭風雨急憑誰畫我荷鉏歸

又

青青蔬甲早寒天想像登盤已墮涎更欲鉏畦向東去園丁來報竹行鞭

又

瓦壘浮屠益作池池邊紅蓼兩三枝貪看忘却還家飯恰似兒童放學時

又

小橋只在槿籬東溝水穿籬曲折通煙雨空濛最堪樂從教打溼敗天公

又

衝雨衝風不怕寒晚來日出短蓑乾遶畦拾塊真為樂莫作陶公運甓看

又

懶隨年少愛花狂且伴羣兒鬪草忙行遍山南山北路歸時新月浸橫塘

冬夜不寐至四鼓起作此詩

秦吳萬里車轍遍重到故鄉如隔生歲晚酒邊身老大夜闌枕畔書縱橫殘燈無焰穴鼠出槁葉有聲村犬行八十將軍能滅虜白頭吾欲事功名高麗有讖云當有八十老將平之李英公實膺是讖

蔬圃

山翁老學圃自笑一何愚曉瘠財二畝勤劬賴兩奴正方畦畫局微潤土融酥翦闢荆榛盡鉏犁磊塊無過溝橫略約聚甃起浮屠拾園中瓦礫作小塔隙地成瓜援餘功及芋區如絲細生菜似鴨爛蒸壺此事今真辦東歸不為鱸

夢中作

拓地移屯過酒泉第功圖像上凌煙事權皂纛兼黃
鉞富貴金貂映玉蟬油築球場飛駿裏錦裁步障貯
燁娟擁塗士女千層看應記新豐舊少年

村居酒熟偶無肉食煮菜羹飲酒

歌鳳俛俛類楚狂畏犧齷齪笑蒙莊著書幸可俟後
世對客從噴臥大牀三畝青蔬了盤筋一缸濁酒具
盃觴丈夫窮達皆常事富貴何妨食萬羊 李文饒書過
異人云平生當食萬羊

辛丑十月諸公餽酒偶及百榼戲題長句

喜事諸公尚見存尺書時到爵羅門已邀風月成三
友聊對湖山倒百尊醉墨淋漓動高壁狂歌悲壯落
前村悠然睡起西窗黑一點青燈又斷魂

灌園

少攜一劍行天下晚落空村學灌園交舊凋零身老
病輪囷肝膽與誰論

幽居

破屋頽垣霧雨昏幽人終日掩柴門因鋤衰艸通南
阜偶洗叢篁見北村衲褐奇溫等狐腋寒蔬脆美敵
熊蹯冬來酒戶微增舊萬事應須付一尊

日出入行

吾聞開闢來白日行長空扶桑誰曾到崦嵫不可窮
但見日日升天東但見莫莫入地中使我倏忽成老
翁鏡裏衰鬢成霜蓬我願一日一百二十刻我願一
生一千二百歲四海諸公常在座綠酒金尊終日醉
高樓錦繡中天開樂作畫鼓如春雷勸爾白日無西
頽常行九十萬里胡爲哉

午醉徑睡比覺已甲夜矣

自我歸城西已復再見冬雖未挂衣冠其實則老農
好事或餉酒石室酒最醲一醉輒至莫臥聞湖寺鐘
心安病自除衾煖夢欲重化作孤鶴去雲崦巢長松

簡蘇訓直判院莊器之賢良

行盡天涯白髮新權籬竹屋著閑身讀書達旦失衰

病食菜終年安賤貧正使寄聲無薛孟不妨同里有
荀陳從今杖履時相過花柳村村次第春

醉眠曲

老夫莫年少嗜好但願無事終日眠斜風急雨勢方
橫低窗小閣且幽妍爐紅酒綠足閑暇橙黃蟹紫窮
芳鮮一盃一盃意忽倦徑撥紙帳投蠶麝鼻間鼾聲
欲撼屋手中書冊正墮前不知投事白中聖那惜門
生朝腹便讀書萬卷晚乃悟妙哉此訣秘不傳是醒
是醉人莫測非夢非覺中了然駸駸百年露電速鼎
鼎一世膏火煎金丹九轉顧未暇且向人間稱睡僊

冬夜

歲晚風霜惡將如遙夜何殘燈挑更暗寒犬吠偏多
支枕成孤詠懷人起浩歌梅花不解飲誰伴醉顏酡

又

忽忽流年恨悠悠獨夜情向人燈欲語透舍露如傾
夢每輕千里愁偏怯五更殿勤桑落酒好爲解餘醒

夜話贈華師

少喜洛陽俠今成衡嶽僧深培地爐火明照佛龕燈
衰鬢晨霜白禪心古澗澄猶能遍參在爲我買行滕
臥病書懷

衰衰年光挽不留即今已白五分頭病中對酒猶思
醉夢裏逢人亦說愁青海戰雲臨賊壘黑山飛雪灑
紹裘丈夫有志終難料憔悴漁村死即休

病中絕句

酒錢自昔從人乞詩思出門何處無青箬織蓬菅織
席此生端欲老江湖

又

半脫貂裘雪滿鞍慣將豪舉壓儒酸病來意氣渾非
昨一炷香煙帳底看

又

酒味醺人睡味濃午時高枕到昏鐘經旬不見西窗
日世上應無懶似儂

造物今年憫我勞微病得遂閉門高黃紬被暖青氈
穩不怕郊原雪意豪

又

青熒猶有佛燈明點滴時聞竹露聲欲睡不成還起
坐麗譙風順報三更

又

少時談舌挾風雷病後逢人口懶開安得東臯隱君
子相看無語只銜盃

蔬園雜詠

菘

兩送寒聲滿背蓬如今真是荷鋤翁可憐遇事常遲
鈍九月區區種晚菘

蕪菁

往日蕪菁不到吳如今幽圃手親鋤憑誰為向曹瞞
道徹底無能合種蔬

葱

瓦盆麥飯伴隣翁黃菌青蔬放筯空一事尚非貧賤
分芼羹僭用大官葱鄉圃有大官葱比常葱差小

巢

昏昏霧雨暗衡茅兒女隨宜沽酒殺便覺此身如在
蜀一盤籠餅是碗巢蜀中雜蔬肉作巢饅頭佳甚唐人正謂饅

頭爲籠餅

芋

陸生晝臥腹便便數息何時食萬錢莫謂蹲鴟少風
味賴渠撐拄過凶年

卯飲醉臥枕上有賦

天寒朝泥酒熟醉臥蓬窗雨勢平吞野風聲倒卷江
漁蓑傲狐腋菜把美羊腔常笑潮陽守南征畏下瀧

又

一榻臥空舍四山風雨聲病多書倚閣寒極酒施行
孤憤歌彌放端憂涕易橫羣胡滿河洛志士若爲情

劍南詩稿卷第十三終

劍南詩稿目錄
卷第十四

十月二十六日夜夢行南鄭道中既覺恍然攬
筆作此詩時且五鼓矣 雨晴步至山亭欲遂

遊東村不果 喜晴 對食 不睡 睡 憶
荆州舊遊 五雲門晚歸 冬暖 歲莫 雪

夜二首 禪室 炭盡地爐危坐至夜分戲作
夜汲井水煮茶 雪後尋梅十首 寄朱元

晦提舉 村居冬日 寓天慶觀有林使君年
八十七方燒丹云一黍米大可化汞一斤為黃

金梅道人年八十五善醫 宿天慶道院 贈
林使君二首 冬夜 宴坐 夢中作 夜寒

遣興 雪後出遊戲作 歲莫 記夢 立春
後三日作 短景 風雨旬日春後始晴 乍

晴風日已和泛舟至扶桑埭徘徊西村久之
晨起南窗晴日可愛戲作 攜瘦尊醉梅花下

城西接待院後竹下作 夜飲示坐中 夜
從父老飲酒村店作 壬寅新春 幽居春夜

讀書 晨起 昔在成都正月七日聖壽寺
麻子市初春行樂處也偶晨興聞鄰村守麻有

感 獨孤生策字景略河中人工文善射喜擊
劍一世奇士也有自峽中來者言其死于忠涪

間感涕賦詩 早春對酒感懷 曉出湖邊摘
野蔬 游飢之餘復苦久雨感歎有作 春晴

泛舟 攜一尊尋春湖上 晦前二日夜欲曉
自湖中歸對殘月獨酌 春曉有感 夜觀素

蜀地圖 久雨小飲 有懷獨孤景略 春雨
復寒遣懷 春遊 海棠 寄仗錫平老借用

其聽琴詩韻 五月十四日夜夢一僧持詩編
過予有暴雨詩語頗壯予欣然和之聯巨軸欲
書未落筆而覺追作此篇 新塘觀月 觀張
提刑周鼎 口占送巖師還大梅護聖 八月

十四日夜湖山觀月 十五夜月色皎然有頃
雲生遂不復見 夜聞秋風感懷 玉局歌

醉歌 閉門 艸書歌 野飲夜歸戲作 夜
泊水村 幽居 與隣翁登山亭 無題 遣

興 夢宴客大樓上命筆作詩既覺續成之
新塘夜歸 古風三首 累日無酒亦不肉食

戲作此詩 讀書 自妙相歸將至杜浦堰舟
中作 秋興 哀北 琵琶 三江舟中大醉

作 短歌行 悲秋 步至西村 題接待院
壁 九月晦日作四首 陶山遇雪覺林遷菴主

見招不果往 哭王季夷 樊江晚泊 蛾眉
村旅舍作 蛾江野飲贈劉道士 丈亭遇老

人長眉及肩欲就之語忽已張帆吹笛而去
寓舍聞禽聲 春晚 題瑩師釣臺圖 仗錫

平老具舟車迎前天衣印老印悉遺還策杖訪
之作絕句奉送兼簡平二首 湖邊曉行 久

雨杜門遣懷 梅雨陂澤皆滿 夜意二首
幽事 對酒戲作 夏雨 軍中雜歌八首 夏

夜舟中聞水鳥聲甚哀若曰姑惡感而作詩
莫歸舟中二首 夏夜四首 北渚 夏日五

鼓起戲書 雨夜 小立 徙倚 居山

劍南詩稿卷第十四

宋陸游務觀

十月二十六日夜夢行南鄭道中既覺恍然攬
筆作此詩時且五鼓矣

孤雲兩角不可行望雲九井不可渡
蟠冢之山高插天漢水滔滔日東去
高皇試劍石為分舛沒苦封猶
故處將壇坡陀過千載中野疑有
神物護我時在幕府來往無晨莫
夜宿沔陽驛朝飯長木舖雪中痛飲
百榼空蹴踏山林伐狐兔就北山
虎食人不知數孤兒寡婦離不報
日落風生行旅懼我聞投袂起大
噓聞百步奮戈直前虎人立吼裂
蒼崖血如注從騎三十皆素人面
青氣奪空相顧國家未發渡遼師
落魄人間傍行路對花把酒學醞
藉空辱諸公誦詩句即今衰病臥
在牀振臂猶思備征戍南人孰謂
不知兵昔者亡秦楚三戶

雨晴步至山亭欲遂遊東村不果

村陋垣屋頹歲晚風雨橫泥塗絕
還往發粥養衰病藥囊雜書卷白
髮滿清鏡一榻臥兼旬不踐牆下
徑烏鵲忽報晴霜重節候正厭供
凍硯愁頗動蠟屐興山楹快遠眺
松吹愜幽聽地瘦藥苗稀葉脫木
枝勁東村未為遠脚力不濟勝三
數入荆扉跣趺學僧定

喜晴

衡門病臥動經旬歲晚況堪風雨
頻晴日一窗殊慰眼清霜萬瓦更
宜人開書頓失昏花墜試茗初看
白乳新南埭東陂從此好剩將紅
藥插烏巾

對食

人苦不知足貪欲浩無窮豹胎日
饜飮萍藎却時供飲豚以人乳萬
乘亦改容方其未遇時鸚鵡動英
雄哀哉王相國計墮飯後鐘所以
賢達士一視約與豐我亦蹭蹬者
羈遊半生中木槩飽藜苒美與玉
食同

口腹嗟幾何曾是役我躬
放箸一笑粲賦詩曉愚公不睡

城遠不聞鐘鼓傳孤村風雨夜
騷然但悲綠酒欺多病敢恨青
燈笑不眠水冷硯蟾初薄凍火
殘香鴨尚微煙虛窗忽報東方
白且復繡經繡佛前

睡

紙帳青氈暖有餘昏昏信脚到
華胥凍醪有力勤推挽春茗無
端苦破除半熟擁衾聞急雨乍
回推枕覓殘書箇中得意君知
否萬戶一作里生封未必如

憶荊州舊遊

書劍萬里行翩翩度關登隴常
慨然射麋雲夢最樂事至今曠
快思楚天落筆千言不加點班
荆百榼命割鮮有時憑陵呼五
白笑人辛苦作太玄君不見將
軍昔忍跨下辱京兆晚為人所
憐功名富貴自古只如此不如
馳射樂飲終殘年

五雲門晚歸

高城帶遠林落日動寒砧行客
自朝莫青山無古今衰遲慚逸
氣憂患足危心溪迳滯歸艇何
時春水深

冬暖

今年歲莫無風雪塵土肺肝生
客熱經旬止酒臥空齋吳蟹黍
酥不容設日憂疾疫被齊民更
畏螟蝗殘宿麥濃霜薄霰不可
得太息何時見三白老夫壯氣
橫九州坐想提兵西海頭萬騎
吹笳行雪野玉花亂點黑貂裘

歲莫

吳中寒氣薄歲莫亦和風移樹
來村北尋僧渡港東露葵收半
綠霜稻杵微紅一飽無餘念吾
生正不窮

雪夜

書卷紛紛雜藥囊擁衾時炷海
南香衰遲自笑壯心在喜聽北
風吹雪牀

又

村路雪泥人斷行佛燈一點絳
紗明山前栖鶻歸何

晚磔磔風傳勁韻聲
禪室

早誇劇飲無勑敵晚覺安禪有宿因赫赫心光誰障
礙縣縣鼻息自輕勻蒲龕紙帳藏身穩香椀燈籠作
夢新勿為霜寒憶溫暖少林立雪彼何人

炭盡地爐危坐至夜分戲作

短景窗易黑長宵爐少紅直令貧到骨未害氣如虹
志士元謀道儒生敢諱窮霜嚴雞難嗾嗾但讀書功

夜汲井水煮茶

病起罷觀書袖手清夜永四隣悄無語燈火正凄冷
山童亦睡熟汲水自煎茗鏘然轆轤聲百尺鳴古井
肺腑凜清寒毛骨亦蘇省歸來月滿廊惜踏疎梅影

雪後尋梅偶得絕句十首

雪晴蕭散曳筇枝小塢尋梅正及時臨水登山一年
恨十分說似要渠知

又

青帝宮中第一妃寶香熏徹素綃衣定知謫墮不容
久萬斛玉塵來聘歸橘中四叟博輪玉塵九斛

又

銀燭檀槽醉海棠老來非復錦城狂疎梅對影太清
淡為拂焦桐彈履霜

又

雪裏芬芳亦偶然世人便謂占春前飽知桃李俗到
骨何至與渠爭著鞭

又

雙鶻飛來噪午晴一枝梅影向窗橫幽人宿醉閑敲
枕不待聞香已解醒

又

竹籬曲曲水邊村月澹霜清欲斷魂商略前身是飛
燕玉肌無粟立黃昏

又

相逢未易可疎親不是登牆宋玉隣林下風標許誰

比直須江左謝夫人

又

春近山中日漸長重重雲崦闕幽香神仙不飲塵凡
酒素面看人醉後狂

又

藥殿仙姝下界遊偶來稅駕剡溪頭君看月裏橫枝
影盡是蒼龍與翠虬

又

清霜夜夜奈寒何賴是知心有素娥枉道疎枝不禁
笑主人歡意自無多

寄朱元晦提舉

市聚蕭條極村墟凍餒稠勸分無積粟告糴未通流
民望甚飢渴公行胡滯留徵科得寬否尚及麥禾秋

村居冬日

溪轉樵風路林藏禹會村簷冰垂玉塔山月涌金盆
畏客常稱疾耽書不出門尚嫌城市近更擬卜雲根

寓天慶觀有林使君年八十七方燒丹云一黍
米大可化汞一斤為黃金梅道人年八十五善

醫

世路崎嶇久已忘道腴禪悅度年光故攜開士降龍
鉢來寄高人夢蝶牀只道燒金有劉向不知賣藥是
韓康日長坐覺非塵世庭檜花開蜂蜜香

宿天慶道院

衰病厭多事清遊諧夙心夜深樓突兀歲晚柏蕭森
汲井洗靈藥焚香橫素琴身閑境自勝城市亦山林

贈林使君

使君物外閱年華厭聽奴兵早莫衝雙履踏雲呼野
渡一瓢邀月醉梅花紅爐點汞閑消日烏几緜經不

憶家我亦岷山有歸處約君同載泝三巴

又

松檜陰中百步廊我來剝啄叩琳房魚腸寶劍餘蛟
血鴉嘴金鋤帶藥香弱水蓬萊風浩浩赤明龍漢劫

茫茫何妨付與神丹訣教跨青鸞到帝鄉
冬夜

窮巷蕭條早閉門北窗燈火夜昏昏老于俗事不挂
眼愁憶故人空斷魂急雪打窗飛磔細狂風卷野怒
濤翻土牀紙帳寒無寐彊把村醅不厭厭

宴坐

身寄窮山裏心安一事無新傳小止觀漸解半跏趺
急雪鳴窗紙孤燈耿地爐老來元少睡且復兀枯株

夢中作

路平沙軟淨無泥香艸丰茸沒馬蹄擣紙聲中春日
晚况然重到浣花溪

夜寒遣興

道人類然寄北窗愁魔百萬一笑降夜闌酒渴有奇
夢吞楚七澤吳三江孤村蕭蕭雨解雪寒犬噤臥飢

鼠齧擁衾危坐待天明白首忍窮心似鐵

雪後出遊戲作

小巖平岡雪陸離幽人又賦探春詩典琴沽酒元非
俗著屐觀碑又一奇大度乾坤容落托多情風月笑

衰遲吾生也似梅花淡燕未歸來蝶不知

歲暮

半生浪走跨秦吳白首還如筮仕初凍芋濁醪邀里
巷昏煙溼雪暗郊墟窮空敢恨寒無褐憂患元因出

有車笑掩陳編聊自慰古來富貴羨樵漁

記夢

世事紛紛觸眼新何由常作夢中身遠遊萬里纔移
刻豪飲千場不忤人鼓吹滿城壺日晚駕花如海洞

天春是間可老君知否莫信人言想與因

立春後二日作

拂面穆穆巷柳黃穿簾細細野梅香春回江表常年
早日向山中特地長千古事終輸釣艇一毫憂不到

禪房綠尊掩罷惟須睡高枕看人舉世忙

短景

短景迫窮冬日月如鳥過衡門窘風雨衰病不可那
疎疎屋茅漏獵獵窗紙破鼠豪冒燈出人倦掩屏臥
中都舊朋儕零落今幾箇弄筆欲遣愁孤吟誰與和
風雨旬日春後始晴

風吹過雁作斜行雨洗殘梅只淡香南浦春回波漸
綠東菴睡起日初長詩囊屬稿懶新思博齒爭豪悔
昔狂莫向晴窗對明鏡朱顏減盡鬢蒼蒼

乍晴風日已和泛舟至扶桑埭徘徊西村久之

十日風雨今日晴衰病忽減思閑行接羅一幅煙霧
薄舴艋八尺竟驚輕亭亭孤塔遠天碧曲曲深巷斜

陽明數家茅屋門晝掩不聞人聲聞確聲身似龐公
不入城東阡南陌錢餘生新年倘有豐年喜買酒漁

村看太平

晨起南窗晴日可愛戲作一絕

蕭散山林一幅巾天公乞與自由身茅簷不似宮墀
暖日滿南窗也可人

攜壺尊醉梅花下

楠癭作尊容斗許擁腫輪囷元媚嫵肯從放翁來住
山誰云置身不得所山房寂寞久不飲作意欲就梅

花語我病鮮歡花更甚日莫淒涼泣殘雨人生萬事
雲茫茫一醉常恐俗物妨正須仙人冰雪膚來伴老

子鐵石腸花前起舞花底臥花影漸東山月墮癭尊
未竭狂未休笑起題詩識吾過

城西接待院後竹下作

水邊小丘因古城上有巨竹數百箇一徑蛇蟠不容
脚平處乃可十客坐裊裊共看風枝舞簌簌時聽春

籜墮古佛不粧香火冷瘦僧如腊袈裟破門前西去
長安路日夜舳舻銜尾過老夫本乏臺省姿且就清

陰曲肱臥

夜飲示坐中

胡雁叫羣寒夜長崢嶸北斗天中央達人觀眇萬
物烈士壯心懷四方縱酒長鯨渴吞海艸書瘦蔓飽

經霜付君詩卷好收拾後五百年無此狂

夜從父老飲酒村店作

旗亭濁酒典衣沽蟹舍老翁折簡呼夜中醉歸騎
驢鬼昂不須宗武扶丹徒布衣有籌略漁陽突騎莫
枝梧牀頭金盡何足道肝膽輪囷橫九區

壬寅新春

半生常是道邊人歲晚初收事外身濁酒一樽聊永
日小園三畝亦新春尚無枕寄邯鄲夢那有衣沾京
洛塵門外煙波三百里 鏡湖三百里 此心惟與白鷗
親

幽居春夜

莫景催人雪鬢雙十年始復及吾邦雲逢佳月每避
舍酒壓閑愁如受降二弄笛聲初到枕一枝梅影正
橫窗要知清夢遊何許不釣桐江即錦江

讀書

放翁白首歸剡曲寂莫衡門書滿屋藜羹麥飯冷不
嘗要足平生五車讀校讎心苦謹塗乙吟諷聲悲雜
歌哭三蒼奇字已殺青九譯旁行方著錄有時達日
不滅燈急雪打窗聞窸窣倘年七十尚一紀墜典斷
編真可續客來不怕笑書癡終勝牙籤新未觸

晨起

小雨溼清曉新鷺啼早春年光驚病眼節物屬閑身
巴峽東連楚嶓山北控秦遠遊端可繼敢恨素衣塵
昔在成都正月七日聖壽寺麻子市初春行樂
處也偶晨興聞鄰村守麻有感
樂事新年憶錦城城南麻市試春行如今老病茅簷

底臥聽兒童嚇蟀雀聲

獨孤生策字景略河中人工文善射喜擊劍一

世奇士也有自峽中來者言其死于忠涪間感

涕賦詩

憶昨騎驢入蜀關旗亭邂逅一開顏氣鍾太華中條
秀文在先秦兩漢間寶劍憑誰占斗氣名駒竟失養

天閑身今老病投空谷回首東風涕自潛

早春對酒感懷

探花嗜昔喜春同老大空驚節物催芳食旋開新壓
酒好枝猶把未殘梅書生歲惡甘藜藿志士時平死
艸萊初開獨孤策死 欲豁孤懷誰晤語夜彈長劍有餘
哀

曉出湖邊捕野蔬

浩歌振履出茅堂翠蔓丹芽採懶忙且勝堆盤供首
藉未言滿斛進橫榔行迎風露衣巾爽淨洗羶葷七
筋香著句誇張君勿笑故人方厭太官羊

存饑之餘復苦久雨感歎有作

道傍融負去何之積雨仍愁麥不支為國憂民空激
烈殺身報主已差池屬饜糠蕪蕪猶多愧徒倚柴荆只
自悲十載西遊無惡歲羨他畷下足蹲踞 子在蜀幾十
年未嘗逢歲歉也

春晴泛舟

兒童莫笑是陳人湖海春回發興新雷動風行驚蟄
戶前一日聞雷 天開地闢轉鴻鈞鱗鱗江色漲石黛
嫋嫋柳絲搖麴塵欲上蘭亭却回棹笑談終覺愧清
真

攜一尊尋春湖上

酒裏真須勉策勳百年何啻是中分花梢已點猩猩
血水面初生瑟瑟紋一世極知均腐骨萬鍾元自付
浮雲浩歌不恨無人和但惜驚飛白鷺羣

晦前二日夜欲曉自湖上歸對殘月獨酌

小閣對寒蟾山尊盡更添方看一輪滿又數兩頭纖
脈脈離雲嬌娟娟傍畫簷五更清露下不恨客衣霑
春曉有感

春曉有感

山杏溪桃續續開緩歌誰與共傳盃年來只有追歡
夢百舌無情又喚回
夜觀秦蜀地圖
住者行省臨秦中我亦急服叨從戎散關摩雲俯賊

壘清渭如帶陳軍容高旌纛縹緲嚴玉帳畫角悲壯傳
霜風咸陽不勞三日到幽州正可一炬空意氣已無
雞鹿塞單于合入蒲萄宮燈前此圖忽到眼白首流
落悲塗窮吾皇英武同世祖諸將行策雲臺功孤臣
昧死欲自薦君門萬里無由通正令選壯不爲用筆
墨尚可輪微忠何當勒銘紀北伐更擬艸奏祈東封

久雨小飲

春來日日風雨橫老去時時衰病攻門外回塘初漲
綠尊前橋面甍生紅未除豪氣每自笑欲吐狂言無
與同安得并刀剪蒼溜憑高萬里望晴空

有懷獨孤景略

富貴世間元不乏此君才大獨難成喑鳴意氣千人
廢爛雅風流一座傾韜略豈勞平大敵文章亦足主
齊盟荒山野水涪州路腸斷西風蕪露聲

春雨復寒遣懷

去日堂堂挽不回新年又傍鬢邊來雨聲欲作海棠
崇書卷只爲春睡煤村舍瘦蔬供薄酒地爐微火伴
殘灰浩然忽起金鞭興漾水歸山安在哉

春遊

平生樂行役不耐常閉戶今朝新雨霽一笑整巾屨
青猿導幽蹊春艸伴微步雖云尊酒薄蔬果亦略具
辛夷發高枝楊柳吹墮絮行歌不知遠落日呼野渡
橫林已棲鴉淺水猶立鷺歸來意頗豪古錦有新句
海棠

今日春已半風雨停出遊餅中海棠花數酌相獻酬
尚想錦官城花時樂事稠金鞭過南市紅燭宴西樓
千林誇盛麗一枝賞纖柔狂吟恨未工爛醉死即休
那知茅簷底白髮見花愁花亦如病殊掩抑向客羞
尤物終動人要非桃杏傳東風萬里恨浩蕩不可收
寄仗錫平老借用其聽琴詩韻

放翁久矣無此客闔戶兒童皆動色寒泉不食人竭
死素綆銀瓶我心惻千金易得一士難晚途淹泊眼

愈寒豈知一日乃見子傑語豪筆無僧跋門前清溪
天作底細細風吹穀紋起倚欄一笑誰得知愛子數
詩如此水江湖安得常相從浩歌相踏臥短蓬功名
渠自有人了留我鏡中雙頰紅

追作此篇

五月十四日夜夢一僧持詩編過予有暴雨詩
語頗壯予欣然和之聯巨軸欲書未落筆而覺
黑雲塞空萬馬屯轉盼白雨如傾盆狂風疾雷撼乾
坤壯哉瀾壑相吐吞老龍騰擊下天閭鱗間火作電
脚奔巨松拔起千年根浮槎斷梗何足論我詩欲成
醉墨翻安得此雨洗中原長河袞袞來崑崙鶴鶴下
看黃流渾

新塘觀月

攜酒新塘南中夜欲忘歸貪看月滿湖不覺露溼衣
天高鶴聲厲風急螢火稀此夕不一醉行數破鏡飛
漁家亦喜事未掩水際扉皇天有公道處處皆清暉

觀張提刑周鼎

他人富貴堆金壁曼舞妖歌誇坐客清心好古誰似
公漢庭諸人推博識一朝得此周廟器買不論貴空
四壁苔痕洗盡銅色見坐臥摩挲欲忘食蠻童捧出
客爲起恍如清廟陪劍履腹中奇字繁蟲魚嶧山之
碑那得比知公原是功名人看罷握手同悲辛鑄京
洛邑在何許漠漠秋風吹虜塵
口占送嚴師還大梅護聖

放翁白髮已蕭然黃紙新除玉局仙寄語山頭老師
叔欲分茅舍度殘年常禪師偈云更移茅舍入深居謂護聖也

八月十四日夜湖山觀月

長空露洗玻璃碧紫金之盤徑三尺忽看擘地出人
間桂樹扶疎如淡墨攬衣獨立鏡湖邊風露萬頃秋
渺然開帆詎必入東海騎鯨便可追飛仙冰壺玉瀝
侵骨冷醉看孤鸞舞清影夜闌歸舍人已眠却倩天
風爲吹醒

十五夜月色皎然有頃雲生遂不復見

北望但空關南望橫羣山青天無翳行素月寥寥永
夜非人間九醞漿成老仙醉六銖衣薄天宮寒翠眉
真人不火食小立環佩風珊珊橫空邀我海山去縹

緜萬里驂青鸞相攜一笑在雲表徐看玉宇飛金盤
夜聞秋風感懷

西風一夜號庭樹起攬戎衣淚濺襟殘角聲催關月
墮斷鴻影隔塞雲深數篇零落從軍作一寸淒涼報
國心莫倚壯圖思富貴英豪何限死山林

玉局歌

玉局祠官殊不惡銜如冰清俸如鶴酒壺釣具常自
隨五尺新蓬織青籜倚樓看鏡待功名半世兒癡晚
方覺何如醉裏泛桐江長笛一聲吹月落蔣公新冢
石馬高謝公飛旄凌秋傳微霜莫遣侵鬢綠從今二

十四考書玉局
醉歌

住時一醉論斗石坐人飲水不能敵橫戈擊劍未足
豪落筆縱橫風雨疾雪中會獵南山下清曉嶙峋玉
千尺道邊狐兔何曾問馳過西村尋虎跡貂裘半脫
馬如龍舉鞭指麾氣吐虹不須分巧守近塞傳檄可
使腥羶空小胡通詠六十載信信獅子勢已窮聖朝
好生貸孳戮還爾舊穴遼天東

閉門

寂寂雲山千萬重閉門不忍數塗窮高秋酒熟雪浮
瓮中夜劍歸雷吼空近報犬羊逃漠北豈無貔虎定
關中君王猶記孤忠在安得英豪共此功

艸書歌

傾家釀酒三千石閑愁萬斛酒不敵今朝醉眼爛巖
電提筆四顧天地窄忽然揮掃不自知風雲入懷天
借力神龍戰野昏霧腥奇鬼摧山太陰黑此時驅盡
胸中愁槌牀大叫狂隨憤吳棧蜀素不快人付與高
堂三丈壁

野飲夜歸戲作

青海天山戰未鏖即今塵暗舊戎袍風高乍覺弓聲
勁霜冷初增酒興豪未辦大名垂宇宙空成慟哭向
蓬蒿灑亭老將歸常夜無奈人間兒女曹

夜泊水村

腰間羽箭久凋零太息燕然未勒銘老子猶堪絕大
漠諸君何至泣新亭一身報國有萬死雙鬢向人無
再青記取江湖泊船處臥聞新雁落寒汀

幽居

遶屋巉巖碧玉峯箇中天遣養疎慵捐書已數空虛
腹得酒還澆壘塊曾曲几坐看窺戶月短蓬臥聽隔
城鐘柴桑自有歸來意枉道人間不見容

與隣翁登山亭

數掩檀籬圍夕照一間茅舍背陰崖吾生擾擾實無
樂人事悠悠那可諧憂患向來侵綠鬢登臨此日費
青鞋京華舊友凋零盡野老逢迎一散懷

無題

纏轆轤車赴密期追歡最數牡丹時新春欲近猶貪
喜舊愛潛移不自知寶鏡塵生鸞悵望鈿箏絃絕雁
參差玉壺莫貯臙脂淚從涇泥金帶上詩

遣興

平生與俗馬牛風落魄人間亦未窮綠綺奏終香縷
碧烏絲書罷燭花紅夢中吳蜀山川近醉後周秦戰
伐空投老飄然若勿笑也勝魚鳥在池籠

夢宴客大樓上命筆作詩既覺續成之

表裏江山亦樂哉華纓滿座敵鄒枚歌從郢客樓中
聽獵向樊姬墓上同梅藥香清簪寶髻熊躡味笑按
新醅眼邊歷歷興亡事欲賦章華恐過哀

新塘夜歸

煙月茫茫十里堤數聲漁唱埭東西旋燒新兔傾村
酒扶得歸來醉似泥
古風

少年慕黃老雅志在山林火食亦彊勉寧有婚宦心
失脚墮世網衰病忽侵尋放逐適天幸獨恨山未深
一牀元不睡儵然橫素琴開門毛髮冷湖關月欲沈

又
賀鑑未嘗死江天醉初醒逸少亦度世珥節過蘭亭
吾本淡蕩人轉徙如蓬萍聊憑一盃綠駐此雙鬢青
邂逅兩仙翁笙鶴遊青冥還家不能食濁世紛羶腥

又
功名如博戲大叫或作盧文辭組繡耳初不繫賢愚
負恃已可笑憎嫉真區區平生學金丹我豈斯人徒
嘯歌醉自和顏鬢老不枯却後五百年煙雨釣鏡湖
累日無酒亦不肉食戲作此詩

小築精廬剡曲傍愕然蟬腹與龜腸酒錢覓處無司
業齋日多來似太常雲碓旋春菘米滑風爐親候藥
苗香明年更入南山去要試囊中服玉方

讀書
讀書四更燈欲盡胸中太華蟠千仞仰呼青天那得
聞窮到白頭猶自信策名委質本爲國豈但空取黃
金印故都卽今不忍說空宮夜夜飛秋燐士初許身
輩稷契歲晚所立慚廉藺正看憤切詭成功已復雍
容託觀釁雖然知人要未易詎可例輕天下士君不
見長松臥壑困風霜時來屹立扶明堂

自妙相歸將至杜浦堰舟中作
斜陽發東郭初夜轉西城寺閣疎鐘動漁村遠火明
蒼茫林靄滅撲瀉水禽驚漸喜吾廬近遙聞過埭聲

秋興
樵風溪上弄扁舟濯錦江邊憶舊遊豪竹哀絲真昨
夢爽砧繁杵又驚秋墜枝橘熟初堪翦浮瓮醅香恰
受菊莫道身閑總無事孤燈夜夜寫清愁

哀北
太行天下香黃河出崑崙崑崙山川形勝地歷世多名臣
哀哉六十年左衽淪胡塵抱負雖奇偉沒齒不得伸

老夫實好義北望常酸辛何嘗擁黃旗徑涉白馬津
窮追殄犬羊旁招出鳳麟努力待傳檄勿謂吳無人

琵琶

西蜀琵琶邏沙槽梨園舊譜鬱輪袍繡筵銀燭燕宮
夜一飲千鍾未足豪故蜀燕王宮今爲張氏海棠園

三江舟中大醉作

志欲富天下一身常苦飢氣可吞匈奴東帶向小兒
天公無由問世俗那得知揮手散醉髮去隱雲海涯
風息天鏡平濤起雪山傾輕帆入浩蕩百怪不可名
虹竿秋月鉤巨鰲倘可求滅迹從今逝回看隘九州

短歌行

百年鼎鼎世共悲晨鐘莫鼓無休時碧桃紅杏易零
落翠眉玉頰多別離涉江采菱風敗意登樓待月雲
爲祟功名常畏謗讒與富貴每同衰病至人生可數
十八九自古危機無妙手正令插翮上青雲不如得
錢卽沽酒

悲秋

秋燈如孤螢熠燿耿窗戶秋雨如漏壺點滴連早莫
我豈楚逐臣慘愴出怨句逢秋未免悲直以憂國故
三軍老不戰比屋困征賦可使江淮間歲歲常列戍

步至西村

一飽無餘事西村偶獨行樵筇息微倦汲井漱餘醒
川闊雁平度谷虛雲亂生絕知豐歲樂笑語隔柴荆
題接待院壁

笙歌淒咽離亭晚回首高城半掩門墨墨遠山橫翠
靄娟娟新月耿黃昏未嫌雙鷺妨歌枕自是孤舟易
斷魂遙想柯橋落帆處隔江微火認漁村

九月晦日作

菊枝傾倒不成叢桐葉凋零已半空自是老來多感
概不應蕭瑟爲秋風

又

山路清寒近探梅振衣高處興悠哉飛鴻杳杳江天

關一片愁從萬里來

又

錦城誰與寄音塵
望斷秋江六六鱗
正使傾家供麴
葉定知不解醉愁人

又

炊煙漠漠衡門寂
寒日昏昏倦鳥還
數樹丹楓映蒼
檜天工解作范寬山

陶山遇雪覺林遷
菴主見招不果往

山中大雪二尺彊
道邊虎跡如梳大
衰翁畏虎復畏
寒招喚不來公勿
怪梨花開時好風
日走馬尋公作
寒食不須沽酒引
陶潛箭筍蕨芽如
蜜甜

哭王季夷

超遙天馬渥注來
萬里修途忽勒回
爽氣即今猶可
想舊遊何處不堪
哀夢中有客餞殘
錦地下無爐鑄
橫財欲醉一尊身
尚病蠶封春露溼
蒼苔

樊江晚泊

碧雲吞日天欲莫
城西捩柁城東路
蓴羹菰飯香滿
船正是江頭落帆
處蒹葭洲漁火遠
更明煙水蒼茫聞
雁聲不是綠尊能
破悶白頭客路若
為情

蛾眉村旅舍作

小雨初收景氣和
青苔狼藉落梅多
曲肱野店睡斜
日濯足溪橋鳴細
波久厭俗情生眼
白近承天詔賜
顏醜予自壬寅冬
兩頰復丹騎鯨未
返蓬壺去此路猶
須幾浩歌

娥江野飲贈劉道士

春光益益催官柳
柳色黃如醜中酒
橋邊微逕愜幽
尋世外高人共攜
手參差茅舍出木
末隱映酒旗當
浦口插花處處引
村童失道時時問
耕叟客堪共醉
百無一事不諧心
十常九日斜潮落
不可留孤舟欲
上頻搔首

丈亭遇老人長眉及肩欲就之語忽已張帆吹
笛而去

颯颯長眉綠覆肩
欲推壽數意茫然
若非楚國庚寅
歲定是堯時丙子
年銅笛一聲驚宿
鷺蒲帆數幅破
晴煙遙知乘醉江
湖去黃鶴樓頭又
放顛

寓舍聞禽聲

日暖林梢鶉鴉鳴
稻陂無處不青青
老農睡足猶慵
起支枕東窗盡意
聽

春晚

兩足人家插稻秧
蠶生隣女采桑黃
萬花掃迹春將
莫百艸吹香日正
長閑覓啼鴉穿北
崦戲隨飛蝶過
東岡飄然且喜身
彊健不怪兒曹笑
老狂

題整師釣臺圖

羊裘老子的魚處
開卷令人雙眼明
未可忽忽便持
去夜窗吾欲聽難
聲

仗錫平老具舟車
迎前天衣印老印
悉遣還策

杖訪之作二絕句
奉送兼簡平

晝妨籃輿不許前
白頭行脚意超然
舜江禹穴千山

水盡在高人拄杖邊

又

魚鼓聲中白氈巾
南山筍蕨一番新
長安不是無卿
相林下平津獨可
人

湖邊曉行

寒飈清曉掠湖堤
緩轡迎涼帽影低
露拆渚蓮紅漸
開雨催陂稻綠初
齊先秋葉已時時
墮失且雞猶續
續啼不是老來忘
睡美戴星南畝慣
扶犁

久雨杜門遣懷

風雨蕭蕭臥掩關
經旬登覽負溪山
也知解送豐年
喜無奈難消永日
閑平野橫吹看凌
厲畫簷高瀉聽
淙潺城闌路斷吾
何恨濁酒枯魚亦
破顏

梅雨陂澤皆滿

雨暗迷行路溪深
沒舊痕汪汪牛溲
白盎盎酒醅渾
暖浸千畦稻橫通
十里村羣蛙更堪
笑鼓吹鬧黃昏
夜意

幌外燈青見鼠行林梢月黑有鼻鳴只言中夏夜偏
短萬里夢回天未明

又

睡覺隣雞已再啼蓬窗燈暗雨淒淒東家蹇驢不用
借明日門前一尺泥

幽事

老境俗緣減閑居幽事多去沙通澗澗插援護新荷
棋罷看山臥釣歸搖櫂歌餘年端有幾風月且婆娑

對酒戲作

去日犇輪不啻過凌煙勳業已蹉跎只言一寸丹心
在無奈千莖白髮何色比鵝雛京口酒聲如珠貫涓
城歌身閑取醉真當勉莫學癡人夢螳螂

夏雨

清風起湖濱急雨來天末蚊蠅遠退聽松竹側蘇活
奇聲集空庭爽氣生細葛素秋雖尚遙聊喜寬肺渴

軍中雜歌

三受降城無壅城賊來殺盡始還營漠南漠北靜如
掃清夜不聞胡馬聲

又

秦人萬里築長城不如壯士守北平曉來磧中雪一
丈洗盡羶腥春艸生

又

匈奴莫復倚長戈來款軍門早乞和鐵騎如山尚可
避飛將軍來汝奈何

又

名王金冠玉蹀躞面縛纒下聲呱呱藁街未遽要汝
首賣與酒家鉗作奴

又

三月未春冰塞川冬月苦寒雪闇天紫髯將軍曉射
虎嚇殺胡兒箭似椽

又

北面行臺號令新繡旗豹尾渡河津檄書纔下降書

至不用兒郎打女真

又

漁陽兒女美如花春風樓上學琵琶如今便死知無
恨不屬番家屬漢家

又

北庭茫茫秋艸枯正東萬里是皇都征人樓上看太
白思婦城南迎紫姑

夏夜舟中聞水鳥聲甚哀若曰姑惡感而作詩

女生藏深閨未省窺牆藩上車移所天父母為它門
妾身雖甚愚亦知君姑尊下牀頭雞鳴梳髻著襦裙
堂上奉灑掃厨中具盤殮青青摘葵菀恨不美熊蹯
姑色少不恰衣袂溼淚痕所冀妾生男庶幾姑弄孫
此志竟蹉跎薄命來讒言放棄不敢怨所悲孤大恩
古路傍陂澤微雨鬼火昏君聽姑惡聲無乃譴婦魂

莫歸舟中

五月未劇暑莫從城市還斷虹低飲澗落日遠銜山
蟹舍叢蘆外菱舟薄靄間詩情終艸艸虛遣鬢毛斑

又

湖水綠可愛弄撓衝夕霏林昏漁火壯山轉寺鐘微
老歎世情惡窮知心事違回頭語孤鶴伴我莫先飛

夏夜

夏夜忽已半東岡月初生起行遶庭樹愛此露滴聲
漂流憶安臥局促念遐征幽懷誰晤語華鶴還自傾

又

螢火喜暗庭桐葉矜冷雨幽人悄不寐獨夜誰與處
乾坤信無情歲月遽如許明發視鏡中鬢絲添幾縷

又

庭荒蔓艸長堂豁爽氣入悠然推枕起聊作倚杖立
飛螢亦避雨黏棟光熠熠南隣輪稅歸小婦愁夜汲

又

結屋在郊墟俯然謝炎熾窗扉故闌寂水竹亦幽邃
飛蟲望燈集栖燕衝雨至石枕與葛幘美哉今夕睡

北渚

北渚露濃蘋葉老南塘雨過藕花稀
新秋漸近蟬更急殘日已沉鴉未歸
銅鏡面顏無藥駐玉關勳業與心違
一蓑一笠生涯在且醉蒼苔舊釣磯

夏日五鼓起戲書

老雞嗥嗥桑樹顛明星磊磊茅屋邊
我與視夜不復眠坐看朝曦浴虞淵
開窗清風來穆然拂几洗研整蠹編
火雲崔嵬忽滿天安得羲和徐著鞭

雨夜

急雨如河瀉瓦溝空堂臥對一燈幽
老雞多事彊知曉落葉無情先報秋
身未蓋棺誰可料尊常有酒莫閑愁
功名老大從來事且復長歌起飯牛

小立

曠懷塵事外小立綠陰間舉世皆嫌拙
平生剩得閑江郊雲易暗旱歲雨終慳
欲醉尊無酒悠然對莫山徒倚

漁扉夕不掩徒倚欲三更月正樹無影
露濃荷有聲崢嶸歲將晚悄悄恨難平
坐念中原沒男兒恐浪生

居山

涉世緣雖薄居山味自長穿雲雙履溼
洗藥一溪香有酒作臉頰無愁供鬢霜
遼天渺歸鶴千載付茫茫

劍南詩稿卷第十四終

劍南詩稿目錄

卷第十五

秋興二首 八月五日夜半起飲酒作草書數紙 秋雨漸涼有懷興元三首 秋風曲 送

宣書記并寄其兄曇才二公 起晚戲作 飲村店夜歸二首 雨夜感懷 寄葉道人 月

下小酌 讀袁公路傳 鄰曲小飲 秋夜觀月二首 枕上 秋夕大風松聲甚壯戲作短

歌 明河篇 夜聞隣家治稻 淚迹 夜步庭下有感 題酒家壁 題書齋壁 贈貓

秋夕 秋雨排悶 小舟航湖夜歸書觸目三首 幽居書事二首 晚霽二首 雨後散步

後園二首 示客 甲子晴 後一日復雨 紹興庚辰余遊謝康樂石門與老洪道士痛飲

賦詩既還山陰王仲信為予作石門瀑布圖今二十有四年開圖感歎作二首 雨中遣懷

秋思 秋雨歎 雨中小酌 衰病有感三首 雨止頓寒遂有晴意 秋晴出遊 悲秋四

首 久雨道懷 野步書觸目 月下 九月十日 秋晴園中山禽絕多有感而賦 燈籠

舟過南莊呼村老與飲示以詩二首 秋夜獨過小橋觀月 紹興中與陳魯山王季夷從

兄仲高以重九日同遊禹廟後三十餘年自三橋泛舟歸山居秋高雨霽望禹廟樓殿重復光

景宛如當時而三人者皆下世予亦衰病無聊慨然作此詩 雜興四首 予秋夜觀月得瘡

疾枕上賦小詩自戲 後春愁曲并序 秋花歎 寄題朱元晦武夷精舍五首 病思 病

愈 病中忽有眉山人士史君見過欣然接之口占絕句 初寒 出塞曲 無題 道室即

事 夙興 長安道 記夢 冬夜讀書 遊僂五首 過鄰家 山園晚興 初冬出扁門

歸湖上 新寒小醉睡起日已高戲作 太息 冬夜讀書 晚步 村舍 野步至近村

夜坐油盡戲作二首 歲莫 幽居感懷 山中夜歸戲作短歌 狂歌 遲莫 種秫 擁

爐 冬夜吟 讀書罷小酌偶賦 移花遇小兩喜甚為賦二十字 書生數 冬夜醉解殘

燈煒然起讀書至明賦詩十韻 夜行 遊淳化寺 餘慶出遊夜歸 遊前山 齋前獨坐

戲作 晚同僧至谿上 僧飯 山店賣石榴取以薦酒 平水小憩 自若耶溪舟行杭鏡

湖而歸 宴坐 遊山歸偶賦 六十吟 舒悲 山園晚興 獨立 探梅二首 遠興

張功甫許見訪以詩堅其約

劍南詩稿卷第十五

宋陸游務觀

秋興
白髮蕭蕭欲滿頭歸來三見故山秋醉憑高閣乾坤
迨病入中年日月道百戰鐵衣空許國五更畫角只
生愁明朝煙雨桐江岸且占丹楓繫釣舟

又
莫境何堪與病遭西風落葉擁亭臯極知世上人情
惡且放江邊醉眼高應俗紛紛何日了詠詩混混寄
吾豪碧油金鎖平生意未許人言學楚騷

八月五日夜半起飲酒作草書數紙
有漏神仙有髮僧碧幙欹枕對秋燈忽然起索三升
酒颯颯蛟龍入剡藤

秋雨漸涼有懷興元
八月山中夜漸長雨聲燈影共淒涼遙知南鄭風霜
早已有寒燕犯獵場

又
十年前在古梁州痛飲無時不慣愁最憶夜分歌舞
歌臥聽秦女擊篳篥

清夢初回秋夜闌床前耿耿一燈殘忽聞雨掠蓬窗
過猶作當時鐵馬看

秋風曲

秋風吹雨鳴窗紙壯士不眠推枕起牀頭金盞酒尊
空櫪馬相看淚如洗鴻門霸上百萬師安西北庭九
千里帳前畫角聲入雲隴上鐵衣光照水橫飛渡遼
健如鶻談笑不勞投馬筆堂堂羽檄從天下夜半研
營辱可鄙拾螢讀書定何益投筆取封當努力百斤
長刀兩石弓飽將兩耳聽秋風

送宣書記并寄其兄曇才二公

在吳識曇公至蜀識才公彌天宣書記晚乃得從容
是家固多賢天遣慰我窮初秋夏末時衲子各西東
子獨惜此別共語夜燭紅怪我耐逆境萬事一笑空
子顧知我否視身如枯蓬枯蓬未變滅姑當付之風
家世無高年我今六十翁俯仰幾時客結束已囟囟
那將須臾景更受憂患攻願言早來歸相就煮晚菘

起晚戲作

地偏身飽閑秋爽睡珠笑老雞每愧渠三唱呼未起
廚人罷晨汲童子愁屣履情慵雖可嘲安靜良足喜
心空夢亦少酣枕甘若醴不學多事人南柯豪衆蟻

飲村店夜歸

致主初心陋漢唐莫年身世落農桑煙牛跡西山
口又臥旗亭送夕陽

又

灑灑村醪君勿辭橙椒香笑白鵝肥醉中忘却身今
老戲逐螢光踴雨歸

兩夜感懷

點滴空塔雨送涼青燈對影獨淒傷身如病木驚秋
早心似鯉魚怯夜長鑄得黃金猶有術掃空白髮定
無方蕭然禪榻君休笑一卷殘書伴枕傍

寄葉道人

白首不堪憂患纏要將樂事錢流年尋山猶費幾兩
屐貯酒真須百斛船若信王侯等螻蟻可因富貴失
神仙 老杜詩王侯與螻蟻共盡隨丘墟太白詩富貴與神仙蹉跎成
兩失 驚人亦莫摩銅狄泰華松風足晝眠

月下小酌

昨日雨遶簷孤燈對搔首今夜月滿庭長歌倚衰柳
世變浩無窮成敗翻覆手人生最樂事臥聽壓新酒
我歸自梁益零落恰親友紛紛墮鬼錄何人得長久
後生多不識詎肯顧衰朽一杯無與同敲門喚鄰叟

讀袁公路傳

成敗相尋豈有常英雄最忌數悲傷蕪蕪豆粥從來

事何恨郵亭坐簣床
鄰曲小飲

早稻喜登場相呼集野堂
迎霜新兔美近社濁醪香
茄屋滴殘雨竹籬圍夕陽
新豐不須作真箇是吾鄉

秋夜觀月

夢回殘燭耿房櫺
杳杳江天叫斷鴻
病骨不禁風露重
披衣小立月明中

又

誰琢天邊白玉盤
亭亭破霧上高寒
山房無客兒貪睡
常恨清光獨自看

枕上

香冷燈昏夢自驚
清愁冉冉帶餘醒
夜長誰作幽人伴
惟是蛩聲與月明

秋夕大風松聲甚壯戲作短歌

人生不自憐坐受外物械
榮華難把玩俄頃皆變壞
山樓亦何有耳目差曠快
秋郊多烈風夜壑起松籟
初聞尚蕭瑟髣髴聽嚴瀨
忽如倒巨浸便欲飄大塊
又疑楚漢戰瀕洞更勝敗
不然六月雨雷電奔百怪
三更勢稍斂鐵馬歸入塞
孰能從吾遊洗汝胸次隘

明河篇

明河八月轉分明
炯如素練西南傾
年年歲歲見河漢
坊坊曲曲聞砧聲
良人萬里事征行
砧聲中有玉關情
遙知鐵衣冷如水
指點明河白髮生
磧中草死駝鳴萬里却望長安城
兒生總角爺未見歸心頓覺封侯輕
漢家自古有夷狄
付與窮荒何足惜
只願天狼無光太白低
還家為婦說安西

夜聞隣家治稻

二頃春蕪廢不耕
半生名宦竟何成
歸來每羨農家樂
月下風傳打稻聲

浪迹

浪迹人間四十年
鏡中不覺已華顛
山川慘澹秋多感
燈火青熒夜少眠
壯志已忘榆塞外
高情正在酒

墟邊扁舟不恨無人識
且復長歌入暮煙
夜步庭下有感

夜遶中庭百匝行
秋風傳漏忽三更
星辰北拱疎還密
河漢西流縱復橫
鷺鷥遶枝棲不穩
冷螢穿竹遠猶明
書生老抱平戎志
有淚如江未敢傾

題酒家壁

明主何曾棄不才
書生飄泊自堪哀
煙波東盡江湖遠
雲棧西從隴蜀回
宿雨送寒秋欲晚
積衰成病老初來
酒香菰脆丹楓岸
強遣樽前笑口開

題書齋壁

隨分琴書適性情
乍寒偏愛小窗明
旋煎粟粟留僧話
故種芭蕉待雨聲
丹藥驗方非畏死
文章排悶不求名
是間幽事君知否
莫怪經秋少入城

贈貓

裹鹽迎得小狸奴
盡護山房萬卷書
慚愧家貧策勳簿
寒無氈坐食無魚

秋夕

羈魂虛仗此詞招
病骨那禁積毀消
亂葉打窗寒有信
昏燈照幔夢無聊
棧邊老驥心空在
爨下殘桐尾半焦
百感忽生推枕起
碧霄銀漢正迢迢

秋雨排悶十韻

今夏久無雨
從秋却少晴
空濛迷遠望
蕭瑟送寒聲
衣潤香偏著
書蒸蠹欲生
壤簷聞瓦墮
漲水見堤平
溝溢池魚出
天低塞雁征
螢飛明闌廡
蛙鬧雜疎更
藥釀時須焙
舟閑任自橫
未憂荒楚菊
直恐敗吳杭
夜永燈相守
愁深酒細傾
浮雲會消散
鼓笛賽西成

小舟航湖夜歸書觸目

雲黑風號不見星
古丘叢木聚精靈
舟人已過微相語
兩兩三三鬼火青

又

電掣半空雲黯黯
舩浮積水浪憑陵
茫然不辯身何處
猶喜東南見塔燈

又
遙望湖塘炬火迎，纔歸村舍雨如傾。畏途回首知安在，催喚兒童暖酒鐺。

幽居書事

莫數人間苦不諧，清時有味是歸來。已因積毀成高臥，更借陽狂護散才。正欲清言聞客至，偶思小飲報花開。紛紛爭奪成何事，白骨生苔但可哀。

又

安命知天更不疑，幽居最愛早寒時。手中書墮初酣枕，窗下燈殘正劇碁。鮮鯽每從溪女買，香菰時就釣船炊。山陰清絕君須記，雪裏騎驢未辦詩。

晚霽

雨斷簷餘滴，雲疎日漏明。人其如積潦，天自活疲氓。溪碓春香稻，霜叢剪綠橙。書生久愁臥，作意賦新晴。

又

漲水返舊壑，浮雲歸故山。園丁藝蔬去，鄰婦賃春還。喬木蒼煙外，孤村落照間。莫嫌樽酒薄，且用破愁顏。

雨後散步後園

淡日輕雲未快晴，涓涓溝水去無聲。為憐一徑新苔綠，別就牆陰取路行。

又

澤國霜遲木未疎，秋來更覺愛吾廬。芭蕉綠潤偏宜墨，戲就明窗學草書。

示客

十年奔走每思歸，剩喜湖邊晝掩扉。社燕免教嘲作客，海鷗曾是信忘機。暉暉晚日收新稻，漠漠新寒試夾衣。留客盤餐君勿笑，一畦蔬甲摘初稀。

甲子晴

今日甲子晴，秋稼始可言。老農喜相覓，隨事具雞豚。掃地設菅席，酌酒老瓦盆。耳熱仰視天，何異傾金尊。牛羊散墟落，霽色滿衡門。起舞屬父老，勿恨此酒渾。後一日復雨。

一雨三日水抹隄，南村北村雲。凄凄天公約束龍，返穴不忍嘉穀沈塗泥。日光清薄潦未縮，起視又嘆行雲西。初纔浙瀝灑窗戶，俄已湍瀉鳴溝渠。豐凶相乘若翻手，振救小緩輒噬臍。窮閭腐儒不預此，且收芋栗寬兒啼。

紹興庚辰余遊謝康樂石門與老洪道士痛飲

賦詩既還山陰王仲信為予作石門瀑布圖今二十有四年開圖感歎作

二十餘年別石門，燈前感舊欲消魂。人生萬事皆如夢，自笑區區記劍痕。

又

愛酒黃冠鬢如雪，石門邂逅一樽同。懸知久作此山土，愁對畫圖秋雨中。

雨中遣懷

秋稼連雲飽不疑，寧期一敗莫支持。雨如梅子初黃日，水似桃花欲動時。正晝蚊蟲驅不去，終宵鼃黽怒何為。凶年氣象堪流涕，禾把紛紛滿竹籬。

秋思

秋來情味更堪論，身寄城南五畝園。委轡看山無鐵轡，梅聖俞馬名。拾樵煎茗有青猿。王元之小童名。陂塘夜雨添新漲，原野煙蕪減舊痕。豈是平生少親友，略無人肯訪孤村。

秋雨數

點點滴滴雨到明，悽悽惻惻夢不成。窗間殘燈暗欲滅，匣中孤劍鏗有聲。少年讀書忽頭白，一字不試空虛名。公車自薦心實取，新豐獨飲人所驚。太行千仞插雲立，黃流萬里從天傾。遺民久憤汗左衽，虜何足煩長纓。霜風初高鷹隼擊，天河下洗煙塵清。投筆急裝須快士，令人絕憶獨孤生。獨孤策藜人前歲死於峽中。

雨中小酌

晨起占雲日日西，吾廬煙雨正凄迷。愁看場上禾生

耳且泥盃中酒到臍窗日幾時飛野馬甕天惟是舞
醜鷄前村著屐猶通路自摘金橙擣鱸齋

衰病有感

衰與病相乘山房冷欲冰在家元是客有髮亦如僧
愁絕窮秋雨情親獨夜燈西鄰有甘井聊得曲吾肱

又

倦枕先雞覺寒汀伴雁孤寂寥誰省錄衰疾且枝梧
鶴骨秋添瘦龜腸夜自呼蓋棺吾事定未敢泣窮途

又

羈宦一周星歸如化鶴丁灰心成寂寂霜鬢失青青
小智空自貴大愚元不靈客來應絕倒扶病講丹經

雨止頓寒遂有晴意

霧雨昏昏地氣騰盤中朝莫厭驅蠅未看霽色排陰
翳先覺清寒洗鬱蒸喚客喜傾新熟酒讀書貪趁欲

殘燈明朝樂事真當賀山北山南曳瘦藤

秋晴出遊

雨餘清冷近霜天拄杖閑拖不挂錢黃葉舞風初
藪碧渠通溜正濺濺無情日馭工催老耐事天公聽

放顛薄莫行歌並湖去有人偷樣畫癯僂

悲秋

形骸枯槁病侵陵少睡長飢一老僧霜夜羈愁更無
賴莫收書策且留燈

又

蕭蕭衰鬢點新霜人靜房櫳易斷腸等是閉門愁裏
過任教風雨壞重陽

又

殘年孤寂不禁秋醉自淒涼醒更愁富貴空成守錢
虜吾今何止百宜休司空表聖有言有四宜休

又

小雨簾櫳慘淡天醉中偏藉亂書眠夢回有恨無人
會枕伴橙香似昔年

久雨道懷

莫年惜日月木落輒動心閑居念親友所願聞足音
風雨斷官道吾廬沉幽深渺渺雲水鄉蕭蕭蘆荻林
艸茂豪鳴蛙天闌無來禽四顧此何處悠悠付孤斟
野步書觸目

月下

村落初過兩園林殊未霜幽花雜紅碧野橋半青黃
飛鷺橫秋浦啼鴉滿夕陽最憐山脚水撩亂入陂塘

九月十日

不須扇障庾公塵散地脩然學隱淪風帽可憐成昨
夢菊花已覺是陳人昏昏但苦餘醒在草草久無佳
句新歎息吾生行已矣老來歲月似奔輪

秋晴園中山禽絕多有感而賦

九日秋陰一日晴山禽應喜我閑行幽吭弄暖閑相
命勁翻凌風遠有聲熟果啄餘看核墮細枝銜得欲
巢成名園美蔭不飛去似比交朋猶有情

燈籠

我年十六遊名場靈芝借榻棲僧廊鐘聲纔定履聲
集弟子堂上分兩廂燈籠一樣薄臘紙瑩如雲母含
清光還家欲學竟未暇歲月已似奔車忙書生白首
故習在顛倒簡牘紛朱黃短檠雖復作老伴目力眩
晃不可常平生所好忽入手摩挲把挈喜欲狂蘭膏
激灑支達日秋雨蕭瑟輸新涼討論廢忘正塗乙遂
欲盡發萬卷藏所嗟衰病終難勉非復當年下五行
舟過南莊呼村老與飲示以詩

舟過南莊呼村老與飲示以詩

我昔過此時荷花粲雲錦今我復來遊霜露已淒凜
鄉鄰福苦薄積雨敗垂稔禾頭耳艱穢熟計難高枕
所懼憂吾君歲莫詔發廩勿言村醪薄排悶聊共飲

玄雲吞落日大風東北起隔林鳴兩鳩當道行衆螳
晴來未三日雨候乃復爾我場何時乾嘉穀在泥滓

又

玄雲吞落日大風東北起隔林鳴兩鳩當道行衆螳
晴來未三日雨候乃復爾我場何時乾嘉穀在泥滓

又

玄雲吞落日大風東北起隔林鳴兩鳩當道行衆螳
晴來未三日雨候乃復爾我場何時乾嘉穀在泥滓

又

玄雲吞落日大風東北起隔林鳴兩鳩當道行衆螳
晴來未三日雨候乃復爾我場何時乾嘉穀在泥滓

又

玄雲吞落日大風東北起隔林鳴兩鳩當道行衆螳
晴來未三日雨候乃復爾我場何時乾嘉穀在泥滓

豐凶歲所有遊惰古所恥努力教子孫天公終可倚
秋夜獨過小橋觀月

湖上蕭蕭葉落頻小橋東畔岸綸巾乍圓素月升寒
壁欲散微雲蹙細鱗有酒便應遺世事得閑隨處勝
官身笑談但恨朋遊少安得幽人與卜鄰

紹興中與陳魯山王季夷從兄仲高以重九日
同遊禹廟後三十餘年自三橋泛舟歸山居秋
高雨霽望禹廟樓殿重複光景宛如當時而三

人者皆下世予亦衰病無聊慨然作此詩
重樓傑閣倚虛空紅日蒼煙正鬱葱鄉國歸來渾似
鶴交朋零落不成龍人生真與夢何校我輩故應情
所鍾淚漬清詩却回棹不眠一夜聽鳴蛩

雜興
風雨雞嗥雪霜柏森森獨居雖無友二物感我深

又
萬物各有時蟋蟀以秋鳴我老自少眠那得憎此聲
又
漲水入我廬萍葉黏半扉日出水返壑念汝何由歸

又
清霜染丹葉秋晚粲如春回首風吹盡天公解戲人
予秋夜觀月得瘧疾枕上賦小詩自戲

貪看霜月步亭皋不覺寒侵范叔袍且倚誦詩驅瘧
鬼斷無人寄碧腴膏唐小說載鄭虔妻病瘧杜子美教誦子璋
髑髏血糝糊等句以却之又元微之謫江陵病瘧白樂天自長安寄以

碧腴膏
後春愁曲并序
予在成都作春愁曲頗為人所傳偶見舊稿
悵然有感作後春愁曲

六年成都擅豪華黃金買斷城中花醉狂戲作春愁
曲素屏紈扇傳千家當時說愁如夢寐眼底何曾有
愁事朱顏忽去白髮生真墮愁城出無計世間萬事
元悠悠此身長短歸山丘閉門堅坐愈生愁未死且

復秉燭遊
秋花數

秋花如義士榮悴相與同豈比輕薄花四散隨春風
黃菊抱殘枝寂寞臥寒雨拒霜更可憐和蒂浮煙浦
古來結交意正要共死生讀我秋花詩可代丹雞盟
寄題朱元晦武夷精舍

先生結屋綠巖巖邊讀易懸知屢絕編不用采芝驚世
俗恐人謗道是神僊

又
蟬蛻巖間果是無世人妄想可憐渠有方為子換凡
骨來讀晦菴新著書

又
身閑剩覺溪山好心靜尤知日月長天下蒼生未蘇
息憂公遂與世相忘

又
齊民本自樂衡門水旱那知不自存聖主憂勤常吁
食煩公一一報曾孫

又
山如嵩少三十六水似叩枰九折途我老正須閑處
著白雲一半肯分無

病思
夜窗孤影怯青燈瘦著秋衣欲不勝光景正如寒圃
蝶情懷却羨病寮僧篝爐冷落曉殘葉禪榻欹斜倚
古藤莫怪類然遺世事鬢絲日日鏡中增

病愈
秋夕高齋病始輕物華凋落歲崢嶸蟹黃旋擘饒涎
墮酒綠初傾老眼明提筆詩情還跌宕倒淋藥裹尚
縱橫閑愁恰似憎人睡又起挑燈聽雨聲

絕句
病中忽有眉山士人史君見過欣然接之口占

蜀語初聞喜復驚依然如有故鄉情絳羅餅餠玻璃
酒何日晝頭伴我行眉州以羅裹餅餠至二十四子號通義餠

玻璃春郡酒名也亦為西州之冠

初寒

我窮不自活萬事付天公今年寒苦晚霧雨常濛濛
雖道裘褐憂坐念疾病攻清夜喜不寐萬木號西風
新霜纔幾何瘴癘一掃空曉看烏白林已有數葉紅
微雲時去來寒日猶瞳矐振衣起出戶一笑尋鄰翁

出塞曲

北風吹急雪夜半埋氈廬將軍八千騎萬里逐單于
漢家如天臣萬邦歡呼動地單于降鈴聲南來金閃
鑠赦書已報經沙漠

無題

碧玉當年未破瓜學成歌舞入侯家如今顛顛篷窗
裏飛上青天妒落花

道室即事

一簪殘雪寄林亭手把黃庭兩卷經琴調養心安澹
泊爐香挽夢上青冥隨緣久已均憂喜玩世惟須半
醉醒溪父園公殊未見類然誰與共忘形

夙興

青燈黃卷擁篝爐殘髮垂蓬未暇梳略似諸生勤夜
課絕勝小吏迫晨趨雞聲啞啞寒猶力月影離離淡
欲無幽致滿前君不領枉因留滯數頭顱

長安道

千夫登登供版築萬手丁丁供斲木歌樓舞榭高入
雲複幕重簾晝燒燭中使傳宣騎飛鞚達官候見車
擊轂豈惟炎熱可炙手五月瞿唐誰敢觸人生易盡
朝露晞世事無常壞陂復土師分鹿真是夢塞翁失
馬猶為福君不見野老八十無完衣歲晚北風吹破
屋

記夢

夜夢有客短褐袍示我文章雜詩騷措辭磊落格力
高浩如怒風駕秋濤起伏奔蹴何其豪勢盡東注浮
千艘李白杜甫生不遭英氣死豈埋蓬蒿晚唐諸人

戰雖臺眼暗頭白真徒勞何許老將擁弓刀遇敵可
使空壁逃肅然起敬豎髮毛伏讀百過聲嘈嘈惜未
終卷雞已號追寫尚足驚兒曹

冬夜讀書

茂陵病後非平昔瘦骨於岬短髮疎紅燭悔從長夜
飲青燈喜對小年書聖賢親見生非晚忿忿俱空死
有餘破屋頽垣君勿笑更闌絃誦滿吾廬

遊僊

羅澗谷選放翁詩有遊僊七言古詩一首即飄飄初珥

玉殿三絕句合成者附記于此

飄飄鸞鶴杳難攀萬里東遊海上山應有世人遙稽
首紫簫餘調落雲間

又

鳳舞鸞歌宴藥宮碧桃花下醉千鍾紅塵滿滿重歸
去花未開殘宴未終

又

玄圃春風賜宴時雙成獨奏玉參差侍晨飲醕虛皇
喜一段龍綃索進詩

又

初珥金貂謁紫皇僊班最近玉爐香為憐未慣叢霄
冷獨賜流霞九醞觴

又

玉殿吹笙第一僊花前姿麗色悽然憶曾偷學春愁
曲謫在人間五百年

過鄰家

今日病良已筇枝發興新高居遺世事一笑過吾鄰
夕照明丹葉秋風老白蘋素衣雖化盡不為犯京塵

山園晚興

傳盃誰與豁幽悰霜晚黃花未滿叢過雁一聲寒靄
外短籬數掩夕陽中易雖病裏猶能讀詩到愁邊始
欲工惟有功名真已矣懶將華髮對青銅

初冬出扁門歸湖上

桑柘枝空葉作堆斜陽更著角聲催雲歸玉筇茫茫

去水下蘭亭曲曲來稻壠受犁寒欲遍漁船入市晚
爭回貂裘破弊霜風冷愁對青燈撥蠶酷

新寒小醉睡起日已高戲作

倦眼矍矍睡易成華胥稅駕不多程衾重枕穩當霜
夕氈暖屏深擁宿醒栩栩蝶魂閑自適縣縣龜息靜
無聲幽棲豈是忘微祿正怕條鈴擾五更

太息

閉將白髮照清溝太息年光逝不留勸業無期著書
晚此生與世判悠悠

冬夜讀書

平生喜藏書拱壁未爲寶歸來稽山下爛漫恣探討
六經萬世眼守此可以老多聞竟何用綺語期一掃
幽居出戶稀衰病擁爐早青燈照黃卷作意勿艸艸

晚步

地爐附殘火將夕鳥雀喧食已了無事扶杖閑出門
披披歸雲陣淡淡新月痕平生足憂患歲晚信乾坤
緩步牛羊巷浩歌桑柘村九原不可作吾意與誰論

村舍

空谷人稀到新寒病頓輕晨霜催小獵宿雨潤新耕
艸莽秦馳道雲煙越故城千年不磨滅惟有莫山橫

野步至近村

隨意出柴荆清寒作晚晴風吹雁北鄉雲帶月東行
童稚爭追逐漁樵習送迎白頭寧復仕惟此錢餘生

夜坐油盡戲作

金樽畫燭少年豪白首孤燈不厭勞夜漏雖深書未
竟半缸誰與續殘膏

又

欲盡殘燈更有情可憐剪斷讀書聲區區紙上太癡
計一笑開門看月明

歲莫

離離井上桐鬱鬱牆下桑零落豈不悲無奈中夜霜
蟋蟀更可念歲莫依客牀客亦自孤寂衣篝歇殘香

一燈挂西壁耿耿青無光援筆欲寫愁三喟不成章
幽居感懷

偶傍楓林結數椽東歸也復度流年汀洲雁下依殘
水墟里人行破夕煙十月風霜欺客枕五更鼓角滿
江天散關清渭應如昨回首功名一愴然

山中夜歸戲作短歌

駿馬不用換美妾名酒不用博涼州霜天飲酒騎馬
出馳獵蹴躡川原秋少年意薄萬戶侯白首乃作窮
山囚箭鋒豈必盡狐兔曾次聊欲平山丘夜歸湖上
酒初醒莊舍蕭條燈火冷解刀自笑太麤生却染松
煤飛兔額

狂歌

少年雖狂猶有限遇酒時能傲憂患即今狂處不待
酒混泥長歌老巖澗拂衣即與世俗辭掉頭不受朋
友諫挂帆直欲截煙海策馬猶堪度雲棧枵然癡腹
肯貯愁天遣作盜盛藜莧髮垂不櫛性所便衣垢忘
濯心已慣眼前故人死欲無此生行矣風雨散羞爲
塵土伏轡駒寧作江湖斷行雁

遲莫

遲莫固多感況此歲崢嶸霜霰忽已集夜聞絡緯鳴
青燈不解語依依有餘情銅瓶煮寒泉中作笙簫聲
沈憂能傷人一夕白髮生蓬萊渺雲海金丹幾時成

種秫

種秫供留客移花待探春愁邊開樂園鬧裏作閑身
鬢髮今如此頭顱莫問人白鷗非避俗野性自難馴

擁爐

睡少人人笑老生擁爐孤坐欲三更月移西去失花
影風自北來傳漏聲鳧鼎煎茶非俗物雁燈開卷愜
幽情興來自喜猶彊健一紙清詩取次成

冬夜吟

昨夜疑霜皎如月碧瓦鱗鱗凍將裂今夜明月却如
霜竹影橫窗更清絕造物有意娛詩人供與詩材次

第新飢鴻病鶴自無寐山窮水絕誰為鄰西村梅花消息動唧唧寒酷漸鳴瓮儘將醉帽插幽香此生莫作長安夢

讀書罷小酌偶賦

歲晚淒涼冰雪晨頽垣破屋鏡湖濱浮生亦念古有死壯氣要使胡無人黃卷展殘三太息綠尊酌罷一嘔伸躬耕不預差科事猶向清時作幸民

移花遇小雨喜甚為賦二十字

獨坐閑無事燒香賦小詩可憐清夜雨及此種花時書生歎

君不見城中小兒計不疎賣漿賣餅活有餘夜歸無事喚傳侶醉倒往往眠街衢又不見墮頭男子手把鉏丁字不識稱農夫筋力雖勞憂患少春秋社飲常歡娛可憐秀才最誤計一生衣食囊中書聲名纔出衆毀集中道不復能他圖抱書餓死在空谷人雖可罪汝亦愚嗚呼人雖可罪汝亦愚曼倩豈即賢侏儒

冬夜醉解殘燈熒然起讀書至明賦詩十韻

冬夜厭久坐頗幸一醉眠滿酌文舉尊徑臥子敬軒鼻雷未及作眼電遽瞭然孤燈如秋螢喚我開陳編初欲限一卷隨手紛聯翩歡然不知疲忽已晨鳥遷嗟我行六十衰病迫殘年仕進今永塞文章後誰傳飽食而安寢此計定自賢勿學州玄翁死為人所憐

夜行

路長憂炬盡馬弱畏泥深腸斷猿啼樹魂驚鬼嘯林艱危窮自慣寒苦老難禁回首金牛道加鞭負壯心頃自小益還南鄭夜宿金牛驛時方大寒人馬俱欲僵仆今十二年矣

遊淳化寺

蕭寺久不到偶來幽興長蠹穿珠九曲蜂釀蜜千房兩過山橫翠霜新橘弄黃年衰道不進珍重一爐香僧問拯迷如何是祖師西來意師曰古殿一爐香拯迷即淳化也

餘慶出遊夜歸

杖藜尋勝勝愜幽情芒屨如飛病體輕迎客野梅纔半

吐避人山雉尚徐行東谿水落難聲壯南嶺雲酣雪意成薄莫歸來僧已定佛龕獨對一燈明

遊前山

兀兀無歡意閑遊未擬回屐聲驚雉起風信報梅開山雪堆僧衲溪流動蟄雷平生一桐帽自惜犯塵埃齋前獨坐戲作

閉戶學僧坐頽然遺世情虛窗鷓飛影枯葉犬行聲雪擁杉灰煖雲垂紙帳明清饒不可耐一笑聽華鯨晚同僧至谿上

就就臥石熊當道矯矯長松龍上天不怕雪雲寒到骨喚僧扶杖立橋邊

僧飯

雲碓春杭白齋廚爨桂香百窮慚燕頤一飽慰龜腸舉世知心少平生為口忙何當棄簪笏終老掩山房山色蒼寒雲釀雪旗亭據榻與悠哉麴生正欲相料理催喚風流措措來

平水小憩

暮食草菴中肩輿小市東霧收山淡碧雲漏日微紅酒旆村場近罾船浦澈通平生喜行路小住莫匆匆

自若耶溪舟行杭鏡湖而歸

換馬亭前煙火微鬪牛橋畔行人稀雲山慘澹少顏色霜日青薄無光輝新酒菊成桑正落美人信斷雁空歸高樓何處吹長笛清淚無端又溼衣

宴坐

鼓樂弦歌萬二千年魔剩欲破幽禪道人袖手心如水一點紗燈夜悄然

遊山歸偶賦

此生本寄一浮漚歸臥茅茨又四秋習氣未除惟痛飲幻軀偶健且閑遊買蓑山縣雲藏市橫笛江城月滿樓與世沈浮最安樂莫思將相快恩雝

六十吟

人生久矣無百年六十七已爲壽嗟予忽忽蹈此境衰髮如蓬面枯瘦孤松摧折老澗壑病馬淒涼依棧豆尚無籌策活目前豈有功名付身後壁疎風入燈焰搖地爐火盡寒蕭蕭胸中白虹吐千丈庭樹葉空衣未續

舒悲

嗜酒苦猖狂畏人還醒輒老病始悔數天下無此錯管葛逝已久千古困俗學捫蝨論大計使我思景略中原失枝梧胡塵暗河洛天道遠莫測士氣伏不作煌煌東觀書無乃太寂寞丈夫不徒死可作一丘貉歲晚計愈疎撫事淚零落

山園晚興

病骨初輕野興濃閑扶拄杖夕陽中艸枯陂澤涓涓水木落園林浙浙風楊子淒涼老天祿馬周顛顛客新豐壯心未與朱顏改一笑憑高送斷鴻

獨立

獨立柴荆外頽然一秃翁亂山吞落日野水倒寒空憂患工催老飄零敢諱窮漁歌亦何恨悽斷滿西風

探梅

半吐幽香特地奇正如官柳弄黃時放翁頗具尋梅眼可愛南枝愛北枝

又

江路雲低糝玉塵暗香初探一枝新平生不喜凡桃李看了梅花睡過春

遠興

莫言人世足悲傷只爲詩情合斷腸窗檻雨晴湖灩灩郊墟煙重月茫茫梅花調苦愁三弄竹葉香清泥一觴閉戶終年嗟局促不如新雁到衡湘

張功甫許見訪以詩堅其約

零落汀蘋露氣清北窗昨夜已秋聲書來屢有入東約坐上極思虛左迎激烈哦詩殿金石縱橫落筆走蛟鯨吾曹此事期千載老眼相逢剩要驚

劍南詩稿目錄
卷第十六

夜夢與數客觀畫有八幅龍湫圖特奇客請予作詩其上書數十字而覺不復能記明日乃追補之亦髣髴夢中意也 泛舟 夜聞大風感懷賦吳體 骨相 有感二首 城西晚眺 苦寒 夙興 冬夜讀書甚樂偶作短歌 冬夜月下作 感憤 蓬戶 行後園 曉出遇獵徒有作 贈道侶 六言四首 作雪未成自湖中歸寒甚飲酒作短歌 題傳神 閏月三夜舍西觀新月 獨夜 晚出偏門 蕙苒 答鄭虞任檢法見贈 舟中曉賦 野興二首

月夜有感 落魄 遺興 湖村野興二首 看鏡 塞上 舟過會稽山下因繫舟遊近村迨莫乃歸 人日偶遊民家小園有山茶方開 過杜浦橋二首 上元日晝臥 莊器之作招隱閣項平父諸人賦詩予亦繼作 春夜讀書感懷 宿能仁寺 寄題方伯驀遠菴

雨中宿石帆山下民家 中夜雨霽月色入戶起飲酒一杯作絕句 贈石帆老人 溪上醉吟 囚山 小園 鄉人或病予詩多道蜀中遊樂之盛適春日遊鏡湖共請賦山陰風物遂卽杯酒間作四絕句却當持以誇西州故人也 四首 病中 病起 小築 記夢 久雨排悶 雨中泊舟蕭山縣驛 夜漏欲盡行度浮橋至錢清驛待舟 江頭十日雨 柯橋客亭二首 小雨舟過梅市 曉枕 巢菜并序 吳娘曲 感舊 晨起閒步 初夏同桑甥世昌過隣家 寓歎 春夏雨暘調適頗有豐歲之望喜而有作 聞虜酋遁歸漠北 初夏遊凌氏小園 偶得北虜金泉酒小酌二首 無題 戲贈 題少陵畫像 閑居書事 登臺

遇雨避於山亭晚霽乃歸 村居書觸目 訪醫 夏夜讀書自嘲 夏日小宴 送紫霄女道士四明謝君二首 醉中夜自村市歸 城北夜 秋夜舟中作 日晚散步湖上遇小雨 安期篇 曉望海山 山園草木四絕句 賽神曲 夜中起讀書戲作二首 秋夜出門觀月 雨中買酒鏡湖酒樓 聞虜政衰亂掃蕩有期喜成口號二首 甲辰中秋無月十七夜獨傲然達旦 悲秋 農家秋晚戲詠 病中作 秋夜讀書 病起 晨起 秋夜 雨中過東村 山寺 天王廣教院在叢山東麓予年二十餘時與老僧惠迪遊略無十日不到也 淳熙甲辰秋觀潮海上偶繫舟其門曳杖再遊 况如隔世矣 江月歌 初寒書懷 歲莫晨興 村飲 夜半讀書罷出門徙倚久之歸賦長句 曝書偶見舊稿有感 崑崙行 一室 得所親廣州書 幽居戲詠 幽事

劍南詩稿卷第十六

宋陸游務觀

夜夢與數客觀畫有八幅龍湫圖特奇客請予作詩其上書數十字而覺不復能記明日乃追補之亦髣髴夢中意也

高堂閱畫娛嘉賓巨幅小卷縱橫陳其間一圖最傑作命意落筆驚倒人奇峯峭立插地軸飛瀑崩瀉垂天紳壽藤老木幻荒怪深潭危棧愁鬼神忽然白晝起雷電始覺異物蟠齋淪陰雲四興誅老魅甘澍連夕蘇疲民豈惟陂澤苗盡立已活億萬介與鱗文章與畫共一法腕力要可回千鈞錙銖不到便懸隔用意雖盡終苦辛君看此圖凡幾筆一一圓勁如秋蓴乃知世間有絕藝天造艸昧參經綸吾言未竟且復止剩發幽與天公噴

泛舟

女牆鬱鬱帶斜暉短棹還從剡曲歸木葉經霜渾欲盡人家近水自相依逢迎俗客言多忤顛沛窮途計易非雪裏閉門殊不惡故貂雖弊勝無衣

夜聞大風感懷賦吳體

故都宮闕汗羶腥原野久稽陳大刑未須校尉戍西域先要將軍空朔庭意言揮戈可退日身乃讀書方聚螢病起窗前髮如雪夜聞風聲孤涕零

骨相

骨相元知薄功名敢自期病侵疆健日閑過聖明時形勝輪臺地飛騰瀚海師江湖雖萬里猶擬綴聲詩有感

書生事業絕堪悲橫得虛名毀亦隨怖懼幾成牀下伏艱難何啻劍頭炊貸監河粟元知誤乞尉遲錢更

覺癡已卜一菴鵝鼻谷 鵝鼻谷在秦望山秦刻石之所崖嶺巉峻可無芝朮療朝飢

又
讀遍名山萬卷藏殘年肯受俗低昂正須嘯詠風濤上未至悲辛酒肉旁夢裏功名誰復計閑中日月不勝長虛皇有詔君知否盡賜江湖作醉鄉

城西晚眺

嫋嫋城笳咽熒熒漁火青霜凋兩岸柳水浸一天星靜看船歸浦遙聞雁落汀倚闌幽興極不敢恨飄零

苦寒

凍硯時能出苦吟濁醪亦復慰孤斟誰知冰雪凝嚴候自是乾坤愛育心癘鬼盡驅人意樂遺蝗一洗麥根深但嫌景短妨書課棲鳥紛紛又滿林

夙興

病後精神殊未減披衣每起待晨雞愛書不厭如平壘戒酒新嚴似築堤莫數茅茨常局促猶勝簿領苦沈迷迎長漸近丹當熟已覺温温温下徹臍
冬夜讀書甚樂偶作短歌

冬夜月下作

衰病作書崇常恨無新功免甌供茗粥睡思一洗空郊居近城闌漏鼓傳繁響細帙開爛漫牙籤紛墨重朱黃參筆墨照映燈花紅魯壁汲冢秘天遣慰困窮衮衣窺藻火宗廟聽笙鏞端居得至樂生世豈不逢藜羹冷未啜短褐忘嚴冬拜手謝造物不須黑頭公

感憤

造物寧能因此翁浩歌庭下答松風煌煌斗柄插天北熠熠月輪生海東皂纛黃旗都護府峨冠長劍大明宮功名晚遂從來事白首江湖未數窮

蓬戶

今皇神武是周宣誰賦南征北伐篇四海一家天歷數兩河百郡宋山川諸公尚守和親策志士虛捐少壯年京洛雪消春又動永昌陵上艸芊芊

蓬戶

蓬戶真堪設爵羅歲時野老自相過人情靜處看方見詩句窮來得最多枕上長歌時激烈樽前一笑且

婆娑白頭萬事都經過莫為悲傷損太和

行後園

霜風吹枯桑落葉乾有聲陂池日已涸沙水見底清
人生非金石歲莫難為情安得天邊鶴駕之以遐征

曉出遇獵徒有作

出門萬瓦粲晨霜忽憶行軍起裏創賣劍買牛身已
老拳旗斬將夢猶狂奇才古有潛屠肆豪氣今誰寓
獵場狐兔艸間何足問合留長箭射天狼

贈道侶

崎嶇世路久知難準擬丹成玉鍊顏十載尋人遍巖
穴一樽隨處對溪山蘇門晝寂聞舒嘯函谷秋清候
度關剩欲相招同此事疑君未辦一生閑

六言

功名正恐不免富貴酷非所須鐵馬未平遼碣釣船
且醉江湖

又

噉飯一簞不盡結廬環堵猶寬常得奉祠玉局不須
艸詔金鑾

又

烏有翁邊貰酒無何鄉裏尋花把定東風一笑今年
別是生涯

又

壯歲京華羈旅莫年湖海清狂勿倚新知可樂笑中
白刃如霜

作雪未成自湖中歸寒甚飲酒作短歌

黑雲垂到地飛霰如細礫我從湖上歸散髮醉吹笛
少年志功名目視無堅敵慘淡古戰場往往身所歷
寧知事大繆白首猶寂寂淒涼武侯表零落陳琳檄
報主知何時誓死空憤激天高白日遠有淚無處滴

題傳神

鹽車心愧渥注姿邈近風雲妄自期鬻雪豈無歸漢
日飯牛猶有相齊時君看短褐琴橫膝誰許我冠劍

拄頤白髮蕭蕭雖憊矣時來或將渡遼師 李英公平遠
東時已八十餘

閏月三夜舍西觀新月

平生絕愛初三月況是平池浸玉鉤老去人間朋舊
少一樽誰與話清愁

獨夜

城上長更續短更江平天迥雁方征燈明紙帳雪霜
色火熟銅瓶風雨聲濁酒未傾心已怯細書時讀眼
猶明蕭然一室平生慣燻下何須擁萬兵

晚出偏門

一段新愁帶宿醒半欹烏帽策驢行村墟香動梅初
破裘褐寒輕雪未成渡口人爭紅日晚沙邊雁帶碧
煙橫悠然又覓長堤路腸斷城樓畫角聲

蕙苾 蜀人謂其實為蕙米唐安所出尤奇

初遊唐安飯蕙米炊成不減雕胡美大如芡實白如
玉滑欲流匙香滿屋腹腴項鬣不入盤况復殮酪誇
甘酸東歸思之未易得每以問人人不識嗚呼奇材
從古棄艸菅君試求之籬落間

答鄭虞任檢法見贈

臥龍山前秋雨晴鄭子過我如夙昔照人眉宇寒巉
巖懸知筆有千鈞力鏡湖歲莫霜葉空乃聞載酒同
諸公歸來湖山皆動色新詩一紙吹清風文章要須
到屈宋萬仞青霄下鸞鳳區區圖笑非絕倫彈丸之
評方誤人

舟中曉賦

小艇下滄浪吳歌特地長斜分半艙月滿載一篷霜
香甌炊菰白醇醪點蟹黃宦遊元為口莫恨老江鄉

野興

玉門關外何妨死飯顆山頭不怕窮春食已成花欲
動了無一事著胷中

又

猿臂將軍老未衰氣吞十萬羽林兒南山射虎自堪

樂何用封侯高帝時

月夜有感

炯炯冰輪升澹澹玉宇碧高樓傾美酒一醉不容失
陸生獨何事閉戶飽岑寂年來負風月豈止此一夕
平生酒邊身欲老每自惜夜闌耿不寐浩歌出金石

落魄

落魄東吳莫笑儂今年要不負春風閑愁擲向乾坤
外永日移來歌吹中酒浪欲爭湖水綠花光却妒舞
衫紅公卿憂責如山重肯信人間有放翁

遣興

壯年一箭落雙鵬野餉如今擷藥苗寒與梅花同不
睡悶尋鸚鵡說無膠烏絲闌上詩初就綠綺聲中酒
半消老去可憐風味在未應山海混漁樵

湖村野興

十里疎鐘到野堂五更殘月伴清霜已知無奈姮娥
冷瘦損梅花更斷腸

又

山色空濛雨點微醉中不覺溼蓑衣何妨乞與丹青
本一棹橫衝翠靄歸

看鏡

局促人間百不如每看清鏡歎頭顱醉來風月心雖
在老去軒裳夢已無棋劫正忙停晚餉詩聯未穩畫
寒爐乘除尚喜身彊健六十登山不用扶

塞上

塞上今年有事宜將軍承詔出全師精金錯落八尺
馬刺繡鮮明五丈旗上谷飛狐傳號令蕭關積石列
城障不應幕府無班固早晚燕然刻頌詩

舟過會稽山下因繫舟遊近村迨莫乃歸

六十齒髮衰歲月如逝波秦王酒食邊知復幾經過
欣然拾畫幟仄步捫青蘿一徑入幽谷四面聞樵歌
白雲忽破碎翠木相蕩摩微漱春塘滿柳陰戲雙鵝
浮生百憂中此樂願豈多日莫吾其歸已恐爛斧柯

人日偶遊民家小園有山茶方開

人日西郊路晨光射淺難停橈喜蕭散照影數衰殘
社酒香浮瓮春蔬綠滿盤山茶雖慰眼不似海雲看
成都海雲寺山茶花一樹千苞特為繁題

過杜浦橋

橋外波如鴨頭綠杯中酒作鵝兒黃山茶花下醉初
醒却過西村看夕陽

又

橋北雨餘春水生橋南日落莫山橫問君對酒胡不
樂聽取菱歌煙外聲

上元日晝臥

積雨連上元孤愁臥空館宿醒殊未解欲起意復懶
牀敷蠻氈穩被擁吳綾暖殘香碧縷細軟火紅焰短
雖云少睡眠聊喜屢展轉昏昏已莫一笑呼茗椀

莊器之作招隱閣項平父諸人賦詩予亦繼作

諸公共賦及招隱細字斜行肯見傳語到淮南小山
作人如江左永和年一窗蘿月禁春瘦萬壑松風撼
晝眠我亦尚嫌林谷淺因君更擬斷雲煙

春夜讀書感懷

荒林臬獨嘯野水鵝羣鳴我坐蓬窗下答以讀書聲
悲哉白髮翁世事已飽更一身不自恤憂國涕縱橫
永懷天寶末李郭出治兵河北雖未下要是復兩京

三千同德士百萬羽林營歲周一甲子不見胡塵清

賊酋實孱王賊將非人英如何失此時坐待姦雄生
我死骨即朽青史亦無名此詩倘不作丹心尚誰明

宿能仁寺

小兩暗江城倦客寄僧榻孤燈如秋螢清夜自開闔
遙憐萍青青厭聽鼃閣閣窗明竟無寐卯酒倒殘榼

寄題方伯暮遠菴

方侯胷中負經濟議論源源有根抵借令不用老山
林尚欲著書垂萬世百年苦短萬世長榮利一時真
聚蚋渠曹定自別肺肝今夕不為明日計

雨中宿石帆山下民家
老覺山行倦閑便水宿幽雨泥看放鴨煙艸聽呼牛

槃箸煩煩勸窗扉喜小留餘年竟何事高枕送悠悠
中夜雨霽月色入戶起飲酒一杯作絕句

吹盡浮雲天宇清城頭疊鼓報三更平生無此一杯
酒玉筍峯頭看月生玉筍峯在石帆之南

贈石帆老人

地僻林深客到稀高春未起閉柴扉新松鬱鬱三千
本密竹蕭蕭一尺圍溪叟旋分菰米滑山童新采蕨
芽肥因君更作長閑想麟閣雲臺竟是非

溪上醉吟

行行不知溪路深但怪素月生遙岑不辭醉袖拂花
絮與子更醉青蘿陰

囚山

垣屋參差綠樹邊囚山光景饒華顛平川極目思秦
地大澤浮空憶楚天刺虎射麋俱已矣舉杯開劍忽
悽然此生終遣英雄笑棘沒銅駝六十年

小園

松菊僅三畝作園真彊名馴禽驚不去熟果墜無聲
倦就盤陀坐閑拈柳栗行茅亭亦疎豁憑檻看春耕

鄉人或病予詩多道蜀中遊樂之盛適春日遊
鏡湖共請賦山陰風物遂即杯酒間作四絕句

却當持以誇西州故人也

嫩日輕雲淡施天撲燈過後賣花前便從水閣杭湖

去捲起朱簾上畫船

又

舫子窗扉面面開金壺桃杏間尊疊東風忽送笙歌
近一片樓臺泛水來

又

湖波綠似鴨頭深一日春晴直萬金好事誰家鬪歌
舞方舟齊榜出花陰

又

花光柳色滿牆頭病酒今朝懶出遊却就水亭開小
宴繡簾銀燭看歸舟

病中

風雨暗江天幽窗起復眠忍窮安晚境留病壓災年
客助修琴料備分買藥錢餘生均逆旅未死且陶然

病起

開歲忽六十病餘閑炷香春光向客淡夜漏為愁長
已老鷄豚社永違鷓鴣驚行蒼龍西角月孤夢墮微茫

小築

小築茅茨鏡水濱天教靜處著閑身平原不復賦豪
士甫里但思歌散人翠壁微泉時的爍衡門疊嶂曉
嶙峋子虛謾辱諸公賞萬里輕鷗豈易馴

記夢

東吳春莫寒猶重睡笑不聞城角動身雖衰情怕出
門江山尚入幽窗夢夢到青羊看修竹道人告我丹
將熟試求一黍換肝腸它日重來駕黃鶴青羊宮在城

都南門外浣花道中

久雨排悶

一春略無十日晴雨脚纔斷雲已生奇葩摧敗等青
莧嘉穀漂蕩隨浮萍書生病臥苔及榻溼薪燎衣熏

欲盲腰頑足痺空歎息咫尺不得行中庭讀書窗黑
不見字彈琴絃緩那成聲老益濁酒且復醉兩部鼓

吹方施行

雨中泊舟蕭山縣驛

端居無策散閑愁聊作人間汗漫遊晚笛隨風來倦
枕春潮帶雨送孤舟店家菰飯香初熟市擔蓴絲滑

欲流自笑勞生成底事黃塵陌上雪蒙頭

夜漏欲盡行度浮橋至錢清驛待舟

潮生抹沙岸雲薄漏月明江頭曉色動鴉起人未行
扶攜度長橋仰視天宇清遙憐繫舟人聽我高屐聲
水檻得小憩一笑拄杖橫澄漪弄孤影微風吹宿醒
湛然方寸間不受塵事攪寄語市朝人此樂未易名

江頭十日雨

江頭十日雨雨止春已盡殘紅如掃空艸木皆綠潤
村墟櫻筍鬧節物團粳近可憐笠澤翁百憂集雙鬢
賦詩空自清學道了不進林間一甌茶晤語君勿吝

柯橋客亭

小市初晴已過春朱櫻青杏一番新灞陵老子無人
識暫借郵亭整角巾

又

梅子生仁燕護雛遶簷新葉綠扶疎朝來酒興不可
耐買得釣船雙鰕魚

小雨舟過梅市

故故催詩襯雨蓬悠悠破夢隔雲鐘遙看漁火兩三
點已過莫山千萬峯老矣自應埋病骨歸哉莫念抗
塵容停橈小住青楓岸吳市高人儻可逢

曉枕

曉枕鶯聲帶夢聽忽看淡日滿窗櫺閑愁誰遣濃如
酒醉過殘春不解醒

巢菜 拜序

蜀蔬有兩巢大巢豌豆之不實者小巢生稻
畦中東坡所賦元修菜是也吳中絕多名漂

搖艸一名野蠶豆但人不知取食耳予小舟
過梅市得之始以作羹風味宛如在醴泉墓

頤時也

冷落無人佐客庖庾郎三九困譏嘲此行忽似葦津
路自候風爐煮小巢

吳娘曲

鏡奩蠶出千黑蟻斂梁梅小雙青豆吳娘十四未知
愁羅衣已覺傷春瘦閑尋女伴過西家鬪艸歸來日

感舊

未斜睡曉濛濛嬌欲閉隔簾微雨壓楊花
醉眼常輕兒女曹西遊對客尚能豪縷金羯鼓龜茲
樂鏤玉琵琶選妙槽巫峽已同行雨夢錦江空憶浣

花邊閑情何計都除盡為覓并州快剪刀

晨起閑步

飛紅掠地送春忙嫩綠成陰帶露香聽徹曉天鶯百
轉却隨飛蝶度橫塘

初夏同桑甥世昌過隣家

空谷舊生涯蕭條只自嗟妻饒噴護筍兒病失澆花
赤米老能飽濁醪貧可賒微科幸差簡扶杖過隣家

寓歎

孤生拙料事諸老誤知人世故幾翻覆此身常賤貧
有書藏禹穴無地靜胡塵衰病今年劇呻吟欲過旬

春夏雨陽調適頗有豐歲之望喜而有作

二十年無赤白囊人間何地不耕桑陂塘處處分秧
遍村落家家黃繭忙野老逢年知飽煖書生隨例得
猖狂雨餘天氣初清潤曳履長歌出艸堂

聞虜酋遁歸漠北

幽州遺民款塞來來者扶老攜其孩共言單于遠逃
遁一夕荆棘生燕臺天威在上賊膽破捧頭鼠竄吁

可哀妄期舊穴得孽育不知天網方恢恢老上龍庭
豈不遠漢兵一炬成飛灰陛下中興天所命築壇授

鉞皆雄才煌煌九霄揭日月浩浩萬里行風雷號山
多獸可遊獵汝不請命何歸哉

初夏遊凌氏小園

水滿池塘葉滿枝曲廊危榭愜幽期風和海燕分泥
處日永吳蠶上簇時閑理阮咸尋舊譜細傾白墮賦
新詩從來夏淺勝春日兒女紛紛豈得知 庾信詩云夏
淺却勝春鏡湖遊人至立夏而止

偶得北虜金泉酒小酌

艸艸盃盤莫笑貧朱櫻羊酪也嘗新燈前耳熱顛狂
甚虜酒誰言不醉人 高適詩云胡兒十歲能騎馬虜酒千盃不
醉人

又

逆胡萬里跨燕秦志士悲歌淚滿巾未履胡腸涉胡

血一樽先醉范陽春
無題

珠韞玉指擘篁篴誰記山南秉燭遊
結綺詩成江令醉囊泉夢斷沈郎愁
天涯落日孤鴻沒鏡裏流年兩鬢秋
不用更求驅豆術人生離合判悠悠

戲贈

簾幕陰陰晝漏遲
鵝黃雪白絡新絲
只應笑殺東隣女
不見鞦韆到拆時

題少陵畫像

長安落葉紛可掃
九陌北風吹馬倒
杜公四十不成名
袖裏空餘三賦艸
車聲馬聲喧客枕
三百青銅市樓飲杯殘
鬻冷正悲辛
仗內鬪雞催賜錦

閑居書事

園林綠葉一番新
桃李吹成陌上塵
玩易焚香消永日
聽琴煮茗送殘春
隱居正欲求吾志
大患元因有此身
堪笑癡人營富貴
百年贏得冢前麟

登臺遇雨遊於山亭晚霽乃歸

溽暑不堪蝸舍陋
瘦藤扶我上危臺
搏禽俊鷲橫空去
卷雨狂風掠野來
壯觀深知化工妙
幽尋却踞夕陽回
悠然有喜君知否
屐齒留痕遍綠苔

村居書觸目

雨霽郊原刈麥忙
風清門巷曬絲香
人饒笑語豐年樂
吏省徵科化日長
杖上花空閑蝶翅
林間甚笑滑鶯吭
飽知遊宦無多味
莫恨為農老故鄉

訪醫

衰與病相乘
况復積憂慮
眩昏坐輒瞑
疲弱行欲仆
今晨訪之醫
見語疾當去
脈來如泉源
未易測君數
盛衰當自察
信醫固多誤
養氣勿動心
生死良細故

夏夜讀書自嘲

事業無成去日遺
只今身世付滄洲
風煙慘慘菰蒲老
星斗離離河漢流
寂寞書生學奇字
窮愁客子著春秋
白頭自苦君無笑
骨朽成塵志未休

夏日小宴

橫吹銅笛蒼龍聲
雙奏玉笙丹鳳鳴
已判百年終醉死
要將一笑壓愁生
旋移畫舫破山影
高捲朱簾延月明
試問炎歊在何許
夜闌翻怯葛衣輕

送紫霄女道士四明謝君

一別南充十四年
時時清夢到金泉
山陰道上秋風早
却見神仙小自然
果州金泉山謝自然飛昇之地

又

道骨仙風凜不羣
清秋采藥到江村
自言家住雲南北
知是遺塵幾世孫

醉中夜自村市歸

村市夜騎黃犢還
却登小閣倚闌干
銀河斜界曉天碧
璧月下入秋江寒
吾輩身閑且飲酒
人生事定須闔棺
元自胸中著雲夢
莫驚綠鬢耐悲歡

城北夜

端居厭孤寂
偶繫北城舟
天地淒涼色
江湖汗漫遊
螢光矜暗夜
蟲語報新秋
老去功名意
青燈映布裯

秋夜舟中作

沽酒黃葉村
炊飯紅蓼岸
居人不執何
正作漁父看
漁父我所羨
尚恐不得作
讀書端自癡
遊宦亦何樂

四顧澤茫茫仰視天離離長歌入雲去月落斗未斂

日晚散步湖上遇小雨

暮色蒼蒼日初落
寒聲策策風正作
湖邊倚杖隄上行
病起聊試遊山脚
平生出門輕萬里
老去謝客專一壑
風濤瀕洞鉸鰓橫
闔闔崔嵬鬼神惡
春蕪一二頃叱黃犢
老學為農元不錯
兜鍪整蟬冤俱掃
空雨笠香

新織青簪

我昔遊峨岷
捫蘿千仞峯
丈人倚赤藤
恐是安期翁
贈我一丸藥
五雲出瓢中
服之未轉刻
瑩然冰雪容
素手搗山靄
綠髮吹天風
丈人顧我喜
共騎一蒼龍
蓬萊亦何求
愛此萬里空
却來過齊州
蠶垤看青嵩

安期篇

曉望海山

莫山青尚淺曉山如黛染開窗望海山天清霧方歛
向來六月中黑雲齊如截蒼龍下曳尾卷雨灑炎熱
造物信老手忽作萬里秋刻削此孤峭巉然消客愁
豈無一布帆寄我浩蕩意會當駕長風清嘯遺世事
山園草木四絕句

紫薇

鐘鼓樓前官樣花誰令流落到天涯少年妄想今除
盡但愛清樽浸晚霞

黃蜀葵

開時閑淡歛時愁蘭菊應容預勝流剩欲持杯相領
略一庭風露不禁秋

拒霜

滿庭黃葉舞西風天地方收蕭殺功何事獨蒙青女
力牆頭催放數苞紅

蓼花

十年詩酒客刀州每為名花秉燭遊老作漁翁猶喜
事數枝紅蓼醉清秋

賽神曲

叢祠千歲臨江渚拜祝今年那可數須晴得晴雨得
雨人意所向神輒許嘉禾九穗持上府廟前女巫遞
歌舞嗚嗚歌謳坎坎鼓香煙成雲神降語大餅如槃
牲膾肥再拜獻精神不違晚來人醉相扶歸蟬聲滿
廟鎖斜暉

夜中起讀書戲作

髮已凋零齒已疎忍飢白首臥蝸廬風聲忽驟蓬窗
過夜半呼燈起讀書

又

滅虜區區計本疎水邊喬木擁茅廬九原定發韓公
笑至老依然一束書

秋夜出門觀月

六十衰翁適得閑一秋無事掩柴關雁來慘淡沙場

外月出蒼茫雲海間飲酒已衰猶愛客著書初畢可
藏山此生終羨漁家樂小艇常衝夕靄還

雨中買酒鏡湖酒樓

陰風號大澤莫雨上高樓愁憶新豐酒寒思季子裘
登臨天地迤老病歲時適安得急裝去北平防盛秋
聞虜政衰亂掃蕩有期喜成口號

又

遺虜遊魂豈足憂漢家方運幄中籌天開地闢逢千
載雷動風行遍九州刁斗令嚴青海夜旌旗色照鐵
關秋功名自是英豪事不用君王萬戶侯

甲辰中秋無月十七夜獨傲然達旦

老覺人間無一放窮閭掃軌謝紛紛已憑白露洗明
月更遣清風收亂雲棲鵲揀枝寒未穩斷鴻呼伴遠
猶聞病羸慵踏梧桐影倚柱長吟夜向分

悲秋

病後支離不自持湖邊蕭瑟早寒時已驚白髮馮唐
老又起清秋宋玉悲枕上數聲新到雁燈前一局欲
殘棋丈夫幾許襟懷事天地無情似不知

農家秋晚戲詠

鞭地如鏡築我場破礮玉粒輪官倉九月野空天欲
霜甌中初喜新粳香舍邊蕭蕭落葉多野蠶出繭飛
黃蛾寒蔬種罷醉且歌隻雞短紙賽園婆

病中作

老鶴遼天興未窮此生光景自匆匆家為逆旅相逢
處身在嚴裝欲發中澀眼尚于書有味孤愁殊覺酒
無功揮戈艸檄今誰記歲晚江邊白髮翁

秋夜讀書

讀書喜夜長著書悲齒莫平生企前哲凜有庸人懼

吾廬大澤中地曠北風怒徂年凋艸木寒氣逼霜露
燈昏老眼聞鈍馬行惡路投枕卷未終吾衰歎非故

病起

頽垣破屋暗藜蒿病起不知秋已高晨倚山楹羣木
脫莫臨苔砌百蟲號力殫編簡初何得腰折塵埃只
漫勞賴有濁醪生耳熱狂歌醉艸寄吾豪

晨起

孤夢忽自驚小窗初送明珍禽語庭樹可愛不知名
向者事宦遊塵土過半生傳呼束帶出襲襲尚殘更
山居雖自由晨起亦有程洗硯拂書几一笑愜幽情

秋夜

老病龍鍾不入城濁醪麤飯餘生未霜村舍秋先
冷無月江天夜自明出塞雖慚平賊手下帷聊喜讀
書聲山童睡熟青燈暗自撥殘爐候藥鑪

雨中過東村

小雨空濛物象奇偶扶藤杖過東陂墊巾風度人爭
看蠟屐年光我自悲窮鬼有靈揮不去死魔多力到
無期歸來笑向磨門說且了浮生一首詩

山寺

寺門壓石危欲崩槎牙老松挂蒼藤風傳上方出定
磬雨暗古殿長明燈宿林野鷗驚復起爭栗山童呼
不磨谿南聞道更幽絕明日裂布縫行膝

天王廣教院在韋山東麓予年二十餘時與老
僧惠迪遊略無十日不到也淳熙甲辰秋觀潮

海上偶繫舟其門曳杖再遊况如隔世矣

遊山如讀書深淺皆可樂道邊小精舍亦自一丘壑
淒涼四十年始復重著脚老僧迹已久講座塵漠漠
當時童子輩衰鬢亦蕭索掃壁觀舊題歲月真電雹
文章卑不傳衣食窘如昨出門意惘然遼海渺孤鶴

江月歌

放翁平生一釣船秋水未落江渺然露洗玉宇清無
煙月輪徐行萬里天人間聲利何足捐浩歌看月冷

不眠孤鶴掠水來翩翩似欲駕我從此仙我寓紅塵
今幾年俯首韁鎖常自憐樂哉揮手過月邊西風未
凋玉井蓮

初寒書懷

嵩雲緜月本閑人誤落塵中白髮新萬事看山差入
眼百年把酒獨關身棧邊老馬行安往牀下寒龜息
自勻藜杖一枝猶好在未妨閑探早梅春

歲莫

小築幽栖與拙宜讀書寫字伴兒嬉已無數老嗟卑
意却喜分冬守歲時羹臠芳鮮新弋雁衣襦輕暖自
繅絲農家歲莫真堪樂說向公卿未必知

晨興

倦枕厭寒夜起尋殘火温嗜嗜衆雞動耿耿一燈昏
野氣增霜力窗光淡月痕早朝非老事且復灌吾園

村飲

少年喜任俠見酒氣已吞一飲但計日斗斛何足論
綠艸滿雉場紅旗植毬門三叫落烏憤倒瀉黃金盆
銀爐熾獸炭狐兔紛紛炮烙浩歌撼空雲壯志排帝閭
回首今幾時去日如車奔朱顏辭曉鏡白髮老孤村
隣翁勸黍酒稚子供魚殮功名信已乎萬事付乾坤

夜半讀書罷出門徙倚久之歸賦長句
浩歌曳杖出柴扉不管三更露溼衣擬看林梢殘月

上偶逢浦口斷雲歸驚鴻脫網寒相倚飢鶻思巢夜
亦飛却掩北窗誰晤語聊憑香盃洗塵鞵

曝書偶見舊稿有感

日滿晴軒理蠹魚壯遊回首一秋歎淒涼王粲從軍
作零落相如諫獵書歌吹恍思登北固弓刀誰記渡
南沮虎頭本欠功名相歸老林間計未疎

崑崙行

陰雲解駁朝暉紅黃河直與崑崙通不駕鸞鳳驂虬
龍徑躡香煙上空中吾行忽過日月宮下視積氣青
濛濛寒暑不分晝夜同嵯峨九關常烈風凜然蕭森

變沖融不悻不眩身如空塵沙浩劫環無窮詎須更
覓安期翁

一室

九萬笑鵬搏幽居一室寬雨聲便早睡酒力壓新寒
懶覺閑多味衰知死有端此生吾自斷不必夢邯鄲
得所親廣州書

音信連年恨不聞書來細讀却消魂人稀野店山魃
語路僻蠻村荔子繁毒艸自搖春寂寂瘴雲不動晝
昏昏此生相見應無日且置清愁近一樽

幽居戲詠

清泉遶屋竹連牆回首微官意已忘小瓮帶泥收洛
筍洛中冬筍貯以小瓮爲遠餉細鱗穿柳買河魴黃旗萬
里無侯骨紅燭千鍾有酒腸欲起九原誰可友蘭亭
修禊晉諸王

幽事

蕭然四壁野人家幽事還堪對客誇快日明窗閑試
墨寒泉古鼎自煎茶桐凋無復吟風葉蘋老猶殘泣
露花萬里封侯真已矣只將高枕作生涯

劍南詩稿卷第十六終

劍南詩稿目錄
卷第十七

初冬雜題六首 閉戶 十月四日夜記夢
西路口山店 題海首座俠客像 送綽姪住

養吳興山中二首 冬夜與溥菴主說川食戲
作 仗錫平老自成都回見訪索怡雲堂詩

野飲 樊江觀梅 山亭觀梅 射的山觀梅
二首 別梅 憶梅 新晴午枕初起信筆

乙巳早春 小雨 南樓遇大風雨 春晚至
山中因訪陳道人 小隱 春興 曾仲躬見

過適遇予出留小詩而去次韻二首 睡起
病起 山居戲題二首 芒種後經旬無日不

雨偶得長句 久雨喜晴十韻 盆池 月中
過蜻蜒浦 六峯項里看采楊梅連日留山中

雨中自項里夜至新塘捨舟步歸二首 夜
聽竹間雨聲 泛三江海浦 獨酌有懷南鄭

秋日泛鏡中憩千秋觀 秋夕虹橋舟中偶
賦 秋思 自嘲 豐年行 秋夜泊舟亭山

下 初秋山中作 秋夜讀書有感 晚涼登
山亭 夜步 感秋 病中作 送猷講主赴

李明府姜山之招 雨中排悶 秋夜歌 病
起鏡中見白髮此去七十無十寒暑矣偶得長

句 初寒宴坐 溪行二首 讀書 自嘲用
前韻 病中久廢遊覽悵然有感 新釀熟小

飲二首 題徐淵子環碧亭亭有茶山曾先生
詩 雜興三首 大雪 遣興 委轡 雪中

作 夢筆驛 舟中感懷絕句呈太傅相公兼
簡岳大用郎中三首 西興泊舟 錢清夜渡

夜歸 江北莊取米到作飯香甚有感 感
興 新春 新年 遊鏡湖 初春晚晴 偶

讀山谷老境五十六翁之句作六十二翁吟
自開歲略無三日晴戲作長句 置酒梅花下

作短歌 梅花已過聞東村一樹盛開特住尋
之慨然有感 思蜀 書憤 南窗望黃柑獨

酌有感 久雨驟晴山園桃李爛熳獨海棠未
甚開戲作 臨安春雨初霽 延和殿退朝口

號二首 簡楊庭秀 飲張公父園戲題扇上
夜泛西湖示桑錫世昌 小舟過御園二首

自真珠園泛舟至孤山 真珠園雨中作
還家二首 初歸偶到近村戲書 題跨湖橋

下酒家 春遊至樊江戲示坐客 莫春 天
華寺前遇縣令過避之入寺僧皆晝睡 偶得

海錯侑酒戲作 雨晴遊香山 春遊絕句
夜行玉笥樵風之間宿龍瑞 聞傅氏莊紫笑

花開急棹小舟觀之 遊法雲寺觀彝老新葺
小園 臧壘十韻 長門怨 遣興 晨坐道

室有感 晝臥 雨晴 宿石帆山下二首
小雨泛鏡湖 小憩村舍 平水 初夏山中

雨後 雲門溪上獨步 雲門過何山 明
覺院 自雲門至上竈欲遊一二僧菴以雨不

果 自上竈過陶山 四月 初夏閒居即事
夜汲 排悶 初夏夜賦 新霽城南舟中

夜興 泊舟二首 飲伯山家因留宿 夜泛
蜻蜒浦 晨起看山飲酒 枕上偶賦 自詠

題齋壁四首

劍南詩稿卷第十七

宋陸游務觀

初冬雜題

勛業文章意已闌莫年不足是看山江南寺寺樓堪

倚安得身如杜牧閑

又

莫嫌風雨作新寒一樹青楓已半丹身在范寬圖畫裏小樓西角剩憑闌

又

風橫雲低雨脚斜一枝柔艣莫咿啞昏昏醉臥知何處推起船篷忽到家

又

五斗安能解醉醒曹騰睡眼怯窗明策勛賴有春芽在臥聽山童轉磴聲

又

荒郊寒雨晚淒淒四壁穿頽旋補泥物我元須各安穩自苦牛屋織雞棲

又

風雨聲豪入夢中不知身世寄孤蓬狐裘氈帽如龍馬天漢西南小益東

閉戶

屏居無一事閉戶常經旬勿云艸舍陋愛此油窗新三日不作詩幽禽語撩人尺素雜行草往檄江梅春十月四日夜記夢

四客聯轡來我醉久不知倒衣出迎客媿謝前致辭客意極疎豁大笑軒鬚眉禮豈為我設度外以相期袞袞吐雄辯泠泠誦新詩共言攜酒壺掃地臨前墀意氣相顧喜忽如少年時老雞不解事喚覺空嗟咨涉世四十年賢雋常追隨爾來風俗壞動脚墮險巖森然義府刀誰為叔度陂起作四客篇捕影吾其癡

西路口山店

日薄霜清十月天馬蹄聲裏送流年店當古路三叉

處山似孤雲兩角邊孤雲兩角在漢中淹泊自悲窮不醒衰殘更著病相纏榆關瀚海知何在目送飛鴻入

莫煙

題海首座俠客像

趙魏胡塵千丈黃遺民膏血飽豺狼功名不遺斯人了無奈和戎白面郎

送綽姪任菴吳興山中

一盃淡粥不烹蔬綽居山粥飯外菜亦不食自占雲根結草廬非佛非心猶坐斷定知不看夾山書

又

湖海相從十日留頗哀老子鬢驚秋目光猶射車牛背不用殷勤舉話頭

冬夜與溥菴主說川食戲作

唐安薏米白如玉漢嘉枏脯美勝肉大巢初生蠶正浴小巢漸老麥米熟龍鶴作羹香出釜木魚淪菹子盈腹未論索麩與鑽飯最愛紅糟并飯粥東來坐閱七寒暑未嘗舉箸忘吾蜀何時一飽與子同更煎土茗浮甘菊

仗錫平老白都城回見訪索怡雲堂詩

東華軟塵飛撲帽黃金絡馬人看好渠儂胸中誰得知畏禍憂讒鬢先老舉世輪與平元衡青山白雲過一生出門曳杖便千里白雲不約常同行敲門剝啄雲沒履劇談未竟還東去到山分我一片雲併遣春風吹好句

野飲

青山千載老英雄濁酒三盃失阮窮訪古頽垣荒塹裏覓交屠狗賣漿中平堤漸放春蕪綠細浪遙翻夕照紅已把殘年付天地騎牛吹笛伴村童

樊江觀梅

莫笑山翁老據鞍探梅今夕到江干半灘流水浸殘

月一夜清霜催曉寒倚醉更教重秉燭怕寒元自怯
憑欄誰知攜客芳華日曾費纏頭錦百端 成都合江園

芳華樓下梅最盛

山亭觀梅

與梅歲歲有幽期忘却如今兩鬢絲乘淡月時和雪
看斷蒼苔地帶花移先春瘦損應多恨靜夜香來更
一奇醉倒欄邊君勿笑明朝紅萼綴空枝

射的山觀梅

射的山前雨墊巾籬邊初見一枝新照谿盡洗驕春
意倚竹真成絕代人餐玉元知非火食化衣應笑走
京塵即今畫史無名手試把清詩當寫真

又

凌厲冰霜節愈堅人間乃有此癯仙坐收國士無雙
價獨立東皇太一前此去幽尋應盡日向來別恨動
經年花中竟是誰流輩欲許芳蘭恐未然

別梅

竹籬數掩傍魚磯萬點梅花掠地飛正喜巡簷來索
笑已悲臨水送將歸影橫月處愁空絕子滿枝時事
更非自古情鍾在吾輩尊前莫怪淚沾衣

憶梅

護惜常愁滿樹開況無一片在蒼苔眼高懶為凡花
醉腸斷驚聞莫角哀寫向素絹時拂拭移來幽圃自
栽培論心竟是明年事輸與醪醖在酒盃

新晴午枕初起信筆

閉戶日陶然晴窗春已妍華胥夢中國龍漢劫初年
浩浩塵揚海茫茫杵倚天何妨駕孤鶴小憩華山前

乙巳早春

故故啼鶯傍曲廊飛飛戲蝶度橫塘病來對酒心雖
怯老去逢花眼尚狂牀擁琴書供枕籍簾通風月索
平章一丘一壑從來事起就功名未苦忙

小雨

細細溼春光霏霏破夕陽臥聞鶯倦枕起看入虛堂

映葉鶯猶轉爭泥燕正忙閑愁無遣處誰與共飛觴
南樓遇大風雨

歎息誰如造物雄故將意氣壓衰翁千羣鐵馬雲屯
野百尺金蛇電掣空身羨漁蓑鳴急雨心憐鴉陣困
狂風世間變態誰能測歸路斜陽十里紅

春晚至山中因訪陳道人

一春衰病集殘骸太息流塵覆酒盃僧鉢始知萼菜
老佛瓶初見杏花開蘋溪小雨成幽討松院斜陽又
獨來不為愛閑從野叟年來萬事學低推

小隱

小隱在江干蒔廬亦易安庖廚供白小籬落蔓黃團
踏蹬馮唐老飄零范叔寒世情從迫隘醉眼覺天寬

春興

萬事不關身儵然一幅巾雖非愛酒伴猶是別花人
杜詩走覓南隣愛酒伴白樂天紫微花詩不別花人不與看 領略
琴書意掃空車馬塵東阡與南陌隨處夢殘春

會仲躬見過適遇予出留小詩而去次韻二首
地僻元無俗客來蓬門只欲為君開山橫翠黛供詩
本麥卷黃雲足酒材

又

數樹山花草舍東想公繫馬落殘紅那知老子耶溪
上正泛朝南莫北風

睡起

風約飛花滿曲廊蕭然無客共焚香爨醅力重初投
枕鼻鼾聲豪已撼牀榻相夢遊心自適昏昏起坐日
方長靜憑一几吾何恨笑殺穿簾燕子忙

病起

山村病起帽圍寬春盡江南尚薄寒志士淒涼閑處
老名花零落雨中看斷香漠漠便支枕芳草離離海
倚闌收拾吟牋停酒椀年來觸事動憂端

山居戲題

海山縹緲斷雲局掃地焚香悅性靈嫩白半甌嘗日

鑄硬黃一卷學蘭亭衰顏冉冉臨清鏡華髮蕭蕭倚素屏尊酒不空身見在莫爭天上少微星

又

病起清羸不自持年光都上鬢邊絲昏昏雨細梅黃後漫漫秧青水滿時曲几方牀娛永日矮冠高屐駭羣兒客來莫笑狂顛甚此處那容世俗知

芒種後經旬無日不雨偶得長句

芒種初過雨及時紗廚睡起角巾軟癡雲不散常遮塔野水無聲自入池綠樹晚涼鳩語鬧畫梁晝寂燕歸遲閉身自喜渾無事衣覆熏籠獨誦詩

久雨喜晴十韻

一雨二十日頽牆屋茆爛扶杖出門行四顧水瀾漫村迴鳩爭築林昏雞失日荒庭蛙黽豪空無螢火亂蠹魚敗書編萍草黏戶半清風忽東來一剪雨脚斷天青日杲杲河白星燦燦車轍尋舊途船步出新岸稍喜泥潦乾破竈得炊爨賤貧固多憂長歌寄吾歎

盆池

人生何處不兒嬉一世元知孰是非汲井埋盆鑿苦破敲針作釣得魚歸蕭蕭菰葉風聲細媚媚蘋花雨點稀竝舍老翁能喜事為添拳石象苔磯盆池初成隣人吳氏老送小石置池上

月中過蜻蜓浦

天光水色合為一舟出西城猶落日一規忽見寒壁升萬頃坐歎溶銀溢哀哀姑惡訴何苦熠熠螢火光自失葦低時見小艇過水響遙知大魚出銅壺玉酒我徑醉短髮垂肩蓬不櫛緩篙適月勿遽行坐待湘妃鼓瑤瑟

六峯頂里看采楊梅連日留山中

綠陰翳翳連山市丹竇纍纍照路隅未愛滿盤堆火齊先驚探頷得驪珠斜簪寶髻看遊舫細織筠籠入上都醉裏自矜豪氣在欲乘風露摘千株
兩中自項里夜至新塘捨舟步歸

樺炬如椽點不明還家療水與階平一盃濁酒頽然睡恍似金牛夜下程

又

天如漆黑泥沒踝老健猶能踉蹌歸裊裊爐香支枕看終年只合掩柴扉
夜聽竹間雨聲

解醒不用酒聽雨神自清治疾不用藥聽雨體自輕我居萬竹間蕭瑟送此聲焚香倚蒲團袖手坐三更
人苦不自覺忿忿投隙生起敵簷間雨更與此君盟
泛三江海浦

龍負三山碧海秋龍驤萬斛放翁遊少舒我輩胸中氣一掃羣兒分外愁醉斬長鯨倚天劍笑凌駭浪濟川舟悠然高詠平生事齷齪寧能老故丘

獨酌有懷南鄭

憶從蟠冢涉南沮笳鼓聲酣醉膽麤投筆書生古來有從軍樂事世間無秋風逐虎花叱撥夜雪射熊金僕姑白首功名元未晚笑人四十歎頭顱

秋日泛鏡中憩千秋觀

病起重來理釣絲扁舟迨及素秋時舊交猶有青山在幽趣唯應白鳥知冉冉年光行老矣茫茫世路欲何之秦皇酒榼苔封遍虛負霜螯左手持湖山之間有石號秦皇酒盃

秋夕虹橋舟中偶賦

解纜初離小市門放篙衝破一谿雲露螢合散自成陣水鳥飛鳴如覓羣楓落荷疎秋漸老河傾斗轉夜將分書生老負功名志醉裏長歌強一欣

秋思

一徑苔侵四壁空北窗支枕聽秋鐘故人去後登樓怯白髮多來覽鏡慵狂憶射麋窮楚澤閑思釣雪泛吳松相如病渴年來劇釀酒傾家畏不供

自嘲

窮途久矣歎吾衰雙鬢新添幾縷絲身是在家狂道

士心如退院病禪師極知勾漏求丹藥不及衡陽賣
漉籬習氣若為除未盡小軒風月又成詩

豐年行

秋風蕭蕭秋日薄築場穫稻方竭作志士雖懷晚歲
悲農家自足豐年樂撥醅白酒喚隣曲啄黍黃雞初
束縛長魚出網健欲飛新兔臥盤肥可雕躬耕辛苦
四十年一飽豈非天所酢書生識字亦聊爾莫作揚
雄老投閣

秋夜泊舟亭山下

逢水逢山到處留可憐身世寄孤舟一汀蘋露漁村
晚十里荷花野店秋羽檝未聞傳塞外金椎先報擊
衙頭聞虜會行帳為壯士所攻幾不免虜語謂會所在衙頭煌
煌太白高千丈那得功名取次休

初秋山中作

萬里西風吹幅巾即今真箇是閑人堆盤菱熟燕脂
角藉藻鱸新淡墨鱗鮫嶺蹇驢尋雪徑娥江孤艇繫
煙津飄然樂事真當勉遠付十年無此身

秋夜讀書有感

久病畏長夏枕簟如炮焚扶持賴藥物俯仰秋已分
清夜炷爐香裊裊起孤雲靈府豁蒙滯舊學資鋤耘
言念總角初操觚極難勤諸老頗賞識謂可與斯文
沉痾幸鍼石輪困勞斧斤可憐四十年薄陋負所聞
白首猶著書述將獻吾君太官薦玉食野人徒美芹

晚涼登山亭

庭空葉飛秋村迥鳩喚雨新涼入巾褐老子顛欲舞
憑高望稽山秀色溢天宇一鏡三百里水落分別浦
淒涼吊禹穴秦漢未為古世俗誰與歸吾其老農圃

夜步

市人莫笑雪蒙頭北陌南阡信脚遊風遞鐘聲雲外
寺水搖燈影酒家樓鶴歸遼海逾千歲楓落吳江又

一秋却掩船扉耿無寐半窗落月照清愁
感秋

秋堂露氣清蕭爽入毛骨葛裊耿無寐坐待山月沒
溼螢飛不起熠熠依衰草勁風西北號落葉紛可掃
老生惜歲月烈士志功名登臨送將去非復兒女情
懸知青海邊殺氣橫千里良時不可失胡行速如鬼
時聞虜會自香草淀入秋山蓋遠遁矣

病中作

一病二十日直愁難自還殘書不成讀長夜只供閑
風舞迎霜葉雲昏欲雨山臨窗忽自笑詩思又相關
送猷講主赴李明府姜山之招
貫花籟映壓車轆惟子窮探到本源聽法鬼神環塵
尾質疑英俊集龍門孤舟此日輕為別尺素何時遠
見存坐想文殊對摩詰高談無礙九河翻

雨中排悶

點點滴滴雨不晴暗暗淡淡燈不明皇天胡為貸此
老病臥垂困今已平却慚向者力量淺鼠肝蟲臂猶
關情百年終歸朝露速一死正自秋毫輕明朝且作
山中行青鞵已覺白雲生豐年處處村酒好莫教湘
湖蓴菜老湘湖在蕭山縣蓴菜絕奇

秋夜歌

書生白首無處著病臥空齋夜蕭索茶鐺聽候湯
熟燈檠藪藪看燼落山童喚起已復倒顧影自笑如
孤鶴人言富貴墮駭機一生窮愁正不惡架上故裘
破見肘牀頭殘酒傾到脚問君何以塵霜風悠然臥
聽山城角

病起鏡中見白髮此去七十無十寒暑矣偶得
長句

短鬢蕭條失故青人間真似宿郵亭正令寬作十年
夢安用更留三日醒覆瓿書成空自苦擊轅歌罷遣
誰聽客來若覓衰翁處睡起悠然倚素屏

初寒宴坐

微火如螢度篆盤明窗坐敗幾蒲團羣兒誰信老懷
懶萬事不禁醒眼看道在簞瓢端自足心閑天地本

來寬此生自斷君知否不辦歸裝也掛冠

溪行

霜落水初澄星繁月未升近村聞夜犬隔浦見秋燈
多病乃如許微寒已不勝平生隣曲意移棹避漁罾

又

疎鐘度莽蒼遠火耿微茫歲莫水歸壑夜寒天賈霜
人生一蟲臂世路幾羊腸老大忘繩檢狂歌盡意長
讀書

自嘲用前韻

殘年過六十寂寞臥山中病眼驚新暗衰顏失舊紅
人譏作詩瘦自憫著書窮輪與封侯骨雲臺競策功
病中久廢遊覽悵然有感

裘馬清狂徧兩川十年身是地行仙歸來訪舊半爲
鬼已矣此生休問天不恨盃觴無藉在但悲山水曠
周旋垂虹風月休如昨安得青錢買釣船

新釀熟小飲

玉船激激酌鵝黃菊欲殘時抵死香似與幽人爲醉
地清笳聲裏一天霜

又

籬菊猶堪采落英一尊玉壺釀初成今宵要向中庭
飲不展華茵展月明

題徐淵子環碧亭亭有茶山曾先生詩

茶山丈人厭囂譁幅巾每訪博士家小亭談笑不知
莫往往城上聞吹笳興來傑作粲珠壁歲久妙墨亡
龍蛇郎君弟子多白髮回頭日月如轉車徐卿赤城
古仙子十年四海推才華覽觀陳迹喜不寐旋補罅
漏支傾斜曲池還浸古來月叢莽忽見當時花重題
舊句照高棟力振風雅排淫哇席間紵袍已散鶴堂
上講鼓初停搨速宜力置竹葉酒不用更瀹桃花茶
桃花茶見曾公詩

雜興

澗井初生一縷雲鮑郎山下雨昏昏鶻聲嘔軋秋空
曉水際人家尚閉門

又

孤夢初回揭短篷橋邊曉日已曛曛太平氣象君知
否盡在豐年笑語中

又

古寺高樓莫倚闌野雲不散白漫漫好山遮盡君無
恨且作滄溟萬里看

大雪

大雪江南見未曾今年方始是嚴凝巧穿簾罅如相
覓重壓林梢欲不勝氈幄擲盧忘夜睡金羈立馬怯
晨興此生自笑功名晚空想黃河徹底冰

遣興

書生不自憐老眼付皇天已飽三升稷寧堆百屋錢
紅塵忙過日青嶂醉論年名字元虛幻從人謗是仙

委轡

委轡去悠悠山窮得渡頭白雲生碧巖翠木擁朱樓
野榭淵明酒征塵季子裘自憐詩興在杜若滿芳洲
雪中作

竹折松僵鳥雀愁閉門我亦擁貂裘已忘作賦遊梁
苑但憶銜枚入蔡州屬國餐飫真強項翰林袁茗自
風流明朝日暖君須記更看青鸞玉羊溝

夢筆驛

朱扉水際亭白塔道邊寺扁舟幾往返每過輒歎欷
經秋病不死歲莫復一至少年自喧譁此老獨顛顛
可憐釣鰲客終返屠羊肆吾身行亦無榮辱安所寄
短燈照孤愁寒衾推殘醉明當臨大江一灑壯士淚
舟中感懷三絕句呈太傅相公兼簡岳大用郎
中

須中鞵鞞兩聲寒孤夢初回燭半殘甲子一周胡未
滅關山還帶淚痕看

又
雨打孤篷酒漸消昏燈與我共無聊功名本是無憑
事不及寒江日兩潮

又
夢筆亭邊擁鼻吟壯圖踏踏老侵尋不眠數盡雞三
唱自笑當年起舞心

西興泊舟
衰髮不勝白寸心殊未降避風留水市岸曠倚船窗
日上金谿海潮來雪捲江登臨數奇觀未易敵吾邦
錢清夜渡

輕舟夜絕江天闊星磊磊地勢下東南壯哉水所匯
月出半天赤轉盼離巨海清暉流玉宇艸木盡光彩
男子志功名徒死不容悔坐思黃河上橫戈被重鎧
晚途雖益困此志顧常在一日天勝人醜虜安足醜

夜歸
晡時振柁離西興錢清夜渡見月升浮橋沽酒市嘈
噴江口過埭牛凌兢寒齋煮麩坐茆店小鮮供饌尋
魚管偶逢估客問姓字歡笑便足為交朋須臾一飽
各散去帆席健快如超騰雲間戍樓鼓坎坎山尾佛
塔燈層層夜分到家趨篝火穉子驚起頭鬢髻道途
辛苦未暇說一尊且復驅嚴凝

江北莊取米到作飯香甚有感
我昔從戎清渭側散關嗟峨下臨賊鐵衣上馬蹴堅
冰有時三日不火食山蕎畬粟雜沙磧黑黍黃床如
土色飛霜掠面寒壓指一寸赤心惟報國即今歸臥
稽山下眼昏臂弱衰境逼新秬炊飯香出甑風殘澗
飲何曾識我豈農家志飽暖閉戶惟思事耕織征遼
詔下倘可期盾鼻猶堪試殘墨

感興
築室真須待伯夷起墳仍合近要離藥來賊境靈何
用米出胡奴死不炊下石紛紛驚俗薄絕絃寂寂嘆
吾衰一尊且作尋春計又見東風浩蕩時

新春
濛濛煙雨暗江干新歲還勝故歲寒酒壓濁清鳴社
食菜分紅綠簇春盤良辰節物元如昨病客情懷自
鮮歡却羨村鄰機上女隔籬相喚祭蠶官

新年
寄迹人間夢已長新年脫帽始微霜坐中使氣如秦
俠陌上行歌類楚狂掃榻欲招貧與語杜門聊以醉
為鄉稽山刻曲雖堪樂終憶祁連古戰場

遊鏡湖
禹祠柳未黃刻曲水已白魴鱖來洋洋鳧雁去拍拍
皇天亦大度能容此狂客挂席乘長風未覺湖海迮
讀書五十年自笑安所獲昔人精微意豈獨在簡冊
驥空萬馬羣裘非一狐腋超然登玉笥及此煙月夕
玉笥峯在會稽山南

初春晚晴
雪盡冰消斂積威參差碧瓦帶斜暉土膏漸釋人東
作天氣初和雁北歸小閣金船嘗臘酒華堂銀燭製
春衣關心雖有尋梅夢冷蕊幽香事已非 自占歲多風
雪屢廢觀梅之集

偶讀山谷老境五十六翁之句作六十二翁吟
三百里湖水接天六十二翁身刺船飯足便休慵念
祿丹成不服怕登仙胸中浩浩了無物世上紛紛徒
可憐但有青錢沽白酒猶堪醉倒落梅前
自開歲略無三日晴戲作長句

新年暗曉覺春慳變化相乘一瞬間兩脚稍收初見
日風花忽起又遮山 風欲作則大霧充塞謂之風花 欲行
幽圃還成阻未脫重裘自笑屏桃李會開君勿恨清
尊且用破衰顏

置酒梅花下作短歌
歲月不貸人綠髮成華顛此生幾兩屐念之每悽然
我本塵外客已絕區中緣惟當及未死勤醉梅花前
瘦影寫微月疎枝橫夕煙偃蹇巖壑間欲與松忘年

豈亦薄世俗忽逐天風翻吾詩不徒歌持配湘娥致
梅花已過聞東村一樹盛開特往尋之慨然有

感

春晚城南十里陂亭亭獨立見奇姿品流不落松竹
後懷抱惟應風月知旋拂亂雲成小佇重攜芳楫卜
幽期佳入空谷從來事莫恨桃花笑背時

思蜀

老子饒堪笑珍盤憶少城流匙抄蕙飯加糝吸巢羹
枓美傾筠籠茶香出土鎔西郊有舊隱何日返柴荆
書憤

早歲那知世事難中原北望氣如山樓船夜雪瓜洲
渡鐵馬秋風大散關塞上長城空自許鏡中衰鬢已
先斑出師一表真名世千載誰堪伯仲間

南窗擘黃柑獨酌有感

放翁潦倒鬢成絲也把花前酒一卮何限人間堪恨
事黃柑丹荔不同時

久雨驟晴山園桃李爛熳獨海棠未甚開戲作

雨霽風和日漸長小園尊酒答年光直令桃李能言
語何似多情睡海棠

臨安春雨初霽

世味年來薄似紗誰令騎馬客京華小樓一夜聽春
雨深巷明朝賣杏花矮紙斜行閑作草晴窗細乳戲
分茶素衣莫起風塵嘆猶及清明可到家

延和殿退朝口號

兩餘未肯放朝暎穿仗恭承聖主恩清蹕傳聲徐御
殿立庭中頃之奏姓名上乃自東廂出御座紫衣引拜許龍
門徘徊漫結亮階戀零落難招楚澤魂歸去猶堪誇
里巷桐江新賜雨朱轡

又

十年短檝樂滄波強著朝衫棄釣蓑才薄何堪試馮
翊恩深猶許對延和空牆煙柳遙迎馬輦路春泥欲
濺韉莫恨此身衰病去同時朝士久無多

簡楊庭秀

衰衰過白日悠悠良自欺未成千古事易滿百年期
黃卷閑多味紅塵老不宜相逢又輕別此恨定誰知
欽張功父園戲題扇上

寒食清明數日中西園春事又匆匆梅花自避新桃
李不為高樓一留風

夜泛西湖示桑甥世昌

嗟我客上都忽已見莫春騎馬出關門眯眼吹紅塵
西湖商賈區山僧多市人誰令汚泉石只合加冠巾
黃冠更可憎狀與屠沽鄰酌酒肉氣吾輩何由親
少須一闕散境寂鷗自馴舉手邀素月移舟采青蘋
鍾從南山來殷殷浮煙津鶴髮隱者數長樂收釣緝
畏冷不竟夕恨此老病身明發復擾擾吾詩其絕麟
小舟過御園

聖主憂民罷露臺春風別苑畫常開盡除曼衍魚龍
戲不禁芻蕘雉兔來水鳥避人橫翠靄宮花經雨委
蒼苔殘年自喜身強健又作清都夢一回

又

水殿西頭起砌臺綠楊鬧處杏花開蕭韶本與人同
樂羽衛纔聞歲一來鷓首波生涵藻荇金鋪雨後上
莓苔遠臣侍宴應無日目斷堯雲到晚回

自真珠園泛舟至孤山

呼船徑截鴨頭波岸幘閑登瑪瑙坡弦管未嫌鶯鶯
起塵埃無奈汚花何宦情不到漁蓑底詩興偏於野
寺多明日一藤龍井去誰知伴我醉行歌

真珠園雨中作

清晨得小雨憑閣意欣然一掃羣兒迹稍稀遊女艤
煙波蘼山脚溼翠到闌邊坐誦空濛句予懷玉局仙

還家

富貴元須早致身白頭豈復市朝人數聲鶉鳩呼殘
夢一架醪醑送晚春壘嶂出雲明客眼澄江漲雨濯
京塵逢人枉道哦詩瘦下語今年尚未親

又
天津橋上醉騎驢一錦囊詩一束書作客況當多病
後還家已過莫春初泥深村巷人誰顧草滿園畦手
自鉏不為衰遲思屏迹此心元向利名疎

初歸偶到近村戲書

雨過一村暗風回百草香刺船過古埭倚杖立新塘
醉覺乾坤大閑知日月長莫歸詩滿卷雖老尚能狂

題跨湖橋下酒家

湖水綠於染野花紅欲燃春當二月半狂勝十年前
小店開新酒平橋上畫船翩翩幸強健不必愧華顛

春遊至樊江戲示坐客

江頭蕭蕭春色莫柳陰遊魚飽飛絮老羹箭筍美如
玉點豉絲蔬滑滌滌銀鞍烏帽尋春客朱戶青旗沽
酒處浮生細看纔幾時一笑自應忘百慮綠盃到手
不肯盡寶帶照地身何與醅醱爛慢我欲狂若芋還
家君勿遽

莫春

顛顛都門白髮新歸來一振客衣塵啼鴛妒夢頻催
曉飛絮鍾情獨殿春湖上風光猶淡沱尊前懷抱頗
清真詩成絕恨知心少自寫吳牋寄故人

天華寺前遇縣令過避之入寺僧皆晝睡

墮絮飛花掠釣舫天華寺下賞春妍縣多官府鳴騶
過僧少叢林避客眠出網長魚猶鱗鱗爭泥新燕欲
翩翩典衣剩買旗亭醉已過旗亭六十年

偶得海錯侑酒戲作

判無神藥斷清冥放筋那憎海物腥滿貯醇醪漬黃
甲密封小瓮餉紅丁從來一飽忘南北此去千鍾任
醉醒添雪更知憑茗椀山童敲臼隔窗聽

雨晴遊香山

兩打除醺夜未拆一晴柳岸先飄雪我搖畫幟鏡湖
中碧水青天兩奇絕長歌縹緲雲不動橫笛清悲竹
將裂悠然起舞影零亂卓爾四顧心激烈好山可隱

輕捨去故人已貴長乖隔肺渴生塵防酒與眼暈成
花作書厄平生所期無一遂獨有曠快相除折夜歸
燈火鬧湖邊淡淡西南一鉤月

春遊絕句

一百五日春郊行三十六溪春水生千秋觀裏逢急
雨射的峯前看晚晴自秦望山而北合三十六溪水爲若耶溪

夜行玉笥樵風之間宿龍瑞

野店谿橋供晚餉吟邊醉裏弄春風馬行缺月黃昏
後鐘下亂山空翠中名宦不辭成寂寂歲時惟恨去
忽忽頗聞禹穴遺書在安得高人與細窮

聞傅氏莊紫笑花開急棹小舟觀之

日長無奈清愁處醉裏來尋紫笑香漫道閑人無一
事逢春也似蜜蜂忙

遊法雲寺觀葬老新葺小園

古寺朱扉傍水開高僧笑語共徘徊陰陰曲徑人稀
到一一名花手自栽竹筧引泉滋藥壟風爐篝火試
茶盃此行自喜非生客二百年間六世來五世祖太保
公捨園地建寺

臧齋十韻

九月十月屋瓦霜家人共畏哇蔬黃小豨大甕盛滌
濯青菘綠韭謹蓄藏天氣初寒手訣妙吳鹽正白山
泉香挾書旁觀穉子喜洗刀竭作廚人忙園丁無事
臥曝日棄葉狼籍堆空廊泥爲緘封煉作火守護不
敢非時嘗人生各自有貴賤百花開時促高宴劉伶
病醒相如渴長魚大肉何由薦凍齋此際價千金不
數孤泉槐葉麪摩挲便腹一欣然作歌聊續冰壺傳

長門怨

未央宮中花月夕歌舞稱觴天咫尺從來所恃獨君
王一日讒興誰爲直咫尺之天今萬里空在長安一
城裏春風時送簫韶聲獨掩羅巾淚如洗淚如洗今
天不知此生再見應無期不如南粵匈奴使航海梯
山有到時

遺興

莫羨朝回帶萬釘吾曹要可草堂靈風來弱柳搖官
綠雲破奇峯湧帝青聽盡啼鶯春欲去驚回夢蝶醉
初醒從教俗眼憎疎放行矣桐江醉客星

晨坐道室有感

一鉢青精便有餘世間萬事總成疎手揮絃上烏棲
曲口誦巖間鳥跡書丹氣初升勤沐浴芝房未熟飽
耘鋤碧霄騰舉入人事莫戀汚渠與臭帑

晝臥

忽忽見春盡徂年那更還香生帳裏霧書積枕邊山
凌厲心猶壯沈蘇氣已孱千秋有管葛看鏡汗吾顏

雨晴

久雨作我病今朝身頓輕花房避初旭簾影弄新晴
漉酒綸巾折聽琴拄杖橫翛然又終日未覺負平生

宿石帆山下

卷地東風吹釣船石帆重到又經年放翁夜半酒初
解落月啣山聞杜鵑

又

繫船禹廟醉如泥投宿漁家月向低溼翠撲人濃可
掬始知身在石帆西

小雨泛鏡湖

吾州清絕冠三吳天寫雲山萬幅圖龍化廟梁飛白
雨鶴收仙箭下青蕪菱歌嫋嫋遙相答煙樹昏昏淡
欲無端辦一船多貯酒敢辭送老向南湖 鏡湖一名南

湖

小憩村舍

藤梢維艇子煙際覓人家小婦簪新麥羣童摘晚茶
溪雲易成雨崖樹少開花聊寄平生快青鞵到若耶

平水

水悍溪橋敗沙頽野徑移年華入詩卷心事付筇杖
雨霽鷓鴣喜春歸鷓鴣知客庖消底物麥飯薦蔬絲
初夏山中

又報東皇促駕歸醉中闕賦送春詩佛餅是處見紅
藥僧榻有時聞子規野客款門聊倒屣豁豁潭照影一
軒眉年光佳處惟初夏兒女紛紛詎得知

雨後

礎潤還成雨雲收旋作晴巖花分日發林筍逐番生
筆硯行常具軒窗晚更明塵埃幸不到那得廢詩情

雲門溪上獨步

山路聯翩十日陰晚晴刺喜得幽尋殘紅猶有數枝
在漲綠真成一倍深泉響珮環鳴閨壑月明珠壁散
疎林歸來寂寞鐘初動羞向孤燈說壯心

雲門過何山

漠漠稻滿陂濛濛雨霏衣林花落更新碨鳥止復飛
我作山中行十日未擬歸思酒過野店念茶叩僧扉
眠枕松下石適意無訶譏心廣體自舒泰然不肉肥

念昔在官塗萬事與願違逢人無一欣對食或累歎
低回三十年竟不飽蕨薇空將書五車自註腹十圍
餘日猶幾何可復貪塵轍賸拾柏子香閉門觀昨非
明覺院

細路蟠青壁層軒倚碧空天香下塵世僧梵起雲中
藤絡將頽石松號不斷風尤憐扶杖處直下數飛鴻

自雲門至上竈欲遊一二僧養以雨不果

道遠晨炊米風和晝減衣花殘孔官廟苔滿葛仙磯
剩欲尋僧話先判秉炬歸山昏又成雨心事固多違
自上竈過陶山

宿雨初收見夕陽縱橫流水入陂塘蠶家忌客門門
閉茶戶供官處處忙綠樹村邊停醉帽紫藤架底倚

胡床不因蕭散遺塵事那覺人間白日長

四月

四月江南暑尚微虛堂初換葛衣時懶陪陌上雍容
騎且對窗間匾牌棋樛徑落花猶片片拂雲新竹已
離離年來病肺疎孟酌應接風光積有詩

初夏閑居即事

門巷蕭蕭日正長
方床曲几傲羲皇
輕風忽起楊花鬧
清露初晞藥草香
對奕兩奩飛黑白
讎書千卷雜朱黃
穿簾語燕能從我
分爾湖邊一夏涼

夜汲

酒渴起夜汲
月白天正青
銅瓶響寒泉
聞之心自醒
井邊雙梧桐
映月影離離
上有獨棲鶻
細爪握高枝
我欲畫團扇
良工不可求
三歎拊庭楯
浩然風露秋

排悶

老去知心少
流塵鎖斷絃
尊空問字酒
囊罄作碑錢
掃葉供朝爨
和泥補漏船
胸中元浩浩
白眼望青天

初夏夜賦

好景入新夏
幽人臥弊廬
廊腰得風遠
樹罅見星疎
門掩鴉棲後
鐘鳴月上初
青燈尚堪近
起了讀殘書

新霽城南舟中夜興

身是江湖不繫船
雨餘隨處一偷然
浮雲盡放青嶂孤
月餘升行碧天
收網漁歌移別浦
隔城塔影落前川
明朝閑就平洲飲
巾履追涼又一年

泊舟

蘼岸煙波橫畫船
幅巾蕭散錢流年
兩行楊柳吹晴雪
只著啼鶯未著蟬

又

湖水無風鏡面平
嶢嶢倒影萬峯青
放翁眼界便疎豁
過盡蘆村泊蓼汀

飲伯山家因留宿

小醉悠然不作醒
斷雲飛盡却成晴
月生檐外見簾影
風下城頭聞角聲
岸幘莎庭便髮冷
酌泉桐井覺魂清
雞號忽報明星上
夢破虛皇白玉京

夜泛蜻蜓浦

四顧水無際
三更月未生
偶成搖櫂去
不減御風行
煙浦漁歌斷
蘆洲鬼火明
還家人已睡
小立叩柴荆

晨起看山飲酒

愛山入骨髓
嗜酒在膏肓
跌宕風煙外
歌呼麴蘖傍

虛窗天柱曉
書堂正見天柱峯
小瓮蒙泉香
家釀今年試用
岐下麩泉麴法
垂老叨微祿
無□□□忙

枕上偶賦

初夏暑猶薄
紗幮怯夜深
孤螢入窗罅
斜月下牆陰
靜養觀書眼
窮悲濟世心
吾衰亦久矣
徂歲苦駸駸

自詠

射的山前一老樵
此生何敢辱旌招
繆緣學道肱三折
不遇知音尾半焦
去盡區區慚啄木
附高燁燁鄰凌霄
但令窮死心無媿
也勝鳴珂事早朝

題齋壁

二十餘年此結茆
園公谿父日論交
風翻半浦亂荷背
雨放一林新笋梢
隔葉晚鶯啼谷口
啜花雞鴨聚塘坳
出門行罷還無事
借得丹經手自抄

又

四顧茫茫水接天
幽居真箇似乘船
月窗竹影連棲鶻
露井桐聲帶斷蟬
甘寢每憎茶作祟
清狂直以酒為仙
形骸那得常羈束
六十年來又二年

又

舴艋為家一老翁
陽狂羞與俗人同
夢回菱曲漁歌裏
身寄蘋洲蓼浦中
斷簡塵埃存治道
高丘草棘閉英雄
旗亭村酒何勞醉
聊豁平生芥蒂胸

又

稽山千載翠依然
著我山前一釣船
瓜蔓水平芳草岸
魚鱗雲襯夕陽天
出從父老觀秧馬
歸伴兒童放紙鳶
君看此翁閑適處
不應便謂世無仙

劍南詩稿卷第十七終

劍南詩稿目錄

卷第十八

丙午五月大雨五日不止鏡湖渺然想見湖未廢時有感而賦 遊鄞 泊上虞縣 發文亭

二首 明州 水亭獨酌十二韻 坐客有談狄魚眼睡之美者感嘆而作 衰病不復能劇

飲而多不見察戲作此詩 或以予辭酒為過復作長句 行路難 千峯樹宴坐 喜雨二

首 五鼓 官居戲詠三首 倦眼 拜日表 早自烏龍廟歸 上丁 新秋 殘年 休

日行郡圃 登北榭 小酌 焚香作墨瀋決訟吏皆退立一丈外戲作此詩 齋中閒詠

秋夜聞雨 自詠 秋懷 不寐 醉中戲作 頻夜夢至南鄭小益之間慨然感懷二首

夜雨枕上 雨夜 安流亭侯客不至獨坐成詠 秋興二首 燕堂獨坐意象殊憤憤起登

子城作此詩 秋雨北榭作 次韻王給事見寄 病中夜半 卽事 歲晚懷故人 焉耆

行二首 丙午初冬得心腹痛疾大下而愈羸耗不支方在告臥燕堂東偏聞民間前一夕被

盜者慨然有感 因王給事回使奉寄 病告中遇風雪作長歌排悶 冬夜戲作 夜坐二

首 遺興 登紫翠樓 丙午十月十三夜夢過一大冢傍人為余言此荆軻墓也按地志荆

軻墓蓋在關中感歎賦詩 病起小飲 冬夜讀書 夜坐觀小兒作撥毛詩欣然有賦 郡

齋偶書三首 燈下閱吏牘有感 過放生池追懷江公民表諫議池蓋公所創也 園中絕

句二首 戲作 縱筆三首 病中偶得名酒小醉作此篇是夕極寒 晨讀道書 後園獨

步有懷張季長正字 老將效唐人體 書憤 晨起 雪 歲晚書懷 晨過天慶 冬夜

比得朋舊書多索近詩戲作長句 休日感興 病中偶書 寒夜 雪中獨酌 送客

新晴 出城 立春日送客郊外 大雪自夜至日欲午始晴 雪夜有感 雪中忽起從戎

之興戲作四首 十二月二十七日祭風師歸道中作 春晴 丁未正月春色已粲然露坐

高風堂北觀種花 燕堂春夜 早春池上作感興 東齋偶書 丁未上元月色達曉如

晝子齋居屬貳車領客 自郊外歸北望譙樓馬上作 還舍 杏花 兩京 贈表弟江

參議 讀書 夜登千峯榭 旬日公事頗簡喜而有賦 聞鼓角感懷 社日小飲二首

昔日 新晴 倚闌 寄徑山印禪師 園中歸戲作 春曉東郊送客 莫春嘆 曉雨二

首 登千峯榭 晚春園中作 北窗 浮生小壘 大閱後一日作假 自嘲 曉出東

城 初夏遇休日園中閒賦 小雨出西門五里至東嶽廟 初夏燕堂睡起 晡後領客僅

見燭而罷戲作短歌 讀宛陵先生詩 書數

劍南詩稿卷第十八

宋 陸 游 務 觀

丙午五月大雨五日不止鏡湖渺然想見湖未廢時有感而賦

朝雨莫雨梅正黃城南積潦入車箱鏡湖無復鍼青秧直浸山脚白茫茫湖三百里漢訖唐千載未嘗廢陂防屹如長城限胡羌嗇夫有秩走且僵早有灌注水何傷越民歲歲常豐穰洪湖誰始謀不減使我婦子饜糟糠陵遷谷變亦何常有妙手開湖光蒲魚自足被四方煙艇滿目菱歌長

遊 鄞

晚雨初收旋作晴買舟訪舊海邊城高帆斜挂夕陽色急勝不聞人語聲掠水翻翻沙鷺過供厨片片雪鱗明山川不與人俱老更幾東來了此生

泊上虞縣

鄞江久不到乘興偶東遊漲水崩沙岸歸雲抱縣樓吟餘聲混混梳罷髮颯颯喜見時平象新絲入市稠發臥聽滿江柔艣聲

又

文雲垂天暗如漆艣聲嘔軋知舡行南風忽起卷雲去江月已作金盆傾

明州

豐年滿路笑歌聲蠶麥俱收穀價平村步有舡銜尾泊江橋無柱架空橫海東估客初登岸雲北山僧遠入城 仗錫平老出山來迎予 風物可人吾欲住擔頭蔬菜正堪烹

水亭獨酌十二韻

清風掃鬱蒸爽氣生戶牖客中淡無事儵然一盃酒

書生拙自料事業期不朽少年忝朝跡躡躑今白首歷觀千載事和戎固嘗有定襄伍原間乃可畫地守神州在何許東巡已去久煌煌一統業謀訓其可負太祖嘗書大宋一統字以賜王溥荆楚多劍客宣潤富弩手孰能用其長坐使老農畝講武幸長楊勞軍臨細柳中興望聖時未死得見否

坐客有談狄魚眼眊之笑者感嘆而作

黃雀頭顱羞五鼎狄魚眼眊參雋永兩整何臯蟹喪軀一鬱可憐牛斷領霜刀斫膾幾許痛公子方誇醉魂醒物生怖死與我均碰几流丹只俄頃哀哉堂堂七尺身正坐舌端成業境豪華只可誇僕妾報應那知類形影世間擾擾何時了一念超然差若顛不妨瓦鉢飽晚菘更汲山泉試春茗

衰病不復能劇飲而多不見察戲作此詩

平生不持面看人寧作五湖雲水身忍窮閉門豈自苦是中有味敵八珍酒盃激盪鼓吹作我自悲吒人自樂更闌坐睡不得去如鷹在韝虎遭縛丈夫歡樂自有時遇酒先怯非予衰萬騎擊胡青海岸此時意氣令君看

或以予辭酒為過復作長句

陸生酒戶如蠡迨痛酒豈能堪大白正緣一快敗萬事住住吐茵仍墮憤爾來人情甚不美似欲殺我以麩葉滿傾不許計性命傍晚更復騰頰舌醉時狂呼不復覺醒後追思空自責即今願與交舊約三爵甫過當亟徹解衣摩腹午窗明茶磴無聲看霏雪

行路難

平生結交無十人與君契合懷抱真春遊有時馬忘秣夜話不覺難報晨極知貧賤別離苦明日有懷就誰語人無根抵似浮萍未死相逢在何許道邊日斜泣相持旗亭取醉不須辭君貴堂廚萬錢食我勸一盃應不得

千峯榭宴坐

蒼寒千疊擁官居吏退憑高樂有餘盡日煙雲窮變
化入秋草木漸凋疎朱弦靜按新傳譜黃卷閑披累

譯書聊與邦人共無事吾僚不用笑迂疎

喜雨

勢掠郊原飛急雪聲搖窗戶過奔雷坐知多稼連雲
熟不獨新涼傍枕來

又

浙瀝蒼聲枕上聞攬衣起坐對爐熏萬家歌舞豐年
樂未費烏龍一綫雲

五鼓

樓堞寥寥鼓簾櫳煜煜燈燈名隨牒吏實似打包僧
衰病元難強疎慵每自憎誰知戎邊日秋野正呼鷹

官居戲詠

萬里飄然似斷蓬桐廬江上又秋風判餘牘尾棲鴉
涇衙退庭中立雁空燈火市樓知酒賤歌呼村路覺
年豐誰言病守無歡意也與他人一笑同

又

說著功名即自羞莫年世味轉悠悠一庭落葉楸梧
老萬里悲風鼓角秋懷綬不為明日計登樓且散異
鄉愁漁舟大似非凡子能揀溪山勝處留是日書所見

又

城頭閑倚一枝藤病起清羸不自勝衙鼓有期催晚
坐條鈴無賴喚晨興愛書習氣嗟猶在寡過工夫愧
未能寂寞已無臺省夢諸公袞袞自飛騰

倦眼

看書澀似上羊腸得睡甘如飲蜜房起坐藤床搔短
髮數聲畫角報斜陽

拜日表

一封馳奏效嵩呼清蹕何時返故都只道建炎巡狩
禮誰知故事自祥符

早自烏龍廟歸

殘漏聲中聽曳鈴翩翩吹帽出郊垌雨餘澗落雙虹

白雲合山餘一髮青鐵馬蹴冰悲昨夢朱顏辭鏡感
頽齡歸來獨對空齋冷鳥迹蒼苔自滿庭

上丁

燎火明中庭老槐泣殘雨白頭奉祀事恐懼劇仰俯
三終樂在懸再拜肉升俎誰言千載後恍若到鄒魯
吾國雖偏小大社胙茹土如何儼章綬日夜臨筮楚
藏書如丘山及物無一羽吾其可憐哉去去老農圃

新秋

打窗落葉報穠期病叟頽然兩鬢絲縱酒已無年少
夢讀書仍負夜涼時問囚損氣嗟誰念學道劊心恐
已遲買鶴清溪歸計足寄聲先遣故人知

殘年

殘年迫鍾漏病骨怯風霜投憤早當去強顏徒自傷
文符紛似雨訟訴進如牆笑殺滄浪客微官有許忙

休日行郡圃

南山如黛照朱扉地接官居到亦稀寒蝶徘徊掠衰
草孤花閃淡弄斜暉荒城歌舞難娛客休日文書且
解圍猶勝去年窮巷底臥聞砧杵念秋衣

登北榭

遠城山作翠濤傾底事文書日有程無溷我為揮吏
散獨登樓去看雲生香浮鼻觀煎茶熟喜動眉間煉
句成莫笑衰翁淡生活它年猶得配玄英方干有千峯

小酌

簾外桐疎見露蟬一壺聊醉嫩寒天團臍磊落吳江
蟹縮項輪困漢水編此兩物近頗登盤投老宦遊真漫
爾平生懷抱固超然文書縛急何由耐會向長安市
上眠

焚香作墨審決訟吏皆退立一丈外戲作此詩

客鬢新添幾縷絲山城且付一官癡空濛碧靄籠香
岫近得一石穴建於背出香如雲靈蠶玄雲起墨池判牒
不妨閑作草坐衙聊得細哦詩吏民莫怪秋來健漸

近南山射虎時
齋中閑詠

風號萬物作濤聲雲截千峯似几平多病支離仍老境莫秋蕭瑟更山城燕鷲久罷塵痕積庭訟全稀薛暈生莫道齋中日無事焚香掃地又詩成

秋夜聞雨

香斷燈昏小幌深不堪病裏值秋霖驚回萬里關河夢滴碎孤臣犬馬心清似釣船聞急瀨悲於靜院聽繁砧玉峯老去情懷惡穩受千莖雪鬢侵 韓致光詩云不知短髮能多少一滴秋霖白一莖

自詠

鈍似窗間十月蠅淡如世外一孤僧心勞撫字雖亡補筆判虛空却蠢能厭見文書銜客袖但思蔬水曲吾恁何時却宿雲門寺靜聽霜鐘對佛燈

秋懷

少時本願守墳墓讀書射獵畢此生斷蓬遇風不自覺偶入戎幙從西征朝看十萬閱武罷莫馳三百巡邊行馬蹏度隴靄聲急士甲照日波光明興懷徒寄廣武歎薄福不挂雲臺名領鬚白盡愈落莫始讀法律親答榜認坻滿庭闌如市吏牘圍坐高于城未嫌樵唱作野哭最怕甜酒傾稀錫平生養氣頗自許雖老尚可否司并何時擁馬橫戈去聊為君王護北平

不寐

閏年九月已重裘說著功名即自羞病骨不禁霜氣峭高風正送雁聲道半盃濁酒如欺老一點青燈欲訴愁不寐裁詩真習氣輸它睡足向黃州

醉中戲作

當年買酒醉新豐豪士相期意氣中插羽軍書立談辦如山鐵騎一麾空玉關久付清宵夢笠澤今成白髮翁堪笑燈前如意舞尚將老健壓諸公

頻夜夢至南鄭小益之間慨然感懷

身似菴居老病僧罷參不復繫行滕夢中忽在三泉

驛庭樹鳴梟鬼弄燈

客枕夢遊何處所梁州西北上危臺雲雲不隔平安火一點遙從駱谷來

夜雨枕上

秋雨不肯晴秋夜不肯明寸心集百憂厭此點滴聲歲月不貸人老病忽至此丈夫本憂世兒女乃畏死

雨夜

蒼雲晝埋山白雨夜溢渠虛堂閃風燈獨處誰與娛吾生過六十鬢髮日夜疎出當飲美酒歸當讀奇書可憐雨不遂兀兀如枯株明復對胥吏孤憤何由攬安流亭侯客不至獨坐成詠

秋興

憶昔西征鬢未霜拾遺陳迹吊微茫蜀江春水千帆落禹廟空山百草香馬影斜陽經劍閣騰聲清曉下瞿唐酒徒雲散無消息水榭憑欄淚數行

又

秋槐雨裏鬢鳧雁水拍拍曉行城南路落葉滿阡陌新霜上衰鬢吾死亦已迫那將有限身常作未歸客長吟側紗帽萬里一秋色世俗不足論天豈無阜白

又

朝先鳴雞興夕殿棲鴉還符檄積几案寢飯於其間榜笞督租賦涉筆辭我顏忽忽過白日胡能慰惻鰥葉脫橫林疎髮鬢溪南山豈無一盃酒吾事何時閑燕堂獨坐意象殊憤憤起登子城作此詩

又

睡魔困衰翁白日坐兀兀忽然振衣起目瞭尚如鶻憑高望中原佳氣未消歇逆賊稽大刑痛憤深至骨新霜下昌陵草有胡馬齧羽林百萬士何日聞北伐賤臣官有守不敢叫行闕夢中涉黃河太行高礮斫

又

天河未洗兵封豕食上國坐令河洛間百郡暗荆棘夷吾非王佐尚足救左袵中原消息斷吾輩何安寢世俗苦齷齪誰與共此功安知無奇士悲歌燕市中

秋風吹雨到江濱小閣疎簾曉色分津吏報增三尺
水山僧歸入萬重雲飄零露井無桐葉斷續煙汀有
雁羣了却文書早尋睡檐聲偏愛枕間聞

次韻王給事見寄

大手方司一世文癯儒何敢望餘塵誰知天上黃扉
貴肯記江邊白髮新末路愈窮詩有崇舊書渾忘筆
無神床頭周易尊中酒猶賴渠儂不負人

病中夜半

蕭蕭欲脫猶吟葉耿耿微明未滅燈夜半不眠閑倚
壁使君清似北山僧

卽事

組繡紛紛街女工詩家於此欲途窮語君白日飛昇
法正在焚香聽雨中

歲晚懷故人

衰髯白盡無添處病骨癯然欲折時客抱琴來聊論
茗吏封印去又哦詩山橫城上勢如壓角動樓頭聲
正悲零落斷鴻書不到歲殘何以慰相思

焉者行

焉者山頭莫煙紫牛羊聲斷行人止平沙風急捲寒
蓬天似穹廬月如水大胡太息小胡悲投鞍欲眠且
復起漢家詔用李輕車萬丈戰雲來壓壘

又

焉者山下春雪晴莽莽惟有蒺藜生射麋食肉飲其
血五穀自古惟聞名樵蘇切莫近亭障將軍臥護真
長城十年牛馬向南睡知是中原今太平

丙午初冬得心腹痛疾大下而愈羸耗不支方

在告臥燕堂東偏聞民間前一夕被盜者慨然
有感

惓惓四壁空宛宛一室與雨聲靜更聞雨氣深不到
下簾設紙屏篝火支藥竈勿言此幽陋足以養衰耗
頗聞閭里間比夕多狗盜游徼無乃闕繆寡將孰告
家貧未決去祿食當念報臥病疇敢安起立擲吾帽

因王給事回使奉寄

兩昏郡郭連三日吏報江流忽數回江每漲津吏輒報日
或三四至正數般如天上坐那知人自日邊來臂弓腰
箭身今老航海梯山運已開漢虜不應常自守期公
決策畫雲臺

病告中遇風雪作長歌排悶

風雪橫街不能出閉戶垂帷養衰疾黃昏臥聽打窗
聲聊挽清寒入詩律公孫布被久有味子敬青氈暖
無匹石鼎閑烹似爪茶霜斂旋破如拳栗蹲鴟足火
微點鹽嬰粟熬湯旋添蜜龍蛇鱗鱗寒筍束子母累
累丹柿實玉狸試說涎已墮石芥纔嘗酒如失天公
付汝亦已厚飽食長謠抱雙膝丈夫豈爲口腹計壯
志常恐無時畢伐胡疏奏端許前腰領敢辭膏斧鑽
冬夜戲作

冬夜戲作

賤貧百年愁老大萬事倦起家來牧民竊語笑丞掾
拘擊拙微科儉陋省遊宴不思返江湖乃爾辱畿甸
斯言中吾病有醜在其面行當自劾去暫寓等郵傳
十月夜正長歲事到冰霰膏油幸可具更盡書一卷

夜坐

曲几蒲團夜過分頽然半脫鹿皮巾鷺鴻避弋鳴煙
渚斷角凌風上雲雲仕宦愈知林下貴窮愁方策酒
中勛扁舟東去何時辦昔向金丹幸有聞

又

山城意象自蕭然況是高齋作雪天漸暗玉蟲寒有
燼欲殘金鴨煖無煙衰容病後如添歲遙夜冬來抵
過年安得龍綃三丈幅爲君試寫白雲篇

遣興

圖書雞犬共扁舟又續人間汗漫遊醉眼本輕千古
事釣竿新賜一灘秋慣看浮世成陵谷莫露神光上
斗牛老病豈堪常作客夢尋歸路傍西嘯

登紫翠樓

水落溪聲壯天寒山色奇殘雲宿虛閣馴鷺下清池

簿領消豪氣功名負聖時憑高不勝嘆神武迫歸期
丙午十月十三夜夢過一大冢傍人爲余言此

荆軻墓也按地志荆軻墓蓋在關中感數賦詩
采藥遊名山物外富真賞秋關策蹇驢雪峽蕩孤槳
還鄉忽十載高興寄遐想夢行河潼間初日照仙掌
坡陀荆棘冢狐兔伏藜莽悲歌易水寒千古見精爽
國難久不復驚覺泚吾額何時真過茲薄醉神所饗
病起小飲

病起新霜滿鬢蓬憑高一笑與誰同酒如綠靜春江
水人有鴻荒太古風野寺鐘來夕陽外寒山空插亂
雲中一官正爾妨人樂只合滄浪狎釣翁

冬夜讀書

莫笑燈檠二尺餘老來舊學要耘鋤寒生點滴三更
雨喜動縱橫萬卷書本著儒冠那免此可因吏牘頓
拋渠善和舊賜今猶在剩采芸香辟蠹魚

夜坐觀小兒作擬毛詩欣然有賦

北風城頭鼓統統徂歲崢嶸正多感老夫假寐角巾
低穉子高吟兩髦髡衰遲笑我藏袖手狂率憐渠滿
軀膽旋炊粉鐘裏青箬新煤錫枝綴紅糝未言問事
漸瀾翻且賞揮毫能果敢嗟予疇昔如汝年萬卷縱
橫恣窺覽卽今見汝尚懽欣此癖真同嗜昌歎夜闌
我困兒亦歸獨與狸奴分坐穩

郡齋偶書

白首奉魚書蕭然一事無吏閑晨已散人醉莫相扶
卷野收禾黍連江下船艫山城君勿謂東北是皇都

又

翠嶺當城起清江擘破流軻峨商客編嘈噴酒家樓
豐歲人元樂殘年我獨愁秦吳環萬里感慨故貂裘
又
江墮清笳月霜嚴畫戟門難聲寒更壯山氣日常昏
搖落悲徂歲羈遊憶故園無勞空竊食何以報君恩
燈下閱吏牘有感

老眼今年太負渠義經魯史頓成疎一爲杜後惠文
吏厭讀司空城日書正苦雁行須束縛不言鼠輩合
誅鉅致君堯舜元無術黃卷何辭飽蠹魚
過放生池追懷江公民表諫議池蓋公所創也

釣臺先生諫大夫建中初元起江湖是是非非玉座
側身可死徙志不渝煙汀月島二十載白髮短船藏
菰蒲晚蒙前洗得一障上奏猶自稱羸疎公廣濟到任
表云不能軟熟終是羸疎其不撓如此 此公造處直奇特竺

乾先生分半席九州看如掌中果天不遺爲吁可惜
徑歸斂手築陂池也活龜魚論萬億骨冷桐山喚不
聞停車悵望春波碧

園中絕句

梅花重壓帽簷偏曳杖行歌意欲仙後五百年君記
取斷無人似放翁顛

又

溪北溪南飛白鷗夕陽明處見漁舟憑誰爲剪機中
素畫取天涯一片秋

戲作浙西諸郡惟嚴無職租

歸臥元知作餓夫宦遊依舊是癯儒免教妻子爭秬
秠秋稼連雲一稜無

縱筆

閑經月下白蘋洲半脫風前紫綺裘曾值東風謁鸞
駕却因南渡看龍舟年光已付曹騰醉天宇誰從汗
漫遊莫怪又成橫笛去故人期我玉華樓 玉華樓在青
城山丈人觀

又

東都宮闕鬱嵯峨忍聽胡兒勅勒歌雲隔江淮翔翠
鳳露霑荆棘沒銅駝丹心自笑依然在白髮將如老
去何安得鐵衣三萬騎爲君王取舊山河

又

行省當年駐隴頭腐儒隨牒亦西遊千艘衝雪魚關
曉萬竈連雲駱谷秋天道難知胡更熾神州未復士

堪羞會須瀝血書封事請報天家九世讎

病中偶得名酒小醉作此篇是夕極寒

一壺花露折黃滕醉夢酣酣喚不響屏煖半銷香鴨
火窗寒初結研蟾冰詩囊羞澀悲才盡藥裹縱橫覺
病增早掛朝衣歸去是貴人誰記接茵憑

晨讀道書

家貧悔嗜酒年邁思學道雖云善補過見事恨不早
儒生守章句忽忽遂將老巖間得奇書足以慰華皓
丹液下注臍黃雲上通腦海山行當歸白髮何足掃

後園獨步有懷張季長正字

斯世元知少賞音道存何恨死山林半生去國風埃
面一片憂時鐵石心閑看斷雲成小立偶穿修竹得
幽尋故人已到梁州未尺紙東來抵萬金

老將效唐人體

寶劍夜長鳴金瘦老未平指弓誇野戰抵掌說番情
已矣黑山成悵然青史名和規不用武教子作儒生

書憤

清汴逶迤貫舊京宮牆春草幾番生刮心莫寫孤臣
憤扶眼終看此虜平天地固將容小醜犬羊自慣瀆
齊盟蓬窗老抱橫行略未敢隨人說弭兵

晨起

衣潤熏籠煖燈殘漏箭長鳴雞帶窗月立馬怯庭霜
病骨陰晴覺官身早夜忙火城那復夢愁絕軟塵香

雪

但苦奇寒惱病翁豈知上瑞報年豐一庭不掃待新
月萬壑盡平號斷鴻繭紙欲書先研凍羽觴纔舉已
尊空若耶溪上梅千樹欠我今年繫短篷

歲晚書懷

早見龍翔上太清紹興末游官玉牒所即今孤宦老山
城靈丹不解換凡骨薄命枉教生太平積雪樓臺增
壯觀近春鳥雀有和聲如山吏牘何時了惆悵西窗
晚照明

晨過天慶

蘿月挂團壁松風號急灘孤燈經院曉殘雪醮壇寒
臘欲閑扶杖何妨醉墮冠詩成興不盡萬里跨青鸞

冬夜

翻翻殘曆不滿紙坎坎壘鼓無停搗香殘未消古鼎
火燈暗尚結寒缸花長安故人日已遠錦江小築天
之涯拘攣動覺吏有責幽獨更似僧無家臥聞沙雁
叫空關想見雪谷森谿鈔起提一筆掃足紙入卷颯
颯奔龍蛇

比得朋舊書多索近詩戲作長句

庭下訟訴如堵牆案上文書海茫茫酒酸肉冷不得
嘗椎牀大叫欲發狂故人書來索文章豈知吏責終
歲忙寒龜但欲事縮藏病驥敢望重騰驥日曛稍退
鳧驚行小山叢竹堂東廂呼兒深炷銅鑪香楚騷為
我被不祥

休日感興

宦海風波實飽經久將入世寄郵亭家無釵澤窮馮
衍身著襦裙老管寧藥園按行新蔓綠書樓徙倚莫
山青偶然得句悲誰屬零落交朋比曉星

病中偶書

燈火青熒古屋深挂冠境界已駸駸竹枝影瘦橫殘
月藥杵聲寒續莫砧病覺死生真大事老知道德愧
初心經龕禪版殊當勉懶學莎蛩事苦吟

寒夜

脫葉爭辭木寒雲巧護霜羈遊少驩樂短景極忽忙
吟苦蟲催織鳴哀雁斷行幽懷誰晤語惆悵此燈光

雪中獨酌

金尊玉壺有何好不堪生世匆匆老朱顏忽已謝晨
鏡白骨行看閉秋草駭浪嗟峨風作之蛟龍血人以
為嬉畏塗寄命三十載賴有痛飲紓吾悲莫驚醉眼
炯如電假鉞猶堪行督戰指麾突騎取遼陽雪灑鞍
門夜傳箭

送客

長亭柳漸柔送客當閑遊江近聞津鼓雲開見戍樓
簿書來袞袞歲月去悠悠閉眼尋歸路春燕滿故疇
新晴

出城

翻繖烏帽出林垌掠面風微酒半醒戍火難尋玉關
夢衣塵空愧草堂靈天晴山雪明城郭水漲江流近
驛亭客鬢不如堤上柳數枝春動又青青

立春日送客郊外

短鬢那禁歲月催勝邊花底又春回雪消漸煥青鴛
日冰解初橫玉鑑梅江驛軒窗臨古道市樓絃管賣
新醅自憐病守無歡意一笑常因送客來

大雪自夜至旦欲午始晴

薄莫雪雲低清宵氣慘悽方聽打窗急已報與階齊
疎箔穿飛蝶空庭聚戲猊新晴思訪客愁絕滿城泥
雪夜有感

狂膽輪囷欲滿軀一麾誰憫滯江湖青衫曾奏二千
牘白首猶思丈二及龍虎翔空瞻王氣犬羊度漠避
天誅何時冒雪趨行殿香案前頭進陣圖

雪中忽起從戎之興戲作

狐裘臥載錦駝車酒醒冰髭結亂珠三尺馬鞭裝白
玉雪中畫字草軍書

又

鐵馬渡河風破肉雲梯攻壘雪平壕獸奔鳥散何勞
逐直斬單于鬘寶刀

又

十萬貔貅出羽林橫空殺氣結層陰桑乾沙土初飛
雪未到幽州一文深

又

羣胡束手仗天亡棄甲縱橫滿戰場雪上急追奔馬

迹官軍夜半入遼陽

十二月二十七日祭風師歸道中作
虎豹生憎上九關諸公袞袞遂難攀面顏已老塵埃
裏精力虛捐簿領間東帶敢言趨玉陛橫戈猶憶戍
天山新春自笑摧頽甚鼓吹東風拜胙還

春晴

南陌爭牛事已非縹山又近放燈期風和已染柳千
縷山冷未開茶一旗酒病況當人別後春光偏在雪
晴時道傍笑我清狂在馬上看山細詠詩

丁未正月春色已粲然露坐高風堂北觀種花

苦寒不解歲嶢嶢病守兀坐憂疲氓天風誰遣撼斗
柄便覺春色來江城北山賽廟見殘雪東津送客聞
新鶯衣裘漸減體殊健簾幙乍捲眼為明今朝天氣
更佳絕淡日微漏雲徐行我移胡床坐庭下幅巾半
脫筇枝橫散關旌旗掃昨夢少城絲竹真前生數株
桃李亦漫種未去與汝聊逢迎

燕堂春夜

南樓紉紉下疎更一點紗籠滿院明映月疎梅入簾
影讀書穉子隔窗聲呻吟藥裹身寧久汛掃胡塵意
未平草檄北征今二紀山城仍是老書生游嘗為丞相

陳魯公史魏公樞相張魏公草中原及西夏書檄於都堂

早春池上作

疎懶元當與世辭殘年況近乞身期一官空作讀書
祟五斗不供沽酒資冰拆野塘初灑灑雪殘芳草已
離離物華似有平生舊不待招呼盡入詩

感興

文章天所秘賦子均功名吾嘗考在昔頗見造物情
離堆太史公青蓮老先生悲鳴伏櫪驥躑躅失水鯨
飽以五車讀勞以萬里行險難外備嘗憤鬱中不平
山川與風俗雜錯而交并邦家志忠孝人鬼參幽明
感慨發奇節涵養出正聲故其所述作浩浩河流傾
豈惟配詩書自足齊談經我衰敢議此長歌涕縱橫

東齋偶書

華髮蕭蕭不滿簪強扶衰病著朝衫寒廳靜似阿蘭若佳客少于優鉢曇詩酒放懷窮亦樂文移肆罵老難堪棄官若遂飄然計不死揚州死劍南 顧況詩云人生只合揚州死而余嘗有歸蜀之意

丁未上元月色達曉如晝予齋居屬貳車領客

此夕幾年無此晴碧天萬里月徐行官壚賣酒傾千斛市里行歌徹五更墮酪獨烹僧鉢笑瑤璃閑照佛龕明頽然坐睡君無笑寶馬香車事隔生

自郊外歸北望誰樓

天上何年墮翠蚪屈蟠爪尾護吾州重門兩細旌旗溼危堞風高鼓角道漠漠川雲昏佛塔涓涓野水入農疇曠懷不耐微官縛擬脫朝衫換釣舟

馬上作

平橋小陌雨初收淡日穿雲翠靄浮楊柳不遮春色斷一枝紅杏出牆頭

還舍

賸欲銜盃樂太平新愁還續舊愁生出門始覺春來早處處簾櫳笑語聲

杏花

江城開歲風雨頻閉閣不出俄經旬忽逢國豔帶卯酒坐覺天地無餘春芳敷正當晨露重盛麗欲擅年華新數株欹斜傍山驛一簇深淺臨煙津徘徊跋馬不忍去只恐飄墮隨車塵念當載酒醉花下破曉啼

驚先喚人

兩京

兩京煙柳厭胡塵又見淳熙十四春薄命遭回猶許國孤忠懇款欲忘身蘇若落魄黃金盡褚令悲傷白髮新曾向延和隨仗入至今殿檻夢嶙峋

贈表弟江參議

襄州參議真豪傑熟視華途癩著鞭奪得鸞篋花裏活皎如玉樹酒中仙才高狗監無人薦句好雞林有

客傳 江第今居四明 老去眼邊親舊少津亭少為繫歸船

讀書

東髮論交一世豪莫年顛顛困蓬蒿文辭博士書驢券職事參軍判馬曹病裏猶須看周易醉中亦復讀離騷若為可奈功名念試覓并州快剪刀

夜登千峯榭

夷甫諸人骨作塵至今黃屋尚東巡度兵大峴非無策收泣新亭要有人薄醪不澆習壘塊壯圖空負膽輪困危樓插斗山銜月徙倚長歌一愴神

旬日公事頗簡喜而有賦

社近樓臺晝已長豐年頗減簿書忙兩催樹綠吹簫陌日射塵紅擊鞠場農事漸興初浸種吏衙早退獨焚香晚來別有歡然處檢教兒書又一箱 杜牧之寄小姪阿宜詩云一日讀十紙一月讀一箱

聞鼓角感懷

鼓坎坎角鳴鳴四鼓欲盡五鼓初老眼不寐如鯨魚撫枕起坐涕泗濡平生空讀萬卷書白首不識承明廬時多通材臣腐儒安懷孤忠策則疎欲剖丹心奏公車論罪萬死尚有餘雷霆願復寬須臾許臣指陳輿地圖億萬遺民望來蘇藝祖有命行天誅皇明如日詎敢誣拜手乞賜丈二笈中原煙塵一掃除龍舟汴汴還東都

社日小飲

催花初過社公雨對酒喜烹溪友魚儘道亂山窮絕處年華未覺異吾廬

又

社雨霏霏溼杏花農家分喜到州家蒼鵝戲處塘初滿黃犢歸時日欲斜

昔日

昔日從戎日身由許國輕陣如新月偃箭作餓鴟鳴堅壁臨關守連營竝渭畔至今悲義士書帛報番情

予在興元日長安將吏以申狀至宣撫司皆蠟彈方四五寸絹虜中勳
惠必具報

新晴

雨斷歸雲急沙乾步履輕風花嬌作態野水細無聲
社酒家家醉春蕪處處耕今朝公事少一笑賦新晴

倚欄

閉岸紗中小倚欄吳中三月尚春寒蜂脾蜜滿花初
過燕鶯泥新雨未乾老厭簿書思屏迹病逢節物強
追歡一樽又動流年感城上斜陽畫角殘

寄徑山印禪師

市朝聲利戰方酣眼看紛紛每不堪但有客誇車九
九了無人問衆三三會當身返東西蜀要與公分上
下菴趙州有上菴菴主下菴菴主語春枕悠然夢何許兩
枝筇杖喚魚潭喚魚潭在眉山中巖客至撫掌魚輒羣出

園中歸戲作

醉裏來尋澗上花已飄殘雪散餘霞麴生也解欺人
老風伯無端妬物華不恨童心伴蜂蝶但愁病眼厭
風沙歸來隱几東窗下一卷黃庭送日斜

春曉東郊送客

雨餘氣清潤迨我送客時翻翻車蓋風五里城東陂
初旭斂花房晨露流桐枝南山卷溼翠更覺光景奇
澄潭集魚艇村路亞酒旗欲歸且復留造物成吾詩

莫春數

春深桃李爭時節千團紅雲萬堆雪東風一夜吹欲
空曲徑平池爛如纈城門獵獵雙青旗羲和促轡西
南馳中原未有澄清日志士虛捐少壯時

曉雨

平明小雨壓香塵遶舍扶疎綠漸勻睡過花時慵著
句老來春事不關身

又

東風吹雨送殘春冉冉年光次第新君看枝頭如許
綠爭教桃李不成塵

登千峯樹

飛觀危欄縹緲中聊將醉眼送歸鴻一生未售屠龍
技萬里猶思汗馬功王衍諸人寧足責姜維豎子自
應窮他年吊古憑高處想見清伊照碧嵩

晚春園中作

少逢春歸未解悲千篇曾賦傷春詩可堪霜點鬢
後更值綠暗園林時楊花輕墮簷外影杏子重壓闌
邊枝球場立馬漏聲靜綺窗語燕簷陰移向來春事
渺何許長空鳥跡何由追鞦韆未拆已寥寥日莫東
風吹綵旗

北窗

小雨霏霏旋作晴北窗清潤綠陰成却緣政拙文書
少臥聽簾櫳燕子聲

浮生

浮生過六十百念已頽然獨有耽書癖猶同總角年
橫陳襦飯側朗誦短檠前不用嘲癡絕兒曹尚可傳

小壘

小壘荒寒外高齋寂寞中貧妨挂冠快病減讀書功
橋斷春江白雲穿夕照紅悠然扶杖處歲月數恩恩

大閱後一日作假

小院鉤簾掃落花公餘蕭散似山家下巖紫壁臨章
草正焙蒼龍試貢茶塞上遠遊心尚壯車中深閉髮
先華老來日月真堪惜愁聽高城咽莫茄

自嘲

貪祿忘歸祇自羞一窗且復送悠悠鏡明不爲人藏
老酒薄難供客散愁正得虛名真畫餅元非大器愧

曉出東城

聽徹清笳曉鐘據鞍漏鼓尚寥寥西樓落月徑三
尺北嶺亂雲生半峯蒼磴幽尋過古寺綠疇小駐勞

春農煙村已遠猶回首恐有鷓鴣與伏龍

初夏遇休日園中閑賦

青山圍女牆細草滿毬場虛簷搖水影曲檻吹蘋香
房櫳寂無人雙燕說曉涼賜休無公事蕭散寄一床
久苦吏役拘更知閑味長桑空繭綴簇波滿稻吐秧
良時動人懷東望一慨慷寧當戀微祿如鼠死太倉

小雨出西門五里至東嶽廟

埋沒文書每自憐偷閑出郭一欣然稻陂雨細豐年
候槐陌風清嫩暑天心似春鴻寧久住身如秋扇合
長捐平生士雅今亡恙老病何由共著鞭

初夏燕堂睡起

歌鳳平生類楚狂山城遲莫得深藏洗春雨過清陰
合掠水風生綠藻涼晨几硯凹涵墨色午窗盃面聚
茶香功名到手渾閑事此與他年未易忘

晡後領客僅見燭而罷戲作短歌

忍睡出坐衙扶病起觴客本來世味薄況復酒戶詐
謔諄時強語嵬昂已頽憤燒燭不盈寸歸臥弄書冊
我來未獲稻客裏今食麥悵望稽山雲飛去無六翻

讀宛陵先生詩

歐尹追還六籍醇先生詩律擅雄渾導河積石源流
正維嶽崧高氣象尊玉磬滲滲非俗好霜松鬱鬱有
春溫向來不導無譏評敢保諸人未及門

書歎

人生如春蠶作繭自纏裹一朝眉羽成鑽破亦在我
少年不自珍妄念烈如火眼亂舞腰輕心醉笑齒差
餘齡幸早悟世味無一可但憶喚山僧煎茶陳餅果

劍南詩稿卷第十八終

劍南詩稿目錄
卷第十九

曉出南山 聞韓无咎下世 官居書事二首

夏日本榭賦詩奕棋欣然有作 謁告歸臥

晚登子城 迂使客出郊夜歸過市樓 秋夜

登千峯榭待曉 九月初郊行 衰病 書意

秋懷 過村店有感 嚴州大閱 後園閒

步 照潺湲閣下池水 秋郊有懷四首 風

興 聽事望馬目山 秋興二首 久無暇近

書卷慨然有作 嚴州多菊然率過重陽方開

或舉東坡先生菊花開時即重陽之語余謂此

猶是未忘重陽者恐此花不肯也戲作一絕

地僻 吏責 張時可直閣書報已得請奉祠

雲臺作長句賀之 累日文符沓至悵然有感

三首 大風 冬夜讀書 再用前韻不以次

思歸 喜小兒病愈二首 初冬風雨驟寒

作短歌 余年二十時嘗作菊枕詩頗傳于人

今秋偶復采菊縫枕囊悽然有感二首 陶淵

明云三徑就荒松菊猶存蓋以菊配松也余讀

而感之因賦此詩 蕎麥初熟刈者滿野喜而

有作 有自蜀來者因感舊遊作短歌 東吳

女兒曲 兩夕 晚遊東園 小雨 初寒在

告有感三首 馬上作 冬夜聞角聲二首

塞上曲 荊州歌 冬夜讀書 寓歎二首

燕堂東偏一室頗深暝盡日率困於吏牘比夜

乃得讀書其間戲作三首 懷鏡中故廬 書

感 對酒 夢歸 蜀使歸寄青城上官道人

寄城都錢道人 寄邛州宋道人 小齋壁

間張王子喬梅子真李八百許旌陽及近時得

道諸仙像每焚香對之因賦長句 芳艸曲

烏龍廟 寒夜移疾二首 寒夜讀書三首

有為子言烏龍高嶮不可到處有僧嚴居不知

其年予每登千峯榭望之慨然為作二詩 楊

庭秀寄南海集二首 夜坐示桑甥十韻 夢

回 醉中草書因戲作此詩 閒步至鞠場值

小雪 張季長學士自興元遣人來因詢梁益

間事悵然有感 東齋夜興 烏龍雪 曉出

東城馬上作 與建子振孫登千峯榭觀烏龍

雪 迷懷二首 到嚴十五晦朔郡釀不佳求

于都下既不時至欲借書讀之而寓公多秘不

肯出無以度日殊惘惘也 雨中獨酌 被酒

徑臥比覺已五鼓矣 燈下讀玄真子漁歌因

懷山陰故隱追擬五首 送客至堊雲門外

題城南堂二首 故山葛仙翁丹井有偃松覆

其上天矯可愛寄題 估客樂 楚宮行 妾

命薄 晚登千峯榭 晝睡 陶次鬱鬱偶取

枯筆作狂草遂成長句 休日與客燕語既去

聽小兒誦書因復作艸數紙 寄譙先生 寄

姚太尉 累日多事不復能觀書感歎作此詩

北窗 讀范文正蕭灑桐廬郡詩戲書 筍

中偶得去年二月都下數詩 感寓 征婦怨

效唐人作 雪 寒夜 縱筆二首 歲晚盤

尊索然戲書 立春前四日謝雪方拜天慶庭

中雪復作 桐江行 屢雪二麥可望喜而作

歌 丁未除夕前二日休暇感懷二首 假中

閉戶終日偶得絕句三首 除夜雪二首 戊

申元日 初春感懷 閉閣 潺湲閣小立

睡起至園中

劍南詩稿卷第十九

宋陸游務觀

曉出南山

久向人間觸駭機，歛收孤迹早宜歸。羊未恨補牢，晚搏虎深知攘臂。非明月長庚天欲曉，新桐清露暑猶微。扁舟蓑笠平生事，莫羨黃金帶十圍。

聞韓无咎下世

書劍飄然去國時，南蘭陵郡日題詩。吳波漲綠迎桃葉，穰燭堆紅按柘枝。故友去為山下土，衰翁何恨鬢邊絲。憑高老淚無揮處，神武衣冠挂已遲。

官居書事

早涉人間足畏塗，一麾投老向江湖。年光已上星星鬢，日力猶供急急符。本自陽狂無藉在，更堪羸病不枝梧。滅胡意氣嗟誰許，淚盡神州赤縣圖。

又

走遍人間老更窮，強尋一笑與誰同。簿書衮衮呻吟裏，歌舞紛紛困睡中。手版倒持悲末路，寒江獨釣媿高風。知心賴有譚夫子，時遣書來問放翁。比數得譚德

稱書

夏日北榭賦詩奕棋欣然有作

異事嚴州省見稀，幅巾闌角立多時。青林白鳥自成畫，急雨好風當有詩。酷信醫方逢酒怯，強驅吏牘坐衙遲。悠然笑向山僧說，又得浮生一局棋。

謁告歸臥晚登子城

此身真是抱官囚，厭見長空赤日流。齋壁曉山千嶂雪，扇紈新雁一汀秋。繫船空作清湘夢，御氣難尋太華遊。菱角藕絲還恨少，強攜玉壺醉高樓。

迓使客出郊夜歸過市樓

山川慘澹作秋霖，雲物徘徊結夕陰。手版向人慚老，大肩輿出郭當登臨。二年雪灑鏡羈思，萬里冰河歌

壯心却羨喧呼樓上客，隔簾紅燭醉更深。

秋夜登千峯樹待曉

萬里秋風夜艾時，剡川孤客不勝悲。讀書眼暗定誰許，憂國涕零空自知。欲墜高梧先策策，漸低北斗正離離。倚闌不覺雞號曉，剪燭題詩寄所思。

九月初郊行

九月吳中尚袂衣，江郊策馬踏斜暉。葑花漫漫連山路，豆莢離離映版扉。蒼兔避鷹投磔去，黃鶴脫網傍人飛。農家光景關心事，不為無才也合歸。

衰病

衰病龍鍾已要扶，誰憐猶作折腰趨。世無魯國真男子，心憶高陽舊酒徒。萬里秋風吹鬢髮，百年世事數頭顱。桐江久客無奇句，孤負君王乞左符。

書意

一鳴輒斥不鳴烹，禍福元知未易評。湖海淒涼身跌宕，孟鷗豪舉筆縱橫。敢希二頃成高臥，但願諸公致太平。波暝龍舟沂清汴，道邊扶杖眼猶明。

秋懷

策策桐葉風濛濛，菊花雨空堂。一燈青幽壁，百蟲語嗟余。豈願仕老病歸，無所屈指計。歲年強半墮，羈旅荷戈北。戍秦挂席西，適楚名慚垂。竹帛文不諧，律呂所餘惟。一死忍復類兒女，金丹或可成青霄。渺輕舉

過村店有感

細篾絡丹柿，枯籬懸碧花。炊煙生旅竈，野水漱寒沙。棲鳥爭投樹，歸牛自識家。恍然遊蜀路，搔首憶天涯。

嚴州大閱

鐵騎森森帕首紅，角聲旗影夕陽中。雖慚江左繁雄郡，白樂天詩云雪川何寂莫茂苑太繁雄。且看人間矍鑠翁，清渭十年真昨夢。玉關萬里又秋風，憑鞍撩動功名意。未恨猿驚蕙帳空。

後園閑步

木葉勾萌喜小春，鬢毛蕭颯媿陳人。今朝忽破簿書

夢此地暫還風月身閑岸綸巾照清淺却扶藤杖上
嶙峋人生要是便疎豁金馬銀臺莫問津

照潺湲閣下池水

平生不鑷白霜雪滿鬢眉照水默自笑已迫溝壑期
慨然念歸休不計妻子飢渠飢亦有命我節詎可移
自我來桐江實無負悍整讒波如崩山孤迹則已危
陸子定何人正恐君未知午枕夢剡曲秋風吹釣絲

秋郊有懷

漫漫蕎麥花如雪覆平野離離豆子莢數枝忽堪把
頗憶故鄉時屏迹謝車馬水宿依蟹舍泥行沒牛膝
作勞歸薄莫濁酒傾老瓦縷飛綠脚膾花簇頰鯉鮮
棄官雖未決世念亦已且浩歌續楚狂幽懷欣獨寫

又

檐頭買雙兔市店取斗酒還家掃北窗歡言酌親友
家貧氣未餒禮薄情更厚高吟金石裂健筆龍蛇走
酒闌起出門孤月挂衰柳大笑各散歸吾輩可不朽
官身縛簡書此樂寧復有悵望秦稽雲憑高一搔首

又

楚人固多屨妄謂秋可悲寧知河嶽間氣俗樂此時
壯士鳴雕弓健馬嚼枯萁日馳三百里榆關赴戰期
陣雲壓龍庭殺氣搖參旗熾火燎狐兔倒瀉黃金卮
勒銘燕然石千載鎮胡兒安能空山裏凍研哦清詩

又

秋山瘦益奇秋水淺可涉出城西風勁拂帽吹脫葉
新霜拆栗罅宿雨飽豆莢枯柳無鳴蜩寒花有穿蝶
郊行得幽曠頗覺耳目愜斷雲北山來欣然與之接
挂冠易事爾看鏡歎勩業永懷桑乾河夜渡擁馬鬣

風興

嗟嗟老雞催落月丁丁殘漏伴斜河一盃淡粥寒燈
下還與山僧不校多

聽事望馬目山

官身早莫不容閑塵土堆胸媿滿顏也有向人誇說

處坐衙常對水南山

秋興

滿簪白髮不勝繁竊祿偷安媿主恩東館煙波秋漸
瘦北山霧雨晝多昏功名蹭蹬身長棄籌策瀾翻舌
幸存堪笑此生虛過盡一秋閉閣聽啼猿

又

孤城寂莫近江干處處疎礎送早寒水落纔餘半篙
綠霜高初染一林丹民租屢減追胥少吏責全輕法
令寬偶有一樽聊獨醉強授黃菊助清歡

久無暇近書卷慨然有作

少年喜讀書事業期不朽致君頗自許書卷常在手
白頭乞鍾釜坐使此心負朝衙有達午夕坐或過酉
文符苦酬對迎餞厭奔走直憂先狗馬豈但凋蒲柳
永懷簡編香更覺冠冕醜飢餐一簞飯悶酌一卮酒
吟哦從所好貧賤亦何有余悔已莫追寄謝故山友
嚴州多菊然率過重陽方開或舉東坡先生菊

花開時即重陽之語余謂此猶是未忘重陽者
恐此花不肯也戲作一絕

無人喚醒賦歸翁滿把清香誰與同但辦對花頻舉
酒莫橫重九在胸中

地僻

地僻天教養散材流年沉著鬢毛催青山自繞孤城
去畫角常隨晚照來几淨雙鉤摹古帖瓊香小斝試
新醅乘槎不是英鐘遠無奈先生興盡回

吏責

吏責何時得暫停年來減盡鬢邊青高談正樂催迎
客笑睡方酣報掣鈴安得雲山長在眼便從樵牧與
忘形詩成不用頻悵悵自古籠禽例剪翎

張時可直閣書報已得請奉祠雲臺作長句賀
之

燈前一笑折書開喜見冰銜洗俗埃丞相苦留猶不
住諸公欲挽固難回玩鷗有約問何關斂版無聊歸

去來千載伏波應太息翰君談笑上雲臺

累日文符沓至悵然有感

豪氣人言若不除固應屏迹向江湖封侯萬里獨心
在餓口四方何事無薄俗更堪開眼看老翁寧辦折
腰趨鼠肝蟲臂今無擇付與乾坤造化爐

又

白首逢人只累秋今雖未是昨真非文章才盡欲焚
稿仕宦興闕當拂衣浪出自應為後戒放言那計墮
危機遼天華表蒼茫裏千載何人識令威

又

三十年為一世入孤城夢斷洛陽塵游黍朝迹今二十有
八年矣強顏懶復看人面何地真堪著此身白骨久
埋金谷支黃花尚醉葛天民嚴光釣瀨雖亡恙除却
江山萬事新

大風

初聞瀕洞怒濤翻徐聽驂驛戰馬奔紙帳蒲團坐清
夜恍如身在若耶村

冬夜讀書

退食淡無事一窗寬有餘重尋總角夢却對短檠書
功業雖蹉跌光陰且破除更須求半偈回向此心初

再用前韻不以次

壯心雖迫老吏責未妨書言議思公瑾英雄陋本初
移燈近牀榻聽雨落塔堦除回首山南戌流年一紀餘
思歸

短髮今年雪滿巾一盃且醉瓮中春定無術致長生
藥那得愁供有限身碎枕不求名利夢挽河盡洗簿
書塵江湖意決君知否致主唐虞自有人

喜小兒病愈

喜見吾家玉雪兒今朝竹馬遶廊嬉也知笠澤家風
在十歲能吟病起詩律忽作病起詩一首

又

一牀共置朝回笏百屋常堆剩錢何似吾家好兒

子吟哦相伴短檠前

初冬風雨驟寒作短歌

東園日淡雲容薄綸巾朝莫闌干角北風動地萬木
號不料一寒如此惡豈惟半夜雨打窗便恐明朝雪
平壑綠酒雖滴亦復醉皐貂已弊猶堪著所嗟此身
老益窮踴躍無功上麟閣久從漁艇寄江湖坐看胡
塵暗幽朔萬鞭枯尚憤未平轟下老曾何足縛要及
今年墮指寒夜擁雕戈度窮漠

采菊繡枕囊悽然有感

余年二十時嘗作菊枕詩頗傳於人今秋偶復
采得黃花作枕囊曲屏深幌閱幽香喚回四十二年
夢燈暗無人說斷腸

又

少日曾題菊枕詩蠹編殘稿鎖蛛絲人間萬事消磨
盡只有清香似舊時

陶淵明云三徑就荒松菊猶存蓋以菊配松也

余讀而感之因賦此詩
菊花如端人獨立凌冰霜名紀先秦書功標列仙方
紛紛零落中見此數枝黃高情守幽貞大節凜介剛
乃知淵明意不為汎酒觴折嗅三數息歲晚彌芬芳

蕎麥初熟刈者滿野喜而有作

城南城北如鋪雪原野家家種蕎麥霜晴收斂少在
家餅餌今冬不憂窄胡麻壓油油更香油新餅美爭
先嘗獵歸熾熾火燎雉兔相呼置酒喜欲狂陌上行歌
忘惡歲小婦紅妝穗簪髻詔書寬大與天通逐熟淮
南幾誤計

有自蜀來者因感舊遊作短歌

錦城如海行不極馬迹重重車轂擊家住城西三十
年聞說城東未曾識看花走馬宿中路經月酒徒無
覓處露香風暖海棠開碧雞坊中倘相遇放翁顛顛
鬢成絲空有西遊千首詩今朝雨霽上危榭意氣頗
如年少時持盃欲作消愁計酒未著人愁已醉不成

題句寫幽情一幅蛟緇空寄淚

東吳女兒曲

東吳女兒語如鶯十三不肯學吹笙鏡奩初喜穉蠶
出窗眼已看雙繭成庭空日暝花自舞簾卷巢乾燕
新乳阿弟貪書下學遲獨揀詩章教鸚鵡

兩夕

歲旱連夏秋客袂厭塵土欣然成一笑愛此清夜兩
瓦檠墮燈燼銅椀起香縷心清病良已境寂句欲吐
東溪久枯涸想像素蛟舞分喜到溝池遊魚命儔侶
晚遊東園

藥瓢藜杖合施行獨往山林已歆盟傍水斷雲含莫
色拂簷高竹借秋聲癡人自作浮生夢腐骨那須後
世名莫笑吟哦無闕日老來未盡獨詩情

小雨

小雨暗林塘寒聲遶畫廊事須求暫假宜睡稱燒香
事須二字蓋唐人公移中語也

初寒在告有感

掃地燒香興未闌一年佳處是初寒銀毫地綠茶膏
嫩玉斗絲紅墨瀋寬俗事不教來眼境閑愁那許上
眉端數橋留得西窗日更取丹經展卷看

又

豪舉當年氣吐虹卽今顛顛一衰翁奇懷本自俗塵
外移病何妨寒雨中香暝候知銀葉透酒清看似玉
船空故人吳蜀音塵斷安得相攜一笑同

又

橫林吹葉水生洲身落窮山古睦州到枕雨聲酣旅
夢背窗燈影動清愁氣衝屋斗有孤劍力挽棟梁無
萬牛未滅匈奴身已老此生虛負幄中籌

馬上作

白髮憑鞍一老翁出門漏鼓尚擊擊淒涼旅思傳呼
裏零落新詩假寐中正苦文移來陸續何由笠釣入
空濛浮生正自少如意付與秋風吹斷蓬

冬夜聞角聲

嫋嫋清笳入雪雲白頭老守臥中軍自憐到死懷遺
恨不向居延塞外聞

又

憶在梁州夜雪深落梅聲裏玉關心山城老去功名
忤臥對寒燈淚滿襟

塞上曲

茫茫大磧吁可嗟莫春積雪草未芽明月如霜照白
骨惡風卷地吹黃沙馳鳴喜見泉脈出雁起低傍寒
雲斜窮荒萬里無斥埃天地自古分夷華青氈紅錦
雙奚車上有胡姬抱琵琶犯邊殺汝不遺種千年萬
年朝漢家

荊州歌

楚江鱗鱗綠如釀銜尾江邊繫朱舫東征打鼓挂高
帆西上湯豬聯百丈伏波古廟占好風武昌白帝在
眼中倚樓女兒笑迎客清歌未盡千鷗空沙頭巷陌
三千家煙雨冥冥開橘花峽人住多楚人少土鎗爭
餉茱萸茶

冬夜讀書

挑燈夜讀書油涸意未已亦知夜既分未忍捨之起
人生各有好吾癖正如此所求衣食足安穩住鄉里
茆屋三四間充棟貯經史四傍設几案坐倦時徙倚
無聲九韶奏有味八珍美寢鉢籤帙間自適以須死
豈惟畢吾身尚可傳兒子此心何時遂感嘆歲月駛

寓歎

江上霜風透弊袍區區無奈簿書勞衰遲始憶壯遊
樂仕宦更知歸臥高人怪羊裘忘富貴我從牛僧得
賢豪俗間問訊真成賴有手惟堪把蟹螯

又

劍外歸耕夢不通公車上疏路何從有心求縮地萬
里無羽可朝天九重狂誦新詩驅瘴鬼醉吹橫笛舞
神龍明當采藥玉霄去他日君看冰雪容

燕堂東偏一室頗深暖盡日率困於吏牘比夜乃得讀書其間戲作

袞袞流年往匆匆短景過簾深上燈早地窄貯香多書盡還重讀詩成更自哦向令無此處將奈旅愁何

賦性無他好開編喜欲迷擊擊傳夜漏嗒嗒待晨雞油滅玉蟲暗灰深紅獸低悠然撫書數無術濟黔黎

懷鏡中故廬

臨水依山偶占家數間茆屋半欹斜雲邊腰斧入秦望雨外舞簑歸若耶從宦只思乘下澤忤人常悔讀南華病來更怯還鄉夢頻驚廉泉試露芽

書感

丈夫本願脫世鞅丹成晝日凌空飛纓冠佩玉朝紫微白銀宮闕瞻巍巍不然萬里將天威提兵直解邊城圍首着滿川胡馬肥掩取不遺一騎歸苦心文章亦未非與此二事同一機寥寥千載見亦稀莊屈已死吾疇依哀哉窮子百家衣豈識萬斛傾珠璣欲洗薄蝕還光輝熟睨無力空獻欵

對酒

新酥鵝兒黃珍橘金彈香天公憐寂寞勞我以一觴胸中萬卷書老不施毫芒持酒一澆之與汝俱深藏生當老窮巷死埋南山岡古來共如此已矣庸何傷

夢歸

老去無餘念時時夢弊廬細傾新釀酒盡讀舊藏書雲峴鉏畬粟煙畦挽野蔬從渠造物巧賦芋戲羣狙

蜀使歸寄青城上官道人

輕別青城十二年至今客枕夢林泉一盃松屑齋前進兩卷丹經肘後傳欲與公爲塵外侶幾時身上峽中船世間牛蟻何勞問輸與雲窗一粲然上官常稱病

憤對客一笑而已

寄成都蓮道人

賣藥錦城中燒丹雪山麓石竇取鵝管玉床收箭鏃紫雲晨覆鼎白虹夜穿屋鬼神嚴厲守沆瀣勤沐浴此士真可入高簡遺世俗江頭十年別顏色炯在目使來每寄聲喜我淡無欲靈劑何必多分餉一黍足

官學道 寄邛州宋道人 宋與余在臨邛鴨翎舖同遇異人宋遂棄

鴨翎舖前遇秋雨獨與宋生棲逆旅坐門憺况見老仙劇談氣欲凌天宇袖中出劍秋水流血點斑斑新報仇我醉高歌宋生舞洗盡人間千古愁老仙約我遊太華是夕當醉蓮峯下語終冉冉已雲霄萬里秋風吹鶴駕我今伶俚踐衰境不如宋生棄家猛西望臨邛一慨然青松偃盡丹爐冷

小齋壁間張王子喬梅子真李八百許旌陽及近時得道諸仙像每焚香對之因賦長句

山城作吏老堪羞衫色塵昏鬢色秋斂版那供新貴使閉門聊與數公遊至人不死闕千劫大海無窮環九州安得相攜從此逝醉騎丹鳳下玄洲

芳艸曲

蜀山深處逢孤驛缺登頽垣芳艸碧家在江南妻子病離鄉半歲無消息長安城門西去路細靄斜陽芳艸莫尊前一曲渭城歌馬蹄萬里交河戍人生誤計覓封侯芳艸愁人春復秋只願東行至滄海路窮艸斷始無愁

烏龍廟

江邊蒼龍背負天蟠踞千載常蜿蜒其前橫闢爲大川高城鼓角聲隱然龍廟於山家於淵世爲吾州作豐年老守雖愧筆如椽潔齋試賦迎神篇

寒夜移疾

南山北山高嶙峋朝雨暮雨斷江津時人正作市朝夢老子已成雲水身希世強顏心自媿閉門謝病客

生噴天公何日與一飽短艇湘湖自采蓴 湘湖在蕭山縣產蓴絕美

又

走遍天涯白髮生晚叨微祿臥山城知章自識狂狂供奉士季那容醉步兵勳藥有時攜短鏡奏書無路請長纓此心擬說還休去付與空塔夜雨聲

寒夜讀書

北窗暖燭滿爐紅夜半濤翻古檜風老死愛書心不厭來生恐墮蠹魚中

又

韋編屢絕鐵硯穿口誦手鈔那計年不是愛書即欲死任從人笑作書顛

又

憶昨從戎出渭濱秋風金鼓震咸秦為肩竟欠封侯相三尺檠邊老此身

有為予言烏龍高嶮不可到處有僧巖居不知其年予每登千峯樹望之慨然為作二詩

樵子向予說有僧巢翠微巖扉雲共宿錫杖鶴同飛日莫松明火天寒柵葉衣棄官從此逝非子尚誰歸

又

嶮絕無微徑淙潺有細流寒巖依作屋墮毳拾為裘木客求相識毛人約共遊百年如一瞬塵世幾公侯

楊庭秀寄南海集

俗子與人隔塵劫何啻相逢風馬牛夜讀楊卿南海句始知天下有高流

又

飛卿數闋嶠南曲不許劉郎誇竹枝四百年來無復繼如今始有此翁詩 温飛卿南鄉子九首其二不減夢得竹枝

夜坐示桑錫十韻

好詩如靈丹不雜羶葷腸子誠欲得之潔齋被不祥食飲屑白玉沐浴春蘭芳蛟龍起久蟄鴻鵠參高翔縱橫開武庫浩蕩發太倉大巧謝雕琢至剛反摧藏

一技均道妙侏心詎能當結纓與易簪至死猶自強 東山七月篇萬古真文章天下有精識吾言豈荒唐

夢回

病骨便衾暖羈懷怯夢回鐘殘燈燼落香冷雨聲來老抱憂時志狂非濟世材明朝入冬假燒兔薦新醅 醉中草書因戲作此詩

賜休暫解簿書圍醉草今年頗入微手挹凍醪秋露重卷繡狂墨瘦蛟飛臨池勤苦今安有漏壁工夫古亦稀 穉子問翁新悟處欲言直恐泄天機

閑步至鞠場值小雪

倒盡床頭酒半罌笑呼筇杖共閑行梅花照水為誰瘦雪片倚風如許輕孟德遇冬思射獵廣文垂老謝才名歸來跨火西窗下獨數城樓長短更

張季長學士自興元遣人來因詢梁益間事悵

然有感

長記殘春入蜀時嘉陵江上雨霏微垂頭驢瘦悲鈴馱截道狐奔脫獵圍曉度市橋花欲語晚投山驛石能飛杜鵑言語元無據悔作東吳萬里歸

東齋夜興

山城殘角伴疎鐘擁褐頽然一病翁紙帳燈明寢龜甲銅瓶火熱起松風雨來尤覺睡味美酒後不知愁思空忽憶江湖泊船夜號鳴避弋聞羣鴻

烏龍雲

烏龍如真龍受尾臥江磧時時登樓望爪尾略可識今朝事大異千嶂忽如失遙知重雲外已有雪數尺頗念采薇人清坐焉得食裹飯欲問之矯首空峭壁

念昔故山時僵臥風雪夕靜聞長松折聲若裂巨石天晴視巖澗鳥獸死如積清夢不可尋撫楯三太息

曉出東城馬上作

曉出東城數幟紅蒙茸狐貉擁衰翁郊墟秋歲蕭條後風雪窮冬慘淡中耐辱已慚非士節端憂未辦濟民窮誕欺成俗真當懼誰挽天河一洗空

與建子振孫登千峯樹觀烏龍雲

二穉慧堪憐猶賒志學年能拋竹屐夏來看玉婉
百念寬身後餘生慰眼前善和書幸在它日要人傳
述懷

尺寸雖無補縣官此心炯炯實如丹羯胡未滅敢愛
死尊酒在前終鮮歡亞父抱忠撞玉斗虞人守節待
皮冠縱言老病摧頹甚壯氣猶憑後代看

謗譽紛紛笑殺僕此身本自等虛空大鵬境界纖塵
裏曠劫年光掣電中翻動煙霞長鏡在招呼風月一
尊同是凡是聖誰能測試問西隣織屨翁 釋家所謂睦
州陳蒲鞅者故居在郡治之西二百步

到嚴十五晦朔郡釀不佳求於郡下既不時至
欲借書讀之而寓公多秘不肯出無以度日殊

惘惘也

桐君故隱兩經秋小院孤燈夜夜愁名酒過於求趙
壁異書渾似借荊州溪山勝處身難到風月佳時事
不休安得連車載郵釀金鞭重作浣花遊

雨中獨酌

僻郡荒山下高齋寒雨中微波生酒綠短焰擁爐紅
學廢悲身老民窮祝歲豐厨人羞雉兔更憶喚隣翁
雉兔登盤頗懷隣里

被酒徑臥比覺已五鼓矣

俗事驅人挽不回經年無地濯氛埃酒酣稍覺客愁
被睡覺忽聞山雨來窗外樹寒無鳥宿壺中水暖有
梅開五更欲起先憫悵燭下文書已作堆

燈下讀玄真子漁歌因懷山陰故隱追擬

石帆山下雨空濛三扇香新翠箬蓬蘋葉綠蓼花紅
回首功名一夢中

又

晴山滴翠水投藍聚散漁舟兩復三橫棟北斷橋南
側起船篷便作帆

又

鏡湖俯仰兩青天萬頃玻璃一葉船拈棹舞擁蓑眠
不作天仙作水仙

湘湖煙雨長蓴絲菰米新炊滑上匙雲散後月斜時
潮落舟橫醉不知

又

長安拜免幾公卿漁父橫眠醉未醒煙艇小釣車腥
遙指梅山一點青
送客至望雲門外

冬溫頻作雨晨冷頓催晴嫩日滿江驛淡煙籠郡城
憂民懷凜凜謀已恥營營投檄真須決隣翁約耦耕

題城南堂 故人陳亦顏少游四方晚乃卜居臨安城南因以城南各其堂屬余賦詩

山林恨與親友別朝市不堪車馬喧陳子調高無俗
客一塵却要近修門

又

借問城南老居士新年樂事復何如春寒催喚客嘗
酒夜靜臥聽兒讀書

故山葛仙翁丹井有偃松覆其上天矯可愛奇

葛翁煉丹一千年翁去丹飛餘此泉炯如古鏡不拂
拭俯聽缺甃時鏘然老龍受命護泉臥蜿蜒直恐從
天墮人言神物老愈靈夜半聲酣風雨過放翁還山
亦何有閉門吟獻龍為友客來相對聊曲肱但酌此
泉勝酌酒

題

長江浩浩蛟龍淵浪花正白蹴半天軻峨大艫望如
豆駭視未定已至前帆席雲垂大隄外纜索雷響高
城邊牛車麟麟載寶貨磊磊落照市人爭傳倡樓呼盧
擲百萬旗亭買酒價十千公卿姓氏不曾問安知孰
秉中書權儒生辛苦望一飽趨起光範祈哀憐齒搖

估客樂

長江浩浩蛟龍淵浪花正白蹴半天軻峨大艫望如
豆駭視未定已至前帆席雲垂大隄外纜索雷響高
城邊牛車麟麟載寶貨磊磊落照市人爭傳倡樓呼盧
擲百萬旗亭買酒價十千公卿姓氏不曾問安知孰
秉中書權儒生辛苦望一飽趨起光範祈哀憐齒搖

髮脫竟莫顧詩書滿腹身蕭然自看賦命如紙薄始知估客人間樂

楚宮行

漢水方城一何壯大路竝馳車百兩軍書插羽擁修門楚王正醉章華上璇題藻井窮丹青玉笙寶瑟聲冥冥忽聞命駕遊七澤萬騎動地如雷霆清晨射獵至中夜蒼兕玄熊紛可藉國中壯士力已殫秦寇東來遣誰射

妾命薄

太白作此篇言長門宮事予反之妾命薄早入天家侍帷幄君王勤儉省宴游寶柱朱致塵漠漠日長別殿承恩稀肝尺猶聞親萬機宮中雖無珠玉賜塞上不見煙塵飛不須悲傷妾命薄命薄却令天下樂

晚登千峯樹

只道文書無了日也能擺撥上層臺窗明山雪莫方作露白野梅寒未開老病真慚天下士窮愁強覆掌中盃兒曹莫怪憑闌久得句何妨秉燭回

晝睡

書獄徵租自笑忙暫歸聊得憩匡床屏圖夜雨孤舟句枕帶秋風九日香方睡菊花枕一卷蠹書棲倦手數聲殘角報斜陽清泉浴罷西窗靜更覺茶甌氣味長胸次鬱鬱偶取枯筆作狂草遂成長句

酒隱人間六十年晚途斂版自傷憐莊周聊寄漆園吏梅福終為吳市仙方外酒徒盟尚在囊中劍術老當傳此心鬱屈何由豁聊遣龍蛇落蜀牋

紙

賜沐家居謝椽曹暫將蕭散慰勤勞琅琅應節兒書

熟壘疊生風客論高玉屑名牋來濯錦風漪奇石出臨洮託盟翰墨吾安敢揮灑淋漓自足豪張季長寄洮

研何元立寄蜀紙皆近到新定

青城大面山中有二隱士一曰譙先生定字天

授建炎初以經行召至揚州欲留之講筵不可拜通直郎直祕閣致仕今百三十餘歲巢居嶮

絕人不能到而先生數年輒一出至山前人有見之者其一曰姚太尉平仲字希晏靖康初在

圍城中夜將死士攻賊營不利騎駭驟逸去建炎初所在揭榜以觀察使召之竟不出淳熙甲

午乙未間乃或見之於丈人觀道院亦年近九十紫髯長委地喜作草書蓋皆得道於山中云

偶成五字二首託上官道人寄之

寄謝譙夫子今年一出無萬緣隨夢斷百念與形枯雲護巢松谷神呵煖藥爐憑高應念我白首學徵租

太尉關河傑飛騰亦遇時中原方蕩覆大計易差池素壁龍蛇字空山熊豹姿煙雲千萬壘求訪固難知

右寄姚太尉

累日多事不復能觀書感數作此詩

我生無他長所得靜而簡出仕三十年不殖一金產四方到為家所向不容揀南遊極巨海西戍掠危棧

為州亦何好且復占仕版俸不給泔糜况敢事酒棧晨興坐堂上符檄高懸藏書二萬軸一字不到眼

胸中積磊塊歎息誰為鏟浮生固如此正可付一莞

北窗

雲開見山雪院靜聞松風吏去曲肱臥疑非塵世中

讀范文正瀟灑桐廬郡詩戲書

桐廬朝莫苦匆匆瀟灑寧能與昔同堆案文書生眼黑入京車馬漲塵紅逢迎風月麴生事彈壓江山毛穎功二子年來俱掃迹頽然堪笑一衰翁

苟中偶得去年二月都下數詩

昨佩魚符入鳳城春風處處聽鸞聲欲尋舊友半為鬼重到西湖疑隔生浮世正如投六簿野人何意慕三旌嚴州戍滿真當老猶幸為民死太平

感寓

人生堂堂七尺身本與聖哲均稱人唐虞乃可讓天下光被萬世常如新哀哉末俗去古遠斷喪太朴燒全淳豆羹簞食輒動色攘糲乃至忘君親錙銖必先計利害詎肯冒死求成仁不欺當從一念始自古孝子爲忠臣

征婦怨効唐人作

萬里安西久宿師東風吹草又離離玉壺貯滿傷春淚錦字挑成寄遠詩擊虜將軍方戰急押衣敕使尚歸遲粧臺寶鏡塵昏盡髮似飛蓬自不知

雪

瘴癘家家一洗無更欣餘潤沃焦枯花壺夜凍先除水衣焙朝寒久覆爐松頂積高時自墮竹枝壓重欲相扶雲開正值春風早却看晴光滿九衢

寒夜思飲酒不果與律同噉藥渣魚戲作

我老異作病盃酒久不持讀書寒雨中比夕頗思之呼童欲洗酌願以病自疑清坐歎寂莫痛飲愁淋漓三爵醒醉間此理當徐思一掬琴高魚且復伴吾兒

縱筆

凍研笑臞儒雕弓隱獵徒不成平趙魏正可老江湖顛顛頭雖秃輪困膽尚盈咸陽呼五白何遽不能盧

又

故國吾宗廟羣胡我寇讎但應堅此念寧假用它謀望駕遺民老忘兵志士憂何時聞遣將往護北平秋歲晚盤尊索然戲書

經年薄宦客桐廬市邑蕭然一物無名酒不來惟飲涇長魚難覓且焚枯支離鶴骨寒添瘦宛轉龜腸夜自呼更與兒曹同一笑燈前短褐拆天吳

立春前四日謝雪方拜天慶庭中雪復作

珮玉珊珊謁衆真竟煩一雪慰疲民未看舞鶴隨飛蓋先喜飄花集拜茵耕墾土膏千糶出市樓酒賤萬家春使君老去悲才盡詩句難追節物新

桐江行

我來桐江今幾時面骨崢嶸鬢如雪怒噴不復有端緒讒謗何曾容辨說十年山樓却水食釀桂餐芝自芳潔作官一飽仰紅腐坐對盤餐常嘔噎雪晴宿戒南山遊剩要賦詠臨清流將行復輟却退坐臺符吏牘令人愁胸中崔嵬向誰吐獨立憑高時自語文章當以氣爲主無怪今人不如古

屢雪二麥可望喜而作歌

苦寒勿怨天雨雪雪來遺我明年麥三月翠浪舞東風四月黃雲暗南陌坐看比屋騰歡聲已覺有司寬吏責腰鎌丁壯傾閭里拾穗兒童動千百玉塵出礪飛屋梁銀絲入釜須寬湯寒醅發劑炊甍裂新麻壓油寒具香大煩下機廢晨織小姑佐庖忘晚粧老翁飽食笑捫腹林下擊壤歌時康

丁未除夕前二日休假感懷

掛冠神武莫躊躇家具何妨載鹿車怨謗相乘真市虎技能已盡似黔驢黃金散後猶耽酒白髮生來更愛書新歲定尋林下約一觴一詠未成疎

又

夢寄梅村竹塢間不堪客裏見春還潮生水欲通南澗雪霽雲猶冒北山病思過年應小減官身得假未全閑變名吳市男兒事末路低回自笑孱

假中閉戶終日偶得絕句

雨聲滴滴莫未已苔暈重重寒更添知是使君初睡起清香一綫透疎簾

又

老夫昔是青城客酒肉淋漓豈本心還我山家本來面數拳春筍薦孤斟仗錫山寄筍枯一名筍兒拳

又

官身常欠讀書債祿米不供沽酒資剩喜今朝寂無事焚香閑看玉谿詩

除夜雪

只怪重衾不禦寒起看急雪玉花乾遲明欲謁虛皇

殿廡馬蒙種立夜闌

又

北風吹雪四更初嘉瑞天教及歲除
戊申元日卯初立春
半盞屠蘇猶未舉燈前小草寫桃符

戊申元日

白頭身世數羈孤一念兒時淚已濡
尚記爭先書鬱壘豈知落後舉屠蘇
盃盤草草思隣舍車馬紛紛厭九衢
六十年非心自了掛冠猶足補東隅

初春感懷

關河謝遠遊歲月迫歸休敢恨驥伏櫪
但思狐首丘雪明窗誤曉霜點鬢驚秋
羈旅鏡愁思誰憐季子裘閉閣

閉閣孤城賸放慵桐江清絕勝吳松
雲收忽見北山雪月落正聞西寺鐘
世味老來無奈薄土思病後不勝濃
尊羹豈止方羊酪輕許平生笑土龍

潺湲閣小立

飽食何曾補縣官潺湲閣上倚闌干
水紋靴皺風初緊花色輕紅露未乾
薄酒愁邊供醉醒故人夢裏話悲歡
孤城正在山窮處過社今朝尚爾寒

睡起至園中

欲挂衣冠萬事輕不妨小住向山城
綠尊耐久常相伴雪鬢纔生便放行
拂枕時時覓幽夢倚闌日日聽新鶯
夕陽更有欣然處來看青郊雨後耕

劍南詩稿卷第十九終

劍南詩稿目錄
卷第二十

上書乞祠 春殘 三月二十日晚酌 次前

韻 北窗閒詠 休日留園中至莫乃歸 北

窗病起 自東津泛舟至桐溪 迂客至大瀨

難上 郊行 夏雨 雨中作 醉題 有懷

青城霧中道友 梅雨初晴迂客東郊 晚歸

休日登千峯榭遇大風雨氣象甚偉 雨中

獨坐 舊識姜邦傑于亡友韓无咎許近屢寄

詩來且以无咎平日倡和見示讀之悵然作此

詩附卷末 釣臺見送客罷還舟熟睡至覺度

寺 泛富春江 宿漁浦 沂小江飯舟中

乞祠久未報 七月十日到故山削瓜淪茗餽

然自適 曉興 感秋 秋夜有感 五鼓入

城 飯罷忽隣父來過戲作 秋夜讀書 夜

坐忽聞村路報曉鐵牌二首 白雲自西來過

書巢南窗 贈竹十韻 雜感五首 入城寓

榻開元 夜出偏門還三山 四鼓酒醒起步

庭下 感憤秋夜作 反感憤 東齋 雨夜

齋中聞急雨 老病追感壯歲讀書之樂作短

歌 閒中戲書三首 采藥 過猷講主桑瀆

精舍 自桑瀆泛舟歸三山 訪野人家 塞

上曲四首 硯湖拜序 泛湖 寓蓬萊館二

首 夜還驛舍 舟中大醉偶賦長句 行飯

至新塘夜歸 雲門感舊 若耶溪上二首

秋雨頗寒偶書 新晴泛舟至近村偶得雙鯉

而歸 上書乞祠 輒述鄙懷 泛湖上雲門

書數 枕上作 老病無復宦情或者疑焉作

此示之 拄杖 北望 歲晚感懷 大雨中

作 繫舟平水步 初到行在 還都 宿監

中偶作 四鼓出嘉會門赴南郊齋宮 題張

野夫監簿大招圖 簡譚德稱監丞 致齋監
中夜與同官縱談鬼神效宛陵先生體 夜歸
次韻鄭唐老 五鼓赴太社臘祭 己酉元
日 送潘德久使薊門 我夢 晨起有感
南省宿直二首

劍南詩稿卷第二十

宋陸游務觀

上書乞祠

上書又乞奉祠歸夢到湖邊自叩扉此去敢辭依馬
磨向來真慣擁牛衣致身途遠年齡莫報國心存氣
力微誓墓那因一懷祖人間處處是危機

春殘

老墮空山裏春殘白日長庸醫司性命俗子議文章
燭映一池墨風飄半篆香箇中有佳處袖手看人忙

三月二十日晚酌

暫因賜沐作閑身太息纔餘一日春委地落花新著
雨穿簾歸燕不生人衛青此日怪長揖王翰當年謀
卜鄰商略晚窗須小醉朱櫻青店正嘗新

次前韻

烏帽紅塵過去身荒山野水又經春殘年欲盡初聞
道薄宦宜休不問人一局枯棋忘日月數斟濁酒約
比鄰石帆山下菱歌斷未數臨風白髮新

北窗閑詠

陰陰綠樹雨餘香半捲疎簾置一牀得祿僅償賒酒
券思歸新草乞祠章古琴百衲彈清散名帖雙鉤榻
硬黃夜出灑亭雖跌宕也勝歸作老馮唐

休日留園中至莫乃歸

儘道官身屬太倉未妨寄傲向林塘綠波春漲羣魚
樂清露晨流蔓草香閑試名弓來射圃醉盤驕馬出
球場長城萬里知誰許看鏡空悲兩鬢霜

北窗病起

一飢可忍萬緣輕況復幽窗疾漸平更事天公終賞
識欺人鬼子漫縱橫道邊塵起頻障扇門外波瀾剩
濯纓不為福心憎薄俗客星祠下是歸程
自東津泛舟至桐溪

潮生東西津雨暗上下塔蕭蕭亂菰蒲拍拍起鳧鴨
吾船雖福小尚可著一榻溪風吹醉頰高枕墮紗帽
南山浮溼翠偃蹇呼不答安得青蓮公傑句為彈壓
逌客至大浪難上

小壘瓜蔓綠短籬梅子黃曉風掠水來吹我醉面涼
平生蕭散意未覺將迎忙溪山供一笑客主可相忘
寧當倒手版聊復據胡床太平豈無象麥飯家家香
我歸亦何有養氣猶軒昂那因五斗陳坐變百鍊剛

郊行

小雨東郊氣象新蕭蕭清吹爽衣巾竝谿密竹巧藏
寺夾道新麻高沒人老厭簿書愁欲睡病疎盃酌渴
生塵桐君山路無多遠元自知津莫問津

夏雨

東風吹雨溪上來北山出雲以應之嚴州城中三日
雨朝莫點滴無休時向來秧底乾欲裂白水漫漫俄
盈陂豚肩覆豆巫醉飽龍骨挂壁農邀嬉今年蠶麥
收數倍爾大如瓮麥兩岐西成在眼又如此還鄉鼓
腹歌淳熙時去受代纔四十四日

雨中作

礎潤雲生五月中山城細雨晚空濛讀書雖恨此身
老把酒尚思吾輩同積澗畫圖昏素壁漬香衣憤覆
熏籠新晴不用占鍾鼓臥聽林梢浙浙風

醉題

不學空門不學仙清樽隨處且陶然人情正可付一
笑生世元知無百年白首難陪東閣客清風自足北
窗眠歸耕只要無人問安用文章海內傳

有懷青城霧中道友

雪谷孤松自鬱然紛紛朝菌但堪憐坐更拂石芥城
劫時說開皇龍漢年淡煮藜羹天送供閑拖藤杖地
行仙共看王室中興後更約長安一醉眠

梅雨初晴逌客東郊

霽色澄鮮已斷梅江郊隱隱尚輕雷層巒正對孤城

落健席遙看大騙來幼婦髻鬢簪早稻近村坊店賣
新醅吾行在處皆詩本錦段雖殘試剪裁

晚歸

暑雨初晴日江暈欲莫天鴉棲沙際樹人喚渡頭船
病骨羸將折昏眸困欲眠市橋燈火鬧且復喜豐年
休日登千峯樹遇大風雨氣象甚偉

今日逢休沐憑高且暫閒風聲初捲野雨氣已吞山
疾疾臨觴頰塵埃得句慳西征忽在眼河勢抱函關
雨中獨坐

馬目山頭雨脚昏龍津橋下浪花翻年豐郡僻無公
事一炷清香畫掩門

舊識姜邦傑於亡友韓无咎許近屢寄詩來且
以无咎平日倡和見示讀之悵然作此詩附卷
末須溪本作嚴州贈姜梅山

故人玉骨已生苔 謂南澗公 邂逅逢君亦樂哉湖寺
繫舟無夢去京塵馳騎有詩來醉中不敢教兒誦看
處常須浴手開久矣世間無健筆相期力斡萬鈞回
釣臺見送客罷還舟熟睡至覺度寺

抽身簿書中茲日睡頗足縹緲桐君山可喜忽在目
紛紛衆客散杳杳一筇獨昔如脫淵魚今如走山鹿
詩情森欲動茶鼎煎正熟安眠簟八尺仰看帆十幅
逍遙富春飯放浪漁浦宿送老水雲鄉羹藜勿思肉

泛富春江

雙鷗搖江疊鼓催伯符故國喜重來秋山斷處望漁
浦曉日昇時離釣臺官路已悲捐歲月客衣仍悔犯
風埃還家正及雞豚社剩伴鄰翁笑口開

宿漁浦

東歸剡曲只三程放泊還如萬里行燈影動搖風不
定船聲響鞦韆須初生曳裾非復白頭事瞑目那求青
史名歸去若為消莫境一蓑煙雨學春耕

泝小江飯舟中

老作孤舟客秋濤漲小江林昏見飛鱗村近有鷺彪

天闌三更月篷低一尺窗魚發雖草草聊喜到吾邦
乞祠久未報

聖朝未許領叢祠擁褐清羸不自支鄧禹有靈應笑
拙周公無夢固知衰得閑要及身安日到死應無睡
足時七百日來塵滿抱今朝浦被有新詩

七月十日到故山削瓜淪茗儵然自適
鏡湖清絕勝吳松家占湖山第一峯瓜冷霜刀開碧
玉茶香銅碾破蒼龍壯心自笑老猶在狂態極知人
不容擊壤窮閭歌帝力未妨堯舜亦親逢

曉興

亂蟬嗥新秋老木立清曉我亦岸綸巾寄傲萬物表
大千藏粒粟浩劫過飛鳥癡子居其間利欲自纏繞
可憐榮進意未向蓋棺了浮名更嚇鬼白堊寫丹旄
我於斯世事看破自少小老矣更何求歸哉憩林沼

感秋

會稽八月秋始涼梧桐葉落覆井床月明編樹遶驚
鶻露下溼草啼寒螢丈夫行年過六十日月雖短志
意長匣中寶劍作雷吼神物那得終摧藏君不見昔
時東都宗大尹義感百萬虎與狼疾危尚念起擊賊
大呼過河身已僵 宗汝霖垂死尙部勳諸將北伐忽大呼過河
者三隨即頌絕

秋夜有感

候蟲何啣啣歲晚聲出壁不惟懶婦驚感此白頭客
壯年事征戍萬里不得息揚颿凌秋濤策馬赴山驛
日照蛟鼉涎雪印豺虎迹誰知七尺軀幸脫九死厄
前年補畿郡入對瞻玉色報恩無死所再拜衰淚滴
即今故山歸愈數老境逼不眠中夜起仰視星歷歷
中原何時定銅駝臥荆棘滅胡恨無人有復不易識

五鼓入城

道旁竹樹露如傾帶睡悠悠十里行曉色未分煙尚
重壓城樓閣已崢嶸
飯罷忽隣父來過戲作

旋炊香稻爨新菰飯飽道遙樂有餘
茶味森森留齒頰
香煙繡繡著圖書
毛皮尚在寧知我
鱗甲深藏莫問渠
賴有鄰翁差耐久
兩畦頻喚共攜鉏

秋夜讀書

一雨濯殘熱
秋氣忽已深
青燈照空廊
重露滴高林
危坐讀周易
會我平生心
夜分徐掩卷
閑弄床上琴
簾外初斜河
屋頭已橫參
人生每如此
利欲安能侵

夜坐忽聞村路報曉鐵牌
何人叩鐵警農耕
炊飯家家起五更也似早朝風雪裏遙聽宮漏下宮城

又

秋氣淒涼霧雨昏
老書生病臥孤村
五更不用元戎報片鐵鐸鐸自過門

白雲自西來過書巢南窗

岷山千里青未了
浪隔長江不到吳
羈雲冉冉吾舊識
安得挽之來坐隅

贈竹十韻

放翁小築湖西偏
虛窗曲檻無炎天
人間乃有真富貴
遶舍十萬碧玉椽
連林娟娟滋清露
高枝裊裊搖蒼煙
常憂俗客觸新粉
屢戒園丁傷逸鞭
涼生尊俎消午醉
聲撼窗扉驚晝眠
春殘斷土得美茁
茁氣壓脚相食萬錢爾
來作吏若墮窰
每一夢到心悽然
還家再見却憐况
塵土何地從臞仙
囊中幸藏餐玉法
欲屏萬事相周旋
更當待月出東嶺
坐石冷泠揮響泉

雜感

自古文章與命仇
功名身外更悠悠
一從識得元無事
窮死逢人不說愁

又

小軒幽檻雨絲絲
種種竹移花及此時
客去解衣投臥榻
半醒半醉又成詩

又

少年意氣與春爭
朱彈金鞭處處行
誰信卽今空谷

裏旋租黃犢學躬耕

又

自洗銅壺試玉醅
小軒風月爲徘徊
此心未與年俱老
猶解逢花眼暫開

又

側帽垂鞭小陌東
名花迎笑一枝紅
啼鶯驚斷尋春夢
惆悵新霜點鬢蓬

入城寓榻開元

羸僮倦馬因長堤
借榻禪房日未西
熟睡覺來聞隱几
庭楸陰轉乳鴉啼

夜出偏門還三山

月行南斗邊人歸
西郊路水風吹葛衣
草露溼芒屨漁歌起遠汀
鬼火出破墓淒淒
醒醉魂荒怪入詩句
到家夜已半佇立叩蓬戶
穉子猶讀書一笑慰遲莫

四鼓酒醒起步庭下

酒解夜過半出門
步中庭天高河漢白
月淡煙霧青

感憤秋夜作

重滴竹杪露
疎見樹罅星
壞甍啼寒螢
深竹明孤螢
秋晚雖未霜
蠹葉時自零
四序逝不留
慨然感頽齡
平生第一把
不博帶萬釘
鷓鴣謝拍拍
鴻路追冥冥

反感憤明夜讀前作而悲乃復作此自解

月昏當戶樹
突兀風惡滿天雲
往來太阿匣
藏不見用孤憤書
成空自哀吾輩赤心
本貫日昔人白骨
今生苦榮河
溫浴不可見
青海玉關安在哉

東齋

膊膊庭樹雞初鳴
嚙嚙天衢雁南征
百年朝露豈長久
萬事浮雲常變更
出處有心終有愧
聖賢無命亦無成
西嚙雖薄可自力
雙犢且當乘兩耕

難任

著脚紅塵已恨深
便應畢世任山林
貴人自作宣明面
老子曾聞正始音
議論坐狂當永棄
簿書緣病復難任
東齋幽寂憑誰畫
開幔床橫一素琴

雨夜四鼓起坐至明

雨夜四鼓起坐至明

以猪水代硯滴名之曰硯湖且爲賦詩

羣山環一湖湖水綠溶漾微風掠窗過亦解生細浪
餘流浸翠麓倒影寫青嶂自然出天工豈復煩巧匠
病夫屏盃酌不遣運酒舫時時挹清泚筆墨助豪宕
帖成龍蛇走詩出雷雨壯從今几硯旁一掃蟾蜍樣
泛湖

筆牀茶竈釣魚竿激激平湖淡淡山浪說枕戈心萬
里此身常在水雲間

寓蓬萊館

桐葉吹殘蕉葉黃驛窗微雨送淒涼長安許史無平
素莫恨棲棲立路旁

又

古驛蕭蕭獨倚闌角聲催晚雨催寒殘年遇合應無
日猶說新豐強自寬

夜還驛舍

樓上繁縷初發更斷雲收雨旋成晴市橋新漲搖燈
影驛路殘泥壯屐聲闌闌變遷非曩日情懷牢落感
餘生高秋病起猶能醉剩買官醅樂太平

舟中大醉偶賦長句

過江何敢號高流偶與俗人風馬牛畫檝新搖嚴瀨
月清尊又醉戴溪秋壯心無復在千里老氣尚能橫
九州古寺試求三丈壁爲君驅筆戰蛟虬

行飯至新塘夜歸

門前徙倚尚餘霞湖上歸來月滿沙雲溼一聲新到
雁林昏數點後棲鴉淒淒迷籬落開寒菊鄭重比隣設
夜茶早議挂冠君會否莫年心念不容差

雲門感舊

總角來遊老未忘背人歲月去堂堂釋松看到偃霜
蓋廢寺憶曾開寶坊佛几古燈寒焰短齋廚新粟午
炊香興闌未忍登車去更倚溪橋立夕陽

若耶溪上

微官元不直鱸魚何況人間足畏途今日溪頭慰心

處自尋白石養菖蒲

又

九月霜風吹客衣溪頭紅葉傍人飛村場酒薄何妨
醉菰正堪烹蟹正肥

秋雨頓寒偶書

羈懷不醉自昏昏臥對青燈獨掩門沙雁帶寒來古
澤林鳩催雨暗孤村數椽蟹舍償初志九陌塵衣洗
舊痕自歎一生書裏活莫年無力濟黎元

新晴泛舟至近村偶得雙鰕而歸

秋風一夜老汀蘋剡曲稽山發興新青嶂會爲身後
塚扁舟聊作畫中人園林搖落知寒早父老逢迎覺
意真歸舍不妨成小醉眼明細柳黃霜鱗

上書乞祠輒述鄙懷

千祿本代耕窮達敢自必早遇高皇帝九品對宣室
妄懷犬馬心縈緯不暇恤上恩等天地腰領免斧鑕
旋屬紹興末賜谷瞻出日賤臣復何幸便殿首造膝
煌煌帝堯典推擇首秉筆愚忠雖懇款野性實坦率
飄然去周行湖海抱沉疾遠遊客窮塞亭障秋蕭瑟
聖君終記省萬里忽乘駟同朝久凋謝存者不十一
造廷故抱暗下殿衰涕溢蹉跎又十載憂患豈易述
流年不貸人白髮日夜密冠雖未卽挂馭已不容叱
尚觀公朝恩養老霑散秩閉門教子孫志願真永畢

泛湖上雲門

三百里湖秋渺然是間可以著釣船浩歌莫過石帆
下爛醉夜泊樵風邊樵風溼在若耶溪鏡湖之間茫茫沙
月忽側墮裊裊山氣時孤鷺冥鴻遠舉謝斯世白鷗
自放全其天幽棲幸脫市朝械捷徑郎著功名鞭人
生各自適意耳稷禹巢許知誰賢

書歎

世態秦欺楚交情越視秦寧教待瓶乳不耐望車塵
書積高圍坐花繁亂插巾那須散人號已是葛天民
枕上作

寒夜臥林廬蕭然適有餘蟲悲號壞壁燈暗守殘書
養拙天知我安貧老似初雖非漆園吏也作蝶遽遽

老病無復宦情或者疑焉作此示之

影薄宦宜休口語心老驥已甘當伏櫪窮猿況是急
投林別君徑入亂雲去後日相思何處尋

拄杖

放翁拄杖具神通蜀棧吳山興未窮昨夜夢中行萬
里蓮華峯上聽松風

北望

北望中原淚滿巾黃旗空想渡河津丈夫窮死由來
事要是江南有此人

歲晚感懷

利名爭奪兩皆非生世寧殊露易晞老冉冉來誰獨
免冢纍纍處會同歸聽歌莫惜終三疊縱獵何妨更
一圍醉臥日高呼不醒笑人霜曉束朝衣

大雨中作

北風撼山勢岌岌老夫倚杖檐前立貪看白雨掠地
風飄灑不知衣盡溼當年入朝甫三十丈胡塵叩
江急屬聞蠟彈遺檄書亟壞布裳縫袴褶即今白髮
不可數破屋頽垣窘風雨汝生汝死問者誰人雖不
問心自悲

繫舟平水步

舟尾參差野岸橫屐聲穿市得閑行雨昏茆店炊煙
溼人語蓬窗續火明枝上橙香初受摘擔頭菰脆正
堪烹漁樵自是平生生意不為衰遲薄宦情

初到行在

六十之年又四年也騎瘦馬趁朝天首陽柱下孰工
拙從事督郵俱聖賢筆墨有時閑作戲功名到底是
無緣都城處處園林好不許山翁醉放顛

還都

平生薄名宦所願得早休奔走二十年鏡中霜鬢秋

歸踏長安道恍然皆舊遊處處見題名始驚歲月道
西湖隔城門放浪輸白鷗當時見種柳已足繫巨舟
挂冠當自決安用從人謀勿以有限身常供無盡愁
宿監中偶作

宿監中偶作

流落歸來兩鬢絲此生真媿北山移數殘宮漏寒無
寐開盡梅花病不知同舍破甘醒宿酒故人折簡索
新詩生涯可笑清如許枉是京塵撲馬時 譚德稱有簡
催和詩

四鼓出嘉會門赴南郊齋宮

客遊梁益半吾生不死還能見太平初喜夢魂朝帝
所更驚老眼看都城九重宮闕晨霜冷十里樓臺落
月明白髮蒼顏君勿笑少年慣聽舜韶聲

題張野夫監簿大招圖

此生只合老漁樵扶病誰令趁早朝開卷未終二大
息羈魂零落恐難招
簡譚德稱監丞

簡譚德稱監丞

廣都江上送舟行淚灑春風別少城冉冉幾經新歲
律依依猶有舊交情塵冠當挂彈何用革帶頻移瘦
自驚剩欲約公風雨夜一燈相對話平生

致齋監中夜與同官縱談鬼神效宛陵先生體

五客圍一爐夜語窮幻怪或誇雷可斫或笑鬼可賣
或陳混沌初或及世界壞或言修羅戰百萬起睚眦
餘談恣搜抉所出雜細大風雲墮皮憤幽坎窞鐵械
羣號起古聚孤泣出空解妖狐冠鬪體掩袂弄姿態
空韉伏逸囚夜半出竊噉雖云多聞益頗犯綺語戒
不如姑置之投枕休困憊明當掛衲衣僕僕愁亟拜

夜歸

飲酒不盡觴觀棋不竟局索馬踏街鼓仰視月挂木
疾馳沿河隄不記幾坊曲到家四鄰寂往往睡已熟
天香餘鼻鼻佛燈猶煜煜中庭雖一席緩步意亦足
寒犬吠荆籬棲鷓起叢竹市聲從北來始覺非林谷
却尋西窗書開卷剪殘燭官閑居更遠一笑謝羈束

次韻鄭唐老

宦遊早日闕相聞一面那知乃爾勤秋釣清難方入
夢曉穿細仗又逢君驟看落筆驚風雨便擬同舟臥
水雲作意歸休還會否莫年無力起斯文

五鼓赴太社臘祭

霜寒裂屋瓦月白射坊門病骨愁看影孤吟怯斷魂
飢鷹掣羈紲老馬伏車轅不奈清宵夢殘蕪滿故園
己酉元日

夜雨解殘雪朝陽開積陰桃符呵筆寫椒酒過花對
巷柳搖風早街泥濺馬深行宮放朝賀共識慕堯心
以亮陰免賀禮

送潘德久使薊門

崑崙東分一枝渾犇蹴砥柱經龍門羲皇受圖撫上
古神禹治水開中原三靈實扶藝祖業萬國共仰東
都尊羣兒撞壞吁可歎顧使殘虜今遊魂因君試求
出師路孟津白馬應如故不須更議繫河橋北風正
可乘冰渡頗聞盧龍已數盡復道飛狐合屯戍轅門
倘駐拂雲祠烽火應過明妃墓君歸解鞍藉芳草細
談塞北忘予老讀書飲酒待賊平萬丈旄頭方下掃
我夢

我夢入煙海初日如金鎔赤手騎怒鯨橫身當渴龍
百日京塵中詩料頗闕供此夕復何夕老狂洗衰慵
夢覺坐歎息杳杳二茆鐘車馬動曉陌不竟睡味濃
平生擊虜意裂皆髮上衝尚可乘一障憑堞觀傳烽
晨起有感

痛飲可以豪謝病可以高計之顧不審老與世俗鑿
丈夫本自許四十擁旌旄上馬不回顧賊穴窮腥臊
渭橋恥未雪孰謂弓可棄此志竟悠悠徂歲行滔滔
一官客長安燭下束弊袍豈惟數龍鍾行恐悲煮蒿
吾曹議古人後亦觀吾曹浮雲易變滅公議終堅牢

南省宿直

檐角參差散莫霞重門鎖斷市聲諱風經綠樹鴉棲

穩月入空廊柱影斜藤紙靜臨新獲帖銅瓶寒浸欲
開花誰知今夕幽窗夢又撈扁舟上若耶

又

頽然靜對北窗燈識字農夫有髮僧但遣奚奴持古
錦何須侍史護青綾塵埃奔走無由息疾病侵陵不
自勝猶喜眼中多壯觀時看雲海化鯤鵬

劍南詩稿卷第二十終

劍南詩稿目錄
卷第二十一

夜歸博街巷書事 馬上作 行在春晚有懷
 故隱 儀曹直廬 讀書 小昭慶院講僧舊
 在都下與之相從今沒已久見畫像於院中作
 詩吊之 晨入省中偶書 春晚 觀潮 新
 晴馬上 過六和塔前江亭小憩 春夕睡覺
 送霍監丞出守盱眙 寄題徐載叔秀才東
 莊 入省 出省 和周元吉右司過弊居追
 懷南鄭相從之作 尤延之侍郎屢求作遂初
 堂詩詩未成延之去國因以奉送 送張野夫
 寺丞牧滁州 史院書事 病中數辱曾無逸
 架閣見問今日忽聞徙居走筆奉簡因致卜鄰
 之約 喜楊廷秀祕監再入館 次韻和楊伯
 子主簿見贈 簡何同叔 去國待潮江亭太
 常徐簿宋卿載酒來別 醉中作行草數紙
 雪夜小酌 卽事 到家旬餘意味甚適戲書
 雨後復小雪 鯉魚行 雪夜行 晨起
 野饋 醉中浩歌罷戲書 朝雨 春雨二首
 託夢 野興二首 杭州夜歸二首 或問
 余近況示以長句 估客有自蔡州來者感悵
 彌日二首 初夏郊行 重午 夏日 睡起
 見楊花滿庭偶書 梅雨 醉歌 醉書秦望
 山石壁 秋夜 夜意 蝸廬 予十年間兩
 坐斥臯雖擢髮莫數而詩爲首謂之嘲詠風月
 既還山遂以風月名小軒且作絕句二首 題
 梅漢卿醉經堂 得親舊書問近況以詩代書
 報之 放逐 月下野步 自詠 午睡起遇
 急雨 夜雨暴至 睡起作帖數行 新秋
 秋興二首 幽居 山居食每不肉戲作 自
 笑 世上 夜歸偶懷故人獨孤景略 秋夜
 自近村歸 夜聞蟋蟀 秋夜風雨暴至 月

下小酌 鄰曲有未飯被追入郭者憫然有作
 吾廬 飲酒望西山戲詠 小院 發篋得
 故人書有感 秋光 晚秋風雨 幽居二首
 故山四首 秋晚弊廬小葺一室過冬欣然
 有作 小室晚酌 冬晚山房書事二首 村
 居日飲酒對梅花醉則擁紙衾熟睡甚自適也
 山居疊韻 寓歎三首

劍南詩稿卷第二十一

宋陸游務觀

夜歸埭街巷書事

近坊燈火如晝明十里東風吹市聲遠坊寂寂門盡
閉只有煙月無人行誰家小樓歌惱儂餘響縹緲縈
簾櫳苦心自古乏真賞此恨略與吾曹同歸來空齋
臥凄冷燈前病骨嶮嶮影獨吟古調遣誰聽聊與梅
花分夜永

馬上作

三十年前客帝城城南結騎盡豪英湖山冷落悲陳
迹文字流傳付後生衰老更禁新臥病塵埃時拂舊
題名馬頭風捲飛花過又得殘春一日晴

行在春晚有懷故隱

老辱明時乞一官逢春惆悵獨無歡舊人零落北音
少市肆蕭疎民力殫歸計已裁千箇竹殘年合挂兩
梁冠石帆山路頻回首箭茁蓴絲正滿槃

儀曹直廬

春晚氣始和微雲淡朝陽開軒面小庭露漬薔薇香
遊絲卷欲盡忽復百尺長而我正遺事枕藉書一牀
讒波雖稽天未遽妨人狂惟當傾綠酒莫待熟黃梁

讀書

兩兩屋矍九九車天津笑我醉騎驢床頭正可著周
易架上何妨抽漢書幸有古人同臭味不嫌兒子似
迂疎頽然白髮雖堪鄙耐事禁愁却有餘

小昭慶院講僧舊在都下與之相從今沒已久
見畫像於院中作詩吊之

曩歲曾陪夜講燈伏犀插腦齒如冰假令重見應難
識遺像癯然一老僧

晨入省中偶書

清風拂畫簾初日照素壁花枝蝶小憩草葉露時滴

房櫳闌無人溝水聲激激摩挲語枯筇伴我住幽寂
春晚

今年病過春得健春欲盡更堪風雨橫紅溼樓綠潤
一笑本自難造物復爾吝榆莢堆平堦柳絮飛作陣
塵埃生破楹霜雪滿衰鬢平生慕陶謝著語終不近
觀潮送劉監至江上作

江平無風面如鏡日午樓船帆影正忽看千尺涌濤
頭頗動老子乘桴興濤頭洶洶雷山傾江流却作鏡
面平向來壯觀雖一快不如帆映青山行嗟余往來
不知數慣見買符官發渡雲根小築幸可歸勿為浮
名老行路

新晴馬上

一劍飄然萬里身白頭也復走京塵畫樓酒旆滴殘
雨綠樹鶯聲催暮春絕塞勒回勳業夢流年換盡市
朝人此生安得常強健小艇湘湖自采蓴湘湖在蕭山
縣

過六和塔前江亭小憩

斷岸孤亭日莫時欄邊聊試葛巾軟偶觀挂席乘潮
快便覺懸車納祿遲痛飲相如無奈渴清言叔寶不
勝羸年來親友凋零盡惟有江山是舊知

春夕睡覺

破衫羸馬老黃塵人自衰遲歲自新積雨恐侵春甲
子昏燈懶守夜庚申花枝影轉歌殘月鼻鼾聲豪撼
四鄰自笑功名猶有夢散關金鼓震函秦

送霍監丞出守盱眙

淮浦鱗鱗浸碧天即今誰料作窮邊空聞甌脫嘶胡
馬不見浮屠插鬻煙亭障久安無傲到盃觴頻舉有
詩傳長城萬里英雄事應笑窮儒飽晝眠

寄題徐載叔秀才東莊東莊乃藏書之所

次公醒狂何必酒直諒多聞俱可友萬籤插架號東
莊多稼連雲亦何有今年偶入長安城不識貴人呼
作卿南臺中丞掃榻見北門學士倒屣迎郎官酸寒

誰肯顧君來下馬談至莫東莊雖富未可矜更要縱
橫開武庫

入省

點點輕花墮綠盃翩翩羸馬犯黃埃眼邊好句等閑
過夢裏故人時一來玉塞請行狂故在霜髭自照老
相催今朝涼冷文書少隱几南窗聽轉雷

出省

五更束帶聽朝雞出省還家日已西酒市雨餘青旆
重河橋風爽紫驄嘶久慚旅飯糜倉粟常憶新橙擣
膾齋萬事似棋聊爾耳年來著數不勝低

和周元吉右司過弊居追懷南鄭相從之作

梁益東西六十州大行臺出北防秋閱兵金鼓震河
渭縱獵狐兔平山丘露布捷書天上去軍諮祭酒幄
中謀豈知今日詩來處日落風生蘆荻洲

尤延之侍郎屢求作遂初堂詩詩未成延之去
國因以奉送

印何纍纍綴若若只堪人看公何樂忽然振袖開布
飄慰滿平生一丘壑遂初築堂今幾時年年說歸真
得歸異書名刻堆滿屋欠伸欲起遭書圍捨之出遊
公豈誤綠髮朱顏已非故請將勳業付諸郎身踐當
年遂初賦

送張野夫寺丞牧滁州

皇天方憂九州裂建隆真人仗黃鉞陣雲冷壓清流
關賊壘啞嚶氣如髮逋誅猾虜入檻車北風吹乾草
頭血一龍上天三百年舊事空聞遺老說金印斗大
誰作州公子玉面蒼髯虬賦詩健筆挾風雨論兵辯
舌森戈矛別君帳飲灞橋頭長歌爲君寬旅愁戰場
遺迹儻可畫尺素寄我關河秋

史院書事是日丞相過局

信史新修稿滿床牙籤黃帕帶芸香中人馳賜初宣
旨丞相傳呼早出堂皇祖聖謨高萬古諸賢直筆擅
三長孤臣會趣龍輝對白首爲郎只自傷紹興辛巳嘗

蒙恩賜對今三十九年矣

病中數辱曾無逸架閣見問今日忽聞徙居走

筆奉簡因致卜鄰之約

病羸不辦攬衣迎剝啄空慚扣戶聲凡藥豈能驅二
豎清心幸足制三彭巷南僦屋儻可問歲晚囊衣吾
亦行不爲朝天愁路澀夜窗燈火要尋盟

喜楊廷秀秘監再入館

公去蓬山輕公歸蓬山重錦囊三千篇字字律呂中
文章實公器當與天下共吾嘗評其妙如龍馬受韉
燕許亦有名此事恐未夢嗚呼大廈傾孰可任梁棟
願公力起之千載傳正統時時醉黃封高詠追屈宋
我如老蒼鶻寂莫愁獨弄杖屨勤來遊雪霽梅欲動

次韻和楊伯子主簿見贈

齋戒叩頭賤天公幸矣使我爲枯蓬枯蓬於世百無
用始得曠快乘秋風此生安往失貧賤白髮蕭蕭對
黃卷今人雖鄰有不覲古人却向書中見猿啼月落
青山空舊隱夢寂思東蒙不願峨冠赤墀下且可短
劍紅塵中終年無人問良苦眼望青天惟自許可憐
對酒不敢豪它日空澆墳上土文章最忌百家衣火
龍翻轍世不知誰能養氣塞天地吐出自足成虹蜺
渡江諸賢骨已朽老夫亦將正丘首杜郎苦瘦帽攔
耳程子久貧衣露肘君復作意尋齊盟豈知衰懦畏
後生大篇一讀我起立喜君得法從家庭鯢鵬自有
天池著誰謂太狂須束縛大機大用君已傳那遣老
夫安注脚 杜輿伯高程有徵文若曾近以詩文得名於諸公而尤
與予善

簡何同叔

白髮都門客青燈夜雪時盡捐塵世事細看月湖詩
格律冰霜敵襟懷猿鶴知吾儕端後死此事要深期
去國待潮江亭太常徐簿宋卿載酒來別

昨解魚符已徑歸偶隨尺一起柴扉暫留已塊黔吾
突久住空令繡客衣外物紛紛何足問故人眷眷莫

相違從今再見應無日長與沙鷗共釣磯

醉中作行草數紙

還家痛飲洗塵土醉帖淋漓寄豪舉石池墨瀋如海
寬玄雲下垂黑蛟舞太陰鬼神挾風雨夜半馬陵飛
萬弩堂堂筆陣從天下氣壓唐人折釵股丈夫本意
陋千古殘虜何足膏磔斧驛書馳報兒單于直用毛
錐驚殺汝

雪夜小酌

黃昏雲齊雪意熟二更雪急聲簌簌地爐對火得奇
溫兔醢魚鱸窮旨蓄引盃且作稿面紅脫帽不管衰
鬢秃浩歌三終徐自和藏書萬卷方盡讀從來本不
擇死生況復區區論禍福雪晴著屐可登山與子一
放千里目

卽事

墜壁編茅養病翁五更擁褐聽霜風老雞棲冷啼偏
早宿火灰深撥更紅知我向來惟斷簡會心終竟在
孤篷東歸已賣腰間劍魯叟從今不諱窮
到家旬餘意味甚適戲書

天恐紅塵著脚深不教經歲去山林欲酬清淨三生
願先洗功名萬里心石鼎應閑閑煮茗玉徽零落自
修琴晚來剩有華胥興臥看西窗一炷沉

雨後復小雪

兩雪來無已冬春忽欲交賤貧安淡薄老鈍耐譏嘲
村酒兒能取農書手自鈔莫年真箇懶屋漏旋添茆
鯉魚財三尺淺水不覆香雖懷江湖樂已數刀几赤
長鯨之長幾千丈雪蹴山傾萬重浪縱遊不厭滄海
寬一躍已在青天上身世局促古所哀噉啜貪餌胡
爲哉人間溝瀆莫更顧夜半變化乘風雷

雪夜作

雪重從壓竹竹折有奇聲雪深亦莫掃小窗終夜明
我老尚耐冷開卷對短檠龍茶與羔酒得失不足評

但思被重鎧夜入蔡州城君勿輕癯儒有志事竟成

晨起

倦枕廉纖雨幽窗料峭寒溪柴旋篝火野藪鬪登梁
年老衣冠古身閑宇宙寬兒孫生我笑趨揖已儒酸
鄉市小把柴謂之溪柴蓋自若耶來也

野饋

經年倉粟厭陳陳天遣香杭饋野人黃耳草生齋鉢
富白頭非出客盤新此生不復營三釜一飽何曾羨
入珍尚媿古來高士在盃羹無慘甌生塵

醉中浩歌罷戲書

造物小兒如我何還家依舊一漁蓑穿雲逸響蘇門
嘯卷地悲風易水歌老眼閱人真爛熟壯心得酒旋
消磨傍觀虛作窮愁想點檢霜髯却未多

朝雨

午夜星照泥平日雲行西小屋古澤中天昏雨淒淒
避溼升我堂垂翅閱老雞所欣園中蔬冒土青滿畦
門無今雨客路滑愁長堤一盃且復睡物理何足齊

春雨

苦雨何時止微雲又作陰傍簷時小立隱几復微吟
枝重殘紅溼隄平漲綠深物華元自好老病負登臨

又

春愁無處避春雨幾時晴黯黯陰連月蕭蕭滴到明
窗昏滅書課放緩咽琴聲何以娛幽獨新醅手自傾

記夢

夢裏都忘兩鬢殘恍然白紵入長安睡教紙熟修溫
卷做得驢騎候熱官紅葉滿街秋著句青樓燒燭夜
追歡如今萬事消除盡老眼摩挲靜處看

野興

紅飯青蔬美莫加鄰翁能共一甌茶舍西日緊花房
飲港北風生柳腳斜筇杖不妨閑有伴茆簷終勝老
無家自鷺七十猶強健采藥歸來見莫鴉

又

鬢邊莫笑久星星造物常鍾我輩情每帶餘醒蹋花影又和殘夢聽鶯聲軒窗風過書籤亂洲渚潮生釣艇橫韓子未除豪氣在文章都待不平鳴

杭州夜歸

昔如架上九秋鷹今似窗間十月蠅無復囊韃思出塞不妨粥飯略同僧白蘋洲晚初回權綠樹村深已上燈莫謂陶詩恨枯槁細看字字可銘膺

又

野艇迢迢信所之歸來常及欲昏時破塘煙重怨姑惡林薄月明悲子規出谷寺鐘初縹緲穿籬續火已參差欣然笑向簷門說又了浮生一首詩

或問余近況示以長句

天亦知予類是真莫年乞與自由身幽尋東浦鷺迎權獨臥北窗鶯喚人野舟滿頭狂取醉草廬容膝樂忘貧死時是處堪藏骨不用要離更作鄰

估客有自蔡州來者感悵彌日

洮河馬死劍鋒摧綠髮成絲每自哀幾歲中原消息斷喜聞人自蔡州來

又

百戰元和取蔡州如今胡馬飲淮流和親自古非長策誰與朝家共此憂

初夏郊行

小硯孤吟恐作愁長堤曳杖且閑遊破雲山踴千螺翠經兩波涵一鏡秋粧妝青紅村步市闌干高下寺家樓去年此日君知否十丈京塵沒馬頭

重午

葉底榴花蹙絳繒街頭初賣苑池冰會稽不藏冰賣者皆自行在來世間各自有時節蕭艾著冠稱道陵

夏日

赤日黃塵襪穢忙放翁湖上獨相羊竹梢露滴鷺殘夢荷蓋風翻送早涼暑用酒逃猶有待熱憑靜勝更無方空齋一榻偷然臥閑看衣篝起篆香

睡起見楊花滿庭偶書

斷香裊裊傍窗紗睡起曹騰日未斜堪數一春風雨惡今年四月見楊花

梅雨

沐罷斜簪二十冠斷雲殘靄暗江干絲絲梅子熟時雨漠漠楝花開後寒刺采芸香辟書蠹旋春麥楚續家餐日長倦睫惟思閉茗椀真須抵死寬

醉歌

讀書三萬卷仕宦皆束閣學劍四十年虜血未染鏑不得為長虹萬丈掃寥廓又不為疾風六月送飛翳戰馬死槽櫪公卿守和約窮邊指淮淝異域視京雒於乎此何心有酒吾忍酌平生為衣食斂版靴兩腳心雖了是非口不給唯諾如今老且病鬢禿牙齒落仰天少吐氣餓死實差樂壯心埋不朽千載猶可作

醉書秦望山石壁

秋雨初霽開長空夜天無雲吐白虹攀波浴海出日月破山卷地驅雷風崑崙黃流瀉浩浩太華巨掌摩穹穹平生所懷正如此拜賜虛皇稱放翁放翁七十飲千鍾耳目未廢頭未童向來楚漢何足道真覺萬古無英雄行窮禹迹亦安往聊借曠快洗我曾濤瀾屢犯蛟鰐怒澗谷或與精靈逢黃金鑄就決河塞俘獻頤利長安宮不如醉筆掃青嶂入石一寸豪健驚天公

秋夜

藥餌扶衰疾琴書返故園陶公方止酒樂令且清言煙鳥宿沙際露螢明草根塵囂不到處此意與誰論

夜意

孤夢初回夜氣清世塵掃盡覺心平月沉洲渚漁歌遠人語比隣續火明獨汲寒泉鳴細綆靜聽漏鼓下高城悠然坐待東方白却看軒窗淡日生

蝸廬

小葺蝸廬便著家權籬莎徑任歌斜為生草草僧行

脚到處悠悠客泛槎孤蝶惜衣晴曝粉穉蜂貪蜜晚
爭花有書懶讀吾堪愧睡起何妨自礎茶

予十年間兩坐斥鼻雖擢髮莫數而詩爲首謂
之嘲詠風月既還山遂以風月名小軒且作絕

句

扁舟又向鏡中行小草清詩取次成放逐尚非餘子
比清風明月入臺評

又

綠蔬丹果薦瓢尊身寄城南禹會村連坐頻年到風
月固應無客叩吾門

題梅漢卿醉經堂

它人爛醉錦瑟傍君獨醉心編簡香沉酣骨髓春盎
盎如枕麴葉羅盃觴三萬牙籤插高架五千黃卷撐
枯腸信哉名教有樂地白首不入無功鄉

得親舊書問近況以詩代書報之

溪頭日日弄潺湲敢料餘生竟得全白簡免勞中執
法青銅罷算小行年花前一笑頻開口林下深藏永
息肩欲養金丹還懶去身今已是地行仙

放逐

放逐雖慚處士高笑譚未減少年豪青山隨處有三
窟白首今年無二毛正得筇枝爲老伴盡將書帙付
兒曹飲酣自足稱名士安用辛勤讀楚騷

月下野步

空中磊落斗跨天道旁荒寒月滿川行歌驚起鷗鷺
眠三萬里在拄杖邊敲門索酒太華前飛渡黃河不
須船袖中短鐵青蜿蜒昔曾巴丘從老僊削平巖崖
扶雲煙此妙可得不可傳雷聲殷殷電煜然已覺遼
碣無腥羶雪花如席登祁連歸來却看東封年

自詠

孤艇渺煙波衡門暗薜蘿衣冠醉學究世有醉學究圖
毛骨病維摩撫几時長喟臨觴亦浩歌無勞問蝸角
蠻觸正橫戈

午睡起過急雨

揩眼捫髯破晝眠闌邊小立獨幽然叢花雨打無飛
蝶高柳風驚有墮蟬才略本居元子下功名那計祖
生先今朝會意君知否目送飛雲揮五絃

夜雨暴至

堂中虛窗雨氣入堂前叢竹雨聲急山童束縵走求
火屋漏惟愁打書溼秋風擺撼九千頃自鏡湖北際海
聖地凡九千頃皆吾鄉上腴也此夕真成傾玉粒蹋歌作社
約比隣一飽今年可平揖

睡起作帖數行

睡餘得清風起坐傍書几日長誰語言賴此管城子
欣然共游戲一笑我忘爾羣鴻偶下集但怪驚不起
古來翰墨事著意更可鄙跌宕三十年一日造此理
不知筆在手而況字落紙三叫投紗巾作歌識吾喜

新秋

短鬢蕭蕭失舊青此身已看作郵亭新秋無限淒涼
意盡付風蟬與露螢

秋興

去秋尚十日軒窗夕已涼露草黏溼螢壞壁啼寒蠶
丈夫志四海臨書慨以慷白髮忽如此惟有歸耕桑
藥餌且枝梧鄰曲相扶將豈無甕中酒老病不能觴
南山有歸處歲晚柏已行下從吾親游此事歲月長

又

無食苦日長無衣念秋近雖云老農圃未害樂堯舜
士生要弘毅病在墮驕吝得喪纔幾何哀哉以身徇
平生最耐事霜雪亦滿鬢憂患一洗空吾道其少進

幽居

幽居人迹稀柴扉晝常掩小池清見底疎雨時數點
蟬噤秋未衰花房莫先斂老大固多傷年華還冉冉
山居食每不肉戲作
谿友留魚不忍烹直將蔬糲送餘生二升畚粟香炊
飯一把畦菘淡煮羹莫笑開單成淨供也能捫腹作

徐行秋來更有堪誇處日傍東籬拾落英
自笑

諸公衮衮幾金貂自笑無材負聖朝老氣醉中猶跌宕
閑身夢裏亦逍遙舊書日伴吾兒讀薄飯時從野
叟招病後秋衣須早製竹窗殘夜雨蕭蕭

世上

世上悠悠東逝波金丹將奈鬢絲何牆頭楊柳知秋
早窗外芭蕉受雨多伏櫪自應如老驥還鄉元欲借
明馳吾棋一局千年事從使旁觀爛斧柯

夜歸偶懷故人獨孤景略

買醉村場半夜歸西山落月照柴扉劉琨死後無奇
士獨聽荒雞淚滿衣

秋夜自近村歸

江頭浩歌天宇寬刺船歸來清夜闌女貞林黑月未
上姑惡聲悲村已寒不恨故交日零落本知浮生難
控搏頭童面槁更安往莫問傍人君自看

夜聞蟋蟀

布穀布穀解勸耕蟋蟀蟋蟀能促織州符懸帖無已
時勸耕促織知何益安得生世當成周一家百畝長
無愁綠桑鬱鬱暗微徑黃犢叱叱行平疇荆扉績火
明煜煜黍穰飽飯香浮浮耕亦不須勸織亦不須促
機上有餘布盎中有餘粟老翁白首如小兒鼓腹擊
壤相從嬉

秋夜風雨暴至

風聲掠野來頤洞如翻濤雨聲集庭木桐葉聲最豪
殘暑一洗空凜然念綈袍秋穀已登場欲忘終歲勞
東舍捉鵝鴨西舍烹豚羔籬落開寒花房櫺壓小槽
貧賤何所歎樂歲成吾高却拾牆角藜拂拭賀汝遭

月下小酌

草樹已秋聲郊原喜晚晴風生雲盡散天闕月徐行
下箸槎頭美傳盃瓊面清追歡猶可勉徂歲不須驚
鄰曲有未飯被追入郭者憫然有作

春得香杭摘綠葵縣符急急不容炊君王日御金華
殿誰誦周家七月詩

吾廬

吾廬鏡湖上傍水開雲扇秋淺葉未丹日落山更青
孤鶴從西來長鳴掠沙汀亦知常苦飢未忍吞羶腥
我食雖不肉七箸窮芳馨幽窗燈火冷濁酒倒殘瓶

飲酒望西山戲詠

太白十詩九言酒醉翁無詩不說山若耶老農識幾
字也與二事日相關

小院

小院回廊夕照明放翁宴坐一節橫銅匱暖徹香初
過鐵杵聲清藥欲成世事熟看無一可古人不作與
誰評新涼社酒家家熟便用陽狂了此生

發篋得故人書有感

衰鬢星星換舊青世間萬事但堪驚晨炊欲熟客未
覺夜漏漸殘人尚行花發且為無事飲詩成非復不
平鳴京華朋舊凋零盡忽見緘題似隔生

秋光

年年最愛秋光好病起逢秋合賦詩叢菊漸黃人醉
後孤燈初暗雨來時舊書細讀猶多味老態相尋似
有期早信為農勝覓祿一生虛作虎頭癡

晚秋風雨

儘道漁村陋秋來物色奇寒生沽酒與雨及種花時
狂舞欲誰屬清吟空自知茫茫宇宙內吾道竟何之

幽居

白髮蕭蕭僅到肩一枝藤杖日翻籬草苦牆北棲雞
屋泥補橋西放鴨船心似枯葵空向日身如病櫟孰
知年放懷却有偷然處不養金丹不學禪

又

面面秋山擁翠屏天留三畝著雲扇迎霜南阜楓林
赤飽兩西村菜甲青散策人驚衰後健浩歌自覺醉
中醒凌煙冠劍應無爾布帽蓑襦老管寧

故山

功名莫苦怨天慳一權歸來到死閑傍水無家無好竹卷簾是處是青山滿籃箭茁瑤簪白壓擔稜梅鶴頂殿野興盡時尤可樂小江煙雨趁潮還鏡湖

又

禹祠行樂盛年年繡轂爭先罨畫船十里煙波明月夜萬人歌吹早驚天花如上市常成市酒似新豐不直錢老子未須悲白髮黃公壚下且閑眠禹祠

又

老尉鴻飛隱市門千年猶有舊巢痕陸生於此寓棋局予二十年前嘗寓居曾丈時來開酒樽曾丈謂文清公渺渺帆檣遙見海冥冥蒲葦不知村數僧也復投詩社零落今無一二存梅山

又

落磻泉奔舞玉虹護丹松老臥蒼龍霜柑籬角寒初熟野碓雲邊夜自香挈榼入沽村市酒打包僧趁寺樓鐘幽尋自是年來懶枉道山靈不見容雲門

秋晚弊廬小葺一室過冬欣然有作

放翁畢竟合躬耕剩喜東歸樂太平碧瓦新霜寒尚薄明窗嫩日雨初晴素琴尋得無放曲野餉烹成不慘羹更說市朝癡太絕一湖秋水濯塵縷

小室晚酌

病不禁寒怯早霜東齋隨事具盃觴清時寬大何妨醉白首龍鍾未減狂枝葉扶藜山果熟鹽醃調適野蔬香興闌徑覓華胥路枕藉圖書滿一床

冬晚山房書事

山澤何妨老太平鸞鸞骨相本來清月明滿地看梅影露下隔溪聞鶴聲未辨藥苗逢客問欲訓琴價約僧評胡奴仁祖今俱絕且學湘纍拾菊英

又

屏迹山村病日增烏皮几穩得閑凭凍雲傍水封梅萼嫩日烘窗釋硯冰歲盡光陰饒袞袞身閑醉夢且

騰騰蠻童采藥歸來晚客至從噴喚不磨

村居日飲酒對梅花醉則擁紙衾熟睡甚自適

也

江村歲晚掩柴荆地僻久無車馬聲孤寂惟尋麴道士一寒仍賴楮先生醅頭珠滴愁先破帳底春回夢易成莫笑衰翁殺風景小瓶梅藥解脚脚

山居疊韻

禽吟陰森林鹿伏樸檉木嗚呼吾徒愚僕僕逐肉粟聯翩隣鳶肩覆餗速戮辱艱難還山間獨欲足畜牧躋梯樓西谿築屋宿北谷光茫常當藏檀玉觸俗目

寓歎

心已忘斯世天猶活此翁嫩湯茶乳白軟火地爐紅課婢耘蔬甲呼兒下釣筒生涯君勿笑聊足慰塗窮

又

久矣門無客高齋獨掩扉敢言消壯志要是息危機清露夜自滴孤雲寒不歸晨炊勿關念更典篋中衣

又

裘薄便冬暝篔空畏午飢臨成乞米帖看入借車詩學古心猶壯憂時語自悲公卿闕自重社稷欲誰期

劍南詩稿卷第二十一終

劍南詩稿目錄
卷第二十二

贈惟了侍者二首 題湖邊旗亭 醉臥道邊
覺而有賦 寓懷四首 喜事 甜羹 縱筆
四首 自嘲解嘲二首 春雨絕句六首 雨
中臥病有感 舟中作 山園 聞虜亂 題
千秋觀懷賀亭 禹祠 樊江 東關二首
練塘 娥江市 宿野人家 舟中遣懷 歸
次樊江 夜過魯墟 有感 遊石帆玉笥石
旗諸山 信步近村 寒食省九里大墓 平
水道中 五雲橋 小雨雲門溪上 雲門獨
坐 泛湖至東澗三首 舟過梅塢胡氏居愛
其幽邃爲賦一詩 北窗 聞蛙 晚春感事
四首 山居 四月三日同子坦子聿遊湖中
諸山 梅仙塢小隱 盟雲 示兒 村居初
夏五首 城東逆旅 江村初夏 舟中作
東關二首 少微山 舟行至織女潭 書數
小園獨立 觀蘇滄浪草書絹圖歌 睡起
書觸目 曉雨初霽 夏雨 自東澗度小嶺
聞有地可卜菴喜而有賦 露坐 自笑 夜
賦 書懷 醉後作小草因成長句 雨中作
詠史 登鶴鼻山至絕頂訪秦刻石且北望
大海山路危甚人迹所罕至也 六七月之交
山中涼甚 幽居三首 園中雜詠三首 予所
居南並鏡湖北則陂澤重複抵海小舟縱所之
或數日乃歸 王給事餉玉友 晚興 村圃

劍南詩稿卷第二十二

宋陸游務觀

贈惟了侍者

水邊剝啄打門誰滿袖清風一紙詩驚起放翁蝴蝶

夢半窗寒日欲斜時

又

雪中僵臥不須悲徹骨清寒始解詩一等人間閑草
木月窗君看早梅枝

題湖邊旗亭

春色初回杜若洲佳人又典鸛裘裘入千里外狂漁
父五百年前舊酒樓渡口遠山顰翠黛天邊新月挂
瓊鉤回頭笑向紅塵說也有閑愁到此不

醉臥道邊覺而有賦

太華五千仞天台四萬丈一枝古藤如黑龍天遣飄
然寄閑放莫怪公卿不我知我自不知渠是誰史書
弄筆後來事繡鞍寶帶聊兒嬉旗亭爛醉官道臥醒
後無人數吾過世間恩怨一時空且免它年送臨賀

寓懷

脫粟未為飢短褐未為寒衆毀心自可身困氣愈完
茆屋雖三間跌坐則已寬濁酒不滿瓢浩歌有餘歡
祿食妻子樂功名後人看成敗兩蝸角貴賤一鼠肝
茫茫百年夢底物堪控搏不如學餐霞駐此雙頰丹
行披終南雲飛渡黃河湍歸然過空城人言古長安
霜露蒙荆榛喟然增永歎

又

蒼壁與黃琮初非俗所貴粲然薦繅藉可對越天地
我豈賣餅兒自街三家市持槃叫道邊雖售無乃媿
文章等卜祝王公以儒戲書成藏名山此是千載事

又

我昔浮滄溟浩渺難具論華夷滌不辨日月互吐吞

神龍忽上騰尾鬣風霆奔積浪自生火烈焰焚乾坤
笑謂同舟子世豈無鵬鯤聊持豪逸氣壓汝破碎魂

又

鮑魚載沙丘鹿馬獻阿房泗上老亭長佯伴起東方
干戈暗寓縣黥徒化侯王富貴誠可慕菹醢亦足當
青門獨無恙種瓜亦何傷後有阮嗣宗絕識未易量
楚漢真豎子孰謂斯人狂

喜事

武夷老子雪垂肩喜事何曾減少年鸚鵡螺深翻細
浪辟邪爐暖起微煙幽花滴露露紗帽亂絮憑風撲
畫船虎豹九關君勿歎未妨一笑住壺天

甜羹 菘蘆服山藥芋作羹

山廚薪桂軟炊杭旋洗香蔬手自烹從此八珍俱避
舍天蘇餲味屬甜羹

縱筆

文叔一人知此翁洛陽城裏又春風讓綠髮好年
少二十四歲作三公

又

一紙除書到海邊紫皇賜號武夷仙功名敢道渾無
意暫作閑人五百年

又

背上嵯峨兩肉山明馳有債自須還玉霄峯頭雪色
鹿清曉一聲煙雨間

又

素月徘徊牛斗間天風吹鶴度函關一年似此佳時
少喚起陳搏醉華山

自嘲解嘲

世變真難料吾癡只自嘲移山謀春土黏日欲煎膠
得句題修竹烹茶拾墮葉行年不須算斷是死衝茆

又

種稻稽山下誅茆刺曲傍鳴雞耐昏日飛燕異炎涼
古劍寒三尺殘書亂一床穹穹與厚厚能識我非狂

春雨絕句

恰喜西窗晚照明，虛簷又報雨來聲。端憂不用占龜兆，壞盡花時自解晴。

又

千點猩紅蜀海棠，誰憐雨裏作啼妝。殺風景處君知否，正伴鄰翁救麥忙。

又

天公似欲敗蠶楚，雨冒南山莫不收。駭女癡兒那念此，貪看科斗滿清溝。

又

今年春半不知春，飛電奔雷嚇殺人。縫得春衫元未著，免教惆悵洛陽塵。

又

梅中最晚是緜梅，一日來看欲百回。俗紫凡紅終避舍，不妨自向雨中開。

又

蕭條冬令侵春晚，淅瀝寒聲滴夜長。更事老翁頭到底，每言宜睡好燒香。

雨中臥病有感

病臥窮山白髮新，不堪風雨過中春。歌呼空倚一尊酒，零落漸無吾輩人。千載詩書成長物，兩京宮闕委胡塵。非熊老子不復見，誰吊遺魂清渭濱。

舟中作

不遷比景戍交河，三徑歸來得已多。應俗愈疎身老大，讀書漸廢意蹉跎。閑從孫叟蘇門嘯，醉和荆卿易水歌。歌罷却揮孤櫂去，石闌干下買漁蓑。石闌干在剡

谿道中

山園

買得新園近釣磯，旋營茅棟設柴扉。山經宿雨修容出，花倚和風作態飛。世事只成驚老眼，酒徒頻約典春衣。狂吟爛醉君無笑，十丈愁城要解圍。

聞虜亂

運數羣胡盡煙塵，北道昏百年。身易老，萬里志空存。楊柳搖搖，馳道櫻桃奉寢園。南公忠義薄，此恨與誰論。

題千秋觀懷賀亭

河湟使典珥左貂，曲江相君謝不朝。宮中玉環狐作妖，黠虜旁窺心已驕。天維欲絕地軸搖，有識凜凜憂宗祧。賀公託言師松喬，黃冠徑歸侶漁樵。老馬立仗不自聊，去如鸞鳳冲煙霄。傾都祖錢擁渭橋，賢哉大夫脫塵囂。揚州渡江木蘭橈，入東夜聽錢塘潮。我來故祠竹蕭蕭，黃冠野服傳生綃。詞卑媿匪英瓊瑤，空采蘋藻奠桂椒。虛堂斷香閉寂寥，遺魂零落何由招。

禹祠

我昔下三峽，南賓繫歸艦。渡江謁神禹，拜手薦俎壺。壽藤枝如虬，巨柏腹若劔。門庭雖日荒，殿寢猶枝梧。巴俗喜禱祠，解牛舞羣巫。巍巍黻冕古，食與夷鬼俱。聖度固兼容，臣憤獨不撓。還鄉瞻廟貌，贏政久已除。嶽牧儼如生，想像聞都俞。廓清雖可喜，欲退復躊躇。念昔平水土，棋布畫九區。豈知千歲後，戎羯居中都。老虜失大刑，今復傳其雛。直令挽天河，未濯腥羶汙。夷鬼細事耳，披攘直須與。天下誰不復，大恥何時祛。蚩蚩謂固然，此責在吾徒。揮涕灑庭草，誰憐小臣愚。

樊江

手中一卷養魚經，又向樊江上草亭。朝雨染成新漲綠，春煙澹盡遠山青。榜舟不厭頻來往，岸幘常須半醉醒。賦罷新詩自高詠，滿汀鷗鷺欲忘形。

東關

路入東關物象奇，角巾老子曳筇枝。蠶如黑蟻桑生後，秧似青鍼水滿時。穿市不嫌微雨溼，過谿翻喜壞橋危。當年野店題詩處，又典春衣具午炊。

又

雲蹙魚鱗襯夕陽，放翁繫纜水雲鄉。一筇疾步人驚健，斗酒高歌自笑狂。風暝市樓吹絮雪，蠶生村舍采桑黃。東阡南陌無窮樂，底事隨人作詩忙。

練塘

微風吹頰酒初醒落日舟橫杜若汀水秀山明何所似玉人臨鏡暈螺青

娥江市

小聚依江近支流入浦分荒寒孤店雨零亂野祠雲薄餉炊畚粟珍烹采糲芹年來去健羨摩腹自欣欣

宿野人家

避雨來投白版扉野人憐客不相違林喧鳥雀棲初定村近牛羊莫自歸土釜煖湯先濯足豆豉吹火旋烘衣老來世路渾諳盡露宿風餐未覺非

舟中遣懷

三黜歸來結草廬平生狂態掃無餘但思下帷授老子那復騎牛讀漢書歷歷舊遊渾似夢蕭蕭殘髮不勝梳閑中事業君知否不把漁竿即荷鋤

歸次樊江

芳草東西路綠楊長短亭人生豈匏繫吾志本鴻冥征袖朝霏雨歸帆夜戴星長魚幸能買且復倒殘瓶夜過魯墟

中夜過魯墟船底鳴細浪月出菱歌長林間續火壯故居不可識四顧但青嶂百年幾廢興撫事一悽愴士生本耕稼時來偶卿相功名亦餘事所勉在素尚况吾多難者久已冥得喪微祿行當辭沒身事幽曠

有感

溫洛榮河拱舊京從來人物富豪英報仇雖有楚三戶守節得無齊二城胡寇寧能斷地脈王師行復暢天聲鳳麟久伏應爭奮勉為明時頌太平

遊石帆玉笥石旗諸山

莫景苦多病幽尋寄一欣溪喧常似雨石潤易生雲天迴回鴉陣林疎過鹿羣莫談朝市事吾老厭紛紛信步近村

端閑何以永今朝拈得筇枝度野橋三畝空園喧啄木十尋高樹絡凌霄長飢未必緣詩瘦多悶惟須賴

酒澆興盡歸來又陳迹一林風葉暮蕭蕭

寒食省九里大墓

陌上簫聲正賣錫籃輿兀兀雨冥冥人來平野一點白山壓亂雲千疊青石馬朱門松下路凍齋冷飯柳陰亭華顛尚記兒童日撫事興懷涕自零

平水道中

處處陂水滿家家巢燕忙葉舒桑漸闌穗重麥初昂高下山花發青紅粉餌香亦知時節好老大自悲傷

雲門此橋本跨溪上今乃在平陸矣

五雲橋 往時鏡湖陂防不廢則若耶溪水常滿可行大舟至

若耶北與鏡湖通縹緲飛橋跨半空陵谷變遷誰復識我來徙倚莫煙中

小兩雲門溪上

好雨疎疎壓莫埃斷雲漠漠帶春雷離黃穿樹語斷續翠碧銜魚飛去來生菜入盤隨冷麩朱櫻上市伴青梅狂吟不是誇強健老氣如山未許摧

雲門獨坐

山北山南處處行回頭六十七清明如今老去摧頹甚獨坐焚香聽水聲

泛湖至東涇

春水六七里夕陽三四家兒童牧鵝鴨婦女浴桑麻地僻衣巾古年豐笑語諱老夫維小艇半醉摘藤花

又

湖光分別浦嶺路過前村泉石相縈帶雲煙互吐吞耕犁無易業隣曲有通婚試覓誅茆地吾將遺子孫

又

細細桃枝竹疎疎鹿眼籬雪霜燒葑夜月露采菱時腰斧登山早移罾出浦遲關心盡幽事恨汝不能詩

舟過梅塢胡氏居愛其幽邃為賦一詩

稽山翠入家家窗此家清絕無與雙丹葩綠樹錦繡谷清波白石玻璃江一堤茂草有眠犢數掩短籬無吠旭北軒商略可散髮借與放翁傾酒缸

北窗

北窗本意傲羲皇老返園廬味更長
犢健戴星耕白水蠶飢衝雨采青桑
俚儒朱墨開冬學廟史牲牢祝歲穰
從此鬢毛雖似雪未妨擊壤頌虞唐

聞蛙

科斗忽安在蛙聲豪有餘雖成兩部樂
恨失一編書忿怒緣何事號呼可奈渠
厨人不遐棄猶得伴溪魚

晚春感事

風惡房櫳燕子歸雨多山路蕨芽肥
青糝旋擣作寒食白葛預裁充暑衣
穉子日長供課早故人官達寄書稀
幽居自喜渾無事又向湖陰坐釣磯

又

和風薄靄過清明滅盡重裘覺體輕
正午軒窗無樹影乍晴阡陌有鶯聲
釀成西蜀鵝雛酒鵝黃廣漢酒名黃就東坡玉糝羹
捫腹偷然出門去春郊何處不堪行

又

徙倚闌干送落暉年華冉冉恨依依
護雛燕子常更出著雨楊花又懶飛
已為讀書悲眼力還因攬帶歎腰圍
親朋半作荒郊冢欲話初心淚滿衣

又

少年騎馬入咸陽鶻似身輕蝶似狂
蹴鞠場邊萬人看鞞韃旗下一春忙
風光流轉渾如昨志氣低摧只自傷
日永東齋淡無事閉門掃地獨焚香

山居

平生杜宇最相知遺我巢山一段奇
茶磴細香供隱几松風幽韻入哦詩
溪邊拂石同兒釣竹下開軒喚客棋
幾許放翁新事業不教虛過太平時

四月三日同子坦子聿遊湖中諸山

我行無所詣悠颺信舴艋愛此綠樹村
捨棹度小嶺路窮忽披豁恍然得異境
蒼玉立萬峯清鏡渺千頃更為西南行
聊破春晝永遙看秀邃處疑足事幽屏

一崦果可人奇石插碧井鏘鳴若環珮
其味復甘冷徘徊不忍去照我鬢鬢影
須臾日穿林井面光炯炯古今勝絕意
正用一笑領安得絕世喧於茲慕箕穎
梅僊塢小隱

綠樹陰陰小嶺西一翁二子自扶攜
雨前芳嫩初浮盃臘脚清醇旋拆泥
本欲省緣行買餅未能去殺尚烹雞
二者皆紀是日實事 弄橈莫便尋歸路
湖靜無風日未低

盟雲

謂雲本無心企望乃爾奇謂雲果有心
百變端為誰豈憐此翁愁一出怡悅之
橫截千嶂平高擎一峯危銀城突嵯峨
玉海浩渺瀾或為羣龍矯或作孤鶴飛
卷舒閑有態去來倏無時滄翁覆松頂
靄靄映水湄帶雨過僧窗和月傍釣磯
豈惟困畫工吾詩固難追惟當與之盟
畢世相娛嬉忍飢固易耳此友不可欺
示兒

村居初夏

舍東已種百本桑舍西仍築百步塘
早茶采盡晚茶出小麥方秀大麥黃
老夫一飽手捫腹不復舉首號蒼蒼
讀書習氣掃未盡燈前簡牘紛朱黃
吾兒從旁論治亂每使老子喜欲狂
不須飲酒徑自醉取書相和聲琅琅
人生百病有已時獨有書癖不可醫
願兒力耕足衣食讀書萬卷真何益

又

莫境難禁日月催臘醅初見拆泥開
壓車麥穗黃雲卷食葉蠶聲白雨來
薄飯蕨薇端可飽短衫紵葛亦新裁
宦塗自古多憂畏白首為農信樂哉

又

北陌東阡節物新往來饋餉走比鄰
出籠鵝白輕紅掌藉藻魚鮮淡墨鱗
笑語相聞豐歲樂耕桑自足古風淳
頽然一醉茆簷下且免西曹議吐茵

又

黃酒開時日正長山家隨分各年光
青梅巧配吳鹽

白筍美偏宜蜀豉香風暝緊催蠶上簇雨餘閑看稻
移秧老夫見事真成晚浪走人間兩鬢霜

又

天遣爲農老故鄉山園三畝鏡湖傍嫩莎經雨如秧
綠小蝶穿花似繭黃斗酒隻雞人笑樂十風五雨歲
豐穰相逢但喜桑麻長欲話窮通已兩忘

又

故鄉風物勝荆吳流水青山無處無列植園林多笑
菓飽鉏畦壟富嘉蔬橋邊來刈桑斧池畔行芟縛
櫻菰我有素紈如月扇會憑名手作新圖

城東逆旅

店家乞火燎征衣溼竹生薪不受吹更甚從戎戍邊
日正如隨計入關時百年擾擾夢相似萬事悠悠心
自知賴有牀頭周易在不妨清坐忍朝飢

江村初夏

紫葢狼籍桑林下石榴一枝紅可把江村夏淺暑猶
薄農事方興人滿野連雲麥熟新食麩小裹荷香初
賣鮓蘋洲蓬艇疾如鳥沙路芒屨健如馬君看早朝
塵撲面豈勝春耕泥沒蹠爲農世世樂有餘寄語兒
曹勿輕捨

舟中作

湖海飄然避世紛汀鷗沙鷺舊知聞漁舟臥看山方
好野店沽嘗酒易醺病骨未成松下土老身常伴渡
頭雲笑芹欲獻雖堪笑此意區區亦愛君

東關

天華寺西艇子橫白蘋風細浪紋平移家只欲東關
住夜夜湖中看月生

又

煙水蒼茫西復東扁舟又繫柳陰中三更酒醒殘燈
在臥聽蕭蕭雨打篷

少微山

平生一昨艇幾到少微山傑觀掃無迹高人呼不還

崖巖危欲壓磴斷滑難攀日莫增幽興漁歌蓼蒼間
舟行至織女潭

鵬枝搖碎碧琉璃織女潭東白塔西帶犢吳牛依茂
樹添葉海燕啄新泥山谿曲折遙通谷沙水淙潺各
赴溪猶恨兒曹不同載一尊他日要重攜

書數

溲落非時用棲遲送此生只知求醉死何憚得狂名
伏櫪天涯老吞舟海滋橫眼前交舊盡有淚對誰傾

小園獨立

草香無處覓花嫩不禁飛澤國春歸晚柴門客過稀
新泥添燕戶細雨溼鷺衣倚杖臨階久衰翁氣力微

觀蘇滄浪草書絹圖歌

天孫獨處河之湄龍梭夜織冰蠶絲機頭剪落光陸
離騎鯨仙人醉題詩字大如斗健欲飛利刃猛斫生
蛟螭墨渴字燥尤怪奇百彪潛影神靈悲嗚呼束雲
作筆今海爲硯激水上騰龍野戰乾坤震蕩人始驚
筆未落時誰得見

睡起書觸目

壓架藤花重圍枝杏子稠渴蜂窺硯水弱燕集簾鉤
入夏暑猶薄投閑身自由午窗初睡起幽興付茶甌

曉雨初霽

曉來一雨洗塵痕濃綠陰陰可一園燕子聲中寂無
事獨穿苔徑出籬門

夏雨

連朝暑溽不可過動地忽有東北風嗟峨雲壓世界
碎天矯龍卷江湖空塵沙洗濯草木醒溝澮激盪舟
舸通更煩造物出壯觀跨海千丈垂天虹

自東涇度小嶺聞有地可卜菴喜而有賦

小嶺西南煙水間頗聞有地百弓寬誰其云者兩黃
鶴何以報之雙玉盤竹塢未昏先曉暖蓮汀當暑亦
清寒一菴何日從吾好會約高人共倚闌

露坐

五月暑猶薄中庭試葛衣蛙聲經雨壯螢點避風稀
塵念三生誤歸心半世違殘年端有幾可復負漁磯

自笑

自笑胸中抵海寬韭齋麥飯日加餐住山緣熟塵機
息養氣功深槁面丹惡路慣曾經灑潏浮生何啻夢
邯鄲鏡湖五月秋蕭爽剩傍灘頭把釣竿

夜賦

夜窗搔首髮鬢警病不勝衣倚瘦藤堪笑顏回忍飢
面常依韓愈看書燈殘生已與友俱冷舊友誰如几
可憑月落風生忽增氣掠簷勁翻有歸鷹

書懷

老死已無日功名猶自期清笳太行路何日出王師

醉後作小草因成長句

天教老去未全衰猶欠縱橫萬首詩家近將軍觴詠
地身如太史滯留時酒翻銀浪紅螺醖墨涌玄雲紫
玉池流落不妨風味在花前醉草寫烏絲

雨中作

空濛初喜灑欄楹忽聽空階點滴聲高枕便知宜夕
睡豐年不歎負春耕多情幽草沿牆綠無賴羣蛙繞
舍鳴屈指清秋兩旬近却愁徂歲又崢嶸

詠史

入郢功成賜屬鏤削吳計用載廚車閉門種菜英雄
事莫笑衰翁日荷鉏

危甚人迹所罕至也

街頭旋買雙芒屨作意登山殊不惡蒼崖無罅竹鞭
逸崩石欲墜松根絡繹高開豁快送目歷險崎嶇危
著脚川雲忽起兩蛟舞瀑水高吹萬珠落大巖空腔
誰所剝絕壁峭立端疑削坡平或可坐百人峽束僅
容飛一鶴蛇蹊岌岌頭自眩鬼谷慘慘神先愕秦皇
馬迹散莓苔如鑄非鑄鑿非鑿殘碑不禁野火燎造
物似報焚書虐人民城郭俱已非煙海浮天獨如昨

六七月之交山中涼甚

城市方炎熱村墟乃爾涼拂窗桐葉下繞舍稻花香
獨鶴警秋露雙螢明屋梁臥聞機婦織感歎夜初長

幽居

大患元因有此身百年強半走跋踈折殘廣武城邊
柳染盡洛陽衣上塵繞樹鶻孤棲漸穩支床龜老息
初勻出門不欲摩雙眼世態年來又一新

又

百頃菰蒲古澤中老夫病起恰秋風流年不貸人皆
老造物無私我自窮市隱昔曾從嘯父山栖今欲効
國公芳樽雖匪金丹術槁面尊前也鬢紅

又

煙水重重際海涯夜深風雨耿茆茨交朋散落歡娛
少憂患侵陵志氣衰癡腹何由有鱗甲俗情自未去
毛皮詩書六十餘年夢更擬傳衣付小兒

園中雜詠

藝花本無多過眼那復遺陰陰一園綠佳處乃在茲
悠然東窗下顧與枕簟宜風輕竹解擗雨足果壓枝

又

珍禽下上鳴迤及清潤時豈惟侑我觴亦以起我詩
白練一團雪來與紅練俱魚虎飛照水意若愛翠裾

又後闕一葉

予所居南竝鏡湖北則陂澤重複抵海小舟縱
所之或數日乃歸

王給事餉玉友

人間五十年自笑晚乃悟歸來寫苦紙老憊無傑句
散髮蕭然蒲葦林馬軍送酒慰孤斟江河不洗古今

晚興

恨天地能知忠義心無侶有時邀落月放狂連夕到
橫參玉船湛湛真秋露却恨鵝兒色尚深
白布帶襦退士裝短籬幽徑獨相羊莎根蟋蟀催秋

候稗穗蜻蜒立晚涼屈子所悲人盡醉酈生常謂我
非狂知心賴有青天在又炷中庭一夕香

村圃

村圃穿荒翳秋容變慘悽柳疎蟬噪急雨重鷓飛低
小草臨池學新詩滿竹題若令車馬到何處有幽棲

劍南詩稿卷第二十二終

劍南詩稿目錄
卷第二十三

七月一日夜坐舍北水涯戲作 病後登山亭
覽鏡 遣懷 開元寺小閣十四韻 寄題

趙寬之主簿慈順堂 郊居二首 新秋感事
二首 八月一日微雨驟涼 秋雨三首 月

下獨坐 秋日步至湖桑埭西 秋社二首
秋思六首 以事至城南書觸目 舍西夕望

題城侍者峴山圖 題城侍者剡溪圖 晚
秋農家八首 湖上小閣 苦雨數 遣懷

道石并序三首 蘭亭 小葺村居 書陶靖節
桃源詩後 有叟 不寐 遙夜 秋晚思梁

益舊遊三首 紹熙辛亥九月四日雨後白龍
挂西北方復雨三日作長句記之 蔬圃 農

家 自喜 重九後風雨不止遂作小寒三首
城南上原陳翁以賣花為業得錢悉供酒資

又不能獨飲逢人輒強與共醉辛亥九月十二
日偶過其門訪之敗屋一間妻子飢寒而此翁

已大醉矣殆隱者也為賦一詩 甜羹之法以
菘菜山藥芋菜菔雜為之不施鹽醬山庖珍烹

也戲作一絕 莫秋書事 早自偏門入城晚
出南堰門以歸 初寒 小舟自紅橋之南過

吉澤歸三山二首 得猫於近村以雪兒名之
戲為作詩 晝睡 戲詠閑適 寓歎二首

獨夜 記九月二十六日夜夢 夢海山壁間
詩不能盡記以其意追補四首 當食歎 睡

鄉 晨興 初冬從父老飲村酒有作 懷南
鄭舊遊 冬夜讀書 余為成都帥司參議成

將軍漢卿為成都路兵鈐相從無虛日余被召
出蜀漢卿坐法謫居于涪既得自便因卜築為
涪人今年廣漢僧祖成來山陰乃言嘗至永嘉
樂清縣柳市之廣福寺有黃先生寓寺中煉丹

及見則漢卿也余聞之感歎不已為賦此詩
雜題六首 思蜀四首 散吏 題剡溪堂上
人梅花小軸 夜夢遊驪山 枕上 五更讀
書示子 夜坐 臥龍

劍南詩稿卷第二十三

宋陸游務觀

七月一日夜坐舍北水涯戲作
兀傲胡床酒半醒
釣筒收盡數舟橫
風生細葛無三
伏月上疎林
正四更
北斗離離低
欲盡明河脈脈去
無聲斥僊豈復塵中戀
便擬騎鯨返玉京

病後登山亭

野客雙蓬鬢
空山一草亭
睡魔欺茗薄
疾豎怯丹靈
沿世窮馮衍
殘年老管寧
安居得後死
不敢恨飄零
覽鏡

白頭漸覺黑絲多
造物將如此老何
二萬里天供醉
眼二千年事入悲歌
劍關曾蹴連雲棧
海道新窺浴
日波未頌中興吾
未死插江崖石竟須磨
比自三江杭
海至大亭

遣懷

許國區區不自勝
秋風空羨下韓鷹
青雲夜歎初心
誤白髮朝看一倍增
積憤有時歌易水
孤忠無路哭
昭陵
唐制有冤者許哭昭陵下
頭顱自揣今如此
尚欲閑
尋紫閣僧
陳希夷奇錢宣靖復招紫閣僧相之

開元寺小閣十四韻

淵源兩名衲
築閣捫星辰
近山臥蜿蜒
遠山高嶙峋
朝看雨空濛
莫揖雲輪困
賦詩有宿諾
下語終未親
萬法不孤起
請君作其因
高掛四面窗
淨掃一榻塵
室中絕人聲
門前謝車輪
容我睡半日
兩忘主與賓
緩燒海南沉
細碾建谿春
是間儻有句
可與屈宋鄰
詩如奮蟄龍
天矯不受馴
使可造次得
何異池中鱗
世有擾龍手
媿我非其人
詩不已就乎著
眼勿遽巡
寄題趙寬之主簿慈順堂

人間得意盡危機
獨有榮親事未非
魏闕恩光新綠
綬高堂娛侍舊斑衣
牙籤插架書無恙
蘭膳循膺咳養

莫違况有兩公天下士
為君百斛瀉珠璣
謝昌國中丞
楊廷秀秘監嘗有此作

郊居

平生萬事不容求
惟有郊居志已酬
更漏遠城雞唱
曉歲時無曆葉知秋
潮生小舫行收菽
月落長歌起
飯牛已作幸民仍
醉死人間毀譽判悠悠

又

索米官倉側坐憑
東方未可戲侏儒
行藏要付他年
看富貴真堪一笑
無等死不過除歲月
長閑勿更問
妻孥狂豪儘道非
平昔老膽輪困尚滿軀

新秋感事

江上清秋昨夜回
漁扉正對荻洲開
志存天下食不
足節慕古人讒愈來
風際紙鳶那解久
祭餘鷓鴣會
堪哀蕭然散髮聽
聽秋雨剩領新涼入酒盃

又

北渚秋風凋白蘋
流年冉冉默傷神
強顏未忍乞墻
祭積毀僅逃輪鬼
薪半榼浮蛆初試釀
兩螯斫雪又
嘗新受恩自度終
無報聊為清時備隱淪

八月一日微雨驟涼

流汗沾衣喘不供
孰知有此快哉風
新涼忽覺從天
下殘暑真成掃地
空恰轉輕雷過林
場已吹好雨到
簾櫳幽人病愈閑
無事剩賦歌詩樂歲豐

秋雨

剡曲高秋一草亭
雨來迨我醉初醒
豪吞平野宜閑
望急打虛窗入靜
聽沙上溼雲號斷
雁籬根衰草綴
孤螢老人懶復親
燈火臥看爐香掩素屏

又

赤日黃塵勢已窮
七月中旬後秋暑
尤劇淒風苦雨却忽
忽盛衰默定見天
造寒暑密移成歲
功柯葉凋零無
茂木羽翰顛顛有
羈鴻誰知病客悲
秋意盡在空階

點滴中

又

冷雨蕭蕭澀不晴叢篁遮盡小窗明故衾獨展成酣
寢新釀初嘗得細傾壁簡積陰添蠹字床琴生潤咽
我聲此時懷抱真難遣一首清詩信筆成

月下獨坐

髮根蕭爽受微風徙倚闌干月正中天宇了無雲一
點城樓俄報鼓三通庭皋簌簌吹凋葉江渚翩翩落
斷鴻回首人間塵土惡騎鯨聊駐水精宮

秋日步至湖桑埭西

伏枕衰方劇措筇氣忽增細泉鳴暗竦寶疎樹映孤燈
斷雁寒依渚強魚健脫罾行纏已無用却作在家僧

秋社

明朝逢社日鄰曲樂年豐稻蟹雨中盡海氛秋後空
不須談土偶正可倚天公酒滿銀盃綠相呼一笑中

又

浦溆漁歌遠蒨茨績火明新涼迎病起樂事及秋成
社肉分初至官壺買旋傾殘年得家食何以報時清

秋思

南鄭歸來二十霜背人歲月去堂堂破裘不補知寒
早倦枕無慘厭夜長年少若為評宿士狂生曾是說
高皇慨然此夕江湖夢猶繞天山古戰場

又

一生書劍徧天涯兩歲秋風喜在家爛醉日傾無算
酒高眠時聽屬私蛙園林夕照明丹柿籬落初寒蔓
碧花便擬掛冠君會否耳根不復耐喧譁

又

殘暑偏能著此翁吹襟剩喜得西風露滋小徑蘭若
冷月射高梁燕戶空衰病呻吟真一洗醉歌跌宕與
誰同從今日日增幽興水際先丹數葉楓

又

半年閉戶廢登臨直自春殘病至今帳外昏燈伴孤
夢簷前寒雨滴愁心中原形勝關河在列聖憂勤德
澤深遙想遺民垂泣處大梁城闕又秋砧

又

雁陣橫空送早寒白頭病叟住江干風林脫葉山容
瘦霜稻登場野色寬萬里關河驚契闊一尊鄰曲話
悲歡書生餓死尋常事那得重彈掛壁冠

又

藥畦蔬圃夕陽中帶落冠敬一病翁步蹇每妨行樂
興眼昏幾廢讀書功露濃乍警雲巢鶴風勁先凋玉
井桐欲賦悲秋却休去鬢絲已是滿青銅

以事至城南書觸目

十里西風吹帽帶江城衣杵遠猶聞路如劍閣逢秋
兩山似爐峯鑱莫雲原上老翁眠犢背籬根小婦牧
羊羣百錢且就村場醉舌本醇醪莫苦分

舍西夕望

茆舍菱陂北柴門藥圃西奇雲去人近澹月傍簷低
野迥羊牛下林昏鳥雀栖郊墟少還住父子自扶攜

題城侍者峴山圖

漢水沉碑安在哉千年峴首獨崔嵬平生不作羊公
計但欲無名死草萊

題城侍者剡溪圖

莫境侵尋兩鬢絲湖邊自葺小茆茨從今步步俱回
棹不獨山陰興盡時

晚秋農家

老來萬事懶不獨廢應鸞門前即湖山亦復罕出遊
吾廬有真樂一榻眠高秋回看世上事得喪良悠悠

又

秋雨無時休令我雙鬢縮庭荒何由鉏木落不得掃
遺奴入城市寸步困泥潦菰首幸可烹芻豢置勿道

又

豢犬使警夜畜雞用司日徹警盜所窺失日固吾患
豈無糠糶費施報不可緩家居亦為政發我中夜歎
東鄰稻上場勞之以一壺西鄰女受聘質之以一襦

誠知物寡薄且用交里閭努力畢農功租賦勿後輸

我年近七十與世長相忘筋力幸可勉扶衰業耕桑
身雜老農間何能避風霜夜半起飯牛北斗垂大荒

疏溝架略約拾瓦壘浮屠既晝菘韭畦遂營瓜芋區
豉香吳鹽白飽計已有餘捫腹笑自賀無羊敗吾蔬

又

苦寒牛亦耕甚雨雞亦鳴物物各有職念心其敢萌
我老返農圃學業付後生語兒續膏油勿輟讀書聲

又

吾里賢長者蓋有萬石風少年以利遷但可哀其窮
仁義亦何常聖賢與人同我言不足取汝豈忘乃翁

蒲萄初紫柿初紅小閣憑闌萬里風莫怪年來增酒
量此中能著太虛空

苦雨歎

九淵龍公出志還瓦溝垂溜聲淙潺茫茫大澤北際
海激激乎湖南浸山吾廬四望路俱斷蛙龜爭雄亂
昏日漏床腐席夜失眠溼竈生薪朝不爨今年十分

喜有秋豈知青秧出禾頭老夫一飽復繆悠聽兒讀
書寬百憂

遣懷

秋風策策冷吹衣謝病經年晝掩扉絕世本來希獨
立刺天不復計羣飛細思萬古名何用太息九原誰
與歸葬近要離非素意富春難畔有苔磯

道石

吾家舊藏奇石甚富今無復存者獨道石一尚置几案
間戲作

秋風嫋嫋雨班班身隱幽窗筆硯閑小試壺公縮地
術數峯閑對道州山

又

林慮靈壁俱尤物散落人間不復還投老東歸風味

在春陵小岫伴身閑

又

誤因祿米棄尊罍一落塵埃底事無布韞青鞵雖興
盡此峯聊當臥遊圖

蘭亭

蘭亭絕境擅吾州病起身閑得縱遊曲水流觴千古
勝小山叢桂一年秋酒酣起舞風前袖與盡回橈月
下舟江左諸賢嗟未遠感今懷昔使人愁

小葺村居

昔我作屋時趣欲庇風雨茆茨寒自刈條枚細相柱
庠庠生蠅蚋得煖森翅羽摧撓自棟梁朽敗連柱礎
鄰父爲我言努力謀安處土堅瓦可陶步近木易取

豈知七十翁沈痼久未愈身世如浮漚家舍真逆旅
一床居易足十歲敢自許且當復其初浩歌臥環堵

書陶靖節桃源詩後

寄奴談笑取秦燕愚智皆知晉鼎遷獨爲桃源人作
傳固應不仕義熙年

有叟

有叟鏡湖邊茆茨八九椽憑闌秋萬里閉戶醉經年
身外浮名小曾中浩氣全此生吾自判造物恐無權

不寐

老眼睡眠少林居煙雨昏百年歸老死萬事付乾坤
熠熠螢穿幔鏗鏘鐵過門欲明聞漉稻浩數閱黎元

遙夜

遙夜凜高秋蕭條念褐裘煙江新雁下竹塢暗螢流
舊友嗟誰在初心恐不酬一尊桑落酒聊得洗吾愁

秋晚思梁益舊遊

幅巾筇杖立籬門秋意蕭條欲斷魂恰似嘉陵江上
路冷雲微雨溼黃昏

又

憶昔西行萬里餘長亭夜夜夢歸吳如今歷盡風波
惡飛棧連雲是坦途

又
滄波極目江鄉恨衰草連天塞路愁三十年間行萬里不論南北怯登樓

紹熙辛亥九月四日雨後白龍挂西北方復雨
三日作長句記之

長空飄閣如欲夜白龍騰拏見雲罅鱗間出火光照
江尾卷風震雨如射老人百歲見未曾兒童閉門伏
牀下髮毛慘凜誰復支性命么微不禁嚇登場已數
禾生耳出戶仍愁泥沒跨皇天生民豈不愛龍亦何
心敗吾稼父老相看出無策攬涕頓顙號粉社移牀
避漏我亦忙秉燭題詩寄悲吒

蔬圃

蔬圃依山脚漁扉竝水涯臥枝開野菊殘拚出秋茶
病骨知天色羈懷感物華餘年有幾許且灌邵平瓜

農家

南畝勤蓄穫西城謹蓋藏種蓄乘霽日斫荻待微霜
豁確新春白山廚野蕪香何須北窗臥始得傲羲皇
自喜

半生羈宦走人間醉裏心寬夢裏閑自喜如今無一
事讀書纔倦即遊山

重九後風雨不止遂作小寒

病軀剩喜即新秋殘暑無端抵死留風雨掃除雖一
快凋年搖落已堪愁

又

菊枝軟倒不成叢井上梧桐葉半空射虎南山無復
夢雨蓑煙艇伴漁翁

又

夜長稚子添書課霜近衰翁憶醉鄉儘道吳中時節
晚菊花也有一枝黃

城南上原陳翁以賣花為業得錢悉供酒資又

不能獨飲逢人輒強與共醉辛亥九月十二日
偶過其門訪之敗屋一間妻子飢寒而此翁已

大醉矣殆隱者也為賦一詩

君不見會稽城南賣花翁以花為糧如蜜蠶朝賣一
株紫莫賣一枝紅屋破見青天盎中米常空賣花得
錢送酒家取酒盡時還賣花春花開豈有極日日
我醉終無涯亦不知天子殿前宣白麻亦不知相公
門前築堤沙客來與語不能答但見醉髮覆面垂鬢

甜羹之法以菘菜山藥芋菜蕪雜為之不施鹽

醬山庖珍烹也戲作一絕

老住湖邊一把茆時沽村酒具山穀年來傳得甜羹
法更為吳酸作解嘲

莫秋書事

莫秋風雨卷茆茨砧杵聲中過雁悲楓葉欲丹先慘
澹菊叢半倒不支持旗亭人熟容賒酒野寺僧閑得
對棋莫怪苦尋林下事駭機滿地只心知

早自偏門入城晚出南堰門以歸

早從偏門入莫從南堰歸鮑郎山前路空翠浮煙霏
秋令忽已深病骨頻添衣向來慕功名常恐斯心違
乃今知其難崦岷迫殘暉伯鸞與幼安尚友或庶幾
到家亦既夕青燈耿窗扉且復取書讀父子窮相依

初寒

蚊蠅掃迹葉飛初剩喜幽窗讀我書牆角短檠真耐
久手中團扇又成疎百年作夢行休去九月無衣亦
晏如獨恨故人消息斷寒江誰與倩雙魚

吳門未得近書

小舟自紅橋之南過吉澤歸三山

霏霏寒雨數家村雞犬蕭然晝閉門它日路迷君勿
恨人間隨處有桃源

又

六月芙蓉正盛時畫船長記醉題詩世間好景元無
盡霜落荷枯又一奇
得貓於近村以雪兒名之戲為作詩

似虎能緣木如駒不伏轡但知空窟穴無意爲魚殮
薄荷時時醉甞能夜夜温前生舊童子伴我老山村

晝睡

眼昏妨讀書不睡復何如擁被新寒裏伸腰午飯餘
斷香榮倦枕疎雨滴前除未竟華胥樂茶甌莫喚渠

戲詠閑適

莫秋風雨暗江津不下書堂已過旬鸚鵡籠寒晨自
訴狸奴氈煖夜相親典衣旋買修琴料叩戶時聞請
藥人說與鄉鄰當賀我死前長作自由身

寓歎

荷戈常記壯遊時齒豁頭童不自知已分功名非力
致更悲文字與年衰端居漸覺從人懶熟睡偏於聽
兩宜自斷歸休君勿怪一盃齋糝敵瓊糜

又

醉撫酒壺隣燼矮臥看香岫愛嶙峋舊時京洛塵埃
面今作江湖風月民幻世界中均起滅太虛空裏孰
窺規可齋入定論千劫說與天魔任惱人

獨夜

獨夜迢迢掩素屏病懷羈思共玲瓏房櫳十月寒初
重風雨三更酒半醒繁杵有聲時斷續殘缸無焰尚
青熒恍然喚起西征夢身臥金牛古驛亭

記九月二十六夜夢

海山萬峯鬱參差宮殿插水蟠蛟螭碧桃千樹自開
落飛橋架空來者誰桐枝高聳宿丹鳳蓮葉半展巢
金龜和風微度寶箏響永日徐轉簾陰移西廂恍記
舊遊處素壁好在尋春詩當年意氣不少讓跌宕醉
墨紛淋漓宿醒未解字猶溼人間歲月浩莫推歎驚
撫几忽夢斷海關天遠難重期

夢海山壁間詩不能盡記以其意追補

碧海無風鏡面平潮來忽作雪山傾金橋化出三千
丈閑把松枝引鶴行

又

海上乘雲滿袖風醉捫星斗躡虛空要知壯觀非塵
世半夜鯨波浴日紅

又

一劍能清萬里塵讓波深處偶全身那知九轉丹成
後却插金貂侍帝宸

又

春殘枕籍落花眠正是周家定鼎年睡起不知秦漢
事一尊閑醉華陽川

當食歎

黃鶯舉網收錦雉帶箭墮藉藻賴鯉鮮發奩蒼兔臥
吾儕亦何心甘味樂死禍貪夫五鼎烹志士首陽餓
請言觀其終孰爲當弔賀八月黍可炊五月麥可磨
一飽端有餘努力事春籟

睡鄉

有酒君勿啜入腸作戈矛有書君勿觀到眼生君愁
不如睡鄉去萬事風馬牛郊墟無來客風雨送莫秋
苦鬣蟲啣啣霜林葉颺颺是時一枕睡不博萬戶侯
斗帳裁青氈重衾擁黃紬華山希夷翁千載可與遊

晨興

未日雞三號將日鶴羣鳴湖陂地曠快頗樂聞此聲
回首宦遊日鈴索攬五更未言簿書勞讒謗隨日生
一飢百憂散灑然懷抱清雨後初得薺晨庖有珍烹
豈不念加糝侈汰恐易萌且當讀古書至味敵太羹
初冬從父老飲村酒有作

父老招呼共一觴歲猶中熟有餘糧麴花漫漫渾如
雪莖菜離離未著霜山路獵歸收兔網水濱農隙架
魚梁醉看四海何曾窄 蘇子美詩云吁嗟四海窄 且復相
扶醉夕陽

懷南鄭舊遊

南山南畔昔從戎賓主相期意氣中渴驥奔時書滿
壁鎗鳴處箭凌風千艘粟漕魚關北一點烽傳路
谷東惆悵壯遊成昨夢戴公亭下伴漁翁

冬夜讀書

霜雪紛紛滿鬢毛，淵年懷抱獨蕭條。房櫳夜悄孤燈暗，原野風悲萬木號。病臥極知趨死近，老勤猶欲與書鏐。小兒可付巾箱業，未用逢人歎不遭。

余為成都帥司參議，成將軍漢卿為成都路兵鈐相，從無虛日。余被召出蜀，漢卿坐法謫居於涪，既得自便，因卜築為涪人。今年廣漢僧祖成來山陰，乃言嘗至永嘉樂清縣柳市之廣福寺，有黃先生寓寺中，煉丹及見，則漢卿也。余聞之感歎不已，為賦此詩。

將軍胸中備文武，鐵馬黃旗玉關路。羌胡可滅心自知，富貴有命才可與奪官。置之三峽，中空山猿鳥同朝。莫道逢奇士，握手談明日家人不知處。平生心事一丹竈，萬里生涯兩芒屨。東嘉古寺臥高秋，時有巢仙來叩戶。山中豈識故將軍，但怪英姿凜不羣。電眼蝟鬚長八尺，論丹說劍氣凌雲。

雜題
松肪釀酒石根醉，樹葉作衣雲外行。指點人間一長歎，秋風又到洛陽城。

又
山家貧甚亦支撐，時撫桐絲一再行。朝甑米空烹芋粥，夜缸油盡點松明。

又
羊裘老人只念歸，安用星辰動紫微。洛陽城中市兒眼，情知不識釣魚磯。

又
黍醅新壓野雞肥，茆店酣歌送落暉。人道山僧最無事，憐渠猶趁莫鐘歸。

又
釣魚吹笛本閑身，正坐微官白髮新。著屐此生猶幾緬，可令復踏九衢塵。

山光染黛朝如溼，川氣鎔銀莫不收。詩料滿前誰領略，時時來倚水邊樓。

思蜀

思蜀寸心折，歸吳雙鬢衰。今年脫虎口，昨夜夢葦頭。死隔平時友，愁吟別後詩。江山應好在，誰記踏青期。

又

一作劍關客，閑遊將十年。不嫌狂駭俗，自許醉知天。瑞草溪橋路，青衣野廟壩。霜天獵歸處，萬里入橫鞭。

又

來從雲棧北，行度雪山西。故事談金馬，遺蹤訪石犀。閑情淡於水，豪飲醉如泥。壞壁塵封遍，何人拂舊題。

散吏

玉食峨嵋枵金齋，丙穴魚常思。晚秋醉未與故人疎，白髮當歸隱青山。可結廬梅花消息，動悵望雪消初。

題剡溪瑩上人梅花小軸

余昔在健為師伯，渾王志夫、張功夫、王季夷瑩上人輩，以秋晚來訪樂歛旬日而去。

夜夢遊灑山

拜賜明時散吏名，頭銜字字敵冰清。讀書有味聊忘老，賦祿無多亦代耕。笠澤尊鱸秋向晚，緱山笙鶴月微明。人間樂事今真得，莫恨摧頽白髮生。

枕上

孤舟清曉下溪灘，為訪梅花不怕寒。忽有一枝橫竹外，醉中推起短篷看。

散旋吸寒齋解宿醒

秦楚相望萬里天，豈知今夕宿溫泉。穿雲漱月無窮恨，依舊潺湲浹古縣。前温飛卿詩云：至今湯殿水鳴咽。縣前流。

五更讀書示子

簷角查查鵲語輕，窗檣澹澹日痕生。清愁不逐爐香散，旋吸寒齋解宿醒。

近村遠村雞續鳴，大星已高天未明。床頭瓦檠燈煜燼，老夫凍坐書縱橫。莫年於書更多味，眼底明明見

莘渭但令病骨尚枝梧半盞殘膏未爲費吾兒雖慧
素業存頗能伴翁飽菜根萬鍾一品不足論時來出
手蘇元元
夜坐

天公似欲假餘齡鐵石年來幸小停微火暝爐娛獨
夜斷雲吐月縞中庭眼前樂事寒醅綠身後虛名盡
簡青賴有古人同此志傍觀不用數伶仃

臥龍

危磴盤紆上翠微倚天樓觀碧參差雨來海氣先橫
鷲風惡松柯盡倒垂孤鶻歸巢翅翎重斷鴻見伴語
聲悲人間萬事難禁老醉撫闌干欲莫時

劍南詩稿卷第二十三終

劍南詩稿目錄
卷第二十四

野步晚歸 竝山東南閑步至野人吳氏居乃歸 晝睡 連日有雪意戲書 兩蜀故人寄

余闔中左縣題名石刻來皆二十餘年矣悵然有感 歲晚 夢斷 雨聲 農家 夜行湖

上 冬夜讀書忽聞雞唱 梅花絕句十首 閉戶 小園竹間得梅一枝 梅花絕句二首

得林正父察院書問信甚勤以長句寄謝 蔬食戲書 數俗 晚飯罷小立門外有作

觀梅至花徑高端午解元見尋二首 春雪 舟過季家山小泊 送王成之給事 山家

送傑上人歸成都二首 落魄 春晴出遊 題瑩上人二畫二首 和張功父見寄二首

山家莫春二首 讀王季夷舊所寄詩 題庠閣黎二畫二首 入雲門小憩五雲橋 黃砂

小店野飯示子坦子聿 山園 入城至郡圃及諸家園亭遊人甚盛 次韻范參政書懷十

首 春晚村居雜賦絕句六首 沽墟西酒小酌 戲詠村居二首 戲詠閑適三首 夜與

兒子出門閑步 老景 初夏 晨起 月夜短歌 小軒 愛閑 靜院 雨晴 讀史有

感 莫歸 仰首座求鈍菴詩 壁老求笑菴詩二首 浴罷 夜坐水次 六月十四日微

雨極涼 十五日雲陰涼尤甚再賦長句 水亭晚眺 自詠 立秋前四日夜泛舟至跨湖

橋 信筆三首 示兒 青山白雲歌 小市蓬萊館午憩 夢遊散關渭水之間

劍南詩稿卷第二十四

宋陸游務觀

野步晚歸

江村十日喜霜晴草死泥乾拄杖輕溝港淺來無鷺
下郊原曠處有牛耕犇馳久厭兒童戲淪落偏知世
俗情欲向書窗了殘課歸來猶占夕陽明

竝山東南閑步至野人吳氏居乃歸

信步閑行遍四鄰擁籬老稚看綸巾人隨世換朋儕
少志與年衰感慨頻梅送冷香橫雪岸雁翻孤影下
煙津豐年何地躄君賜剩向旗亭作醉人

晝睡

我年垂七十齒髮日變遷初無金丹術何以追飛仙
惟有一高枕可以餓餘年蕭蕭敗榻上鼻鼾心了然
靜如約隱霧湛若珠藏淵寄語少年輩未宜嘲孝先

連日有雪意戲書

壯歲羈遊半九州即今顛顛老菟裘狂心那復繳鴻
鶴世事已如風馬牛雪作未成增慘澹葉飛欲盡更
颼颼聊將袖裏平戎事判斷千巖萬壑秋

兩蜀故人寄余閩中左縣題名石刻來皆二十
餘年矣悵然有感

憶過西州樂飲時百車載酒萬花圍只言身外皆餘
事豈信人間有駭機雪鬢已成新夢境縹緲空花舊
征衣早知一笑難如此剩判年光醉不歸

歲晚

歲晚霜風正怒號荒村敗屋擁藜蒿窮猶可勉聖賢
事老豈遽忘鉛槧勞從宦雖如棋已決治經竊比繭
初纒閉門養氣淵源在未敢摧傷學楚騷

夢斷

夢斷燈殘聞雁聲攬衣起坐待天明街頭濁酒不堪
醉窗外疎梅空復情人欲見擠真石身寧輕用作

投瓊南湖可引春疇美只合躬耕畢此生

雨聲

兩聲點滴朝復暮中有詩人絕塵句雲門咸池渺千
古斷譜遺音此其緒雨聲點滴夜不休中有羈臣去
國愁九疑聯翩湘水秋忠誠內激涕自流我今衰病
百無念臥對青燈吐殘焰支牀納息効寒龜傍枕長
吟笑孤劍雨聲不斷睡愈美窗白鴉啼攬衣起呼兒
燒兔傾濁醪又倚胡牀雨聲裏

農家

低垣矮屋俯江流渾舍相娛到白頭累世不知名宦
樂百年那識別離愁飯餘常貯新陳穀農隙閑眠子
母牛聞道少年俱孝謹未應家法媿恬侯

夜行湖上

月痕澹欲無斗柄低半沒荒陂雁飛鳴草屋牛臥齧
我行湖邊路霜冷刮病骨斷隄沙水溼屢滑常恐蹙
殘年垂七十野處猶短褐窮死士所有權門不可謁

冬夜讀書忽聞雞唱

齷齪常談笑老生丈夫失意合躬耕天涯懷友月千
里燈下讀書雞一鳴事去大牀空獨臥時來豎子或
成名春燕何限英雄骨白髮蕭蕭未用驚

梅花絕句

凜凜冰霜晨皎皎風月夜南山有飛仙來結尋梅社
又

憶昔西戍日夜宿僊人原風吹野梅香夢繞江南村
又

錦城梅花海十里香不斷醉帽插花歸銀鞍萬人看
又

低空銀一鉤慘野玉三尺愁絕水邊花無人問消息
又

蘭茝古所貴梅乃晚見稱盛衰各有時類非人力能
又

子欲作梅詩當造幽絕境筆端有纖塵正恐梅未肯
又

又

又
清霜徹花骨霜重骨欲折
我知道造物意遣子世味絕

又
士窮見節義木橋自芬芳
坐回萬物春賴此一點香

又
南村花已繁北場殊未動
更賒一月期待我醉春甕

又
山月縮中庭幽人酒初醒
不是怯清寒愁躡梅花影

閉戶
算飄虛道不堪憂閉戶
方從造物遊安樂本因無事

得功名常忌有心求
洗除仇怨忘蠻觸收斂光芒靜
斗牛兒報牀頭春甕熟
人間萬事轉悠悠

小園竹間得梅一枝
若耶溪邊鶴髮叟
流落一生端坐口如今不怕桃李

噴更因竹君得梅友
嶺頭羈旅萬里愁江上凄涼一
杯酒酒枝橫澹月影在地
藥插烏巾香馥手交情歲晚

金石堅孤操凜然真耐久
荒山野水終自得銀燭金
壺亦何有夢魂不接莊周蝶
心事肯付張緒柳晚來

畫角動高城起舞聊為放翁壽
梅花絕句

幽谷那堪更北枝
年年自分著花遲
高標逸韻君知否
正在層冰積雪時

又
萬瓦清霜夜漏殘
小舟斜月過闌干
老來一事偏堪恨
好看梅時却怕寒

得林正父察院書問信甚勤以長句寄謝
折柳湖南別尚新
書來已見柳搖春
故情有此膠投漆
薄俗從渠越視秦
長劍柱頤那復夢
短衣掩脛未全貧
有詩亦欲頻持寄
腸斷西江六六鱗

蔬食戲書
新津韭黃天下無
色如鵝黃三尺餘
東門豕肉更奇絕
肥美不減胡羊酥
貴珍詎敢雜常饌
桂炊薏米圓

比珠還吳此味那復有
日飯脫粟焚枯魚
人生口腹何足道
往往坐役七尺軀
羶葷從今一掃除
夜煮白石羹陰符

數俗
風俗陵夷日可憐
乞墻鉅市亦欣然
看渠皮底元無血
那識虞卿魯仲連

晚飯罷小立門外有作
此心何敢慕輕肥
尚媿無功飽蕨薇
浦面烏衝殘靄去
柳陰人荷一鋤歸
病嗟短髮紛紛白
老覺初心種種非
百步空庭著明月
昏昏手自掩荆扉

觀梅至花涇高端叔解元見尋
春晴閑過野僧家
邂逅詩人共晚茶
歸見諸公問老子
為言滿帽插梅花

又
春暝山中雲作堆
放翁艇子出尋梅
不須問信道傍叟
但覓梅花多處來

春雪
江雲垂野雪如簷
閨歲春來特地遲
倒盡酒壺終日醉
以聽兒誦半山詩
舟過季家山小泊

困睫濛濛渴煮茶
繫船來叩野人家
風飄翠浪千畦麥
水漾紅雲一塢花
健犢破荒耕犖確
禽除蠹啄槎牙尋春非復衰
翁事且伴兒童一笑諱

送王成之給事
我昔揚帆掠吳楚
夜泊秦淮聽春雨
明朝冠蓋擁長亭
誤辱諸公問良苦
是時衆中初識公
天驥蹴踏萬馬空
知心投分財數語
玉塵謾護生清風
冶城醉墨鴉棲壁
長干祖道花照席
公方閉戶試諸生
坐數江山少顏色
爾來倏仰三十春
欲話舊遊無故人
豈知邂逅逢一笑
使我肝膽還輪囷
困衰遲少復入城市
虛左屢招慚主意
忽聞上印却悽然
悔不日日從公醉
朝廷三載虛一相
如公早合鸞臺上
榮河温洛久胡

沙此段功名勿多讓

山家

白石青莎一徑斜，斷無人迹到山家。
梁間歸燕避微雨，池面遊魚爭落花。
雪鬢但增新感慨，金鞭那復舊豪華。
明窗睡起渾無事，篝火風爐自試茶。

送傑上人歸成都

錦城一別鬢成絲，今日山陰送傑師。
亂絮飛花撲行路，正如東郭放船時。

又

春夜挑燈話別愁，此心已在錦江頭。
舊時處處塵昏壁，想復長吟爲小留。

落魄

落魄江湖七十翁，欲持一笑與誰同。
蕭蕭雪鬢難藏老，寂寂蓬門可諱窮。
好句尚來欹枕處，壯心時在倚樓中。
無涯毀譽何勞詰，骨朽人間論自公。

春晴出遊

芳樹參差葉已成，園林隨處聽鶯聲。
遊人正樂還興歎，造物無心却有情。
慘徑落紅猶可藉，漲溪分綠已堪耕。
蘭亭禹廟年年好，剩伴鄉鄰醉太平。

題瑩上人二畫

天地又秋風，谿山憶剡中。
孤舟幸閑著，借我訪支公。

右剡谿

曉聽楓橋鐘，莫泊松江月。
斯人亦可人，淡墨寫愁絕。

右吳江

和張功父見寄

舉世何人念此翁，敢期相問寂寥中。
回思舊社驚年往，細讀來書恨紙窮。
我用荷鋤爲事業，君將高枕示神通。
叮嚀一語宜深聽，信筆題詩勿太工。

又

佐命貂蟬再世孫，手鉏瓜壟傍青門。
超騰已得丹換骨，戀著肯求香返魂。
功父如夫人逝去，聞頗損眠食故反之。
正復悲秋如騎省，可令病渴似文園。
庭前柏樹西來

意握手何時得共論

山家莫春

遶屋清陰合綠堤，綠草纖起蠶初放。
食新麥已磨鎌，苦筍先調醬。
青梅小蘸鹽，佳時幸無事。
酒盡更須添。

又

行飯獨相羊，扶藜過野塘。
晴光生蝶粉，暝律變鶯吭。
妙美羣兒競，蠶飢小婦忙。
深知遊宦惡，窮死勿離鄉。

讀王季夷舊所寄詩

燈前忽見季夷詩，淚灑行間不自知。
醉別西津如昨日，露晞漚滅已多時。
余在京口與季夷別，遂不復相見。

題岸閣黎二畫

秋山瘦嶙峋，秋水渺無津。
如何草亭上，却欠倚闌人。

右秋景

溪上望前峯，巉巖千仞玉。
渾舍喜翁歸地，爐煨羊熟。

右雪景

入雲門小憩五雲橋

數雨初過換夾衣，園林零落到薔薇。
鳴鳩日暝遙相應，雛燕風柔漸獨飛。
臺省多才吾輩拙，江湖久客莫年歸。
雲門踞月方清絕，且倚溪橋看夕霏。

黃昉小店野飯示子坦子聿

山林久衰病，生世幾清明。
未作松根臥，猶尋溪上行。
食新炊麥飯，嘗醃蝦菜羹。
孺子雖知學，家貧且力耕。

山園

山園寂寂閉春風，箇裏天教著放翁。
萬事已拋孤枕外，一尊常醉亂花中。
閑隨戲蝶忘形久，細聽啼鶯得意同。
月桂可憐常在眼，小叢時放一枝紅。

入城至郡園及諸家園亭遊人甚盛

老子何曾慣市塵，今朝也復入城闈。
太平有象人人醉，造物無私處處春。
九陌鶯花娛病眼，一竿風月屬閑身。
不緣興盡回橈早，要就湖波照角巾。

次韻范參政書懷

養氣頽然似木雞，謗讒寧復問端倪。
生塵甑煨喜炊

黍棘釜羹香忘糝藜萬里曾遊雲棧北一庵今臥鏡湖西殘年老病侵腰膂那得隨人病夏畦

又 已著山林掃塔衣洗除仕路劍頭炊心光熠熠雖潛發領雪紛紛已太遲度日只今閑水牯知時從昔羨山雌掩關未必渾無事擬徧寒山百首詩

又 身寄崦嵫欲盡時且貪餘景伴兒嬉故廬手種竹千箇醉帽時簪花一枝蠹篋有書供夙好衡門無客作新知羊裘自欠封侯骨敢道君房徹底癡

又 感昔傷懷一喟然事賢猶及紹興前此身顛仆應無日諸老凋零不計年客少可羅門外雀家貧也辦杖頭錢插花醉舞春風裏不學龐翁更問禪

又 春寒還似莫冬天敗絮重披有蟲緣雖欠高僧分白氈偶蒙暴客怒青氈濁醪益盜貧猶醉倦枕昏昏晝亦眠年少從渠笑衰癯相呼禹廟看龍船近有偷兒取二釜去宅幸無所失亡

又 祠祿恩寬亦例沾屏居懷抱苦厭厭戍邊事往功名忤迎客兒扶老病兼遇與榜舟無遠近破愁沽酒任酸甜殘年唯有讀書癖盡發家藏三萬籤

又 芋栗多儲煮復煨一塵那許到靈臺虹穿道室爐丹熟龍吼空山匣劍開躡屩未成遊地肺掩扉聊欲隱天台桃花榮謝吾何預一任劉郎去後栽

又 探梅方憶雪中歸轉眼青青子滿枝築圃漫為娛老計劈牋又賦送春詩乞身何日還初服坐食終年媿聖時睡起西窗澹無事一枰閑看客爭棋

宇內寓形財幾時西山俄已迫斜暉百年過隙古所歎眾口鑠金胡不歸已是平生行逆境更堪末路踐危機夜香一炷無他祝稽首虛空懺昨非

又 趙州行脚我安能閑却床邊六尺藤釣閣臥聽西澗雨棋軒遙見北村燈平生愛睡如甘酒晚歲憂讓劇履冰剩欲舒懷答清歡半空鸞鳳媿孫登

春曉村居雜賦絕句 作堤蜿蜿六百尺西崦東村成一家春雨乍晴桑吐葉秋風初冷稻吹花

又 鵝兒草綠侵行路被子花明照屋除處處乞漿俱得酒杖頭何恨一錢無

又 一篙湖水鴨頭綠千樹桃花人面紅茆舍青帘起余意聊將醉舞答春風

又 朝書牛券拈枯筆莫祭蠶神酌凍醪閑放無憂窮有意傍人錯羨此翁高

又 澆書滿挹浮蛆蠶攤飯橫眠夢蝶牀莫笑山翁見機晚也勝朝市一生忙東坡先生謂晨飲為澆書李黃門謂午睡為攤飯

又 午枕閉門無客攬夜燈開卷有兒同若為牋與天公道盡乞餘生向此中

又 沽棗西酒小酌 棗西小店酒新篘一醉今朝覺易謀從曠却來俱有死出青天外始無愁功名未許妨高臥風月猶能賦遠遊造物向人元不薄卷簾萬頃鏡湖秋

戲詠村居 歌起陂頭正插秧梯斜籬外又刺桑日長處處鶯聲

笑歲樂家家麥飯香林杏半丹禁宿雨叢萱自斂避
斜陽北窗合是羲皇上已置臨風八尺床

又
馬跡車聲斷已無隣翁笑語自相呼衣裁大布如亭
長船設低篷學釣徒慈物欲師僧施食畏人愁報吏
催租陳蕃壯志消磨盡一室從今却掃除

戲詠閒適
鈔書字細眼猶明擣藥聲清疾漸平桐葉雨邊尋斷
夢菊花香裏散餘醒人間榮辱知難到紙上興亡看
亦輕惟恨暮年交舊少滿懷情話向誰傾

又
刻曲稽山是故鄉人言景物似瀟湘三升花露春壺
滿八尺風漪午枕涼樹合綠陰山鶻開盆鑄紫石水
梳香回思烏帽京塵客始覺幽居白日長

又
涉世心知百不能閉門嬾出病相仍單瓢味美如烹
鼎鄰曲入淳近結繩半顆鴉殘牆外杏一枝鶻裏糶
邊藤蕭然掃盡彈冠興敢爲詩情望武陵

夜與兒子出門閑步
家住黃花入麥村閑將穉子出柴門草根螢墮久開
闔雲際月行時吐吞未分悲憂攻齒髮已將生死付
乾坤舊書半蠹猶堪讀糲飯藜羹莫更論

老景
老景雖無幾爲農尚有餘曾傳種魚術新得相牛書
黍酒時留客菱歌或起予平生湖海志高枕看嚴徐
初夏

老病少睡眠臥見天窗白棲鳥亦已鳴一一翻去翻
我起將何之且復守書冊收斂萬里心未厭容膝坐
吾家讀書法一字亦當覈勉哉積新功莫問幾時客

王右丞數白髮詩曰俯仰天地間能爲幾時客
月夜短歌

老夫倚杖當戶立霜氣青冥月輪溼聽聽短髮冷入
頂更覺衣履清風襲月落欲盡夜蒼茫回顧明星已
煌煌明星雖高未須喜三足陽鳥生海底
小軒

四面山如碧玉城小軒聊得愜幽情乍飛乳燕低無
力自落來禽靜有聲麟筆殘功成水品蛇圖餘思入
棋枰閑中事業吾能了未恨林廬送此生
愛閑

愛閑惟與病相宜壯歲懷歸老可知睡熟素書橫竹
架吟餘犀管閣銅螭水芭蕉潤心抽葉盆石榴殘子
壓枝堪笑放翁頭白盡坐消長日事兒嬉
靜院

靜院房櫳兩送涼熏籠衣幘潤生香小屏風疊圖遙
碧古錦囊書榻硬黃已占江湖寬處老絕知日月靜
中長敲門無客妨人睡更覺餘年樂未央
雨晴

閑曳枯筇自在行曲廊小閣賞新晴幽禽葉底吟風
久殘兩枝間照日明茶映盞毫新乳上琴橫薦石細
泉鳴亦知老健終難恃且復蕭然得此生
讀史有感

英雄自古埋秋草世上兒童共笑狂射賊曾飛白羽
箭閉門空枕綠沉槍隆中高臥人千載易水悲歌淚
數行讀盡青編窗日晚一尊聊復吊興亡
莫歸

意行無所之偶傍陂頭立空村犬吠豪高樹蟬嘒急
風塵一身老海宇萬感集還家日已莫草露青鞋溼
仰首座求鈍菴詩
鈍菴來問鈍何如真箇能參鈍也無掘井及泉那用
巧磨磚作鏡未爲愚先師鉢袋當傳後上座蒲團莫
負渠我亦年來念休歇約君同作鈍工夫

壁老求笑菴詩
臺省諸公六出奇江湖狂客一生癡無人為問淨光
老撫掌掀髯端為誰

又
車馬往來塵暗天淨光欣喜接諸賢半甌春茗無多
費且結來生一笑緣

浴罷
浴罷西軒物色幽臥看香霧上衣篝半廊月白初侵
夜一葉桐飛忽報秋老覺年光殊衰衰病知心事斷
悠悠碧甯且作池邊醉玉色新醅手自籌

夜坐水次
房星縱心星橫北斗高掛南斗傾蓼根熠熠螢火明
葦叢哀哀姑惡聲我倚胡床破三更溪風吹衣月未
生玉門關拂雲城何時連營插漢旌白頭書生未可
輕不死令君看太平

六月十四日微雨極涼
湖上清秋近齋中白日長雲來樹收影雨過土生香
蓮小紅衣溼瓜甘碧玉涼晚來幽興極移榻近方塘

十五日雲陰涼尤甚再賦長句
襍穢京塵觸熱行豈知世有野堂清磴茶落雪睡魔
退激水跳珠涼意生甕甕清風隨塵柄悠悠長日付
棋枰小舟先向蘋汀泊浴罷還須泛月明

水亭晚眺
暑雨初晴浦面寬水亭景物卷簾看聯舟作陣圍魚
隊屈竹成籬護芡盤四海諸公半丘壘百年幾夕倚
闌干日沈未用忽忽去待挽銀河濯肺肝

自詠
萬事不挂眼終年常避人荒畦荷鋤晚環堵結茆新
病馬何勞斥輕鷗未肯馴雖慚市門卒聊作葛天民
立秋前四日夜泛舟至跨湖橋

短楫追涼十里來夜深却御便風回離離蒲葉先秋
老嬾嬾蘋花帶露開陌上歌呼簪稻穗橋邊燈火賣

官酷時平樂事知何限未數流年兩鬢催
信筆
為善得禍吁可悲顏回短命伯夷飢何人長號血續
淚天自無心君自癡

又
少年醉眼傲王侯末路悲歌夜飯牛濟世有時生一
念鏡中白髮勸人休

又
急雨初過景物奇一天雲作細鱗差畫橈弄水三十
里恰是西村煙暝時

示兒
斥逐襟被歸招喚振衣起此是鄙夫事學者那得爾
前年還東時指心誓江水亦知食不足但有餓而死
小兒教汝書不用日十紙字字講聲形仍要身踐履
果能稱善人便可老鄉里勿言五鼎養肉食吾所鄙
青山白雲歌

年自有人
小市狂歌醉墮冠南山山色跨牛看放翁胸次誰能
測萬里秋空未是寬

蓬萊館午憩
驛門繫馬聽蟬吟翻動平生萬里心橋畔笛聲催日
落城邊草色帶煙深關河歷歷功名晚歲月悠悠老
病侵憶戍梁州如昨日憑闌西望一霽襟

夢遊散關渭水之間
平生望眼怯天涯客裏何堪度歲華但恨征輪無四
角不愁歸路有三義驛窗燈闇傳秋柝關樹煙深宿
莫鴉叱犢老翁頭似雪羨渠生死不離家

劍南詩稿卷第二十四終

劍南詩稿目錄

卷第二十五

秋夜 世事 夜半池上作 秋夜將曉出籬

門迎涼有感二首 夏秋之交久不雨方以旱

為憂忽得甘澍喜而有作 藥圃 書數 夜

興 閑中頗自適戲書于客座 新涼夜坐有

作 荷花二首 醉中作 題齋壁 老將二

首 白髮 小雨 秋日郊居八首 七月十

七日大雨極涼 雨中作 秋興三首 雨夜

南堂獨坐 夜不能寐復呼燈起坐戲作 喜

晴 枕上 新作南門 寄成漢卿將軍 病

臥 晚晴 秋雨初晴有感 獨飲 小築

示兒 新晴 晨起坐南堂書觸目 壬子八

月癸卯大風雨拔木飄瓦通夕不能寐 秋雨

不止排悶 用短 覽鏡有感 哭徑山策老

松風 醉歌 秋夜讀書有感 瀘州亂

東鄰築舍與兒輩訪之為小留 夜坐 西隣

亦新葺所居復與兒曹過之 有術士過門謂

余壽及九十 晚眺 秋日焚香讀書戲作

九月一日夜讀詩稿有感走筆作歌 上書乞

再任冲佑 秋晚歲登戲作二首 舟中望禹

祠蘭亭諸山 夜觀嚴光祠碑有感 閑趣

壬子九日登山小酌 舍北望水鄉風物戲作

絕句 新黏竹隔作暝閣 禹跡寺南有沈氏

小園四十年前嘗題小閣壁間偶復一到而園

已易主刻小閣于石讀之悵然 贈鏡中隱者

月夜作 記夢 感舊 小園 初冬 閑

中樂事二首 小舟 九月二十三夜小兒方

讀書而油盡口占此詩示之 今年立冬後菊

方盛開小飲 行飯莫歸 晝眠 睡覺聞兒

子讀書 余得木杖于秦望山中今三十年矣

隴蜀萬里未嘗相捨戲賦長句贈之 步至近

村 五鼓不得眠起酌一盃復就枕 醉倒歌

冬夜 默坐 日莫 遣興 泛舟 夜讀

范至能攬轡錄言中原父老見使者多揮涕感

其事作絕句 初冬掃東山之麓置數石子喬

松巨竹間以眺西山甚自適也 南堂春記乃

已三十年偶讀之悵然有感

劍南詩稿卷第二十五

宋陸游務觀

秋夜

清夜不成寐出門還浩歌斷雲微翳月薄露不傾荷
絡緯知時早梧桐奈汝何非關老懷惡秋物感人多

世事

世事本難全吾生已媿天借書常稱載餽酒亦蟬聯
鐘粥隨時具湖山此地偏殘年更何慕未死即神仙

夜半池上作

夜永空齋睡不成起扶藤杖傍池行露濃雙鶴移杖
宿風急孤螢墮草明斷續更籌傳古戍縱橫河漢接
高城寒泉未漱神先爽靜聽銅瓶汲井聲

秋夜將曉出籬門迎涼有感

迢迢天漢西南落嗷嗷鄰雞一再鳴壯志病來消欲
盡出門搔首愴平生

又

三萬里河東入海五千仞嶽上摩天遺民淚盡胡塵
裏南望王師又一年

夏秋之交久不雨方以旱為憂忽得甘澍喜而有作

亂點灑庭蕪涼聲集井梧綠荷傾作永翠蔓綴成珠
臥聽病良已行吟愁欲無天公終老手談笑活焦枯

藥圃

少年讀爾雅亦喜騷人語幸茲身少閑治地開藥圃

破荒斷瓦礫引水灌膏乳玉芝移石帆金星取天姥
申椒藤蕪葦一一粲可數次第兩苗滋參差風葉舉

山僧與野老言議各有取瓜香躬采曝泉潔謹炊鬻
老夫病若失稚子喜欲舞餘年有幾何長鏡真託汝

書數

只道才高始不容無才也墮駭機中市朝回首已陳

迹日月催人成老翁仗馬自食三品料雲鵬方駕九
天風今朝有喜君知否揀得煙汀下釣筒

夜興

夜出茆堂自撤局烏藤與我兩伶俜涼蟾吐暈圍千
丈老木移陰可一庭隔浦呼鳴聞宿鳥傍簷開闔數
流螢放翁尚友論千載不取梁鴻即管寧

閑中頗自適戲書示客

髮猶半黑臉常紅老健應無似放翁烹野八珍邀父
老燒窮四和伴兒童野八珍見王履道詩世又有窮四和香法
剪紗新製簪花帽乞竹寬編養鶴籠葉許夔龍竟誰
是請君下語勿匆匆

新涼夜坐有作

老夫任運本騰騰一念軒裳實未曾閑似苔磯垂釣
叟淡如村院罷參僧硯屏突兀蓬婆雪書几青熒蓮
勺燈臨叩雪山硯屏及漢嘉古檉燈檠皆吾書室中物也 稚子
可憐貪夜課語渠循舊未須增

荷花

風露青冥水面涼旋移野艇受清香猶嫌翠蓋紅妝
句何況人言似六郎

又

南浦清秋露冷時凋紅片片已堪悲若教具眼高人
看風折霜枯似更奇

醉中作

宦遊三十載舉步亦看人愛酒官長罵近花丞相噴
湖山今入手風月始關身少吐曾中氣從教白髮新

題齋壁

平生喜蕭散垂老厭奔走三千鏡湖上樂事未曾有
晨開一卷書莫把一卮酒病除覺身輕赤脚自踰藕
乃知造物意亦未棄衰朽今夕月殊佳出門喚鄰叟
老將

憶昔東都有事宜夜傳帛詔起西師功名無分身空
在猶指金創說戰時

又
百戰西歸變姓名悲歌擊筑醉湖城貂裘換得金瑤
鬢種藥南山待太平

白髮

疾病侵壯年髮恐不及白偶獲針石功寓世成久客
行年垂七十霜雪紛滿憤耳目雖已衰亦未與人隔
濯纓千頃湖送老五畝宅大布縫長衫東阡復南陌

小雨

百穀畏秋陽常恐膏澤吝大哉天公仁霖霖來有信
蘋汀水未長藥壠土先潤新涼生葛衣老僊亦小振

秋日郊居

山雨霏微鴨頭水溪雲細薄魚鱗天幽尋自笑本無
事羽扇筇杖上釣舫

又

行歌曳杖到新塘銀闕瑤臺無此涼萬里秋風菘菜
老一川明月稻花香

又

秋日留連野老家朱槩鮮鬪粲如花已炊藟散真珠
米更點丁坑白雪茶 藟散米名丁坑茶名

又

車蕩比鄰例饋魚流涎對此四腮鱸北窗雨過涼如
水消得先生一醉無

又

今年斟酌是豐年社近兒童喜欲顛半醉半醒村老
子家家門口掠神錢

又

魚臠滿缶酒新筍處處吳歌起攏頭上客已隨新雁
到晚禾猶待薄霜收刻及諸賢人以八月來水鄉助穫謂之上
客以其來自山中也

又

兒童冬學鬧比鄰據案憑儒却自珍授罷村書閉門
睡終年不著面看人 農家十月乃遣子入學謂之冬學所讀雜

字百家姓之類謂之村書

又

兩翁兒女舊論姻酒樽羊腔喜色新不遣交情隔生
死固應世好等朱陳小兒子聿聘亡友張叔清季女蓋尋舊約
也

七月十七日大雨極涼

吳中七月熱未已渴烏呀呀井無水炎官護前不少
斂樹頭敢望秋風起天公老手亦豈難雨來黑雲如
壞山瓦溝淙淙萬銀竹變化只在須臾間老夫挑燈
北窗下山童夜歸泥過蹀躞草根促織有底忙綠衣未
贖還慨慷

雨中作

山雨時時急谿流日日添溼苔緣暗壁腐瓦落頽簷
老至那容却狂來未易礙泥深村路絕煙樹出青帝

秋興

天遣幽人儘放狂醉眠無復客為妨墨蛟飛下剡藤
滑蒼壁碾成官焙香老境雖深身更健清秋欲半日
猶長閉門莫道都無事又了移花一段忙

又

蓬蒿門巷絕經過清夜何人與晤歌蟋蟀獨知秋令
早芭蕉正得雨聲多傳家產業遺書富玩世神通醉
臉醜如許癡頑君會否一毫不遺損天和

又

老子雖貧未易量風流猶在小茆堂蒲萄錦覆桐絲
古鸚鵡螺斟玉漉香千點荷聲先報雨一林竹影剩
分涼秋來便有欣然處新種蓴絲已滿塘

兩夜南堂獨坐

老夫眼暗牙齒疎七十未滿六十餘故人欲盡誰與
娛獨坐默誦小年書北風日夜吹雨急空村泥深屋
茆溼鳳皇覽德乃下集可憐飛螢常熠燿

夜不能寐復呼燈起坐戲作

吳中秋半暑未退今歲雨多如許涼藥鼎煖煖伴孤

飯三更袖手聽啼螢

喜晴

久雨羣蛙日夜號樂哉霽色滿江郊草書已悟屋漏
壁詩句免悲風卷茆喚婦晴鳩鳴廢圃歸林棲鷓補
危巢泥乾我亦思來客未暇移書廣絕交

枕上

守書眼欲闌投枕乃瞭然兒曹戒曳履相語翁正眠
豈知擁敗褐炯如寒魚鱗少時笑老人其事今好還
蕭蕭雙白鬢忽忽七十年豈惟老態出已覺衰病纏
白晝尚便靜況此清夜闌妙處殆難名睡與不睡間

新作南門 弊廬本西鄉設門紹熙壬子歲始葺關荆棘移
門南鄉

荆棘移門未費錢好山無數碧巉然病夫憤憤真堪
笑及衣狐裘三十年

寄成漢卿將軍

燕領將軍萬里遊谿山好處即遲留頗聞南岳度殘
夏寧憶北平防盛秋君已飛騰丹換骨我方衰病雪
蒙頭禪龜也有新勛業百萬魔軍一戰收

病臥

病臥東齋怕攬衣年來真與世相違橫林蠹葉秋先
覺別浦蘼雲暝不歸歲月惟須付樽酒江山竟是屬
漁磯鄰翁一夕成今古愈信人生七十稀 村東吳翁病

一夕而卒

晚晴

今年秋多陰殊未決豐歉時時雲一片復作雨數點
晚來晴頗牢天宇碧如染微風過林梢斜日在山崦
農家築場罷竭作事收歛貪睡吾可慚齋扉晝常掩

秋雨初晴有感

炎曦赫赫尚餘威冷雨蕭蕭故解圍號野百蟲如自
訴辭柯萬葉竟安歸芼菜菘菜珍無價上釣魴魚健
欲飛散吏何功露一飽高眠仍聽擣秋衣

獨飲

怪怪奇奇不自懲晚途猶復氣橫膺航船那待清歌
勸酒到愁邊量自增

小築

小築湖邊避俗囂幾年于此寓簞瓢雖非隱士子午
谷軍嬸詩人丁卯橋羅雀門庭無俗駕緣雲磴路有
歸樵詩情酒興常相屬堪笑傍人說寂寥

示兒

文能換骨餘無法學但窮源自不疑齒豁頭童方悟
此乃翁見事可憐遲

新晴

積雨已凄冷新晴還少和稼收平野闌木落遠山多
土潤朝畦菜機鳴夜擲棧時清年歲好吾敢數蹉跎

晨起坐南堂書觸目

林塘天與占深幽一把茆輕萬戶侯漠漠斷雲開復
合纖纖微雨落還收奇峯角立千螺曉遠水平鋪正
練秋詩料滿前吾老矣筆端無力固宜休

壬子八月癸卯大風雨拔木飄瓦通夕不能寐

我昔浮江坐貪快六十幅蒲船尾挂惡風吹到馬當
祠出沒蜿蜒舞澎湃舟人失色急倒檣共上蘆灣望
祠拜風雲晝晦性命憂更復何心問薪菜顛危僅免
葬魚腹至今常抱垂堂戒豈知風雨有茲夕屋破窗
鳴紛百怪直疑屋外即長江九轉得生那可再正襟

默坐徐自思忠信固可當喪敗鬼神雖惡技有窮卷

地破山真一噫明朝倚杖看晴雲茲夕驚心復何在

秋雨不止排悶

放翁愁坐茆齋裏泥潦連村不得行夜夜溼星占兩
候時時老木送秋聲小詩旋錄兼行草薄酒新釀任
濁清身世正如萍在水略無根柢也能生

用短

用短定非癡愛閑真復奇飯香貪始覺睡味老偏知
畦地閑栽藥留僧靜對棋餘年猶有幾捨此欲何之

覽鏡有感

齒如敗屐鬢成絲七十之年敢自期閱世久應書鬼錄強顏那復乞山資緋衫蔭子踰初望下澤還鄉負聖時回首墮溝元有命不須深計巧丸兒

哭徑山策老

岌岌龍門萬衲傾翩翩隻履又西行塵侵白拂繩床冷露滴青松卯塔成遙想再來非四入尚應相見話

三生放翁大欠修行力未免人間愴別情

松風東嶺諸松多余丙戌歲手種距今壬子二十有七年矣

半嶺松風破睡時起看山月倚筇杖縱橫滿地髯龍影盡是當年手自移

醉歌

佛如優曇時一出老媿何為憎見佛山從古在天地

間愚公可笑欲移山火其書盧其居佛亦何曾可掃除子有孫孫有子山竟嗟城汝何喜床頭有酒敵霜

風詩成老氣尚如虹八萬四千顛倒想與君同付醉眠中

秋夜讀書有感

鬢毛焦秃齒牙疎老病燈前未廢書卷裏光陰能屬我人間聲利久忘渠窮山藏拙猶嫌淺糲飯支贏不願餘雨露安能澤枯朽故人枉是費吹嘘時所聞如此

廬州亂

高寺坡前火照天南定樓下血成川從事橫屍太守

死處處巷陌森戈鋌此州雄跨西南邊平安烽火夜夜傳豈知癰疽潰在內漫倚築城如鐵堅從來守邊

要人望縱有奸謀氣先喪即今死者端為誰姓名至死無人知

東鄰築舍與兒輩訪之為小留

甲第潭潭莫羨渠窮人從昔愛吾廬茆茨新潔嗟何

欠鄰里追隨故不疎瓊醬芬香盤早免白齏珍醖膾寒魚年豐日有攜尊與家乘從今不一書黃魯直有日記謂之家乘

夜坐

瘦骨倚蒲團燈苒影自看心清便獨夜酒盡怯新寒病虎滅精采飢鴻摧羽翰晚途堪笑閱猶擬乞祠官

西鄰亦新葺所居復與兒曹過之

竹屋茆檐煙火微長歌相應負禾歸窮居幸可支朝夕世事何曾有是非新茁畦蔬經宿雨半開籬槿弄斜暉老翁酪與吾年等眷眷遮留莫苦違

有術士過門謂余壽及九十

形骸鶴瘦復松枯況是新霜滿鬢鬢醉似在家狂道士愚于識字老耕夫敢言萬里封侯事但問縱文入口無許我年如伏生比逢時猶解誦唐虞

晚眺

秋晚閑愁抵酒濃試尋高處倚枯筇雲歸時帶雨數

點木落又添山一峯鳴雁沙邊驚客艣行僧煙際認樓鐘箇中詩思來無盡十手傳抄畏不供

秋日焚香讀書戲作

世事無端自糾紛放翁隱几對爐熏好官何恨輸玄

保奇字猶須屬子雲婆律一銖能敵國水沉盈握有兼斤閉門莫怪常終日不是高人不遣聞

九月一日夜讀詩稿有感走筆作歌

我昔學詩未有得殘餘未免從人乞力屨氣餒心自知妄取虛名有慚色四十從戎駐南鄭酣宴軍中夜連日打毬築場一千步閱馬列廐三萬疋華燈縱博

聲滿樓寶釵豔舞光照席琵琶弦急冰雹亂羯鼓手勻風雨疾詩家三昧忽見前屈賈在眼元歷歷天機

雲錦用在我剪裁妙處非刀尺世間才傑固不乏秋毫未合天地隔放翁老死何足論廣陵散絕還堪惜

上書乞再任冲佑

虬枝六尺藤方屋九寸帽人間無處著山水歸寄傲

耳中聞淵明自我髮未燥高標不可揖七十忽已到明窗置經龕與室養丹竈雖云迫遲莫要足平昔好

悠然萬念空快若河卷掃寄聲幔亭雲行拜散人號秋晚歲登戲作

水落沙痕出天高野氣嚴麩香油乍壓齋美韭新醃
裘褐風霜逼衡茆醉夢兼菊花香滿把聊得儼陶潛

又

漫漫蕎鋪白纍纍橘弄黃未論癡腹飽已覺醉魂香
曳杖行歌裏拋書倦枕傍軒車雖已矣終媿食官倉
時方謀祠祿

舟中望禹祠蘭亭諸山

艣枝謳輒出煙津醉倚船蓬岸幅巾禹穴探書慚舊
學塗山執玉記前身雲低野澤號新雁露溼芳洲老
白蘋逸少亡來欲千載眼中髣髴見清真

夜觀嚴光祠碑有感

我昔過釣臺峭石插江淥登堂拜嚴子挹水薦秋菊
君看此眉宇何地著榮辱維陽逢故人醉脚加其腹
書生常事爾乃復駭世俗正令爲少留要非昔文叔
平生陋范曄瑣瑣何足錄安得太史公妙語寫高躅
閑趣

濯罷銅駝陌上塵此生長作水雲人更貧家業猶供
酒未死年光盡屬身閉戶棋聲聞隔牖卷簾山色對

麟岫貴公漫說林間事東路何人岸角巾
壬子九日登山小酌

老懷多感驚佳節病骨宜寒喜薄霜玉膾齋中橙尚
綠彩貓鏹上菊初黃幾年虛負登高興何許重尋落
帽狂淺酌易醒歸薄莫又成支枕獨焚香

舍北望水鄉風物戲作絕句
西風沙際矯輕鷗落日橋邊繫釣舟乞與畫工團扇
本青林紅樹一川秋

新黏竹隔作煨燭

骨相元作臞儒酸况復疾豎乘衰殘鶻姑聲急兩方
作烏舅葉丹天已寒封姨青女交作尼竹君楮生却
憐客小兒但喜夜爐紅老夫更愛晨窗白蝸牛負廬
亦自容是豈不足支窮冬已勝展鉢三椽下莫羨苴
菲萬戶封

禹跡寺南有沈氏小園四十年前嘗題小閣壁
間偶復一到而園已易主刻小閣于石讀之悵

然

楓葉初丹樹葉黃河陽愁鬢怯新霜林亭感舊空回
首泉路憑誰說斷腸壞壁醉題塵漠漠斷雲幽夢事
茫茫年來妄念消除盡回向禪龕一炷香

贈鏡中隱者

小築林間避世紛不妨楚叟是知聞來遊喜有樵迎
我歸臥豈無雲贈君得鹿夢回初了了吠藜聲惡尚
信信從今雪夜頻相過紙帳蒲團要策勳

月夜作

江風吹微雲長空散魚鱗秋露洗明月青山湧冰輪
我病適良已欣然岸綸巾索酒惱諸兒哦詩驚四鄰
頗覺胸次空未數白髮新庭菊臥殘枝奇香猶絕塵
園梅雖未花瘦影已可人方池湛淪淪醜石立麟岫
幸無千金費亦足終吾身樂哉何所恨擊壤從堯民

記夢

我夢結束遊何邦小憩埜館臨幽窗千峯廬山錦繡
谷一水蜀道玻璃江春耕叱犢翁眉厖曉汲負盞女
髻雙忽然夢斷已難唱擁衾坐待鄰鐘撞

感舊

當年書劍揖三公談舌如雲氣吐虹十丈戰塵孤壯
志一簪華髮醉秋風夢回松漠榆關外身老桑村麥
塹中奇士久埋巴硤骨燈前慷慨與誰同 獨孤景略死
于忠州十年矣

小園

窄窄柴門短短籬山家隨分有園池客因問字來攜
酒僧趁分題就賦詩晨露每看花蕪圻夕陽頻見樹
陰移 此二事非閑寂不知也 拂衣司諫猶忙在此趣淵
明却少知

初冬

已罷彈冠欲挂冠一菴天遣養衰殘雨荒園菊枝枝

瘦霜染江楓葉葉丹羹釜帶鱗烹白小蓬門和蔓繫黃團夕陽更動閑遊興十月吳中未苦寒

閑中樂事

轉老轉迂疎胸中一物無放言誇酒聖著論笑錢愚掃地收松粉全粟買鶴雛登臨未應倦天給短筇扶又

得喪略相當幽居氣味長五窮雖偃蹇二豎已奔忙出甌桃花輕傾瓢竹葉香語君真富貴不是傲羲皇

小舟

小舟無定處隨意泊江村雲氣分山疊沙汀蹙浪痕匡途危虎尾閑味笑熊躡高詠淵明句吾將起九原

九月二十三夜小兒方讀書而油盡口占此詩

示之

徹骨貧來累始輕孤村月上正三更汝緣油盡眠差早我亦尊空醉不成南陌金羈良自苦北邙麟冢半無名書生事業期千載得喪從來未易評

今年立冬後菊方盛開小飲

胡床移就菊花畦飲具酸寒手自攜野實似丹仍似漆村醪如蜜復如齋傳芳那解烹羊脚破戒猶慚擘蟹臍一醉又驅黃犢出冬晴正要飽啣犁

行飯莫歸

宿疾去如掃出門芒屨輕菊叢寒蝶鬧楓葉夕陽明結陣看鴉集銜衣喜犬迎踟躇搔白首詩句入經營

晝眠

困睫膏騰老孝先羸氈布被早霜天珥貂碧落應無分且向人間作睡仙

睡覺聞兒子讀書

夢回聞汝讀書聲如聽蕭韶奏九成且要沉酣向文史未須辛苦慕功名人人本性初何欠字字微言要力行老病自憐難預此夜窗常負短燈檠

余得木杖于秦望山中今三十年矣隴蜀萬里未嘗相捨戲賦長句贈之

提攜到處覺身輕楚澤秦關不計程只道維摩無待者誰知上座是同行青鞵白拂真相稱湘竹谿藤誤得名珍重從今常倚壁任蒼吾欲過浮生

步至近村

藥物扶持疾漸平布裘絮帽出柴荆荒堤經雨多牛跡村舍無人有確聲數蝶弄香寒菊晚萬鴉回陣夕

楓明老翁隨意閑成句不似劉侯要取名

五鼓不得眠起酌一盃復就枕

栖冷雞聲咽窗深燭焰明流年容易過華髮等閑生濁挹連醅酒香搓帶葉橙殘骸付螻蟻汗簡更須名

醉倒歌

曩時對酒不敢飲側睨旁觀皆貝錦狂言欲發畏客傳一笑未成憂禍稔如今醉倒官道邊插花不怕顛

狂甚行人喚起更嵬昂牧豎扶歸猶踉蹌始知人生元自樂誤計作官常懷懷秋毫得喪何足論萬古興

亡一酣枕

冬夜

新醅引睡睡味濃有如猩脣薦駝峯屏深氈煖衾稠重鼻端雷起驚兒童床頭蘭缸綴玉蟲雙瓶湯熱爐

正紅夢回起坐夜未中憑几困睫猶膏青霜風凋盡玉井桐月落翠霧淒房櫳一盃嬰粟蠻奴供莊周蝴蝶兩俱空

默坐

巧說安能敵拙修焚香默坐一窗幽煌煌炎火常下照浩浩黃河方逆流氣住神仙端可學心虛造物本同遊絕知此事不相負荆棘翦除梨栗秋

日莫

浙浙風吹葉淒淒雨作泥鶻寒猶遶樹雞晚自歸栖老病心知有榮枯理本齊端居嫌太懶拾瓦傍蔬畦

遣興

勛業如今莫繫懷開單日日學僧齋譏深只有天堪問憂極渾無地可埋看鏡已成雙白鬢登山猶費幾

青鞵晚來詩興誰能那雀噪空困葉擁堦
泛舟

去去泛輕舸飄然興自豪葉凋山寺出溪瘦石橋高
草徑牛羊下煙村鶴鶴號還家一盃酒未畏莫風饕
夜讀范至能攬轡錄言中原父老見使者多揮
涕感其事作絕句

公卿有黨排宗澤帷幄無人用岳飛遺老不應知此
恨亦逢漢節解沾衣

初冬掃東山之麓置數石于喬松巨竹間以眺
西山甚自適也

護霜天氣半晴陰小嶺蒼寒蘚徑深翠靄欲成孤鳳
舞青松先作老龍吟漁歌浦口生高興騎吹邊頭負
壯心兒報東村蚤梅發杖藜與汝共幽尋
南堂春記乃已三十年偶讀之悵然有感

一住三山三十載交親漸覺眼前稀長松鬱鬱偃高
蓋新竹森森添舊圍沙徑雨餘留鳥迹柴門日落鎖
煙扉放翁正倚蒲團穩遼海從渠萬事非

劍南詩稿卷第二十五終

劍南詩稿目錄
卷第二十六

醉臥松下短歌 霜艸 冬夜 村東 小園
書適二首 狂夫 白髮 檢舊詩偶見在
蜀日江濱池醉歸之篇悵然有感 十一月四
日風雨大作二首 冬日觀漁獵者 雨晴
病起 奉祠 假寐見海山異甚作小詩記之
松下縱筆四首 拜勅口號二首 閑居
十一月十八日蒙恩再領沖佑鄰里來賀謝以
長句 題老學菴壁 冬晴日得閑遊偶作
示元禮 書巢冬夜待日 醉後莊門望西南
諸山 著書 探梅 歲莫風雨二首 自夏
秋匱甚慨然有感 題四仙像四首 自責
自解 午睡起消搖園中因登山麓薄莫乃歸
羣兒 久疾灼艾小愈晚出門外 夙興弄
筆偶書 縱筆 冬晴閑步東村由故塘還舍
作二首 十二月八日步至西村 夜聞湖中
漁歌 忽得京書有感 晚步門外書觸目
親舊書來多問近況以詩答之 開書篋見韓
无咎書有感 夜大雪歌 寄宇文成州 示
子聿 雪 夜坐 春雨 夢與數客劇飲或
請賦詩予已大醉縱筆書一絕覺而錄之 世
事 二子 謝郭希呂送石洞酒 飲酒 無
題 雨雪兼旬有賦 北窗睡起 立春 曉
枕 落梅二首 閑居無客所與度日筆硯紙
墨而已戲作長句 壬子除夕 癸丑正月二
日二首 避世行 稽山農 牧牛兒 讀書
未終卷而睡有感 早春新晴 枕上聞禽聲
感舊 夜雨三首 初晴野步 明日復雨
排悶二首 小室 浮世 紅梅二首 湖上
晴甫一日復大風雨連日不止遺懷 癸丑上
元三夕皆大雨雪 寓數 幽興 緜梅三首

劍南詩稿卷第二十六

宋陸游務觀

醉臥松下短歌

披鹿裘枕白石醉臥松陰當月夕寒藤天矯學草書
天風蕭森入詩律忽然夢上百尺顛綠毛邇近巢雲
仙相攜大笑咸陽市俯仰塵世三千年

霜草

入冬已兩旬澤國霜始賈可憐青青草一夕生意盡
嗟予蒲柳姿去日若飛隼草衰有復榮我髮寧再鬢
微官雖置散束帶終自憫漸退用婦言千載付一哂

白樂天詩曰猶被妻兒教漸退莫求致仕且分司

冬夜

百錢買菅席錦茵亦何加疋布縫麤裘安用狐腋奢
昨者南山僧松肪寄一車可以照讀書堅坐待朝霞
顧影為發笑山童雙髻丫一掬琴高魚聊用薦夜茶

村東

村西行藥到村東沙路溪流曲折通莫問梅花開早
晚杖藜到處即春風

小園

新作小溪園牽藤迤縲門釣艇橫北渚樵路接東村
靜坐依林樹慵眠傍竹根還家日已夕棲雀鬧黃昏
書適

老翁垂七十其實似童兒山果啼呼覓鄉讎喜笑隨
羣嬉累瓦塔獨立照盆池更挾殘書讀渾如上學時

又

家食身無役耆年力未衰寓歡那待酒隨意或成詩
窮達元非我冤親竟是誰惟嗟見事晚枉却鬢邊絲
狂夫

狂夫與世本難諧醉傲王侯亦壯哉奕奕方收巖際
電酣酣已起枕間雷回天力在人終數入月星來敵

自摧千載鬼雄皆國士直令窮死未須哀

白髮

白髮今年一倍增閉門養此老無能牛羊被野霜天
晚禾稼連雲歲事登未午春炊餘脫粟乍寒包裹有
愈增自憐未廢詩書業父子蓬窗共一燈
檢舊詩偶見在蜀日江濱池醉歸之篇悵然有

感

江濱池頭爛醉歸青旗日晚插城扉正馳玉勒衝紅
雨又挾金九伺翠衣老境漸侵歡意盡舊遊欲說故
人稀憑高三數君知否倦鷓無風亦退飛

十一月四日風雨大作

風卷江湖雨闌村四山聲作海濤翻溪柴火輒蠶氈
暖我與狸奴不出門

又

僵臥孤村不自哀尚思為國戍輪臺夜闌臥聽風吹
雨鐵馬冰河入夢來

冬日觀漁獵者

人閑漁獵各相從南陌東阡處處逢繡羽觸機餘耿
介錦鱗出網尚噉喙傍觀扶杖常移日就買還家足
御冬更待風霜都過盡却從春野看春農

雨晴

山川炳煥似闢國風雨退收如解嚴老子真成無一
事抱孫負日坐茆簷
病起

少年射虎南山下惡馬強弓看似無老病即今那可
說出門十步要人扶

奉祠

明窗松石供琴薦小鼎山泉煮藥苗乞得奉祠還自
愧猶將名姓到中朝
假寐見海山異甚作小詩記之

海如黛色深浪作雪點濺數峯黃金山巉絕出水面
此非想與因了了目中見何時真往遊浮世付掣電

松下縱筆

自掃松陰寄醉眠龍吟虎嘯滿霜天却思初到人間
世似是唐堯丙子年

又

老不能閑莫笑予五千言豈世間書青松折取當塵
尾爲子試談天地初

又

種玉餐芝術不傳金丹下手更茫然陶公妙訣吾曾
受但聽松風自得仙

又

髯龍天矯欲飛去百尺蒼藤羅絡之應笑此翁才不
進故將老氣起吾詩

拜勅口號

黃紙如鴉字今朝下九天身居鏡湖曲銜帶武夷仙
日絕絲毫事年請百萬錢祠俸錢粟常歲計千緡有疇
惟優老政千古照青編

又

扶病中庭拜君恩抵海深頓增新祿格暫拂舊朝簪
心欲先營酒兒言且贖琴人生奉祠責喜色動山林
僕以官視大卿監修給皆增於昔尤爲忝竊也

閑居

土鑪茶七椀瓦甌粟三升兀兀能言石騰騰有髮僧
淨巾裁白穩拄杖采紅藤尚喜冬來健逢山得遍登
十一月十八日蒙恩再領冲佑鄰里來賀謝以

長句

綠章封事徹虛皇黃紙除書降野堂海上春常探先
到壺中日已不勝長冰銜再署仙班貴糲料重支玉
粒香便掛朝冠亦良易金銅茶籠本相忘 往時嘗使閩

者例餽茶三年今不講已久余蓋未嘗嘗及也

題老學菴壁

此生生計愈蕭然架竹苦節只數椽萬卷古今消永
日一窗昏曉送流年太平民樂無愁數衰老形枯少

睡眠喚得南村跛童子煎茶掃地亦隨緣
冬晴日得閑遊偶作

不用清歌素與蠻閑愁已似解連環閩年春近梅差
早澤國風和雪尚慳詩思長橋蹇驢上棋聲流水古
松間戲天公事君知否正乞柴荆到死閑
示元禮

燕居侍立出扶行見汝成童我眼明但使鄉閭稱善
士布衣未必媿公卿

書巢冬夜待旦

掃葉擁墻寒犬行編茆護柵老雞鳴風霜漸逼歲時
晚形影相依燈火明史策千年媿豪傑關河萬里愴
功名固應死抱無窮恨老病何由更請纓

醉後莊門望西南諸山

身是咸陽舊酒徒龍鍾猶復泥村酤百年略似夢長
短一醉且隨家有無登覽未應慚脚力功名正爾歎
頭顱夕陽又凭闌千立誰畫三山岸幘圖

著書

平生著書汗馬牛一事不施今白頭河洛未清非我
責山林高臥復何求愚公可笑金堆屋老子唯須糟
築丘華表無人識歸鶴煙波底處有馴鷗

探梅

我遊東村衝暮煙斷橋流水鳴磯磯欲尋梅花作一
笑數枝忽到拄杖邊高標元合著山澤絕豔豈復施
丹鉛定知曾授餐玉法不爾恐是凌波仙錦江賦詩
忽萬里蓬山把酒今三年相逢風味宛如昨人生何
者非前緣頗思取醉極清賞杖頭幸有百許錢但判
插破烏紗帽莫記吹落黃金船

歲暮風雨

驪風起海濤浩蕩東北來鐵騎掠陣過秋濤觸山回
老夫北窗下坐守寒爐灰處世困憂患萬事學低摧
便欲滅燈睡門閉不敢開並海固多風汝辱良可哀
念昔少年日從戎何壯哉獨騎洮河馬涉渭夜銜枚

又

一冬少雨雲人意常昏昏夜半有奇事兩聲卷江村
陸子真老農破屋依頽垣扶持衰病身收召譴逐魂
手烹牆陰齋美若乳下豚聽雨取一醉不厭村酒渾
眼背燈生暈衣弊蟲可捫父子幸相守萬事何足論
自夏秋置甚慨然有感

萬卷縱橫眼欲枯老猶閉戶誦唐虞故人誰復訪生
死鄰父幸能通有無雲子翻匙新稻飯天吳坼繡舊
衣襦時乎得掩松根骨也勝王孫泣路隅
題四仙像

反虜鯨鯢世共維漢公勳業過伊周市門灑淚塵埃
裏誰與朝廷植委裘梅福

又

世上年光東逝波咸陽銅狄幾摩挲神仙不死成何
事只向秋風感慨多剡子訓

又

曾看四嶽薦虞鯨閱歲三千一瞬間歸臥青山孤絕
處白驢常伴白雲閑張果

又

蓮花峯下張超谷此老何曾有死生聞道風清月明
夜至今鼻息亂松聲陳搏

自責

窮途敢恃舌猶存小築城西十里村未掛衣冠慚士
節免輸薪粲荷君恩文章跌宕忘繩墨學問荒唐失
本原仕宦一生成底事子孫世世記吾言

自解

四十頭顱已可知殘年至此復何為著書不直一盃
水看鏡空添千縷絲達宦獨驕儒作戲後生速化吏
為師有冠當掛無餘說但恨衰翁見事遲

午睡起消搖園中因登山麓薄莫乃歸

老病攻百骸微纏困束縛頽然一熟睡如獲萬金藥
窗明竹影亂林暖鳥聲樂夾深香欲上火活湯正作

毫甌羞茗蒜銅洗供盥濯整巾出庭戶曳杖歷巖壑
遙岑見木杪細水齧籬脚踟躕遂忘歸清嘯送日落

羣兒

野行遇羣兒呼笑運甓忙共為小浮圖鱗峒當道旁
蜺殼以注燈碗足以焚香須臾一闕散無益亦何傷
古來富貴人峨冠登廟堂謀謀一悖謬懸宇失太康
坐令安業民血喋而屍僵傳呼一朝寵遺患日月長
均為兒戲爾禍機孰深藏我作羣兒詩持用矜世盲

久疾灼艾小愈晚出門外

老境侵凌病滿軀火攻下策得枝梧沽來村酒初判
醉叱去山童不遣扶霜重木凋鴉可數溪清魚見鸛
相呼與闌却掩齋扉臥閑看青燈照藥爐

夙興弄筆偶書

憂患熏心少睡眠雞號窗白一欣然道旁歲晚貂裘
弊燈下書成鐵硯穿杜老慣聽兒索飯鄭公何啻客
無託春風不解嫌貧病尚擬花前醉放顛

縱筆

山合水將窮真宜著放翁醉嫌天地迤老覺歲時公
偃蹇松逃世翻仙鶴駕風舊交零落盡一笑與誰同
冬晴閑步東村由故塘還舍作

故園三徑可婆娑遇與遵塗負杖歌霜重天寒山色
淡草枯野曠獵徒多解刀尚可謀黃犢揮帖無由致
白鶴自計長閑何所恨一生心事在煙波

又

紅藤拄杖獨相羊路遶東村小嶺傍水落枯萍黏蟹
椀鄉人植竹以取蟹謂之曰椀雲開寒日上魚梁洛陽二
頃言良是光範三書計本狂歷盡危機識天意要令
閑健返耕桑

十二月八日步至西村

臘月風和意已春時因散策過吾鄰草煙漠漠柴門
裏牛迹重重野水濱多病所須唯藥物差科未動是
閑人今朝佛粥更相餽更覺江村節物新

夜聞湖中漁歌

夢回一燈翳復明臥聞湖上漁歌聲嗚嗚乍低忽更
起孀婦欲斷還微縈初隨缺月墮煙浦已和殘角吹
江城悲傷似擊漸離筑忠憤如撫桓伊箏放臣萬里
憂國淚戎客白首懷鄉情峽猿失侶方獨宿沙雁垂
翅猶遠征巴巫竹枝短亭晚瀟湘欸乃孤舟橫世間
此恨故相似使我百感何由平

忽得京書有感

白髮蒼顏七十翁朽株枯木略相同如山儲藥難醫
拙齊斗堆金不換窮昨夢已拋空却外殘年全付醉
眠中故人苦未知心事一紙空煩寄斷鴻

晚步門外書觸目

數椽茆屋鏡湖傍喬木蒼煙一徑長酒賤過門多醉
叟天寒樓故有餘糧歌呼草市知人樂簫鼓叢祠喜
歲穰只道老來詩思盡未妨擊壤頌時康

親舊書來多問近況以詩答之

耐辱推頹百不能居然老病住養僧流年速似一彈
指更事多於三折肱庭樹影中聞夜汲隣機聲裏對
寒燈沈詩任筆俱忘盡酒戶新來却少增

開書篋見韓元咎書有感

老覺人間萬事非幽棲幸已脫塵囂殘年得飽不啻
足舊友半空誰與歸開眼不妨成一夢翦翎何至羨
羣飛龍圖老子今安在把卷燈前淚滿衣

夜大雪歌

朔風吹雪飛萬里三更藪藪鳴窗紙初疑天女下散
花復恐麻姑行擲米異哉凍硯已生冰信矣重衾如
發水山中臥澗松竹折庭前蔽地鳥焉死昨日之暖
殊昏昏桃李欲坼春滿園陰陽錯繆世或有物窮則
變古所言雖云明年幸一麥凍餒溝壑知誰存嗚呼
今夕之雪未足論所憂明日巉巖高塞門

寄宇文成州

成州太守比何如夢裏依然把臂初復起卿當用卿

法長閑吾實愛吾盧五湖風雨孤舟夜萬里關山一
紙書正使兩翁長隔關子孫它日莫相疎

示子聿

我鑽故紙似癡蠅汝復孳孳不少懲父子更兼師友
分夜深常共短檠燈

雪

平郊漫漫覺天低况復寒雲結慘悽老子方驚飛蝶
蝶羣兒已說聚後貌中宵驚墮頻摧木徹日難瘖重
壓棲只待新晴梅塢去青鞵未怯踏春泥

夜坐

耿耿殘燈夜未央負牆閑對篆盤香風號東北河冰
合月落西南竹影長孤鶻欲棲頻繞樹寒龜無息穩
捲床頽然坐睡那知曉推戶朝曦已滿廊

春雨

午夜聽春雨發生端及期世憂殊未艾天意固難知
士節承平日人材南渡時後生聞見狹撫枕數吾衰
夢與數客劇飲或請賦詩予已大醉縱筆書一
絕覺而錄之

高談雄辯憑陵酒豪竹哀絲蹴踘春占斷名園排日
醉不教虛作太平人

世事

世事說來猶可厭宦情夢裏亦應無山林已結三生
願朝市誰非九折途醉舞盃盤無藉在狂吟風月不
枝梧何人今擅丹青藝為畫蘇門長廬圖

二子

兩楹夢後少真儒毀譽徒勞豈識渠孟子無功如管
仲楊雄有賦似相如敬王事業知誰繼準易工夫故
不疎孤學背時空絕數白頭窮巷抱遺書

謝郭希呂送石洞酒

從事今朝真到齊春和盎盎却秋悽色如夷甫玉塵
尾價敵茂陵金囊颯瑞露頗疑名太過稟泉猶恨韻
差低山園雪後梅花動一榼常須手自攜 瑞露桂孟酒

得名甚盛棄泉坡下酒自昔名冠關中而失之太勁

飲酒

六十四民安在哉千八百國俱煙埃世人一漚寄巨
海對酒不醉吁可哀平生清狂今白首芒屨布裘稱
野叟晨興窗几網蛛絲石洞書來餉名酒看月直到
無月時尋花直到花片飛醉中往往花壓帽鄰里聚
看湖邊歸先生兩耳不須洗利名不到先生耳狂歌
起舞君勿嘲青山白雲終醉死

無題

金鞭朱彈憶春遊萬里橋東罨畫樓夢情曉風吹不
去書憑春雁寄無由鏡中顏鬢今如此懷下朋儔好
在不篋有吳牋三萬箇擬將細字寫新愁

雨雪兼旬有賦

冬温思雨雪稍久已復厭祁寒人怨咨千載語猶驗
人心自無常天命本不僭積陰勢已極浮雲會當斂
山花紅酣酣谿水綠盪盪短蓬倘可具與子東入剡
北窗睡起

立春

上大事已明空却前樵路細盤雲外嶺釣筒倒插水
中天此時消息君知否千載業由未足賢

曉枕

紹熙又見四番春春日春盤節物新獨酌三盃愁對
影例添一歲老催人菊芽冒土如爭出柳色搖村已
漸勻身是蘭亭山下客未容逸少擅清真

落梅

殘漏寥寥急明星磊磊高一從安枕臥無復攬衣勞
熨斗生晨火熏籠覆溫袍一盃山藥酒紅日滿亭皋
雪虐風饕愈凜然花中氣節最高堅過時自合飄零
去恥向東君更乞憐

又

醉折殘梅一兩枝不妨桃李自逢時向來冰雪凝嚴

地力韓春同竟是誰

閑居無客所與度日筆硯紙墨而已戲作長句

水複山重客到稀文房四士獨相依黃金那得與齊
價白首自應同告歸韞玉面凹觀墨聚浣花理膩覺
豪飛韞玉澗硯名浣花蜀牋名與蘭却欲燒香睡閑聽松
聲畫掩扉

壬子除夕

前村後村燎火明東家西家爆竹聲老逢新正幸強
健却視徂歲何崢嶸兒時祝身願事主談笑可使中
原清豈知一出踐憂患斂縮豈復希功名雪霜滿鬢
覺死近節物到眼空數驚蠶官社公正暖熱春盤難
鼓爭施行蓬門車馬所不至山僧野叟相逢迎嗚呼
吾曹見事晚古俗實在蚩蚩氓茆簷一笑語兒子明
當滿舉屠蘇觥

癸丑正月二日

朱顏不老畫中人綠酒追歡夢裏身堪笑三山衰病
叟閉門寂寂過新春

又

菊叢抽綠滿枯萸繞舍梅花已遍開須信今春春事
早江鄉開歲有奔雷

避世行

君渴未嘗飲鳩羽君飢未嘗食烏喙惟其知之審取
捨不待議有眼看青天對客實少味有口啖松柏火
食太多事作官蓄妻孥陷安所避刀鋸與鼎鑊孰
匪君自致欲求人迹不到處忘形麋鹿與俱逝杳杳
白雲青嶂間千歲巢居常避世

稽山農

余作避世行以爲不可常也復作此篇
華胥氏之國可以卜吾居無懷氏之民可以爲吾友
眼如巖電不看人腹似鷗夷惟貯酒周公禮樂寂不
傳司馬兵法亡亦久賴有神農之學存至今扶犁近
可師野叟粗繒大布以禦冬黃梁黑黍身自春園畦
翦韭勝肉美社瓮撥醅如粥醴安得天下常年豐老

死不見傳邊烽利名畫斷莫挂口子孫世作稽山農
牧牛兒

南村牧牛兒赤脚踏牛立衣穿江風冷笠敗山雨急
長坡望若遠隘巷忽相及兒歸牛入欄煙火茆簷溼

讀書未終卷而睡有感

莫年緣一癩百事俱棄置今遂癩到書把卷輒坐睡

其餘癩則已感此獨歎欬念昔少壯時日夜痛磨礪
誓言死為期身在敢暴棄寧知未死前殆欲負此志

顏回稱好學楊雄乃識字勉哉慕前修自畫聖所諱

早春新晴

柳弄春柔拂小潭山橫霽色卷浮嵐飛揚旛脚擲東
北零落梅花餘二三村店疎燈新賣酒神祠疊鼓正

祈蠶幽人睡起東園去芹茁莖芽又滿籃

枕上聞禽聲

屏掩輕寒酒半消斷香殘夢兩無慘開年春意遽如
許破曉一聲娑餅焦

感舊

憶從南鄭入成都氣俗豪華海內無故苑燕開車載
酒名姬舞罷罷斗量珠浣花江路青蠅舫桂柳毬場白

雲駒回首壯遊真昨夢一竿風月老南湖

夜雨

澤國寒多雨晦人夜少眠不緣醒作病只合醉終年
庭艸已爭茁園梅空自憐重雲不難扶無劍倚青天

又

寒雨連三夕幽居只數椽家貧輕過節身老怯增年
日月悲歌裏關山淚眼邊梅花自開落歎息為誰妍

又

人日春猶淺雞晨夜向闌殘缸燈暈小單枕雨聲寒
難補皇天漏空思后土乾山家尊酒薄懷抱若為寬

初晴野步

入市路三叉綠山港半斜疎籬帶殘雪幽竇瀉瀉沙
好為晴相語芳蘭啜欲芽病餘無脚力隨處聽人家

明日復雨排悶

湖上孤村冷欲冰更堪衰與病相乘夢回點滴簷間
雨心折青熒帳外燈雖有數椽常似客僅存一肉未
成僧披衣偶取南華讀打破愁城喜不勝

又

此老在家如出家蒲團趺坐讀南華溼雲不散雁呼
伴幽室無聲燈墜花心法先當破窠窟世緣最忌養
萌芽行年七十方知悔萬事無涯生有涯

小室

小室僅容膝焚香觀昨非出門寧有礙知我正須希
霜橘爭棋樂仙壺賣藥歸平生釣竿手不解叩黃扉

浮世

浮世如流水滔滔日夜東百年均夢寐萬古一虛空
青鳥來雲外銅駝臥棘中相逢惟痛飲令我憶無功

紅梅

芋蘿山下越谿女戲作長安時世妝白白朱朱雖小
異斷知不是百花香

又

雲裏溪頭已占春小園又試晚妝新放翁老去風情
在惱得梅花醉似人

湖上

今朝雨初晴湖上好天色落梅紛可藉桑柳亦已拆
老夫病良已泣水散輕策冉冉春物新忽忽衰髮白
四方豈不樂懶情畏遠客惟當勤買酒東城復南陌

晴甫一日復大風雨連日不止遣懷

書劍當年隘九州白頭歸臥一窗幽染成草色春猶
淺老盡梅花雨未休得句已無前輩賞開編時與古
人遊山房小甕今朝熟不恨尊前自獻酬

癸丑上元三夕皆大雨雪

雨雪連三日孤城冷欲冰泥深唯響屐風惡更吹燈
空窗追散客何關在定僧一盃嘗鼓煎寒影對唳憎
寓歎

人生各自有窮通世事寧論拙與工
裹馬革心空許國不龜手藥却成功
早朝玉勒千門雪夜坐蓬窗萬壑風
借得奇書且勤讀小兒能讀地爐紅
子坦以新昌木炭二百斤來

幽興

雨後梅花無復在
老來酒盡頭成疎
身如海燕不逢社
家似瓜牛僅有廬
短髮垂肩頰中散
深居謝客病相如
從今何以消長日
剩種芭蕉學草書

細梅

疎影橫斜事已非
小園日莫鎖芳菲
素綃應怯東風思
故著重重淺色衣

又

香似海沉黃似酒
不禁風雪最遲開
放翁欲作梅花譜
蠟屐樽筇日日来

又

紅梅眼看風吹盡
更有細梅亦已無
天與色香天自愛
不教一點上蜂鬚

劍南詩稿卷第二十六終

劍南詩稿目錄
卷第二十七

僧廬 春日 春遊 懷昔 記夢 春陰
睡起行至門外有賦 早春四首 醉吟三首

贈劉政之秀才 蓬門 龍鍾 送佛照光
老赴徑山 春社有感 春社四首 村夜

山園遣興 次韻陳機宜見贈 野意 戒殺
余年四十六入峽忽復二十三年感懷賦長

句 山行 雨中排悶 杜敬叔寓僧舍開軒
松下以虛瀨名之來求詩 贈徑山鈺書記

五月一日作 春夏之交衰病相仍過芒種始
健戲作 自嗟 枕上述夢 雨中排悶 小

軒夏夜涼甚偶得長句呈杜叔高秀才 憶昔
夏日晚興 老翁 困甚戲書 歲晚 戲

詠山陰風物 老健 六月晦日作 喜雨
門外納涼 贈蘇趙叟兄弟 癸丑七夕 共

語 書歎 秋曉倚闌 癸丑七月二十七夜
夢遊華嶽廟二首 僕頃在征西大幕登高望

關輔樂之每冀王師拓定得卜居焉暇日記此
意以示子孫 讀陶詩 秋夜感舊十二韻

幽居 醉題 雨涼小飲戲作 題齋壁 書
憤 秋興 兩夜排悶二首 秋日出遊戲作

二首 雨中夕食戲作三首 自警 寄方瞳胡
先生 雨夕焚香 秋雨初霽徙倚門外有作

雨中作 贈老雞二首 秋晚閑步隣曲以
予近嘗臥病皆欣然迎勞 雨夜 醉臥道傍

枕上聞急雨二首 得趙若川書因寄 夢
至洛中觀牡丹繁麗溢目覺而有賦 閑居對

食書媿二首 秋夜獨酌 風雲交作戲題
自嘲 書室 數日秋氣已深清坐無酒戲題

長句 五更起坐 谿上雜言 厭事 方池
癸丑重九登山亭追懷頃在興元常以是日

獵中梁山山下樂甚慨然賦詩予于是生六十有
九年矣

劍南詩稿卷第二十七

宋陸游務觀

僧廬

僧廬土木塗金碧四出徵求如羽檄富商豪吏多厚積宜其棄金如瓦礫貧民妻子半菽食一飢轉作溝中瘠賦歛鞭笞縣庭赤持以與僧亦不惜古者養民如養兒勸相農事憂其飢露臺百金止不為尚魏七月周公詩流俗紛紛豈知此熟視創殘謂當爾傑屋大像無時止安得疲民免飢死

春日

節節足足雀噪檐朱白白花窺簾坐旁設酒隨時飲床上堆書信手拈寓世無求猶役役杜門不病亦厭厭春濃日永有佳處睡味著人如蜜甜

春遊

鏡湖春遊甲吳越鶯花如海城南陌十里笙歌聲不絕不待清明寒食節青絲玉瓶挈新釀細柳穿魚初出浪花外金羈絡雪駒橋邊翠幙圍蠅舫怕雨愁陰人未知時時微雨却相宜養花天色君須記正在輕雲嫩鷲時

懷昔

昔遇高皇帝華纓接俊遊年光一彈指世事幾浮漚故國但青嶂羈臣今白頭平生笑李廣癡絕望封侯

記夢

夢不出心境曠然成遠遊花殘杜城醉木落華山秋戰血磨長劍塵痕洗故裘那知覺來處身臥五湖舟

春陰

老境三年病新春十日陰孤舟鏡湖客萬里玉關心出岫雲多態呼風鳥獨吟讀書惟恐盡傾酒却愁深

睡起行至門外有賦

窗黑停書課屏深養病眸雨聲工破睡酒力不禁愁

兀兀披衣起昏昏曳杖遊柴荆晚未閉隔水數歸牛

舊學樊遲稼新通汎勝書不成籌國論且復愛吾廬

具牛將犢行野雉挾雌鳴農事不可緩閑人亦勸耕

近陂牛渚白遠浦鴨頭青一櫂悠然去東風吹酒醒

西村一抹煙柳弱小桃妍要識春風處先生拄杖前

少日沉迷汗簡青如今毀譽兩冥冥書生弄筆如何信只合花前醉不醒

驅使難憑赤丁子傳呼底用蒼頭兒世間如夢身如寄春去花空欲泥誰

牽經引禮人誰聽是古非今世共憎何似對花傾綠酒自歌一曲醉騰騰

君居古荊州醉膽天字小尚不拜龐公况肯依劉表胸中九淵蛟龍蟠筆底六月冰雹寒有時大叫脫烏憤不怕酒盃如海寬放翁七十病欲死相逢尚能刮眼看李廣不生楚漢間封侯萬戶宜其難

莫笑蓬門雀可羅老農正要養天和穿林屨屨登嘯叩角鳴鳴甯戚歌睡笑到明三展轉針甘捧腹一摩挲床頭更聽糟床注造物私吾亦已多

龍鍾一老寄荒村鼎食山樓久已分平日氣吞雲夢澤莫年緣在武夷君搶榆敢羨垂天翼倚市從嚙刺繡文幸有筆床茶竈在孤舟更入剡谿雲

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

送佛照光老赴徑山

大覺住育王劫折拄杖強到底佛照住育王挑得鉢囊隨詔起從來宗門話只要句不死說同說異菴外人若是吾宗寧有此日日風雨今日晴萬里春光入帝城傳宣江上走中使開堂座下羅公御香鬪雲共布法音浩浩潮收聲報恩一句作麼道常遣山林見太平

春社有感

顛顛前朝白髮郎祠庭賦祿玷恩光寸心未與年俱老萬事惟憑酒暫忘穿仗兩曾觀揖遜扶犁獨幸返耕桑昔年湘落還堪嘆社飲推排冠一鄉三山百家之聚年莫余先者

春社

桑眼初開麥正青勃姑聲裏雨冥冥今朝有喜君知否到處人家醉不醒

又

社肉如林社酒濃鄉鄰羅拜祝年豐太平氣象吾能說盡在擊擊社鼓中

又

柴門西畔枕陂塘社雨新添一尺強臺省諸公方袞袞故應分喜到耕桑

又

太平處處是優場社日兒童喜欲狂且看參軍喚蒼鶻京都新禁舞齋郎

村夜

寂寂山村夜悠然醉倚門月昏天有暈風軟水無痕迹為遭讒遠身由不仕尊敢嗟嗟車馬絕同社自雞豚

山園遺興

輪通告糴走比隣恤患分災累故人安得此身無一事林中數筍過殘春

次韻陳機宜見贈

邂逅今年得若人儵然不染庾公塵思幽屈子歌山鬼語妙陳王賦洛神初接笑談忘老憊熟觀風度愛

清真花時飛盡頻行樂莫學衰翁睡過春
野意

隄長逾十里村小只三家山客馳樵擔溪翁鳴釣車花深迷蝶夢雨急散蜂衙衰疾新年減青鞵上若耶

戒殺

物生天地間同此一太虛林林各自植但坐形骸拘日夜相殘殺曾不置斯頰皮毛備裘褐膏血資甘腹雞鶩羊彘輩尚食稗與芻飛潛何預汝禍乃及禽魚豺虎之害人亦為飢所驅汝顧不自省何暇議彼歟又于人類中各私六尺軀方其忿怒時流血視若無我欲反其源默觀受氣初挺刃之所加慘若在我膚朝飯一罇豆莫飯一盃蔬捫腹茹簷下陶然歡有餘

余年四十六入峽忽復二十三年感懷賦長句當年吊古巴東峽雲灑扁舟見早梅宋玉宅邊新酒

美巫山廟下莫猿哀樵柯爛盡棋方劇客甑炊成夢未回已把癡頑敵憂患不勞團扇念寒灰劉夢得團扇歌曰當時初入君懷袖豈念寒爐有死灰

山行

七十衰翁短鬢斑藥瓢藤杖伴清閑平生惡路羊腸阪晚歲羸軀飯飯顛山一寸塔餘青靄外數聲鐘下翠微間往來處處皆奇絕莫道先生興盡還

雨中排悶

一春苦沈陰未省見桃李已逢暗寒食更值雨甲子重雲失南山寸步困泥滓籜龍已觸觸一飽差可喜

杜敬叔寓僧舍開軒松下以虛瀨名之來求詩君不見洛陽八節灘未至一舍聞驚湍生絳六幅誰

所畫入眼能令三伏寒又不見桐廬七里瀨濺雪跳珠舞澎湃羊裘老子去千年絕世孤風凜如在杜陵

之孫今勝流飄然不必事遠遊結茆古寺聽松吹坐擅洛水桐江秋放翁百念俱已矣獨有好奇心未死

約君少待秋月明抱琴來宿寫難聲
贈徑山錫書記

徑山老將無勅敵百萬魔軍俱掃迹座下何人策雋
功籌略縱橫鈺記室鈺公聲名滿吳會惟有放翁最
先識奕奕揮毫王粲詩翩翩插羽陳琳檄風雷東海
起伏龍繖藉園丘薦蒼壁徑山入門第一義萬口誦
言真稱職我謂鈺公豈止此徑山鉢袋渠能得一枝
白拂倘付之會見青天飛霹靂

五月一日作

處處稻分秧家家麥上場敢悲身老大獨幸歲豐穰
酪美朱櫻熟菰青角黍香脩然一竹几飽受北窗涼

春夏之交衰病相仍過芒種始健戲作

藥裏關心百不知可憐筆硯鎖蛛絲倒壺猶有莫春
酒開卷遂無初夏詩戶外逢人驚隔闌燈前顧影嘆
支離癡頑未伏常愁臥鼓缶長謠樂聖時

自嗟

青蔬半畝老生涯霜鬢蕭蕭只自嗟勦業蹉跎空許
國文詞淺俗不名家殘骸皆作麒麟棺舊友仍非處
士牙收得平生釣竿手長安西日更須遮

枕上迷夢五月十二日雞鳴時作

江湖送老一漁舟清夢猶成塞上遊生馬駒馳鐵蹶
腕古鏡歌奏錦衣構玉關雪急傳烽火青海雲開見
戍樓白首不候非所恨咿嚶床簣死堪羞

雨中排悶

潤入盆山綠葉稠倦攤書映小窗幽浮雲不卷時時
雨薄酒無功日日愁積潦漲來妨躡屐好山遮盡罷
登樓青秧搖蕩湖堤決一飽前知未易謀

小軒夏夜涼甚偶得長句呈杜叔高秀才

遙夜簾櫳已借秋闌千星斗挂檐頭鵲翻清影移枝
宿螢弄孤光拂簟流榻上琴書紛枕籍髮根風露冷
颼颼故人莫笑幽居陋此夕真從造物遊

憶昔

憶昔西征日飛騰尚少年軍書插鳥羽戍壘候狼煙
渭水秋風夜岐山曉雪天金鞮馳叱撥繡袂舞嬋娟

但恨功名晚寧知老病纏虎頭空有相麟閣竟無緣
壯士埋巴峽獨孤策孤身臥海壩安西九千里孫武
十三篇裘嘆蘇秦筭鞭憂祖邀先何時聞詔下遺將
入幽燕

夏日晚興

高掛虛窗對綠池鳥啼聲歇柳陰移含風珍簟閉眠
處疊雪輕衫新浴時泉冷甘瓜開碧玉手香素藕買
一作雪長絲夕陽四面漁歌起又赴隣翁把釣期

老翁

老翁垂七十不復歎頭顱浩蕩新漁艇澗零舊酒徒
嚴徐元袞衰管葛亦區區獨有欣然處登山未用扶
困甚戲書

官如枝頭乾不受雨露恩身如水上浮泛泛寧有根
刈莠以苦屋縛柴以為門故人分祿米隣父餉魚發
前門吏徵租後門實襦幘不敢謀歲月且復支朝昏
兩餘幽花拆亦可作清尊吾生信已乎終老此山村

歲晚

日月忽其逝吾生猶幾何不從屠狗醉卽和飯牛歌
斧鉞稽天討金縢約虜和無情恨荆棘歲晚暗銅駝

戲詠山陰風物

萬里秦吳稅駕遲還鄉已數鬢成絲城邊綠樹山陰
道水際朱扉夏禹祠項里楊梅鹽可徹太白梁園吟云
五盤楊梅爲君設吳鹽如花皎白雪不知楊梅酸者乃薦以鹽佳品未
嘗用也 湘湖蓴菜鼓偏宜 蓴菜最宜鹽鼓所謂未下鹽鼓者
言下鹽鼓則非羊酪可敵蓋咸言蓴菜之美爾 圖經草草常堪
恨好事它年采此詩

老健

才智不足狂有餘此身老健更誰如齒牢尚可決乾
肉目瞭未妨觀細書不怪模稜噉了了但驚診臂勸
徐徐曉看瓜壘初牽蔓一笑呼兒勿廢鉏

六月晦日作

長夏忽云過徂年行且休川原方渴雨草木已驚秋

露蔓晨猶泫風蟬莫更道明窗對清鏡世事判悠悠
喜雨

雷車隆隆南山陽電光煜煜北斗傍急雨橫斜生土
香草木蘇醒起仆僵芭蕉抽心鳳尾長薛荔引蔓龍
鱗蒼葛懶竹簟夜更涼超然真欲無羲皇常年七月
蚊殷廊今夕肅肅疑飛霜水車罷踏屣斗藏家家買
酒歌時康

門外納涼

玄雲障落日早得數刻涼寒泉灑門前浴罷倚胡床
蟬聲晚愈壯藕花凋更香嘯詠忽已久野色來蒼蒼
新月淡無輝大星森有芒水鳥亦歸宿飛鳴掠橫塘
人生各有時何至終身忙撫髀三太息墜露溼衣裳

贈蘇趙叟兄弟

君家真德門才傑生衰衰託契則甚深所恨相識晚
攜文數過我每讀必三反譬如天廡駒真是渥注產
閉門萬卷讀更要極源本才難聖所嘆期子敢不遠

癸丑七夕

風露中庭十丈寬天河仰視白漫漫難尋仙客乘槎
路且伴吾兒乞巧盤秋早時聞桐葉墜昨夜涼已怯紵
衣單民無餘力年多惡退士私憂實萬端

共語

喬嶽成塵巨海枯欲求共語一人無黃金已作飛煙
去癡漢終身守藥爐

書數

少年志欲掃胡塵至老寧知不少伸覽鏡已悲身涼
倒橫戈空覺膽輪困生無飽叔能知己死有要離與
卜鄰西望不須措病眼長安冠劍幾番新

秋曉倚闌

雲罽纖纖玉一鉤小庭風露更清柔老來朋舊凋零
盡獨倚闌干特地愁

癸丑七月二十七夜夢遊華嶽廟

驛樹秋風急關城莫角悲平生忠憤意來拜華山祠

又
性碑偽正朔祠祝虜衣冠神亦豈堪此出門山雨寒

僕頃在征西大幕登高望關輔樂之每冀王師
拓定得卜居焉暇日記此意以示子孫

八月殘暑退秋聲滿庭樹豈無四方志衰病迫霜露
遼東黃頭奴稔惡天震怒南北會當一老我悲不遇
子孫勉西遷俗厚吾所慕約己收孤嫠教子立門戶
黍稌暗阡陌鷄雉足七箸永為河渭民勿憚關山路

讀陶詩

我詩慕淵明恨不造其微退歸亦已晚飲酒或庶幾
兩餘鋤瓜壅月下坐釣磯千載無斯人吾將誰與歸
秋夜感舊十二韻

冷螢綴蓬根忽復照高樹年光逝不留百感集遲莫
往者秦蜀間慷慨事征戍猿啼鬼迷店馬噤飛石鋪

鬼迷店在大散關下飛石鋪在小益道中常有崩石危嶺高入雲
朽棧為容步天近星宿大江惡蛟鼉怒意氣頗自奇
性命那復顧最懷清渭上衝雪夜掠渡封侯細事爾
所冀垂竹素兜鍪竟何成豈獨儒冠誤當時安校尉
旗纛今照路浩歌遂成章聊慰老不遇

曲居

海濞結茆新退藏常畏人已侵垂老境尚愛不貲身
丹灶長生藥巢居上古民秋來有奇事鷗鷺日相親

醉題

勿笑山翁病滿軀胸中俠氣未全無雙瞳曠過醉猶如
電五木隨呼盡作虛代北胡兒富羊馬江南奇士出
菰蘆何由親奉平戎詔蹴踏關中建帝都

雨涼小飲戲作

孤村小院雨輪涼團扇流塵簟避床蛩思感秋吟壞
壁螢光乘暗遶高梁中箱字細成襖頰醜盃深斷
送狂坐睡覺來人已散簾櫳時度玉簪香玉簪花名

題齋壁

迹是滄浪客家居穩程村秋菰莢羹滑社酒帶醇渾

勦業知難遂文章不更論惟餘此身在分付與乾坤

書憤

山河自古有乖分京洛腥羶實未聞劇盜曾從宗父命遺民猶望岳家軍上天悔禍終平虜公道何人肯散羣白首自知疎報國尚憑精意祝爐熏宗澤守東都巨盜來歸百萬號宗爺岳家軍蓋紹興初語

秋興

秋風又滿會稽城有客飄然萬事輕久向林間得佳趣不知身外有浮名蒲萄雨足初全紫烏柏霜前已半頽欲把一盃終覺癩老來懷抱為誰傾

雨夜排悶

羸病愁燈影羈懷怯雨聲新秋忽已半垂老若為情金印兒嬉事青編身後名何如破窗下袖手送餘生

又

村巷時時雨江城夜夜砧沉憂羈客夢孤憤遠臣心身病常須藥囊空未贖琴明朝鏡中髮飽受雪霜侵

秋日出遊戲作

箬帽蓑衣自道宜不論晴雨著無時半醒半醉人爭看是聖是凡誰得知

又

薄雲韜日未成雨野水蓄沙爭赴溪書冊懶看聊作伴酒壺不飲亦常攜

雨中夕食戲作

高秋滴增雨作泥黃昏爭林雀欲棲臨窗一飯頗簡快半升脫粟燒黃齋

又

粗鉢寒菹到手空屬饜也與八珍同家人見慣渾閑事笑殺新來兩髻童

又

粳粒微紅愧食珍蔣芽初白喜嘗新摩挲便腹無憂責我是人間得計人

自警

墮髮滿長梳荒畦入晚鉏涼生團扇病退短筇疎聖道功殊淺塵緣習未除青燈幸如故勉近讀殘書

寄方瞳胡先生

形槁神彌王心虛腦自疑平生一酒榼萬里兩行膝安枕存玄牝齋居養絳陵他年喬嶽下正晝看飛騰古仙人飛升皆在五嶽名山故人少見者

雨夕焚香

芭蕉葉上雨催涼蟋蟀聲中夜漸長繡十二經真太漫與君共此一爐香

秋雨初霽徙倚門外有作

三十餘年此結廬客來不用笑迂疎前身已預蘭亭會老眼曾窺禹穴書浮食社醅香出屋登場秋稼穗盈車蕭蕭蓬鬢雖衰矣追逐鄉鄰尚有餘

雨中作

野外偏于看雨宜映空渡水細如絲川雲借潤支琴石礪水分流洗藥池未肯高眠成老態却緣危坐得新詩悠然更助鄰丁喜漸近收蕎下麥時

贈老雞

我我赤憤先羣輩嗷嗷長鳴蓋四郊意氣雖雄無處用風霜從我老衡茆

又

場中啄粟樹頭棲三唱明星出尚低關路元無玉盃嘗客吳兒莫議會稽雞

秋晚閑步隣曲以予近嘗臥病皆欣然迎勞

放翁病起出門行績女窺籬牧豎迎酒似將釀知社到甌如盤大喜秋成歸來早覺人情好對此彌將世事輕紅樹青山只如昨長安拜免幾公卿

雨夜

歲晚茆茨劣自容齒搖將脫髮將童心遊萬里關河外身臥一窗風雨中醫不可招惟忍病書猶能讀足忘窮夜闌睡覺蛩聲裏時見燈花落碎紅

醉臥道傍

爛醉今朝臥道傍，鄉閭共為護牛羊。高懷那遣羣兒覺，至理真能萬事忘。喚起瘦軀猶鬼戕，扶歸困睫更芒洋。凍齋快嚼茆簷下，拍手從人笑老狂。

枕上聞急雨

枕上雨聲如許奇，殘荷叢竹共催詩。喚回二十三年夢，燈火雲安驛裏時。

又

酒病羈愁一洗空，長歌高枕雨聲中。傳聞黔港深三尺，明日扁舟處處通。港涸久不通舟楫，兩日雨殊可喜也。得趙若川書因寄。

澤居路絕人不到，晨起忽傳雙鯉魚。儲淚一升悲世事，滅愁三尺看君書。龍媒對策言傷直，山邑迎親計未疎。老病閉門誰省錄，因風時肯問何如。

夢至洛中觀牡丹繁麗溢目覺而有賦

兩京初駕小羊車，顛顛江湖歲月賒。老去已忘天下事，夢中猶看洛陽花。妖魂豔骨千年在，朱彈金鞭一笑譁。寄語甌裘莫癡絕，祈連還汝舊風沙。

閑居對食書媿

遊宦無功坐免歸，誰令盤筋極甘肥。錦鱗差尾魚登俎，繡羽駢頭雉觸機。桑落滿壺春盎盎，雨前轉磴雪霏霏。殘年何地酬君賜，自古羈臣厭蕨薇。

又

老病家居幸歲穰，味兼南北飫枯腸。滿脾蜜熟餠鏗鏗，笑下棧羊肥。罽氍香鱗刺河魴，初出水迷離穴兔正。迎霜山僧一鉢無，餘念應笑先生為口忙。

秋夜獨酌

壯志隨年減，羈愁與夜長。月高寒暈淡，花坼露叢香。仕畏讒銷骨，歸判酒腐腸。青燈寫孤影，相勸盡餘觴。

風雲交作戲題

雲脚如龍爪，空中挾雨來。何關風伯事，欲到却吹回。

自嘲

歲月推遷萬事非，放翁可笑白頭癡。此生竟出古人後。

下有志尚如年少，時僻學固應知者。少長歌莫問和予，誰自嘲自解君。毋怪老大從人百不宜。

書室

客來莫笑席塵凝，靜處工夫却少增。黑蟻常繙書壁簡，瘦蛟時落越溪藤。尚能豪健如霜鶴，未遽衰殘學凍蠅。更喜論文有兒子，夜窗相對短檠燈。

數日秋氣已深清坐無酒戲題長句

漸近重陽天氣嘉，數椽茆竹淡生涯。山童擁篲掃黃葉，鄰女傍籬收碧花。避俗要生輪四角，出門何啻路三叉。晚窗酒盡無多數，試問前村好事家。

五更起坐

世間醉夢過浮生，誰肯披衣坐五更。煜煜心光回自照，昏昏睡息浩無聲。古人得意捐糟粕，癡子何知墮化城。七十老翁須努力，隣雞曉唱又窗明。

谿上雜言

谿上之丘吾可以休，谿中之舟吾可以遊。一裘雖弊可度風雪，虛一簞雖薄未有日夕憂。媿于此心鼎食其敢飽，負其所學蟬冕增吾羞。古人誰謂不可見，黃卷猶能親生面。百穀藁竊知稷功，九州茫茫開禹甸。巍巍成功亦何有，治亂但如翻覆手。逢時皆可致唐虞，比身管樂寧非苟。樹桑釀酒蕃雞豚，是中端有王業存。一朝遇合得施設，千載始知吾道尊。

厭事

厭事便微疾，貪眠幸早寒。人雖笑疎懶，天實閔衰殘。草布何曾賤，茆茨本自寬。黃花插烏帽，一醉有餘歡。

方池

莫笑方池小，清泉數斛寬。照花紅錦爛，洗研黑蛟蟠。日取供茶鼎，時來擲釣竿。秋風過欄角，也解作微瀾。

癸丑重九登山亭追懷頃在興元常以是日獵中梁山，山下樂甚，慨然賦詩。予于是生六十有九年矣。

生年六十九，重陽轍遍秦。吳歲月長南，鄭從戎嗟尚。

壯中梁縱獵最難忘
離披雉拂雕鞍墮
獨倏狐穿古冢藏
夢斷酒醒今萬里
亦逢佳節重悲傷

劍南詩稿卷第二十七終

劍南詩稿目錄
卷第二十八

感懷四首 出遊二首 讀杜詩偶成 秋夜

卽事 物有可歎者因戲作數語以識之 老

懷 對酒 東村散步有懷張漢州 晚寒自

東村步歸 排悶六首 初寒病中有感 放

歌行 山頭石 有客 幽居五首 野興四首

買油 繫舟二首 初冬至近村 古築城

曲四首 山園 將軍行 古別離 寄子虞

泛舟自中堰入湖 夜歸舟中作 蓬萊閣

聞大風 小出塞曲 冬日園中作 登山亭

拄杖歌 冬晴 冬夕二首 十月十五夜

對月 久疾三首 舍北望牛頭山山有延勝

寺先太傅書堂在焉六年前嘗泛小江往遊寺

焚於睦寇書堂無復存矣 十月十九日大風

作寒閉戶竟日 寄天封明老 村居二首

十月下旬暄甚戲作小詩 霜天雜興三首

連日風雨寒甚夜忽大風明日遂晴 懷昔

寄題王俊卿看山堂二首 絕歎 風雨 晚

過鄰曲 莫仲謙挽詞 病起 晚興 贈粉

鼻 與兒輩論李杜韓柳文章偶成 夢至小

益 懷紹興間往還諸公 磨衲道衣 溪上

作二首 小憩 癸丑十一月下旬溫煥如春

晦日忽大風作雪 占城櫻竹拄杖 西城

東城 斯道 病起山居日有幽事戲作二首

蝸廬 冬夜讀書二首 十二月九日枕上

作 記夢三首 鏡湖女

劍南詩稿卷第二十八

宋陸游務觀

感懷

老病與世絕屏迹三家村我居一何陋舉手屋可捫
客至不能迎堅坐度朝昏一窗修竹下超然傲羲軒
外物自變遷內景常默存黃流不注海浩浩朝岷崙
妙道本自得至言初不煩功成出緒餘猶足康黎元

又

卜居鏡湖上一菴環翠屏竹林藏谿徑嶺路蟠青冥
鸞騰立奇石蘄絕瞻危亭車馬雖掃迹猿鳥與忘形
我行半九州踞盡芒屨青豈知雪滿鬢于茲散雲局
丹砂收箭鏃扶苓勵人形遼天渺歸鶴一瞬二千齡

又

平生喜栽花賴以娛寂莫小園財一畝粲粲萬附萼
典衣買紫桂輟食致紅藥阡陌香草茂掩苒煙柳弱
踏雨探花開障風畏花落雖慚童心在終勝塵事縛
今日疾稍間天氣亦清廓啼鳥寒不歸可以侑吾酌

又

殘年迫衰謝嬰疾歸鄉枌諸賢渡江初總角幸有聞
才非楚倚相亦能讀典墳夫豈或使之後死與斯文
世儒鑿戶牖道術將瓜分孤陋守一說百氏殆可焚
後來豈無人鼻望誰揮斤巍巍貞觀治房魏出河汾

出遊

采藥今朝偶出遊溪邊小立喚漁舟未須著句悲搖
落嫩日和風不似秋

又

朝行躡屩穿幽谷莫返褰裳涉亂流提起短筇成一
笑每煩上座為分憂

讀杜詩偶成

一念寧容事物侵天魔元自是知音拾遺大欠修行

力小吏相輕尚動心

秋夜即事

鳥宿牛歸戶欲局燈前老子影伶俜溼雲不散初聞
雁深竹微明尚有螢一卷舊書開蠹簡半升濁酒倒
餘瓶乘閑欲擬歸來作小草斜行滿曲屏
物有可數者因戲作數語以識之

雞棲及我未掩扉犬雖遠出莫自歸司晨警夜職交
舉簸糠粟粒報亦微查查雙鷓鴣更媿汝庭樹夜宿常
相依豈憐主人老寂寞暝暝蓬戶不忍違養鷄甚恩
健即去養鷹雖久飽亦飛嗟哉物性厚薄異使我隱
几空獻秋

老懷

身見高皇再造初名場流輩略無餘舊書科斗纔存
字薄業蝸牛僅有廬迂士豈堪新貴使少年自與老
人疎荒園寂寂堆霜葉抱瓮何妨日灌蔬

對酒

古今共有死長短無百年方其欲瞑時如困得熟眠
世以生時心安度死者情疑其不忍去一笑可絕縲
區區計生死不如持一觴一觴澆不平萬事俱可忘
待酒忘萬事猶是役於酒醉醒不到處天魔自奔走

東村散步有懷張漢州

扶杖村東路秋來始此回寒鴉盤陣起野菊臥枝開
憂國丹心折懷人雪鬢催房湖八千里那得尺書來
晚寒自東村步歸

排悶

夕陽下平野落葉滿荒街村店賣麪麩人家燒豆蘇
溪風透布褐草露溼芒屨骨相元如此何由與世諧
丈夫結髮志功名大事真當以死爭我昔駐車籌筆
驛孔明千載尚如生

又

曾攜一劍遠從戎秦趙關河顧盼中老去功名無復
夢凌煙分付黑頭公

又
四十從軍渭水邊功名無命氣猶全
白頭爛醉東吳市自拔長刀割虎肩

又
西塞山前吹笛聲曲終已過雒陽城
君能洗盡世間念何處樓臺無月明

又
萬里風中寄斷蓬古來虛死幾英雄
拔山力與回天勢不滿先生一笑中

又
風霜九月冷颼颼湖海飄然一布裘
親見凶義初畫卦轉頭三十萬春秋

初寒病中有感

楚水楓林霜露新白頭一叟正吟呻
牛衣未起王章疾馬磨何傷許靖貧
治道本來存簡冊神州誰與靜煙塵
新亭對泣猶稀見况覓夷吾一輩人

放歌行

君不見汾陽富貴近古無二十四考書中書
又不見慈明起自布衣中九十五日至三公
人生窮達各有命拂衣徑去猶差勝
介推焚死終不悔梁鴻寄食吾何病
安用隨牒東復西獻諛耐辱希階梯
初無公論判涇渭徒使新貴矜雲泥
稽山一老貧無食衣破履穿面黧黑
誰知快意舉世無南山之南北山北

山頭石

秋風萬木賈春兩百草生造物初何心
時至自枯榮惟有山頭石歲月浩莫測
不知四時運常帶太古色老翁一生居
此山脚力欲盡猶躋攀時時撫石三歎
息安得此身如爾頑

有客

有客隱華山學道忘歲月靈苗生絕壁
光景中夜發斷根食之盡倏爾換金骨
通籍虎豹閣日預通明謁綠章奏封事
誤字坐責罰後身幸不忘去日苦飄忽

白首三入朝未省及黔突方逃申公鉗
已取卞和剛福微不盈皆罪衆幾擢髮
上天豈憐之寸步使屢蹶拔其利欲根
還之山水窟洗心謝宿愆世事等胡粵

幽居

窮老苦畏事雅意在丘壑結茆鏡湖上
卒歲安寂莫有門常懶開壁間挂雙屨
猶恨未遠人靜夜聞城角

又

來客無僮奴剝啄自叩戶主人亦蕭然
若飲不能具清言正絕倒日莫亟散去
更欲盡所懷衣薄畏霜露

又

山園手栽花日夜數花時花開亦已落
一歡自無期勸君強自娛勿作兒女悲
春風染柳條不染君鬢絲

又

種菜三四畦畜豚七八箇永言給賓祭
且復課慵情霜清黃犢健土潤小雨過
冬畊不可失努力勿安臥

又

放翁家山陰其貧蓋一國骨相異虎頭
祠祿真雞肋有米薪未具坐待至曛黑
躬耕豈所難一飽非爾力

野興

身似孤鴻鍛羽翰悲鳴飲啄住江干
酒闌客思多新感病起衰顏失故丹
倦枕忽聞中夜雨疎砧又報一年寒
幽窗晤語無來客空倚詩情強自寬

又

老去癡頑百不能非醒非醉日騰騰
敲門惟有徵租吏好事元無送米僧
舊俗不還誰復念古書雖在漸難憑
平生生意氣今如此惆悵西窗半夜燈

又

殘水涓涓入野塘菊花猶放數枝黃
悶思野步便晴日病怯冬溫喜薄霜
湯餅鬻成新兔美膾齏擣罷綠橙香
人間富貴知何得商略山林却味長

又

水作縠紋微起伏天如卵色半陰晴
偶來竹下搯頭

坐却向藤陰曳杖行西埭人喧菽船過東村燈上緯
車鳴幽居應接真無暇莫訝經年懶入城

買油

習氣年來掃未平夢回猶喜讀書聲冬裘不贖渾閑
事且爲吾兒續短檠

繫舟

繫舟江浦待潮平數息無人共月明歷盡世間多少
事飄然依舊老書生

又

地曠月明鋪素練霜寒河淺拂輕綃手扶萬里天壇
杖夜過前村禹會橋

初冬至近村

南國霜常晚初冬葉始紅曠懷牛屋下美睡雨聲中
沮水憶浮馬西鄙軍行溪過澗皆淨而齊

嶠山思射熊何由効唐將八十下遼東

古築城曲

築城聲酸嘶漢月傍城低白骨若不掩高與長城齊
又

長城高際天三十萬人守一日詔書來扶蘇先授首
又

百丈築城身千步掘城壕咸陽三月火始悔此徒勞
又

嶧山訪秦碑斷裂無完筆惟有築城詞哀怨如當日
又

山園

山泉引派漲清池野蔓移根絡短籬藝果極知非老
事接花聊復効兒嬉提壺言語開顏聽斷木衣襦緩
步窺莫笑題詩還滿紙小園幽事要君知

將軍行

將軍入奏平燕策持笏榻前親指畫天山熱海在目
中下殿即日名炬赫馳出都門雪初霽直過黃河冰
未拆繡旗方掠桑乾渡羽檄已入金臺陌勇士如鷹
健欲飛虜王似兔何勞擗戎服押俘獻廟社正衙第

賞頌詔冊端門賜醺天下慶御觴尚恨滄溟往從來
文吏喜相輕聊遣濡毫書竹帛

古別離

孤城窮巷秋寂寂美人停棹夜歎息空園露溼荆棘
枝荒蹊月照狐狸迹憶君去時兒在腹走如黃犢爺
未識紫姑吉語元無據况憑瓦北占歸日嫁來不省
出門前魂夢何因識酒泉粉絲磨鏡不忍照女子盛
時無十年

寄子虞

吾兒適淮壖送之梅市橋三年安得過思汝雙鬢凋
今年當代歸秋色已蕭蕭迎汝不憚遠夢泝錢塘潮
人事不可料邑民挽歸橈郡牧部使者交章聞之朝
增秩復使留此事久寂寥念汝未育子大女方垂髫
小女聞學行想像扶牀嬌汝少知讀易外物莫能搖
但願早舉孫不必七葉貂歸來即罷前相從樂單瓢
泛舟自中堰入湖

夜歸舟中作

水縮沙洲出霜清木葉丹鷺羣橫澹靄鴉陣報初寒
冷落人情見衰遲世念闌惟留一句子村舍話團圓
意薄楊脩喚小兒孤舟自笑髮成絲放開癡腹無非
夢拈起幽懷總是詩霜下忽驚桐葉盡難生更覺水
聲奇餘年那恨驅黃犢除却爲農百不宜

蓬萊閣聞大風

天風搖蕩萬松聲卷海頽山得我驚觸灑頰堆秋起
柁塵臯闌下夜還營荷戈老氣縱橫在看劍新詩效
唾成興盡却尋湖上路醉看月墮斗杓傾

小出塞曲

全師出雁塞百戰運龍韜金絡洮州馬珠裝夏國刀
度沙風破肉攻壘雪平壕明日受降處甲齊熊耳高

冬日園中作

園荒闕掃除籬敗且枝梧久旱池萍死新霜野蔓枯
寒爐殊未識濁酒却時醅飛動郊原與飢鷹待指呼

登山亭

新得天台古澗藤強扶衰疾踟躕登高臨遠雖多感歎老嗟卑却未曾紙上是非難盡信人間禍福有相乘早知等是枯魚肆乞水何須望斗升

拄杖歌

道人四壁空無有一炷清香閑袖手床邊獨有拄杖子疾病相扶真我友禪房按膝秋聽雨野店敲門莫賒酒畏途九折歷欲盡世上誰如君耐久老矣更踏千山雲何可一日無此君歸來燈前夜欲半露柱說法君應聞

冬晴

吳中霜雪晚初冬正佳時丹楓未辭林黃菊猶殘枝鳴雁過長空纖鱗泳清池氣和未重裘臨水照鬚眉悠然據石坐亦復出門嬉野老荷鋤至一笑成幽期

冬夕

犬吠驚飄葉禽喧換宿枝墮空霜肅肅垂地斗離離野叟讀書罷高城吹角悲功名渾錯料老病却如期

又

不寐起中夕披衣增慨慷千金空市骨三沐竟剗腸世事庸能識吾生安用長布裘茆屋底死去亦芬芳

十月十五夜對月

離海月盈丈寒光萬里明衆星斂欲盡一鏡獨徐行重露滴松鬣高風吹鶴聲老來殊畏冷不盡倚闌情

久疾

久疑無時已殘年莫更論流離魂未返窮苦舌空存畊壠關心事祠官荷主恩但愁垂老眼不見定中原

又

殘年仍臥疾窗戶夜悄悄一日且復過久生非所欽暗塵侵藥笥微月伴衣砧萬里懷良友前盟可得尋

又

幽屏元無事沉緜自鮮歡歷長猶可截冠挂豈容彈擣藥香塵細尋書蜜炬殘晚來差覺健風月小庭寬

舍北望牛頭山山有延勝寺先太傅書堂在焉六年前嘗泛小江往遊寺焚於陸寇書堂無復存矣

存矣

太傅讀書處秋風曾問途江如青弋險山似白鹽孤山形絕類夔府之白鹽但差卑小耳路盡還登嶺林開忽見湖艸堂無復識流涕想規模

十月十九日大風作寒閉戶竟日

霜風捲地起落葉擁蝸廬終日澹無事一窗寬有餘坐多知力耗食少覺心虛懶情無新句松聲忽起予

寄天封明老

須迹天台一夢中距今四十五秋風勝遊回首似昨日衰病侵人成老翁聖寺參差石橋外仙蓬縹緲玉霄東因君又動青鞵興目斷千峯翠倚空

村居

衰病汗朝著思寬得免歸羸能心自信不恨世相違草市寒沽酒江城夜擣衣是中堪送老高枕謝招麾

又

自笑觸藩羝人嘲失旦雞囊慳衣任短山冷屋便低宦拙讓銷骨言狂悔噬臍自今焚筆研有手但扶犁

十月下旬暄甚戲作小詩

老怯霜風盡日眠素屏紙帳擁蠻氈爲君小試回春手便似暄妍二月天

霜天雜興

楓葉全丹柰葉黃江城殘角伴斜陽琴書自足閑中樂天地能容醉後狂老死山林初不憾夢遊河渭獨難忘穀城黃石今安在取履猶思効子房

又

萬鼓風聲吼屋邊老人裘綺旋裝綿晨梳墮髮知衰甚夜枕聞雞尚慨然身後文章空飽蠹眼前交舊半沉泉飯蔬飲水平生慣恥向天公更乞憐

又

少學愚公一味愚莫年仍似病相如閑吟寄友惟生

紙草具留僧只野蔬雨澗溪流殊未足霜高木葉已
無餘潭州丞相憐衰疾細字時收尺素書

連日風雨寒甚夜忽大風明日遂晴
萬里浮雲一掃空碧天無際日曛曛歡聲四起春風
裏恰似祥符景德中

懷昔

昔者成梁益寢飯鞍馬間一日歲欲莫揚鞭臨散關
增冰塞渭水飛雪暗岐山悵望釣璜公英槩如可還
挺劍刺乳虎血濺貂裘殷至今傳軍中尚媿壯士顏
豈知墮老境槁木蒙霜菅澤國氣候晚仲冬雪猶慳
曩事空夢想擁褐自笑孱胡星未買地大弓何時彎
寄題王俊卿看山堂

廣文風度絕清真一代論文不數人車馬到門常謝
病北山雖遠却相親

又

閉戶終年嬾出遊北山山色可消愁何時一掃胡塵
盡更約同吟太華秋

絕數

老屋環青嶂衰翁臥白頭殘書且遮眼薄酒不澆愁
世故真難料吾生愈覺浮餘年更須惜幸得返山丘

風雨

風雨連三日衰翁不下堂弄書聊自適與世已相忘
拆栗經霜飽搓橙帶露香地爐供小飲亦足慰淒涼

晚過鄰曲

陽狂跌宕送年華信步來尋野老家淺瀨水清逢立
鷺橫林葉盡數栖鴉書生一飽依耕耒壯士孤愁入

戍笳王績但思酣美醞葛洪不復問丹砂

莫仲謙挽詞

懷器潛山澤逢時起薜蘿星辰占寶劍雷雨化龍梭
禹穴書雖富浯溪石未磨門閭更須築有子繼三科

病起

一病輒經旬幾病能不死誠知迫頽年暫健亦自喜

半窗風竹影晴景極清美讀書雖益嬾尚可日百紙
引鏡整角巾病思真一洗悠然度朝晡萬事如覆水

晚興

一聲天邊斷雁哀數蕊籬外蚤梅開幽人耐冷倚門
久送月墮湖歸去來

贈粉鼻畜貓名也

連夕狸奴磔鼠頻怒髯喫血護殘困問渠何似朱門
裏日飽魚殮睡錦茵

與兒輩論李杜韓柳文章偶成

吏部儀曹體不同拾遺供奉各家風未言看到無同
處看得同時已有功

夢至小益

夢覺空山淚漬衿西遊歲月苦駸駸葭萌古路綠雲
壁枯柏浮梁暗襟襟林坐上新聲猶蜀伎道傍逆旅已

秦音荷戈意氣渾如昨自笑摧頽負壯心

懷紹興間往還諸公

早歲從諸傑森然盡國華辭工出月臨筆健拔鯨牙
道在窮何憾年徂生有涯湖山元不改老淚溼風沙

磨衲道衣

久脫朝衣學道裝溪雲埜鶴作身章何時九轉丹砂
熟却插金貂侍紫皇

溪上作

落日溪邊杖白頭破裘不補冷臆臆愚酷信紙上
語老病猶先天下憂未俗陵遲稀獨立斯文崩壞欲

橫流紹興人物嗟誰在空記當年接俊遊

又

偃僕溪頭白髮翁莫年心事一枝筇山銜落日青橫
野鴉起平沙黑蔽空天下可憂非一事書生無地効

孤忠東山七月猶關念未忍沉浮酒醖中

小憩

徐行散腰膺小憩畜精神休養觀書眼調娛宴坐身
青氈我家舊紅粟太倉陳溫飽無餘事寒龜息自勻

癸丑十一月下旬温燠如春晦日忽大風作雪
今年一冬晴日多草木萌甲風氣和百錢布被未識
贖老翁曝背兒行歌吾儕小人慮不遠積雪苦寒來
豈晚青天方行三尺鳥不料黑雲高巉嵒明朝雪惡
凍復餓兒啼頰皺翁噤臥九重巍巍那得知閣門催
班百官賀

占城櫻竹拄杖

參雲氣壓葛陂龍跨海來扶笠澤翁八十尚思行脚
在與君處處現神通

西城

市步羣鷺散關門夕照明河流倒橋影雪野聚鳥聲
繁杵聞深巷寒煙下廢城匆匆舩盡發爭趁早潮平

東城

墟落斂莫煙林梢偃新月河橋燈漸鬧柳岸船猶發
薄酒吹欲無佇立搔短髮誰知七十翁歲晚念裘褐

斯道

斯道有顯晦所憂非賤貧乾坤均一氣夷狄亦吾人
朋黨消廷論鉅履洗戰塵清時更何事處處是堯民

病起山居日有幽事戲作

靈府超然外物輕靜中談笑却三彭暗窗風竹參差
影霜樹山禽格磔聲客出異苗咨藥品僧攜奇篆乞
書評幽居亦未全無事更用人間有姓名

又

鶴骨龜腸欲不禁扶衰初喜罷呻吟益山冰釋書窗
暝藥竈香濃道院深筆健乍臨新獲帖手生重理舊
傳琴閉門局促還堪恨雲海何時豁此心

蝸廬

蝸廬四壁空也過百年中葑火朝供爨蘆綿夕禦風
不惜窮有崇自以放名翁但恨村醪薄衰顏只覓紅
冬夜讀書有感

一指頭禪用不窮一刀七藥去凌空汗牛充棟成何
事堪笑迂儒錯用功

又
胸中十萬宿貔貅卓纛黃旗志未酬莫笑蓬窗白頭

客時來談笑取幽州
十二月九日枕上作

臥聽百舌語簾櫳已是新春不是冬堪數老來如許
病正令無病亦無悵

記夢

黃河衮衮抱潼關蒼翠中條接華山城郭丘墟人盡
老藥爐依舊白雲間

又

西巖老宿雪垂肩白石為糧四百年喜我未忘山下
路慙慙握手一欣然

又

三髻山童喜欲顛下山迎我拜溪邊松陰拂罷蒼苔
石接竹穿雲理舊泉

鏡湖女

湖中居人事舟楫家家以舟作生業女兒妝面花樣
紅小繖翻翻亂荷葉日莫歸來月色新菱歌縹緲泛
煙津到家更約西鄰女明日湖橋看賽神

劍南詩稿卷第二十八終

劍南詩稿目錄
卷第二十九

水村曲	石洞餉酒	病退	偶書	讀史
飲石洞酒	戲作	霜寒	賽神曲	涼州行
望夫石	江村道中書觸目	采蓮曲	兀坐	頗念遊歷山水戲作
五雜俎	二首	漁扉	詠史	烏棲曲
古別離	書數	十二月二	十六夜聽雨	起晚
陳少監餉澄清堂酒	雪中作	甲寅元日予七十矣酒間作短歌示	子	七十
正日後一日	立春	老境	偶	懷小益南鄭之間悵然有賦
再用前韻不依	次	北坡梅開已久一株獨不著花立春日忽	放一枝戲作	人日
夜讀呂化光文章拋盡	愛功名之句戲作	遇衛士飲以卮酒	閒趣	正月二十日晨起弄筆
春夜讀書	春晴	泛湖入城	書齋壁二首	春日睡起
老病	謝客或者非之戲作	永日無一事作詩自詒	窗前作小土山莖蘭及玉簪最後得香百合	併種之戲作
泛舟觀桃花五首	新闢小園	五首	上巳小飲追憶乾道中嘗以是日病酒	留三泉江月亭懷然有感
晚步門外散懷二	首	欲出遇雨	飢坐戲詠	蔬食
山亭	久不得張漢州書	春晚村居	遊雲門諸蘭	若
與子坦子聿遊明覺十四韻	淨智西窗	小僧乞詩	西窗睡起	平水
三月二十	五夜達旦不能寐二首	園中小飲	舟中夕	望
四月一日作	舟行過梅市	山園雜賦	四首	西窗
山頭鹿	夏四月渴雨恐害布	種代鄉鄰作插秧歌	雲童童行	董逃行
閔雨二首	喜雨	初夏	村舍	烏啼
感	舊	讀書至夜半燈盡欲睡慨然有感	遺興	農舍
四月晦日小雨	泛舟過吉澤	書		

數 五月得雨稻苗盡立 薄醉遺懷

劍南詩稿卷第二十九

宋陸游務觀

水村曲

山村今年晚禾早
麥下民租獨大半
水村雨足米狼戾也
故三分慰民意
看榜歸來送歌舞
共喜清平好
官府老翁猶記軍
興時汝輩少年那得知

石洞餽酒

忘憂自古無上策
欲飲家貧酒盃空
迨今朝鵲喜報遠
餽未圻赤泥先動色
魚長三尺催膾玉
巨蟹兩螯仍斫雪
勿言地僻少
過從清風明月俱
吾客驅除二豎走
三彭零落眼花生
耳熱陶然酣臥聽
松聲媿爾公卿足
憂責

病退

病退身仍健
春回日漸長
神詞金鼎藥
龍出玉函方
美睡三竿日
安禪半篆香
殘年已如許
幸復起膏肓

偶書

身放江湖遠
年推里巷尊
隣翁分酒子
羽客借桐孫
泱泱冰消澗
纖纖柳映門
小車非漢相
時亦到前村

讀史

南言萑菜似羊酪
北說荔枝如石榴
自古論人多類此
簡編千載判悠悠

飲石洞酒戲作

酣酣霞暈力通神
澹澹鵝雛色可人
一笑破除垂老日
滿懷搖蕩隔年春
梅花的的吹初破
楊柳纖纖織染未
勻醉倒橋邊人不
怪西曹免護相
君茵

霜寒

霜重晨簷滴
薪乾夜焙溫
老惟便布褐
病不出柴門
瓶裏梅花墮
窗間鶯語喧
閑人信無事
午睡到黃昏

賽神曲

擊鼓坎坎吹笙鳴
鳴綠袍槐簡立
老巫紅衫繡裙舞

小姑烏白燭明蠟
不如鯉魚糝美出
神廚老巫前致詞
小姑抱酒壺願神
來享常驩娛使我
嘉穀收連車牛羊
莫歸塞門閭雞鷺
一母生百雛歲歲
賜粟年年蠲租蒲
鞭不施園土空虛
束草作官但形模
刻木爲吏無文書
滄風復還羲皇初
繩亦不結況其餘
神歸人散醉相扶
夜深歌舞官道隅

涼州行

涼州四面皆沙磧
風吹沙平馬無迹
東門供張接中使
萬里朱宣布襖勅
勅中墨色如未乾
君王心念兒郎寒
當街謝恩拜舞罷
罷萬歲聲上黃雲
端安西北庭皆郡
縣四夷朝貢無征
戰舊時胡虜陷關
中五丈原頭作邊
面

望夫石

送君遠戍交河北
男兒自以身許國
不能彎弓騎惡馬
欲隨君去何由得
登山橋首西北雲
形容雖變心猶存
月明夜夜照淚痕
鐵心石腸輸與君

江村道中書觸目

短籬曲曲對開門
脩竹陰陰不見村
別浦回潮魚泥密
孤舟春近雁沙溫
路逢行客時交轡
店賣新醅一舉樽
忽過亂山幽絕處
恍如白帝到東屯

采蓮曲

采蓮吳姝巧笑倩
小舟點破煙波面
雙頭折得欲有贈
重重葉蓋羞人見
女伴相邀拾翠羽
歸棹如飛那可許
傾鬟障袖不響人
遙指石帆山下雨

兀坐頗念遊歷山水戲作

萬里當時寄一官
十年客枕不曾安
鬼愁難下扁舟晚
龜退陂前古驛寒
昔歎遠遊生雪鬢
近緣多病學金丹
功名非復衰翁事
獨有江山興未闌
鬼愁難在安

五雜組

五雜組山雉羽
住復還江頭
路不得已貴臣去

五雜組機上綺往復還冷遊子不得已富兒死
漁屏

湖上千峯翠作圍正應佳處著漁屏迂疎自計難謀
食老病誰令未拂衣萬里滄波鷗乍沒千年華表鶴
重歸一玉粟飯吾何恨自古高人有采薇

詠史

夜雨燈前感慨深為邦一士重千金風雲未展康時
略天地能知許國心劍忽拄頭都將相帽曾壓耳隱
山林英雄自古常如此君看隆中梁甫吟

烏棲曲

楚王手自格猛獸七澤三江為苑囿城門夜開待獵
歸萬炬照空如白晝樂聲前後震百里樹樹棲鳥盡
驚起宮中笑人謂將日髮澤口脂費千萬樂聲早莫
少斷時莫怪棲鳥無穩枝

古別離

君北遊司并我南適熊湘邂逅淮陰市共飲官道傍
丈夫各有懷窮達詎可量臨別一取醉浩歌神激揚
勳業有際會風雲正蒼茫亂點劍峯血苦寒芒屢霜
死即萬鬼鄰生當致虞唐丹雞不須盟我非兒女腸
書數

夜深青燈耿窗扉老翁稚子窮相依齋鹽不給脫粟
飯布褐僅有懸鶉衣偶然得肉思共飽吾兒苦讓不
忍違兒飢讀書到雞鳴意雖甚壯氣力微可憐落筆
漸健快其奈瘦面無光輝布衣儒生例骨立統袴市
兒皆瓠肥肥勿言學古徒自困吾曹捨此將安歸作詩
自寬亦慰汝吟罷撫几頻歎歎

十二月二十六夜聽雨

新春尚七日小雨暗江城葺簷夜點滴已作春雨聲
輕黃上柳枝嫩綠抽蒨萌造物本何心誰主此發生
頗疑重雲外斗杓已東傾老至不可却一尊志濁清

起晚

傍簷百舌語瓊瓏已覺新春在眼中欲起未成還小

睡忽看初日滿窗紅

陳少監餉澄清堂酒

酣暢年來豈易逢齋湯蜜汁亦時中玉醅忽逐春風
至一吸懸知百榼空

雪中作

黑風卷地連三日密雪穿簾又一回衰病不禁天色
惡笑談誰共酒尊開忍寒瘦馬嘶空櫪覓食飢鴉啄
廢臺笑遺蠻童撼園竹較羹分火待歸來

甲寅元日子七十矣酒間作短歌示子

我昔自蜀歸百年已過半觀棋未終局回視斧柯爛
飽知山林樂富貴何足換退休休失健決正坐闇且懦
齒髮日衰殘歲月難把玩蕭朱尚或隙籍湜固宜咩
出門無一欣撫事有三歎新年遂七十推敬媿里閭
眷眷惜茲夕凜凜畏明日豁然忽大笑愁若春冰泮
窮達真兩忘生死付一貫清尊既漱灑碩果亦璀璨
擁門紛鼓笛上壽列童冠老翁亦忘疲起舞影零亂
不獨誇癡頑自足洗患難投床判宿醒笑睡到日旰
七十

七十殘年百念枯桑榆元不補東隅但存隱具金鴉
觜那夢朝衣玉鹿盧身世蠶眠將作繭形容牛老已
垂胡客來莫問先生處不釣娥江即鏡湖

正日後一日

七十今年是連朝樂未休比鄰更頌禱親黨共遲留
羊映紅纒酒花簪絳帕頭從今日有喜農事起西疇
絳帕頭蓋以絳帛飾巾幘之類

立春

採花枝上寶檐新看遍秦山楚水春村舍不知時節
換傍檐百舌苦撩人

老境

髮白未及童齒搖未及脫正如一席飲燒燭將見跋
谿山環草舍霜露侵布褐文章雖自力亦已強弩末
寧將垂老耳更受世事聒巨慮入我夢行已寄瓶鉢

偶懷小益南鄭之間悵然有賦

西戍梁州鬢未絲蟠山漾水幾題詩劍分蒼石高皇

迹蟠家廟傍有高皇試劍石中分如截巖擁朱門老子祠三
泉道上有老君景趣幽遠燒兔驛亭微雪夜騎驢棧路

早梅時登臨不用頻悵斷未死安知無後期
再用前韻不依次

憶昨從戎丞相府元瑜書檄仲宣詩雲屯騎士臨邊
日魚貫降胡獻捷時史冊誤人悲壯志關河回首負
初期豈知二紀身猶在衰鬢星星老侍祠

北坡梅開已久一株獨不著花立春日忽放一
枝戲作

日日來尋坡上梅枯槎忽見一枝開廣寒宮裏長生
藥醫得冰魂雪魄回

人日

新歲逢人日老夫持道齋斷冰浮野水微綠發枯荑
壽景豐年象今年元日至人日皆晴閑吟曠士懷春橋已
陳迹鬪巧笑吳娃前一日立春

夜讀呂化光文章拋盡愛功名之句戲作

玉關西望氣橫秋肯信功名不自由却是文章差得
力至今知有呂衡州

遇術士飲以卮酒

行藥來村北觀魚立水邊忽逢長揖客能算小行年
酒薄聊頰頰囊空闕贈錢時清君未死訪我華山前

閑趣

老子卽今雙白鬢鏡湖自古幾青山半窗蘿月獨敲
枕滿院松風常掩關天地許寬誰礙汝琴尊是處可
開顏將行亦莫買春草幸有一筇相伴閑

正月二十日晨起弄筆

深院窗扉曉色遲新愁宿醉兩參差兩聲欲與夢相
入春意不隨人共衰零落殘梅臨小約縱橫野水赴
清池物華撩我緣何事似恐新年漸廢詩

春夜讀書

枉是儒冠遇太平窮人那許共功名枯腸不飽三升
稷皓首猶親二尺檠寓世已爲當去客愛書更付未
來生夜闌撫几愁無奈起視離離斗柄傾

春晴泛湖入城

春色初回杜若洲隔煙時見矯輕鷗嵩雲綠月年年
夢楚枕吳檣處處愁魚躍銀刀論網買酒傾綠蟻滿
盃浮前生杜牧吾身是又向江南遍倚樓

書齋壁

老病人扶氣力微闌干西角立斜暉流年冉冉功名
誤新冢纍纍故舊稀仗馬曾鳴宜永棄牧羝雖乳敢
言歸住養活計無多子只要筇枝與衲衣

又

落魄人間不記年晚營茆棟鏡湖邊室空惟是四壁
立面瘦漸生雙頰顛地僻門無殘客到歲豐路有醉
人眠君看朝市紅塵開始信吾曹是地仙

春日睡起

睡起悠然弄衲琴銅猊半爐海南沉淒涼故里逢春
處忠憤孤臣許國心水滿鳧鷖初拍拍雨餘花木已
陰陰吾兒振掩淮邊未歸近清愁轉不禁子虞書報二
月離古壽

老病謝客或者非之戲作

病侵腰膂兩經秋欲下繩床不自由客至難令三握
髮佛來僅可小低頭安禪還我閑蒙衲怒氣從渠勇
挾轉亦欲署門還懶去死生貴賤本悠悠

永日無一事作詩自詒

目昏罷觀書足蹇停遊山二事差可樂造物乃復怪
得非閱我老作意鑄其頑掃除盡宿習使得終日閑
閑亦何負汝剌曲茆三間奇石玩犖角清流聽淙瀉
勿言村醪薄數酌可解顏脩然日已夕臥看飛鳥還
窗前作小土山莖蘭及玉簪最後得香百合併

種之戲作

方蘭移取徧中林餘地何妨種玉簪更乞兩叢香百

合老翁七十尚童心

泛舟觀桃花

花溼二月桃花發霞照波心錦裏山說與東風直須惜莫吹一片落人間花溼桃花最感處

又

桃源只在鏡湖中影落清波十里紅自別西川海棠後初將爛醉答春風自梅仙塢至花溼恰十里

又

種桃亦解比封君世故紛紛寂不聞九轉金丹應已熟全家仙去隱紅雲

又

湖南小山花更多不醉將如春色何釣得鮮鱗堪斫膾任教微雨溼漁蓑湖南山名在柯山之南

又

鄰曲一生花裏活村翁疑是古遺民初來自被春留住任枉道當時為避秦

新闢小園

人生如意每難全草草園池却自然世事已拋高枕外春風常在短筇前墮空花片紛紛紅雨徧地苔痕長綠錢酒戶漸增詩興在天容此老剩狂顛

又

西戎歸來鬢已霜生兒又過乃翁長眼明身健殘年足飯軟茶甘萬事忘學廢僅能書姓字客來懶復倒衣裳山園寂寂春將晚酷愛幽花似蜜香

又

席地幕天君勿嘲隨宜野藪與山殺幽花避日藏深葉歸燕尋人理舊巢曲水詠觴空念昔斜川鄰曲自論交清貧尚媿茶山在送老湖邊有把茆曾文靖至歿

帶高僧舍

新展山園半畝強笑人車馬出籠坊山禽乍喫慙勳語野鷗無風自在香點點水紋迎細雨疎疎籬影界斜陽出門遙向鄰翁說釋耒相從共一觴

又

東軒嫩日上疏櫺吹盡浮雲作意晴林暝牆頭雙鶻語水清池面小魚行畦添藥品誰能別架引藤陰忽已成倚杖怡然便終日老夫那復不平鳴

又

祠祿廢人未棄官春深幽園有餘歡筍生遮道妨行藥果熟團枝礙整冠黃酒拆泥初灑灑生綃裁扇又團團退飛風際由來事莫羨青霄刷羽翰

上巳小飲追憶乾道中嘗以是日病酒留三泉江月亭悽然有感

零落殘花一兩枝綠陰庭院燕差池隔牆笑語軟韉散惆悵三泉驛裏時元微之詩三泉驛內逢上巳

晚步門外散懷

大千沙界一浮漚成壞元知不自由寓迹箇中誰耐久問君底事不歸休春波欲雨黃鸝鬧晚渡無人白憤浮七十之年何啻足戲憑藥物小遲留

又

萬化紛紛本一機不為腐骨欲安歸彭殤共盡孰脩短亮桀兩忘無是非濡首極知當痛飲翦翎那復許羣飛江郊未解春寒惡高柳吹花又滿衣

欲出遇雨

東風吹雨惱遊人滿路新泥換細塵花睡柳眠春自懶誰知我更懶於春

飢坐戲詠

衰鬢蕭然滿鏡霜一菴歸老鏡湖傍有懷每恨交朋遠無食方知日月長落筆未妨詩袞袞閉門猶喜氣揚揚晚來袖手蒲團穩笑喚兒童代夜香

蔬食

今年徹底貧不復具一肉日高對空案腸鳴轉車軸春著忽已花老筍欲成竹平生飯蔬食至此亦不足孰知讀書却少進忍飢對客談堯舜但令此道盡有傳深山餓死吾何恨

山亭

風惡闌回兩天寒勒住花尋幽扶柳栗息倦倚桂牙
分韻僧吟苦爭棋客笑譁相逢仍草草歸路並山斜
久不得張漢州書

春晚村居

儘道三巴遠那無一紙書衰遲自難記不是故人疎
一事元無可得忙悠然半醉倚胡牀牡丹枝上青春
老燕子聲中白日長身世已如風六鷁文章仍似閨
黃楊太平有象無人識南陌東阡擣麩香

遊雲門諸蘭若

花過木陰合溪雲生莫涼牛行響白水鷲下點青秧
古寺宛如昔穉松森已行 遭傍松及三十年則僧輒伐去復
種小者予自幼歲至今已見三種矣 耆年不下榻童子為燒
香

與子坦子幸遊明覺十四韻

我自何山來覓路占樓鐘聯翩兩葛巾跌宕一短笻
深谷已曠黑夕陽猶半峯堂中千歲師磊砢如古松
殘僧三四輩斗粟各自春長廊久寂寞香火亦闕供
頗聞在世時一鉢制惡龍時時出雷雨百里常年豐
宿緣忽云盡獻供無春農饒鳥晨攫斂飢鼠夜穿墻
而況我輩人生世本不逢胡不安汝分終年抗塵容
靜觀興廢事可洗芥蒂胸一笑下山去村塢煙重重

淨智西窗

一窗新綠愜幽情袖手哦詩取次成牆外蜜蜂來又
去可憐終日太忙生

小僧乞詩

風前掩菴草吹香溪上霏微雨送涼萬里安西無夢
到却尋僧話破年光

西窗睡起

老便寂寂厭紛紛借得禪房臥看雲夜宴怕逢觥錄
事秋山傭伴獵將軍餘年敢望十寒暑夙習正須三
沐熏斜日滿窗誰喚起數聲啼鳥隔溪聞

平水

旅飯風埃小市傍却呼拄杖踏斜陽可憐陌上離離
草一種逢春各短長
三月二十五夜達日不能寐

愁眼已無寐更堪衰病嬰蕭蕭窗竹影磔磔水禽聲
揮楚民方急煙塵虜未平一身那敢計雲涕為時傾

又

憂國心常折觀書眼欲枯百年終坎壞一飯且枝梧
忽忽殘春過迢迢清夜徂壯心空萬里老病要人扶
園中小飲

此老胸中萬頃寬小園幽徑日追歡寧教酒欠尋常
債取就人求本分官高柳陰濃煙欲暝叢花紅溼露
初溥時月桂方盛開要知澤國年光晚已過清明尚淺
寒

舟中夕望

船掠湖堤不入城葛巾羽扇試春行女牆迤邐橫輕
靄佛閣崢嶸倚晚晴樹冒藤花堆故繡風吹鸞語送
新聲細思造物何由報遣作閑人過此生

四月一日作

桃李逢春次第開坐看零落付蒼苔壓車麥穗黃雲
重食葉蠶聲白雨來鏡裏頓驚年事速天邊誰挽斗
杓回可憐團扇塵塵侵損又見生絳月樣裁

舟行過梅市

新換單衣細葛輕偷然隨處得閑行綠陰浦口維舟
處霽日場中打麥聲醉叟臥途知酒賤耕農滿野喜
時平老來無復雕龍思遇與新詩取次成

山園雜賦

初夏未覺暑微陰殊勝晴藤冠稱新沐蓴菜解餘醒
偶據盤陀坐還扶柳栗行平生志勛業今日一毫輕
又

藤陰初覆架菱蔓漸穿萍水繞籬根綠山從樹罅青
長辭帝所夢不媿草堂靈賴有黃醅法終年任醉醒

又
一日老一日一年貧一年元無肉食相且作地行仙
本不營三窟何須直一錢村虛櫻筍開剩放醉中顛

又
芳荃真妙士霜菊亦奇才邂逅心生敬慙慙手自培
扶持新長桂護惜欲殘梅此意何人解頽然付酒盃

西窗

西窗偏受夕陽明好事能來慰此情看畫客無寒具
手論書僧有折釵評薑宜山茗留閑啜鼓下湖蓴喜
共烹酒爵朱門非我事諸君小住聽松聲

山頭鹿

呦呦山頭鹿毛角自媚好渴飲澗底泉飢齧林間草
漢家方和親將軍霸陵老天寒弓力勁木落霜氣早
短衣日馳射逐鹿應倒金繫犀筋命有繫翠壁蒼
崖迹如掃何時詔下北擊胡却起將軍遠征討泉甘
草茂上林中使我母子常相保

夏四月渴雨恐害布種代鄉鄰作插秧歌

浸種二月初插秧四月中小舟載秧把往來疾於鴻
吳鹽雪花白村酒粥面濃長歌相贈答宛轉含幽風
日莫飛漿歸小市鼓擊擊起居問尊老勤儉教兒童
何人采此謠為我告相公不必賜民租但願常年豐

雲童童行

雲童童挾雨來雨未濡土雲已開不能為人斂浮埃
山南山北空聞雷青秧欲槁吁可哀

董逃行 讀古樂府擬作

漢末盜賊如牛毛千戈萬槩更相鑿兩都宮殿摩雲
高坐見霜露生蓬蒿渠魁赫赫起臨洮僵屍自照臍
中膏危難繼作如崩濤王朝荒穢誰復薶踰城散走
墜空壕扶老將幼山中號昔者羣枉根株牢衆憤不
能損秋毫誰知此亂亦不遭名雖放斥實遁逃平民
踏死聲嗷嗷今茲受禍乃我曹

閔雨

黃沙白霧晝常昏嗣歲豐凶詎易論寂寂不聞秧鼓
動啞啞實厭水車翻粟困久盡無遺粒淚席嘗沾有
舊痕聞道憂民又傳詔蒼生何以報君恩 有詔禱雨天
竺山

又

赤日黃塵江上村徵租惟有吏過門微風敢喜北窗
臥大旱恐非東海冤千載傳巖疑可致一篇洪範向
誰論青蔬半畝垂生死且喚鄰翁共灌園

喜雨

楚巫奔走畏天慳變化寧知轉盼間初夜電光搖北
斗父老以北斗下有電候雨 平明雲氣冒南山坐令沃野
新秧遍已覺豐年舊觀還白首老農愁破處夢回高
枕聽潺潺

初夏

已作梅黃雨猶餘麥秀寒穿林紅練帶拔地碧琅玕
酒向愁邊薄衣從病後寬所欣消渴滅乳酪正甘酸

村舍

門巷桑麻暗庖廚筍鼓香僮奴課鋤菜婢子學燒糠
貧任青春過閑知白日長非關愛疎懶無事可成忙

烏啼

野人無曆日烏啼知四時二月聞子規春畊不可遲
三月聞黃鸝幼婦閔蠶飢四月鳴布穀家家蠶上簇
五月鳴鴉舅苗稚憂草茂人言農家苦望晴復望雨
樂處誰得知生不識官府葛衫麥針有即休湖橋小
市酒如油夜夜扶歸常爛醉不怕行逢灞陵尉

感舊

廢隴荒陂浥浥畊生無勛業死無名衰頽日甚君休
問二十年前白髮生紹興壬午年三十八與查元章王嘉叟
同出垂拱殿門二君指予問曰子亦有白髮耶相與太息今三十二年
矣

讀書至夜半燈盡欲睡慨然有感

白髮蕭蕭老空谷人歎厄窮心自足東郊曉射墮錦

雉北掩春畊叱黃犢區區世事何足論未死斷知常
閉門關河好在萬里路理亂不至三家村夜分燈暗
月入戶賦詩肯道儒冠誤飢鷹勁翮高有聲橫截陂
湖正南去

遣興

壯歲元年多病長年敢自期賤貧交易絕憂患夢常悲
續食叨微祿寬心賴小兒平生鏡湖上天乞小茆茨
農舍

農舍雖云苦君恩詎可忘繭稠初滿簇麥熟已登場
渺渺開村路登登築野塘但須時雨足擊壤詠時康

四月晦日小雨

霏霏亂點暗朝光藪藪奇聲渡野塘一浦未輪新漲
綠四郊聊壓旱塵黃風生團扇清無暑衣覆熏籠潤
有香竹屋茆簷得奇趣不須殿閣詠微涼

泛舟過吉澤

蕭蕭菰蒲如菽林五月已覺秋意深煙波滅沒有漁
艇浦漱飛鳴多水禽稽山出雲極奇變陸子岸犢方
微吟一聲菱唱起何許洗盡萬里功名心

書歎

高廟衣冠月出遊中原父老淚交流諸公誰効回天
力散吏空懷血緯憂雨細漁菴晨舉網月明畊隴夜
驅牛神州克復知何日北望飛蓬萬里秋

五月得雨稻苗盡立

城郭迎龍鼓吹喧甘膏三夕慰黎元草荒常日經行
路水到前村舊漲痕黃犢盡畊稀曠土綠苗無際接
旁村家家足食山無盜安枕何勞夜閉門

薄醉遣懷

踟躕蝸廬迂蕭條鶴髮新途窮貧入夢身老病欺人
帶索忘二組羹藜抵八珍蓬窗一盃酒自覺膽輪函

劍南詩稿卷第二十九終

劍南詩稿目錄
卷第三十

五月十一日夜坐達旦 題陽關圖 新暑書
事 時雨 示客 南堂默坐 夏日 小酌

夏夜二首 看鏡二首 明妃曲 思遠遊
太息 六月二十六日夜夢赴季長招飲

夜分不寐起坐園中至旦 露坐 晨起 散
步東邨 早秋四首 七月二十一日午睡夢

泛江風濤甚壯覺而有賦 幽居戲贈鄰曲
遣興二首 步至湖上寓小舟還舍五首 送

王仲言侔泰州絕句二首 醉中作 秋夜書
感 八月三日驟涼有感 南堂與兒輩夜坐

泛舟至魯墟 園蔬薦村酒戲作 雨夕排
悶二首 雨中作 讀易 郊行夜歸有感

醉歌 買酒 秋雨數 憂國 夜意 大風
雨中作 題齋壁二首 窮途 貧病 秋晚

四首 山村書所見二首 三年前嘗與兒輩
步過東涇小嶺得勝處可營別墅貧不能成偶

復至其地悵然有感 園中秋夕 秋晴每至
園中輒抵莫戲示兒子 醉睡初覺偶作 汪

茂南提舉挽詞二首 謝徐居厚汪叔潛攜酒
見訪 喜鄭唐老相過 秋晚散步門外 寄

徐秀才斯遠并呈莊賢良器之 閨中 秋霽
晨起 筮篋謠二首寄季長少卿 悶極有

作 自詠 夢范參政 乞奉祠未報食且不
繼 山寺 太師魏國史公挽歌詞五首 三

峽歌九首 十月三日泛舟湖中作 早行
晚泊 遣懷 舟行戲書

劍南詩稿卷第三十

宋陸游務觀

五月十一日夜坐達旦

莫笑耽書不計年，寒儒業定幾生前。讀經今日韋編絕，作賦當時鐵硯穿。公路晚悲身至此，令威歸歎塚纍然。三更聽雨蓬窗底，又作鰥魚夜不眠。

題陽關圖

誰畫陽關贈別詩，斷腸如在渭橋時。荒城孤驛夢千里，遠水斜陽天四垂。青史功名常踏踏，白頭襟抱足乖離。山河未復胡塵暗，一寸孤愁只自知。

新暑書事

城中五月汗霑衣，吾愛吾廬喜氣微。珍簟含風來遠餉，輕羅疊雪出鳴機。艾人當戶佳時過，筒黍堆盤舊俗非。漫欲題詩還懶去，老來百事與心違。去歲葉正期餉，斷算得以禦暑，今年蠶事僅得五六分，遂辦暑服。

時雨

時雨及芒種，四野皆插秧。家家麥飯美，處處菱歌長。老我成情農，永日付竹床。衰髮短不櫛，愛此一雨涼。庭木集奇聲，架藤發幽香。鶯衣溼不去，勸我持一觴。即今幸無事，際海皆農桑。野老固不窮，擊壤歌虞唐。

示客

桑柘成陰百草香，纒車聲裏午風涼。客來莫說人間事，且共山林夏日長。

南堂默坐

日日樹頭鶉鴉鳴，夜夜谿邊姑惡聲。堂中老子獨無語，寂然似可終吾生。大鵬一舉九萬程，下視海內徒營營。秋蟲春鳥非我類，何至伴渠鳴不平。

夏日

燕子生雛梅子黃，斷雲殘雨過林塘。孤舟正作客筇，夢九陌難隨襪襪忙。團扇興來閑弄筆，寒泉漱罷獨

焚香太平處處熏，風好不獨宮中愛日長。

小酌

白髮蕭然海上村，猶能草草置清樽。今年項里楊梅熟，綠李來禽不足言。

夏夜

露溼芙蓉冷，月明薜蘂香。殘醉吹欲無，聽聽髮根涼。豈惟棄世事，形影亦相忘。空憶南山下，新秋射虎場。

又

我昔在南鄭，夜過東路谷。平川月如霜，萬馬皆露宿。思從六月師，開輔談笑復。那知二十年，秋風枯首瘠。凋盡朱顏白，盡頭神仙富貴兩悠悠。胡塵遮斷陽關路，空聽琵琶奏石州。

又

七十衰翁臥故山，鏡中無復舊朱顏。一聯輕甲流塵積，不為君王戍玉關。馬正惠公喜功名，每日幸未甚，衰若有邊警，願預征行，得夏馬數疋，輕甲一聯足矣。

明妃曲

漢家和親成故事，萬里風塵妾何辜。掖庭終有一人行，敢道君王棄蕉萃。雙馳駕車夷樂悲，公卿誰悟和戎非。蒲桃宮中顏色慘，雜難鹿塞外行人稀。沙磧茫茫天四圍，一片雲生雪即飛。太古以來無寸草，借問春從何處歸。

思遠遊

我志日已衰，詩亦無傑句。正如隨翅鶴，悵望遼海路。雖云須藥物，幸未迫霜露。裂裳裹兩踵，此詩亦已屢。嗟峨青城雲，慘淡蟠冢樹。秋風吹短裘，萬里入芒屨。

太息

太息重太息，吾生誰與歸。那知莫景迫，但覺故人稀。避禍歸猶困，憂讒默亦非。今年貧徹底，擬賣舊漁磯。六月二十六日夜夢赴季長招飲。少城駿馬逐春風，二十年間萬事空。清夢都忘雙鬢

改繡筵還喜一尊同烏巾掩冉簪花重羯鼓敲鏗列
炬紅安得此散真入眼碧油幢擁主人翁

夜分不寐起坐園中至旦

涼氣蘇衰疾幽情入杖藜月驚孤鶴起天帶衆星西
松菊今彭澤山川古會稽清吟殊未愜嗟嗟已晨雞

露坐

此手乃可憐經月不把酒著書又苦晚何以圖不朽
空庭坐二更磊落垂北斗向來歷關河萬里空回首
豈知三十年竟作越中叟後生雖滿眼非復舊交友
形體迫衰謝妻子亦何有悵望懷古人吞聲死農畝

晨起

心安已到無心處病去渾如未病前晨起更知秋色
好一庭風露聽鳴蟬

散步東邨

偶從北崦繚東崗曳杖行歌踏夕陽一徑入雲多鹿
跡數家臨水共漁梁坐風蕭瑟知秋早社酒淋漓喜
歲穰鄰曲不須憐老僮尚能尋句荅年光

早秋

涼颺浙浙撼庭柯微雨蕭蕭集浦荷艸閣檐虛覺山
近蓬窗地住得香多謀身自拙窮無鬼閉戶長閑睡
有魔臺省諸公盛冠劍固應老子得婆娑

又

秋入房櫳夜漸長紗厨留暈怯新涼蜜光得意穿簾
隙桐葉知時拂井牀世事本來誰得鹿人生何處不
亡羊燈前笑向吾兒說又過銅匱半篆香

又

落魄巴江號放翁斯名歲晚亦成空酒醒遙夜孤舟
兩睡美清秋一榻風敲浪千重無死地神丹九轉有
新功雲端不遇飛仙過誰顧幽人寂莫中

又

貂裘塵土憶東周瓜隴風霜隱故侯賴似老雞頻失
日衰如蠹葉早知秋壺觴非復平生友歲月空添客

子愁病起筆端猶健在未妨揮灑賦登樓

七月二十一日午睡夢泛江風濤甚壯覺而有

賦

夢中不記適何邦風飽蒲帆入大江久矣眼中無此

快蹴天雪浪濺船窗

幽居戲贈鄰曲

莫年遠屏天所借落佩倒冠如得謝雖無壺酒助歌
呼幸有蠹書供枕藉市聲不聞耳差靜車轍掃空身
轉暇雨慳葵葉未吐甲露重榴房初坼罅深紅菱角
密覆水爛紫蒲桃重垂架直令掩關避世俗未害煎
茶喚鄰舍蕭蕭雞犬衡門晚寂寂燈火幽窗夜勸君
切勿縱高談性命如絲不禁嚇

遺興

失馬真成福移山未必愚故園三徑廢餘俸一錢無

又

望道心常渴觀書眼欲枯宦遊歸自好不必為尊鱸
療飢惟恃粥動步已須人欲午猶支枕經旬不過鄰
鷓棲寒自穩鷗沒遠難馴莫笑謀身拙黃冠學季真

步至湖上寓小舟還舍

淒涼懷古地慘澹莫秋天紅樹秦馳道青山禹廟塢
湖風飄斷角墟日起孤煙老恨功名晚無人共著鞭

又

山居苦無事攜稚出門行酒賤逢人醉農閑到處耕
巷牛聽晚笛池鷺唼枯萍東望生秋興樓臺壓綠城

又

病墮支離境閑尋漫浪遊湖平天鏡曉山峭石帆秋
賒酒家家許看花處處留歸途倦扶杖却上釣魚舟

又

萬壑爭流地身閑得縱觀未能容蟹舍聊得寄漁竿
遠浦樵風急空山笠石寒踟躕不知晚磔磔有歸翰

又

細浪隨搖櫂新涼入岸巾斷行初到雁空擔莫歸人

漫道貧非病誰知賴是真疎鐘起詩思迢遞度煙津
送王仲言倅泰州絕句

汝陰太史萬籤藏酸棗先生六世芳豹尾屬車留不住
却尋陳迹海陵倉 晁景迂與先太史有海陵酬唱

紫薇傑作傳千載物色分留待下車老病難陪曳尾
客因來時寄一行書 劉賈甫書為泰倅

醉中作
昨艫為家雲作友流年盡付樽中酒清歡穿林鸞鳳
吟草書落紙龍蛇走人間無復王景略千載風雲常
寂寞安得熊羆十萬師蹴踏幽并洗河洛

秋夜書感
闌干斗插西慘淡河絡角開歲財屬爾草木忽搖落
平生歷畏塗赤手犯蛟鱗幸收垂盡日歸臥一丘壑
鄉鄰怪此老航躡尚如昨使無湖海寬朝市何處著
諸公方衮衮一士要誇誇謀食古所羞終身美藜藿

八月三日驟涼有感
殘暑侵人畏汗露清秋乍見月纖纖自燒熱火添香
獸旋把寒泉注硯蟾佳客誤占螢入戶遠書空王喜鵲
鳴簷悠然獨對清燈臥誰念柴門老病兼 俗以螢飛入
室為有客至之兆

南堂與兒輩夜坐
殘暑初歸肺病蘇胡床清夜集前除風高木葉危將
脫月上天河淡欲無鶴影繞枝棲未穩荷盤擎露重
相扶凄然又起流年感兩鬢如蓬日夜枯

泛舟至魯墟
南蕩東陂弄夕霏葛巾鶴氅試秋衣纖纖新月迎船
出兩兩珍禽背水飛病思漸蘇開酒戒宦情已絕謝
塵轍郊居是處堪乘興不怕城笳苦喚歸

園蔬薦村酒戲作
身入今年老囊從早歲空元無擊鮮事常作毀臠翁
道有秋菰白羹惟野蕘紅何人萬錢筋一笑對西風

兩夕排悶
買牛耕剡曲舉世笑迂疎流落愈憂國衰殘猶讀書
滔滔安稅駕耿耿獨愁余破屋秋多雨情懷用底攜

又
煙雨暗郊墟頽然臥草廬蟲喧夢回枕燈伴讀殘書
短褐頻關念荒畦久廢鋤更堪湖水漲累日食無魚

湖水泛則魚不可捕
社食醅香燕子歸陰風吹雨暗郊扉疏溝園叟方攜
錫采藥蠻童已溼衣山雉尾垂衝鷺去水雞翅重踞
波飛憑闌一笑君知否肺渴秋來勢漸微

讀易
揖遜干戈兩不知巢居穴處各熙熙無端鑿破乾坤
秘福始羲皇一晝時

郊行夜歸有感
小市歌呼散幽人悄獨行斷鴻沙際冷重露草根明
信古癡常絕酬恩命本輕還家掩屏臥衰涕浩縱橫

醉歌
三十六策醉特奇竹林諸公端可師秋風蕭蕭吹鬢
絲蟹螯正可左手持醉倒村路兒扶歸瞠兒不識問
是誰浩歌起舞夜何其北斗磊落明河移貴人惜醉
渠自癡黃金絡馬誇市兒一朝禍來莫支持新州如
山不可移

買酒
放翁病起不禁愁買酒看山自獻酬八月吳中未搖
落誰令衰鬢早知秋

秋雨數
淙淙雨聲瀉高秋稻梁浸瀾雨不休志士仁人萬行
淚孤臣孽子無窮憂一身窮困未暇恤如此無事理
有不聖言古訓舉不驗簡編可用汗馬牛嗚呼有粟
吾得食夜睡何時得安席我生猶及宣和年建炎以
來身所歷高皇一言感天地盜賊千羣掃無迹疽囊

劍南詩稿 卷之三十一

三二九

雖慘固可醫誰為聖代施鍼石

憂國

恩許還山已六年誓憑耕稼饒華顛養心雖若冰將
釋憂國猶虞火未然議論孰能忘忌諱人材正要越
拘攣羣公亦采芻蕘否貞觀開元在目前

夜意

居家元是客在俗亦如僧點滴檐間雨青熒帳外燈
壯心終蹭蹬去日捷飛騰不及寒沙雁來時下杜陵

大風雨中作 甲寅八月二十三日夜

風如拔山怒雨如決河傾屋漏不可支窗戶俱有聲
烏鳶墮地死雞犬噤不鳴老病無避處起坐徒歎驚
三年稼如雲一旦敗垂成夫豈或使之憂乃及躬耕
鄰曲無人色婦子淚縱橫且抽架上書洪範推五行

題齋壁

閉門無事不勝閑心境超然一室寬香岫火深生細
靄硯池風過起微瀾睡餘但欲依書几坐久還思弄
釣竿擾擾平生成底事鏡湖歸隱老黃冠

又

手斲雲根結草廬平生心事滿無餘二升菰米晨炊
飯一椀松燈夜讀書天理直須閑處看人謀常向巧
中疎煙波有趣君知否裂網伸鉤也得魚

窮途

窮途多感慨老境少知聞酒裏閑消日書中自策勳
全軀希碌碌掃軌厭紛紛每愧吾鄉老頭童念致君
先友傳公給事莫年髮髯每酒酣脫帽覽鏡數曰吾其已乎

貧病

行年七十尚攜鋤貧悴還如白紵初好事鄰僧勤送
米過門谿友強留魚客來旋過牆頭酒睡起閑抽架
上書要信榮枯元不動曾中浩浩著空虛

秋晚

春粳入甑香炊玉壓酒鳴槽滴碎珠甲第朱門漫豪
侈山家風味定應無

新築場如鏡面平家家歡喜賀秋成老來懶惰慚丁

又

壯美睡中聞打稻聲

又

秋菰出水白於玉寒薺繞牆甘若飴正是長齋豈不
可凜然大節固難移

又

竹竿坡面老別駕飯顛山頭瘦拾遺自古詩人例如
此放翁窮死未須悲

山村書所見

老枳垂藤晝常黑雛鷹聲作嬰兒啼伐薪歸來遇急
雨石路下山如踏梯

又

荒坡茫茫牧牛童板角上背捷如風腰間一枝摺枯
竹橫吹短笛過村東

墅貧不能成偶復至其地悵然有感

前年度嶺踏斜陽曾卜松陰置草堂只倚氣吞雲夢
澤竟無錢買雪堆莊煙脂菱角空頻摘火齊楊梅已
再嘗事不如心居十九往來常羨捕魚郎 山多楊梅有

合抱者下臨鏡湖皆萎蕩

季秋哉生明風露正悽冷放翁澹無事樂此清夜永
飢鷹棲不穩勁翅起東嶺湖邊千樹柳何處寄幽影
人生寓宇內俯仰一炊頃此心無媿負簞食均五鼎
許身輩稷高終亦輸箕穎天風倘可乘采蓮登玉井

園中秋夕

秋晴每至園中輒抵莫戲示兒子
老翁七十如童兒置書不觀事遊嬉園中壘瓦強名
塔庭下埋盆聊作池青蒲紅蓼共掩映病棕瘦竹相
扶持衰頹已作老驥臥來往尚如黃犢馳但知身存
百無害莫問老健能幾時汝勤挾策乃堪笑且共飯
豆羹秋葵

醉睡初覺偶作

小圃醒還醉幽窗起復眠
虛明炷香地清潤斷花天
老去才雖盡窮來志益堅
阿瞞那可語平日笑橋玄

汪茂南提舉挽詞

學已三冬富書猶萬卷
藏名場雖踏蹤朝論極
揄揚小試儒袴詠遂辭
鷓鴣驚行秋風九原路
挽鐸倍淒涼

又

住者紹興末江淮聞戰
聲上流煩舊德下客辱
深知陳迹成今古追懷
每涕洟郎君雖不識
撫事亦增悲先相公督
師荆襄游首蒙招致暮
府會留樞屬不克行

謝徐居厚汪叔潛攜酒見訪

我雖生亂離猶及見前
輩衣冠方南犇文獻往
往在幸供掃灑役迹忝
諸生內話言猶在耳造
次敢不佩殘年趨死近
孤學與時背妄出更何
求終老事耕未史君稽
古學力大障橫潰廣文
亦偉士名字震當代
同舟肯過我凜與前脩
配憂時抱忠鯁論事極
慷慨嗟予雖益衰耳目
幸未廢何當卜鄰牆早
莫聆警效喜鄭唐老相
過

鄭子有書癖對書百事忘頭亂不暇櫛鬢冷不暇嘗持此金石心力求古文章吟哦屈宋作蚤夜聲琅琅方揮却日戈恥窺及肩牆不見今六年所得非復常扁舟夜過我劇論神激揚徐出二三篇穉米於太倉已足起衰懦黑絲生鬢霜使得盡見之殆可鍼膏肓願子繼自今勿惜傾錦囊因來數為寄歲晚慰所望

秋晚散步門外

栗里歸栽菊青門隱賣瓜
羸軀病天色衰鬢怯年華
野曠鳥聲樂溪清雁影斜
門前秋潦退也擬築堤沙
潦水壞道數丈方與鄰曲
共修之

寄徐秀才斯遠并呈莊賢良器之

徐子作別十年餘無人可
寄一紙書閑門笑睡畏剝
啄自怪一念常關渠西風
蕭蕭吹槁葉秋光正滿
蝸牛盧讀書易倦出無友
撫几憮恍空愁予蜀莊之
孫

住南郭亦復迹遠非情疎
何時同載過老子共飯赤
米羹青蔬

閑中

閑中高趣傲羲皇身臥維
摩示病床活眼硯凹宜墨
色長毫甌小聚茶香門無
客至惟風月案有書存但
老莊問我東歸今幾日坐
看庭樹六番黃

秋霽

驅除雲霧極知難敢意天
公不作怪汛掃中庭待明
月攀躋危榭望青山取琴
理曲茶煙畔看鶴梳翎竹
影間不為新晴宜著句擬
將幽事破除閑

晨起

晨起梳頭拂面絲行年七
十豈前期此生猶著幾兩
屐長日惟消一局棋空釜
生魚忍貧慣閉門羅雀與
秋宜區區名義真當勉正
是先師戒得時

笠篔簹二首寄季長少卿

庭樹非不榮霜貫萬葉枯
朋友豈我棄漸遠勢自疎
中夜起太息發篔簹舊書
塵昏蠹蝕損行缺字欲無
一讀色已變再讀涕淚濡
卷書置篔簹中寧使飽蠹
魚

又

少壯離別時回顧日月長
會合終有期何恨天一方
我齒如敗屐君髮如新霜
餘日復幾何萬里遙相望
欲泣老無淚欲夢不可常
寄書何時到江漢春茫茫

悶極有作

貴已不如賤狂應又勝癡
新寒壓酒夜微雨種花時
堂下藤成架門邊枳作籬
老人無日課有興即題詩
自詠

常記當年入洛初華燈百萬擲樽蒲平生意薄刀筆吏投老身為山澤臞已罷向空書咄咄尚能擊缶和鳴鳴今朝客至無尋處正伴園丁斲芋區

夢范參政

夢中不知何歲月長亭慘
淡天飛雪酒肉如山鼓吹
喧車馬結束有行色我起
持公不得語但道不料今

遽別平生故人端有幾長號頓足淚迸血生存相別尚如此何況一日泉壤隔欲懷雞黍病為重千里關河阻臨穴速死從公尚何憾眼中寧復見此傑青燈耿耿山雨寒援筆詩成心欲裂

乞奉祠未報食且不繼

富貴常求繫日繩阮窮却羨棄家僧強顏始覺貧為害對鏡方嗟老可憎出戶風霜欺短褐讀書父子共昏燈聖師夢奠二千載一卷遺言終可憑

山寺

信步得佳寺入門吹斷香林深栗鼠健屋老瓦松長吊古增悽愴憑高寄慨慷忽忽與未盡新月映方塘

太師魏國史公挽歌詞

早擅淵源學常懷懇款忠雲龍際千載典冊冠三公論諫寧中止謀謀不苟同此心誰復識志士泣秋風

又

位歷公卿貴身兼將相榮珥貂儀一品錫帶價連城入告推忠厚躬行本志誠斯民何以報萬里徧春暉

又

道德補天石勛勞夾日龍犯顏無不盡造膝略皆從歲貢來戎幣秋防滅塞烽畫圖麟閣上猶足折遐衝

又

舊弼初收召惟公力贊揚都亭移供帳全魏徹封疆大度寧猜阻羣言自中傷拳拳虛左意猶可質穹蒼公初拔附即力薦張忠獻公于壽王如賜館都亭驛起封魏國公皆公

密奏且書乞用張公為首相而已佐之

又

攏干勞久戍大將未班師抗議回天意忘身為聖時人心嶮莫測時事遠難知汗簡方傳信孤生欲語誰吳璘戍德順軍師老欲還不敢自請公為相察其情即力請班師西鄙賴以無事後議者乃指公為棄地公不辨也

三峽歌

乾道庚寅予始入蜀上下三峽屢矣後二十

五年歸畊山陰偶讀梁簡文巴東三峽歌感之擬作九首實紹熙甲寅十月二日也

神女廟前秋月明黃牛峽裏莫猿聲危途性命不容恤百丈牽船侵夜行

又

不怕難如竹節稠新灘已過可無憂古妝我我一只髻木盃銀盃邀客舟

又

十二巫山見九峯船頭彩翠滿秋空朝雲暮雨渾虛語一夜猿啼明月中

又

錦繡樓前看賣花麝香山下摘新茶長安卿相多憂畏老向夔州不用嗟

又

險詐沾沾不媿天文情回首薄如煙東遊萬里雖堪樂灑灑瞿唐要放船

又

蠻江水碧瘴花紅白舫黃旗無便風滄萬四時常避水棚居高出亂雲中

又

亂插山花簪子紅蠻歌相和瀼西東忽然四散不知處踏月捫蘿歸峒中

又

萬州溪西花柳多四鄰相應竹枝歌問君今夕不痛飲奈此滿川明月何

又

我遊南賓春莫時蜀船曾繫挂猿枝雲迷江岸屈原塔花落空山夏禹祠

十月三日泛舟湖中作

桑落可釀酒艸枯可呼鷹平生當此時意氣十倍增即今境界別千錢買短篷鏡湖三百里往來寒日中小甌炊彫胡玉食無此美臥聞水鳥聲世念去如洗

知此恨太晚享此恐不足南山忽已昏更就漁村宿
早行

寒漏參差斷晨雞次第鳴匆匆半枕夢草草一盃羹
澤國多逢雨閑人不計程雲間出寸塔迎我有餘情

晚泊

樓上鳴鳴角橋邊點點燈聚沙新到雁趁渡獨歸僧
日隱山光暗天低海氣蒸居人笑老子醉髮亂鬢聾

遣懷

莫年世事轉悠悠攪涕悽然類楚囚不道渾無排遣
處病觀周易悶梳頭

舟行戲書

世事無窮膏火煎羈魂病骨久羸然覺時不及夢差
樂死去始嗟生可憐慷慨知非請纓日推移忽及挂
冠年揚帆海浦差強意臥看秋濤蹴遠天

劍南詩稿卷第三十終

劍南詩稿目錄
卷第三十一

久雨 偶得長魚巨蟹命酒小飲蓋久無此舉
也 泛舟湖山間有感 望永思陵二首 糟
蟹 霜夜三首 書室明燠終日婆娑其間倦
則扶杖至小園戲作長句二首 初冬 買屐
十月晦日作 贈道友五首 示子聿 老
境 予所居三山在鏡湖上近取舍東地一畝
種花數十株彊名小園因戲作長句 被命再
領沖佑有感 冬夜戲書三首 幽居二首
送蘇召叟秀才入蜀效宛陵先生體 寄題哲
上人漫堂 冬夜獨酌 夜坐燈滅戲作 艾
如張 上之回 雜詠園中菓子四首 閉戶二
首 連日大寒夜坐復苦飢戲作短歌 園中
對酒作 孝宗皇帝挽詞三首 小兒入城
夜坐二首 縱筆五首 郊行夜歸書觸目
閉戶 十一月五日夜半偶作 晴和出遊湖
山間 病思 寄子虞 紙閣午睡二首 夜
分復起讀書 效蜀人煎茶戲作長句 書逆
旅壁 癩趣 閒中富貴二首 書近況寄蜀
中道舊 醉中自贈 明日自和 雪中至近
村 歲莫感懷以餘年諒無幾休日愴已迫爲
韻十首 桐江哲上人以端硯遺子聿纔寸餘
而質甚奇天將雨輒先流泚予爲效宛陵先生
體作詩一首 立春前三日作 贈應秀才
春耕 首春連陰 夜坐 新春 得季長書
追懷南鄭幕府慨然有作 正月十一日夜夢
與亡友譚德稱相遇於成都小東門外旣覺慨
然有作 送陳吏部還朝 觀棋 春行 兩
鬢春色粲然喜而有賦 幽思 贈持鉢道人
柳二首 山園雜詠五首

劍南詩稿卷第三十一

宋陸游務觀

久雨

黃葉雨中盡飢鴻煙際來時艱歲仍惡身死病相催
西隸無行路南山有疾雷囊空罷沽酒一醉轉悠悠
偶得長魚巨蟹命酒小飲蓋久無此舉也

老生日日困鹽齋異味樓魚與楮鷄敢望槎頭分縮
項況當霜後得團臍堪憐妄出綠香餌尚想橫行向
艸泥東嶼夜來梅已動一樽芳醞徑須攜

泛舟湖山間有感

我似人間不繫舟好風好月亦閑遊歸來華表千年
鶴滅沒煙波萬里鷗歲晚客那復數時艱接緯未
忘憂野人只欲安耕釣江左夷吾可見不

望丞思陵

綠衣迎拜屬車塵艸木曾霑雨露春三十五年身未
死却為天下最窮人

又

肝食憂民宴樂疎太倉幾有九年儲賈生未解人間
事北闕猶陳痛哭書紹興庚辰辛巳間游屢賈誓言略蒙施用

糟蟹

舊交髯簿久相忘公子相從獨味長醉死糟丘終不
悔看來端的是無腸

霜夜

梅花欲動夢魂狂橙子閑搓指爪香莫怪艸堂清到
骨一梳殘月伴新霜

又

黃甘磊落圍三寸赤蟹輪囷可一斤更喚東陽麴道
士與君霜夜策奇勳時東陽餉酒

又

澹月窺窗似有情更堪梅影向人橫放翁不受天魔

惱獨擁青氈睡到明

書室明煖終日婆娑其間倦則扶杖至小園戲

作長句

放翁老手竟超然俗子何由與作緣百榼舊曾誇席
地一窗今復幻壺天夢回橙在屏風曲雨霽梅迎拄
杖前吾愛吾盧得安臥笑人思穎憶平泉李衛公憶平泉山居殿陽公思穎詩皆數十篇

又

美睡宜人勝按摩江南十月氣猶和重簾不捲留香
久古硯微凹聚墨多月上忽看梅影出風高時送鴈
聲過一杯太淡君休笑牛背吾方扣角歌

初冬

老客人間百事慵樂哉閉戶過今冬朝爐獸炭騰紅
焰夜榻蠶氈擁紫茸蠟刺圻蓬新栗熟鷓鴣雛弄色凍
醅濃題詩正自消閑日本不爭先萬戶封

買屐

一兩三日泥泥乾雨還作出門每有礙使我慘不樂
百錢買木屐日日繞村行東阡與北陌不問陰與晴
青鞋豈不佳要是欠耐久何當踏深雪就飲湖橋酒
十月晦日作

藤疎不覆架桐落欲平溝閨歲風霜晚衰年日月道
觀書方坐石把釣又登舟不是無羈束閑人得自由

贈道友

凡骨已蛻身自輕勃落葉上行無聲華陰市樓醉舞
罷却上蓬峯看月明

又

憶在長安爛漫遊大明宮闕與雲浮今朝偶上慈恩
塔北望茫茫禾黍秋唐舍光殿與慈恩塔南北相直

又

當時辛苦學長生準擬中原看太平今日醉遊心已
足一瓢歸去隱青城

又

足一瓢歸去隱青城

二孟兀兀復騰騰服氣燒丹總不能借問生涯在何許孤舟風雨伴漁燈

又

零落殘碑艸棘中北邙蕭瑟又秋風舊時憶在鷓行裏幾見宣麻拜相公

示子聿

儒林早歲竊虛名白首何曾負短檠堪歎一衰今至此夢回聞汝讀書聲

老境

平生百不遂惟有老如期眼澀觀書夜心衰把酒時僧分新掘藥客誦舊題詩四十年前我回看定是誰

予所居二山在鏡湖上近取舍東地一畝種花數十株疆名小園因戲作長句

出郭西南十里過小園風月得婆娑翠屏三扇恰相倚玉鏡一奩誰為磨投鐻未嫌衰鬢白插花聊喜醉

顏酡耶溪更盡青鞋與免使將軍怒脫靴

被命再領冲佑有感

殘骸日益衰晨夜抱疾痛地爐得微火終日不烹動讀書舊成癖今但坐作夢未能追鴻冥乃復分鶴俸風霜舍邊柳合抱皆手種眼中人盡非欲話誰與共

冬夜戲書

東歸剡曲寄彷彿閑日雖冬亦自長梅瘦有情橫淡月雲輕無力護清霜長魚通印鹽花白珍鮓披繇麴慘香一飽喟然還自憫疆顏垂老食官倉

又

將挂衣冠彊小留期年畢竟是歸休青氈獨擁欺霜夜濁酒頻傾洗客愁鶴影冷翻丹井月雁聲遙帶玉關秋一生自笑閑中過不為功名也白頭

又

老樹霜餘已盡紅縱橫落葉滿庭中一鉤澹澹西南月萬鼓憑憑東北風賒酒每慚添舊券讀書何計策新功蓬窗坐睡摧頹甚隔竹敲茶積小童

幽居

落葉紛可掃幽花寒自開困空無雀噪門靜有僧來孤學時方棄窮途勢莫回呼兒了租賦莫待縣符催

又

雨霽雞栖早風高雁陣斜園丁刈霜稻村女賣秋茶缺井磨樵斧枯桑繫釣槎客來那用問此是放翁家

送蘇召叟秀才入蜀効宛陵先生體

士勇赴知己義重身固輕尊公況有命子得辭此行結廬出門去迢迢過蠻荆泝江卜風色入峽聽猿聲萬里一紙書南寄孤雁征山陰在何處計子難為情願言早來歸鄰曲當出迎檣舟柯橋市一榼手自傾

寄題哲上人漫堂

老子從來任運行愛君堂以漫為名北邙大有英雄骨枉用工夫過一生

冬夜獨酌

寒水茫茫浸月明疎鐘杳杳帶霜清一樽濁酒有妙理十里荒雞非惡聲物外雖增新跌宕胸中未洗舊崢嶸頽然坐睡蒲團穩殘火昏燈伴五更

夜坐燈滅戲作

冷飯黃齋傲太平鬢絲原不為愁生忽因燈死得奇觀明月滿窗梅影橫

艾如張

錦膺繡羽名山雞清泉可飲林可栖稻梁滿野棄不啄雖有奇禍無階梯東村西村煙雨晚蕭艾離離林薄淺翩然一下駭機發汝雖知悔安能免漢家天子南山下萬騎合圍窮日夜犬牙鷹爪死不辭觸機折頸吁可悲

上之回

咸陽宮闕天下壯五更衛士傳雞唱重門洞開鑿駕出回中更在雲霄上雲霄一路蟠青冥車聲隱麟駝雷震窳妃穿仗王母下何必軒皇居大庭君王遊幸無終極萬年盡是歡娛日文成已死方不鮮茂陵松

柏秋蕭瑟

雜詠園中菓子

不酸金橘種初成無核枇杷接亦生珍產已從幽圃
得濁醪仍就小槽傾

又

漿石榴隨鱸作節蠟櫻桃與酪同時兩株偶向池邊
種可喜今年墜折枝

又

架垂馬乳收論斛港種雞頭采滿船鼉鼎若爲占食
指麴車未用墮饒涎

又

山杏谿桃本看花纍纍成實亦堪誇鹽收蜜漬饒風
味送與山僧下夜茶

閉戶

聲利能令智者愚放翁閉戶養迂疎地爐枯葉夜煨
芋竹算寒泉晨灌蔬狗俗不如飄著鸞愛山只合削
騎驢今朝更有欣然處萬里知心一紙書蜀兵來得張
季長歸唐安江原書

又

冠蓋長安幾番新放翁只似向來貧滿窗紅日價無
敵半榼新醅香動人宴坐心光無被障橫眠睡息自
清勻世間不用詢名字身是無懷上古民

連日大寒夜坐復苦飢戲作短歌

翁飢不能具小兒凍何由成復禪藏書充棟讀至
老固願少出蘇黎元念當萬事度可否肯使一恨彌
乾坤古來賢達多晚謬千載遺笑綺與園老翁肝心
等鐵石他年骨朽此固存村沽雖薄亦取醉起看江
月傾金盆

園中對酒作

僂僂衰翁雪滿顛愛花耽酒似當年雖無錦障七十
里也有青銅三百錢數掩竹籬分小徑一泓沙井貯
寒泉栽紅接白株株活坐擁春工太半權

孝宗皇帝挽詞

大道本生知崇高志不移凝神超事物觀妙極希夷
訪藥三山遠遺弓萬國悲神孫昔鍾愛天作太平基

又

代邸膺圖日臨朝涕泗橫誠心非外飾至孝化羣生
高廟聯龍衰思陵接柏城平生奉親意一理貫幽明

又

便殿諮詢早深宮宴樂稀欲頒傳位詔猶索未明衣
壽損名方永身癯國愈肥孤臣泣陵柏心折九虞歸

小兒入城

小兒破帽出求師老父寒爐夜畫詩不耐青燈寫孤
影聊呼薄酒慰長飢我今僅守詩書業汝勿輕捐少
壯時但恨北風如許惡湖橋歸路想流澌

夜坐

萬燈披書卷孤螢引篆香病思無事樂老悔少年狂
南渡衣冠盛西征道路長如今俱夢破高枕看人忙

又

葉盡木無聲天高夜自明映窗燈半滅掠野雁孤征
瓦裂人間事雲浮身後名惟應托長鑱寂寞送浮生

縱筆

情游不能耕心媿新春白歎傲茅三間主人終勝客

又

朝士腰下黃山僧鼻端白放翁俱笑汝飽飯作閑客

又

溫溫地爐紅皎皎紙窗白忽聞啄木聲疑是敲門客

雪晴蓼甲紅雨足韭頭白雖無萬錢具野飯可留客

小兒勿大勤使汝髮早白長爲南畝民殊勝東閭客

郊行夜歸書觸目
老翁病起厭端居隨意東西不問途霜野艸枯鷹欲
下江天雲溼雁相呼空垣破竈逃租屋青帽紅燈賣

酒爐未畏還家踏泥潦園丁持炬小兒扶

閉戶

老人閉戶動經月懶就東家借蹇驢身後有名豈如
酒體中不佳聊讀書秦王開圖見七首漢相狗市載
廚車人間憂怖古如此莫怪荒畦常荷鋤

十一月五日夜半偶作

艸徑江村人迹絕白頭病臥一書生窗間月出見梅
影枕上酒醒聞雁聲寂寞已廿千古笑馳驅猶望兩
河平後生誰記當年事淚濺龍牀請北征

晴和出遊湖山間

日出氣稍和呼船渡煙津微風西南來水面生魚鱗
適此一日佳聊娛百年身捋鬚俯船舷一笑彼何人
閨餘春事早已覺陽和新梅花處處開幽香襲衣巾
久病喜我出問訊傾鄉鄰舟回不須速看涌白玉輪

病思

賣劍還山學老農不堪衰與病交攻將軍閉戶方鋤
菜處士攜家欲賃春殘齒彊留終號疏病腰扶拜苦
龍鍾壯遊誰信梁州日大雪登城望夕烽

寄子虞

老自安故鄉况復觸罪罟五年三奉祠每請幸聽許
貧家似破屋隨事且撐拄雖殊乞墾肉已近掘野鼠
平生膽力薄不敢犯張禹有時一言失恐懼氣如縷
念此思挂冠白首冀安處吾兒哀乃翁歲莫忍羈旅
何時得斗粟歸舍聊共煮便艸北關書乞骸歸卒伍

紙閣午睡

紙閣紙爐火一杵斷香欲出礙蒲簾放翁不管人閒
事睡味無窮似蜜甜

又

黃紬被煖青氈穩紙閣油窗晚更妍一飽無營睡終
日自疑身在結繩前

夜分復起讀書

愁極不成寐起開窗下書似囚逢縱釋如瘡得爬梳

燈火夜過半風霜歲欲除平生濟時意却作愛吾廬

效蜀人煎茶戲作長句

午枕初回夢蝶牀紅絲小磴破旗槍正須山石龍頭
鼎一試風爐蟹眼湯巖電已能開倦眼春雷不許殷
枯腸飯囊酒盃紛紛是誰賞蒙山紫筍香

書逆旅壁

百憂襲莫年懷抱日騷屑雖云歸故鄉何異萬里客
窮冬迫寒鐵凜有在陳厄駕言適近村慘慘天欲雪
人沽村市酒馬齧山坡麥旅炊雜沙土得飽何暇擇
手斲若龜北面槁無人色士窮自其分所幸全大節
功名已甑墮身世真瓦裂不學玉關人飢鷹方夜掣

懶趣

謝病掩柴荆年來懶趣成舌根茶味永鼻觀酒香清
已矣馳驅息悠然磊砢平高眠得三昧夢斷已窗明

閑中富貴

要信人生各有緣閑中富貴亦關天綠窗靜對千梢
竹翠寶新疏一脈泉愛百衲琴常鎖匣買雙鉤帖不
論錢箇中得意君知否不換金貂與玉蟬

又

天為疎慵剩與閑一菴青嶂白雲間衲僧過別歸廬
阜羽客來尋說華山冬筍生林龍鱗鱗寒泉落礫珮
珊珊俗人自是無因到雖設柴門不上關

書近況寄蜀中道舊

遺事復遺榮空齋一榻橫宿醒投未正新句煨初成
山崦傳梅信天窗送雪聲戲題勻碧紙遣鶴報青城

醉中自贈

富貴猶宜早退休一生齟齬更何求賦形未至欠壬
甲語命寧須增斗牛粟里收身貧亦樂平陵埋骨死
無憂狂歌醉舞真當勉剩折梅花插滿頭

明日自和

二頃元知未易求不如馬磨學文休正令未死有幾
日那得殘年叢百憂霜野挾弓朝射雁煙陂吹笛莫

呼牛與來醉倒尋常事莫信兒童笑白頭
雪中至近村

荒山風雪歲將殘貨粟迢迢犯苦寒急燎征裘憩牛
屋旋沽村酒挂驢鞍清貧徹骨初無憾老健逢人疆
自寬深夜還家未能睡解囊吹火取詩看

歲莫感懷以餘年諒無幾休日愴已迫爲韻

昨莫送客歸短櫂過魯墟故廬有遺趾青山遶牆隅
桑竹雖鬱然舊植已無餘瓦礫不可求而況屋壁書
繫舟問鄰人搔首久躊躇行當挂朝衣躬耕返吾初

又

我家釋未起遠自東封前詩書守素業蟬聯二百年
長老日零落念之心惕然每恐後生輩或爲利欲遷
我少亦知學踏踏及華顛認過豈不力壽非金石堅

又

我壯已早衰晨鏡每惆悵藥物姑自持耆老曷敢望
造物有乘除貧悴博無恙歸鄉更多感朋舊盡凋喪
客來多避席謂我丈人行此意詎敢忘報子以直諫

又

士生始志學固爲聖人徒人人可稷高世世皆唐虞
仰事與俯育治道無絕殊孔孟之所傳世俗顧謂迂
申韓尚刻薄老莊競虛無爾車非不良盍行九軌途

又

江左謝太傅高臥頗自喜東山豈不佳惜也終一起
阿堅偶自敗元子亦適死區區疑謗中勳業端有幾
當時嘲小艸雖戲實中理所以山中人至今笑園綺

又

家世本無年甲子近一周小子獨何幸七十今平頭
往者收朝迹亟欲求歸休厚恩許奉祠得祿歲愈憂
三釜不及親顧爲妻子留何由洗此媿欲挽天河流

又

高皇昔中興風雨躬沐櫛一士未嘗遺萬里皆馳驅
廉聽闢言路虛懷詢得失孤臣實艸芥亦獲對宣室

龍顏宛在目德不報萬一橋山松柏寒淚盡史臣筆

又

王師宿梁益行臺護諸將腐儒忝辟書萬里至渭上
旌旗照關路風雪暗戎帳堂堂鐵馬陣疊疊木牛餉
誰知骨相薄空負心膽壯回首二十年撫事增悲愴

又

在昔祖宗時風俗極粹粹美人材兼南北議論志彼此
誰令各植黨更仆而迭起中更夷狄禍此風猶未已
臣不難負君生者固賣死儻築太平基請自厚俗始

又

井地以養民整整若棋畫初無甚貧富家有五畝宅
哀哉古益遠禍始開阡陌富豪役千奴貧老無寸帛
困窮禮義廢盜賊起蹙迫誰能講古制壽我太平脈

又

桐江哲上人以端硯遺子聿纔寸餘而質甚奇
天將雨輒先流泚子爲效宛陵先生體作詩一
首

又

吾兒得巖硯其徑甫踰寸奇哉掌握物乃有琮璧潤
器實備才德初不以形論汝能志山林懷之可嘉遜
春近寒尤苦先生不下堂烏皮蒙燕几白拂挂禪牀
書架斜斜設梅花細細香悠然睡還起已覺日微長

贈應秀才

過宋不見元城公渡淮不見陳了翁當時人人皆太
息至今海內傾高風老夫七十居鄉縣齷齪龍鍾何
足見辱君雪裏來叩門自說辛勤求識面我得茶山
一轉語文章切忌參死句知君此外無他求有求寧

踏三山路

春耕

今年液水滿西疇父老人人卜有秋只要耕犁及時
節裹茶買餅去租牛

首春連陰

入春十日九日陰積雪未解雨復霽西家船漏湖水

漲東家驢病街泥深去秋宿麥不入土今年米貴如黃金老嫗哭子那可聽僵死不覆黔婁貧州家遺騎
飽春酒欲飲復止吾何心出門空數歲華速已見微
綠生高林

夜坐

衰翁不出門歲月過電電窗明地爐煖袖手坐寂寞
可憐瓶中梅爛漫幾開落小園亦數樹曾未破一萼
三更北風急雨雪恐復作且當勤舉杯莫恨浮蟻濁

新春

老境三年病新元十日陰疎籬枯蔓綴壞壁綠苔侵
憂國孤臣淚平胡壯士心吾非兒女輩肯賦白頭吟
得季長書追懷南鄭幕府慨然有作

從戎昔在山南日疆半春光醉裏銷綠樹啼鶯窺帽
影畫橋飛絮逐鞭梢花經小雨開差晚笙法餘寒澀
未調惆悵流年又如許羈魂仗仗楚詞招
正月十一日夜夢與亡友譚德稱相遇於成都

小東門外既覺慨然有作

當年與子別江干漸老心知後會難豈料今宵清夢
裏東門交轡說春寒

送陳吏部還朝

邂逅稽山許攬鬚塵埃時得近冰壺不辭我老雞豚
社且喜公歸櫻筍廚滿室琴書懷燕几一川風雨送
行驢勉哉早了功名債要畫騎牛第二圖 先賢良與劉
凝之有廬山騎牛圖

觀棋

一枰翻覆戰枯棋慶吊相尋喜復悲失馬翁言良可
信牧豬奴戲未妨為白蛇斷處真成快黑幟空時又
一奇斂付兩奩來對酒冷冷聽我誦新詩

春行

簑帽絲絲雨芒鞋策策泥柳斜風帶北花斂日平西
社酒誇新壓春蕪喜遍犁深村無客過父子自扶攜
雨霽春色粲然喜而有賦

應接年光老漸慵猶能一飲百分空半露蝶粉簾櫳
雨遠送鶯聲巷陌風千縷麴塵楊柳綠萬枝猩血海
棠紅從來造物陶甄手却在閑人詩句中

幽思

雲際茅茨一兩間春來幽事日相關臨窗靜試下巖
硯軟枕臥看靈壁山紅練帶飛俱意得錦熏籠煖尚
香慳 錦熏籠謂瑞香 今朝社過添惆悵高棟巢空燕未
還

贈持鉢道人

青鐵作小冠白紵縫短褐右扶九節杖左執七綴鉢
何嘗有定止到處可生活惟有烈士心白刃不能奪
相逢一笑粲滯思得披豁揮袂去若飛跂望已天末

柳

楊柳春風綠萬條憑鞍一望已魂消當年鳳集城邊
路曾愛纖纖拂畫橋

又

西園雨打杏花稀便面章臺事已非只恐無情堤上
柳又將風絮送春歸

山園雜詠

祠祿留人未挂冠山園二畝著身寬百年竟向愁邊
老萬事元輪靜處看花徑糝紅供晚醉月天生暈作
春寒汗青事業都忘盡時賴吾兒舉話端

又

殘春終日在林亭散髮披衣醉復醒科斗已成蠹閣
閣櫻桃初結子青青魚遊滄海寧濡沫禽慕雕籠卽
翦翎薄晚東風吹小雨笑攜長鑊伴畦丁

又

桃花爛熳杏花稀春色撩人不忍違俗客年來真掃
迹清樽日莫獨忘歸魚行池面紅雲散鶻起枝頭絳
雪飛莫道顛狂無訴處臥看香篆掩齋扉

又

已過社雨尚春寒小醉初醒怯倚欄柳帶花移宜土

潤鶴和雛養要籠寬孤翁白首投村社諸彥青雲接
羽翰誰信幽居多樂事晚窗兒女話團圓

又

春光何止二分空寒食都無數日中密葉成陰花寂
寂舊巢添上燕忽忽紙鳶收線愁風惡秧馬掀泥喜
雨濛堪數今年衰更甚蒼顏縱醉不成紅

劍南詩稿卷第三十一終

劍南詩稿目錄
卷第三十二

兩夜書感二首 鏡湖 舟中戲書 春晚懷
山南四首 春晚書齋壁 七十一翁吟 山
茶一樹自冬至清明後著花不已 晨起 春
晚雜興六首 齋中雜題四首 老疾戲自贈
夜坐聞湖中漁歌 上巳書事 對酒 自
規 窮居有感 春夏之交風日清美欣然有
賦三首 夜歸 農家歎 三月十一日郊行
初夏行平水道中 初夏幽居偶題四首
晨起 小圃 幽居 夜賦 閒中書事二首
初夏十首 四月旦作時立夏已十餘日
春夏之交鳴鳥百族惟布穀聲最悲急動人戲
作十韻 倚杖 野步 竹窗晝眠 騰騰
幽棲二首 睡起 愁坐忽思南鄭小益之間
二首 四月十三夜四更起讀書 夏雨初霽
題齋壁 東窗 聞臬 雨中示子聿 山園
屢種楊梅皆不成枇杷一株獨結實可愛戲作
長句 夢遊山寺焚香煮茗甚適既覺悵然以
詩記之 夏日 巢山二首 四月二十三日
作二首 觀月 溽暑 晨起 閒思二首
梅天 夜坐 麥熟市米價減鄰里病者亦皆
愈欣然有賦 雨中作 夜雨 乙卯重五
夏夜風雨極涼枕上口占 窮居 思蜀 五
月二十三夜記夢 送葉尚書 路傍曲三首
贈汪叔潛 出遊

劍南詩稿卷第三十二

宋陸游務觀

兩夜書感

宦遊四十年歸逐桑榆暖皇恩念黎老一官猶置散
春殘桃李盡風雨閉空館有懷無與陳萬事付酒樽
近代固多賢吾意終不滿可憐杜拾遺冒死明房瑄
慷慨詎非奇經綸恨才短羣胡穴中原令人數微管
又

儒生不自貴執藝等卜祝詩書定何物為汝市爵祿
唐虞雖日遠凜凜猶在目誰能舉其要治功端可復
平生麤知此俛仰髮已禿一豪不獲施老病死巖谷
安知萬世後終無可封俗願廣稽古心端拱咨嶽牧
鏡湖

躬耕斬一飽閃閃望有年水旱適繼作斗米幾千錢
鏡湖沃已久造禍初非天孰能求其故遺迹猶隱然
增卑以為高培薄使之堅坐復千載利名託亡窮傳
民愚不能知仕者苟目前吾言固應棄悄悄夜不眠
舟中戲書

平生萬事付之天百折猶能氣浩然試問軟塵金絡
馬何如柔艣月侵船英雄到底是癡絕富貴但能妨
醉眠三百里湖隨意住人間真有地行仙
春晚懷山南

梨花堆雪柳吹絲常記梁州古驛前二十四年成昨
夢每逢春晚即悽然

壯歲從戎不憶家梁州裘馬鬪豪華至今夜夜尋春
夢猶在吳園藉落花

又
梁州一別幾清明常憶西郊信馬行桃李成塵總閉
事梨花楊柳最關情

又
身寄江湖兩鬢霜金鞭朱彈夢猶狂遙知南鄭城西
路月與梨花共斷腸
春晚書齋壁

海棠已成雪桃李不足言纖纖麥被野鬱鬱桑連村
穉蠶細如蠶杜宇號朝昏展墓秋餌美坐社黍酒渾
早筍漸上市青韭初出園老夫下箸喜盡屏難與豚
幽居亦何樂且洗兩耳喧呼兒燒柏子悠然坐東軒

七十一翁吟

七十一翁心事闌坐叨祠祿養衰殘樽中無酒但清
坐架上有書猶縱觀吏部齒搖心悵望將軍髀滿淚
沈瀾客來共飯增羞澀小摘山蔬不揜漿

山茶一樹自冬至清明後著花不已

東園三日雨兼風桃李飄零掃地空惟有山茶偏耐
久綠叢又放數枝紅

晨起

初日被蒼煙零亂松竹影老夫起燒香童子行汲井
平生水雲身不墮車馬境願言學龐公全家事幽屏

春晚雜興

寂寂野人家柴扉傍水斜僧分晨鉢筍客共午甌茶
燕戶添新土蛛絲罨落花悠然便終日惟此送年華

又

澤國固多雨莫春猶薄寒兒童喜茶舍婦女賽蠶官
閱世年雖往為農興未闌窮途得一飽亦足慰艱難

又

池面萍初紫牆頭杏已青攜兒撐小艇留客坐孤亭
相法無侯骨生年直酒屋正須遺萬事莫遣片時醒

又

小市湖橋北幽居石埭西蒲深姑惡哭樹密穉歸啼
山茗封青箬村醪坵赤泥平生汗簡手投老慣扶犁

又

病瘍無意緒閉戶作生涯艸艸半盂飯悠悠一盃茶

笑穿居士屬閑看女郎花 唐人謂辛夷為女郎花園中有此
花一叢二百朵 莫問明朝事忘家即出家

又

青梅薦煮酒綠樹變鳴禽處世已如客傷春無復心
焚香惟默坐曳杖亦幽尋一日悠然過深慚惜寸陰
齋中雜題

列屋娥眉不足誇可齋別自是生涯閑將西蜀團窠
錦自背南唐落墨花

又

小醉微吟過一春人間儂是最閑人龜毛拂子長三
尺拈起風光處處新

又

斐几硯函鸞鶴眼古奩香斲鷓鴣斑絕知造物慙慙
意成就衰翁到死閑

又

幽居厭見凡花艸紅紫紛紛不復裁自勵蒼苔換黃
土南山移得玉芝來 窗外新移雲門玉芝一本甚茂

老疾戲自贈

年過七十日夜衰羸然骨立不支持一身百病作無
時飯且不足那論醫鏡中之人定是誰面骨突兀鬢
成絲買棺作冢計已遲一日寧免累諸兒門前湖山
可盡嬉心雖欲住力不隨左車牙脫吁可悲問汝何
不食肉糜

夜坐聞湖中漁歌

少年嗜書竭目力老去觀書澀如棘短檠油盡固自
佳坐守一窗如漆黑漁家鼻裏起三更哀而不怨非
凡聲明星已高聲未已疑是湖中隱君子

上巳書事

單衣初著下湖天飛蓋相隨出郭船得雨人人喜秧
信祈蠶戶戶斂神錢黃雞煮雉無停筍青韭菹菹欲
墮涎丞相傳聞又三押衡茅未改日高眠

對酒

手摘醅醲翦牡丹山家艸艸亦杯盤溪頭一夜風吹
雨又作殘春幾日寒

自規

陸君拙自謀七十猶糲食著書雖如山身不一錢直
默自觀我生困弱良得力轉喉畏或觸唾面敢自拭
世路方未夷機穽寧有極但能常閉門尊拳貧難助

窮居有感

孤村煙艸莫凄迷笠子蓑衣自架犁生計似蛛聊補
網弊廬如燕旋添泥人土者舊多時學地廢陂湖失
古隄迂闊自知無著處敢因窮厄怨推擠

春夏之交風日清美欣然有賦

日鑄珍芽開小缶銀波煮酒湛華觴槐陰漸長簾櫳
暗梅子初嘗齒頰香戶戶祈蠶喧鼓笛村村乘雨築
陂塘年光何預衰翁事伴蝶隨鷺也解狂

又

天遣殘年脫屣職功名不恨與心違綠陂細雨移秧
罷朱舫斜陽擊紙歸花巾丹青賣團扇象牀刀尺製
單衣白頭曳杖人爭看共數浮生七十稀

又

芳潤園林不似貧年光無盡逐番新來禽顏色不禁
雨搏黍語言如惜春身外豈關吾輩事鏡中已換昔
時人神僊定未超塵俗猶插金貂侍帝長

夜歸

疎鐘渡水來素月依林上煙火認茅廬故倚船篷望
有山皆種麥有水皆種稻牛領瘡見骨叱叱猶夜耕
竭力事本業所願樂太平門前誰剝啄縣吏徵租聲
一身入縣庭日夜窮答榜人孰不憚死自計無由生

農家數

還家欲具說恐傷父母情老人儻得食妻子鴻毛輕
三月十一日郊行

到處人家可乞漿槐陰巷陌午風涼水陂漫漫新秧
綠山壠離離大麥黃父子力耕春漸老婦姑共績夜

猶長堯民擊壤雖難繼芹笑懷君未敢忘

初夏行平水道中

老去人間樂事稀一年容易又春歸市橋壓擔蓴絲
滑村店堆盤豆莢肥傍水風林鶯語語滿原煙艸蝶
飛飛郊行已覺侵微暑小立桐陰換夾衣

初夏幽居偶題

放逐還家一老翁癡頑自笑更誰同倚欄風月黃昏
後攜杖園林綠潤中泳水小魚依藻荇覓巢輕燕拂
簾櫳此身要豈堅牢物莫遣須臾酒盞空

又

展盡高槐日漸長了無蜂蝶為花忙青梅旋摘宜鹽
白黃酒初嘗帶臘香林下光陰無一事水邊窗戶有
餘涼應門不用辭衰疾車馬何由到野堂

又

昔如轉戰墮重圍今幸奮翔脫駭機曉樹好風鶯獨
語夜窗細雨燕相依安居不恨蝸廬迂得食寧論鶴
料微更喜莫年彊健在又看刀尺製練衣

又

朱櫻羊酪喜新嘗碧井桐陰轉午涼書几得晴宜試
墨衣篝因潤稱熏香枯龜自覺支牀穩老馬安能試
艸長半世學纏終不近空餘清夢上沅湘

晨起

青青水中萍粲粲牆下艸開歲幾幾時已數春事老
鳴禽傍窗戶怪我倦幽討長吟感人懷病枕起亦早
下牀呼猿奴浩蕩恣灑掃綠陰列蒼石芳樽得頻倒
客來但與飲談天有何好亦莫離肺肝吟哦學郊島

小圃

剡曲西邊築草堂小園聊復寄相羊魚行水際汀蘋
動麝過林中野草香覓句有時攜筆硯遺懷隨事具
杯鷓少年朋舊凋零盡不獨思人亦自傷

幽居

青門不種故侯瓜揀得湖山便寄家老境一廬依水

竹壯遊萬里犯風沙氣衰那辦飲無算病著更知生
有涯莫道吾廬全索寞牆東新補數株花

夜賦

小齋寂寂似禪寮臥數更籌覺夜遙帳外殘燈欺不
寐梁間棲燕伴無聊江湖蹭蹬朱顏改憂患侵凌壯
志消挂旆天山少年事此身終負聖明朝

閑中書事

病過新年逐日添清愁殘醉兩厭厭惜花萎去常避
日待燕歸來始下簾堂上清風生玉塵澗中寒溜注
銅蟾一生留滯君休歎意望天公本自廉

又

一畝山園半畝池流年忽逮挂冠期賣花醉叟剝紅
桂種藥高僧寄玉芝午枕為兒哦舊句晚窗留客算
殘棋登庸策免多新報老子癡頑總不知

初夏

紛紛紅紫已成塵布穀聲中夏令新夾路桑麻行不
盡始知身是太平人

又

翦韭醃薑粟作漿新炊麥飯滿村香先生醉後騎黃
犢北陌東阡看戲場

又

稻未分秧麥已秋豚蹄不用祝甌窶老翁七十猶彊
健沒膝春泥夜叱牛

又

買得新船疾似飛蠶飢遙望采桑歸越羅蜀錦吾何
用且備幽人卒歲衣

又

槐柳成陰雨洗塵櫻桃乳酪併嘗新古來江左多佳
句夏淺勝春最可人夏淺却勝春徐陵詩也

又

杜鵑血盡啼未歇蝴蝶夢殘心更狂我自人間少情
者老來十倍惜年光

又
賜食金盤出寶闈玄熊掌映紫蹄侯家但託承恩
澤豈識山廚苦蕢藟

又
隋家古寺郡西南寺廢殘僧只二三藜藿滿庭塵闌
佛時聞鏡鼓賽春蠶

又
渺渺荒陂古埭東柳姑小廟柳陰中放翁老憊扶藜
杖也逐鄉人禱歲豐

又
老翁賣卜古城隅兼寫宜蠶保麥符日日得錢惟買
酒不愁醉倒有兒扶

四月日作時立夏已十餘日

京塵相值各匆忙誰信閑人日月長爭葉蠶飢鬧風
雨趁虛茶懶鬪旗槍林中晚筍供廚美庭下新桐覆
井涼堪笑山家太早計已陳竹几與藤牀

春夏之交鳴鳥百族惟布穀聲最悲急動人戲
作十韻

春風捨人去陸子歎以驚欲挽春使回無奈布穀聲
春亦何負汝日莫聲不停或謂布穀者一氣感使鳴
春老自當去微禽彼何情上天運四時斗柄亦崢嶸
奈何獨私春欲使久不傾南風吹衆綠一掃紫與赭
此時豈不佳乃爾懷不平勿作兒女態起視東郊耕

倚杖

倚杖柴門外踟躕到日斜兒童拾筍簪婦女賣茶芽
掠岸過漁艇隔籬聞緯車年來詩料別滿眼是桑麻

野步

蝶舞蔬畦晚鳩鳴麥野晴就陰時小息尋徑復微行
村婦窺籬看山翁拂席迎市朝那有此一笑慰餘生

竹窗晝眠

初夏暑雨薄但覺白日長向來萬里心盡付一竹牀
新筍出林表森然羽林槍時聞解箨聲靈府生清涼

平生喜晝眠此志晚乃償安枕了無夢孰為蝶與莊
徐起搦寒泉中有菱絲香清獻送落日與世永相忘

騰騰

騰騰吾喪我兀兀我忘吾萬事皆墮甌一身真朽株
江天號鶴鶴村巷暗楸梧薄酒猶堪醉歸來稚子扶

幽棲

閑人了無事地僻稱幽栖米留雞食移琴避燕泥
桐生窗欲暗筍長徑還迷不作容車計門閭儘放低

又

誰謂幽棲陋茅茨足庇牀雨便梧葉大風度練花香
浴佛兒童喜縲絲婦女忙場來三十載吾鬢固宜霜
乾道丙戌始卜居鏡湖之三山今甫二十年矣

睡起

虛堂四簷竹脩脩朱夏正午如高秋八尺風漪雲碧
稠一榻寬如禹九州屈信展轉俱自由息以兩踵無
與喉世方窘若魚吞鈎我獨超然鷹脫鞴一物不向
靈臺留非睡非覺以神遊青城紫閣多朋儔相逢握
手笑不休

愁坐忽思南鄭小益之間
當年蜀道秦關萬里飄然往還酒病曾留西縣眼明
初見南山

又
籌筆門前芳艸回龍道上青山萬里猶能夢到再遊
未信天慳

四月十三夜四更起讀書
七十未捐書正恐死乃息起挑窗下燈度此風雨夕

夏雨初霽題齋壁
楸花練花照眼明幽人浴罷葛衣輕燕低去地不盈
尺鵲喜傍簷時數聲對奕軒窗消永晝曬絲院落喜
新晴忽驚重五無多日采縷纏筒弔屈平

東窗
萱艸石榴相續開數枝晚筍破蒼苔背人紅練穿林

去直是無情不再來

聞臬

兩忘亮桀自心平此念胡為掃復生幸是安眠無一事苦憐鶯語惡臬聲

雨中示子聿

窮閭父子自相依寂寂茅廬映竹扉瓜蔓水生初抹岸練花寒動却添衣吾玄自笑豈尚白汝瘦元知能勝肥苦學勿為干祿計宦途雖樂不如歸

山園屢種楊梅皆不成枇杷一株獨結實可愛戲作長句

楊梅空有樹團團却是枇杷解滿盤難學權門堆火齊且從公子拾金丸枝頭不怕風搖落地上惟憂鳥啄殘清曉呼僮乘露摘任教半熟雜甘酸枇杷盡熟時鴉鳥不可復禦故熟七八分則取之

夢遊山寺焚香煮茗甚適既覺悵然以詩記之

平日居山恨不深甞來差足慰幽尋僧歸共說道逢虎院靜惟聞風滿林毫盞雲濤驅滯思篆盤雲縷洗塵襟此行殊勝邯鄲客數刻清閑直萬金

夏日

柴扉晝掩竹林幽坐使炎天變素秋扇月團團似初滿簾波細細欲平流朋儕零落關河阻疾病沉痾歲月遺賴有澄湖常在眼虎頭不用畫滄洲

巢山

巢山避世紛身隱萬重雲半谷傳樵響中林過鹿羣蟲蝨葉成篆風蹙水生紋不踴溪橋路僂凡自此分

又

短髮巢山客人知姓字誰穿林雙不借取水一軍持渴鹿羣窺澗鶯猿獨裊枝何曾畜筆硯景物自成詩

四月二十三日作

點點荷離水翩翩燕出巢苔添雨後暈筍放露中梢世路千重浪生涯一把茅款門僧亦絕無句鍊推敲

又

莫笑茅廬走何曾厭日長飯餘醑酪滑浴罷葛巾涼落日桐陰轉微風梳子香貧家猶裹粽隨事答年光

觀月

清風發疎林瞰月上素壁悠然倚庭楯愛此風月夕人間好時節俯仰成宿昔少年不痛飲老大空歎息

海暑

海暑雨將作南風來解圍幽花臨砌坼乳燕傍巢飛腰斧刻桑去攜籃采藥歸翻憐少年老墨雪託宮衣

晨起

衰老少睡眠睡晚覺常早五更攬衣起漏鼓猶考考青燈耿孤影不睡坐亦好讀盡一編書南窗朝日杲

閑思

溝水細無聲窗扉晚更明簾開燕雙入人靜鶻羣行青李求初至黃醅釀已成出門無奈懶不是傲公卿

又

小雨時時作幽花續續紅新蟬落庭樹癡燕集屏風傍枕拋書卷臨池下的釣筒閑中有真樂那得數途窮

梅天

稻壩移初遍梅天澀未晴輕陰昏蒼色餘潤咽琴聲時傍菱塘立還尋沙徑行杜門終此世更誓未來生

夜坐

燈暗一室幽鳥鳴四山靜道人坐倚壁度此清夜永少時志功名癡絕如捕影造物遺以窮磨礱發深省坐令益益淺渺渺波萬頃雖未造道真南轅終至郢

麥熟市米價減鄰里病者亦皆愈欣然有賦

凶年已度麥方秋學道從來幸寡求荷鋤自隨身若寄流離可賣飯何憂隣翁瀕死復相見村市小涼時獨遊不怕歸時又侵夜新添略約跨清溝

雨中作

風聲如翻濤雨點如撒菽皇天念此老一為洗煩促呼童取短檠聊展舊書讀悽然對孤影感數衰鬢禿兀如老病馬關河久在目伏櫪雖已疲連雲思昔藉

夜雨

齒牙搖動鬢毛疎，四壁蕭然臥艸廬。急雨聲酣戰叢竹，孤燈焰短伴殘書。壯心未減從戎日，苦學猶如覓舉初。自笑堅頑誰得似，同儕大半已丘墟。

乙卯重五

重五山村好，榴花忽已繁。粽包分兩髻，艾束著危冠。舊俗方儲藥，羸軀亦點丹。日斜吾事畢，一笑向杯盤。

北窗八尺臥，文藤夜雨生。涼洗鬱蒸裊，裊清愁縈斷角。悠悠孤夢伴殘燈，羸軀垂老嗟焉往。公論猶存似可憑，聊向斯文圖不朽。未甘粥飯學山僧。

窮居

半世佞信所之窮，居仍抱莫年。悲燒金術誤囊衣，薄種黍年凶酒味醜。大廈萬間空有志，後車千乘更無期。掩書常笑城南杜，麻屨還朝授拾遺。

思蜀

白首躬耕遇滄磯，江南自笑欲疇依。凌煙勳業無人許，濯錦園林有夢歸。心似遊僧思遠適，身如敗將陷重圍。客來矚欲相寬釋，每說人生七十稀。

五月二十三夜記夢

夜漏欲盡雞初唱，夢到神仙信非妄。泉流直春碧澗底，松根橫走蒼崖上。徐行林際遇飛橋，峭壁驚濤臨萬丈。非惟履險足踟躕，已覺處幽神悄悄。槍空巖滴乳，久化石竇益珠璣。紛紛物象鬼神慘澹疑，欲搏龍蜃蛟蜃誰敢傍。長眉老仙乘百雲，握手授我綠玉杖。三生汝有世外緣，一念已斷塵中障。雖云曩事不復憶，憐汝瞳子神猶王。何須更待熟金丹，從我歸哉住崑閬。

送葉尚書

曩歲榜扁舟，萬里歸自蜀。五月下瞿唐，六月過浮玉。於時始識公，一笑忘暑毒。羽扇臨清流，華觴跋紅燭。一別十五年，去日如電速。孤生晚還朝，歛退慚陸陸。要津非所冀，見公心自足。斥歸又七載，衰病將就木。

造物哀其窮，公來位嶽牧。每見語諄諄，與世異寒燠。聖朝方急賢，登用及釣築。如公實舊德，顧豈待夢卜。初聞一札下，已報四輩趣。懸知新天子，虛懷須啓沃。願公論其大，始為天下福。卽宣垂拱麻，寧復摛文宿。

路傍曲

冷飯雜沙礫，短褐蒙霜露。黃葉滿山郵，行人跨驢去。大道南北出，車輪無停日。彼豈皆奇才，我獨飢至夕。

又

淒涼路傍曲，朱門人不知。秋街槐葉落，正是斷腸時。

贈汪叔潛

火雲嵯峨如壘嶂，百病攻衰非一狀。低簷小屋桑竹村，忽辱君來問。亡恙蹶然攢衣起，闔門裹飯仍煩遠。相餉歲饑野，外無供給羞。盈餘糧不盈，益我守此窮。三十年尚恐死前無力量，君誠不以老棄予。苦語見規宜勿讓。

出遊

莫笑衰殘百不能，一枝筇杖捷飛騰。山空野火焚秦篆，日澹煙蕪遍禹陵。小浦漲潮迎釣艇，疎鐘出谷送行僧。踟躕不覺歸途晚，村落人家已上燈。

劍南詩稿卷第三十二終

劍南詩稿目錄
卷第三十三

立秋後四日雨 夙興 存養堂為汪叔潛作
感昔二首 病稍平示兒輩 野堂四首

七月下旬得疾不能出戶者十有八日病起有
賦 夢有餉地黃者味甘如蜜戲作數語記之

首 秋夜二首 病起憊甚有數 小舟晚歸二
首 夜坐 幽事 病後衰甚非籃輿不能出

門感數有賦 秋思 題村店壁 病去 白
首 書病 舍北晚眺二首 夜閱篋中書偶得

李德遠數帖因思昔相從時所言後多可驗感
數有作 登東山 貧樂 乙卯重九 縱步

近村 題齋壁 范參政挽詞二首 病後往
來湖山間戲書 秋夜遣懷 初冬暄甚 贈

湖上父老十八韻 初冬感懷 讀杜詩 記
九月三十日夜半夢 小舟遊近村捨舟步歸

四首 蜀僧宗傑來乞詩三日不去作長句送
之 羲農 冬夜不寐 十月 讀易二首

聞雁 悲歌行 村飲 鏡湖西南有山曰外
山民某氏居之其居少西小潭受飛泉羣山環

合真異境也為作短歌 十月十七日子生日
也孤村風雨蕭然偶得絕句予生於淮上是日

平日大風雨駭人及予墮地雨乃止二首 遊
山舟中遇風雨戲作 一齒動搖似不可復留

有感 山行 老學菴 枕上偶成 舍北閒
望作六字絕句 題菴壁二首 縱筆三首

十月二十八日夜雞初鳴時夢與數女仙遇其
一作詩示予頗哀怨如人間語惟末句稍異予

戲之曰若無此句不可為神仙矣其一從傍戒
曰汝當勿忘此規作詩者甚有愧色予頗悔之

既覺賦兩絕句以解嘲 山行二首 貧甚作
短歌排悶 過張王行廟 秋月曲 卽事

悲歌行 讀李泌事偶書 晨起 喜雨 閒
趣 自警 雨後二首 窗黑 雨止行至門

外戲作 野飲 雨夜有懷張季長少卿 雨
中熟睡至夕二首 憶昔 燈下看梅 程泰

之尚書挽詞二首 雨夕獨酌書感 白首
客言來自上臯道中以其語作一絕 睡起

劍南詩稿卷第三十三

宋陸游務觀

立秋後四日雨

天為新秋故作涼海風吹雨入虛堂涼生庭樹陰陰
綠潤蓑簷衣浥浥香杯泛鵝兒供小獸確春雲子喜
新嘗一年又見星橋近未信仙家日月長

夙興

老眼無眠覺夜長攬衣不復待窗光明星漸淡避初
日秋露已濃生曉涼出艸幽花紅紫雜穿林啼鳥去
來忙是中有趣君知否喧寂年來已兩忘

存養堂為汪叔潛作

絳帳先生見處別少年立節如冰雪胸中凜凜萬卷
書一字不為庸人說存心養性以事天人知不知渠
晏然窮經日夜廢寢飯不怕諸生嘲腹便三旌五鼎
俱忘想致一工夫在存養我今老病死即休未死尚
欲從公講

感昔

三著朝冠入上都黃封頻醉渴相如馬慵立仗寧辭
斥蘭偶當門敢怨鋤富貴尚思還此笏衰殘故合愛
吾廬燈前目力依然在且盡山房萬卷書

又

五丈原頭秋色新當時許國欲忘身長安之西過萬
里北斗以南惟一人往事已如遼海鶴餘年空羨葛
天民腰間白羽凋零盡却照清溪整角巾

病稍平示兒輩

人與鴉俱曉天憑雁送秋極知生意盡疆為汝曹留
藥餌傾殘稟風霜迫故裘倚屏搔短髮且復寄悠悠
野堂

野堂蕭颯雪侵冠歷盡人間行路難病馬不收煙艸
與孤桐半落井淋寒長瓶濁酒猶堪醉敗篋殘編更

細看此興不隨年共老未容城角動憂端

又

姓名無復世人聞靜處何妨獨策勳久矣不堪東閣
客歸哉無媿北山文橫林霜近有丹葉平野雨餘多
斷雲更喜鷓鴣來漸熟一溪煙水與中分

又

野堂地僻無車馬艸徑柴門晝亦扃栗里雖貧儲舊
粟玉川終老抱遺經病身凜凜殘秋葉故友寥寥欲
日星賴有吾兒堪暖眼夜闌常共一燈青

又

鼓缶酣歌樂太平野堂窗戶極疎明棄官正為愚無
用謝客新緣病有名閑入鄉人賽神社時從長者放
魚行雖然更有關心處打稻家家趁晚晴

七月下旬得疾不能出戶者十有八日病起有

賦

秋風吹海氣候頗不令昏昏七十翁擾擾半月病
箸書殊未成即死目不暇扶持賴藥物僅得全性命
兩添苔暈青風入桐枝勁深巷無人聲搗頭發孤詠

夢有餉地黃者味甘如蜜戲作數語記之

有客餉珍艸發奩驚絕奇正爾取嚼齧炮製不暇施
異香透崑崙清泉水生玉池至味不可名何止甘如飴
兒稚喜語翁雪領生黑絲老病失所在便欲棄杖馳

秋夜

晨雞喚夢覺齒頰餘甘滋寄聲山中友安用求金芝
燈欲殘時酒半消斷礎疎雨共無慘老來萬事渾非
昔惟有詩情似灑橋

又

夜雨淒涼客思迷聞砧却是夢回時人人解說悲秋
事不似詩人徹底知

病起憊甚有歎

殘年迫衰謝一病不枝梧書倩傍人讀行頌稚子扶
冥心付天地畢世釣江湖無米博佳傳虛名那可圖

小舟晚歸

扶病尋溪支志憂泛釣桂渚寒無宿鷺月白有啼鴉
敗壁青燈暗幽窗稚子諱無生未暇說且復議桑麻
又

秋晚吾廬好柴門映斷山潮生魚箔短木落雉媒閑
綠堞蒼茫外漁舟浩蕩間客來常謝病老鈍耐嘲訕

夜坐

老眼清無寐孤懷默自傷思人交舊盡撫事歲時長
籬犬吠殘月江楓凋早霜放翁殊耐事掩卷撥爐香

幽事

老夫病起日支離幽事關心只自知社近隣翁餽新
釀客歸童子拾殘棋功名已付來生了筆墨尤非晚
歲宜餘習可憐除未盡移花引水伴兒嬉
病後衰甚非盤輿不能出門感歎有賦

酒興詩情尚自如形骸可怪頭成疎平生只倚雙鳧
寫此日常須一鹿車寂寂豈惟慚鄰禹厭厭更覺類
曹蜍晚窗弄筆聊滴被數首清詩手自書

秋思

人生四十歎頭顱久矣心知負壯圖未死皆為閑日
月無求儘有醉工夫風凋木葉流年晚秋入窗扉病
骨蘇信步出門湖萬頃季鷹不用憶蓴鱸

題村店壁

五十年來命壓頭即今殘髮不禁愁亂鴉陣起霜天
晚落葉聲乾古渡秋小市歡醜聊兀傲長亭秣蹇得
遲留一身自處窮如許幸是無因為國謀

病去

病去身差健秋高氣漸寒未甘常伏几時作一憑闌
玉粒炊粳軟香塵搗藥殘欣然顧兒輩燈下語團欒

白首

白首稱祠吏清時作幸民招呼林下客遊戲夢中身
山路烏騾穩煙波畫楫新村村有花柳無事即尋春
書病 乙卯七月二十二日取病兩旬始平九月二日作此詩

莫年雖病不甚劇藥嗽猶自力今年七月風眩
作兒子在前不能識杯中藥冷呼不醒全家相顧無
人色昏昏但思向壁臥蟲臂鼠肝寧暇恤醫巫技殫
欲斂手天高鬼惡吁莫測偶然得活出望外扶杖下
牀猶屢踣讀書心在目力短袖手堅坐到窗黑無功
祿食四十年數息此責何由塞

舍北晚眺

紅樹青林帶暮煙並橋常有賣魚船樊川詩句營丘
畫盡在先生拄杖邊

又

日日津頭繫小舟老人自懶出門遊一枝筇杖疎籬
外占斷千巖萬壑秋

夜闌篋中書偶得李德遠數帖因思昔相從時
所言後多可驗感歎有作

早歲傳聞月日評殿門邊近眼偏明當時一坐推談
止今日叢林見話行老臥煙村身偶在夜開蠹紙淚
如傾豈知二十餘年後河洛胡塵訖未平 予送德遠歸
臨川詩有吁食煩明主胡沙暗舊京之句頗為前輩所稱時紹興辛巳
春也

登東山

漆園傲吏養生主栗里高人歸去來俱作放翁新受
用不妨平地脫塵埃松崖壁立臨樵塢竹徑蛇蟠上
歎臺送盡夕陽山更好與君踏月浩歌回

貧樂

蕭然曲肱地自號直心翁淨名書云直心是道場拙宦二
災過勞生一笑空新蔬經雨綠晚稻得霜紅飽食真
無事浩歌明月中

乙卯重九

九日村醪熟逢迎不用呼樽前狂起舞陌上醉相扶
殘髮新霜白衰顏落葉枯明年何足問且復插茱萸
縱步近村
病去身輕試杖藜滿村麩麥正離離照溪自數尚微

瘦趁渡人言殊未衰艸塞瓶頭沽濁酒花簋笠頂引
羣兒裴回不恨歸差晚正愛青燈映竹籬

題齋壁

看盡人間利與名歸來始覺此身輕禍機不敗漁舟
興樂事渾輸地確聲破篋雖無衣可典寒畦已有芋
堪烹餘年且健貧何害刺與隣翁醉太平

范參政挽詞

屢出專戎闔道歸上政途勳勞光竹帛風采震羌胡
籤帙新藏富園林勝事殊知公僊去日遺恨一毫無
又

孤拙知心少平生僅數公凋零遂無幾遲莫與誰同
瓊樹世塵外神山雲海中夢魂寧復接慟哭向西風

病後往來湖山間戲書

周公居東三食新夷吾在魯丘厄陳聖賢憂患尚如

此況我本是羈窮人今秋危病輒不死餘業自笑堅
頑身結茅所幸得佳處石帆天鏡無纖塵捫蘿峭壁
上采藥腰斧長歌行負薪尋僧獨泛若耶月攜友共
采湘湖蓴蠡土簞金陋勾踐斯頌刻石憎嬴秦不如
一醉禹祠去惡衣菲食真吾鄰禹祠在吾廬東南十餘里
秋夜遣懷

六年歸臥水雲鄉本自無閑可得忙羸病豈知身尚
健迂疎真與世相忘霜清水落年華晚月黑梟鳴夜
漏長瑣瑣井蛙何足計一篇秋水笑蒙莊

初冬暄甚

吳中十月雪霜怪風景喧妍葉未敗杲日還看浴東
海薄雲不解冒南山蛙鳴閣閣荒池曲蠅出營營食

案間安得玄冥正時令紅爐綠酒一開顏

贈湖上父老十八韻

一鏡三百里環以碧玉峯天公賜我厚極目爲提封
煙收見石帆雨霽望臥龍蛙岷峨寶林塔迢遞天章鍾
興來思一出霜晴及初冬父老捨杖迎衣冠頗嚴恭
語我相識久幸未棄老農間者傳伏枕喜聞足音登

貧舍有盤飧勿責異味重麪甃新油香黍酒甕面濃
已遣買撲握亦可致噉嚼願公領此意秣寒聊從容

我起爲太息厚意敢不從吾生行逆境平地九折叩
況今又老退如子豈易逢但願從今健衰疾緩見攻
遇興卽扣門艸具煩炊春但恐乘月來妨子睡味濃

初冬感懷二首

落葉掃還積斷鴻飛更鳴羸軀得霜健老眼向書明
水瘦河聲壯荻枯馬力生竟爲農父死白首負功名
庭蕪失故綠園樹染新丹病思閑支枕詩情獨倚闌
帶移頻覺瘦貂弊不禁寒惟有牆陰薺離離又滿盤

讀杜詩

城南杜五少不羈意輕造物呼作兒一門酬法到孫
子熟視嚴武名挺之看渠曾次監宇宙惜哉千萬不
一施空回英概入筆墨生民清廟非唐詩向令天開
太宗業馬周遇合非公誰後世但作詩人看使我撫
几空嗟咨

記九月三十日夜半夢

一夢邯鄲亦壯哉沙堤金轡絡龍媒兩行畫戟森朱
戶十丈平橋夾綠槐東閣羣英鳴珮集北庭大戰捷
旗來太平事業方施設誰遺晨雞苦喚回

小舟遊近村捨舟步歸

數家茅屋自成村地確聲中晝掩門寒日欲沉蒼霧
合人閒隨處有桃源

又

借得漁船沂小谿繫船浦口却扶藜莫言村落蕭條
甚也勝京塵沒馬蹄

又

不識如何喚作愁東阡南陌且閑遊兒童共道先生
醉折得黃花插滿頭

又

斜陽古柳趙家莊負鼓盲翁正作場死後是非誰管
得滿村聽說蔡中郎

蜀僧宗傑來乞詩三日不去作長句送之

看遍東南數十州寄船却泝蜀江秋孤雲兩角山亡
恙斗米三錢路不憂今年所在皆大稔萬里得詩長揖
去它年挈笠再來不放翁爛醉尋常事莫笑黃花插
滿頭

義農

義農去不反釋老似而非太息衆皆醉逝將誰與歸
經時忘肉味盡日掩柴扉安得同心者燈前語造微

冬夜不寐

老眼睡眠少空村霜露淒鐸鐸聞叩鐵啞啞數鳴雞
月入知窗破衾單幸屋低明晨炊米盡吾起不容稽
十月

塞向傾書櫃開爐積豆箕林居得溫暖天遣養衰遲
獲盜藏蔬後鉏耰下麥時農家冬最樂我老頗能知

讀易

羸軀抱疾時時劇白髮乘衰日日增淨掃東窗讀周
易笑人投老欲依僧
又

老喜杜門常謝客病惟讀易不迎醫冬來更愧乖慵
甚醉過收蕎下麥時

聞雁

霜高木葉空月落天宇黑哀哀斷行雁來自關塞北
江湖稻梁少念汝安得食蘆深洲渚冷歲晚霰雪逼
不知重雲外何處避畢弋我窮思遠征羨汝有羽翼

悲歌行

士如天馬龍爲友雲夢曾中吞八九秦皇殿上奪白
璧項羽帳中撞玉斗張綱本不問狐狸董龍何足方
雞狗風埃踏蹬不自振寶劍淋頭作雷吼憶遇高皇
識隆準豈意孤臣空白首卽今埋骨丈五墳骨會作
塵心不朽胡不爲長星萬丈掃幽州胡不如昔人圖
復九世讎封侯廟食丈夫事齷齪生死真吾羞

村飲

吳中賈霜晚冬艸有未衰坐令老病叟遂失凋年悲
翩翩烏紗帽裊裊殘菊枝雖無車馬客時與鄰翁期
新醅壓尚渾雉兔亦及時自覺勝淵明但醉不賦詩
鏡湖西南有山曰外山民某氏居之其居少西

小潭受飛泉羣山環合真異境也爲作短歌

漢東九十九重岡武都九十九脈泉豈如君家環翠
阜小潭珮玦聲鏘然我欲從君乞葦地開軒下看泉
中天金丹九轉太多事服水自可追飛仙雲孫相遇
不相識笑問塵世今何年掬泉弄月清歡罷却折玉
井秋風蓮

井秋風蓮

十月十七日子生日也孤村風雨蕭然偶得二
絕句予生淮上是日平日大風雨駭人及予墮

地雨乃止

少傅奉詔朝京師機船生我淮之湄宣和七年冬十
月猶是中原無事時
又

我生急雨暗淮天出沒蛟鼉浪入船白首功名無尺
寸茅簷還聽雨聲眠

遊山舟中遇風雨戲作

龍驤萬斛去如鴻巨浪惟能窘短篷不是山靈嫌俗
駕一生常值打頭風

一齒動搖似不可復留有感

晚境常憂豁可憎苦留終不受丁寧主貧何恨客辭
去木老元知葉自零未害朵頤臨肉俎但妨叩齒讀
仙經從今有酒須勤買莫學騷人要獨醒

山行

老翁七十亦何求尚賴山行散百憂攜耳帽寬新小
疾獨轆車穩正閑遊酒旗滴雨村場晚茶竈炊煙野
寺秋苦論人間長久事高吟何啻傲封侯

老學菴予取師曠老而學如秉燭夜行之語名菴

窮冬短景苦慙忙老學菴中日自長名譽不如心自
肯文辭終與道相妨吾心本自同天地俗學何知溺

糝糠已與兒曹相約定勿爲無益費年光
枕上偶成

放臣不復望脩門身寄江頭黃葉村酒渴喜聞疎雨
滴夢回愁對一燈昏河壙形勝寧終棄周漢規模要
細論自恨不如雲際雁南來猶得過中原
舍北閑望作六字絕句

潘岳一篇秋興李成八幅寒林舍北偶然倚杖盡見
古人用心

題菴壁

竹間僅有屋三楹小菴纔兩間雖號吾廬實客亭已斷
雨聲重點滴欲殘燈影更晶熒酒惟排悶難中聖茶
却名家可作經頭眩滅來還病蹇何時徹底得康寧

又

身似蝸牛蠹有盧却緣無用得安居地爐封火欺寒
雨紙閣油窗見細書癡熟山僧分鱗飴船來溪友餉
薪樗閉門莫笑衰頽甚讀易論詩亦未疎

縱筆

老眼輕千乘枯腸却八珍直令身潦倒未害膽輪囷
酒裏遺浮世書中見古人平生笑園綺老躅帝城塵
又

壯歲志天下崎嶇無一施高談對隣父朴學付癡兒
補柵憐難冷分糧憫雀飢吾生忽至此惆悵鏡中絲

又

天道何時定人生固有涯壯年行出塞晚歲病還家
積憤憑誰豁孤忠祗自嗟今朝茅屋底隱約聽霜茄
十月二十八 夜雞初鳴時夢與數女仙遇其

一作詩

戲之曰若無此句不可爲神仙矣其一從傍
曰汝當勿忘此規作詩者 有愧色予頗悔之
既覺賦兩絕句以解嘲

玉姝眉黛翠連娟弄翰閑題小碧牋人世愁多無著
處故應分與藥宮仙

又
虹作飛橋蜃吐樓羣仙來賦海山秋玉姝定自多才
思更與人間替說愁

山行

緣崖曲曲羊腸路傍水疎疎鹿眼籬舉起短鞭成一
笑吾詩正是策勳時

又

眼邊處處皆新句塵務經心苦自迷今日偶然親拾
得亂松深處石橋西

貧甚作短歌排悶

閒何闕逢諸葛畏人常憂不得活事不諧問文開不
踴權門更可哀即今白髮如霜艸一飽茫然身已老
惟有躬耕差可爲賣劍買牛悔不早年豐米賤身獨
飢今朝得米無薪炊地上去天八萬里空自呼天天
豈知

過張王行廟

烈士生不遇栖栖爲旅人英魂死不沒凜凜爲明神
明神受帝命廟食福我民牲酒何足言壓抑姑少伸
火旱千里赤與人下雷雨降水不反壑談笑出平土
害人錫之福姦僞亦擊汝豈若世上人吞聲氣如縷

秋月曲

舊時家住長安城萬戶千門秋月明紫陌朱樓歌吹
海酣宴不覺銀河傾受降城頭更奇絕莽莽平沙千
里月選兵夜出打番營鐵馬蹴冰冰欲裂塞月未落
成功回腰鼓橫笛如春雷長安高樓豈不樂與此相
去何遽哉丈夫志在垂不朽漆胡骷髏持飲酒舉頭
雲表飛金盃痛飲不用思長安

卽事

蕭騷白髮滿論中猶是人間詩酒身湖上悲秋新有
作眼邊敗意絕無人稻梁栖或雁初下煙水粘天鷗
自馴堪笑推移成老大時時几杖接鄉鄰
悲歌行

感慨常自悲發為窮苦辭偏及不少仲夢中亦酸辛
脂車思遠道太息令人老中原宋輿圖今乃傳胡雖
此責在臣子諸公其可已談笑復舊京令人憶西平
讀李泌事偶書

辛渭當時已誤來商山芝老更堪哀人生若要常無
事兩顆梨頰手自煨

晨起

晨起梳頭懶披衣立艸堂霧昏全隱樹氣暖不成霜
難急回魚隊天低襯雁行新春猶一月已覺日微長

喜雨

一秋未雨冬未雪坐使肺肝生客熱不惟裘褐藏篋
笥臥毯坐許俱未設樽中有酒不敢嘗小甕黃蘗却
時啜新春距今一月爾便恐蝗生殘宿麥天公老手
真可人夜雨蕭蕭洗旱塵北風吹雪定不晚喜入三

山湯甃榭

閑趣

堅閉門來又過冬一裘且復擁龍鍾不辭陋巷如漿
冷自愛新醅似粥醲迎婦橋邊燈煜煜賽神林外鼓
寥寥豈惟自得閑中趣要遣兒孫世作農

自警

人生非金石壽夭不自知一日復一日亦或至耄期
方其未死間早夜勿自欺嗟彼陷溺者太山起毫釐
努力戒情偷堯舜可庶幾我今齒髮弊疆健復幾時
一寸學古心自視猶可為雞鳴推枕起為善亦孳孳
天定終勝人吾世或未衰素業果有傳二復吾此詩
雨後

鏡湖歸隱老黃冠布褐蕭然一室寬燈影青熒人未
睡兩聲點滴夜將闌四朝出處朋儕盡半世漂流骨
相寒青史無名端可恥著書留與後人看

又

蕭蕭殘髮雪侵冠冉冉清愁用底寬把卷昏眸常欲
閉投牀睡興却先闌惟須酒沃相如渴未分人哀范

叔寒雨霽定知梅已動佩壺明日試尋看
窗黑

風雨窗常黑衰翁罷讀書縱橫七略廢情失三餘
宴坐工夫熟多聞習氣除韓公未解此誤謂腹空虛

雨止行至門外戲作

簷雨收殘滴溪雲弄晚晴出門還浩歎幾屐了吾生

野飲

綠岸波生染麴塵碧天雲細蹙魚鱗山居剩得舒長
目野飲自無拘忌人元結詩云坐無拘忌人勿限醉與醒酒
甕石邊孤店晚樵風溪畔早梅春懷章正可驚奴輩
未勝行歌獨負薪

雨夜有懷張季長少卿

放翁雖老未忘情獨臥山村每自驚鼎鼎百年如電
速寥寥一笑抵河清梅初破藟行江路燈欲成花聽
雨聲正用此時思劇飲故交零落愴餘生

雨中熟睡至夕

擁爐聽雨生睡思澀眼瞢瞢惟欲閉丈夫少壯要自
力飽食養慵真可媿我今不睡欲何為常恐兒曹落
吾事蠻氊紙帳方施行五鼎八珍無此味

又

少陵今雨無客至寂寞衡門晝常閉孝先酣枕夢周
公弟子雖嘲可無媿世上紛紛榮辱多不如睡中差
省事小兒忽報煎茶熟起擁寒爐究餘味

憶昔

憶昔輕裝萬里行水郵山驛不論程屢經漢帝燒餘
棧曾宿唐家雪外城壯志可憐成昨夢殘年惟有事
春耕西窗忽聽空階雨獨對青燈意未平

燈下看梅

風雨經旬怯倚闌梅花折得就燈看有情應寄去年
別無寐不禁清夜寒病起措筇幽興在春遲載酒後
期寬籬東數樹尤奇絕日遣蠻童候路乾
程泰之尚書挽詞

丈古唐元結經明漢仲舒三朝入座貴千載九丘書
早接遊從末常聞議論餘死生今永訣追恨寄聲疎

又

昔在紹興末同趨行殿門方思尋宿好忽已奉遺言
誅行曲臺議飾終明主恩高皇舊朝士今復幾人存

雨夕獨酌書感

數掩蘆藩常不開飢鴉兩兩啄青苔雨來十日未成
雪歲盡一枝初見梅池上晚行攜獨鶴燈前夜酌撥
新醅漁村老景今如許駿馬舊遊安在哉

白首

白首元無一事成朝來大笑絕冠纓花飛早已知春
減漏盡寧容更夜行蕭散且爲無算飲猖狂未免不
平鳴玉關青海今安在麥野桑村送此生

客言來自上臯道中以其語作一絕

日曬霜融作淺泥酒家却在斷橋西五陵今代無豪
俠獨臥茅簷聽午雞

睡起

老怯年華速閑知晝漏長已回酣枕夢未過古匳香
洗面宮眉綠開茶帶勝方山家風味在雖病意差彊

劍南詩稿卷第三十三終

劍南詩稿目錄
卷第二十四

歲暮 殘臘二首 一壺歌五首 屬疾 新

歲暮 早春 太古 春夜 正月六日作 寄

題吳斗南翫芳亭 春初驟暗一夕梅盡開明

日大風花落成積戲作三首 讀老子傳 示

元用 春思 春望 丙辰上元前一日 夜

雨思 枯蒼遊 春陰 寒夜歌 正月十六日

園中偶賦 陵霄花 懷舊六首 夜坐 入

城舟中作 寓蓬萊館 過能仁光孝寺欲訪

听老會府中速客遂不果入 夜二鼓留西城

門歸三山 讀杜詩 蘇軾光節推挽歌詞

村翁 寄子布 落花 南窗 排悶 過隣

家戲作 看花 閒趣 春盡遣懷 二友

半丈紅盛開 感事四首 豐年行 四月一

日夜漏欲盡起坐達旦 蓬萊行 馮縣丞挽

歌詞 幽居初夏四首 出蜀十九年故交零

落始盡慨然有作 憶天彭牡丹之盛有感

五月七日夜夢中作二首 急雨 夜中步月

晨起 枕上聞布穀聲 雨夜 焚黃 卽

事 失鷗鷺 贈童道人蓋與予同甲子 上

方銜老求宿蘆詩宿蘆蓋所寓室名以其似漁

舟也 夜坐園中至夜分 六月二十四日夜

分夢范至能李知幾尤延之同集江亭諸公請

予賦詩記江湖之樂詩成而覺忘數字而已

晨起 村飲示鄰曲 醉歸 二愛并序 蟾

蜩浦 題韓運鹽竹隱堂三首 哭杜府君

初秋夜坐 宴坐自午至莫 舟中詠落景餘

清暉輕橈弄溪渚之句蓋孟浩然耶溪泛舟詩

也因以其句為韻賦詩十首

劍南詩稿卷第三十四

宋陸游務觀

歲莫

案閒官曆喜更端鬢畔羅幡巧耐寒篩辣博香筠臘
酒染紅絲綠簇春盤衰容未覺餘年迫佳日猶思一
笑歡太息兒童癡過我鄉儂雖陋亦爭看

殘臘二首

破臘春先到微陰日易醺鳥聲猶寂寂木意已欣欣
雲起山分疊風生水蹙紋斷腸何處笛偏向醉中聞
殘臘無多日吾生又一年林塘明夕照墟落淡春煙
山色危欄角梅花綠酒邊歲時元自好老病獨悽然
一壺歌

悠悠日月沒根株常在人間醉一壺傾倒欲空還激
灑不曾教化不曾沽

又

先生醉後即高歌千古英雄奈我何花底一壺天所
破不曾飲盡不曾多

又

自從軒昊到隋唐幾見中原作戰場三十萬年如電
掣不曾記得不曾忘

又

恥從嶽牧立堯庭況見商周戰血腥攜得一壺閑處
飲不曾苦醉不曾醒

又

長安市上醉春風亂插繁花滿帽紅看盡人間興廢
事不曾富貴不曾窮

屬疾

白頭屬疾臥丘園藥物枝梧且僅存月黑淺山聞鵬
嘯窗明高樹送鴉翻議欺薄命深消骨憂集窮途黯
斷魂回視少時真隔世但餘一念在元元

新歲

風入鞭梢緊春從艸色深山坡臥新犢園木轉幽禽
勳業少年夢關河遊子心爾來都掃盡濁酒帶醅斟
早春

數聲屋角聽鳴禽紅糝青梢忽滿林雨過東臯一犁
潤冰消南澗半篙深逢僧竹院閑評藥攜鶴山村醉
擁琴青史功名黃閣貴有時應不到如今

太古

太古安知慮與堯茹毛飲血自消搖不須追咎爲書
契初結繩時俗已燒

春夜

老慮生如寄春寒夢亦孤燈花時自墜鼻語迭相呼
萬里書難得三年病未蘇窗深不知曉但覺動林鳥

正月六日作

上天四序分寒燠以漸相尋不相瀆今年立春七日
耳暖景溫風何迫促羣蛙怒鳴蚊蚋出虻蟬插翅飛
滿屋兒童便欲覓團扇我亦汗垢思湯沐山坡梅花
常恨晚一夕開盡如雪谷籬邊已放桃藥紅庭下頓
長萱芽綠小人識淺喜欲舞輕衫冷澹相追逐春深
藹鬼不貸人此暖但憂非汝福

寄題吳斗南玩芳亭

北斗以南有吳侯人物知非第二流讀書不放一字
過閉戶忽驚雙鬢秋平生離騷讀千遍屈泥穠歸要
親見歸來落筆愈驚人宋玉景差俱北面玩芳亭中
蘭茝芳朝回解帶春晝長愛君憂國有奇作坐令壯
觀還沉湘老夫曩亦同此趣甚欲閑題玩芳句無奈
生涯今已別倒壑枯楠忘歲月

春初驟暄一夕梅盡開明日大風花落成積戲

作

暖逼梅花爛漫開飄零便恐付蒼苔更堪連夜風如
許似如愁人把一杯

又

殘梅零落不禁吹，真是無花空折枝。堪笑老人風味減，三年不作送梅詩。予往歲多有送梅之作，今鬪筆已累年。

又

年年爛醉萬梅中，吸酒如鯨到手空。花欲過時常惜別，今年此別更匆匆。

讀老子傳

巍巍闕里與天崇，禮樂詩書萬世宗。但說周公曾入夢，寧於老子數猶龍。

示元用

德孫學語已驚人，悶裏時時一笑新。老子已應如樞，驥此即端恐是天。麟會看神授如椽筆，莫改家傳折角巾。汝叔不癡當愛汝，夜窗燈火勉相親。

春思

七十老翁身退耕，可憐未減舊風情。典衣取酒那論價，秉燭看花每到明。江浦時時逢畫楫，寺樓處處聽新鶯。此生無復陽關夢，不怕樽前唱渭城。

春望

天地回春律，山川掃積陰。波光迎日動，柳色向人深。霑灑憂時淚，飛騰滅虜心。人扶上危榭，未廢一長吟。

丙辰上元前一日

弊裘破帽髮鬢髻，宛似山房罷講僧。身病不禁連夜雨，家貧只挂舊年燈。修椽柳外掀樓角，危檻雲間露塔層。自笑閑遊本無定，興闌隨處倚枯藤。

夜雨思恬蒼遊

道心退惰如風鷁，世念堅彊似火牛。安得短篷湖海去，夜深聽雨琵琶洲。

春陰

麴塵柳色正遮門，石黛江流曲抱村。小院春光方盍盍，遠山雨氣又昏昏。傍簷林鳥驚幽夢，極目煙蕪捲燒痕。只道餘寒尚如許，不知生意滿乾坤。

寒夜歌

陸子七十猶窮人，空山度此冰雪晨。既不能挺長劍

以扶九天之雲，又不能持斗魁以回萬物之春。食不足以活，妻子化不足以行。鄉鄰忍飢，讀書忽白首。行歌拾穗，將終身論事。憤叱目若炬，望古踊躍心生塵。三萬里之黃河入東海，五千仞之太華磨蒼昊。坐令

此地沒胡虜，兩京宮闕悲荆榛。誰施赤手驅蛇龍，誰恢天網致鳳麟。君看煌煌藝祖業，志士豈得空酸辛。

正月十六日園中偶賦

又向柴荆過上元，豪華前事不須論。偶逢花發閑持酒，不得人扶懶出門。薄技號山曾獻玉，榮途染指亦嘗龍。年來洗盡東陵夢，瓜瓞蕭蕭老故園。

陵霄花

庭中青松四無鄰，陵霄百尺依松身。高花風墮赤玉盞，老蔓煙溼蒼龍鱗。古來豪傑人少知，昂霄聳壑寧自期。抱才委地固多矣，今我撫事心傷悲。

懷舊

鶴鳴山下竹連雲，鳳集城邊柳映門。當日不知為客樂，如今回首却消魂。

又

駿驟西過雨，漫天千里江山在眼邊。二十四年如昨夢，憑誰問訊帶枷僊。

又

狼煙不舉羽書稀，幙府相從日打圍。最憶定軍山下路，亂飄紅葉滿戎衣。

又

翠崖紅棧鬱參差，小益初程景最奇。誰向豪端收拾得，李將軍畫少陵詩。

又

回龍寺壁看維摩，最得曾吳筆意多。風雨塵埃昏欲盡，何人更著手摩挲。

又

瞻冢山頭是漢源，故祠寂寞掩朱門。擊鮮藉艸無窮樂，送老那知江上村。

夜坐

蓬窗夜半竹籬然坐守殘編情不眠辛苦空成左傳
癖道遙常媿大慈僊風寧可繫功名誤日不能黏歲
月遷明日覓船湖上去西村桃李淡春煙

入城舟中作

權邊蘆岸接藍水篷外橫空破墨山更著灘頭一行
驚此身真在畫圖間

寓蓬萊館

朱門高柳畫橋南掠面風埃喜解驂霽日偶逢春盎
盎野人不慣屋潭潭堂中剩喜簪裾集樓上時聞鼓
角酣明發扁舟覓歸路趁時吾欲事農蠶
過能仁光孝寺欲訪昕老會府中速客遂不果

入

春日城南過寶坊馳驅不得駐車箱高門臨道淨如
拭傑屋凌空勢欲翔齋近鐘魚初送響風微松檜自
生香暫來堪笑忙如許坐羨高人白晝長

夜二鼓留西城門歸三山

秉炬夜離驛戴星出西關舟人飛畫楫門鎖響銅環
漁火明遙浦溪風解醉顏鄰家亦驚起迎我笑堅頑

讀杜詩

千載詩亡不復刪少陵談笑即追還常憎晚輩言詩
史清廟生民伯仲間

蘇軾光節推挽歌詞

才名京兆掾門閥魏公孫遇事雖航艣接人終靜溫
寧吟灞橋雪不掃舍人門二妙凋零盡衰翁慨獨存
韜光與訓直吏部下世相距三年

村翁

放翁真箇是村翁釣渭耕莘事不同蹴踘煙雲兩芒
屨憑陵風雪一篷籠屢經駭浪身終免遍閱浮漚毒
未窮幸有春衣堪換酒道邊醉臥示神通

寄子布

釣灘耕壟雪盈簪從入新年病至今遠使有書常灑

淚長宵無夢更傷心何由老眼迎歸權空為秋風感
莫磋一紙新詩千萬恨臨風悵望獨長吟

落花

朱朱白白不禁吹老未忘情作許悲瑞錦已殘猶有
夢明霞初散可無詩人應偷樣傳圖本天亦收香付
蜜脾榮悴相尋君看取曉來青子已團枝

南窗

身輕婚嫁畢耳靜市朝疎褊帶脫烏幘一窗寬有餘
排闥

白髮無端日日新自憐猶作百憂身孤燈聽雨常終
夜一棹尋花又送春旋壓麥饑邀父老時分菜把餉
比鄰不須頻起陳人數已是清朝六世民

過隣家戲作

老脫朝冠岸幅巾時時乘興過比隣餅無儲粟吾猶
樂步有新船子豈貧醅甕香浮花露熟藥欄土潤玉
芝新玉芝謂鬼白山家多有之相從覓笑真當勉又過浮
生一歲春

看花

好樹典衣買新花扶杖看村醪雜清濁山果半甘酸
家事貧尤簡詩情老未闌鷓鴣閑似我日莫立清灘

閑趣

同儕零落落曉星稀久住人間豈自期衰病已成垂白
叟春寒又到牡丹時溪邊喚客閑持釣燈下留僧共
覆棋一日轉頭還過却紛紛世事不須知

春盡遣懷

裊裊爐香晝掩屏殘年真是解塵轍青鸞旋擣通隣
好白葛新裁製暑衣避日小魚穿藻去倚風輕燕拂
簾飛要知名宦非初意三十年前已念歸予以乾道乙

酉卜築湖上今三十有二年矣

二友

清芬六出水梳子堅瘦九節石菖蒲放翁閉門得二
友千古夷齊今豈無

半丈紅盛開
滿酌吳中清若空共賞池邊半丈紅老子通神誰得
似短筇到處即春風

感事

雞犬相聞二萬里遷都豈不有關中廣陵南幸雄圖
盡淚眼山河夕照紅

又

堂堂韓岳兩驍將駕馭可使復中原廟謀尚出王導
下顧用金陵為北門

又

渭上晝昏吹戰塵橫戈慷慨欲忘身東歸却作漁村
老自誤青春不怨人

又

捫蝨當時頗自奇功名遠付十年期酒澆不下胷中
恨吐向青天未必知

豐年行

南村北村春雨晴東家西家地確聲稻陂正滿綠針
密麥隴無際黃雲平前年穀與金同價家家涕泣伐
桑柘豈知還復有今年酒肉如山賽春社吏不到門
人晝眠老穉安樂如登仙縣前歸來傳好語黃紙續
放身丁錢

四月一日夜漏欲盡起坐達旦

春歸不可留斗柄已崢嶸老至不可却雪鬢森千莖
少年所讀書廢忘如隔生舊交死欲盡存者萬里程
高談無與發欲語輒吞聲悠悠一飽計泯泯千載名
逝將山丘歸不見河雒清挑燈坐待日攬筆衰涕傾

蓬萊行

山峭插雲海樓高入煙霄不知何宮殿東望鬱嵒崑
是時青童君初散通明朝風濤中破裂涌出黃金橋
授我玉芝房服之塵念消凡骨一朝換入極坐可超

馮縣丞挽歌詞 綱字仲柔

尊公同故里季父接周行晚蕙烏衣巷重逢玉樹郎

名流多賞識榮路正騰驥愁絕河梁上風煙莫莽蒼

幽居初夏

湖山勝處放翁家槐柳陰中野徑斜水滿有時觀下
鷺艸深無處不鳴蛙籜龍已過頭番筍木筆猶開第
一花歎息老來交舊盡睡餘誰共午甌茶

又

藤冠屮屨病支離門外紛紛百不知解籜有聲鶯倦
枕飛花無力點清池閑思舊事惟求醉老感流年只
自悲綠樹陰中紅練起一團零亂溼臙脂

又

長歌嫋嫋插秧天小繖飄飄入市船高棟巢乾初乳
燕綠槐陰密已鳴蟬只言未俗人情惡未廢先生日
晏眠推枕起來閑弄筆銅蟾手自挹寒泉

又

鬢毛秃盡齒牙疎難受人間折簡呼詩酒本來無藉
在形骸況復不枝梧槐陰漸密能朝日池水新生可
浴鳧移得太行終亦死平生常笑北山愚

出蜀十九年故交零落殆盡慨然有作

西遊邂逅得諸君落筆千言酒百分聚散亦知元有
數死生豈料不相聞平羌空憶吟江月小益何由度
棧雲一事與君聊自慰兒曹或可付斯文

憶天彭牡丹之盛有感

常記彭州送牡丹祥雲徑尺照金盤豈知身老農桑
野一朵妖紅夢裏香

五月七日夜夢中作

征行過孤壘寂寞已千年馬病霜菅瘦狐鳴古冢穿
煙塵身欲老金石志方堅零落英雄盡何人共著鞭

又

霜露薄貂裘連年塞上留蘆笳青冢月鐵馬玉關秋
振臂忘身憊憑天報國辭諸公方衰衰好運幄中籌

急雨

急雨清風發土香靈臺如受寶犀涼華胥一枕遽然

覺却聽蟬聲送夕陽

夜中步月

夜半不成寐起尋微月行風生驚葉隨露重覺荷傾
兀兀酒中趣悠悠身後名與蘭還掩戶坐待日東生

晨起

齒豁不可補髮脫無由裁清晨明鏡中老色蒼然來
餘年亦自惜未忍付酒杯抽架取我書危坐闔復開
萬世見唐堯夔龍獲親陪寥寥三千年氣象挽可回
豈以七尺軀顧受世俗衰道在無不可廊廟均蒿萊
枕上聞布穀聲

老去惟思日月遲更堪青鬢總成絲無端催取流年
去最恨溪頭布穀兒

兩夜

北風吹雨亂疎鐘敲敲燈花破碎紅孤夢正行天一
握高城俄報鼓三通衰遲空抱屠龍技豪俊誰收汗
馬功但願輿圖早來復白頭敢望起雲中孤雲兩角去
天一握蓋囊斜遺上也

焚黃

啼呼梨棗憶兒時駒隙頻經日月馳早歲已與風木
歎餘生永廢蓼莪詩燎黃恩重空垂泣戴白身存敢
自期足蹇僅能成拜起籃輿歸路不勝悲

卽事

陶令常耽酒龐翁不出家安貧炊麥飯省事嚼茶芽
池滿浮雞鴨庭荒噪蛄蛙詩成賞音絕自向小兒誇

失鸕糶

不見池邊整羽衣繞村散覓走羣兒卑飛正恐爲人
得徑去何須報我知久憶蘋洲應自喜尚餘菰米亦
堪悲放翁未到忘情處日莫憑欄獨詠詩

贈童道人蓋與予同甲子

吾儕之生乙巳年達者寥寥窮比肩退士一生藜藿
食散人萬里江湖天忍貧不變我自許挾術自營君
豈然一事尚須煩布策幾時能具釣魚船方謀買一小

舟未得也

上方鈺老求宿蘆詩宿蘆蓋所寓室名以其似

漁舟也

一曲亭前水接天放翁短棹弄風煙宿蘆縱有江湖
趣猶是人間賸釣船

夜坐園中至夜分

岸巾閑倚胡牀坐步履還扶拄杖行漸近秋清知病
減盡捐世累覺心平翻翻雙鷗風枝爽熠熠孤螢露
艸明更欲裴回盡幽興麗譙傳漏報三更

六月二十四日夜分夢范至能李知幾尤延之

同集江亭諸公請予賦詩記江湖之樂詩成而
覺忘數字而已

露箬霜筠織短篷飄然來往淡煙中偶經菱市尋谿
友却揀蘋汀下釣筒白菡萏香初過兩紅蜻蜒弱不
禁風吳中近事君知否團扇家家畫放翁

晨起

月澹知將曉風清喜近秋狂吟詞跌宕新沐髮臆臆
桐葉危先墮蟬聲斷更適達生隨處樂自笑替人愁

村飲示鄰曲

七年收朝迹名不到權門耿耿一寸心思與窮友論
憶昔西戍日孱虜氣可吞偶失萬戶侯遂老三家村
朱顏捨我去白髮日夜繁夕陽坐溪邊看兒牧雞豚
離胡幸可炊亦有社酒渾耳熱我欲歌四座且勿喧
卽今黃河上事殊曹與袁扶義孰可遣一戰洗乾坤

醉歸

西醉吳玠墓南招宗澤魂焚庭涉其血豈獨清中原
吾儕雖益老忠義傳子孫征遼詔儻下從我屬囊韉

十畝春蕪手自犁瓜牛廬在鏡湖西禪心每笑彈棋
局道眼長捐刮膜篋絕食就官分鶴料無車免客笑
雞栖頃獨有一竹輿今亦壞矣旗亭酒賤秋風近夜夜歸
來醉似泥

二愛并序

陶淵明詩云孟夏艸木長遶屋樹扶疎衆鳥欣有
託吾亦愛吾盧孟東野亦云遠岸雪難莫勁枝風

易號霜禽各嘯侶吾亦愛吾曹予暇日詠二詩有
感作二愛詩

結屋不袤丈著身還有餘破壁作小窗亦足陳吾書
無酒當飲水無肉當飯蔬知止乃不殆此語良非虛
古人造道處正自無絕殊願君勿它求且復愛吾廬
門外秋水深日日集鷗鷺是豈相與期正以同類故
殘年過七十朋舊半丘墓非吾濟世心歎息莫予助
人生非金石去日如脫兔三復東野詩獨立悲歲莫

蜻蜓浦

舍北蜻蜓浦新秋偶一來菱絲煙際老芡背露中開

漁火明還滅沙禽去却回吾行興無盡舟子莫相催

題韓運鹽竹隱堂絕句二首茂卿字立適

鄴下王孫今勝流相逢三伏凜生秋未嘗一日可無
竹似是前身王子猷

又

塵埃車馬日駸駸誰解從君一散襟待我清秋有閑
日抱琴來寫萬龍吟

又

靜處知君解策勳爐香裊裊起微雲岸巾不住尋青
士敬枕還應對墨君

哭杜府君

叔高初過我風度何玉立超然衆客中可慕不待揖

入都多賓友伯高數來集質如琮璧潤氣等芝蘭襲
晚乃過仲高午日曬行笠忽忽遽別去悵望空快悵

有如此三高青紫何足拾豈無知之者相視莫維繫
窮魚雖相憫可媿吐微溼亦知尊公賢何止蓋鄉邑

向風每拳拳識面真汲汲秋風忽聞訃執書數以泣
造門不自決追悔今何及又聞著書富手澤溢巾笈

哀毀要無益遺稿動綴緝

初秋夜坐

徂歲又如許吾生真若浮露蟬鳴達曉風葉墮先秋
野迴星辰大天空河漢流胡牀幸亡恙且復寄悠悠

宴坐自午至莫

身外寥寥掃怨思曾中浩浩納乾坤飽經世事常高
枕慣見人情不署門孤日夜分生海底百川秋漲沂
河源珥貂碧落從來事東訪蓬萊不足言

舟中詠落景餘清暉輕橈弄溪渚之句蓋孟浩
然耶溪泛舟詩也因以其句爲韻賦詩

獨鶴還故鄉歸然但城郭出門無與遊所至苦寂寞
裹飯事幽討此詩殊不惡薄莫宿漁家蒼煙帶墟落

又

維舟入谷口信步造異境隔籬雞犬聲滿地梧楸影
瓦甌炊香稻石泉汲新井人間苦偏仄愛此須臾景

又

老圃髮如霜見客能廢鋤與坐使之年自云八十餘
老身六朝民艸舍數世居力守遠祖言一字不學書

又

沿溪得茅店酒旗出柴荆杖頭錢已空一醉何由成
主人語鄭重手把甕面清勸我姑小留溪魚亦可烹

又

秦皇酒甕邊古有釣魚磯我來必竟日時挈雙鯉歸
白鷺真可人常先孤棹飛高詠江練句令人憶玄暉

又

鏡湖三百里風止鏡面平持以照吾心俗塵安得生
散髮鷗鷺間萬事秋毫輕誰能拂東絹寫我孤舟橫

又

朝發雲根寺莫宿煙際橋冷螢溼不飛潛魚驚自跳
菱船歌裊裊菰浦風蕭蕭平明宿鳥起我亦理歸橈

又

古祠照滄波老木閤雲洞輕舟不搖楫正用一風送
汲井漱甘液掃榻寓幽夢所恨山未深城笳聽三弄

又

禹穴探斷簡樵風泛清溪倒影森松桂避船散鳧鷖
塵中有異境十里青玻瓈高塔忽招人湖邊日未低

又

溪行已清秋還舍尚殘暑天公爲解圍簾櫳過疎雨
青蔬喜小摘紅粒亦新杵一飽坐北軒蘋花泣煙渚

劍南詩稿卷第三十四終

劍南詩稿目錄
卷第三十五

浮生 秋夜 秋夜紀懷三首 書懷 林居
秋日 七月二十四日作 枕上作時聞臨海
四明皆大水 書懷 秋陰至近村 閒居自
述 秋雨初霽試筆 幽懷 雨後出門散步
二首 秋夜示兒輩 七十二歲吟 雨夜讀
書二首 秋晚 新菊二首 九月二十八日
五鼓起坐抽架上書得九域志法然有感 題
橋南堂圖 題吳參議達觀堂堂勝蓋朱希真
所作也僕少亦辱知於朱公故尤感慨云 舍
北搖落景物殊佳偶作五首 自嘲 作夢
夜坐 北園雜詠十首 龜堂獨坐遣悶二首
復竊祠祿示兒子 隴頭水 雪歌 春近
望永阜陵 初拜再領祠宮之命有感 醉
中信筆作四絕句既成懼觀者不知野人本心
也復作一絕五首 臘月十九日午睡覺復酣
臥至晚戲作 睡起至園中 北園籬外散步
歲莫獨酌感懷 盆池 對食 踏磴 海
棠圖 丁巳正月二日雞初鳴夢至一山寺名
鳳山其尤勝處曰味軒予爲賦詩既覺不遺一
字 初春 雨中作三首 縱筆 題慧老芋
巖 立春日 病中作二首 立春日二首
北望 上元夜作 長歌行 讀書 枕上作
書志 夜賦 晚步 漁歌 殘夢 書憤
二首 小舟遊西涇度西岡而歸 春行 姜
總管自築墓舍名蘭菴求詩 湖上今歲遊人
頗盛戲作四首 賞花至湖上 莫春二首
莫春

劍南詩稿卷第三十五

宋陸游務觀

浮生

浮生真是寄郵亭短髮忽忽失故青睡少始知愁有
力病增方數藥無靈謀生懶似逢秋燕訪舊疎於欲
日星自笑若為銷此恨濁醪聊復倒餘瓶

秋夜

高屐枯筇一老翁燈前自笑髮如蓬冷冷月浸荒庭
竹浙浙風凋古井桐病思未蘇秋尚淺醉魂初醒夜
方中故人萬里無消息便擬江頭問斷鴻

秋夜紀懷

缺月淡欲盡老雞鳴苦遲聊為待日坐不作感秋悲
魯叟一王法幽人七月詩平生經世志老死欲誰期
又

瞿曇起西域老氏奮中州談理一家說靈民千載憂
橫流當有自獨立豈相仇垂世詩書在兒童勿外求
又

北斗垂莽蒼明河浮太清風林一葉下露艸百蟲鳴
病入新涼減詩從半睡成還思散關路炬火驛前迎
書懷

蕭颯先秋鬢龍鍾未死身不惟今日老已是一生貧
食菜從兒瘦關門任客噴世間餘一念河雒尚胡塵

林居秋日

結棹引水遶荒畦病臥蝸廬不厭低小聚數家秋露
裏平波千頃夕陽西亭臯艸木猶葱蒨天上風雲已
慘悽逋負如山炊米盡終年枉是把鉏犁

七月二十四日作

閑拂青銅一惘然此生應老海雲邊涼颺入秋詩初
就幽鳥呼人夢不全天上鵲歸星渚冷月中桂長露
華鮮射胡羽箭凋零盡坐負心期四十年

枕上作時聞陸海四明皆大水

撫枕時時猶數秋阮窮已極畏凶饑雨聲浙瀝孤齋
冷客夢蕭條萬里歸山邑風雷移窟穴海城水潦半
民屏如雲秋稼方相賀一飽還憂與願違

書懷

漫道年來未極衰窮途憔悴實難支半分臂減休文
瘦七尺軀存曼倩飢尚憶青衫陪衆雋寧期白首負
明時悠然萬里煙波興除却沙鷗總不知

秋陰至近村

村店閑尋酒筇枝瘦倚肩雲齊龍卷雨野曠鶴盤天
露井飄桐後清觴泛菊前欲歸還小立搔首意悠然
閑居自述

自許山翁懶是真紛紛外物豈關身花如解笑還多
事石不能言最可人淨掃明窗憑素几閑穿密竹岸
烏巾殘年自有青天管便是無誰也未貧

秋雨初霽試筆

墨入紅絲點漆濃閑將倦筆寫秋容雨聲已斷時聞
滴雲氣將歸別起峯斜日半穿臨水竹好風遙送隔
城鐘遠遊更動輕舟興太息何人解見從

幽懷

苦茅架竹亦吾廬病起幽懷得小據愛酒已捐身外
事閉門猶讀死前書鄰家人喜添新犢小市奴歸得
早蔬但使身安歲中熟敢辭老境落樵漁

雨後出門散步

細水穿沙溜殘雲扶雨歸不成遊酒市且作倚漁扉
老大徂年速羈窮壯志違破裘雖百結猶勝泣牛衣
又

病葉常先買寒潮只暗生扶衰賴藥石隨意出柴荆
細路牛欄溼疎籬續火明枯榮不須計千古一棋枰
秋夜示兒輩

吳下當時薄阿蒙豈知垂老數途窮秋砧巷陌昏昏
月夜燭簾櫳裊裊風縮項偏魚收晚釣長腰粳米出

新舊兒曹幸可團欒語憂患如山一笑空
七十二歲吟

七十人言自古稀我今過二未全衰讀書似走名場
日許國如騎戰馬時秋晚雁來空自感夜闌酒盡不
勝悲渭濱星竇逾千載一表何人繼出師

雨夜讀書

風雨瀕洞吞孤村讀書擁褐不出門歷觀忠邪見肝
肺直與治亂窮根原傳巖之野感帝夢此事難以今
人論危冠長劍一見用萬里耕桑吾道尊

又

一燈如螢雨潺潺老夫讀書蓬戶間但與古人對生
面那恨鏡裏凋朱顏功名本來我輩事人自蹭蹬天
何慳君看病驥瘦露骨不思仗下思天山

秋晚

聚落蕭條古堞東蘆藩蓬戶臥衰翁井桐葉盡新霜
後衣杵聲繁夕照中身似敗棋難復振心如病木已
中空村醪酸澀君無笑也解燈前作臉紅

新菊

已過重陽十日期菊叢初破兩三枝自憐短鬢蕭蕭
白不似黃花驛裏時黃花驛在岐鳳閣子嘗過之

又

老去流年不耐催微霜又見菊花開莫言冷落西風
晚也有飛飛小蝶來

泫然有感

一事無成老已成不堪歲月又崢嶸愁生新雁寒初
下睡起殘燈曉尚明天地何由容醜虜功名正恐屬
書生行年七十初心在偶展輿圖淚自傾

題橋南堂圖

平生不識橋南路聞道清流帶煙樹今朝開卷一欣
然恍若身親到其處徐郎獨立疑如山招不能來塵
不去舊居萬瓦碧浮煙結茅却就橋南住雲盡春生

水似藍想君清獻釣魚養道上紅塵高十丈斷無一
點到橋南

題吳參議達觀堂堂勝蓋朱希真所作也僕少
亦辱知於朱公故尤感慨云

中原遺老維川公鬢鬢白盡雙頰紅揮毫爲君作齋
勝想見眼中餘子空餘子碌碌何足數獨付莊周賈

生語看君踐履四十年始知此公不輕許公今度世
爲飛僊開卷使我神凜然清時臺省要才傑諸公誰

致維川客

舍北搖落景物殊佳偶作

今年冬候晚仲月始微霜野日明楓葉江風斷雁行
窮塗多藉躪老境易悲傷自笑詩情懶蕭然舊錦囊

又

路擁新霜葉溪餘舊漲沙栖鳥初滿樹歸鴨各知家
世事元堪笑吾生固有涯南村聞酒熟試遣小僮賒

又

小聚鷗沙北橫林蟹舍東船頭眠醉叟牛背立村童
日落雲全碧霜餘葉半紅窮鱗與倦翼終勝在池籠

又

屋角成金字溪流作縠紋斜通小橋路半掩夕陽門
孤艇衝煙過疎鐘隔塢聞杜門非獨病實自厭紛紛

又

艸徑人稀到柴扉手自開林疎鴉小泊溪淺鷺頻來
簷角除瓜蔓牆隅斷芋魁東鄰臘肉至一笑舉新醅

自嘲

身見紹興初改元百罹敢料至今存生涯破碎餘龍
具學問荒唐守兔園獨立未除還芴氣餘生猶待闔
棺論北窗燈暗霜風惡且置孤愁近酒樽

作夢

作夢今逾七十年平生懷抱尚依然結茅杜曲桑麻
地覓句灑橋風雪天驃騎向來求作佛淮南末路望
登仙世間妄想何窮盡輪與山翁一醉眠

夜坐

杳杳霜鐘十里聲，娟娟江月半窗明。陳編欲絕猶堪讀，微火相依更有情。九曲煙雲新散吏，時方被命再領武夷祠。祿百年，鈿槩老諸生。頽然待日君無笑，尚勝聞雞賦早行。
温岐詩云：雞聲茅店月，人迹板橋霜。蓋唐人早行絕唱也。

北園雜詠

西村林外起炊煙，南浦橋邊繫釣船。樂歲家家俱自得，桃源未必是神仙。

舍北橋東幽事多，老夫飯飽得婆娑。茅簷日落聞春相，荻浦煙深有權歌。

小橋密接西岡路，支徑深通北崦村。老子意行無遠近，月中時打野人門。

東吳霜薄富園蔬，紫芥青菘小兩餘。未說春盤供采擷，老夫湯餅亦時須。

又
鋤麥家家趁晚晴，築陂處處待春耕。小槽酒熟豚蹄笑，剩與兒童樂太平。

又
閑伴鄰翁去荷鋤，林疎歷歷見村墟。怪生白鷺飛無數，水落灘生易取魚。

又
短笻行樂出柴荆，雪意闌珊却變晴。林際已看春雉起，屋頭還聽歲猪鳴。

又
歲殘已似早春天，隔水橫林一抹煙。聞道堦西梅半吐，攜兒閑上釣魚船。

又
白髮蕭蕭病滿身，凍雲野渡正愁人。揚鞭大散關頭

日曾看中原萬里春

又
莫年身似一虛舟，付與滄波自在流。垂地雪雲吹不散，且傾桑落贈槎頭。

龜堂獨坐遣悶
髮已凋疎齒已搖，高談誰與慰無聊。苦心雖嘔何由出，病骨非讒亦自銷。玉雪細塵烹瑞艸，煙脂小把斷靈苗。防風苗色紅如臘，脂可作醃。賀公吳語吾能似，太息遺魂不可招。

又
放逐還山入見春，枯顛槁項雪霜新。大牀不解除豪氣，兀眼安能識貴人。食有淖糜獨足飽，衣存短褐未全貧。北窗坐臥君無笑，拈起烏藤捷有神。

復竊祠祿示兒子
得飽不啻足，閉門還讀書。翁猶糞不糝，兒固食無魚。衰繡曷加我，簞瓢常晏如。人生隨所遇，勿替此心初。

隴頭水
隴頭十月天，天雨霜壯士。夜挽綠沉槍，臥聞隴水思。故鄉三更起，坐淚數行我。語壯士勉自彊，男兒墮地志四方。裹尸馬革固其常，豈若婦女不下堂。生逢和親最可傷，歲暮金絮輸胡羌。夜視太白收光芒，報國欲死無戰場。

雪歌
黑雲黯黯如鸞鷗，急霰颯颯疑投沙。初聞萬竅號地，續已見六出飛天花。寧論異事，吠羣犬且喜和氣連。千家穿簾投隙，粉嫵媚平坑塞谷。迷鎔飭遙遙林塔，出玉筍渺渺江路。蟠脩地扣門方擬，貰鄰酒篝火更欲尋。僧茶懸知朝士集，鬪角靴聲入賀趨。正衙吾衰久矣，尚何說所幸一稔均幽遐。

春近
短褐枯笻老病身，龍鍾也復喜新春。已知不解多年住，且作都無一事人。簷角鳥聲呼醉夢，室中花氣襲

衣巾朝來更有欣然處一筋山蔬勝八珍
望永阜陵

聖主乘乾臨斧辰小臣承詔上丹墀寧知齒豁頭童
後更遇天崩地陷時泣至眼枯無血續夢隨魂斷獨
心知白頭才盡空濡筆寧繼生民下武詩

初拜再領祠宮之命有感

黃紙初開喜可知追懷平昔却成悲生當京國承平
日仕及皇家再造時小艸出山初已誤斷雲含雨欲
何施兒孫賀罷仍無事却赴幽人把釣期

醉中信筆作四絕句既成懼觀者不知野人本

心也復作一絕

麥野桑村有酒徒過門相覓醉相扶朱門日日教歌
舞也有儂家此樂無

又

過得一日過一日人間萬事不須謀鄰家幸可賒芳
醞紅藥何曾笑白頭

又

今朝賣穀得青錢自出街頭買堯肩艸火燎來香滿
屋未容下筓已流涎

又

老覺人間足畏塗怕人渾似怕於菟精明頗動青鞵
輿先探門前有客無

又

治道巍巍本易成狂言安得略施行太平事業人皆
見不計封倫死與生

臘月十九日午睡覺復酣臥至晚戲作

枕痕著面眼芒羊欲起元無抵死忙擁被却尋初斷
夢掩屏重撥欲殘香雲雖散寒猶緊春意將回晝

已長老去此身無著處華胥真恐是吾鄉

睡起至園中

春風忽已遍天涯老子猶能領物華淺碧細傾家釀
酒小紅初試手栽花野人易與輸肝肺俗語誰能挂

齒牙更欲世間同省事勾回蟻戰放蜂衙
北園籬外散步

北園西出路透迤邐荆作門扉杖縛籬鋤麥正忙人滿
野營巢未定鵲爭枝招呼父老嘗新釀約束兒童築
壞陂遇興閑行便終日隔溪績火已參差

歲莫獨酌感懷

明時頗忝武夷僊俯仰人間只自憐總角回思如昨
日挂冠過限已三年病多晴日思行藥睡少清宵學
坐禪更歎衰孱不禁酒地黃一盞即頽然

盆池

兩送疎疎響風吹細細紋猶稀綠萍點已映小魚羣
傍有一拳石又生膚寸雲我來閑照影一笑整綸巾

對食

蓬蘽生庭葉擁堦經旬飯豆爨枯蕪煙霄舊謂行夷
路薪水今悲繫病懷夢裏百年元易過人間萬事苦
難諧癡兒自墮閻黎計歡喜聞鐘已過齋

贈登

少慕功名頗自奇一生蹭蹬鬢成絲市樓酒美貧何
預斗柄春回老不知黑幟遊魂應有數白衣効命永
無期魚梁東畔牛欄北舉世誰能識此悲

海棠圖

人間奇艸木天必付名流菊待陶元亮竹須王子猷
我為西蜀客辱與海棠遊再見應無日開圖特地愁
丁巳正月二日雞初鳴夢至一山寺名鳳山其

尤勝處曰味軒予為賦詩既覺不遺一字

已窮阿閣勝更作味軒遊不盡山河大無根日月浮

吾身元是幻何物彊名愁久覓卓菴處是問應可留

初春

誰把鵝黃染柳絲似催鄰曲蹋青期已忘萬里封侯
志但憶千回上樹時朝雨池塘光澈盡莫煙樓觀碧

參差紫姑一作行藏 欲問還休去身世從來心自知

雨中作

三日雨頗作昏昏饒睡眠泥深散酒市風惡惱燈天
茅屋松明照茶鐺雪水煎山家自成趣撫枕寄悠然

又

浙浙連江雨惜惜一室幽茶甘留齒頰香潤上衣裘
泥滓將雞鴨林樊喚婦鳩短章雖漫興聊足散吾愁

又

短鬢白如絲梅花似舊時掩屏愁入夢隱几雨催詩
病爲陰天劇春緣閨歲遲非關畏車馬衰甚實難支

縱筆

氣本充天地書非汗馬牛人人見堯舜世世有巢由
朝市紅塵鬧山村白髮稠所欣吾道在江漢古東流

題慧老羊巖

煨芋當時話已新如今拈出更精神十年相國非吾
願半顆君當別付人

立春日

江花江水每年同春日春盤放手空天地無私生萬
物山林有處著衰翁牛趨死地身無罪梅發京華信
不通數片飛飛猶臘雪村鄰相喚賀年豐去冬無雪今
年以正月十日已時立春而平旦有雪數片猶臘雪也

病中作

老軀百病集類然仰天呼汝病勿怨天藥石幸可扶
寓形天地間疾病誰能無不從酒色來病自無根株
但使元氣在雖劇行當蘇哀哉忿忿子永棄元化爐

又

牧羊知治民解牛得養生一理儻造微何事不可明
我老抱病久頗窺古人情唐堯授四時帝道所以成
周家七百年王業本農耕造端無甚奇至今稱太平
人生正如此默默要無營心君但高拱萬物安能攪

立春日

花壓烏巾酒滿卮舊逢春日恨春遲如今病臥孤村
裏過了新春也不知

又

慶元丁巳春來晚人日初過近上元空對一樽三太
息無人爲戴縷金幡

北望

中原墮胡塵北望但莽莽青年死已盡童稚日夜長
羊裘左其衽寧復記疇曩豈無豪俊士憤氣塞穹壤
我欲支斯人悲詫寄遐想夢行黃河濱雲開見仙掌

上元夜作

百年古謂風前燭我逾七十飯不足亦知生世無工
拙久向人間耐榮辱今年上元燈滿城十里東風度
絲竹蓬窗溼薪不禦寒獨取殘書伴兒讀忽然得意
見古人半椀凍齏甘勝肉書生蓋棺事未定論著儻
存終見錄富貴無名豈勝數意氣空能驕世俗君不
見拄天拄地邢君牙不如詩人窮瞎張太祝

長歌行

不羨騎鶴上青天不羨峨冠明主前但願少賒死得
見平胡年一朝胡運衰送死桑乾川胡星澹無光龍
庭爲飛煙西琛過葱嶺東戍踰朝鮮魏魏天王都九
鼎奠瀾漭萬國朝未央玉帛來聯翩黃頭汝小醜汗
我王會篇盡誅非無名不足煩戈鋌還汝以舊職牧
羊遼海邊

讀書

兩眼欲讀天下書力雖不迨志有餘千載欲追聖人
徒慷慨自信寧免愚置書不讀談虛無誰其始爲此
創疽古時澤被禽與魚博施所以爲唐虞正使老釋
信不誣爲我未免近楊朱高軒大旆塞路衢臺閣尊
顯來于于安得禹臯日陳謨沾濡四表無焦枯坐令
事業見真儒老農不恨老耕鋤

枕上作

龍鍾七十豈前期矮帽枯筇與老宜愁得酒卮如敵
國病須書卷作良醫登山筋力雖猶健閉戶工夫頗
自奇今日快情春睡足臥聽蒼鳥語多時

書志

往年出都門誓墓志已決況今蒲柳姿倏仰及大耋
妻孥厭寒餒鄰里笑迂拙悲歌行拾穗幽憤臥齧雪
千歲埋松根陰風蕩空穴肝心獨不化疑結變金鐵
鑄爲上方劍釁以佞臣血匣藏武庫中出參髦頭列
三尺粲星辰萬里靜妖孽君看此神奇醜虜何足滅
夜賦

簷滴新春雨窗昏半夜燈病無詩一字窮賴酒三升
郡中月設折酒九斗日恰得三升世路澀如棘祠官冷欲冰
殘年只此是年少解飛騰

晚步清溪上微陰忽快晴鴉棲先小泊魚暖已羣行
藥餌扶垂老耕桑樂太平非關戀鄉社久客倦遐征

漁歌
斜陽收盡暮煙青媚媚漁歌起遠汀商略野人何所
恨數聲哀絕不堪聽

殘夢
少時鐵馬蹴河冰老去摧藏百不能風雨滿山窗未
曉只將殘夢伴殘燈

書憤
白髮蕭蕭臥澤中祇憑天地鑒孤忠
陋窮蘇武餐檀久憂憤張巡嚼齒空
細雨春燕上林苑頽垣夜月洛陽宮
壯心未與年俱老去猶能作鬼雄

又
鏡裏流年兩鬢殘寸心自許尚如丹
衰遲罷試戎衣窄悲憤猶爭寶劍寒
遠戍十年臨的博壯圖萬里戰

臯蘭關河自古無窮事誰料如今袖手看

小舟遊西涇度西岡而歸
小雨重二後餘寒百五前聊乘瓜蔓水
閑泛木蘭船雪暗梨千樹煙迷柳一川
西岡夕陽路不到又經年

春行
九日春陰一日晴強扶衰病此閑行
猩紅帶露海棠溼鴨綠平堤湖水明
杜子美曉看紅溼處花重錦官城李太白

蜀江紅且明用溼字明字可謂奪造化之功世未有拈出者酒賤柳
陰逢醉臥土肥稻壟看深耕山翁莫道渾無用解與
明時說太平

姜總管自築墓舍名蘭菴求詩
君不見贅翁退隱真皇時蘭室遺名星日垂雖無豪
士千車送不媿高人一錡隨又不見貞觀故人有王
顯抵老摧頹不作蘭一時戲語今尚傳人生窮達誰
能免蘭菴知君出游戲壽過期頭乃常事青松手種
三千本會看半空飄鼓吹人老則衰君不然快瀉玉
船鯨吸川釣璜遠祖應相似八十方爲筮仕年

湖上今歲遊人頗盛戲作
龍船看罷日平西柳闇花穠步步迷射的山前朱舫
小樵風涇上紫騮嘶

又
畫船鼓吹載涼州不到三更枉出遊忽有歌聲出霄
漢誰家開宴五雲樓

又
翠阜青林煙壘重朱樓畫閣雨空濛禹祠西走蘭亭
路一片湖山錦繡中

又
臺府官醅歲歲新蘭亭春勝鏡湖春三山小瓮雖堪
笑也向湖邊作醉人

賞花至湖上
吾國名花天下稀園林盡日敞朱扉蝶穿密葉常相
失蜂戀繁香不記歸欲過每愁風蕩漾半開却要雨
霏微良辰樂事真當勉莫遺忽忽一片飛

莫春
季子黃金盡安仁白髮新無情五更雨便送一年春
難續西樓夢空存北陌身海棠應似舊惆悵又成塵

又
綠葉枝頭密青蕪陌上深江山妨極目天地入孤吟
身已雙蓬鬢家惟一素琴世情君莫說頭痛欲泔泔

莫春

數間茅屋鏡湖濱
萬卷藏書不救貧
燕去燕來還過日
花開花落即經春
開編喜見平生友
照水驚非曩歲人
自笑滅胡心尚在
憑高慷慨欲忘身

劍南詩稿卷第三十五終

劍南詩稿目錄
卷第三十六

九里 清明 一百五日生 送李憲被召舊
與其先侍郎遊從 初夏 幽居 閒適 病
中夜賦 閒身 書感 衰病 雜題六首
自傷 雨後絕涼偶作 村居 久雨 七十
三吟 會稽 泛舟 夜觀子虞所得淮上地
圖 水村 題菴壁二首 晚歸舟中作 送
嚴居厚棄官歸建陽溪莊 次朱元晦韻題嚴
居厚溪莊圖 夢中遊禹祠 感懷 酒熟
病起遊近村 秋夜讀書示兒子 秋晚書感
王成之給事挽歌辭二首 書南堂壁二首
秋晚 晨起待子聿歸 信筆二首 龜堂東
窗戲弄筆墨偶得絕句五首 次呂子益韻 舍
北行飯書觸目二首 明日復得五字二首
十一月二十二日夜待子聿未歸 南窗 幽
居 春近山中即事三首 雪夜感舊 將進
酒 歲莫懷張季長 謝朱元晦寄紙被二首
送王季嘉赴湖南漕司主管官 菴中夜興
初春欲散步畏寒而歸 憶昔 戊午元日
讀書至夜分有感二首 雜感十首 歎老
朝飢食齋麩甚美戲作二首 漁隱堂獨坐至
夕 讀書 北望 蘭 古梅 山驕散步田
舍北歸三首 寄題連江陳氏拂石軒 得張
季長書以大蓬見稱蓋以予寄祿官視昔祕書
監也 病足累日不能出門折花自娛 書意
新燕 北巖采新茶用忘懷錄中法煎飲欣
然忘病之未去也 連日至梅僊場及花涇觀
桃花抵莫乃歸二首

劍南詩稿卷第三十六

宋陸游務觀

九里

破曉憑鞍野興濃
鷺飛先我過村東
綠鍼細細稻浮水
絳雪紛紛花舞風
陌上鞦韆喧笑語
擔頭炬杖簇青紅
誰知老子裴回意
絕愛山橫淡靄中

清明

氣候江吳異
清明乃爾寒
老增丘墓感
貧苦道途難
燕子家家入
梨花樹樹殘
一春回首盡
懷抱若爲寬
一百五日生

一百五日東郊時
陂塘水滿雨如絲
人家青煙不禁火
俚俗豈復思
子推舊墳年多木
已拱新墳積土高
纍纍老鴉飛鳴啣肉去
紙錢雨溼掛樹枝
深松茂柏死自樂
地下應笑生人悲
眼中青山身後塚
此事決定君何疑
風吹雲破日下照
小灘碎礫光陸離
停車暫憩道傍舍
解囊且補殘春詩

送李憲被召舊與其先侍郎遊從

早謁龍門鬢未秋
莫年乃復接英遊
海瀕已幸見公子
瓜壘仍煩訪故侯
霖雨即陪諸老進
德星肯爲一方留
西城柳色青如許
欲挽長條特地愁

初夏

已過浣花天
行開解粽筵
店沽浮蠟酒
步屨載秧船
古俗交情久
豐年樂事偏
出波蓴菜滑
上市鯊魚鮮
僧閣梅山麓
漁扉禹廟壩
丹青不可畫
得句一欣然

幽居

社結山林友
家藏種樹書
蔽牀欣卜宅
容駟笑高閭
薄飯頻茹韭
單衣旋製練
東家借蹇罷
南市買船初
美景遊俱遍
鄰翁好不疎
時時得乘興
豈獨愛吾廬

閑適

朝讀易一卦
時鈔史數行
花開聊把酒
睡起獨焚香

寂寂市聲遠
悠悠村日長
吾衰尚何恨
兒女解耕桑

病中夜賦

客如病鶴臥
還起燈似孤
螢闔復開
首藉花催春事
去梧桐葉送
雨聲來
榮河温洛幾
時復志士仁人空
自哀
但使胡塵一朝靜
此身不恨死蒿萊

閑身

炊煙漠漠閉柴荆
聊用閑身答太平
重碧飛觴心未老
硬黃臨帖眼猶明
吳蠶滿箔含桃熟
壠麥登車搏黍鳴
補劑息踪今有地
問君何處用虛名

書感

奪壁元知價不離
屠龍誰信本無求
哦詩聲裏歲時速
憂國淚邊天地秋
已欠謝安俱泛海
況無王粲與登樓
此身著處憑君記
萬里煙波沒白鷗

衰病

衰病集餘日
推移成老翁
衡門隱者趣
大布古人風
几杖呻吟裏
山川莽蒼中
從來世緣薄
不是坐詩窮

雜題

少談王霸謀
身拙晚好詩
騷學道疎
賴有一籌差
自慰閉門不作子公書

又

莫笑花前白髮新
宣和人醉慶元春
何時道路平如砥
却就清伊整幅巾

又

三生元是出家人
一念差來墮薦紳
二寸楮冠雙屨屨
天公還我水雲身

又

黃庭兩卷伴身閑
盤篆香殘日未殘
泛泛孤身似萍葉
始知天地不勝寬

又

年華偃蹇留不住
鬢雪縱橫耘更多
樂天不生夢得死
恨無人續竹枝歌

年來世事掃除盡猶有閑吟頗自奇安得陟釐九萬
箇為君盡寫莫年詩

自傷

朝雨莫雨梅子黃東家西家鬻蘭香白頭老鰥哭空
堂不獨悼死亦自傷齒如敗屐鬢如霜計此光景寧
久長扶杖欲起輒仆牀去死近如不隔牆世間萬事
俱茫茫惟有進德當自強往從二士餓首陽千載骨
朽猶芬芳

雨後絕涼偶作

槐陰日色薄桐葉雨聲長林下有餘適城中無此涼
浮瓜寒水碧斲藥小鋤香未許陶潛達華簪何足忘
陶詩云聊用忘華簪

村居

黍酒濃浮瓮瓜菹綠映槃老便藜粥美病喜粟漿酸
紗帽新裁穩絢袍舊製寬村居亦何好聊用發詩端
久雨

水長平侵岸雲低半失村菰蒲亂鳧鴨泥潦困雞豚
弄筆排孤悶煎茶洗睡昏荒郊多狗盜及早閉柴門

七十二吟

七十三年事事新涵濡幸作六朝民髮無可白方為
老酒不能賒始覺貧末路已悲身是客此心猶與物
為春柴門勿謂常岑寂時有鄉鄰請藥人

會稽

海近風雲惡城高鼓角雄山川橫慘淡樓閣半虛空
故國千年鶴征途萬里篷餘生猶幾日盡合付杯中
泛舟

山照澄波髮鬢青新蒲梢上立蜻蜒孤舟每為尋詩
出輪與漁翁醉不醒

夜觀子虛所得淮上地圖

閉置空齋清夜徂時聞水鳥暗相呼胡塵漫漫連淮
潁淚盡燈前看地圖

水村

家住煙波似畫圖殘年不復歎頭顱深深竹塢見螢
度翳翳蒹葭聞鳥呼十里笳聲上雲漢一空星影落
陂湖天公著我非無地却悔從來錯怪渠

題菴壁

萬里東歸白髮翁閉門不復與人通綠樽浮蟻狂猶
在黃紙棲鴉夢已空薄技徒勞真刻楮浮生隨處是
飛蓬湖邊吹笛非凡士儻肯相從寂寞中 每風月佳夕
輒有笛聲起湖之西南莫知何人意其隱者也

又

俠氣當年蓋五陵今成粥飯在家僧身存但倚貧非
病齒落方慚豁可憎踏月閑穿雙屨屨聽琴橫按一
枯藤年來萬事都經遍強笑看人獨未曾

晚歸舟中作

路入芙蓉浦家依羅楹村急難雙鷺立平野萬鴉翻
市散人爭渡僧歸寺掩門淒涼誦新句招得欲殘魂
送嚴居厚棄官歸建陽溪莊

曼容不過六百石淵明僅留八十日寥寥千載有兩
公海內至今推絕識放翁貪祿老始歸自今不作一

錢直見人勇退輒欣慕亟欲起拜忘衰疾吾廬近在
官道傍門外未掃車馬迹溪莊有地肯見分會結茅
齋傍青壁

次朱元晦韻題嚴居厚溪莊圖

鶴俸元知不療窮葉舟還入亂雲中溪莊直下秋千
頃羸取閑身伴釣翁

夢中遊禹祠

湖上無人月自明夢中髣髴得閑行庭空滿地楸梧
影風壯侵雲鼓角聲世異客懷增慘愴秋高歲事已
嗚咽長歌忽遇騎鯨客喚取同朝白玉京

感懷

老抱遺書隱故山鏡中衰鬢似霜菅規模肯墮管蕭
亞夢想每馳河渭間竹帛竟孤千載事江湖敢恨一
生閑殘功賴有吾兒續把卷燈前為破顏

酒熟

侯印何由得酒泉小槽新熟亦欣然放翁達處過彭

澤客自在傍吾自眠

病起遊近村

老人摧頹絕造請門設常關艸生徑一年三百六十日三百五十九日病一日不病出志歸繞村處處扣

柴扉水東溪友新酒熟舍北園公菘菜肥平生養氣心不動黜陟雖聞了如夢從今病愈即相尋共聽糟

淋漓春食

秋夜讀書示兒子

久病少睡眠往往中夕起呼燈取書讀不能盡數紙喟然置之數生世後闕里持蠡欲測海遠復迫老死

人生各有業唐虞本吾事詩書脫秦厄天意固在此異端塞穹壤作俑孰為始神禹逝不還吾其如洛水

秋晚書感

丘塚相望故舊空放翁猶復寄漚中少眠危坐待窗白得酒細傾生頰紅雖媿蛟龍起雲雨尚勝魚鳥困池籠秋來莫道無遊興野渡村橋處處通

王成之給事挽歌辭

昔泝黃牛峽曾經白鷺洲從容參步武談笑極風流晚預蓬萊客時從襖被遊揮毫看半醉追想只添愁

又

詩騷湘水客風度曲江公一夕南樓去千秋東省空囊封震朝右墨敕絕宮中贈極文昌貴君恩厚飾終

書南堂壁

偶築湖邊舍侵尋四十春山丘未薤骨詩酒尚關身樵路霜侵屨漁舟雨墊巾忝蒙鄉黨敬六聖有遺民

子生於宣和乙巳歲

又

荒寒淺村步隱翳小茅茨偶逐漁樵住都忘歲月移閑惟接僧話老始愛陶詩耆齒猶須幾羸然敢自期

秋晚

寒渚雁新下壞牆蛩夜吟庭莎欲無色園樹不成陰露灑孤臣淚馳驅壯士心明朝鏡中髮飽受雪霜侵

晨起待子聿歸

老人盥櫛罷坐待汝晨省忽思隔重關懷抱增耿耿小兩暗北窗誰與慰凄冷卷書默袖手奈此清晝永懸知河橋下亦已喚舴艋長路歸當飢呼童具湯麩

信筆

吾生本暫寓無日不可死區區遲速間何地著愜喜朝移一株石暮引一脈水是中亦何樂一笑聊爾耳

又

有酒或一醉無酒終日閑兩足通南欄木落見西山飯飽出柴門本散腰膈頑偶然遇野人笑語欲忘還

龜堂東窗戲弄筆墨偶得絕句

身如蠶老已三眠一繭何妨自裹纏豆飯藜羹支永日權籬竹屋送餘年

又

一樽且復罄幽歡不是癡頑強自寬死去何憂累兒子千錢可買市成棺

又

北菴睡起坐東廂無事方知日月長天與詩人送詩本一雙黃蝶弄秋光

又

老衰有驗詩先退勳業無心夢漸稀淺浦小山孤絕處數家煙火自相依

又

老人孤寂似無家午枕初回日已斜偶得風和身亦健舍南舍北探梅花

次呂子益韻

呂子奇才非復常詩來起我醉中狂大音誰和陽春曲真色一空時世粧東閣獻諛無轍迹西湖寄傲有杯觴病懷正待君瀟被墨妙時須寄數行

舍北行飯書觸目

晚發初發一甌茶曳杖閑行興未涯煙樹參差墨濃
淡風鴉零亂字橫斜夕陽偏傍平橋路寒蝶猶依晚
菊花堪笑衰翁耐荒寂短衣霑露未還家

又

落雁昏鴉集遠洲青林紅樹擁平疇意行舍北三
路閑看橋西一片秋小婦破煙撐去艇了童橫笛喚
歸牛形容野景無餘思自怪癡頑不解愁

明日復得五字

羸病偶不死端居思出遊山寒麥苗短天闊雁聲道
學劍元癡絕脂車久罷休鄰翁獨眷眷同好自相求

又

腰痛今朝愈寒裳野興長黃鴉號亂篠碧蝶繞枯桑
陂壞良疇廢村空舊路荒十年逢九潦誰與問蒼蒼
十一月二十二日夜待子聿未歸

寒爐火半銷壞壁燈欲死人行籬犬吠月出林鶻起
吾兒信偶非長路老子可憐煎百慮人人父子與我
同立朝勿遣交河戍

南窗

暄妍一窗日的燠數枝梅小鼎煎茶熟幽人作夢回
新春又將近晚景但堪哀用底舒懷抱殘書闔復開

幽居

衰鬢蕭條笑舊青一枝棲穩寄餘齡徐行不媿衣露
肘安臥何妨席見經視客恰如堂上燕捐書那顧案
頭螢時時開說前賢事聊遣鄉閭識典刑

春近山中即事

乞得松楠手自栽結茅聊喜避風埃百年孰與夢長
短萬事只如雲去來雪後梅花初半吐身閑樽酒盍
頻開錦官城外青羊路常記當年小獵回

又

節物貧家有故常春盤臘粥逐時忙悠悠歲月催雙
鬢艸艸雞豚薦一觴人意自殊平日樂梅花寧減故
時香小園新展西南角挂樹青蘿百尺長

又

世亂王孫泣路隅時平野老醉相扶種橙正可三年
大愛竹何曾一日無細路迢迢上雲雨輕舟渺渺入
菰蒲莫歸剩欲談幽勝安得丹青為作圖

雪夜感舊

江月亭前樺燭香龍門閣上馱聲長亂山古驛經三
折小市孤城宿兩當晚歲猶思事鞍馬當時那信老
耕桑綠沉金鎖俱塵委雪灑寒燈淚數行

將進酒

我欲挽住北斗杓常指蒼龍無動搖春風日夜吹艸
木只有榮盛無時凋我欲刻斷日行道陽鳥當空月
杲杲非惟四海常不夜亦使人生失衰老如山積麴
高崔嵬大江釀作蒲萄醅頽然一醉三千杯借問白
髮何從來

歲莫懷張季長

已迫桑榆景況逢梅柳時功名終自誤老病獨如期
醉眼嫌天迥孤吟覺鬼悲唐安在何許無字寄相思
謝朱元晦寄紙被

木枕藜牀席見經臥看飄雪入窗櫺布衾紙被元相
似只欠高人為作銘

又

紙被圍身度雪天白於狐腋軟於綿放翁用處君知
否絕勝蒲團夜坐禪

送王季嘉赴湖南漕司主管官

它人作陵邑榜答朝莫急王子乃不然袖手萬事集
它人西入都競裁丞相書王子掉頭去長沙萬里餘
問子謀身無乃左凜如霜松姿磊砢屈原賈誼死有
靈計此兩人心獨可

菴中夜興

示疾維摩無侍者夜闌自掩艸菴門有情梅影半窗
月相應雞聲十里村紙帳擁裘尋斷夢地爐撥火暖
殘樽扶衰又踐新春境萬事元知不足論

初春欲散步畏寒而歸

峭寒漠漠入重貂酒力欺人凝不消春困苦多無處
賣客魂欲斷情誰招一溪水淺梅枝瘦四野雲酣雪
意驕欲到前村無奈賴却尋歸路度西橋

憶昔

憶昔從戎出渭濱壺漿馬首泣遺民夜棲高冢占星
象晝上巢車望虜塵共道功名方迫逐豈知老病只
凌巡燈前撫卷空流涕何限人間失意人

戊午元日讀書至夜分有感

七十年來又四年兩聲燈影故依然未收浮世風漚
夢尚了前生蠹簡緣老學辛勤那有補舊聞零落恐
無傳先師鉢袋終當付歎息誰能共著鞭

又

強戴羅襜怯歲增光陰堪數捷飛騰蒼間點滴新春
兩窗下青燐半夜燈傍架討尋書散亂倚屏吟嘯髮
鬢髻極知老境惟當伏絕學端居恨未能

雜感

志士山棲恨不深人知已是負初心不須先說嚴光
輩直自樂由錯到今

又

勸君莫識一丁字此事從來誤幾人輸與茅簷負暄
叟時時睡覺一頻伸

又

世事紛紛無已時勸君杯到不須辭但能爛醉三千
日楚漢興亡總不知

又

百年鼎鼎成何事寒暑相催即白頭縱得金丹真不
死摩挲銅狄更添愁

又

世間魚鳥各飛沉茅屋青山無古今畢竟替他愁不
得幾人虛費一人心

一杯濁酒即醺然自笑閑愁七十年今日出門天地
別此身如在結繩前

又

山人那信宦塗艱強著朝衣趁曉班豪氣不除狂態
作始知只合死空山

又

老子傾囊得萬錢石帆山下買烏犍牧童避雨歸來
晚一笛春風艸滿川

又

故舊書來訪死生時間剝啄叩柴荆自嗟不及東家
老至死無人識姓名

又

忍窮待死十年間老子誰知老更頑溪友留魚供晚
酌鄰僧送米續朝餐

又

朋儕什九墮丘墟自笑身如脫網魚委命已悲吾道
喪垂名真負此心初齒殘僅可決濡肉眼矚知難讀
細書家事豈容關老子兒曹努力事耕鋤

又

一杯齋餽飪老子腹膨脹坐擁茅簷日山茶未用烹
朝飢食齋麩甚笑戲作

又

一杯齋餽飪手自筆油葱天上蘇陀供懸知未易同
漁隱堂獨坐至夕

又

斜倚筇杖岸幅巾閉門久已謝知聞中庭日正花無
影曲沼風生水有紋三尺桐絲多靜寄一樽玉濯足
幽欣世間萬事都忘盡惟向閑中屢策勳

讀書
讀書肝膽尚輪囷蠹簡堆中著此身飽識三千餘歲
事已為七十四年人鏡中衰鬢難藏老海內虛名不
救貧只欲從今都掃盡剩沽春酒答新春

北望
昔我初生歲中原失太平寧知墓木拱不見塞塵清

京洛無來信江淮尚宿兵何時青海月重照漢家營

蘭南巖路最近飯已時散策香來知有蘭遽求乃弗獲
生世本幽谷豈願為世娛無心託階庭當門任君鋤

古梅

梅花吐幽香百卉皆可屏一朝見古梅梅亦墮凡境
重疊碧蘚暈天矯蒼虬枝誰汲古澗水養此塵外姿

山脚散步由舍北歸

偶散東岡步因成北渚遊鴉昏先小泊魚暖欲羣浮
緩曳紅藤杖斜披紫綺裘閑身病亦可隨處得無愁

又

幽徑欣行藥衰年困負薪梅殘香更遠艸動綠初勻
魚似濠梁樂鷗如海上馴度橋成一笑微健及新春

又

空碧升團月江郊弄夕霏生涯今始是年事古猶稀
冰解魚初躍風和雁欲歸興來忘遠近艸露已沾衣

寄題連江陳氏拂石軒 李似之嘗有歌詞

平生聞說西江水百丈齋淪深見底漁舟來去白鷗
飛上有綸巾隱君子作詩自許輩陶謝歡傲煙雲弄

清泚紛紛聲利滿人間耳本不聞安用洗李公過江
號高流逸氣凜凜橫清秋沙邊一笑偶邂逅掃石蔭

松相獻酬浩歌聲斷七十載尚奇萬壑風颼颼放翁

老憊狂未歇買船欲作西江遊

得張季長書以大蓬見稱蓋以予寄祿官視昔

秘書監也因作五字寄之

老病江湖上煩公問死生僊蓬雖誤到殘錦只虛名
近歲裁損濫恩所謂十色錦者所存亡幾點滴三更雨淒涼萬

里情向來遺恨極不遂隱青城

病足累日不能出菴門折花自娛
頻報園花照眼明蹒跚正廢下堂行擁衾又聽五更

雨屈指元無三日晴不奈病何拋酒醞麤知春在賴
鶯聲一枝自浸銅瓶水喜與年光未隔生

書意

帝命煌煌救百神方傾天漢洗胡塵但須荊州一好
漢安用商山四老人竹帛恐貽千古笑江湖未媿百
年身此心欲與何人說病足呻吟又過春

新燕

天工不用剪刀催山杏溪桃次第開要信今年春事
早社前十日燕新來

北巖采新茶用忘懷錄中法煎飲欣然忘病之

未去也
槐火初鑽燧松風自候湯攜籃苦徑遠落爪雪芽長
細嚼襟靈爽微吟齒頰香歸時更清絕竹影踏斜陽

連日至梅僊塢及花涇觀桃花抵莫乃歸

千載桃源信不通鏡湖西塢擅春風舟行十里畫屏
上身在西山紅雨中俗事挽人常故故夕陽歸櫂莫

又

忽忽豪華無復當年樂爛醉狂歌亦足雄

又

桃花塢近釣魚磯不比劉郎萬里歸水底紅雲迷醉
眼樽前絳雪點春衣病依几杖猶能出老愛風光未
忍違天借清遊每窮日夜深炬火候柴扉

劍南詩稿卷第三十六終

劍南詩稿目錄
卷第三十七

病中作 題郭太尉金州第中至喜堂 莫春

小園新晴二首 春晚感事二首 春晚園

中作 題夷堅志後 幽居 聞鳥聲有感二

首 與子虞子坦坐龜堂後東窗偶書 行年

東窗小酌二首 西林傅菴主求定菴詩二

首 夏日五首 夜酌 夏夜四首 泛舟

感舊六首 書喜 自詠 露坐二首 親舊

或見嘲終歲杜門戲作解嘲 北窗 新秋以

窗裏人將老門前樹欲秋為韻作小詩十首

食新有感貧居久蔬食至是得肉 秋夕露坐

作 有年 大雨 東西家 予自春夏屢病

至立秋而愈作長句自賀 七月十一日雨後

夜坐戶外觀月 王與道尚書挽詞二首 初

秋 感秋 北窗試筆 秋思四首 新涼二

首 自遣 自規 感舊四首 秋日獨酌

夙興 身世 憶昔 豐歲 村居 中秋夜

半後無雲而月色微淡尤為絕景 夜賦 遣

興 秋賽 寄題周丞相平園 雨三日歌

戲作浴生絕句 龜堂雜題四首 偶讀陳無

已芍藥詩云一枝剩欲替雙髻未有人間第一

人蓋晚年所作也為之絕倒戲作小詩 村舍

雨中作 江郊 閒趣三首 小飲 作字

晝睡起偶賦 小舟過吉澤効王右丞 湖

山雜賦五首 太息四首 學書 晚興 秋

晴見天際飛鴻有感 初寒獨居戲作 夢觀

牡丹 書喜三首 小飲罷行至湖塘而歸

病雁 澤居 秋穫歌 戊午重九 重九懷

獨孤景略 長鏡 秋霽遣懷 屏迹 初寒

風雨 龜堂自詠二首 閒居初冬作 病

中排悶 季秋已寒節令頗正喜而有賦

劍南詩稿卷第三十七

宋陸游務觀

病中作

破裘縫更暖糲食美無餘摩詰病說法虞卿窮著書
身羸支枕久足蹇下堂疎今日晴窗好幽懷得好據
題郭太尉金州第中至喜堂

安廉甲第天下傳玉題繡井摩雲煙落成鼓吹震百
里意氣欲壓秦山川第中築堂最宏麗奎畫岌岌蛟
龍纏知公所喜在勇退顧視解組如登仙公心雖爾
天未可終倚北伐銘燕然十年宿衛功第一小却臥
護長淮邊帳前犀甲羅十萬僕下珠履逾三千願公
小緩高枕計即今河雒猶腥羶出師雞鹿擁皂纛畫
象麒麟裁玉輝是時公喜客亦樂為公滿瀉黃金船
莫春

山陰又見莫春初禁火園林社雨餘世事不妨隨日
改年光未遽與人疎豉香下箸嘗蓴菜鹽白開奩得
蟹魚艸艸一杯終可喜數間茅屋亦吾廬

小園新晴

散髮陽狂不計年園林只在小窗前斷虹千尺卷殘
雨新月一鉤生莫天臘釀拆泥留客醉山茶落磴喚
兒煎物華心賞元無盡剩住人間作地仙

又

衰病猶煩藥石功殘春終日在園中地偏幽艸為誰
綠雨霽新花如許紅足蹇扶持須稚子杯深暖熱賴
鄰翁此身雖向閑中老若比休休却未同 司空表聖休
休亭歌曰休休莫莫伎倆雖多性靈惡賴是常教閑處著

春晚感事

據鞍千里何曾病閉戶安眠百病生每憶嘉陵江上
路插花藉艸醉清明
又

寒食梁州十萬家鞦韆蹴鞠尚豪華犢車輕轆歸城
晚爭碾平蕪人亂花

春晚園中作

杏子青青梅子酸山園轉眼又春殘老懷豈復小年
樂病骨不禁清曉寒學術背時甘義墮功名無路久
心闌蠶收麥熟吾何恨但遣銀杯似海寬

題夷堅志後

筆近反離騷書非支諾畢豈惟堪史補端足擅文豪
馳騁空凡馬從容立斷鼈陋儒那得議汝輩亦徒勞
幽居

聞鳥聲有感

小舫簾為鏡幽居竹織門短籬圍藕蕩細路入桑村
魚膾桂頭美醅傾粥面渾殘年謝軒冕猶足號黎元
小市提壺沽濁酒東陂脫袴插青秧歸來靜臥茅簷
底如覺閑中白日長

又

流年冉冉去無情日夜溪頭布穀聲城郭雖存人換
盡令威應悔學長生

與子虞子坦坐龜堂後東窗偶書

時烏朝莫鳴芳艸日夜生春風捨我去歲律俄蟬噪
綴簇繭白白出陂稻青青鳴機織芋葛暑服亦已成
小兒結山房窗戶頗疎明萬事不挂眼朱黃浩縱橫
佳哉東北風吹下讀書聲功名詎敢望且復慰父兄
是日午間開子聿在山半讀書相與欣然

行年

行年過七十與世兩相忘墨沼龜魚樂藥園芝朮香
吾生一蟲臂世路幾羊腸楮弁新裁就脩然學道裝
新作兩楮冠

東窗小酌

烏帽翩翩白苧涼東窗隨事具杯觴流年不貸世人
老造物能容吾輩狂藤葉成陰山鳥下檜花滿地蜜
蜂忙何人畫得農家樂咿軋纜車隔短牆

又
市塵遠不到林塘嫩暑軒窗晝漏長蠶妾趁時爭鹽
鬪農夫得雨正移秧徒行有客驚頭健爛醉無人笑
老狂却掩菴門徑投枕軒聲雷起撼藜牀

西林傳庵主求定庵詩
粥後鐘魚未動時夜燈仍對碧琉璃不須更說能生
慧枯木寒灰也自奇

又
業力驅人舉世忙西林袖手一爐香未能成佛渾閑
事十劫看渠坐道場

夏日
將雛燕子漸離巢過母龍孫已放梢日出址湖初曬
網雨餘乘屋旋添茅家貧舊業元知廢身老微官久
合拋莫恨門前車馬絕豈無農圃與論交

又
過眼春光久已空曬絲擣麥又匆匆新泥滿路梅黃
兩古木號山月暈風角黍茨新間罇俎靈符墨溼照
房櫳歲華不為衰翁駐且付餘生一笑中

又
吳中五月暑猶微竟日南堂坐掩扉綠樹露 一作霧
香鶯獨語畫廊風惡 一作急 燕雙歸二千界內人人
錯七十年來念念非投老萬緣俱掃盡從今僧亦不
須依

又
雨斷雲歸旋作晴尚餘紅溼在簾旌燕雛掠地飛無
力梅子臨池墜有聲米糲解包供午餉莛齋傍枕析
朝醒此翁不負頑軀處捫腹時時繞舍行

又
梅雨初收景氣新太平阡陌樂閑身陂塘漫漫慢行秧
馬門巷陰陰挂艾人白葛烏紗稱時節黃雞綠酒聚
比鄰掀髯一笑吾真足不為無錐更歎貧
夜酌

酒綠孤燈夜梅黃細雨天聊成顧影醉復作曲肱眠
腰下蘇秦印囊中趙壹錢丈夫隨所遇底處不陶然

夏夜
夏夜誰知亦自長幽居渺在水雲鄉月侵竹簟清無
暑風度衣篝潤有香棲鷗自驚移別樹流螢相逐過
橫塘放翁尚苦餘醒在細綆銅餅落井牀

又
山崦風生鴈肅悲柴門月上樹陰移熏衣汗雨初乾
後把卷蚊雷不動時孤悶難禁終歲病浮生易滿百
年期釣竿只待清秋近一棹煙波信所之

又
展轉紗幮睡不成一藤扶僂繞廊行月昇雙鷗移枝
宿露下孤螢綴蔓明汲井忽驚人已起開門堪數事
還生羽衣道帽從吾好柏子煙中起磬聲

又
龜息綿綿破五更起扶藤杖竝南榮擇栖孤鷗尚三
匝司日老難俄一鳴移坐徐看山月吐脫巾聊受水
風清不知竟是真仙未夜夜神遊白玉京

泛舟
水鄉元不減吳松短懼沿洄野興濃鬱鬱冬青森翠
葆離離夜合散紅茸水涯多此二樹村深初度穿林笛
寺近先聞出塢鐘歸路夕陽猶滿岸憑舷一笑覽衰
容

感舊
要識梁州遠南山在眼邊霜郊熊撲樹雪路馬蒙氈
慘淡遺壇側 拜韓信壇至今猶存 蕭條古廟墟 沔陽有蜀
後主所立武侯廟 百詩猶可想數息遂無傳 子山南雜詩百
餘篇舟行過望雲灘壁水中至今以為恨

又
夜涉南沮水朝過小益城梯山天一握度棧土微平
雨近秦雲暗霜高隴月明至今孤夢裏喝馬有遺聲
喝馬皆七字韻語聞之悲愴動人

又
早發金堆市更衣石櫃亭難聲秋後壯山色雨餘青
道澤愁車轍橋危避馳鈴功名竟何在撫事感頽齡

又
塵土暗貂裘森然白髮稠年光真衰衰吾事竟悠悠
馬宿平沙夜軍中馬及廐卒夏夜皆露宿沙上烽傳絕塞秋
平安火拉南山來至山南城下故人零落盡追寫只添愁

又
凜凜隆中相臨戎遂不還塵埃出師表艸棘定軍山
壯氣河潼外雄名管樂間登堂拜遺像千載媿吾顏

又
我思杜陵叟處處有遺蹤錦里瞻祠柏綿州弔海棕
蹉跎悲懼驥感會失雲龍生世後斯士吾將安所從
書喜

又
雨足郊原正得晴地絲萬里盡春耕陰阡陌桑麻
暗軋軋房櫓機杼鳴亭鼓不聞知盜息社錢易斂慶
秋成天公不負書生眼留向人間看太平

自詠
平生萬事付愁癡兀兀騰騰到死時夜踏亂雲過略
約曉分寒溜注軍持束薪山客招烹石渡海蕃僧乞
製碑作箇生涯君勿笑柱天勳業亦兒嬉
露坐 立秋前五日

又
旋削甘瓜進酒卮斷雲漠漠斗離離北臨積水風來
壯東恨長林月上遲秋近不堪聞急杵夜涼已復怯
輕絺天孫老抱河梁恨豈獨人生事可悲

又
岸曠臨窗意未便又拖筇杖出庭前清秋欲近露霏
艸皎月未升星滿天過墟船爭明日市踴車人廢徹
宵眠齊民一飽勤如許坐食官倉每惕然
親舊或見嘲終歲杜門戲作解嘲

又
十年蕭散住林間只是幽居不是閑續得茶經新絕
筆補成僧史可藏山詩題紫閣憑雲寄藥報青城附

鶴還自笑何曾總無事枉教人道閉柴關
北窗
寒泉斷藕素絲長紋篔開瓜碧玉香午睡覺來桐影
轉無人可共北窗涼

又
新秋以窗裏人將老門前樹欲秋爲韻作小詩
殘暑無多日幽居近小江酒醒中夜起松月入山窗
陸子江海人所願守節死潮生釣瀨邊月落菱歌裏

又
小智每自私自大患緣有身孰能忘彼己吾將友斯人

又
野艇千錢買明當泛渺茫但能容一椹家具不須將
立朝紹興間猶及見諸老魂夢不可逢丘垤閉秋艸

又
朝真方檢杖步月始開門零落山花後經旬掩綠樽
唐虞雖已遠至道豈無傳度日一編裏懷人千載前

又
秋風昨夜來聲滿梧桐樹故人渺天末此夕誰與度
少年雖婚宦淡然本無欲婆娑三畝園自歎不啻足

又
無食妨何事吾兒可散愁焚香正中禡聽汝讀春秋
食新有感貧居久蔬食至是方稍得肉
壯遊車轍遍天涯晚得祠官不去家優老每慚千載
遇食新又歎一年加出波魚美如通印下棧羊肥抵
臥沙捫腹笑歌仍索酒不嫌鄰舍怪謹謹

秋夕露坐作
銀河半落露華清南斗闌干北斗明冉冉方悲老將
至纖纖又數月初生酒牀細滴香浮衾衣杵相聞聲
滿城萬卷讀書無用處却將耕稼報昇平

有年

不向神林乞雨晴天公自解相西成急符收盡無通
賦新酒沽多足笑聲外戶徹局停夕柝齊民相勸力
春耕傳聞夜市連三鼓却恨龐公不入城

大雨

北風挾驪雲突起塞宇宙赫日初未西盼轉失白晝
翻空黑幟合列陣奇鬼鬪雨鐵飛縱橫雷車助奔驟
平階水入戶溝瀆不能受對面語不聞持繳避屋漏
兒童抱圖書衣屨那暇救縱暴理豈長忽已收蒼鬻
比鄰更相勞捩拾如過寇老子獨癡頑長歌對醇酎

東西家

東家雲出岫西家籠半山西家泉落澗東家鳴珮環
相對籬數掩各有茆三間芹羹與麥飯日不廢往還
兒女若一家雞犬意自閑我亦思卜鄰餘地君勿怪

予自春夏屢病至立秋而愈作長句自賀

良藥扶衰抵萬金漸加糜粥輟呻吟吟溪風拂簟有秋
意山影半庭生夕陰薄俗只成驚老眼幽居正得遂
初心岸巾待月欄干曲更覺天公愛我深

七月十一日雨後夜坐戶外觀月

浴罷淡無事岸幘臨前軒雷雨始退散雲月相吐吞
風蟬斷還續枝間終夕喧露螢闔復開熠燿綴艸根
殘暑會當去孰敢厭炮燔四時莽相代所數歲月華
歡悵挽不留白髮生無根兒女日夜長子且復有孫
猶松偶未薪野鶴猶孤鷺華表幸來歸餘事何足言

王與道尚書挽詞

朗朗百間屋汪汪千頃陂直能彰主聖清不顧人知
許國多艱日逢辰獨斷時人猶望霖雨殄瘁不勝悲

又

昔遇開藩日嘗叨下榻榮從容陪讌笑傾倒及平生
借譽言猶在懷知涕易橫終慚五字句不盡百年情

初秋

雨氣排殘暑風聲送早秋拂窗聞葉落繞井看螢流

臥起須人助炊春尚自謀蕭條歲將晚百慮入搔頭

感秋

秋色關河外秋聲天地間壯士感此時朝鏡凋朱顏
一身寄空谷萬里夢天山噫嗚嗚怒皆裂憤激悲涕潛
古來真龍駒未必置天閑長松倒澗壑委棄同藁菅
得志未可測談笑濟時艱凜然出師表一字不可刪

北窗試筆

老來日月速去若放箭方看出土牛已復送巢燕
清晨覓縑衣正午廢紈扇北窗小兩餘盆山鬱葱蒨
病體為之輕一笑玩筆硯雖無顏柳工揮灑亦忘倦
紙窮墨漸燥地虻爭入卷屬兒善藏之勿遺俗子見

秋思

秋毫不受俗塵侵隨處悠然一散襟天際挂虹初斷
雨雲頭翳日又成陰引泉北澗長澆竹拂榻西窗自
斲琴藥石掃空身便健始知萬事要無心

又

雨長蒼苔滿釣磯坐令秋暑斂餘威天高月破殘雲
出野曠風驚蠹葉飛終歲鉏犁猶不飽萬家礎杵獨
無衣早知竟坐儒冠誤射虎南山未必非

又

身似龐翁不出家一窗自了淡生涯山薑零落初成
子石竹凄涼半吐花寒澗挹泉供試墨墮葉篝火喚
煎茶掩關本意君知否兩耳衰年不耐譁

又

老懷不慣著閑愁信脚時為野外遊過雁未驚殘月
曉片雲先借一天秋村醅似粥家家醉社肉如林處
處留七十已稀今又過問君端的更何求

新涼

山居謝來客病體喜新涼幽艸上牆綠落花露土香
捐書心自息聽雨夢偏長菰葉鄰人餉欣然獨舉觴

又

菰首初離水薑芽淺漬糟粳香等炊玉韭美勝炮羔

露下殘蕪溼風生萬木號從今更何事痛飲讀離騷
自遣

踽踽人間未死身鄉閭共敬六朝民睡無由著緣多
感醉不能成坐一貧幽屏最憎蟲弔夜狂吟略似鳥
鳴春也知世俗誰知我猶待君王獵渭濱

自規

曲肱飲水彼何人汝獨何爲厭賤貧大節勿汙千載
史少時便盡百年身圖書幸可傳遺業雞黍何妨約
近鄰今日仲秋還小兩剩鈕麥壘待新春鄉人謂八月
一日得兩宜來年麥

感舊末章蓋思有以自廣

庚寅歲入巴東破臥聽清猿月下聲二十九年窮未
死却思當日似前生

又

百堂小益最初程朱棧青崖照眼明十日經行圖障
裏時時馬上聽鶯聲

又

路入梁州似掌平鞦韆蹴鞠趁清明未論日遠長安
近且喜南山天際橫

又

青城山裏屏風疊太華峯頭腰帶輕跨鶴橫空吾欲
去九秋月露看青冥

秋日獨酌

艸木秋始繁黃碧照籬落雖云各有時意緒終索莫
老人固多感對此聊命酌風霜肅萬物過雁在寥廓
吾當識其大微物不足託何以豁曠懷短章可時作

夙興

艸堂風雨少睡眠骨冷始覺非壯年水鳥長鳴聲戛
然庭中棲鴉亦已翻老人清餓如龜蟬起坐甚愛小
窗妍一生宦遊膏火煎歸來杜門氣羸全人看雖不
直一錢知我自有穹穹天賦詩稿成棄不傳殘鐘斷
磬知誰編

身世

身世浮沉等一漚臥看校尉劍封侯青燈微火葉鏞
夜淡月淒風衣杵秋醉裏不辭嘲兀兀吟邊時得奇
悠悠即今老眼無開處又向城南倚寺樓

憶昔

憶自梁州下益州身閑處處醉紅樓早知虛起彈冠
意悔不常爲秉燭遊詩思已慚馳陣馬目光猶覺射
車牛蓮峯日觀何時到下看人間萬里秋

豐歲

豐歲籬聲動四鄰深秋景氣榮如春羊腔酒擔爭迎
婦鼙鼓龍船共賽神處處喜晴過甲子家家築屋趁
庚申老翁欲伴鄉閭醉先辦長衫紫領巾

村居

孤村淺浦近江城西折坡陁一嶺橫墟落煙生含暮
色園林風勁作秋聲年豐租稅無逋負酒熟鄉鄰遞
送迎老病愈知難報國只將高枕送餘生

中秋夜半後無雲而月色微淡尤爲絕景

輕煙薄靄九霄寒素月渾如隔數看此夕洞庭應更
好誰能從我跨青鸞

夜賦

老人不食覺魂清況若身遊白玉京夜靜月驚林鶴
起水涼風颭露荷傾昏燈一點窺孤夢畫角三終轉
五更欲醉海山還懶去且攜羽扇憩青城

遣興

學廢文章傳世少身閑車馬過門疎壯心易盡堯眉
酒義氣肯貪熊掌魚列聖仁恩深雨露兩京宮闕尚
丘墟素懷華涓嗟誰問且作狂歌楚接輿

秋賽

柳姑廟前煙出浦冉冉縈空青一縷須臾散作四山
雲明日來爲社公雨小巫屢舞大巫歌土女拜祝肩
相摩芳茶綠酒進雜還長魚大載高嗟峨常年餞科
煩笙楚縣家血溼庭前土妻啼兒號不敢怨期會常

憂累官府今年家家有餘粟縣符未下輸先足木刻
吏蒲作鞭自然粟昂如流泉儲積不愁無九年

寄題周丞相平園

先生道心平如砥秋毫忿怒何曾起漫將周易著牀
頭本不洗心那洗耳先生國論如砥平三朝倚之作
權衡泰階兩兩元不動自然萬里無槐槍如今歸來
曲肱臥世事無窮俱看破不栽桃李不鉏蘭山僧野
叟時來過吾儕七十固已壽更到期頭亦何有倘知
生死本自平拈放一邊如把酒

雨三日歌

秋風戒寒雨三日空村無人莫蕭瑟北窗書生萬卷
書齒豁頭童真可惜輪囷新蟹黃欲滿磊落香橙綠
堪摘與來尚能氣吞酒詩成不覺淚漬筆士生蓬矢
射四方掃平河雖吾儕職湖中隱士倘可逢握手與
君談至夕

戲作治生絕句

治生何用學陶朱少許能慳便有餘惜酒已停晨服
藥省油仍廢夜觀書

龜堂雜題

龜堂端是無能者妄想元無一事成最後數年尤可
笑飽餐甘寢送浮生

又

癡頑老子老無能遊惰農夫酒肉僧閉著庵門終日
睡任人來喚不曾磨

又

長腰玉粒出新春秋穫真成畝一鍾衣食盡供官賦
足何妨世世作耕農

又

冷雨蕭蕭濯不晴亂書圍坐正縱橫忽聞小瓮新醅
熟急喚兒童洗破觥

偶讀陳無已芍藥詩云一枝剩欲簪雙髻未有
人間第一人蓋晚年所作也為之絕倒戲作小

詩

少年妄想已癡絕鏡裏何堪白髮生縱有傾城何預
汝可憐元未解人情

村舍

過埭六七里埭江三四家潮生魚滬短風起鴨船斜
世守桑麻業長無市井譁

雨中作

雨聲可愛秋方見睡味無窮老始知半醉擁衾支倦
枕誰能三復放翁詩

江郊

白艸江郊莫青帝野店秋喧呼估船客鬼我飲家流
老豈題橋柱愁惟倚寺樓更傷昏澀眼煙際數歸牛

閑趣

被擁聽秋雨兒扶上夜香甌炊霜後稻槽漬社前薑
馬病空思路僧歸却住房風屏久嘔軋錯認騰聲長

又

飯滿七綴鉢香凝百衲窗雨聲酣曉枕燈灺落秋缸
疾豎元知遯天魔亦已降超然對兒子未媿鹿門龐

又

老至衰滋劇秋高病尚侵坐看兒學字臥聽客彈琴
困滿雀方鬪栖寒雞欲瘖世情元自嬾不是事違心

小飲

莫笑放翁顛歌呼覆酒船雙螯初斫雪珍羞已披縣
寒雨連旬日新橙又一年更須重九到作意菊花前

作字

整整復斜斜如風際鴉書成半行艸眼倦正昏花
未辦倉盛筆寧能錐畫沙老夫端可媿頭白不名家

晝睡起偶賦

蝴蝶與蒙莊頽然寓一牀日隨香篆過夢逐雨聲長
酒喜新鑄綠橙如故歲黃昏昏還隱几誰識老龜堂

小舟過吉澤劾王右丞

澤園霜露晚孤村煙火微本去官道遠自然人迹稀

木落山盡出鐘鳴僧獨歸漁家閑似我未夕閉柴扉
湖山雜賦

門前天鏡倒千峯舍後菰蒲與海通乘興出遊無遠
近煙波何處覓孤篷

又
一生到處賈胡留身屬官倉不自由白首歸來更何
恨十年爛醉石帆秋

又
東西相望兩湖橋來往無時一晝橈買酒每尋村市
步黃蔬時就野僧寮

又
不到梅山二十霜望中常似隔他鄉一杯饜粟紗燈
下最憶初寒宿上方梅山寺與敝廬南北相差無二十里然不
到最久

又
煙中一棹小江秋憶上牛頭倚寺樓今日籬邊殘照
裏却從西北望牛頭

又
太息
早歲元于利欲輕但餘一念在功名白頭不試平戎
策虛向江湖過此生

又
書生忠義與誰論骨朽猶應此念存砥柱河流傳掌
日死前恨不見中原

又
自古才高每恨浮偉人要是出中州即今未必無房
魏埋沒胡沙死即休

又
關輔堂堂墮虜塵渭城杜曲又逢春安知今日新豐
市不有悠然獨酌人

又
學書
九月十九柿葉紅閉門學書人笑翁世間誰許一錢
直窗底自用十年功老蔓纏松鉤霜雪瘦蛟出海拳

又
虛空即今譏評何足道後五百年言自公
晚興

又
壯遊車轍遍天涯晚落農桑不自知許國雖墜身遠
老讀書未倦眼先衰雲深嶺路樵歸晚雨細江亭渡
發遲一事猶堪慰孤寂錦囊傾倒有新詩

又
秋晴見天際飛鴻有感
新晴天宇色正青羣鴻高奮在冥冥兒童相呼共仰
視我亦扶杖來中庭豐年到處稻梁滿胡不暫下栖
沙汀應須江海寄曠快肯爲霜雪嗟飄零書生可笑
不自喜憔悴久翦籠中翎鷗波萬里每媿杜鶴化千
載知非丁風前哀號漫激烈日下孤影常踈嶼詩成
欲寫復懶去誦似溪友聲泠泠

又
初寒獨居戲作
開釵一作釵得紫棗帶葉摘黃甘獨臥維摩室誰同
彌勒龕宗文樹雞柵靈照挈蔬籃一段無生話燈籠
可與一作自可談

又
夢觀牡丹
忘却晨梳滿把絲棟花嫌不似臙脂起來一笑看清
鏡惟插梨花却較宜

又
書喜
水際柴荆鍵不開野人相覓漫敲推寒鴉陣黑疑雲
過老木聲酣認雨來酒價日低常得醉官租時辦不
勞催平生未省如今樂却笑傍觀誤見哀

又
今年端的是豐穰十里家家喜欲狂俗美農夫知讓
畔化行蠶婦不爭桑酒坊飲客朝成市佛廟村伶夜
作場身是閑人新病愈臘移霜菊待重陽

又
滿川秋穫重赧肩拾穗兒童擁道邊夜夜江村無吠
大家家市步有新船奪攘不復憂山越安樂渾疑是
地仙惟有衰翁最知達避胡猶記建炎年
小飲罷行至湖塘而歸

社酒真如粥面濃朱顏頃刻換衰容霜輕已覺樹搖落雲起始知山墨重梅市魚歸衝雨棹寶林人定隔城鐘此翁大似遊僧樣爐煖窗深又過冬

病雁 詞稼將滿幸蠶支朝夕遂不敢復有請而作是詩

蘆洲有病雁雪霜摧羽翰不辭道路遠置身湖海寬稻梁亦滿目鳴聲自辛酸我正與此同百憂雙鬢殘東歸忽十載四忝侍祠官雖云幸得飽早夜不敢安乃知學者心羞媿甚飢寒讀我病雁篇萬鍾均一算

澤居

澤居僅足不求餘曠快真同縱壑魚平日酷憎蠅附驥莫年肯作鶴乘車齒搖但羨岷山羊眼澀惟觀青監書此際自應還往絕本無心與俗人疎

秋穫歌

牆頭累累柿子黃人家秋穫爭登場長碓搏珠照地光大甌炊玉連村香萬人牆進輸官倉吏飢冷不暇嘗訖事散去喜若狂醉臥相枕官道傍數年斯民阨凶荒轉徙溝壑相望縣吏亭長如餓狼婦女怖死兒童僵豈知皇天賜豐穰畝收一鍾富萬箱我願鄰曲謹蓋藏縮衣節食勤耕桑追思食不餐糟糠勿使水旱憂堯湯

戊午重九

朋舊相望天一涯登高結伴只鄰家秋風自欲吹紗帽衰鬢何曾泥菊花藥市神仙思益部鮫盤節物記京華自憐病後歡悵薄小醉歸來日未斜

重九懷獨孤景略

昔逢重九日初識獨孤君埵鬱洮河馬聯詩劍閣雲已悲吳蜀遠更歎死生分安得持卮酒澆君丈五坟

晨鏡

晨起覽清鏡有叟鬢已皤鹹黃色類拖面皺紋如鞞熟視但驚歎初不相誰何久乃稍醒悟舉手自摩挲與汝周旋久流年捷飛梭生當老病死求脫理則那切勿彊撐拄據鞍效廉頗惟須勤把酒暫遺衰顏醜

秋霽遣懷

陸生少日心膽壯萬里憑陵寄疎放玉關曾誓馬革裹滄海豈憂魚腹葬人生富貴本細事的築逢時俱將相正令不遇亦何慊藥鑊丹爐老青嶂今年秋晚苦多雨三十六溪新綠漲極知世事不足論霽日小舟行可榜

屏迹

昔者航濤江雲山迎我東擊楫誓江神永託冥冥鴻十年桑榆暖萬事馬牛風邇來愈屏迹庭戶深蒿蓬就愛挹新醅傍畦蒨晚菘隣曲或念我小鮮亦時供喟然撫几歎恨今已龍鍾向使早十年何媿柴桑翁

初寒

今日霜露冷凜然悲莫秋垂帷跨微火發篋出輕裘徂歲逝將換殘生愈覺浮一杯還自閔小獵記梁州

風雨

風雨從北來萬木皆怒號入夜殊未止聲亂秋江濤渺然老書生白頭臥蓬蒿閉門不敢出裂面風如刀鄰人閔我寒牆頭過濁醪時哉一昏醉新橙宜蟹整

龜堂自詠

龜堂一老翁短褐立秋風時過同籬菊身衰似井桐新霜萬瓦白朝日數樵紅且復尋書卷悠然度歲窮

又

采藤持織履刺楮治爲冠看劍心空壯騎驢骨本寒病多辭酒伴老甚解祠官 予十月奉祠歲滿不復敢請 積有扁舟在秋濤萬里寬

閉居初冬作

香樹蒲團又一新天將閉處著閉身東窗換紙明初日南圃移花及小春婦女晨炊動井臼兒童夜誦聒比鄰早知閭巷無窮樂悔不終身一幅巾

病中排悶

面骨嵒嶮鬢雪新承平版籍有遺民 予生於宣和中心雖願繼無傳學力不能支已廢身開卷眼昏如隔霧

擁爐肺渴欲生塵老龐亦有兒孫念付與天公不問人

季秋已寒節令頗正喜而有賦

霜降今年已薄霜菊花開亦及重陽四時氣正無愆
伏比屋年豐有蓋藏風色蕭蕭生麥隴車聲碌碌滿
魚塘老夫亦與人同樂醉倒何妨臥道傍

劍南詩稿卷第三十七終

劍南詩稿目錄
卷第二十八

秋懷 吳體寄張季長 嘲畜貓 立冬日作
初冬 醉題 新作火閣二首 舍北行飯

遺興二首 舟中三首 兩夜感舊 夜聞落
葉 閉門 祠祿滿不敢復請作口號三首

過鄰家 舍北野望四首 書感 冬夜爐邊
小飲 龜堂獨酌二首 冬夜作短歌 病愈

自遣 感舊二首 寒雨中偶賦二首 壽
考如富貴 午飯二首 題王仲信畫水石橫

幅 治圃 冬日感興十韻 冬日出遊十韻
思蜀三首 作雪二首 戲詠山家食品

耕罷偶書 兩夜 菴中晨起書觸目四首
三山杜門作歌五首 老境二首 記戊午十

一月二十四夜夢 六經示兒子 舍北晚步
對酒 夜坐求酒已盡喟然有賦 食粥

寒夜 梅花六首 三山卜居今三十有三年
矣屋陋甚而地有餘數世之後當自成一村今

日病少間作詩以示後人二首 南園觀梅
歲盡苦寒 己未新歲 歲首書事二首 初

春 菴中獨居感懷三首 戲作貧詩二首
春日園中作 中春連日得雨雷亦應候 兩

後微陰光景益奇復得長句 春日小園雜賦
二首 簡鄰里 客叩門多不能接往往獨坐

至晚戲作 園中偶題四首 北窗偶題四首
沈園二首

劍南詩稿卷第三十八

宋陸游務觀

秋懷

形骸歲歲就枯朽意氣時時猶激昂水遠浮鷗方浩蕩霜高殘菊更芬芳人皆有舌是非在劫未成灰時世長三百里湖行自復子孫努力事耕桑鏡湖廢百七十餘年故吾鄉多凶會有復之者

吳體寄張季長

九月十月天雨霜江南劍南途路長平生故人阻攜手萬里一書空斷腸人生彊健已難恃世事變遷那可常兩家子孫各長大他年窮達毋相忘

嘲畜貓

甚矣翻盆暴嗥君睡得成但思魚饜足不顧鼠縱橫欲購銜蟬快先憐上樹輕胸山在何許此族最知名俗言貓為虎舅教虎百為惟不教上樹又謂海州貓為天下第一

立冬日作

室小財容膝牆低僅及肩方過授衣月又遇始裘天寸積篝爐炭銖稱布被綿平生師陋巷隨處一欣然

初冬

志士逢秋已自傷老人況復惜年光正看溪碓春粳滑又見山坡下麥忙桐落井牀多槁葉菊殘衫袂尚餘香讀書有課真當勉剩貯明膏伴夜長是日方買油

醉題

生來避世傲公卿海內無人識姓名九節筇邊秋萬里長明燈下雨二更心安白髮何勞掃藥熟黃金固可成只待蓬壺賦詩罷却來京洛看昇平

新作火閣

旋設篝爐下紙簾樂哉容膝似陶潛囊中佩藥無時服架上堆書信手拈似玉秋菰殊未老如雲宿麥不須占掃空祠祿吾何欠陋巷簞瓢易屬厭祠祿止此月

又山路霜清葉正黃地爐火煖夜偏長中安煮藥膨臍鼎傍設安禪曲肱牀木槁不知年自往雲閑已與世相忘更闌坐穩人聲靜時聽風簾響暗廊

舍北行飯

蔓絡疎籬艸滿塘飽嬉聊復步斜陽一霜驟變千林色兩犢新犁百畝荒野寺僧殘尚鐘鼓官堤舟過見帆檣歸來笑補空囊課寒日誰知亦自長

遣興

轍迹當年遍九州晚歸始解臥林丘愛身每戒玉抵鶻養氣要如刀解牛柔勝搖殘天鏡月短筇領盡石帆秋儘言未辦常局戶竟是吾身得自由

又

出任纒堪斗大州初歸便擬築糟丘虛名大似月蟾兔榮路久如風馬牛唧唧悲蛩常弔夜蕭蕭蠹葉更禁秋靜觀世事頻興歎千載前時有許由

舟中

柁邊潮水落還生篷底寒燈滅復明約束長年牢繫纜報人風雨有鼉鳴

又

蕭蕭風雨小江秋不是愁人亦合愁忽聽疎鐘知寺近笑尋沙路上牛頭

又

龕山古戍更漏聲白塔小市燈火明六十年間幾來住依然惻愴路傍情

雨夜感舊

雨來猛打窗燈暗猶照壁老人耿不寐撫事悲夙昔風生枯柏渡馬病金牛驛鼻枝猿下飲登樹熊自擲危巢窺鶻栖深雪見虎跡至今清夜夢猶想嶠山碧廢棄謝功名老疾輟行役賦詩雖不工聊用慰今夕

夜聞落葉

我行出柴門初喜春艸生俛仰幾何時落葉終夜聲

嗟我日益老抱疾況未平晨興就盥櫛顧亦彊支撐
齋中有兩童熟視不能名定非張睢陽大笑顏冠纓
死至人所同此理何待評但有一可恨不見復兩京
閉門

閉門高臥鏡湖傍元自無閑可得忙泛罷杯觴餘菊
苦玩殘指爪帶橙香燈昏共度空階雨蛩冷偏依丈
室牀不待衰年宦情盡未來如雁到衡陽

今年高謝武夷君斂豆羹藜亦所欣參透莊生齊物
論掃空韓子送窮文心如脫弄犇林鹿迹似還山不
雨雲猶幸此身強健在鄉鄰爭看布襦帶

祠庭入載竊榮名一飽心知合自營牘後落銜便手
倦月頭鐫倖喜身輕弊衣不補惟頻結濁酒難謀且
細傾賴有東臯堪肆力比鄰相喚事冬耕

白首還山不自存天書四降海邊村慚非故將前侯
比誤辱優賢養老恩龜壽自應能食氣鶴歸那得更
乘軒從今再艸公車奏惟有挂冠神武門

扶杖過吾鄰相誇自在身年豐稱貸少酒賤往來頻
羣散雞歸柵聲喧雀噪困丁寧語兒子切勿厭沉淪
過鄰家

短景妨遊興長歌慰作勞葉凋西埭近水落北橋高
病每隨時劇衰難與世塵旗亭新釀美萬事一秋毫

斷壠園蔬圃枯桑繫釣查經行橋獨木佇立路三义
野卉樓孤蝶平川起亂鴉檣節無定處興盡即還家

又
溪約通西崦山蹊繚北村殘霞明水面落葉擁籬根
野父編龍具樵兒習兔園吾今并蛙耳敢復慕鸚鵡

早歲遭逢異中年促召頻馳驅猶許國臥起已須人
藥石三秋病風波萬里身籬門殘照裏慘淡易傷神

書感
常記當年賦子虛公卿交口薦相如豈知鶴髮殘年
叟猶讀蠅頭細字書出處幸逃千載笑功名從負此
心初荒園落葉紛如積日莫歸來自荷鋤

冬夜爐邊小飲
擁爐可使曲身直飲酒能同檣面紅若使金丹真入
手飛騰亦在立談中

龜堂獨酌
幅巾蕭散餘齡江左諸賢可乞靈護枕小屏圖紫
閣映窗矮卷寫黃庭曠懷與世元難合幽句何人可
遣聽一酌蘭溪遺萬事時看牆底臥長瓶偶得蘭溪十
餘樽清醅烈殆不可名

又
一棹蘭溪自獻酬徂年不肯為人留巴山頻入初寒
夢江月偏供獨夜愁越石壯心雞嗑嗑子卿歸信雁
悠悠天生我輩初何用病骨支離又過秋

冬夜作短歌
飢鼠窺殘燈寒犬踏枯葉小室擁燎爐清笳下危堞
老人素多疾舉動常畏怯衣裘視寒燠日夜自調燮
食必按本艸下箸未嘗輒體安疾自去藥石無此捷
敢學李輕車霸亭夜遊獵況如馬新息萬里聽高跼
欲求神氣住先戒事物接寧為子光瘖不效嗇夫喋

病愈
明晨一杯粥跌坐橫白麩無魚何足道為爾歌長缺

倦榻呻吟每自哀占著來告一作言出餘災自能洗研
拂書几時亦折花尋酒杯久類寒蛟潛岫穴忽如老
馬噴風埃霜晴爛熳東窗日一笑山坡訪早梅

自遣
枳籬茅屋枕孤峯偃盡初來手種松睡少未成千里
夢愁深先怯五更鐘中天日月逢真主數畝桑麻伴

老農世事古今誰料得不堪跋水照衰容

感舊

君不見資中名士有李石八月秋濤供筆力初為博
士不暖席晚補臺郎俄復斥諸公熟晚亦太息推壓
至死終不惜生前何曾一錢直後遺文價金壁後
之視今猶視昔此事誠非一朝夕山城舊廬暗荆棘
羸然諸孫守墳籍撫孤我負朋友責萬里詩成淚空
滴

又

君不見蜀師渾甫字伯渾半生高臥墓頭村才不得
施道則尊死已骨朽名猶存文章落筆數千言上支
離纒下招魂望之眉宇何軒軒高談浩若洪河翻苑
尹敬如綺與園方飾羔雁登衡門小人誘傷實不根
妄指拱壁求瑕痕窮通在公豈足論浮雲終散朝陽
暎安得此老起九原入贊國論蘇黎元 范至能帥成都
欲以遺逸起之懷客有沮之者遂不果

寒雨中偶賦

鬢毛蕭颯齒根浮徂歲翩翩肯暫留窮巷多泥誰問
疾空階滴雨又經秋自營可笑誇三窟善守寧須築
百樓但使胸中機事盡一樽隨處送悠悠

又

莫年心事與誰同到處飄然一病翁斷夢淒涼燈影
裏殘詩零落雨聲中莫驚顏鬢渾非昨略數朋儕已
半空祠祿上還猶負媿何功班綴冠僊蓬 子官視祕書
監

壽考如富貴

壽考如富貴初亦不自知邂逅偶不死亦或至期頤
予少多疾恙五十已遽衰齒搖頰頰白蕭然蒲柳姿
俛仰忽二紀臥病實半之富貴不可求壽亦豈汝私
萬事付自然孰為樂與悲惟當老益學易簣以為期

午飯

我望天公本自廉身閑飯足敢求兼破裘負日妨簷

底一椀藜羹似蜜甜

又

民窮豐歲或無食此事昔聞今見之吾儕飯飽更念
肉不待人嘲應自知

題王仲信畫水石橫幅

王郎書逼揚風子畫亦憑陵蜀雨孫豈是天公惜絕
藝一生憔悴向衡門

拾圃

槁蔓殘蕪滿幽圃多具鉏耨課僮豎非惟吾圃要翦
除亦恐爾輩成惰窳老桂盤壑飽風霜修篁當軒弄
煙雨一松孤立信豪傑兩槐對植如賓主珍禽揀枝
春欲動蠹穴掃空吾甚武靡蕪芽葉已暗長甘菊根
芽亦潛吐山薑潤蒲乃微艸露葉參差看仰俯世間
安得有遺才位置要須令得所

冬日感興十韻

露雨天昏墮陂湖地阻深蔽空鴉作陣暗路棘成林
有客風埃裏頻年老病侵夢魂來二豎相法欠三壬
舊憤開孤劍新愁感斷砧唐衢惟痛哭莊舄正悲吟
瘦跨秋門馬寒生夜店衾但思全舊壁敢冀訪遺簪
樓上蒼茫眼燈前破碎心長謠傾濁酒慷慨壓層陰

冬日出遊十韻

吳會寒常薄冬深略未冰荒郊觀雉鬪大澤見魚騰
釣艇頻容借籃輿漸可乘有時穿密篠隨處倚枯藤
金石素遺刻衣冠禹舊陵叢祠祈臘雪小市試春燈
問路鉏耨爭橋乞供僧疎狂違俗久衰疾與年增
千祿雖知恥懸車媿未能階官有微俸醉髮任鬢鬢

思蜀

園廬已卜錦城東乘驛歸來更得窮只道驂驪開道
路豈知魚鳥困池籠石犀祠下春波綠金雁橋邊夜
燭紅未死舊遊如可繼典衣猶擬醉鄴筒

又

二十年前客錦城酒徒詩社盡豪英才名吏部傾朝

野意氣成州共死生吏部郎字文紹奕衰自成州守字文子震
子友廢苑探梅常共醉遺祠訪柏亦俱行即今病臥
寒燈裏欲話當時涕已傾

又
謹侯才氣敵文園國子監丞譚季王德稱日日銀鞍畫戟
門奇句入神聞鬼泣巨觥如海看鯨吞一官胃豈能
令死萬里銘旌忍更論湖上秋來頻入夢憑誰詞翰
與招魂

作雪

雪雲寒不動林鳥噤無聲病起衰何劇囊空醉不成
中原亂方作弱虜運將平臺省多賢俊常談媿老生

又

荒村雪欲作老叟病無聊樹暝鳥驚集茆深雉兔驕
溪灘觀趁渡嶺路數歸樵即死無它憾終身負聖朝

戲詠山家食品

牛乳押酥淪茗芽蠶房分蜜漬棕花舊知石芥真尤
物晚得萋蒿又一家疎索鄉鄰錄老病團樂兒女且
喧譁古人不下藜羹慘對酌龜堂已太奢

耕罷偶書

新溉東臯畝一鍾烏健麤足事春農瀟橋風雪吟雖
苦杜曲桑麻興本濃老大斷非金谷友生存惟冀酒
泉封莫嘲野餉蕭條其箭茁蓴絲亦粗一作且供

雨夜

未路蕭條客子心不堪徂歲更沉陰低簷雨滴睡眠
少敗壁燈殘感慨深不辦典衣謀盡醉尚能擁鼻作
微吟交朋一散如天遠試向今宵夢裏尋

菴中晨起書觸目

山重水複怯朝寒一卷窗間袖手看朱擔長瓶列雲
液絳囊細字拆龍團數峯移自侏儒國一研來從黯
淡難要識放翁頑鈍處胸中七澤著猶寬雲液揚州酒

又

名近淮帥餉數十尊營道小山及劍硯得自張季長張仲欽適在案間

暉暉初日上簾鉤漠漠清寒透衲裘雪棘竝棲雙鶻
腹金環斜絆一猿愁廉宣臥壑松楠老王孑穿林水
石幽戲事自憐除未盡此生行欲散風漚唐希雅畫鶴
易元吉畫猿廉宣仲老木王仲信水石皆菴中所挂小軸

又

賦形不使面團團聳膊心知到骨寒晏子元非枕鼓
士杜生那有切雲冠時扶遷客桃榔杖日厭詩人首
指盤糲是平生憎阿堵今年初解侍祠官

又

初歸舊墓老鄉邦手結茆茨近小江北渚露霑行藥
屐東廂日射勘書窗孤忠自信丹心折萬事空成雪
鬢霜長媿宗人白崖老贈行期我鹿門龐子自成都召
還禱射洪白崖陸使君祠使君以杜詩為籤子得全家隱鹿門之篇

三山杜門作歌

我生學步逢喪亂家在中原厭犇竄淮邊夜聞賊馬
嘶跳去不待雞號旦入懷一甌舛間伏往往經旬不
炊爨嗚呼亂定百口俱得全孰為此者寧非天

又

高宗下詔傳神器嗣皇御殿猶揮涕當時獲綴鵝鷺
行百寮拜舞皆獻款小臣疎賤亦何取即日趨召登
丹陛嗚呼橋山歲晚松柏寒殺身從死豈所難

又

中歲遠遊踰劍閣青衫誤入征西幙南沮水邊秋射
虎大散關頭夜聞角畫策雖工不見用悲吒那復從
軍樂嗚呼人生難料老更窮麥野桑村白髮翁

又

晚入南宮典牋奏濫陪太史牛馬走忽然名在白簡
中一權還家傾臘酒十年光陰如電電綠黃憤從
鄰叟嗚呼古來駘驩劍倚門況我本自安丘園

又

寬恩四賦仙祠祿每忍慚顏救枵腹五秉初辭官粟
紅一瓢自酌巖泉綠天公乘除不負汝宿疾微平歲

中熟嗚呼字字細讀逍遙篇此去八十有幾年

老境

白髮短欲盡入嗔心尚孩埋盆池激瀾累瓦塔崔嵬
軟飯三春米醇醪九醞醉忽然拈筆起記著早梅開

又

今日霜殊重衰翁老可憐朝暈兩炊火覆藉一牀
人客容稱疾兒童不攪眠雲開見殘日更愛小窗妍

記戊午十一月二十四夜夢

街南酒樓粲丹碧萬頃湖光照山色我來半醉躡危
梯坐客驚顧聞飛屐長綰短帽黃袍衰從一山童持
藥笈近傳老仙嘗過市此翁或是那可識逡巡相語
或稽首爭獻名樽冀餘瀝我欲自言度不聽亦復軒
然為專席高談方縱驚四座不覺隣雞呼夢破人生
自欺多類此撫枕長謠識吾過

六經示兒子

六經如日月萬世固長懸學不趨卑近人誰非聖賢
馬能龍作支竭乃翁為天我老空追悔兒無棄壯年

舍北晚步

漠漠炊煙村遠近寥寥離鼓墟西東三义古路殘蕪
裏一曲清江淡靄中外物已忘如棄屣老身無伴等
羈鴻天寒寂寞籬門晚又見浮生一歲窮

對酒

老子不堪塵世勞且當痛飲讀離騷此身幸已免虎
口有手但能持蟹螯牛角挂書何足問虎頭食肉亦
非豪天寒欲與人同醉安得長江化濁醪

夜坐求酒已盡喟然有賦

澹月微霜夜漏徂披裘不睡附寒爐清笳嫋嫋已三
弄殘火熒熒纔一鉢報國無期心欲折讀書自力眼
將枯麴生作態年來甚不受閑人折簡呼

食粥張文潛有食粥說謂食粥可以延年予竊愛之

世人箇箇學長年不悟長年在目前我得宛丘平易
法只將食粥致神仙

寒夜

堅冰塞川厚莫測斷雁叫羣聲可哀艸園小甕酒未
熟霜壓瘦枝梅不開穉子忍寒守蠹簡老夫志睡盡
爐灰低頭就世吾所諱千載伯鸞安在哉

梅花

五十年間萬事非放翁依舊掩柴扉相從不厭閑風
月只有梅花與釣磯

又

山村梅開處處香醉插烏巾舞道傍飲酒得仙陶令
連愛花欲死杜陵狂

又

一花兩花春信回南枝北枝風日催爛熳却愁零落
近丁寧且莫十分開

又

廣寒宮中第一仙情深不礙韻超然勸君莫作兒女
態但向花前傾玉船

又

秣歸江頭煙雨昏客舟夜繫梅花村相逢萬里各羈
旅不待猿啼已斷魂

又

青羊宮前錦江路曾為梅花醉十年豈知今日尋香
處却是山陰雪夜船

三山卜居今三十有三年矣屋陋甚而地有餘
數世之後當自成一村今日病少間作詩以示

後人

印累累綬若若換君朱顏君不覺冠如箕劍拄頤蒼
頭盧兒笑君癡不如短褐歸鄉舍上畢租庸下婚嫁
橫波引水蒔禾黍高陸犁荒種桑柘比鄰畢出觀夜
場老稚相呼作春社雞爭春米茅簷底犬吠行人權
籬罅數椽幸可傳子孫此地它年名陸村藜藿一飽

能世守殊勝養牛并上尊

再見封侯未為快一擲成虛安用再世間得意固多
矣堪笑窮人事常敗我生出仕四十年寸進恰如船
上埭即今臥病茅簷裏回首窮通竟何在荆山之下
玉抵鵲兩京春著論斤賣蘇秦煌煌佩六印尼父栖
栖厄陳蔡玄傑美官輒見思東野出門常有礙躬耕
至老豈不佳子孫當以吾為戒

南園觀梅

小嶺清波寂寞中綠樽歲晚與君同高標賴有詩人
識絕豔真窮造物工正喜參差橫夜月又驚零落付
春風老語世事寧多數身自人間一轉蓬

歲盡苦寒

曉寒無賴透重裘三日江雲暝不收歲月推移吾輩
老交朋零落此生浮東臯苦瘵猶中熱舊疾雖存亦
小瘳禹廟蘭亭俱在眼剩沾春酒破春愁

己未新歲

錢歲愁雖劇迎年喜亦深桃符帶神寫椒酒過花對
車馬久無迹兒孫聊慰心更欣春意早處處有鳴禽
歲首書事

東風入律寒猶劇多稼占祥雲欲成雲陰作雪彌旬至開
歲雪意愈濃明日戊初立春猶可為臘雪也 鬱壘白書誇腕力

屠蘇不至歎人情 今歲無醜屠蘇者 呼盧院落諱新歲
鄉俗歲夕聚博謂之試年庚賣困兒童起五更立春未明相呼
賣春困亦舊俗也 白髮滿頭能且健剩隨鄰曲樂昇平

又

扶持又度改年時 耄齒侵尋敢自期 中夕祭餘分饌
飪 鄉俗以夜分畢祭享長幼共飯其餘又歲日必用湯餅謂之冬餠
純年饅飩 犁明人起換鍾馗春盤未抹青絲菜 今年正
月二日立春 壽學先酬白髮兒聞道城中燈絕好出門
無日數吾衰 客來多言府中今歲上元燈甚盛

初春

元日人日來聯翩轉頭又見試燈天且欣一雪壓
瘴不怕連陰咽管絃陌上漸多酩酒舍岸邊初理下

湖船紫姑擬卜元無事只問今春幾醉眠
菴中獨居感懷

身愈龍鍾髮愈稀流年冉冉迫殘暉讀書十紙勤雖
在上樹千回事已非仗馬曾鳴宜取斥牧羝雖乳亦
忘歸餘生自笑如何似萬里遼天老令威

又

自閉菴門不點燈情耕村叟罷參僧一生已是膠黏
日投老安能夏造冰頭面敢辭乾汝唾蔬餐聊得曲
吾肱高春睡熱無多笑那有禪師解放鷹

又

無錢溪女亦留魚有兩東家每借贖藜粥數匙晨壓
藥松肪一椀夜觀書黃紬被暖閑無厭白布衫長樂
有餘南陌東阡春事動放翁作計未全疎

戲作貧詩

垂老貧彌甚虛教遇太平竈閑無馬穴釜冷有魚生
妾病常停織兒飢屢輟耕癡頑惟此老未廢浩歌聲

又

左券頻稱貸西成少蓋藏苦飢炊稻種綠病賣桑黃
土焙燐煙煖藜羹愛慘香君看首陽叟窮死亦何傷

春日園中作

杏花開過尚輕寒盡日無人獨倚闌久別名山憑夢
到每思舊友取書看塵埃幸已賒腰折富貴深知欠
面團老去逢春都有幾一杯行復送春殘

中春連日得雨雷亦應候

誰言白首意低推老子逢春亦樂哉犁畔方吹社公
兩犍頭又轉阿香雷睡餘支枕聽鶯語醉裏題窗記
燕來更有山家堪喜事吾孫上樹欲千回 德孫幼病足
今已行步健甚

雨後微陰光景益奇復得長句

結轡軒車已掃空揮犀談笑與誰同日消淺醉閑吟
裏春在輕陰薄靄中百尺遊絲喜風定一雙新燕說
泥融天工只費須臾力開遍東闌半丈紅

春日小園雜賦

久矣雲霄綴羽翰小園聊得賦春寒
春在春寒賦風生鴨綠紋如織
露染猩紅色未乾不向山丘數零落
且從兒女話團樂人言麥信春來好
湯餅今年慮已寬

又

市塵不到放翁家繞麥穿桑野徑斜
夜雨長深三尺水曉寒留得一分花
悶從鄰舍分春食閑就僧窗試露芽
自此年光應更好日驅秧馬聽縑車

簡鄰里

今年意味報君知屬疾雖頻未苦衰
獨坐空齋如自訟三舍法行時嘗上書
言事者屏置一齋曰自訟小鑄殘俸類
分司樂天詩猶彼妻孥教漸退莫求致
仕且分司閑撐野艇漁蓑溼亂插花
醉帽歌有興行歌便終日逢人那識我
為誰

客叩門多不能接往往獨坐至晚戲作

貧舍久疎羅酒漿客來不復倒衣裳
官情已盡詩情在世味無餘睡味長
紅練帶飛穿柳去錦熏籠暖撲簾香
蕭然自笑渾無事漁唱聲中又夕陽

園中偶題

綠衣粲粲味微丹映葉穿枝立畫欄
莫戀主人驚不去五陵年少有金丸

又

春深無處不春風數樹桃花乃爾紅
鶯蝶紛紛自常事不應也著白頭翁
禽名

又

憶向彭州取牡丹蠟封馳騎露初乾
如今歷盡人間事縱有姚黃亦懶看

又

九日春陰一日晴不堪風駕浪花生
畫船欲解解還歸臥寂寂窗扉聽鳥聲

北窗偶題

兩叢香百合一架粉長春堪笑龜堂老
數然不記貧

又

曉晴林鶻喜晝暖蜜蜂喧我老詩情盡
逢春亦一言

又

簾外燕翩翩歸時在社前不辭飛渡海
來看賽豐年

沈園

煙波兩瀟瀟肯為放翁來菰米猶能給
蒼顏得屢開

又

城上斜陽畫角哀沈園非復舊池臺
傷心橋下春波綠曾是鶯鶯照影來

又

夢斷香消四十年沈園柳老不吹綿
此身行作稽山土猶弔遺蹤一泫然

劍南詩稿卷第三十八終

劍南詩稿目錄
卷第三十九

戲贈園中花 春思 贈燕 雨悶示兒子
讀晉書 春晚苦雨 燕 夜雨 寒食日九
里平水道中 春晴自雲門歸三山 子數年
不至城府丁巳火後今始見之 晚自北港泛
舟還家 書懷 初夏 小築 喜雨 晨起
五月初病體益輕偶書 己未重五 五月
七日拜致仕勅口號二首 致仕後卽事十五首
讀後漢書二首 新裁道帽示帽工 新製
道衣示衣工 兩翁歌 五月中連夕風雨氣
候如高秋枕上有賦 前詩感慨頗深猶吾前
日之言也明日讀而悔之乃復作此然亦未能
超然物外也 雨後過近村 銘座 致仕後
述懷六首 蝶 戲贈酒榼 題菴壁二首
舟泛澤中夜歸 書懶 晨起 夜坐 白樂
天詩云倦倚繡牀愁不動緩垂綠帶髻鬟低遼
陽春盡無消息夜合花前日又西好事者畫之
爲倦繡圖此花以五六月開山中多于茨棘人
殊不貴之爲賦小詩以寄感歎 蟬蛸行 望
霽 久雨路斷朋舊有相過者皆不能進 散
步至三家村 村東晚眺二首 露坐二首 致
仕後歲事有望欣然賦詩 夜聞姑惡 村舍
雜書十二首 逃暑小飲熟睡至莫二首 夜坐
庭中達旦 讀前輩詩文有感 自嘲 予讀
元次山與濃溪鄰里詩意甚愛之取其間四句
各作一首亦以示予幽居隣里四首 東山避暑
用醜醜體 喜雨 得故人書偶題 喜雨歌
老學菴井 長歌行 七月二日夜賦 自
述二首 項羽 曹公

劍南詩稿卷第三十九

宋陸游務觀

戲贈園中花

橫風疾雨為花厄
霽日暄風又不禁
我欲小施調燮手
酌中寒暖半晴陰

春思

兀兀治華酒未醒
霏霏發火雨初晴
愁看入戶桃花片
閑聽爭巢燕子聲
百疾侵陵成老大
一春轉盼又清明
蘭亭禹廟渾如昨
回首兒時似隔生

贈燕

燕來我何喜
感此中春時
燕去亦何有
無奈凋年悲
四序如循環
萬物更盛衰
我亦寓斯世
如客會當歸
羈車已在門
戀戀終何為
達人付無心
欣厭兩俱非
豈有天壤間
會合無別離
對花不爛醉
燕子笑汝癡

雨悶示兒子

東吳春雨多
略無三日晴
濛濛平野暗
浙浙空階聲
百花雨中盡
三月未聞鶯
重裘坐奧室
時序真強名
亦欲借驪出
泥淖沾衣纓
撫事每累歎
濁醪聊獨傾
景運今方開
關輔一日平
我家本好疇
灑澆可躬耕
買酒新豐市
看花下杜城
會當與汝輩
藉艸作清明

讀晉書

諸公日飲萬錢廚
人乳蒸豚玉食無
誰信秋風雒城裏
有人歸棹為尊鱸

春晚苦雨

垂老臥村墅
餘寒欺病身
雞猶未忘日
雨欲不容春
忽忽花時過
茫茫艸色勻
尊絲已上市
一飯未傷貧

燕

春晝花明映柳纖
燕歸勝事始能兼
爭梁許語驚幽夢
掠地斜飛避畫簾
雛食得蟲應自喜
巢泥經雨更頻添
去來要是知時節
常怪人嘲作附炎

夜雨

空階雨聲夜轉急
壁竦窗破凄風入
一燈嫋嫋吹欲滅
老生獨傍書架立
取書欲讀輒復休
却行出門搔白頭
市樓賣酒日千斛
衆人皆樂君胡憂

寒食日九里平水道中

曉雨絲絲熟食時
泥深轍斷客行遲
亂雲重疊藏山寺
野水縱橫入稻陂
馬鬣松陰封舊隴
龜趺道左立新碑
扶衰此出知能幾
清淚臨風不自持

春晴自雲門歸三山

乍行春野眼增明
漸減春衣體倍輕
人賣山茶先穀雨
鴉隨幡祭過清明
柳塘水滿雙鳧戲
稻隴泥深一犢行
晚到三橋泛舟去
掩關不復畏重城

予數年不至城府丁巳火後今始見之

陳迹關心已自悲
劫灰滿眼更增欷
山川壯麗昔無敵
城郭蕭條今已非
宰堵招提俱昨夢
祝融回祿尚餘威
故交滅盡新知少
縱保桑榆誰與歸

晚自北港泛舟還家

舒慵篷籠底
經行略約西
水深鵝唼艸
雨細犢掀泥
醉倚乾坤大
閑知物我齊
衡門觸冠過
聊得賦幽棲

書懷

羸馬常愁趁早朝
斤歸幸復侶漁樵
青黃未勝溝中斷
宮徵何殊爨下焦
心樂簞瓢同鼎食
身安山澤謝弓招
數間茅屋誰知處
煙雨濛濛隔斷橋

初夏

淡鷖輕鷗入夏初
一窗新綠鳥相呼
出門易倦常歸臥
著句難工但自娛
花徑蝶閑無墮藥
酒樓人散有空壚
閩川茶籠猶霑露
及肺渴朝來頓欲蘇
閩中買餘茶初至

小築

放翁小築寄江郊
屋破隨時旋補茅
莫看白煙橫水際
曉聽清露滴林梢
生來不啜猩猩酒
老去那營燕燕巢
目斷鹿門三太息
龐公千載可論交

喜雨

幽人睡覺夜未央四簷懸溜聲浪浪樂哉甘澍及時
至九衢一洗塵沙黃明朝鄰曲各羅喜賽廟沽酒到
猪羊不勞驅馳龍骨轉盼白水盈陂塘呼兒掃地
設菅席與汝一醉歌時康豈惟磨鎌待收麥小甑已
覺吳粳香

晨起

天公擇地養衰殘著向桑村麥野間曉色入簾初悵
漾幽禽窺戶已閒關酒徒散去稀中聖詩思衰來媿
小山一炷沉煙北窗底曲肱臥看不勝閑

五月初病體益輕偶書

世事紛紛了不知又逢燕乳麥秋時經年謝客常因
醉三日無詩自怪衰乘兩旋移西崦藥留燈重覆北
窗棋但將生死俱拈起造物從來是小兒

己未重五時已請老

門楣束艾作神人團樓盤中節物新安用丹書襖赤
口風波雖惡不關身

五月七日拜致仕勅口號

剡曲東歸日醉眠冰銜屢忝武夷仙思如長假容居
里官似分司不限年一扎疏榮馳廐置兩兒扶拜望
雲天坐糜半俸猶多媿月費公朝二萬錢

又

黃紙東來墨未乾孤臣思許挂朝冠小兒扶出迎門
拜隣舍相呼擁路觀白首奉身歸賦畝清霄無夢接
鷓鴣從今剩把花前酒憂患都空量自寬

致仕後即事

休官拜命不勝榮墨涇黃新照眼明絡繹交親來作
賀羊腔酒擔擁柴荆

又

救過鸞臺鳳閣來清晨初拆驛書開繡箱香案迎門
拜身著朝衫止此回

又

山村處處晴收麥鄰曲家家午曬絲正用此時身得
謝十分壽酒不須辭

又

白髮三朝執戟郎賜骸偶值歲豐穰村東已種千畦
麥舍北新添百本桑

又

老民一日脫朝衣回首平生萬事非赤腳婢沽村釀
去平頭奴馭舛驢歸

又

一生病鶴寄樊籠此去鴻冥萬里空未論尊羹與羊
酪新秬要勝太倉紅

又

沉縣分已錢餘生造物苛留未遣行今日下牀還健
在一編來就小窗明

又

清靜全勝欲界天逍遙不滅地行仙衆中莫怪人嫌
老十五年前本命年

又

一盂麥飯掩柴關坐久不堪腰脚頑拖得瘦藤閑信
步小橋東北望螺山

又

問門前客元無迹諛墓中人本不工猶有鄰僧能送
米未妨竊比玉川公

又

歸耕所願雜民編乍脫朝衫喜欲顛但得吾兒能力
穡不請半俸更超然

又

相湖尊菜勝羊酪項里楊梅敵荔枝八帙開來今過
半一杯引滿若爲辭

又

不嫌雞瘦濁醪酸艸艸杯盤具亦難食指忽搖方竊
喜小兒來請賽鄰官

又
甌中白飯出新春，食裏黃齋細。芼葱一飽坐兼南北，笑始知造物念衰翁。

又
多事車前要入騶，老人惟與一藤遊。未教變化爲龍去，更踏人間萬里秋。

讀後漢書
貨春老子吾所慕，垂世文章寧在多。詩不刪來二千載，世間惟有五噫歌。

又
季英行年九十八，猶灌園蔬授六經。我欲圖之置齋壁，世無顧陸善丹青。

新裁道帽示帽工
故帽提攜二十霜，別裁要作退居裝。山人手役雖難及，老子頭圍未易量。花插露霑那暇惜，塵侵鼠齧却須防。裏時賴復呼兒問，一匣菱花每在傍。

新製道衣示衣工
良工刀尺製黃袍，天遣家居樂聖時。著上朱門應不稱，裁成烏帽恰相宜。客撐小艇招垂釣，僧掃虛窗約對棋。寶帶貂冠雖看好，定知不入野人詩。

兩翁歌

君不見塞上失馬翁，馬去安知不爲福。又不見新豐折臂翁，臂廢身全老鄉國。陸翁多難類兩翁，著書滿屋身愈窮。十年力耕遇水旱，老不能耕年始豐。人言翁窮可悶笑，霍食鵜衣天所料。翁方自謂實幸民，對人抱膝惟清嘯。卽今羣公佐明主，長劍拄頤來接武。向非老病又不才，縱欲歸休寧見許。

五月中連夕風雨氣候如高秋枕上有賦

擁被微吟短鬢秋，孤燈殘漏共悠悠。雨聲不貸三更夢，酒力寧禁萬里愁。身寄湖山鄰剡曲，心遊河嶽過關頭。世間可恨知多少，虛弊當年季子裘。

前詩感慨頗深，猶吾前日之言也。明日讀而悔。

之乃復作此，然亦未能超然物外也。身世今如一老僧，病餘殘髮雪鬢髻。湖桑棗下漁舟，兩道樹山前野店。燈澗水潺湲，供洗鉢。松風蕭颯入行藤，世人欲覓何由得。覩面相逢喚不應。

雨後過近村

賦罷淵明歸去來，紵衣桐帽一時裁。歲華新筍初成竹，天氣停雲未斷梅。江路醉歸常嵬我，僧窗閑過卽徘徊。老人剩有凋年感，寄語城笳莫苦催。

銘座

天下本無事，庸人實擾之。吾身本無患，衞養在得宜。一毫不加謹，百疾所由滋。人生快意事，噉臍莫能追。汝顧不少忍，殺身常在斯。深居勿妄動，一動當百思。每食視本艸，此意未可嗤。賦詩置座右，終身作元龜。致仕後述懷。

彈冠紹興未解組，慶元中灑灑危塗過。邯鄲幻境空閑傳，相牛法醉挾鬪雞。翁衝雨歸來晚，山花滿笠紅。

壯歲江湖去，還朝六十餘。輩流俱已盡，勳業固知疎。遽走寧黔突，長閑祇荷鋤。如今更何憾，終作愛吾廬。

又
生理雖貧甚，胸中頗浩然。常辭問字酒，屢却作碑錢。寧有駱堪鬻，尚無車可懸。小須梅雨霽，散髮醉江天。

昔自臺郎斥，頻年困負薪。四叨優老祿，十送故鄉春。衰瘁寧知活，蕭條敢厭貧。惟思逢樂歲，擊壤學堯民。

又
韋布還初服，蓬蒿臥故廬。所慚猶火食，更恨未巢居。叱叱驅黃犢，行行跨白驢。交親各強健，不必問何如。

又
店店容除酒，家家可乞漿。白陂時雨足，綠樹午陰涼。病爲休官減，門緣謝客荒。今朝遇隣叟，滿意說豐穰。

庭下幽花取次香飛飛小蝶占年光幽人為爾憑窗
久可愛深黃愛淺黃

戲贈酒榼

老去臥湖海白髮朝朝新積有小道士時來中聖人
形模雖簡古風味絕清真何當秋雨夕傾倒見情親

題菴壁

破屋聽鴉雀鼠穿邇來四壁愈蕭然錢多孰謂可使
鬼人衆何嘗能勝天秃尾驢遊雲外寺長鬚奴引竹
闌泉更餘一事猶當勉讀易從今十絕編

又

孤村寂寂潮生浦小院昏昏雨送梅蔬食一簞宜面
槁畏塗九折自心灰古人骨朽有書在今雨泥多無
客來散髮陽狂非奇傲世間萬事本悠哉

泛舟澤中夜歸

無窮煙海接空濛秦望稽山醉眼中虹斷已收千嶂
雨鶴歸正駕九天風漁舟容與橫沙際水鳥號鳴傍
葦叢興盡還家忽三鼓半輪殘月斗杓東

書癩

此身不覺老侵尋殘髮蕭蕭雪滿簪那有新詩書觸
目亦無閑話問安心寒垣西戌茫如夢省戶東歸病
至今一懶便知生世了午窗酣枕敵千金

晨起

清晨推枕起盥面吾事足豈無掃灑役出市待歸僕
小殮亦已省尚進藥盈掬整衣登北堂危坐巾一幅
徐行梧楸陰愛此雨餘綠幽鳥東山來鏘鳴若琴筑
靜聽興未闌穉子報飯熟欣然往從之寧計食不肉

夜坐

仲夏苦鬱蒸既夕熱未解浴罷坐柴門汲井痛掃灑
覆野天穹穹垂地星磊磊明河落無聲北斗低飲海
三更缺月升艸木盡光彩漁舟在何許斷續聞欸乃
百憂集老境坐歎雙鬢改誰能擁雕戈遺虜何足醜
白樂天詩云倦倚繡牀愁不動緩垂綠帶鬢

低遼陽春盡無消息夜合花前日又西好事者
畫之為倦繡圖此花以五六月開山中多于茨

棘人殊不貴之為賦小詩以寄感歎

王室東遷歲月賒兩京漠漠暗胡沙繡牀倦倚人何
在風雨漫山夜合花

蟬蛸行

蟬蛸至細能知時春風殘雨占無遺蜻蜒滿空乃不
知庭除一出無歸期樂哉蜻蜒高下飛蟬蛸未盡何
憂飢簷間蜘蛛亦伺汝吐絲織網腹如鼓

望霽

夜雨勿厭空塔聲天公欲作明朝晴明朝甲子最畏
兩榜舟入市聞古語今年雨暘俱及時麥已入倉雲
四垂雨來不駛亦不遲大點如菽細如絲徐徐雲開
見杲日晚禾吹花早禾實但令有米送官倉豆飯藜

羹甘似蜜

久雨路斷朋舊有相過者皆不能進
今年風雨多平陸成沮如吾廬地尤下積水環百步
客從城市來熟視却復去僮奴笑欲倒繳屐知無路
計其各還家對竈燎衣袴嗟予久退藏蓬藿生庭戶
誰如數子賢裹飯肯來顧清言雖不接亦足慰遲莫

散步至二家村

人情簡朴古風存莫過二家水際村見說終年常閉
戶仍聞累世自通婚習船歸處魚發美社發香時黍
酒渾記取放翁扶杖處諸蒲煙艸溼黃昏

村東晚眺

興來信步過東陂最愛村東物象奇藤杖穿雲秋望
處葛衣霑露夜歸時殘聲淒斷蟬移樹孤影荒寒鷓
鴉枝自揣今年還得飽一川新稻已離離

又

飽食無營過莫年節枝到處一蕭然清秋欲近露霑
艸新月未高屋滿天遠火微茫沽酒市叢蒲窸率釣
魚船哦詩每恨工夫少又廢西鵝半夜眠

露坐

星稀避月明河白映天青入夜蟬逾急先秋葉自零
花枝栖露蝶簾度風盤欲喚隣翁坐漁舟醉不醒

又
落月無留照殘河亦已傾墜枝雙鵲鼻黏艸一螢明
暑令忘三伏涼颼逼五更為憐荷瀉露故起繞池行

致仕後歲事有望欣然賦詩

聖時恩厚賜餘生日與鄉閭樂太平已棄胡牀無長
物尚攜拄杖有同行新裁烏帽人爭看小摘青蔬手
自烹買得水車無用處絕知造物相歸耕

夜聞姑惡

湖橋東西斜月明高城漏鼓傳三更釣船夜過掠沙
際蒲葦蕭蕭姑惡聲湖橋南北煙雨昏兩岸人家早
閉門不知姑惡何所恨時時一聲能斷魂天地大矣
汝至微滄波本自無危機秋菰有米亦可飽哀哀如
此將安歸

村舍雜書

我本杞菊家桑芋亦吾宗種藝日成列喜過萬戶封
今年夏雨足不復憂螟蟲歸耕殆有相所願天輒從

又
中春農在野蠶事亦隨作手種臨安青桑名可飼蠶
百箔累累繭滿簇繹繹絲上簍老子雖安眠衣帛可
無作

又
舍北作蔬圃敢辭灌漑勞輪困瓜瓠熟珍愛敵豚羔
晨發戒廚人全項淨去毛雖云發客笑亦足慰老饕

又
舍南種胡麻三日幸不雨晨起親按行已見青覆土
窮人如意少喜色漏眉宇兒童勿情偷造物不負汝

又
五月新麪成六月甘瓜熟作麪及良時火見金始伏
懸知桑落後醅面釀如粥再拜謝天公無功叨美祿

子家釀用宛丘瓜麪法

又
折蓮釀作醴采豆治作醬開曆揆日時汲井滌瓮益
上奉時祭須下給春耕餉杏爾後之人歲事不可曠

又
東山石上茶鷹爪初脫鞵雪落紅絲磴香動銀毫甌
爽如聞至言餘味終日留不知葉家白亦復有此不

又
逢人乞藥栽鬱鬱遂滿園玉芝來天燒黃精出雲門
丹茁雨後吐綠葉風中翻活人吾豈能要有此意存

又
我居大澤中一舟不可無短篷挾兩槳疾若波中鳧
來往菰蘆村按行瓜芋區浮家亦可樂何必愛吾廬

又
軍興尚戎衣冠帶謝褒博禿巾與小裹顧影每懷怍
及今反土服始覺榮天爵出入阡陌間終身有餘樂
讀書乃一癖我亦不自知坐書窮至老更欲傳吾兒
吾兒復當傳百世以為期君看北山公太行尚可移

又
爵祿九鼎重名義一羽輕人見共如此吾道何由行
湖山有一士無人知姓名時時風月夕遙聞清嘯聲

又
消暑小飲熟睡至莫
桑落香浮榭葉杯甘瓜綠李亦佳哉虛堂頓解汗揮
兩高枕俄成鼻殿雷靜聽風聲生檻竹徐看日影轉
庭槐晚涼更動扁舟與北渚紅蕖已半開

又
槐影桐陰欲滿廊綸巾羽扇自生涼新筍玉壺陳雙
榼平展風漪可一牀馳騎遠分丹荔到大盆寒浸碧
瓜香湖邊誰謂幽居陋也愛迢迢夏日長

又
夜坐庭中達旦
老矣常嗟去日道病來更覺此生浮庭花無影月當

午簷樹有聲風報秋足倦獨行驚蹀躞髮稀久坐怯
聽鷓鴣號日出閑無事又向清溪弄釣舟

讀前輩詩文有感

我無前輩千鈞筆造物爭功謝不能已分文章歸委
靡可憐意氣尚憑陵鸞旗廣殿晨排仗鐵馬黃河夜
踏冰此事要須推大手蟬嘶分付與吳僧

自嘲

天公大度一何奇養此無能老白癡宿疾閑愁俱掃
盡美餐甘寢更無時蛙鳴庭艸何曾問水半門扉亦
不知道似嬰兒猶有恨小軒風月獨哦詩

余讀元次山與瀼溪鄰里詩意甚愛之取其間
四句各作一首亦以示予幽居隣里

峯谷互回映

北起成孤峯東蟠作幽谷中有十餘家蘆藩映茆屋
土肥桑柘茂雨飽麻豆熟比鄰通有無并稅先期足
煙中語相答月下歌相續兒童不識字未必非汝福

張芸叟過鄭公故莊詩曰兒童不識字耕稼鄭公莊

誰家無泉源

泉聲百步聞泉脈高下通潺湲亂雲外屈曲明月中
八月稻登場引之作機春羨流灌蔬畦全家飽芥菘
洗沐及澣濯蚤莫靡不供斗水百憂寬悲哉杜陵翁

夾路多修竹

黃茆持覆屋溪石運作垣桑麻有餘地家家養龍孫
春雷初起蟄切玉供盤殮一朝解風篴變巖蒼雲屯
我來倚拄杖恐是辟疆園千畝倘可致封君何足言

扁舟皆到門

千錢買輕舟不復從人借樵蘇晨入市鹽酪夕還舍
豈惟載春秋亦足穫秋稼有時醉村場老稚相枕藉
常侵落月行不畏惡風嚇無為詫軒車此樂予豈暇

東山避暑用轆轤體

避暑穿林隨所之一奴每負胡牀隨望秋槁葉有先
隕未莫赫日無餘暉輪困離奇澗松古鉤輅格磔蠻

禽悲北巖竹間最慘慄清獻倚石真忘歸

喜雨 六月二十七日

去年禹廟歸梅梁今年黑虹見東方巫言當豐十二
歲父老相告喜欲狂插秧正得十日雨高下到處水
滿塘六月欲盡日杲杲造物已命摧驕陽夕雲如豚
渡河漢占書共謂雨至祥南山雷車載膏澤枕上忽
送聲淋漓猛思濁酒大作社更想紅稻初迎霜六十
日白最先熟食新且領晨炊香 六十日白稻各常以六月
下旬熟

得故人書偶題

小築稽山下狂歌剡曲傍鄉鄰共雞黍童穉學農桑
白首餘年促青編後日長此心誰復許三數付書囊

喜雨歌

不雨珠不雨玉六月得雨真雨粟十年水旱食半菽
民伐桑柘賣黃犢去年小稔已食足今年當得厭酒
肉斯民醉飽定復哭幾人不見今年熟

老學菴井

老學菴北井六月寒如冰大旱不涸雨不增凜如人
以常德稱日濟千人不驕矜置而不汲渠自澄轆轤
三丈青絲繩對之已足涼肺膺使我終日臥曲肱顧
謂此井真良朋蕩除炎歊却塵垢宜有鬼神來護守
嗚呼涇水一石泥數斗正使逢時亦何有

長歌行

我無四目與兩口但在人間更事久死生元是開闔
眼禍福正如翻覆手消磨日月幾緇履陶鑄唐虞一
杯酒既非狗馬要蓋惟那計風霜悴蒲柳龜突無煙
今又慣龜蟬與我成三友判知青史無功名只用忍
飢垂不朽

七月二日夜賦

鄙人志趣在漁樵四十年來負聖朝本恥彈冠良易
挂未嘗刻印敢煩銷盈盈微月生江渚嫻嫻清笳下
郡誰衰病逢秋真一洗井淋桐葉已先飄

自述

二畝新蔬圃三間舊艸堂病除身小健秋近夜微涼
薄酒時醒醉殘書半在土老懷常自笑無事忽悲傷

又

睡美不知日氣衰先覺秋有時浮小艇隨意宿滄洲
未恨名風漢惟求拜醉侯更須多種竹搔首送悠悠

項羽

八尺將軍千里騅拔山扛鼎不妨奇范增力盡無施
處路到烏江君自知

曹公

二袁劉表笑談無眼底英雄不足圖赤壁歸來應歎
息人間更有一周瑜

劍南詩稿卷第三十九終

劍南詩稿目錄
卷第四十

夜雨 昔人有畫醉僧醉道士醉學究者皆見于傳記及歌詩中予暇日為各賦一首 次季

長韻回寄 溪上小酌 齋中夜賦 讀舊稿有感 新秋 陳阜卿先生為兩浙轉運司考

試官時秦丞相孫以右文殿修撰來就試直欲首送阜卿得予文卷擢置第一秦氏大怒予明

年既顯黜先生亦幾蹈危機偶秦公薨遂已予晚歲料理故書得先生手帖追感平昔作長句

以識其事不知衰涕之集也 書喜二首 幽居 雜興四首 贈鷺 贈鶻 東堂睡起

五鼓起坐待旦 功名 搔首 小雨釣歸 曉賦 急雨 遺興四首 讀林逋魏野二處

士詩 紙墨皆漸竭戲作 讀隱逸傳 泛舟至東村 自詒 野興 讀書 客有見過者

既去喟然有作二首 秋陰 八月九日晚賦 燕坐 村飲四首 秋雨益涼寫興 薪米

偶不繼戲書 牧牛兒 與兒子至東村遇父老共語因作小詩 微雨午寢夢憩道傍驛舍

若在秦蜀間慨然有賦 晨起對鏡 村思 秋夜 醉中書懷 次韻鄭盱眙見寄并簡其

甥劉君 書齋壁 一老 戲用方外語示客 秋晚三首 次金溪宗人伯政見寄韻 新

寒二首 村隣會飲 試筆二首 孤村 絕 祿以來衣食愈不繼小兒力圖之殊未有涯予

謂不若痛節用爾示以此詩 予宿疾多已失去獨氣痛時作賦詩自寬 秋懷十首末章稍

自振起亦古義也 九月七日子坦子聿俱出 飲租穀雞初鳴而行甲夜始歸勞以此詩 醉

題堞西酒家二首 秋晚 省事 晨起頗寒 飲少酒作艸數幅 往事 步至東莊 秋思

二首 讀退之人不知古今馬牛而襟裾之句有感 病愈看鏡 讀韓致光詩集 逆旅書 壁二首 初寒老身頗健戲書二首 子龍求 煙雨軒詩口占絕句二首

劍南詩稿卷第四十

宋陸游務觀

夜雨

濃雲如潑墨急雨如飛鏃激電光入牖轟雷勢掀屋
漏溼恐敗書起視自秉燭移牀顧未暇益益苦不足
不如卷茵席少忍待其復飛螢方得意熠熠相追逐
姑惡獨何怨菰叢聲若哭吾歌亦已悲老死終碌碌
昔人有畫醉僧醉道士醉學究者皆見于傳記

及歌詩中予暇日為各賦一首

醉僧

殘雪覆枯顛手扶短柳栗送酒無蘇州一醉未易得
青旗獵獵秋風吹長瓶一吸亦足奇但辦道傍常醉
倒不須解作藏真艸

醉道士

落托在人間經旬不火食醉後上江樓橫吹蒼玉笛
大口如盆眼如電九十老人從小見曾攜一鶴過岳
陽滿城三日聞酒香

醉學究

聖師飲百觚儼然常齋莊弟子習禮餘兕觥躋公堂
至今遺風被洙泗諸生雅歌老儒醉衣冠簡朴未可
輕安知中無膏二生

次季長韻回寄

野人蓬戶冷如霜問訊今惟一季長舊好自均親骨
肉新知何怪薄心腸開書字字論疇昔遣使年年有
故常萬念知公掃除盡見哀底事獨難忘

溪上小酌

岸曠出籬門投竿俯溪瀨魚聚忽千百鳥鳴時一再
新涼社餞香亦有雉免賣歡言洗杯酌又破止酒戒
齋中夜賦

高居終日掩齋扉幽事常多俗事稀露重叢篁時自

瀉風高脫葉有先飛秋衣漸製聞砧杵肉初分謝
蕨薇却笑老身閑不得一燈明滅亂書圍

讀舊稿有感

我少則嗜書于道本無得譬如昌歎芟乃自性一癖
老來百事廢惟此尚自力豈惟絕慶弔乃至忘寢食
吟哦雜誦詠不覺日既夕文辭顧淺懦望古空太息
世俗不可解更為著金石收斂固已遲雖悔終何益
君看老農夫法亦傳後稷持此少自寬陶然送餘日

新秋

秋氣入清笳旗亭酒可賒長歌穿小市短帽插幽花
溪女留新蟹園公餉晚瓜誰知閑老子解作醉生涯
陳阜卿先生為兩浙轉運司考試官時秦丞相
孫以右文殿修撰來就試直欲首送阜卿得予
文卷擢置第一秦氏大怒予明年既顯黜先生
亦幾蹈危機偶秦公薨遂已予晚歲料理故書
得先生手帖追感平昔作長句以識其事不知
衰涕之集也

衰涕之集也

冀北當年浩莫分嘶人一顧每空羣國家科第與風
漢天下英雄惟使君後進何人知大老橫流無地寄
斯文自憐衰鈍辜真賞猶竊虛名海內聞

書喜

乞得身歸鏡水濱此生真作葛天民眼明身健何妨
老飯白茶甘不覺貧食酒又蕪三斗熟園花時報一
枝新挂冠更作黃冠計多事常嫌賀季真

又

已向煙霞著脚深世間萬事不關心舊攜鴉觜供鉏
藥新典魚須用買琴井上引藤初滿架池南移竹漸
成陰話行不必須今日五百年間有賞音

幽居

萬家水竹古山陰揀得幽居愜素心梁燕委巢知社
近井桐飄葉覺秋深琴緣廢久塵常積書為開稀蠹
漸侵幸自杜門無一事不須清夜感衣砧

雜興

病養精神過服藥貧知儉約勝營生事夔事業今何有且與心君致太平

又

東家飯牛月未落西家打稻雞初鳴老翁高枕葛懶裏炊飢熱時猶軒聲

又

莫年常苦睡為崇好事新分安樂茶更得小瓢吾事足山家風味似僧家曾召南提幹近送安樂茶來

又

蛟鱷垂涎歷畏塗如今歡喜去攜鋤一生患難休回首正似元符會上書

贈鷺

雪衣飛去莫匆匆小住灘前伴釣篷禹廟蘭亭三十里相逢多在莫煙中

贈鶻

為梁屋渚自何年毛羽摧傷不怨天知我齋餘常施食翻然飛下北窗前

東堂睡起

置身事外息吾黥獨臥空堂一榻橫簷影漸移知日轉樹梢微動覺風生每從山寺開經快間就園公辨藥名若論胸中淡無事入珍何得望藜羹

五鼓起坐待旦

睡覺初聞雞一鳴披衣危坐待窗明殘軀已向閑中老癡夢猶尋熟處行南北迢迢悲往事古今莽莽數浮生伯倫一鍾君休笑冢象祁連亦已平

功名

少年妄意慕功名老眼看來一髮輕金甲雖如朝邑尉羊裘終媿富春生連娟落月依山盡寂寞寒潮蕪岸平要識放翁新得意蓼花多處釣舟橫

搔首

玩畫無餘易聞歌已盡詩古人不可作此理孰能推

白髮秋風裏青燈夜雨時初心竟當負搔首歎吾衰

小雨釣歸

兩點鳴叢葦雲頭冒遠山兒曹出籬望老子榜舟還潤入園畦裏涼生窗戶間秋陽方可畏徒倚一開顏

曉賦

八月江湖風露秋時聞脫葉下梧楸離離斗柄西南指爛爛天河今古流人語正謹過古堞 湖桑堞五鼓聞挽船聲喧甚角聲三弄下誰樓百城已共豐年樂一老猶懷卒歲憂

急雨父老謂雲逆風則必雨驗之信然

雲從西南與風自東北至老農占雨候速若屈伸臂亂點俄打窗新涼已生袂經旬苦肺渴得此亦少慰呼兒持故襦買酒具一醉薄言煮園蔬雉兔未可議

遣興

幾看人間歲月新的船猶繫鏡湖濱曾穿高帝朝元仗却作山陰版籍民留病三分嫌太健忍飢半日未全貧早知晝繡能為崇翁子終身合負薪

又

湖海元為汗漫遊誤思四領幔亭秋掃空薄祿始無媿閉上衡門那得愁湯嫩雪濤翻茗碗火温香縷上衣篝牀頭亦有閑書卷信手拈來倦即休

又

掃盡衣塵喜不勝村居終日醉騰騰閑投隣父祈神社戲入羣兒鬪艸朋幽徑有風偏愛竹虛堂無暑不憎蠅悠然又見江天晚隔浦人家已上燈

又

久矣微官絆此身柴車歸老亦逢辰阮咸臥摘孤風在白墮閑傾一笑新萬里馳驅曾遠戍六朝涵養忝遺民清閑即是桃源境常笑淵明欲問津

讀林逋魏野二處士詩

君復仲先真隱淪筆端亦自韓千鈞閑中一句終難道何況市朝名利人

紙墨皆漸竭戲作
官庫誰能餉陟釐漢宮無復賜隴廩不如掃盡書生
事閑伴兒童竹馬嬉

讀隱逸傳

終南處士入都門少室山人補諫垣畢竟只供千載
笑石封三品鶴乘軒

泛舟至東村

野水如天遠漁舟似葉輕颼颼風漸冷淡淡月初生
沙際樵蘇路籬間語笑聲還家已薄莫燈火照柴荆

自詠

健忘閑何害貪眠老正宜本心惟泥酒餘習略存詩
未廢春農業猶堪幼學師微官何所戀請老五年遲

野興

荷鋤通北澗腰斧上東峯秋水清見底曉雲深幾重
槩槩傳社鼓渺渺度樓鐘歸覓村橋路詩情抵酒濃

讀書

平生愛客如愛書力雖不逮意有餘門前車馬久掃
迹老病又與黃卷疎人情冷暖可無問手不觸書吾
自恨今年入秋風兩頰燈火得涼初可近年過七十
眼尚明天公成就老書生舊業雖衰猶不墜夜窗父
子讀書聲

客有見過者既去喟然有作

鬢毛俱白盡事不補秋毫去死今無幾歸耕何足高
已如陶止酒徒勸屈鋪糟惟有滄溟去揚帆觀雪濤

又

永日安耕釣餘年迫耄期研朱點周易飲酒和陶詩
帶箭歸飛鶴措牀不眠龜此生君看取死是出門時

秋陰

淡日披朝霧輕雲結暮陰菰蒲溪路暗松竹艸堂深
妙墨雙鉤帖奇聲百衲琴古人端未遠一笑會吾心

八月九日晚賦

薄晚悠然下艸堂綸巾鶴髦弄秋光風經樹杪聲初

緊月入門扉影正方一世不知誰後死四時可愛是
新涼從今覓醉其當勉酒似鷄兒破殼黃

燕坐

赫日噴噴湧海門黃流混混汜河源功成一曰書仙
籍鍊骨成金不足言

村飲

不來東舍卽西家野老逢迎一笑諱試說莫年如意
事細傾村釀聽私蛙

又

無念無營飽卽嬉老翁真箇似嬰兒昏鐘未動先酣
枕日上三竿是起時

又

買來新兔不論錢釣得鮮鱗細柳穿野店渾頭更醉
釀一杯放手已醺然

又

淡煙孤榜繫村橋疊疊沙痕印落潮最是一年秋好
處踏泥沽酒不辭遙

秋雨益涼寫興

秋氣蕭蕭暑已歸晚雲更送雨霏微牀收珍簟數管
席筍疊纖絺換熟衣遣醉醉縱橫馳筆陣乘閑談笑解
棋圍出門未免流年歎又見湖邊木葉飛

薪米偶不繼戲書

仕宦不諧農失業敗屋蕭蕭書數篋藜羹不糝未足
嗟爨竈無薪掃枯葉丈夫窮空自其分餓死吾肩未
嘗脅世間大有乞墻人放翁笑汝驕妻妾

牧牛兒

溪深不須憂吳牛自能浮童兒踏牛背安穩如乘舟
寒雨山陂遠參差煙樹晚聞笛翁出迎兒歸牛入圈

與兒子至東村遇父老共語因作小詩

桑竹穿村巷衡茅隔土垣海氣成物象秋氣肅川原
豆芋行將熟雞豚亦已繁豐凶歲所有農事更深論
微雨午寢夢憩道傍驛舍若在秦蜀間慨然有

賦
吳中秋晚雨冥冥自笑閑愁又爾馨身世已歸南北
陌夢魂猶寄短長亭濁醪可釀樽餘綠明鏡無情鬢
失青積有釣船堪送老一汀鷗鷺共忘形

晨起對鏡
雙鬢成絲高頰頰曉窗臨鏡意茫然朱顏豈是一朝
去暗鑠潛消五十年

村思
揣分新辭祿扶衰又度秋已將窮博健更賴學忘憂
船護煙波鴨欄歸艸徑牛作勞何以慰茅店問新筍

秋夜

倦叟投牀早昏燈落燼頻鶻翻驚缺月犬吠逐行人
未喪詩書業猶存老病身菊花行可醉作意插烏巾
醉中書懷

既老心愈空新涼體差健登山每嗔扶對案亦強飯
平生百事懶惟酒不待勸迨此桑落時一醉適我願
羸然雲水身本非朱紫植少猶恥枉尺老敢欺方寸
但令死瞑目餘事何足論不見鹿門翁全家事潛遜

次韻鄭肝貽見寄并簡其甥劉君

衣上空嗟京洛塵故交半作白頭新衆中初得見吾
子東觀已疑無若人仗馬極知非久斥沙鷗要是孰
能馴兩章英妙同時到趙壹囊中却未貧

書齋壁

平生憂患苦繁纒菱刺磨成艾實圓俗謂困折多者謂菱
角磨作雞頭天下不知誰竟是古來惟有醉差賢過堂
未悟鐘將覺晚柱寧知壁偶全自笑爲農行沒世尚

知鷺雁落空致

一老

太平一老醉騰騰南陌東阡喜不勝民力農桑家自
足士崇名節道方興騎鯨仙去時猶遠射虎歸來氣
頗增莫道幽棲交舊絕月中亦有打門僧
戲用方外語示客

紅粟青錢一掃空篋籬行賣學龐翁身居本地風光
裏愁擲它方世界中剩欲劇談明不二誰能太息賞
無同踞牀一喝君聞否三日猶應覺耳聾

秋晚

西山破曉兩眉青南浦無風一鏡平食盡不容添鶴
口身閑且免負鷗盟霜前艸樹已無色雨到菰蒲先
有聲只怪勝遊頻入夢今朝蜀客話青城故人苑中立
巨山自青城來見訪

又

辭祿始知貧有味杜門不覺老相催寒鴉已占雁前
到黃菊猶須霜後開團扇塵埃高挂壁短檠書史亂
成堆羸軀自笑癡頑甚撐拄新寒又一回

又

世事無窮似奕棋不如常采故山芝蕭蕭雞犬三家
聚莽莽風煙十里陂幸有濁醪從客醉常憂點鬼笑
人癡清秋樂處君知否庭下幽花漸可移

次金溪宗人伯政見寄韻

道義流聞意已傾豈知晚歲託齊盟六經日月未嘗
蝕千載源流終自明汝水家家書有種吾宗世世士
知名讀君長句還增氣俗耳那聞韶護聲

新寒

碧蝶飛飛過短籬山薑石竹有殘枝誰知老子閑眠
處恰是新寒細雨時

又

安石榴房初小拆南天竺子亦微丹新寒漠漠偏欺
老睡起無風怯倚欄南燭草本俗謂之南天竺李端叔取以名
僧軒蓋用俗語也

村隣會飲

陸子白首安耕桑樂事遽數烏能詳長羅家家雪作
麴畫楫處處青分秧迎荻船歸潮入浦祈蠶會散月
滿廊有時鄰曲苦招喚茅簷掃地羅壺觴堆盤珍膾
似河鯉入鼎大櫛勝胡羊披縣黃雀麩糝美斫雪紫

蟹椒橙香老人飽食可無患摩挲酒食與飯囊兒孫
扶持遞相送笑語無間歌聲長人間哀樂不可常掠
剩有鬼在汝傍常憂水旱虞螟蝗力行孝悌招豐穰
試筆

烹葵飯豆飽還休弄筆翻書歲又秋靈府湛然如止
水擬將何地著閑愁

紅絲玉斗紫毫銚歲晚相從味更長不似樂天歸老
日柳枝駱馬兩堪傷

孤村

老寄孤村裏悠然臥曲肱筭貧先放鶴嫌閑併疎僧
古戍高秋笛笛寒窗半夜燈平生羞詭遇多獲豈吾能
絕疎以來衣食愈不繼小兒力圖之殊未有涯
子謂不若痛節用爾示以此詩

處世吾傷拙營生汝亦疎如謀道邊舍似信枕中書
甕牖居疑黍藜羹食敢餘晏嬰元學墨勿負此心初
予宿疾多已失去獨氣痛時作賦詩自寬
疾久難全去扶持度歲年垣牆完罅隙七筋禁芳鮮
漸減觀書課常儲買藥錢鄉人多不識誰與問沉縣
秋懷十首末章稍自振起亦古義也

皇天本無心萬物各有時飛鴻何預入南翔每如期
仰看霜露墜俯數艸木衰英英籬下菊秀色獨滿枝
豈無一樽酒相與斟酌之耄老天所佚行歌復何疑
又

暑退財幾時忽已迫霜露西風一何厲落葉紛滿路
老翁衰可笑日夜念墟戶衣裘先關懷膏火亦當具
酒尤不可緩傾聽糟牀注供漿柿栗耳何敢議雉兔
又

雨滴大梧葉風轉孤蓬窠秋色固悽愴二物感人多
日月行黃道倏過如飛梭大計百年間貴賤俱銷磨
東家及西舍更代哭與歌若無杯中物如此搖落何
又

身如行脚僧放包即爲家家如道邊店蕭然寄天涯
居室如小舟風屏觸語啞坐傍陳琴書庭下栽雜花
儉陋雖可笑在我則已奢何以善吾生念念思無邪
又

遇酒幸一醉遇飯幸一飽或遇空無時豈復有他巧
鄉鄰哀其窮叩戶餽糜粲欣然出舍傍菘韭青落爪
飢羸曾未起吟諷已稍稍袖手北窗前枯腸困搜攬
又

秋高天薄寒夾衣已出笥團團素紈扇時至自當棄
明年機中練與我亦何異宮妾感物悲此豈丈夫事
吾曹一出門所遇皆有義夷齊死千年高風邈難嗣
又

群塵當以犀濯纓當以水龜堂一炷香世念去如洗
人生天地間太倉一稊米哀哉不自悟役役以至死
孰能從我遊跌坐燔柏子夜半清磬聲悠然從定起
又

改朔甫再宿月見西南隅纖纖一銀鈎挂空疑有無
我行青楓岸遠水浮雙鳧新寒入短衣感此風霜初
頗欲呼小艇東村行芋區衣薄且言歸煙火望吾廬
又

短蓑榜輕舟時過野僧舍長衫挂數珠亦入法華社
平生無揀擇生死均早夜餘年猶幾何久已付造化
常嫌樂天伎却肯退之罵君看佛骨表自是無生話
又

我昔聞關中水深土平曠涇渭貫其間沃壤誰與抗
桑麻鬱千里黍林高一丈潼華臨黃河古出名將相
淪陷七十年北首增慘愴猶期垂老眼一觀天下壯
九月七日子坦子聿俱出斂租穀雞初鳴而行
又

甲夜始歸勞以此詩
仲秋穀方登螟生忽告飢難難冀一飽俯仰事已非
貸糧助耕耘客主更相依一日忽如此欲語涕屢揮
共斂螟之餘存者牛毛稀吾兒廢書出辛幸庶幾
又

夜半聞具舟憐汝露溼衣既夕不能食念汝戴星歸
手持一杯酒老意不可違林瘦酒味薄食少雞不肥

頗聞吳中熟多稼徹王畿亦欲就飽處無羽能奮飛
官富哀我民榜笞方甚威渠亦豈得已撫事增歎歎

醉題埭西酒家

陣陣新寒入布裘偶乘小醉得閑遊丹楓落日野橋
晚斷雁溼雲江路秋馬得一鳴何恨斥金經百鍊豈
容柔不知千載塵埃裏更有吾曹強項不

又

桑麻蒙翳不通鄰耽酒頽然一老民遣客方眠那是
醉有衣可典未為貧曬翎斜日鷗來熟印跡平沙雁
到新君看此間何境界癡人猶說吐車茵

秋晚

庭艸猶殘綠溪楓已半丹誰知此翁健又見一年寒
幻境槐安夢危機竹節難如今渾過盡摩腹且加餐

省事

省事漸捐書甘貧學執蔬心安閑夢少病去俗醬疎
兀爾遊方外超然到物初此身猶是幻況復愛吾廬

晨起頗寒飲少酒作艸數幅
衣食無多悉自營今年真箇是歸耕屏居大澤羣鷺
息乍得清寒百體輕橋北潦收波淺碧埭西霜近葉
微頰一杯弄筆元無法自愛龍蛇入卷聲

往事

海內橫流日吾猶及建炎衆賢雖共視久疾固難移
點虜方觀釁行宮未解嚴時平逾五紀話此涕常霑

步至東莊

澤國寒雖晚霜天已迫冬嬌花雪無際稻米玉新春
身已風中葉人方飯後鐘兒能哀老子努力事春農

秋思

門巷蕭條秋色深黃花始欲慰孤斟久貧自笑不妨
樂過兵固知非所欽琴調已忘還漸省詩聯未穩更
長吟吾兒西上無多日安得相從老故林時子處將調

官臨安

又

日落江城聞擣衣長空杳杳雁南飛桑枝空後醉初
熟豆莢成時兔正肥但歲背人常冉冉老懷感物倍
依依平生許國今何有且擬梁鴻賦五噫

讀退之人不知古今馬牛而襟裾之句有感

書生獨占世間癡過計私憂無已時知盡古今成底
事空將血淚向人垂

病愈看鏡

鏡中稍復舊朱顏一笑衰翁乃爾頑三百瓮齋消未
盡不知更著幾年還舊傳貧士死見陰吏為言當還魂有三百
瓮齋料未盡

讀韓致光詩集

渺莽江湖萬里秋玉峯老子弄孤舟猶勝宿直金鑿
夜凜凜常懷發醉憂

逆旅書壁

驢鞍懸酒榼僮背負衣囊但說市朝變不知岐路長
下程先施藥拂榻靜焚香明日又西去河橋秋葉黃

又
騎驢萬里行歲一過秦城下杜黃春酒新豐聞曉鶯
綠槐新巷陌白骨幾公卿欲覓曲江水連雲禾黍生

初寒老身頗健戲書

一身百病老難支病減身輕偶此時窗暖不妨聊假
寐囊空久已罷招醫山爐曉絕香生岫整研坡陀墨
滿池箇裏生涯君莫厭癡人至死不曾知

又

過雁聲悲落葉稠孤村景物更禁秋窮諸客路風塵
惡老判人間歲月遣酒號賢人真古語疾為豎子豈
吾憂山房幸有初寒備且傍篝爐擁褐裘

子龍求煙雨軒詩口占絕句

烏柏迎霜已半丹哦詩終日合憑欄霜高木落應尤
好長挂西窗更怕寒

又
規模正似釣魚菴把酒纔容客一二若比東偏參倚
室此中猶自覺兢兢參倚蓋子聿書室名也

劍南詩稿卷第四十終

劍南詩稿目錄

卷第四十一

居室甚隘而藏書頗富率終日不出戶二首
無酒數 讀書 醉賦 掩扉 六經二首

舟中作 秋晚二首 西窗獨酌 冬初薄霜
病軀益健欣然有賦 一錢 燈下讀書戲作

遊近山 示兒子 寄深陽周丞文璞周寄
詩卷殊可喜 旅思 東村步歸二首 觀方

外書 午睡初起二首 莫秋遣興二首 種
蔬 起晚戲作 老藪 新治暖室 暖閣

自詠 夜坐 初冬有感二首 題酒家壁
冬初出遊二首 早飯後戲作二首 擬古四首

東村二首 倚闌 霜寒不能出戶偶書
冬晴與子坦子聿遊湖上六首 夢蜀 歲晚

二首 讀老子 貧病 洪雅葛仙硯 冬日
讀白集愛其貧堅志士節病長高人情之句作

古風十首 十一月四日夜半枕上口占 齋
中弄筆偶書示子聿 飢寒吟 病愈小健戲

作二首 祭寵與鄰曲散福 湖水愈縮戲作
夜坐 夢中作遊山絕句二首 大姪挽辭

書辛二首 退居 北望感懷 白髮 老
歎 作竹籬成因把酒其間戲題四十字 新

養白雞毛羽如玉殊可愛 新籬 龜堂雜興
十首

劍南詩稿卷第四十一

宋陸游務觀

居室甚隘而藏書頗富率終日不出戶

掩關小室動經旬蠹簡如山伴此身百億須彌藏粒

芥大千經卷寓微塵危機已過猶驚顧惡夢初回一

欠伸此役神通君會否聽風聽雪待新春

又

椰子微軀有百窮平生風際轉枯蓬豈知蟬腹龜腸

後更寄蜂房蠟穴中學儉久判羹不糝禪煩惟欲寐

無聰積書充棟元無用聊復吟哦答候蟲

無酒歎

不用塞黃河不用出周鼎但願酒滿家日夜醉不醒

不用冠如箕不用印如斗但願身強健朝莫常飲酒

造物不少恕虐戲逐段新坐令古銅榼經月常生塵

平生得酒狂無敵百幅淋漓風雨疾造物欲以醒困

之此老醒狂君未知

讀書

古人已死書獨存吾曹賴書見古人後之視今猶視

古吾書未泯要有取賈生痛哭漢文時至今讀之有

餘悲魏徵嘻笑封德彝生亦豈責絳灌知窮秋風雨

臥孤館萬世悠悠百年短垂死成功亦未晚安知無

人歎微管

醉賦

霜楓照茅屋露菊插紗巾今古無窮事江湖未死身

直令依馬磨終勝拜車塵我亦輕餘子君當恕醉人

掩屏

久臥空山獨掩屏迂疎不恨世相違新霜巷陌鳥烏

樂小兩園畦菘芥肥驥病極知當伏櫪鷗閑誰與共

忘機一編蠹簡從吾好又見西窗挂夕暉

六經

六經聖所傳百代尊元龜諱諱布方冊一字不汝欺

抱書入家塾自汝兒童時老乃幸不驗愚哉死何悲

又

秦人燔六經非與經為仇方其勇決時亦為子孫謀

歛金鑄巨人豈復畏鉏耰千載惡名在尚與黃河流

舟中作

沙路時晴雨漁舟日往來村村皆畫本處處有詩材

炊黍孤煙晚呼牛一笛哀終身看不厭岸曠興悠哉

秋晚

門巷清如水情懷淡似秋詩吟唐近體談慕晉高流

託命須長鏡浮家只小舟江南煙雨岸何處不堪留

又

木落寺樓出江平沙渚生牛羊下殘照鼓角動高城

寒至衣猶質憂多夢自驚羣胡方鬪穴河渭幾時清

西窗獨酌

却掃衡門歲月深殘骸復病交侵平生所學為何

事後世有人知此心水落枯萍黏破塊霜高丹葉照

橫林一樽濁酒西窗下安得無功與共斟

冬初薄霜病軀益健欣然有賦

古服追隨野老歡豎裁布褐縮縫冠霜清頓洗肺肝

熱木落更知山澤寬斗酒敢言嫌魯薄杯羹聊得學

吳酸一貧自是書生分忍媿看人却似難

一錢

萬事紛紛不足論滿庭枯艸閉柴門一錢留得終羞

澀持買飯餽引福孫

燈下讀書戲作

吾生如蠹魚亦復類熠燿一生守斷簡微火寒自照

區區心所樂那顧世間笑閉門謝俗子與汝不同調

遊近山

羸病知難賦遠遊尚尋好景送悠悠亂山孤店雁聲

晚一馬二童溪路秋掃壁有僧求醉墨倚樓無客話

清愁殘年敢望常強健到處臨歸為小留

示兒子

祿食無功我自知汝曹何以報明時為農為士亦奚
異事國事親惟不敢道在六經寧有盡躬耕百畝可
無飢最親切處今相付熟讀周公七月詩

寄溧陽周丞文璞周寄詩卷殊可喜

滿握珠璣何自來晴窗初喜拆書開信哉天下有奇
作久矣名家多異才隔關經年如許進超騰它日若
為陪山陰道上霜天好安得相從賦早梅

旅思

支遁山前看月明葛洪井上聽松聲廢亭草滿青驪
健野店燈殘寶劍鳴萬事竟當歸定論寸心那得塊
平生悠然酌罷無人語寄意孤桐一再行

東村步歸

野渡霜風冷茆簷夕照明催科醉亭長聚學老書生
山果紛丹漆村膠任濁清路回家忽近柳外小橋橫

又

風陣鴉翻黑霜林葉半丹筋骸欣小健裘褐戒初寒
代步雞栖足充飢鶴料寬平生自如許況已挂吾冠

觀方外書

司馬遺書有坐忘顛翁止觀略相當龜堂閉戶常終
日時得相從一炷香

午睡初起

曲腰桑上午雞鳴嗷嗷還如報五更睡起展書摩病
眼油窗喜對夕陽明

又

舍中未報壓新醅閑弄流塵榭葉杯得醉固佳醒亦
好了無一事到靈臺

莫秋遣興

改盡朱顏白盡頭杜門亦復弊貂裘斷鴻影外玉關
月病驪嘶中青海秋孤坐向空書咄咄閑吟隨處送
悠悠如虹壯氣難豁安得雲濤萬里舟

又

平生南地慣羈遊放浪常同不繫舟鼉作夜風經沌
口鸛鳴秋雨宿杭頭方傾意氣輕秦俠俄困悲傷類
楚囚買屋數間聊作戲豈知真用作菟裘

種蔬

老翁老去尚何言除却翻書即灌園處處移蔬乘小
雨時時拾礫繞頽垣江鄉地暖根常茂早歲蟲生葉
未繁四壁愈空冬祭近更催穉子牧雞豚

起晚戲作

睡到僧廊響木魚莊周蝴蝶兩遽遽數聲林下華亭
鶴一卷牀頭笠澤書雲子甌香炊熟後露芽甌淺點
嘗初若論身逸心無事臺省諸公恐不如

老歎

八十未滿七十餘山巔水涯一丈夫長鳴未免似野
鶴生意欲盡如枯株臨安宮闕經營初銀鞍日日醉
西湖不須細數舊酒徒當時兒童今亦無

新治暖室

小堂穩暖紙窗明低幌圍爐亦已成日閱藏經忘歲
月時臨閣帖雜真行詩才退後愁酣戰酒量衰來喜
細傾從此過冬那復事夜深時聽雪來聲

暖閣

裘輒勝狐白爐温等鴿青宮中供爐炭用胡麻文鴿鴿青
紙屏山字樣布被隸書銘養日簾稀卷留香戶每局
日晡濃睡起盥濯誦黃庭

自詠

朋舊凋零盡乾坤偶脫遺食新心竊喜話舊語多悲
泥醉醒常少貪眠起獨遲閉門誰共處枕藉樂天詩
王元之自言在商州讀老莊外枕藉白樂天詩

夜坐

白首仍多病青燈獨掩扉雲低聞雁過雨急待兒歸
初冬有感

衰髮蕭蕭滿鏡絲情懷非復似平時風霜十月流年
感礎柱三更游子悲閩嶠故人消息惡 傳聞方伯謨病

本蜀江遺老素書遲張季長居唐安歲常通書一簞豆飯
休嫌薄賦分羈窮合自知

又

峩冠本願致唐虞白首那知墮腐儒碌碌不成千載
事駸駸又見一年徂無僧解較齋厨米有吏頻傲瘦
地租要信此翁頑到底只持一笑了窮途

題酒家壁

智若禹行水道如丁解牛蘧蘧幾春夢泛泛一虛舟
事定憂何益狂來醉始休青帝誇酒笑且復共登樓
冬初出遊

風聲如雨曉聽颺萬葉丹楓滿瓦溝西望牛頭二十
里一枝柔艣作閑遊

又

寒巖渺渺涉煙津十里山村發興新青旆酒家黃葉
寺相逢俱是畫中人

早飯後戲作

湯餅滿盂肥豕香更留餘地著黃梁解衣摩腹西窗
下莫怪人嘲作飯囊

又

髯鬚主簿方用事冰壺先生來解圍蠻童取火炷香
椀不讀南華誰與歸

擬古

牛跡可使圓羊角可使直惟使剛者柔造物不可得
世方貴輒熱剛實不可為為剛死道傍已矣何所悲

又

君看一鉤絲能得幾日絡君思幾州鐵打此一大錯
目前豈不快後悔將奈何我非通神明比汝更事多

又

寧忍千日飢野葛不可烹寧枉百里途捷徑不可行
自古風俗壞善士亦淪胥橘柚禹包貢後世稱木奴

又

坐臥北窗下百事廢不洽脫粟與大布衣食裁自支

温飽豈不欲違道予心悲地下見先人所冀尚有辭
東村

野人知我出門稀男輟鉏耨女下機掘得此菇炊正
熟一杯苦勸護寒歸

又

野人喜我偶閑遊取酒忽忽勸小留舍後攜籃挑菜
甲門前喚擔買梨頭村人謂小梨為梨頭

倚闌

滿庭晴日破朝寒粥罷披裘小倚欄殘菊抱叢香欲
盡一株南燭獨如丹

霜寒不能出戶偶書

垂老仍多病濃霜得快晴猶能撥菊醉今年菊晚十月
未猶有花但負探梅行篝火烘裘暖油窗撥眼明小兒
殊可喜和我讀書聲

冬晴與子坦子聿遊湖上

湖邊細靄弄霏微柳下人家晝揜扉乘暖冬耕無遠
近小舟日晚載犁歸

又

村南村北紡車鳴打豆家家趁快晴過盡水邊牛跡
路嶺頭猿鳥伴閑行

又

道邊白水如牛渚知是山泉一脈來會挈風爐并石
鼎桃枝竹裏試茶杯

又

海山山下百餘家垣屋參差一帶斜我欲往尋疑路
斷試沿流水覓桃花

又

老僧八十無童子禮佛看經總不能雙手了又出迎
客自稱六十六年僧

又

一棹無時可醉吟一藤隨處得幽尋先須挽取銀河
水淨洗人間塵霧心

夢蜀

夢飲成都好事家新粧執樂雁行斜
楨肩郵縣千筒酒照眼彭州百馱花
醉帽傾歌歌未闕罰觥潏潏笑方
譁霜鐘喚覺晨窗白自怪無端一念差

歲晚

無窮世事浩難量歲晚沉綿臥艸堂
短褐拆筵移曲折故書經蠹失偏
傍賣刀擬買春耕犢挾筴曾亡舊
牧羊點檢生涯還自笑菜畦殘葉帶
新霜吳中冬蔬常

茂

又

扶藤據几久支離敢料駸駸迫耄期
面槁自丹天所借齒搖復住力何施
花前鯨吸猶堪酒窗底蟬嘶未廢詩
浮世極知誰不死比君終技幾年遲

讀老子

道德五千言巍巍衆妙門管窺那見
豹指染僅嘗龜正爾分章句誰歟達
本源蜀莊猶不死過我得深論世傳
莊君平不死時在人間猶讀老子

貧病

窮愁病思兩茫茫衰髮元知合變霜
酒要解醒猶有策食求祝噎更無方
凋零坐上親朋少寂寞人間歲月長
默計有時還自幸幼安垂老始歸鄉

洪雅葛仙硯探齋中物作題

異硯出漢嘉溫潤蒼玉質因形作獸
背得墨如點漆才高德亦全終月不
更筆蠶溪大沱輩皆蜀硯之得名者
鳥敢相甲乙從我歸吳中略計將萬
日摩拂不去手有若琴在膝名晦知
者稀體重盜計室惟當艸太

女不污管商術

冬日讀白集愛其貧堅志士節病長
高人情之

句作古風

君子亦有慕不慕要路津君子亦有
恥不恥賤與貧風俗未唐虞詩書非
一秦展轉不能瞑臥聽雞唱晨

天下不難一孰能凝使堅自古功已成
或散如飛煙惟唐用房魏規模三百年
至今河潼路過者猶泫然

又

漢禍始外戚唐亂基宦寺小人計已私
頗復指他事公卿恬駭機關河入危涕
艸茅豈無人死抱經世志

又

成童入鄉校所願爲善士富貴本邂逅
不遇亦已矣生輕名義重固守當以死
堂堂七尺軀勿使汚青史

又

勁風東北來茆屋吹欲裂出門有奇觀
湖上千峯雲日高炊未具歲晚衣百結
士豈無一長所要全大節

又

吾常慕昔人石介與王令挑燈讀其文
奮起失衰病吾徒宗六經崇雅必放鄭
人衆何足云少忍待天定

又

郊居四十年艸木日夜長喬松已偃蓋
穉松出蒼莽儒生學仁義敢廢自培養
鬱鬱棟梁姿拔地當百丈

又

仕如柳柳州賤奏典儀曹君恩篤始終
賜骸老東臯歷觀親黨間如我亦已遭
世世當斂退里門不須高

又

鏡湖有隱者莫知何許人出與風月遊
居與猿鳥鄰似生結繩代或是葛天民
我欲往從之煙波浩無津

十一月四日夜半枕上口占

卜日家祭竈牲肥酒香清分胙雖薄少
要是鄰里情衆起壽主人一觥潏潏傾
氣衰易成醉睡覺窗已明

小室惜惜夜向分幽人殘睡帶殘醺
簷間雨滴愁偏覺枕畔橙香夢亦聞
驚雁數聲投野澤悲笳三疊上霜雲
年來萬事俱拋盡自笑詩中尚策勳

齋中弄筆偶書示子聿
左右琴樽靜不諱放翁新作老生涯
焚香細讀斜川

集候火親烹顧渚茶書爲半酣差近古詩雖苦思未
名家一窗殘日呼愁起裊裊江城咽莫笳

飢寒吟

夜寒每達日懷抱安得寬朝飢或過午忍此良亦難
飢寒誠吾憂憂有甚飢寒彈琴不終曲推去發永歎
大兒破綠襦二歲待一官小兒學耕稼飯牛歌夜闌
老翁垂八十捫壁行蹒跚傍觀勿嘲笑窮死心所安

病愈小健戲作

路入江村跨蹇驢鞍前分挂兩囊書興來到處沾新
酒不爲閑愁要破除

又

入市歸村不跨驢蠅頭細字夜鈔書身安自勝閑官
職不是虛名暗折除

祭竈與鄰曲散福

已幸懸車示子孫正須祭竈請比鄰歲時風俗相傳
久賓主歡娛一笑新雪鬢坐深知敬老瓦盆酌滿不
羞貧問君此文茅簷底何似原頭樂社神

湖水愈縮戲作

瓜壠從來幾郡平鏡湖復有一玄英今秋雨少煙波
窄堪笑沙鷗也敗盟

夜坐

夜永霜濃睡不成團欒兒女話無生金蓮妄想消除
盡一椀松肪徹曉明

夢中作遊山絕句

霜風吹帽江村路小蹇迢迢委轡行忽到雲山幽絕
處穿林啼鳥不知名

又

寺樓已斷莫鐘聲照佛琉璃一點明不道溪深待船

久老僧驚怪太遲生

大姪挽辭前知歸林州博白縣錄

束髮已青袍終身州縣勞一官常飭講萬里忽烹蒿
竟負昂霄志空傳擲印豪君在博白與郡爭辨職事袖印還

之而去兩疎心不遂遺恨寄滔滔

書幸

富貴不可爲禍機發須臾貧賤不可爲飢寒死路衢
我亦貧賤者死期幸少紆春雨兩耕犢西疇破煙蕪
秋風一釣舟南浦宿菰蒲辛勤異退之亦復有屋廬
堂北鑿明窗可以陳琴書文章不傳世自適亦有餘

又

我身匪兕虎豈是曠野物生非洪水時胡爲在巢窟
向來三入朝薄命不黔突未嘗識許史況敢交平勃
滄波渺黏天遠逐輕鷗沒今年君恩厚幸許賜骸骨
既逃申公鉗又異卞和別放懷歌嗚嗚寧暇書咄咄

退居

溪煙漠漠奕棋軒覓水潺潺種藥園醫爲疾平新掃
跡客知睡美罕敲門談餘白拂懸牀角飲散空樽臥
壁根賜帛更蒙優老詔此生何以報君恩比有詔書賜
致仕官羊酒粟帛丁寧甚至

北望感懷

榮河溫洛帝王州七十年來禾黍秋大事竟爲朋黨
誤遺民空數歲時道乾坤恨入新豐酒霜露寒侵季
子裘食粟本同天下責孤臣敢獨廢深憂

白髮

蕭蕭白髮濯滄浪刻曲西南一艸堂飲水讀書貧亦
樂杜門養病老何傷已成五畝扶犁叟誰記三朝執
戟郎正似籬邊數枝菊歲殘猶復耐冰霜

老歎

事與年俱往心於世轉疎曼膚銷欲盡鬢髮變無餘
野店通賒酒隣翁伴荷鋤尚嗟餘習在夢課吏鈔書
作竹籬成因把酒其間戲題四十字

今日偶暄暖臥聞林鳥呼雖思大白飲未免小蒼扶
柳色動籬外梅花來座隅夕陽紅滿野更復倒殘壺
新養白雞毛羽如玉殊可愛
赤憤我我玉羽明籬間新織竹籠成老人從此知昏

曉不用元戎報五更

新籬

新籬三面北通門藤架陰中細路分天宇淡青成卵
色水波微皺作靴紋參差村舍穿林出縹緲漁歌隔
浦聞忽覺楚鄉來眼底欲題幽句弔湘君

龜堂雜興

朝來地確玉新春雞蹠豚肩異味重便腹摩挲更無
事老人又過一年冬

又

曳杖東岡信步行夕陽偏向竹間明丹楓吹盡鴉聲
樂又得霜天一日晴

又

閩溪紙被輒於綿黎峒花紉駿勝氈一夜山中三尺
雪未妨老子日高眠

又

三分帶苦檜花蜜一點無塵柏子香鼻觀舌根俱得
道悠悠誰識老龜堂

又

方石斛栽香百合小盆山養水黃楊老翁不是童兒
態無奈菴中白日長

又

少年身寄市朝中俗論紛紛聒耳聾清絕寧知有今
日高眠終夜聽松風

又

二三隣曲偶相尋小醉悠然臥竹陰醒後自看還自
笑溪雲猶未是無心

又

蒲團安坐地爐温無位真人出面門世上不知何歲
月斷鐘殘角送黃昏

又

道妙從來亦屢聞閉門方用十年勤筆端小技深知
悔舊稿如山欲盡焚

又

散樸澆淳萬事新腐儒空有涕沾巾唐虞不是終難
致自欠臯夔一輩人

劍南詩稿目錄
卷第四十二

己未冬至 冬至夜坐作短歌 新裁短褐接
客以代戎服或以爲慢戲作 冬夜 書感
書意 試茶 對酒懷丹陽成都故人 三山
卜居三十有四年矣老身七十有五兒輩亦頗
宦學未爲非吉也偶作五字示諸兒 村興
枕上 得建業伴鄭覺民書言虜亂自淮以北
民苦餒調皆望王師之至 兩夜讀書 夢中
作 題傳神 紀懷 新作柴門戲書 炊飯
愛閒 與子聿讀經因書小詩示之 登東
山 己未歲莫 冬夜讀書示子聿八首 幽
興 寓歎 夢題驛壁 新春 庚申元日口
號六首 視東臯歸 晚步舍東 人日東園
逆旅行 小雨初霽 獨夜 忍窮 開歲
半月湖村梅開無餘偶得五詩以煙溼落梅村
爲韻 老病 三二年來夜夢每過吾廬之西
一士友家觀書飲酒方夢時亦自知其爲夢也
二首 上元兩 雜興二首 初春書喜 幽
居無一事戲作 贈道流 病中作 病愈偶
書 小圃獨酌 飯罷戲示鄰曲 春日六首
新晴野步 湖上作二首 夜行過一大姓
家值其樂飲戲作 枕上作二首 懷懷行
春齋 答客 閨中自詠二首 甲申雨 今
歲遊花溼差晚戲作 枕上口占三首 贈謝
正之秀才 連日往來湖山間頗樂卽席有作
贈貓 數老 殘春 東村 晚步舍北歸
記夢 寄題揚州九曲池 投老 茅亭
貧甚賣常用酒杯作詩自戲 春晚泛湖歸偶
賦

劍南詩稿卷第四十二

宋陸游務觀

己未冬至

老人畏添歲每歎時序速今朝陽始生在易得來復
扶衰奉先祭拜起賴童僕兒曹亦壽我魚兔隨事足
歡言為一醉家釀及新熟占年當得稔 冬至後九日遇
壬法嘗有年 喜笑動隣曲冀從宿麥始載重車折軸明
年秋社時處處饜酒肉

冬至夜坐作短歌

一陽萌生從此日老人堅坐午達夕渾渾上泝河流
黃赫赫內視神珠赤愛如嬰兒未離乳危若遊絲裊
千尺君不見宣房塞河百萬人一日橫流由蟻隙

新裁短褐接客以代戎服或以為慢戲作

世事巧相違殘年幸許歸雖云裁免褐不擬出漁扉
拂石襟靈爽措筇氣力微朝衣猶挂却况遺著戎衣
冬夜

多病睡眠少長閑懷抱清昏燈照殘夢寒漏下高城
落月澹將沒棲禽靜復驚誰言冬夜永輾轉已窗明

書感

壯歲功名妄自期晚途流落鬢成絲臨風畫角曉三
弄釀雪野雲寒四垂金鎖甲思酣戰地宅貂裘記遠
遊時此心炯炯空添淚青史它年未必知

書意

領霜久矣不勝耘殘髮今年白十分憂國雖忘幾婦
緯愛君敢進野人芹牀頭酒滴空階雨爐面香橫出
岫雲已向人間齊物我不教驚起白鷗羣

試茶

強飯年來幸未衰睡魔百萬要支持難從陸羽毀茶
論寧和陶潛止酒詩乳井簾泉方徧試拓羅銅碾雅
相宜山僧剝啄知誰報正是松風欲動時

對酒懷丹陽成都故人

勞生常羨鶻體樂死時却悔生時錯花前有酒不肯
狂回首朱顏已非昨君看古來賢達人終日飲酒全
其真世間萬事竟何有金樽翠杓差關身放翁少日
無凡客飛觴縱樂皆豪傑清歌一曲梁塵起腰鼓百
面春雷發故人仙去蓬萊宮鸞絲鳳竹醉春風石帆
山下孤舟雪一段清愁付此翁

三山卜居三十有四年矣老身七十有五兒輩
亦頗宦學未為非吉也偶作五字示諸兒

買地不占龜心知百世宜西隣梅福隱南望項王祠
菴小偷僧樣陂長技古規保家無異法一念勿萌欺
村興

身老交情見絲生口數添園丁上牛米村婢博蠶鹽
炬枚堆盤白銀鐙出釜甜閉門君勿謂衰病正相兼

枕上

迢遞孤村夜淒涼半篆香懷人悲夢短聽雨怯更長
有術乾盤禾無方掃鬢霜高吟擬排悶吟罷更佞佞
得建業倅鄭覺民書言虜亂自淮以北民苦徵

調皆望王師之至

邦命中興漢天心大討曹風雲助開秦河渭蕩腥臊
日避揮戈勇山齊積甲高煌煌祖宗業只在馭羣豪
兩夜讀書

農家冬少事無地肆吾勤急雨生新健陳編寄一欣
高風感莘渭善治仰華勳老死今朝夕何由誦所聞
夢中作己未十二月五日夜作所書皆夢中事也

長隄行盡古河濱小市人稀霧雨昏樞馬垂頭鬣營
艸驛門移路避槐根斷碑零落苔俱徧漏壁微茫字
半存催喚厨人燎狐兔強排旅思舉清樽

題傳神

雪鬢蕭然兩頰紅人間隨處見神通半醒半醉常終
日非士非農一老翁極驥雖存千里志雲鵬已息九
天風嶸嶸骨法吾能相難著凌煙劍佩中

紀懷

未斷要離冢畔雲，偷牛得食寄鄉粉。修身本欲善吾死，臨事豈忘尊所聞。時序管寧親饋奠，江山龐老上丘墳。飾巾家簣從來事，萬種悠悠莫苦分。

新作柴門戲書

雖設常關果是麼，開門終日有誰過。從來不省多車轍，此際真宜置爵羅。尚許漁樵時刺豕，偶逢風月亦婆娑。炎炎炙手須臾事，也似柴荆較幾何。

炊飯

米分齋鉢供薪拾，墮巢枝偶爾成。幽事欣然慰午飢，炊時珠瀉甌嘗處。雪翻匙欲作明朝計，還須賣漉籬。

愛閑

今日先生病體輕，愛閑猶有舊心。情帖看貞觀行間，印琴記中郎爨下。聲衣焙温温香欲透，雪簷滴滴日初晴。客來一笑明窗底，枉道為農事耦耕。

與子聿讀經因書小詩示之

經中固多趣，我老未能忘。似獲連城璧，如傾九醞觴。信能明孔氏，何暇傲羲皇。努力晨昏事，躬行味始長。

登東山

老慣人間歲月催，強扶衰病上崔嵬。生為柱國細事爾，死畫雲臺何有哉。熟計提軍出青海，未如喚客倒金罍。明朝日出春風動，更看晴天萬里開。

己未歲莫

七十六年將到時，龍鍾猶復強支持。寒燈照影始知瘦，薄酒作醒方覺衰。春日尚能持冷麩，花時未礙插繁枝。癡頑應有傍觀笑，自課園丁補槿籬。

冬夜讀書示子聿

宦途至老無餘俸，貧悴還如筮仕初。積有一籌勝富貴，小兒讀遍舊藏書。

易經獨不遭秦火

字字皆如見聖人，汝始弱齡吾已老。要當致力各終身。

又

古人學問無遺力，少壯工夫老始成。紙上得來終覺淺，絕知此事要躬行。

又

簡斷編殘字欲無，吾兒不負乃翁書。絕勝鎖向朱門裏，整整牙籤飽蠹魚。

又

聖師雖遠有遺經，萬世猶傳舊典刑。白首自憐心未死，夜窗風雪一燈青。

又

殘雪初消薺滿園，糝羹珍美勝羔豚。吾曹舌本能知此，古學工夫始可言。

又

讀書萬卷不謀食，脫粟在傍書在前。要識從來會心處，曲肱飲水亦欣然。

幽興

世間萬事有乘除，自笑羸然七十餘。布被藜羹緣未盡，閉門更讀數年書。

寓歎

午倦便高枕，朝飢笑小餐。時穿幽圃屐，常掩小菴門。溪憶鷗盟約，花迷蝶夢魂。餘生猶幾許，萬事付乾坤。

夢題

眼底誰為耐久朋，倚肩按膝一烏藤。虛名但可欺橫目，薄俗何時復結繩。浮世百年悲冉冉，閑身萬事付騰騰。年來更數龍鍾甚，欲探梅花病不能。

新春

半生征袖厭風埃，又向關門把酒杯。車轍自隨芳艸遠，歲華無奈夕陽催。驛前歷歷雙隄陌，上悠悠人去來。不為途窮身易老，百年回首總堪哀。

庚申元日口號

數行晴日照青鸞春入屠蘇微灑樽兒報山僧留刺
去未為無客到吾門

又

黃纒五丈裁衫穩黑黍三升作飯香造物要教無媿
怍一身溫飽出耕桑

又

南陌東阡自在身老年喜見歲華新洛中九老非吾
侶且作山陰十老人

又

晚塗初入長生運新歲仍當大有年剩與鄉鄰同覓
醉市樓酒賤不論錢

又

去年迎客已蹒跚今歲人扶出亦難堪笑此翁衰到
底重裘絮帽尚言寒

又

仁和館外列鷓鴣行憶送龍舟幸建康舍北老人同甲
子相逢揮淚說高皇

視東學歸

抱末新湖葑燒畬古廟墻宦遊悲駭歸臥困沉綿
日隱啼鴉戍舟回落鴈天衰殘知迫死不忍負青編

晚步舍東

遇興穿叢竹尋香折野梅莫天寒欲雪幽徑綠生苔
栖雀爭枝噪歸牛並塹來高城角聲動不盡古今哀

人日東園

歲首未入春風氣已稍和我睡意慵起如此鳴禽何
駕言之東園落梅亦已多江南無堅冰綠池生微波

挹彼蒲萄醅酌我鸚鵡螺雖無絲與竹倚樹自高歌

矯首東南望稽山鬱嵯峨兒曹幸力穡老子得婆娑

逆旅行

古者謂死為歸人此身未死均是客家為逆旅身在
途久寓遽歸初不擇逆旅相看隨薄厚非意相干寧

足責世間何處無谿山得酒盡醉當墮曠傍觀嘲謔
亦其宜東海定非蠡可測

小雨初霽

歸來偶似老淵明消渴誰憐病長卿小雨染成芳艸
色好風吹斷畫簷聲剪燈院落長猶冷賣酒樓臺晚
旋晴莫道此翁遊興懶蘭亭禹寺已關情

獨夜

村路泥淹雪虛簷水結冰長征荷戈客暫到放包僧
妖鵬鳴高樹飢餓觸聞燈誰能問良苦衰病正相乘

忍窮

短褐財遮肝孤煙僅續炊久窮方有味古語不吾欺
堅坐忘昏日殘年迫耄期尚餘書滿屋手校付吾兒

開歲半月湖村梅開無餘偶得五詩以煙溼落

梅村為韻

斷岸通別浦孤舟入春煙與梅本無期忽到醉眼邊
折花插紗帽花重覺帽偏居人空巷看疑是湖中仙

又

我來梅花村倚杖久佇立惜哉風雨餘零落綠苔溼
往年賦詩人去袂不可執明朝梅亦空感舊百憂集

又

梅花如高人妙在一丘壑林逋語雖工竟未脫纏縛
乃知尤物側天下無傑作老我懷不舒樽前幾開落

又

斗柄忽東指開盡湖邊梅偉觀天下無四顧雪千堆
時至當歛退勿受曉角催安知桃李輩於子無嫌猜

又

昨日春已來盎盎滿江村落梅亦多情點點浮清樽
語離聊一醉不恨村酒渾人生共如此已矣兩忘言

老病

湖上歸耕一病翁此心非復少年同讀書初恨歲時
速聞道始知身世空匠石不能材社櫟弋人何意慕
冥鴻新春愈覺支離甚又付生涯藥裏中

三二年來夜夢每過吾廬之西一士友家觀書
飲酒方夢時亦自知其為夢也

西鄰好友工談笑每見明知是夢中樽酒不空書滿
架何時真得與君同

又

清言疊疊岸綸巾久矣吾遊無若人自怪夢中來往
熟抱琴攜酒過西鄰

上元雨

城中酒壚千百所不憂不售惟憂雨今年上元燈滿
城曲巷深坊鬧歌舞天公不借一日晴風吹燈死雨
如傾家家移牀避屋漏不聞人聲聞屐聲

雜興

造物乘除理固然許將窮悴博頑堅驥衰伏櫪心千
里龜冷捲牀壽百年好事時供沽酒費攤途爭笑插
花顛漁村宿願雖償盡猶恨僧房欠晝眠

又

散髮林間萬事輕夢魂安穩氣和平只知秋菊有佳
色那問荒雞非惡聲達士招呼同嘯傲福人分付與
功名一篇說盡逍遙理始信蒙莊是達生

初春書喜

我生本癡絕萬事不繫懷一朝蛻形去豈問棄與墮
遊宦三十年所向無一諧偶然有天幸自退非人排
黃紙如鴉字君恩賜殘骸刻溪回雪舫雲門散青鞵
兩犢撤春泥一鉢隨午齋更當擁布被高枕聽鳴蛙

幽居無一事戲作

長鬢僅有玉川奴秃尾猶無漫漢驢萬事已隨春枕
斷故人何啻曉星疎出乘微雨鋤畝粟歸傍荒畦頽
野蔬一字不看方睡美任人搜去帳中書

贈道流

煙雲深處作生涯回首人間歲月賒留得朱顏憑綠
酒掃空白髮賴丹砂七絃指下冷泠久雙袖風中獵
獵斜他日相尋不知處會從漁父問桃花

病中作

牀席呻吟裏衡茅隱約中空興年往數未著日新功
世遠言猶在身危道豈窮但能無愧怍天地本來公
病愈偶書

枯蓬萬里寄飄風晚落江頭號放翁冉冉流年秋鏡
裏悠悠殘夢曉笳中掃除藥裏病良已棄置酒杯愁
自空閑處固應容老子臥看年少起新豐

小圃獨酌

少時裘馬競豪華豈料今為老圃家數點罪微社公
兩兩叢閑淡女郎花詩成枕上常難記酒滿街頭却
易除自笑邇來能用短只將獨醉作生涯

飯罷戲示鄰曲

今日山翁自治厨嘉穀不似出貧居白鵝翁美加椒
後錦雉羹香下豉初箭茁脆甘欺雪菌蕨芽珍嫩壓
春蔬平生責望天公淺捫腹便便已有餘

春日

開盡梅花柳漸青東風又滿會稽城放翁晨起有佳
思姪姪林鶯初試聲

又

方池潏潏碧波平曲徑纖纖細艸生席地幙天君但
醉苦無多日是清明

又

桃花輕薄柳花狂蛺蝶翩翩燕子忙惟有龜堂無一
事閉門白日不勝長

又

巷口東風吹酒旗老人也惜早春時雨來三日泥沒
蹀過盡梅花渾不知

又

雪山萬疊看不厭雪盡山青又一奇今代江南無畫
手矮牋移入放翁詩

又

怕見公卿懶入城野橋孤店跨驢行天公遺足看山

願白盡髭鬚却眼明

新晴野步

吹盡浮雲旋作晴郊原高下水縱橫煙蕪漫漫如添色谷鳥關關已變聲迨酒賤時須痛飲得人扶處儘閑行隔湖遙指蘭亭路隣叟追隨羨眼明

湖上作

鷓兒涇口曉山橫蜻蜒港頭春水生蘭亭之北是茶市柯橋以西多鑼聲

又

東涇西涇花極望紅雲照波錦裏山路似掌平身自倦酒如土賤篋常罄

夜行過一大姓家值其樂飲戲作

村豪聚飲自相歡燈火歌呼鬧夜闌醉飽要勝飢欲死看渠也復面團團

枕上作

水漲池新滿山寒屋儘低愁多憎夜雨睡少喜晨雞社肉初分昨春燕已再犁明朝尋父老不怕蹋街泥

又

山雨蕭蕭過沙泉咽咽流夢中無遠道醉裏失孤愁貧賈相如騎寒思季子袋兒童報新霽裏飯出閑遊

悽悽行

悽悽重悽悽惻惻復惻惻我媿思曠傍人誰子思惻興邦在人材巖穴當物色如何清廟器老死山南北小儒雖微陋一飯亦憂國豈無一得愚欲獻懼非職

春齋

食案何蕭然春齋花若雪從今日老硬何以供采蘋山翁垂八十忍貧心似鐵那須萬錢筋養此三寸舌

輕炊香粒飯幸免煩祝噎一瓢亦已泰陋巷時小啜

答客

人生各有營為吏最無策其間小黠者但肯乘下澤絕筆光範書掃迹翹才客早收畏塗身未老歸阡陌嗟予昧擇術誤計真累百衰病始知悔泥默每自責

孤舟寄渺莽尚恨江湖迮客來勿多談窮命不禁嚇

閑中自詠

小艇上時皆綠水短筇到處即青山二十四考中書令不換先生半日閑

又

聲名本自不關身富貴元知與禍鄰但恨平生閑不足再來真作臥雲人

甲申雨

老農十口傳為古春遇甲申常畏雨風來東北雲行西雨勢已成那得禦山陰洪湖二百歲坐使膏腴成瘠鹵陂塘遺迹今悉存歎息當官誰可語甲申畏雨古亦然湖之未廢常豐年小人那知古來事不怨豪

家惟怨天

今歲遊花涇差晚戲作

滿地殘紅點綠苔花涇弭棹小裴回春風又作忽忽別老病無端衰衰來亦悟百窮緣駢髀終羞萬事學低摧吾文自欲忘憂耳那博人間水一杯

枕上口占

五十年前詩酒身山陰風月尚如新閑愁已是無關障一枕春寒更惱人

又

踴雨敲門覓季夷雙屐同和仲高詩回思五十年前事恰似今宵夢裏時

又

五十年間萬事空懶將白髮對青銅故人只有桃花在惆悵無情一夜風

贈謝正之秀才

君家麻源第三谷我在鏡湖分一曲平生夢亦不相接忽然懷中瀉珠玉誠齋老子主詩盟片言許可天

下服長歌為君定聲價賞音但須一夔足踴泥過我君豈誤拱壁何至求凡目只愁明日遽來索北窗連夜挑燈讀

連日往來湖山間頗樂即席有作
晚春光景亦佳哉野老蒼顏一笑開莫問此生猶幾
展但知相遇且銜杯偶攜兒女祈蠶去又逐鄉隣賽
麥回不信年華如轉轂城頭君聽角聲哀

贈貓
鹽裹聘狸奴常看戲座隅時時醉薄荷夜夜占甃甃
鼠穴功方列魚殮賞豈無仍當立名字喚作小於菟
數老

小築依林藪殘年迫耄期衣寬方覺瘦步蹇始悲衰
食飲常多忘方書動自隨園花幾分在睡起問吾兒

殘春

章甫從諸老今為兩世人惟書尚開眼非酒孰關身
遠水涵清鏡晴雲蹙細鱗籬邊花未盡作意醉殘春

東村

雨霽山爭出泥乾路漸通稍從牛屋後却過鶴巢東
泱泱沙溝水翻翻麥野風欲歸還小立為愛夕陽紅

晚步舍北歸

昨日海棠開今朝燕子來偶行沙際去却傍柳陰回
酒是沽愁藥書為引睡煤吾生不乏此外物信悠哉

記夢

夜夢遊名山翠壁開巖扉主人喜迎客劇談皆造微
下臨萬里空渺渺一鶴飛安得棄家去丹竈常相依

寄題揚州九曲池

清汴長淮莽蒼中揚州畫戟擁元戎南連近甸觀秋
稼北撫中原掃夕烽茶發蜀岡雷殷殷水通隋苑月
溶溶懸知帳下多豪傑一醉何因及老農

投老

投老百無成山林送此生薄才元易盡古道竟難行
陋巷牛羊迹衙門鳥雀聲新年幸差健作意事春耕

茅亭

終日坐茅亭蕭然倚素屏兒圓點茶夢客授養魚經
馬以鳴當斥龜緣久不靈詩成作吳詠及此醉初醒

貧甚賣常用酒杯作詩自戲

桃李成塵渾不數海棠也作臘脂雨清明未到春已
空枝上流鶯替人語逢春日日合醉歸莫笑典衣窮
杜甫生時不肯燒舌本死後空持醅墳土門前三百
里湖光天與先生作醉鄉銀杯羽化不須歎多錢使
人生窟郎

春晚泛湖歸偶賦

十日雨晴湖水深暖催新綠上橫林分泥海燕穿花
徑帶犢吳牛傍柳陰夏近漸低遊舫價日斜殊費寺
樓吟歸來支枕還無事一縷微煙看水沉

劍南詩稿卷第四十二終

劍南詩稿目錄
卷第四十三

東園小飲四首 病退頗思遠遊信筆有作
春晚閒步門外 嘲布穀 題齋壁 龜堂晚
興 長干行 養生 園中觀艸木有感 恩
賜龜紫二首 自警 獨夜 雨夕枕上作
喜晴 觀運糧圖 宇文袞臣吏部予在蜀日
與之遊至厚契闊死生二十年矣庚申三月忽
夢相從如平生愴然有賦 阿姥 初夏 讀
書 喜晴 初夏北窗二首 書適 幽居初
夏四首 獨醉 獨立 高臥 趙彥庸修撰
挽辭 讀香奩集詩戲効其體 野步至村舍
莫歸 述悲 江東韓漕晞道寄楊庭秀所贈
詩來求同賦作此寄之 雨夜 小橋 自笑
入梅 雨夜 燕 午枕 項里觀楊梅四
首 夜歸 五月十一日睡起 示客 雨中
作 舟中遣興 自嘲 齋中雜興十首以丈
夫貴壯健慘戚非朱顏爲韻 夏五月方閱雨
忽大風雨三日未止三首 遣興二首 六月
一日曉賦 露坐 夜賦 乙夜納涼 五鼓
老態 枕上聞風鈴二首 寄贈湖中隱者
觀畫山水 六月十八日立秋未日起行山
園口占 新秋 晨起自山園歸書室 初秋
小雨 出遊 對酒 自勉 新涼 醉中題
民家壁 秋景 舟中作 雜興四首 自詠
閒適 近村莫歸 秋興 讀史有感三首

劍南詩稿卷第四十三

宋陸游務觀

東園小飲

少年萬里走塵埃歸臥柴荆晝不開十事真成九敗
意一春知復幾銜杯波清憑檻觀魚樂風緊鉤簾待
燕回催喚比隣同晚酌旋燒笙筍摘青梅

又

入東又見幾春風茆屋蘆藩寂寞中道業雖如詩不
進世緣已與夢俱空高枝濯濯辛夷紫密葉深深躑
躑紅村巷斷無軒蓋到一樽猶得伴鄰翁

又

三月園林日漸長閑從鄰曲咎年光醅醺獨殿羣芳
後醞醑能令萬事忘下豉尊羹誇舊俗供鹽梅子喜
初嘗烏靴席帽知何樂自古京塵眯眼黃

又

乞得殘骸老故山艸亭終日對孱顏孤雲百尺起江
際幽鳥數聲鳴竹間衆死一身今獨健人忙萬物本
常閑此心欲語知誰聽賴有漁樵日往還

病退頗思遠遊信筆有作

平日身如不繫舟曾從楚尾客秦頭風生江浦千帆
曉月落山城一笛秋萬事只能催白髮百年終是臥
荒丘扶衰強項君休笑尚憶人間汗漫遊

春晚閑步門外

病退扶行力尚微悠然隨意出荆扉蜂貪釀蜜爭花
去燕喜分泥傍水飛午渴坵瓶嘗煮酒晴暄開筍換
單衣躊躇已久歸猶賴更向溪頭坐釣磯

嘲布穀

時令過清明朝朝布穀鳴但令春促駕那爲國催耕
紅紫花枝盡青黃麥穗成從今可無語傾耳舜致聲
題齋壁

出郭無十里結廬纔數間每將窮博健不遺樂坊閑
賣藥雲邊市尋僧雨外山何妨搖櫂去却作跨驢還

龜堂晚興

九日春陰一日晴回塘閑院愜幽情小魚出水圓紋
見輕燕穿簾折勢成今日掩關真佚老向來涉世亦
遺名巡簷更有欣然處新筍初抽四五莖

長干行

裙腰綠如艸衫色石榴花十二學彈箏十三學琵琶
寧嫁與商人夫婦各天涯朝朝問水神夜夜夢三巴
聘金雖如山不願入侯家鄣袖庭花下東風吹鬢斜

養生

受塵故里老爲氓三十餘年學養生情盼作妖狐未
慘肥甘藏毒醜猶輕忠言何啻千金藥赤口能燒萬
里城陋巷藜羹心自樂傍觀虛說傲公卿

園中觀艸木有感

木筆枝已空玉簪殊未花楨桐時更晚春盡始萌芽
老人多感慨俯仰悲歲華兩曜如奔輪疾去不可遮
城頭插雙旗疊鼓催清笳兀然一室間不復過鄰家

午睡或至莫亂髮垂髻髮所嗟瘦僧死莫致茶山茶
茶山僧道省歲餉新茶今死已再歲矣

恩賜龜紫

憶昔青衫上赤墀領間未有一莖絲豈知曉拜金龜
賜却是霜髯雪鬢時

又

已挂朝衣神武門暫紆紫綬拜君恩兒孫賀罷還無
事兩笠煙蓑自灌園

自警

少年不自量妄意慕管葛晚節雖知難猶覩終一豁
悲哉老病馬解縱誰復秣既辭筮轡勢始愛原野關
欽澗鬻霜菅亦可數年活勿復思長途嘶鳴望天末

獨夜

一生食太倉蠹耗均雀鼠雖云久置散飢飽尚撐拄

兩年失微祿始覺困羈旅傾身營薪米得食已過午
人觀不堪憂意氣終自許藜藿若大庖艸廬如萬礎
平生師顏原本自藐晉楚悠然臥北窗殘燈翳還吐
雨夕枕上作

鬢毛日夜雪霜稠冉冉年光逝肯留酒力但資愁作
祟雨聲偏與睡為仇銘旌官職眼前事史冊姓名身
後憂畢竟此生何處是江湖萬里有孤舟

澤國風雨多春盡尚裘褐閉門不能出飽受鳩婦聒
今朝雲忽歸溝水清活活偶為東園行魚鳥閒何關
婦女蠶事終桑柘光如發布穀汝勿憂吾袴真可脫
喜晴

王師北伐如宣王風馳電擊復土疆中軍歌舞入洛
陽前軍已渡河流黃馬聲蕭蕭陣堂堂直跨井陘登
太行壺漿單食滿道傍芻粟豈復煩車箱不須絕漠
追敗亡亦勿分兵取河湟但令中夏歌時康千年萬
年無饑饉

宇文哀臣吏部予在蜀日與之遊至厚契闊死
生二十年矣庚申三月忽夢相從如平生愴然
有賦

英姿爽氣宇邛州雖古人中豈易求六月長途將竭
死一天風雷起龍湫

阿姥
城南倒社下湖忙阿姥龍鍾七十強猶有塵埃嫁時
鏡東塗西抹不成粧
初夏

兩足移秧後風和剝繭初昏昏時就枕買買却尋書
晚步身須杖晨興髮廢梳滿城車馬客誰復問何如
讀書

稽古衰猶力翻書夜達晨思人頻掩卷感事忽霑巾
世閱幾春夢身今一老民忍窮端已慣蔬食又經旬
喜晴

江湖春莫多風雨點滴空塔實厭聽剩喜今朝有奇
事一窗晴日寫黃庭

初夏北窗
作墨無聲紫玉池年光又入放翁詩風和柳岸吹綿
後兩足瓜哇引蔓時病酒相如無奈渴清言叔寶不
勝羸此生豈復功名事付與城頭畫角悲

又
水際柴荆晝不開臥聽微雨雜輕雷春蠶滿箔眠初
起社燕爭巢去復來海檜屈蟠依怪石山榴零落點
蒼苔一樽及此風光美車下長坡底用推

書適
老人去健羨飯足便之餘此外一壺酒薦以園中蔬
手種數畦花時開一編書近者苦足蹇復營一柴車
時時訪溪父亦或遊僧廬上下山澤間視身等禽魚
既歸則浩歌幽抱亦少據一笑謂兒子不須起犁鋤
幽居初夏

路緯長隄北家居小市西陂塘晨飲犢門巷午鳴雞
婦喜蠶三幼鄉中謂蠶眠為幼兒誇雨一犁衰翁亦放
淚未怕履露泥

又
梅塢青黃子艸陂紅紫花雙鵝朝戲浦羣鴨莫還家
赤腳挑殘筍蒼頭摘晚茶出門逢野老滿意說桑麻

又
詰曲穿桑徑謳謳響竹門疏泉灌藜莧倚杖牧雞豚
江步橫新舸茅簷弄幼孫太平端有象誰與畫吾村

又
大耋光陰短南詛日月長松枯宜倒壑龜老慣搢牀
寂寂三升稷悠悠百本桑飢寒猶駭麟何術延吾育
獨醉

老伴死欲盡少年誰肯親自憐真長物何啻是陳人
江市魚初上村場酒亦醇頽然北窗下不覺墮紗巾
獨立

午醉初醒後回廊獨立時斜陽明兩葉乳鶻裊風枝
違俗雖堪笑師心頗自奇傍人疑徙倚向道是尋詩

高臥

省戶歸來不計年悠然高臥鏡湖邊釣簾每對千峯
兩接竹新分一脈泉學問誠身元有道阮窮知我豈
非天虛名自古能爲累正恐人看直一錢

趙彥膚修撰挽辭

朝路英聲早宗盟宿望尊謙談推醞藉大筆擅雄渾
許國心猶壯安邊策具存悽涼故時客痛哭望秋原
讀香奩集詩戲効其體

金鋪一閉幾春風咫尺心知萬里同麝枕何曾襖夢
惡玉壺空解貯啼紅晝愁延壽丹青誤賦欠相如筆
墨工一事目前差自慰月明還似未央中

野步至村舍莫歸

艸徑盤紆入廢園漲餘野水有殘痕新蒲漫漫藏孤
艇茂樹陰陰失近村拄杖敲門求小憩老盆盛酒瀉
微渾興闌却覓橋邊路數點歸鴉已帶昏

述悲

屏居不出門終歲袖手坐但怪意氣衰那覺日月過
故人爲冢丘老伴餘幾箇天高鬼神惡回天夷齊餓
遺魂一零落豈復聞楚些且當醉濁醪吾夢行亦破
江東韓漕睺道寄楊庭秀所贈詩來求同賦作

此寄之

三朝巍巍韓侍中爛然彝鼎書元功西戎北狄問安
否九州萬里涵春風子孫繼踵皆將相我猶及拜西
樞公顧憐通家略貴賤勞問教誨均兒童西樞有孫
又奇偉凜然大華摩蒼穹小試玉節江西東文書如
海到手空政成蒲鞭亦不用地上錢流倉粟紅君持
此手上廊廟折衝禦侮知從容桑乾不勞尺箠下榆
關正可丸泥封却歸故里訪遺老應記山陰九十翁

雨夜

麥熟家家喜墮涎龜堂依舊突無煙雨中更覺凄涼

甚一點殘燈守蠹編

小橋

漠漠輕陰隱隱雷石榴半落點莓苔小橋西北闌干
角獨岸綸巾待雨來

自笑

三間茅屋寄滄浪鳥出樊籠馬脫韁灑灑陂塘秋水
滿陰陰門巷麥風涼蔬盤旋采溪毛滑篷艇新編露
箸香捐盡浮名方自喜一生枉是伴人忙

入梅

微雨輕雲已入梅石榴萱艸一時開碑償宿諾淮僧
去卷錄新詩蜀使回墨試小螺看斗碗茶分細乳玩
毫杯客來莫謂兒嬉事九陌紅塵更可哀

雨夜

小雨收仍落孤燈翳復明衰殘書易忘憂患夢多驚
熠熠螢矜暗翻翻雀轉更閉門行老死亦足慰平生

燕

初見梁間牖戶新銜泥已復哺雛頻只愁去遠歸來
晚不怕飛低打著人

午枕

茅簷一杯淡藜粥有底工夫希鼎錄書中至味人不
知雋永無窮勝梁肉老夫享此七十年每媿天公賦
予偏清泉洗醮煎山茗滿榻松風清晝眠

項里觀楊梅

山前五月楊梅市溪上千年項羽祠小繼輕輿不辭
遠年年來及貢梅時 鄉俗謂楊梅止曰梅

又

隔歲租園不計錢楊梅海裏過年年癡人只競閑名
利那信三山是地仙

又

溪流曲曲樹陰陰人語煙中覺塢深把定山僧同一
笑明年強健更相尋

又

山中戶戶作梅忙火齊飄珠入帝鄉細織筠籠相映發華清虛說荔枝筐鄉俗謂選擇楊梅為作梅

夜歸

城角傳三弄桑村喜獨歸雨多螢滿野徑狹露沾衣食儉鹽醃薄年衰氣力微青燈對兒女撫事一歎欷五月十一日睡起

病眼慵於世事開虛堂高臥謝氛埃簾櫳無影響雲起草樹有聲知雨來茶碗嫩湯初得乳香篝微火未成灰偷然自適君知否一枕清風又過梅

示客

世間可笑走踐踈誤認虛空作汝身已覓餘名潤枯骨更謀厚積遺何人風旛畢竟非心境瓦礫何妨是道真新藕出泥瓜上市為君一醉墮紗巾

雨中作

雨聲一滴不肯住客夢欲成還自驚白水陂邊破茅屋亂書堆裏老儒生出行豈復有流輩未死尚能躬釣耕十日無魚亦何歎新菰幸可配吳杭旬日來溪水泛溢魚不可得

舟中遣興

湖海渺雲濤浮家得養高方牀展斬簞短褐束鄖條酒裏亦何好人間聊可逃酣歌掩樓底萬事一秋豪

自嘲

少讀詩書陋漢唐莫年身世寄農桑騎驢兩腳欲到地愛酒一樽常在傍老去形容雖變改醉來意氣尚軒昂太行王屋何由動堪笑愚公不自量

韻

成童入鄉校諸老席函丈堂堂韓有功英概今可想

從父有彥遠早以直自養始終臨川學力守非有黨紛紛名佻師有泚在其類二公生氣存千載可畏仰

又

士生學六經是為聖人徒處當師顏原出當致唐虞

斯文陣堂堂臨敵獨援枹異端滿天下一掃可使無乃知立事功先要定規模彼雖力移山安能奪匹夫

又

公議在天下如人有元氣平居失護養一日可勝諱神丹卒難求百疾起如蠅奄奄息僅屬熟視吁可畏大義在春秋遺跡悲漢魏君看徐孺子底物視富貴

又

昔我自蜀歸耆舊已凋喪後來二三公尚慰天下望千里一紙書慰勳問亡恙嗚呼亦已矣遺語寄悲愴我亦迫桑榆便恐無輩行夜窗對青燈力憊心尚壯

又

餘齡垂八十雖憊猶強飯正如老病馬風沙時一噴玉關眇何許道里何啻萬目中埃歷歷欲進不能寸矯首望秋空徒羨霜鶴健薤骨亦何悲吾非麒麟楮

又

琅琅誦詩書尚記兩髦髡誰料七十年沉滯終坎壈炊突映茅廬日莫煙慘慘忍窮端已熟撫事空自感狂言悔噬臍衆皆驚破膽尚有愛書心還如嗜菖歎

又

去國已酉冬忽見十頰歷衰殘口兩齒困阮家四壁時看溪雲生飽聽簷雨滴悠然度寒暑何處著欣戚幽人豈知我月夕聞吹笛何當五百歲相與摩銅狄

又

湖中風月佳時每聞笛聲異甚莫知何人意其隱君子也

又

扁舟東下破日月去若飛當時筆硯舊久已晨星稀俊逸如伯渾簡詣如知幾天高鬼神惡回首萬事非我欲泝黃牛買屋居青衣九原不可作哀哉誰與歸

又

荷鉏艸堂東藝花二百株春風一朝來白白兼朱朱南列紅薇屏北界綠芊區偃蹇雙松老森聳萬竹隴餘地不忍蒔插援引甌壺何當拂東絹畫作山園圖

又

閑居寂無客柴門晝常關孤舟小於葉放浪煙水間
樹暗楊梅村露下白蓮灣釣魚樵風涇買酒石帆山
向來支許輩恐亦無此閑道逢若耶叟握手開蒼顏
夏五月方閑雨忽大風雨三日未止

海風一夕狂拔木山雨三朝猛穿屋向來望雲眼欲
枯雨甚還憂敗嘉穀今年旱勢連吳中吾州乃獨勞
神龍稽首龍公要斟酌收雲歸山水歸壑

五月晝晦天欲雨街中人面不相覩風聲撼山翻怒
濤雨點飛空射強弩一雨三日姑可休龍其玩珠歸
故湫千里連雲慶多稼牲肥酒香作秋社

外物元知等一塵浮生何事最關身江山好處得新
句風月佳時逢故人有酒一樽聊自適藏書萬卷未
爲貧聖賢自古無如命君看居東與在陳

老向人間怯路岐感今懷昔不勝悲詩無傑思知才
盡酒有殘杯覺氣衰縣郭燈疎尋店夜津亭雨細待
船時筋骸尚給春耕在便買烏犍亦未遲

六月一日曉賦
視夜明星高蟬聲滿庭樹殘骸幸差健散髮穿兩屨
巖扉手自開曳杖得徐步碧瓦浮青煙圓荷瀉殘露
艸木無俗姿雞犬共幽趣兒來問晨炊一笑揮使去

露坐
冷泠野水赴橫塘坐久松風入髮涼月淡星疎天欲
曉未妨清嘯倚胡牀

夜賦
月暈知將雨風聲報近秋暗廊行熠燿深樹嘯僞鷗
老幸傳家事狂猶爲國憂相齊雖已矣且復飯吾牛

乙夜納涼
幽人新製葛衣成二寸藤冠覺髮輕淨掃中庭延月
色緩拖拄杖聽蟬聲微涼便欲疎紈扇小醉何妨倒

玉罌八尺風漪真美睡故應高枕到窗明

五鼓

夢斷華胥夜艾時遶廊蕭蕭散曳筇杖長空漸見明河
落短調猶殘畫角吹世事又隨朝日出釣船莫負早
秋期南湖五畝新菰熟此味惟應老子知

老態

齒如強留客雖住無久理目如新募兵臨敵烏可使
齒廢疎梁肉目澀屏書史浮世真幾何老態遽如此
毀粥習安坐用短亦自喜作詩記吾衰聊用調釋子
枕上聞風鈴

毒暑今年倍故常蟲聲四合欲昇牀老人不辦搖團
扇靜聽風鈴意已涼

又

流汗沾衣熱不勝饑蚊乘勢更縱橫夢回忽覺南風
起時聽鐸然一兩聲

寄贈湖中隱者

高標絕世不容親識面無由沉下鄰萬頃煙波鷗境
界九秋風露鶴精神子推綿上終身隱叔度顏回一
輩人無地得申牀下拜夜聞吹笛度煙津

觀畫山水

古北安西志未酬人間隨處送悠悠騎驢白帝城邊
雨挂席黃陵廟外秋大網截江魚可膾高樓臨路酒
如油老來無復當年快聊對丹青作臥遊

六月十八日立秋未日起行山園口占

北斗離離柄漸西披衣出戶聽晨雞豈惟蒲柳先搖
落坐覺風雲已慘悽斷簡不妨重料理清樽隨處可
提攜穿林莫惜衣露露爽徹靈臺勝寶犀

新秋

衰髮成絲奈若何更堪日月疾飛梭梧桐敗葉飄猶
少蟋蟀雕籠賣已多歲樂喧呼沽酒市夜涼悽斷采
菱歌老夫亦動秋風興欲倩鄰翁買釣蓑

晨起自山園歸書室

世事苦紛紛村墟寂不聞穿林拾蟬蛻隔浦數鷗羣
搖落初飄葉高春未散雲歸來書滿眼猶足肆吾勤

初秋小雨

雨來一洗肺肝熱風過遠吹禾黍香誰識山翁歡喜
處短檠燈火夜初長

出遊

舉世誰能伴我閑出遊隨處一開顏繫船扛鼎將軍
廟秣蹇流觴內史山小市况經搖落後高城回望莽
蒼間歸來燈火湖塘晚指點柴門未上關

對酒

平生但信緣作計每不審春炊官倉粟一飽輒甘寢
二年棄微祿溝壑方懷懷藜羹闕鹽酪豆飯雜沙珍
偶然餓不死得酒猶痛飲振回灑灑極喚省邯鄲枕
自勉

新涼

曩歲讀隱書妄意慕陶葛芝房及乳石日夜躬采掇
飛舉固未能死籍或可脫那知事大謬髮齒將禿豁
神僊豈棄汝正坐自迂闊餘年尚努力勿待燭見跋
初卷含風入尺滿井桐已復不禁吹蟬聲未用催殘
日最愛新涼滿袖時

醉中題民家壁

壯歲羈遊厭故棲莫年却愛艸堂低交情最向貧中
見世事常於醉後齊松吹颼颼涼短髮芒屨策策響
新泥吾詩戲用寒山例小市人家到處題

秋景

雨泣蘋花老風搖稗穗長昏林喧宿鳥秋院咽啼螢
舊學成迂闊初心墮渺茫頽齡尚餘幾誰與問蒼蒼
舟中作

會稽城上角鳴鳴日落煙村暝欲無千載虛名笑張
翰一官元不直尊鱸

雜興

足弱僅能行齒搖常欲墮扶持賴藥物苟幸一日過

事來強訓答其實惟欲臥平生許文休歲晚依馬磨

又

蘭臺遺漆書汲冢收竹簡辛勤萬卷讀不負百年眼
圍座浩縱橫插架高巉崕一笑顧吾兒銀艾何足結

又

壽年本偶爾亦與富貴同一日復一日遂作八十翁

几杖稱大耋貂蟬號三公信手忽成盧孰為拙與工

又

少年豈知酒借醉以作狂中年狂已歇始覺酒味長
湛湛癭樽綠酌以紅螺觴醒醉不可名兀坐萬事忘

自詠閑適

殘年鄰曲幸相依真似遼天老鶴歸荷浦未疎魚正
美鄉俗謂夏秋魚為荷葉下魚豆畦欲暗雉初肥款門路
近時看竹送酒人多不典衣最喜夕陽閑望處數家
垣屋鎖煙霏

近村莫歸

莫笑山翁雪鬢繁歸休幸出上恩寬鸞樽恰受三升
醞龜屋新裁二寸冠鸞樽即皮囊美所云詞陵樽也予近以龜
殼作冠高二寸許僧閣鸞茶同淡話漁舟投釣卜清歡
還家欲作諸孫贈村路纍纍柿未丹

秋興

扶衰又見素秋過未死其如造物何破屋頽垣那敢
議濁醪麪飯已為多佩刀但可償黃犢作字安能博
白鵝龜紫拜思如夢寐殘年其實一漁蓑

讀史有感

不肯低頭就世事亦不作牋與天公惟須痛飲以醉
死亂山深處聽松風

又

昔人識不過十字富貴封侯渠自如龜堂閉門萬卷
讀一字不肯供時須

又

蘇門長嘯不可親鹿門采藥更絕塵老死故山雖自

許掩書未免媿斯人

劍南詩稿卷第四十三終

劍南詩稿目錄
卷第四十四

讀何斯舉黃州秋居雜詠次其韻十首 讀蘇叔黨汝州北山雜詩次其韻十首 新治火閣

枕上作二首 初睡起有作 示友 述懷 枕上三首 病足久敗遊山之興山中道人

多見問戲作示之 舟中作 追懷胡基仲 十月八日九日連夕雷雨 西村 感事示兒

孫 或遺木瓜有雙實者香甚戲作 十月 初晴 梅花五首 對酒戲詠 冬夜 冬晴

稍理舊學有感于懷 葺小圃及東齋 讀經 示兒子 出遊不果 夢行秦晉間有作 聞

雞鳴自警 嘲子聿 馬上口占 幽居 感 事 初寒 寄題季長飾菴 對食書媿 戲

題酒家壁三首 十月二十八日夜風雨大作 夜寒燃火有感 農事休小葺東園十韻

開東園路北至山脚因治路傍隙地雜植花州 六首 連日治圃至山亭又作五字四首 寒

夜 掩卷有感 閒遊 野寺 三江 讀老 子 新泉絕句二首 風雨 題菴壁二首

讀僊書作 讀淵明詩 寒夜枕上 新晴出 門閒步 聞笛 鳴禽 食晚 午坐戲詠

戲詠鄉里食物示隣曲 歲莫貧甚戲作 汪 叔潛教授挽辭 汪給事太夫人程氏挽辭

太恭人諭氏挽辭 路乾 寒夜 乍晴至園 中

劍南詩稿卷第四十四

宋陸游務觀

讀何斯舉黃州秋居雜詠次其韻

造請非所長一帶每懶束緝客雖小殊亦未勝僕僕
正須駕柴車歸藝東籬菊故山甘水泉羣飲友麋鹿
百年不堪玩萬事要自燭小人欺屋漏吾輩當戒獨

少從長者遊聽聞聖人道日食雖一簞頗覺顏色好

辛勤五十年猶秉後凋操風俗日已移令人惡懷抱
紛紛堪一哈驕我以旗纛豈知江湖間世襲散人號

全家寄舸艤結茅非始謀江市得煙蓑不博千金裘

道散俗日薄老聃出衰周治身去健羨如稼必去蠹
吾身一隙塵斯世一客郵君能通其說生死真浮休

衆星麗長空惟月最爲傑我我大圓鏡粲粲白玉珠

穿林散珠璣入戶凜霜雪世方喜繁華我獨慘不悅
清光真可支肝肺冰欲結彼哉市朝人忿忿生內熱

夜靜我欲歌四座且勿喧堯舜本得道富貴何足捐

聖人久不作學者墮語言著書各專門百家散如煙
一身有不知况察魚與鳶安得天下士相與明忘筌

古人處丘園如彼不嫁女終身秉大節敢恨老環堵

嗟予晚乃覺乞骸歸卒伍去就講已熟穴居宜知雨
百尺持汲綆道長畏天暑先見雖有慚愛身亦自許

賦性本剛褊直欲棲深山晚乃稍悔悟自恨不少寬

胡越本一家禍福環無端少忍萬事畢孰爲熱與寒
我文爲我言冠蓋滿長安人人不如君八十猶朱顏

倚牆有鋤耰當戶有杼軸雖云生產薄桑麻亦滿目

況承先人教藏書令汝讀求仁固不遠所要念念熟
喟然語兒子勿媿藜藿腹亦勿慕虛名守此不啻足

人生天壤間出處本異趣釋未入市朝徒失邯鄲步

昔人亦有言刻足以適屨奈何不自反忽已迫霜露
我躬尚不閱况爲子孫慮歲晚故山寒地爐可煨芋

少年去國時不忍輕出晝晚歸補省郎但覺慚列宿

人豈不自揣幸矣老雲岫知止詎敢希要且避嘲詬
誰將有限身遺臭古今宙人誅雖或逃陰陽將汝寇

讀蘇叔黨汝州北山雜詩次其韻

暑耘日炙背寒耕泥沒腳衆人占膏腴我獨治磽确
力盡功未見厥土但如昨豈惟窘糠粃直恐轉溝壑
今年雨暘時天如相耕穫屋傾未暇扶且復補籬落

舊絮補破襦生薪續微火憚孤有凍死自視亦已過

鄰翁冒風雪斗酒持飲我尖團擘霜蟹丹漆釘山果
欣然共笑語何止寬寒餓布被擁更闌招魂不須些

三山鏡湖上出郭無十里結廬非所擇但取便薪水

間亦出從宦安能慕園綺地主卜林塘亦復異子美
蘧蔭方丈室僅足容臥起吾意本扁舟陸居聊爾耳

祠官粟一囊不贍軀七赤前年蒙寬恩例許乞骸骨

聯翩三兒子俱作鶴雀碧賦祿雖尚遠亦足慰衰白
幅巾茆簷下稱病謝來客從今門前路永掃車馬迹

舍北有漁磯下臨清溪流柳陰出朱橋蓮浦橫蘭舟
蓴絲二三畝采掇供晨羞魚蝦雖瑣細亦足贍吾州
人生常如此安用萬戶侯綠蓑幸可買金印非所求

寓形百年中如臂屈伸頃少壯幾何時已復墮衰境

老人喜自潔臨澗漱綠淨佛龕香事已備鉢供煮羹
山茶試芳嫩野果薦甘冷不學萬錢厨長魚取淮頴

巖石著幼與風月思玄度老子放浪心常恐迫遲莫
安得世人握手相與語吾宗甫里公奇辭賦漁具

高風邈不嗣徒有吟諷苦霜風吹短衣何山不堪住

久病臥江村髮白面鰲黑艱難念温飽日夜積涓滴
聚壤糞園桑荷鋤耘壟麥苟失一日勤農事深可惜

小兒念乃翁卒歲共欣戚歧望明年春社雨泥一赤

德孫秀眉宇慨然修初服枯腸貯詩書十飯九不肉
成童將覓舉想見袍立鶴先澤儻未衰豈無五秉粟

汝能記吾言併以告阿福閉門勿雜交一經萬事足

吾幼從父師所患經不明何嘗效侯喜欲取能詩聲
亦豈劉隋州五字矜長城秋雨短檠夜掉頭費經營

區區宇宙間捨重取所輕此身儻未死仁義尚力行

新治火閣
老子今朝喜有餘房樞新舉得安居爐紅氍毹暖不出
戶木落窗明常讀書浮蟻撇嘗人散後躡鴟煨熟雪

飛初頽然自適還終日殊勝隆中臥草廬

枕上作
無地容錐四壁空浩然亦未愴途窮夢回倦枕燈殘
後詩在空壻雨滴中徂歲易成雙鬢禿故人難復一

樽同唐安萬里音塵絕誰為寒沙問斷鴻
張季長今年
尙未通書

又
蕭蕭白髮臥扁舟死盡中朝舊輩流萬里關河孤枕
夢五更風雨四山秋鄭虔自笑窮耽酒李廣何妨老

不侯猶有少年風味在吳棧著句寫清愁
初睡起有作

嗷嗷曉雞鳴迢迢殘漏聲撥衾幽夢斷寒幌小窗明
嶽婢簪衣暖山童擁篲行老夫徐下榻負火聽餅笙

示友
道向虛中得文從實處工凌空一鷲上赴海百川東

氣骨真當勉規模不必同人生易衰老君等勿忽忽
述懷

宦遊輕用不貲身斂退今為省事人唾俟面乾元不
投羹憂手爛更誰嗔時分鄰瓮雙瓶綠見張石史詩承

謝官倉五斗陳最好莫秋溪上路柴門月色向人新
枕上

殘燈熠燿露螢明落葉蕭蕭寒雨聲堪笑衰翁睡眠
少小詩常向此時成

又
斷香猶在夢初回燈似孤螢闔復開怪底詩情清徹
骨數聲新鴈枕邊來

病足久敗遊山之興山中道人多見問戲作示
之

佛北公那有力移山買來芒屨真虛費扶上籃輿亦
漸艱積有春陵數峯在虛窗高臥看孱顏

舟中作
三百里湖新月時放翁艇子出尋詩城頭蜃閣煙將

合波面虹橋柳未衰漁唱蒼茫連禹穴寒潮蕭瑟過
娥祠祖龍虛負求僊意身到蓬萊却不知

追懷胡基仲墓在雲門顯聖寺後
高潔胡徵士當時已絕無門庭謝殘客薪水斥常奴

遺稿何由見英魂不可呼誰憐墓上艸又是一年枯
十月八日九日連夕雷雨

雨聲聒耳不停點雲氣冒山殊未開敢恨終年惟短
褐但驚十月有奔雷牽蘿且復補茆屋飯豆何妨羹

芋魁莫笑賦詩無傑句年來萬事學低摧

西村

今年四月天初暑買蓑曾向西村去桑麻滿野陂水深遙望人家不知路再來桑落陂無水閉門但見炊煙起疑是義黃上古民又恐種桃來避秦

感事示兒孫

人生讀書本餘事惟要閉門修孝悌畜豚種菜養父兄此風乃可傳百世我聞長安官道傍至今人指魏公莊北方俗厚終可憲一字不識勤耕桑長安有魏鄭公舊莊裔孫皆力耕無識字者張芸叟嘗過之

或遺木瓜有雙實者香甚戲作

宣城繡瓜有奇香偶得並蒂置枕傍六根互用亦何常我以鼻嗅代舌嘗

十月

十月霜侵季子裘吾詩又送一年秋風回斷續聞樵唱木落參差見寺樓久已浮雲看富貴固應華屋等山丘江邊海際多幽致擬跨青驪處處遊

初晴

袖手東窗初日明殘編未負老書生不勝多病畏寒雨正得一霜方快晴客戶餉羹提赤鯉莊戶以難魚之屬來餉謂之送羹鄰家借碓擣新秬柴荆莫怪無車馬恰要無人識姓名

梅花

造物作梅花毫髮無遺恨楚人稱芳蘭細看終不近

又

五年作竹梢十年作梅枝九泉子廉子此語今誰知

又

廉宣仲自言以五年之功作竹梢十年之功作梅枝

又

欲與梅為友常憂不稱渠從今斷火食飲水讀僊書

又

春信今年早江頭昨夜寒已教清徹骨更向月中看

江上梅花吐山頭霜月明摩挲古藤杖三友可同盟

對酒戲詠

幾傾西國蒲萄酒小嚼南州豆蔻花更拂烏絲寫新句此翁可惜老天涯

冬夜

北斗挂屋角西風驚雁羣山寒歲云莫人靜夜中分酒滴槽牀雨香生紙帳雲眼花書課減舊學失鋤耜

冬晴稍理舊學有感于懷

天公元不吝光陰付與書生遂本心老已為民猶學問向雖作吏半山林百年斷稿傳三世一日晴窗抵萬金努力更思懷道術酒杯雖把不須深

葺小圃及東齋

山翁作園沼安樂及禽魚凡艸猶當養芳蘭可得鋤初非治一室亦豈愛吾廬莫境雖云迫心期故有餘

讀經示兒子

通經本訓詁講字極聲形未盡寸心苦已銷雙鬢青懼如臨戰陣敬若在朝廷此是吾家事兒曹要細聽

出遊不果

天柱峯前水亂流石棋渡口葉飛秋青鞵已是前身事縱有籃輿亦懶遊

夢行秦晉間有作

夜店紬衾暖晨厨粟飯香驢肩雙酒榼童背一琴囊冰坼河聲壯郊平塔影長古今均夢境不用弔興亡

聞雞鳴自警

為善孳孳進德新雞鳴每念舜何人此身強健直須勉一日會當無此身

嘲子聿

講誦多吳語鉤提學佐書夜分燈未徹晨起髮慵梳飽食園官菜少留溪友魚能憐乃翁病身自舉籃輿

馬上口占

大耋光陰豈自期即今堪喜亦堪悲關河隔絕初心負憂患侵尋舊學衰羸馬涉溪孤店路栖鴉滿樹曉

霜時憑鞍殘夢悠然覺又得浮生一首詩

幽居

莫笑茅茨陋岡形接臥龍連娟鏡湖月縹渺寶林鐘
閑約魚池釣眠聽確舍春他年好事客過此訪遺蹤

感事

陋巷何須歎一瓢朱門能守亦寥寥衲衣先世曾調

鼎野褐家聲本珥貂若悟死生均露電未應富貴勝
漁樵千年回首俱陳迹不向杯中何處消 沈義倫丞相
裔孫為僧劉仁贍侍中裔孫為道人皆孤身死紹興中二公之後遂絕

初寒

逐祿天涯半此生明時寬大許歸耕山圍魚市寒無
色兩掠蓬窗夜有聲白髮青燈身潦倒殘蕪落葉歲

崢嶸爾來有喜君知否買得烏健萬事輕

寄題季長飾菴

近詔還中祕新文記飾菴主盥君勿讓賈勇我何堪
木落山容瘦雲齊雪意酣何由共杯酒把蟹擘黃甘

對食書媿

連年寬水旱天若相懸車羸有芋魁豆併忘熊掌魚
先生飯不足賢者食無餘老我知何幸晨盤厭美蔬

戲題酒家壁

漫道江南倚寺樓豈如煙雨弄扁舟并刀不翦清愁
斷楚練難縻白日留湖上采菰甘似蜜街頭買酒滑

如油金丹九轉何時畢且對梅花一醉休

又

送了春歸又送秋人間隨處寄悠悠百年此際成遺
老萬里當時賦遠遊筆力日衰懶障馬江天歲晚狎

冥鷗清狂自笑無時歇又犯新寒上市樓

又

朋舊存亡寂不聞年年江海愴離羣時平酒價賤如
水病起老身閑似雲飽食每慚荒舊學後生誰可付

斯文案頭清鏡塵昏盡殘髮知添白幾分子老甚髮乃
有未白者

十月二十八日夜風雨大作

風怒欲拔木雨暴欲掀屋風聲翻海濤雨點墮車軸

拄門那敢開吹火不得燭豈惟漲溝谿勢已卷平陸
辛勤藝宿麥所望明年熟一飽正自難五窮故相逐

南鄰更可念布被冬未贖明朝甑復空母子相持哭

夜寒燃火有感

隋菓拾槁枝微火吹孤螢風火一相得須臾細煙青
暖焰遂騰上凜冽回玄冥君看金鼎火其初亦熒熒

至理存橐籥奇功挾風霆笑談縛三彭指顧役六丁
超然出塵世豈獨制頽齡勸君勿虛死萬過誦黃庭

農事休小葺東園十韻

歸老心常逸新寒體亦康幸當農事隙稍治舊園荒
翦闢西山出磔回北徑長作欄扶弱蔓換土植孤芳

霜霰貧筥碧風煙薛荔蒼蝶來翻小翅鳥下轉幽吭
疏剔巖泉集耘鋤藥草香溪藤栽酒榼番錦製詩囊

坐久雲生石歸遲月滿廊人間胡不樂披宅笑君房
開東園路北至山脚因沿路傍隙地雜植花艸

清溝東畔翦葦菅雖設柴門盡日關遠引寒泉成碧
沼稍通密竹露青山幽花泣露開仍落好鳥穿林去

復還更上橫岡吾所愛小兒試覓屋三間

又

魏野林逋久已僂放翁寄傲鏡湖邊松根偃蹇支琴
石巖竇潺湲洗藥泉半祿掃空雖在我殘年健甚豈

非天遙遙桑芋家風在重補茶經又一編

又

憶自南昌返故鄉移家來就鏡湖涼鶴雛養得冲霄
漢松樹看成任棟梁手版永拋貧亦樂肩輿時上老

何妨乎郊東望江城近隱隱清笳送夕陽

又

父子追隨一笑傾東園東畔路初成夾栽芳艸如繩
直前出籬門似砥平春近野梅香欲動雨餘溝水細

無聲今朝有意誰能識不用人扶亦自行

又
病眼逢人每懶開正須此地洗氛埃數枝梅向林梢
出一脈泉從嶺背來藤杖有時緣石磴風爐隨處置
茶杯殘軀自笑如春艸又喜天邊斗柄回

又
避俗從來恨不深家園栽種偶成陰西連幾曲菖蒲
澗東接無窮蒼蘆林鳥柏谷寒迎野步金沙泉冷洗
塵襟清音可寫吾詩拙它日君來試抱琴

連日治圃至山亭又作五字
雜圃課僮奴爭前不待呼水泉經雨壯蓁莽得霜枯
高樹鳴雙鶻清池下兩鳧莫年惟樂此餘念一毫無

又
富貴尋常事天奚獨汝慳十分教懶拙百倍與清閑
放鶴雲千頃釣魚溪一灣此詩雖信筆它日不須刪

又
好竹千竿翠新泉一勺冰殘蕪襯落日老木上寒藤
細磴歌難過危欄曲可憑歸時忽已暮點點數漁燈

又
門開度略約路盡上坡陀農隙閑耕犢樵歸起醉歌
青煙舞鸞鳳白石伏龍龜剩有筇杖與窮冬氣已和

寒夜
敗屋頽垣對短檠課書聊自限三更蕭條艸木寒無
色寒窸狐狸出有聲半榼濁醪求火暖一篇疑義與
兒評未須遽起窮愁數明日尋梅雪正晴

掩卷有感
少年雖讀書每恨性疎懶中年頗自勵已數歲月短
學不到聖賢此意終未滿甌空不憂飢衣垢不思浣
區區管晏事端可付一莞羸然八十翁風雪臥空館

閑遊
出雜羊牛牧歸隨鳥雀栖聊持數匙飯就乞半盂齋
浩蕩凌原野崎嶇歷澗溪閑遊豈不好客意自淒淒
野寺

閑行入野寺僧飯鼓其鏗慘慘風勢面暉暉日滿廊
去來元自在賓主兩相忘却下山坡路樵歌出隴長

三江
三江郡東北古戍鬱嵯峩漁子舫浮葉更人鼓應鼙
年豐坊酒賤盜息海商多老我無豪思悠然寄醉歌
讀老子

放翁晨興坐龜堂古銅匾燒海南香臨目接手精思
牀身如槁木心如牆八十一章獨置傍徐起開讀聲
琅琅恍然親見古伯陽袂屬關尹肩庚桑孰能試之
出毫芒未俗可復躋羲黃陰符偽書實荒唐稚川金
丹空有方人生忽如瓦上霜勿恃強健輕年光
新泉絕句二首

風雨
掃石蔭雙松岸巾穿萬竹爾來又一奇巖泉寒可掬
剽泉可淪茗就泉可洗藥楚人曾未知但謂纓可濯

七十年來樂太平白頭父子事春耕因思世事悲身
事更聽風聲雜雨聲四海故人強半死一襟清淚對
誰傾新春要覓燒丹處不住青城住赤城

題菴壁
萬壘青山繞鏡湖數椽自愛野人居風來松度龍吟
曲雨過庭餘鳥迹書小疾不妨尋酒去豐年偶及挂
冠初有金可散還多事四壁蕭然計未疎

又
衰髮蕭疎雪滿巾君恩乞與自由身身并猿鶴爲三
友家託煙波作四隣十日風號未成雪一年梅發又
催春漁舟底用勤相覓本避浮名不避人

讀僊書作
與世已如風馬牛松風終日聽鸞鷗一爐丹熟定不
死半盃酒香安得愁腰帶鞞前秋萬頃香爐峯下水
交流人間事事皆須命惟有神仙可自求

讀淵明詩
淵明甫六十遽覺前途在作詩頗感慨自謂當去客

吾年久過此霜雪紛滿曠豈惟僕整駕已迫牛負輓
奈何不少警玩此白駒隙傾身事詩酒廢日弄泉石
梅花何預汝一笑從渠索顧以有限身兒戲作無益
一牀寬有餘虛室自生白要當棄百事言從老聃役

寒夜枕上

屋老霜寒睡不成迢迢漏鼓過三更烏啼林外月初
上犬吠水邊船夜行市有歌呼知歲樂亭無袍鼓喜
時平吾詩欲寫還慵起臥看殘燈翳復明

新晴出門閑步

一夜風號作快晴披裘扶杖出門行青山繞舍雪封
盡丹葉滿街霜染成廢寺僧寒多晏起近村農情闕
冬耕窮人旋畫膨脝計自買蹲鴟煮糝羹

聞笛

雪飛數片又成晴透瓦清霜伴月明一曲忽聞高士
笛臨窗和以讀書聲

鳴禽

小徑霜泥結凍時幽人十日廢筇枝新晴池館春來
早簾外鳴禽聖得知

食晚

日高得米喚兒春苦雨園蔬久闕供省事家風君看
取半飢半飽過殘冬

午坐戲詠

貯藥葫蘆二寸黃煎茶橄欖一甌香午窗坐穩摩癢
腹始覺龜堂白日長

戲詠鄉里食物示隣曲

山陰古稱小蓬萊青山萬疊環樓臺不惟人物富名
勝所至地產皆奇瓊茗芽落磴壓北苑藥苗入饌逾
天台明珠百舸載芡實火齊千擔裝楊梅湘湖蓴長
涎正滑秦望蕨生拳未開箭萌蟄藏待時雨桑草茵
蠶驚春雷櫻花蒸黃蘗醬薑茁披剝醃糟醅細研
嬰粟具湯液溼裹山蕨供炮煨老饒自覺筆力短得
一忘十真堪哈從今置之勿復道一瓢陋巷師顏回

歲莫貧甚戲作

得米還求潤底薪始知天地有窮人年開八秩寧餘
死官及三兒不救貧藥盡無如醫偃寒囊空那辦酒
凌巡柳條萱艸添愁思不似尋常見早春

汪叔潛教授挽辭

江南有奇士英譽早飛騰未見心先契相從氣倍增
時煩問字酒屢共讀書燈下榻延徐孺同舟得李膺
百年期永好一旦失良朋稚子初何取龍門亦許登
流光疾於鳥舊社冷如冰欲作千言誄衰遲愧未能
汪給事太夫人程氏挽辭 夫人內外二族享壽八九

十者至二十餘人

爵邑恩榮盛鄉閭譽望尊儒科傳累葉上壽萃高門
阡茂新栽柏堂餘舊樹萱故民何以報沾灑望秋原
太恭人諭氏挽辭 恭人生於紹聖二年沒於慶元六年

壽九十六自太孺人至太恭人皆特恩封

耄齒人誰及高門世共榮始終膺備福穉老遇昇平
綸綍褒嘉事鄉閭惻愴情吾詩儻傳世亦足見平生
路乾

日曬霜融步步泥旬餘不到石泉西連朝和暖得乾
路喚取鄰翁來杖藜

寒夜

閉戶歲云莫翻書夜向闌足僵知火盡目鈍覺燈殘
躍浦魚驚顛穿林犬逐獾三年納徵祿無媿得心安
乍晴至園中

藥笈漁竿每自隨枯筇短帽恰相宜投林但有窮猿
喜伏樞元無老驥悲巖溜甘寒通碧沼野梅清絕隔
疎籬放翁老甚情懷懶那辦題詩寄所思

劍南詩稿卷第四十四終

劍南詩稿目錄
卷第四十五

十二月三日夜橋上看月 流年 山家五首
小舟白竹篷蓋保長所乘也偶借至近村戲
作二首 稻飯 殘臘二首 書志 數日不出門偶賦三首 寄題嚴居厚伴釣軒 寄趙昌甫并簡徐斯遠 南園觀梅 老身 獨處 醉中歌 排悶 庚申十二月二十一日西和州健步持子布書報已取安康襄陽路將至九江矣悲喜交懷作長句二首 園中作 足疾 歲莫書懷二首 除夜 修路 金丹 平昔 二月三日春色粲然步至湖上 計子布歸程已過新安入畿縣界 東園觀梅 喜得建茶 春雨 春雨二首 初春感事二事 道室書事 先少師宣和初有贈晁公以道詩云奴愛才如蕭穎士婢知詩似鄭康成晁公大愛賞今逸全篇偶讀晁公文集泣而足之 春日雜題六首 春日賸甚戲作 春日 書室獨夜 追感往事五首 書意二首 清都行有序 春來食不繼戲作 紹興辛酉子年十七矣距今已六十年追感舊事作絕句 獨坐視老奴灌園 雨晴風日絕佳徙倚門外三首 ●春遊 春雨三首 書懷 三月十六日至柯橋迎子布東還二首 題施武子所藏楊補之梅 食野菜二首 予十許歲卽往來雲門諸山今復與諸子來追念悽然 雲門道中 龍瑞 禹寺 寄題張仲欽左司槃澗 園中晚興 送陳希周赴安福令 春晚久雨排悶 甲子日晴 三月二十日兒輩出謁孤坐北窗二首 春盡記可喜數事 立夏前二日 作 老民二首 貧甚自勵 衡門 遊法雲舟中作 貧居 初夏野興三首

劍南詩稿卷第四十五

宋陸游務觀

十二月三日夜橋上看月
常時新月有無間今夕清輝抵半環柳外橋高最堪
望憑欄目送下西山

流年

流年及老敢前期浮世如漚只自知多貯閑愁持抵
酒剩遊好景擬供詩海東藥到寬衰疾屢下書稀恰
別離陳明州鮑人參張季長久不得書約束春盤莫艸艸又
當梅發兩京時

山家

風月寬閑地溪山隱遯身雲邊安井臼竹裏過比鄰
洗水分巖瀑烹芝束糶薪柴門敲不應疑是避秦人

又

種藥為生業彈琴悅性靈中宵煑白石平日誦黃庭
茶熟眠初起兒扶酒半醒意行無定處猿鳥共忘形

又

長生固非道得道自長生書不傳關尹言誰契廣成
羅浮觀日出句曲聽松聲聞說長安好何妨醉太平

又

陶葛金丹訣千年秘不傳人皆肖天地世豈乏神仙
擾擾生趨死悠悠食復眠微言誰復領浩歎撫遺編

又

清絕更誰如松風小閣虛穩巾參几杖鶴羸落琴書
新鑿淘丹井常攜斷藥鉏身閑隨處樂何況是吾廬

又

小舟白竹篷蓋係長所乘也偶借至近村戲作
茅簷細雨溼炊煙江路清寒欲雪天不愛相公金絡
馬羨他亭長白篷船

又

雪雲無際暗長空小市孤村禹廟東一段荒寒端可

晝白篷籠底白頭翁

稻飯

買得烏犍過歲穰此身永免屬官倉塘南塘北九千
頃八月村村稻飯香鏡湖下至海凡種稻九千頃

殘臘

殘臘無多寒漸薄新春已近日微長棋枰散後軒窗
靜梅塢歸來襟袖香海霧籠山青淡淡河堤猶水白
茫茫鷺飛前導生遊興笑岸綸巾上野航

又

殘臘去春纔十日衰翁告老已三年乳糜但喜分香
鉢銀勝那思映綵鞭萬里當時嗟漫浪一窗此日困
沉綿清泉白石無人到且結梅花淡淡緣

書志

著書汗馬牛不如守道力賣文取卿相詎是儒者職
孔光豈不學千載汗簡冊通塞本細事于我奚失得
袁安臥空廬亦度風雪夕如何慕温飽撓節不自惜
我突無炊煙或至日中晷小兒抱遺經衣短兩脛赤
吟誦何琅琅聲如出金石掩卷語乃翁聖有陳蔡厄

數日不出門偶賦

衰甚身如作繭蠶經旬不省出茅菴老僧遣信分茶
串隱士敲門致酒甌看鶴松陰賞高潔疏泉石鍊得
清甘地偏心遠無車馬賴有吾兒與劇談

又

十二年來一日同飯蔬略似誦經翁居家不擬依鄰
富報國惟思祝歲豐冰澗乍通寒溜碧蘭叢新放露
芽紅閉門萬化俱觀盡那用瞿曇更說空

又

湖上蝸廬僅自容寸懷無奈百憂攻補衣未竟迫秋
露待飯不來聞午鐘稚子挾書勤質問鄰翁釋未間
過從今朝一笑君知否滿盃新醅粥面醲

寄題嚴居厚伴釣軒

人生有至樂莫若江湖中千錢買短船青箬織孤篷

潮生鼓棹去煙波浩無窮長歌送夕陽回首萬事空
伴釣君已奇我乃真釣翁君出羊裘家散人亦吾宗
一見即定交正以氣味同何時溪莊路共醉蘆花風
梁莊蓋居厚所居

寄趙昌甫并簡徐斯遠

我詩非大手我酒亦小戶得遊名勝間獨以用心苦
趙子乃宿士山立誰敢侮寓名祝融祠葦笠臥煙雨
高吟三千篇一字無塵土朱先少許可書每說昌甫
雖云忍飢瘦得喪亦相補嗟君與斯遠文中真二虎
我老日益衰想像氣如縷

南園觀梅

幽徑疎籬洗世塵眼明見此數枝新橫斜恰受三更
月璀璨先回萬物春洛浦凌波矜絕態巖山騎鶴想
前身放翁著句煩君記畫在生綃却未真

老身

老身無處著登望憶閑遊白浪浮天遠黃雲出塞秋
百年殊鼎鼎萬事只悠悠歲晚長亭路寒侵季子裘
獨處

老夫閉門衰疾嬰小兒適有南山行一奴入市莫未
返惜惜不聞烏雀鳴地爐火死凍腳硬欲作薄粥愁
空鎗平生遺日賴詩句久矣無復吟哦聲但餘一點
真正念照了萬象猶精明欲論此事向何許衆中倘
遇千人英

醉中歌

文章日益近衰陋風節久已嗟陵夷元祐大蘇逝不
返慶曆小范今誰知閉門學古人共笑低頭就俗我
却疑脫衣幸可買漁艇爛醉浩歌隨所之

排悶

人間歲月莽悠悠老大悲傷只涕流民饜糟糠寧細
事俗忘節義更深憂潦歸宿麥猶難望雲少同雲未
易求自歎此生真已矣且偷暇日弄孤舟

庚申十二月二十一日西和州健步持子布書

報已取安康襄陽路將至九江矣悲喜交懷作
長句

吳蜀相望萬里程征鞍忽報近澄城角巾已入三更
夢老眼先增十倍明告至徧為親舊問勞還深媿里
閭情追思二紀睽離事惠極翻成涕泗橫

又

萬里東來雙鯉魚衰翁悲喜得兒書聞過峴首已冬
至想到匡廬將歲除辛苦山行穿雪履淒涼旅飯嚼
冰蔬此行身歷艱難遍莫厭東臯共荷鋤

園中作

幽禽啼不去紅藥落還開意適時時醉身閑日日來
著書增水品披句覓橙栽消息吾兒近扶衰又上臺
子布約二月初到鄉里

足疾

足疾惟妨拜登臨故自如深知造物意遣遂此心初
東塢閑看竹西溪獨釣魚莫歸猶未倦把卷遶前除
歲莫書懷

世事從來不可常把茆猶幸得深藏牀頭酒食寒難
熟瓶裏梅花夜夜更香薄命元知等蟬翼畏途何處不
羊腸詩成讀罷仍無用聊滿山家骨董囊

又

憶昔初辭鷓鴣行慨然誓墓老耕桑蓼汀夜宿夢魂
爽梅塢莫歸襟袖香窮巷每多閑日月小兒時誦古
文章吾儕窮死從來事敢變胸中百鍊剛

除夜

守歲全家夜不眠杯槃狼藉向燈前相看更覺光陰
速笑語逡巡即隔年

修路

雨霖道壞困泥塗木石紛然賴里閭但使僅堪行便
足我無長戟與高車

金丹

子有金丹鍊即成人人各自具長生施行要使俗仁

壽收斂猶能心太平劇飲似鯨身不倦細書如蠅眼
常明更餘一事君難學富貴真同涕唾輕

平昔

平昔飄然林下僧更堪衰與病相乘殘年已任身生
死一念猶關道廢興皎皎初心質天地兢兢晚節昭
淵冰子孫勿厭藜羹薄此是吾家無盡燈

二月三日春色粲然步至湖上

不媿衰翁雪鬢新出門也復整烏巾梅花隔水香撩
客野鳥穿林語喚人長日難消惟泥酒災年不死又
違春吾兒已到新安未想掬清溪洗客塵子布度將至
新安

計子布歸程已過新安入畿縣界

憶昔初登下峽船一回望汝一凄然夢魂南北略萬
里人世短長無百年強遣老懷終兀兀忽聞歸騎已
翩翩今朝屈指無窮喜歷盡江山近日邊

東園觀梅

出世仙姝下艸堂高標肯學漢宮粧數苞冷藥愁渾
破一寸殘枝夢亦香問訊不嫌泥濘屐屐每到月
侵廊高樓吹角成何事只替詩人說斷腸

喜得建茶

玉食何由到艸萊重奩初喜拆封開雪霏庚嶺紅絲
磴乳泛閩溪綠地材舌本常留甘盡日鼻端無復甯
如雷故應不負朋遊意手挈風爐竹下來

春雨

細雨吞平野餘寒勒早春未增豪飲與先著苦吟身
幽徑萱芽短方橋柳色新閉門非爲老半世是閑人

春雨

擁被聽春雨殘燈一點青吾兒歸漸近何處宿長亭

又

湖上新春柳搖搖欲喚人多情今夜雨先洗馬蹄塵

初春感事

馬跡車聲是處忙經旬無客到龜堂水初泛溢黏天

綠梅欲飄零特地香世事紛紛人自老歲華冉冉日
初長百錢不辦旗亭醉空愛鷓鴣兒似酒黃

又

一樹紅梅已半殘破裘也復敵春寒忍窮過日却差
易負媿終身良獨難活火靜看茶鼎熟清泉自注研
池寬人生樂處君知否萬事當從心所安

道室書事

五十餘年讀道書老來所得定何如目光熠熠夜穿
帳胎髮青青晨映梳二事皆紀實甚畏蝮蛇寧斷手已
烹煎掌敢兼魚春蕪二畝扶犁去空憶高皇賜對初
先少師宣和初有贈晁公以道詩云奴愛才如
蕭穎士婢知詩似鄭康成晁公大愛賞今逸全

篇偶讀晁公文集泣而足之

仕不逢時勇退耕閉門自號景迂生遠聞佳士輒心
許老見異書猶眼明奴愛才如蕭穎士婢知詩似鄭
康成早孤遇事偏多感欲續殘章涕已傾

春日雜題

梅花三十本圍以疎竹籬入春甫十日開遍南北枝
少年輕節物老大復苦衰坐見零落盡一杯初未持

又

春雨路易乾雨止即可行梅花落無餘蘭芽亦已生
好鳥何山來向我飛復鳴行矣東郊路藉艸作清明

又

野水如棋枰所至各成村炊煙出茆屋碓聲隔柴門
樹陰同戲兒多已長子孫安居無暴斂何以報國恩

又

春陰不成雨正作卵色天花開路無塵楊柳搖輕煙
佳哉冷淘時槐芽雜豚肩長安墮胡虜況說野狐泉

又

客路行無窮漁唱聽不厭濤江西限吳雲岫南入剡

又

蹇驢過小市高柳擁孤店去去望前村鴉歸煙欲斂

蒲柳深復淡桃李白間紅東皇一稅駕萬物酣春風
煙村在何許小屏團扇中一笑喚稚子相扶上短篷

春日暄甚戲作

桃杏酣酣蜂蝶狂兒童相喚踏春陽老人自笑還多
事預恐明朝雨壞牆

春日

遲日園林嘗煮酒和風庭院眼新絲已過燕子穿簾
後又見鋼魚上市時排悶與兒聯小句破閑留客戰
枯棋幾年自覓安排處除却歸休總不宜

書室獨夜

忽忽新春過惜惜一室幽銅燈立雁趾石鼎揭龍頭
老媿人扶拜貧無食足謀退居消日月太半付莊周

追感往事

太平翁翁十九年紹興中禁中謂秦太師為太平翁翁父子
氣焰可熏天不如茅舍醉村酒日與鄰翁相枕眠

又

世事紛紛過眼新九衢依舊漲紅塵桃花夢破劉郎
老燕麥搖風別是春

又

渡江之初不暇給諸老文辭今尚傳六十年間日衰
靡此事安可付之天

又

文章光焰伏不起甚者自謂宗晚唐歐曾不生二蘇
死我欲痛哭天茫茫

又

諸公可歎善謀身誤國當時豈一秦不望夷吾出江
左新亭對泣亦無人

書意

我本三生世外人幻軀其實強冠巾稍能閉戶學種
菜時亦長歌行負薪一醉却非身外事百年終是冢
中塵君知夢境無根底莫信人言想與因

又

病眼猶堪閱世人難將雪鬢著烏巾囊中錢盡罷沽
酒澗底雨寒愁束薪老子那辭徙牛屋癡人自喜拜
車塵窮通要是兒嬉事懶就山僧講宿因

清都行有序

辛酉二月十四日夜雞初鳴夢與故人查元
章並轡行大道中前望宮闕甚壯麗元章言

吾輩當同預大議論予與約勿為身謀元章
拊掌稱善遂覺作清都行一首

積雨初收曉寒重野人忽作清都夢宮牆柳色綠如
染仰視修門岌飛動元章久已葬岷山安得翩翩並

馳鞚春光如昔交舊少肺肝欲寫誰堪共頗聞天閣
有疑事通明殿下方僉議約君切勿負初心天上人

間均一是

春來食不繼戲作

久臥窮閭困負薪何妨掃盡太倉陳瘦如飯顆吟詩
面飢似柴桑乞食身犧象未應殊斷木江湖底處有
窮鱗大冠長劍人看好不換茅簷一幅巾

紹興辛酉予年十七矣距今已六十年追感舊

事作絕句

常憶初年十七時朝朝烏帽出從師與許子威輩同從鮑
季和先生晨興必具帽帶而出忽逢寒食停供課正寫卷書
作質碑

獨坐視老奴灌園

東窗日晚獨愁予眼闌年來頗廢書賴有吾家老阿
對相從引水灌園蔬

雨晴風日絕佳徙倚門外

一雙芒屨伴筇枝不用兒扶自出嬉貪看南山雲百
變舍西溪上立多時

又

茶碾無端廢午眠杖藜信步到門前青裙溪女結蠶
卦白髮廟巫催社錢

又

章老三年病方死吳翁一夕呼不醒獨有此身頑似鐵倚門常看莫山青章吳皆隣人以去冬死

春遊

春風堤上艸萋萋艸軟沙平護馬蹄似蓋微雲纔障日如絲細雨不成泥千秋觀裏逢新燕九里山前聽午雞追憶舊遊愁滿眼絲船曾繫畫橋西

春雨

狼藉殘花滿地紅擁衾孤夢雨聲中人生十事九堪歎春色三分二已空但有老盆傾濁酒不辭衰鬢對青銅長貧博得身強健久矣無心咎化工

又

藥爐茶竈淡生涯聽雨猶能惜物華蕭岸頓添三尺水沾泥不貸一城花閑摩病眼開書卷時傍危欄弄釣車稚子孤行八千里喜聞炊熟可還家家僅自行在來報子布寒食前可到家唐人以寒食前一日爲炊熟

又

自笑平生懶是真閉門高枕動兼旬海棠千片已隨水杜宇一聲無復春綠酒盈樽足忘老朱櫻上市正嘗新今朝雨止通溪路又向沙頭岸幅巾

書懷

謝客元無疾深居似有憂向空書咄咄對竹送悠悠出每思安臥歸還念遠遊春衣典已慣斗酒不難謀

二月十六日至柯橋迎子布東還

江國常年秋雁飛吾兒遠客寄書稀道途一見相持泣鄰曲聚觀同載歸艸艸杯盤更起舞匆匆刀尺旋裁衣從今父子茅簷下回首人間萬事非

又

我似傷禽帶箭飛更憐汝作雁行稀異時恐抱終身恨此日寧知徒步歸萬里外應勞遠夢三年前已挂朝衣斷編蠹簡相從老絕念功名亦未非

題施武子所藏楊補之梅

補之寫生梅至簡亦半樹此幅獨不然豈畫橫斜句

食野菜

野蕪山蔬次第嘗超然氣壓太官羊放翁此意君知否要配吳粳曉飯香

又

萬里蕭條酒一杯夢魂猶自度邛郊可憐龍鶴山中菜不伴我眉枵脯來

念懷然

子十許歲卽往來雲門諸山今復與諸子來追經行猶記髮髻初所至渾如過故墟橋廢夕陽空鶴表碑亡春艸沒龜趺荒郊渺渺羊牛下叢木蕭蕭鳥雀呼可恨一衰今至此右攜筇杖左人扶

雲門道中

度嶺穿林一徑斜旋篝新火試新茶箬包粉餌祠寒食雨溼青鞵上若耶石罅微泉來滴瀝溪涯老木臥槎牙不須苦覓東柯谷是處雲山可寄家

龍瑞

多年不蹋陽明路今日重來院院行好在千秋馮觀主修廊一見眼偏明

禹寺

莫春之初光景奇湖平山遠最宜詩尚餘一恨無人會不見蟬聲滿寺時

寄題張仲欽左司槃澗

劍谿之南有佳處山靈尸之不輕付張公鼻祖晉司空談笑得地開窗戶谿光如鏡新拂拭白雲青嶂無朝莫伏几讀書時舉頭萬象爭陳陶謝句公今仙去有嗣子關塞崎嶇方叱馭山城何曾數如斗噉噉不受世俗汗君不見伍文往者勢如山朝士幾人無汗顏尊公遺事不須述但看當時出處間

園中晚興

世故誰能必書生妄自期年光卷中過心事鬢邊知零落花隨水輪困筍突籬晚晴山盡出徙倚獨移時送陳希周赴安福令

補史鶴嶺邊尊公方玉立超遙籟風雲餘子那可及
天高鬼神惡聞計三日泣晚途見嗣子握手悲喜集
乘桴掠鯨波信矣勇可習巉巖風骨峭颯霧不能襲
謂當上臺省豈復論等級如何困無津俛首臨一邑
顧嗟六朝民龍鍾垂八十肯來野水濱半月解書笈
吾杯僅容翁安得看鯨吸佇立送歸鞍霽日滿原隰

春晚久雨排悶

積雨暗村墟幽居雜鼃蚓泥潦欲升階几席或生菌
壯年多重隄況我抱宿疾下牀躡高屐顧影輒自哂
客來入我戶亦復為數憫胡不徙高原再拜謝不敏

甲子日晴

澤國春多雨闊月殊未止皇天俄悔禍畀以晴甲子
山川相炳煥桑柘鬱千里壠麥行可獲吳蠶亦三起
牀頭醅瓮香大杓瀉浮蟻醉醒日已晡長歌識吾喜

三月二十日兒輩出謁孤坐北窗

園林春已空陂港雨新足泥深黃犢健桑老紫椹熟
豐年逋負少村社饜酒肉微風吹醉醒起和飯牛曲
又

歲月不相貸布穀忽已鳴新夏亦自佳北窗綠陰成
讀書老易倦披衣繞堦行摩挲枕榔杖與汝樂太平

陳希周自海外歸送枕榔杖一枝

春盡記可喜數事

微雨洗浮埃蒼顏一笑開僧招行藥圃兒報得琴材
病退初嘗酒春殘已過災鄰家賽神會自喜亦能來

卜者謂予今春當病幸不甚驗

立夏前二日作

晨起披衣出艸堂軒窗已自喜微涼餘春只有二三
日爛醉恨無千百場芳艸自隨征路遠遊絲不及客
愁長殘紅一片無尋處分付年華與蜜房

老民

乞得不貲身林間號老民兒因作詩瘦家為買書貧
村僕欺謾少隣翁語笑真今朝鹽酪盡齋糝更宜人

又

老民無一事終日臥柴扉鑿沼觀魚樂鉤簾待燕歸
架高藤葉密土潤藥苗肥休退真吾分無心學息機
貧甚自勵

忍病停朝藥捐書省夜燈都門下第客山寺退居僧
天每臨幽隱人何與廢興能輕馬千駟肯慕稷三升

衡門

小聚風煙外衡門水竹間疏溝分北澗翦木見南山
人笑謀生拙天教到死閑猶存拄杖子遇興即躋攀
遊法雲

放船三家村進棹十字港雲山互吞吐水艸遙莽蒼
沙鷗下拍拍野鷺浮兩兩蕭騷菰蒲中小艇時來往
巨山如香爐藍水似車輞夢魂不可到于此寄遐想
瘦僧迎寺門為我掃方丈指似北窗涼此味媿專享
我笑謝主人聊可倚拄杖吾廬已清絕敢取魚熊掌
舟中作

短篷搖櫂莫山昏老怯年華易斷魂夾港蒲聲知小
雨隔林續火認孤村奉祠累歲慚家食謝事終身負
國恩惟有愚忠窮未替尚餘一念在二元

貧居

囊空如客路屋窄似僧寮得飯多菰米烹蔬半藥苗
艸生初失徑筍放欲干霄不道弓旌誤虞人自畏招

初夏野興

得意煙霞不諱窮一菴聊寄寂寥中山從樹杪參差
見水過花陰曲折通閑倚胡牀遡新月時停團扇受
微風元知夢境無真實不待邯鄲覺後空

又

披衣清曉倚闌干龜屋裁成二寸冠盆檜雨餘抽嫩
綠研池風過起微瀾愛書自笑心常在去死懸知日
尚寬回視前修似無媿不教一字入長安

又

扇墮巾欹午夢回鳴鳩又喚雨絲來數行楮帖臨窗

學一卷陶詩傍枕開糠火就林煨苦筍密甌沉井漬
青梅艾人行復巍然出老大難堪節物催

劍南詩稿卷第四十五終

劍南詩稿目錄
卷第四十六

孟夏方渴雨忽暴熱雨遂大作 小池 衡門
海上作 朝飢示子聿 養氣 示友 早

涼熟睡 初夏 夏雨 倚樓 晚興二首
晨雨 戲作絕句以唐人句終之二首 述懷

聞中自詠 晨興 自詠二首 西村 漁
父 放歌行 苦貧 晨起至參倚齋示子聿

夏夜對月 夏夜 五月十日曉寒甚聞布
穀鳴有感 老歎 閉戶 長飢 山齋書事

贈道流 避暑松竹間 連日大雨門外湖
水渺然 午睡 窮居 梅雨 村居書事

閑中信筆二首其一追和陳去非韻其一追和
王履道韻二首 題齋壁 夏日雜題八首

夏雨數 物外雜題八首 過村舍 晝臥初
起書事 夜雨有感 偶作夜雨詩明日讀而

自笑別賦一首 舍西晚眺示子聿 自訟
讀唐人樂府戲擬思婦怨 南堂納涼二首

中庭納涼二首 待日二首 晨興二首 晚
涼述懷 湖塘晚眺二首 小集 出門與鄰

人笑談久之戲作四首 魚池將涸車水注之
一齒動搖已久然餘皆堅甚戲作 晚至新

塘 夜泛湖中 立秋後作 覽鏡 早秋南
堂夜興 菱歌 聞角 湖隄 秋日 龜堂

晨起 柳橋秋夕 道室雜題四首

劍南詩稿卷第四十六

宋陸游務觀

孟夏方渴雨忽暴熱雨遂大作

蒸溽殊未解雨來那可涯鷓鴣無穩樹燈暗不成花

處處躍秧馬家家閉水車兒童伴翁喜聚首話桑麻

小池

荷鰭庭中破嫩苔清溝一派引泉來剪刀艸長浮萍
合無數遊魚去復回

衡門

曲徑衡門短短籬槐楸陰裏倚筇枝老來百事不入
眼惟愛青山如舊時

海上作

厭逐紛紛兒女曹挂帆江海寄吾豪鯨吞鼉作渾閑
事要看秋濤天際高

朝飢示子聿

水雲深處小茅茨雷動空腸慣忍飢外物不移方是
學俗人猶愛未為詩生逢昭代雖虛過死見先親幸
有辭八十到頭終強項欲將衣鉢付吾兒

養氣

養氣安心不計年未嘗一念住愁邊才疎屢掃朝中
迹命薄翻成世外緣耐老尚能消劫石放任聊復醉
江天飽知句曲羅浮路不訪初平即稚川

示友

黃卷青燈自幼童長年頗亦有新功尚嘲孟顛遲成
佛那討辛毗不作公學問更當窮廣大友朋誰與共
磨礱諸君果未捐衰老鄙語人當致一通

早涼熟睡

靈臺虛湛氣和平投枕逡巡夢即成屋角鳴禽呼不
覺手中書冊墮無聲百年日月飛雙轂千古山河戰
一枰賴有蓮峯遺老在白雲深處主齊盟謂陳希夷

初夏

麥秀微寒後梅黃細雨前湖灘初集鷺堤柳未鳴蟬
琴帶輕陰潤巾因小醉偏晚來幽興極又上釣魚船
夏雨

忽聞疎雨滴林梢起看油雲滿四郊行蟻君臣初徙
穴鳴鳩夫婦正爭巢築陂處處移新稻乘屋家家補
破茆堪笑此翁惟美睡孝先便腹任譏嘲

倚樓

千里江山入倚樓高吟聊復寫吾憂詩書幸有先人
業貧賤初非學者羞數掩檜籬端可老一杯藜粥尚
何求東陂未插青秧遍且與隣翁卜雨鳩

晚興

偶扶藜杖過傍村却倚禪牀坐小軒日落鴉栖津樹
暗人歸鶴踏釣船翻挽弓從笑識丁字刺繡終勝倚
市門羹芋一杯吾自飽諸兒強為置盤餐是日五郎等
置食參倚

又

身如病鶴謝樊籠白盡衰髯臉尚紅蒲葦陂塘新漲
後梧楸門巷夕陽中遺名要耐千年看快飲方誇百
榼空造物閱憐君會否放教折臂老新豐

晨雨

過雲生谷暗既雨却窗明低燕爭泥語浮魚逆水行
山川增秀色艸木有奇聲處處青秧滿長歌樂太平
戲作絕句以唐人句終之

又

雨細穿梅塢風和上柳橋山居無曆日今日是何朝
靜對煎茶籠閑疏洗藥泉回頭問童子今夕是何年
述懷

情懷猶是昔年人豈料侵尋八十身燈下看書方覺
老花前闕酒始知貧玉非鼠朴何勞辨魚與熊踏各
自珍萬事回頭已陳迹為君一笑落紗巾

閑中自詠

鶴羨清癯鷗羨閑衡門正在水雲間無求尚恨時賒
酒有癖應緣酷愛山細繞坡頭行犖角別分泉脈聽
淙瀉三更不睡看江月恐有高人夜叩關

晨興

小雨過郊墟晨興一事無殘榴重結藥新燕續生雛
書細猶能讀行遲漸要扶蔬畦恐蕪沒且復課僮奴

自詠

愈老愈知生有涯此時一念不容差身如病鶴長停
料心似山僧已棄家高枕時時聞解籜卷簾片片數
飛花飯餘解帶摩便腹自取風爐煮晚茶

又

行年耄及臥蝸廬山水登臨亦已疎無可奈何猶食
粟未能免俗學燒蔬蓬門時接漁樵話塵几聊存種
樹書強欲入城還自笑世間那有鶴乘車

西村

亂山深處小桃源往歲求漿憶叩門高柳簇橋初轉
馬數家臨水自成村茂林風送幽禽語壞壁苔侵醉
墨痕一首清詩記今夕細雲新月耿黃昏

漁父

楚江茫茫新雨霽殘雲變作魚鱗細老翁短楫去若
飛我欲從之已天際從之不可況共語醉眼知渠輕
一世直釣去餌五十年此意寧為得魚計

放歌行

少年不知老境惡意謂長如少年樂朝歌夜舞狂不
休逢人欲覓長生藥三二十年底難過屈指朋儕餘
幾箇就令未死身日衰朱顏已去誰能那人間萬事
如奕棋我亦曾經少壯時兒曹紛紛不須技歲月推
遷渠自知

苦貧

老作清時版籍民深耕迨及故山春熟思豈是天貧
我妄計還憂鬼笑人但使甌中餘麥飯何妨澗底采
荆薪此窮正坐清狂爾莫向瞿曇問宿因

晨起至參倚齋示子聿

似仙猶火食比古未巢居老子纔全節小兒能著書
下簾留乳燕投飯出潛魚幸好隆中客無為起艸廬
夏夜對月

薄雲歸欲盡殘雨久猶滴月入疎林間庭戶粲珠壁
梅天苦蒸鬱爽氣始此夕豈無一舴舨放浪江天碧
散髮黃鶴樓醉弄白玉笛真當舞魚龍詎止裂金石
夏夜

酒力初消睡未厭臥看香縷繞疎簾月高樓鶻重移
樹風勁流螢自入簷長夏迢迢秋尚遠孤愁冉冉病
相兼老人本是山中客掃迹元非畏楚鉗

五月十日曉寒甚聞布穀鳴有感
弊袴久當脫短褐竟未送 吳中諺語曰未喫端五粽布襖未
可送俗謂典質曰送老怯五更寒重衾擁殘夢羣蟲方得
意飽血藏衣縫竹簟何時陳紈扇殆無用長夏塵塵
來歲月疾飛鞚妾懷耿憂太息欲誰控

老歎
人生易衰老萬事海濤翻但恨芳尊在寧悲雪鬢繁
諸儒輕古學遺虜盜中原有語誰能聽毋矜舌尚存
閉戶

收身歸死鏡湖傍閉戶悠悠白日長巷僻斷非容駟
路腸枯那有說蔬羊書生正可蹈東海世事漫思移
太行睡起不知天早莫坐看螢度篆盤香

長飢
病臥窮閭負聖時本來吾道合長飢朝不及夕未妨
樂死何如生行自知早年羞學仗下馬末路幸似泥
中龜煙波一葉會當逝吹笛高人有素期

山齋書事
山榴子結又重開巢燕雛飛却續回燕有三生雛乃去青
兩足人哇千頃稻日長風舞一庭槐浩歌縱酒愁仍
在作意觀書睡已來常恨流年不相貸若為更著莫
蟬催

贈道流

賣藥會稽市不知今幾年身常雜庸保世果有神仙
醉帽簪花舞漁舟聽雨眠放翁獨識子肯向俗人傳
避暑松竹間

雙松五丈高萬竹一尺圍上有林蟬鳴下有磯鳥飛
正午不見日我來每忘歸清詩忽陳前永與世俗違
直北有異境煙汀連釣磯何當霜雪時散髮櫛葉衣
連日大雨門外湖水渺然

趁朝把笏著烏靴不似歸來買短蓑尚鄙朱公養魚
術肯為甯戚飯牛歌逢時有命求何益觸事無心得
最多樂處却嫌兒輩覺出門十步即煙波

午睡

槐楸陰裏綠窗開天與先生作睡媒流汗未乾衣上
雨大聲已發鼻端雷枕鑄松石分琴薦篔簹織風漪取
笛材却起岸巾看汲井人間車馬正氛埃

窮居

阮窮心自樂寂寞道常尊老病頻辭客嬉遊不出村
淖糜均列鼎徒步當華軒不但終吾世猶堪遺子孫

梅雨

殘雨收還滴低雲去復留護雛憐弱燕喚婦笑鳴鳩
確米春初滑園蔬摘復抽誰知泥沒蹠也有客相求

村居書事

困厄難希飽暖家未妨隨事作生涯白鹽赤米已過
足早韭晚菘猶恐吝奢鴨放競浮新漲水牛歸正及眠
棲鴉年逾七十方辭祿敢望高人挂齒牙

閑中信筆二首其一

閑中信筆二首其一追和陳去非韻其一追和
王履道韻

我看浮名如脫髮誓墓收身老巖穴座延窮鬼心不
疑鑪錘橫財渠自別樂哉今為八十翁神交園綺商
山中烹葵刺棗及時序爛醉黍酒歌邪風

又

小江之上千峯立潮回艇子爭來集飄風忽起白浪

高急雨橫吹綠葦溼歲豐斗酒纔百錢茆店無人驚
醉眠醒來徑入亂雲去異日出看東封年

題齋壁

鏡水西頭破茅屋紹興初載舊書生門無車馬終年
靜身臥雲山萬事輕三釜昔傷貧藉祿一廛今幸老
為抵斷蓬不是無飛處莫與飄風抵死爭

夏日雜題

疎疎窗似秋蛩室墨墨書如春鶻巢大奎何妨尚絃
誦小詩時亦雜談嘲

又

耽耽醜石巖當道矯矯長松龍上天滿地凌霄花不
掃我來六月聽鳴蟬

又

情懷萬里長征客身世連牀日過僧熟計書空成咄
咄不如任運去騰騰

又

一枝黎峒桃榔杖二寸羊城蟬蛸冠萬里來為老人
壽始知天地不勝寬

又

天隨手不去朱黃辟蠹芸編細細香今夕短檠須暫
設北窗風雨送微涼

又

身閑欲出無如懶酒薄雖傾不敵愁殘暑從今無一
月剩儲詩思待新秋

又

樵悴衡門一秃翁回頭無事不成空可憐萬里平戎
志盡付蕭蕭暮雨中

又

衰疾沉綿短鬢疎淒涼圯上一編書中原久陷身垂
老付與囊中飽蠹魚

夏雨歎

蝸舍入門楣觸額黃泥壁作龜北垆雨多潦水欲上

堵臥聽鳧鴨聲拍拍日高糴米奴未回坐知薄飯未
容索仕羞捷徑耕不力自取囊空欲誰責富貴危機
復可畏世間果無第一策雖然胸中有事在片言可
壽天下脈

物外雜題

市墟沽斗酒獨酌復高歌一笑語觀者比君更事多

又

當年下沔鄂回首幾秋風景物渾如昨千帆落照中

又

曉入姑蘇市閭門繫短篷老人元不食買餅飼山童

又

送客停山步尋僧立寺門青鞵慣泥濘却愛雨昏昏

又

粉蝶臨江渚朱橋枕市樓長吟策小蹇又度一年秋

又

飼驢留野店買藥入山城興盡飄然去無人識姓名

又

高城今曠野比屋昔朱門道上傳呼過遙遙幾世孫

又

過市摩雙眼驚嗟閱盛衰朱樓倚霄漢曾見始成時

過村舍

確舍臨山路牛欄隔艸煙問今何歲月恐是結繩前

晝臥初起書事

歲華病思兩侵尋靜看槐楸轉午陰待睡不來聊小
憩煨詩未就且長吟還山久洗天涯恨謝事新諧物
外心忽有故人分祿米呼兒先議贖雷琴

夜雨有感

斷虹不隔江郊雨 東方虹見則雨止俗語謂之隔雨今歲獨不
爾一醜昏燈夜半時多感生悲那為酒積衰成瘦錯
寃詩空塔點滴何由止倦枕淒涼只自知平日故人
零落盡寄書誰與敘癡離

偶作夜雨詩明日讀而自笑別賦一首

俗情向者未全忘洗以繁簾一縷香得失故應常浩
浩是非正可付蒼蒼殘蟬不斷知秋近雙燕歸來伴
書長誰識龜堂新力量東家却笑接輿狂

舍西晚眺示子聿

秋溥常記犯靈胥季子雙髻尚髧如薄飯不為明日
計短檠相對十年餘嗟予久合墮鬼錄憐汝猶能讀
父書西望牛頭渺天際永懷吾祖起家初牛頭山在小
江西北有先太傅讀書堂尚存

自訟

年少寧知道廢興搏風變化羨鯤鵬貪求但欲攀分
寸痛定方慚乞斗升靈府已能澄似水俗緣更覺薄
于僧挂冠且喜身蕭散二頃寧須退可憑

讀唐人樂府戲擬思婦怨

一自門前征馬嘶此心常與斷雲西雙飛空羨雉朝
雉獨泣忍聞烏夜啼遼海晝昏塵漠漠杜陵春到艸
萋萋孤愁可為隣姬說只有臨樽醉似泥

南堂納涼

環坐列胡牀兒曹共此涼風生桐葉墜露下稻花香
老幸返初服窮宜歸故鄉已無纓可濯清嘯對滄浪

又

浴罷閑無事悠然寄一牀水風涼醉頰松月上虛廊
岸久烏紗側熏餘細葛香今宵一美睡何止傲羲皇

中庭納涼

紅映衡門夕照明翠浮村巷暝煙生搖搖楸線風初
緊颭颭荷盤露欲傾數酌濁醪留客醉一編疑義與
兒評須臾散去人聲寂獨數城頭長短更

又

散髮江天嬾出遊衡門日落鎖梧楸火雲突兀方蒸
暑銀漢縱橫已報秋熠燿露螢黏徑艸擊擊漏鼓下
譙樓追涼明日無奇策聊向林間卜雨鳩

待旦

東方星磊磊西舍雞喔喔萬慮集五更吾睡無由著

世事如飲酒不獻自無醉開窗起危坐送月西南落

是身如浮煙久聚要當散吾年七十七寒暑凡幾換
夏夜亦自佳何必厭揮汗推枕坐南窗悠然待清日

晨興

冬夕宜晚睡夏日思晨興磊落明星高蒼涼朝日昇

正襟坐堂上有几不敢憑陳前聖人書凜如蹈淵冰
平生不苟利豈獨畏友朋長飢君勿謂人各有不能

又

欲曉不能寐亟起坐北堂齋莊對斷簡左右陳朱黃

湛湛一池墨裊裊半篆香老生不自逸幸此夏日長
奇哉長頭兒好勇不可當安得數年健與兒講虞唐

晚涼述懷

末學常憂墮吝驕晚知鵬鷗本道遙屏醫却藥疾良

已破械空囚盜自消父子終身美藜藿交遊大半是
漁樵衡門日落清風起又著藤冠度野橋

湖塘晚眺

綠樹暗村墟青山繞艸廬奉祠神禹舊馳道暴秦餘

浦色沉煙網蛙聲入雨鉏清秋又如許幽憤若為據
又

病起閑無事時來古渡頭煙中賣魚市月下采蓮舟
帆鼓娥江晚菱歌姚廟秋長吟無傑句聊以散吾愁

小集

烏柏遮山路紅蕖滿野塘病蘇身漸健秋近夜微涼

杯酌隨宜具漁歌盡意長兒曹娛老子團坐說豐穰
出門與鄰人笑談久之戲作

少時已數少驩娛衰病經旬一笑無今日出門逢父
老欣然隨衆強盧胡

又

莫謂昏昏半掩扉偶逢鄰叟荷鋤歸且令閑說鄉村

事莫問渠言是與非
又

菽水欣欣每盡歡仁賢不必襲衣冠出門邂逅移時
語未嘗龜堂取友端

又

屋角時聞黃犢鳴相逢但可說春耕一言誤及城中
事議罰應須便酌觥

魚池將涸車水注之

清波溜溜入新渠鄰曲來觀樂有餘試手便同三日
雨滿陂已活十千魚喜如雷動風行際快若天開地

闢初萬物但令俱有託吾曹安取愛吾盧
一齒動搖已久然餘皆堅甚戲作

病齒元知不更全漂浮机杼已三年一朝正使終辭
去大嚼猶能盡幾肩

晚至新塘

青鞵隨意出柴荆聊向南塘曳杖行歸鳥已從煙際

沒斷虹猶在柳梢明城頭層塔凌空立浦口孤舟並
岸橫向道有詩渾不信爲君擁鼻作吳聲

夜泛湖中

水鴨鴛鴦拍拍飛菰蒲深處弄煙霏喚回二十年前

夢半醉姑溪棹月歸
立秋後作

宋玉悲秋千載後詩人例有早秋詩老夫自笑心如
石三日秋風漫不知

覽鏡

此頭那可著貂蟬瘦似騎驢孟浩然一事比渠差省
力閉門無句與人傳

早秋南堂夜興

水注橫塘藻荇香候蟲唧唧滿空廊風前落葉紛可
掃天際疎星森有芒夜漏漸長愁少睡秋衣未製怯

新涼明朝却有欣然處寫得黃庭又幾行

菱歌

海內知心人漸少眼前敗意事常多問君底事渾忘
却月下菱舟一曲歌

聞角

河白如銀天淡青角聲中有玉關情
早知送老桑麻野梅失安西萬里行

湖隄

新月纖纖淡欲無時聞魚躍隔菰蒲
籃輿小放湖隄上信有人間白玉壺

秋日

將日溪風急新秋天宇寬涼生豎裁
褐爽入縮縫冠拊翼雞頻唱爭枝雀
正誰一簞吾已足芋豆亦加餐

龜堂晨起

培火螭爐起寶熏滴泉整研聚玄雲
屏圍燕几成山字簾展涼軒作水紋
絕口不談浮世事洗心聊策退居勳
老年猶健非無自一卷丹經受鄭君

柳橋秋夕

柳疎橋盡見水落路全通衣杵家家
月漁舟浦浦風眼明無俗物步蹇有
枯筇野逸誰能那悠然西復東

道室雜題

早訪丹砂上岫嶮晚提河派泝崑崙
陰符後出君無忽三百奇文要細論

又

聞說湖中有釣舟煙波出沒雜輕鷗
一聲清嘯去已遠我欲從之何處求

又

山中有艸名長生丹砂可死金可成
服之刀圭齒髮換要看東封告太平

又

勘書窗下松明火采藥溪頭樹葉衣
只在人間人不識秋風又見雁南飛

劍南詩稿卷第四十六終

劍南詩稿目錄
卷第四十七

儒生 秋夜 寺閣 秋暑夜興 漁父 省
事 新涼書懷四首 七月十七晚行湖塘雷

雨大作 七月十八夜枕上作 梅市 秋思

小舟湖中夜歸追和孟浩然夜歸鹿門歌

酒盡 燒香 自述二首 風雨 白露前一
日已如深秋有感二首 東村晚歸 秋望

郭西 舍北 夜坐示子聿 柳橋晚眺 秋
興五首 嘉泰辛酉八月四日雨後殊凄冷新

雁已至夜復風雨不止是歲八月一日白露二
首 近村民舍小飲 閒適二首 夜歸二首

自詠 老歎 秋社 晨起 中夜睡覺兩
目每有光如初日歷歷照物晁文元公自謂養

生之驗予則偶然耳感而有作 錢道人亦飲
酒食肉囊中不蓄一錢所須飯及艸屨二物皆

臨時乞錢買之非此雖強與不取也二首 枕
上 山園書觸目 苦貧戲作 秋曉書感

秋夜 村舍二首 天涼時往來湖山間有作
雨夜歎 病足晝臥夢中譚諱乃誦尚書也

既覺口占絕句二首 新買啼雞 幽棲二首
秋日雜詠八首 望永阜陵 排悶 秋日

晨起 出遊莫歸戲作 自詠 出蜀日嘗遣
僧則華乞籤于射洪陸使君祠使君以老杜詩

為籤予得遣興詩五首中第二首其言教戒甚
至退休暇日因用韻賦五首 悲歌行 秋夜

讀書 對食戲詠 懷昔 偶得雙鱗二首
秋懷十首 以竹藥閉深院琴樽開小軒為韻

示客 秋晚村舍雜詠二首 臥病累日羸甚
偶復小健戲作三首

劍南詩稿卷第四十七

宋陸游務觀

儒生

儒生安義命所遇委之天用可重九鼎窮寧直一錢
雖云髮種種未害腹便便高臥茅簷下羹藜法不傳

秋夜

老病睡眠少如斯秋夜何長庚未配月織女已斜河
莎徑蟲吟苦柴門葉落多誰知窮甯戚不作飯牛歌

寺閣

三壑初得牧牛童兩扇新成釣舸篷偶訪野僧過射
的却衝微雨上樵風登山未減青鞵興到手俄驚綠
酒空自笑此身猶健在試憑重閣送飛鴻

秋暑夜興

寂寂空廊絡緯鳴消搖岸憤近南榮閑眠簟作波紋
冷新浴衣如蟬翼輕微雨已收雲盡散衆星俱隱月
徐行呼童持燭開藤紙一首清詩取次成

漁父

千錢買一舟百錢買兩槳朝看潮水落暮看潮水長
持魚換鹽酪縣郭時下上亦或得濁醪不復計瓶盎
浩歌志遠近醉夢隨莽蒼玄真不可逢悠然寄遐想

省事

車馬聲都絕比鄰迹亦疎殘傾家釀酒細讀手鈔書
薄飯惟羹芋閑遊不借鹽有時還自笑省事更誰如

新涼書懷

烏帽圍寬帶眼移閉門慣忍日長飢文章雖婉聲名
誤志節寧隨血氣衰天地無私非困我聖賢可學有
餘師短檠正歎經時別涼入郊墟喜可知

又

藥物扶持病少蘇殘年不恨老菰蘆潦收溪蝦魚爭
售歲樂村場酒易沽無日檀林無墜葉 禮木自夏至秋

日有落葉不可勝掃有時燕戶有新籬今年燕屢生雖七月望
猶未止秋風刺起扁舟與安得州家復鏡湖

又

鄰曲今年又有年垂髮戴白各欣然先輸官庾無補
賦共賽神祠有社錢退傳寄聲情鎮密 連得周丞相書
細字滿幅晦翁入夢語蟬聯 昨夕夢朱元晦甚款 燈前細
與兒曹說蠹簡猶堪數世傳

又

山川遺迹晉唐餘水竹相望許洛居朱希真嘗言山陰富
水竹有洛陽許下氣象 一齒屢搖猶決肉雙眸雖澀尚耽
書郊原夜夜驅耕犢村店時時秣蹇驢客問若爲娛
老境吾兒未與短檠疎

七月十七晚行湖塘雷雨大作

電火雷車下九關我行莫出郊原間翳翳暗樹類奇
鬼突兀黑雲如壞山江湖默應鰻蚰溢鐵鑊自脫梅
梁還今夕虛蒼瀉懸瀑預知高材聽淙濕

七月十八夜枕上作

電掣光如晝雷轟意未平亂雲俄卷盡孤月却徐行
露艸蛩相語風枝鶴自驚一涼吾事足美睡到窗明

梅市

梅市柯山小繫船開篷驚起醉中眠橋橫風柳荒寒
外月墜煙鐘縹渺邊客思況經孤驛路詩情又入早
秋天如今老病如何恨判斷江山六十年

秋思

利欲驅人萬火牛江湖浪迹一沙鷗日長似歲閑方
覺事大如山醉亦休衣杵相望深巷月井桐搖落故
園秋欲舒老眼無高處安得元龍百尺樓

小舟湖中夜歸追和孟浩然夜歸鹿門歌

山光漸淡川氣昏急雨亂打荷葉喧小舟橫掠湖邊
村人家收網半閉門吾廬未見見堤樹舟人指點孤
燈處蒲叢姑惡最可哀衝雨飛鳴背人去

酒盡

飲酒但飲溼吾聞之老坡渠非惜酒錢無如久窮何
我窮乃過之空壘倒餘溼日來彌可笑溼亦不可得
平生忍飢多得飯已有餘父子茅簷下清坐談詩書
燒香

寶熏清夜起氤氳寂寂中庭伴月痕小斷海沉非弄
水旋開山麝取當門蜜房割處春方半花露收時日
未噉安得故人同晤語一燈相對看雲屯
自述

寄懷魚鳥臥煙汀結友松筠醉艸亭拜賜龜章紆舊
紫予蒙恩銀服篋中有守郡時故袍用以拜命養成鶴鬢掃餘
青遺經在櫝傳家學大字書牆作座銘浪迹江湖遂
終老此身何啻一浮萍

又
意望天公本自廉甘餐美睡偶容兼一生憂患如山
重此日安閑抵蜜甜拙宦雖無齊虜舌早歸亦免楚
人鉗但餘一味疎慵在儲藥千斤未易砭

風雨
風搖北斗柄欲折雨溢天河浪正生一盞昏燈北窗
下腐儒未輟讀書聲
白露前一日已如深秋有感
匹馬曾防玉塞秋豈知八十老漁舟非無丈二及堪
請只恐傍人笑白頭

又
護塞寧須右北平拂雲祠是受降城誰知此志成虛
語白首燈前聽雁聲
東村晚歸

蜀道還吳鬢已絲歷年二紀固應衰寧知病思沉綿
日又見秋風搖落時錦雉白魚供野餉青林紅樹入
新詩東村寂寂風煙晚酒挂驢肩又一奇
秋望

快哉一雨洗浮塵却喜郊原霽色勻野火已亡秦相
篆江濤猶託伍胥神登臨頓覺清秋早流落空悲白

髮新東望思陵鬱葱裏老民猶及見時巡游尚能記高
皇建炎巡幸

郭西
鵲下川原黑船行浦淑空橋燈搖水影樓角散天風
野眺飛埃外漁歌冷翠中不須嘲病翼要是脫樊籠
舍北

支徑秋原上衡門夕照中野煙山半失溪漲浦橫通
鬢禿難藏老衣穿可諱窮浩歌終自得心事寄冥鴻
夜坐示子聿

久客誠當去無心偶小留掃空閑夢想閱盡舊朋傳
學術非時好文章幸自由蘇黃門贈姪孫元老詩有云從此
文章始自由不嫌秋夜永問事有長頭

柳橋晚眺
小浦聞魚躍橫林待鶴歸閑雲不成雨故傍碧山飛
秋興

秋風吹我夜植杖溪橋側木葉雖未凋慘澹無顏色
功名不垂世富貴但堪傷底事杜陵老時時矜省郎
又

秋暑勢已窮風雨縱橫至白鷺立清灘與我俱得意
又
胸中萬卷書一字用不著歸休始太息竟是為農樂

又
酌酒桑陰下邠風入醉歌何須繩檢外名教樂還多
嘉泰辛酉八月四日雨後殊凄冷新雁已至夜
復風雨不止是歲八月一日白露

殘暑方炎忽痛摧無情風雨亦奇哉但嗟不為貧人
計未動秋砧雁已來

又
仲秋四日雁橫天閉戶垂帷意已便方數今年時候
早夜深風雨更凄然

近村民舍小飲

秋風吹細雨蕭然濯炎熾老夫疾頓平甘食仍熟寐
春物財幾何搖落已復至昔人喻死生謂若屈伸臂
愚公顧不靈白首沒榮利嗟予辛學道了此直差易
二拜散人號退志獲早遂絃歌萬二千盡力不能崇
瘦臙骨可數渺渺入空翠霜蟹初把螯絲蓴小添豉
平生笑巨君老齧乾肉糲異味幸滿前萬事付一醉

閑適

飲酒不至狂對客不至疲讀書以自娛不强所不知
一窗袖手坐往往晝漏移初非能養生簡事頗似之
四時俱可喜最好新秋時柴門傍野水鄰叟閑相期

又

陸子居山陰杜門輒經年有時思出遊兩屨凌風煙
長鏡斷靈苗大瓢挹飛泉眼長不及寸能著萬里天
不飲顏常丹不食腹果然金丹亦棄置我是地行仙

夜歸

今年寒到江鄉早未及中秋見雁飛八十老翁頑似
鐵三更風雨采菱歸

又

芟浦菱陂夜半時小舟更著疾風吹青熒一炬楓林
外鬼火漁燈兩不知

自詠

宦遊疇昔徧天涯萬里東歸歲月賒古道泥塗居士
屨荒畦煙雨故侯瓜園公谿父逢皆支野寺山郵到
卽家病思漸輕重九近又將烏帽插黃花

老歎

一齒危將墜雙瞳久已昏謀生積蔬圃養拙閉柴門
多病從來慣虛名不足論自憐餘一念猶欲濟元元
秋社

兩餘殘日照庭槐社鼓擊繁賽廟回又見神盤分肉
至不堪沙雁帶寒來書因忘作閑終日酒爲治羣醉
一杯記取鏡湖無限景蘋花零落蓼花開

晨起

雞已參差唱窗曉曉聰明高林風不止叢竹露如傾
夢爲多難記詩錄類少成晨興了無事散髮遶堦行

中夜睡覺兩目每有光如初日歷歷照物晃文
元公自謂養生之驗予則偶然耳感而有作

人情所願欲莫若貴與富是皆有命焉非力可成就
予昔未有聞無與發其覆越起強干祿時命適大謬
方行蛇當道未至髮已嗾適燕乃南轅之楚顧北首
風波起平地兩耳厭嘲詬隴蜀萬里餘數遍道傍埃
六十歸爲郎數月艸章奏夫豈或使之擊去惟恐後
嗟彼亦何心喜愠出遯返還山惟自認衡茅屏幽陋
乘除得少健上下歷巖岫得飽豈復擇百口同斂糗
寒龜久猶息野鶴老益瘦又如已放馬寧當夢華廐
造物念途窮畀以樗櫟壽雖無熊鳥衡坐空陰陽寇
兩皆若有光夜視如正晝物生稟定數此語聞自舊
置冰鳥覆翼棄野於菟穀偶然當後死鬼錄自遺漏
山陂粟屢收池水麻可漚鄰父相歡娛席地醉醇酎
錢道人飲酒食肉囊中不蓄一錢所須飯及
艸屨二物皆臨時乞錢買之非此雖強與不取
也
萬里飄如不繫船空囊短褐過年年食時無飯芒屨
破只向街頭旋乞錢
又

誤辱君王賜鏡湖身隨鷗鷺寄菰蒲行年八十猶強
健欲伴先生去得無

枕上

呼兒初夜上門關怕冷貪眠自笑屨月色橫分窗一
半秋聲正在樹中間莫年不復樽前樂浮世無如枕
上閑鍊句未安姑棄置明朝追記尚班班

山園書觸目

山近雲生易人稀鳥下頻瘦篁穿石竅古蔓絡松身
熱摘巖邊果乾收澗底薪經過不相識喚作避秦人
苦貧戲作

五窮作祟不容支蟬腹龜腸旋過時客散難求門外
轍衣穿徒有鬢邊絲兒能解事甘藜藿婢苦無薪晚
屢屢箕踞浩歌君會否書癡終覺勝錢癡

秋曉書感

天公息我半生勞寄傲江湖亦足豪淡盡月痕知夜
艾飄殘桐葉喜秋高讀書時亦挂牛角對酒正須持
蟹螯縱有故人終自絕安能從汝望緜袍

秋夜

抱病齒髮非閱世城市換朋儕冢纍纍在者亦雲散
窮居賴出戶俯仰秋已半疎鐘到倦枕微火耿幽慢
平生疑著處忽若河冰泮百年寓逆旅萬事真既漣
紛紛彼方寢袖手不須喚蘿月忽滿窗悠然付長歎

村舍

篠屋楓林下 山中人以篠覆舍厚密過于茅 柴門艾浦旁
先鳴雞膈膊徐上日蒼涼服藥貧寧較觀書老有常
仍須教童穉世世力耕桑

又

生理嗟彌薄吾居久未完蝶飛窗紙碎龜坼壁泥乾
小雨牛欄溼微霜確舍寒晚禾蟲獨少鄰里共相寬
今年晚禾苦蟲蛀子獨獨免

天涼時往來湖山間有作

萬壑千巖自古傳青鞵布襪更誰先泛舟菰脆鱸肥
地把酒橙黃橘綠天秦篆舊碑荒艸棘禹書遺穴慘
風煙誰知陸子登臨日已近浮生八十年

雨夜數

秋雨何曾住一滴老夫危坐欲三更開元貞觀事誰
問溫洛榮河塵未清豐年猶有餓死慮破屋自愛讀
書聲刺經作制豈不美無奈人間痛哭生

句

病足晝臥夢中講諄乃誦尚書也既覺口占絕
唐虞已遠三千歲每誦遺書涕泗潛濟濟九官十二
牧我獨不得居其間

又
人能不食十二日趙岐柳開皆嘗不食十二日不死惟書安
可一日無唐虞雖遠典謨在病臥蓬窗時囁嚅

新買啼雞

我我赤憤聲甚雄意氣不與其曹同我求長鳴久未
獲一見便覺千羣空主人燒神議已決知我此意遽
見從秋衣初縫惜不得急典三百新青銅憐渠亦復
解人意來宿庭樹不待籠狐狸熟晚那敢犯蕭蕭清
露和微風五更引吭震戶牖橫挺無復須元戎明星
已高啼未已雲際騰上朝陽紅老夫抱病氣已索賴
汝豪壯生胸中明朝春黍得碎粒第一當冊司晨功

幽棲

幽棲少人客積病得衰殘身納分司祿兒須遠次官
新寒換衣典閑日借書觀更數秋來瘦晨興覺帽寬

又

自卜幽棲地頻驚歲月移鄉鄰崇禮讓子弟習書詩
嗷嗷雞鳴樹信信犬吠籬謀生已過足富貴亦何爲

秋日雜詠

都門初出若登仙弄水穿雲喜欲顛只恐光陰已無
幾不知又過十三年

又

五百年前賀季真再來依舊作閑人一生看盡佳風
月不負湖山不負身

又

菰蒲風起莫蕭蕭煙斂林疎見斷橋白蟹鱸魚初上
市輕舟無數去乘潮

又

葉底珍禽不受呼弄風小蝶點殘蕪舍南舍北秋光
好到處皆成一畫圖

又

紅莧如丹照眼明臥開石竹亂縱橫騷人見處終然
別只說清秋采落英

又
桐葉吹殘柳亦稀
溪頭倚杖立斜暉
誰知老子無窮
喜待得吾兒小艇歸

又
久雨初晴喜欲迷
青鞵踏遍舍東西
忽然來到柳橋
下露溼蓼花紅一溪

又
十里秋風畫角哀
夕陽光景亦佳哉
正疑白鷺歸何
晚一片雪從天際來
望永阜陵

龍飛回首尚如新
忽闕人間四十春
聖主已嚴天上
駕孤臣歸作道傍民
傾河尚恨難供淚
衛社何由得致身
獨立秋風吹白髮
感恩肝胆漫輪囷

排悶

悠然不覺歲時遷
楚水楓林繫釣船
貧悴只如行卷
日衰遲忽過挂冠年
閑遊野寺騎驢去
倦擁殘書聽雨眠
賴有一籌差自慰
小兒筆墨日翩翩

秋日晨起

翻樹鴉知日橫空
雁戒寒但欣蘇肺渴
未暇議衣單
粥鼎湯初沸香篝火
半殘讀書心漸懶
顧影一長歎
出遊莫歸戲作

終年兀兀復騰騰
眼看朱門幾廢興
造物偶容窮不
死衆人共養老無能
逢山自有閑遊侶
入寺寧無淡話僧
莫道歸來却岑寂
小兒同守短檠燈

自詠

荒園風煙入荷鉏
孤村巷陌看騎驢
少年曾縱千場
醉老境惟存一束書
作意買山雖已矣
忍慚乞米獨何歟
所欣肺病秋來減
白髮蕭蕭可自梳

予出蜀日嘗遣僧則華
乞籤于射洪陸使君祠
使君以老杜詩爲籤
予得遺興詩五首中第二

首其言教戒甚至
退休暇日因用韻賦五首
我幼入家塾結髮知苦心
稍長謬聞道篤守至于今

淡然朱絲絃三數
有遺音詎敢負所學
枉尺求直尋
彼哉孔光輩千載
汚儒林

又

童子丹元家湛然
居靈府世人不少悟
役役徒自苦
江湖豈不廣魚乃投
數罟是身如璞玉
要經大火聚
萬卷讀丹經孰能精
去取

又

少壯不自料慷慨志
四方謝病還故山
始覺白日長
命薄類蟬翼功名安
可望狐狸不足問
力不當豺狼
惟有臥釣船仰看白
鷺行

又

孤雲起江郊萬木酣
天風水鳥何所恨
終夜號菰叢
我興視中庭北斗挂
寒空誰言秋夜長
明星已生東
丈夫老憂國百慮蟠
胸中

又

我昔遊青城萬仞窮
躋攀巢居上官翁
許我分半山
且言牡丹平可卜
茅三間報國未能忘
承諾遂東還
蹭蹬意何成看雲徒
汗顏

悲歌行

有口但可讀離騷
有手但可持蟹螯
人生墜地各有
命窮達禍福隨所遭
嗟予一世蹈謗藪
淘如八月秋江濤
尊拳纒奮肋已碎
曹射箭盡弓未破
形厓骨悴吹可倒
摧拉未足稱雄豪
一身百憂偶得活
殘年幸許歸蓬蒿
時時照水輒自笑
霜鬚雪頰不可薶
脫身仕路棄衫笏
如病癰亦逢爬搔
見事苦遲已莫悔
監戒尚可貽兒曹
勉騎款段乘下澤
州縣豈必真徒勞

秋夜讀書

門前客二千帳下兵
十萬人生可意事
隨手風雨散不如一
編書相伴過昏日
豈惟洗貧病亦足捍
患難老夫垂八十巖
電尚爛爛孤燈對
細字堅坐常夜半
吾兒幸能繼書亦未
殘斷安知不遭時
清廟薦玉瓚不然老
空山亦足化里閨
我死斯言存觀者
有追歎

對食戲詠

一飽欣逢歲小穰時憑野餉誑枯腸橙黃出白金齋
美菰脆供盤玉片香客送輪囷霜後蟹僧分磊落社
前薑秋來幸是身強健聊為佳時舉一觴

懷昔

偶住人間日月長細思方覺少年狂衆中論事歸多
悔醉後題詩醒已忘鼉作鯨吞吁莫測谷堙山塹浩
難量老來境界全非昨臥看縈簾一縷香

偶得雙鯽

今朝溪女留鮮鯽灑掃茅簷旋置樽養老不須煩祝
鯽從來楚俗慣魚殮

酒興森然不可回重陽未到菊先開一雙鯽刺明吾
眼催喚廚人斫鱠來

秋懷十首以竹藥閉深院琴樽開小軒為韻

我非王子猷賦性亦愛竹舍外地十畝不藝凡艸木
長吟雜清嘯觸目皆此族更招竹林人枕藉糟與麴

短裘入重雲長鏡求靈藥人瘦四體具狗杞羣吠惡
采實去條枝摘花棄附萼長嘯忽躡空天台赴幽約

惟王居法宮玉帛來四裔一朝啓戎心邊城或晝閉
養生能體此皆可閱千歲利欲喜乘人日夜勤自勵

飲酒可不病自酌隨淺深處世可無患惟勿欺此心
此心實通天一念天所臨子能守吾言可度豺虎林

吾道久寂寞不絕如一綫至人隱市塵我輩何由見
安得世外士與之共談醜僧話亦或佳聊可過竹院

小人方盛時瓦礫視黃金及其大勢去或不遺一簪
耶嗚今尚存遺戒豈不深所以栗里翁惟蓄一素琴

又

世事本何常賀弔更在門棄為溝中斷亦何羨犧樽
禍福要其終愚智始可言君看驪山墓何若楊王孫

又

今日天微寒處處菊花開永懷杜拾遺抱病起登臺
古路逢僧過溼雲聞雁來我亦秋風客詩成有餘哀

又

天鏡環千峯蒼翠立雲表漁舟破浪來泛泛一葉小
雲門若耶間迨此素秋杪登覽不可遲去若孤鴻矯

示客

丈夫素所學致主齊義軒恨無同志人徒欲起九原
痛哭驚世俗著書成空言歲月去衰衰吾其死空村

秋晚村舍雜詠

村巷翳桑麻蕭然野老家園丁種冬菜隣女賣秋茶
啄木矜奇服牽牛蔓碧花一樽雖艸艸笑語且喧嘩

秋晚年中熟湖鄉未寂寥步頭橫畫舫柳外出朱橋
潮壯知多蟹霜遲不損麴家家新釀美隣里遞相邀

臥病累日羸甚偶復小健戲作
病忽迨旬日衰如增十年難求素緩藥空負宋清錢

微火秋先跨閑房晝亦眠偶除書鬼錄遇酒又陶然

伏枕頻九死下牀如再生幸回蒿里駕猶作越吟聲
拂几嗟塵積開書覺眼明淖糜方自養未敢憶南烹

行年當大耋臥病涉高秋丸藥作奇驗傲裝仍小留

輕漚元泛泛破屋已飄飄尚有江湖興沙頭問釣舟

劍南詩稿目錄
卷第四十八

縱筆四首 村興 賽神 小立 窮老 晚
步舍東 述野人語二首 戲答野人二首

建安陳希周官海南為予致兩拄杖其一促節
竹一枕椰也 排悶 九月十二日折菊 表

姪江炯種竹名筠坡來求詩 微雨 秋晚寓
歎六首 秋晚湖上 縱遊歸泊湖橋有作

九月十八日至山園是日頗有春意 明日又
來天微陰再賦二首 雨後至近村二首 雨

復作自近村歸 雨寒戲作 衡門晚眺 不
寐 示子虞 弊廬 予未冠即交諸名勝今

無復在者感歎有作 夜雨 題嚴州王秀才
山水枕屏 小飲示座中 搖落吟 插花

雨過行視舍北菜圃因望北村久之二首 居
三山時方四十餘今三十六年久已謝事而連

歲小稔喜甚有作 幽居 曉晴肩輿至湖上
戲作野興六首 道室書事 行飯至潮桑

堰東小市 負日戲作 遊西村 初冬 遣
懷 策杖 汲東山下井 園中作二首 園

中 短篷 自適 堂東小室深丈表半之戲
作 獨處二首 探梅至東村 讀史 漁翁二

首 寓言三首 夜四鼓睡覺起行簷間觀新
作南籬 客去追記坐間所言 疇昔 飲牛

歌 牧羊歌 生日子聿作五字詩十首為壽
追懷先親法然有作 園中書觸目 養生

齋中雜興二首 江上 追憶征西幙中舊事
四首 冬夜 冬日 冬朝 冬莫 風月

落葉 邠風 擁爐不出輒終日自嘲 嘲梅
未開

劍南詩稿卷第四十八

宋陸游務觀

縱筆

莫笑畸翁迫耄期從來不許俗人知繫船慣聽巴東雨畫策曾從渭北師袖劍客同樓上醉爛柯人看洞中棋如今更欲滄溟去鯨浪浮天信所之

又

常笑相如賦上林肯爲子政鑄黃金心光自發誰能障踵息無聲不厭深搖齒復牢堪決肉枯顛再茁已勝簪老松澗底雖終棄霜雪元知不解侵

又

拖得烏藤到處行看山看水眼猶明但期少健遊潼華豈必長生似老彭一繡青鞵吾事了半甌綠酒萬緣輕安知不作希夷叟生長兵間老太平予生于宣和末遇虜禍開東歸又避地數年

又

未說無功爵位叨昔人所畏在功高印如斗大寧常保劍拄頤長祇自勞酒社極知身可隱獵場猶得氣差豪世間見透渾無事狐貉安能詫緼袍

村興

折花持博酒種菜賣供家請藥人何壅爭棋客正譚漁翁足蹠踣牧豎手了又短景匆匆晚橫林又宿鷓鴣更堪笑鳴噪下庭柯

小立

紅樹園廬晚碧花籬落秋荒陂船護鴨斷岸笛呼牛酒賤村村醉山寒寺寺幽聊須岸鳥憤小立埭西頭窮老

窮老寧須數吾生得已多風埃棄朝憤煙雨弄漁蓑富屋烏爰止閉門爵可羅人生只此是得酒且高歌

晚步舍東

籬槿花開柿葉丹土溝東去過牛欄艸煙漠漠天將暮布褐蕭蕭客正寒

述野人語

白米乾薪好井泉甘餐美睡若登仙從來不慣嘗鹽酪席下何須有一錢

又

重重大布敵風霜籬外桑陰五月涼軟飯一盂千萬足那知世有郭汾陽

戲答野人

日飲雲根一脈泉知君骨相自應仙曲肱閑臥茅簷下買斷南山不用錢

又

木葉凋疎天欲霜老懷多感易淒涼得君數語開人意徑就湖橋醉夕陽湖橋有村店酒甚美

建安陳希周官海南爲予致兩拄杖其一促節

竹其一桃榔也

雨漬嵐侵蘚暈重石罅楷矢正相同取從萬里鯨波路來伴三山鶴髮翁雪一作雲上有時留醉艸花前隨處打殘紅化龍徑去吾何憾且與人間作歲豐

排悶

棄官謂逍遙勞苦殊未既荒疇須墾闢破屋欠塗墍疾深藥難求食盡穀暴貴安能作經營但覺睡有味秋高霜露逼更苦薪炭費雖云未遽死飢凍亦可畏頗思從李廣小獵聊吐氣復恐灞亭歸邂逅逢醉尉

九月十二日折菊

黃菊芬芳絕世奇重陽錯把配萸枝開遲愈見凌霜操堪笑兒童道過時

表姪江炯種竹名筠坡來求詩

奉常遺緒冷如秋閉戶知君頗好修千里可嗟妨晤

語兩書猶喜免沉浮但令有竹能醫俗何患無天可
寄愁一事却須常自勉勿容凡子得同遊

微雨

晡後氣殊濁黃昏月尚明忽吹微雨過便覺小寒生
樹杪雀初定艸根蟲已鳴呼童取半臂吾欲傍堦行

秋晚寓歎

荷葉枯已盡菊花殘更香帶醒嘗野橘和夢聽啼鶯
鬢畔流年速燈前舊話長寒龜且未死不必恨措牀

又

野處仍多病經年無與遊僧庸幾市井醫傲過公侯
不睡愁逢夜無衣怯到秋一端聊自慰問事有長頭

又

幽夢難呼覺孤愁雨滴成天高那可問年往若為情
屏虜猶遺育神州未削平登高西北望衰涕對誰傾

又

老歎交朋盡閑知日月長著書終覆瓿得句漫投囊
霜樹昏鴉黑風簾小蝶黃村醪如水薄也復答年光

又

十里丹楓岸三家小麥村山多妨極目秋晚易消魂
火舉船過埭人行犬吠門窮愁已如許那更雨昏昏

又

行年垂大耋久矣少朋傳舊事同誰說新詩或自訓
廢書眠過日泥酒醉經秋遲速皆當死時來莫預愁

秋晚湖上

已過西成賽廟期家家下麥不容遲夕陽遍野人歸
後秋水生難鷺集時靈藥不治懷抱惡好詩空益鬢

毛衰從來未識蘇司業愁絕西風滿酒旗

縱遊歸泊湖橋有作

西蜀東吳到處遊千巖萬壑獨吾州短篷載月娥江
夜小蹇尋詩禹寺秋村酒可賒常痛飲野人有興即

相求何由喚得王摩詰為畫湖橋一片愁

九月十八日至山園是日頗有春意

烏藤真好友伴我出荆扉落葉紛如積鳴禽暖不歸
露濃松鬣長土潤木苗肥未盡幽尋興還家趁夕暉

明日又來天微陰再賦

烏白赤于楓園林九月中天寒山慘淡雲薄日曠曠
旋摘分猿果寬編養鶴籠身閑足幽事歸臥莫匆匆

又

河岸風檣遠村陂牧笛長短籬圍鹿眼幽徑繚羊腸
照水鬢眉見搓橙指爪香衣裘又關念礎杵滿斜陽

雨後至近村

夜雨曉方止朝雲猶作陰山餘一寸碧溪長半篙深
臥泛白鷗渚行穿黃葉林老農能共語真率會人心

又

年耄身猶健秋高疾已平隣翁思問訊蔬圃要巡行
竹杖輕無迹芒鞋捷有聲相逢無別語努力事冬耕

雨復作自近村歸

夜聽蕭蕭未漲溪朝行漲灑已成泥可憐鳩取招麾
速誰似雲知出處齊野菊枝長半狼藉江楓葉落正

淒迷行人也識龜堂老小榼村醪手自攜

雨寒戲作

掃園收榭葉培地甃博爐幸有藜烹粥何慚紙作襦

衡門晚眺

幽居端似玉川生茅屋支撐不更營青旆荒寒增酒
興錦囊零落負詩情殘蕪色襯斜陽遠落葉飛如野

鳥輕徂歲崢嶸忽如許雁來又過會稽城

不寐

麗譙聽盡短長更幽夢無端故不成寒雨似從心上
滴孤燈偏向枕邊明讀書有味身忘老報國無期涕

每傾敢為衰殘便虛死誓先鄰曲事春耕

示子虞

好學承家夙所奇蠹編殘簡共娛嬉一婚倘畢吾無
累吾今年為一子自獨歸者聘婦無復婚嫁之責二三釜雖微汝
有期子虞明秋當赴句金 韋弟元知是難弟德兒稍長

豈常兒要令舟過三山者致誦常聞夜艾時

弊廬

弊廬雖陋甚鄙性頗所宜歌傾十許間艸覆實半之
確聲隔柴門績火出枳籬縛木為堯牢附垣作雞埘
黃犢放林莽蒼鵝戲陂池傭耕食于我客主同爨炊
瓦盎設大杓菹菹羹園葵一飽荷鋤出作勞非所辭
上以奉租賦下以及我私有錢即沽酒阡陌恣遊嬉
亦有扶持者婢跣奴髻椎欲畫恨無人後世考此詩
予未冠即交諸名勝今無復在者感歎有作
早歲鄉閭接勝流老來零落歎山丘欲尋共語人難
得却是封侯印易求數酌不能成兀兀一枰且復寄
悠悠世間只有身差重惆悵今年白盡頭

夜雨

吾詩滿篋笥最多夜雨篇四時雨皆佳莫若初寒天
紙帳白于氈紙被軟于綿枕傍小銅匱海沉起微煙
是時聞夜雨如絲竹管致恨我未免俗吟諷動雕鐫
南朝空塔語妙出建安前意謂奪造化百世莫比肩
安知梧桐句乃復與竝傳夜雨何時無奇語付後賢

題嚴州王秀才山水枕屏

我行天下路幾何三巴小益山最多翠崖青嶂高嵯
峨紅棧如帶縈巖阿下有駭浪千盤渦一跌性命委
蛟鼉日馳三百一烏驟雪壓披氈泥滿鞞驛亭沃酒
醉臉酡長留腰鼓雜巴歌大散關上方橫戈豈料世
變如翻波東歸輕舟下江沱回首歲月悲蹉跎壯君
落筆寫岷嶓意匠自到非身過偉哉千仞天相摩谷
裏人家藏綠蘿使我恍然越關河熟視粉墨頻摩挲

小飲示座中

鏡裏蕭蕭兩鬢衰閑人正與老相宜誰知翦燭焚香
夜恰是搓橙破橘時莫道閉門無逸氣尚能為客誦
新詩君看江海寬多少是處皆堪理釣絲

搖落吟

素秋欲盡風雨惡千林如掃俱搖落年運而往秋復

冬念念元知已非昨癡人顧欲吝此生放翁憫汝笑
絕纓髮毛爪齒俱外物天地大化終無情我貧無以
遺兒子惟有一言持付爾仕宦要能當百挫為農飢
死無游惰

插花

有花君不插有酒君不持時過花枝空人老酒戶衰
今年病止酒虛負菊花時早梅行可探家醞綠滿卮
君不強一醉歲月復推移新詩亦當賦勿計字傾歎

雨過行視舍北菜圃因望北村久之

蔬畦躡屐愜幽情檢校園丁日有程得雨尚慳須灌
溉我來時聽枯槁聲

又

吳牛齧艸臥斜陽烏白青紅未飽霜急趁路乾來寓
目十分閑事却成忙

居三山時方四十餘今三十六年久已謝事而
連歲小稔喜甚有作

自問湖邊舍衰殘倦仰中謀身悲日拙造物假年豐
稅足催科靜禾登債負空社醅邀里巷臘肉飫兒童
衣及霜晨贖爐先雪夜紅陂塘趨版築垣屋訖宮功
盜息時雍象人淳太古風退夫無一事鼓缶伴鄰翁

幽居

百事徒勞無一成幽居偶得稱幽情傍籬叢枳寒楮
綠遶舍流泉夜有聲飢坐炮燔多巨栗醉歸懷袖有
新橙愛閑自是從來癖敢竊區區納祿名 予自僞曹罷
歸十年不出戶乃請挂冠

曉晴肩輿至湖上

多稼如雲穫併空牛闌樵擔畫圖中梧桐已逐晨霜
盡烏白猶爭夕照紅脫網噉啜犇遠浦避鷹撲握保
深叢旗亭人語燈初上一醉何妨野老同

戲作野興

省事貧猶富寬懷客勝家充虛一簞飯遺睡半甌茶
有興閑垂釣逢歡醉插花臬橋亦可死處處是生涯

又

擾擾亭中客悠悠局上棋所遭元有命自苦竟何爲
馮衍深尤婦陶潛過責兒奇文雖可貴寢語豈非癡

又

久已挂吾冠江邊歲又殘心惟無媿忤身取不飢寒
小酌三杯足安居一席寬東岡有泉脈攜杖試尋看

又

今年病微減耕稼樂江村燈火耿破屋歌呼圍老盆
常時但葵莧盛饌有雞豚客散茅簷寂蹒跚自閉門

又

出戶語鄰叟與卿同一愚逢人卽如舊臨事不勝迂
髮白花猶插囊空酒亦沽回思五十載何處有榮枯

又

有酒皆堪醉無山不可廬遂初成近賦孤憤悔前書
湘寺分經峽廬山寄藥鉏江頭霜葉滿詩興屬騎驢

道室書事

榻上一琴橫中函太古聲丹砂燒已死芝艸種初生
道勝魔軍破方靈疾豎平明朝有蜀使細字報青城

行飯至潮桑堰東小市

飽食無營是處遊偶然來到埭東頭芒鞋也似雙鳧
快漁艇真如一葉浮樵擔行歌衝眼色酒旗遮路賣
新篔任朱二老今安在數息黃茅擁故丘任朱皆居堰

旁與予同乙巳生今死矣

負日戲作

困來兩臂似膠黏底怪吳人號黑甜安得他生不識
字朝朝就日臥茅簷世傳揚大年見老兵負日不覺曰快活因

問汝識字否對曰不識大年曰如此更快活也

遊西村

昨夜雨多溪水渾不妨喚渡到西村出遊始覺此身
健無食更知吾道尊藥笈可賒山店酒筇枝時打野

僧門歸來燈火茅簷夜且復狂歌鼓盃盆

初冬

平生詩句領流光絕愛初冬萬瓦霜楓葉欲殘看愈
好梅花未動意先香暮年自適何妨退短景無營亦
自長況有小兒同此趣一窗相對弄朱黃

遺懷

寬袂新裁大布裘低篷初買小漁舟舊交只有青山
在壯志皆因白髮休漫道臥巖吞貉子安能浙米向

矛頭山園芋栗秋方熟一飽今知本易謀

策杖

山翁老病入腰膺坐覺諸兒行步奔暫出衡門須策
杖千回上樹更堪論

汲東山下井

從來耽酒須微祿絕祿三年酒盞疎百尺轆轤新浚
井一杯聊慰渴相如

園中作

誰采枕椰寄一枝北來萬里爲扶衰風光最愛初寒
候懷抱殊勝未老時閑引微泉成曲澗盡除枯蔓補

疎籬花前自笑童心在更伴羣兒竹馬嬉

又

病侵衰境頻須藥日漏寒雲旋作晴幽鳥喚回殘枕
夢蠻童扶下野堂行書生本自安窮處豐歲何妨樂

太平新買西村兩黃犢閑招鄰曲議春耕

園中

霜凋樺柳枝無葉風折安榴子滿房冬日園林元自
好老人懷抱自多傷

短篷

射的山前繫短篷快如魚鳥出池籠試臨清鏡枯顛
茁不待丹砂兩頰紅逐妄百年真自苦造微一日有
餘功不須更說岷峨約已覺蓬壺在眼中

自適

遠遊思里巷久困念耕桑家釀傾醇碧園蔬摘矮黃
小槽用豨豆麴矮黃吳中菜名利名因醉遠日月爲閑長今

歲雖中熟吾徒亦小康

堂東小室深丈袁半之戲作

小室舍東偏滿窗朝日妍研池生細浪香岫起微煙
欲極圖書樂少須冰雪天猶勝禪榻上僅僅占三椽
禪僧自謂三條椽下六尺單前

獨處二首

蓬門終日閉寂寂少人聲納祿知身貴傳家覺責輕
朝餐烹芋糝夜坐聽松明刻却彈棋局此心如砥平
白穩敷牀穩烏藤倚壁斜夜深惟畫字燈暗不成花
似客猶居里如僧未出家孤村夜無月何事有啼鴉
探梅至東村

乞得殘骸已累年柴車破弊不堪懸閑愁正要供詩
思小疾何妨省酒錢忍事漸多心混混貯書雖少腹
便便今朝偶有尋梅興春色爭來拄杖前

讀史

青燈耿耿夜沉沉掩卷凄然感獨深恤緯不遑嫠婦
歎美芹欲獻野人心孤忠要有天知我萬事當思後
視今君看宣王何似主一篇庭燎未忘箴

漁翁

船入蘆花日莫時雙瞳炯炯鬢如絲世間豈少磻溪
叟老向煙波人不知

又
文叔君房兩故人可憐俱作白頭新桐江歸伴隣翁
醉一笑相看意却真

寓言

濟劇人才易扶顛力量難為謀須遠大守節要堅完
氣與秋天杳胸吞夢澤寬方知至危地自有泰山安

又

出仕謝招麾還家美蕨薇深居全素志大路息危機
世變生呼吸人情忽細微牀頭周易在捨此欲安歸

又

山海二家市風煙五畝園藜藿均玉食茅屋陋朱門
耕釣此身老乾坤吾道尊故交淪落盡至理與誰論

夜四鼓睡覺起行簷間觀新作南籬

星斗闌干天宇清起披短褐繞廊行葉聲颯颯飛霜
重籬影疎疎疎落月明沙冷斷鴻投別浦風高殘漏下
孤城衰遲自笑情猶在一首新詩取次成

客去追記坐間所言

征西懷罷幾經春數息兒音尚帶秦每為後生談舊
事始知老子是陳人建隆乾德開王業溫洛榮河厭
虜塵倘得此生重少壯臨危敢愛不貲身

疇昔

行路悲疇昔驅車每戴星數殘雙隻堪歷盡短長亭
飛蓋交迎錢聽歌半醉醒至今湖海夜猶夢隴山青
飲牛歌

門外一溪清見底老翁牽牛飲溪水溪清喜不污牛
腹豈畏踐霜寒墮趾舍東土瘦多瓦礫父子勤勞藝
黍稷勿言牛老行苦遲我今八十耕猶力牛能生犢
我有孫世世相從老故國人生得飽萬事足捨牛相
齊何足言

牧羊歌

牧羊忌太早太早羊輒傷一羊病尚可舉羣無全羊
日高露晞原艸綠羊散如雲滿川谷小童但摺竹一
枝豈必習詩知考牧

生日子聿作五字詩十首為壽追懷先親法然

有作 十月十七日

我生尚及宣和末頽廢頗驚歲月移負米養親無復
日蓼莪廢講豈勝悲渡江百口今誰在抱恨終身祇
自知文字虛名何足道樽前媿汝十章詩

園中書觸目

氣候今年晚濃霜始此回殘梧未全槁晚菊有初開
烏柏先楓赤寒鴉後雁來西窗夕陽暖摘橘薦新醅
烏柏未霜而葉丹寒鴉必得霜乃至

養生

武丁命傳說治國如和羹天亦命放翁用此以養生

抑過補不足輔相其適平千歲汝自有不必師廣成
齋中雜興

八十頽齡安所歸蕭然終日掩柴扉清心始信幽棲
樂窮理方知俗學非山果滿筐猿食足石泉通笕藥
苗肥衰翁莫道渾無事掃葉歸來又落暉

又

倒掩衡門手自關老身著在亂書間有詩尚作清宵
祟無事能妨白日閑薄莫上樓聊試步經旬止酒自
醜顏兒曹莫笑衰翁懶擬遍淮南大小山

江上

禹會橋頭江渺然隔江村店起孤煙冷雲垂野雪方
作斷雁叫羣人未眠萬里漂流歸故國一生蹭蹬付

蒼天莫年尚欲師周孔未遽長齋繡佛前

追憶征西懷中舊事

大散關頭北望秦自期談笑掃胡塵收身死向農桑
社何止明明兩世人

又

小獵南山雪未消繡旗斜卷玉聽驕不如意事常千
萬空想先鋒宿渭橋

又

憶昨王師戍隴回遺民日夜望行臺不論夾道壺漿
滿洛筍河魴次第來在南鄭時關中將吏有獻此二物者

又

關輔遺民意可傷蠟封三寸絹書黃亦知虜法如秦
酷列聖恩深不忍忘關中將校密報事宜皆以蠟書至宣司

冬夜

颼颼黃葉欲辭枝況著霜風抵死吹投老難逢身健
日讀書偏愛夜長時孤村月白聞衣杵破竈煙青煮
芋糜不是用心希陋巷為儒自合耐寒飢

冬日

室中恰受一蒲團也抵二千世界寬上策莫如局戶
坐苦閑猶復取書看蔬青飯軟枝梧老窗白爐新準

備寒堪笑此翁幽獨慣却嫌兒女話團圓

冬朝

風入園林徹夜鳴曉看黃葉與堦平篝爐火著衣初
暖爨釜薪乾粥已成潔己工夫先盥頰正心事業始
冠纓聖賢雖遠詩書在殊勝隣翁擊磬聲 釋氏謂銅鉢
為磬

冬莫

曉角昏鐘為底忙豈容老子更禁當乘除富貴惟身
健補貼光陰有夜長臨水小軒初見月滿庭殘葉不
禁霜巴江尺素何時到剩著新詩寄斷腸 張梓州書久
不至

風月

鏡中日日鬢毛衰八十還思七十時風月不知人意
緒酒醒夢斷又催詩

落葉

萬瓦清霜伴月明臥聽殘漏若為情無端木葉蕭蕭
下更與愁人作雨聲

邪風

少學詩三百邪風最力行春前耕犢健節近祭猪鳴
簷日桑榆暖園蔬風露清金丹不須問持此畢吾生

擁爐不出輒終日自嘲

柴門木落葉成堆十日元無一再開書坐藏多為飽
祟詩緣吟苦作窮煤兒言山圍當收栗僧約溪橋共
探梅堪笑此翁推不動地爐無火畫寒灰

嘲梅未開

梅蕊如紅稻中藏無盡香何時來鼻境更待幾番霜

劍南詩稿卷第四十八終

劍南詩稿目錄
卷第四十九

自嘲 解嘲 野興 枕上 遠遊 晚遊
夜坐 酒熟醉中作短歌 冬夜讀書有感
散步湖上至野人家 對食戲詠 昨非 遂
初 小雨偶出隣里小兒競隨吾後不知其意
何也 書喜 書房雜書二首 寒夕 讀經
讀史 讀劉蕡策 雨霰作雪不成大風散雲
月色皎然 中夜苦寒 示子孫二首 早梅
縱筆二首 歲莫雜感四首 自責 懷舊
用昔人蜀道詩韻 出遊 辛酉冬至 冬至
後一日書 客至 子聿入城 降魔 冬日
二首 客去 自勉四首 午晴至園中 七
姪歲莫同諸孫來過偶得長句 苦寒 閑中
書適二首 復湖 梅花絕句四首 跋馮氏
蘭亭二首 十二月二日夜夢與客竝馬行黃
河上憩於古驛二首 倚樓 讀書 讀史
閒遊 日莫 省事 雪中作 夢韓无咎王
季夷諸公 晴窗讀書自勉 冬夜讀史有感
大寒 自詠 晚興 雪後寒甚 雪晴步
至舍傍 訪隱者 村野 初夜 雙松 兀
兀 殘曆 戒言 聞松風有感 遣興二首
有道流過門留與之語頗異口占贈之 閒
記老境二首 小飲梅花下作 門外野望
自題傳神 歲莫貧甚戲書 晚晴閒步隣曲
間有賦 誦書示子聿二首 十二月二十九
日夜半雨雪作披衣起聽 辛酉除夕 除夕

劍南詩稿卷第四十九

宋陸游務觀

自朝
僻學論交少貧居卜地偏不逢方謝事垂老旋希僂

兀兀醒如醉昏昏晝亦眠却慚農與圃一飽錢餘年
解嘲

一壑棲遲久多生習氣消行藏無媿怍夢覺兩逍遙
倩鶴傳山信疏泉洗藥苗晚來幽興極乘月過溪橋

野興
晨炊畚粟薦園蔬默計生涯已有餘舉世方誇稽古
力滿懷空貯活人書悶呼赤腳行沽酒出遣蒼頭旋
儼驢不為歸休習疎懶愛閑元與市朝疎

枕上
送盡小窗月數殘孤戍更清詩時自至幽夢久方成
衣杵斷還續燈花落復生細衾賸得暖紙帳不知明

遠遊
老子平生喜遠遊流塵不惜闌貂裘江亭吹笛三巴
夜關路騎驢二華秋但使澄心同止水自知幻境等
浮漚悠然飽聽松風睡勾漏丹砂底用求

晚遊
垣屋參差出溝溪曲折通亂鴉空際黑落日竹間紅
軋軋輿竿語搖搖橋脚風吾行本無定隨意入空濛

夜坐
流落知聞絕歸休寵辱空酒狂寧限老詩思正須窮
活火生新焰殘燈委碎紅平生會心處正在兀然中

酒熟醉中作短歌
陸子壯已窮百計不救口蜀道如上天十年厭奔走
還鄉困猶昨負郭無百畝雖云飢欲死亦未喪所守
虛名一畫餅陳迹幾芻狗但思從壯士大獵雲夢藪
長戈白如霜爛漫載牛酒箭穿乳虎立車轡蒼兜吼

歸來數禽獲毛血灑戶牖人生貴適意富貴安可苟
冬夜讀書有感

落葉殘蕪又一冬老人光景易忽忽不論病惰耕桑
業但恨貧分學問功馬昔騰驥離冀北鶴今憔悴返
遼東六經未與秦灰冷尚付餘年斷簡中

散步湖上至野人家
湖上霜高水落時一藤信步出尋詩妄誇強健真堪
笑喚作清閑亦自欺西塋又隨牛迹去東村常望鶴
巢知漁翁留客頻辭謝雞瘦難烹酒味漓

對食戲詠
瘦榼傾桑落毫杯點雨前冰梨頰似頰霜粟大如拳
洗瀟烹蔬甲攜鉏斷筍鞭餘年只此是切勿念腥羶

昨非
温飽從來與道違書生只合臥牛衣老狐五百生前
錯孤鶴三千歲後歸舌自生肥勝玉食腰常忘帶沉
金圍一官彭澤曾何有元亮還家悔昨非

遂初
貧士善用短屏居常自如出尋鄰叟語歸讀古人書
過店亦沽酒登山時跨驢非關傲塵世聊欲遂吾初
小爾偶出隣里小兒競隨吾後不知其意何也

雲生海澨初飛雨日漏山椒旋作晴笠笠芒鞋橋下
路兒童爭逐放翁行

書喜
堪笑龜堂老更頑天教白髮看青山家居禹廟蘭亭
路詩在林逋魏野間略計未嘗三日醒細推猶得半
生閑今年況展南湖面朝借樵風莫可還時方有朝命
復鏡湖

書房雜書
歛版一何久懸車已後時狂醒醒始悔窮獨老方知
世外乾坤大林間日月遲猶須采藥去不媿鹿門期

又
面槁髮鬢衰殘百不能夜房侵戶月晨硯滿池冰

藥債多於酒蔬餐薄過僧年深拄杖折自斫澗邊藤

寒夕

夜扣銅壺徹日吟了無人會此時心燈殘焰作孤螢
小火冷灰如積雪深風急江天無過雁月明庭戶有
疎砧此身畢竟歸何許但憶藏舟黃葦林

讀經

半升粟飯養殘軀晨起衣冠讀典謨莫謂此生無用
處一身自是一唐虞

讀史

民間斗米兩三錢萬里耕桑罷戍邊常使屏風寫無
逸應無烽火照甘泉

讀劉蕡策

志士仁人 一作人人 氣薄雲唐家惟有一劉蕡看渠
放逐蛇龍手那肯驅蠅與拍蚊

雨霰作雪不成大風散雲月色皎然

數間茅屋寄蓬蒿天遣來歸息我勞月可一庭陳素
練風酣萬木起驚濤病侵齒髮才雖盡酒挾江山氣
尚豪安得人間掣鯨手共提筆陣法莊騷 韓文公以騷
配莊古人論文所未嘗及也

中夜苦寒

困窮全素節羸老愈剛腸報國永無日飯蔬那自傷
布衾如鐵冷冬夜抵年長推枕歌梁甫中庭月似霜

示子孫

為貧出仕退為農二百年來世世同富貴苟求終近
禍汝曹切勿墜家風

又

吾家世守農桑業一挂朝衣即力耕汝但從師勤學
問不須念我叱牛聲

早梅

東塢梅初動香來託意深明知在籬外行到却難尋

縱筆

晨炊躬稼米夜讀世藏書俯仰無多媿心知死有餘

又 破困供飯足陋屋著身寬小蹇勤芻秣時時一跨鞍

歲莫雜感

衰髮如枯菅殘齒如敗屐取米鷲薄糜便足度晨夕
欲知死遠近不必訊龜策四序忽已過如數埃雙隻
發裝陌上亭具食水邊驛會當一日歸豈有終作客

又

天風吹雲片大者如飛鷗豈惟平溝坑直恐羶馬牛
百錢買薪蒸千錢贖褐裘雖無狐貉溫要免溝壑憂
小兒為我言幸可具杯甌園蔬亦復佳過足翁豈求

又

歲盡霜雪稠相望僵萬木天豈私梅花獨昇此芬馥
高標我自有何憾老空谷人言和羹實晚或參鼎鍊
哀哉世論卑汗我塵外躅誰能補被之寫真配修竹

又

我少雖嗜書賦性實慵惰初志略未訓白髮已無那
吾兒猶好勇世事如棄唾呻吟編簡中徹日或未臥
爾來愈自勵日讀易一過勉終大學功吾道要負荷

自責

晨起登堂正幅巾蕭然聊欲養吾神凡心未免更詩
字習氣猶思識古人買屬為登山寺去徹燈緣愛月
窗新何時一切消除盡終作無懷上古民

懷舊用昔人蜀道詩韻

曩自白帝城一馬獨入蜀晝行多水湄夜宿必山麓
時聞木客嘯常憂射工毒蜿蜒蛇兩頭蹙蹙一足
豈惟耳目駭直恐性命促稍歷葭萌西遂出劍閣北
奴僵不敢訴馬病猶盡力我亦困人客一日帶屢束
最憶蒼溪縣送客一亭綠豆枯狐兔肥霜早柿栗熟
酒酸壓查梨妓野立土木主別意益勤我去疲已極
行行求旅店借問久乃得溪聲答歌長燈焰照影獨
村深寒更甚薪盡燒簣竹須與風雨至終夕苦漏屋
於時厭道途自誓棄微祿猶幾二十年始謝祝史職

予四竊祠祿乃謝事君思念篤老內閣使寓直亦思秋豪
報力備執黍稷却尋少時書開卷有慚色

出遊

僧院軒窗酒市樓過門自入不須留恰來竹下尋棋
局又向沙邊上釣舟詩放不能諧律呂書狂猶足走
蛟虬秦碑禹窆風煙外一弔興亡萬古愁

辛酉冬一至

今日日南至吾門方寂然家貧輕過節身老怯增年
鄉俗謂冬至飯即添一歲 畢祭皆扶拜分盤獨早眠惟
應探春夢已繞鏡湖邊

冬至後一日書

霜霰新冬後年齡大耋時功名久無夢文字略存詩
丘壘歸何憾琴書付有兒癡人癡到底更欲數期頤

客至

何處軒車客能來桑麥村一奴先入市此老自磨門
野果嘗皆澀村醪壓尚渾殘年亦何恨治世作黎元

子聿入城

小硯寒生凍孤燈翳復明衰翁守微火稚子隔重城
日落林無影舟行水有聲詩家忌艸艸得句未須成

降魔

老閱人間久曾降百萬魔悲憂誠害性喜悅亦傷和
省事常須勉忘懷得最多當年未知此無奈月明何

冬日

故里躬耕後頽齡老及前開門無客至得句有僧傳
忽忽身如夢迢迢日似年會當乘小雪夜上剡溪船

又

客至惟清坐真貧不是慳援琴排遣悶合藥破除閑
引鶴時穿屐逢梅一破顏怪來寒徹骨夜雪冒南山

客去

相對蒲團睡味長主人與客兩相忘須臾客去主人
覺一半西窗無夕陽

妄出真成錯歸耕惜已遲褐溫貧始覺飯美淡方知
身外元無易情中自有詩窮源那得止瞑目以為期

又

自信直如致殘年偶得全老猶嗤佞佛貧亦諱言錢
日莫勤鞭策塵埃痛洗滌仍須語兒子此事要家傳

又

臂弱傳鈔少心煩記問衰讀書猶自力愛日似兒時
章句分無憾聲形講不遺明年幸強健閉戶有餘師

又

歸老寧常逸時時學荷鉏室雖無長物園尚有餘蔬
壯志誠衰矣貧居亦晏如為農當世業安用築門閭

午晴至園中

老不禁寒起每遲出門蕭散午晴時春回九地梅先
覺霜賈千林竹不知藥圃采苗芒屨溼石泉照影角

巾歌歸來未過西簷日袖手悠然獨詠詩

七姪歲莫同諸孫來過偶得長句
兩塾林宗一角巾蕭條村路竝煙津四朝遇主終身
困八世為儒舉族貧行摘殘蔬循廢圃臥聞飢雀噪

空困封胡羯末皆佳甚刺喜團樂一笑新

苦寒
終日頗添季子裘經旬不上仲宣樓摩挲酒榼雖堪
喜疎索梅花未免愁正苦冰生退吟筆却思雪作潤

耕疇乘除擾擾殊多事獨擁青氈覓睡休

閑中書適
棋廢機心息書捐笑睡多客來時淡話酒後亦高歌
甚欲江湖去無如老病何平羌半輪月依舊照漁蓑

又

乞得殘骸久天涯一秃翁飄分春瓮綠甌絕太倉紅
短褐便冬暖長歌樂歲豐老腰那可折步步賴枯筇

復湖

世事相尋敗與成湖中春鏹浩縱橫共知陂壤行當
復敢恨臺高既已傾小隱山園在湖中近聞亭觀皆廢天鏡

忽看孤月墮樵風長送片帆輕下臨萬頃如雲稼從此年年有頌聲

梅花絕句

體中頗覺不能佳急就梅花一散懷衝雨涉溪君會否免教塵土瀉青鞋

又

高韻知難折簡呼溪頭掃地置芳壺梅如解語應惆悵昔日名流一箇無

又

折得梅花古渡頭詩凡却恐作花羞清樽賴有平生約爛醉千場死即休

又

疎枝冷蘂誰能畫楊叟江西舊擅名今日東窗閑拂拭去人一尺眼先明

跋馮氏蘭亭

堂堂淮陰侯夫豈曾等伍放翁評此本可作蘭亭祖唐古石刻本

又

蘭紙藏昭陵千載不復見此本得其骨殊勝蘭亭面

中山舊本山谷有句云俗書喜作蘭亭面

十二月二日夜夢與客竝馬行黃河上憩於古驛

竝轡徐驅百里中雲開太華翠摩空是間合有神靈在七十餘年墮犬戎

又

河濱古驛關重門雉兔紛紛黍酒渾吾輩豈應徒醉飽會傾東海洗中原

倚樓初三日

莫雲細細鱗千疊新月纖纖玉一鉤歎息化工真妙手衝寒來倚水邊樓

讀書

先親愛我讀書聲追慕慈顏涕每傾萬事到前心盡

類一編相向眼偏明致君正使違初志為己猶當畢此生更祝吾兒思早退雨蓑煙笠事春耕

讀史

夜對遺編歎復驚古來成敗浩縱橫功名多向窮中立禍患常從巧處生萬里關河歸夢想千年王霸等棋枰人間只有躬耕是路過桑村最眼明

閑遊

已破梅花一兩枝竝溪穿塢每歸遲老軀健似中年日鄉俗淳如太古時上疏清狂非復昔據鞍矍鑠欲誇誰一端尚被鄰翁笑無事長吟費撚髭

日莫

樸學無關道廢興更堪衰與病相乘眼看白日西南去繩繫膠黏總不能

省事

老去終年臥艸廬事皆省盡略無餘塵留鼠跡猶噴拂風作飄聲固不除興發舊醅何害醉詩成拙筆亦堪書投牀睡美悠然覺作計今知本不疎

雪中作

鬢毛無奈歲華催一笑登臨亦樂哉平地忽成三尺雪遶湖何啻萬株梅雲山疊疊朝憑閣簾幙沉沉夜舉杯節物鼎來方自此酥花綵勝待春回

夢韓无咎王季夷諸公

積雪欲照夜老難方唱晨諸公迹已久幽夢忽相親話舊慙慙意追歡見在身悠然又驚覺撫枕一悲辛

晴窗讀書自勉

今日雪始晴逸舍為鳥樂老來少睡眠雖病亦早作豈無案上書可與共寂寞弦歌始風雅次第親灑壘高明仰河漢曲折窮脈絡唐虞誠未遠珠泗亦如昨

委佩聞都俞避席承博約膏肓幸施砭幽閱欣納鑰天全魯壁藏不墮秦火虛吾生百世餘其敢負所託

冬夜讀書有感

短檠膏涸夜將殘感事懷人興未闌酌酒淺深須自

度圍棋成敗有傍觀斷酒作飯終年飽大布裁袍稱
意寬世上閑愁千萬斛不教一點上眉端

大寒

大寒雪未消閉戶不能出可憐切雲冠局此容膝室
吾車適已懸吾馭久罷叱拂塵取一編相對輒終日
亡羊戒多岐學道當致一信能宗闕里百氏端可黜
爲山儻勿休會見高峯嶽顏齡雖已迫孺子有美質
自詠

滿梳晨起髮凋零亭午柴門未徹扇萬事忘來尚憂
國百家屏盡獨窮經補枯倒壑雖無用龜老搭牀故
有靈夢裏騎驢華山去破雲巉絕數峯青十二月十二
夜夢實有此政識之

晚興

斷芋挑蔬自鬻羹雪簷收滴莫寒生不嫌終日無來
客時聽荒園斲木聲

雪後寒甚

日破重雲出春從淺步來未融樓北雪先綻水南梅
屏護清吟硯缸鳴乍熟酷平生羨李愬入蔡夜銜枚

雪晴步至舍傍

雪消還似雨冰釋旋成泥視菜荒陂北尋梅小塢西
牆陰新犢臥庭際午雞啼幽興殊無極歸來日已低
訪隱者

村野

湖曲有隱者時時容叩門人如釣渭叟地似避秦村
笑語驚塵遠衣冠古製存山寒歸路晚相與盡瓢樽
村野易過日閉門心自欣一身猶逆旅萬事固浮雲
病厭詩爲祟閑憑酒策勳灌園雖舊業隨事不須勤

初夜

初夜多幽興危闌偶獨憑月陞星盡沒風勁雪重凝
身似遊邊客心如退院僧奇寒不可耐歸對北窗燈

雙松 父老言紹興中所植

東岡天矯兩蒼龍千尺蟠空黛色濃六十餘年松若

此誰知我更老於松

兀兀

兀兀孤村客悠悠兩世人夢忘身潦倒醉覺膽輪困
故里簪纓換都門巷陌新聞臨安火後興衰漸畢餘年猶
有幾撫事一傷神

殘曆

殘曆不盈紙苦寒侵弊裘歲猪鳴屋角鼙鼓轉街頭
未死猶當學長貧肯復憂雪晴農事起且復議租牛

戒言

饒舌憂患始銘膺勸戒深談空摩詰默對酒子光瘖
久已忘齊語何嘗解越吟悠然嫌未足更撫絕弦琴
聞松風有感

遣興

重位每憂身後罵虛名不救眼前飢直須采藥名山
去日夜松風無歇時

又

侯印從來非所圖赤丁子亦不容呼著低法對新棋
敵量減愁逢舊酒徒生世豈能常役役酣歌且復和
鳴鳴扁舟到處皆吾境莫問桐江與鏡湖

又

家住城南剡曲傍門前山色蘸湖光三朝執戟悲年
往二頃扶犁樂歲穰名姓已隨身共隱文辭終與道
相妨子孫勉守東臯業小甌吳粳底樣香

有道流過門留與之語頗異口占贈之

萬里縱橫自在身偶然來看剡溪春取將月去閑娛
容攜得雲歸遠寄人縮地不妨遊汗漫移山隨處對
嶙峋須君更出囊中劍一爲關河洗虜塵

閑記老境

謝事久懸車爲農懶荷鋤破裘寒旋補殘髮短猶梳
槁木忘榮謝閑雲任卷舒心知老當逸先罷夜觀書
又

嫌闌不入市怕寒稀出門擁爐愁兀兀投枕睡昏昏
柳色新如染梅花香滿村猶嗟未免俗薄酒誑空樽

小飲梅花下作

脫巾莫數髮成絲六十年間萬首詩予自年十七八學作詩今六十年得萬篇排日醉過梅落後通宵吟到雪殘時偶容後死寧非幸自乞歸耕已恨遲青史滿前閑即讀幾人爲我作著龜

門外野望十二月二十五日

野迥浮煙碧門深反照紅柳邊雙鷺渚天際萬鴉風僧唄家禳疫神船社送窮豐年隨處樂忘却鬢如蓬

自題傳神

識字深村叟加巾下版僧檐挑雙舛屢壁倚一烏藤得酒猶能醉逢山未怯登莫論明日事死至亦騰騰僧頌云今日騰騰任運明日任運騰騰

歲莫貧甚戲書

阿堵元知不受呼忍貧閉戶亦良圖曲身得火纔微直槁面持杯祇暫朱食案闌干堆首偕褐衣顛倒著天吳誰知未減麤豪在落筆猶能賦兩都

晚晴閑步隣曲間有賦

湯沐身輕念出遊近春原野霽煙浮樓陰雪在玉三寸雲罇月生銀一鉤窮巷客稀常足睡莫年詩退不禁愁鄉隣無事冬耕罷獨倚籬門數過牛

誦書示子聿

乃翁誦書舍東偏吾兒相和山之巔翁老且衰常早眠兒聲夜半方泠然楚公著書數百編少師手技世世傳我生七十有八年見汝任此寧非天

又

易傳三聖至仲尼炎炎秦火乃見遺經中獨無一字疑正須虛心以受之世衰道散吁可悲我老欲學無碩師父子共讀忘朝飢此生有盡志不移

十二月二十九日夜半兩雪作披衣起聽

臘雪瑞豐登春兩相發生二者皆可賀愛此打窗聲披衣起靜聽蕭蕭亂疎更豈惟肺渴蘇耳目爲一清孤燈不結花相對翳復明明朝遂除夕歲月驚蟬蛩

辛酉除夕

衰境遇白雞自分墮幽墟造物偶見寬俯仰復歲除駸駸迫耄期凜凜無根株孰知尚堅頑壯者有不如銅瓶垂碧井手自浸屠麻松煤染兔穎秉燭題桃符登梯挂鍾馗祭竈分其餘僮奴數我健却立不敢扶新春無五日節物傾里閭羅檐插紗帽一醉當百壺

除夕

六聖涵濡作幸民明朝七十八年身門前西走都城道臥看無窮來往人

劍南詩稿卷第四十九終

劍南詩稿目錄

卷第五十

開歲 箕卜

梅花絕句六首

立春前一日

作 立春日

送子龍赴吉州掾

正月五日

出遊

六日雲重有雪意獨酌

閒甚戲作

莫笑

初春雜興五首

春曉

書感 壬戌

正月十四日

十五日

高枕

送施武子通

判 老學菴自規

雨夜

子聿以剛日讀易

柔日讀春秋常至夜分每聽之輒欣然忘百憂

作長句示之

記夢

夜賦 杜叔高秀才雨

雪中相過留一宿而別口誦此詩送之 曉賦

雪後龜堂獨坐四首

二月一日作

過東

鄰歸小憩

寄呂子和南廂

自述

呂氏子

夔郎求詩

新晴

晚步湖堤歸偶作

春來

食不足戲作

散步湖隄上時方濬湖水面稍

渺瀰矣

老學菴

春曉 龜堂雨後作 書

感 後書感

村居書喜

中春偶書

夜泊

東岡櫻桃已過殊不知 別嚴和之二首

齋中雜題四首

春晚

社日小飲

山茶

春夜 春遊

北窗睡起

北窗懷友 舟中

作二首

湖村春興

鄰餉 久雨

登山

讀易 村居書事二首

春晚書村落間事

雜興六首

南堂獨坐

春雨示鄰曲

讀書

新晴賞牡丹

對酒

病起遇晴有作 定

命 假山小池二首

春欲盡天氣始佳作詩

自娛 自詠

西村勞農

題廬陵蕭彥毓秀

才詩卷後二首

舍北溪上垂釣

三月二十

二日作

劍南詩稿卷第五十

宋 陸 游 務 觀

開歲

綠襦新畫衛門扉，賀刺相欺可累欬。賣困不靈仍喜睡，送窮無術又來歸。相尋蠶市人何在，爛醉墓津事亦非。惟有禹祠春漸好，從今剩判典春衣。蠶市成都正初故事，墓頤津在眉山，亦邦人正月宴遊之所。

箕卜

孟春百艸靈，古俗迎紫姑。厨中取竹箕，冒以婦裙襦。豎子夾扶持，插筆祝其書。俄若有物憑，對答不須臾。豈必考中否，一笑聊相娛。詩章亦間作，酒食隨所須。興闌忽辭去，誰能執其祛。持箕畀麗婢，棄筆臥牆隅。几席亦已徹，狼藉果與蔬。紛紛竟何益，人鬼均一愚。

梅花絕句

幾年不到合江園，說著當時已斷魂。只有梅花知此恨，相逢月底却無言。

又

當年走馬錦城西，曾為梅花醉似泥。二十里中香不斷，青羊宮到浣花溪。

又

聞道梅花圻曉風，雪堆遍滿四山中。何方可化身千億，一樹梅前一作翁。一作花一放翁

又

小亭終日倚闌干，樹樹梅花看到殘。只怪此翁常謝客，元來不是怕春寒。

又

亂簦桐帽花如雪，斜挂驢鞍酒滿壺。安得丹青如顧陸，憑渠畫我夜歸圖。

又

紅梅過後到細梅，一種春風不並開。造物無心還有

意引教日日放翁來

立春前一日作 壬戌開歲四日立春

開年化日已舒長，漸見風和鳥變吭。冒土萱芽抽嫩綠，拂橋柳色弄輕黃。重溫壽酒磨廚臘，探借春盤餅餌香。不入城門今幾歲，遙知車馬正匆忙。

立春日

日出風和宿醉醒，山家樂事滿餘齡。年豐臘雪經三白，地暖春郊已遍青。菜細簇花宜薄餅，酒香浮螳瀉長瓶。湖村好景吟難盡，乞與侯家作畫屏。

送子龍赴吉州掾

我老汝遠行，知汝非得已。駕言當送汝，揮涕不能止。人誰樂離別，坐貧至于此。汝行犯胥濤，次第過彭蠡。波橫吞舟魚，林嘯獨脚鬼。野飯何店炊，孤權何岸檣。判司比唐時，猶幸免笞箠。庭參亦何辱，負職乃可恥。汝為吉州吏，但飲吉州水。一錢亦分明，誰能肆譏毀。聚俸嫁阿惜，擇士教元禮。我食可自營，勿用念甘旨。衣穿聽露肘，履破從見指。出門雖被嘲，歸舍却睡美。益公名位重，凜若喬嶽峙。汝以通家故，或許望燕几。得見已足榮，切勿勿有所啓。又若楊誠齋，清介世莫比。一聞俗人言，三日歸洗耳。汝但問起居，餘事勿挂齒。希周有世好，敬叔乃鄉里。豈惟能文辭，實亦堅操履。相從勉講學，事業在積累。仁義本何常，蹈之則君子。汝去三年歸，我儻未即死。江中有鯉魚，頻寄書一紙。

正月五日出遊

久作閑人不慣愁，新春天氣更清柔。未為瓊海千年別，且繼斜川五日遊。細柳拂頭穿野徑，落梅黏袖上漁舟。此身定去神仙近，倚遍江南賣酒樓。

六日雲重有雪意獨酌

遍遊數澤一漁叻，盡歷風霜只縕袍。天為念貧偏與健，人因見懶誤稱高。地連海澨濤聲近，雲冒山椒雪意豪。偶得名鱗當痛飲，涼州那得直蒲萄。

閑甚戲作

酒盡樽樽腹書拋委架塵漸能閑過日始覺老催人
玉塵王夷甫金龜賀季真若論方外事終媿葛天民

莫笑

莫笑窮閭叟人生亦已稀衆中容後死險處得先歸

初服還韋布晨發笑蒺薇牀頭周易在捨此復嚙依

初春雜興

戲續春寒賦閑賡午醉詩煎茶小石鼎酌酒古銅卮
曝日龜浮沼營巢鶻墮枝村深無客過幽興與誰期

又

水長鷗初泛山寒茗未芽深林聞社鼓落日照漁家

渡遠呼船久橋傾取路斜客愁慵遠眺不是怯風沙

又

問途來野店秣蹇憩山郵何處無詩思平生慣旅愁
翩翩下鷗鷺點點散羊牛傳入王孫畫千金未易酬

又

故歲愁聽雨新春剩得晴暖催紅藥開漲入綠池平
遊馬行爭路華燈賣滿城江村獨無事戶戶及時耕

又

老病倦遊涉偶尋溪友期殘冰擁魚笱新暖入桑枝
山曠巨然畫煙村摩詰詩何人爲收拾媿我不能奇

春曉

嗟嗟雞號野昏昏月挂樓夢隨殘漏斷愁伴宿醒留
壯志看清鏡春寒著弊裘拂窗新柳色最憶錦江頭

書感

投老羈孤久臨觴感概頻關河疎舊友風雨敗新春
事固少如意天終能勝人所悲頭上髮不與柳條新

壬戌正月十四日

老子居然健上元如許晴湖平波不起天闕月徐行
散髮漁舟穩臨風野笛清安能擁笳鼓萬里將幽并

十五日

誰推圓鏡上天東桂影婆娑滿鏡中天宇更無雲一
點誰門初報鼓三通兒童艸艸杯盤喜鄰曲紛紛笑

語同逐祿豈能無聚散明年誰復伴衰翁

高枕

高枕閉看古篆香世間萬事本茫茫偶亡塞馬寧非
福太察淵魚恐不祥每與諸兒論今古常思百世業
耕桑危機正在黃金印笑殺初心繆激昂

送施武子通判

初入修門鬢未秋安期千里接英遊退歸久散前三
衆適住欣逢第一流只道升沉方異趣豈知氣類肯
相求龍鍾不得臨江別目斷西陵煙雨舟

老學菴自規

堯德被四表其本在身修江河水稽天發源乃涓流
人忍於搏蝨習熟且解牛象箸與玉杯漆器實其由
斯須失兢畏惡名溢九州始乎爲善士終可蹈軻丘
孰置汝太山孰擠汝汚溝降福孰汝私得禍孰汝讎
直狂在一念禍福皆自求易簣汝所知垂死勿情偷

兩夜

斷岸輕煙著柳條孤村小雨夜蕭蕭荒雞隔浦聲相
續短燭無風焰自搖朴學元知廢歲月殘生竟是老
漁樵最憐鬢畔千莖雪日日春風吹不消

子聿以剛日讀易柔日讀春秋常至夜分每聽

之輒欣然忘百憂作長句示之

顏朱已去鬢絲稠知復人間幾歲留正可牀頭著周
易安能車上說春秋齋鹽日映從兒好致誦更闌解
我憂時發一言常中理絕勝問事不能休

記夢

信命從來不問天經旬無酒亦陶然夢爲估客揚州
去水調聲中月滿船

夜賦

八十衰翁久挂冠今年無酒敵春寒亂雲入戶雨方
急斷雁叫羣燈未殘蠹簡幸存隨意讀蝸廬雖小著

身寬支離自笑心猶壯憂國憂家慮萬端

杜叔高秀才雨雪中相過留一宿而別口誦此

詩送之

久客方知行路難關山無際水漫漫風吹欲倒孤城遠雪落如從野寺寒莫挈衣囊投土室晨沾村酒挂驢鞍文章一字無人識胸次徒勞萬卷蟠

曉賦

雞晨非一唱鴉日每三鳴萬物各有役吾生何所營書編猶未掩窗紙已微明穉子勇過我琅琅誦易聲雪後龜堂獨坐

丈夫自重如拱壁安用人看一錢直簞食豆羹不虛受富貴那可從人得讀書萬卷行塊心幽有鬼神為君惜龜堂樂處誰得知紅日滿窗聽雪滴

又

兩手龜坼愁出袖閉戶垂帷坐清晝朝陽破雲雪漸消點滴無窮聽簷溜士生百行雖相補第一要能安飯糗詩書辛可教兒童勿使後人憐晚謬

又

牙齒欲落何足惜爛鬢黎羹自堪食屋穿不害氣吐虹客至從驚瘦如腊天公鑄汝亦已至春風裂面雪三尺濁醪傾罷仰屋歌尚支孫俸與徐積

又

閉門屋漏不可居出門雪泥深尺餘興闌已回刻溪權路滑罷借東家驢竹窗兀兀無與語澆愁賴有酒一壺眼花耳熱睡至夜吹火起讀殘編書

二月一日作

狼藉梅花委道傍山櫻已復占年光蒼消積雪時聞滴衣履殘爐賸得香老馬已衰寧識路寒龜未死且搯荆柴荆終日無來客賴有陶詩伴日長

過東鄰歸小憩

籃輿過鄰曲綠野喜新晴暖日生花氣豐年入碓聲築波鄉竭作買犢戶深耕歸舍還尋睡殘書傍枕橫寄呂子和南廂

聖代多名德君家不乏公還看短袍綠來躡軟塵紅

小忍便無事力行方有功官閑能念我時寄尺書東自述

藜藿安貧陋柴荆俯莽蒼露著朝筮易掃地晝焚香美睡天教懶長歌客怒狂歡然送餘日醉死亦何傷

呂氏子夔郎求詩

乃祖身兼將相崇諸孫玉立有家風此郎已復塵埃外它日相期氣類中行已勤勤須自省讀書疊疊要新功果能哮吼如獅子一瓣香應嗣放翁

新晴

兼旬不雨亦常陰一日新晴抵萬金浦面波紋春穀細橋頭柳色麴塵深關山滿眼愁千斛歲月催人雪一簪猶有強寬懷抱處午窗睡起聽鳴禽

晚步湖堤歸偶作

酒盡知難折簡呼出門仍苦要人扶殘梅委地香誰惜歸雁穿雲遠欲無日落牛羊猶被野農閑畚鍤正開湖還家寂寞西窗晚旋燎枯枝擁地爐

春來食不足戲作

飢臥誰能羨屬饜高懷飽食豈容兼分司祿在終難取脚監致仕當得分司祿須自請乃給遂置之東帛恩深獨不露頃有赦令賜致仕者果帛羊酒郡獨格不行衰謝形容無藥駐犇馳日月欠膠黏兒童拍手看翁醉山杏溪桃簇帽簷

散步湖隄上時方濬湖水面稍渺瀰矣

老覺人間萬事輕不妨閑處得閑行西山鳥沒莫雲合南浦隄平春水生孤操不渝無鶴怨淡交耐久有鷗盟先民幸處吾能勝生長兵間老太平邵堯夫自謂生於太平老於太平為太平之幸民彼豈知幸哉若子生於亂離乃老於太平真可謂幸矣

老學菴

老學衡茅底秋毫敢自欺開編常默識閉戶有餘師大節難危見真心夢寐知唐虞元在眼生世未為遲

春曉

強尋殘夢苦難成推枕捲藤繞舍行新漲生波漁艇
活晨曦送暖客衣輕煙迷芳草蒼茫色鶻占高枝嘖
咄聲老病自憐猶嗜學誦書家塾羨諸生新館一客諸
孫晨興入學誦書頌感

龜堂雨後作

澤國春多雨龜堂病少棕雖名舊朝士其實老耕農
一點葦間火數聲煙外鐘詩材故不乏處處起衰慵
書感

我欲哭窮途所懼世俗驚出門復入門掩淚且吞聲
唐虞邈難繼周孔不復生承學百世下我輩責豈輕
楊墨斥已殫釋老猶縱橫拔本塞其源力盡志未平
吾道如皦日薄食終必明一木雖獨立可支大廈傾
夷風方變夏孰能作長城卓哉易簣公垂死猶力行
後書感

貧賤終身志不移閉關涵泳賴書詩唐虞未遠如親
見周孔猶存豈我欺力學正須忘寢食少年誤計事
文辭爾來朋友皆雲散考質從誰盡所疑

村居書喜

紅橋梅市曉山橫白塔樊江春水生花氣襲人知驟
暖鶻聲穿樹喜新晴坊場酒賤貧猶醉原野泥深老
亦耕最喜先期官賦足經年無吏叩柴荆

中春偶書

鄰曲祈蠶候陂塘浸種時春寒薪炭覺雨霽鼓鐘知
驢瘦衝泥怯魚驚食釣遲衰翁一味懶耕養媿吾兒

夜泊

小聚近江干中春尚爾寒釣船隨鷺宿煙月伴鐘殘
冉冉歲時速茫茫天地寬推篷一搔首無處著悲歡
東岡櫻桃已過殊不知

病著寒侵怕出門蕭蕭煙雨暗江村一樽闕與梅花
別過盡櫻桃不足言

別嚴和之

器之魂逝已難招尚有和之慰寂寥今夜月明空數

息想君孤棹泊溪橋

又

千里風煙行路難旅舟應過子陵灘人間富貴知何
物莫負君家舊釣竿

齋中雜題

湖水日益長柳色日益深好鳥西山來飛鳴過前林
年華挽不留陳迹曠難尋花開少共賞酒熟惟孤斟
王謝今編氓曲水空山陰一樽欲弔古已矣子何心

又

屯雲失南山三日吹細雨歲月不貸人盡聲遽如許
一年復一年老至不可禦下溼病在脾餘息僅如縷
枯皮裹瘦骨羊屬松下土屋壞要當顛安能強撐拄

又

書生每苦飢得飯已可賀黃齋三百瓮自是天所破
有時尚不繼得米無暇簸昨者雪塞門煙絕但僵臥
雖云迫溝壑老學不敢惰夜分喚隣翁我歌爾當和

又

西窗日過中飢坐生眼花援筆課小詩墨燥字傾斜
須臾忽滿紙翩翩若風鴉雖無古人法簡拙自一家
乃知雨漏壁未媿雖畫沙俄報豆飯熟投筆喜莫涯
呼童拾潤薪試我家山茶

春晚

萍葉青浮水蛙聲鬧徹明川雲時聚散天氣半陰晴
杏子爭梅結鳩巢後鶻成吾儕亦有役過社更深耕

社日小飲

人生當惜老年時醉插山花壓帽敬世事恰如風過
耳微聾自好不須治

山茶

雪裏開花到春晚世間耐久孰如君憑闌歎息無人
會二十年前宴海雲成都海雲寺山茶開故事宴集甚感

春夜

寂寂春將莫迢迢夜未央膏殘燈焰短杵急藥塵香

困思棲雙睫羸軀寄一牀養慵新有味初志悔軒昂
春遊

右軍不復見清真賞會猶須我輩人幽夢斷時雞唱
曉短章成處鳥呼春出山茶筍村墟鬧上市尊鱸七
筋新速覓一壺隨處醉風吹紅紫半成塵

北窗睡起

杏梢紅溼晝初長睡過窗間半篆香久厭客遊歸自
好本無才術老何傷依蒲不去羣魚樂點艸還驚小
蝶忙堪笑放翁無一事強將詩句占年光

北窗懷友

中年妄意慕軻雄白首終希尺寸功落落要居流俗
外兢兢恐墮異端中仰天俯地猶多媿飯豆羹藜已
過豐幸有北窗堪講學故交零落與誰同

舟中作

娥江西路石帆東身寄鷗波浩蕩中疊疊沙痕留浦
岸疎疎日影透漁篷詩人無復同盟在酒債何時一
洗空已迫耄年宜易感人生五十卽稱翁

又

晤語無人與遣愁出門聊復弄輕舟山穿煙雨參差
出水赴陂塘散漫流隔葉雄雞鳴谷鳥傍林子母過
吳牛數家清絕如圖畫炊黍何妨得小留

湖村春興

桑柘相望雨露新桃源自隱不緣秦稻陂正滿初投
種蠶子方生未忘人酒借鴉兒成淺色魚憑雲母作
脩鱗賽神歸晚比鄰醉一笑猶關老子身

鄰館

結隊同秋穫連牆聽夜春薄持聊共飽熱啜却煩供
炊玉吳粳美浮蛆社酒釀時平多樂事莫厭數從容

久雨

風雨連旬日屢空猶晏如敢言苔及榻僅免釜生魚
蒼稜朝供鉢松肪夜照書百年如此過作計未全疎

登山

困厄身垂老登臨意未平莫煙迷艸色宿雨壯溪聲
往古飛鴻沒浮名脫髮輕平生五字律自笑尚關情

讀易

大易中含造化機王何元未造精微乾坤要自吾身
看臥聽雞鳴起索衣

村居書事

四十餘年食太倉賜骸恩許返耕桑長絲出繭尊羹
美白雪翻匙稻飯香酒戶知貧焚舊券醫翁憐病獻
新方春殘睡足東窗下聞道長安依舊忙

又

藥物枝梧病漸蘇門前野老笑相呼春深水暖多魚
婢雨足年豐少麥奴小飲杯盤隨事具閑行巷陌情
人扶題詩非復羌村句誰與丹青作畫圖 李伯時有羌
月圖傳世

春晚書村落間事

千古會稽城閭閻樂太平豐年觀米價霽色聽禽聲
俗儉憎浮侈民淳力釣耕 詩有七月字字要躬行

雜興

秦漢區區了目前周家風化遂無傳君看八百年基
業盡在東山七月篇

又

義和分職投人時斷自唐虞意可知獸舞鳳來餘事
耳西成東作要熙熙

又

老無添處仍逢病春欲殘時未減寒架上漢書渾忘
盡淋頭周易却常看

又

一身適負愁賒酒滿眼關山海上樓子細推來惟合
睡五更風雨已如秋

又

面頰日瘦口眼大氣血頽衰鬢髮薄不用凌煙寫冠
劍一蓑煙雨事春耕

又
故交零落形弔影陳迹凄涼口語心辛苦一生成底
事祈招空解誦惜情

南堂獨坐

晨坐南堂雙眼明南山山色滿柴荆片雲忽過失簾
影急雨初來聞竹聲鸚鵡螺深生酒興蟾蜍滴古助
詩情野人頻約天台去幾編青鞋了此行

春雨示鄰曲

春來天氣苦蕭森如縷雲升便作霖寒溜何曾住一
滴綠陰忽已遍千林蓴絲箭茁垂垂老蓼浦菱塘澗
澗深聞道南山花尚在約君攜酒試同尋

讀書

堯庭君相都俞盛闕里師生博約深我讀殘編食忘
味朱紘三歎有遺音

新晴賞牡丹

杜門睡榻長蒼苔滿眼新晴亦樂哉小市忽逢蓴菜
出曲欄初見牡丹開不嫌雨後泥三尺且趁春殘醉
幾回自揣明年猶健在東箱更覓茜金栽 茜金近出杜

丹名

對酒

神僊豈易學富貴不容求百歲儻未盡一樽差可謀
鐘鳴上方晚桂發小山秋處處多幽趣攢眉勿浪愁

病起遇晴有作

十日春雨靈百疾投間作呻吟雖甚苦飲啗尚自若
筋骸則已疲正氣亦消鑠行年垂八十所恃豈在藥
魔軍累百萬指顧可盡縛君看仁義師何至用韜略
川雲忽破散平地見日脚無人畫此翁縹渺立孤鶴
定命

定命

定命元知不可移更兼狂疾固難治履穿衣弊窮居
日齒豁頭童大耋時耕釣詩多悲境熟功名夢少感

年衰今朝雨歇春泥散剩伴兒童鬪艸嬉

假山小池

鑿池容解水壘石效遙岑鳥喜如相命魚驚忽自沉
風來生細籟雲度作微陰便恐桃源近無人與共尋

又

蓮嶽三峯時桃源一路分池偷鏡湖月石帶沃洲雲
魚隊深猶見禽聲靜更聞巖幽林箐密疑可下湘君
春欲盡天氣始佳作詩自娛

浮雲飛盡見青天拄杖閑拈瘦倚肩漸喜綠秧分穠
稔又看畫柱坊鞦韆雞豚雜還祈蠶社鼓笛喧譁競
渡船惟有此翁無一事閉門贏得日高眠

自詠

生艸覆蝸廬長鬚駕鹿車貧猶思施藥老不廢觀書
登覽攜童稚歌呼和里閭躬耕亦何得聊以遂吾初

西村勞農

川雲散盡十分晴繚出溪頭信意行片片飛花隨步
遠離離芳艸上牆生村深日暖單衣爽路轉沙平兩
屨輕膾肉芬香坊酒醞因來聊得餉春耕

題廬陵蕭彥毓秀才詩卷後

詩句雄豪易取名爾來閑澹獨蕭卿蘇州死後風流
絕幾許工夫學得成

又

法不孤生自古同癡人乃欲鏤虛空君詩妙處吾能
識正在山程水驛中

舍北溪上垂釣

大耋還家萬事非垂竿好在綠苔磯風和山雉挾雌
過村晚吳牛將犢歸春漲新添塘澗灑夕雲仍帶雨
霏霏此生自笑狂顛足依舊人間一布衣

三月二十二日作

雨過艸爭出溪湍魚逆行輕舟摘蓴菜小市聽鶯聲
萬事已無夢一樽猶有情吾兒能講學不必說無生

劍南詩稿卷第五十終

劍南詩稿目錄
卷第五十一

書感 寒食 西村莫歸 舍外彌望皆青秧
白水喜而有賦 寄題太和陳誠之秀才遠明
樓 蝸舍 東岡 首夏 贈曾溫伯邢德允
自述三首 示客 對食戲作二首 對酒
戲作二首 夏初湖村雜題八首 溪上露坐
北齋書志示兒輩 作盆池養科斗數十戲
作 枕上 晨起 喜晴 讀夏書 幽栖
閒詠園中艸木六首 夜雨 晨起 放翁
過隣家 東園 曉出至湖桑埭 雨夜觀史
雨復作 園中 湖上遇道翁乃峽中舊所
識也 老學菴北作假山既成即雨彌月不止
苦雨二首 五月初作 遊西村贈隱者
彷彿 碌碌 讀陳蕃傳 夏日晨起 醉舞
北窗微陰 夏夜 村居 晚興 溪上
貧甚戲作長句示鄰曲 縱筆 入都 開局
感舊 贈陸伯政 雨夜 自局中歸馬上
口占 秋雨 秋夜 求月桂 秋思二首
史院書懷 楚辭所謂桂數見於唐人詩句及
圖畫間今不復見矣作二絕句屬山僧野人試
求之 雨夜 九月初作四首 莫秋 重九
不出遣懷 暇日 憶三山 示子聿 車中
作 初寒偶出 史院晚出 贈洞微山人
九月十四日夜雞初鳴夢一故人相語曰我爲
蓮華博士蓋鏡湖新置官也我且去矣君能暫
爲之乎月得酒千壺亦不惡也既覺惘然作絕
句記之 初寒對酒 午晴試筆 夜吟二首

劍南詩稿卷第五十一

宋陸游務觀

書感

頭顱已可知牙齒今復落十步或再休吸粥不及勺
身依一蒲團壁挂兩芒屨對客輒坐睡有問莫能醉
念昔少壯時心慕宦遊樂初登平津館晚入征西幙
兩暗駱谷烽霜清散關柝登高望中原氣已吞雍雒
寧知事大謬憔悴理征臺單車去梁益健席下沔鄂
還朝見故人大馬黃金絡後來固多士鷓鴣照臺閣
婆娑郎吏間祇自取嘲噉歷思從來事無鐵可打錯
幸得還故園快若解束縛閭里通有無情厚不為薄
泥行事春耕日曝畢秋穫隔牆喚鄰翁濁酒聊共酌

寒食

小市禁煙餘東郊展墓初桐陰覆碧井泉脈入清渠
貧悴停遊舫龍鍾廢荷鋤西窗斜日在且復勤殘書
鄉人貧甚者每自謂不能下湖則其貧可知

西村莫歸

天氣清和修禊後土風淳古結繩前村村陂足分秧
水戶戶門通入郭船亭障盜消常息鼓坊場酒賤不
論錢行人爭看山翁醉頭枕槐根臥道邊

舍外彌望皆青秧白水喜而有賦

此地天教著放翁舍傍煙樹晚空濛一無可恨得歸
老寸有所長能忍窮東作已趨堯舊俗南薰方詠舜
遺風謝安勳業能多少枉是忽忽起剡中

寄題太和陳誠之秀才遠明樓

宦遊再有江西役南望廬陵每慨然未見高樓出雲
雨但驚妙語雜風煙諸公何止元和盛獨我初非正
始賢筆力深知太遠絕此詩它日勿同編樓有榜廷秀

大蓬所作記及周丞相以下諸公題詠

蝸舍

蝸舍次生艸龜腸飽淖麩麥因多兩損蠶遇閏年遲
徒義憂無勇求仁戒自欺此生雖欲盡吾志未應衰

東岡

東岡竹千竿大者圍過尺微風生其間蕭蕭戛寒碧
我閑適一到散髮坐磐石萬事不累心清歡遂至夕
此君本傲世獨我有夙昔老情恐作疎時來寓琴奕

首夏

亂山深處著柴荆岸憤披衣露氣清宴坐有書聊作
伴出遊無客獨題名陰陰密樹花初盡澗澗方池水
已平幾許人間堪笑事今朝百舌頓無聲

贈曾溫伯邢德允

髮似秋蕪不受耘茶山曾許與斯文回思歲月一甲
子游獲從文靖公時距今六十年尚記門牆三沐熏卷裏
聖賢能觀面人間富貴實浮雲二君才氣俱超絕豈
待衰翁誦所聞

自述

古井無由浪浮雲一掃空詩書修孔業場圃嗣幽風
懼在飢寒外憂形寤寐中吾年雖日逝猶冀有新功

又

舊業還耕釣殘年迫耄期筋骸衰後覺力量夢中知
客約溪亭飲僧招竹院棋未為全省事終勝宦遊時

又

屏迹歸休後頭生寂寞中忍貧辭半俸學古得全功
西埭村醅曠東陂小約通經行有佳趣稚子也能同

示客

一點昏燈兩部蛙客來相對半甌茶典衣未贖身饒
蟲洽米無工飯有沙每為采菱浮野艇時因賣藥宿
山家青鞋到處堪乘興不獨雲門與若耶

對食戲作

香粳炊熟泰州紅荳甲尊絲放箸空不為休官須惜
費從來簡儉作家風

米如玉粒喜新春菜出煙畦旋摘供但使胸中無塊
柞一餐笑敵紫馳峯

對酒戲作

杖頭高挂百青銅小立旗亭滿袖風莫笑村醪薄無
力衰顏也得暫時紅

又

亂插除醺壓帽偏鵝黃酒色映鰲船醺然一枕虛堂
睡頓覺情懷似少年

夏初湖村雜題

市遠村深客到稀艸堂終日掩柴扉釀成新蜜蜂兒
靜分盡殘泥燕子歸

又

嫩日輕風夏未深曲廊倚杖得閑吟地偏艸茂無人
迹一對菱鷄下綠陰

又

寒泉自換菖蒲水活火閑煎橄欖茶自是閑人足閑
趣本無心學野僧家

又

日落溪南生暮煙幅巾蕭散立橋邊聽殘賽廟擊
鼓數盡歸村隻隻船

又

胎髮茸茸漆不如夏初安健勝春初雙瞳爛看公卿
面却解燈前讀細書

又

從來抵死愛湖山敢料天教半世閑杜曲桑麻雖苦
薄灞橋風雪如相關

又

幽禽兩兩已成巢新竹森森漸放梢稻壩作陂先蓄
水野堂防漏却添茅

又

門巷蕭條長綠苔經旬清坐罷傳杯麪生風味那忘
得少待吾家芍藥開 吾鄉有陸家芍藥其品甚高

溪上露坐
水際風生爽拂裾比鄰自集不勞呼昏鴉杳杳飛初

定遠樹離離望欲無新竹出林時解籜小荷翻露已
成珠橋東一徑蒼苔滑歸舍還須稚子扶

北齋書志示兒輩

初夏佳風日頽然坐北齋百年從落魄萬事忌安排
徐仲車聞安定先生莫安排之教所學益進 鄉俗能尊老君恩
許賜骸飢寒雖未免何足繫吾懷

作盆池養科斗數十戲作

小小盆池不畜魚題詩聊記破苔初未聽兩部鼓吹
樂且看一編科斗書

枕上

風竹無時靜月窗終夜明時時聽鶯鶯一數殘更
吳楚民猶困燕齊虜未平功名天所命吾志固難成

晨起

終夜厭姑惡經春無秘歸今歲不聞杜宇 溪雲生慘慘
林日澹暉暉物外孤懷勝人間百慮非鄰翁剡中去
為我買漁衣

喜晴

葛衣初著喜新晴寂寂虛堂一榻橫乍坼孤花藏葉
罅晚歸雙燕拂簾旌舞空不斷游絲直掠地還飛落
絮輕刺欲倚闌尋好句清笳已復動高城

讀夏書

巨浸稽天日沸騰九州人死若丘陵一朝財得居平
土峻宇雕牆已遽興

幽栖

何處是幽栖城南路少西楊花穿戶入燕子避簾低
棋局聊相對茶爐亦自攜溪頭雲易合晚雨又成泥

閑詠園中艸木

剪刀葉畔戲魚回被子花頭舞蝶來領略年光屬閑
客一樽自勸不須推

又

麝香萱艸移東郭錦子葵花買上原兒喚乃翁閑一
看欣然曳杖出籬門

又

一樹山櫻鳥啄殘懸鈎半舍亦甘酸兒童采得爭來
餉應念衰翁舌本乾

又

綠侵小徑墓衣艸青絡疎籬鬼帶藤未暇開編尋本
艸且將名品問山僧

又

日高未辦續晨炊一椀村醅且療飢槃箸索然君勿
笑桑間紫椹正累累

又

仲夏園中百艸靈風吹露垆各青青勸君辦取金鷄
觥不問昌陽與稀苓

夜雨

初夏雨淋漓簷聲繞四廊感深頭易白睡少漏偏長
紅捲簾旌溼潤生衣焙香清吟欲排悶三數不成章

晨起

海燕翻將乳戎葵榮已繁魚船初入市尊擔未過門
年耄停朝課家貧省小殮近以病後晨廢讀書又以廩粟不

繼遂罷食粥所欣行藥處秧稻遍村村

放翁

拜賜頭銜號放翁家傳不墜散人風問年已過從心
後遇境但行無事中馬老豈堪空冀北鶴飛猶得返
遼東道傍跌宕煩君看閱盡時人臉尚紅

過隣家

老病在臂蹠終日不喜動溪雲忽過前袖手以目送
今晨光景佳霽色入鳥哢驚言出柴荆暫作湖山夢

東村望鶴巢西阜過羅峒父老意欣然爲我撥春瓮
豈惟燒舌燥亦用輓腳痛形骸去繩檢談笑得少縱

吳蠶初上簇陂稻亦已種端五數日間更約同解纜

東園

晨起東園去消磨夏日長隨鋤泉眼出上爪藥苗香
琴挂山齋壁龜背道室牀始知彭澤令真足傲羲皇

曉出至湖桑埭

殘年孤寂不堪言時喚平頭駕短轆老氣猶能作羆
臥壯懷誰復記鴻軒權歌縹渺城西路煙樹參差埭
北村堪笑怪奇消未盡夜來還夢屬麤韃

兩夜觀史

讀書兩夜一燈昏歎息何由起九原邪正古來觀大
節是非死後有公言未能劇論希捫蝨且復長歌學
叩轅它日安知無志士經過指點放翁門

兩復作

今日雲歸恰喜晴小池忽見水紋生窗昏又輟讎書
課臥聽蕭蕭打葉聲

園中

稚竹侵簷綠新桐覆井涼閑身少羈束隨處得徜徉
山鶻惺惚語藤花掩冉香吾詩有餘思小復立西廂

湖上過道翁乃峽中舊所識也

大罵長歌儘放顛時時一語却超然掃空百局無棋
敵倒盡千鍾是酒仙巴峽相逢如昨日山陰重見亦
前緣細思合辱先生友五十年來不負天

老學菴北作假山既成卽雨彌月不止

古者封禪歲乾封輒枯旱不言絕民食徒欲曬日觀
我今作小山纔及仞有半下豬數斗水艸木稍葱蒨
蕞爾何足言造物亦幽贊冥冥一月雨陰翳迷昏日
芳艸爭抽萌珍木亦擢榦龜魚出復沒鳥雀聚仍散
彼天初何私遺我耳目玩遂令閭巷間日厭鶉鴉喚

淖深樵蘇絕有米不能爨爲小乃害大未可以理斷
憂懼塞胸中當食屢興歎培塿固易平荷鍤媿吾懦

苦雨

儘道迎梅雨能無一日晴窗昏愁細字蒼滴亂疎更
未怪蛙爭席真憂水冒城何由收積潦蕭鼓賽西成

又

煙水茫茫無際空，增滴不休一窗閑。隱几四月澹如秋，箔冷蠶遲績泥深麥未收。家貧村酒薄，曷解老農憂。

五月初作

鄰舍春新麥，家人拾晚蠶。推移逢夏五，賦與數朝三。遣日須棋局，忘憂賴酒甌。幽居有高致，多取未為貪。

遊西村贈隱者

水清沙淨見遊魚，槐柳陰陰五月初。人似登山惟火食，俗如太古欠巢居。熟聞高臥常局戶，剩欲頻來共荷鋤。從此夢遊端有地，淵明不獨愛吾廬。

徜徉

家世由來出楚狂，湖山垂老得徜徉。讀書坐懶常中廢，得句因衰已旋忘。萬化隨緣寓蟲臂，百年何處異羊腸。忍飢到死知無恨，免使人嘲作飯囊。

碌碌

碌碌初何取，悠悠信所之。安貧無鬼笑，守道有天知。暑服黃縑製，晨發赤米炊。今朝潦水退，村路得遺墟。

讀陳蕃傳

莫笑書生一卷書，唐虞事業正關渠。漢廷若有真王佐，天下何須費掃除。

夏日晨起

華胥歸路萬山青，拈得烏藤繞舍行。兩皆尚餘殘睡笑，一襟初受曉涼生。陰院落新桐影，寂寂房櫳乳燕聲。已罷小殮，停卯酒龜腸蟬腹不勝清。

醉舞

短帽蓼花舞道傍，年垂八十尚清狂。茸茸胎髮朝盈櫛，炯炯神光夕照梁。令尹閩人三仕已，太山在我一豪芒。藥苗麥飯初何欠，全取愚儒百鍊剛。

北窗微陰

露滴林梢花送香，風吹池面雨輪涼。蠹書一卷作老伴，麥飯半盂支日長。學道莫如心自肯，杜門真與世相忘。君恩不報雖知媿，稀米安能益太倉。

夏夜

乞骸安晚節，養疾臥空村。月暗梟鳴樹，船歸犬吠門。藜羹加糝美，黍酒帶醅渾。稚子能勤學，燈前與細論。

村居

鷓鴣穿林語，鳴鶴竝水鳴。餽糲憐道渴，裹飯助隣耕。零落橋危斷，欹斜屋半傾。君母笑偷情，猶足盡吾生。

晚興

羸病時時劇，歡餘日日疎。睡憑書紹介，愁賴酒驅除。小寒追涼處，輕衫出浴初。無人堪晤語，且復狎樵漁。

溪上

散髮倚胡牀，風生水面涼。單衣縫白紵，雙屨織青芒。道家有青芒屨，荷葉猶微赤。藤花已半黃，歸來村路晚。漁火耿蒼茫。

貧甚戲作長句示鄰曲

百屋堆錢四壁空，人人生志願孰能同。蕭條齒髮難藏老，冷落杯盤可諱窮。斷筍不思郭夏日，典衣那計禦霜風。知心幸有隣翁在，一笑相從艸莽中。

縱筆

冉冉殘年迫耄期，壯雖三折未成醫。北山愚公世方笑，東郭順子吾所師。萬里元非破賊手，一生無奈造物兒。梅雨初晴湖水滿，未妨把酒細哦詩。

入都

葵莧登盤酒可賒，豈知扶病又離家。朝行打岸禱頭惡，夜宿垂天斗柄斜。不恨山林淹歲月，但悲道路困風沙。隣翁好為看耕隴，行矣東歸一笑譁。

開局

八十年光敢自期，鏡中久已髮成絲。誰令歸蹋京塵路，又見新開史局時。予三作史官，皆初開局。舊史僅存多不識，殘編重對只成悲。免朝愈覺君恩厚，閑看中庭木影移。

感舊

四十三年夢今朝，又喚回平橋穿小市。細雨壓輕埃，老喜詩情在。慵愁史課催，時時還自笑。白首接鄰故。

贈陸伯政

夜窗燈火老徒勤自憫何時可策勳未喪斯文天壽
我豈無餘子我思君約通殘譜言猶在細讀新詩筆
欲焚早晚皇恩許歸去相呼同臥石帆雲

兩夜

莫雨濯殘熱史官非坐曹忍慚靡粟帛偷暇近詩騷
屋老孤燈闇風顛萬木號明朝有奇事江閣看秋濤
自局中歸馬上口占

幼輿只合著山巖誤被恩光不蓋慚人怪衰翁煩只
一心知造物賦朝三飛騰豈少摩雲鷲縮方同作
蘭蠶安得公朝閱枯朽早教歸臥舊茆菴

秋雨

久占煙波弄釣舟業風吹作鳳城遊不知苑外芙蓉
老但見牆陰苜蓿秋黃把裏書俄復至朱顏辭鏡不
容留晚窗又聽蕭蕭雨一點昏燈相對愁

秋夜

庭院蕭條夜氣清臥聽宮漏下宮城旅懷生怕還鄉
夢留取殘燈伴雨聲

求月柱

重重汗簡擁衰翁百里家山夢不通病眼可令常寂
寞煩君為致數枝紅

秋思

烏帽翩翩九陌塵杖藜誰記岸綸巾遺簪見取終安
用弊帚雖微亦自珍廊廟似聞憐老病雲山漸欲屬
閑身牆隅苜蓿秋風晚獨倚門扉感概頻

又

霜露初侵季子裘山川空賦仲宣樓夢回最怯聞衣
杵病起常憂負酒籌日月往來雙轉轂乾坤成壞一
浮漚書生事業無多許二寸毛錐老未休

史院書懷

後死與斯文猶能讀典墳雖慚千載事要是一生勤
石磴霏霏雪銅爐裊裊雲扶衰又秋晚何以報吾君

楚辭所謂桂數見於唐人詩句及圖畫間今不
復見矣作二絕句屬山僧野人試求之

小山桂枝今所無一生到處問樵夫細思不獨人間
少月裏何曾有兩株

又

丹葩綠葉鬱團團消得姮娥種廣寒行盡天涯年八
十至今未遇一枝看

兩夜

細雨催局戶昏燈照擁衾倦知秋漏永瘦怯曉寒深
林鶻依簷宿莎蟲入戶吟此時搔短髮誰會欲歸心

九月初作

菊佩絳繁節物催老懷撫事一悠哉年光半付殘編
去詩句時從倦枕來零落朋儕今孰在寂寥事業世
方咍兩叢月桂門前買自下中庭破綠苔

又

九月都門凜欲霜羸軀恩免立鵷行細書付吏牒初
稿和藥呼兒對古方陋巷閉門常謝客高齋掃地獨
焚香此生自計終何取似有山林一日長實錄有初稿

二稿

又

碧海仙蓬感舊遊莫年心事轉悠悠登高此去無多
日扶病重來又過秋十里樓臺迷巷陌萬家礎杵戒
衣裘平生剩欠觀書債四庫留人未許休

又

富貴功名未足云平生一飯不忘君哦詩高韻凌金
石把釣幽情渺水雲落葉打窗秋已莫歸鴉泊樹日
將曛欲知老病常多感革帶今年減幾分

莫秋

十日都門雨風煙已莫秋甌香新菽粟篝煖故衣裳
意氣臨書健形骸顧影愁何時刻中路秣蹇憩山郵

重九不出遣懷

人生各自適飛潛魚腹煎踏豈得兼竝舍晚風傳葉

杵小窗殘日射書籤昏瞳但怪花爭墜衰鬢應無白
可添采菊泛觴終覺懶不妨閑臥下疎簾

暇日

身健官閑荷主恩蕭然不異在家園一池新墨生吟
思半篆殘香入夢魂舊友無書知獨冷小兒有命會
孤鶩藜羹麤足餘何事鐘動三茅又歛昏

憶三山

柳橋南北弄煙霏門不常開客自稀遣僕遠馱黃檗
出呼兒閑取白鷗歸片雲忽起迷丹竈潦水初生沒
釣磯一出可憐時屢變又看刀尺製秋衣

示子聿

故山誰伴隱茅茨幸有吾家大耳兒兩暗小窗分夜
課雪迷長鑣共朝飢名場未捷寧妨學史限雖嚴不
廢詩我死汝應傳鉢袋勉持愚直報明時

車中作

秋天近霜霰吳地少風塵時駕小車出始知閑客真
新交孰傾蓋往事漫霑巾處處皆堪隱桃源莫問津
初寒偶出

史院晚出

已乞殘骸老故丘誤思重作道山遊龍津兩過橋如
拭鳳闕煙消瓦欲流直舍小眠鐘報午歸途微冷葉
飛秋心知伏櫪無千里縱有王良也合休

贈洞微山人

我年六十四獲譴輸鬼薪束書出東門揮手謝國人
笑指身上衣不復染京塵時有一老翁祝我當自珍
却後十五年迎君浙江濱我笑語是翁豈說他生身
事果不可知邂逅如隔辰鶴髮無餘翼鶉衣仍苦貧
秋風旱河頭握手一笑新買酒烹雞豚往事得具陳
試數同朝舊零落增悲辛與翁雖俱老肝膽猶輪囷
千里亦命駕何況託近鄰秋高佳風月相過莫厭頻

九月十四日夜雞初鳴夢一故人相語曰我爲
蓮華博士蓋鏡湖新置官也我且去矣君能暫
爲之乎月得酒千壺亦不惡也既覺惘然作絕
句記之

白首歸修汗簡書每因囊粟戲侏儒不知月給千壺
酒得似蓮華博士無

初寒對酒

晨起常教置一壺色如鵝醪滑如酥侍郎取榼不須
笑司業與錢還復酤霜路預愁騎款段雪舟每憶釣
菰蒲寒花滿帽君無笑醉倒偏宜稚子扶

午晴試筆

葉脫園林夜夜霜風和巷陌日猶長軒車但怪容孤
鶴穉米安能益太倉此去得非窮李廣向來元是老
馮唐明窗攬筆聊揮灑颯颯驚蛇又數行

夜吟

似睡不睡客歌枕欲落未落月挂檐詩到此時當得
句羈愁病思恰相兼

又

六十餘年妄學詩工夫深處獨心知夜來一笑寒燈
下始是金丹換骨時

劍南詩稿卷第五十一終

劍南詩稿目錄

卷第五十二

閱詠二首 遊張園 客至 客去 無客

次韻黃宮教見贈 書直舍壁二首 韓太傅

生日 懷故山 西齋遣興 兩夜作 掩戶

臥疾 晚歸 寂寂 獨坐有懷杜伯高

李允蹈判院送酒四斗予答書乃誤以為二斗

作小詩識媿 感舊贈超師 雜書四首 送

子虞赴金壇丞 今日史課偶少暇戲作五字

入局 縱筆四首 送襄陽鄭帥唐老 掩

門四首 自嘲 乍晴出遊 送客至湖州市

題史院壁四首 寄二子 訪客至北門抵

莫乃歸 恩除祕書監 寄題儒榮堂 夙興

館中書懷 雜興十首以貧堅志士節病長

高人情為韻 送任夷仲大監 謝韓寶之直

閣送燈二首 道山直舍 館中營繕方一新

而右文殿生芝艸甚異 戲述淵明鴻漸遺事

雪夜 直舍獨坐思成都 歎老 冬曉

有懷梁益舊遊 孤坐無聊每思江湖之適

夢韓无咎如在京口時既覺枕上作短歌 出

東城竝江而歸 子聿欲暫歸山陰見乃翁作

惡遂不行贈以此詩 題趙生畫 題宣律師

畫像 暇日弄筆戲書三首 立春前後連日

風雨 武林 立春後十二日命駕至郊外戲

書觸目三首 春夜 訪客至近郊 車中作

倦飛 遣興 癸亥正月十日夜夢三山竹

林中筍出甚盛欣然有作

劍南詩稿卷第五十二

宋陸游務觀

閑詠

身似地行僊心非欲界天與竿聲軋軋巾角影翩翩
買菊穿苔種懷茶就井煎歸來書遶坐隨處一欣然

又

久入春農社新腰老衲包紙裁微放矮硯斲正須顛
髯簿能為崇方兄任絕交吾詩無傑句聊復當談嘲

遊張園

冷局歸差早名園得緩行穿林山驟出度磔路微平
霜近柳無色風生蒲有聲出門還憺愴滿路夕陽明

客至

官閑身自得客至眼殊明靜算棋生死閑分酒濁清
悠然劇談罷偶爾小詩成但恨桑麻事無人與共評

客去

客來拈麈尾客去拂牀眠孤夢歸湖上殘書墮枕邊
幽禽窺戶語落日傍窗妍暫爾名朝士終然是地僊

無客

今日了無客偷然塵柄閑硯涵鷓鴣眼香斲鷓鴣斑
木落風初勁雲低雨尚慳西湖未暇到臥看曲屏山

次韻黃宮教見贈

景說

士固未易料世乃有若人高標與曠懷豈復容疎親
邂逅京塵中握手一笑新我雖讀古書妙處媿斲輪

敢學狂接輿歌鳳笑泣麟空持鼻端至庶幾遇郢斤
獨立臨洪流欲濟茫無津君其幸教之勿棄老病身

書直舍壁

三黜媿公議再來仍冷官志無重奮發身有轉衰殘
加飯支餘息添衣禦早寒歸休應漸近不是強心寬

又

道山西下路杳杳歷重廊地寂聞傳漏簾疎有斷香

渠清水馬健屋老瓦松長欲出重欹枕無何見故鄉
韓太傅生日

珥貂中使傳天語一片驚塵飛輦路清霜粲瓦初作
寒天為明時生帝傳黃金飾奩雕玉觴上尊御食傳

恩光紫駟之峯玄熊掌不數沙苑千羣羊通天寶帶
連城價受賜雍容看拜下神皇外孫風骨殊凜凜英

姿不容畫問今何人致太平縣地萬里皆春耕身際
風雲手扶日異姓真王功第一

懷故山

老怯京塵化素衣無端拋擲釣魚磯碧雲又見日將
暮芳艸不知人念歸萬事莫論羈枕夢一身方墮亂

書圍岷山學士無消息空想燈前語入微張季長秘閣
久不得書

西齋遣興

桐葉秋先實菊花寒更香酒邊聊兀兀身外本茫茫
小憩元非睡長吟偶似狂忽然思把卷一笑就窗光

雨夜作

十月多蚊蚋昏昏氣未平正須三日雨却用一霜晴
閑館蕭條意空堦點滴聲鐘殘撫枕歎歸夢幾時成

掩戶

蔗漿那解破餘醅一讀南華眼自明香縷映窗凝不
散墨丸入硯細無聲太山蟻垤初何有佛國魔宮本

亦平此段光明誰障得曠懷還與老書生

臥疾

舊疾乘衰作長貧與懶宜羈愁惟付酒史課未妨詩
雨入殘更滴霜逢閨歲遲新春真耄及不用卜歸期

晚歸

無事經秋別鏡湖詩囊隨處累奚奴樓頭寒日低將
盡陌上殘泥踏欲無軒冕豈容關喜愠筆瓢亦未費

枝梧畫橋綠浦歸來晚一醺昏燈得自娛

寂寂

接客厭紛紛客去喜寂寂今朝下簾坐疎雨時一滴

地爐擁破褐自笑懶無敵新春儻得歸更面九年壁
獨坐有懷杜伯高

畫橋通小市深院欲黃昏愛月先移燭留香每閉門
李侯有佳句樂令善清言老病貪搭枕何由共一樽

李九蹈判院送酒四斗予答書乃誤以為二斗
作小詩識媿

冷官誰顧雀羅門一紙惟君肯見存堪笑放翁昏至
此乘壺誤寫作朋樽

感舊贈超師
一聲清蹕出行宮百尺黃旗繡戲龍我赴文場君受
戒道邊曾共望高宗

雜書
世味漸闌如嚼蠟惟詩直恐死方休四時風月元無
盡萬里江山更擬遊

又
一身頂踵無非病兩飯齋鹽亦關供正可清言學夷
甫不須豪氣似元龍

又
杖籬莎徑入荆扉中有村翁百結衣誰識新年歡喜
事一雞一犬伴東歸雞犬皆實事

又
身似匡廬老病僧閉門一衲坐騰騰雨聲驚斷長安
夢惆悵西窗夜半燈

送子虞赴金壇丞
與汝為父子忽逾五十年平生知幾別此別益酸然
念汝髮亦白執手河橋邊西行過臨平想汝小繫船

悠悠陽羨路渺渺雲陽川京江昔所遊想像在目前
今茲兩使君幸有宿昔緣汝雖登門晚世好亦牽聯

顧於賞罰間其肯為汝偏夙夜佐而長努力忘食眠
醉如新豐酒清若鶴林泉棠宜使可愛蒲正不須鞭

今日史課偶少暇戲作五字
仲夏入都門堂瓦忽已霜史館方掄才我亦廁其傍

三日敗一筆手抵視芒芒吏來督日程炙冷不及嘗
今辰偶少靜掃地欲焚香市聲塞我門騶呼過我牆

鄙性不耐喧懼况意欲狂天生兩窮耳只堪聽啼螿
入局

殘年困簡牘靜坐憶漁樵鄙意慚輕出殊恩免早朝
微霜凋綠樹寒日滿朱橋悵望滄波友弓旌豈易招
鏡湖西南有隱士人不可得而見

縱筆
胸中略無一點事眼底常展數行書半飢半飽便可
爾衣食何須求有餘

又
小兒讀書耕且養老夫入朝仕易農明春史成許歸
去父子相逐歌年豐

又
晝倦夜常成美睡病多老却未全衰歸從冊府猶披
卷了却官書更賦詩

又
坊遠不聞宮漏聲三茅鐘殘窗欲明山童睡熟呼不
應添水拂書翁自行

送襄陽鄭帥唐老
鄭侯骨相非復常伏犀貫額面正方聲名赫奕動天
子家世富貴連椒房武能防秋北平道文合落筆中

書堂叢西謀帥國大事當宁久弄黃金章一朝丹詔
自天下兩班仰首看騰驤鄭侯此行端可羨繡旗皂

纛戈如霜三更傳令出玉帳平旦按陣來毬場宿兵
萬竈盡貔虎牧馬千羣皆驪驪酒酣賦詩懷府和縱

橫健筆誰能當雖然鄭侯志意遠虎視直欲吞北荒
榆林雁門塞垣紫孟津砥柱河流黃出師有路吾能

說直自襄陽向洛陽
掩門

身瘦不勝笏官閒常掩門漢廷雖好老楚澤未招魂
硯潤蟾珠滴香殘鴨尚溫箇中殊會意恨欠阿戎言

又
簾箴落高槐陰陰長綠苔只言門晝掩不道客誰來
足痺思尋壑愁生欠撥酷吾兒能問事梨栗且炮煨

又
舉手可及屋積書高柱頓忽聞疎雨滴況記故山時
點染聊成字呻吟僅似詩不關才思盡碌碌本亡奇

又
寡求忘市遠易足任囊空院吏催呈史家僮笑忍窮
鬢毛驚盡白倉粟既陳紅賴有三莪夢時時到枕中

自嘲
野老家風子未知天教甫里出孫枝遍遊竹院尋僧
語時拂楸枰約客棋是處登臨有風月平生歌歷半
宮祠即今箇事渾如昨喚作朝官却自疑予仕宦幾五
十年矣歷崇道玉局武夷今又忝佑神之命

乍晴出遊
八十山翁病不支出門也賦喜晴詩小樓酒旆闌街
處深巷人家曬練時本借微風軟帽影却乘新暖弄
鞭絲歸來幸有流香在剩伴兒童一笑嬉流香蓋賜酒

名
送客至湖州市
偶駕雞栖送客行迢迢十里出關城誰知小市蕭條
處剩有豐年笑語聲聊借野風吹醉頰更憑陂水濯
塵纓故廬想見春回近鄰曲家家已遍耕

題史院壁
命薄謀常拙年衰力轉微鷓鴣飛元合退燕乳偶成歸
汗簡慚靡日流塵怯染衣無端霜夜月應照舊苔磯

又
檣木志榮謝閑雲任卷舒慵爲繞枝鶻寧作蠹書魚
羈旅心常折親朋夢亦疎溪頭釣船在恐負此心初

又
白髮無餘鬢蒼顏失故丹旅遊多敗意大屋每饒寒
出畏霜侵褐歸乘日暖鞍若非時得句何以慰衰殘

又
苔鬢平分路銅環半掩扉殘蕪寒不死敗葉落還飛
責重何由塞愁生但念歸非無茅一把世事苦相違

寄二子
大兒新作鶴林遊仲子經年戍吉州日日望書常至
莫時時入夢却添愁得官本自輕齊虜對景寧當似
楚囚識取乃翁行履處一生任運笑人謀

訪客至北門抵莫乃歸
北郭那辭十里遙上車且用慰無聊九衢浩浩市聲
合四野酣酣雪意驕清鏡新磨臨綠浦長虹橫絕度
朱橋歸來熟睡明方起臥聽鄰牆趁早朝

思除祕書監
羣僊鶴駕去難追白首重來不自知才藝荒唐癡獨
絕功名蹭蹬老如期海邊鄭叟窮耽酒吳下韋郎晚
學詩扶上木天君莫笑衰殘不似壯遊時

奇題儒榮堂
朝散大夫徐夢莘著北盟錄上之除直祕閣
訓辭有儒榮之語因以名堂來求賦詩

軍容基禍廟謀疎尚記文登遣使初只道大功隨指
顧至今遺種費誅鋤還朝不遣參麟筆寓直空聞上
石渠剩辦殺青君記取龍庭焚盡始成書

夙興
鐘已樓頭動燈猶帳外殘霜濃愁枕冷病起覺衣寬
鶴怨憑誰解鷗盟恐已寒君思等天地應許納微官
館中書懷

流落逢明主恩光集晚途題名驚手戰拜閣藉人扶
枉辱三華組國史實錄及策府凡三職終歸一腐儒庫
書時取讀猶足補東隅

雜興十首以貧堅志士節病長高人情爲韻
仕宦徧四方每出歸愈貧寒暑更質衣笑倒隣里人
今年作史官坐糜太倉陳無如思歸何日夜望絕麟
區區牛馬走擬覬蟻豷臣思深老不報肝膽空輪因

孟子闢楊墨吾道方粲然韓愈排佛老不失聖所傳
伐木當伐根攻敵當攻堅坐視日月食孰探天地全
一木信難恃要憂大廈顛安得孟韓輩出為吾黨先

又

聖人固多能藝乃以不試嗟予少貧賤日月成坐棄
矧今耄已及甘食而美睡道衰朋友散斯文凜將墜
閉戶輒竟日孰與講仁智厭厭生意盡何暇議李志

又

少年喜結交患難謂可倚寧知事大謬親友化虎兕
出任五十年危不以讒死始畏囊中雖寧取道傍李
老來多新知英彥終可喜豈以二三君遂疑天下士

又

昔我遊廬山夜遇東林雪灰深火正熟膏滅燈半滅
童驚林虎過僧惜澗松折至今每追想可解肺肝熱
那知蓬山夢忽繼此清絕殊勝蘇子卿餐蘊持漢節

又

觀人如觀玉拙眼喜譏評得失顧在人玉固非所病
慶曆嘉祐間人才於斯盛王回僅一招石介棄不聘
乃知天下士成敗各有命願君姑安之天定豈不勝

又

兩山如蛾眉一水若車輞吾昔廬其間百里臨莽蒼
少年手藝木條榦日夜長吟啞駕獨轆迢遞搖兩漿
平生會心地今乃寄夢想何時喚鄰翁煙水行布網

又

貨財不可居祿位不可饜我爾本一家何至臯蘭塵
小夫謀人國紛紛日煎熬或謂性本惡或謂經無褒
誤人方自此孰如飲醇醪清言亦自佳遺事非徒高

又

魯山粹而博韶美曠且真石渠東觀中久矣無若人
飛僊驂鳳鸞豈久混世塵空餘文章在常與日月新
我雖不足數嚙昔忝交親尚想秋燈下對影歌幅巾

陳山魯山劉儂鳳韶美

又

君子尚大節又甚惡不情魯連故可人用意終近名
千載高夷齊采薇忘其生周公述易象所以貴幽貞
去聖雖已遠江左見淵明我讀飲酒詩朱紘有遺聲

送任夷仲大監元受之子

往者江淮未徹兵丹陽邂逅識者英叩門偶綴諸公
後倒屣曾蒙一笑迎敢意癡頑成後死相從髣髴若
平生小詩話別初何有一段清愁伴鶻聲游昔在京口
與陳應求馮國仲直元章張欽夫諸人從先提刑遊今三十九年矣

謝韓實之直閣送燈

玉作華屋綴絳繩樓臺交映莫天澄東都父老今誰
在腸斷當時諫浙燈

又

舊友年來不作疎華燈乃肯寄蝸廬寧知此老蕭條
甚二尺檠前正讀書

道山直舍

身世從來一蠹魚討論猶記入朝初自憐報國無他
技又領蘭臺四庫書

館中營繕方一新而右文殿生芝艸甚異

丹碧參差盛一時殿楹三秀見金芝漢庭漫道多才
傑天馬何勞作頌詩

戲述淵明鴻漸遺事

桑苧柴桑一世豪區區玩物亦徒勞品茶未及毀茶
妙飲酒何如止酒高

雪夜

雪屋透窗明風簾撮夜聲披衣擁爐坐忘却在都城
直舍獨坐思成都

錦城花絮送吳船屈指東歸又幾年羣玉峯頭身老
矣百花潭上夢依然青衫尚記稱狂客白髮寧知作
老僊所恨酒腸非復昔閑遊空負杖頭錢

數老

鏡裏蕭蕭白髮新默思舊事似前身齒殘對客豁可

恥臂弱學書肥失真漸覺文辭乖律呂豈惟議論少
精神平生師友凋零盡鼻堊揮斤未有人

冬曉

恩免宵興趁曉班養慵終覺媿吾顏浮名半世虛催
老高臥何時復得閑兩岸夕陽漁浦市數峯寒靄沃
洲山扁舟來往無窮樂此事天公豈所慳

有懷梁益舊遊

土埃壘壘復雙雙悠然殘夢對寒缸亂山落日葭萌
驛古渡悲風枯柏江虎印雪泥餘過跡樹經野火有
空腔四方行役男兒事常笑韓公賦下羆

孤坐無聊每思江湖之適

世上元無第一籌此身只合臥滄洲臚搖漁浦蒼茫
月帆帶松江浩蕩秋有酒人家皆可醉無僧山寺亦
閑遊老來閱盡榮枯事萬變惟應一笑調

夢韓无咎如在京口時既覺枕上作短歌

隆興之初客江臯連棧結駟皆賢豪坐中无咎我所
畏日夜訓倡兼詩騷有時贈我玉具劍間亦報之金
錯刀舊遊忽墮五更夢舉首但覺鐵瓮高樽前美人

亦黃土吾輩鬼錄將安逃死生一訣信已矣所恨膏
火常煎熬平生不愛葱嶺話方術亦陋葛與陶但當

東歸棄百事爛醉海上觀雲濤

出東城竝江而歸

上車容假寐出郭當閑遊遠笛臨風起高帆到岸收
人歸花市路客醉酒家樓徑就東窗臥孤燈欲話愁

子聿欲暫歸山陰見乃翁作惡遂不行贈以此
詩

鐘鳴豈復夜行時文字相娛賴此兒欲去復留知汝
孝未言先泣歎吾衰兩篇易象能忘老百畝山畬可

免飢但報家僮多釀酒一欄紅藥是歸期明年春晚史
院奏書必得歸矣

題趙生畫趙生名廉宣和未得幸廉宣仲爲子言

東都畫手排浮萍天子獨賞一趙生幅練尺紙皆厚

賜衆史妬媚都人驚爾來一筆不復見好事住往空
聞名奇哉此獨出劫火論價直恐千金輕老廉博士
最別識一見自謂雙眼明老夫寓居旱河上矮軸正
向幽窗橫飯餘捫腹看不厭林外重閣高崢嶸憑誰
喚任兩禪客水邊共聽煙鐘聲

題宣律師畫像

秀目大頭顱英姿舉世無平生一瓦鉢何處有天厨
暇日弄筆戲書

又

天地爲我廬江山爲我客北斗以酌酒恨我飲量窄
人生但閉戶鳥用分菽麥贈君玉函方憤憤無皂白

又

艸書學張顛行書學楊風平生江湖心聊寄筆硯中
龍蛇入我腕正素忽已窮餘勢尚隱鱗此興嗟誰同

武林

皇輿久駐武林宮汴雒當時未易同廣陌有風塵不
起長河無凍水常通樓臺飛舞舞祥煙外鼓笛喧呼明

又

立春前後連日風雨
月中六十年間幾來往都人誰解記衰翁 紹興癸亥子
年十九以試南省來臨安今六十年矣

立春後十二日命駕至郊外戲書觸目

身兼老病常歸臥天半陰晴偶出遊鸚鵡碧籠當戶
外鞦韆畫柱出牆頭年華冉冉飛雙翼夢境悠悠寄
一漚旅食都門那可久少留應爲賦春愁

又

宮雲縹渺漏聲遲夢裏華胥却自疑春淺風光先盡
益時平節物共熙熙畫簾不捲聞人語玉勒徐行避
酒旗閱盡輩流身獨健恍如隨計入都時

又

丹成不服怕升天豈料乘風到日邊九陌樓臺生細
靄萬家弦管送流年香車寶馬沿湖路繡幙金罍出
郭船折簡亦思招客醉不堪春困又成眠

春夜

客向燈前老愁從枕上生雨聲添好睡花氣散餘醒
舊事談誰聽新詩鍊不成惟當速歸老鄰父待同耕
訪客至近郊

訪客西郊路停車小苑門閑雲寧有雨淡日不成暄
鷺下青蘋浦鴉啼綠樹村還家未索莫隨分具魚餒

車中作

雨過未生塵寒輕不著人斷雲飛苑路高柳暗天津
憔悴非平日呻吟又一春絲毫寧有補空負耦耕身

倦飛

倦飛何意閉樊籠冉冉年光過眼空酒盡不妨沽巷
口詩成多是在車中曾腰白羽心猶壯不養丹砂頰
自紅所歎莫年交舊盡燈前情話與誰同

遣興

馬跡車塵不到門莫年萬事付乾坤讀書浪苦只取
笑識字雖多誰與論骨相元非金馬客夢魂空繞石
帆村濁醪幸有鄰翁共莫厭從來老瓦盆

癸亥正月十日夜夢三山竹林中筍出甚盛欣

然有作

新春身不到家園東崦西村役夢魂一夜四山雷雨
起滿林無數長龍孫

劍南詩稿目錄

卷第五十三

謝徐志父帳幹惠詩編 河橋晚歸 謝王子
林判院惠詩編 紹興癸亥余以進士來臨安

年十九明年上元從舅光州通守唐公仲俊招
觀燈後六十年嘉泰壬戌被命起造朝明年癸

亥復見燈夕遊人之盛感數有作 出謁晚歸
思歸示子聿 上元後連數日小雨作寒戲

作四首 出湧金門 書志示子聿 入春念
歸尤切有作 書房雜詠二首 獨立思故山

寓歎 後寓歎 新歲頗健寄青城故人
新年七十有九 春日訪客于逆旅及郊寺感

而有賦 二月二日夢中作 對酒作 西湖
春遊 春晚用對酒韻 題館中直舍壁 春

晚懷故山 春社日效宛陵先生體四首 局
中春興 久客 幽居 春日絕句八首 歎

老 春雨中偶賦 戲詠落花 思歸示兒輩
東軒花時將過感懷二首 江亭 對食

飽食 記夢 初夜暫就枕 次林伯玉侍郎
韻賦西湖春遊 湖中微雨戲作 與兒輩泛

舟遊西湖一日間晴陰屢易 贈呂次翁 得
子聿到家山後書 題齋壁三首 小飲 贈

傳神水鑑 春晚 天竺曉行二首 初見石
榴花 夢遊三首 江亭晚思 上章納祿恩

畀外祠遂以五月初東歸五首 江亭 題三
茆邵道士雲隱二首 受外祠敕 感寓二首

肉食 贈成封州 予以壬戌六月十四日
入都門癸亥五月十四日去國而中有閏月蓋

相距正一年矣慨然有賦二首 雨中別同朝
諸公二首 出城 宿北錢清 老伶 舟行

錢清柯橋之間 寓蓬萊館 乍自京塵中得
歸故山作五字識喜 初歸雜詠七首

劍南詩稿卷第五十三

宋陸游務觀

謝徐志父帳幹惠詩編

平生聞若人筆墨極奇峭相望二千里安得接談笑
一朝獲其詩驚喜踰素料夜窗取吟諷寒燈耿相照
春容清廟歌縹緲蘇門嘯蹴天浙江濤照野楚山燒
每篇十過讀玩味屢掉正如啜名酒雖愛不忍嚼
看君亦華髮氣壓萬年少予昔從茶山辱賞三語妙
文章老不進顛顛今可吊誰知牛車鐸黃鐘乃同調
願君時來過勿恤俗子誥

河橋晚歸

曲巷連新市層樓近小橋青帘猶滴雨綠浦恰通潮
簾影晴方見笙聲冷未調斜陽覓歸路偏愛玉驄驕

謝王子林判院惠詩編王從楊廷秀甚久

文章有定價議論有至公我不如誠齋此評天下同
王子江西秀詩有誠齋風今年入修門軒軒若飛鴻
人言誠齋詩浩然與俱東字字若長城梯衝何由攻
我望已畏之謹避不欲逢一日來叩門錦囊出幾空
我欲與馳逐未交力已窮太息謂王子諸人無此功
騎驢上灞橋買酒醉新豐知子定有人詎必老鈍翁

紹興癸亥余以進士來臨安年十九明年上元
從舅光州通守唐公仲俊招觀燈後六十年嘉
泰壬戌被命起造朝明年癸亥復見燈夕遊人
之盛感歎有作

隨計當時入帝城笙歌燈火夜連明寧知六十餘年
後老眼重來看太平

出謁晚歸

萬卷縱橫眼欲盲偶隨尺一起柴荆淵魚脫水知難
海野鶴乘車只自驚苑路落梅輕有態御溝流水細
無聲紅塵朝莫何時了促駕歸來洗破甍

思歸示子聿

平生愛山水遊陟老不厭此外惟讀書垂死尚關心
方昔少壯時萬里攜一劍自從還故山日夜就收斂
蒙恩置三館寒灰忽光焰龍鍾氣纒屬筆力安得贍
同舍多賢豪揣分無乃玷春來百疾作沉痾困鍼砭
思歸入夢寐歷歷數過店問津始肯濤繫纜望禹窾
小江齋餅美梅市將酒醺雲破山嶙峋雨足湖潏灑
二月柳勝槎三月花如染拄杖幸可扶吾生尚何欠
更當與稚子晨莫事鉉槩天爵古所尊榮名勿多占
上元後連數日小雨作寒戲作

呼兒取酒敵春寒病起聽衰剩覺寬萬事不妨高枕
臥始知老子耐悲歡

又

春風催暖入園林一片雲生又作陰留得梅花三日
住誰云造物本無心

又

煙籠天闕青鴛溼水漲官河畫鷁浮解賦春陰三十
首不應惟有宋鄆州

又

擬撥殘書出郭行浮雲忽已敗春晴窮閭今雨無車
馬臥聽深泥濺履聲

出湧金門

出湧金門一黯然初來猶是紹興前都人百萬今誰
在惟有西湖似昔年

書志示子聿

誤上蓬山亦已叨所悲故里隔胥濤還家未失屠羊
業報國元無汗馬勞載筆敢言宗史漢閉門猶得讀
莊騷小兒願與翁偕隱正恐聲名未易逃

入春念歸尤切有作

六朝覆育忝遺民扶憊歸來雪鬢新對酒無歡翻作
病愛詩何得但窮人腰錢自昔妨騎鶴絕筆何時到
獲麟鄉俗嬉遊重端五剩烹糲糲喚比鄰筮者言予五

月可還故山
書房雜詠

賦性無他嗜傳家但古書
堯咨洪水際義畫結繩餘
異學方攘斥浮文亦掃除
挑燈北窗下聊得遂吾初

又

久客思鄉井殘軀怯歲年
家能常食粥口固不言錢
鐵補曾穿硯章聯屢絕編
臥聞兒講學起坐失沉懸
獨立思故山

谿水初生與岸平橋頭新柳已藏鶯
詩緣遇興玲瓏和酒為逢知爛熳
傾青箬買來衝雨釣烏健租得及時
畊今朝獨立東風裏歎息無人會此情

寓歎

俗心浪自作焚絲世事元知似弈棋
舊業蕭然歸亦樂餘年至此死何悲
古人可作將誰慕造物無心豈汝私
已決殘春故溪去短蓑垂釣月明時

後寓歎

貂蟬未必出兜鍪要是蒼鷹憶下韉
彭澤往歸端為酒輕車已老豈須侯
千年精衛心平海三日於菟氣食牛
會與高人期物外摩挲銅狄灞城秋

新歲頗健寄青城故人

驕氣年來痛自鋤似能略契度關書
神光出晷夜穿帳胎髮滿頭長映梳
吾道元知非土苴此身那可付丘墟
岷山幸有丹爐在青壁何時共結廬

新年七十有九

中歲抱沉痾詎敢望七十造物偶脫
遺俯仰耄已及寧知辱弓旌扶憊去
鄉邑受恩不知報懷抱空怏怏天門
邈難窺地芥亦懶拾隨身一詩囊副
以兩藥笈何當復得謝浩蕩脫維繫
擘淚畫楫飛穿雲青鞵溼餘年尚有
幾登覽當汲汲狂吟題寺廊大筆蘸
墨汁春日訪客于逆旅及郊寺感而有賦

底事經年客帝鄉風光淡澹日初長
野歌作氣老猶壯花氣撩人醒亦狂
店壁拂塵尋舊字寺樓極目送

斜陽告歸不過殘春事杜曲桑麻亦未荒

二月二日夢中作

零落薔薇委道傍更堪微雨漬殘香
象牀玉尺人何在腸斷新裁錦一方

對酒作

羨門安期何在哉河流上泝崑崙開
白雲不與隱居老孤鶴自下遼天來
春江風物正閑美綠浦潮平柂初起
莫吹長笛發巴陵曉挂高帆渡湘水
世間萬變更故新會當太息摩銅人
脫裘取酒藉芳草與子共醉壺中春

西湖春遊

靈隱前天竺後鬼削神剝作巖岫冷
泉亭中一尊酒一日可敵千年壽清
明後上巳前千紅百紫爭妖妍擊擊
鼓聲鞠場邊鞦韆一蹴如登仙人生
得意須年少白髮龍鍾空自笑君不
見鬪亭耐事故將軍醉尉怒詞如不
聞

春晚用對酒韻

吾今歸哉復歸哉草堂正對湖山開
座銘漆園養生主屏列柴桑歸去來
一閑可敵八珍美驪駒在門端可起
不緣老病日日增世味從來淡如水
故人誰非白頭新况復眼中無故人
但餘一恨未免數掩關睡過今年春

題館中直舍壁

幾年顛顛去清班敢辱君恩誤賜環
但厭軟塵隨倦馬不愁弱水隔神山
下帷寢飯羣書裏退食雍容衆雋間
行矣東歸竟何補低回未免媿吾顏

春晚懷故山

吾廬煙樹間正占湖一曲遠山何所
似鬢髻千髻綠近山更可人連娟兩
眉蹙澗蟠偃蓋松路暗圍尺竹海棠
雖妍華態度終不俗最奇女郎花宛
有世外獨雖云懶出遊閉戶樂事足
年來殊失計久耗太倉粟淖糜不救
口斷簡欲滿屋兀兀不知春青燈伴
幽獨

春社日効宛陵先生體

社雨

開歲纔幾時春社忽已及茫茫草色深蕭蕭雨聲急
扶犁行白水不惜芒屨溼村童更可憐赤腳牛背立

社鼓

酒旗三家市煙草十里陂林間鼓擊擊迨此春社時
飲福父老醉菟峩相扶持君勿輕此聲可配豐年詩

社酒

農家畊作苦雨暘每關念種黍踴麴蘖終歲勤收斂
社瓮雖草草酒味亦醇醲長歌南陌頭百年應不厭

社肉

社日取社豬燔炙香滿村飢鴉集街樹老巫立廟門
雖無牲牢盛古禮亦略存醉歸懷餘肉露遺徧諸孫

局中春興

天知病眼困風沙借與蓬山閱物華微暝已迎新到
燕輕陰猶護欲殘花幽窗寂寂書圍座倦枕時時夢

久客

過家立馬庭前還小駐不妨閑試半甌茶
顛額閑坊底蕭條久客心燕歸知社過葉密覺春深
燈火愁殘史塵埃歎素琴餘生猶有幾去日苦駸駸

幽居

花過鶯初賴泥新燕正忙病餘猶止酒睡起獨焚香
拄杖嫌園窄棋枰喜日長北窗元可樂不是傲羲皇

春日絕句

吏來屢敗哦詩興兩作常妨載酒行忽見家家插楊
柳始知今日是清明

又

二十四番花有信一百七日食猶寒眼中不是無春
色歎息衰翁自鮮歡

又

門前喚擔買芳菲白髮猶堪插一枝舊厭蛙聲今喜
聽牆陰特地作盆池

又

故園蛺蝶最多種百草長時花亂開窮巷春風元不
到一雙誰遣過牆來

又

桃李吹成九陌塵客中又過一年春餘寒漠漠城南
路只見鞦韆不見人

又

便恐東皇促駕回小軒無事且啣盃不知何處桃花
落一片飛從屋角來

又

介亭南畔排衙石剝蘚剝苔覓舊題讀罷南豐數行
字滿山煙雨共淒迷

又

楊家園裏醉殘春醉倩傍人拾墮巾紅紫飄零不須
歎東君渠自是行人

數老

晨起梳頭滿鏡霜豈堪著脚少年場酒徒分散情疎
索棋敵憑陵意頗頑寓世極知均醉夢餘生只合老

春雨中偶賦

啣桑石帆山下尊絲長待我還東泊野航
老子年來百事慵不妨詩課尚能供殘花已覺胭脂
淡煮酒初嘗琥珀濃羸病不堪連日雨孤愁偏法五

戲詠落花

更鐘舊交只有烏藤在且伴禪床莫化龍
終年裁接待新春一日隨風委路塵愁殺主翁渠不
管爭如只作看花人

思歸示兒輩

睡味甜如蜜人情冷似漿流年垂及耆客子固多傷
興發雞豚社心闌翰墨場吾兒姑力穡莫羨笏堆床

東軒花時將過感懷

小軒風月得婆娑盡付流年與嘯歌細數一春今過
半正令百歲亦無多還家常恐難全璧閱世深疑已

爛柯只欲閉門捲倦枕晚風無奈落花何

又

社雨晴時燕子飛園林何許覓芳菲江山良是人誰在天地無私春又歸殘史有期成汗簡修門即日挂朝衣人生念念皆堪悔敢効淵明數昨非

江亭

千載濤江上書生誦所聞鑄形尊越蠹扶眼悼荆員高為衝煙沒輕舟壓浪分何由從此逝揮手謝諸君

對食

天賦元無滿谷羊不煩梁肉汗龜腸忽逢客釜蔬羹美遙憶山廚麥飯香正有一簞元自足縱嘲三韭亦何傷江邊煙岫參差路便喚漁舟莫治裝

飽食

飽食無功媿汗青燈前顧影歎伶俜馬衰猶養疑知路龜久當捐為不靈腰下徒誇綬若若鏡中何止髮星星石帆回首初非遠要及清秋斷扶苓

記夢

旅夢遊何地分明禹廟傍不嫌村餉薄但愛野蔬香筍市連山塢菱歌起夕陽一蓑元所樂枉道賴衣裳初夜暫就枕

街鼓寥寥欲斷時官閑惟與睡相宜褰帷臥看初升月轉枕重思未穩詩偃仰少安真得策欠伸徐起頓忘疲悠然已在羲皇上莫遣兒曹取次知

次林伯玉侍郎韻賦西湖春遊

西湖一別不知年陳迹重尋麥嶺邊山遠往來雙白鷺波平俯仰兩青天殘骸自覺難支久一笑相從亦宿緣旅食京華詩思盡羨公落筆思如泉

湖中微雨戲作

搓罷青梅指爪香一盃聊復荅年光莫言老子無人顧猶得西施作淡粧

與兒輩泛舟遊西湖一日間晴陰屢易

逢著園林即款扉酌泉鸞筍欲忘歸楊花正與人爭

路鳩語還催雨點衣古寺題名那復在後生識面自應稀傷心六十餘年事雙塔依然在翠微

贈呂次翁

君得金丹雖未仙放翁邂逅與忘年空能處處誇詩句不解時時贈酒錢馬駿極知生翼上鶴飛會見上遼天爾來筆硯塵埃滿刺欲相從乞一聯

得子聿到家山後書

日日春陰愁出戶汝今恰遇十分晴桑林紫莢纍纍熟稻壠青秧漫漫平夢好定知行路健書來深慰倚門情柯橋道上山如畫早晚歸舟聽鶻聲

題齋壁

小屋閑坊旋卜居老人也看作吾廬客知貪睡多留刺兒未來歸自檢書草賦萬言那直水屬文三紙尚無驢京塵日念家山樂況值腰鎌割麥初

又

殘髮蕭蕭不滿簪衰年亦自惜光陰作碑諛墓已絕筆絀史藏山猶苦心穿破綠錢多稗筍驚飛紅雨有幽禽北窗睡起摩挲眼更覺清風直萬金

又

一權秋風去已遲釣竿恐失野人期朝回補睡尋幽夢客去偷閑練近詩浮世本知緣苦薄頹齡已與志俱衰平生所慕孤山老剩欲懷茶奠舊祠

小飲

門生嘲喜眠官長罵耽酒人生自適爾嘲罵亦何有蒸我乳下豚翦我雨中韭盃盤雖不豐吾兒起為壽車馬滿長安誰肯顧衰朽作詩付汝藏千金珍弊帚

贈傅神水鑑

寫照今誰下筆親喜君分得臥雲身口中無齒難藏老頰上加毛自有神誤遣汗青成國史未妨著白號山人它時更欲求奇迹畫我溪頭把釣緜

春晚

新綠成陰小雨時幅巾蕭散與閑宜燕歸赴訴經年

別鶯晚分疏出谷遲曉枕呼兒投宿酒莫窗留客算
殘棋儵然此意風塵表正恐羲皇未必知

天竺二曉行

二茆聽徹五更鐘三竺穿窮九里松無復官樓沽酒
笑但頰湖水照衰容

又

筍輿呷軋水雲間慚愧忙身得暫閑堪笑風中一黃
葉知看天外幾青山

初見石榴花

吳中四月尚餘寒細雨霏霏怯倚闌老子真成興不
淺榴花折得一枝看

夢遊

太華峯頭秋氣新醉臨絕壁岸綸巾世間萬事惟堪
笑禹跡茫茫九片塵

又

九秋風露洗頭盆萬里雲煙腰帶輕小食松膠知已
熟與君爛醉不須醒

又

客途幽夢苦凄凄滿眼山川意却迷條華朝驅雲外
騎河潼夜聽月中雞

江亭晚思

本自無閑況有忙遠坊兀兀送年光太空不礙雲舒
卷高枕寧論夢短長山破霽煙千萬疊鳥橫湖浦兩
三行年來自笑詩情減愁絕奚奴古錦囊

上章納祿恩界外祠遂以五月初東歸

身似霜松老不枯乞骸猶得待清都百錢濁酒渾家
醉六月飛蟲徹曉無笑睡不愁閑客攬出遊自有小
兒扶買山尚恐巢由笑敢問君王覓鏡湖

又

黃紙淋漓字似鴉即今真箇是還家園廬漸近湖山
好鄰曲來迎鼓笛譁籟實傍籬收豆莢盤蔬臨水采
芹芽皇家養老非忘汝不必青門學種瓜

又

羣玉峯頭孤夢斷五雲溪上野舟回傍人鷗鳥自然
熟到處藕花無數開麥飯不饜常面槁柴門閑掩自
心灰雨來正作盆山地不怕冥冥半月梅

又

身是風前一斷蓬經年竊食竟何功倚天青嶂迎舩
出撲馬紅塵轉眼空網戶餉魚勝丙穴旗亭送酒等
鄂筒死前幸作扶犁叟免使淮南笑發蒙

又

此身惟有一躬畊乞得餘年樂太平東觀竝遊收昨
夢西湖重到付來生一堤草露明晨照半浦荷風颭
晚晴歷歷歸途皆勝事江亭先聽權歌聲

江亭

旅食京華興已闌喜扶衰憊出重關江波蕪岸綠堪
染山色迎人秀可餐濠上觀魚非至樂管中窺豹豈
全班此行便問天台路利采靈芝換病顏

題三茆邵道士雲隱

與盡當年句曲秋却歸罨畫弄扁舟有時信脚來沙
際拾得殘雲補破裘

又

尚嫌勾漏養丹砂況種劉郎去後花罨畫溪頭雲萬
頃不知何處是君家

受外祠敕

放浪江湖迹已陳今朝剩喜結銜新讀經未敢稱名
士拜賜猶應號散人歸去還騎款段馬醉顛重岸接
羅巾中行漸近雲門寺愈信人生有宿因

感寓

人生難控搏古謂七十稀壽夭雖小異要亦同所歸
君看銜山日耿耿有餘暉投床方息偃晨起復求衣
萬家同一役負水關門扉知叟與憑公畢竟孰是非

又

老氏有至言所貴知我稀鄙夫急自銜豈復擇所歸

君看珠在淵草木借光輝所以古達人懷玉被褐衣
吾廬大澤中歲苦水半扉朱門固自好我亦未必非

肉食

平生愛枯淡老病未免肉殺戒苦難持食境則易熟
鄙夫五鼎少達士一瓢足紛紛刀机間斷者豈復續
習聞謂當然乍見可痛哭長安多貴人得此試一讀

贈成封州鏞

綠髮臨邊固已奇不應顛顛客京師極知自有封侯
骨但要無忘畊壠時意氣覆瓿書捷布風流橫槊賦
新詩平生每恨相從少滿眼關山又語離

予以壬戌六月十四日入都門癸亥五月十四
日去國而中有閏月益相距正一年矣慨然有

賦

三百六十日扶衰得出都略無新伎倆仍是舊形模
世事蠻攻觸人情越事吳勿言尊菜老樣權醉湘湖
又

一百七十里我行誰謂賒期年初去國度宿即還家
事似談春夢身如寄客棹石帆村好在重理舊桑麻

雨中別同朝諸公

今日別交舊街泥盈尺深極知當作惡追恨闕相尋
笑語關幽夢江山入苦吟新秋纔一月留句待清砧
又

兩點萬珠落水聲羣馬奔纔能脫危路未遽定驚魂
一掃枕中夢即歸江上村村膠莫嫌薄隨事有雞豚

出城

羈枕不成寐羸驂曉出城驛門深閉草苑樹密藏鶯
老病安閑散疎慵負聖明津亭凝望久惟是待潮平
宿北錢清

晡時理舟楫甲夜泊錢清齋餅依然笑 店家齋麵有名
已六十年矣漁燈特地明酒旗闌道出風浪拍舷鳴未

說鄉關喜江山亦有情

老伶

老伶頭已白相識不論年時出隨童稚猶能習管絃
煙林梅市路風慢放翁舩餘酒堪同醉君無惜醉眠

舟行錢清柯橋之間

逾年夢想會稽城喜挂高帆浩蕩行未見東西雙白
塔先經南北兩錢清兒童鼓笛迎歸艦父老壺觴敘
別情想到吾廬猶未夜竹間正看夕陽明

寓蓬萊館

道山方夢斷稅駕復蓬萊海上羝應乳遼東鶴已回
客驚添鬢雪自笑久心灰底事妨人睡樓頭莫角哀
乍自京塵中得歸故山作五字識喜

門巷如秋爽軒窗抵海寬初還綬若若已覺面團團
引睡拈書卷偷閑把釣竿人生快意事五月出長安

初歸雜詠

雪滿漁蓑雨墊巾超然無處不清真胸中那可有一
事天下故應無兩人騎馬每行秋棧路喚船還渡莫
江津酒樓僧壁留詩徧八十年來自在身

又

齒豁頭童儘耐嘲即今爛飯用匙抄朱門漫設千盃
酒青壁寧無一把茅偶爾作官羞問馬頰然對客但
稱貓此身定向山中死不用磨錢擲卦爻 磨錢擲卦爻

蜀龍昌期語也

又

八十可憐心尚孩看山看水不知回輒炊香甑桃花
飯淺酌清尊竹葉醅平地本知多陷阱羣兒隨處覓
梯煤曠懷只待秋風起十丈蒲帆海上開

又

換盡朱顏兩鬢皤流年如此奈君何早從學問求開
益晚悟文章要詆訶每憶壯遊成獨笑問逢老伴亦
高歌更餘一恨君知否千載涪溪石未磨

又

窗下初收剝啄棋疎簾牽地晝陰移下巖石潤揮毫
後正焙茶香落磴時應老入朝元是錯期年決去已

爲遲天公賦予誰能測只吝功名不吝詩

又

小園五畝翦蓬蒿便覺人間迹可逃盡疏珍禽添爾
雅更書香草續離騷藥苗可斲攜長鏡黍酒新成壓
小槽老入鷓行方徹悟一官何處不徒勞

又

乞得身歸且浩歌蕭然生世寄漁蓑茶甘半日如新
啜墨妙移時不再磨山寺蹋雲頻獨往鄰家穿竹自
相過棋枰勝負能多少堪笑傍人說爛柯

劍南詩稿卷第五十二終

劍南詩稿目錄

卷第五十四

湖上急雨 夏日獨居 溪上夜釣 幽事

夙興 文章 閒遊四首 夏日 蜻蜓浦夜

泊 幽興 避暑近村偶題 南堂夜坐 立

秋前一夕作 憶昔 自嘲 夜坐庭中 養

生 飲酒近村 遊山四首 聞蛩二首 入

秋遊山賦詩略無闕日戲作五字七首識之以

野店山橋送馬蹄為韻 村居四首 六藝示

子聿 七月十七夜五更起坐至日 書懷四

首 湖上秋夜 書感 示兒 書適二首

放慵 登臨 寓歎 居家 舟中作 築舍

雜感五首 送陳懷叔赴上臯酒官却還都

下 歸三山入秋益涼欣然有賦 子聿至湖

上待其歸 晚行舍後 秋夜讀書有感二首

治圃 村醉 病臥 書悔 航海 黃犢

秋夜 目昏頗廢觀書以詩記其始時年七

十九矣 假山擬宛陵先生體 秋興二首

湖上夜歸 晨起 飯飽晝臥戲作短歌 孤

學 自嘲 試筆 秋思三首 晨起偶得五

字戲題稿後 野步 喜晴 自箴 自喜

自詒二首 對酒示坐中 秋晚衰疾稍平聊

識喜懷 偶出至近村 書宛陵集後 鄉居

重九無菊有感

劍南詩稿卷第五十四

宋陸游務觀

湖上急雨

谿煙一縷起前灘急雨俄吞四面山造化等閑成壯觀月明却送釣船還

夏日獨居

平生本清淨垂老更蕭然已罷客載酒亦無僧說禪空庭朝下鶯密樹晚鳴蟬長日君無厭新秋近眼邊

溪上夜釣

少時妄意學金丹八十谿頭把釣竿露溼茭叢姑惡哭煙深沙渚鷺鷥寒登臨每歎乾坤大強健猶應歲月寬作意清吟未須厭如山殘稿後人看

幽事

曳杖驚林鶻投竿罵澗花若非詩滿卷只道夢還家開士分朝飯鄰翁喚午茶悠然吾事足歸路竝山斜

夙興

幽夢回千里高城轉五更窗虛送月落竹動喜風生自笑行安住猶思坐待明郊居少僮僕手自闢柴荆

文章

文章在眼每森然力弱才疎挽不前前輩不生吾輩老恐留遺恨又千年

閑遊

觸熱辭行在扶衰返故丘亂蟬催落日病葉報新秋秣蹇投山驛尋詩倚寺樓不因行萬里那信此生浮

又

剡縣有佳處吾行無定期橫塘供晚釣孤店具晨炊約客同看竹留僧與對棋人生得自在更老未為遲

又

我出亦何急轍行還悵然輕裝幸已具老健更誰先野飯聊支日山蔬不直錢此生終樂死何以報皇天

又
已破京塵夢還尋剡曲遊戴星離古戍衝雨憩山郵壁認曾題字門橫昔渡舟經行固多感隨處寄悠悠
夏日

赫赫炎威日正中冰紈笛簟欲無功一心願伴沙頭鷺百計難呼木杪風纖手削瓜刀似水小翼分酒盞如空洗心幸有高樓月少待寒光出海東

蟻艇浦夜泊

風雨忽如秋已深短篷今夜繫楓林溪翁那問市朝事蔬食不生盃炙心橫截煙波飛健鷗遠投沙渚落羈禽斯遊誰道傷幽獨猶有殘鐘伴苦吟

幽興

微官那得繫疎慵幽興渾如社酒濃掃盡塵埃無一點洗空幻翳有千重百年到處俱羈客萬里從來付短筇身在有餘真妙語盃羹何地欠秋菘

避暑近村偶題

乞得身歸荷聖時登臨筋力未全衰楚祠草舍三叉路項羽廟在項里隋寺苔侵半折碑安隱院也孤店不妨乘月宿扁舟頗為看山移紅塵冠蓋真堪怕還我平生白接羅

南堂夜坐

老來日月駛秋令俄更端蟬號晚愈壯螢火流空園西風吹衣裳蕭然謝炎官飽食一事無散髮坐前軒河漢西南流北斗何闌干坐久光彩變缺月涌金盆

立秋前一夕作

螢度梧楸徑鳥鳴蒲葦洲寧知八十老又見一年秋賀監稱狂客劉伶贈醉侯吾身會兼此已矣尚何求

憶昔

憶昔西遊兩鬢青即今鏡裏雪千莖蛾眉風月猶關念濯錦鸞花已隔生避暑有時移枕簟畏人終日閉柴荆此懷恨欠詩千首且寄秋泉一再行

自朝

外澤裏常粗元知似瓠壺仕因無援困學為背時孤
軒蓋愁城市風煙落道途它年遊萬里不必念歸吳
夜坐庭中

大澤秋初到荒庭夜自明風雲生有候河漢落無聲
病得新涼減詩因少睡成高枝有烏鶻栖穩若為驚

養生

稟賦本不强四十已遽衰藥裹不離手對酒盤無梨
豈料今八十白間猶黑絲咀嚼雖小難幸未如牛呵
昔雖學養生所遇少碩師金丹既茫味鸞鶴安可期
惟有庖丁篇可信端不疑愛身過拱壁奉以無缺虧
孽不患天作威惟憂自詒孽楚豈不苦害猶在四支
二豎伏膏肓良醫所不治衣巾視寒燠飲食節飽飢
虎兕雖在傍牙爪何由施老人不妄語聊賦養生詩

飲酒近村

放翁睡多少行立人扶往赴鄰里集痛飲山花插鬢
紅醉歸棘露露衣溼紗巾一幅何翩翩庭中弄影不
肯眠莫欺此老今衰甚曾見高皇狩越年

遊山

蕭散湖山路天教脫屣羈蟬聲入古寺馬影度荒坡
樵唱時傾耳僧談亦解頤偏門燈火鬧不敢恨歸遲
偏門會稽城西南門名

又

久客喜歸舍況逢秋氣新聊乘行藤子閑覓住菴人
道士青芒屨高僧白氎巾更須苦井水一為濯京塵

又

病退行猶倦山坡每少休高枝聞鶯語淺瀨見魚遊
偶有堪乘興元無可遣愁悠然又終日爭路有歸牛

又

古寺不來久入門空數嗟僧亡猶見塔樹老已無花
世事雖難料吾生固有涯懸懸一梳月十里伴還家
聞蛩

蟬聲未斷已蛩鳴徂歲蟬噪得我驚八十光陰猶幾
許勉思忠敬盡餘生

又

稽首周公萬世師小儒命薄不同時秋蟲却是生無
憾名在齋人七月詩

入秋遊山賦詩略無闕日戲作五字七首識之

以野店山橋送馬蹄為韻

東髮初學詩妄意薄風雅中年困憂患聊欲希屈賈
寧知竟鹵莽所得纔土苴入海殊未深珠璣不盈把
老來似少進遇興頗傾瀉猶能起後生黃河吞鉅野

又

我昔西遊邊萬里持一劍風發不自恤露宿未嘗厭
棧危餘漢燒山斷有秦塹敢誇胡羊美但懷巴酒職
回首四十年遠遊每關念秋風跨蹇驢尚喜道傍店

又

周南太史公道家蓬萊山塵凡不可料亦復居其間
屢委乞骸骨寬恩許投閑羽衣碧玉簡尚綴僊官班
黃精掃白髮面有孺子顏簡寂吾家舊飄然時往還

又

我行剡中路茆店連谿橋驢弱我亦飢解鞍雨蕭蕭
投床得小憩炊黍烹藥苗舉手謝主人去路盤山腰
沃洲在何許秋葉紅未凋遊僧不可逢聊須問歸樵

又

怕事真驚病老作入都夢頭顱今何似尚復堪自送
聯裾預登瀛策馬從上雍年表當亟去思大容力控
雖言解朝籍尚予侍祠俸明年即八十月難把弄
著書則已矣努力謀社蠶

又

吾才如寒人何計逐犇馬吾文如醜女惟藉粉黛假
向來已歸休畢志向林下塊然一愚公初不繫用捨
國恩定難報衰涕時一灑人本不勝天豈復論衆寡

又

驢病比已損秋風輕四蹄朝遊支遁寺莫涉干吉谿
青嶂環孤村綠波溢橫隄吾行本無定所至窮攀躋
細推亦何樂正類好鍛嵇自今當務本春蕪飽鉏犁

村居

白首歸來亦灌畦任教鄰里笑栖栖道心寧感兩雌
雉生計惟存五母雞不恨閑門可羅爵本知窮巷自
多泥莫聞鼓角猶人境更欲移家入剡溪

游子從來念故鄉我歸仍得值豐穰粗繒裁製襜褕
嘔肥封烹調縛飴香對客不妨依几杖呼兒時與話
畊桑却慚未解真齊物猶揀山村靜處藏

青藜杖出氛埃外白版扉開水竹邊造物與閑仍與
健鄉人知老不知年齋居每袖持螯手妄想寧流見
麴涎昨夜小庭風露冷菊花消息已先傳

石帆山下樂誰如八尺輕舸萬頃湖能釀人家分小
榼愛棋道士寄新圖條枚積地樹雞柵溝港接筒燒
芋區父子還家更何事斷編燈下講唐虞

六藝江河萬古流吾徒鑽仰死方休沛然要似禹行
水卓爾孰如丁解牛老僊簡編猶自力夜涼膏火漸
當謀大門舊業微如錢賴有吾兒共此憂

七月十七夜五更起坐至旦
秋容淡如水昨莫到江城世事違高枕年華入短檠
書中固多味身外盡浮名倚壁方清嘯蓬窗已送明

不飢不寒萬事足有山有水一生閑朱門莫管渠癡
絕自愛茅茨三兩間

又
老人舉動須扶掖跣婢奴少得閑從此漸須都畫
斷足如避難在空山

又
蝸廬自稱野人居三尺明窗已有餘從此要當常省
事時時小葺欲何須

又
首著堆盤莫笑貧家園瓜瓠漸輪囷但令爛熟如蒸
鴨不著鹽醃也自珍

湖上秋夜
湖上山銜落月明釣筒收罷葉舟橫不知身世在何
許一夜蕭蕭蘆荻聲

書感
俗學方譁世遺經寢已微斯文未云喪吾道豈其非
拔本寧餘力迷途幸識歸新涼起衰疾燈火耿郊扉

示兒
得道如良賈深藏要若無冷金寧輒躍韞玉忌輕沽
儒術今方裂吾家學本孤汝曹能念此努力共枝梧

書適
北嶼千梢竹東軒八尺床徧行欣老健熟睡領新涼
海石陳書几陶詩貯藥囊時時一到眼亦足傲羲皇

又
海石英石也東坡詩云海石來珠浦
心清絕慾早才薄去官多月下時閑釣雲邊每浩歌
野堂青草覆山市白驢過也有成功處新降百萬魔

放慵
往者畊仍養中間任易農屢辭身老病每荷上矜從
進魏門三戟歸無畝一鍾扶持得良藥更放幾年慵

登臨
儘道羈懷惡登臨亦解顏健嫌山路淺狂恨酒尊慳
親友多疎索漁樵自往還有詩仍懶記零落水雲間

寓歎
有位方憂失無家豈念歸賢愚竟誰得今昨兩皆非
世事無長算人情忽駭機細思如意處惟有釣魚磯
居家

為吏心雖懶居家力尚餘刈茅支屋漏栽棘補籬疎
就井磨樵斧持錢鍛藥鉏毋勞歎徒步野鶴豈堪車

舟中作

野老元無事乘閑偶一來微風市樓笛落日寺街槐
梨大團三寸鱸肥疊四腮鄰船不識面呼與共銜盃

築舍

築舍水雲鄉蕭然似淨坊粥饋菘米滑羹釜藥苗香
素壁圖嵩華明窗讀老莊與人元淡淡不是故相忘

雜感

孔欲居九夷老亦適流沙忠信之所覃豈間夷與華
沉我州閭間相視等一家老稚各自力勉蹈思無邪

又

十月可釀酒六月可作醬兒曹念乃翁左右日供養
比鄰有老疾亦復致一餉老老以及人此義古所尚

又

肉食養老人古雖有是說修身以待終何至陷饕餮
晨烹山蔬美午漱石泉潔豈役七尺軀事此膚寸舌

又

一氣不遽變兩壽皆有符死非一日至小疾為前驅
人能謹察之豈有倉卒虞哀哉不知此雖悔良難圖

又

養生孰為本元氣不可虧秋毫失固守金丹亦奚為
所以古達人一意堅自持魔鬼雖百萬敢犯堂堂師

送陳懷叔赴上臯酒官却還都下

奇才初試發礪刀疋馬秋風到上臯地近雖同三輔
重時平無復五陵豪極知穩步煙霄路却要微知郡

縣勞歸去平津開首燕吐茵應復忤西曹
歸三山入秋益涼欣然有賦

藥物扶持美食眠鏡湖仍遇素秋天一年強起歸猶
健百口相看喜欲顛碧瓦朱甍無傑屋烏篷畫楫有

新船道山頂上雖清絕萬頃煙波始是仙
子聿至湖上待其歸

舍北犬吠迎歸航老翁待兒據胡床碧雲忽起欲吞
日黃葉自凋非置霜十風五雨歲則熟左發右躬身
其康豈無深谷結茅屋父子讀易消年光

晚行舍後

略約東邊一徑深杖藜行飯當登臨稷山拉海出遙
碧禹穴生雲成莫陰殘歲自興遊子感少年誰解老
人心歸來燈火參差夜倦倚胡床續短吟

秋夜讀書有感

妄意斯文力弗勝苦心猶欲付雲仍數編魯壁家傳
學一盞吳僧夜講燈南犬固應多吠雪夏蟲那得解
知冰但令吾道常無墜飲水何妨枕曲肱

又

齒髮凋殘志有餘一編聊復遂吾初老來每恨無同
學夢裏猶曾得異書家世偏憎慕青紫兒童切莫話
龍豬正令世世皆農圃廉讓何妨化里閭

治圃

小圃漫經營栽培培力畊土鬆宜雨點根稚怯鉏聲
紅葉方當熟清陰亦漸成每來常竟日聊得暢幽情

村醉

髮已凋零齒已疎飽語成敗更誰如貴人豈得常金
屋丞相那知起草廬久泛江湖知釣術晚歸慵畝授
農書一尊徑就村翁醉未肯英雄許本初

病臥

蕭條風雨又經旬病臥真成不覿隣跨馬難酬四方
志耽書空盡百年身碧花引蔓緣疎竹黃雀呼羣啄
破困君見此時風味否肯辭人笑橐裝貧

書悔

衣食須畊稼無端浪出遊客途南北雁世事雨晴鳩
篷轉何時已灰寒善自謀江湖千萬里何處欠漁舟

杭海

我老臥丘園百事習慵惰惟有汗漫遊未語意先可
或挂風半帆或貯雲一舸趁潮亂鳴鶻過磧細扶柁

近輒凌煙海自笑一何果邂逅得奇觀造物豈付我
古漱石蜿蜒孤島松磊砢雁蕩大龍漱石如騰龍東海縣境
有巨松傳爲堯舜時物湘竹閔娥祠淮怪深禹鏤鬼神駭
岸炬天地赫龍火瑰奇窮萬變鯤鵬尚么麼紛紛旋
或忘追記今亦頗作詩配齊諸發子笑齒瑳

黃犢

賣刀買黃犢用以事耕稼凄風山北秋缺月溪西夜
小童搯竹枝相呼聊一跨秋來作欄成參差出林鱗
青煙起草積微火近茅舍未言東作功此景已可畫
秋夜

老覺人間歲月道惜惜窗戶一燈幽讀書已廢虛長
夜護塞無期負盛秋病齒何堪食梁肉殘軀惟念製
衣裘重陽臥看登高侶滿把茱萸只自愁

日昏頗廢觀書以詩記其始時年七十九矣

少時業詩書慕古不自量晨莫間弦誦左右紛朱黃
積書山崇崇探義海茫茫同志三四人辯論略相當
落筆輒千言氣欲吞名場忽焉六十年綠鬢久已霜
食必觀本草不療病在床今秋又病目始覺閑味長
車馬既不至亦無書在傍一坐漏十刻甚倦則倚牆
蝴蝶吾前身華胥吾故鄉童子亦聽睡不復呼燒香
假山擬宛陵先生體
疊石作小山埋瓮成小潭旁爲負薪徑中開釣魚菴
谷聲應鐘鼓波影倒松楠借問此何許恐是廬山南
秋興

又

足力踈躄少迎客目視昏短常廢書賴是門前秋水
長沙鷗未遽與人疎

湖上夜歸

滿鏡新霜奈老何扁舟日日醉顏醜樂如逐兔牽黃
犬快似麾兵卷白波霜近菊花猶未見雨餘橙子已

堪挂湖桑小市人無數爭看山翁擊楫歌

晨起

戒婢簾衣徹屣屣呼兒滌硯作踰屢須臾開卷東窗
下卽是先生無病時

飯飽晝臥戲作短歌

爲農得飯常半菽出仕固應甘脫粟藜羹自美何待
糝况復畏人嘲首指今年還東已八十視聽雖存鬢
先禿安能賣藥謀助道道流賣藥自給名曰助道但有知
分堪養福水車轆轤鄰鮑魚社鼓擊擊衆分肉可憐
老子暫膨臍午睡窗邊自捫腹里中車蕩取魚書例以所
得分遣

孤學

孤學雖違俗猶爲一腐儒家貧占力量夜夢驗工夫
正復安三徑寧忘奏六符殘年知有幾自怪尚區區

自嘲

儒生窮事業老去轉荒唐長日中分睡殘年有底忙
書常懶終卷詩亦少成章忽棄蓬窗去花前又一觴
試筆

秋思

清談數語猶疑過平地徐行亦慮危酌酒淺深須在
我更衣單復要隨時

又

烏柏微丹菊漸開天高風送雁聲哀詩情也似并刀
快翦得秋光入卷來

又

水際柴門一扇開白頭羸病亦堪哀阿誰得似桃榔
杖肯爲閑人萬里來

又

蒼顏莫怪少曾開觸目人情但可哀死去肯爲浮世
戀此身元自不應來

晨起偶得五字戲題稿後

推枕悠然起吾詩忽欲成雖云無義語猶異不平鳴
有得忌輕出微瑕須細評平生五字句垂老媿長城

野步

場圃農功畢，村鄰醉叟多。野風吹慘澹，海氣起嵯峨。
婦女窺籬看，兒童拾穗歌。身閑不自樂，如此莫年何。

喜晴

一夜霜風掃積陰，檐間喚起有鳴禽。滿窗零亂梧桐樹，
影隣巷蕭條雞犬音。文史漸宜精討閱，湖山仍得飽

登臨。園丁也解娛翁意，藝果移花已滿林。

自箴

帶寬非復昔年腰，頰上餘丹日日消。切勿更為兒戲，
事解猿放鶴各逍搖。

自喜

身閑僂不遠，食足富何加。庭臥長生犢，園開手種花。
狂歌聲跌宕，草筆橫斜。八十明年是，衰殘豈復嗟。

自詒

病中看周易，醉後讀離騷。不解書驪券，安能問馬曹。
身隨遊宦困，氣為屏居豪。清日南堂坐，稽山秋更高。

又

莊語畏如佛，端居要若齋。清虛集心腑，枯槁見形骸。
自計愚無用，何傷老不諧。人生須廣大，勿作井中蛙。

對酒示坐中

綠橙丹柿鬪時新，一笑聊誇老健身。大度乾坤容縱，
酒多情風月伴垂綸。初生京洛逢時泰，幼度江淮避

虜塵。八十年間窮不死，猶能澗底束荆薪。

秋晚衰疾稍平聊識喜懷

世事紛紛博局中，豈知造物貸衰翁。短筇倚壁知身，
健小甌炊粳喜歲豐。霜近平郊多雁落，雨頻斷港有

船通。更餘一事生詩興，烏柏新添數葉紅。

偶出至近村

神爽無酣寢，身閑有劇棋。說詩橫柳栗，賒酒挈鴟夷。
寺古殘香冷，溪深獨木危。往來元信步，不是赴幽期。

書宛陵集後

突過元和作，巍然獨主盟。諸家義皆墮，此老話方行。

趙壁連城價，隋珠照乘明。粗能窺梗概，亦足慰平生。

鄉居

客問鄉居事，久居君自知。度橋徵士悔，過社旅人悲。
社散家分肉，農閑衆築陂。牆東新洗竹，我亦補藩籬。

重九無菊有感

重陽未見一枝菊，它日菊開生我愁。高興亭中香滿，
把令人北望憶梁州。高興亭在南鄭子城西，北正對南山。

劍南詩稿卷第五十四終

劍南詩稿目錄
卷第五十五

記東村父老言 試筆 曠懷 夢行小益道
中二首 秋樹 雜感六首 柳橋秋夜 訪
隱者不遇 蒼檜 農家歌 君子非好異
獨登東巖 灌園 晨起 龜堂 蜀漢 客
有言太山者因思青城舊遊有作 遊近村
疎雨 秋曉 癸亥初冬作 兀坐久散步野
舍 法雲寺 小徑登東山繚行自西北至溪
上 美睡 逆旅 東園 雜感四首 渡頭
小飲賞菊 與兒輩小集 舍北晚眺 書
室獨處欣然有詠 冬初至法雲 感憤 記
老農語 村舍 自述 泊舟湖橋酒樓下
菴中雜書四首 連日暴下齋然不支戲作
大風 野興二首 若耶村老人 霜曉 山
澤 遠遊 北窗 醉題 幽居 連陰欲雪
排悶 示子聿 項里溪上見珍禽曰溪鷓相
隨數十步不去 冬夜對書卷有感 項王祠
入城 出城 不入城半年矣作短歌遣興
先大父以元祐乙亥寓居妙明僧舍後百餘
年當嘉泰癸亥游復假榻一夕感歎成詠 志
學 晚行舍北 幽居述事四首 十一月五
夜風雪寒甚燃薪取煖戲作五字 魯墟 曉
雪二首 養生 夜讀鞏仲至閩中詩有懷其
人 獨意 十一月十三日夜作 故人趙昌
甫久不相聞寄三詩皆傑作也輒以長句奉酬
夢中賦早行 兀兀 哺猿 與子坦子聿
元敏犯寒至東園尋梅 示諸孫 題齋壁二
首 雜言示子聿 夜坐聞大風 歸老 懷
舊三首

劍南詩稿卷第五十五

宋陸游務觀

記東村父老言

原上一縷雲水面數點雨夾衣已覺冷秋令遽如許
行行適東村父老可共語披衣出迎客芋栗旋烹煮
自言家近郊生不識官府甚愛問孝書請學公勿拒
我亦為欣然開卷發端緒講說雖淺近於子或有補
耕荒兩黃犢庇身一茅宇勉讀庶人章淳風可還古

試筆

用筆如用人利鈍烏可常必欲責其全無乃廢所長
宣城與晉陵聲價略相當不知今何年森然集龜堂
和墨若鑿黑擣紙如銀光心手適調一運此紫毫銳
前却俱稱意六驥馳康莊聊復取一快詎必師鍾張
曠懷

曠懷何童等沙鷗外物相挺劇火牛若信本心無一
事始知平地起閑愁每逢達士惟長歎欲棄浮生尚
小留今日微霜好風日短筇且領鏡湖秋

夢行小益道中

棧雲零亂馱鈴聲驛樹輪樺燭明清夢不知身萬
里只言今夜宿葭萌

又

棹柳林邊候吏迎血塗草棘虎縱橫分明身在朝天
驛惟欠嘉陵江水聲

秋樹

秋風一夜吹橋樹明日來看已非故吳中九月霜尚
薄落葉半隨飛鳥去老人心事感凋零只欲逢秋醉
不醒范寬用意真難解偏寫丹楓作畫屏

雜感

鶴乘軒車已堪歎狐戴鬪體何可親勸君一笑掃除
盡來作人間百歲人

又
讒口安能作禍基吾曹興廢豈無時向來何事令公
怒問著渠儂自不知

又

難危寧度瘦驢嶺奔走莫隨肥馬塵困厄終身兀自
好可憐癡子恨無津瘦驢嶺在施黔間前輩或有作驢瘦嶺蓋
誤也

又

一尊易致蒲萄酒萬里難逢鸛鶴樓何日羣胡遺種
盡關河形勝得重遊

又

老境睡多行立少浮生會少別離多安得此身重壯
健一盃朋舊共高歌

又

苦熱惟憂不復涼轉頭忽已見清霜道人若悟無寒
暑墮指流金總道場

柳橋秋夜

帝青萬里月輪孤掃盡浮雲一點無正是吾廬秋好
夜上橋渾不要人扶

訪隱者不遇

秋高山色青如染寒雨霏微時數點蘭亭在眼久不
到每對湖山輒懷歎雅聞其下有隱士漠漠孤煙起
松庵獨攜拄杖行造之枳籬數曲柴門掩笛聲尚近
人已邈日啜薄糜終不貶何如小住共一尊山藜野

芋分猿啖

蒼檜

北風捲野天晝晦雨如弩鏃穿屋背老夫下牀行躡
屐稚子抱書坐持盞豈無長楸與巨竹幹折枝摧共
顛沛孰能不動安如山屹立庭前獨蒼檜

農家歌

村東買牛犢舍北作牛屋飯牛三更起夜寐不敢熟
茫茫陂水白纖纖稻秧綠二月鳴搏黍三月號布穀

為農但力作瘠鹵變衍沃腰鎌卷黃雲踏碓春白玉
八月租稅畢社食醴如粥老稚相扶攜閭里送追逐
坐令百世後復覩可封俗君不見朱門玉食烹萬羊
不如農家小甌吳粳香

君子非好異

君子非好異本意亦從衆居然迫所媿難復趨一闕
孟軻遇齊王夫豈不欲用萬鍾養弟子乃似以利動
惟其有辭受百世尊道統豈惟聖賢哉學者固所共

獨登東巖

早慕功名已絕癡晚耽筆墨愈無奇收歟未乳身先
老化鶴重歸語更悲朋舊在亡成斷夢山河興廢入
孤吹悠然獨倚闌干笑又過簪黃泛菊時

灌園

八十身猶健生涯學灌園溪風吹短褐村雨暗衡門
眼正魔軍怖心安疾豎奔午窗無一事梨棗弄諸孫
晨起

老尚貪書課黎明即下床不驚天乍冷更覺意差強
蟾滴初添水螭爐旋炷香浮生又一日開卷就窗光

龜堂

莫笑龜堂老殘年所得多賦詩傳海估說法度天魔
天矯竹如意鱗皴松養和拈來示諸子無事數相過

蜀漢

蜀漢崎嶇外江湖莽蒼中冷官家世事獨立古人風
已老學猶力久窮詩未工悠悠千載後此意與誰同

客有言太山者因思青城舊遊有作

我登青城山雲雨顧在下月色縮巖谷欲睡不忍捨
明朝下半嶺頗怪哀湍瀉山麓雲未歸平地泥沒蹀
乃知宿處高所恨到者寡有客談泰山昔嘗宿石室
夜分林采變陽谷看浴日九州皆片塵盛夏猶慘栗
我聞思一往安得飛僊術但願齊魯平東封尾清蹕

遊近村

度壑穿林脚愈輕憑高望遠眼猶明霜凋老樹寒無

色風掠枯荷颯有聲泥淺不侵雙草屨身閑常對一
棋枰茆檐蔬飯歸來晚已發城頭長短更

疎雨

檐間秋雨時一滴絕似漢嘉方響泉不聽此聲三十
載夢回搔首一凄然

秋曉

菅席多年敗見經布衾木枕伴殘更嚙嚙天際雁初
度嗟嗟舍傍雞亂鳴貸米未回愁竈冷讀書有課待
窗明一秋最恨空堦雨滴破羈懷是此聲

癸亥初冬作

開歲忽八十古來應更稀我存人盡死今是昨皆非
愛酒陶元亮還鄉丁令威目前尋故物惟有釣魚磯

兀坐久散步野舍

頽洞風號木蕭條雨滴堦忽思穿兩屐聊用散孤懷
赤腳春畚粟平頭拾澗柴先師有遺訓萬事忌安排
胡翼之先生教徐節孝曰莫安排

法雲寺

不到法雲久秋高初一來廚供菰白美池蘸水紅開
橋畔逢遊衲雲邊數過梳同遊恨歸早珍重約尋梅

小徑登東山竊行自西北至溪上是夕子聿置酒

行穿拳確度餘劄小立風中客袖斜衰草雙雙點飛
蝶長空一一送栖鴉荻洲薄莫收魚網茆舍初寒響

緯車誰道老人多感慨未妨尊酒樂年華

笑睡

老來曾次掃蟬噪投枕神安氣亦平漫道布衾如鐵
冷未妨鼻息自雷鳴天高斗柄闌干曉露下雞埒隔
膊聲俗念絕知無起處夢為孤鶴過青城

逆旅

秋晚南山行小蹇就店秣我亦念少休無奈市兒聒
嗟爾亦坐飢鎔銖苦爭奪其心計亦厭陷溺無自脫
我欲救其本汝勿謂迂闊要傾江海大一洗錐刀未
人生願須幾卒歲惟一褐有地即可耕何山不堪活

東園

今日天雲霜又見一日晴晴寒病良已扶杖東園行
瓦鼓息我倦靜聽幽鳥鳴花菓四十株手自培養成
疎密無行列東園蓋強名人看不滿笑聊用適我情

雜感

買薪貸粟不曾知一事無營盡日嬉耄老却如童稚
日早眠晏起食無時

又

古言忍字似而非獨有癡頑二字奇此是龜堂安樂
法大書銘座更何疑

又

平生所聞宋華子病忘乃與知道鄰老夫歷盡世間
事始覺此公真可人

又

羲皇一晝開百聖學者即今誰造微文詞害道第一
事子能去之其庶幾

渡頭

蒼檜丹楓古渡頭小橋橫處繫孤舟范寬只恐今猶
在寫出山陰一片秋

小飯賞菊

菊得霜乃榮性與凡草殊我病得霜健每却稚子扶
豈與菊同性故能老不枯今朝喚父老采菊陳酒壺
舉衷舞翩僂擊缶歌烏烏秋晚遇佳日一醉詎可無
與兒輩小集

老子秋來樂事稠吳杭新擣酒新篘矮黃不待園官
送小白每煩溪女留頓飽可憐頻夢與半酣自喜有
兒酬不如意事何窮已且放團樂一笑休

舍北晚眺

平野沉寒日遠村生莫煙離離立紅樹點點散烏健
暫出不逾歲告歸仍一塵江湖初見雁著眼送雲邊

書室獨處欣然有詠

鑿空學道本無師歇盡狂心頗自奇閑坐始知冬日

永高談未覺老年衰治棺準備膏肓日釀酒枝梧雨
雪時常笑祖龍癡到底一生辛苦覓安期

冬初至法雲

曉日曠曠露未乾東中十月始微寒牛閑處處農功
畢米賤家家酒盡寬煙浦白鷗迎鼓柁漁村紅樹入
憑闌歸舟莫恨無人語手把陶詩側臥看

感憤

形勝峭渾在英豪趙魏多精兵連六郡要地控三河
慷慨鴻門會悲傷易水歌幾人懷此志送老一漁蓑
記老農語

村舍

霜清楓葉照溪赤風起寒鷗半天黑魚陂車水人竭
作麥壠翻泥牛盡力確春玉粒恰輪租籃挈黃雞還
作貸歸來糠粃常不饜終歲辛勤亦何得雖然君思
烏可忘為農力耕自其職百錢布被可過冬但願時
清無盜賊

自述

剝啄敲村舍了又揖主人新牆拆龜兆疎瓦斷魚鱗
紅粒炊畚粟青煙鬱潤薪得床思熟睡寒犬苦信信

泊舟湖橋酒樓下

偶策青驢出還將白鶴隨鍊丹留日觀采藥上天池
送客清秋棹留僧靜夜棋從來閑姓字不遺世人知

菴中雜書

縹緲雲邊罨畫樓空濛雨外木蘭舟誰知老子清狂
甚獨占城南十里秋

藥更無一事累天君

蒲龕坐久暖如春紙被無聲白似雲除却放生并施
藥更無一事累天君

萬物並作吾觀復衆人皆醉我獨醒走徧世間無著

謀生安用苦區區豆飯藜羹未遽無若使天年猶合
活不妨自有穀於菟

處閉門鋤菜伴園丁

又

茅茨一室有餘樂，轍環四海誰知心。輟畊壠上鴻鶴志，長嘯山中鸞鳳音。

連日暴下，藪然不支，戲作。

老子心如行脚僧，秋風久已辦行藤。紙衾夜夜江湖夢，小復遲留待判鱗。

大風

風大連三夕，衰翁不出門。兒言卷茅屋，奴報徹蘆藩。狼藉鴉鶻墜，縱橫葉滿園。乘除有今日，紅日上東軒。

野興

掃盡紅塵閉是非，舍傍好在舊苔磯。壺中春色松肪酒，江上秋風柵葉衣。一片共知雲偶出，千年誰識鶴重歸。勿言野外無供給，雪後連山藥草肥。

又

樓蘭勛業竟悠悠，聊作人間汗漫遊。半谷雲霞丹竈熟，一天雷雨劍池秋。徜徉藥市經旬醉，問訊巢仙數夕留。却過故廬應一歎，岸邊猶繫采菱舟。

若耶村老人

昔聞若耶村，意象乃物外。皤然阡陌間，來往幾船背。無論百歲翁，甲子數至再。我來親見之，殊未輟畊耒。曩事一一言，多聞雜諄諄。回頭指丁壯，此是曾玄輩。有翁又過我，家有孫五代。指呼取斗酒，山果雜細碎。顧我使之年，慚縮不能對。恭惟大父行，不覺投杖拜。養生惟一畝，此在吾術內。翁能信踐之，成就乃爾大。我今纔耄及耳目，已憤憤長庚。雖餘輝，敢與明月配。

霜曉

霜有連薺白，林無一葉青。紙衾圍栗烈，風響送東丁。酒盡尊餘滴，灰深火撥星。蓬窗了無事，默坐養黃庭。

山澤

我本山澤人，散誕傲簪裳。宦遊五十年，天遣還農桑。東阡南陌間，吾亦愛吾鄉。楚祠坐秋社，隋寺觀夜場。

醉迷采蒼耳，旅飯炊黃粱。自疑太古民，百年樂未央。有時閑暇時，頗復誦老莊。亦嘗遊岷峨，略聞度世方。氣爲東道主，主安客自長。却後五百年，見我灞城旁。

遠遊

姓字不須通，從來號放翁。月明登暑雪，木落過秋風。成都武擔山，暑雪堂歸州。巴東縣江上，秋風亭皆絕景。處處題僧壁，時時臥釣篷。始知侯萬里，未必是英雄。

北窗

破屋頽垣嘯且歌，一窗隨處寄婆娑。安閑人每歎同儕少，遇事方知去日多。雲涇沙洲秋下雁，雨來菰浦夜鳴鼉。何時更續扁舟興，剩載鄒筒醉綠蘿。綠蘿溪在夷陵。

醉題

目光炯炯射車牛，何至隨人作淚愁。身處江湖如富貴，心親魚鳥等朋儔。孤帆滅沒三湘曉，野店荒寒二華秋。醉墨不容塵土汗，憑君試訪寺家樓。

幽居

練褐藤冠物外裝，下簾留住欲殘香。瀟湘客過誇漁具，灑腕僧來說藥方。詩未遽衰猶跌宕，書雖小退亦軒昂。不緣厭靜尋幽事，老去無如白日長。

連陰欲雪排悶

先生經旬甌坐，塵藜不污白鬢巾。魯連敢謂天下士，摩詰要是山中人。王維自稱山中人，溪從灘瘦瘦愈刻。厲山自木落，增嶙峋。雲重惟愁雪，欲作梅花忽報一枝春。

示子聿

古學尊皇極，淫辭斥異端。人才如爾少，老健及吾難。身退桑榆暖，家貧菽水歡。人生粗足耳，衣食不須寬。涉溪來過東，溪老斷枝槁。葉紛如掃，忽逢溪鷓昔未識。言語惺惚，羽毛好異哉。馴狎若可呼，迹雖甚疎情。有餘上穿蒼煙立，高樹下踏白石窺。遊魚老夫日日

溪頭行見此不妨雙眼明定交物外俗今始豈獨沙鷗可與盟

冬夜對書卷有感

人生如夢終當覺世事非天孰可憑萬卷雖多當具眼一言惟恕可銘膺所聞要足敵憂患吾道豈其無廢興白髮蕭蕭年八十依然父子短檠燈

項王祠

項里溪水聲潺潺溪上青山峩髻鬢煙村人語虛市合石橋日落漁樵還堂上君王凜八尺大冠如箕熊豹顏築祠不知始何代典祀千載誰敢刪蕭清亭障息剽奪掃蕩螟蟻騰囚神奸范增玉斗久已碎虞姬粧面留餘濟小人平生仰遺烈近廟欲結茅三間時時長歌拔山曲醉倒聊慰窮途躑

入城

宿凍迷車轍晨霜縮瓦溝路長休小驛風勁透重裘寶貨殘軀健芒芒去日道親交喜握手隨處小遲留

出城

病鶴寒彌瘦孤松老不枯非關畏軒冕本自樂江湖古錦添詩句羸驂入畫圖兒孫候門久喚取倒殘壺不入城半年矣作短歌遺興

我居城西南渺渺水雲鄉舟車皆十里來住道豈長今夏我來時天風吹荷香再來已孟冬慘然天靄霜市南兩株柳葉盡萌已黃乃知多事人歲晚虛悲傷名藍墮劫火鞠爲瓦礫場河橋比一新華表照康莊成壤莽相尋推理海茫茫疾豎造物兒吾手扼其吭砥柱天下險一葦乃可杭養氣倘能全斯言豈荒唐先大父以元祐乙亥寓居妙明僧舍後百餘年當嘉泰癸亥游復假榻一夕感歎成詠楚公仙去幾秋風巷陌蕭條舊隱空遺老卽今無處覓斷香殘照淚痕中

志學

聖門志學豈容差山立方當斥百家早忝授經聞博

約晚羞同俗陷浮華風勢槁面寒無褐雷轉飢腸飯有沙漫道衰慵貪睡美五更和夢聽城笳

晚行舍北

逆旅將歸客扶衰取次行霜濃木葉盡水落岸痕生鳧雁浮寒浦牛羊滿晚晴東村隔煙寺杳杳送鐘聲

幽居述事

曾會蘭亭醉墮簪後身依舊住山陰琴傳數世漆文斷鶴養多年丹頂深滌硯灘頭無漬墨吹簫月下有遺音小詩戲述幽居事後有高人識此心

又

頽然掩戶不妨奇又賦幽居第二詩大藥鼎成令虎守精思床穩用龜揅壺中自喜乾坤別局上元知日月遲更就羣童閑鬪草人間何處不兒嬉

又

落葉平溝日滿廊幽居又賦第三章喜無俗事干靈府恨不終年住醉鄉上樹榜船雖老健疏泉移竹亦窮忙山僧欲去還留話更盡西齋一炷香

又

昨艤東歸喜遂初頻拈枯筆賦幽居細燒栢子供清坐明點松肪讀道書蒼爪嫩芽開露茗紅根小把淪煙蔬年來自許機心盡頗怪飛鷗自作疎

十一月五夜風雪寒甚燃薪取煖戲作五字

束薪從潤底及此不時求力比鷄黃酒功如狐白裘分才具糜粥餘事煖衾稠復恐成驕惰三更起飯牛

魯墟先太傅舊宅

魯墟無復壞垣存偶榜舟來入亂雲杜曲桑麻猶鬱鬱桃源雞犬亦欣欣青圍舊墅千峯立綠引官河一脈分我卜數椽差不遠得歸何以報吾君

曉雪

遶湖誰琢玉爲屏換却南堂萬疊青老子醉狂還自笑持竿畫字滿中庭

又

觀雪剡溪天下勝題詩常恨不能奇未應便許疑之語此與何曾有盡時

養生

西遊曾受養生書晚愛煙波結草廬兩皆神光穿夜戶一頭胎髮入晨梳邀雲伴遠忘返與鶴分窠寬有餘占盡世間閑事業任渠千載笑迂疎

夜讀鞏仲至閩中詩有懷其人

詩思尋常有偏於客路新能追無盡景始見不凡人細讀公奇作都忘我病身蘭亭盡名士逸少獨清真獨意

獨意

酒似交情薄愁隨夜漏長常貧且撐拄多病不禁當偶讀書終卷閑臨帖數行翻憐市朝客擾擾為誰忙

十一月十三日夜作

風雲正相乘蕭然一點燈擁爐蒙衲被就壁倚枯藤火降神方王河潮腦自凝鄰雞太多事三唱請晨興故人趙昌甫久不相聞寄三詩皆傑作也輒以

長句奉酬

海內文章有阿昌數能著句寄龜堂就令覲面成三倒未若冥心付兩忘道義極知當負荷風波那得易禁當相思命駕應無日且約陶然寓醉鄉

夢中賦早行

夜分秉炬治裝賣千里霜風入馬蹄擁褐却尋孤驛夢垂鞭時聽近村雞荒煙漫漫沉殘月宿莽離離上古隄天色漸分寒更力道傍沽酒坵官泥

兀兀

兀兀初何有俛俛不自知偶然登耆及便欲數期頤把釣秋風夕騎驢晚雪時江湖遊已徧更作灞城期

哺猿

有書常懶讀有酒常懶醉惟有默坐佳又以睡為祟不如捨之起扶杖來東園摘此幽澗菓哺我高枝猿食菓飲清泉猿計亦何闕但恐夜霜時腸斷巴山月與子坦子聿元敏犯寒至東園尋梅

北風吹人身欲僵老翁畏冷晝閉房梅花忽報消息動意氣山立非復常二兒一孫奉此老瘦藤天矯凌風霜幽禽白頰忽滿樹似與我輩爭翔翔溝絕無聲凍地裂耿耿寒日青無光歸來相視不得語小楹一寫鵝兒黃

示諸孫

蠅舍鵝衣老可哀衰顏時為汝曹開朱門莫羨羨羊脚糲食且安羹芋魁家塾讀書須十紙山園上樹莫千回但令學業無中絕秀出安知有後來

題齋壁

皤皤太平民堂堂大耋身乾坤一旅舍日月兩車輪衰貴超三品蔬甘敵八珍明年真耄矣爛醉海山春

又

力穡輪公上藏書教子孫追遊屏裘馬宴集止雞豚寒士邀同學單門與議婚定知千載後猶以陸名村雜言示子聿

福莫大於不材之木禍莫慘於自躍之金鶴生於野今何有於軒桐爨則已今豈慕為琴古今共戒玉自獻卷舒要似雲無心廬室但取蔽風雨衣食過足豈所欽我今餘年忽八十歸畊幸得安山林逢人雖歎種種髮入塾尚憶青青衿吾兒殆可守孤學相與竭力窮幽深

夜坐聞大風

天曠穹廬覆風豪野戰酣詩成飛醉墨棋罷縱高談奇怪空堪笑低摧亦未甘東浮雲海去會載酒千巖歸老何妨駕鹿車平生風雪慣騎驢鬢毛白盡猶耽酒目力衰來轉愛書止足極知于道近癡頑更喜與人疎著身莫怪無閑處地肺天台儘有餘

懷舊

扇子破中有隱士清江一曲照柴荆當時船急失一見至今空憶莫猿聲

又
青城之西谿谷深道翁巢居獨鼓琴一盃松麩留我
宿夜半虎嘯風生林

又
剡溪百里徹底清石闌干裏真人行大丹一粒擲溪
水禽魚草木皆長生

劍南詩稿卷第五十五終

劍南詩稿目錄
卷第五十六

道室雜詠三首

偶與客飲客去戲作 故里
鱗齒 冬夜 枕上 寒暑 長溪東山容

老索月谷幽賞詩二首

梅

歲晚幽興四首

寄題胡基仲故居

雪夜

聽雪爲客置茶

果

獨夜 寄題王才臣山居

夜賦

雪後

二首

寒夜讀書 對食戲作六首

甲子立

春前二日作

家居自戒六首

感貧

鄰曲

送客

夜寒起坐待旦

信手翻古人詩隨

所得次韻二首

甲子歲元日

初春書懷七

首

初春紀事二首 送子虞吳門之行

法雲

簡房

陌上

獨立

春陰 閒味

聞虜亂

代華山隱者作

春日

寄子虞

送子坦

送子通

醉眠初起書事

見蜂采檜花偶作

對酒戲詠二首

夜興

老甚自詠二首

夜過魯墟

園中小飲

幽居春晚二首 梅

花過後遊西山諸菴 梅仙塢花涇觀桃李

家園賞花

聞金谿陸伯政下世 一春風雨

大半有感

山行贈野叟二首

雲門道中

讀書有感

六言雜興九首

春晚出遊六首

劍南詩稿卷第五十六

宋陸游務觀

道室雜詠

寫化雙鳧杖化龍雲山回首不知重藥園夜慵丹臺
月酒市秋聽紫閣鐘豈但煙霄隨步武故應冰雪換
形容小童開戶驚奇事野鶴來巢砌下松

又

莫怪先生閱事多人間何處不經過天山八月霜枯
草陽谷三更日浴波酒熟春風歸掌握丹成神物共
誰何散人本帶江湖號四百年來一釣蓑

又

身是秋風一斷蓬何曾住處限西東棋枰窗下時聞
電丹竈巖間夜吐虹采藥不辭千里去釣魚曾破十
年功白頭始悟頭生妙盡在黃庭兩卷中

偶與客飲客去戲作

多泥窮巷破扉屋人不堪憂心自足有時負日向門
前手把南華日中讀若教開門與客游擾擾依前懷
百憂平生自計亦已熟惟有釣魚湖水頭舊聞仲長
子光可與友瘖不能言但就酒安得此友常過門一
語不交傾數斗

故里

故里淳風比結繩歸咍況遇歲豐登已侵鐘漏行安
往略有園廬退可憑萬事寧容媿天地一心常若蹈
淵冰區區僻見君無怪人固終身有不能

齟齬

人生天地間本非金石堅况復歷歲久蠹壞無復全
齟齬雖小疾頗解妨食眠昨莫作尤劇頰輔相鈞聯
欲起賴衣裳欲睡目瞭然恨不棄殘骸蛻去如蛇蟬
或當學金丹揮手凌雲煙逢師定悠悠丹成在何年
冬夜

悠悠孤夢伴餘醒窗下寒燈照閣明雪意欲成風正
惡漁舟忽過雁羣鳴志衰但有徂年感身沒應無後
世名猶幸耄期身粗健天公元不負書生
枕上

鐘鼎初何有山林亦足雄行思絕大幕歸但醉新豐
雁過荒寒外燈殘寂寞中蒼顏無鏡對那覺是衰翁
寒暑

寒暑侵陵日夜衰坐令齒髮不支持愛憎徇物去忘
反神氣養形誰復知布被九條晨入靜柏床五尺夜
精思舊交勿恨江湖別雲海神山會有期

長溪東山容老素月谷幽賞詩
人間底處無明月只要青山為發揮林裏枝寒無鶻
立水邊路白有僧歸
右月谷

清泉白石君家物美竹名花可旋移幽賞定知隨處
勝更須時展放翁詩

右幽賞

若耶溪頭春意慳梅花獨秀愁空山逢時決非桃李
輩得道自保冰雪顏僊去要令天下惜折來聊伴放
翁閑人中商略誰堪比千載夷齊伯仲間
歲晚幽興

歲晚幽興

梅出疎籬柳拂池流年已迫早春時壯心卓犖猶欺
酒老業呻吟未廢詩眼暗觀書如棘涇齒疎嘖飯似
牛呵風爐欲試蒼鷹爪自向林間拾墮枝
又

殘年欲遂迫期頤追數朋儻死已遲卜塚治棺輸我
快染鬚種齒笑人癡近聞有醫以補種墮齒為業者
野梅墮地草生後街柳拂鞍冰泮時滿眼雲山不須買剩
傾新釀賦新詩

又
萬里風波行路難君恩尚許綴祠官中庭鬱鬱藥苗

長絕壁鸛鷓松吹寒泥巷有人尋杜甫雪廬無吏問
袁安清晨對鏡增幽致龜屋新裁二寸冠

又

短鬢元知不久青況開九帙數餘齡全家共保一忍
字累世相傳三住銘時泛孤舟過梅市却穿雙屨上
蘭亭擁爐莫恨無僧在滿院松風要細聽 先太傅親受
三住銘于施肩吾先生授游曰汝其累世相傳毋忽因即以傳幸虞諸
子

寄題胡基仲故居

憶昔公來一束書蕭然不復畜僮奴浮雲每數成蒼
狗空谷誰能繫白駒才氣沙塵埋巨闕文章林壑吼
於菟旅墳三尺雲門寺又見離離長綠蕪

雪夜

雪聲如飛沙風聲如翻濤三更天地闇雪急風愈豪
頗疑虛空中鬼神戰方壘勝負要一決利兵未肯鑿
我如墮重圍百計無由逃僵縮不能寐起坐擁故袍
自歎老益貧庭草常不薶惟酒不憚費貸券如山高
園蔬甘且柔味不減豚羔醉此風雪夕聊慰抱瓮勞

聽雪為客置茶果

病齒已兩旬日夜事醫藥對食不能舉况復議盃酌
平生外形骸常恐墮貪著時時隣曲來尚不廢笑詭
青燈耿窗戶設茗聽雪落不釘栗與梨猶能烹鴨脯

獨夜

燈花寒自結雪片夜方深瘦影參危坐清愁入苦吟
江湖身汗漫藥石病侵尋朋舊凋零盡何人識此心
寄題王才臣山居

王子自少無他娛求佳山林結草廬頭童齒豁已衰
矣衣弊屢空常晏如出遊取懷襴衡刺歸臥盡讀倚
相書它日叩門傾白墮要看著句到黃初

夜賦

練色亭臯月江聲木杪風開書燈煜煜傳漏鼓擊擊
流落諸生老呻吟四壁空生涯君勿笑淡話有兒同

雪後

雪後晴初快春前日漸長菊根萌已動梅蕊意先香
禽語驚幽枕冰消漲野塘衰殘難出戶不是懶衣裳
又

冰開地沮洳雲破日曛曛鴻入青冥際草生殘燒中
方放畢公稅已復始農功稻壠牛行處泥翻夕照紅
寒夜讀書

老去無他嗜書中有獨欣月窗雞啼啞霜野犬狺狺
雖數吾何適猶尊昔所聞從今倘未死一日亦當勤
對食戲作

霜餘蔬甲淡中甜春近靈苗嫩不蘇采掇歸來便堪
煑半銖鹽酪不須添

又

白鹽赤米了朝餽拗項何妨煑瓠壺一種是貧吾尚
可隣家稗飯亦常無

又

春前臘後物華催時伴兒曹把酒盃蒸餅猶能十字
裂餛飩那得五般來

又

拼欄子嫩供香飯早筴芽新簇冷淘常使先生飽捫
腹其餘萬事一秋毫

又

冰壺欲著先生傳髯簿卑凡豈得書常恨當年定交
晚枉教渴死老相如

又

黃昏來扣野人扉笑語欣欣意不遲封火正紅煨芋
美不妨秉炬雪中歸

甲子立春前二日作

頭風初愈喜身輕書卷時開覺眼明養熟犬雞隨坐
起性靈烏鵲報陰晴韭菘釘餛飩春盤好芝朮徒和臘

藥成自笑衰殘殺風景燈時不擬入重城
家居自戒

曩得京口俸始卜湖邊居屋財十許間歲久亦倍初
莠花過百本嘯詠已有餘猶媿先楚公終身無屋廬

又

平居少愧怍動以直自遂雖墮虎兇羣我已無死地
神仙果可學道藏有神仙可學論吾輩恐差易勿言聞
道晚努力補駮劇

又

世人無奈愁沃以盃中酒未能平磊塊已復生堆阜
冷水不洽源九載亦何有不如讀周易一卷常在手

又

疾病當治本神醫古難遭哀哉有限身日與利慾鑿
大嚼徒為貪劇飲豈足豪淡薄以養壽亦非慕名高

又

飢寒陷侵暴其實可憐傷一事百自反忿心冷如霜
怒物學者心省事慮亦長吾過固多矣責彼何暇詳

又

霜嚴雞報晨月落犬警盜遺粒與棄糠每塊不足報
椎奴事樵汲跣婢勤爨竈有過姑教之箠楚置勿道

感貧

經歲無兼味窮冬止破裘翁將貧博健兒以學忘憂
士固安天命吾寧為食謀八荒如可望時亦上高樓

鄰曲

濁酒聚鄰曲偶來非宿期拭盤堆連展淮人以名麥餅
洗醢煮黎祁蜀人以名豆腐烏特將新犢青桑長嫩枝
豐年多樂事相勸且伸眉

送客

有客相與飲酒盡惟清言坐久飢腸鳴殷如車輪翻
烹粟煨芋魁味美敵熊蹯一飽失百憂抵掌談義軒
意倦客辭去秉炬送柴門林間鳥驚起落月傾金盆
夜寒起坐待旦

懍懍不成寐攬衣寒夜中青熒煨芋火韃鞮鼓簾風
巷犬聲如豹見王維與裴迪書山童首似蓬悠然束書

坐徐待日生東

信手翻古人詩隨所得次韻

病起瘦可驚峻嶒夜窗影八十遂當至何止踐衰境
食簞幸能盡藥裹亦已屏汲泉煮日鑄舌本味方永
士苦不自晦常若雖見穎叔度獨何人長陂渺千頃

右夜坐

孔門春服成弟子從沂浴老氏坐中庭莊生記新沐
古聖自潔清如日浴暘谷豈比流俗人蟻蝨生桎梏
老人喜時節良夕當爆竹未濯三生垢湯沐意亦足
豈惟寓蕭散亦以洗榮辱悠然獨酌罷投枕睡已熟

右除夜沐浴

甲子歲元日

飲罷屠蘇酒真為八十翁本憂緣直死却喜坐詩窮
米賤知無盜雲霧又主豐一簞那復慮嬉笑伴兒童
開歲微陰不兩法當有年

初春書懷

六十餘年慕古人即今方近葛天民見人各是元非
怒遇事皆安豈怨貧小圃鉏耒聊過日扁舟煙雨尚
關身出門未覺龍鍾在禹廟蘭亭又見春

又

毫及光陰古更稀自今惟有數期頭食觀本草雖多
事醉讀離騷自一奇物外有人閑始見山中可樂老
方知武陵好在桃千樹短檝相尋亦未遲

又

數掩蘆藩竝水居一家全似業樵漁春寒例謝常來
客老病猶貪未見書馴雀正緣拋食慣芳蘭肯為礙
門鋤藥苗滿鉢無人共賴有溪僧為破除

又

甫及初春日已長偶同鄰曲集山房囊盛古墨靴紋
皴箬護新茶帶胯方老境不嫌來冉冉流年直恐去
堂堂清泉冷浸疎梅蕊共領人間第一香

又

底處人間無駭機超遙且喜謝招麾千年湖底孤松
秀萬里天邊獨雁歸服氣昔常憎火食遊山近已製
荷衣青城況有幽人約會守丹爐隱翠微

又

納祿貧如策仕初歸來依舊臥蝸廬半池墨藩臨章
草一盤松助讀隱書長鑱僅供飢子笑清江不療渴
相如耄期自許詩情在雪裏猶能跨蹇驢

又

愚公不解計安危行盡人間惡路歧難似車登龜退
嶺險如舟過馬當祠平生憂患常難測送老安閑敢
自期一事不成應有命惟將知止報明時

初春紀事

窗櫺無日影庭樹無風聲微雲淡天宇非陰亦非晴
笑哉豐年祥入我居蘇觥父老亦共喜驩言叩柴荆
一飽已有期惟當力春畊遣兒牧雞豚作社賽西成

又

經冬少雨雪所至苦水涸園蔬葉多蠹山步艱半闕
入春一再雨喜氣滿墟落又聞湖邊路已破小桃萼
一尊儻可攜父子自醺醉

送子虞吳門之行

相送何由插羽翰淡煙微雨暗江干孤懷最怯新春
別病骨難禁昨夜寒尊酒汝寧嫌魯薄釜羹翁自絮
吳酸此詩字字俱愁絕忍淚成篇却怕看

法雲僧房

八十衰翁有底忙水邊山際亦佺佺清溪橋斷舟橫
岸小塢梅殘雨漬香數點青燈經野市一爐軟火宿
僧房自嫌尚有人間念却為春寒怯夜長

陌上

陌上長歌任笑狂此生得喪略相當天將耄齒償貧
悴身坐虛名撥謗傷溪水漸生朱舫活野梅半落綠
苔香新晴快上蘭亭路莫待春殘始一觴

獨立

白髯蕭颯一愚公獨立濛濛細雨中羊踏寒蔬新少
夢魚生空釜久諸窮殘編幸有聖賢對閑話豈無隣
曲同街鬻才名非老事小詩信筆不能工

春陰

數間茅屋傍楓林常負平生萬里心老去逐年增老
病春來無日不春陰麴塵蕪岸波初漲猩血團枝色
已深欲到東園還懶起却和殘睡聽鳴禽

閑味

身似枯禪謝世塵豈容收歛強冠巾庾郎三韭不妨
飽晏子一裘何恨貧栖冷每憐雞唱早雲開初見月
痕新閑中有味君知否熊掌駝峯未是珍

聞虜亂代華山隱者作

滿谷松風枕石眠中原戰血又成川但思秦鑄銅人
日不記齊成柏寢年大藥一爐噉晚日孤桐三尺寫
秋泉何妨狂舞旗亭下乞與人間畫醉僊

春日

車馬閑中絕衣襦病後寬攻詩消晝永賒酒敵春寒
柳細挂難似花新染未乾歸鴻與來燕各自管悲歡
十里城南路蕭然一秃翁舊書衰易忘新句嬾難工

寄子虞

山色春寒淡溪流宿雨通街頭有良醞思汝一尊同
老境寧容別諸兒仕為貧一春多臥病幾度送行人
五斗方須祿千金且愛身長安雖可樂憐汝正思親

送子適

隔一濤江路豈遙躊躇不覺欲魂銷寄書勿遣過三
日發渡何曾無兩潮睡少不關茶作祟愁多却賴酒
時澆柯橋西畔斜陽岸誰為離人惜柳條

醉眠初起書事

身世元知似斷蓬流年分付酒盃中飢寒未解士先
老風雨欲收花已空泥補舊巢梁燕喜水生支港釣
船通睡魔正費驅除力隔竹敲茶賴小童

見蜂采檜花偶作

來禽海棠相續開輕狂蝶去還來山蜂却是有風
味偏采檜花供蜜材

對酒戲詠

不管詩人太瘦生但念酒徒稀醉眠憑誰為畫畢吏
部縛著鄰家春食邊

又

長安市中多美酒一斗財當三百錢堪笑書生消幾
許有錢十萬醉經年

夜興

鼻呼作人聲月出如野燒推枕中夜起殘燈尚餘照
難從公榮飲獨效孫登嘯入十推不僵平昔豈所料
空廊病馬臥枯草老牛唯明朝語俗人與汝不同調
老甚自詠

殘年真欲數期頤一事無營飽即嬉身入兒童鬪草
社心如太古結繩時騰騰不許諸人會兀兀從嘲老
子癡亦莫城中買鹽酪菜羹有味淡方知

又

羨生常笑古人癡俯仰那知迫耄期鏡裏鬢無添白
處尊前顏有暫丹時客瞋終歲常稱疾兒訝經旬懶
賦詩枉却愁過強健日身閑何往不熙熙

夜過魯墟

晡時發柯橋申夜過魯墟燈出籬落間七世有故廬
門低不容駟壁壞土遺書高樹宿羈鳥廢沼跳驚魚
移船過古埭水面涵星疎安得病良已畢世澆春蔬

園中小飲

造物伏我老界以江湖寬俯仰六年間得請兩挂冠
鬢毛雖蕭颯脚力未蹶跚記書過十張噉飯空一簞
開歲忽兩月感此春事殘杏靨笑牆頭鶯聲入雲端
掃地設菅席相與勸加餐村酒瀉濁清野果嘗甘酸
鄰里語蟬聯兒孫話團樂雖無萬錢筋浩歌有餘歡

幽居春晚

雲歸禹穴賞新晴酒買蘭亭散宿醒竹帶鞭移俄盛
出鶴全窠買已長鳴故山雖媿收身晚外物元如脫
髮輕只恐村鄰成間闕杖藜隨處叩柴荆

又

老廢讎書病廢詩畫閣惟與睡相宜未尋內史流觴
地又近龐公上塚時花發遊蜂喧院落筍長馴鹿入
藩籬石帆山下春如許野老來招不用辭

梅花過後遊西山諸菴

乞得身歸喜滿顏柴門雖設不曾關無如梅作經年
別且就僧分半日閑樵斧曉穿雲外去釣船夜向月
中還君看老子無窮樂一笑知非造物慳

梅僊塢花溼觀桃李

妖妍天遣占年華數息人間有許花十里織成無罅
錦半天留得未殘霞欲題直恐無才稱不見何由信
客誇醉後又驚春事晚湖隄煙柳已藏鴉

家園賞花

白首扁舟返舊邦逢春直欲倒千缸紅雲夾路薔薇
障翠羽成層薛荔幢鶯語枝頭常盡日蝶迷葉底不
成雙閑人爛醉尋常事中聖先判臥北窗

聞金谿陸伯政下世

久矣望來使潛然開計書兩家通絕譜千里泣靈車
亦悟古皆死所悲天祝余泉局生氣在故不羨曹蜎

一春風雨大半有感

忽忽春將老寒暄尚未齊雨昏雞唱晚風惡鶻巢低
寫物才殊退尋芳思欲迷餘年不須較只是死秦稽

山行贈野叟

垂白衰翁住道邊突間猶喜續炊煙壁如龜筮難占
卜瓦似魚鱗不接連幼學及時兒識字官租先衆吏
無權與君俱長宣和日握手相看一悵然

又

莫笑孤村生理微茅茨煙火自相依客來旋掃青苔
榻日在先關白版扉婦女憂蠶租葉去兒童耘麥荷

鉅歸散人世襲江湖號剩欲溪頭借釣磯

雲門道中

川鷺林霏翠欲浮散人心事寄沙鷗莫投野店孤煙起曉涉清溪小蹇愁嶺路窮時縈細棧山形缺處起重樓釣遊陳迹渾如昨一念悽然不自由

讀書有感

洙泗諸生尊所聞豈容兀者亦中分焚經競欲愚黔首亡史誰能及闕文吾道固應千古在幾人虛用一生勤世間倚相何曾乏會與明時誦典墳

六言雜興

世界蒼摩勒果聖賢優鉢曇華但解折衷六藝何須和會二家

又

夢裏明明周孔胸中歷歷唐虞欲盡致君事業先求

養氣工夫

又

語道無如孔孟佛莊雖似非同倘有一人領會何須客滿坐中

又

失馬詎知非福亡羊不妨補牢病裏正須周易醉中

却要離騷

又

舉足加劉公腹引手捋孫郎鬚士氣日趨委靡賴有二君掃除

又

廣平作梅花賦少陵無海棠詩正自一時偶爾俗人平地生疑

又

瘦馬羸僮道路清泉白石山林常得有衣換酒不愁無法燒金

又

一夜雨來可怖五更雲散無餘傳舍僧窗雖異不妨

隨處觀書

又

熟讀大小止觀精思內外黃庭直使超然有得豈若淵源六經

春晚出遊

風急名花紛紛雪土鬆香草出瑤簪且呼野艇西村去未必微雲便作陰

又

王孫草生與階齊女郎花發乳鸞啼街頭賣酒處處賤信脚覓醉無東西

又

柳暗人家水滿陂放翁隨處曳筇杖村深麥秀蠶眠後日暝鳩鳴鷓乳時

又

禹吾無間聖所歎治水殆與天同功三千年事一炊頃突石嵯峨煙靄中

又

岌岌高丘近道邊寂寥翁仲臥荒煙生前意氣今何在寒食無人挂紙錢

又

鳴機裂素製春衣煮酒香清雁鶩肥倒社相呼共行樂三搗鼓近是船歸

劍南詩稿卷第五十六終

劍南詩稿目錄
卷第五十七

北窗 幽居雜題四首 題旅舍壁二首 出
行湖山間雜賦四首 上巳 筍絕句 贈蘇
召叟 贈趙去華 道室述懷 春晚雨中作
晚行湖上 欲卜菴居未有勝地作詩識之
東窗遣興 獨酌 舟中作 衰疾 示兒
野興 閒遊四首 炊米不繼戲作 莫行
小雨二首 送辛幼安殿撰造朝 初夏
自警 枕上 野步至近村 書懷示子適
三月三十夜聞杜宇 夜大雨連明晨起乃知
之 聞虜亂次前輩韻 壯士吟次唐人韻
衰疾 書日用事二首 初夏出遊 初夏晝
眠 農事稍閒有作 夜雨 朝晴 北窗
遊山戲作 遣興二首 細雨 初暑 夙興
新堂 卽席四首 生涯 落花 四月廿
二日微雨中次前輩韻 夜雨 夏日 久雨
二首 舟中 繫船 復雨 書適 村社禱
晴有應 題北窗二首 晝坐聞牆外人聲殊
敗幽思戲作 晨起行園中 葺舍 次韻林
伯玉登臥龍 道室雜詠六首 湖塘夜歸
東軒 夏日 斫膾 野飯 村酒 避雨
雨中短歌 散懷 南堂 門屋納涼 幽居
露坐 暑中久不把酒盆池千葉白蓮忽開
一枝欣然小酌因賦絕句二首

劍南詩稿卷第五十七

宋陸游務觀

北窗

老人日夜衰臥起常在背窗間一編書終日聖賢對
東臯客輸米粲粲珠出碓南山僧餉茶細細雪落磴
吾兒亦解事稀甲自鉏菜一飢既退舍百念皆卷旃
閉身去俗遠澄念與道會宿痼走二豎笑睡造三昧
挂冠反布韋上印謝銀艾庭中石蒼然此客真度外

幽居雜題

開歲頻風雨清明氣始和遊山書半廢耽酒睡常多
客去孫登獻牛疲甯戚歌餘生猶有幾盡底付漁蓑
又

雅意元知止端歸喜遂初久閑棋格長多病的徒疎
瀆藥三升酒支頭一束書兒曹看翁嬾切勿厭蝸廬

又

忽忽年光逝悠悠世事非曉猶明續火晝永啓漁扉
施食禽魚熟蔬溝杞菊肥寂寥何所歎父子自相依
又

獨往成初志安居謝世紛名書硬黃紙古硯熨焦紋
兩作占琴薦風來散鷺羣豈無朝市事塞耳未曾聞

題旅舍壁

泥淖停牛屋風埃坐簣牀絳人難諱老楚客自嫌狂
浪迹江湖大回頭日月長村村有餅餌正可不賣糧
又

地曠風號木天高日脫雲村名步頭換縣界驛前分
蒿艾春侵路雞豚莫識羣敲門就炊爨一飯敢忘君

出行湖山間雜賦

老入新年健春逢小雨晴偶因尋酒去又作繞村行
塘水蒼鷺戲郊原黃犢鳴閑身有樂事倚杖看農耕
又

新釀學鵝黃幽花作蜜香客邀閑即去病起醉何傷
野寺無晨粥村伶有夜場吾心靜如水隨事各年光

又

徑繞茶岡北橋連芡浦東蟲蝨鳥柏葉露溼穉蕪叢
燒地春蕪綠漁扉夕照紅君恩那可報惟是祝年豐
又

魚市樵風口樵風溪港名茶村穀雨前柳邊煙掩苒堤
上艸芊眠墓掃鴉銜肉人歸鷺導船東風吹短髮得
句為誰妍
上巳

上巳

殘年登八十佳日過重三簾幙低新燕房櫳起晚鸞
名花紅滿舫美醞綠盈甌春事還如昨衰懷自不堪

筍絕句

列仙閱世獨清癯雪谷冰谿老不枯輪與錦欄孩子
輦千金一束入天廚
贈蘇召叟

贈蘇召叟

蘇子出傳輦翻如天際鴻才華刮眼膜文字愈頭風
豈止千人見真當四海空老夫雖老矣此論不妨公

贈趙去華

趙子毫端萬斛珠眼前百輩不枝梧盛名豈待它年
見公論何曾一日無我老杜門惟足睡君豪折簡固
難呼此詩強欲相題目堪笑衰翁膽滿臚

道室述懷

養心功用還嬰肯使秋毫有妄情一寸藤冠狂道
士一編蠹簡老書生狐妖從汝作人立金價在吾如
土輕地肺終嫌近朝市明年泝峽上青城

春晚雨中作

冉冉流年不貸人東園青杏又嘗新方書無藥醫治
老風雨何心斷送春樂事久歸孤枕夢酒痕空伴素
衣塵畏途回首濤瀾惡賴有雲山著此身

晚行湖上

飽來捫腹繞村墟北陌東阡信所之
女手采餘桑鬱

鬱煙蕪生遍冢纍纍高林日莫無鶯語深巷人歸有
犬隨東走郡城逾十里好風勞送角聲悲

欲卜菴居未有勝地作詩識之

破裘百結鬢垂蓬旋旋過流年旋已空
麤眷屬如雲盡散性光明似日方中極知萬事不勞問欲住一菴誰
與同會向巢居明月夜五致橫膝寫松風

東窗遺興

東窗徙倚當閑遊水長池魚自滿溝花氣襲人渾欲
醉鳥聲喚客又成愁百年光景輪歌枕萬里風煙入
倚樓欲寫烏絲還懶去詩名老去判悠悠

獨酌

一榼芳醪手自斟從來戶小怯杯深已於醉醒知在
聖又向淳漓見古今濡首固非吾輩事達生猶得昔
人心餘醺欲過香差減且據胡牀坐綠陰

舟中作

誤長僂蓬不滿年恩容歸老白雲邊艸枯病馬停朝
秣子已納祿水冷鰕魚廢夜眠泥俗豈須名赫赫耐
嘲唯可腹便便柯橋梅市花俱好且典春衣醉放顛

衰疾

衰疾憐新鬼狂豪尚故吾棋常先客著行不許兒扶
硯潤閑蟾滴香殘冷鴨爐自憐風味在尚欲泛江湖
示兒

野興

聞義貴能徙見賢思與齊食嘗甘脫粟起不待鳴雞
蕭索園官菜酸寒太學齋時時語兒子未用厭鉏犁
溪漲侵菴路山光壓釣磯荒畦畦荷鉏去小艇載犁歸
世態那堪看吾言可自違從今謝人事終日掩荆扉

閑遊

遊徧名山日月長結廬歸占水雲鄉醉中即是逃名
地閑外應無度世方檜蜜滿脾餘小苦木苗泥露有
奇香肺腸自與人間別堪笑醅缸與飯囊

又

高會揮金媿二疎食貧只似布衣初終年老健錄儲
藥隨分窮忙為著書弔古何時過梁宋題詩且欲徧
衡廬不須更擬乘風去水有煙帆陸箇輿

又

過盡僧家到店家山形四合路三叉清明糝美村村
賣穀雨茶香院院誇困臥幽窗身化蝶醉題素壁字
棲鴉夕陽不盡青鞋與小立風前鬢腳斜

又

夙興蓐食戒山行策蹇迢迢過故城露葉未乾明曉
日風蒲初勁借秋聲綠陰渡口孤鶯語白水陂頭兩
犢耕遙望炊煙疑可憩試從行路問村名

炊米不繼戲作

敢羨晨興費萬錢口邊縱理信前緣高年雖獲殿諸
老一飽常如登九天架上有書吾已矣甌中無飯亦
陶然蓬門一閉還旬日實怕閑人攪晝眠

莫行

志士能輕萬戶封野人自愛一枝筇行窮綠岸呼船
渡糴得黃梁就確春林外人家明遠火月邊僧閣下
疎鐘江村不用愁孤絕小店茅簷儘見容

小雨

小雨過巖局殘雲傍野亭花光相映發鶯語苦叮嚀
舉酒和神氣彈琴悅性靈素居朋友絕得句遣誰聽

又

急雨方侵慢斜暉忽滿廊塵清添艸色衣潤省簫香
婦織將收繭農功已下秧諸孫入家塾親為授二蒼
送辛幼安殿撰造朝

稼軒落筆凌鮑謝退避聲名稱學稼十年高臥不出
門參透南宗牧牛話功名固是券內事且葺園廬了
婚嫁千篇昌谷詩滿囊萬卷鄴侯書插架忽然起冠
東諸侯黃旗皂纛從天下聖朝及席意未快尺一東
來煩促駕大材小用古所歎管仲蕭何實流亞天山
挂旂或少須先挽銀河洗嵩華中原麟鳳爭自奮殘

虜犬羊何足嚇但令小試出緒餘青史英豪可雄跨
古來立事戒輕發往往讒夫出乘鱗深仇積憤在逆
胡不用追思瀾亭夜

初夏

白白養筒美青青米果新蜀人名粽爲盜簡吳中名粒枚爲
米果衰遲重時節薄少遍鄉鄰梅市花成幄蘭亭州
作茵極知歡意盡強起伴遊人

自警

放翁原憤憤徂歲復駸駸社稷終無用秋蟲漫苦吟
拍蚊違殺戒引水動機心老耄誰規我忠言抵萬金

枕上

病叟少安枕驚禽無穩棲慵占賈誼騰空感祖生雞
野勢風號北窗痕月過西元非破賊手只合架牛犁
山中惟集鳴終夜雞三鳴後聞架犁則旦矣

野步至近村

耳目康寧手足輕村墟州市徧經行孝經章裏觀初
學麥飯香中喜太平婦女相呼同夜績比隣場作事
春耕勿言野饑無鹽酪筍蕨何妨淡煮羹

書懷示子適

平生山林幾緬履何意隨人戴朝憤口言報國直妄
耳斷簡圍坐晨至夕道山堂東直廬冷手種疎篁半
窗碧但虞風波起平地豈有毫髮能補益成書朝奏
莫請老入耳幸免煩言噴東望故山百餘里父老歡
忻來接跡白羊綠酒爭下擔長笛腰鼓紛如織迢迢
梅市過魯墟觀者所至空巷陌爾來呻吟又春盡周
視室中惟四壁但令糲飯麤撐柱猶勝朱門常蹴踏
小兒助我理孤學終歲伏几心如石問看飲酒詠離
騷何似焚香對周易

三月三十夜聞杜宇

斗轉春歸不自由韶華已逐水東流子規獨抱區區
意血淚交零曉未休
夜大雨連明晨起乃知之

黃紬被穩枕慵移夜雨淋浪了不知水長壞陂初復
後鳩鳴去婦却還時芳蹊入夏多青子白髮今年有
黑絲剩欲披衣湖上去滿村芳艸正離離

聞虜亂次前輩韻

中原昔喪亂豺虎厭人肉輦金輪虜庭耳目久習熟
不知貪殘性搏噬何日足至今磊落人淚盡以血續
後生志撫薄誰辦新亭哭藝祖有聖謨嗚呼寧忍讀
藝祖書爲大宋一統四字賜大臣今藏秘閣

壯士吟次唐人韻

士厭貧賤思起家富貴何在髮已華不如爲國戍萬
里大寒破肉風卷沙誓捐一死報天子兜鍪如箕鎧
如水男兒墮地射四方安能山樓效園綺塞雲漠漠
黃河深涼州新城高十尋風發露宿寧非苦且試平
生鐵石心

衰疾

衰疾猶能飯一簞蓴絲菰首亦加餐舊叨刻印俄銷
印老嫗彈冠亟挂冠自怪嵇康如許賴人憐范叔不
勝寒得錢剩買青芒屨采藥名山與未闌

書日用事

左右數書冊朝夕一艸堂家貧自能儉病愈不求方
盛饌豚肩美常庖筍茁香園丁報花坼亦復命壺觴
又

初夏出遊

一裘良已暖半菽可無飢養氣戒多語端居如有思
私心須自勝己過遣誰知耄齒尤當勉常憂寸晷移
去去衝朝霧行行弄夕霏移秧晴塢作坐社醉扶歸
細艸迷行徑殘花點釣磯犂牛將犢過雄雉挾雌飛
野寺煙鐘遠村墟積火微諸孫殊可念相喚候柴扉

初夏晝眠

好景逢初夏閑身得晝眠書橫竹架上冠墮素屏前
葱蒨小山桂濕溪幽竇泉危巢出乳燕高樹集新蟬
強健關天命逍遙近地仙晚窗思茗飲自取雪芽煎

農事稍閒有作

架犁架犂喚春農布穀布穀督歲功黃雲壓檐風日
美綠針插水霧雨濛年豐遠近笑語樂浦漲縱橫舟
楫通東家築室窗戶綠西舍迎婦花扇紅我方祭竈
徹豚酒盤箸亦復呼隣翁客歸我起何所作孝經論
語教兒童教兒童莫忽願汝日夜勤磨礱烏巾白
紵待至公

夜雨

莫雨蕭蕭集瓦溝空階點滴送清愁何由乞得須臾
睡直到窗明滴未休

朝晴

宿雨初收雲四歸小山艸木麗朝暉翩然雙鷺從蒼
下言語分明詠溼衣

北窗

簾影參差午漏前盆山綠潤雨餘天詩無傑句真衰
矣酒借朱顏却悵然海燕理巢知再乳吳蠶放食過
二眠名泉不負吾兒意一搦丁坑手自煎子與寄惠山泉丁坑蓋曰鱗流亞也

遊山戲作

晚境頻辭祿窮居旋學耕量衰添酒敵才盡減詩名
風月成交支溪山管送迎登車雨先止天豈相吾行
遺興

聒聒鳴鳩莫笑渠百年我亦旋枝梧病知藥物難為
驗老覺人間不足娛茆屋何妨度寒暑蔬餐且可遣
朝晡釣船一出無尋處千頃江邊雪色蘆

又

老荷君恩許醉眠散人名號媿妨賢久叨物外清閒
福麤識詩中造化權風月四時隨指顧乾坤一氣入
陶甄新秋更欲浮滄海臥看雲帆萬里天

細雨

細雨重雲漸入梅陰陰門巷長新槐壯心已與年俱
逝脫髮應無術可栽笑睡常嫌鶯喚起清愁却要酒

闌回年來百事非平昔信手題詩懶剪裁

初暑

槐陰清潤麥風涼一枕閒眠晝漏長山鶻喜晴當戶
語海桐帶露入簾香酒綠久病常辭酌茶為前銜偶
得嘗雲北雲南動遊興疎呼小豎治輕裝

夙興

夙興短蓬髮幽步豁煩襟翠碧停闌角驚黃語柳陰
書殘頰補緝琴廢細追尋未是全無事猶堪養道心

新堂

湖上新堂氣疎豁三面嵐光翠如發都門歸來病相
屬鄰里怪我間何闊尊絲作羹飯雕胡厨人斫鱸藝
絕殊何由喚得左元放銀盤釣出松江鱸

卽席

穉荷出水榴花開長笛圓聲送舉杯村鄰相樂君勿
笑要是安健無凶災

又

醉中起舞遞相屬坐上戴花常作先要知吾輩不凡
處一吸已乾雙玉船

又

長魚腹腴羊臂臠饒想久矣無秋毫今朝林下煨苦
筍更覺此君風味高

又

小山榴花照眼明青梅自墮時有聲柳橋東岸倚筇
立聊借水風吹宿醒

生涯

久矣冥行墮嶮巖樂哉偶得謝招麾放懷身世相忘
地夙駕山林獨往時縱老豈容妨痛飲更慵亦未廢
新詩超然自喜生涯別始數龜堂見事遲

落花

桃李擅春事餘醺為之殿豈不欲周旋過日如掣電
大風連三月吹盡無餘片留之豈有策佇立情眷眷
空令腸九回竟欠語一轉流年付芳艸樽酒孤勝踐

鶯聲入碧雲簾影滿深院消搖綠陰間風流屬團扇
四月廿二日微雨中次前輩韻

語訛覺齒疎冠倒感髮稀屢爲曼容免遂賦淵明歸
今日天氣佳雨絲弄斜暉起居惟所適單複時易衣
出遊叩僧廬歸臥掩漁扉一笑顧兒子正爾良未非
夜雨

點滴茅檐雨長霄不肯晴殘缸待雞唱倦枕厭鼻鳴
已踐衰殘境况兼羈旅情晨興亦何事惟髻繞廊行
夏日

入戶桐陰漸覆牀乍敷笛簟北窗涼筇杖倚壁知身
健衣焙殘香覺日長雨霽斷雲時聚散風來纖艸久
低昂蝶衣粉溼猶飛懶小駐闌干就夕陽

久雨

梅子青青苦未黃經旬積雨欲頽牆蠹生書帙時須
火潤入衣篝剩得香鄰舍相逢驚問閣通宵不寐聽
淋浪定知又發韓公笑有底鳴蛙兩股長

又

梅天一日幾陰晴對酒無聊醉不成巧曆莫能知雨
點孤桐那解寫溪聲林深鳥爵來無數艸茂鋤耨去
卽生明日雲開天萬里御風吾欲過青城

舟中

青楓湖上村綠葦舟中客雲興山疊見海近地勢圻
悠然滄洲趣宛與塵世隔雖云食不足蠹免婚嫁責
渥丹未辭鏡衰白幸滿憤明當鼓棹行放浪窮七澤

繫船

高樹滴殘雨叢蘆生夕風情遊貧有自老鈍學無功
歲月詩編裏江湖旅色中煙村繫船處邂逅得漁翁
復雨

催喚兒童掃綠苔長歌清嘯與悠哉林間子墮知梅
熟水面痕生驗雨來往事已成孤枕夢故人誰共一
樽開自憐未負年華在素扇團團月樣裁

書適

清和巷陌單衣後綠潤軒窗午餉餘曲曲素屏圍倦
枕斜斜筠架閣殘書松陰坐石閑看鶴山寺尋僧晚
跨驢此段家風君試看京塵撲帽獨何歟

村社禱晴有應

叢祠牲酒走村村賴是龍歸爲解紛爽氣收回騎月
雨俗謂二十四五間有兩往往輒成霽潦謂之騎月兩快風散盡
滿天雲數峯縹緲如屏面一浦漣漪作簟紋猶勝楚
人簫鼓裏九歌哀怨下湘君

題北窗

束擔還山讀舊書斷編終日見唐虞千莖白髮年華
速一點青燈夜漏徂厚價異時空市骨大呼從昔不
成虛細思天賦原非薄跬步門前萬頃湖

又

不嗔人作腐儒看斷簡堆中興未闌更事愈懷憂國
切苦心始覺著書難流泉激激人聲遠修竹蕭蕭暑
令寒四海諸公常共處北窗何地著身寬

書坐間牆外人聲殊敗幽思戲作

老人氣衰潤髮齒歲月翩翩來有幾晨興食米不一
溢日課讀書猶十紙雖云喧寂無二觀終嫌蝸蝨喧
吾耳亟起振衣欲出門赤日當空汗如洗撥灰未炷
瓦爐香汲井先換銅匱水也勝太史落南時短檠夜
對屠牛机

黃魯直自言遷宜州時夜寓市中直屠牛之机用雞毛
筆作字

晨起行園中

老病厭羈煩晨興步小園草深移舊路竹茂失顏垣
未暇從魚樂惟思與石言人家尋每得拄杖印苔痕

葺舍

蟻知將雨先移穴燕護新雛迭守巢補漏支傾吾可
笑呼奴乘屋更添茅
次韻林伯玉登臥龍

一紙臨門喜欲顛詞源滾滾瀉長川旗旄外闔新元
帥風月名山古洞天自笑屏居依近郭每煩登望指

孤煙雄篇三復空與數窮乃工詩似不然
道室雜詠

精神有限惟當造造化無心不汝私此事安須知決
擇雞鳴勿後老人期

又
黃褐長條七尺身袖中一劍隱紅塵城門萬屨日來
往衆裏安知無此人

又
冰霜難與夏蟲語晦朔豈容朝菌知忿忿至前能小
忍人人券內有期頭

又
萬法元須一理通長生極治本同功廣成千歲無它
術祇在唐虞二典中

又
莫緣侯印學陰謀生世惟須一釣舟輕用鐵錙終折
缺善刀何止解千牛

又
放翁耄齒猶朱顏一物不留方寸間已吞八九雲夢
澤更著百億須彌山

又
湖塘夜歸
漁翁江上佩笭箬一卷新傳范蠡經鬱鬱林間桑棹
紫芒芒水面稻苗青雲邊築舍分南北陌上逢人半
醉醒莫恨西村歸路遠行前點點有飛螢

又
東軒
僻巷地無喧閑人慮不煩刺舟回北渚岸幘倚東軒
乳鷓行苦徑馴聲觸筍籜作勞憐野老喚取倒清樽

又
夏日
例謝門前客深藏篋裏書衣穿但重補飯足不求餘
山溜鳴庭際藤陰接屋除何勞厭三伏俯仰即秋初
研膾

又
玉盤行膾簇青紅輪與山家淡煮菘要識坐堂哀穀
鯨試來臨水看噉嚼

野飯
六十日白可續飯三千年清何與人堪笑此翁頑似
鐵還山又食一番新

村酒
亂山落日漁歌長平疇遠風稂稻香酒旗搖搖截官
道歸家未遲君試嘗

避雨
雲如壞山欲塞海樹似奇鬼將搏人急投民家雨隨
至燎衣不覺雞唱晨

雨中短歌
昨夕雨大如車軸今日雨細如牛毛人言愈細愈澤
物天公爲此非徒勞泥深入市路欲絕壞簷敗壁風
蕭騷豈惟龜龜矜矜得意坐覺藜莠無由薶刺牀供爨
嗟婢子持傘上學憐兒曹村場酒貴賒不得且解布

囊尋弊袍
少年已遂遯山林何況霜毛兩鬢侵習氣尚存詩入
夢病根未去藥關心猿知秋近啼先苦鶴閱年多頂
漸深不忍頓疎風月在巖能扶杖即登臨

南堂
空堂寂寂暑氣清祇有燕雀無人聲雲頭忽移簾影
失兩點亂集荷盤傾溝坑水溢魚驚喜庭戶風送蛟
龍腥衣巾汗垢爲一洗呼奴舉榻臨前楹取泉石井
試日鑄吾詩邂逅亦已成何由探借中秋月與子同

遊白玉京
門屋納涼
機裂齊紈如素月牀敷蕪草起微瀾行人遠不分眉
目過鳥高猶響羽翰新長庭槐夾門綠無窮陂稻際
天寬今年項里楊梅熟火齊驪珠已滿盤

幽居
孤村野徑不曾鋤惡艸從來一寸無每爲遊魚疏港
瀆更緣啼鳥植楸梧閑門猶有僧時到殘產渾無賦

又
孤村野徑不曾鋤惡艸從來一寸無每爲遊魚疏港
瀆更緣啼鳥植楸梧閑門猶有僧時到殘產渾無賦

未輸浪走人間真誤計莫年猶足補東隅

露坐

殘月久方上幽花時自零風枝驚宿鳥露草溼流螢
浩氣吞雲夢危途塞井陘菱歌何處起及我醉初醒
暑中久不把酒盆池千葉白蓮忽開一枝欣然
小酌因賦絕句

千葉芙蓉白玉膚一樽沆瀣碧琳腴極知俱出氛埃
外我亦秋風山澤臞

又

我讀淵明止酒篇知渠未識玉池僊誰言見面無多
子高壓天魔萬二千

劍南詩稿卷第五十七終

劍南詩稿目錄
卷第五十八

老馬 大熱 大雨 午睡 書意 卜居三
山已四十年矣暇日有感聊賦五字二首 北

窗 睡起已亭午終日涼甚有賦 殘雨 溪
上避暑二首 龜堂避暑 旅舍偶題 溪月

砭愚 雜興十首 病瘡兩作而愈 露坐
戲詠 初秋書感 湖上 枕上 書懷

游昭牛圖 唐希雅雪鷗 菖蒲 吾廬東北
皆修竹茂林羽族來栖者不可數計感而有作

秋夜聞蘭亭天章寺鐘 閔雨 徒行短歌
次前輩韻 江樓次前輩韻 七月四日夜賦

出近村歸偶作 送子修入閩 書志 秋
雨 雨後涼甚 屏迹二首 書事四首 雨

後 幽居 書事 秋夜感遇十首以孤村一
犬吠殘月幾人行爲韻 艸書歌 自傲 新

秋二首 憫俗 塊坐齋中有感 新涼示子
適時子適將有臨安之行 秋雨二首 講學

野興四首 示元敏 八月四日夜夢中作
明日復理夢中意作 又明日復作長句自

規 示子孫 秋夕 徂歲 村居遣興三首
甲子秋八月偶思出遊往往累日不能歸或
遠至傍縣凡得絕句十有二首雜錄入稿中亦
不復詮次也

劍南詩稿卷第五十八

宋陸游務觀

老馬

貧家畜老馬枯其風雨唯本非百金產安用三品料
馬固志華廐士亦安蓬藿兩窮適相遭萬事付一笑
少游御款投作計無此妙可憐杜陵翁妄想追風驃

大熱

五月頗閔雨炎風吹旱塵氣羸不給喘流汗沾衣巾
呼婢使具浴報以未買薪汝事雖不恪亦坐乃翁貧
汲井掬寒泉自足忘我嗔譬如寓逆旅百事聽主人

大雨

今年景氣佳有禱神必答時時雖閔雨顧盼即霑洽
縣地千里間四月秋盡插季夏雨三日凄爽欲忘簞
瀦水如塞河決水如放閘几席亂龜鼉庭除泳鵝鴨
舍邊魚受釣戶外鷗可狎飛螢最得意終夕自開闔
蕭蕭菰蒲聲恍若船入夾嗟予亦耐事堅坐書滿榻
懸知穉穉收已足供伏臘會約張志和清風泛苕霅

午睡

梅黃雨足喜初晴投枕華胥夢已成帳底香雲凝未
散手中書卷墮無聲簞紋似水飛蠅避鼻息如雷稚
子驚癡腹便便竟何有已將嘲弄付諸生

書意

疎慵久已臥郊扉暫出人間輒免歸梵志放花常恨
晚士師分鹿又成非平生舊學寧當負同志良箴亦
重違說與吾兒勤念此負禾勿恨露沾衣

卜居三山已四十年矣暇日有感聊賦五字

薄宦非初志幽居不計年稚松成偃蓋小豎亦華顛
生理憑耕稼光陰付醉眠從來慕園綺一著要爭先

又
泥古衰猶學開荒夜亦耕屋芟生艸蓋釜擷野蔬烹

白稻雨中熟黃鶩桑下鳴殘雲忽吐日喜對小窗明

北窗

北窗無俗物三伏有餘涼玉塵消長日風漪可一牀
盞分新作茗爐撥欲殘香却岸紗巾去倘然野水傍

睡起已亭午終日涼甚有賦

飯罷頽然付一牀曠懷真足傲羲皇松棚盡日常如
莫荷沼無風亦自香倚杖月生人影瘦岸巾露透髮
根涼頗聞王旅徂征近敷水條山興已狂

殘雨

五更殘雨滴檐頭探借天公一月秋只道風吹雲散
盡數聲桑下又鳴鳩

溪上避暑

莫年事業轉悠悠盡日投竿杜若洲世上漫言天愛
酒古來寧有地埋憂全家只合雲山老萬事空驚歲
月適禡帶脫冠猶病渴正平頗憶著岑牟

又

短髮聽聽徹徹頂涼悠哉隨處據胡牀但憐鵲影翻殘
月不恨蟬聲送夕陽門巷陰陰桐葉暗汀洲漠漠藕
花香寓形宇內終煩促安得騎鯨下大荒

龜堂避暑

縹緲紗幮覆象牀蠻童擎粥進黃梁硯池湛湛一泓
墨衣焙霏霏半篆香團扇題詩無滯思清泉灑地有
餘涼更須風伯開雲陣準擬今宵月滿廊

旅舍偶題

野店山橋策蹇驢浩然聊喜遂吾初童顏幾歲已辭
鏡胎髮今朝還入梳小瓮設營秋社酒斷編閑理小
年書白雲可笑猶多事常向人間耐卷舒

溪月

天風吹髮冷颼颼獨向沙邊上釣舟愁絕平羌江上
月向人依舊半輪秋

砭愚

儲藥如丘壠人愚未易醫信書安用盡見事可憐遲

錯自彈冠日憂從識字時今朝北窗臥向句味陶詩

雜興

早遇齊侯遊柏寢晚從漢帝祀甘泉不須苦學飛騰

又

南山手自斲蒼苔竹閣柴扉次第開二十里間雲不

又

靈府寧容一物侵此身只合老山林何由挽得銀河

又

赤米熟炊元自軟黃薑頻倒不多酸縱令酒負尋常

又

冰壺冷浸玉芙蓉二伏炎蒸一點無淨洗硯池瀟墨

又

硯傳百歲重鬪角筆擅一時錐出囊子所用硯百年前物

一角微調筆姑蘇能憑作頗佳紙欲窮時瘦蛟舉已看雷雨

又

扁舟夜載石帆月雙屨曉穿天柱雲八十老翁能辦

又

犀象本安山海遠樓楠豈願棟梁材伏波病困壺頭

又

粟無人餽方差快門有僧敲未絕幽豈是老荒深絕

又

瞿聃楊墨寧非學治獄行兵亦有師惟是儒生知擇

術百年窮達守書詩

病瘧兩作而愈

久出天魔境胡為瘧鬼來亦知無妄疾畢竟不為災

引睡須書卷支羸賴粥杯微風起秋色樽酒亦時開

露坐

略約方塘北簷雷小塹東荷盤傾夕露芙蓉秋風

戲詠

歲曆還逾半人生但可悲此身猶老健隨處且兒嬉

初秋書感

流年冉冉不容追餘息厭厭只自知馬革裹尸違壯

湖上

石帆山下舊苔磯回首平生念念非秋早明河低接

枕上

紗幘竹簟不勝清臥看殘缸翳復明兩樹梧桐鳴急

雨一林鸛鶴噪疎更靜無狂蝶妨幽夢懶有羣鷗責

書懷

無事自能心太平有為終蔽性光明皮膚脫盡見真

理梁肉掃空甘菜羹處處浮家成野宿時時策蹇作

山行平生常笑羊裘老史冊猶存後世名

游昭牛圖

游昭木石師李唐畫牛乃自其所長出欄初聽一聲

笛意氣已無千頃荒客居京口老益困衣不揜脛鬚

眉蒼時時弄筆眼力健蹠角毛骨分毫芒我無沙隄

金絡馬拂拭此幅喜欲狂乞骸幸蒙優詔許置身忽

在煙林傍日落飲牛水滿塘夜半飯牛天雨霜俚醫

灌藥美水艸老巫詞禁被不祥願我孫子勤農桑願

汝生積筋脈強確聲驚破五更夢歲負玉粒輸官倉
唐希雅雪鷗

烈風大雪吞江湖巨木摧折竹葦枯鳥爲瑟縮墮地
死豈復能顧卵與雞棘枝拔出亂石罅凜凜生氣獨
有餘耐寒兩鵲亦異稟羽族有此山澤癯神凝氣勁
中自足不待晴日相嗚呼深知畫手亦怪偉用意直
刮造化爐氄毛雖細爪翻健落筆豈獨今所無我評
此畫如奇書顏筋柳骨追歐虞

菖蒲

雁山菖蒲崑山石陳叟持來慰幽寂寸根蹙密九節
瘦一拳突兀千金直清泉碧缶相發揮高僧野人動
顏色益山蒼然日在眼此物一來俱掃迹根蟠葉茂
看愈好向來恨不相從早所嗟我亦飽風霜養氣無
功日衰稿

吾廬東北皆修竹茂木羽族來栖者不可數計
感而有作

逸舍皆茂林萬數栖鳥雀詰日輒爭鳴未暇紛已泊
清陰交欲暗丹實熟可啄吾廬少人迹媿爾肯見託
雖無惠養德亦免彈射虛結巢俯可窺淳風今豈薄
秋夜聞蘭亭天章寺鐘

絕湖上蘭亭不過一炊頃湖廢隸隄行往返常畢景
猶有古寺鐘迢迢下重嶺煙雲含莽蒼風露共凄冷
蕭然艸堂臥度此清夜永百念一洗空於焉發深省
閔雨

歲秋固多雨每恨不及時黃塵蔽赤日苗稿已不遲
踏車聲如雷力盡真何爲天豈不念民雲族風散之
窮民守稼泣便恐化棘茨妻子不望活所懼尊老飢
我願上天仁顧哀民語悲鞭龍起風霆尚繼豐年詩

徒行短歌次前輩韻

風吹短衣雙鬢白老人徒步歸鄉國數樹丹楓野店
西一川紅蓼溪橋北芒屨有賣百無憂過盡青山到
渡頭更求款段真多事堪笑當年馬少游

江樓次前輩韻

一日千回上庭樹城南尚記嬉遊處俯仰人間八十
年鏡中未許朱顏去甲第侵雲多貴人朝回撲帽軟
紅塵江樓月夜吹長笛誰似儂家不負身

七月四日夜賦

樓角西南月一鉤晚瓜落刃酒新籥仙家又愴銀河
別太史新班玉曆秋衰病歲時良冉冉窮愁身世轉
悠悠莫因乞巧嘲兒女我亦飄然水上浮

出近村歸偶作

朝騎小蹇涉煙村擁路爭看八十身似我猶爲一好
漢問君曾見幾閑人楊梅線紫開園晚蓴菜絲長入
市新莫笑堅頑推不倒天教日日享常珍

送子修入閩

士生萬里合鵬搏憔悴青衫且自寬薄祿及親雖共
喜遠途將父亦誠難關山可厭風塵惡蓬華應思菽
水歡只道老年心似鐵詩成也作鼻辛酸

書志

飲水蕭然臥曲肱桑村麥野醉騰騰老身長子知無
憾泛宅浮家苦未能南畝服勞勝乞食腐儒垂死恥
依僧柴荆常閉斜陽裏剝啄雖聞亦懶應

秋雨

雨聲疎復密窗影暗還明赤米香炊飯青蔬淡鬻羹
閑中長棋格病後減詩情惟有桑麻事鄰翁與細評
雨後涼甚

屏迹

竝海寬閑野清秋搖落天微涼供美睡穩字入新聯
陋屋蕭蕭雨修筒細細泉晚窗生酒興洗酌一陶然
屏迹亂山中觀身槁木同桑麻安舊業薪水付村童
不散嬰兒樸常存太古風一錢無用處那復計囊空
又

飯熟起開鉢困來徐倒牀無狂安取聖有短始知長
養道褐懷玉露才錐出囊聊須喚兒稚細細話耕桑

書事

聞道輿圖次第還黃河依舊抱潼關會當小駐平戎
帳鏡益南亭看華山 鏡益寺南亭盡得太華之勝

又

關中父老望王師想見壺漿滿路時寂寞西溪衰艸
裏斷碑猶有少陵詩 華州西溪即老杜所謂鄭縣亭子者

又

鴨綠桑乾盡漢天傳烽自合過祁連功名在子何殊
我惟恨無人快著鞭

又

九天清蹕響春雷百萬貔貅扈駕回不獨兩師先灑
道汴流袞袞入淮來

雨後

雨後涼生病體輕閑拖拄杖出門行槐花落盡桐陰
薄時有殘蟬一兩聲

幽居

早歲猶奇怪中年痛掃除華堂棋陸廢名馬宴遊疎
散帙身忘倦畦蔬手自鉏寥寥千載後誰此訪幽居

書事

北征談笑取關河盟府何人策戰多掃盡煙塵歸鐵
馬剪空荆棘出銅駝史臣歷紀平戎策壯士遙傳入
塞歌自笑書生無寸效十年枉是枕瑠戈

秋夜感遇十首以孤村一犬吠殘月幾人行爲韻

月生東山口宿鳥驚相呼我起立蒼茫况在白玉壺
飢鶴掠危巢大魚躍平湖作意賦新詩佳夕不可孤

又

今日天氣佳駕言適山村種枳作短籬壘石成高垣
牲酒賽秋社簫鼓迎新婚所願在仕者努力蘇元元

又

長康有二絕吾獨得其一寓世八十年一癡萬事畢
世間所謂點正類禪中蠱燂湯會有時爲計誰得失

我夢遊異境烏帽跨小蹇桑麻夾阡陌山川曠何遠

又

俗有太古風蕭散到雞犬鐘鳴忽驚覺所造恨猶淺
竭作朝築陂獨勞莫鉏菜艸煙欄犢臥船響籬犬吠

又

殘年迫耄及農事不敢廢兒曹強學餘努力事春礎
頽唇如昨日俯仰芳歲殘蠅蚋方鳴秋礎杵已戒寒

又

書生賦子薄何適不艱難梁肉固所美食淡心始安
前年蒙趣召渡江當六月顧漸衰病軀觸熱朝行闕

又

君恩雖屢下恐懼乞骸骨飄然返柴荆所愧已黔突
畏首復畏尾吾身其餘幾雖云食不足健決豈不偉

又

蓬窗對親舊情話來壘壘何以永今朝沽酒刺圈稀
昔遇高皇帝同朝多偉人哀哉逝不留煮蒿返蒼旻

又

存者纔一二相望不得親秋風聞雁過老淚霑衣巾
唐虞治巍巍洙泗道益明豈知秦漢後佛老起縱橫

詩書雖僅存韶護無遺聲書生幸有聞未死猶力行

吾廬宛在水中止車馬喧囂那到耳一堂儵然臥虛
曠蟬聲未斷蟲聲起有時寓意筆硯間跌宕弄騰作

談詭徂徠松盡玉池墨雲夢澤乾鵝滴水心空萬象
提寸毫睥睨醉僧窺長史聯翩昏鴉斜著壁鬱屈瘦

蛟蟠入紙神馳意造起雷雨坐覺乾坤真一洗小兒
勸我當自珍勿爲門生書斐凡

自微

牛解謹藏刀羊亡密補牢達人憂祿厚奇禍出名高
所要懷全璧寧當取緼袍世間俱癘疥何事苦爬搔

新秋

遠浦平郊弄夕霏曲籬幽徑鎖秋暉
馴驪巧占蒼苔臥鶯鶯斜穿密篠飛浴罷小軒成美睡雨餘老火斂
餘威未言風月供詩思汗噴塵衣且解圍

又

輝聲滿院送流年又見秋風到海邊
舊友死來頻入夢新詩愁絕少成篇
步頭野水雙飛鷺林外人家一點煙
顧影自驚如許瘦囊空無藥起沉綿

慣俗

蚩蚩之氓不自覺顧笑吾曹安淡薄
攜女數千行問法腰錢鉅萬仍騎鶴
豈知此事不兩得芻豢何可參
毒藥野狐出林作百態擊下鬪體渠
自忤老氏五千本清靜楊雄太玄惟
寂寞但能於此尊所聞萬卷丹經盡糟粕

塊坐齋中有感

敗席凝塵懶拂除況能作意去庭蕪
讀書眼力衰難強對酒心情薄欲無
野寺鐘魚思下擔山郵鞍馱憶登途
頽然坐睡誰驚覺寂寞西窗日又晡

新涼示子適時子適將有臨安之行

竹簾紗幌事已非秋清初換熱練衣
鶻鷲山月栖還起螢避溪風墮又飛
老眼漸昏書懶讀壯心雖在事多違
夜窗剩欲挑燈語日倚柴門望汝歸

秋雨

毒熱秋未衰吾廬沉淺迫雖云日一浴
流汗沾衣幘蕭蕭三日雨出此炮烙厄
瀟湘應更佳恨我無六翮

又

吾廬多美蔭最茂楸與梧百鳥集其間
下上更嗚呼秋風忽動地搖落日日疎
何如澗底松終歲無榮枯

講學

遷善以美身講學以盡性能為可行爾
用舍固有命天方斲斯文魯叟虛歷聘
黎元則可哀窮死吾何病

野興

來日無多去日道朱顏那肯為人留
簷聲點滴無時

兩野氣蒼茫極目秋朝出釣魚來北渚
夜耕驅犢上西疇此心所要常無媿
寂寞衡門死即休

又

江湖蕭散葛天民救放還山一幅巾
老去飢羸惟恃粥病來舉動每須人
道窮舉世知心少學進吾兒著語親
更有一端差自慰短檠不作白頭新

又

早見高皇帝宇宙新老年猶作太平民
虛名僅可欺橫目臆論曾經犯逆鱗
原野莫雲低欲雨陂湖秋水浩無津
蕭條生計君無笑一鉢藜羹敵八珍

又

飽見人間行路難暫陪鶴鷺意先闌
集仙院裏三題石神武門前兩挂冠
飢臥了無千里志倦飛元法九霄寒
客來莫笑蓬窗陋若比巢居已太寬

示元敏

學問參千古工夫始一經寧論綬若若
且喜佩青青汝業方當進吾言要細聽
仍須知稼穡勉為國添丁

八月四日夜夢中作

太華巉巖數水長白驢依舊繫斜陽
山深乳洞藥爐冷花發雲房酷飭香
鄰叟一樽迎谷口蠻童三髻拜溪傍
中原俯仰成今古物外自閑人自忙

明日復理夢中意作

白盡鬚鬚兩頰紅頽然自以放名翁
客從謝事歸時散詩到無人愛處工
高挂蒲帆上黃鶴獨吹銅笛過垂虹
閑人淚迹由來事那計猿驚蕙帳空

又明日復作長句自規

大學淵源不易窮古人立志自童蒙
醉猶温克方成德夢亦齋莊始見功
痛哭孰能悲陷溺力行猶足變雕蟲
太空雲翳終當散吾道常如日正中

示子孫

累葉為儒業不隳定知賢傑有生時
學須造次常於是道豈須臾或可離
我老已無明日計心存猶惜寸

陰移薙薙夫子雖天縱禮樂官名盡有師

秋夕

承學雖云淺初心敢自輕飄零為祿仕蹭蹬得詩名
撫事悲長劍懷人感短檠不堪秋雨夕鼓角下高城

但歲

但歲風煙慘幽居市井遙甌香炊蕙米泉潔煮芎苗
野廟迎神晚村船過埭囂西窗一樽酒亦足慰無聊

村居遣興

追數交朋略散亡臂辱足蹇固其常一年又見秋風
至孤夢潛隨夜漏長不辦誦書如倚相頗能噉飯勝
張蒼回看薄宦成何味只借朝衫作戲場

又

萬里征途與已闌三間破屋住猶寬山薑著雨房重
斂南燭先霜實半丹野市秋陰更蕭瑟書生老瘦轉
酸寒掩關也有消愁處一卷羅經醉後看

又

野堂疎豁近江臯喜見南山秋氣高野外漸寒羣木
脫艸根薄莫百蟲號築陂濬畝更相勉伐荻剝桑敢
愛勞亦念耄荒當自佚欲將世業付兒曹

甲子秋八月偶思出遊往往累日不能歸或遠
至傍縣凡得絕句十有二首雜錄入稿中亦不
復詮次也

鬻雪猶能活窖中僧牛亦可隱牆東來歸里社當知
幸萬卷書邊一老翁

又

小兒緣天摘列宿老子含飴弄穉孫郊居得此豈不
樂無奈催租人打門

又

早攜書劍三隨計晚辱弓旌四造朝心媿石帆山下
叟一生不識浙江潮

又

筋骸未廢寧為老煙火猶通豈是貧時跨一壘山縣

去園丁野老盡相親

又

著囊藥笈每隨身問病求占日日新向道不能渠豈
信隨宜酬答免違人

又

藥麤野老偏稱効詩淺山僧妄謂工懷麩裏茶來問
訊不妨一笑寂寥中

又

家居愈老厭拘纏旅舍僧房意自便乞菜作羹殊有
味借牀小憩即成眠

又

鄉間敬老意常勤一味甘鮮必見分大戴在前無著
食始知富貴本浮雲

又

市樓嘈囂知豐歲驛樹輪囷傲早霜六十年間凡幾
到剎沽新酒對斜陽

又

煇湯具浴僧窗暖春黍供炊旅甌香自笑平生為客
熟關山千里一衣囊

又

胡麻刈罷下麪初引水家家灌晚蔬但有茅簷隨處
好淵明可獨愛吾廬

又

秋風敗葉委蒼苔小蹇閑遊始此回溪上風煙爭晚
渡縣前燈火賣新醅

劍南詩稿卷第五十八終

劍南詩稿目錄
卷第五十九

遊山 對酒 遣舟迎子適因寄古風十四韻

重寄子適 飯後偶題 秋興二首 舍北

行飯 舍南野步 感昔五首 病齒 揮手

過鄰家 甲子秋八月丙辰雞初鳴時夢劉

韶美示詩八篇高古可愛明日作此詩志之

山居 歸老 送子坦赴鹽官縣市征 寄子

坦 書感 自扁門歸 遣興 詩酒 晚秋

野興二首 舟中口占 閉門 莫秋六首

農舍四首 九月十日夜獨坐 述意 小疾

自警 白龍 學易二首 閑中作 枕上

出遊五首 家居三首 贈隱者二首 貧中

自戲 風雨夜坐 示村醫 秋雨 雜興六

首 江亭 晚歸 懷昔 初寒示鄰曲 夢

中作并序 初寒二首 鉏菜 對酒 夜臥

久不得寐復披衣起呼燈作艸書數紙乃復酣

枕明日作此詩記之 孤雲 自閑 贈雞

子適為其長兄置酒予亦與焉作五字示之

太息三首 代鄰家子作 山行 行過西山

至柳姑廟晚歸 月夕幽居有感 寒夜將旦

作 舍北獨步 山村道中思蜀 不如茅屋

底四首 菜羹 十月脰甚人多疾十六日風

雨作寒氣候方少正作短歌以記之 冬夜題

齋壁 自遣 蕩蕩 晨起

劍南詩稿卷第五十九

宋陸游務觀

遊山

四序雖悉佳莫若新秋時已脫烹煮厄未興搖落悲
鷺集水落渚鷗爭風墮枝煙村烏柏丹晚日望最奇
豈無一舸艇往赴幽人期婆娑下堂迎壞衲顛倒披
丹果垂中庭碧花蔓疎籬秋高財一來怪我今年衰
對酒

天上何曾許寄愁酒中正自可忘憂不能上樹作巢
飲尚辦滿船供拍浮神仙可學君豈信衣食裁足吾
何求但憶人如王粲輩相攜一笑賦登樓

遣舟迎子適因寄古風十四韻

今日拆汝書一讀眼為明知汝即日歸明當遣舟迎
想汝片帆東翻若飛鴻征薄莫過梅市呼謳雙櫓聲
到家亦尚早城樓初發更艸艸一尊酒為汝手自傾
夜分不能寐頓忘衰病嬰豈惟病良已白頭黑絲生
暫別亦不惡益重父子情自今日相守北窗同短檠
六經炤久伏百氏方縱橫世俗擯孤學未易口舌爭
此責在學者艸萊勿自輕汝壯父未死相勉在力行
重寄子適

秋風日日望歸裝忽報來期喜欲狂衰病無因懣迎
汝夢隨殘月過浮梁

飯後偶題

環堵蕭然百慮忘天教得飯飲枯腸長橋鮓美桃花
嫩北苑茶新帶胯方漠漠寒花敬晚照翩翩孤蝶弄
秋光解衣捫腹西窗下賴有新詩破日長

秋興

流光冉冉迫晡曉常抱秋風宋玉悲才盡已無楓落
句身存又見雁來時自憐閉戶龐眉叟初對還家大
耳兒子適方自行在歸一盞青燈照寒影不妨細舉別

來詩

又

世事元看等一毫紛紛寵辱陋兒曹雁行橫野月初
上桐葉滿庭霜未高細考蟲魚箋爾雅廣收艸木續
離騷更餘一事君知否臥聽牀頭滴小槽

舍北行飯

飯飽逍遙信所之芙蓉蔬圃遍遊嬉梧楸凋落風高
後瓜瓠輪困雨足時犬喜人歸迎野路鷗營巢穩占
低枝晚來懶復呼童子自掩柴門上屐屨

舍南野步

枯蔓絡荆籬幽花映荻扉馴鷹不起歸鷓鴣猶飛
野色連收網邊愁入搗衣壯圖空自笑事事與心違

感昔

行年三十憶南遊穩駕滄溟萬斛舟常記早秋雷雨
霽柁師指點說流求

又

馬瘦行遲自一奇溪山佳處看無遺酒壚強挽人同
醉散去何曾識是誰

又

負琴腰劍成三友出蜀歸吳歷百城最是客途愁絕
處巫山廟下聽猿聲

又

岳陽三伏正炎蒸爽氣淒風見未曾白浪蹴天樓欲
動當時恨不到黃陵

又

行遍天涯只漫勞歸來登覽與方豪雲生神禹千年
穴雪捲靈胥八月濤

病齒

似病非病臂已瘳當墮未墮齒難留一杯藜粥吾所
美幸可自辦不待求既無齧骨犯曲禮亦免祝饒煩
成周形骸外物付悠悠那將老境供閑愁

揮手

揮手羣玉府說駕石帆山偶與片雲出却隨孤鶴還
松風莫蕭瑟石溜夜淙潺阿敏讀書處更添苑一間

過鄰家

初寒偏著苦吟身情話時時過近鄰嘉穰連雲無水
早齊民轉壑自酸辛室廬封鏽多補戶市邑蕭條少
醉人甑未生塵羹有糝吾曹切勿怨常貧

甲子秋八月丙辰雞初鳴時夢劉韶美示詩八
篇高古可愛明日作此詩志之

韶美仙去三十年一念及之常悵然秋窗忽夢接顏
色萬里老鶴歸遼天贈詩溫其似玉瓚我亦麤識關

雎亂建安黃初不足言筆端直覺無秦漢

山居

客至何曾共劇談行藏獨有老農諳覓官肯信山居
樂食淡方知飯味甘一脈泉通澆藥圃萬重雲鎖釣
魚菴好奇自笑心無厭行遍江南憶劍南

歸老

兩腳走萬里歸老樵風溪雖遠京雒塵窮巷還多泥
纍纍喪家狗嗟嗟失日鷄幸非徙比景何恨棲會稽
今年更可笑偃僂自灌畦榮雖不滿眼悔亦免噬臍
萬事付一尊師友阮與嵇

送子坦赴鹽官縣市征

父子團樂笑語諱豈知雲散各天涯長亭結束秋將
晚別酒淒涼日易斜我坐老年艱就養汝非仰祿肯
離家遊山尚有平生意試為閑尋一鹿車臘中欲作一
小肩輿輕駛堅實兩夫可舉者以備山行

寄子坦

目斷西陵細鷺中津亭想汝繫孤篷頗憂昨莫雲吞
日俗以黑雲接落日為風雨之候 猶幸今朝雨壓風就食
亦知難戀戀挂帆終恨太匆匆寒沙不是無來雁頻
寄書歸問老翁

書感

老荷寬恩許退耕絲毫無報亦何情民貧樂歲尚艱

食道喪異端方肆行黨禍本從名輩出弊端常向盛
時生古人骨冷青松下誰起英魂與細評

自扁門歸

橘柚纍纍未著霜陂塘渺渺度秋光長橋虹臥當官
道重閣羣飛出女牆煙際遠舟俄已隱天邊驚雁不
成行歸來有底誇兒輩笑指奚奴古錦囊

遣興

兔徑遊觀足蝸廬臥起寬垂名千古易無愧寸心難
燈火煖清夜風霜變早寒一經家世事吾興未應闌

詩酒

詩酒平生樂無如老病侵才衰愁韻險量退怯杯深
宿露滋金盞微霜點頰林呼鷹五陵路惆悵少年心

晚秋野興

病骨支離不耐秋今年九月即輕裘細書燈下幸能
讀舊支夢中時與遊連夕夢紹興間朝諸公官賦畢輪
無吠犬農功已息有閑牛不知冠蓋朝天客也得心
安似我不

又

徹底無能徹骨貧自憐虛作六朝民學因病廢捐長
日志與年衰媿古人露溼亂螢飛暗廡霜清飢雀噪
空困一生眼境常如此艸賦憑誰問大鈞

舟中口占

養生妙理本平平未可常談笑老生業力頓消知學
進人情愈薄喜身輕鶴雛日長丹砂頂巖溜時聞玉
珮聲最是扁舟暮歸處一川風月遠相迎

閉門

閉門何所樂聊息此生勞霜薄殘蕪綠風酣萬木號
研朱點周易飲酒讀離騷斷盡功名念非關快剪刀

莫秋

多雨今秋水渺然溝溪無處不通船山回忽得煙村
路始信桃源是地仙

又

閑傾清聖濁賢酒，穩泛朝南莫北風。射的山前雲幾片，一秋不散伴漁翁。

又

百年大耋龍鍾日，九月初寒慘淡天。嶺谷高低明野火，村墟遠近起炊煙。

又

舍前舍後養魚塘，溪北溪南打稻場。喜事一雙黃蝶，隨人來往弄秋光。

又

九月山村已驟寒，看雲殊怯倚闌干。一杯濁酒栽培睡，不覺春雷起鼻端。

又

清秋又是一年新，滿眼丹楓映白蘋。海內故人書斷絕，汀洲鷗鷺却心親。

農舍

三農雖隙亦匆忙，稽事何曾一夕忘。欲曬胡麻愁屢雨，未收蕎麥怯新霜。

又

神農之學未為非，日夜勤勞備歲饑。雨畏禾頭蒸耳出，潤憂麥粒化蛾飛。

又

萬錢近縣買黃犢，襪履行當東作時。堪笑江東王謝輩，唾壺塵尾事兒嬉。

又

杜門雖與世相違，未許人嘲作計非。長綆雲邊牽犢過，小舟月下載犁歸。

九月十日夜獨坐

蓬窗燈火耿疎籬，正是寒沙雁到時。頭少二毛真篤老，口無縱理亦長飢。朝聞夕死固當勉，幼學壯行嗟已遲。小豎夜闌私怪我，儼然危坐若深思。

述意

憂患無窮生有涯，惟須百事屏紛華。人誰敢侮修身

士天不能窮力，稽家頗嘆老僧同。夜寒間從隣叟試秋茶，結茅林下從來事。瓦屋三間已太奢，陸士衡兄弟

共居瓦屋三間

小疾自警

老來土弗強，舉箸輒作病。造物蓋警之，何啻三下令。而我不自珍，若與疾豎競。豈惟味攝養，實亦關忠敬。顛陪乃自詒，何用死不瞑。自今師古訓，念念貴清靜。羔豚昔所美，放斥如遠佞。淖糜煮石泉，香飯炊瓦甑。采蔬擷藥苗，巾冪相照映。膨臍亦宜戒，僅飽勿憚刺。隱書有至理，要使氣常勝。因之戒友朋，苦語君試聽。

白龍

九月癸酉莫白龍見西方，是時久晴明日落天正蒼。玉宇無纖雲，凌空獨高翔。蜿蜒久乃隱，父老數未嘗。清臺占五行，此事實殊常。我非劉子政，聊記以短章。

學易

卒歲勿多求，壺殮與褐裘。心安由自足，身貴為無求。易化千年鶴，難馴萬里鷗。閉門方學易，未暇揖浮丘。

又

學古忘衰疾，齋心洗昨非。拳拳奉天理，坦坦息心機。改過先幽隱，收功在細微。耄期猶自警，俯仰惜餘暉。

閑中作

呼童按摩罷，倚壁欠伸餘。棋局可忘老，鳥聲能起予。掃蒼憐胃蝶，投餌出潛魚。向晚明窗下，還來讀舊書。

枕上

嚙嚙初聽雁，南征嗑嗑俄聞雞。一鳴夢境往來雙，隻候官途興廢短。長檠何由生計，裁能足不願人間過。取名飯，輕茶甘吾事了，但愁無酒酌公榮。家貧不能釀酒，而官壺多醜。

出遊

一樽隨處可開顏，此事深疑造物慳。地可登臨多恨遠，身常強健又須閑。山圍小市煙初斂，霜著橫林葉半殷。徒倚闌干君勿厭，日斜猶及棹舟還。

又
漁村酒市本無期小蹇扁舟信所之丹葉滿林霜落
後紫萍黏塊水枯時山林閑寂歸雖早齒髮衰殘病
已遲努力及時謀自適錦囊多貯莫秋詩

又
山有籃輿步有舟放翁身健得閑遊羊牛點點日將
夕蒲柳蕭蕭天正秋細徑僧歸雲外寺疎燈人語酒
家樓歸途更愛湖橋月燭倚闌干為小留

又
霜氣蕭條木葉黃佳時病起意差強雲煙古寺聞僧
梵燈火長橋見戲場一枕清風幽夢斷數匙旅飯野
蔬香道邊莫笑衰殘甚獨往山林興未央

又
禹筮胥濤中路分畫橈衝破一川雲柯橋僧閣凌空
起梅市漁歌帶月聞蟹束寒蒲大盈尺鱸穿細柳重
兼斤酒家報我新醅熟且撥閒愁寄一欣

家居

清世念遺民常情重老人饋漿煩郡府分胙媿鄉鄰
穫稻黃雲卷春梗玉粒新膨脗自摩腹一笑欲忘貧

又
老眊詩名滅登臨笑口開釀泉為酒熟情鶴附書回
紗帽方簪菊筇杖又探梅清狂君勿笑曾是薄蓬萊

又
蒲葦村深地風霜歲晚天溪柴勝熾炭小束柴自若耶
溪出名溪柴黎布敵純綿客有遺黎布者甚輕暖有客問奇
字無人嘲晝眠誰言此翁老懷抱尚超然

贈隱者

噦昔從君處玄都太古壇月高檐影直霜重珮聲寒
鶴駕三山近壺天萬里寬相逢初未省但認切雲冠

又
力量超終古光明破積昏獨行寧有待妙用本忘言
神定嬰兒戲丹靈豎子奔緒餘應不靳小出濟元元

貧中自戲
種枳為籬艸結廬人間知足更誰如澗深松老志榮
謝天闊雲閑任卷舒門冷併無殘客跡家貧常讀絕
編書有金可散還關念多事從來笑漢疎

風雨夜坐

寒風凄緊雨空濛舍北新丹數樹楓軟枕舊遊來眼
底掩書餘味在胃中松明對影談玄客篠火圍爐采
藥翁君看龜堂新境界固應難與俗人同

示村醫

玉函肘後了無功每寓奇方嘯傲中衫袖翫橙清鼻
觀枕囊貯菊愈頭風新詩吟罷愁如洗好景逢來病
欲空却羨龍鍾布裘客埭西賣藥到村東

秋雨

一秋風雨被白日積水鬼神愁太陰寒蟄悲鳴艸根
溼水鳥啾哭菰叢深殘年不覺日月逝病骨惟愁霜
露侵常有淖糜支日莫一毫寧復少年心

雜興

散步持書卷閑眠枕藥囊馴麈隨几杖癡蝶入衣裳
病起年光速身閑日景長為憐紅樹好久立向西廂

又
客問維摩疾人哀范叔寒詩囊負童背藥笈挂驢鞍
野果攢眉澗村醪振齒酸老難殊可念日日報平安

又

愛物停垂釣劬身自荷鋤時從鄰父飲日授稚孫書
尚棄登山屐寧須下澤車平生雙不借投老伴歸歟

又

平生獨何幸命若與人謀疲懦逃深責空疎得早休
位卑輕得喪迹遠少恩讎莫怪歸耕樂文園久倦遊

又

倒囊得千錢從人買釣船秋風宿村步莫雪醉江天
得意鷗波外忘歸雁浦邊平生笑巖子猶有姓名傳

澤居憂下溼老病覺中乾違俗恐不免倚天聊自寬
受規如獲藥喜退甚彈冠不是憎勳業心知骨相寒

江亭

野市逢虛日江亭候莫潮蟲號霜後艸人立雨中橋
病骨羸將折殘魂黯欲消無心作村醉酒旆苦相招

晚歸

梅市橋邊弄夕霏菱歌聲裏棹船歸白鷗去盡還堪
恨不為幽人暖釣磯

懷昔

奮迹窮閭本甚微刺天何敢慕羣飛業文僅與驢書
券學射纔因鼠發機習獲縱橫真脫命風波瀕洞尚
餘威朝冠挂了方無事却愛山僧百衲衣

初寒示鄰曲

村北村南數十家陂池重複谷盆筴菘蕪缺處見漁
火蓬戶閉時聞紡車淺瀨水清雙立鷺橫林葉盡萬
樓鴉是中佳興無窮極賴著青鞵上若耶

夢中作并序

甲子十月二日夜雞初鳴夢宴客大樓上山

河奇麗東南隅有古關尤壯酒半樂闋索筆
賦詩終篇而覺不遺一字遂錄之亦不復加

竄定也

富貴誇人死即休每輕庸子覓封侯讀書歷見古人
面好義常先天下憂獨往何妨刀買犢大烹却要鼎
函牛坐皆豪傑真成快不負凌雲百尺樓

初寒

老遇初寒候貧當絕祿時衣裘俱在笥薪炭不愆期
鶉滿羣童網魚浮百石陂比隣每分餉捫腹可無飢

又

重簾禦晚吹密瓦護晨霜 小室今年冬初增瓦三百箇三面
窗皆設紙簾 焰焰輒爐火霏霏石鼎香行遲依木杖坐

久穴藜牀晝亦無聊甚胡為厭夜長

鈕菜

江湖霜雪薄終歲富嘉蔬菘韭常相續萬蔓亦有餘
家貧闕梁肉身病忘鼃魚幸有荒畦在何妨日荷鋤

對酒

賦性雖耽酒其如老病身氣衰成小戶醅濁號賢人
疏廣矜君賜劉伶畏婦嗔蘭亭獨超絕千載擅清真
夜臥久不得寐復披衣起呼燈作艸書數紙乃

復酣枕明日作此詩記之

才下多阮窮地偏罕人客半生走四海竟無第一策
莫年忽大悟惟有緊閉門朝作一池墨弄筆招羈魂
初若奔駭驥忽如掣蛟鯨鬼神森出沒雷雨更晦明
飛揚興已極投筆徑就牀酣酣一枕睡不覺幽夢長
手攜避秦人行上腰帶鞋下視河流黃仰看天宇青
大呼自驚覺夜半燈欲死茆簷雨點滴身乃在萬里
挑燈影突兀顧問汝是誰留侯雖強食輕舉亦何疑

孤雲

四十年來住此山入朝無補又東還倚闌莫怪多時
立為愛孤雲盡日閑

自閔

破帽羸驂厭垢氛挂冠歸伴故溪雲年光疾病占強
半日景睡眠居七分廬冢蕭條頻賈涕交朋零落久
離羣殘年豈復行孤學自閔猶尊昔所聞

贈雞

青銅三百買烏雞闢地牆東為擇棲更聘一雌全物
性莫辭風雨五更啼

子通為其長兄置酒予亦與焉作五字示之

烏衣兄弟集我亦據胡牀晚菊數枝在小園幽興長
霜清桑落熟湯嫩雨前香艸艸雖堪笑他年未易忘

太息

太息貧家似破船不容一夕得安眠春憂水潦秋防
旱左右枝梧且過年

又

禱廟祈神望歲穰今年中熟更堪傷百錢斗米無人

要貫朽何時發積藏

又

北陌東阡有故墟辛勤見汝昔營居豪吞暗蝕皆逃去窺戶無人艸滿廬

代鄰家子作

社日淋漓酒滿衣黃雞正嫩白鷄肥弟兄相顧無涯喜扶得吾翁爛醉歸

山行

山光秀可餐溪水清可啜白雲映空碧突起若積雲我行溪山間靈府為澄澈峻峭崖角立蟠屈路九折黃楊與冬青鬱鬱自成列其根貫石罅橫逸相糾結上捫鵬鷖巢下歷豺虎穴流泉不可見鏘然響環玦出山日已莫林火遠明滅小憩得樵家題詩記幽絕行過西山至柳姑廟晚歸

月夕幽居有感

五嶽名山采藥身可憐騎馬踏京塵浮名本是挺災物謝事寧非得道因出岫每招雲結伴巢松仍與鶴為鄰劍南舊隱雖乖隔依舊柴門月色新

寒夜將旦作

白髮垂肩無二毛宵中消盡少年豪河傾月沒夜將日木落艸枯秋已高窗下燈殘候蟲語牆隅棲冷老雞號曲肱不復更成寐起視寒空如斷鰲

舍北獨步

霜露霑衣迫歲徂天公欲為老人娛斷雲新月供詩句蒼檜丹楓列畫圖風葉蕭蕭歸獨鶴煙波渺渺漾雙鳧孤村薄莫誰從我惟是詩囊與酒壺

山村道中思蜀

當年萬里客西南藥市題詩倚半酣偶為三遊羣玉府遂妨重到百花潭剡溪謾說思安道函谷誰能識老聃空乞丹青作橫幅半堤寒日策羸驂

不如茅屋底

鑄印大如斗佩劍長拄頤不如茅屋底睡到日高時

又

南伐踰銅柱西征出玉關不如茅屋底高枕看青山

又

火齊堆盤起珊瑚列庫藏不如茅屋底父子事耕桑

又

列鼎賓筵盛籠坊從騎都不如茅屋底醉倒喚兒扶

菜羹

青菘綠韭古嘉蔬蓴絲菰白名三吳臺心短黃奉天廚熊蹯駝峯美不如老農手自闢幽圃土如膏肪水如乳供家賴此不外取襍禩寧辭走煙雨雞豚下箸不可常況復妄想太官羊地爐篝火煮菜香舌端未享鼻先嘗

十月晦甚人多疾十六日風雨作寒氣候方少正作短歌以記之

昔我從行臺宿師南山旁仲秋已戒寒九月常雲霜入冬即大雪人馬有仆僵土牀熾薪炭旃毳如胡羌果蔬悉已冰熟視不得嘗獵騎荷戈歸爭獻狐與狼是時意氣快豈復思江鄉邇來四十載餘景迫老荒結茅鏡湖曲氣候歲靡常殘暑排不去單衣作重陽霜晚木未丹地燠艸不黃玄冥失號令瘧鬼意頡頏忽焉風雨惡縱擊勢莫當頗疑地撼軸又恐河決防和泥補竅穴乞火燎衣裳霰雪雖未作疾癘幸退藏風爐著糝美瓦甌粳飯香比隣共安健相與歌虞唐

冬夜題齋壁

髮不能勝二寸冠天教送老向江干倚牆筇杖伴人瘦縮瓦清霜爭月寒壯志追思良可悔危途逼歷始知難一身著了餘何事茅屋三間已太寬

自遣

蔬食任無魚山行可借鹽指攀猶把釣眼濯未捐書客少勝紛若家貧亦晏如時時顧影數頭似十年初

蕩蕩

蕩蕩唐虞去日遺孔林千載亦荒丘六經殘缺幸可
攷百氏縱橫誰復憂釋書恐非易論語王迹其在詩
春秋君臣父子未嘗泯吾道尚傳君但求

晨起

曉枕初興白髮翁弊裘百衲封爐紅獨居漫受書狐
媚滯思難矜筆陣雄舊學蟲魚箋爾雅晚知稼穡講
幽風一身自喜無餘事且度殘年風雪中

劍南詩稿卷第五十九終

劍南詩稿目錄
卷第六十

述感 甲子歲十月二十四日夜半夢遇故人
于山水間飲酒賦詩既覺僅能記一二乃追補
之二首 舟中夜賦 舟中曉賦 漁家 遠
遊 與兒孫小飲 遂初 與村鄰聚飲二首
夜坐示子虛 行飯莫歸 寒雨中夜坐
枕上 卽事二首 雜感六首 閒中自嘲
暇日坐山麓松石間作 得子虛臨安舟中書
因寄 書喜二首 老學菴夜興 感昔七首
孤村 村舍書事 小葺居舍 冬至 夜
坐示子適兼示元敏 客懷 雜書幽居事五
首 題齋壁 探梅 新移竹栽喜于得雨而
池中瀾灑乃以水溢而去戲以長句記之 讀
宛陵先生詩 勉學 道室試筆六首 治心
夜夢遇老人于松石間若舊嘗從其遊者再
拜敘間闕老人亦酬接甚至云 過鄰家 村
飲 市飲 社飲 舟中作 風雲晝晦夜遂
大雪 大雪 雪夜 雪霽 雪後 夜寒與
客燒乾柴取煖戲作 排悶 席上有舉呂居
仁詩者因次其韻示坐客 予使江西時以詩
投政府丐湖湘一麾會召還不果偶讀舊稿有
感 柳橋 鷗鷺 感物 甲子歲莫 出
遊至僧舍及逆旅戲贈絕句二首 歲莫出遊
出遊所至皆欣然相迎口占示之 題旅舍
壁 野人舍小飲 自近村歸 夢華山 歲
莫與鄰曲飲酒用前輩獨酌韻 山中飲酒
客亭 除夜

劍南詩稿卷第六十

宋 陸游 務觀

述感

斷簡承孤學窮閭負壯心方憂一齒落時一齒方搖動
何止二毛侵買地開幽圃招僧理廢琴浮生祇如此
感慨不須深

甲子歲十月二十四日夜半夢遇故人於山水
間飲酒賦詩既覺僅能記一二乃追補之

拂衣金馬門稅駕石帆村喚起華山夢招回湘水魂
心親頻握手目擊欲忘言最喜藤陰下儵然共一樽

又

小山緣曲澗路斷得藤陰忽遇平生友重論一片心
興闌棋局散意豁酒杯深雜唱俄驚覺悽然淚滿襟

舟中夜賦

千里風塵季子裘五湖煙浪志和舟燈殘復吐惱孤
夢兩落還收生旅愁城上霜笳入霄漢煙中漁火耿
汀洲牧之未極詩人趣但謂能輕萬戶侯

舟中曉賦

木落霜清水鳥呼扁舟夜泊古城隅吹殘畫角鐘初
動低盡寒空斗欲無浪迹已同鷗境界遠遊方羨雁
程途高檣健席從今始遍歷三湘與五湖

漁家

江上漁家水蘊扉閑雲片片傍苔磯釣收驚下虛舟
立橋斷僧尋別徑歸海近岡巒多迤邐天寒霧雨正
霏微羊裘老作桐江叟點檢初心幸未違

遠遊

少年遊宦日駢躓恥沉浮見虎猶攘臂逢狐肯叩頭
力行雖自許早退豈人謀予年六十餘即退閑故山小艇
煙波上飄然得遠遊

與兒孫小飲

歲莫寒多兩村深早閉門荒園摘菜芥近市買雞豚
短褐聯三世幽窗共一樽吾曹常得此餘事不須論

遂初

狂本類三閭歸仍慕二疎何由滿人笑但可遂吾初
奕奕沙堤馬栖栖下澤車細看俱外物俛首老犁鋤

與村鄰聚飲

冬日鄉間集珍烹得徧嘗蟹供牢九美聞人憊德言
賦中所謂牢九包子是魚煮膾殘香雞跖宜菰白豚肩
雜韭黃一歡君勿惜豐歉歲何常

又

交好貧尤篤鄉情老更親薰香紅糝熟齋美綠椒新
俗似山川古人如酒醴醇一杯相屬罷吾亦愛吾鄰

夜坐示子虛

裘薄知霜重燈殘覺夜闌為農宜廢學謝事等無官
疎懶貧難醒沉綿死有端大兒千里至聊復為加餐

行飯莫歸

暨置觀書不耐閑飄然梅塢竹籬間霜風盡脫千林
葉雲氣平沉一面山笑喚筇杖扶蹇步聊憑村酒借
朱顏廟壩牆下歸來晚宿鳥紛紛已漸還

寒雨中夜坐

江村風雨晚冥冥閉戶添衣愴客情爐蒸松肪如蠟
爨鼎煎茶浪起難聲團樂賴有兒同話剝啄應無客
可迎聊舉一杯生耳熱頽然酣枕到窗明

枕上

世間命薄有誰如僵臥空山夢亦孤三尺窗前燈半
死萬重雲外雁相呼久貧僅守殘書笈未死猶須幾
酒壺趣辦一棺那得緩古人四十揣頭顱

即事

心與巖泉靜形如野鶴羸朝餐美藜藿夜學講唐虞
婢老無釵澤僮寒鬪袴禱所欣惟一事無吏督殘租
糶飯流匙滑葵羹出甌香有時留野客亦復餉鄰牆

又

老圃傳占法行僧遺藥方未為全絕物終勝利名場

買馬當可乘策舍當可居快馬多覆敗傑屋鬼所狙

徒行與露坐安穩無後虞所以古達人秋風憶尊鱸

又 士生誦二典况若生唐虞陸陸奉玉帛可否聞吁俞

闕里得其傳功與造化俱孰知千載後乃尊重譯書

又 擁裘南窗下堅坐試定力爐香亦不散伴我到曠黑

絕交近為我遊世易顛陪默默何所為且復自休息

又 上破聞竹枝入秦聞烏鳥奏曲未及終涕淚淒已濡

還山風月夕菱唱起鏡湖雖無遠遊感白首亦窮途

又 吾聞之古方有病當鮮食如其不能爾金丹亦無益

我老更事多此語知造極子房從赤松千載推達識

又 夢育小兒女便有無窮愛謁醫問疾恙對客誇警邁

晨雞忽喚覺此愛復安在人生困糾纏一笑脫囚械

又 鏡湖西畔有漁扉竊比玄英似庶幾風月定交殊耐

久煙波得意可忘歸曾行萬里求微祿亦伴諸公踐

又 駭機試問即今成底事晨發依舊北山薇

閑中自嘲

暇日坐山麓松石間作

偶曳枯筇出槿籬松間盤石坐移時飢摩齧艸無餘

綠乳鵲營巢有墮枝幽事類分皆可譜高情辭達自

成詩莫嗟寂寂終吾世正是他年一段奇

得子虞臨安舟中書因寄

水悠悠雙鯉魚眼明初圻入關書殘年已覺如

客一念還成淚濺裾春近預憂歸夢短潮回莫遣寄

聲疎何時可棄微官縛五畝荒畦共荷鋤

書喜

寵辱元知不足驚退居兀兀錢餘生冰魚可釣羹材

足霜稻方登羅價平鄰媪已安諸子養閔氏媪以貧甚

棄諸子而去今始得復歸園丁初葺數椽成韓氏得屋湖上

又 十月東吳艸未枯村村耕牧可成圖歲收儉薄雖中

熟民得蠲除已小蘇家塾競延師教子里門罕見吏

徵租老昏不記唐年事試問元和有此無

又 老學菴夜興

冷臥空齋枕曲肱飢鷹驚起髮鬚昏煙霞華嶽逃名

客風雪廬山入定僧榭葉蔽身勝衣帛金丹照室不

燃燈禿翁自笑無名字聊向江湖襲舊稱取江湖散人

之意

又 感昔

百丈庚寅上峽時至今猶健豈前期家人暗換吾何

數鏡裏衰翁復是誰上峽骨肉在者四子爾今皆出仕

又 神女祠前猿夜鳴相公溪上艸初生重遊惟有西窗

夢一點燈青夢不成

又 白帝城邊鶯亂啼憶騎瘦馬踏春泥老來感舊多悽

愴孤夢時時到瀟西

又 小益晨裝雨作泥南沮涉水馬長嘶山腰細棧移新

路驛壁流塵閣舊題

又 曾從征西十萬師白頭回顧只成悲雲深駱谷傳烽

處雪密嶓山校獵時

又 老君洞外小朱扉雲壓寒空雪欲飛結陣弓刀邊壘

去挂鞍狐兔獵場歸

又

少時失脚利名間寸步何曾不險艱造物恐人渾忘却夢中憂患尚如山

孤村

少年誤計落人間晚臥孤村日掩關小室易温爐火省幽窗常暗架書閑梅橫籬落春初動雲開川原雪尚慳欲喚一藤同勝踐恨無傑句壓溪山

村舍書事

紙窗百衲地爐紅圍坐牛醫卜肆翁時節杯盤來往熟朝哺鹽酪有無通男丁共結春耕耦婦女相呼夜績同老子頽然最無事客歸自策讀書功

小葺居舍

野水楓林下殘年亦自存刈茅支漏屋插棘補頽垣把釣襟靈爽爭棋笑語喧晚窗幽興極共酌黍醅渾冬至

老遇陽生海上村川雲漠漠雨昏昏鄰家祭徹初分昨賀客泥深不到門萬卷縱橫忘歲月百年行止付乾坤明朝晴霽猶堪出南陌東阡共一樽
夜坐示子適兼示元敏

微霰不成雪大風俄散雲孤燈翳還吐斷雁遠猶聞冉冉新春動遙遙清夜分兒孫未須睡吾與汝論文

客懷

客懷病思兩悽悽瘦馬長韉濺雪泥道左忽逢曾宿驛壁間閑看舊留題村醪酸薄陳山果旅飯蕭條嚼凍齋何處人間非夢境恍然重到劍關西

雜書幽居事

抱瓮窮園叟還山老布衣死邊常得活閑處偶容歸釣恐魚吞餌棋憂客墮機此心君會否洗盡百年非

又

淡薄齊榮辱恢疎略怨恩爐常養丹母手自斲桐孫炎火下照海黃河高沂源道翁來不速一笑倒吾樽

又

庭曠多延月齋空半貯雲松聲行路共泉脈近鄰分

采藥九蒸曝朝真三沐熏林間有叢祀繞屋夜宿信

又

貧困雖終老曾中尚浩然直令頭搶地未害鼻撩天種菜慳三畝苦茅僅數椽布衾常不暖夜夜亦安眠

又

卜築南湖上梅花幾度春身緣作詩瘦家爲買山貧野步維漁艇江樓岸醉巾誰知會稽叟不愧葛天民

題齋壁

門前枯葉滿荒街堂下殘蕪擁土階蓬蓽蕭條如旅店豆蔬淡薄學僧齋畫存真火温枵腹夜挽黃流灌病骸喚取鄰翁同結社它年仙去與君偕

探梅

歲月相尋豈有窮早梅喚醒醉眠翁坐中酒量人人別花底春風處處同白帝城邊微雪過青衣江上夕陽紅錦囊空復殘詩在分付悲歡一夢中
新移竹栽喜於得雨而池中瀾鱗乃以水溢而

去戲以長句記之

霧雨三日天沉陰西溪水長二尺深土濡新竹有生意池滿文禽無任心竹根蘇活賴此雨禽亦歸飛戲煙浦去留雖異各欣然抽萌哺子全其天

讀宛陵先生詩

李杜不復作梅公真壯哉豈惟凡骨換要是頂門開鍛鍊無遺力淵源有自來平生解牛手餘刃獨恢恢

勉學

學力艱危見精誠夢寐知衆人雖莫察吾道豈容欺雷雨含元氣著龜決大疑爲儒能體此端不負先師

道室試筆

浮雲萬事不到眼千歲人間心尚孩屏風疊下看花落扇子峽中聞雪來

又

兜羅絳雲常滿谷勃落葉衣無四時中原百戰血塗野此老醉眠初不知

又
事來得失若山重放下始知前日狂一枝藜杖一壺酒何處人間無醉鄉

又
吾家學道今四世世佩施真三住銘一窗蘿月照孤詠萬壑松風吹半醒

又
死來尚戀遊金谷病廢猶難放柳枝等是胃中不浩浩樂天莫笑季倫癡

又
明明行路有神仙世士求仙却不然貪冒苦多廉讓少恐君未得盡天年

治心
治心無他法要使百念空秋毫作其間有若海颶風颶風孰能止三日力自窮我徐躡其後杲杲日出東

向來一噫者畢竟誰為雄萬里靜海氛一望開天容會從安期生高會蓬萊宮
夜夢遇老人於松石間若舊嘗從其遊者再拜

敘間闕老人亦酬接甚至云
遼海曾從化鶴丁百年塵土汚巾瓶萬山深處遇行

李再拜起時如醉醒綠樹巖前開藥笈白驢背上指丹經雲霄平步尋常事不用求方更解形

過鄰家
病去詩情動寒深酒戒開兒孫扶每出鄰里喚還來雲重時飛雪春遲未見梅山園多芋栗夜話且燔煨
村飲

舊隱青山在衰顏白髮新推移忝前輩疎懶似高人擊鼓驅殍鬼吹簫樂社神家家皆有酒莫吐相君茵

市飲
學道無多事消陰服衆魔春雷驚蟄戶海日浴鯨波

大勇收全勝靈襟襲太和何妨會稽市取酒獨酣歌
社飲

東作初占嗣歲宜蠶官又近乞靈時傾家釀酒無遺力倒社迎神盡及期先醉後醒驚老僮路長足蹇數歸遲西村漸過新塘近宿鳥歸飛已滿枝
舟中作

一葉輕舟一破裘飄然江海送悠悠閑知睡味甜如蜜老覺羈懷淡似秋失侶雲間孤雁下耐寒波面兩

鳧浮年逾八十真當去似為雲山尚小留
風雲晝晦夜遂大雪

大風從北來洶洶十萬軍艸木盡偃仆道路暝不分山澤氣上騰天受之為雲山雲如馬牛水雲如魚鼈

朝聞駢白日莫重壓厚坤高城岌欲動我屋何足掀兒怖牀下伏婢恐堅閉門老翁兩耳聾無地著戚欣夜艾不知雪但覺手足戰布衾冷似鐵燒糠作微温豈不思一飲流塵暗空樽已矣可奈何凍死向孤村

大雪
海天黯黯萬重雲欲到前村路不分烈風吹雪深一丈大布縫衫重七斤

雪夜
病臥湖邊五畝園雪風一夜圻蘆藩燎爐薪炭衣篝暖圍坐兒孫笑語温菜乞鄰家作菹美酒賒近市帶

醉渾平居自是無來客明日衝泥誰叩門
雪霽

米盡囊空莫問渠天公自解養迂疎雪泥堯路斷來客朝日滿窗宜讀書漸暖橫林聞語鳥乍晴幽圃富

嘉蔬東家小蹇那須借早晚吾兒送鹿車 子坦欲作一小轎子來

雪後
兩解平簷雪風收際海雲根蘇萱出土冰斷水生紋遊舫家家葺行歌巷巷聞太平元有象端為謝東君

夜寒與客燒乾柴取暖戲作

檜竹乾薪隔歲求正虞雪夜客相投如傾瀝瀝蒲萄酒似擁重重貂鼠裘一睡策勳殊可喜千金論價恐

難酬他時鐵馬榆關外憶此猶當笑不休
排悶

殘雪融成雨寒燈結作花睡稀聽鼠坐久送棲鴉
食似開僧鉢居如寓店家餘年不須問卽此是生涯
席上有舉呂居仁詩者因次其韻示坐客

是身如鼠穴太倉七十始辦求深藏扶衰復拜求舊
詔入對講殿瞻顛昂期年蒙恩許謝病家居更辱鄉
黨敬今夕不醉無庸歸此老餘年君所知

予使江西時以詩投政府丐湖湘一麾會召還
不果偶讀舊稿有感

文字塵埃我自知向來諸老誤相期揮毫當得江山
助不到蕭湘豈有詩

柳橋

村路初晴雪作泥經旬不到小橋西出門頓覺春來
早柳染輕黃已蘸溪

鷗

海上輕鷗何處尋煙波萬里信浮沉今朝忽向船頭
見消盡平生得喪心

鷺

雪霽春回亦樂哉棋軒正對小灘開翩翩飛鷺真吾
友肯爲幽人一再來

感物

日落烏將數子歸風和雉挾兩雌飛不如村舍安孤
寂父子飄然兩褐衣子齋居已久又諸子皆出仕獨與子通相

對如世人

甲子歲莫

世間巧拙亦何施萬事難禁歲月移遲死幾時天有
意要令自悟不須師

出遊至僧舍及逆旅戲贈絕句

山僧邂逅卽情親野叟留連語更真淡淡論交端有
味一彈指頃百年身

又

飯炊適熟如延客犬喜來迎似到家雨滴茅簷艸煙
溼不妨笑語暫諳諳

歲莫出遊

殘曆消磨無半紙一年光景又成非瓦溝雪水滴欲
盡江路梅花開尚稀竹院篝燈留度宿旗亭誇酒勸
無歸此身自笑知何似萬里遼天一鶴飛

出遊所至皆欣然相迎口占示之

寓館兼山澤行裝半雨晴隨宜分藥物投老惜人情
邂逅成新識慇懃講舊盟農家尤可念迎勞較春耕
題旅舍壁

題旅舍壁

老子殘年未易量出門隨處得徜徉窗櫺日淡僧房
暖竈突煙青旅甌香濁酒可求敲野店舊題猶在拂
額牆閑來又取丹經讀夜就松明解布囊

野人舍小飲

梅市波光遠柯橋柳色新百年情分熟數酌笑言親
沙上人爭渡街頭婦賣薪聚聚隔林鼓歲莫賽江神

自近村歸

雪晴村路尚殘泥茅屋清寒正要低野渡船虛飛鳥
集煙村路近蹇驢嘶堅頑那復愁空曩老健猶能伴
架犁蹴榻不僵君會否更須百瓮享黃齋

夢華山

古松偃蹇谷谿斜太華峯前野老家久客未歸丹竈
冷碧桃八十一番花

歲莫與鄰曲飲酒用前輩獨酌韻

出會稽南門九里有聚落雖非衣冠區農圃可共酌
野實雜甘酸艸具無厚薄小童能擊筑一笑相與樂

徒手出叢花空中取丸藥主禮雖可笑衆客亦起酢
聊持綴宿好未用嘲淡泊窮達則不同亦踐真率約
予年過八十故物但城郭避御名從省文作詩記清歡
未媿華表鶴

山中飲酒

百屋堆金錢萬戶封公侯富貴人所羨熟計終繆悠

有酒君但飲有山君但遊雖云亦夢事要是勝一籌
獨醉新豐市遺魂招馬周清獻蘇門山曠度交公休
爛爛目如電凜凜氣愈道騎鯨歸東海已矣吾何求

客亭

荻浦煙汀泣海涯一枝柔艣語啞啞久從野老非生
客慣寓僧廬勝在家乘興村村俱有酒逢春處處可
尋花朝來雪霽梅初動又向郵亭閱歲華

除夜

野水楓林屋數椽寒爐無火坐無氈殘燈耿耿愁孤
影小雪霏霏送舊年椒酒辟瘟傾盞盞藍袍伴鬼舞
跼蹐從今供養惟春薺莫羨愚公日萬錢

劍南詩稿目錄

卷第六十一

乙丑元日 元日讀易 自開歲陰雨連日未
止 枯菊二首 村舍雜興五首 夜興 示

鄰曲 夢中作 春雨 艸堂 道室 旅次
有贈 雜感五首以不愛入州府為韻 自詠

絕句八首 風月吟 年光 龜堂 春晴
閉門二首 有所感 八十一吟 高吟 湖

上作 賞花 園廬 乍晴行西村 書數
新製小冠二首 書逆旅壁 倚樓二首 小

雨 書數 遷雞柵歌 春興 小園 二月
晦日夜夢欲卜居近邑道遇老父告以不利欣

然從之 新晴 病中作 示子適 窮居
春晚自近村歸 開孫滿月 小築 春晚數

鷓鴣 舍東四詠 示元敏 莫春四首
書感 晨起出南堂 春晚小飲 殘春二首

聞山步有虎 久雨初霽 初夏幽居雜賦
七首 雨 自閔 蔬食 讀阮籍傳 杜宇

行 捕虎行 遣興 三齒墮歌 龜堂初暑
衰歎 初夏閒步村落間 夜興

劍南詩稿卷第六十一

宋陸游務觀

乙丑元日

好在屠蘇酒扶衰把一卮家貧為壽略曆閏換年遲
薦廟須扶拜題門強綴詩惟思買春困熱睡過花時
俗有賣春困者子老憊思睡故欲買之

元日讀易

伏羲三十餘萬歲傳者太山一毫芒春秋雖自魯麟
絕禮樂蓋先秦火亡孟軻財能道封建孔子已不言
鴻荒於虛易學幸未泯安得名山處處藏

自開歲陰雨連日未止

江雲漠漠雨昏昏歸老山陰學灌園十里羊腸僅通
路三家鐮腳自成村應時罇餽聊從俗耐久鍾馗儼
在門近縣傳聞頗多盜呼兒插棘補頽垣 俗有年罇
之語子貧甚今歲遂不能易鍾馗

枯菊

翠羽金錢夢已闌空餘殘藥抱枝乾紛紛輕薄隨流
水黃與姚花一樣看

又

積雪嚴霜轉眼空春回無處不春風欲知造物無窮
妙但看萱根與葍叢

村舍雜興

冉冉年華速昏昏睡思濃廢書心自愧謝病客能容
雨急鐘微度溪湍確自春可憐燈下影隨處伴衰慵

又

堅臥非由病端居不是齋世情元自薄人事固多乖
晨飯炊糗米宵行點豆蕪昔人言可用第一忌安排
徐仲車有請問于安定先生先生曰莫安排

又

白首返吾鄉功名罷激昂掃除魔眷屬疋髮病膏肓

老圃勤供菜蠻童解炷香黃昏那用問且喜日舒長

又

粥罷重投枕 晨起踣後再睡最佳 燈殘起讀書閉門常
自得作計更誰如箭茁白於玉樓花長比魚盤殮有
此味勿怪食無餘

又

遊宦風波惡還家日月長厭煩思病忘避俗欲陽狂
絕意功名會收身翰墨場著書吾豈敢尚可述農桑

夜興

窮巷行人絕高城漏鼓稀劇談頻翦燭久坐旋更衣
飢鼠衝人過啼鴉冒夜飛客歸吾未睡孤影自相依

示鄰曲

北陌東阡好弟兄老年幸復主齊盟同嘗春韭秋菘
味共聽朝猿夜鶴聲百世不忘耕稼業一壺時敘里
閭情諸孫識字吾真足安用鵬搏九萬程

夢中作

華山數水本閑人一念無端墮世塵八十餘年多少
事藥爐丹竈尚如新

春雨

倚闌正爾受斜陽細雨霏霏渡野塘本為柳枝留淺
色却教梅藥洗幽香小露蝶粉初何惜暫澀鶯聲亦
未妨造物無心寧徧物憑誰閑與問東皇

艸堂

幸有湖邊舊艸堂敢煩地主築林塘辛幼安每欲築舍
予辭之遂止 漉殘醅瓮葛巾漉插遍野梅紗帽香風緊
春寒那可敵身閑晝漏不勝長浩歌陌上君無怪世
譜推原自楚狂 陸氏舊譜云本出接輿後

道室

暮遇風山第六爻備然盡謝俗間交謀生舊買雲三
頃託宿新分鶴半巢露下丹芽生藥壠月明金粉落
松梢眉間喜動君知否借得丹經手自抄

旅次有贈

黃鶴樓前逢劍客青衣江口見詩人天涯莫起漂零感物外終為自在身賣馬求船雖少日阻風中酒動兼旬中原早晚胡塵靜緜月嵩雲要卜鄰

雜感五首以不愛入州府為韻

莘渭二老人耕釣俱白首功烈在人間如天有北斗方其未遇時自處固不苟夫豈邀虛名欲眩千載後降及秦漢王望古猶培塿猶能守所聞外物不得誘君看魯二生亦豈聖人偶凜然諸儒間人可我獨不

又

山樓天與癖酒復甚所愛雖云慚黃綺亦慕稽阮輩失腳落人間二事略皆廢晚歸臥雲壑謂此在券內如何疾屢作大與初意背好山雖在眼動步輒有礙酒戒復堅持如隄憂蟻潰何以遺餘年閉戶淡煮菜

又

鸞鳩槍榆枋枯魚過河泣鵬鯤九萬里此豈汝所及丈夫志古人絕世而獨立遠遊馬蹏穿高臥劍鋒灑其初所抱負固自高業岌安能與兒曹俛首就維繫君看折腰趨孰若舉手揖芝老尚可餐修門戒輕入

又

洛水初平時艸木充九州禽獸孳育繁與人為敵讎于時聖人作日夜為民憂思有以勝之食肉而服裘然後人奠居禾黍歲有秋豈知千載後戕殺無時休一食刀机赤百味供膳羞豪侈方相誇哀哉非始謀

又

我年甫三十出身事明主狂愚斥不用晚辟征西府踏踏過錦城邂逅客嚴武十年醉鄆筒陽狂頗自許青城訪隱翁西市買幽圃如何復不遂歸聽鏡湖雨結廬三間茅泛宅一枝艸天真儻可全吾其老煙浦

自詠絕句

雙鬢蕭條失故青躬耕猶得養餘齡明時恩大無由報欲為鄉鄰講孝經

又

深村人有結繩風晚歲身為帶索翁毀粥茹蔬茅屋底誰知也過百年中

又

不淪鬼錄不登仙遊戲杯觴近百年小市跨驢寒日裏任教人作畫圖傳

又

逆旅門前撥不開先生醉策蹇驢來未言乞得囊中藥一見童顏且壓災

又

遠遊索手不賣糧薪米臨時取道傍今日晴明行亦好經旬風雨住何妨

又

一條紙被平生足半盃藜藿百味全放下元來總無事雞鳴犬吠送殘年

又

平生寧獨愛吾廬何處茅簷不可居晝闕僅奴停接客夜無膏火罷觀書

又

睡著何曾厭夜長老人少睡坐何傷無燈無火春寒惡破絮纒衾即道場

風月吟

去日如馳衰有驗萬事惟當就收斂可憐未與酒相忘風月婆娑猶不厭有時清夜行中庭幅巾藜杖影矻矻松風十里吹殘夢蘿月三更照半醒河傾雞唱吟未已爽透髮根清入齒長光底事不貸人饒鹽汲水啼鴉起

年光

無賴年光逐水流人間隨處送悠悠千帆落浦湘天晚孤笛吟風鄂縣秋小市鶯花時痛飲故宮禾黍亦閑愁久留只恐驚凡目又向西涼上酒樓

龜堂

莫笑龜堂陋生涯實有餘春寒擁重褐晨飯富藏蔬

薄技雕蟲爾虛名畫餅如兒時論語在敢負此心初

春晴

春如人易老愁與漏俱長酒著多思睡花熏直欲狂
新晴乾蝶翅微暖滑鶯吭誰見龜堂叟搭藤送夕陽

閉門

殘髮凋零不滿巾閉門聊得養天真恐傷藥艸停除
地爲惜松桂禁伐薪獨木架成新略約一峯買得小
嶼岫蕭然便覺渾無事談笑時時過近鄰

又

衰疾厭厭不易醫閉門惟與睡相宜狂曾忤物慵迎
客瘦不勝衣悔作詩數簡隱書忘世味半甌春茗過
花時寂寥終歲君無諍正是幽居一段奇

有所感

世事真成風馬牛細思愈覺此生浮舊交散後知心
少行路難來出戶愁氣節陵夷誰獨立文章衰壞正
橫流魯中狂士今安有淚盡朱雲艸滿丘

八十一吟

八十古云耄吾今不啻過山程兩芒屨水宿一漁蓑
雞唱劉琨舞牛疲甯戚歌春寒欺短褐將奈此翁何
高吟

食少支撐惟恃粥力衰舉動輒頽人誰知造物猶遺
漏擁鼻高吟又一春

湖上作

耳目聰明手足輕應酬幽事未忘情百年日向漁樵
過千里雲從几席生樽酒每招鄰父共圖書時與小
兒評但餘煙水無儔侶堪笑沙鷗欲抗衡

賞花

湖上花光何處尋朱白白自成林衰翁何預傷春
事閑客猶懷愛物心欲隨每愁風驟起正開却要日
微陰蘭亭禹廟平生事一棹芳醪莫厭深

園廬

天假殘年使荷鋤白頭父子守園廬四朝曾遇千齡

會七世相傳一束書物理從來多倚伏人情莫遣得
親疎功名自有英雄了吾輩惟當憶遂初

乍晴行西村

堤樹叢祠北煙村古埭南買魚論木盎挑薺滿荆籃
積潦經旬月晴光見二三農功殊可念保麥復祈蠶

書數

塵甌炊畚粟贏僮策蹇驢自從行卷日直至挂冠餘
揣分元知止求官實抱虛園蔬幸無恙父子日攜鋤

新製小冠

淺醉微吟獨倚闌輕雲淡月不多寒悠然顧影成清
歡新製柈欄二寸冠

又

柈欄冠子輕宜髮練布單衣爽辟塵縱不能詩亦堪
畫年餘八十水雲身

書逆旅壁

市遠過三里店孤無四鄰窄纔容一客久或任經旬
病軀求風藥樵兒餽爨薪人情愈諳熟來往不辭頻

倚樓

曲曲闌干縹緲間哦詩本欲破除閑無端又起天涯
感淡墨生綃數點山

又

樓上憑闌小立時淡煙漠漠雨絲絲年光日日有佳
處不解春寒偏入詩

小雨

小雨明復闇餘寒去又來新苔綠砌上殘杏過籬開
垂老身餘幾逢春心尚孩江天近寒食林外過輕雷

書數

無能自號癡頑老尚健人驚矍鑠翁未向松根藏病
骨尚尋花底醉春風翩翩孤影如歸鶴冉冉流年付
斷蓬曾謁高皇識隆準傷心無復一人同紹興朝士自

周丞相下世獨予尙在爾

遷雞柵歌

烏雞買來逾歲年庭中赤憤何昂然吾孫初生畏晨
唱家人共議欲汝捐為窮必塚奴豈憚雞賣將烹吾
所憐貴人賤畜雖古訓物理寧不思兩全舊棲沉亦
苦沮如新柵幸可圖完堅東園稍去房與遠挾雌將
雛從此遷竹簾朝莫有餘粒瓦缶亦自盛清泉啣啣
風雨守汝職臚臚勿恤驚吾眠

春興

暖靄催桑眼晴光長艸心沙平看臥犢密葉聽鳴禽
買酒貧為祟登山病不禁終年惟一褐捫蝨又春深

小園

蕭散遺塵事栽培得小園土鬆花意活林暖鳥言繁
發酪供晨鉢菹芹薦晚樽餘年君莫問送老向孤村

二月晦日夜夢欲卜居近邑道遇老父告以不
利欣然從之

夢中行卜居道遇白髯叟一面出苦言戒我棄勿取
人之生實難失腳墮虎口我深感其言解衣奉杯酒
豈知立談間得此直詠友起坐心茫然天闌樓挂斗

新晴

苦雨幾終月新晴喜夕陽扶行呼稚子隨意下茅堂
艸茂知聲健巢新覺燕忙興闌歸亦好袖手獨焚香

病中作

苦雨侵衰骨餘寒著弊裘病多辭社飲貧甚輟春遊
日日親蔬圃時時弄釣舟回頭語造物與子兩無求

示子適

敢恨吾生後聖賢六經雖缺尚成編本來堯舜身親
見孰謂丘軻道不傳妙理豈求逢服外淳風寧在結
繩前此身未死還堪勉更伴吾兒學數年

窮居

羸病無時已窮居只自悲巾偏非雨墊衣弊豈塵縑
米盡時炊稗樽空慣啜滴逐貧雖有賦乞食未成詩

春晚自近村歸

山陰道上柳如絲策蹇悠悠信所之曲水已過修禊

集餘寒不減試燈時貧猶自力常謀醉病不能閉日
賦詩誰道茅簷苦幽獨一鉤新月是相知

開孫滿月

夜夢奇童拜且言今乃幸得生高門夢後一日得開
孫虎兒墮地百獸奔未論頭角與眉宇但聽啼聲誰
敢侮就令長大未必奇亦作人間孔文學

小築

西郊小築臨煙汀南山秀色入窗櫺朝鐘暮鼓在何
許乃是會稽山陰之蘭亭堂中老人白鬚鬢手扶藤
杖垂九齡客來不語坐至夕往者絕物今忘形牆隅
老雞新樹柵長號催上東方星老人亦起穿兩屨巖
泉漱齒讀黃庭

春晚數

一風已快晴微雲復成雨盛麗女郎花坐看委泥土
蜂房蜜已熟科斗生兩股堂堂一年春結束聽杜宇
老夫久臥疾乃復健如許便當裹米糲爛醉作端午

鷓鴣

翩然一鷓升倏爾一鷓下非惟飽殘餘亦可免彈射
巡簷攫脯脩入舍掠膾炙嗟汝無盈厭坐是取驅嚇
物情貴能改一售亦可貴併語黃雀羣勿輕敗吾稼

舍東四詠

疎籬

數掩圍柴荆王維畫不成尤憐月中影特地起詩情

松棚

松棚尋丈地客至共開顏堪笑杜陵老坐思千萬間

盆池

寒溜初通後新荷未長時誰持大圓鏡為我照鬚眉

小徑

環遶無十步捷行財半之安西九千里自有著鞭時

示元敏

學貴身行道儒當世守經心心慕繩檢字字講聲形
吾已鬢眉白汝方矜佩青良時不可失苦語直須聽

莫春

掠面微風吹宿醒送春空有不勝情
風煙老盡王孫艸時聽桑間小婦聲

又

辛夷海棠俱作塵
蕪魚蓴菜亦嘗新一聲布穀便無說
紅藥雖開不屬春

又

市橋岸下泛湖舟
雕檻疎簾半上鈎春事幾何君惜醉
明朝赤幟插誰樓遊湖至立夏止

又

被除已過莫春初
綵舫相銜十里餘浮蠟喜嘗新店酒
流塵閑拂壞垣書

書感

楚此難招去幹魂
正令舌在向誰論中分白日歸歌枕
全付青春與杜門凜凜啞人愁履虎區
區染指畏嘗鼉殘年誓報嗟何有虛負
明時養老恩

晨起出南堂

曉枕華胥誰喚回
下堂拽杖一悠哉啼鴉已逐晨光起
飛鷺初衝宿靄來石路少行生蔓艸柴
扉多閉長莓苔身閑亦未全無事檢
校幽花幾樹開

春晚小飲

病臥虛齋一味慵
今年春事又成空籜龍奮迅風雷際
木筆凋零霧雨中平野艸深黃犢健
斷溪水長晝船通小兒偶得官樓酒
釀醞醕乾一醉同

殘春

江鶯堆盤粒粒香
山家節物亦窮忙桑間甚紫蠶齊老
水面秧青麥半黃語燕似催春事去
遊絲不似客愁長鄉村年少那知此
處處喧呼蹴鞠場

又

過了清明日愈遲
年華不復在辛夷誰知綠葉陰成處
正是青天露坐時茂艸滿庭喧鼓吹
嫩湯出鼎試槍旗衰翁敢作明年計
剩與東君惜語離

聞山步有虎

茆屋穿漏雨送春
村路斷絕虎啞人采桑鋤麥皆結伴
兒童出門翁媪噴

久雨初霽

兩月泱泱雨不休
今年春盡尚重裘水深艸茂羣鼉怒
日出風和宿麥秋陂壞隄防誰與築
市遙鹽酪絕難求農家辛苦尋常事
賣劍方當更買牛

初夏幽居雜賦

雨霽逢初夏
胡牀蔭綠槐半酣方寤我假寐忽
哈臺小穗閑簪麥微酸細嚼梅衰翁
不禁老更著物華催

又

過盡一春兩園林
氣少和偶然扶柳栗復爾坐盤陀小
艸數行字殘花一曲歌公卿非傲汝
無奈愛閑何

又

水際閑將鶴林間
獨擁琴披叢采香艸映樹看珍禽正
使居無屋猶勝突不黔過春差覺健
處處得幽尋

又

籬落魚池北
房櫳道院東水紋藤坐榻山字素
屏風采藥松岡近投竿荻浦通悠然
搔短髮心事寄冥鴻

又

曲曲羊腸徑疎疎
鹿眼籬渴蜂窺硯水狂蝶入書帷一
枕輕安夢數聯蕭散詩餘生已過足
不必到期頤

又

闢地翦蓬蒿
何曾數作勞藥名尋本艸蘭族驗離
騷北澗穿籬過南山出屋高回頭看
富貴何啻一秋毫

又

修名寧復冀
餘日苦無多已歎堂堂去將如寂寂何
編籬護香艸埋盎貯清波兒戲君無
笑相從且浩歌
家近蓬萊白玉京
艸堂登望不勝清初驚野色昏昏至
已見波紋細細生殘醉頓消迎亂點
微吟漸苦入寒聲只愁今夕虛簷滴
又對清燈夢不成

自閑

主人元是客儒士却成僧垂老貧如昔經春醉未會
褰衣身偃僂顧影髮鬢髻忽憶東岡路捫蘿試一登
蔬食

牆陰春薺老筍蕨正登盤野饑元無婦村醅不屬官
何由取熊掌幸免買豬肝猶勝煩秦相緝袍閱一寒

讀阮籍傳

天生父子立君臣萬世寧容亂大倫籍輩可誅無復
議禮非為我為何人

杜宇行

去年杜宇號阡陌家家聚首憂蠶麥豈惟比屋衣食
憂縣家亦負催科責今年略不聞杜宇蠶收麥熟人
歌舞豈惟襦新湯餅寬隣里相約先輸官

捕虎行

自故歲有三虎出上皋天衣山谷近者尤為人害捕
之未獲

山村牧童遭虎噬血肉俱盡餘雙髻家人行哭覓遺
骨道路聞之俱掩涕州家督尉宿山中已淬藥箭攢
長弓明朝得虎徹檻筭縲絲擣麩歌年豐

遣興

前歲我冠領石渠即今山市醉騎驢目衰書卷研求
懶心弱詩章鍛鍊疎風雨吾盧嗟獨破齋鹽每食歎
無餘燈前却有欣然處稚子談經屢起予

三齒墮歌

一葉落知天下秋三齒墮矣吾生休詩人未脫紈袴
態尚樂華屋悲山丘蓼花菰葉可以解我憂鷓鴣白
鷺可以從我遊君看貂蟬與兜鍪等為岑岑壓我頭
豈知石闌千下買箬笠一棹飄然煙雨舟不須強預
家國憂亦莫妄陳帷幄籌功名富貴兩悠悠惟有杜
宇可與謀

龜堂初暑

淪漪一曲遶茅堂葛帳紗巾喜日長多事林鳩管晴
雨依人海燕度炎涼深枝著子纍纍熟幽艸開花冉

再香安得此時江海上與君袖手看人忙

衰歎

十年三墮齒久矣歎吾衰塵塵循天理兢兢到死時
窮空顏子巷勤苦董生帷道遠餘生趣常憂日影移

初夏閑步村落間

薄雲韜日不成晴野水通池漸欲平綠葉忽低知鳥
立青萍微動覺魚行醉遊放蕩初何適睡起逍遙未
易名忽遇湖邊隱君子相攜一笑慰餘生

夜興

鬢毛飽受雪霜侵一褐蕭條寄故林簷雨滴回羈枕
夢城笳喚起塞垣心平生恥露囊中穎垂老甘同蠶
下琴燈燼欲殘看瘦影不妨袖手坐愔愔

劍南詩稿卷第六十一終

劍南詩稿目錄
卷第六十二

寄十二姪 出塞四首借用秦少游韻 命駕
遊山遇雨 東籬雜題五首 書事二首

乙丑重五二首 夏夜枕上 石帆夏日二首
仲夏風雨不已 幽居 齒落 雨中排悶

逆境 夜興 寄題李季章侍郎石林堂
流年 雨中鋤藥 自嘲 世事 悲齒落自

解 送十五郎適臨安 幽居夏日二首 大
雨 思雲門 夏夜 觀身 養氣 日用

村市醉歸 夏日感舊四首 雨後 東軒
寄子虞子適 寄張季長 夏夜二首 讀趙

昌甫詩卷 海氣 村居 戒殺 庭中夜賦
秋近 歎老 殘暑得小雨頗涼 乙丑夏

秋之交小舟早夜往來湖中戲成絕句十二首
初秋四首 秋陰出遊 杜宇 養生 初秋夜

賦二首 殘年 記夢 村飲 老鰥 對食作
七月十九日大風雨雷電 湖上 欲雨

秋懷四首 食新 予初仕為寧德縣主簿而
朱孝聞景參作尉情好甚篤後十餘年景參下

世今又幾四十年忽夢見之若平生覺而感歎
不已 讀書 諭鄰人三首 示小廝二首

劍南詩稿卷第六十二

宋陸游務觀

寄十二姪

庚寅吾入蜀西過齊安城雪堂拜老仙眉宇寒崢嶸
微泉尚如昔激激琴筑聲龍蛇入筆力斷石臥縱橫
戊戌奉詔追觸熱萬里程歸途抵齊安歲月浩可驚
三日乃東下鼓角遙送迎安國有老僧元祐初載生
禪聯說舊事耳目猶聰明徒行就瓶別耿耿惻愴情
豈知二紀後汝乃為此行追懷昔遊地未語涕已傾
念汝雖竝塞殘虜方守盟職雖在警盜袍鼓寂不鳴
惟當奉法令日夜撫孤惻悍官卑俸入薄切勿厭藜藿
勇如赤壁戰節若江水清人誰不汝知沈事賢公卿
三山與七家相望兩柴荆歸來講學暇襪襪同春畊
出塞四首借用秦少游韻

北伐下遼碣西征取伊涼壯士凱歌歸豈復賦國殤
連頸俘女真貸死遺牧羊犬豕何足讎汝自承餘殃

又

煌煌藝祖業土宇盡九州當時王會圖豈數汝黃頭
所謂黃頭女真今茲縛纛下狀若鰲鯨牛萬里獻太社
裨將皆通侯

又

符離既班師北討意頗闌志士雖有懷開說常苦艱
諸將初北首易水秋風寒黃旗馳捷奏雪夜奪榆關

又

小醜盜中原異事古未有爾來閭左起似是天假手
頭顱滿沙場餘截飼豬狗天網本不疎貸汝亦已久

命駕

命駕清晨出射堂筇枝羽扇受微涼鴟將數子窺苦
井桐引新枝出粉牆岸幘影邊茶正熟投壺聲裏日
初長興闌却蹋湖隄去十里山花滿袖香

遊山遇雨

千秋觀前雨溼衣石帆山下叩漁扉鷓鴣苦道行不
得杜鵑更勸不如歸

東籬雜題

終日在東籬清和適此時鬢聲如妬夢花氣欲撩詩
愛客茶新碾留僧飯別炊流年隨手過不覺近期頤

又

深居遠悔吝簡事養精神曳杖一蕭散待茶時欠伸
風生叢竹嘯露坻野花新自作東籬後經旬不過鄰

又

昨日一花坼今朝一艸生深林鳩婦聒高棟燕巢成
熟果檐間墮殘書枕畔橫菴居澹無事作意領新晴

又

南陌歸雖久東籬興又新無求覺身貴好儉失家貧
引水常終日栽花又過春桃源不須覓已是葛天民

又

溝聲流激激籬影立疎疎平日來燒藥臨昏尚看魚
比鄰怪疎索風月伴躊躇安得王摩詰憑渠畫草廬

書事

本來只道千鈞重看破元無一羽輕日月光明天廣
大不妨歡傲過平生

又

燕雛學母飛初熟梅子團枝亦半黃塵尾唾壺俱屏
去尚存餘習炷爐香

乙丑重五

盤中共解青菰粽衰甚猶簪艾一枝寂莫廢詩仍止
酒今年真負此佳時

又

飛棹中流救屈平俚歌寧復楚遺聲危冠更在門楣
上但覺蕭蕭數與艾柴

夏夜枕上

臥聽殘更下麗譙雖非遙夜亦迢迢正令展轉無安

枕猶勝龍鍾趁早朝

石帆夏日

石帆山下雨冥冥閑岸紗巾憩草亭單履簪衣時脫
著甜酸園果半黃青鯉魚無隊依蒲藻病鶴長鳴鍛
翅翎自笑若為消永日異書新錄相牛經

又

短棹飄然信所之茶園漁市到無時風從蘋末蕭蕭
起月過花陰故故遲蓴菜羹吳舊俗竹枝度曲楚
遺辭頗聞項里楊梅熟鄰曲相招莫後期

仲夏風雨不已

南陌東阡自在身一年節物幾番新鱗魚出後鶯花
鬧梅子熟時風雨頻冠蓋敢同修禊客桑麻不減避
秦人夕陽更有蕭然處照影清溪整葛巾

幽居

旌節庭下葵鼓吹池中蛙坐令灌園公忽作富貴家
浮生均一闕事過但興嗟蚩蚩彼何人欲摘空中花
牆隔蔬可挽巷口酒可賒疎懶遂吾性不賣東陵瓜
齒落

昔聞少陵翁皓首惜墮齒退之更可憐至謂豁可恥
放翁獨不然頑頓世無比齒搖忽脫去取視乃大喜
譬如大木拔豈有再安理咀嚼浩無妨更覺菟肩美
雨中排悶

殷殷雷繞村浙浙雨鳴砌禽魚各自適草木亦得意
顧此菴中人老病獨顛顛飯遲每懶索兀兀方坐睡
平生飽憂患性命已屢試但得過今朝明日可徐議
逆境

步步常由逆境行極知造物欲其成磨礪久已盡芒
角烹煑豈容重發生死到面前猶覺小事於身外孰
非輕出門不必名山去但見風煙已眼明

夜興

脫冠殘髮冷颼颼北斗闌干河漢秋木末有風栖鶻
起亭臯無月亂螢流酒慳僅得時時醉詩退難禁夜

夜愁欲睡不妨還小立一聲菱唱起滄洲

寄題李季章侍郎石林堂

林慮靈壁名宇宙震澤春陵稍居後翟公黃鶴得數
峯對客掀髯詫奇秀我行新難見益奇千巖萬竇雷
兩垂古來豈無好事者根株盤踞不可移侍郎築堂
聚衆石坐臥對之盱忘食千金博取直易爾要是尤
物歸精識君不見牛奇章與李衛公一生冰炭不相
容門前冠蓋各分黨惟有愛石心則同崎嶇宦路多
危機凜然石支人間稀它時櫟梓華亭岸更看全窠
買鶴歸

流年

冉冉流年迫耄期心情漸減舊兒嬉唾壺塵尾已從
省茶竈筆床猶自隨昨日客招東浦釣今朝僧約北
軒棋敢將輕健誇鄰里一笑元知要及時

雨中鋤藥

庭中正苦日卓午水面忽看雲過西老子不辭衝急
雨小鋤香帶藥畦泥
自嘲

壯歲耽書廢夜眠窗明猶在短檠前如今自笑摧頽
甚臥看兒曹理斷編

世事

世事如今盡伏輪面能乾唾況其餘詩才退後愁強
韻眼力衰來怯細書歛迹已思焚筆硯作勞敢避把
犁鉏晴空萬里寬多少一片閑雲足卷舒

悲齒落自解

年運而往君自寬此生畢竟有衰殘語訛嚼廢尋常
事只作兒童礪齒看
送十五郎適臨安

求祿亦常事出門寧自由苦留雖惜別細話却生愁
兩急投村市鐘殘過寺樓祗應今夕夢先汝到江頭

幽居夏日

茅舍參差煙靄中超然高興與誰同形骸已與流年

老詩句猶爭造物功子母瓜新間莫組公孫竹長映
簾櫳日長愈覺閑無事隱具成書又一通

又

內史蘭亭晚上鄰永和風月凜如新功名不入閑人
夢詩酒猶關老子身簷淺時時聞賈籜池清一一見
潛鱗正令未逐飛仙去要是巢居太古民

大雨

北窗欲化莊生蝶睡思濛濛栖倦睫川雲忽帶急雨
來萬點縱橫打荷葉坐收爽氣入詩律更借涼颼吹
醉頰壞簷腐瓦凜欲墮積潦中庭深可涉兒愁漏溼
廢夜課婦畏泥塗停早盥老翁自笑獨爾頑更喜煙
波搖短檝

思雲門

一身膏脂略瘦盡萬卷簡編如隔生祇欲移家若耶
去亂雲深處聽難聲

夏夜

散髮荒池上秋聲滿綠蒲燐飛乘月暗梟語似人呼
學問無新得功名負壯圖拾薪炊麥飯隨事且枝梧

觀身

欲去浮華累先觀老病身濁醪何負汝淡飯最宜人
意氣隨年往工夫媿日新祇將閑送老虛作太平民

養氣

學道先養氣吾聞二任章屏除金鼎藥糠粃玉函方
凜凜春冰履兢兢拱壁藏高談忘志力守此病最膏肓

日用

日用無淵奧其中妙理存但能明物性不必學玄門
盡力扶元氣精思去病根昔人由此道推己及元元

村市醉歸

伏櫪元知免駭機翦翎豈復慕羣飛坐中客滿知心
少囊裏詩多得意稀小市雨餘尋酒去野橋日落策
驢歸不辭十里行空翠終勝京塵化客衣

夏日感舊

北窗枕簟臥陶翁樹樹鳴蟬葉葉風睡覺殘書棲賴
架浴回細葛覆薰籠一藤未遂名山去半卷還驚舊
歷空妄想金丹若莫笑清班曾是長仙蓬

又

五待仙祠兩挂冠此生略有半生閑嘯歌雨笠煙蓑
底來往山村縣郭間一粒何嘗換凡骨數盃且復駐
顏顏胡塵掃盡知何日不隱箕山即華山子任宦屢歷
官祠崇道玉局武夷佐神太平凡五任

又

吳人那慣粟漿酸茶盃聊露舌本乾身病不堪閑客
攬日長惟憶異書看流年冉冉誰能駐長夏迢迢亦
已殘步有新愁君賀我西風先夢上嚴灘近修小舟乾
事村鄰多來賀

又

獨居無復客嘲邊終日頽然飽即眠護硯小屏山縹
緗搖風團扇月嬋娟桐陰忽見翻雙鷓石罅時聞落
細泉避暑不須河朔飲轉頭即見早秋天

雨後

甘樹慰羣望浮雲還故墟新涼生枕簟餘潤入犁鋤
簾上翩翩鷺蒲新鱖鱖魚素秋猶半月團扇意先疎

東軒

榴花零落滿蒼苔簷蔔忘憂亦已開湖海片帆先已
具少安無躁待秋來

寄子虞子適

大兒再度吳門秋小兒錢塘逾月留恨身不能插兩
翅與汝相守寬百憂聞鐘時宿雲外寺待月亦上湖
邊樓但常保此豈不樂路難悠悠非善謀

寄張季長

髮不勝簪短褐寬每因臨鏡數衰殘未嘗三日不服
藥雖滿百年終闔棺舊友豈知常阻關一尊那得敘
悲歡錦官花重應如昔直欲凌風借羽翰

夏夜

鳴蜩斷復續宿鳥久始安觸熱汗沾衣莫夜猶未乾
梧桐獨知秋一葉墮并闌行矣戒礎杵四序環無端

又

落月不滿窗驚鵲屢移樹沉憂少睡眠亦以衰疾故
五更忽作夢立馬青衣渡白首厭山村郵亭憶征步

讀趙昌甫詩卷

蝸廬海暑不可過把卷一讀趙子詩如遊麻源第三
谷忽見梅花開一枝寄書問訊不可得握臂晤語應
無期惟當飲水絕火食海山忽有相逢時

海氣

浴罷來水滸適有漁舟橫浩然縱棹去漫漫菰蒲聲
海浸乃爾奇萬象空際生驂驪牧龍馬天矯騰蛟鯨
或如舉大旗或如執長兵我欲記其變忽已天字清
成壞須臾間使我歎且驚世事正如此何者非強名

村居

舍後盤高岡舍前面平野防盜枳作藩蔽雨篠代瓦
村人以篠覆屋如茅 數家相依倚百事容乞假薄莫耕
樵歸共話衡門下

戒殺

郊居去市遠豬羊稀入饌既畜雞鶩羣復利魚蟹賤
暴殄非所安擊鮮况親見那得屠殺業為客美穀膳
餘年尚有幾過日如露電豈無園中蔬敬奉君子宴

庭中夜賦

流汗沾衣不自支庭中散髮立多時烏烏畫角凌風
起淡淡銀河拂地垂浮玉閑遊元自樂浣花小築亦
何疑東歸萬里君知否要了滄洲一段奇

秋近

石榴萱草併成空又見牆陰草葉紅茶釀頗妨千里
夢簟涼初怯五更風新瓜落刃冰盤裏晚燕添巢畫
閣中身健流年俱可樂故人自欠一尊同

歎老

齒墮因廢談髮短不入把餘年似殘尊欲盡不禁瀉

出門見鄉曲每恨識面寡往昔同戲兒曩曩塚盈野
殘暑得小雨頗涼

午暑不可觸忽驚如許涼軒窗雲作暝草木雨生香
蒲葉先秋翼蟬聲入夜長自欣無一事岸幘倚胡床

又

乙丑夏秋之交小舟早夜往來湖中戲成絕句
橫林渺渺夜生煙野水茫茫遠拍天菱唱一聲驚夢
斷始知身在釣魚船

又

河漢橫斜斗柄低啼鴉掠水未成栖怪生凄爽侵肌
骨船繫秦皇酒食西

又

誰門鼓角寺樓鐘一一風傳到短篷喚得放翁殘酒
醒錦囊詩草不教空

又

小市易散無人行茫茫湖橋惟月明老夫解醒不用
酒自有千頃菰蒲聲

又

雞頭纍纍如大珠紅草綠荷風味殊天與楊梅成一
絕吾鄉獨有異鄉無

又

城南天鏡三百里綠以重重翡翠屏最好長橋明月
夜寄船策蹇上蘭亭

又

酒旆搖搖出竹籬扁舟遠赴野人期一天風雨晚來
惡落盡白蓮渾不知

又

七月湖中風露新臨流閑照白綸巾荷花折盡渾閑
事老却尊絲最惱人

又

恰聽殘蟬禹寺門又看新月石帆村後來復有龜堂
老千載猶應此意存

又

娥江道上欲三更垣屋參差閉月明倚柂賦詩無傑
思斷腸分付棹歌聲

又
秋來湖闌渺無津旋結漁舟作四鄰滿眼是詩渠不
領可憐虛作水雲身

又
夢筆橋東夜繫船殘燈耿耿不成眠千年未息靈胥
怒卷地潮聲到枕邊

初秋
生世元浮脆人言七十稀耄期今已及氣力固應微
食冷常憂過追涼每念歸入秋纔幾日卷簾換縑衣

又
藉草沾衣露沿溪掠面風桐凋無茂綠蓮老有疎紅
小約款危度鄰園曲折通新秋得強健一笑莫匆匆

又
初夜月猶淡入秋風已清螢孤無遠照蟬斷有遺聲
命薄慚勛業才疎負聖明青鞵若耶路亦足慰平生

又
兀兀終年醉空空四壁窮那知雙雪鬢又度幾秋風
高枕三峯老深衣獨樂翁騎驢向何許指筌有蠻童

秋陰出遊
遮日雲生忽復收黃鸝鳴喚伴林鳩也知雨意逢秋
作未害山翁竟日遊陌上驛亭雙隻埃煙中漁釣兩
三舟歸遲不是尋詩料秣蹇民家偶小留

杜宇
杜宇雖微禽用意舉世稀念昔春盛時天地皆芳菲

杜宇
杜宇默無聲不畏百鳥譏東君將促駕乃獨號鳴悲
日夜不肯休流血沾其衣念言身尚存乃使春獨歸

飲啄雖如昔此身當疇依月明抱樹枝敢忘此獻秋
雖無精衛勞區區亦庶幾寄言天壤間勿謂斯禽微

養生
衰病猶弱國地與齊楚隣朝憂羽書來莫畏戎車塵

奔命不敢辭所懼殘吾民羸老正類此日夜憂其身
起居飲食間恐懼自貴珍一念少放逸禍敗生逡巡
所以古達者訓戒常諄諄不死正爾得成真非有神
初秋夜賦

又
北斗垂欲盡明河淡不流低回半枕夢蕭瑟一窗秋
老益尊儒術閑仍為國憂孰云生死大却已付悠悠

又
炎燭猶未伏清絕忽新秋露氣房櫳冷砧聲歲月遺
悲蛩草根語孤燐竹間流聞道河南北飛蝗暗百州

殘年
殘年垂八十高臥豈逃名泥巷多牛迹茅簷有確聲
炊菰觴父老煮棗哺雛嬰遺戍雖傳說何時復兩京

記夢
環立江頭千萬峯夢中於此倚枯筇青冥誰見歌巾
角碧瀼閑將洗筆鋒一卷素書雲笈貯數升松麩水
機春正呼鶴駕凌風去驚覺西山煙外鐘

村飲
白稻登場喜食新太倉月廩厭陳陳叢祠懷肉有歸
遺官道橫眠多醉人小市孤村真送老浩歌起舞最
關身鹽醃乞貸尋常事惱亂比隣莫媿頻

老鰥
水際山前有老鰥終年無事亦非閑淵源師友簡編
上土木形骸魚鳥間零落斷雲依釣瀨連消新月照
柴關葵羹稗飯悠然過一飽元非造物慳

對食作
賤士窮愁殆萬端幸隨所遇即能安乞漿得酒豈嫌
薄賣馬傲船常覺寬少壯已辜三釜養飄零敢道一
袍單飯餘捫腹吾真足首藉何妨日滿槃

七月十九日大風兩雷電
雷車動地電火明急雨遂作盆盎傾強弩夾射馬陵
道屋瓦大震昆陽城豈獨魚蝦空際落真成蓋履舍
中行明朝雨止尋幽夢尚聽飛濤濺瀑聲

劍南詩稿 卷之六十二

湖上

三伏無多暑漸微登臨清曉試縑衣風高病木初凋
葉潦退流萍尚半扉白首重來空感昔清尊相屬欲
忘歸猶憐不負湖山處好在平生舊釣磯

欲雨

正苦中天赫日流房櫳忽復變颼颼雲生江浦初成
暝葉下亭臯刺作秋移穴族行憐垤蟻爭巢婦去數
林鳩人間寒暑何窮已礎杵行聞治褐裘

秋懷

少年萬里度關河老遇秋風感慨多草聖詩情元未
減若無明鏡奈君何

又

園丁傍架摘黃瓜村女沿籬采碧花城市尚餘三伏
熱秋光先到野人家

又

迢迢枕上望明河帳薄簾疎奈冷何不惜衣篝重換
火却緣微潤得香多

又

詩如水淡功差進身似雲孤累轉輕落葉擁籬門巷
晚一枝藤杖且閑行

食新

龍鍾好在夢中身剩喜今年又食新不用更煩人祝
餼輪困瓜瓠是常珍

予初仕為寧德縣主簿而朱孝聞景參作尉情

好甚篤後十餘年景參下世今又幾四十年忽
夢見之若平生覺而感歎不已

白鶴峯前試吏時尉曹詩酒樂新知傷心忽入西窗
夢同在埔村折荔支埔音通

讀書

憶昔年少時把卷惟引睡情遊過日月自咎輒涕泗
老來百事廢却覺書多味豈惟時有得聖域可坐致
譬如入武庫慷慨不暇視淺陋安能名出門但驚喟

天球及河圖千古所共祕幸今發其藏雖老敢自棄
論鄰人

鄰曲有米當共春何至一日不相容為善何嘗分士
農堯民皆當變時雍

又

相攻本出忿與疑能不終訟固已奇訟端可窒君試
思歲時鄰里相諧嬉

又

世通婚姻對門扉禍福飢飽常相依忿爭得直義愈
非不如一醉懷牒歸

示小廝

偷閑打睡汝何尤罵詈榜笞我所羞但指一鞭隨小
蹇不妨村路共閑遊

又

晨興略整案頭書十日庭中始掃除未免丁寧惟一
事臨池莫釣放生魚

劍南詩稿卷第六十二終

劍南詩稿目錄
卷第六十三

秋雨 江村二首 山行 天王寺迪上人房

五十年前友人王仲信同題名尚在 東窗偶

書二首 乙丑七月二十九日夜分夢一士友

風度甚高一見如宿昔出詩文數紙語皆簡淡

可愛讀未終而覺作長句記之 示子適 小

雨 舟中作二首 漁父二首 讀書示子適

秋夕 醉中錄近詩因題卷後 貧甚戲作

絕句八首 自傲二首 雨後極涼 醉題

秋感 鼠敗書 秋望 秋夕 出遊 病中

戲詠 書喜 春畊 秋思絕句六首 秋興

寓歎 北窗 閒思 秋光 秋夜思南鄭

軍中 湖上 讀王摩詰詩愛其散髮晚未簪

道書行尚把之句因用為韻賦古風十首亦皆

物外事也 夢行益昌道中有賦 自規 幽

興 記前輩語 貧居即事六首 自詠 枕

上作 秋曉聞禽聲五韻 對酒二首 示鄰

里 重示 雨夜起行室中 閏月辛酉壬戌

連日風雨癸亥早晴 秋思二首 閒遊三首

對鏡 幽居書事二首 偶與客話峽中舊

遊 讀老子次前韻 作籬 寓歎 衡門感

舊 客中作 讀書示子適 老懷 沉辭

遊近村二首 小亭 記夢二首

劍南詩稿卷第六十三

宋陸游務觀

秋雨

老火阻餘威，積此一雨洗。一雨豈遽涼，涼亦自此始。陂湖菱芡熟，小市新酒美。行歌多醉人，驩意溢閭里。懸知婁豐年，絲穀賤如水。呼兒具筆牘，作詩識吾喜。

江村

江村一雨喜，塵清隱隱雷。車意未平莽，蒼郊原來莫。色颺颺，林壑起秋聲。書希簡古終難近，詩慕雄渾苦未成。白首愈悲知我少，從今一技不須名。

又

誤著儒冠不更論，白頭且喜臥江村。林深棲鳥逐更噪，埭近過舟終夜喧。病起日惟翻斷簡，愁來時亦倒清尊。自嫌未絕知聞處，尚有僧敲月下門。

山行

南出柴門即是山，青鞵踏破白雲間。旋償酒券何時足，罷諾僧碑盡日閑。三尺古琴餘爨迹，一枝禪杖帶湘斑。吾廬北望雲煙裏，又伴紛紛宿鳥還。

天王寺迪上人房五十年前友人王仲信同題名尚在

綠遶青圍古會稽，城東河上古招提。己公茅屋曾遊處，渭北山人半醉題。暫憩不妨停畫楫，幽尋還得杖青藜。舊人死盡惟殘屋，竹密雲深步步迷。

東窗偶書

東窗終日靜，惜惜消盡平生幻。安心秋氣未催羣木脫，老懷先感百蟲吟。屏風疊邃思廬阜，冠子峯高憶少林。安得吾身且強健，一藤隨處更幽尋。

又

萬事何曾有，速淹熊蹯魚腹。自難兼山川，置掌猶能取。日月無膠可得黏，稚子幸堪持几杖。老生元自慣。

齋鹽清晨臨鏡，還三數雪，領今年無處添。

乙丑七月二十九日夜分夢一士友風度甚高。

一見如宿昔，出詩文數紙，語皆簡淡可愛，讀未終而覺作長句記之。

客中得友，絕清真，蓋未傾時意。已親枕冷，不知清夜夢眼明，喜見老成人。河傾斗落，三傳漏霧散雲歸。兩幻身心亦了然，知是妄覺來，未免一酸辛。

示子適

翁老兒窮不自支，此心幸與古人期。勞兼薪水奴初去，典到琴書事可知。藥杵無聲工忍病，米困可掃取言飢。餘年有幾，須相守，萬里煙霄付異時。

小兩

赤日炎熇勢未回，川雲忽起亦佳哉。鴨衝細雨橋陰出，蝶弄微風草際來。棹柳不禁朝莫久，芙蓉猶有二三開。一年光景煩君看，何怪昆池有劫灰。

舟中作

蘧藤作帆三版，懸漁燈夜泊閭門邊。煙波四萬八千頃，造物推排作水仙。

又

山蔬藥苗滿箸香，超然下視太官羊。更憑語與劉文叔，豆醬從來味最長。

漁父

食單雖薄尚羹藜，且喜今朝酒價低。一櫂每隨潮上下，數家相望埭東西。團團箬笠偏宜雨，策策芒鞋不怕泥。應笑漆園多事在，本來無物更誰齊。

又

數十年來一短蓑，死期未到且婆娑。敲門賒酒常酣醉，舉網無魚亦浩歌。片月又生紅蓼岸，孤舟常占白鷗波。人間各自生涯別，文叔君房媿汝多。

讀書示子適 時子適方敗舉

我生無它營，半世隨宦牒。讒波方稽天，憂與愁相接。中間稍自覺，萬事付馬曹。告歸幸見聽，泊與淡相遭。

日晏突無煙垢面有爪痕讀書則未置可笑習氣存
造物哀其窮畀之大耳兒兒亦好古學乃不售有司
謂當焉瑟縮乃如鶴昂藏父子共薄飯忍飢講虞唐
豐凶有常數穠萎當自力古言不吾欺歲晚於汝食

秋夕

西山樵路隔重雲溪水微風起穀紋暑退忽驚秋漸
晚夜長已與晝中分菰蔣入饌渾家喜礎砢催寒竝
舍聞新作篝燈學僧樣與兒同策讀書勳

醉中錄近詩因題卷後

鵝兒色淺酒醺人雞距鋒圓筆絕倫滿引一盃書數
紙要知林下有閑身
貧甚戲作絕句

俸祿無餘退即畊市人指笑太清生從今惜取青鞵
底祇向雲邊水際行

又
處窮上策更誰如日晏猶眠為腹虛飢則臥不起貧者之
常也尚闕鄰僧分供米敢煩地主送園蔬

又
貸米東村待不回鉢盂過午未曾開飢腸雷動尋常
事但誤生臺兩鷓來

又
北齋孤坐破三更庭戶無人有月明數種袴襦秋未
曠羨他鄰巷搗衣聲

又
竈突無煙甑有塵頽垣破屋越溪濱老鰥狂怪誰嗔
責日日行歌獨賣薪

又
行徧天涯等斷蓬作詩博得一生窮可憐老境蕭蕭
夢常在荒山破驛中

又
讀書但覺慚輪扁補吏非能去箭張白髮歸為林下
叟固應飢不饜糟糠

又
糴米歸遲午未炊家人竊閑乃翁飢不知弄筆東窗
下正和淵明乞食詩
自做

又
出任每辭榮歸休但力耕儉勤貧亦足戒懼禍終輕
學自不欺始智由無事行書紳及銘座勉勉盡吾生

又
經術吾家事躬行更不疑仁常為己任清每畏人知
古訓必三復危途仍十思兢兢死方已寧論迫期頤
雨後極涼

金微未壯長火老尚餘燼可憐茅舍翁瞑目困藉躡
蕭蕭得一雨天氣頗清潤豈惟爽襟靈亦足祛疾疾
浮生日月駛老死纔一瞬聖賢邈不嗣利欲以身徇
孰能痛澡雪此道庶少進閉門君但學妙理天豈吝

醉題
來往人間今幾時悠悠日月獨心知尋僧共理清宵
話掃壁閑尋往歲詩疋馬秋風入條華孤舟莫雪的
湘漓只愁又踏關河路荆棘銅駝使我悲

秋感
畏塗歷盡百年中老臥窮閭一秃翁衣杵凄凉常帶
月井桐零落不禁風空文久悔雕蟲技大學方施習
射功 佛書云如人習射久久方中 萬一死前能少進九原
猶可見先公

鼠敗書
雲歸雨亦止鷓起窗既白秋宵未為永不寐如歲隔
平明亟下榻亦未暇冠幘檢校案上書狼藉鼠齧迹
食簞與果邊攘取初不責倏然敢四出乃至暴方冊
坐令漢篋亡不滅秦火厄向能畜一貓狡穴詎弗獲
緘滕又蕩然追咎亦何益情偷當自戒鼠輩安足磔

秋望
千里郊原俯莽蒼三江煙水接微茫橫林蟲鏤無全
葉新雁風驚有斷行神禹祠庭遺劍珮先秦金石古

文章一尊莫恨盤發薄終勝登樓憶故鄉

秋夕

浴罷紗巾出草堂一枝瘦杖倚枕榔蟬吟古柳聲相
續月入幽扉影正方頻約僧棋秋漸健稍增書課夜
初長亦知桑落宜菊酒太息何時辦一觴

出遊

八月石帆秋聊爲汗漫遊本因尋友去却爲看山留
小艸題僧壁長吟上驛樓月能從劇飲天可寄閑愁
高下評泉品縱橫記酒籌花開遇門入水長信船流
骯髒人雖棄脂韋我自羞此心君不信試往問沙鷗

病中戲詠

八十行加二清秋住故山新涼足眠睡舊疾害躄攀
雪白紛殘鬢梳黃染病顏疲牛臥斜日羸馬噉枯菅
貧廢兒孫學慈生僕妾頑贖衣時已迫貸米歲方難
齋鉢僧朝薄盤盤發客笑慳從今謝還往惟有掩柴關

書喜

軟斜古屋枕江干恩賜殘骸許挂冠杵臼有聲聊足
食羊牛識路自歸闌不求客怨陶潛醉肯受人憐范
叔寒兒輩漸還家暎熱預知燈火話團欒子龍初自江
西歸子處亦今冬當罷官矣

春晷

去蜀歸吳會真成萬里行窮通竟安在恩怨兩皆平
文字妨求道孟觴害養生餘年猶有幾買犢事春晷

秋思絕句

煙草茫茫楚澤秋牧童吹笛喚歸牛九衢不是風塵
少一點能來此地不

又

榮悴元知豈有常紛紛草木占年光霜風一掃知何
在楚客從來枉斷腸

又

一片雲生便作陰東軒草樹共蕭森秋風豈必關人
事自是衰翁感慨深

又
秋棘編籬畫掩門桑麻遮路不知村平生詩句傳天
下白首還家自灌園

又

胸次本來容具區自私益益一何愚片帆忽逐秋風
起聊試人間萬里途

又

黃蛺蝶輕停曲檻紅蜻蜒小過橫塘老人未肯殺風
景睡起熏籠重炷香

秋興

節物喜更新清秋最可人徐行曳藤杖小立岸紗巾
煙雨迷衰草汀洲老白蘋鶴巢時託宿猿果每分珍
羽客期燒藥毛人約卜鄰蘭亭故不遠千載見清真

寓歎

五畝煙蕪過半生還山自笑又躬耕春炊不繼兒啼
飯烹鉅無方客絮羹遊宦人間身愈困讀書燈下目
幾盲退之已老當更事猶向時人說善鳴

北窗

垂老乞骸骨飄然辭聖朝竹頭那足用桐尾不禁焦
短褐縫練布晨飧采藥苗風霜征雁路燈火衲僧寮
隴客詢安否狸奴伴寂寥北窗鳴落葉愁絕夜迢迢

閑思

睡美精神足心空念欲輕讀書無定課飲酒不成醒
日日東軒坐時時北渚行最奇烏柏下側帽聽秋鶯

秋光

小圃秋光潑眼來老人隱几興悠哉翩翩蝴蝶成雙
過兩兩蜀葵相背開兩足疎籬引荒蔓人稀幽徑長
新苦貧家籠冷炊煙晚待得鄰翁賣藥回

秋夜思南鄭軍中

五丈原頭刁斗聲秋風又到亞夫營昔如埋劍常思
出今作閑雲不計程盛事何由觀北伐後人誰可繼
西平眼昏不奈陳編得挑盡殘燈不肯明

湖上

飄然世外更何求終日橋邊弄釣舟
回視老身猶長物縱無炊米莫閑愁
煙生墟落垂垂晚雁下陂湖處
處秋欲覓高人竟安在又聞長笛起滄洲
湖中有隱士
月夜必吹笛人莫有見者

讀王摩詰詩愛其散髮晚未簪道書行尚把之

句因用為韻賦古風十首亦皆物外事也

我生本江湖歲月不可算采藥遊名山
所歷頗蕭散一逢巢居翁見謂於我館
酌泉啖松柏每得造膝款行道不自力
殘髮日已短海山故不遠謫限何時滿

又

仕宦五十年所至不黔突取魚固捨熊
挾兔那恨鷓退歸息厭厭誰敢書
咄咄屋穿每茨草臚瘦可數骨秋風忽已厲
落葉襯殘月脫巾坐中庭清冷入毛髮

又

我愛古竹枝每歌必三反孤舟上荆巫
天末未覺遠最奇扇子峽恨不遂高
逐荆棘蜀故宮煙水楚廢苑至今清
夜夢百丈困牽挽人生如寄爾勿歎
流年晚

又

住歲著朝衫晨起事如橐告歸臥孤村
枯淡有餘味閉門絕外慕自謂真富貴
蕭然畢吾生地下亦增氣里翁戀兒女
小疾輒憂畏惟窮可賒死我在君亦未

又

萬金築華堂千金教新音不知憂患場
著脚日愈深今人喜議古後亦將議
今使汝有子孫聞之亦何心鄧通擅銅
山死日無一簪未死汝勿喜五溪多毒
淫

又

往者遊青城猶及二三老稽首出世師
數語窮至道妻子真弊屣棄去恨不早
俯仰纔幾時殘骸日衰槁吾兒有奇骨
亦復至幽討金丹儻可成白髮何足掃

又

稚川師鄭君纔及一卷書書大僅如箸
度世蓋有餘

想其所論說妙極軒昊初內篇今雖存亦復飽蠹魚
我欲探其原蹇步空趨趨安得插兩翅從公遊太虛

又

隱書有二景字字當力行寸地與尺宅可以久汝生
沂流歸崑崙虛堅守臨長城一日告成功河塞黃金成
笙鶴適繞山貂蟬朝玉京即今修行地千古名還嬰

又

子道室以還嬰名之
行年過八十形悴神則旺往來江湖間垂老猶疎放
滄波浩無津天遣遂微尚刻溪挂風帆漁浦理煙榜
奇雲出深谷新月生疊嶂與懷晉諸賢誰能續遺唱

又

二十遊名場最號才智下踏蹬六十年亦有茆一把
典衣租黃犢乘兩畊綠野西成得一飽敢計泥沒蹀
住久鄰好深百事通乞假秋高小食香相喚注老瓦
夢行益昌道中有賦

又

朱棧青林小益西早行遙聽隔村雞龍門閣畔千尋
壁江月亭前十里堤酒舍胡姬歌折柳江津洗馬惜
障泥倦遊重到曾來處自拂流塵覓舊題

自規

忿忿俱生一念中聖賢本亦與人同此心少忍便無
事吾道力行方有功碎首寧聞怨飄瓦關弓固不慕
冥鴻老翁已落江湖久分付餘年一短篷

幽興

蘭渚前頭湖水清了無俗事敗幽情雨淋茅屋隨時
補日射油窗特地明庭樹晚鷺窺戶語鄰園秋筍過
籬生芥菘漸美鹽醃足誰共貧家一釜羹

記前輩語

疇昔見諸老從容聞至言馬非求路寢木豈願犧尊
臥起數椽屋嘯歌三畝園人生正應爾雲夢不須吞
貧居即事

筮易常逢坎推星但值箕老雖齊涓叟窮不減湘纍

巷月鳴衣杵庖煙爨豆其秋深病良已且復強伸眉

又
地偏人罕到秋晚日猶長病去筇枝費家貧菜粥香
流泉通藥壠積雨潤書囊欲譜幽居事疎慵久未遑

又
月黑鼻鳴樹燈殘鼠穴牆床空圍紙被室靜蕪楓香
不恨言傷直惟憂愁敗剛回頭顧名利百世永相忘

又
米竭炊煙靜村深客屨稀庭除荒宿莽籬落帶斜暉
風惡披書卷鷗馴傍釣磯鄰家殊耐久相伴荷鋤歸

又
意緒喪家狗形骸槁木枝曲肱雖自適縱理固當飢
買絮初寒後畦蔬小雨時窮途何用卜吾道即著龜

又
守道常違俗存心不愧天終年飢過半動步謗居前
力倦少行立氣昏多睡眠今宵風月好扶杖到溪邊

自詠
素慕巢居穴處民久為釣月臥雲身經行山市求靈
藥物色旗亭訪異人高枕靜聽棋剌啄幽窗閑對石
嶙峋吾廬已是桃源境不為秦人更問津

枕上作
一室幽幽夢不成高城傳漏過三更孤燈無焰穴鼠
出枯葉有聲鄰犬行壯日自期如孟博殘年但欲慕
初平不然短楫棄家去萬頃松江看月明

秋曉聞禽聲五韻
秋曉風露佳天宇曠以清鳥雀當此時意樂有和聲
人獨不自喜乃欲鳴不平世事雖萬端但可笑絕纓
君看郊與島徒自殘其生

對酒
素月度銀漢紅螺斟玉醪染丹梨半頰斫雪蟹雙螯
詩就吟逾苦盃殘興尚豪閑愁翦不斷剩欲借并刀

又

又

又

又

又

密條持苦屋寒廬用織簾跪肩柴熟罨東坡煮猪肉缺
云淨洗鍋少著水柴頭煙不起尊菜鼓初添黃甲如盤

大紅丁似蜜甜街頭桑葉落相喚指青帝
示鄰里

古學陵夷失本原讀書萬卷誤元元從今相勉躬行
處士庶人章數十言

重示
篤學仁何遠窮居道亦行能充氣剛大誰蔽性光明
家世艱難業鄉閭宿昔情歲殘相勞苦惟是語春暉

兩夜起行室中
老疾逢秋體自輕披衣暫起繞床行隙風不斷燈將
滅簷雨如傾階欲平鏹叟何嘗愁枕冷病夫未免待
窗明拂書洗硯龜堂上幽事誰知日有程

閏月辛酉壬戌連日風雨癸亥早晴
殘雨在簷猶點滴斷雲銜日正蒼涼清愁偏向暮年
覺少睡不禁秋夜長簾影漸生禽語樂杵聲初動藥
塵香諸兒作吏俱安否那得乘風至汝傍予諸子伯叔
季皆出任

秋思
少日猖狂不自謀即今垂死更何求簡編不隔聖賢
面夢寐時為河嶽遊濁酒未傾心已醉長歌欲發涕
先流石帆射的煙嵐晚過雁聲中又一秋

又
十日秋陰滿徑苔蓬門那有客敲推水邊丹葉已如
許籬下黃花猶未開空見遊僧銜嶽去難逢新雁社
陵來溪雲一片閑舒卷戀著漁磯不肯回

閑遊
江邊小市舊經過歲月真如東逝波茶竈酒壚多識
面少留賣藥買漁蓑

又
溪橋偶與僧遊話草市來尋逆旅炊自笑一生為客
慣捉鱸小豎訴朝飢

又

又

又

又

又

又
秋除情累煙波上放蕩胸懷詩酒中禹會橋邊潮落處夕陽幾度繫孤篷

對鏡

面大如盤七尺身珥貂自合上麒麟詩家事業君休問不獨窮人亦瘦人

幽居書事

老人初起厭羸喧塵几從教鼠迹存赤腳平頭俱遣去倚牆危坐噉朝噉

又

買魚賒酒皆高興野店溪橋圖畫中從此衰翁自行耳不須多事喚蠻童

偶與客話峽中舊遊

我昔旅遊秋雨細建平城東門欲閉主人迎勞語蟬聯小婦春炊縮衣袂長年二老半醉醒蜀估峽商工算計須臾燈闌人欲眠泊船卸鞍猶相繼山深水峻近蠻獠往往居民雜椎髻即今屈指四十年懷抱屢涼真隔世

讀老子次前韻

平生好大忽瑣細焚香讀書戶常閉少年曾預老賄役晚歲欲挹浮丘袂力探玄門窮衆妙肯學陰謀畫奇計言狂不獨人共排志大仍憂後難繼君看淡掃出繭眉豈比一尺春風髻著書勿恤飽蠹魚會有子雲生後世

作籬

生世八十餘日夜迫衰老中年所築舍傾壞當官道每逢風雨夕性命凜莫保况此蘆竹藩何恃不摧倒今朝手自葺不暇避塗潦雞豚有限隔門巷得鋤掃豈惟禦盜竊亦足慰懷抱陰雲忽四垂見事幸差早

寓歎

老生讀書百絕編日晏忘食夜廢眠孝經一力行不盡况有六籍陳吾前華軒玉食非素願廣廈高壙實

郵傳經營歸計笑時人我老但須書數卷

衡門感舊

蒼煙屯不散正素橫郊原雨細不溼衣著水始見痕躊躇意自佳未遽掩衡門一一送歸鴉楓林猶未昏念昔壽州歸紹興初紀元闔門過百口一身今獨存不死實有命送老三家村躬耕幸得食萬事不足論

客中作

江天雨霽秋光老野氣川雲淨如掃投空飛鳥雜落葉極目斜陽襯衰草平沙爭渡人鵲立長亭下馬障泥溼纍纍紅果絡青篾未霜先摘猶酸澀客中雖云貧路程買薪糴米常留行茆檐獨坐待僮僕不聞人聲聞確聲

讀書示子通

我性苦愛書未始去几案生雖後三代意尚卑兩漢世衰道術裂年往朋友散澤居貧至骨霜冷衣露肝猶能樂其樂肯發窮苦歎爾來更可笑身糴兒炊爨一飽輒欣然弦誦等離泮望古雖天淵視俗亦冰炭阿通可憐生相守忘夜旦孤學當世傳歲月不可翫

老懷

老懷常易感秋雨苦難晴羈枕悲歡夢高城長短更榮枯一蠹垤成壞幾棋枰枰抱疾茅檐下行人肯寄聲昨日得李孟達書

沉縣

沉縣久未平寂莫閉柴荆危葉先霜墜殘螢冒雨明記書由默誦得食出躬耕此事吾親驗方當告後生

遊近村

行歷茶岡到藥園却從釣瀨入樵村半衰半健意蕭散不雨不晴天晏溫薯蕷籬傍籬寒引蔓菖蒲絡石瘦生根參差燈火茆檐晚童稚相呼正候門

又

被髮行歌雪滿膺夕陽顧影亂鬚髻乞漿得酒人情好賣劍買牛農事興社鼓賽秋聞坎坎塔燈照夜堃

層層歸來閉指烏藤說箇是人間耐久朋

小亭

除地編茅作小亭一川風露對青冥殘螢欲盡猶穿
戶落葉初飛已滿庭櫟老無心求匠石鬼靈有說拒
奴星餘年默數能多少盡付黃庭兩卷經

記夢

少日飛揚翰墨場憶會上疏動高皇寧知老作功名
夢十萬全裝入晉陽

又

老來百事不關身北陌東阡一幅巾忽夢行軍太行
路不惟無想亦無因

劍南詩稿卷第六十三終

劍南詩稿目錄
卷第六十四

養疾 客從城中來 莫秋中夜起坐次前韻

閒遊 自規 自笑 泛舟至鏡湖旁小市

懷舊 道院述懷二首 秋雨二首 聽雨

畏事 刈穫後書事二首 秋夜五鼓初起

坐堂上至旦 習懶自咎 雨夜枕上作 晚

飯後步至門外拉溪而歸 文章 枕上口占

乙丑九月三日晚久雨驟晴西南新月如玉

鉤重陽以八月置閏菊花粲然滿園喜甚作一

絕記之 寓歎 村興 夜聞堦東賣酒鼓聲

諱甚 燈下晚發示子通 秋晚書懷二首

初寒 黃昏小雨中 雙鰓蒼頭在傍云初未嘗

得暇予乃甚適若熟寐者作五字記之 乾道

之初卜居三山今四十年八十有一感事抒懷

視東臯歸小酌二首 梅市道中二首 古

寺 夢中作二首 舟行魯墟梅市之間偶賦

衰疾 憶昔 雨後寒甚 入冬病體差健

而貧彌甚戲作 蜀漢 新開小室 初冬絕

句二首 卽事六首 閒吟 自遣 記乙丑

十月一日夜夢二首 縱遊 村居書事六首

湖堤莫歸 題搨本姜楚公鷹二首 書棠

五詠 感遇六首 幽興 題詹仲信所藏米

元暉雲山小幅二首 詹仲信以山水二軸為

壽固辭不可乃各作一絕句謝之二首 有所

懷 自嘲老態 十月十四夜夢與客分題得

早行 紹興中予初仕為寧德主簿與同官飲

酒食蠟房甚樂後五十年有餉此味者感歎有

賦酒海者大勸盃容一升當時所尚也 病中

雨夜 讀呂舍人詩追次其韻五首 菴中晚

思 枕上 冬夜 雜興二首

劍南詩稿卷第六十四

宋陸游務觀

養疾

齒耄嬰新疾才衰減舊名短筇扶蹇步小院愜幽情
卜叟言災退醫翁賀脈平飯香炊穉程羹美醅蕪菁
菊穎寒猶小楓林曉漸頽清詩披客費佳著指僧枰
家塾燈前課村陂雨外畊從今尚何事賴此遣浮生

客從城中來

客從城中來相視慘不悅引盃撫長劍慨歎胡未滅
我亦為悲憤共論到明發向來酣鬪時人情願少歇
及今數十秋復謂須歲月諸將爾何心安坐望旂節
莫秋中夜起坐次前韻

東吳秋令遲得雨亦良悅中庭有流螢烈風吹不滅
披衣起坐久鼓角參差發西成雖作勞農事亦漸歇
老怯歲律殘俛仰忽九月蟋蟀鳴壁間媿汝知時節
閑遊

白石床平偶小留青芒屨穩復閑遊微丹點破一林
綠淡墨寫成千嶂秋竹院頻分齋鉢飯苔磯時把釣
魚釣要知此老神通否二十年來不識愁
自規

老疾今俱至艱難亦備更箇中無障蔽何處欠光明
一日能用力三年亦有成脩身在我爾勉勉盡餘生
所謂三年有成者豈獨爲國哉
自笑

學道功賒歲月馳平居自笑著鞭遲安心未竟夜鏡
夢與世雖疎秋尚悲藥圃幽尋芒屨溼棋枰愁戰角
巾欹只愁今夕西窗夢又買長筒到古邨
泛舟至鏡湖旁小市

久著朝衫負此湖扁舟剩喜補東隅市樓合樂醅新
熟寺壁殘詩字欲無常日不堪愁宛轉此行猶得笑

須臾夕陽鷓鴣皆相識更覺人間是畏塗
懷舊

身是人間一斷蓬半生南北任秋風琴書昔作天涯
客蓑笠今成澤畔翁夢破江亭山驛外詩成燈影雨
聲中不須強覓前入比道似香山實不同
道院述懷

學道已非生死流極知心外更何求理窮性盡命亦
至氣佳神全形自留大藥一爐真度世孤桐三尺可
忘憂故人怪我歸來晚太華峯頭又素秋
又

八十年前一炷香依然餘習未全忘舊緣入靜多局
戶近爲精思別置床篝火古鐺煎檜蜜汲泉小食釀
松肪老翁正似遼天鶴更覺人間歲月長
秋雨

雨滴何由止人眠不復成雲深無雁影村近有砧聲
草草殘年夢寥寥後世名太山并螳蟻俱向酒中平
又

秋晚兼旬雨雨晴當有霜頗思遊近縣亦已戒輕裝
珍羞披緜美寒醅撥雪香菊花常歲有所喜及重陽
聽雨
髮已成絲齒半搖燈殘香燼夜迢迢天河不洗胸中
恨却賴檐頭雨滴消

畏事
畏事偷安百不能飯蔬聊得曲吾妝舊交夢裏時時
見宿疾秋來日日增遣悶自鉏幽圃藥扶衰猶賴故
溪藤不因顧見鬚髻影全是深山退院僧

刈穫後書事
鄰里西成例少蘇貧家生業得徐圖雖非五鼎豈無
食未辦複禪猶著襦牢莢漸肥堪奉祭耕牛已買不
求租却思流落天涯日要是家居勝道途
又

耄歲誰知困不蘇每虞黠鬼笑狂圖陶公老去但濁

酒管老歸來惟白襦不逐兒童覓兼味且隨鄰曲了
殘租細思自有欣然處高謝人間九折途

秋夜五鼓初起坐堂上至日

蒸鬱不可過開門星滿天身還倚藤杖手自酌巖泉
雞唱猶相續鴉飛忽已翻事隨朝日出佳思復茫然

習懶自咎

習懶多遺事時能害睡眠猶驕殘竹筍鼠橫齧床氈
獨子巡籬落狸奴護簡編人間有俊物求買敢論錢

雨夜枕上作

兩點滴我心雨氣傷我魂但憂草廬破敢思布被溫
市墟酒如山不溼老瓦盆天其遂吾心窮死三家村

晚飯後步至門外並溪而歸

徐行摩腹出荆扉掠面風尖酒力微市步空船迎荻
去湖隄輕擔賣魚歸濕濕沙竇鳴殘水莽莽平蕪襯

落暉商略最關詩思處滿村砧杵搗秋衣

文章

文章如奕棋分量固有極學不盡其才識者為太息
古來名世士亦或墮此域至今讀其文曷嘗不追惜

士生千載後夙慕當自力如其不能然歸哉事研織

枕上口占

白首區區道未明故山海不蚤歸研勇如搏虎但堪
笑學似累棋那易成殘雨墮蒼苔時一滴老雞棲樹已

三鳴村居孤寂知何憾兩耳猶勝聽市聲

乙丑九月三日晚久雨驟晴西南新月如玉鉤

重陽以八月置閏菊花粲然滿園喜甚作一絕

記之

初三新月見如期重九黃花又及時俱是人間稱心
事典衣一醉更何疑

寓歎

蕭疎殘髮數莖絲勝負渾如未算棋萬里旌旗無昨
夢一蓑煙雨有新詩潛消暗換人誰在小醉閉眼我

自奇二十四年能幾許汾陽回首亦成癡

村興

結宇楓林下久窮吾所安村深事自簡累少食差寬
雨闌牛眠屋泥深鴨滿闌呼兒搗粉餌準擬賽鄰官

夜聞埭東賣酒鼓聲諱甚

烏柏森疎照溪赤寒鴉翻翻蔽天黑鮮鱸出網重兼
斤新蟹登盤大盈尺年年此際清霜夜飯罷讀書聲

滿舍豈惟父子講家學亦有朋儕結經社誰令屠沽
聚里中鼓聲終夜聒老翁嗚呼安得寐無聽不但杜

老左耳聾

燈下晚發示子通
家貧短衣不掩胛空庖凄凄竈不爨老翁八十忍飢
熟兀坐空堂日常肝今年閏餘九月寒那敢遽識南

山炭艱難幸復致一發舖歡燈前百憂散適子挾冊
于于來時與乃翁相論難但令歌向竟同歸門前籍

湜何憂畔

七澤三巴日月長即今萬事付茫茫結廬窮僻新如
少屬疾沉縣舊學荒中夜飯牛初上阪千年化鶴復

秋晚書懷

還鄉自憐尚覺身為累剩蓄荆薪待雪霜

又

頽然兀兀復騰騰萬事惟除死未曾無奈喜歡閑弄
水不勝頭健遠尋僧喚舸野岸橫斜渡問路雲山曲

折登却笑吾兒多事在夜分未減讀書燈

初寒

久雨重陽後清寒小雪前拾薪椎髻僕僕賣菜掘頭船
薄米全家粥空牀故物託身猶付一畝名字更須傳

掘頭松見張志和詩

黃昏小雨中雙鷗蒼頭在傍云初未嘗得眼予

乃甚適若熟寐者作五字記之

人看初無寐形勞幸少休夢魂雖栩栩鼻息未動勤
輕若風中絮浮如水瀝死生君了否試向此中求

乾道之初卜居三山今四十年八十有一感事

抒懷

乾道之初結草廬三朝六見紀元初年光拋擲雖加倍生計蕭條愈不如目暗欲盲停夜課髮殘無幾怯晨梳市聲風便猶關耳未死終當更徙居

視東臯歸小酌

築陂下麥晚歸來圍火烘衣始此回但得諸孫傳素業真無一事挂靈臺井桐葉落垂垂盡雜菊花殘續續開不負初寒蟹螯手床頭小瓮撥新醅

又

少年誤計慕浮名更事方知外物輕身誓生生辭祿食家當世世守農畊授時堯典先精讀陳業幽詩更力行最好水村風雪夜地爐煙煨歲豬鳴

梅市道中

去去浮官浦悠悠數客檣蓼花低蘸水楓樹老經霜蕭鼓迎神鬧鉦擾下麥忙城西小市散歸艇滿斜陽

又

兩暗山陂路人喧古渡頭廟垣新畫馬村笛遠呼牛買飯語爭席迎潮競解舟平生苦吟處又送一年秋

古寺

秋草荒無路來遊感廢興殘僧僅粥飯古像冷香燈扶病驚重到題名記昔曾自量難笑汝一數倚枯藤

夢中作

繫馬朱橋上酒樓樓前數水拍堤流春風又作無情計滿路楊花靛雪毬

又

大慶橋頭春雨晴行人馬上聽鶯聲祥符西祀曾迎駕惆悵無人說太平

舟行魯墟梅市之間偶賦

短髮蕭蕭久挂冠江湖到處著身寬蓼花不逐蘋花老桐葉常先櫛葉殘未卜柴荆臨峭絕且謀蓑笠釣荒寒閑人尚媿沙鷗在始信煙波得意難

衰疾支離負聖時猶能采菊傍東籬捉衿見肘貧無敵聳膊成山瘦可知百歲光陰半歸酒一生事業略存詩不妨舉世無同志會有方來可與期

憶昔

集為之感愴作長句紆悲不知涕泗之集也

憶昔高皇紉柄臣招徠賢雋聚朝紳寧知遺恨忽千載追數同時無一人薶骨九原應已朽殘書數帙尚如新此身露電那堪說也復燈前默愴神

雨後寒甚

陂澤連山脚風煙接海濱孤鴻悲遠客殘菊伴陳人酒盡瓶枵腹爐寒客曲身老翁殊耐事一笑自回春

入冬病體差健而貧彌甚戲作

乞骸自喜脫風塵北陌東阡負未身夢裏相逢無豎子面間時出有真人閑憑曲几還終日不出衡門動過旬送老齋鹽君勿笑天教成就一生貧

蜀漢

憶昔遨遊蜀漢間駸駸五十尚朱顏呼鷹雪鬪天回路采藥雲迷御愛山舊事已無人共說征途猶與夢相關夕陽不覺憑闌久待得林鴉接翅還

新開小室

竝檐開小室僅可容一几東為讀書窗初日滿窗紙衰眸頭清澈不畏字如蠅現然絃誦聲和答有稚子餘年猶幾何此事殊可喜山童報炊熟束卷可以起

初冬絕句

鱸肥菰脆調羹美麪熟油新作餅香自古達人輕富貴例緣鄉味憶還鄉

又

道途冬暝衣裘省村落年豐鼓吹喧下麥種麴無曠土壓桑接果有新園

即事

雲起山容改潮生浦面寬寒鷗先雁到烏柏後楓丹年邁狐裝帽時新豆搗糲非關嗜温飽更事耐悲歡

又
遜居無外事白日不勝長詩為窮差進琴雖老未忘
映窗精試墨閉閣苦留香年少無相誚功名事更狂

又
日上小窗東禽鳴高樹中樂哉容膝地著此曲肱翁
香迳常遲散兒來亦旋通所慚貪坐睡鉛槧少新功

又
紙潔晴窗暝粳新午飯香嗜眠為至樂省事是奇方
孤蝶弄秋色亂鴉啼夕陽詩情隨處有信筆自成章

又
井稅無餘負川原已飽犁樵歌歸市步帆影過河堤
野實丹兼漆村醪蜜與齏雖云有豐約不廢醉如泥

又
還鄉吳語熟伏枕越吟悲接客寒溫簡過鄰几杖隨
獨嗟親舊少不覺歲時移陌上人爭看風吹白接羅
閑吟

閑吟可是治愁藥一展吳牋萬事忘不惜莫年訓倡
絕猶能作意答秋光

自遣
衣冠尚作閑身崇梁肉終非退士宜惟有褐裘并豆
飯尚能相伴到期頤
記乙丑十月一日夜夢

夢裏江淮道上行解裝掃榻喜新晴店門邂逅緇袍
客共把茶甌說養生

又
旋糴街頭米數升黃昏看上店身燈明朝山路聞鏡
石買得烏驪喜不勝

縱遊

人事元知不可諧名山踏破幾青鞵百錢拄杖無時
醉一錫隨身到處埋驛壁讀詩摩病眼僧窗看竹散
幽懷亦知詩料無窮盡燈火蕭疎過縣街

村居書事

過門車馬誰曾入塞路蓬蒿不復鋤雨漏日惟支敗
屋鼠餘時自緝殘書

又
矮餅煮粥猶難繼小甌蒸鱸豈解常偶得鹽醢便豪
侈晨殮滿舍野蔬香

又
架橋築路村翁事裂網伸鉤老嫗心自笑年來足衰
態軒昂故步艱重尋

又
書收鼠齧猶堪讀柿拾鴉殘亦自甜動念不如姑省
事智謀老健恐難兼

又
修身世世詩書業營利明明市井人安得後生俱自
好百年門戶本來貧

又
文辭苦思徒妨睡官職虛名不療飢垂老始知安樂
法紙鷲竹馬伴兒嬉

湖堤莫歸

出郭拉湖無十里我歸蟹舍過魚梁川雲蒼白不成
雨汀樹青紅初著霜俗孝家家供菽水農勤處處築
陂塘樂哉追逐逐鄉三老半醉行歌詠歲穰
題搨本姜楚公鷹

憶昔呼鷹塞草枯妖狐狡兔笑談無明窗見畫空三
歎恍若霜郊遇獵徒

又
弓面霜寒斗力增坐思鐵馬蹴河冰海東俊鷗何由
得空看緜州舊畫鷹

書巢五詠

銅之在人間細大各有境散為五銖貨聚作九牧鼎
天祿與辟邪乃復參泓穎致用孰相須寒泉出金井

右硯滴

古者貝為貨庶物賴以通後世貴銅臭退處書几中

楮生借光輝文字傳士窮言利古所羞孰謂汝不達
右研蠹

時來偶見收過時自當退豈惟裁紙尾亦或用牘背
人情有貴賤志士感興廢庫中九萬張視我猶前輩

鸞膠搗松煙成此金石姿雖以剛故折挺特終不移
微功在簡冊敢惜身蹈危雖非破硯文永世亦有辭

右折墨

銅壺受五升中貯太古醇相從亦已久一朝委流塵
我豈少恩哉白頭乃如新誰知矮道士亦作斥仙人

右空酒壺
感遇

仕宦五十年終不慕熱官年齡過八十九已辦一棺
結廬十餘間著身如海寬此外皆長物簡去心始安

又

稱意多怒嗔易可出艱難我無狐白裘短褐亦禦寒
士方貧賤時藜藿若不足一朝得富貴奴僕饜梁肉

又

大藏食亞夫空器餽荀彧何如茆檐下父子共饘粥
我生有至願世世謝寸祿有子復有孫無榮亦無辱

又

人之所甚患飢渴與寒暑粗免則已矣過計安用許
自奉非其分三彭將嫉汝寓形天壤間大抵皆逆旅

又

但能飽菜根何地不可處堂堂七尺軀切勿効兒女
我以善勉汝汝謂出訾毀置之不復言意又不能已

爲善如築臺成功由積粟中休猶不可況本無基址
未言破萬卷日且讀十紙學雖在力行要是從此始

又
人與人爲徒事我蓋有緣司晨與警夜異類亦可憐

舐糠啄遺粒要使全其天人則當教誨見善或能遷
盛怒姑小忍雖蒲豈非鞭事過我亦喜陶然送流年

幽興

老向浮生生意漸闌飄然俟死水雲間龜支牀穩新寒
夜鶴附書歸舊隱山無意詩方近平淡絕交夢亦覺

清閑一端更出淵明上寂寂柴門本不關
題詹仲信所藏米元暉雲山小幅

又

俗韻凡情一點無開元以上立規模鏡湖老監空揮
淚想見楚江清曉圖徽宗見元暉楚江清曉圖大加賞歎

詹仲信以山水二軸爲壽固辭不可乃各作一
絕句謝之

策蹇渡橋春雨餘亂山缺處草亭孤不知何許丹青
手畫我當年入蜀圖

右春山

雪皚梅村一徑斜茆檐煙火兩三家眼明見此幽栖
地却恨吾廬已太奢

右雲山

有所懷
鏡裏形模日夜衰三峯師友久睽離芝房又失耘鋤
候丹劑常思沐浴時雷雨未成龍起晚海天無際鶴

自嘲老態

歸遲午窗一鉢青精飯揀得香薪手自炊
世念秋毫盡渾如學語兒得床眠易熟有飯食無時

紗帽簪花舞盆池弄水嬉從今轉無事靜坐不吟詩
十月十四夜夢與客分題得早行
暮食寒燈下脂車小市傍驛門猶淡月街樹正清霜
觸目關河異興懷道路長丈夫當自力雙鬢易蒼蒼

紹興中予初仕為寧德主簿與同官飲酒食蠟房甚樂後五十年有餉此味者感歎有賦酒海者大勸盃容一升當時所尚也

昔仕閩江日民淳簿領閑同寮飛酒海小吏擘嶼山夢境悠然逝羸軀獨爾頑所嗟晨鏡裏非復舊朱顏病中雨夜

蹭蹬今如此沉緜不復支心隨形共頽年與智俱衰兩急孤燈暗雲深斷雁悲舊書空滿架惆悵負明時

讀呂舍人詩追次其韻

士生始從學取友實先務吾聞諸古人傾蓋有如故漢宮長生藥至取雲表露治身當何如而受一塵汚

有過當相規有善當相告豈惟定新交亦以篤舊好勢利古所羞置之勿復道霜賈萬木凋孰秉歲寒操

少壯如昨日忽已及耄期舊友散莫收亦復少新知言歸鏡湖上日日醉東籬自笑如寒蝶裴回殘菊枝

東籬予小園名

道士成金丹青雲可接翼小夫豈知此危坐學數息如持一畚土自謂河可塞生不遇碩師幾何不自賊

三沐復三熏佩玉懷明珠何至不自珍欲效豕負塗傳呼雖甚寵正可誇羣奴君看魏徵孫世世為農夫

庵中晚思

小庵摩腹獨仿佯俗事紛紛有底忙雲影忽生鴉蔽日雨聲不斷葉飛霜經綸正復慚伊傅雜駁猶能陋漢唐卷盡殘書窗已晚笑呼童子換爐香

枕上

熒熒地爐火煮藥土床前高帝老朝士長安舊少年松高露時滴城遠鼓猶傳拋擲百年事且安殘夜眠冬夜

杞菊家風有自來充飢藜糝不盈盃雲迷野渡一聲雁雪暗山村千樹梅宴坐何妨面蒼壁長吟且復畫爐灰歲殘尚恨新春遠欲挽天邊斗柄回

雜興

陋巷無心長草萊柴門偶自不曾開餘齡漸迫諸孫長徂歲將窮積雪來日欲燎衣無宿燼莫思頽頽但空喜孰知自有志憂處遶坐新書正作堆

又

此身漂蕩等流槎又向江村送歲華急雨遇寒凝作雪明燈無炮結成花座懸鏡古森毛髮甌聚茶香爽齒牙況是貧家多樂事阿開漸學手吒又

劍南詩稿目錄
卷第六十五

稽山行 贈論命周雲秀才 自嘲 自寬
唐虞 幽事絕句六首 寄題廬陵王晉輔先

輩桂堂 寄題王晉輔專春堂 鼠屢敗吾書
偶得狸奴捕殺無虛日羣鼠幾空為賦此詩

讀唐書忠義傳 病後作 山中 夜思 晨
起 老態二首 枕上 贈過門道人 道院

雜興四首 山村經行因施藥五首 數老
即事二首 自賀 天氣作雪戲作 家風

十二月二日夜夢遊沈氏園亭二首 江干
獨行過柳橋而歸 戲遣老懷五首 對鏡

晨起 吾年過八十二首 述志二首 排悶
舟中作 丙寅元日 新晴 新歲 簡邢

德允 簡蘇邵叟 東村 新曆數 雪中二
首 早春出遊二首 東籬三首 村市醉歸

村夜 旅思 對酒作 遊東村 晨起
夢中作 春雨四首 村店 久雨薪炭食飲

俱不繼戲作 溪上 謝君寄一犁春雨圖求
詩為作絕句二首 二月一日夜夢 新晴二

首 望丞思陵 燈下小酌 春遊二首 春
日雜賦五首 悲歌行 梅市莫歸三山 龜

堂偶題二首 泛湖

劍南詩稿卷第六十五

宋陸游務觀

稽山行

稽山何處魏浙江水湯湯千里巨大野勾踐之所荒
春雨桑柘綠秋風秫稻香村村作蟹蝦處處起魚梁
陂放萬頭鴨園覆千畦薑春確聲如雷私債逾官倉
禹廟爭奉牲蘭亭共流觴空巷看競渡倒社觀戲場
項里楊梅熟采摘日夜忙翠籃滿山路不數荔枝筐
星馳入侯家那惜黃金償湘湖蓴菜出賣者環三鄉
何以共烹煮鱸魚三尺長芳鮮初上市羊酪何足當
鏡湖瀟瀟衆水自漢無旱蝗重樓與曲檻漱灑浮湖光
舟行以當車小繖遮新粧淺坊小陌間深夜理絲簧
我老述此詩妄繼古樂章恨無季札聽大國風泱泱
贈論命周雲秀才

周郎頎然市中隱精神卓犖秋天隼忽來過我論五
行袖出詩卷如束筍人生一息不自保況我耄期真
待盡君今盛為談未來我亦聽之俱可驟雖然此心
猶未泯何至死去同蠹蟲地下不作修文郎天上亦
為京兆尹
自嘲

受福元無一羽輕豈如造物假餘生抱病不死躋高
壽遇亂能全見太平投箸斷鴻常自閔營巢倦鶴固
難成乘除亦有堪慚處記誦文辭誤得名
自寬

兀兀空齋靜掩扉篝爐香細著秋衣蒼頭殘雨晴猶
滴欄角羈雲晚未歸支枕口和心共語挑燈形與影
相依卷書未覺唐虞遠知我何妨舉世稀
唐虞

唐虞雖遠愈巍巍孔氏如天孰得違大道豈容私學
裂專門常怪世儒非少林尚忌隨人轉老氏亦尊知

我稀能盡此心方有得勿持糟粕議精微
幽事絕句

死生歸有命榮悴出無心苔井閑磨劍松窗自斲琴
又

矮紙來吳下長毫出宛陵自書霜夜句持寄剡中僧
又

昨夕風掀屋今朝雨壞牆雖知炊米盡不廢野歌長
又

煙畦朝斷藥雪澗夜淘丹仄徑何曾峻單袍不覺寒
又

新傳服氣訣舊喜步虛吟兒女不難棄雲山何處深
又

客生聞吠犬草茂有鳴蛙日暎方炊飯秋深始采茶
寄題廬陵王晉輔先輩桂堂

楚人記草木桂在椒蘭中我懷小山句妙絕窮化工
唐人作山水亦以桂配松丹葩間綠葉錦繡相疊重

不知始何時巖桂開秋風楚人所稱者委棄等蒿蓬
嗚呼各有時士豈怨不逢我作桂堂詩廣子雲夢胸

寄題王晉輔專春堂堂前皆種牡丹
三月風光不貸人千紅百紫已成塵牡丹底事開偏
晚本自無心獨占春

鼠屢敗吾書偶得狸奴捕殺無虛日羣鼠幾空
為賦此詩

服役無人自炷香狸奴乃肯伴禪房晝眠共藉床敷
暝夜坐同聞漏鼓長賈勇遂能空鼠穴策助何止履

胡腸魚殮雖薄真無媿不向花間捕蝶忙 道士李勝之
畫捕蝶獅貓以饒當世

讀唐書忠義傳
志士慕古人忠臣挺奇節就死有處所天日為無色
大義孰不知臨難欠健決我思呆脚髮可配嵇紹血

病後作
骨相坐一寒仕宦經百謫晚入文昌省又坐煩言噴

詔書復收召付以大典冊期年甫奏篇皇恐亟自劾
歸來稽山下三食新穫麥草屨布裙襦徒步老阡陌
今年疾屢作况若將歸客道士言犯土拜章安舍宅
巫言神去幹翦紙招魂魄把臂忽自悟此豈屋漏脈
盡去囊中藥默觀鼻端白正氣徐自還鬼子何足磔

山中

草閣留雲宿溪橋引鶴行身閑詩曠逸心靜夢和平
石乳無時滴松肪徹夜明山中足幽趣不是傲公卿

夜思

風掃浮雲作快晴窗聲終夜雜簾聲月明滿院鶯驚
起霜冷壓栖雞懶鳴名字虛稱舊朝士門庭元是老
書生尚餘一事猶堪喜北陌東阡醉太平

晨起

晨起梳頭雪滿膺可憐衰與病相乘浮名何足欺橫
日真樂聊須付曲肱任有俸錢渠亦好退無耕耨我
何憑具牛力盡殊堪閔買犢東村恨未能

老態

破榼愁春近空困畏日長頭風便菊枕足痺倚藜床
冉冉殘年逼悠悠萬事忘有兒堪晤語無客亦何妨

又

寡欲貧何損無才老更宜挂牆多漢刻插架半唐詩
飯已頻摩腹兒來暫解頤尚悲吳蜀遠未免故人思

謂張季長

枕上

夜雨一再作燈前獨詠詩影看孤鶴瘦吟苔斷蛩悲
幽夢悠然覺清笳何足吹殘年猶幾日已夫媿明時
贈過門道人
朝行市塵中奔馬不可及莫涉清溪流芒屨了不溼
巖扉一丹竈山路兩書笈白醴可置掌童子亦絕粒
邂逅安期生電逝不暇揖太華獨疑然萬仞道傍立

道院雜興

江上霜風吹角巾東歸不獨為吳尊掃除長劍華纓

夢收拾孤颿短棹身勾漏丹砂開竈晚商顏芝草滿
山春東封敢擬迎鑾仗且作行歌陌上人

又

征途暗盡舊貂裘歸臥林間喜自由體倦尚憑書引
睡心安不假酒攻愁丹爐弄火經年熟竹院聽琴竟
日留今日理髯還一笑白間時有黑絲抽

又

早歲知聞久已空巋然猶有瀾城翁東樓誰記傾春
碧敘州蓋古戎州也有東樓厨醞本名重碧苑至能易為春碧
嶺空思擘晚紅北嶺在福州予少時與友人朱景參會嶺下僧
舍時秋晚荔子獨晚紅在冉冉流年霜鬢外纍纍荒塚綠
燕中琳房何日金丹熟老鶴猶堪萬里風

又

龜堂有叟富神通白髮何妨兩頰紅先取山川來掌
上却移天地入壺中鬻花不老非塵世風月常新奪
化工近作東籬君未見一尊少住莫怱怱

山村經行因施藥

閑行偶復到山村父老遮留共一尊曩日見公孫未
醉如今已解牧雞豚

又

耕傭蠶婦共欣然得見先生定有年掃灑門庭拂床
几瓦盆盛酒薦豚肩

又

兒扶一老候溪邊來告頭風久未痊不用更求苴芷
輩吾詩讀罷自醒然

又

鹽肩每帶藥囊行村巷歡欣夾道迎共說向來曾話
我生兒多以陸為名

又

逆旅人家近野橋偶因秣蹇暫消搖村翁不解讀本
草爭就先生辨藥苗

歎老

身歷迴回事萬端天教林下養衰殘文編似是他人
作書卷如曾隔世觀久已悠悠置恩怨況能一一記
悲懽牀頭周易真良藥不是書生強自寬
卽事

秃尾驢嘶小市門側蓬帆過古城村此生感慨知何
限斗酒新豐不足論

又
草衣木食更何求穴處巢居過卽休尚恨未能全省
事一竿風月釣滄洲
自賀

胎髮茸茸綠映巾歸耕猶是太平民流觴內史招同
社扛鼎將軍與卜鄰弊居去蘭亭項里皆甚邇曾冠六齋
非俗吏已開九秩是陳人一盃剩約梅花醉又見開
禧第二春

天氣作雪戲作
八十又過二與人風馬牛深知老當逸熟謂死方休
細衲兜羅襪奇溫吉貝裘閉門薪炭足雪夜可無憂
家風

春耕秋釣舊家風門巷荒寒屋壁空四海交情殘夢
裏一生成心事斷編中買魚日待攜籃女裹藥時從挾
簾翁 俗謂買藥爲裹藥 便廢閑吟亦未可吾徒豈獨坐
詩窮

十二月二日夜夢遊沈氏園亭
路近城南已怕行沈家園裏更傷情香穿客袖梅花
在綠蕪寺橋春水生
又

城南小陌又逢春只見梅花不見人玉骨久成泉下
土墨痕猶鏤壁間塵

江干
霜晴忽念到江干小蹇羸童路已乾骨相豈能當富
貴鬢毛聊喜耐悲歡客途冬暝衣裘薄村市年豐酒
醞寬殘臘卽今無十日剩求芹蓼助春盤

獨行過柳橋而歸

寒雲覆江干慘慘雪欲作草枯狐兔見鷹隼方縱搏
老翁臥蓬戶疾痛在腰脚忽覺意稍佳快若解束縛
呼童扶下堂西出度略約浮波見鳧雁決起驚鳥鵲
籬根犬迎吠確下雞儂啄霜餘桑葉積春近柳枝弱
徐行過傍舍醉笑盛醺醉歲莫農事休羨爾羣飲樂

戲遣老懷

平生碌碌本無奇況是年垂九十時阿囷略如郎罷
老穉孫能伴太翁嬉花前騎竹強名馬階下埋盆便
作池一笑不妨閑過日歎衰憂死却成癡

又

清羸正怯倚闌干紗帽還驚半指寬日漏雲端纔欲
暝風催梅信又成寒尋僧竹院逢茶熟引鶴溪橋及
雪殘只道捐書差似達庖丁數紙尚須看

又

兒時萬死避胡兵敢料時清畢此生已迫九齡身愈
健熟觀萬卷眼猶明深深小塢梅初動漱漱清溪水
欲平安得飄然從此迹緜山風月聽吹笙

又

舊襲家風號散人晚承恩詔賜閑身放狂泥酒都忘
老厚價收書不似貧霜曉方驚羣木脫春晴又喜一
花新先生偶出人難遇陌上爭先看角巾

又

本意歸來老故丘閉門飯足尚何求閑雲一片自舒
卷幽鳥數聲相應詎但得有書時到眼正令無酒亦
忘憂東籬偏仄纔尋丈已敵征西萬戶侯

對鏡

歲月雖遙遺形容未苦癯髮如新沐潤顏似半酣朱
書讀常終卷山行亦却扶悠悠隨日過不復歎頭顱
晨起

客枕畏霜氣曉窗收月痕芸芸萬物作皎皎一心存
老已忘開卷貧猶力灌園兒孫能繼此亦足報君恩

吾年過八十久已棄朝簪化蝶有殘夢焦桐無賞音
溪聲喧夜日野色變晴陰欲講平生學茫然不可尋
又

八十又過二自言名放翁斧斤遺壽櫟雲海寄冥鴻
酒挂驢鞍側詩投藥笈中瀾城逢剡叟共語莫匆匆

述志

椎牛釀酒千人帳破浪凌風萬斛船常恨書生無此
快一生低首短檠前

又

新豐買酒慰無聊衝雪騎驢上瀾橋巖老尚堪吞鴆
子松風何至羨山苗

排悶

吹盡梅花了不知化工也誤老人期離離新草隨愁
出漠漠餘寒與睡宜古錦一聯吟舊句文楸數著理
殘棋波生澄澗君何怪禪榻從來映鬢絲

舟中作

林麓重重霧雨昏扁舟晚過郡南門鑄金越相遺祠
古執玉塗山王氣存官道蒼茫多水驛客遊飄泊厭
風殘剡中此去無多地會約支公聽斷猿

丙寅元日

縹緲初聞寺閣鐘霏微零雨北年豐家家椒酒歡聲
裏戶戶桃符霽色中春枕方濃從賣困社醅雖美倦
治糞從今萬事俱拋擲且作人間百歲翁

新晴

夜雨空階滴到明山雲忽斂作新晴門前月淡有檐
影牆外泥乾無屐聲與世日疎愁易遣入春得喫疾
差平便當剩作滄洲趣寄語沙鷗勿敗盟

新歲

改歲鍾馗在依然舊綠襦老庖供鱗鮓踈婢暝屠蘇
載糗送窮鬼扶箕迎紫姑兒童欺老曠明燭聚呼盧
簡邢德允

邢子襟靈舊絕塵爾來句法更清新淡交喜得山栖
友傑作疑非火食人豈但僕奴看屈子直須塗改到
生民與君兩世交情厚剩欲燈前對角巾

簡蘇邵叟

君家文獻歷十朝魏公我冕加金貂孫支得君愈雋
發貴名突兀凌煙霄居吳入蜀三十載諸公熱能折
簡招潤松意氣極磊砢天馬毛骨何超遙鼎來行卷
十九首嶽山明月聞吹簫沉香亭畔未須說想見風
雪上瀾橋老夫誦之羣玉府學士如堵不敢驕爾來
一編愈妙絕粲若新霽瞻斗杓出為龍首子何有老
穿約尾我亦聊湖邊酒樓無十步胸次憊憊思同燒

東村

信脚村墟路歸來日未西波清魚隊密風小鷓鴣低
白水初平岸青蕪亦徧犁市墟多美酒飲具不須齎

新曆數

新曆在手心怕開日月聯翩相續來黃金散盡自一
快白髮不貸真可哀無為健羨廣成子千二百年終
有死膠不可黏西去日刀何由翦東流水酒無醇醜
但痛飲市醞上尊俱醉耳堂堂七尺死即休不飽烏
鳶飽螻蟻

雪中

忽忽悲窮處悠悠感歲華莫雲如潑墨春雪不成花
眼澀燈生暈詩成字半斜殘尊已傾盡試起問東家

又

春晝雪如篔簹清羸病起時跡跡深驚虎過煙絕閱僧飢
地凍萱芽短林寒鳥哢遲西窗斜日晚呵手斂殘棋

早春出遊

微雲薄靄新晴後小蓋輕輿古道遙林杪禽禽初學
嘯牆陰凍雪未全消酒壚日暮收青旆市步人歸擁
畫橈軟帽捫髯常半醉逢人誰與話無慘
又
人生何適不艱難積是胸中萬斛寬尺宅常朱那待

酒上池頻飲自成丹楚祠花發呼舟去禹穴雲生倚杖看更有新春堪喜事一村簫鼓祭蠶官

東籬

東籬深僻懶衣裳書卷縱橫雜藥囊無吏徵租終日睡得錢沽酒一春狂新營茅舍軒窗靜旋煮山蔬七筋香戲集句圖書素壁本來無事却成忙

又

漫道深居晝掩關東籬裁接不曾閑每因清夢遊敷水自覺前身隱華山花發時時攜綠酒客來往往羨朱顏藥爐安著猶無地擬展茅茨一兩間

又

東偏隙地作疎籬遇興無非一笑時陪客投壺新罰酒與兒鬪草又輸詩山桃溪杏栽俱活藥鑿漁竿動自隨家事猶令罷關白固應黜陟不曾知

村市醉歸

明時乞得水雲身白首扶衰又見春橫木門幽謝來客獨轅車小避行人湘湖水長蕪絲滑蘭渚泥融箭茁新處處酒壚皆可醉不辭微雨墊吾巾

村夜

入春雨雪無休日雨止猶陰未快晴萬竅怒號風不定半輪斜照月微明百年辛苦農桑業五處睽離父子情但得平安已為幸孤燈殘火過三更時子虞調官行在子龍阻風西陵子修在閩子坦在海昌子與子布子通守舍

旅思

百病集殘骸閑遊且散懷旅裝如遠役蔬食似長齋買藥停山步求醫過縣街春寒殊未已閉戶夜燃藟

對酒作

憑閣風吹帽穿林雨墊巾相呼十日飲不負百年身陌上金羈馬墳前石琢麟於吾竟何有笑殺武陵人

遊東村

露草衡門曉風松一場幽新春有佳日老子得閑遊鷗為忘機下魚緣得計浮歸途無遠近一葉亂漁舟

晨起

老境真無事深居每畏人嗻嗻雞失日姪姪鳥鳴春過擔餓餠白擊盤粒粒新出門還可喜一笑語比鄰

夢中作

世事何由可控制故山歸臥有餘歡澗泉見底藥根瘦石室生雲丹竈寒人遠忽聞清獻起山開頻得異書看一朝出赴安期約萬里煙霄駕紫鸞

春雨

片片紅梅落纖纖綠草生無端夜來雨又礙出門行春陰易成雨客病不禁寒又與梅花別無因一倚欄

又

胸懷阮步兵詩句謝宣城今夕俱參透焚香聽雨聲

又

疎點空階雨長明古殿燈廬山岑寂夜我是定中僧

村店

水汎輕搖檝山行穩跨驢朝暉半晴雨閭里雜樵漁野鷺浮寒浦飢鴉集老樗店家看壞壁忽見昔年書

久雨薪炭食飲俱不繼戲作

澤國春饒雨書生老益貧固難誇練炭亦豈擇勞薪鹽盡纔供莫醯微尚惱鄰人嗤信書誤癡絕望常珍

渠上

偶就澄溪照幅巾蘭亭遺韻想清真功名不入山林夢詩酒猶關老病身萬事只增思魯數百年常媿避秦人超然聊喜高情在手挈長條貫細鱗

謝君寄一犁春雨圖求詩為作絕句

說著功名我自羞喜君解劍換吳牛莫將江上一犁雨輕博人間萬戶侯

又

老農雖瘠喜牛肥回首紅塵萬事非耕罷春蕪天欲莫小舟衝雨載犁歸

二月一日夜夢

夢裏遇奇士高樓酣且歌
霸圖輕管樂王道探丘軻
大指如符券微瑕互琢磨
相知殊恨晚所得不勝多
勝算觀天定精忠壓虜和
真當起莘渭何止復關河
陣法參奇正戎旗相蕩摩
覺來空雨泣壯志已蹉跎

新晴

寂寂房櫳鳥雀聲
熏籠茶竈正施行
繁花滿樹春纔
半斜日穿雲雨乍晴
引睡書橫猶在架
圍棋客散但空枰
病懷莫道傷幽獨
小榭芳醪手自傾

又

挂冠湖上遂吾初
捫腹消搖適有餘
羹煑野蔬元足味
屋茨生草亦安居
市墟分熟通賒酒
鄰舍情深許借驢
更喜新晴滿窗日
鐵題重整一牀書

望丞思陵

高帝中興萬物春
青衫曾忝綴廷紳
仕為將相却常事
年及耄期能幾人
早幸執爨觀北伐
晚叨秉筆記東巡
歸畊况復蒼梧近
鬱鬱葱葱佳氣新
紹興末駕幸金陵游適在朝列淳熙末上命羣臣齊集文華閣修高宗實錄游曾被選

燈下小酌

江湖雙鬢秃宇宙
一身窮酒浪搖輕
碧燈花落碎紅交
情元易見春事半
成空尚覲身強健
煙畦擷芥菘

春遊

杏花天氣喜新晴
白首書生樂太平
小陌鞦韆雖隔世
名園被袂尚關情
山林自古流觴地
絃管誰家送酒聲
蔬菜鱖魚初滿市
莫將羊酪敵南烹

又

窮愁終日竟胡為
老健人間自一奇
每駕柴車遊古寺
閒騎竹馬伴羣兒
登臨蘭渚流觴地
蘭亭本名蘭渚
蕭散孤泉冷澗時
練布單衣白羽扇
路傍人總道相宜

春日雜賦

羈懷病思正厭厭
詩卷漁竿信手拈
老境何嘗忘一

笑春風也解到窮閭
殘花滿地無餘萼
新筍掀泥已露尖
轉老轉窮君勿笑
煎蹠魚腹豈容兼

又

鬢毛八九已成霜
此際逢春只自傷
苦雨不容花抵敵
餘寒猶賴酒禁當
退紅衣焙熏香冷
古錦詩囊覓句忙
堪笑散人閑事業
西窗容易又斜陽
唐樂府云床上下小熏籠
韶州新退紅

又

江湖放浪水雲人
藥物枝梧夢幻身
移竹南窗初試筍
掃花北陌旋成塵
窮忙自笑常終日
老健猶能不負春
未遂初心惟一事
乞薪賒米惱吾鄰

又

乞得身歸剡曲邊
衡門茅舍共蕭然
向來誤計守書冊
此日遺愁無酒錢
俗客妬閑來衰流
年欺老去翻翻梨
花楊柳清明過
且向江村剩放顛

又

人生覓飯元多術
最下方為祿代耕
脫却朝衫猶老健
快如苦雨得春晴
鳥聲頻喚五更夢
花氣頓醒三日醒
最喜晨興聞剝啄
吾兒書札到柴荆

悲歌行

讀書不能遂吾志
屬文不能盡吾才
遠遊方樂歸太早
大藥未就老已催
結廬城南十里近
柴門正對湖山開
有時野行桑下宿
亦或慟哭中途回
檀公畫計三十六
不如一篇歸去來
紫髓之峯玄熊掌
不如飯豆羹芋魁
腰間纍纍六相印
不如高臥鼻息轟
春雷安得寶瑟五十弦
為我寫盡無窮哀

梅市莫歸三山

日日蠻童佩一壺
壺乾時亦復村醪
橫林露塔遠猶見
莫鬪籠山淡欲無
綠浦側憑菰作界
畫橈常遣鷺前驅
此身元是滄浪客
敢學高人乞鏡湖

龜堂偶題

文章何物求渠力
詩亦安能使汝窮
春水一池花百

本此生未易報天公

又

細肋臥沙來左輔巨壑斫雪出東吳不知一飽摩便
腹得似茅檐著糝無

泛湖

白鷺雙飛導我前自疑身是水中仙放舟漢客樵風
裏擲釣秦皇酒瓮邊山寺雲間傳鼓漁家浦口起
炊煙箇中得意君知否買盡煙波不用錢

劍南詩稿卷第六十五終

劍南詩稿目錄
卷第六十六

園中作 寄題求志堂 贈過門道人 春晚
二首 梨花三首 農桑四首 自嘲 春晚
二首 閉戶 晨起 出遊四首 曳杖 自
詠 雜興五首 雜感六首 兩聲 書感
書意 讀唐書 雜題四首 栽牡丹 夜聞
姑惡 哭開孫 晚春東園作二首 禽聲
秦皇酒瓮下垂釣偶賦 出遊歸鞍上口占
閒詠 雨 立夏 孤寂 明日觀孤寂詩不
覺大笑作長句自解 初夏出遊三首 自詠
五更聞雨思季長 醉中作 溪園 初夏
閒居八首 子坦今秋鹽官市征當滿作絕句
寄之 子通調官得永平錢監待次甚遠寄詩
寬其意蓋將與之偕行也 送韓立道守池州
野興四首 東齋雜書十二首 梅市 初夏
幽居四首 泛舟至近村茅徐兩舍勞以尊酒
再次前韻 題陳伯予主簿所藏秦少游像
入梅并序 北窗雨中作 戲書觸目 四
月二十八日作二首

劍南詩稿卷第六十六

宋陸游務觀

園中作

疎籬園中庭野水赴方塘春兩路易乾徐步蹋夕陽
豔豔紅杏梢忽已占年光我老來日短乃復不自量
接花待其成鄰里共笑狂萬事孰能料社稷老不僵
磊磊盤中果安知不獲嘗作詩遣閑愁一笑無留觴
寄題求志堂

古人不輕出出則堯舜其君民古人不輕隱隱則坐
使風俗淳孰知後世乃不然唐虞日遠如飛煙異端
欲出六籍上裔夷直居中夏先窮居求志達行道儻
不塞責真負天士固不可苟富貴顧亦豈可徒貧賤
如其一念有媿心寧不終身戴慚面老夫少年鐵鑄
硯欲窺聖門終未見祝君勿恃來日長八九十年如
掣電

贈過門道人

賣藥人間兩屨輕飄然雲水不論程曉經浦口亂流
渡夜宿山家乘月行

春晚

門巷蕭條老病侵春晴方快又春陰啄吞自笑如孤
鶴導引何妨効五禽雨洗杏花紅欲盡日烘楊柳綠
初深雜鷺寧有平生舊也傍茆檐送好音

又

村巷泥深晝掩門倚闌搔首一消魂花經風雨人方
惜士在江湖道更尊孽淚忽看魚對躍入雲時見鶴
孤鶩向來幸涓今安在歎息誰能起九原

梨花

開向春殘不恨遲綠楊翠地最相宜征西幕府煎茶
地一幅邊鸞畫折枝宜司靜鎮堂屏上有過鸞梨花
又

粉淡香清自一家未容桃李占年華常思南鄭清明
路醉裏迎風雪一杈

又

嘉陵江色嫩如藍鳳集山光照馬銜楊柳梨花迎客
處至今時夢到城南

農桑

農事初興未苦忙且支漏屋補頽牆山歌高下皆成
調野水縱橫自入塘

又

水長人家浸稻秧蠶生女手摘桑黃差科未起身無
事鄰曲相過日正長

又

采桑蠶婦念蠶飢陌上忽忽負籠歸却羨鄰家下湖
早畫船青繖去如飛

又

蠶如黑螳稻青鍼夫婦晡桑各苦心但得老親供養
足不差布袂與蒿簪

自嘲

野叟身常雜傭保莠園荒庭自鋤掃小兒晡養董董
足大兒游宦垂垂老朝餐未破百食齋晚餉猶存兩
困棗春粳但備翁作糜儲帛纒堪裂袷賢愚元自
一王尊癡鈍寧論萬馮道可憐對客猶自矜談道能
令君絕倒

春晚

寂寞又過桃李時東園微雨草離離破困食外有餘
粟殘髮白中生黑絲小疾已能忘藥石餘年寧復問
著龜飾巾待盡從來事閉戶燒香更不疑

又

正見山陂草木芽狂風忽掃萬枝花病懷久已忘春
事老眼猶能惜物華枕上有詩頻自改尊中無酒不
妨除昔人漫道傷幽獨野鷗分巢即是家
閉戶

乞身林下養衰殘，閉戶寧容外物干。正使有為終淡泊，未能無疾已輕安。寸陰息念如年永，丈室端居抵海寬。老子爾來深達此，却嫌兒女話團圓。

晨起

初聽高枝鶉鳴，旋聞深井轆轤聲。煙籠小閣猶疑雨，日射東窗頓作晴。古洗注湯供類灌，春畦摘菜

包烹。老人頽情雖堪笑，終勝胷中懷不平。

出遊

九日陰霾一日晴，此行處處是丹青。斷雲零落江郊路，壽木輪囷古驛亭。籃婦微行望畊壠，漁歌相和起煙汀。拔山意氣今何在，猶有遺祠可乞靈。路過項羽廟

又

近過父老遠尋僧，病起經行力漸增。織室踴機鳴軋軋，稻陂潄水築登登。淺深村落時分徑，高下川原自作層。薄莫到家還熟睡，隔林鐘鼓報晨興。

又

吳地清明未減寒，梨花初動杏花殘。平沙漫漫人爭渡，微雨蕭蕭客跨鞍。野寺吹螺作春會，山郵糴米具朝餐。已開九帙吾何覲，時說金丹強自寬。

又

東阡南陌適逢晴，小蹇輕裝短作程。白水滿陂秧馬躍，綠陰遶舍犍車鳴。過村小婦憑牆看入寺，高人攬袂迎剩情。東風吹柳絮放翁詩到此時成。

曳杖

曳杖寄彷彿，徐行轉曲廊。病知貪酒害，老悔愛花狂。庭樹雲收影，簾旌雨浥香。悠然有佳處，物我兩相忘。

自詠

曾著杞菊賦，自名桑苧翁。常開羅爵網，不下釣魚筒。租稅先期畢，陂塘與衆同。十章八十字，世世寫屏風。

予寫孝經十章八十四字為屏風

雜興

謀生在衣食，不仕當作農。識字讀農書，豈不賢雕蟲。

婦當娶農家，養蠶事炊春。晨耕候春尾，夜織驚秋蛩。畦蔬勝肉羹，社酒如粥醲。母為慕朝幘，詔笑求見容。

又

家世本臞儒，自奉至儉薄。肉食固難期，間亦闕鹽酪。賓朋飯芋豆，時節羹藜藿。偶然設鷄豚，變色相與作。家居常守此，自計豈不樂。蔬園畏蹴蹋，切勿思大嚼。

又

家本徙壽春，遭亂建炎初。南來避狂寇，乃復遇強胡。于時髡兩髦，幾不保頭顱。亂定不敢歸，三載東陽居。人事固難料，今乃八十餘。努力未死間，讀我先人書。

又

讀詩讀七月，治書治無逸。王業與農功，事異理則一。此外復何為，齊民有遺術。一飽不啻足，切勿為利詖。大屋起道傍，百鬼闕其室。曷不觀陸翁，食菜開九帙。

又

三吳氣候異，開歲固多雨。今年已莫春，霽日僅可數。寒氣薄，腰理沉痛結。心膺遣奴買藥物，日夜事炮煮。端居情懷惡，欲出泥淖阻。安得平生歡，駕言問良苦。

雜感

病臥踐衰境，躬畊歸故園。怒蛙號廢沼，妖鵲嘯荒村。里巷魚殄薄，坊場黍酒渾。相逢欲話舊，意極轉忘言。

又

道進身垂老，方靈病已侵。知難逃死籍，猶得遂歸心。星斗開孤劍，塵埃拂素琴。妾庸常袞袞，誰與論幽深。

又

雨霽花無幾，愁多酒不支。凄涼數聲笛，零亂一枰棋。蹈海言猶在，移山志未衰。何人知壯士，擊筑有餘悲。

又

草徑纔容步，茅廬僅庇床。原貧道尊顯，回夭死芬芳。致誦喧清曉，鉏耨滿夕陽。此風能不墜，韋布亦何傷。

又

早仕讒銷骨，遲歸悔噬臍。短衣猶掩脛，窮巷固多泥。

婢喜蠶三幼 鄉中謂蠶眠爲幼 奴貪雨一犁 衡茅明我眼 刮膜謝金甌

又

春晚晴還雨 村深醉復醒 溪添半篙綠 山可一窗青 藥品隨長鏡 花名記小屏 閑身幸無事 吟嘯送餘齡

兩聲

吾園畜兩聲 善驚未易馴 及今纔幾時 弭耳常依人 飢食園中草 渴飲溝澗濱 時時輟餘糧 亦未耗吾困 吏或無佳政 盜賊起齊民 孰能撫以德 坐還二代醇

書感

疋馬曾爲塞上遊 東歸幾見刻川秋 故城廢市古今歎 斷角殘鐘朝暮愁 尺寸無功真碌碌 耄期未死轉悠悠 阿奴尚喜強人意 二日於菟氣食牛 開孫以二月二十日率晬盤

書意

萬事馬牛風 蕭然破屋中 忍貧增力量 耐辱見神通 道進天魔散 心安客疾空 微言施魚鳥 一脫池籠

讀唐書

力行可使金如土 篤好能徠馬若龍 斗米三錢本常事 風雲千載自難逢

雜題

貧中得味如發蔗 語下明心似到鄉 對客欲談渾忘却 笑呼童子替燒香

又

半飽半飢窮境界 知晴知雨病形骸 軒昂似鶴那求料 枯槁如僧不赴齋

又

傳家只要存書種 學道當知養聖胎 寧使終身遷此景 莫令一物汗靈臺

又

大兒都門久栖栖 小兒調官今復西 鄰家父子我所羨 泥水沒膝扶研犁

栽牡丹

攜鋤庭下斲 蒼苔墨紫輕紅手 自栽老子龍鍾逾八十 死前猶見幾回開 夜聞姑惡

夜聞姑惡

學道當於萬事輕 可憐力淺未忘情 孤愁忽起不可耐 風雨溪頭姑惡聲

哭開絲

學步漸扶床 乘車已駕羊 虛稱砌臺使 不遇玉函方 杳杳天難問 茫茫夜正長 寂寥誰伴汝 蕭寺閉空房 晚春東園作

又

雨餘木葉綠成陰 一日身閑直萬金 習氣自嫌除未盡 烏啼花落尚關心 女郎花開春事闌 王孫草長思婦歎 蜂釀蜜脾猶未熟 兩催梅頰已微丹 禽聲

禽聲

布穀布穀天未明 架犁架犁人起 畊宦途不似農家 樂東作西成過此生

秦皇酒瓮下垂釣偶賦

酒瓮山邊古釣磯 沙鷗與我共斜暉 目前雖有小得喪 天下豈無公是非 滄海橫流何日定 古人復起欲誰歸 道邊醉倒君奚憾 豈失風塵一布衣

出遊歸鞍上口占

渺渺煙波飛檣去 迢迢桑野策驢還 寄懷楚水吳山外 得意唐詩晉帖間 每惜好春如我老 誰能長日伴人閑 世間自是無兼得 助業元非造物慳

閑詠

本志常思退 前緣剩得閑 聽猿來剡縣 采藥上稽山 超絕風塵表 瑩然冰雪顏 向來香火地 五綴羽衣班 兩

曉望橫斜映水亭 莫看飄灑溼簾旌 不嫌平野蒼茫色 實厭空壙點滴聲 上策莫如常熟睡 少安毋躁會

當晴且將穡事傳童稚未插秧時正好耕

立夏

赤幟插城扉東君整駕歸泥新巢燕鬧花盡蜜蜂稀
槐柳陰初密簾櫳暑尚微日斜湯沐罷熱練試單衣

孤寂

晚境諸兒少在傍書堂孤寂似僧房家居不減旅懷
惡夏夜尚如寒漏長數筇筍齋甘淡薄半盂麥飯喜
豐穰愚儒幸自元無事日課朱黃自作忙

明日觀孤寂詩不覺大笑作長句自解

獨處將如長夜何直將寂寞養天和愛身不情如懷
壁守氣無虧似塞河塵篋空存獲麟筆煙波賴和飯
牛歌年來勛業君知否蠶下新降百萬魔

初夏出遊

早緣疎拙遂歸耕晚為沉緜得養生藥鑿釣竿緣已
熟海村山市眼偏明安西萬里人何在廣武千年恨
未平但使蓮峯歸路穩亦無閑手揖公卿

又

平生與世曠周旋惟有清遊意獨便小竈炊菘山市
口束芻秣蹇海雲邊春融恨欠舒長日秋爽已悲搖
落天首夏清和真妙語為君誦此一欣然

又

泥蹴樓鞵雨墊巾閑遊又送一年春長歌聊對聖賢
酒羸病極知朝莫人廢堞荒郊閑吊古朱櫻青杏正
嘗新桃源自愛山川美未必當時是避秦

自詠

龜屋裁小冠鹿皮製短裘陸駕少游車水泛淵明舟
山澤與城市有路即可遊或時一飯去間亦旬日留
方見草木萌忽已天地秋淘丹雲潤冷采藥乳穴幽
逢人亦欣然有問乃不訓摩挲金銅人千載寄悠悠
五更聞雨思季長

幽叢鳴姑惡高樹號杜宇驚回千里夢聽此五更雨
展轉窗未明更覺心獨苦天涯懷故人安得插兩羽

醉中作

小市鐘聲斷高樓月色新醉眠當大路狂舞屬行人
有客要元亮無妻諫伯倫山花信手插不復惜烏巾
溪園

跌宕欲忘形溪園半醉醒靜看猿哺果閑愛鶴梳翎
矮榻水紋簾虛齋山字屏更須新月夜風露對青冥

初夏閑居

雲液初斲小瓮香風漪乍展北窗涼巢乾燕乳蟲供
哺花過蜂閑蜜滿房閉戶不知春已去鈔書但覺日
方長所嗟詩思年來減虛負奚奴古錦囊

又

川雲漠漠雨冥冥濁酒閑傾不滿瓶鸞篔尚寒憂繭
薄稻陂初滿喜秧青王師護塞方屯甲親詔憂民已
放了病起自憐猶健在不須求應少微星

又

松棚黯黯接虛堂掃地燒香旋置床密葉留花供淺
酌斷雲障日作微涼高城薄莫聞吹角小市豐年有
戲場白首史官閑盡歲祗將搜句答流光

又

城上朱旗夏令初溪頭綠水蘸菰蒲花貪結子無遺
萼燕接飛蟲正哺雛簫鼓賽蠶人盡醉陂塘移稻客
相呼 鄉中謂備耕者為客 長安青蓋金羈馬也有農家

此樂無

又

吸茗清風兩腋生西齋雅具愜幽情熏衣過後篝爐
冷展卷終時懶架橫巢燕何曾擇貧富鳴鳩元不為
陰晴但能與物俱無著小草新詩取次成

又

野水楓林久寄家慣將枯淡作生涯小樓有月聽吹
笛深院無風看磴茶靜岸葛巾穿蒼蔚閑拖筇杖入
鏡衙平居每與兒孫說切勿人前一語誇

又

水邊茆屋兩三間野叟幽人日往還兩卷硬黃書老子數峯破墨畫廬山功名會上元須福生死津頭正要頑試說龜堂得力處向來何啻半生閑

又

煮酒青梅次第嘗啼鶯乳燕占年光蠶收戶戶繅絲白麥熟村村搗麩香民有袴襦知歲樂亭無桴鼓喜時康未嘗一事橫胸次但曲吾肱夢自長

子坦今秋鹽官市征當滿作絕句寄之

八十老翁頭似雪柯橋送汝淚頻揮殘年豈料猶強健却向柯橋接汝歸

子適調官得承平錢監待次甚遠寄詩寬其意蓋將與之偕行也

黃紙起家陞仕籍青衫遯闕拜恩光署銜汝勿憎銅臭就養吾方喜飯香世事極知多倚伏人生正要小回翔但令父子常相守斂版扶犁味總長

送韓立道守池州

千里江山控上流省郎懷綬去爲州才華故在諸公右談笑遙分聖主憂月墮麗譙喧鼓角雨餘綠野徧鋤耒萬家歌舞舞春風裏秋浦如今不似秋

野興

寓館無常地輕裝不宿謀迷途問畊叟過渡上漁舟野飯香炊玉村醪滑瀉油還家亦無事隨處送悠悠

又

小雨迎藜杖微風入葛巾寧甘結襪系不作拜車塵施藥鄉鄰喜忘機鳥雀馴家山又初夏好在不自身

又

山豁逢孤寺林窮渡小溝松聲亂僧梵雨點雜魚遊阜纛三軍帥金章萬戶侯人生各有願未肯換扁舟

又

去去歷山村行行竝垣廟湍流鱸魚小仄徑鮮花繁白鷺飛如導青蘿險可捫歸途不寂寞迎笑有諸孫

東齋雜書

吾廬雖甚陋窗扉亦疎明開卷冬日暝曲肱暑風清昨日一鳥鳴今日一木榮欣然與之接悲慨何由生

又

吾貧無時醒日月忽過邁空林春采甚荒壠秋種稗孤學有自來飢死奚足怪著書充棟宇一字不肯賣

又

負負無可言上上不須說天壤大如許我獨身子子苟合不可爲萬事聽瓦裂年登麥飯足得酒且勤歡

又

有客可劇談有酒可盡醉老夫老更窮終日惟坐睡既無客款門酒亦未易致頽然北窗下兀兀有餘味

又

下帷聽雨聲開戶延月色霏霏半篆香湛湛一池墨徐行舒血脈危坐學睡息吾聞諸先賢養生莫如嗇

又

門低不通車室隘劣容膝掩脛無全衣作字用挫筆親朋孰可望門內自相恤一笑語吾兒汝馭未須叱

又

區芋常願雨秧菜常願晴吾兒行渡江晨起愁風生人生各徇私夫豈造物情孰能均此意萬里皆春畊

又

吾居魚鱉鄉戒食兼鮮藟雞鷺以御客乃者亦一掃區區仁愛心殆可質蒼昊物情豈遠哉我亦吝肝腦

又

藝花恨不茂雜草欲其盡心常墮貪愛否則近殘忍蝶網猶翩翩蚓斷更菌蠹君其等觀之何者非可閱

又

藥與疾相當何恙不能已良醫善用藥疾去藥亦止晨哺節飲食勞佚時臥起藉曰米長生耄期直易爾

又

養生有妙理省事與寡言于此能力守衆說皆其藩擾擾斲汝本譏譎傷汝魂要當俱置之息深睡自溫

又

學者學聖人斯須不容苟百年樂算瓢千載仰山斗
家庭盛茲誦父子相師友但令書種存勿媿畊壟畝

梅市

沙際人家半掩扉借炊小住不相違水生溪面大魚
躍風定草頭雙蝶飛竹院遊僧聞鼓集煙畦老圃荷
鋤歸浩然物外真堪樂回首浮生萬事非

初夏幽居

日長巷陌曬絲香雨霽郊原割麥忙小擔過門嘗冷
粉微風解箨看新篁傍籬鄰婦收魚笱叩戶村醫送
藥方欲到湖邊還懶動悠然扶杖立斜陽

又

虛堂一幅接羅巾竹樹森疎夏令新瓶竭重招麴道
士牀空新聘竹夫人寒龜不食猶能壽弊帚何施亦
自珍枕簟北窗寧有厭小山終日對嶙峋

又

野草幽花無歇時一窗終日對東籬病猶獨醉雖堪
笑老未全衰亦自奇古紙硬黃臨晉帖矮牋勻碧錄
唐詩箇中疑是忘憂處問著山翁却不知

又

東園梅熟杏初丹老子披襟每不冠古硯坡陀麝煤
綠小山蔥蒨石盆寒移床剩欲眠松塢鼓棹還思泊
蓼灘未用絲毫辨差等黃塵終勝客長安

泛舟至近村茅徐兩舍勞以尊酒

小舸悠颺亦樂哉迢迢故取北村回山從樹外參差
出水自城陰曲折來樂歲共忘東作苦殘租不待急
符催舊鄰父老睽離久喚取開顏把一盃

再次前韻

少壯即今安在哉輕舟訪舊莫輕回兒童擁岸迎舟
入婦女窺籬喜客來多難只成雙鬢改流年更著莫
笳催放懷魚鳥平生事少住茅檐盡此盃

題陳伯子主簿所藏秦少游像

晚生常恨不從公忽拜英姿繪畫中妾欲步趨端有
意我名公字正相同

入梅 并序

吳俗以芒種後得壬日為入梅今年正以此
日重雲蔽天比夜乃雨父老以為有年之候
賦詩以識之

今年入梅日雲腳垂到地芬香小麥趁展轉北窗睡
甲夜聞雨聲起拜造物賜三登于此卜一飽可坐致
語兒高爾困戒婦豐爾饋擊壤歌太平門無督租吏
北窗雨中作

鬱蒸作不解風雨來有信豈惟窗戶清更喜草木潤
簡編既陳前燈火亦可近跂予望聖賢傾河洗驕吝
扶衰幸未死吾道其少進安得平生歡懷抱為君盡
戲書觸目

狸奴閑占熏籠臥燕子橫穿翠徑飛我亦人間好事
者憑闌小立試單衣

四月二十八日作

四月欲盡五月初九十未及八十餘開口何曾談世
事收身且復愛吾廬

又

行徧人間病不禁鬢毛飽受雪霜侵茅檐一夜蕭蕭
雨洗盡平生幻妄心

劍南詩稿卷第六十六終

劍南詩稿目錄

卷第六十七

倚筇 薄暑 晝寢二首 睡起二首 林間

書意二首 示子通 追涼小酌 暑夜泛舟

二首 短歌行 小江 歸興二首 自春來

數夢至閩中蒼溪驛五月十四日又夢作兩絕

句記之二首 自嘲二首 雨霽 大雨 社

飲 采藥有感 觀邸報感懷 送子通至梅

市而歸 述閒 幽居 午暑 舟過道士莊

晨興 對酒 泛舟 地僻 東軒 季夏

雜興四首 夏夜暑毒不少解起坐庭中二首

素飯 老態自遣 耒陽令曾君寄禾譜農

器譜二書求詩 雨夜 柴門 賽神 菖蒲

二首 迂拙 夏夜 夏末野興二首 示子

孫 夜雨 劇暑 六月十夜風月佳甚起坐

中庭有作 古井 菴中紀事用前鞏韻 急

雨 舍東追涼 酒藥 六月十七日大暑殆

不可過然去伏盡秋初皆不過數日作此自遣

急雨遽涼 縱遊深山隨所遇記之四首

感中原舊事戲作 小涼 村居 城東 初

秋露坐作短歌 池上 秋稼漸登識喜 野

渡用前韻 秋後一日風雨 感事 久無客

至戲作 乍涼 閒趣 溪上 秋詞三首

秋思 老學菴北窗雜書七首 親舊見過多

見賀強健戲作此篇 小病兩日而愈 秋興

二首 日用四首

劍南詩稿卷第六十七

宋陸游務觀

倚筇

老翁愈老欲安歸
臥稽山飽蕨薇
未免解牛逢肯綮
豈能相馬造精微
靈山有士拈花笑
關里何人鼓瑟希
我亦倚筇桑竹下
白髯蕭颯滿斜暉

薄暑

仲夏暑尚薄
孤村日尤長
僧坊初施浴
行路亦饋漿
老我絕人事
終日坐虛堂
南北兩松棚
細細吹清香
堂中無長物
獨置湘竹床
我睡僕亦休
睡覺誰在傍
起坐拭兩眸
小山鬱蒼蒼
安得鳥有生
俱老無何鄉

晝寢

倦腕擊書忽墮前
心清無夢腹便便
丹成未要排雲去
且住人間作睡仙

又

困睫芒羊一欠伸
頽然忽已墮紗巾
鼻端雷動君無怪
路熟華胥不問津

睡起

睡起俛俛扇懶搖
枕痕著面未全消
山丹石竹俱零落
孤蝶飛來伴寂寥

又

蒲萄換葉欲成陰
歲月催人感慨深
安得門前無俗客
岸巾臨水聽蟬吟

林間書意

三三兩兩市船回
水際柴門尚未開
垂綠筍梢風正惡
弄黃梅子雨初來
紅螺盃小傾花露
紫玉池深貯麝煤
領取林間閑富貴
向來誤計伴鄒枚

又

小山草木一窗秋
團扇江山萬里愁
不讀狐書真僻學
未登鬼錄且閑遊
少隨官牒嗟無策
晚脫朝衫喜

自由半嶺嘯聲驚
阮籍要知天下有高流
示子通

吾家大傅後
衿佩盛青青
我忝殿諸老
汝能通一經
學先嚴
詰訓書要講
聲形夙夜常
相勉
諸孫待典刑

追涼小酌

綠樹暗魚梁
臨流追晚涼
持盃屬江月
散髮據胡床
苦蕒醃齋美
菖蒲漬蜜香
醉來呼稚子
扶我上南塘
暑夜泛舟

又

暑氣方然一鼎湯
聊呼稚子夜追涼
微風忽起髮根冷
關月初升林影長
漸近場中聞笑語
却從隄外看帆檣
超然自適君知否
身世從來付兩忘

又

烈暑元知不可逃
天將清夜付吾曹
小舟行處蒲風急
健鷁歸時山月高
愚智極知均腐骨
利名何啻一秋毫
等閑分得吳松水
安用并州快剪刀

短歌行

冠一免不可以復冠
門一杜不可以復開
山林兀兀但俟死
臺省袞袞吁可哀
巨材倒壑亦已矣
萬牛欲挽真難哉
阿房銅人其重各
千石回首變化為風埃
吾曹浮脆不自悟
乃欲冠劍常崔嵬
勸君飲勿用盃酌
但當手提北斗魁
挹乾東海見蓬萊
安用俛首為低摧

小江

細靄斜陽一片秋
數家茅屋小江頭
櫓聲遠入菰蘆夾
鳥陣斜飛蘭杜洲
暫住便成閑嘯詠
欲歸更復小遲留
老翁腳力猶能健
明日重來倚寺樓

歸興

輕雷纏曉斷
梅初殘
籜縱橫過筍餘
鄉語謂梅雨有雷為斷
梅又謂筍出林為過筍
飽有期程新買犢
睡無厭足久捐書
白蘋滿渚閑揮榜
綠樹連村獨跨驢
夏日儘長歸亦莫
水邊燈火已疎疎

又

輕雷纏曉斷
梅初殘
籜縱橫過筍餘
鄉語謂梅雨有雷為斷
梅又謂筍出林為過筍
飽有期程新買犢
睡無厭足久捐書
白蘋滿渚閑揮榜
綠樹連村獨跨驢
夏日儘長歸亦莫
水邊燈火已疎疎

又

輕雷纏曉斷
梅初殘
籜縱橫過筍餘
鄉語謂梅雨有雷為斷
梅又謂筍出林為過筍
飽有期程新買犢
睡無厭足久捐書
白蘋滿渚閑揮榜
綠樹連村獨跨驢
夏日儘長歸亦莫
水邊燈火已疎疎

又

輕雷纏曉斷
梅初殘
籜縱橫過筍餘
鄉語謂梅雨有雷為斷
梅又謂筍出林為過筍
飽有期程新買犢
睡無厭足久捐書
白蘋滿渚閑揮榜
綠樹連村獨跨驢
夏日儘長歸亦莫
水邊燈火已疎疎

古道迢迢人跡稀，羸驂軟帽遠村歸。正看日暮羊牛下，又見月明烏鵲飛。僧院疎鐘出林岫，漁家微火耿窗扉。閑遊要是幽人事，草露從教溼短衣。

自春來數夢至，閩中蒼溪驛五月十四日又夢

作兩絕句記之

騎驢夜到蒼溪驛，正是猿啼月落時。三十五年如電掣，敗牆誰護舊題詩。

又

亭臯敗葉先秋實，城上驚烏半夜啼。自笑遠遊心未已，年來頻夢到蒼溪。

自嘲

長日淡無事，虛堂來遠風。愛眠從病蹇，厭事懶治聾。貓健翻憐鼠，庭荒不責童。爾來添目暗，又免送歸鴻。

又

身臥孤村日，年當大耋時。貧憂償酒券，懶悔許僧碑。輸稅質畊犢，飯餐烹伏雌。勞生不須歎，隨事且支持。

兩齋

一雨洗炎蒸，危闌獨憑涼。應生萃蔡爽，氣入鬚髻。庭下宵遊燐，盤中晝掃蠅。絕勝塵土裏，馬上嚼寒冰。

大雨

萬壑風聲遠，千林雨脚長。溝盈懸壘竈，屋漏徙衣囊。未說豐年喜，先便永夜涼。清秋病小愈，起拖上瀟湘。

社飲

世上升沉一轆轤，古來成敗幾樗蒲。試看大醉稱賢相，始信常醒是鄙夫。淵明詩云：一士常獨醉，一夫終年醒。起舞非無垂白伴，莫歸仍有髭髯扶。即今不乏丹青手，誰畫三山社飲圖。

採藥有感

兼度記霜露，蟋蟀謹歲月。古人于物理，瑣細不敢忽。我少讀蒼雅，衰眊今白髮。中間嬰疾疾，過日常卒卒。潤毛春可求，山藥秋可掘。雖云力探討，疑義未免闕。屏居朋友散，奧妙誰敢發。窮理已矣，夫置饋當自罰。

觀邸報感懷
六聖涵濡壽域民，耄年肝膽尚輪囷。難求壯士白羽箭，且岸先生烏角巾。幽谷主盟猿鶴社，扁舟自適水雲身。却看長劍空三數，上蔡臨淮奏捷頻。

送子適至梅市而歸

梅市長隄愴別情，魯墟歸路當閑行。日沉菱浦看魚躍，煙合菰叢聞鷓鴣。水門扉初半掩，擁橋炬火已先迎。停橈不奈清愁得，獨倚闌干待月明。

述閑

披衣按摩罷，據榻欠伸餘。香煨翻心字，茶凝出草書。客稀門每閉，意悶髮重梳。賴有盆山樹，幽情得少據。

幽居

謝病言歸一鹿車，短籬數掩護幽居。樹枝南畔有飛鷓，蓮葉東邊多戲魚。倦枕續成驚斷夢，斜風吹落讀殘書。興來偶曳枯筇出，父老逢迎却未疎。

午暑

笛材織簟涼如水，霧縠縫幮薄若空。更著高安竹根枕，不妨專享北窗風。

舟過道士莊

江蕪芳杜滿沙汀，道士莊前酒半醒。上下風煙還竟日，往來魚鳥各忘形。歸人薄晚常爭渡，病葉先秋亦自零。興欲盡時猶小住，北村漁火看青荧。

晨興

晨興未櫛盥，扶杖竝檐立。斷雲方東行，庭草露猶溼。朝飢神益爽，清虛自來入。可憐數雞雛，隨母啄遺粒。蝶殘蚍蜉喜，鼠腐鴟鴞集。吾當一洗之，漱泉開玉笈。

對酒

斷簡殘編不策勛，東臯猶得肆微勤。榮枯一枕春來夢，聚散千山雨後雲。煙水幸堪供眼界，世緣何得累心君。床頭小瓮今朝熟，撥置閑愁且一欣。

泛舟

水長芳洲沒，風生的艇橫。偶尋東埭去，却作北村行。

宿鳥昏方定流螢雨更明歸來未覺晚傳漏下重城
地僻

地僻臨端瀨門幽長綠苔客書疑誤達僧刺媿虛來
清露蘋花圻斜陽燕子回自憐猶有恨佳日對空壘

東軒
終日在東廂閑消百刻香一枰分黑白雙硯列朱黃

荷氣侵簾馥桐陰覆井涼前知今夕夢孤榜上瀟湘
季夏雜興

蟻鬪知將雨蟲鳴覺近秋衰翁非愛酒無計奈孤愁
又

嶢嶢瘦體嶺莽莽老牛陂橫在施黔間陂在汝州四海均
羈旅何人感此詩

又
熟睡一炊頃清談數刻間未言能近道要得暫身閑

又
疏泉澆藥壠枕石聽松風此樂慙專享無因與客同

夏夜暑毒不少解起坐庭中
窗間有螢過枕上見星流欲睡不堪熱長歌起飯牛

又
風從高樹下蟲抱短莎鳴小據胡床坐還扶拄杖行

素飯
放翁年來不肉食盤箸未免猶豪奢松桂輒炊玉粒

飯醯醬自調銀色茄時招林下二三子氣壓城中千
百家緩步橫摩五經笥風爐更試茶山茶曾樂道近鏡

茶山茶
老態自遣

似見不見日愈衰欲墮不墮齒更危誰令汝年八九
十常欲強健寧非癡目昏大字亦可讀齒搖猶能決

濡肉若知用短百無憂此理正如夔一足矇矓駝脆
俱有味笑侮莫聽傍人喙但令孫曾能力畊一飽不

妨還笑睡
未陽令曾君寄禾譜農器譜二書求詩

歐陽公譜西都花蔡公亦記北苑茶農功最大置不
錄如棄六藝崇百家會侯奮筆譜多稼僮州讀罷深
咨嗟一篇秧馬傳海內農器名數方萌芽令君繼之
筆何健古今一一辨等差我今八十歸抱耒兩編入
手喜莫涯神農之學未可廢坐使末俗慚浮華

兩夜
羸軀對影愴餘齡追念平時只自驚夏木正濃桐葉
墜秋風未起草蟲鳴蠹魚似是三生業汗馬難希百

世名時王師方出塞小雨迎涼何所作北窗還對短燈
檠

柴門
寂莫柴門不徹扇槐花細細糝空庭晚梅摘得鹽供
釘濁酒沽來草塞瓶病已廢耕拋襪閑猶持釣愛

簞簞經旬莫恨無來客交舊疎如欲日星

賽神
落日林間簫鼓聲村村倒社祝西成扶翁兒大兩髦
髮澆水渠成千耦耕家受一廛修本業鄉推三老主

齊盟日聞淮頴歸王化要使新民識太平

菖蒲
古礪生菖蒲根瘦節蹙密仙人教我服刀七濁百疾

陽狂華陰市顏朱髮如漆歲久功當成壽與天地畢

又
菖蒲古上藥結根已千年聞之安期生采服可以仙
斯人非世人兩耳長垂肩松下語未終竦身上青天

迂拙
迂拙宜歸早乘除得死遲老稀朝市夢窮足道途詩
詳世無它技忘懷自一奇故溪幽絕處惟許白鷗知

夏夜
六尺筇枝膝上橫中庭岸幘聽鼙更露零金掌漢宮
曉月度銀河秦塞明菡萏晚花香未滅梧桐病葉墮

無聲關河又見新秋近屈指流年一數驚

夏末野興

半世天涯倦遠遊，還鄉不減旅人愁。數聲相應鳴呼雨，一片初飛葉報秋。山塢風煙僧院路，河梁燈火酒家樓。絕知雪鬢宜蓑笠，分付貂蟬與黑頭。

又

漠漠川雲闊，復開天。公試手挽秋回，參差小市林邊。出縹緲疎鐘，雨外來土瑠飯香，供晚餉布帘。字大賣新醅，歸舟自逐輕鷗去，不用城笳抵死催。

示子孫

芾屋惟須補漏穿，家人衣食亦隨緣。豈容一事相關白，已過傳家十二年。

夜雨

藩籬處處蔓牽牛，蕙苾叢深稗穗抽。只道物生常茂遂，一宵風雨又成秋。

劇暑

六月暑方劇，喘汗不支持。逃之顧無術，惟望樹影移。或謂當讀書，或勸把酒卮。或誇作字好，蕭然却炎曦。或欲溪上釣，或思竹間棋。亦有出下策，買簟傾家貲。赤腳踴增冰，此計又絕癡。我獨謂不然，願子少置思。方今詔書下，淮汴方出師。黃旗立，轅門羽檄晝夜馳。大將先擐甲，二軍隨指揮。行伍未盡食，大將不言飢。渴不先飲水，驟不先告疲。吾儕獨安居，茂林蔭茅茨。脫巾濯寒泉，臥起從其私。于此尚畏熱，鬼神其可欺。坐客皆謂然，索紙遂成詩。便覺窗几間，颯颯清風吹。六月十夜風月佳甚，起坐中庭有作。

曼膚汗雨不勝揮，夜景冷然暫解圍。激罷寒泉甘齒頰，夢回斜月入窗扉。荷翻小浦孤螢度，露溼危巢倦鶴歸。我亦馭風思遠適，岳陽樓上酌湘妃。

古井

道傍有古井，久廢無與汲。鄰里共浚之，寒泉稍來集。駕言欲激灌，冀遠塵土襲。躊躇復棄去，綆短安能及。

菴中紀事用前輩韻

掃灑一菴躬，瑣細蓬戶朝昏。手開閉荒山，蘄藥須長。

鑊小竈煎茶便，短袂空中咄咄安。用書身外悠悠固，難計山僧野叟到。即留麥飯葵羹，貴能繼久貧奴婢。多散去，豈有跣足并椎髻。負薪長歌過此生，直疑身在鴻荒世。

急雨

觸熱支離老病增，忽看東北片雲興。疾雷載雨輪膏澤，茂樹生風洗鬱蒸。采藥喜逢巖下客，說詩曾對剡中僧。坐令身在羲皇上，繞坐何煩更設冰。

舍東追涼

驕陽收火傘，清露貯冰壺。海湧四更月，風生千頃蒲。歌狂忘老境，意豁失窮途。所恨朋儕盡，無人為攬鬚。

酒藥

愁憑酒破除，病藉藥枝梧。焦草死已久，宋清今亦無。幽情寄魚鳥，小艇雜菰蒲。海上秋風早，懸知肺渴蘇。六月十七日大暑，殆不可過，然去伏盡，秋初皆不過數日，作此自遣。

赫日炎威豈易摧，火雲壓屋正崔嵬。嗜眠但喜蘄州簟，畏酒不禁河朔盃。人望息肩亭午過，天方悔禍素秋來。細思殘暑能多少，夜夜常占斗柄回。

急雨遽涼

急雨消殘暑，曠然天地秋。露螢矜熠熠，風葉送颼颼。涼簟惟添睡，明河不洗愁。流年又如此，隨處怯登樓。

縱遊深山隨所遇記之

行穿拳確度谿，銜路跨清溪。一木斜歷盡艱危，到平地壞垣，歇屋兩三家。

又

山徑欹危細棧通，孤村小店夕陽紅。竹郎有廟臨江際，木客無家住箬中。

又

道逢山客束荆薪，口眼雖肝略似人。試問村名嗒不語，割然長嘯上嶙峋。

古寺蕭蕭不見僧飛甍滿屋老梟鳴空房終夜無燈
火斷木支門睡到明

感中原舊事戲作

蜂兒園裏香塵細燕子樓中寶瑟斜惟有天知太平
事乞傾東海洗胡沙

小涼

羸軀一夏困沉縣不在林間即水邊高臥已忘浮世
事小涼漸近早秋天枯樺軋軋鳴幽圃昨艇遙遙入
莫煙餘日無多那諱得逢人自笑說明年

村居

人笑無才自笑狂權籬竹塢得深藏自從病後辜風
月未免愁中讀老莊行圃數畦秋葉長泛溪十里晚
荷香叢書坐嬾無由讀且補忠州手錄方

城東

出郭溶溶細澁波平生此地幾經過祭餘野廟啼烏
樂酒賤村墟醉叟多亭午疎鐘離石佛斂昏微雨泊
曹娥采蓮艇子愁衣溼不爲人家惜綠荷

初秋露坐作短歌

房星縱心星橫斗牛闌干河漢明青天露坐性所樂
不覺庭樹秋風生秋風搖落君勿悲明年花開還滿
枝人生衰謝則已矣寧復鬢髮童顏時

池上

旋移吟榻竝池橫欲出柴門復嬾行樹罽忽明知月
上竹梢微動覺風生貧無醉日惟堅忍疾遇涼秋亦
漸平二尺燈檠元好在便思相伴聽蛩聲

秋稼漸登識喜

門外新場滑似油早禾已慶十分收虹霓不隔郊原
雨蝴蝶爭催巷陌秋人樂風傳迎社鼓路長水濺采
蓮舟老翁自笑無它事欲隱牆東學儂牛

野渡用前韻

十里平沙到渡頭溪山合向畫圖收老僧赴供袈裟
古醉叟行歌穠穉秋斷岸煙迷耕處草孤村雨送釣

時舟龍泉不斷元無恨莫放神光上斗牛
秋後一日風雨

炎歊數日劇蕩滌及秋初病葉風吹盡鳴蟬雨打疎
趁涼謀社酒乘潤理園蔬分喜寧無處蒲中饒鱖魚

感事

曾事高皇接雋遊君恩天地若爲酬濟時已負終身
媿謀己常從一笑休在昔風塵馳鹿置即今煙雨暗
咻疇孤愁欲豁寧無地野店逢僧每小留

久無客至戲作

瘦影支離雪鬢繁頻年老病臥孤村雍容那有客聯
騎刺豚尚無僧叩門濁酒香浮新社瓮晚瓜味敵故
侯園茅檐蓬戶風煙晚小酌欣然對子孫

乍涼

涼風蘇病骨搖落起詩情一病輒數日幾詩終此生
招呼丹竈客結束玉霄行預想溪橋路三更待月明
閑趣

絕迹市朝外結廬雲水間心平詩淡泊身退夢安閑
有酒旋尋伴無門那說關桐江故不遠日莫趁潮還

溪上

溪上秋來風露清蕭然浴罷葛衣輕看雲舒卷了窮
達見月虧盈知死生老去關心惟藥裹閑中消日付
棋枰故人書札頻相問何日芒屨上赤城

秋詞

東吳七月暑未艾川雲忽與天晝晦蔽空雨點弩發
機平地成渠屋穿背早禾玉粒自天瀉村北村南喧
地確大牲如阜酒如江相喚龍祠作秋賽

又

八月暑退涼風生家家場中打稻聲穗多粒飽三倍
熟車軸壓折入肩頰常年縣符鬧如雨道上即今無
吏行鄉閭老稚送歌舞竈釜日饜豬羊烹

又

暮收功成將整駕萬頃黃雲收晚稼公私逋負一洗

空懷抱喜看兒姪從來婚聘不出鄉長自東家適
四舍年豐人樂我作詩朝晡夜織誰能畫

秋思

詩人本自易悲傷何況身更憂患場鳥鵲成橋秋又
到梧桐滴雨夜初涼江南江北埃雙隻燈暗燈明更
短長安得平生會心侶一尊相屬送年光

老學菴北窗雜書

本慕修真謝俗塵中年踳躅作詩人即今恨養金丹
晚日向江湖把釣緝

又

獨住人間遂許時殘骸自笑尚支持直須消破黃蘗
盡始是浮生結局時

又

茅齋遙夜養心君靜處工夫自策勛正喜殘香伴幽
獨鴉鳴窗白又紛紛

又

小龍團與長鷹爪桑苧玉川俱未知自置風爐北窗
下勒回睡思賦新詩

又

定交魚鳥欲忘形獨岸綸巾坐草亭不恨囊中無赤
仄且欣案上有黃庭

又

松棚接屋得陰多石徑生苔奈滑何盡道疎籬宜細
雨晴時最好晒漁蓑

又

龜常曳尾豈非樂鶴已鐵翎徒自傷造物今知不負
汝北窗夜雨默焚香

親舊見過多見賀強健戲作此篇

偶向人間脫駭機玉池中夜自生肥據鞍馬援雖堪
笑強飯廉頗亦未非道貌安能希晡益世緣但可付
筍違它年不死君須記會在天津看落暉 元微之贈老
人詩云天津橋上無人識獨倚闌干看落暉

小病兩日而愈

病骨羸然山澤臞故應行路笑形模記書身大似椰
子忍事癯生如瓠壺美酒得錢猶可致高人折簡孰
能呼不如淨掃茅齋地臥看微香起瓦爐

秋興

脩蔓叢篁步步迷山村東下近魚陂釣歸恰值秋風
起棋罷常驚日景移病葉辭枝應有恨候蟲吟壁故
知時殘年我亦悲搖落薄莫空囊又有詩

又

八十仍當過二時加餐安寢豈前知晨梳脫髮雖無
數社食新醅已有期偶為買花經廢圃時因踣藕下
清池尚餘一事終關念安得兒孫少別離

日用

舊好疎毛穎新知得麴生幽居無一事枕臂聽松聲

又

春穀灌園蔬日長閑有餘何妨忍揮汗合藥施鄉閭
貧知藜糝美渴愛粟漿酸食少從奴去人稀苦屋寬

又

空舍封書篋多年飽蠹魚還家貧不死讀盡舊藏書

劍南詩稿卷第六十七終

劍南詩稿目錄
卷第六十八

七月十一日見落葉 龜堂一隅開窗設榻爲
小憩之地 南門晚眺 進德 次韻邢德允
見贈 秋懷十首 出遊二首 東窗獨坐書
懷 書數 荷鋤 病臥 秋夜獨坐聞里中
鼓吹聲 老歎 艸堂 齋中讀書罷有感
雨欲作步至浦口 鏡湖有烏名水鳧鳴於春
夏間若曰打麥作飯偶有所感而作 自述
秋興十二首 秋夕書事二首 薄粥 拄杖
小築二首 一編 埭北 風雨 解嘲 識
喜 寓興 老馬行 農家 對酒作 秋分
後頓凄冷有感 卽事示子通 醉中絕句二
首 種麥 秋晚二首 秋穫後卽事二首
行飯至湖上 晨出 老境 憶昔 自嘲
解嘲 新寒 夜歸 夢中作 自勵 九月
一日未明起坐 小疾偶書 初寒晨起 霜
降前四日頗寒 題驛壁 閒遊 貧舍寫興
二首 秋晚雨中作 待旦 夜意 湖村
連夕熟睡戲書 小軒 曉寒 次韻朝陵葉
院察見寄 書意 九月下旬卽事 城南
舟中記夢 送周郎 村舍得近報有感 貧
歎 明日復作一首自解 子虞調官行在寓
鐵圍巷初冬遽寒甚作兩絕句寄之

劍南詩稿卷第六十八

宋陸游務觀

七月十一日見落葉

葉彫非一日盛夏則已然一葉復一葉及此搖落天
晨起坐堂上散若飛鳥翮昔時可藏鴟今欲不庇蟬
顧視庭中艸亦復非阡陌百穀秋皆成是謂造化權
豈為艸木計而欲求兩全物理貴見微勇退差為賢
龜堂一隅開窗設榻為小憩之地

南門晚眺
路長試問神遊向何處月明揮榜上瀟湘

南門晚眺

奚奴前負一胡牀門巷楸梧已漸黃不歷塵埃三伏
熱孰知風露九秋涼蕭蕭浦瀨漁歌晚漠漠陂塘稻
穗香勿恨行雲吞素月夢回正愛雨淋漓

進德

進德工夫在日新正如更歷自知津迷時誤認毒為
藥定後始知天勝人四壁不妨身落魄萬夫誰敵膽
輪囷遺經在匱君毋厭燈火青熒漸可親

次韻邢德允見贈

人間榮瘁固難窮歲月推遷即老翁馬駿初非凡凡眼
識源深終與大川通細思渭北希高價終勝淮南誚
發蒙莫學三山頑鈍叟一生空耗太倉紅

秋懷

居在二家聚門纔一木橫用寬緣歲樂飲薄為時平
疎樹葉遲落遠村燈更明題詩雖艸艸亦足寫幽情

又

村晚歸牛下林昏宿鳥喧微升天際月半掩水邊門
衣杵悲邊信漁歌斷客魂老人交舊盡此意與誰論

又

客思殘荷外農功晚稻前祭多巫得職稅足吏無權
浦淑家家釣村墟點點煙歸舟葛衣薄始覺是秋天

又

典琴沽市贖賣劍買吳牛雞黍隨時具江山到處留
隨僧日一浴笑吏月三休安得沅湘客相從賦遠遊

又

心常疑不動形要小勞之活火閑煎茗殘枰靜拾棋
曬書朝日出丸藥晝陰移意適還休去悠然到睡時

又

曩得治中俸湖山偶卜居身書著禾譜兒解讀農書
遇事絕欣厭接人均戚疎乾坤雖浩浩等付一蘧廬

又

秋暑雖猶在晨興氣已清蠻童掃荒徑獠婢滌空罍
病樹有凋葉殘蟬無壯聲書生守故態已復理燈檠

又

種樹清陰滿鈔書蠹字穿老身猶在世屈指不知年
棄紙儲詩稿長筒聚藥錢一生如一日正可付之天

又

望遠目猶明登高腳更輕每思遊赤壁時夢上青城
燈下書如蟻花前飲似鯨古仙曾歷考強半出儒生

又

昨者風雨過浩然天地秋年光雙雪鬢生計一漁舟
賣藥來查浦聽猿到沃洲平生畏暑毒八月記初遊

出遊

來往人間不計年一枝筇竹雪垂肩掃除身外閑名
利師支書中古聖賢支遁山前饒石水葛洪井畔慘

又

風煙小癩大點君無笑買斷秋光不用錢
行路迢迢入谷斜藥籠來憩野人家山童負擔賣紅

又

果村女緣雜采碧花篝火就炊朝飯飯汲泉自煮午
甌茶閑遊本自無程數邂逅何妨一笑譁

東窗獨坐書懷

秋豪外物不關心竹塢梅村惜未深蓬戶夜涼燈煜
燭盆山雨潤木蕭森潔齋入靜三熏沐宴坐降魔七
縱擒但恨圖書闕調護不勝鼠齧與蟲侵

書數

齊民困衣食如疲馬思秣我欲達其情疎遠畏強恥
有司或苛取兼弁亦豪奪正如橫江網一舉孰能脫
政本在養民此論豈迂闊我今雖退休嘗綴廷議未
明恩殊未報敢自同衣褐吾君不可負願治甚飢渴

荷鋤

五畝畦蔬地秋來日荷鋤何曾笑爾輩但覺愛吾廬
膽怯沽官釀睡昏讀監書區區尚多事未解雜樵漁
病臥

老境偏饒臥秋天不肯晴愁憑書解散病仗藥支撐
果熟為烏樂村深雞犬聲邊頭定何似頗說募新兵

秋夜獨坐聞里中鼓吹聲

收盡浮雲見素娥青天脈脈映明河時平里巷吹彈
鬧歲熟人家嫁娶多高會不知清夜永散歸想見醉
顏酡小窗燈火晶熒處也有人慶七月歌

老歎

老翁終日飽還嬉常拾兒童竹馬騎食為齒搖艱咀
嚼冠因髮少易傾歌烏鳥歌罷人誰問咄咄書成自
不知堪笑殘生似蒲柳秋風未到已先衰

艸堂

南出湖塢有廢堤艸堂只在鶴巢西清風滿榻眠初
起落葉平溝路欲迷新酒已知迎社熟秋鶯猶作傍
蒼啼鄰翁相遇鏡言笑共喜年豐米價低

齋中讀書罷有感

少時學問苦匆匆致誦光陰轉手空聖域淵源雖自
力故交零落與誰同荒村莫恨身垂老後世元知論
自公但掩齋扉憑曲几忘憂正在寂寥中

雨欲作步至浦口

雨作千山暗風來萬木號放懷忘世事徐步出亭皋

野處惟知盡心期不復豪宋清捐善藥須賈遺絳袍
寧乞陶翁食難餽楚客糟精心窮易老餘力及莊騷
杖屨時行樂鋤耨慣作勞正令朝夕死猶足遂吾高
鏡湖有烏名水鳧鳴於春夏間若曰打麥作飯

偶有所感而作

人生天地中賦予各有限所享過所賦鮮不貽後患
玉食害而家此語禹所難麥飯勿謂薄耕時泥及軒
土墼竹為挾鹽酪調藜藿吾媿人豈知尚以陋見訕
恨亦見事遲失脚墮名宦千載梁伯鸞巍然吾無間
自述

自述

早畏危機避避巧九長安未到意先闌心如老馬雖知
路身似鳴蛙不屬官閑駕柴車無遠近旋沽村酒半
甜酸羣兒何足勞情恕胸次從初抵海寬

秋興

晨興秋色已凄凄嗚呼嗟猶聞隔浦雞說與譬門謝來
客要乘微雨理蔬畦

又

村酒甜酸市酒渾猶勝終日對空樽茅齋不奈秋蕭
瑟踴雨來敲野店門

又

困儲赤米枝梧飯篋有青氈準擬寒政使堆金無處
用不須常貯一錢看

又

病起殘骸不自支旋烹藜藿解飢羸一編蠹簡青燈
下恰似吳僧夜講時

又

莫笑門庭艸棘荒也能隨事各年光半瓶野店沽醇
碧一番鄰國餉矮黃

又

白頭韭美醃薑熟鱖尾魚鮮斫鱠成却對盤殮三太
息老年一飽費經營

又

淹速從來但信緣襟懷無日不超然喚船渡口因閑
立待飯僧牀得甞眠

又

懲羹吹蠶豈其非亡羊補牢理所宜白頭始訪金丹
術莫笑龜堂見事遲

又

赫赫能令京兆死沾沾正坐魏其愚何如陸子山行
樂臚膊常懸酒一壺

又

放翁老矣欲何之采藥名山更不疑但入剡中行百
里姓名顏狀有誰知

又

樵客高僧兩斷蓬偶同煙接泛秋風栖賢雪夜匆匆
別豈意相逢在剡中

又

鼙鼓華鯨響寺廊殘蕪落葉弄秋光蹇驢繫著門前
柳閑覓題名拂敗牆

秋夕書事

秋夕初多露漁家半掩扉鵲飛山月出犬吠市船歸
影瘦悲形瘁冠偏感髮稀眼中無宿土老我欲嘯依

又

寂寂青楓岸蕭蕭白版扉端居常賴動偶出却忘歸
時黍徵科簡師還驛置稀江村日無事煙火自相依

薄粥

薄粥杖梧未死身飢腸且免轉車輪從來不解周家
意養老常須祝甞人

拄杖

吾嘗評拄杖妙處在輕堅何日提攜汝同登入峽船

小築

小築清溪尾蕭森萬竹蟠養廬雖偏仄庭戶亦平寬
摘果觀猿哺開籠放鶴盤澹然還過日無處著悲歡

又

小築隨高下園池皆自然鋤山得靈藥斷坎遇寒泉
幽檻花房斂深林果蒂駢鄰翁亦好事相伴送流年

一編

一編垂首北窗前皎皎寧當逐物遷道有廢興何與
我心無媿怍始知天昔嘗西戍八千里今復東歸三
十年死去雖無勳業事九原猶可見先賢

埭北

煙村湖埭北魚市廟墻東急雨時時作輕舟浦浦通
薪芻聚津口簫鼓鬧林中烏桕禁愁得來朝數葉紅

風雨

殘暑時當盡清風勢自回重雲輶日月大雨挾風雷
老樹不自保毀巢吁可哀却愁新雁到莫境更禁催

解嘲

心如頑石志榮辱身似孤雲任去留酒瓮飯囊君勿
謂也勝滿腹貯閑愁

識喜

本自怕沾京洛塵固應不吐相君茵偶逃鼉作鯨吞
地幸保詩狂酒病身傲世曾歌楚人鳳著書久絕魯

郊隣山村且試筇枝興風月秋來正一新

寓興

窮巷無來客秋風獨浩歌壯年閑處老佳日病中過
甚欲攜長鑊仍思擁短蓑逢山皆可隱不必上三峩

老馬行

老馬虺隤依晚照自計豈堪三品料玉鞭金絡付夢
想瘦稗枯萁空咽嚙中原蝗旱胡運衰王師北伐方
傳詔一聞戰鼓意氣生猶能爲國平燕趙

農家

吳農耕澤澤吳牛耳溼溼農功何崇崇農事常汲汲
冬休築陂防丁壯皆雲集春耕人在野農具已山立
房櫓鳴機杼煙雨暗蓑笠尺薪仰有取斷屨俛有拾
洪水昔滔天得禹民乃粒食不知所從汝悔將何及
孩提同一初勤惰在所習周公有遺訓請視七月什

對酒作

齒落不廢嚼足跛尚能履書生之所遭僥倖有如此
自知窮事業元不直杯水徒行若車安蔬食如肉美
或時得斗酒亦復招鄰里不肯歌烏鳥行矣呼起

秋分後頓凄冷有感

今年秋氣早木落不待黃蟋蟀當在宇遽已近我牀
況我老當逝且復小彷徨豈無一樽酒亦有書在傍
飲酒讀古書慨然想黃唐耄矣狂未除誰能藥膏肓

即事示子通

四十已悲非少年耄期何事每歡然遊山夜雨眠僧
院沽酒秋風上釣船諸友詩章來壘壘小兒筆勢亦
翩翩眼邊不是常蕭索終憶巢居訪老仙 青城上官道

人結巢古松杪數十年

醉中絕句

有山有水登臨地無病無愁獻傲身世念秋毫除未
盡麴生應恨白頭新

又

左殮右粥年年飽南陌東阡處處閑幸免催租敗幽
興豈容對酒惜酩顛

種麥

墾地播宿麥飯牛臨野池未能貪佛日正恐失農時
斫斫鋤耨力勤勤祝史辭嘉平得三白吾飽豈無期

秋晚

梧桐落并牀蟋蟀在書堂徂歲聿云莫攬衣慨以慷
一生常踏踏萬事略更嘗積有銘心語南華論坐忘

又

身世呻吟裏園廬寂寞中家貧憂酒券才盡畏詩筒
陂水猶猶滿山苗穫欲空兒孫更力作勿媿禹遺風

秋穫後即事

多稼如雲接百城村村鼓樂賽西成頓寬公賦私逋
責一洗兒啼婦歎聲社酒將釀供晚酌秋菘玉潔芋
晨烹放翁醉飽摩便腹自衣毫甌試雪坑

又

秋穫春耕力尚餘雨中襪襖種寒蔬築居正可茨生
艸出市何妨借寒鹽老境朝晡數匙飯腐儒生死一
編書敲門忽有岷山使慚愧交情未作疎 是日得張季

長書

行飯至湖上

行飯消搖日有常青鞋又到古祠傍殘蕪滿路無多
綠落葉投空不待黃只道詩書能發冢豈知博塞亦
亡羊此身只合都無事時向湖橋看戲場

晨出

味爽睡饜足起扶藜杖行關山開曉色艸木度秋聲
市晚船初發奴勤地已耕道邊多野菜小摘助晨烹

老境

一生幸免踐危機老境還山飽蕨薇智士固知窮有
命達人元謂死為歸臨窗蜀紙瞻詩艸出戶鄆條繫
褐衣堪笑街頭小兒女問予君是伯休非

憶昔

憶昔梁州夜枕戈東歸如此壯心何蹉跎已失邯鄲
步悲壯空傳勅勒歌今日扁舟釣煙水當時重鎧渡
冰河自憐一覺寒窗夢尚想悟溪石可磨

自嘲

清心不醉猩猩酒省事那營燕燕巢惟有箸書殊未
厭莫年鐵硯亦成凹

解嘲

我生學語即耽書萬卷縱橫眼欲枯莫道終身作魚
蠹爾來書外有工夫

新寒

小雨戒新寒衡茆已怯寬氈香炊紫角門靜挂黃團
扶杖穿茶塢移舟傍釣難欲知秋有信霜鬢不勝繁

夜歸

野店燭炊飯溪橋夜據鞍天回河絡角海關斗闌干
牧舍牛生犢蔬園犬逐獮今年時序早九月已清寒

夢中作

萬里行求藥三生誓棄官鶴巢投莫宿松礎續朝餐
進火金丹熟凌風玉宇寒人間日月速歲歷又將殘
自勵

中年已懼小人歸況是駸駸老及時氣情欲歸思友
助學衰不進賴兒規無功追媿清時祿有命何憂晚
節飢羸病今年能未死潛心更下董生帷
九月一日未明起坐

病骨清羸八十餘空齋凄冷五更初忽聞雲表新來
雁起讀燈前未竟書坐久屢傳雞啞嗟嗟殘猶化蝶
蘧蘧農功漸畢身無事約束家童種晚蔬
小疾偶書

書生本願致時康自怪秋來疾在牀胸次豈無醫國
策囊中幸有活人方但知元氣為根本正使長生亦
批糠豎子何勞一除掃區區猶欲恃膏肓
初寒晨起

推枕悠然起寒燈誰與同曉窗俄已白宿火尚能紅
老境呻吟吟外年華寂寞中長飢亦何恨聊復固吾窮
霜降前四日頗寒

草木初黃落風雲屢闔開兒童鋤麥罷鄰里賽神回
鷹擊喜霜近鶴鳴知雨來盛衰君勿歎已有復燃灰
題驛壁

輪囷古柳驛門前糴米歸遲突未煙隨計入都今四
紀體寒僕瘦只依然

閑遊
大冠長劍已焉哉短褐禿巾歸去來五世業儒書有
種一生任運仕無媒麥經小兩家家下菊著新霜處
處開自笑閑遊心未歇青鞋蹋碎白雲堆
貧舍寫興

過故應高臥有餘歡

又

粲粲新霜編瓦溝離離寒菜入盤羞貧童擁壘掃枯
葉贖婢挑燈縫破裘 寶璣曾紀實

秋晚雨中作

新雁南來歲又殘蕭蕭風雨暗江干客疎似悉爾來
病酒薄不禁如許寒艸絡籬頭花尚碧樹當浦口葉
初丹醉來且擁黃紬睡莫問何時后土乾

待旦

晨光殘淡月急點殺寒更歷歷記孤夢悠悠帶宿醒
攬衣推枕起亂髮遶牀行歎息人間事還隨初日生
夜意

浮雲掃盡天如水十里疎鐘到野堂窗紙月明人不
睡屋茅霜冷夜初長歸休固已師沮溺承學猶能陋
漢唐安得子孫常念此不妨世世業耕桑

湖村

四十來居湖上村翻翻七見改初元風梢解筆竹過
母露葉成陰桐有孫渴鹿出林窺藥井馴鷗掠水傍
棋軒老人不用誇頭健時看孫曾浴畫盆
連夕熟睡戲書

投壻塵機息捐書困味長早眠猶有日晚起已無霜
蝶入三更枕龜楮八尺牀昏昏君莫笑差差勝醉為鄉
小軒

礎杵聲中去日道小軒風露一簾秋人間走徧心如
石分付寒蠶替說愁
曉寒

悠悠殘夢伴殘更萬木風號曉氣清難唱欲闌開井
汲月痕漸淺覺窗明突煙騰碧炊初動衣焙堆紅火
已生小閣翻書發褐暖早朝霜滑媿公卿
次韻朝陵葉院察時見寄

憶昨翻然別衆仙秋風吹鬢感凋年虛齋無復客滿
座敗屨空餘詩百篇高誼未忘林下約清吟重結社
中緣不教落在塵埃地萬頃煙波一釣船
書意

巢山遠下溼止酒謝中乾麤得養生妙孰能非意干
挂冠身始貴屏華疾方安自笑猶多事時時把釣竿

九月下旬即事

霜晚知麪熟山寒喜酒釀黃絲聽夜織赤米看晨春
儲藥扶持老收薪準備冬兒扶還客拜顧影歎龍鍾

城南

城南亭榭鎖閑坊孤鶴歸飛只自傷塵漬苔侵數行
墨爾來誰為拂頰牆

舟中記夢

石帆山下一漁翁風雨蕭蕭臥短篷幽夢覺時還自
笑閬州城北看蠶叢

送周郎

我居山陰古大澤四顧茫茫煙水白平時轍跡所不
到玉樹郎君肯來客衡門僅可俛首過陋室真成容
膝在木盤設食菜數箸共飽知君不予責期年相從
無夜旦一日復有千里隔送君津頭淚如綆老身恨
不生羽翮江湖道險非一二觸處兢畏真良策從今
日望平安書我欲燈前手親拆

村舍得近報有感

莫謂山村僻時聞詔令傳寬民除宿負募士戍新邊
霜重瓦欲裂月明人少眠殘年抱遺恨終媿祖生鞭
貧歎

明日復作一首自解

老叟年年病書生世世貧盜寧窺破棗雀亦棄空園
屋壞須撐拄衣穿厭補紉今朝風日美且復過比鄰

句寄之

飄零舊交少衰疾壯心違每顧兒童笑吾貧未解圍
子虛調官行在寓鐵團巷初冬遽寒甚作兩絕
歲晚江湖行路難一樽何日共開顏汝方僵臥鐵團
巷我亦飢吟飯穎山
又

知汝彈冠意易闌苦貧未免覓微官鐵團巷口殘燈
火愁絕霜風十月寒

劍南詩稿目錄
卷第六十九

初冬步至東村 南門散策二首 思北鄰韓
三翁西鄰因養主南鄰章老秀才二首 二毀
大風不能出戶 晚菊 舍南雜興三首
自詠二首 風霜 十月 記夢 幽興 夜
聞雨聲 訪山家 自法雲回過魯墟故居
旅舍 書几試筆 道室偶書 觀渡江諸人
詩 村居閒甚戲作二首 夜投山家四首
聞西師復華州二首 舟中 得趙昌甫寄予
及子通詩 飯後登東山 東村 石堰村
袖手 幽居遣懷三首 湖上晚歸 宿村舍
村飲二首 食野味包子戲作 醉中作
感老 寺壁偶題 贈道流 冬夕閒詠 飯
後自嘲 感舊二首 村老留飯 醉歌二首
力耕 春近 夜坐聞鼓聲 小室 老景
夜坐 晨起 貧述 自述 十一月廿七
日夜分披衣起坐神光自兩皆出若初日室中
皆明作詩志之 歲莫遣興二首 道室即事
四首 泛舟過金家埂贈賣薪王翁四首 冬
晴 寄隱士 幽事 去新春纔旬餘霽色可
愛 作雪遇大風遂晴 冬夜 書意三首
山房 卽事六首 戍兵有新婚之明日遂行
者予聞而悲之爲作絕句二首 夢中作 覈
茶示兒輩 雨中示鄰里 記出遊所見 立
春前七日聞有預作春盤邀客者戲作 春前
六日作

劍南詩稿卷第六十九

宋陸游務觀

初冬步至東村

八月風吹梗稻香九月蕎熟天始霜男耕女饁常滿
野宿麥覆塊皆蒼蒼豐年比屋喜迎客花底何曾酒
杯逢家人但覓浩歌聲不在東阡在南陌

南門散策

結宇溪一曲兩山左右之橫木以為門斷竹作短籬
本無剝啄客門杜固不施登路壞莫補石罅生棘茨
野蔓不知名丹竇何纍纍村童摘不訶吾亦愛吾兒

又

槐楸陰最茂秋晚惟空枝今日晴無風散步適其宜
右扶青溪杖左挾斜川詩石琢四腰鼓可以休我疲
清言出正始不雜世論卑野僧何處來成此一段奇

思北鄰韓二翁西鄰因菴主南鄰章老秀才

韓翁生不識官府半醉長歌老煙浦因師老乃學長
齋白飯青蔬自炊煮二君要是可喜人未嘗一語欺
其鄰有過無過姑置之後生孰能如此真

又

鄉閭耆宿非復前老章病死今三年朝來出門為太
息不見此翁催社錢我比翁雖差識字向來推擇嘗
為吏事功自計無一毫尚不如翁終日醉

二毀

茶杯得之久石硯日在前一朝忽墜地質毀不復全
附著以膠漆入用更可憐杯猶奉飲歎硯不廢磨研
向使遂破碎亦當歸之天動心則不可此物何足捐

大風不能出戶

昨日欲出病見留今日可出風復作室虛窗白爐火
暝閉戶幸有圖書樂一杯淡粥飽則已下箸豈復思
藜藿山禽念我太寂寥故作叩門聲刺啄

晚菊

蒲柳如懦夫望秋已凋黃菊花如志士過時有餘香
眷言東籬下數株弄秋光粲粲滋夕露英英傲晨霜
高人寄幽情采以泛酒觴投分真耐久歲晚歸枕囊

舍南雜興

浙浙莫風生暉暉殘月明開門喜閉望扶杖得徐行
霜薄樹多綠泉流溝有聲兒童殊可念畫地作棋枰

又

莎徑依山曲柴扉竝水開不因行藥出即為覓詩來
戒婢挑蔬甲催兒斲芋魁隨宜也能飽漂母未須哀

又

麻菽連枝熟柴荆盡日關臨池驚鷺起倚柱待雲還
倦憩石腰鼓行攜銅博山老人無定意所到即開顏
石工琢石作杖鼓樣以坐

自詠

足蹇須人慣顏衰著蠶多飯遲惟靜臥酒至亦高歌
蝗死繁蔬甲霜清長藥窠經旬鄰父病且喜復來過

又

莫笑幽棲僻謀生亦未疎殘困具薄粥半俸補殘書
均節貧無患安恬疾可除雖云苦寒近隨手蓄薪樗

風霜

天上風霜慘人間日月道江湖南北雁原野雨晴鳩
莽蒼新阡陌凋零舊輦流惟應赤藤杖伴我送悠悠

十月

紅樹平沙十月天放翁今作水中仙蓼蘩林外迎神
鼓隻隻溪頭下釣船世事極知吾有命俗人終與汝
無緣菊花枯盡香猶在又付東籬一醉眠

記夢

久住人間豈自期斷砧殘角助凄悲征行忽入夜來
夢意氣尚如年少時絕塞但驚天似水流年不記鬢
成絲此身死去詩猶在未必無人覩見知

幽興

池水車初滿荆籬補已成身閑詩簡淡心靜夢和平
雁後寒強至楓先柏葉頽居然足幽興未數歲崢嶸

夜聞雨聲

我似騎驢孟浩然帽邊隨意領山川忽聞風雨掠窗
外便覺江湖在眼前路過郵亭知幾處身如估客不
論年未妨賸擁寒衾臥贏取孤吟入斷編

訪山家

捨舟步上若耶溪壽櫟修藤路欲迷僧院倚山馴栗
鼠野塘漲水下芙蓉艸侵古路迢迢遠雲傍行人故
故低薄莫但尋遺毳去山家正在鶴巢西

自法雲回過魯墟故居

枳籬數掩閉柴扉白碓聲中煙火微雪暗杜陵無雁
下雲迷遼海有人歸耕疇且復償初願官路那知脫
駭機更有冬來歡喜事芋魁豆兩不勝肥

旅舍

寺鐘吹動四山昏繫纜來投江上村木落不妨生意
足水歸猶有漲痕存爐紅手暖書差健鼎沸湯深酒
易温勿爲無年憂寇竊信信小犬護籬門

書几試筆

鬢毛蕭颯齒牙疎九十侵尋八十餘屋小苦寒猶省
火窗明新霽倍添書解梁已報偏師入上谷方看大
盜除藥笈著囊幸無恙蓮峯吾亦葺吾廬 偶見報西師

復關中郡縣昔予常有卜居條華意因及之

道室偶書

置心常在結繩前縱未登仙亦永年秦不及期周過
曆灼然由我不由天

觀渡江諸人詩

中朝文有漢唐風南渡詩人尚數公正使詞源有深
淺病懷羈思亦相同

村居閑甚戲作

人厭塵囂欲學仙上天官府更紛然不如嘯傲東籬
下且作人間過數年

又
題詩本是閑中趣却爲吟哦占却閑我欲從今焚筆
硯興來隨分看青山

夜投山家

驀溝上飯到山家牧豎響門兩響了葑火正紅煨芋
熟豈知新貴築堤沙

又

夜行山步鼓擊擊小市優場炬火紅喚起少年巴蜀
夢宕渠山寺看蠶叢

又

生艸茨廬荆作扉數家煙火自相依大兒飼犢舍邊
去小兒捕魚溪口歸

又

房櫳深深續火明垣屋蕭蕭響穀聲作官覓飽最緣
筭羨爾爲農過一生
聞西師復華州

又

西師驛上破番書鄂杜真成可卜居細肋臥沙非望
及且炊黍飯食河魚
青銅三百飲旗亭關路騎驢半醉醒雙鷺斜飛敷水
綠孤雲橫度華山青

舟中

振拖柯橋北維舟艸市西月添霜氣峭天帶斗杓低
浦凍無魚躍林深有鶴棲不嫌村酒惡也復醉如泥
得趙昌甫寄子及子通詩

去國雙蓬鬢還山一鹿車壯慚稽古淺老悔養生疎
俗態慵開眼高吟獨起予青燈對余子併爲問何如

飯後登東山

飯已茶未成褰裳步山徑雖云筋力衰拄杖猶濟勝
天高樓塔麗霜落溝港淨豈惟野實丹已覺林筍迸
井桐亦強項葉脫枝愈勁啼鳥久不去將無助幽興
盤紆穿翠谷欹仄下危磴所嗟無客來誰與持塵柄

東村

今日風日和衰病亦少平出門無所之攜幼東村行
吳地冬未冰濺濺溝水聲山卉與野蔓結實丹漆并
雞犬亦蕭散如有世外情舉手叩柴扉病叟喜出迎
從我語蟬聯未寒疇昔盟解囊付之藥與爾偕長生

石堰村

木落山不蔽水縮洲自獻寒日晚更明村巷曲折見
小婦鳴機杼童子陳筆硯農家雖苦貧終勝異鄉縣
君看宦遊子豈無墳墓戀生死在故鄉切勿慕乘傳
袖手地爐傍身閑日自長窗明蠹簡字簾約篆盤香
道士傳琴譜山僧送藥方自然塵事遠不用濯滄浪

幽居遣懷

大患元因有此身正須枵腹對空困扶持接客寧嗟
老質貧迎醫未厭貧確下罕遺雞豚粒席間不掃鼠
行塵時時笑顧兒曹說縱有煙霄莫問津

又

斜陽孤影數伶仃橫按烏藤坐艸亭閑久更知貧有
味病多那責藥無靈農書甚欲從師授忍字常須作
座銘更喜友生能餉酒欣然一醉倒長瓶 東陽郭希呂

餉石洞酒

習氣深知要掃除時時福念獨何歟呼童不應自生
火待飯未來還讀書世態詎堪閑處看俗人自與我
曹疎作詩未必能傳後要是幽懷得小據

湖上晚歸

蓬山再別四經秋來日翩翩去日道無酒可傾殊省
事有詩渾忘亦良籌梅花遮路如撩客柳葉飄風已
滿溝湖上榜舟歸薄莫斜陽紅入寺家樓

宿村舍

臚瘦童僵小作程村翁也復解逢迎霜林已熟橙相
餽雪簪初開芋可羹土榻圍爐豆楷暖荻簾當戶布

機鳴解囊自取殘編讀何處人間無短檠

村飲

雪前雪後梅初動街北街南酒易賒身健不妨隨處
醉有家未必勝無家

又

醉插江梅老更宜猶能小樹揀繁枝假令住世十小
劫應愛此花無厭時

食野味包子戲作

珍餉貧居少寒雲萬里寬疊雙初中鵠牢九已登盤
放箸摩便腹呼童破小團猶勝濃西老菜把仰園官

醉中作

名醞羔兒拆密封香粳玉粒出新春披綿珍爨經旬
熟研雪雙螯洗手供吟罷欲沉江渚月夢回初動寺
樓鐘爐煙裊裊衣篝暖未覺家風是老農

感老

人生六十已為衰況我頽齡及耄期對酒尚如年少
日愛書不減布衣時遠遊每動辭家興大藥方從出
世師但向青編觀曩事英雄何代不兒嬉

寺壁偶題

斷山支徑得行吟度礮穿林不厭深雉挾兩雌飛谷
口烏將數子下牆陰前三喜接高人語方寸寧容俗
慮侵少待新春好風日不妨攜客更相尋

贈道流

羽人邂逅飲旗亭自說經年醉不醒曾伴翰林遊赤
壁仍邀內史寫黃庭古琴蛇蚶評無價寶劍魚腸託
有靈太華何時尋此約九霄風露宿青冥

冬夕閑詠

柳眼梅鬚漏泄春江南又見物華新終年幽興遺身
世半夜孤吟槍鬼神客有疎親俱握手酒無賢聖總
濡脣放翁自命君無笑家世從來是散人

飯後自嘲

歲熟家彌困天寒酒闕傾僅能炊稻飯敢望糝藜羹

一榻解腰臥四廊摩腹行詩人要疎瘦此日媿膨脹

感舊

憶昔初乘上峽船雪灘雲岫過聯翩忽忽不暇尋高
隱遺恨于今四十年扇子峽有隱士

又

雕鞍送客雙流驛銀燭看花萬里橋二十三年真一
夢茆簷寒雨夜蕭蕭

村老留飲

乘興出遊眺初不言所之家人固難求我亦不自知
投杖却人扶疾步莫能追荒寒野廟墻枯涸漚菅池
過門爭邀留具食不容辭濁醪小瓮釀香飯別甑炊
瓦盆進豚肩石臼擣花糝新冬不易見醉倒理亦宜
舉手謝主人外強中實衰一觴可以起它日更為期

醉歌

艸書大叫寫成圖博籥隨聲喝作虛何似即今雲海
上千鈞強弩射天吳

又

百騎河難獵盛秋至今血漬短貂裘誰知老臥江湖
上猶枕當年虎鬪體

力耕

力耕歲有一困米殘俸月無二萬錢莫怪窮空心不
動正緣愚拙氣差全學經塵壘懸車後秉禮拳拳易
簣前猶恨未能忘筆硯小兒收拾又成編子通編予詩
續稿成四十八卷卷有百篇

春近

開禧忽見第三春身寄楓林野水濱吾道幸逢天道
在物華又與歲華新郊原處處堪行樂道路人人可
問津剩辦青鞵并布襪若耶已報綠生鱗

夜坐聞鼓聲

村居樂飲鼓襲襲亭障無虞歲屢豐誰道喧呼妨熟
睡老人自愛地爐紅

小室

地福焚香室窗昏釀雪天爛炊二脣飯側枕一肱眠
身似嬰兒日家如太古年狸奴不執鼠同我愛青氈

老景

老死知無日天公偶見寬疾行逾百步健啖每三冷
身瘦短裁褐髮稀低作冠年來更小點不據伏波鞍
夜坐

地僻少行跡屋低便老人爐紅得清坐酒綠慰孤斟
吠犬驚飄葉栖禽換暗林人間固多難感概不須深

晨起

小疾蠲除盡閑愁壑闢空時光雞唱裏生計確聲中
戒婢儲猿果看奴織鶴籠老人新得道處處見神通

貧述

寒生肌粟苦衣單瘦減頭圍覺帽寬荒寂在家猶逆
旅窮空養老亦蔬餐柴青竈突騰煙細膏盡燈缸照
字難猶喜新醅二斗熟半窗梅影助清歡

自述

勃落為衣隱薛蘿掃空塵抱養天和過期未死更強
健與世不諧猶嘯歌野市蕭條殘葉滿酒家零落廢
壚多石帆山下孤舟兩借問君如此老何

若初日室中皆明作詩志之

靈府無思睡息微神光出皆射窗屏大冠長劍竟何
有尺宅寸園今始歸憂患過前皆夢事功名自古與
心違二峯二室煙塵靜要試霜天樹葉衣

歲莫遣興

昔慕騷人賦遠遊放懷蜀棧楚山秋橘中尚可著四
老海外誰云無九州薄酒時須澆舌本閑愁莫遣上
眉頭幅巾短褐吾差便實厭衣冠裹沐猴

又

病著愁侵併不支孤村況遇歲殘時水軒客散成舒
慵山寺僧來得劇棋銅鴨香生風嫋嫋竹雞聲斷雨
絲絲新詩煨煉功何似問著衰翁自不知

道室即事

看盡吳山看蜀山歸來不減舊朱顏宣和遺老凋零
盡况說祥符景德間

又

松根茯苓味絕珍甌中枸杞香動人勸君下筇不領
略終作邱山一簞塵

又

徧遊海嶽却歸秦除却南山萬事新長劍高車何足
道金人十二也成塵

又

黃金堆屋無處用甲第連雲誰與居莫笑先生無僕
馬風雷萬里跨鯨魚

泛舟過金家埂贈賣薪王翁

水生浦澈多浮鴨風急汀洲有斷鴻渺渺江天無限
景一時分付與樵翁

又

老人不復事農桑點數雞豚亦未忘洗腳上牀真一
快稚孫漸長解燒湯

又

賣薪自可了鹽酪治地何妨栽果蔬我老鈍頑請平
半俸比渠只有不能如

又

輒炊豆飯可支日厚絮布襦聊過冬閭巷家家歌聖
澤子孫世世業春農

冬晴

歲莫常年雪正豪今年暗暖減絺袍春回山圃梅爭
發睡足茆簷日已高倉庾家家儲舊穀笙歌店店賣
新醪太平氣象方如許寄語殘胡早遁逃

寄隱士

乳竇寒猶滴巖扉夜不扃奇書窺鳥跡靈藥得人形
浩浩天風積冥冥海氣清儻逢王內史更為乞黃庭

幽事

老大常愁節物催東皇又挽斗杓回江天慘慘不成
雪山驛蕭蕭初見梅隱士寄雲從地肺遊僧問路上
天台戲書幽事無時闕古錦詩囊莫莫開

去新春纔旬餘霽色可愛

宦遊強半侍僊祠況是懸車耄及時厚薄人情窮易
見陰晴天氣病先知綠樽一醉真當勉白髮千莖莫
自疑野渡山村梅柳動身閑何處不熙熙

作雪遇大風遂晴

雪作風散之雪止風亦定霽日上窗扉明暖起我病
去春財十日共喜時序正晨興盥頰罷白髮滿清鏡
門前無客至默臥弄塵柄叢竹如有情代我發孤詠

冬夜

我生何多艱塌地皆九折君恩許歸休幸與世俗絕
幽居鄰不觀奚止掃車轍地爐清夜中危坐燈欲滅
開門月滿庭皓皓如積雪隔溪聞鶴鳴靈府為澄澈

書意

飲酒以散愁服藥以去病區區積外物豈足語性命
清晨坐堂上萬事一袖手愁病初無根孰謂藥與酒
掀髯笑穉阮舉袂謝和緩氣住則神住時至骨自換

又

解牛悟養生牧羊知治民通一萬事畢我每思古人
小園財三畝手自執嘉木先當培其根又戒無欲速
老松臥澗底千歲陵冰霜我豈樗櫟哉但取無伐傷

又

唐堯授人時妙用均造化我讀七月詩周室亦其亞
彼用治四海我斂之一身至理之所在太山等微塵
鍊氣以成真豈復有它術譬如尊六經百氏當盡黜

山房

擾擾人間歲月移山房幾度換茅茨身遊與世相忘
地詩到令人不愛時老鶴初來未丹頂穉松親種已
虬枝東塗西抹非無意斂面朱鉛太不宜

即事

老來百事似嬰兒，美睡甘餐只自知。陋屋略如營窟，世淳風不滅結繩時。

鴻冥固自辭，增繳樗散猶能謝斧斤。況是溪山幽絕地，有人高臥百重雲。

閑行靜坐樂誰知，紅飯青蔬美有餘。常笑癡人不更事，時時愁歎欲何須。

有人叩戶皆吾友，得屋施牀即我家。緩步東西行飯耳，元非看竹探梅花。

了事如何省事奇，無心始覺有心癡。三更急雨打窗破，正是擁爐危坐時。

高人鬻駱放柳枝，豪士駿馬換蛾眉。人間解事誰如我，小蹇山童自謂宜。

送女忽忽不擇日，綵繞羊身花照席。莫婚晨別已可悲，猶勝空房未相識。

夜靜孤村聞笛聲，溪頭月落欲三更。不須吹徹陽關曲，曲中有征人萬里情。

野鶴翩僂啄米粒，微碧桃縹紗著花。稀海山又見春風到，丹竈苔封人未歸。

團坐團樂且勿譁，飯餘共舉此甌茶。纔知道義死無憾，已迫耄期生有涯。小圃花光還滿眼，高城漏鼓不停揭。閑人一笑真當勉，小榼何妨問酒家。

兩中示鄰里

寒風吹細雨，白晝見日罕。經旬廢讀書，天豈成我願。比鄰各無聊，會面苦不款。未嘗燒茶鑪，而況把酒盃。高談極奇趣，散去意亦滿。癡點未易名，要是工用短。記出遊所見。

我行初無折簡招，出門十里未覺遙。憩裝蕭蕭北嶠寺，策蹇渺渺西村橋。眉頭那可遣愁到，舌本正要著酒澆。寒風朝作入裘褐，荒祠莫過奠桂椒。平郊煙斂見聚落，細路日落逢漁樵。安得丹青王右轄，為寫此

殺傳生緒。立春前七日聞有預作春盤邀客者戲作

蓼芽蔬甲簇青紅，盤筋紛紛笑語中。一餅不分空腹望，莫年知有幾春風。

春前六日作。夜枕夢回春雨聲，曉窗日出春鳥鳴。典衣沽酒莫辭醉，自有梅花為解醒。

劍南詩稿卷第六十九終

劍南詩稿目錄
卷第七十

立春後作 舟中 小園春思二首 禹祠
今年開歲三日上元三夕立春人日皆大晴
題野人壁 小市 柳 見事 夜雨 自詒
初春幽居二首 自勉 春遊 晝坐 正
月十六日送子虞至梅市歸舟示子通 聞百
舌 畜一雞報曉聲清圓而鳴每晚戲書絕句
書村落間事 行歌 開歲頗思江湖遊適
憶昨三首 排悶 識喜 枕上作 近村
讀史二首 羸臥 春感 八十三吟 小
園花盛開 出遊歸臥得雜詩八首 感舊
寄龔立道 寓歎 春晚二首 幽事二首
讀李杜詩 煙波卽事十首 茅舍 子通入
城三宿而歸獨坐凄然示以此篇 莫春新路
至湖上示元敏 閔雨 春和初遷坐堂中
春晴暗甚花開略無餘矣賦以寓感 春晚
春陰溪上小軒作 散策至湖上民家 枕上
聞雨聲 聞里中有鬪者作此示之 春寒
石帆山下 餘寒 自九里平水至雲門陶山
歷龍瑞禹祠而歸凡四日八首 春早得雨二首
春晚二首 春晚南堂晨起二首 見鶻補
巢戲作 子素不工書故硯筆墨皆取具而已
作詩自嘲 春晚卽事四首 懷昔 書感
夜中獨步庭下

劍南詩稿卷第七十

宋陸游務觀

立春後作

春不遺窮僻天如念寂寥鳥鳴知節換池溜覺冰消
冷燧供新葺輕裘換故貂豐年無疾苦鄰曲遞相招

舟中

江天雲斷漏斜暉靡迤羣山翠作圍帆影似經吳赤
壁鏘聲如下蜀青衣臥聞裂水長魚出起看凌風健
鶻飛禹會橋邊最清絕憶曾深夜叩漁扉

小園春思

小軒愁入丁香結幽徑春生荳蔻梢若論此時吟思
苦縱磨鐵硯也成凹

又

重臺謾艸初離土百葉細梅已滿枝莫道山家殺風景
也能醉倒向東籬東籬予小圃名

禹祠

祠宇嵯峨接寶坊扁舟又繫畫橋傍豉添滿筍蕪絲
紫蜜漬堆盤粉餌香團扇賣時春漸晚夾衣換後日
初長故人零落今何在空弔顏垣墨數行

今年開歲三日上元三夕立春人日皆大晴

今歲晴和歷歲無江城歌舞溢通衢天心只向人心
卜不用懸勳問紫姑

題野人壁

身如魚鳥出池籠常在陂湖艸莽中簫鼓相聞村社
密桑麻無際歲時豐市墟買酒何人識僧閣煎茶欠
客同久欲瀟湘寄清嘯它年一棹莫匆匆

小市

春風小市畫橋橫橋北橋南次第行絕景惟詩號勅
敵閑愁賴酒作長城樓臺到處靈和柳簾幙誰家子
晉笙薄莫歸來漁火開放翁自笑欲忘情

柳

春來無處不春風偏在湖橋柳色中看得淺黃成嫩
綠始知造物有全功

見事

流光莫恨去聯翩見事還疑勝昔年細改新詩須枕
上少留劇飲待花前陰陰竹塢安茶竈淺淺蘋汀著
釣船物外家風吾豈敢散人名號亦充員

夜雨

江邊依舊釣舟橫萬事何曾有一成空憶廬山風雨
夜自吹小竈煮蔓菁

自語

一塵東近會稽城鑿破煙蕪侂侂耕上藥養神非近
効善言銘座右要躬行論書尚欲心先正學道寧容氣
不平天付吾儕元自足滿園春薺又堪烹

初春幽居

滿榼芳醪手自攜陂湖南北埭東西茂林處處見松
鼠幽園時時聞竹雞零落斷雲斜郭日霏微過雨未
成泥老民不預人間事但喜農疇漸可犁

又

小築園林淺鑿池身閑隨事得遊嬉幽花折得露猶
溼嘉木移來根不知小蝶弄晴飛不去珍禽喜靜語
多時風光未忍輕拋擲聊付詩囊與酒卮

自勉

學詩當學陶學書當學顏正復不能到趣鄉已可觀
養氣要使完處身要使端勿謂在屋漏人見汝肺肝
節義實大閑忠孝後代看汝雖老將死更勉未死間

春遊

梅市移舟過古城此行亦未闕逢迎負薪野老無妻
子施藥山人隱姓名風雨偏宜宿茅店鹽醃不遣到
藜羹宜和版籍今誰在似是天教樂太平

晝坐

早春風雨暗江干羔酒狐裘不敵寒輪與蒲龕深袖

手一爐真火養金丹

正月十六日送子虞至梅市歸舟示子適

策府還山白盡頭一塵隨分葺菟裘看燈雖幸新春
健無食猶懷卒歲憂稚子與翁俱襁褓大兒出塞習
兜鍪它時別作謀生計賣藥惟當學伯休

聞百舌

春鳥雖僂言春盡能齧舌秋蛭與寒蟹亦各知時節
微物顧能此人乃獨不然君看甘陵黨作孽非由天

畜一雞報曉聲清圓而鳴每晚戲書絕句

雞鳴平日未為遲恰是山房睡覺時著屐起尋溪上
路野梅猶有未殘枝

書村落間事

東巷南巷新月明南村北村戲鼓聲家家輪賦及時
足耕有讓畔桑無爭一村婚媾皆鄰里婦姑孝慈均
母子兒從城中懷肉歸婦滌釜供刀七再拜進酒
壽老人慈顏一笑温如春太平無象今有象窮虜何
地生煙塵

行歌

孤村小市負薪歌造物其如此老何靈藥已能驅疾
豎醇醪不用戰悲魔

開歲頗思江湖遊適

健筆當年賦遠遊即今局促但堪羞雖為月下孤舟
客未醉天涯七澤秋丹熟竟當金換骨客來從笑雪
蒙頭龍泉本約同歸隱肯為春耕欲換牛

憶昨

入蜀還吳迹已陳蘭亭道上又逢春諸君試取吾詩
看何異前身與後身

又

當年落魄錦江邊物外常多宿世緣先主廟中逢市
隱丈人觀裏識巢僊 遽遭人賣藥成都市中巢僊謂上官先生

又

萬里曾為汗漫遊豈知白首弄漁舟會騎一鶴凌風

去何處人間無酒樓

排悶

抱耒返東臯初非憚作勞飢寒凜未免老病適相遭
開卷無如懶飛觥豈復豪不辭窮到死猶足竊名高

識喜

齒搖徐自定髮脫却重生意適簪花舞身輕捨杖行
僧招決棋戰客讓主詩盟尚欲瀟湘去煙帆不計程

枕上作

謝事還家一老農悠然高臥聽晨春雖無客共樽中
酒何至僧鳴飯後鐘采若未能浮楚澤思鱸猶欲釣
吳松自餘萬事慵開眼知結宗門案幾重

近村

人去柴車十里中竹林密處路纔通漸聞水磴知村
近遙望禾困喜歲豐漁艇往來春浪碧人家高下夕
陽紅百錢又向旗亭醉自笑吾生亦未窮

讀史

人間著脚盡危機睡覺方知夢境非莫怪富春江上
客一生不厭釣漁磯

又

榮悴紛紛醉夢中轉頭何事不成空全家采藥鹿門
去我憶襄陽龐德公

羸臥

羸臥將如老景何小園風月且婆娑茶因春困論交
密酒為家貧作態多馬上元無聽雞句原頭那有飯
牛歌自憐遠屏猶多事賣藥歸來買釣蓑

春感

老厭紛紛懶入城長亭小市近清明隴頭下漏初芸
艸陌上吹簫正賣錫多病更知生是贅九原那恨死
無名但餘一事猶關念萬里唐安闕寄聲 張季長久不
通書或傳其臥病甚耿耿也

八十三吟

石帆山下白頭人八十三回見艸春自愛安閑忘寂

冥天將強健報清貧枯桐已爨寧求識弊帚當捐却
自珍桑苧家風君勿笑它年猶得作茶神

小園花盛開

厭住愁城徒醉鄉春風也肯到山房鴨頭綠張池平
岸猩血紅深杏出牆淡薄相遭心已懶修行無力夢
猶狂更嗟著句多塵思慚愧溪藤似截肪

出遊歸臥得雜詩

江天缺月西南落村路寒雞一再鳴自笑此身羈旅
慣野橋孤店每關情

又

江村何處小茅茨紅杏青蒲雨過時半幅生絹大年
畫一聯新句少游詩

又

眼明未了觀山債力在猶能涉水行莫笑軒然誇老
健身存終勝得浮名

又

壯歲經春在醉鄉老來數酌不禁當正須獨倚蒲團
坐領略明窗半篆香

又

兒扶行飯出柴扉僂僕方嗟氣力微道側偶逢耘麥
叟倚鋤閑話兩忘歸

又

久讀僊經學養形未容便應少微星一枝新鍛金雅
觜更向名山斲茯苓

又

薺花如雪滿中庭乍出芭蕉一寸青老子掩關常謝
客短蓑鋤菜伴園丁

又

晚交數子多才傑誰肯頻來寂寞鄉但寄好詩三四
幅絕勝共笑億千場

感舊

自蜀還吳會先憑劍換牛掃除狂習氣謝絕醉朋傳

去死時猶遠餘生已覺浮即今真憊矣閉戶尚何求
寄龔立道

龔子吳中第一流老農何幸接英遊難逢正似玉杵
白易散便成風馬牛清夜話端思滾滾莫年心事恐
悠悠何由喚得閻門權一醉千崑萬壑秋

寓數

五福惟無富嗟子得已多禪房時託宿酒市每酣歌
詩瘦慵看鏡棋鏖恐爛柯殘年猶有幾切莫負漁蓑

春晚

客夢初回夜漏殘東村想見杏花繁未能便逐啼鴉
起自掩屏風護曉寒

又

湖上春寒雁已歸宿醒殘夢兩依依也知晨起元無
事窗白爐紅且攬衣

幽事

跌宕人間歲月遷賞心幽事故依然潮通支浦漁舟
活露溼繁花醉帽偏才盡賦詩愁壓倒氣衰對奕法
鏡先光陰風月空如昨悵望蘭亭被禊年

又

塵抱年來盡掃空柴門幽事與誰同水生初漲一溪
綠花落已浮千點紅愁賴蒙泉存舊法予家釀用岐下
蒙泉麴法困憑顧渚策新功故人岷下無消息尺素
憑誰寄斷鴻謂張季長

讀李杜詩

濯錦滄浪客青蓮澹蕩人才名塞天地身世老風塵
士固難推挽人誰不賤貧明窗數編在長與物華新

煙波卽事

短髮垂肩不裹巾世人誰識此翁真阻風江浦詩成
束賣藥山城醉過春

又

煙波深處臥孤篷宿酒醒時聞斷鴻最是平生會心
事蘆花千頃月明中

又
家浮野縱無常處身是閑人不屬官但有濁醪吾事
足浮名不作一錢看

又
落雁沙邊艇子斜分明清夢上三巴眼明一點炊煙
起不是漁家即酒家

又
雕胡炊飯芰荷衣水退浮萍尚半扉莫爲風波羨平
地人間處處是危機

又
夢筆橋邊聽午鐘無窮煙水似吳松前年送客曾來
此惟有山僧認得儂

又
浪迹人間數十年紹興間自剡中入天台始有放浪山水之興
年年散髮醉江天岳陽樓上留三日聊與瀟湘結後
緣

又
煙水蒼茫絕四鄰幽棲無地著纖塵蕭條雞犬楓林
下似是無懷太古民

又
歸老何須乞鏡湖秋來日日飽蓴鱸正令霖雨稱賢
佐未及煙波號釣徒

又
父子團欒到死時漁家可樂更何疑高文大策人皆
有且聽煙波十絕詩

茅舍
茅舍晨雞復暝鴉莫年別自是生涯貪眠久已遺人
事對酒猶能惜物華出有兒孫持几杖歸從鄰曲話

桑麻日長亦莫憎春困小窳何妨自煮茶
子適入城三宿而歸獨坐悽然示以此篇

吾兒早自立所懼非飢寒我歸自僊蓬再疏請挂冠
明恩華其行汝亟忝一官得祿寧甚遠懼違菽水歡

我年且九十亦覺去汝難生死要相守豈憚聯征鞍
但恐老益衰千里愁關山官期猶累歲言之已辛酸
村醪瀉盃益山果亦滿盤春風吹桃李一笑且團欒
莫春新路至湖上示元敏

時雨作未成蒸溽思出門湖塘直東西行人各歸村
翻翻鳥投林杳杳鐘鳴昏羊牛爭走路煙火出短垣
吾兒望未到誰與共盤飧幽獨多惆悵且復攜斯孫
歸來蓬窗下聊可與晤言

閔雨
臘雪不濡土春風吹早塵東吳貴粳稻布種當及晨
千里方冀蠶坐視膏澤屯民孽實自作所賴天公仁
何時見秋穫如山築高囷

春和初遷坐堂中
九月天始霜澤中多烈風東廂尋丈地聊以安我躬
薪炭南山來地爐晨莫紅二月春始和如蟲思舊塾
艸堂雖福小門戶隨事葺關窗對小山峯嶂爭葉發
筆硯陳橫几圖書羅矮牀頡頏燕雀聲左右蘭蕙芳
有時苦頑痺杖藜寄相羊折花與弄水自適亦何常

春晴暗甚花開略無餘矣賦以寓感
常年看花時輒苦風雨厄今年獨異此遊人滿阡陌
翩翩出聯騎往往醉墮幘轉盼桃杏空遂見辛夷坼
海棠尤可念不耐暖日炙臙脂成白雪其意亦自惜
曾未淹旬時春事欲掃迹安得愛花心堅頑如鐵石

春晚
南陌東阡自在身黃塵不污接羅巾無方可染星星
鬢有酒能留盃盃春下豉已添蓴菜美啣泥又見燕
巢新作公何益辛毗事且是人間九十人

春陰溪上小軒作
午醉初醒倚釣軒悠然無與共清言風微僅足吹花
片雨細纔能見水痕杳杳暝鐘浮遠浦離離煙樹識
孤村故人萬里岷山下安得書來慰斷魂 比遣書問張
季長猶思於都下未報

散策至湖上民家

曳杖翩然入莽蒼人間有此白雲鄉風傳高樹珍禽
語露溼幽叢藥艸香農事正看春水白客途漸愛午
陰涼餘年且就無羈束社鼓擊擊樂未央

枕上聞雨聲

小雨廉纖不霑土忽聞簷溜喜無窮斷知不作西山
餓多稼如雲在眼中

聞里中有鬪者作此示之

老翁無所長惟是更事多生世與人處烏可傷至和
秋毫不能忍平地尋千戈唾面聽自乾彼忿自消磨
鄉鄰皆世舊何至誓弗過勗哉養子壽它年住雞窠
春寒

石帆山下

漁艇水流去柴門風自開餘寒為醉地多病作慵媒
莎艸鋤還出鷗羣去復來流年殊衰衰殘鬢不禁催
久矣移家住鹿門偶然信腳到桃源尚嫌名挂東林
社那問塵生北海博才盡極知詩艸艸睡多常覺氣
昏昏舊聞福地多靈藥安得高人與細論

餘寒

漠漠餘寒透客衣江村倍覺失春期頡頏燕比常年
晚開落花爭數日遲

自九里平水至雲門陶山歷龍瑞禹祠而歸凡

四日

桐帽施裘擁半酣肩輿呼軋轉城南牛過野水將新
犢女采柔桑起稚蠶遺老年光重九十故鄉春事及
重二種花築室知難辦借地猶能結艸菴

又

細雨如絲映晚暉店家小憩換征衣春農耕罷負犁
去村社祭餘懷肉歸黃犢自依殘照臥白鷗爭傍小
灘飛道邊舊識凋零盡誰記遼天老令威

又

老子無心老尚狂山程隨處寄張張雲歸岫穴初收

雨水入陂塘正下秧野客就林煨燕筍蠶家負籠采
雞桑遠遊萬里知何樂却喜東歸住故鄉

又

老子山行肯遽回直穿犖确上崔嵬未誇腳力如平
昔且喜眉頭得暫開廟後故梁龍化去山前遺箭鶴
銜來囊錢已盡君無笑艸艸猶能把一杯

又

我來恰值莫春初晝漏微長小雨餘苔蝕秦碑土舊
刻龍歸禹穴護遺書燕巢已壘泥猶溼花片雖殘葉
尚疎到處不妨俱可樂詩人為底愛吾廬

又

輿似鷄栖寄兩竿山程三月尚春寒麥苗吐穗初成
實梅子生仁已帶酸買飯猶勝乞播客看耕僮學勸
農官還家莫道虛懷袖筍蕨隨宜亦滿槃

又

點點桃花糝綠苔入門倚杖意悠悠數聲茶飯齋初
散一片溪雲雨欲來老宿龍鍾嗟獨在高松磊砢憶
新栽世間萬事俱難料未死重遊更幾回

又

我行隨處叩巖扉覓得生薪旋燎衣道士已驂鸞鶴
去山僧初自水雲歸盃頭酒壓松肪熟盤裏蔬供藥
禾肥老覺論心須世外溪陰回首尚依依 龍瑞馮道士

春早得雨

春早得甘澍村鄰喜欲狂天公終老手處處出新秧
二月中去餘慶澤卷主自天童歸亦二月也

春晚

稻陂方渴雨蠶箔却憂寒更有難知處朱門惜牡丹
窗戶迎新燕階除集乳鷓欲知春已莫地上亦無花

又

思與春為別忽忽置一樽明年尚強健扶杖候柴門
春晚南堂晨起

秋風樹瘦勁春露葉扶疎夙興立堂上短髮未暇梳
高謝世俗樓遊於物之初青黃災斷木三四調羣狙

又

長生豈有巧要令方寸虛今年幸差健小雨聊荷鋤
春陽染柳條春風落花片化工本無心誰與催漏箭
俯仰財幾時梁間有雛燕人亦隨物遷蒼然鏡中面
要當心鐵石先登酣百戰我豈兒女哉秋風感團扇

見鶻補巢戲作

臥看銜枝鶻補巢方知此老懶堪嘲山村四十餘年
住未省曾添一把茅

予素不工書故硯筆墨皆取具而已作詩自嘲
我昔生兵間淮洛靡安宅就髦入小學童叟聚十百
先生依靈肘教以兔園冊僅能記姓名筆硯固不擇
竈煤磨斷瓦荻管隨手畫稍長遊名場麤若分菽麥
偶窺文房譜雖慕無由獲筆惟可把握墨取黑非白
硯得石即已殆可供擣帛從渠膏梁子竊視笑啞啞

春晚即事

桑麻夾道蔽行人桃李隨風旋作塵煜煜紅燈迎婦
擔擊擊畫鼓祭蠶神

又

小時抵死願春留老大逢春去即休今歲禹祠纔一
到安能分日作遨遊分日作遨遊王摩詰詩也

又

漁村樵市過殘春八十二年老病身殘虜遊魂苗渴
雨杜門憂國復憂民

又

龍骨車鳴水入塘雨來猶可望豐穰老農愛犢行泥
緩幼婦憂蠶采葉忙

懷昔

高皇布網收鳳麟我得定交猶數人陳山清真王逸
少李石風流賀季真

書感

一是端能服萬人施行自足掃胡塵南州不可無高
士東國何妨有逐臣

夜中獨步庭下

山月明如畫江風冷借秋衰遲亦可歎幽獨自成愁
斗柄垂江渚笳聲下戍樓我惟詩思在從此亦宜休

劍南詩稿卷第七十終

劍南詩稿目錄
卷第七十一

憶昔 雜詠十首 曉思 幽居二首 幽居
卽事九首 醉歸二首 書南堂壁二首 五
月雨 蠶麥 早至園中 憶雲門諸寺 贛
士曾與宗字光祖以其居貧籬谷圖來求詩
以菜茹飲酒自嘲 五月二十一日風雨大作
寄題括蒼陳伯子主簿平楚亭 卽事 梅
雨初霽 夏日雜題六首 晚興 急雨 聽
雨 窮居戲詠 讀窮居五字慨然有感復作
一首自解 蒙恩封渭南縣伯因刻渭南伯印
題門壁 雨霽 西村晚歸 連日雲興氣
濁雨意欲成西南風輒大作比夜月明如晝
考古 殘春無幾述意二首 南堂晨坐 記
悔 東園晚興 晨起行園中 雷雨 戲書
燕几二首 喜雨 閒適 早晴 翦牡丹感
懷 偶觀舊詩書數 聞蜀盜已平獻馘廟社
喜而有述 晚雨 雨晴 起晚自嘲 閒中
偶詠二首 晚步湖塘少休民家 獨酌罷夜
坐 雨中出門閒望有作 示二子 道室秋
夜二首 醉題 自詠二首 秋晴 門外獨
望 貧歌 秋晚雜興十二首 霜風 贈丐士
贈目眇者

劍南詩稿卷第七十一

宋陸游務觀

憶昔

憶昔紹興中東帶陪衆彥沐浴雨露私艸木盡葱蒨
一朝窮達異相遇忘慶唁遠官楚蜀間寂寞返鄉縣
于時同舍郎貴者至鼎鉉數奇益自屏短褐失貧賤
俯仰五十載未媿金百鍊忍飢菘蘆間生理僅如錢
窮交誰耐久晨莫一破硯歡歌楓林下萬事付露電
惟有孤舟與所至多勝踐衡茅無定止何處非郵傳
炊煙起沙際跳魚裂波面嘔啞緯車鳴隱翳漁火見
蕭鼓樂水神鐘梵闌竹院我詩雖日衰得句尚悲健
巍巍闕里門未嘗棄狂狷放浪終餘年造物不汝謹

雜詠

仕困風波歸可樂生如疣贅死何悲極知此手終無
巧那得隨人儘作癡

鏡中顏狀年年改海內交朋日日疎一慟寢門生意
盡從今無復季長書近聞張季長物故

又
女郎花樹新移種官長梅園亦探租作盡人間兒戲
事誰知空橐一錢無鄉人謂楊梅止曰梅官長其高品也

又
一日日窮窮不醒一年年老老如期黃河却有逢清
日白髮應無返黑時

又
世間萬事本悠悠自古詩人易白頭莫羨老夫垂九
十一年添得一年愁

又
夸士騎牛著鐵冠往來城市擁途觀爭如老子無奇
怪惟是蓑衣伴釣竿

又
家園菜肥志肉食村場酒美勝官壺終年醉飽無憂
責莫怪愚公老不枯

又
宦途所至尚偷閑何況湖邊晝掩關未愛好風吹醉
袖且貪微雨養益山

又
斜風吹雨晚空濛獨立溪邊兩鬢蓬便過此生何所
恨百年強半水雲中

又
病起清臞不自持紗巾一幅倚筇枝水沉香冷紅蕉
晚恰似道山羣玉時

又
曉思
莫年多感恰孤夢久不成殘燈暗無焰宿雨滴有聲
食少夜常飢展轉空腸鳴老鷄雖三號山窗終未明
默誦舊記書更覺負平生披衣搔短髮壯志浩縱橫

又
幽居
策府還家又五年心常無事氣常全平生本不營三
窟此日何須直一錢雨霽桑麻皆沃若地偏鷄犬亦
餽然閉門便造桃源境不必秦人始是仙

又
橫艸無功負主恩一生強半臥衡門蠹書身世元無
憾伏檻光陰不更論春兩負薪蘭渚市秋風采藥石
帆村更思旋羅場中麥暖熱塵埃老瓦盆

又
幽居即事
采藥鹿門山釣魚富春渚君看此氣象何止輩伊呂
直令終不偶後人會知汝亦不妨著書世世祕囊褚

又
野寺促晨裝古驛休破棗雖云行役苦客子心獨樂
家山幸歸來未免數拘縛安得萬里天翩然下孤鶴

又
莫年乞殘骸窮巷事幽屏長與食一簞有味敵五鼎

終日無再炊奈此夏晝永枯腸不禁攪戒婢罷煮茗

又 小磴落雪花修鯁汲牛乳幽人作茶供爽氣生眉宇
年來不把酒杯榼委塵土臥石聽松風蕭然老桑苧

又 日鑄歲幾何苞苴遍權門野人求其類金墮實第暴
超然高世韻何獨驅睡昏安得如吾宗坐致顧渚園

又 酒能忘事物不過在醉時麴蘖力既盡萬緒如益絲
阿堵雅見疎歡伯難與期自憐善用短時誦止酒詩

又 薰艾割蜜房荷鋤掘吳朮誰烹彌明鼎來薦維摩室
厚味不措毒上藥能愈疾今夕風月佳良會不可失

又 古人在山林躬自事樵汲我雖迫耄期勤慎亦在習
掃地拂几硯何遽力弗給却笑杜陵翁多臥少行立

又 屏居江海涯杳杳菰蒲深俛仰夏令中澤國正多陰
桑椹熟以紫水鳥時遺音偶得一瓢酒隣里聊相尋

醉歸 夜分飲散酒家墟歸路迢迢月滿湖小豎竊言翁未
醉入門猶記露菖蒲

又 烏柏陰中把酒杯山園處處熟楊梅醉行蹉跎人爭
看躡盡斜陽躡月來

書南堂壁 數間破屋住荒郊暑雨時須自補茅多病篇章無傑
思長閑樵牧有新交荒唐但向先師媿航麟寧辭薄

俗嘲偶有會心成獨笑一林春筍放煙梢
又 心瀕元知面合團愚公骨相却酸寒雲山萬疊猶嫌
淺茆屋三間已覺寬菜長何妨供小摘花開聊得助

幽歡今朝忽有西村興著起芒鞋不作難

五月雨 空濛五月雨景氣一番新換盡園林葉洗空衢路塵
山郵惱行客野渡滯歸人獨有龜堂叟涼風吹角巾

蠶麥 村村桑暗少桑姑戶戶麥豐無麥奴又是一年春事
了纒絲擣紗笑相呼

早至園中 湖上空濛雨熟梅清晨岸憤一悠哉幽花不恨艸埋
沒密樹豈知禽去來舊為愛茶分水器近緣炊爨得

琴材小丘僅見山如髻尚媿韓公八尺臺
憶雲門諸寺 三百六十日安可日日愁四百八十寺要須寺寺遊
雲門若耶間到處可淹留金像闕古殿霜鐘發重樓

臨澗見魚躍穿林聞鹿呦亦有疎豁處白鷺下綠疇
僧固非盡佳終勝從公侯夜闌煎蜜湯豈不賢盃甌

澤居厭溽暑慨思風露秋晴雨俱可人亦莫占鳴鳩
高人心虛萬物宗家世常以仕易農買山本愛坡上
竹手種已偃巖前松瀑泉三伏凜冰雪谷聲十里酣

笙鏞了知自是一丘壑不與金精為附庸 地與金精山
青牛峽為隣

以菜茹飲酒自嘲 山澤有臞儒殘年病滿軀拙疎難救藥貧困不枝梧
海客留苦脯山僧餉筍枯筍枯出仗錫山衰顏得村酒
猶解甞時朱

五月二十一日風雨大作 風雨縱橫夜徹明須臾更覺勢如傾出門已絕近村
路對面不聞高語聲銜舳江關多蜀估宿師淮浦飽

吳粳老民願忍須臾死傳檄方聞下百城蜀盜已平淮
壩胡賊亦逐去
寄題括蒼陳伯予主簿平楚亭

琵琶洲上莫山奇五十餘年役夢思與子定交雖可
樂念身垂老亦成悲遠遊倦似風枝鶻愁思多於繭
益絲安得往尋平楚約一樽相屬醉題詩
卽事

歸臥已如狐首丘不妨解劍換吳牛掃空身外閑榮
辱閱盡樽前舊輩流學道漫希僧坐夏憂時常媿士
防秋一年曆日開強半數息人間歲月道

梅雨初霽

梅雨忽已過松風來颯然吟多錦囊富影瘦角巾偏
客祝加餐飯兒憂少睡眠衰骸累人久撫事感餘年

夏日雜題

東吳五月黃梅雨南浦孤舟白髮翁貂插朝冠金絡
馬多年不入夢魂中

又

午夢初回理舊琴竹爐重炷海南沉茅簷三日蕭蕭
雨又展芭蕉數尺陰

又

新縫細葛作蟲裯簾展風漪凜欲秋啼鳥一聲呼夢
斷依然書卷在牀頭

又

簷前桐影偏宜夏葉底蟬聲漸報秋莫道衰翁怯風
露也能覓醉水邊樓

又

渚蒲經雨送微馨野鶴凌風有墮翎歸入衡門天薄
暮清溝淺浸兩三星

又

一葉兩葉病木實一點兩點疎螢流水底星河秋脈
脈髮根風露夜應聽

晚興

地荒蓬藿與人齊局促何曾厭屋低村市船歸聞犬
吠寺樓鐘暝送鴉栖山童新斫朱藤杖僮婢能醃白
苣薑政欲出門尋酒伴霏霏小雨又成泥

急雨

蝸廬四壁僅容身赫赫炎曦不貸人正喜風清三伏
暑已看雨壓九衢塵寒泉不減中濡味貢茗初嘗正
焙新安得凌空雙健羽徑隨猿鶴上嶙峋

聽雨

老態龍鍾疾未平更堪俗事敗幽情紗幮留簟差堪
樂且聽蕭蕭莫雨聲

窮居戲詠

賦分雖云薄謀生亦自疎但令書有種敢恨食無餘
身病慵行立庭荒廢掃除寒溫雖泛禮猶辱問何如

旬日連得二三故人書

讀窮居五字慨然有感復作一首自解

布褐營身足茅茨置榻寬食非依漂母菜不仰園官
小蹇鞍韉黑羸僮骨相酸丹青能寫此千載尚傳觀

蒙恩封渭南縣伯因刻渭南伯印

旋著朝衫拜九天榮光夜半屬星躔渭南且作詩人
伴敢望移封向酒泉唐詩人趙嘏爲渭南尉時謂之趙渭南

題門壁

四十年來住此村勝衣拜起有曾孫市墟分熟客賒
酒鄰舍情親每饋殮居似窮邊荒馬驛身如深谷老

桑門幸知歲惡緣陂廢安得農官與細論 貧郭及近縣
頗有患水處

雨霽

雨霽禽魚樂風生艸木香老鷺時易失閑覺日偏長
閣閣畫何怒翩翩蝶許忙閉門真得計切勿變軒昂

西村晚歸

小塢花垂盡平隄艸次迷日長鶯語久風定絮飛低
子響聞碁院舟橫傍釣溪歸途不知處依約埭東西

連日雲興氣濁雨意欲成西南風輒大作比夜

月明如晝

鳩自呼鳴蚓自歌二者鄉人以爲雨候 何時甘澍一滂
沱封姨漫妒陽臺夢却付長空與素娥

考古

考古無長晝憂時少熟眠偷生迫鐘漏戰死媿兜鍪
莫報乾坤施空驚歲月遷藜藿安用糝吾事本蕭然
殘春無幾述意

試筆書盈紙烹茶睡解圍新蔬供冷麵熟練製單衣
雛燕飛初穩殘花見漸稀年衰學不進默默訟吾非

又

衰疾來無已流年過若馳家貧食易美身老夢常悲
艸長增蛙怒花空失蝶期不堪多難日更賦送春詩
南堂晨坐

鏡湖清絕似瀟湘晨起焚香坐艸堂日暖遊絲垂百
尺花殘新蜜釀千房綠桑椹箔開蠶食白水翻車浸
稻秧莫道村翁殺風景也能沽酒答年光

記悔

我悔不學農力耕泥水中二月始稽事十月畢農功
我悔不學醫早讀黃帝書名方手自緝上藥如山儲
不然去從戎白首捍塞壘最下作巫祝為國祈豐年
猶勝業文辭志在斗升祿一朝陪衆雋所望亦已足
豈知賦命薄平地成怨仇生為馬伏櫪死為狐首丘
已矣何所悲但悔始謀錯賦詩置座傍聊以志吾忤

東園晚興

宿葉自脫新葉生東園忽已清陰成老夫東行復西
行烏藤瘦勁青鞵輕竹鷄羣號似知兩鶉鳴相喚還
疑晴萋萋幽艸上牆綠瀼瀼細水循堦鳴蕭然濯手
坐盤石心地平安體紆適青山缺處紅日沉杳杳長
空送歸翮

晨起行園中

晨日未出林庭戶有爽氣僮奴課薪水老子自擁篲
稻陂方閔雨艸木亦顛頽羣蛙汝何心尚復作鼓吹
雷雨

雲昏失南山雷過撼北戶天其哀此民界以三日雨
未言高下足十已得四五雨勢殊未已喜色徧農圃

稽手謁龍公願言終有秋民飢不敢辭懼貽明主憂
戲書燕几

平生萬事付天公白首山林不厭窮一枕烏聲殘夢
裏半窗花影獨吟中柴荆日晚猶深閉煙火年來只
僅通水品茶經常在手前身疑是竟陵翁

又

飽知此手合鋤犁剩喜東歸老故栖僧乞新詩題院
壁人扶半醉下樓梯少通朝籍讒銷骨晚畏京塵悔
噬臍尚有遠遊心未死夢攜猿鶴渡數溪

喜雨

一雨洗早塵吾廬氣疎豁土潤竹萌出水長漁舟活
桑麻鬱千里夾道光如潑憑高望歸雲更覺原野闌
沉憂寬旅食分喜到僧鉢但仰皇天慈不必尤旱魃
閑適

閉門萬事不相關飽受人間一味閑琴薦潤生諳雨
至衣篝香冷數春殘早曾寄傲風煙表晚尚鍾情水
石間小市酒旗能喚客試尋隣曲共開顏

早晴

老病常貪睡蕭蕭厭雨聲翩然兩鳥鶻為我報新晴
翦牡丹感懷

雨聲點滴漏聲殘短褐猶如二月寒閉戶自憐今伏
老聯鞍誰記舊追歡欲持藤楫沾春碧自傍朱欄翦
牡丹不為挂冠方寂寞宦遊強半是祠官
偶觀舊詩書數

吾道運無積何至墮畦吟醜鷄舞甕天乃復自拘窘
外物豈移人子顧不少忍鶴井與狐妖正可付一哂
繁華夢境鬧零亂空花實可憐愁書生尚學居易積
我昔亦未免吟哦琢肝腎落筆過白雨聚稿森束筍
幸能悟差早念念常自憫安得從碩儒稽首謝不敏
聞蜀盜已平獻誠廟社喜而有述

北伐西征盡聖謨天聲萬里慰來蘇橫戈已見吞封
豕徒手何難取短狐學士誰陳平蔡雅將軍方上取

燕園老生自憫歸耕久無地能捐六尺軀
晚雨

萬里雙芒屨終年一布裘病侵消壯志醉著失閑愁
琴料憑僧問巢居與鶴謀晚來疎雨過探借北窗秋

兩晴
早嘆常思雨沉陰却喜晴放船蓮蕩遠岸橫竹風清
淮浦戎初遁興州盜甫平為邦要持重恐復議消兵
起晚自嘲

辛苦一生何所獲老向東阡與南陌頭眩眼暗牙齒
疎能作人間幾時客爾來偷情更可笑臥聽場中打
新麥老雞失日也似儂引頸一呼窗已白
閑中偶詠

斷編殘稿本徒勞橫得虛名亦已叨不識狐書那是
博尚分鶴料敢言高巢山且欲營丹竈跨海何當看
雪濤與世不諧終自許笑人苦勸學鋪糟

又
舉世紛紛名利間天公偏賦此身閑塵衣濯罷滄浪
水茅舍歸來會計山鄰舍擊盤分麥飯野人曳杖叩
柴關酒通詩債何時了未死何妨且旋還
晚步湖塘少休民家

瓜蔓緣籬竹蘆芽刺岸沙橫陂浮雁鷺古道暗桑麻
適遇扶犁叟同休織屨家村童亦可念喚客手吒叉
獨酌罷夜坐
不見麴生久惠然相與娛安能論斗石僅可具盤盂
聽雨蒙僧衲挑燈擁地爐勿生孤寂念道伴有狸奴
雨中出門閑望有作

急雨初來已瀉簷清香欲散更穿簾年開九秩尚不
死坐對一編殊未饜人笑黠癡俱得半自憐貧病每
相兼說梅古謂能蠲渴戲出街頭望酒帘

示二子
豈不懷榮畏友朋一生凜凜踏春冰任真雖笑拘邊
幅達節寧容出準繩自喜殘年如白傅更憐諸子慕

崔丞耄期尚有江湖興頑健人言見未會 時子龍調官
東陽丞子坦調彭澤丞

道室秋夜
江上窮秋日菴中獨夜時丹靈敲豎子神定出嬰兒
梁熟猶餘夢柯摧未畢棋神仙元可學往矣不須疑

又
道室生虛白仙經寫硬黃晨杯擎石髓夜几照松肪
眼力新生犢心源百鍊鋼何當登日觀萬里看扶桑
醉題

雲樓潤飲未為高起舞行歌亦足豪試問食時觀本
艸何如酒後讀離騷遊山不待飛雙鳥翦水無因得
快刀熟睡市墟君勿笑年來隨事學鋪糟

自詠
忽忽殘年及耄期清晨對鏡不須悲遠行久立雖差
倦未到入扶見客時

又
食飲從來戒失時衣裘亦復要隨宜老人最索調停
處正在初寒與半飢

秋晴
身健心閑百慮輕秋晴未必減春晴晨窗暖日烘花
氣午枕微風送鳥聲韞玉硯凹宜墨色冷金牋滑助
詩情少年風味嗟猶在虛道歸休學力耕

門外獨望
離離遠樹傍煙津又見清秋一歲新老眼厭看南北
路流年暗換往來人鑄金遺像誰能記執玉來朝適
已陳況我風中斷蓬耳夕陽空復一傷神

貧歌
壽居福之首貧為士之常造物賦我貧乃以壽見償
處常而受福每恐不得當掬澗以沃渴屑栢以為糧
雖云未免飢何至死道傍猶勝遼東丁化鶴還故鄉
秋晚雜興

籍爛醉狂歌坐箕牀

又

昔遇高皇起衆材姓名曾得廁鄒枚年踰八十猶賒死却伴隣翁鬪芋魁

又

老病侵凌不可當時時攬鏡自悲傷西風吹散朝來酒依舊衰顏似葉黃

又

冷落秋風把酒杯半酣直欲挽春回今年菘菜嘗新晚正與鱸魚一併來

又

置酒何由辦咄嗟清言深媿淡生涯聊將橫浦紅絲磴自作蒙山紫筍茶 鄉老舊謂碾磨茶爲作茶

又

洗耳高人恥見堯看渠應不受弓招精神徇物那能久刀礪君看日日銷

又

石帆山下醉清秋常伴漁翁弄小舟箬笠照溪吾自喜貂蟬誰管出兜鍪

又

煙波萬頃鏡湖秋清嘯雖聞不可求自是世間知者少山林何代乏巢由 隱者

又

禹巡吾國三千歲陳迹銷沉渺莽中豈獨江山無定主苔磯知換幾漁翁 禹廟

又

江東誰復識重瞳遺廟欹斜艸棘中若比咿嚶念如意烏江戰死尚英雄 項羽廟

又

漠漠漁村煙雨中參差蒼檜映丹楓古來畫手知多少除却范寬無此工

渺渺風煙接小江 卽錢塘江別名牛頭山色滿蓬窗門前西走錢塘路也有閑人似老龐

霜風

霜風近海夜颼颼敢效庸人念褐裘關吏雖通西域貢王師猶護北平秋黃旗馳奏有三捷金印酬功多列侯願補顏行身已老區區映故亦私憂

贈巧士

志士寧聞畢世窮此間從古混蛇龍尚能忍恥播間祭安用追慚飯後鐘

贈目眇者

達人所遇有生涯高臥窮閭自一家閱世正嫌巖下電開樽且看霧中花

劍南詩稿卷第七十一終

劍南詩稿目錄

卷第七十二

閒遊所至少留得長句五首 晚雨 翌日早晴 一雨二十日 入夏多雨雖止復作六月

甲寅始大晴 題尊信齋并序 夏日雜詠四首 夏日四首 苦熱 予頃遊青城數從上官

道翁遊暑中忽思其人 龜堂 夢中作二首 秋近頗有涼意 夜坐中庭涼甚 東偏小

室去日最遠每為逃暑之地戲作五字 野寺 南堂雜興八首 新秋往來湖山間四首

北嶼 小室逃暑 秋雨 中作 目昏有感 幽居 初秋卽事二首 山庖 題道傍壁二

首 訪野老 書適 憶蜀 生涯四首 對 食作 曉思 戲書 梅市舟中作 孤店

過魯墟先太傅舊隱 步月 拄杖示子適 讀道書 秋日睡起 書意 寄題龔立道岷

山棲閒堂 秋雨書感二首 弄筆 睡覺作 二首 秋思十首 秋來苦貧戲作 晚晴

對月二首 出近村晚歸二首 秋晚 犬雞 賣藥翁 書里中事 書室雜興四首 秋

感 秋夜二首

劍南詩稿卷第七十二

宋陸游務觀

閑遊所至少留得長句

書檣艇子短驢鞍野店山郵每小留瓜蔓水生初抹岸梅黃雨細欲遮樓遼東邂逅從歸鶴海上逢迎得狎鷗豈是人間偏好異莫年難復作沉浮

又

垣屋參差桑竹繁意行漫漫不知村眼明可數遠山學足健直窮流水源驚引釣船經菽浦牛隨牧笛入柴門試尋高處休行李清絕應須入夢魂

又

太平人物自諧嬉及我青鞵布襪時丁壯趁晴收早粟比隣結伴絡新絲圓聲坎坎迎神社大字翩翩賣酒旗晤語豈無黃叔度欲尋幽徑過牛醫

又

已過樵場到漁村逢著人家即叩門僧釜藜羹加糝笑市墟黍酒帶醅渾顏齡更媿才能薄故里方知輩行尊身迫九原兒亦老一經猶欲教諸孫

又

高僧宴坐雪蒙頭閑收從來水牯牛深院陰陰四簷雨高堂寂寂一簾秋光明本自無餘欠夢幻何曾去留我亦儻然五湖客不妨相與試茶甌

晚雨

春早久閑雨夏潦復望晴米盡薪亦絕漲水與堦平山信得新粟欣然聽春聲書生易滿足筆硯還施行南風柱礎乾西照窗戶明雨其遂已乎努力趣秋成

翌日早晴

澤居傍海壖暑雨困積潦四顧路俱絕所至泥浩浩坐臥敗屋中兀若在孤島得米無束薪端憂令人老今朝復何朝浮雲散如掃一蟬鳴高槐兩蝶點平艸

欣然受涼應便欲事幽討呼童羈我駒東走天台道

一雨二十日

一雨二十日雨意殊未闌我廬大澤中四顧煙水寬東家有小舟借我不作難鷓鴣與鳩鵲自是平生歡更作十日期水淺生小灘相與極幽賞勿待江月殘

入夏多雨雖止復作六月甲寅始大晴

兼旬大雨無晝夜積潦深虞敗吾稼豈惟一飽墮渺茫直恐下溼侵腰跨南風忽從木末來新月徘徊出雲罅

州家出符縣家喜泄水漸空梁可架放翁亦復扶病起旋築頽牆補茆舍便合觀身作老禪安心穩

坐今年夏

題尊信齋并序

吾友陳希真求序名其書齋予告之曰韓文公言讀孟軻書然後知孔子之道尊晚得揚

雄書益尊信孟氏因雄書而孟氏益尊予謂孔子豈待人而尊孟子亦豈待人而信韓之言則過矣然尊信孔孟者實學者之本務也

請以名君齋且為詩以終吾意

於虜孔孟何其卓如天日月地海嶽正令舉世皆揚墨邪正豈復勞商推雖然此道久橫流執熱其誰不思濯魯鄒遺書世皆讀要以尊信為善學吾友希真

蓋其人不肯俛首為齷齪羹藜飯豆欲老矣功雖未竟志則慤我居山陰子在閩闕然不見千里邈澤中

久雨道路絕叩戶忽聞聲剝啄尊信二字子所知妙質豈復須斤斲伏生九十語已訛失日自慚猶嗟嗟

夏日雜詠

閑居自無客况復暑如焚百折赴溪水數峯當戶雲幽尋窮鹿徑靜釣雜鷗羣舊愛南華語今方踐所聞

又

兀兀從誰語晡晡寄一牀不嗟頭似葆但苦汗如漿敬枕風生竹釣簾日轉廊非由靜勝熱本體自清涼

蒲葦蕭蕭晚秋梧蕭蕭陰山童驚大駟林鳥伴微吟
巖硯深瀟墨吳棧熟搏碁新詩與醉帖自笑尚童心

又

省事心君靜忘情眼界平食便醞酪美浴試葛衣輕
鶴整千年駕鷗尋萬里盟秋風即在眼作意上青城

夏日

颼颼風露髮根涼月落菱歌盡意長分得鏡湖纔一
曲喫虧堪笑賀知章

又

新闢虛堂痛掃除蕭然終日屏僮奴此間恐是維摩
室除却藜牀一物無

又

平明一浴汗無餘坐覺胸中合太虛春玉作糜天所
賜不妨數筋進山蔬

又

艸芝方出我眉老力比金丹似更多素不及期周過
曆始知養壽在中和伏中方製艸芝丹此方出史載之學士家

苦熱

炎歊行中天曼膚汗翻水纖絺薄如霧不異鎧被體
散髮垂兩肩萬事棄不理寸陰若度歲日莫何可俟
頗聞交廣間暑又烈於此此如不可耐彼豈皆渴死
聊嘗扶短策北澗弄清泚豈必拜賜冰恩光動閭里

予頃遊青城數從上官道翁遊暑中忽思其人
往年屢遊丈人祠上官八十如嬰兒自言少年龔不

治芝房松鬣可無飢叩之不答但解頤德人之容端
可師我聞學道當精思畢世不可須臾離公雖泯默
意可知上羊要是緣多岐逝從公遊亦未遲聯杖跨
海尋安期

龜堂

障日松棚正策功幅巾聊得受微風蟬聲不斷艸堂
靜涼水已歸村路通拄杖閑行穿犖孤雲時見起
龍從東陽醉耐無由到知負今年幾碧筒郭希呂呂子

益兩友歲醜酒今以故不至

夢中作

試說山翁事諸君且勿譁百年看似夢萬里不思家
夜艾猶添酒春殘更覓花却嗤勾漏令辛苦學丹砂

又

平羌江上月伴我故山來幽興依然在浮雲正爾開
清秋纔幾日黃葉已成堆未醉江樓酒扁舟可得回

秋近頗有涼意

平日麪數箸哺時飯一杯枝梧長日過悵望早秋來
團扇尋詩寫縑巾借樣裁惟應水邊坐待得市船回

夜坐中庭涼甚

銀漢迢迢夜氣澄都忘朝莫困蚊蠅月從東涌行空
闕風自南來洗鬱蒸渴解似嘗仙掌露魂清如近玉
壺冰誰知此際超然處不減廬山入定僧

東偏小室去日最遠每為逃暑之地戲作五字

蕭蕭簷陰轉冷冷冷覺水鳴高墉日氣遠方簞午風清
渴愛殮漿笑慵便葛屨輕新秋忽在眼結束問山程

野寺

僧壁題名半闕訛重來歎息屢摩挲林蟬欲斷莫復
急竹露如傾秋更多半俸漸償賒酒券故衫已換鈞
魚蓑西窗一看枯棋罷歸去還憂爛斧柯

南堂雜興

車馬無聲晝漏長野人與世已相忘屏除長物軒楹
爽洗濯塵襟肺腑涼秋近平郊鳴鶴鶴日斜荒徑下
牛羊興來欲喚筇枝去更盡銅爐一炷香

又

新涼一夜入郊墟晨起衣巾爽有餘燕欲委巢雛盡
去燕有三生雛者及秋雛方去盡扇猶在手意先疎題詩
又滿牛腰束采藥常攜鷓鴣觜鋤湖上從今風月好不
妨隨處命籃輿

又

蛩聲每續蟬聲起桐葉仍兼柳葉凋懶情心慵疎筆

硯久長生計屬漁樵鬻茅旋補東廂屋伐石新成北
港橋物外高人來往熟等閑折簡也能招

又

耄齒東歸息故廬聊持頌健託鄉閭未忘塵尾清談
興常讀蠅頭細字書貧甚尚能耕有犢步輕那數出
無驢南堂又見秋風起臥看溪雲自捲舒

又

奔走當年一念差歸休別覺是生涯茆簷喚客家常
飯竹院隨僧自在茶紹興初僧喚客茶各隨意多少謂之自在
茶今遂成俗禪欠遍參寧得髓詩緣獨學不名家如今
百事無能解只擬清秋上釣槎

又

十里城南禾黍村白頭心事與誰論情偷已墜先人
訓迂拙仍辜聖主恩病退時時親蠹簡興來往往出
柴門斜陽倚杖君知否收點雞豚及未昏村老人不能
耕者以牧雞豚爲事村隣皆然

又

年過八十更應稀又向清秋聽擣衣一片雨來書慢
黑數聲鐘斷釣船歸酒壚好事能焚券藿蕞無情未
解圍剩欲出門尋一笑故人零落數疇依

又

北連大澤鷺秋早東限連林覺曉遲數筋藥苗留客
話一爐松火約僧棋人間掃跡雖堪笑物外論心頗
自奇有恨未償猶絕數青城交舊待多時

新秋往來湖山間

車似鷄栖舟似葉百里何曾勞步履朝遊樵風弄清
泚莫泊石帆登岌業旅飯雖香纔脫粟僧羹無菜寧
用披歸來村落未上燈除却御風無此捷

又

會稽山下樵風溪翠屏倒影青玻璃尤奇峭壁立千
仞行子欲上無階梯商山坐看紫芝老武陵無奈桃
花迷人間得意妄自喜一鬨憐汝真醜雞

又

禹祠巍巍閱千代廣殿修廊半傾壞屹然遺空每摩
挲石長苔侵字猶在去年已媿曳杖來今者更用兒
扶拜聊持一酌薦丹衷衰疾龍鍾神所貸

又

健席高檣梅市路朱橋綠樹蘭亭步兒時釣遊略可
記不料老年猶此處漁歌相和葦間起菱船遠入煙
中去世間萬事等浮雲耐久誰如兩芒屨

北崦

毒熱憚輕出新涼尋舊盟西郊猶近市北崦漸謀耕
松菊有佳色山林無俗情行行望續火一點隔林明
小室逃暑

秋雨中作

千頃菰蒲萬里風漁翁散髮臥孤蓬何如此室纔尋
丈常在冰壺雪窖中
燈前劇論與誰同中歲朋儕亦已空行道敢希千載
上會心聊付一編中雨侵壞甃新苔綠秋入橫林數
葉紅莫怪又生湖海興此身元自是孤蓬

目昏有感

兩眸眇昏八十餘爾來觸事覺空疎何由四目如蒼
頡讀盡當年倚相書

幽居

一曲清溪帶淺山幽居終日臥林間丹經在昔曾親
授死籍從今或可刪入笑拙疎安淡泊天教強健享
清閑秋來漸有佳風月擬與飛仙日往還

初秋卽事

簾櫳雨過不勝清秋氣依依似有情高棟尚餘雙燕
宿短莎先放百蟲鳴挑燈剩欲開書秩擘蟹時須近
酒釀却媿隣家常作苦探租黃犢待寒耕

又

老來閱世苦忽忽又見流年入鬢蓬山徑溼螢黏露
艸井淋病葉賈秋風隣翁每共藜羹味穉子能終汗

簡功造物於人元不薄未須抵掌數囊空

山庖

新春穠醴滑如珠旋壓犁和軟勝酥更翦藥苗挑野
菜山家不必遠庖厨

題道傍壁

晚境那禁歲月催幽花又見澗邊開莫辭贖買旗亭

酒恐有騎驢李白來

又

湖廢財存十二三拍隄漲水尚如藍吾廬隱翳初非
意頗欲臨流結艸菴

訪野老

農事元知要細評野人有舊得尋盟林深未見果蔬
地舍近先聞雞犬聲春水築塘謀竭作陽坡臥犢約
同耕老來常數人情薄深媿今朝倒屣迎

書適

架竹苦茅屋數椽推開窗戶即江天微飢未遽愁長
日小疾何妨度厄年孤鶴入秋偏警露斷山欲雨自
生煙囊中妙法君知否買斷清閑不用錢

憶蜀

憶昔西遊日岷峨勝事繁題詩古栢廟載酒海棠園
世故紛難料年光浩莫論所欣身尚健短褐醉江村
生涯

生涯數畦菜心事一溪雲樵擔斜陽下漁歌靜夜聞
門無俗駕到厨有遠泉分但了麴蘖事功名烏足云

又

身世茫茫如夢門庭冷似冰逢迎賣藥叟辭謝乞錢僧
羸疾時時劇衰顏日日增人扶亦可出要是藉烏藤

又

舊業桑麻在頽齡耄耋過虞卿著書晚伏叟授經訛
井上磨樵斫村東買釣養傾身營一飽自笑又蹉跎

又

殘年端有幾寂寞寄滄洲鳥宿千林莫蟲鳴四壁秋

風廊動礎杵月壠把鉏耰衣食隨宜具何心復淚求

對食作

潦餘多稼猶中熟種晚嘉蔬亦半收黃耳輩生殊自
喜白頭非長復何求比量傍舍慚温飽誦詠農書做
墮偷偶有一樽難獨啜過門誰肯小遲留

曉思

昏昏斷夢帶餘醒散髮披衣坐待明城角吹殘河漸
隱海氣消盡日初生老農自得當年樂癡子方爭後
世名莫怪閉門常懶出卽年車蓋爲誰傾

戲書

柳下人家枳作籬小姑不畫入時眉緯車聲出窗扉
裏正是新涼夜永時

梅市舟中作

漕渠北向小橋通漸入蒼茫大澤中造物將無知我
醉故吹急雨打船篷

雨

孤店門前千萬峯酒濃不抵別愁濃明朝晴雨吾能
卜但聽蘭亭古寺鐘

過魯墟先太傅舊隱

桑竹蕭條帶夕陽故居依約古河傍頽垣壞甃無尋
處父老猶言學士莊

步月

鷗鷺論交有舊盟越山勝處著柴荆只思小閣焚香
臥偶作長堤踟躕月行湖關煙鐘來縹緲林疎漁火見
分明店家已賣新筍酒一醉今宵似可成

拄杖示子適

拄杖相從四十年交情耐久獨依然西窮巫峽岷江
路北抵岐山渭水邊早已歸休弄泉石老猶緩步歷
風煙會同鉢袋并禪版付與兒孫世世傳

讀道書

一境有神龍歲不畏枯旱爲國常得賢百世不可亂

吾讀黃老書掩卷每三歎正使未長生去死亦差緩
如何不自力白首猶漫漶支朋死略盡日月難把翫
豈無獨往願兒孫苦羈絆安得葛與陶相從明此殺
秋日睡起

白露已過天益涼練衣初覆篝爐香天其閱我老且
儻付以美睡聲撼牆離騷古文傍倦枕砥柱巨刻懸
高堂睡餘一讀搔短髮萬壑松風秋興長

書意

屋漏徙我牀窗破補其罅衣穿傲狐貉食淡忘膾炙
人生老可哀百事就衰謝我喜在得歸味美如啖蔗
雖云茅茨陋豈不賢傳舍兒能牧雞豚身自種桑柘
市墟酒易賒鄰廡驢可借睡任門生嘲醉無官長罵
見書眼先閉情懶亦自赦却後五百年林間作佳話
寄題龔立道崑山樓閑堂

我居山陰古大澤出門尚恨風煙近欲求曠快舒眼
力夢中去作樓閣客樓閣主人計不疎萬卷讀盡家
藏書平時不喜入城府况肯自屈承明廬聽雞束帶
誰不爾明時可仕君獨止不妨借地作園林買山豈
是巢由事園廬皆借地營之

秋雨書感

新春赤米摘新蔬一飽從來不願餘門外久無溫卷
客架中寧有熱官書濁醪未廢時時歡短髮猶須日
日梳自笑少年風味在滿川煙雨正愁予

又

晨起開門雪滿簪東崗一徑得幽尋斷雲殘雨歲華
晚丹實碧花秋意深林下已悲身老病人間猶與俗
浮沉牀頭小甕今朝熟又喚隣翁共淺斟

弄筆

少學文章竟不成莫年腕弱字欹傾抽毫欲下還休
去斐几空憐似砥平

睡覺作

世言黃帝華胥境千古蒸荒孰再遊但解消搖化蝴蝶

蝶不須富貴慕蚍蜉

邛鄞夢事豈關身未熟黃梁迹已陳輪與烏衣老鈴
下日中睡覺一彈伸

秋思

露濃壓架葡萄熟日嫩登場穉稻香商略人生如意
事及身強健得還鄉

又

三三兩兩戲魚行香餌纔投去若驚寄與扁舟五湖
客只當遠引過平生

又

一篇舊艸天台賦六幅新傳太華圖占盡人間清絕
事紫藤香起竹根爐麝香近出廬山

又

村南村北鶉鴉鳴小雨霏霏又作晴拂枕欹眠不成
夢却拖藤杖出門行

又

出門東行復西行處處人家打稻聲小甕秋醅雖未
熟後園楮葦已堪烹

又

看雲廬阜屏風墨采藥嵩山冠子峯行盡四方心未
快不如一榼醉吳松

又

桑竹成陰不見門牛羊分路各歸村前山雨過雲無
迹別浦潮回岸有痕

又

隣砧落日數聲殘汀樹秋風幾葉丹冉冉清愁來不
斷無方能使酒腸寬

又

老子齋居罷擊鮮木盤竹筴每隨緣隣僧不用分香
鉢蓮芡猶堪過半年

又

存神止慮自長年黃老遺書漢尚傳妙語雖傳人
不省却從丹竈覓神仙漢武帝賜平津侯詔曰君其存精神正念
慮補助醫藥以自持邪侯與楊王孫書曰願存精神省思慮進近醫藥
厚自持其語悉同疑出於黃老遺書至漢尚傳也

秋來苦貧戲作

閉門高臥養吾真說著生涯笑倒人奴閑囊空辭雇
直婢愁鬢冷拾炊薪羹能有糝猶為泰地到無錐始
是貧一飯不妨支一日讀書常愧詎比隣

晚晴

雨餘殘日入疎籬變化相乘乃爾奇千嶂莫雲收盡
後一年秋暑洗空時如山酒券不相貸隔巷衣砧如
許悲剩欲出門紆滯思交親零落與誰期

對月

遠客厭征路流年逢素秋不知今夜月還照幾人愁

又

艸艸治杯盤三更月露寒茆簷雖隱翳終勝客中看

出近村晚歸

松枝代如意練布製單衣出每沾晨露歸當送夕暉
野花當路發沙鳥背人飛到舍燈初上茅簷聞踏機

又

苦雨秋將晚羈愁酒易醺百年終腐骨萬事盡浮雲
果熟多猿噉林疎過鹿羣亦思書觸目老癩不成文

秋晚

雞聲喔喔頻催曉木葉颼颼已變秋憂患縱多終強
項飢寒未至且優游老罷尚欲身當道乳虎何疑氣
食牛時黑孫方生半年但有一愁消未得大兒白髮成

邊頭

犬雞

小犬一何警日夜吠籬落老雞則不然平日方嗥嗥
勤情各其性於我何厚薄糠粃一施之且復慰寂寞

賣藥翁

老翁如我老賣藥以代耕得錢付酒家一毫不自營

浩歌和隣叟苦語誨後生我欲為作傳無人知姓名
書里中事

事近接耳目誕信良易知頗疑有定數一惑不可移
坐視非所安忠告反取疑雖抱愚直意妄發悔曷追

書室雜興

秋水淺出難秋葉落成陣方喜風露清已歎霜霰近
衰疾雖向平不死亦董董燈青地爐冷吾學其少進

又

衣多藏之筒食餘積之困我享既有限富亦豈勝貧
布褐本自温筍蕨固已珍君看梁伯鸞寄食終其身

又

老眼觀細書紛然黑花墜不如袖手坐嘿誦舊所記
但恨志弗強編簡頗失次後身作書生努力究此事

又

學書五十年其進不及寸未能踐繩墨況敢說豪健
雖然亦有用尚足博麤飯開學教牛經坐市寫驢券

秋感

瘦盡腰圍白盡頭悲蛩聲裏落梧秋短檠且慰經年
別豎褐猶懷卒歲憂天地無私嗟獨困風霜有信又
殘秋頑軀安得常強健更倚東吳寺寺樓

秋夜

秋色滿江干江楓已半丹身閑詩簡淡道勝夢輕安
偃蹇憐腰折清癯鄙面團何妨杵衣夜又見歲將殘

又

落葉鳴遙夜啼螿送莫秋不知何許笛故作此時愁
青海二年戍黃旗萬里侯何如石帆下煙雨釣滄洲

劍南詩稿卷第七十二終

劍南詩稿目錄
卷第七十三

秋日村舍二首 村遊 吳歌 秋感二首

紹興辛未至丙子六年間予年方壯每遇重九

多與一時名士登高於載山宇泰閣距開禧丁

卯六十年憂患契闊何所不有追數同遊諸公

乃無一人在者而予猶強健慘愴不能已賦詩

識之 結茅 老健 幽居即事二首 秋晚

書感 小市莫歸 寓歎三首 題僧菴 哭

季長二首 魔境作頗思遠適賦此自遣 枕

上 讀幽詩 北窗 小圃醉中作 秋冬之

交雜賦六首 海山 飲村酒 觀諸將除書

捫腹 醉歌 自歎 村翁 不寐 書志

東偏紙閣初成 小豎醉 雜興四首 示

兒孫輩 雜賦六首 幽居 連日作陰頗有

雨雲意 山房 梅市莫歸 法雲寺 郊居

作雪不成獨詠 聞雁 泛舟至蜻蜒浦小

泊漁村 散策門外隣叟怪其瘦 書警二首

園中 冬晴行園中二首 懷青城舊遊

晚立 志喜 窮居 冬暖園中萱艸蒼然海

棠亦著花可愛作路浚井皆近事也 即事示

兒輩 小雨頗寒 題舍壁二首 仲冬書事

醉舞 思蜀二首 次韻李季章參政哭其

夫人七首 試筆 屠希筆 寒夜吟 記夢

懷 書況

霜夜二首 歲莫 與野人散策門外 十

一月十一日夜聞雨聲 自述二首 歲莫老

劍南詩稿卷第七十三

宋陸游務觀

秋日村舍

會稽城南古大澤霜晴水落煙波迤寒風蕭蕭涸柳
柳暖日暉暉秀麴麥傳聞新詔募新軍復道公車納
羣策忠誠所感金石開勉建功名垂竹帛

又

川雲慘慘欲成雨宿麥蒼蒼初覆土芋肥一本可專
車蟹壯兩螯能敵虎村村婚嫁花簇檐廟廟禱祠神
降語兒孫力稼供賦租千年萬年報明主

村遊

閉戶苦無膠行行不覺遙人稀廢古井水退築新橋
野店聽山雨僧厨餽藥苗湖中有高士折簡恐難招
吳歌

秋感

勝負兩蝸角榮枯一蟻窠人情苦翻覆吾意久蹉跎
困賸憑茶醒衰顏賴酒酖坐人能聽否試爲若吳歌
扶杖龍鍾迫耄期江湖木落更堪悲醉中光景似得
志夢裏朋儕如少時落筆龍蛇仲蒙帖 丙國器一字仲
蒙滿懷風月季長詩前朝名勝凋零盡百歲關心只
自知

又

聖世優容許乞身歸來猶幸齒齊民漁家那有懸車
地蔬食何施祝鯁人獠婢臨溪漂衣絮蠻童掃葉續
炊薪生涯如此仍秋莫賴是從來慣處貧

紹興辛未至丙子六年間予年方壯每遇重九
多與一時名士登高於戴山字泰閣距開禧丁
卯六十年憂患契闊何所不有追數同遊諸公
乃無一人在者而予猶強健慘愴不能已賦詩
識之

故里登高接雋遊即今不計幾番秋一樽尚與菊花
醉萬事不禁江水流薄命雖多死閭巷逢時亦有至
公侯若論耄歲朱顏在窮達皆當輸一籌
結茅

結茆湖曲兩三間客少柴荆盡日關插架圖書娛晚
莫滿難鷗鷺伴清閑壁龕吳晉千年字 斷地得吳永安
晉太康中古甌 窗納葦稽萬壘山自怪堅頑推不倒時
來臨水照蒼顏

老健

年垂九十身猶健竹屋荆扉不厭低挈榼自沽深巷
酒擁衾遙聽別村雞家添豚柵還堪賦路認牛欄每
不迷惟恨窮秋開霽少晚來小雨又成泥

幽居卽事

壯歲本亡奇類齡又及斯極知身有幾惟是醉相宜
燒艸温新犢編籬護伏雌謀生未忘念笑語路傍兒
又

秋晚書感

晚日照茅茨西風吹接羅貧思止酒易老海養丹遲
斷地秋畦藥焚香夜探著呼兒具舟楫吾欲上湘漓
儀象初心豈願才溝中雖斷不須哀吾生自信雲舒
卷客態誰論燕去來夕露正看沾艸棘晨霜已見落
楸槐老年閉戶真無憾葑火更闌熟芋魁

小市莫歸

愛酒行行訪市醅醉中亦有穉孫扶林梢殘葉吹都
盡煙際孤舟遠欲無野餉每思羹昔者旋炊猶得飯
雕胡青山在眼何時到堪數年來病滿軀

寓歎

日夕羊牛下月明烏鵲飛林林皆有託質獨安歸
疾痼方求藥秋高未製衣岷峨不遂隱更恨昔謀非
又

交世非初志謀生又絕疎家貧思辟穀人忌悔知書
門異回軒巷乘無秃尾驢老頑君勿怪萬事有乘除

又

短髮不禁搔，紆悲賴濁醪。潦收溪瀨急，木落寺樓高。
善飯餘何欠，看雲亦足豪。今朝有奇事，江浦得霜螯。

題僧菴

細路穿雲塢，危橋渡野塘。人稀土花碧，屋老瓦松長。
憂患雙蓬鬢，裝資一布囊。燒薪藉餘暖，今夜有新霜。

哭季長

岷山剡曲各天涯，死籍前時偶脫遺。三徑就荒俱已老，一樽相屬永無期。
哀慟今何及，泉壤從遊後不疑。邂逅子孫能記此，交情應似兩翁時。

又

我荷鋤時君賜環，君歸我復造清班。無由促席暫握手，每得寄聲聊解顏。
造物不令成老伴，著書猶喜在名山。季長晚著書數百卷 半年僅得陳尊鯽，白首臨風涕自潸。

魔境作頗思遠適賦此自遣

夜夜燃燈日，日香修行老尚墮。微茫齋居自許塵心盡，遇事方知業力強。
兩屨生雲入瀟皖，孤舟載月上瀟湘。道人行李君毋笑，惟是著筒與藥囊。

枕上

窗紙蕭蕭印月痕，數聲新雁過江村。孤愁不與夢俱斷，羸老豈知身尚存。
世事萬端歸蠹簡，秋風百感集清樽。荷鋤家圃知何憾，猶勝生求入玉門。

讀幽詩

我讀幽風七月篇，聖賢事事在陳編。豈惟王業方興日，要是淳風未散前。
屈宋遺音今尚絕，咸韶古奏更誰傳。吾曹所學非章句，白髮青燈一泫然。

北窗

半世蟬嘶坐北窗，老年依舊守殘缸。買書安得黃金百，覓句如求白壁雙。
老氣尚思吞夢澤，壯遊曾足釣巴江。寒生事業秋毫盡，筆力終慚鼎可扛。

小圃醉中作

搖落園林探借春，耄期詩酒肯輸人。狂時湖海猶嫌壯，達處羲農亦未淳。
木葉蔽身如盛服，藜羹加糝即常珍。巢由尚隱唐虞代，漫道桃源是避秦。

秋冬之交雜賦

蓬戶終年閉，靈臺一事無。貧猶能自活，衰未藉人扶。兒學無敵異，孫啼有啓呱。
東隣趨道士，折簡也能呼。

又

霽日收殘靄，微霜作早寒。桐凋無宿葉，水退出新灘。室小纔容膝，門低每觸冠。
平生只此是，何物動憂端。

又

避俗嫌林淺，安貧覺屋寬。地爐燒葑火，土榻藉蒲團。稚子誇藜糝，高僧輟芋殘。
霜寒固難出，不怕笑蹢躅。

又

嶺下晨炊黍，津頭莫繫船。寒潮吞別浦，老木慘蒼煙。市徙新山步，耕侵古廟墀。
閑人不蓄曠，散髮醉江天。

又

霧雨林塘晚，風霜聚落寒。衣冠存簡朴，農圃備艱難。春簸麴供餌，蒸炊豆作團。
此心如古井，無地起漣瀾。

又

確舍臨寒水，漁舟弄夕霏。烏將九子過，雉挾兩雌飛。浮世萍無蒂，流年弩發機。
常思南鄭日，縣驛跨驪歸。

又

確舍臨寒水，漁舟弄夕霏。烏將九子過，雉挾兩雌飛。浮世萍無蒂，流年弩發機。
常思南鄭日，縣驛跨驪歸。

又

湘浦騷人詠，吸漓黃州飲。溼又增奇紛紛，坐客評清濁。我已昏然睡不知。
觀諸將除書

觀諸將除書

百鍊剛非繞指柔，貂蟬要是出兜鍪。整得官若使皆齊，虜對泣何疑劫楚囚。

身如椰子腹瓠壺二畝荒園常荷鋤著萬卷書雖不足容數百人還有餘

醉歌

却日莫揮戈君當聽我歌花殘狂有限酒熟悶無多生理憑長鑱幽情寄短蓑江湖秋萬里未死且婆娑

自歎

惡殺常根食安貧但溫袍消搖敢言達簡默本非高入刺逢飛雪遊吳看怒濤平生笑漁父苦語勸鋪糟

村翁

不入城門三歲餘亦無車馬過吾廬食常羹芋已忘肉年迫蓋棺猶愛書處處叩門尋醉叟時時臨水看遊魚半生名宦終何得作箇村翁計未疎

不寐

一竿江渚寄沉冥衰疾侵凌失鬢青困睫日中常欲閉夜闌枕上却惺惺

書志

平生不喜作鷹搏常伴寒螢語夜闌一椀涼糜支日過數椽破屋著身寬衰殘雖已數垂白憂患未容侵

東偏紙閣初成

泥丹後五百年吾話在笑君虛坐幾蒲團

小豎醉

毗鄰占雨解移穴蟋蟀畏寒先近牀我亦聯屏為煖室一冬省火又宜香

雜興

漫道樽中酒不空歌呼誰解和衰翁可憐小豎如猱攫却有平陽吏舍風

又

寸陰可惜子所知尺宅治生今未遲虛費年光作閑事人間信有白頭癡

又

堯舜桀紂皆腐骨王侯螻蝻同丘墟麥苗覆塊鳩喚雨常恨無人同荷鋤

一春妍暖無多日八十康強有幾人學不名家空自苦路邊醉倒却關身

又

詩人肝肺困雕鐫往往壽非金石堅我獨適情無傑句化工不忌遺長年

示兒孫輩

昔忝諸生後初非一世豪但希卿有秩敢望郡功曹斂版寧為辱扶犁亦足高兒孫勿妄想底處不徒勞

雜賦

養疾清溪曲風林幾著霜細書如助癩薄酒不成狂老歎朋儕盡閑知歲月長柴門偶一出倚杖立斜陽

又

孤學連流俗危機歷畏途逢人增懼况看鏡失膚脚閉戶書圍坐移燈影向隅空懷四方志泯默死東吳

又

家業貧原憲年齡老伏生但悲鸞獨舞那羨雁能鳴釀酒秋常醉驅牛夜亦耕此身當自貴勿用作投瓊

又

貴固不如賤狂應未勝癡閉門真已矣命駕欲何之碧縷生香袖清漪漲硯池是中有佳處不覺晝陰移

又

海上魚鹽聚煙中雞犬聲耕農叱牛去醉叟策驢行飲薄民差樂烽消盜略平悠然憩松下我亦有幽情

又

櫛髮晨興後寬腰午餉餘講明窮理學雜校養生書倚杖聽啼鳥臨池看戲魚怡然又終日底事解愁予

幽居

人間歲月苦駸駸白首幽居不厭深懶愛舉杯成笑睡靜嫌對奕動機心山村野渡雙芒屨夜雪長霜一布衾不到匡廬三十載夢攜巾鉢上東林

又

連日作陰頗有雨雪意十分曆日過八九徂歲迫人殊可驚霜木蕭蕭臨古

道雲雲慘慘冒高城山頭噤雀無生意水面飢鳶有
墮聲刺壓新醅供旨蓄從今次第問春耕

山房

四紀移家剡曲傍自茨生艸作山房寒侵夜艾知霜
重行遍天涯覺夢長戒婢無勞事斂澤課奴相率補
陂塘無衣已免幽人數數落春蠶歲有常

梅市莫歸

老境惟閉門不與事物接時逢佳山水尚復快登涉
山程策小蹇水泛搖短楫今茲稅駕地佳事喜稠疊
雲生溼行膝風細掠醉頰旅羹芋玉糝僧飯數白種
封火煨羊魁瓦甑炊豆莢經行出幽圃懷抱頗自愜
枯籬絡丹竇深澗堆黃葉白雲橫谷口綠篠穿山脇
還家寧迫莫取路差徑捷何當倚蒲龕一坐十小劫

法雲寺

法雲古蘭若西走奏錢塘路帆影梅市橋人語柯山
聚吾家昔為隣來往無晨莫十世三百年散徙非復
故修廊與廣殿亦已化煙霧經營久不倦大體始略
具鐘魚以時鳴軒檻有幽趣中庭掃蕪穢斷碣起顛
仆老我絕世緣隨身惟兩屨願言治北窗寂寞同子
住

郊居

郊居本宴如觸事自多感況當搖落時雲重天慘慘
路窮非通途地偏無遠覽蕪連古道槁葉滿幽坎
老來厭了了萬事付雞聞地爐熾生柴喚客烹薺糝
作雪不成獨詠
淡日朝穿霧濃雲夜護霜風聲空浩蕩雪意愈微茫
棊几閑臨帖銅爐靜炷香悠然踐殘歲不是傲羲皇

聞雁

蜻蜒浦中聞雁聲寒侵短褐客愁生忽思大散關頭
路雪壓蒙氈夜下程

泛舟至蜻蜒浦小泊漁村

醉泛蜻蜒浦啞啞一鵝聲陂塘秋水瘦墟落莫煙生

野店曾留醉樵翁不記名相逢雖惘惘懷抱已先傾
散策門外隣叟怪其瘦

八十衰翁力既愆強扶藤杖出門前朝暭恃躬何勞
歎齒脫牙搖已數年

書警

束帶接一客伸紙報一書未為甚疲勞已覺不枝梧
惟有袖手坐儼然如齋居尚懼精神衰藥石以自扶
又

園中

殘菊無復花遊蠶抱枯叢我老復多疾寄迹窮巷中
開門無客至安取樽不空夕陽挂高樹此日還忽忽
冬晴行園中

冬溫光景如春妍莫年強健勝壯年手推園門拂石
坐豈暇為客思無甌殘蕪未死更鬱鬱晚菊欲槁猶
鮮鮮閑愁正得酒彈壓此夕預知當熟眠
又

桔槔灌蔬固已非竹筧澆花宜見譏杏繁梅瘦種性
別一氣生殺均天機細推物理孰不爾搏風未可嘲
卑飛君其置之且共酌白酒方熟黃雞肥
懷青城舊遊

宦途到處不黔突惟有劍南藤歲月屢遊老澤蒼玉
璋疑是虛皇白銀闕松肪擣麩具晨餐樹葉作衣勝
短褐泥飲不容繁杏落浩歌常送寒蟬沒水邊洞口
適有遇握手一言換凡骨少陵老子未識真欲倚黃
精除白髮

晚立

倦憑小豎立柴門殘角疎鐘欲斷魂傷雁養翎依荻
浦渡牛浮鼻望煙村壯心已覺隨年往孤學何由與
俗論數點雨聲催返舍小窗燈火對壺殮

志喜

雪鬢蕭蕭九十翁短策猶喜策新功
斷輪自得不得傳處治水本行無事
中山市兒童隨小蹇江村煙雨宿
孤篷更知衰疾從今減萬里塵清蜀藥通

窮居

仕宦初何得窮居半十農清宵叔夜鍛
平日伯鸞春馬磨猶支日牛衣亦過冬
湖中有嘯父何計得相從湖中隱士
月夜棹舟其疾如飛拉湖有聞其嘯歌者

井皆近事也

暖景變嚴冬誰知造化功少留萱艸綠
探借海棠紅築路橫塘北疏泉小嶺東
欣然得佳處忘却歲將窮即事示兒輩

今歲霜遲殊未寒籬東烏柏葉纔丹
病輕漸喜免求藥老甚難誇能據鞍隣舍
僧貧分米少酒坊人熟督錢寬晚來笑向
兒孫說且得無生一話團

小兩頗寒

冬温初喜一寒新紙閣博爐養病身
殘雨已收猶點滴斷雲欲散更輪囷
衣裳可典寧留筍口腹雖饒肯累人
一事明朝差似樂探梅閑岸接羅巾

題舍壁

身寄瓜牛廬手持科斗書尚憎鴛鴦
棧肯羨鶴乘車富貴何加我山林亦
宴如年來常去殺不數食無魚

又

艸沒孔明廬塵流倚相書家居四立
壁出駕獨轅車窮達本無擇死生良
自如鏡湖三百里處處侶禽魚

仲冬書事

邊頭無警少鈴聲病得新霜亦已平
赤腳聽蛩勤夜績蒼頭租犢待冬耕
發奩雙兔駢頭臥溢棧芳醪徹底清
里巷紛紛誇節物春盤饑鼓漸開情

醉舞

渭城朝雨不須歌爛醉江頭舞短蓑
自是先生眼根鈍天狐伎倆本無多

思蜀

白帝城邊八陣磧青城山下丈人祠
英雄不生僊又去零落艸間多折碑

又

蜀莊鳴飛隘九區超然豈止山澤癯
荒臺古井無處所行子但覓房公湖

次韻李季章參政哭其夫人

飛蓋傳呼入省門依然殘夢浣花村
遙知最是傷心處衫袂猶罷掃黛痕

又

焚香黃閣退朝歸道話時時正要提
九十老翁綠底健一生強半是單栖

又

萬里甌車入鳳城豈知遽已迫斜曛
似聞後院思遺愛掩淚人人說小君

又

佛供齋僧糞萬分幽明路絕竟難論
若為可慰重泉念觸事平心無怨恩

又

煮蒿一去杳難知數紙遺書手自披
切勿輕為歸蜀夢竹枝忍復聽吾伊

又

害道無如狗愛噴養生尤要膏精神
祝公少置空閨億天下安危在此身

又

富貴思歸豈坐透岷山種芋已成區
獨歸它日公無憾天際煙帆與石俱

試筆

人間元無第一手萬事端如屈伸肘
但能看破即超然何代商山無四叟
老民自視中何有傾身經營一杯酒
此外管城差可人相從且作明窗友

屠希筆

屠希一筆價必千紹興初載海內傳高皇愛賞登玉
几求書蚤莫常差肩一朝希死子孫弱歲久僅可售
百錢宣城晉陵競聲價外雖甚飾中枵然嗚呼世事
每如此使我太息中夕起

寒夜吟

仕宦孰不願美官無如兩膊聳聳寒可憐誤信紙上
語至死功名心未闌翫得倚門矍鑠猶據鞍何如
百年中盡付一漁竿布襦可以度雪夕麥飯可以支
朝餐但知禪龕著身穩莫和詩人行路難

記夢

衣紳飄舉髮廳廳一鶴聊為太華遊每過名山思小
憩天風浩浩不容留

霜夜

月淡霜清夜漏遲疎鐘杳杳度南陂燈殘有恨欲誰
語難老無聲如我衰使入蜀川方在道書傳淮浦定
何時若為可遣閑愁得獨擁寒爐蒸豆其時方附蜀中
便舟寄書張季長家又未得古壽書每開懷

又

土牀紙帳臥幽寂枕上細聽城上更櫓拙燒殘地爐
冷嗟呶聲斷天窗明風霜欲透艸茨屋鹽酪不下菘
糝羹猶恨扶犁老無力向來枉是請躬耕

歲莫

歲莫風霜慘村深艸棘稠力衰行每蹇衣薄鼻多鼾
久矣當長往悠然尚小留兒童報炊熟得飽且忘憂

與野人散策門外

春意侵寒律川雲結夕陰閑人了無事隣叟偶相尋
廢沼萍黏塊孤村雀滿林世間真夢耳何物可關心
十一月十一日夜聞雨聲

入冬殊未寒塵土冒原野溝溪但枯萍不聞清湍瀉
今夕復何夕急雨鳴屋瓦豈惟宿麥長分喜到菜把
明朝開衡門想見泥濺蹀豐年儻可期擊壤歌幽雅
自述

怡然氣貌漸還嬰淡飯麤裘過此生儘道無方能縮
地夢中夜夜上青城

又

齒疏復牢能咀嚼足孳漸愈可踟踖短繫非復衰翁
事且與兒孫共地爐

歲莫老懷

粥美忘流歡燈孤伴獨吟衾寒知夜艾身痛卜天陰
薪炭常憂絕杯觴不厭深故人今已矣三數有遺音
謂季長也

書況

垂白渭南叟深居湖上村貧知蔬食美閑覺布衣尊
琴譜從僧借茶經與客論探梅來直步沽酒到偏門
細織籠安鶴頻求果飼猿舊書編未絕猶足教諸孫

劍南詩稿目錄
卷第七十四

書道室壁 書志 雪夕 書枕屏四首 二
友 寄五郎兼示十五郎 鄰曲相過 東窗

曉寒 小雪 書感 家釀頗勁戲作 食
薺糝甚笑蓋蜀人所謂東坡羹也 雜興四首

幽情 醉歌 霜冷 讀書雜言 東嶺
書戒 書齋壁 雪意 山房 晨起 兩雁

書文稿後 題唐執中書樓 歲晚六首
雀啄粟 老翁 寄子虞 雜詠四首 曉起

折梅 累日濃雲作雪不成遂有春意 晚晴
出行近村閒詠景物 道室戲詠 書感三首

臘月 雪作 卽事 或遺以兩大瓢因寓
物外興 歲未盡前數日偶題長句五首 余

得蘆竹拄杖于舍傍民家似蘆非蘆堅勁輕滑
色如栗玉入手錯然微有聲它杖莫及作五字

唐律記之 八十四吟二首 歲莫六首 書
感 書適 學道 舟中作 得蜀信 送蘇

趙叟赴省試 新春感事八首終篇因以自解
自歎 初春二首 簡傅十八官 開歲愈貧

戲詠 戊辰立春日二首 早春出遊 春寒
園居 郊行 野望 晨起 午坐

劍南詩稿卷第七十四

宋陸游務觀

書道室壁

餘生天地一飛蓬學道年來似有功習氣掃除空劫外精神澡雪隱書中種瓜谿父時時見賣藥壺公處處同莫謂與人緣苦薄相隨拍手有兒童

書志

蓬矢桑弧射四方豈知垂老臥江鄉讀書雖復具隻眼貯酒其如無別腸疋馬揚鞭遊鄠杜扁舟振柂上瀟湘自悲此志俱難豁且復狂歌破夜長

雪夕

目視眈眈左耳聾吾衰略與昔人同移燈自看玲嶸影取酒時燒礪碗胸東郭稍能師順子北山未敢笑愚公空村雪虐風饑夜袖手悠然政策功

書枕屏

西域兜羅被南番篤耨香慣眠三丈日不識五更霜又心若冰將釋貌如兒未孩青城上官叟時入夢中來

又

甘菊縫爲枕疎梅畫作屏改詩眠未穩聞雪醉初醒又星斗闌干曉窗屏矓矓明金門與茅店一種是雞聲

二友

剩儲名酒待梅開淨掃虛窗候月來老子幽居得二友人間萬事信悠悠

寄五郎兼示十五郎

八十九十老可驚白髮森然憎鏡明身當遊岱尚少駐書欲藏山殊未成大兒爲國戍絕塞季子伴翁親短檠古人已矣不可作夜闌撫几數平生鄰曲相過

鄰曲集山家相看一笑譁扶行足蹉跎半落齒桂牙農圃乖生理風霜感歲華老來情話少更盡此甌茶

東窗

臘近寒何薄秋衣著尚宜年光祈雪見飾物賣燈知川日初沉後樓鐘欲動時東窗對兒子相與細論詩

曉寒

落月銜山口濃霜倒菊叢青氈壓衾暝輒火滿爐紅起晚書虧課愁多酒策功杜陵如昔否誰與問征鴻

小雪

簷飛數片雪瓶插一枝梅童子敲清磬先生入定回夢裏逢無咎天涯哭季長吾生亦有幾且復釣滄浪

書感

家釀頗勁戲作千古英雄骨作塵不如一醉却關身鼎來雖恨王陵熱熟味方知孟子醇試問浩歌遺世事何如酣枕養天真竹林嵇阮雖名勝要是淵明最可人

食薺

薺甚美蓋蜀人所謂東坡羹也薺糝芳甘妙絕倫暇來恍若在峨岷羹羹下豉知難敵牛乳拌酥亦未珍異味頗思修淨供祕方常惜授厨人午窗自撫膨臍腹好住煙村莫厭貧

雜興

鋤草春愈茂養草秋亦衰不如兩置之榮悴渠有時又栖雞未日鳴粒食固宜報林鳥何預人曉曉欲誰告

又

碩果墜池響魚隊散無迹空弦可落雁此事蓋自昔又滌硯欲其潔磨鏡欲其明願君試思之與己孰重輕

又

幽情免歸又破六年閑每寄幽情煙水間清鏡不藏新白髮芳樽猶惜舊朱顏一編蠹簡心空在百衲寒蓀債未還莫爲岷峨勞夢想故鄉隨分有名山

又

滌硯欲其潔磨鏡欲其明願君試思之與己孰重輕

醉歌

不癡不聾不作翁平生與世馬牛風無材無德癡頑
老爾來對客惟稱好相風使帆第一籌隨風倒拖更
何憂亦不求作佛亦不願封侯亦不須脫裘去換酒
亦不須賣劍來買牛甲第從渠饜梁肉貂蟬本自出
兜整燮理陰陽豈不好纔得閑管晴雨如鷓鴣辛苦
築壘拂雲祠不如吟歎風月登高樓爾作楚舞吾齊
謳身安意適死即休

霜冷

梅花消息動江邊漸見新春換故年莫道孤翁心似
鐵夜來霜冷透青氈

讀書雜言

書亦何用於世哉聖人之言如造化巍巍地闢而天
開淵源虞唐至周孔黃河萬里岷崙來天不使諸儒
為戰國血又不使六藝為亡秦灰豁如盲瞽見皦日
快若聾聵聞春雷插空秦華起突兀垂天雲漢森昭
回奈何後世獨不省顧捨夷路趨邛邛不知開眼踏
覆轍乃欲歸罪車輪摧福有基禍有胎一朝產禍吁
可哀

東嶺

雲罅漏斜日駕言東嶺行鴉翻半天黑鷺起一川明
小立照溝水欲歸聞角聲君看浮世事何處異棋枰

書戒

我幼事父師熟聞忠厚言治身接物間要使如春温
鞭朴不可弛此語實少恩但能交相愛餘亦何足論
家貧賴奴婢炊汲與磨門餘力具茗藥夕飯或至昏
有過尚當貴况可使煩冤出仕推此心所樂在平反
寧坐輒弱廢促駕歸丘園吾老死無日作詩遺子孫

書齋壁

煙水雲山千萬重散人名號繼吾宗買雞養就冲霄
鶴拾子栽成偃蓋松父老年年同社酒兒孫世世作
春農晚窗睡覺添幽事臥聽蘭亭古寺鐘

雪意

風吼江郊雪意濃雲如雨陣決雌雄山寒酒過平時
量窗黑書虧半日功閑話更端茶竈熟清詩分韻地
爐紅不須遽覓華胥路更挾天花落坐中

山房

何處合題詩山房病起時晨光鳥先覺春信柳偏知
陋學勤何益虛名悔可追布衾新絮暝惟與睡相宜
晨起

勛業文章謝不能生涯分付一枝藤身同湘浦孤舟
客心羨廬山下版僧倦枕厭聞窗外雨殘膏猶在壁
間燈草芝要及清晨服深媿蠻童為扣冰 草芝丹眉山
史載之學士方

兩雁

兩雁東西來合羣以南翔鏡湖接天台海闊天茫茫
冥飛遠增弋長路諸冰霜君看此氣象豈復謀稻梁
正爾下杜陵已復掠瀟湘超遙萬里程燕雀安能量

書文稿後

上蔡牽黃犬丹徒作布衣苦言誰解聽臨禍始知非

題唐執中書樓

吾州唐子他州無閉戶偏讀家藏書志氣頗聞已山
立神仙固自多樓居終日坐忘對燕几有時出遊騎
蹇驢人生如此自可爾勿羨新貴高門閭

歲晚

雲暗郊原雪意稠天公似欲富來甦布衾歲久真如
鐵詎敢私懷一己憂

又

不學空門不學仙端居曾次自超然絳人甲子君休
問新歲吾兒本命年

又

戒殺家庖罷饋魚病脾亦復禁寒蔬莫慚鄰里嘲枯
淡出甑香粳玉不如

小岫嶙峋炷寶熏卷書閑對一窗雲雁聲忽向天邊
過起立中庭看斷葦

又

小塢梅開十二三曲塘冰綻水如藍兒童鬪采春盤
料蓼茁芹芽欲滿籃

又

久矣功名不上心亦無心要老山林鹿門采藥悠然
去千載龐公是賞音

雀啄粟

坡頭車敗雀啄粟桑下餉來烏攫肉乘時投隙自謂
才苟得未必爲汝福忍飢蓬蒿固亦難要是少遠彈
射辱老農較未爲汝悲豈信江湖有鴻鶴

老翁

老翁睡少知遙夜貧士衾單怯苦寒悶裏不嫌村酒
薄瘦來偏覺舊衣寬離門遇健時能出書卷乘閑亦
取看深愧野人憐寂莫放鋤相喚共朝餐

寄子處

人生恨無年我老已爛熟退耕鏡湖上風雨有茅屋
事君闕補報得此不啻足餘年尚幾何嬾嬾風中燭
大兒戍塞垣馳馬佩矢餼去家千餘里辛苦就微祿
書來續二紙語悲不忍讀遙弟在我傍亦復淚溢目
門戶嗟日衰持守賴家督雲雲暗准天念汝方露宿

雜詠

少日狂疎觸怒嗔每緣憂患喪吾真晚收咄咄書空
手却作騰騰任運人

又

得過一日且一日安知今吾非故吾喪手明窗讀周
易不辜香鉢一齋盂

又

松肪燎火滿爐紅嬰粟煎湯到手空試問齋居守丹
竈何如醉臥聽松風

又

舊聞五岳多靈藥晚遇高人得祕文夢境此身常是
客幾時歸臥華山雲

曉起折梅

織女斜河漏已殘長庚配月夜將闌小橋幽徑無人
見折得梅花伴曉寒

累日濃雲作雪不成遂有春意

釀雪經旬竟不成一霜却作十分晴雲歸岫穴千峯
立暝入郊原萬耦耕苜葉離離豐歲候梅花眷眷故

人情道傍孤店新醅熟已有幽禽一兩聲

晚晴出行近村閑詠景物

雪雲吹盡木陰移正是先生曳杖時老特行將新長
犢空桑臥出寄生枝醫翁莫過囊探藥筮叟長占手

布著誰謂人間足憂患未妨古俗自熙熙

道室戲詠

道身隱太華壯歲客青城采藥何辭遠燒丹久未成
傅生已醉死韓子得狂名猶有殘詩在他年遺後生

書感

人生百憂坐一官況與羣飛接羽翰兩具吳牛給畊
足三間茅屋著身寬煮菘蒿悽愴會不免簡儉寂默差
可安康莊坦坦不整駕可憐平地生漚瀾

又

舞非得譜拍拍錯行未知津步步危劫石消磨會當
盡太行突兀乃可移清晨瓦釜煮藜粥遙夜地爐燒
豆其此中正自有佳處區區外慕寧非癡

又

茅檐住穩勝華屋芋糝味甘如大烹靜觀萬事付一
默掃空白髮非黃精丈人祠西鶴傳信小姑山前鼉
報更興闌却揮短棹去曉渡清伊聽玉笙

臘月

今冬少霜雪臘月厭重裘漸動園林興頓寬薪炭憂
山陂泉脈活村市柳枝柔春甦吾何患嘉蔬日可求

雪作

今年冬暝異常時造物收功乃爾奇平野忽看吹雪片清池俄復結冰澌飛蝗掃地無遺種瑞麥連雲有兩岐想見市樓增酒價深居袖手歎吾衰

卽事

雲本無心木不材平生得喪信悠悠釣魚每過桐江宿賣藥新從剡縣回山圍萬蔓晨灌漑地爐芋栗夜燔煨人情萬變吾何預笑口何妨處處開

或遺以兩大瓢因寓物外興

樹葉爲衣草結廬生涯正付兩葫蘆名山歷徧家何有塵念空來夢欲無野鶴巢雲元自瘦澗松埋雪定非枯悠然但覓高樓醉何處人間無酒徒

歲未盡前數日偶題長句

老向人間迹轉孤參差煙火出菰蒲數畦綠菜寒猶茁一勺清泉手自斟穀賤窺籬無狗盜夜長煖足有狸奴歲闌更喜人強健小草書成鬱壘符

又

短褐蕭蕭一幅巾明時乞與水雲身平生不售屠龍技投老直爲種菜人釜粥芬香餉鄰父蘭豬豐脂祭家神聯翩節物驚人眼籬鼓停槓又見春臘月八日以病相魏北俗也蜀人豢豬供祭謂之歲豬

又

枱欄小弁野人裝八十二年舊話長真笑形骸無藉在本知生世不牢強茅檐啼鳥初相命煙渚歸鴻漸著行想得城中盛冠蓋家家來往薦椒觴

又

風號四野雲如墨徂歲消磨不滿旬瑞雪便應平地尺野梅又報一年春長河斷渡冰將合古寺題詩手爲跛僵臥閉門行路絕安知今代獨無人

又

漸近新年日愈長不辭扶病舉椒觴了無一事干靈府只合終身住醉鄉鬪釘春盤兒女喜擣筴臘藥婢奴忙蜀州白首猶癡絕更爲梅花賦斷腸

余得蘆竹拄杖于舍傍民家似蘆非蘆堅勁輕滑色如栗玉入手錯然微有聲它杖莫及作五

字唐律記之

輕堅蘆竹杖入用自龜堂挺節冰霜後論交歲月長心空無寵辱時異有行藏老病登臨少何妨日倚床

八十四吟

新歲八十四自宜形影孤睡憑書攢相愁賴酒枝梧兒問離騷字僧傳本草圖孰言生計薄種芋已成區

又

七十人稀到吾過十四年交遊無輩行懷抱有曾玄飲敵騎鯨客行追縮地仙城南春事動小蹇又翩翩

歲莫

書房偷得蝸廬樣僅能容老病身紙被蒙頭方坐穩却愁轉眼又新春

又

淺色染成官柳絲水沉熏透野梅枝客來莫怪逢迎賴正伴曾孫竹馬嬉

又

挹泉石鼎煎崖蜜候火銅爐炷海沉一坐便應論十劫不知歲月去駸駸

又

久衰豈是見人時健忘偏于養性宜噉飯著衣常苦賴爲誰欲理一團絲

又

燕脂斑出古銅鼎彈子窩深湖石山老去柴門誰復過天教二支伴清閑

又

少慕浮名百種癡老知世事盡兒嬉從今春困不須賣睡到日高三丈時

書感

襁負客淮穎髣髴逢亂離中原遂乖隔北望每傷悲泛渭題新賦遊嵩續舊詩死生雖異世此意未應移

泛湄賦遊嵩詩見白歐二集
書適

細讀養生主長歌歸去來山僧借水品溪父送琴材
病退稀求藥身閑日探梅今宵喜無寐燬下有書回

學道

學道知專氣尊生得養形精神生尺宅虛白集中局
出岫孤雲靜凌霜老栢青晨興取澗水漱齒讀黃庭
舟中作

東浦菰蒲合南莊桑柘繁曾村落名潮生無斷港寺廢
有頽垣糴米尋山步移舟泊水村野人多舊識相對

兩無言
得蜀信

齒髮凋零志氣衰強臨尊酒祇成悲少年半是投閑
日春事常當臥病時憂患頗疑書作祟功名不似老

如期青城舊友頻相約歸養金丹尚未遲
送蘇趙叟赴省試

關路誰非觀國賓此君肝膽獨輪囷故家遺俗欲墜
地博士議郎方要人久矣扁舟弄江月往哉駸馬踏

京塵勅中墨色如鴉溼日待東歸一笑新
新春感事八首終篇因以自解

九陌風和不起塵平湖冰解欲生鱗往來朝莫紛如
蟻得見新春有幾人

又

興來遊行不辭遙吹帽風輕過畫橋猩血未看開露
蕊麴塵先已上煙條

又

一年最好早春天風日初和未脫縣坎坎圓鞦韆神
社翻翻小繳下湖船

又

憶到蘆門正月初竹枝歌舞擁肩輿當時光景應如
昨綠鬢洽中八十餘歲府

錦城舊事不堪論回首繁華欲斷魂繡轂金羈三十
里至今猶夢小東門

又

玻璃江上柳如絲行樂家家要及時只怪今朝空巷
出使君人日宴菱頤眉州

又

梁州陌上女成羣銅綠春衫罨畫裙相喚遊家園裏
去鞦韆高挂欲侵雲興元

又

烏藤卽是碧油幢百萬天魔指顧降酣枕不知霜縞
瓦下床已見日烘窗

自數

晨興袖手觀空寂飯罷寬腰習按摩堪數一生閑日
月爲身時少爲人多

初春

春入陂湖已折冰流年誰解繫長繩土膏動後麥苗
長桑眼綻來蠶事興稅足了無徵欠吏飯香時有乞
齋僧開正父老頗占候已決今年百稼登

又

漠漠春寒罷對棋霏霏春雨却催詩梅花一樹映疎
竹茅屋三間圍短籬醉倒幸無官長罵出遊自有老
人期年光滿眼吾何憾又近吳蠶浴種時

簡傅十八官漢孺

朋舊凋零盡新交得雋人文章諸律呂議論足精神
甚欲邀聯騎無如困負薪蘭亭脩禊近爲記永和春
開歲愈貧戲詠

謝事貧過筮仕初歸裝僅有一柴車笥衣盡典仍耽
酒困米無炊尚買書澗底飽觀苗鬱鬱夢中聊喜蝶
遽遽商山幾許功名事老子如今却笑渠
戊辰立春日

昨夜風搖斗柄回典衣也復一傳盃故人久作天涯
別新句空從枕上來清鏡豈堪看鬢色小園剩欲覓

桃栽頽然却恨貪春睡不盡城頭畫角哀

又

臥聽城門出土牛羅幃應笑雪蒙頭但須晨起一卮酒
聊洗人間千種愁處處樓臺多俠客家家艇舫待春遊
梅花未徧枝南北定爲餘寒得小留

早春出遊

地爐久厭撥寒灰一笑真成病眼開不恨城笳催日落
且欣巷柳報春回蹇驢破帽人人看南陌東阡處處來
聞道禹祠遊漸盛也謀隨劍一持盃

春寒

故歲無多雪新春乃爾寒柴車歸里社茅舍老江干
客熟沽醪啜絲癡索飯搏更憐菘芥長殊勝仰園官

園居

欲出還中止微陰却快晴檻花栽盡活籠鳥教初成
身寄江湖久心知富貴輕還嬰吾所證手自寫菴名
近名小室曰還嬰

郊行

山色掃石黛江流漲麴塵春晴不終日老病動經旬
竹密有啼鳥村深多醉人東阡與南陌處處寄閑身

野望

偶攜一小豎徒倚望南山松苗爲誰怨溪雲如我閑
洲長歸雁下天迴莫鴉還安得一竿去終年煙水間

晨起

日高霜漸釋睡起髮猶蓬小圃經行外新蔬檢校中
水開聞躍鯉天遠看飛鴻粥熟還歸舍吾生亦未窮

午坐

茶盃凝細乳香岫起微雲樹影窗間見禽聲屋角聞
流年易拋擲舊學失鋤耘師友今零落何人爲運斤

劍南詩稿卷第七十四終

劍南詩稿目錄
卷第七十五

自警 春雨 春寒 自喜二首 簡湖中隱者 短歌示諸稚 王子猷謂竹爲此君白樂天謂酒爲此君子野處無客每對竹獨酌得小詩 會稽行 野飲 作野飲詩後一日復作此篇反之 春晴二首 遣興二首 開歲屢作雨不成正月二十六日夜乃得雨明日行家園有賦 書屋壁二首 與兒孫同舟泛湖至西山旁憩酒家遂遊任氏茅菴而歸 日莫自大匯村歸 八十四吟 晚步至湖上 春陰題野店壁 題寺壁 題幽居壁二首 思夔州二首 梅開絕晚有感二首 園中晚飯示兒子 自詰 野飲 茆亭 身世 家有兩瓢分貯酒藥出則使一童負之戲賦五字句禹寺 旅遊二首 貧歎 東窗四首 近村 石帆山下作 日起二首 書況 閨中戲賦村落景物二首 予好把酒常以小戶爲苦戲述 春日對花有感 出遊遇雨而返二首 記閒 二感 題柴言山水四首 草亭獨坐 修居室賦詩自警 遊迹 春晴登小臺 魯墟舟中作 貧病戲書二首 又作二首自解 挾書一卷至湖上戲作 謝客相過書幸 書歎 古興二首各五韻 病中有述二首各五韻 黃鴉吟 恩封渭南伯唐詩人趙嘏爲渭南尉當時謂之趙渭南後來將以予爲陸渭南乎戲作長句 幽居 肩輿至湖桑棗 半俸自戊辰二月置不復言作絕句二首 頭風戲作 茆齋 畊桑 春遊 四首 蔬飯 海棠歌 園中作 書意三首 晚春二首

劍南詩稿卷第七十五

宋陸游務觀

自警

生世如夢境淹速無定時少壯不可恃况汝迫耄期
五官及百骸自揣日益衰客來能送迎要是強支持
百口皆新人所至無舊知紹興同朝者掃地靡復遺
雖云窮耐久造物豈汝私餘日真幾何得酒且伸眉

春兩

春陰不肯晴春兩斷人行慘澹柴荆色蕭條雞犬聲
香分豆子粥美啜芋魁羹猶勝梁州路蒙氈夜下程

春寒

冉冉年華過上元梅花如雪照江村雲歸翠竇初收

兩人怕清寒懶出門香燼已殘爐未冷客談方劇酒
重溫尚嫌塵塵境妨幽致過壞船聲莫正喧一湖桑棗去弊
廬里許

自喜

了了復惺惺著龜未是靈閑中有富貴壽外更康寧
身備鄉三老家傳子一經春回元不記出戶四山青

又

身寄人間世心常古鏡如喚醒狂蝶夢掃盡老狐書
年出鄉閭右貧過仕宦初村村是桃李豈獨愛吾廬
簡湖中隱者

夫子終年醉不醒若為問我故丁寧書因遣僕馱黃
藥詩許登山斲茯苓疇昔但知悲驥老即今誰不羨
鴻冥清宵定許敲門否擬問黃庭兩卷經

短歌示諸稚

流年去不還老狀來無那雖甚顏原貧尚勝夷齊餓
再歸又六年疲馬欣解馱姑幸筆轡空敢復希豆莖
好山懶出遊敗屋得偃臥飢能儲粟盜病亦有藥裹
酒蟻溢罈罌茗雪落小礪香火失情偷編簡謹程課

豈惟先幻妄亦以起衰懦向來名宦事回首如棄唾
義理開諸孫閱閱待其大賢愚未易知尚冀得一个
如其盡為農亦未可吊賀歸耕豈不佳努力求寡過
王子猷謂竹為此君白樂天謂酒為此君余野

處無客每對竹獨酌得小詩

新種疎篁對小軒旋沽薄酒實空尊門無車轍亦何
恨有此兩君堪與言

會稽行

我欲遊蓬壺安得身插羽我欲隱嵩華歎息非吾土
會稽多名山開跡自往古豈惟頌刻秦乃有廟祀禹
山形舞鸞鳳泉脈流湮乳家家富水竹處處生蘭杜
方舟泛曹娥健席拂天姥朱樓入煙霄白塔臨雲雨
脩梁看龍化遺箭遺鶴取茶芽可作經楊梅亦著譜
湖尊山蕨輩一一難遽數終年遊不厭冰玉生肺腑
誦詩有樵童乞字到俚嫗况復青青衿盛不減鄒魯
古詩三千篇安知闕吳楚土風聊補亡吾言豈夸詡

野飲

春兩行路難春寒客衣薄客衣薄尚可泥深畏驢弱
溪橋有孤店村酒亦可酌鳧茈小甌炊丹柿青篾絡
人生憂患窟駭機日夜作野飲君勿輕名宦無此樂

作野飲詩後一日復作此篇反之

世事如海沙巧歷不能數身居憂患中殆若墮奔虎
又如住敗屋岌岌日撐拄中夜風雨至摧壓固其所
孰能知其然徙義以為主要于一念間不敢欺仰俯

兢兢日三省寧可自莽鹵君看昔先師乃媿不若禹

春晴

雨斷雲歸兩作晴夕陽鼓角動高城客愁正得酒排
去草色直疑煙染成鷺為風和初命友鷗緣水長欲
尋盟不須苦問春深淺陌上吹簫已賣錫

又

常年春日少春晴拂面今朝暝吹輕水閣家家橫小
舫園亭處處聽新鶯桃花不管詩人老舊葉空催野

叟咩自笑此生餘幾許銅馳荆棘尚關情
遺興

莫笑龜堂礪魄胸此中元可貯虛空尚饒靈運先成
佛那計辛毗不作公采藥偶逢丹井客買蓑因過玉
霄翁不須更問歸何許散髮飄然萬里風

又

我是仙蓬舊主人一生常得自由身退歸自合稱山
長變化猶應侍帝晨得酒不妨開口笑學人難作捧
心蟬塵中且復隨緣住又見湖邊草木新

日行家圃有賦

東風催雨破天怪行圃歸來剩解顏百草吹香蝴蝶
開一溪漲綠鷺鷥閑老來每歎論心少貧甚方知覓
醉麴猶賴盞盞無恙在呼兒結束入南山

書屋壁

築室鏡湖濱于今四十春放生魚自樂施食鳥常馴
土潤觀鋤藥燈清論養真桃源處處有不獨武陵人

又

鳥道經行穩巢居臥起寬鹿衣裁短褐龜屋製危冠
舊菴菴中散今師靖長官蛟龍雲雨上未必勝泥蟠

與兒孫同舟泛湖至西山旁憩酒家遂遊任氏
茅菴而歸

過埭維舟古柳根却扶拄杖入煙村印泥接迹牛羊
過投宿爭林鳥雀喧酒保殷勤邀瀹茗道翁偃僂出
迎門郊居不與人間事惟有咩桑得細論

日莫自大雁村歸

筍輿伊軋莫山昏水敗陂塘路僅存出谷鐘聲知過
寺隔林人語喜逢村廟墟荒寂新犁地堤草凄迷舊
燒痕兒子念翁霜露冷遙持炬火出柴門

八十四吟

八十仍逾四遲留未告行筮言災退散醫質脈和平
畊牧猶能力癡頑每自驚所嗟經學廢心媿濟雨生

晚步至湖上

柴車無與駕篷艇亦須人賴有拄杖子能扶羸病身
雲山翠屏合煙月玉鈎新蕭散湖塘路微風吹葛巾
春陰

題野店壁

窗昏不見字今日罷觀書迹寄浮生內心遊曠劫初
太山均蟻垤聖域亦蘧廬兀坐還成倦荒畦去荷鋤
斷稿投衣橐殘壺挂馬鞍寺荒尋店久橋敗涉溪寒
道里逢人問題名拂壁看平生慣行役隨處得加餐

題寺壁

菴居渾似罷參僧除却癡憨百不能意倦有時憑曲
几興來隨處曳枯藤雲山直去寧須伴蘚磴高攀不
計層聞道鼉鳴天欲雨松門小住看雲興

題幽居壁

青山四抱路盤紆天與先生卜草廬雲冷數聲聞斷
雁溪清百尺見遊魚新醪薄薄閑尋醉殘髮蕭蕭悶
憶梳莫謂躬耕便無事百年京洛尚丘墟

又

聲利場中偶解圍悠然高枕謝招揮山前曳杖尋僧
去林下收棋送客歸城市氛埃那許到比鄰煙火自
相依纓冠束帶前身事散髮今惟勃落衣

思夔州

老來百念盡消磨無奈雲安入夢何壯憶公孫劍器
舞愁思賓客竹枝歌

又

武侯八陣孫吳法工部十詩韶護音遺蹟故祠春草
合略無人解兩公心

梅開絕晚有感

年年踏雪探梅開二月今年始見梅從此逢春心轉
懶小詩不擬覓花栽

又

尋梅不負雪中期醉倒猶須插一枝莫諱衰遲殺風

景卷中今歲欠梅詩

園中晚飯示兒子

一飽何心慕萬鍾小園父子自相從
蚍蜉布陣雨將作蚊蝶成團春已濃
澗底束薪供晚爨街頭糴米續
晨春盤餐莫恨無兼味自繞荒畦摘芥菘

自註

修行力量淺觸事常寡踪端居本無事
奈此百憂攻今晨默自詰世豈不汝容
激濯臨清流歡歌陸長松緩步有夷途
遠眺多奇峯野叟時相尋村酒亦自醲
于道忽少進一掃芥蒂胸襟釜本常情
寧說飯後鐘

野飲

農事未興思一笑春薺可采魚可釣
霏霏小雨忽已晴堤上相攜踏殘照
村場酒薄亦有力把醞相娛不辭醜
眼花耳熱言語多霍然已醒如過燒
人生百年會有盡世事萬變誰能料
酒空人散寂無聲為君試作蘇門嘯

茆亭

讀罷楞伽四卷經其餘終日坐茆亭
靜聽溪確春雲母細斷松根采茯苓
大道粗嘗聞海若高情未至媿山靈
寒泉新潔甘于乳晨起何妨挈半瓶

身世

身世飄然似斷雲時人誤許與斯文
旋償債動千里強理詩情無一分子
美舊悲殘酒炙幼安今老白襦裙
餘生自喜渾無事清夜銅爐炷寶熏

家

家有兩瓢分貯酒藥出則使一童負
之戲賦五字句長物消磨盡猶存
兩大瓢藥能扶困憊酒可沃枯焦
童負來山店人看度野橋畫工殊
好事傳寫入生綃

禹寺

禹寺荒殘鐘鼓在我來又見物華
新紹興年上會題壁觀者多疑是
古人旅遊

壯志蹉跎雪滿頭久將餘日付滄洲
閑雲不入老人夢隣笛似知孤客愁
小築聊須傍蘭渚片帆那復到樟樓
生涯草草真堪笑三十年來一破裘

又

本自無心落市朝不妨隨處狎漁樵
螺青點出莫山色石綠染成春浦潮
縣驛下時人語鬧寺樓倚處客魂消
流年不貸君知否素扇團團又可搖

貧歎

貧到今年極蕭然四壁家弊袍生蟣
蝨粗飯雜泥沙浩浩乾坤大茫茫歲
月賒故鄉煙水窟別擬卜生涯九折
危途寸步難至今回首尚心寒元來
自有安身處茆屋三間似海寬

又

才薄常為世俗輕還山力不給躬耕
即今贏得都無事袖手東窗聽雨聲

又

俗事紛紛意不據兀如頭垢念肥梳
東窗且復焚香坐閑看微雲自卷舒

又

寂寂東窗午夢殘更堪春雨作春寒
蠻童未報煎茶熟一卷南華枕上看

近村

家居每思出出亦無與遊江山豈不
佳乃復生我愁不如適近村家家業
農疇深巷鳴雞犬長陂下羊牛棗熟
稻當穫桑落酒可筍寧無賓祭須柿
栗良易求醫翁日過門得藥疾自瘳
婚嫁不出村百世加綢繆我來每絕
數恨不終歲留人生正應爾底事須
王侯

石帆山下作

石帆山下古苔磯回首人間萬事非
能飲上池何患死不營尺宅欲安歸
寒龜瑟縮捲床老倦鷄鷄翻遷帶箭
飛堪笑年來殊省事就憑樵女綻春
衣

日起

殘燈冷火待窗明稍覺今朝病體輕已賴林鳩知宿
雨更煩蒼鷺報新晴

又

地爐晨起撥寒灰困睫濛濛尚賴開正倚蒲團覓殘
夢一聲啼鳥又驚回

書況

自從請老鏡湖濱萬事不關林下人鴉去鴉歸還過
日花開花落又經春官微也過千重浪身在依然一
幅巾晨突有煙吾事了濁醪不復惱比鄰

閑中戲賦村落景物

遊宦才能薄還山日月長買牛捐寶劍取酒解金章
泉脈疏供啜松肪煉按方北窗貪兀傲南陌喜彷徨
僧過傳著法醫來寄藥囊泛舟經姚廟策蹇上僧塘
癩似嵇中散癡如顧長康人間須掃迹隨處是羊腸
燒廟僧塘皆湖上地名

又

覆篠初成屋編荆旋作門孤雲生釣瀨微雨過棋軒
柳種來傍縣疾子爲取柳本于餘姚茅氏花栽乞近村石
敬聊可坐地福不成園酒榼劖楓瘦香爐斷竹根海
鷗呼可下隴鳥教能言搏飯迎雙鶴聯網繫小猿山
家雖寂寞隨事有盤餐

予好把酒常以小戶爲苦戲述

我非惡旨酒好飲而不能方其臨觴時直欲舉斗升
若有物制之合會已不勝豈獨觀者笑心亦甚自憎
正如疾逆虜憤切常橫膺踏踏忽衰老何由効先登
上天無長梯繫日無長繩可數固非一壯志空飛騰
春日對花有感

天天枝頭花鬱鬱地上草方春萬物遂我乃獨衰
少時喜方藥晚亦學黃老又非愛名宦壯歲迹已掃
如何過八十尚復未聞道偃行阡陌間齒搖而髮編
名山可巢居決去恨不早宴坐精思牀猶能養梨棗

出遊遇雨而返

柴門方出雨霏霏未到湖邊促駕歸深炷爐香掩屏
臥誰知不爲溼春衣

又

荒山前頭野水邊東行西行不自憐天公豈亦哀老
子風雨留教終日眠

記閑

白雲堆裏看青山猿鳥爲隣日往還黃綺後身應我
是再來依舊一生閑

二感

狸奴睡被中鼠橫若不聞殘我架上書禍乃及斯文
乾鷄下屋簷鳴噪不待晨但爲得食計何曾問行人
情得啜而安飢得飽而馴汝計則善矣我憂難具陳
題柴言山水

陰陰山木合幽處著柴荆喧中有靜意水車終日鳴

又

懸水三十仞疾雷聞數里正暑凜生秋倚杖者誰子

又

高秋風雨天幽居詩酒地君看此氣象其可折簡致

又

草亭臨峭絕霜嶂起嶙峋危磴儻可上老夫思卜鄰

草亭獨坐

掃地垂簾坐草亭東風吹頰醉初醒睡蛇死後魔無
力疾豎降來藥有靈在手殘梅香淡泊傍檐幽鳥語

丁寧老人不是神通妙世事元來要飽經

修居室賦詩自警

荒園二三畝敗屋八九間初至如逆旅忽逾四十年
屋日已朽蠹我老不自還茅可刈之野木可伐之山

尚復不能具日夜憂其顛况我虛幻身念念隨化遷
齒墮髮亦縞鏡中失朱顏其危甚于屋何恃能牢堅
豐汝梨與棗養汝禾與鉛防疾如待敵愛氣如守關
謀于履霜初懼在橫流前書紳銘席端雖老尚可全

遜迹

遜迹荒村慣忍貧秋毫不使喪其真家居亦以古爲
鑑事過始知天勝人臨食致思方下箸讀書有得每
書紳放翁毫矣當知辛布褐藜羹畢此身

春晴登小臺

不管筇枝破綠苔閑穿萬竹上荒臺幽花經雨自開
落啼鳥喜晴時去來河岸家家裝彩舫兒曹處處唱
青梅誰知老子癡頑甚看改新元十一回

魯墟舟中作

春浦雨來元不到畫橈偶復入鷗羣人家遠火林間
見船底微波枕上聞山口正銜初出月渡頭未散欲
歸雲錦囊詩草新寥落得句猶堪寄一欣

貧病戲書

得米還憂無束薪今年真欲甑生塵椎奴跣婢皆辭
去始覺盧仝未苦貧

又

頭痛泔泔齒動搖醫驕折簡不能招亦知客疾無根
柢少健還能起負樵

又作二首自解

盡日溪邊艇子斜治生不種邵平瓜已分鄰舍紅蓮
米更啜僧房紫筍茶

又

靈府安平四體和經時止酒頰常醜老生要是常談
爾吐納餘閑節按摩
挾書一卷至湖上戲作
買地孤村結草廬蕭然身世落樵漁一編在手君無
怪會典蓬山四庫書
對客相過

我力日愈衰人事不敢倡窮巷春多泥何以稅客鞅
諸君顧何取勤懇問亡恙賦詩代尺書跂望徒悵悵

書辛

土益常餘菜山庖不絕煙罷醫翻少疾無術自長年
小舫煙波宅閑身陸地仙東窗最佳處日對坐忘編

書歎

髡髻承學紹興前歷看人間七十年撲滿終歸棄道
側鷗夷猶得載車邊釣船夜泛吳江月醉眼秋看楚
澤天造物未容書鬼錄殘春又藉落花眠

古興二首各五韻

草衰何預人每起徂年悲日月纔幾何又見青青時
青青雖滿眼行矣當復衰盛衰還無端其理可前知
人生死則已千載無還期

又

月出橫林上宿鳥無定枝物生各畏禍所託輒蹈危
老人倚壁坐大軒驚羣兒雖云差自適見事亦太遲
猶有一可喜承謝世俗羈

病中有述二首各五韻

萬事有常理中智皆能知禍福如白黑不待諷蒼龜
疾患初萌芽未有旦夕危每能自省察百鬼安能窺
一怠生百疾速死乃自詒

又

爲國恃久安變起最莫測釋楚爲外懼此實計之得
吾儕學養生事事當自克老無聲色娛戒懼在飲食
要須銘盤盂下箸如對敵

黃鴉吟

嗟哉黃鴉一何陋性喜隱翳藏荒園煙深翅重飛不
起鳴聲穀穀知雨候夜與妖鵬羣又似惡白晝羽毛
不足辱彈射滋味不足登俎豆捕之既無用驚之又
不售譬之人以支離而全木以擁腫而壽若予者智

不能知農圃學不能舉孝秀名不詳世動得嘲詬是
亦天下不材之尤尚何議乎汝後

恩封渭南伯唐詩人趙嘏為渭南尉當時謂之趙渭南後來將以予為陸渭南乎戲作長句

老向人間久倦遊君恩乞與渭川秋虛名定作陳驚坐好句真慚趙倚樓棧豆十年瘴病馬煙波萬里著浮鷗就封他日輕裘去應過三峯處處留

幽居

宿志在人人外清心游物初猶輕天上福那習世間書薺菜挑供麩槐芽采作菹朝哺兩摩腹未可笑幽居

肩輿至湖桑埭

籃輿隨意出衡門日已沉山野未昏小市叢祠湖上路短垣高柳埭西村麥苗極目無閑土塘水平堤失舊痕明詔裕民聞屢下老農何以報君恩

半俸自戊辰二月置不復言作絕句

力請還山又幾年何功月費水衡錢君恩深厚猶慚懼敢向他人更乞憐

又

俸券新同廢紙收迎賓僅有一絕表日鋤幽園君無笑猶勝牆東學僧牛

頭風戲作

出門處處皆桃李我獨呻吟一室中只道有詩歐瘡鬼誰知無檄愈頭風

茅齋

茆齋雖絕小老子策新勦磴落霏霏雪爐生鼻裊雲心將鷗共遠巢與鶴中分幾許人間事吾廬寂不聞

畊桑

老病雖俱至畊桑亦未遲兒童誇憤健婦女閔蠶飢月落鼻鳴夜燈殘鼠齧時但當尋熟睡萬事不須思

春遊

方舟衝破湖波綠聯騎蹋殘花徑紅七十年間人換盡放翁依舊醉春風子年十四始到禹祠龍瑞今七十一矣

又

熟食從來少天色東吳況是足春寒城南藉草可痛

飲安得酒腸如海寬

又

蘭亭路上換春衣梅市橋邊送夕暉聞有水仙翁是

又

沈家園裏花如錦半是當年識放翁也信美人終作

蔬飯

春事已闌珊山村未褪寒荷生初入饌薺老尚登槃僧飯時分鉢園蔬不仰官枯腸更禁攪姑置密雲團

海棠歌

我初入蜀鬢未霜南充樊亭看海棠當時已謂目未親豈知更有碧雞坊碧雞海棠天下絕枝枝似染猩

猩血蜀姬豔粧肯讓人花前頓覺無顏色扁舟東下

八千里桃李真成僕奴爾若使海棠根可移揚州芍

藥應羞死風雨春殘杜鵑哭夜夜寒衾夢還蜀何從

乞得不死方更看千年未為足

園中作

湖曲舊誅茆松陰近結巢安閑多熟睡衰退少新交兩漬丁香結春生豆寇梢良辰不把酒新燕解相嘲

書意

整書拂几當閑燼時取曾孫竹馬騎故故小勞君會否戶樞流水即吾師

又

人生祇要常無事忿欲紛紛喜見侵贈子祕傳安樂法秋毫莫遣動吾心

又

籬角緋桃落漸稀晚風吹去點苔磯揮金豈必如疎傳二畝春秧也是歸

晚春

世事紛紛不足論流年去似海濤翻莫因齒髮悲殘景且喜柴荆是故園千里桑麻無曠土數家雞犬自

成村鄰翁過我誇秧信雨後春泥一尺渾

又

莫笑花前醉墮巾
放翁又看一年春
尋巢燕熟頻穿戶
釀蜜蜂喧不避人
楚廟羔豚初散社
稽山筍蕨正嘗新
要知不負年光處
南陌東阡自在身

劍南詩稿卷第七十五終

劍南詩稿目錄
卷第七十六

湖上 卽事 東籬雜書四首 山行 稻陂
雨夜思子處 醉中示客 散髮 病中觀
辛夷花 小艇 雜題四首 閒遊 病起初
夏 衡門獨立 雨夜 山麓 北齋 禽言
四首 道院偶述二首 初夏書感 贈邢芻
甫 昔從戎南鄭日范西叔爲予書小臥屏今
三十有八年矣悵然有懷 小雨 遺興二首
初夏喜事 夢蜀 閒遊二首 初夏二首
野興二首 自笑 喜晴 過鄰曲 題蘇
虞叟巖壑隱居 縱筆二首 北窗卽事二首
感物 園中把酒示鄰曲二首 書憂 門
外獨立 感事六言八首 幽居記今昔事十
首以詩書從宿好林園無俗情爲韻 喜雨
初夏雜興六首 對酒作 獨坐閒詠二首
水亭二首 書興 書感二首 暑雨二首
池亭夏晝二首 頌歲從南鄭屢往來興鳳間
暇日追懷舊遊有賦 掃除小園未竟歸臥
暑中北窗晝臥有作 羈懷 自貽四首

劍南詩稿卷第七十六

宋陸游務觀

湖上

綸巾羽扇影翩翩湖上徜徉莫計年桃李已忘疇昔
分禽魚猶結後來緣山前虛市初多筍江外人家不
禁煙莫恨幽情無與共一雙白鷺導吾前

卽事

成敗歸青史悲驩付浩歌病從今歲減詩比去春多
高枕觀浮世持盃養太和功名亦易爾難負此漁蓑
東籬雜書

芳草初侵路青梅已破枝雨來鳩逐婦日出雉求雌
莽莽江湖遠悠悠歲月移老人觀物化隱几獨多時

又

桃李成塵土來禽始著花病夫猶枕上春事又天涯
巷陌鞦韆夢簾櫳燕子家野僧來問訊強把半甌茶

又

老厭人間事閑知造物功草生三徑綠花發一窗紅
幽境羈塵外流年嘯傲中所嗟儕輩盡論舊只春風

又

身與春俱老愁隨日漸長簾櫳聽語燕澗谷擷幽芳
酒榼常從後詩囊亦在傍閑行無定處隨意據胡床

山行

山鳥啼孤戍煙蕪入廢亭隄成陂水白雨細稻秧青
草市少行旅叢祠多乞靈最憐投宿處微火莫晶熒

稻陂

白水滿稻陂投種未三宿新秧出水面已作纖纖綠
年來殘俸絕所望在一熟見之喜欲舞不復憂半菽
想當西成時載重壓車軸病齒辛已牢往矣分社肉

雨夜思子虞

兀兀過遙夜悠悠擁破衾峭寒侵病骨殘雨滴愁心

人別易千里書來真萬金醉眠差似可誰與伴孤斟

醉中示客

四座無譁聽我歌百年生計一煙蓑清尊澹澹猶狂
在白髮蕭蕭奈老何遠適安能縮地脈高眠聊足養
天和吾徒看盡人間事莫愛車前印幾窠

散髮

散髮垂肩頰更簪一窗竹水對蕭森從來恥作資身
策老去終懷報國心雷起鼻端秋枕石泉鳴指下夜
橫琴不緣羸病愁迎客經歲何人肯見臨

病中觀辛夷花

餘生垂九十一病理一衰旬月不自保敢作期歲期
粲粲女郎花忽滿庭前枝繁華雖少減高雅亦足奇
持盃醉花前事亦未可知明年儻未死一笑當解頤

小艇

放翁小艇輕如葉只載蓑衣不載家清曉長歌何處
去武陵溪上看桃花

雜題

賀公在朝雅吳語莊寫仕楚猶越吟我幸歸休在閭
巷燈前感慨不須深

又

茆屋三間已太奢柴乾米白喜無涯非賢敢竊優賢
祿願折蓴絲與蕨芽半俸自春初不復敢請

又

野花紅碧自爭春村酒酸甜也醉人解放船頭便千
里不愁無處著閑身

又

湖隄疎瘦水楊柳村舍殿紅山石榴推戶本來隨意
入乞漿因得片時留

閑遊

柴車去去度橫陂正是春殘入夏時果熟多藏新密
葉鷺啼偏占最高枝迷途每就傭畊問薄飯時從逆
旅炊隨意題詩無傑思還家猶足詫吾兒

病起初夏

頭風間作已全輕
山雨雖頻却快晴
窗外時時度花片
林梢處處送鶯聲
地偏無客談閑事
麥熟逢人樂太平
不為衰遲辜節物
一甌羊駝薦朱櫻

衡門獨立

春歸堪笑又恩恩
水白秧青細雨濛
溪鳥低飛畫橋外
路人相值綠陰中
宋清藥券貧來積
李賀詩囊病後空
惟有劇談能一洗
芳尊那得故人同

雨夜

吳中地多雨
海角客常愁
羸病須醫藥
殘年憶輩流
解裝孤驛晚
振枕小江秋
莫起瀟湘興
無才賦遠遊

山麓

草合路如線
偶隨樵子行
林間遇磐石
小憩看春耕

北齋

質衣茸北齋
歌壞略撐柱
窗扉則虛名
聊足度寒暑
獨學無與論
推覈實勞苦
審觀古人意
十亦得四五
無功與子光
相可豈待語
一床寬有餘
高臥聽簷雨

禽言

架犁架犁
南村北村
雨淒淒
夜起飯牛
雞未啼
日莫
屹屹行
千畦沒
足勿恨
一尺泥
西成收薄汝
噬臍架

犁

又

拔筍拔筍
入簞不辭
風雨窘
養成會見
高拂雲
取供
口腹
初不忍
獨持兩把
慰倚門
慈顏
一笑如春
温披

筍

又

老翁老尚健
打麥持作飯
終歲隴畝間
勞苦孰敢怨
人生為農最
可願
得飽正如持
左券
確春樵爨
小甌
香豈不勝汝
耗太倉
打麥作飯

又

堂前捉續子
力作忘朝餐
鵝黃雪白相
照耀
插茅作
簇
高如山
蠶女採桑
至黃
繭何暇
膏沐梳髻
鬢纒成

蜀錦與楚穀
舞姝纏頭
不論東堂
前捉續子
道院偶述

景德祥符
草野臣登
封曾望屬
車塵已經
成住壞空
劫猶是東
西南北人

又

憶在青城煉
大丹丹成
垂欲上仙
班飄零未
忍塵中
老猶待時
平隱華山

初夏書感

春與人俱老
花隨夢已
空遊蜂黏
落蕊輕燕
接飛蟲
桑悴知蠶
起牲肥賽
麥豐為農
當自力相
戒勿恩恩

贈邢芻甫

割愁何處有
并刀傾座
誰能奪錦
袍堪笑陸
翁隣鬼
錄尚推邢
友擅人豪
杜門雖少
客載酒落
筆已能奴
命騷安得
相從北窗
下巧君贖
腹與殘膏

昔從戎南鄭
日范西叔
為子書小
臥屏今三
十有八年
矣悵然有
懷

梁州風月
今何在每
憶朋儔淚
濺裾戎幙
已如它世
事素屏猶
對故人書

小雨

川雲疊疊
密如鱗山
雨霏霏細
似塵未必
便為晞隴

喜天公分付與詩人

遣懷

山澤荒寒
外門庭寂
莫中厭聞
鳩喚雨常
羨鷓知風
逆境嗟行
偏閑愁幸
掃空今晨
有奇事簫
鼓賽年豐

又

風月資吟
嘯漁樵約
往還貧猶
能釀酒病
不廢遊山
亂石臥牛
馬流泉鳴
珮環豁除
羈旅日猶
有半生閑

初夏喜事

箕穎元非爭
奪場瀟湘
自古水雲
鄉采茶歌
裏春光
老黃繭香
中夏景長
斂版早知
遊宦惡署
門晚悟世
情常茹芝
却粒雖無
術散髮猶
當効楚狂

夢蜀

自計前生定蜀人錦官來住九經春堆盤丙穴魚腴
笑下著峨眉柙脯珍聯騎鶴遊非復昔數編殘稿尚
如新最憐栩栩西窗夢路入青衣不問津
閑遊

一見溪山病眼開青鞵處處蹋蒼苔平生長物掃除
盡猶帶筆床茶竈來

好事湖邊賣酒家杖頭錢盡慣會除壚邊爛醉眠經
日開過紅薇一架花

初夏

床有蒲團坐負牆室無童子自燒香人圖作佛雖堪
笑我愛逃禪亦太狂櫻筍久忘晨入省尊鱸猶喜老
還鄉汗青未絕茶經筆那暇投文吊戰場

又

梅子生仁已帶酸棟花墮地尚微寒室無長物惟空
榻頭不加巾但小冠蠶簇倚牆絲益起稻秧經雨水
陂寬郊原清潤身差健剩欲閑遊一跨鞍

野興

東望城闌十里遙野人生計日蕭條棋枰棄置機心
息肉食蠲除業境消送藥時時過鄰父放魚日日度
溪橋自憐愛物還成癖門巷春來草沒腰

又

涉澗穿林信意行翠崖朱棧愜幽情關關幽鳥將雛
語簌簌幽篁解籜聲藉草一壺消永日出門幾屐了
平生川雲正作遮山計浩蕩南風又快晴

自笑

宦途昔似伏轡駒退處今如縱壑魚手自掃除松菊
徑身常枕藉老莊書郊居本自依農圃社飲何妨逐
里閭白髮蕭然還自笑風流猶見過江初

喜晴

正厭鳩呼雨俄聞鶯噪晴路開知潦退書展喜窗明
日透疎簾影風傳莫角聲兒童競相報門有賣朱櫻

過鄰曲

黃雲卷盡綠針齊夏木陰陰滿古堤耆老往來無負
戴比鄰問道有提攜暑天漸近便餐酪吳俗相傳尚
繪壘共喜豐年多樂事扶歸先判醉如泥

題蘇虞叟巖壑隱居

蘇子飄然古勝流平生高興在滄州千巖萬壑舊卜
築一馬二僮時出遊香斷鐘殘僧閣晚鯨吞鼉作海
山秋極知處處多奇語肯草吳牋寄我不

縱筆

騎鶴翩翩過月傍浩然風露九秋涼忽聞捲地潮聲
起始覺江山近故鄉

又

百尺松根結茯苓千年長養似人形誰知金鼎烹初
熟恰值山翁醉欲醒

北窗卽事

衡茅隨力葺幽居掃地焚香樂有餘分食時能下檣
鵲作洲常悔詎池魚遊歸又失相尋客睡起重開未
了書袖手悠然便終日不辭世俗笑迂疎

又

北窗最與懶相宜世上紛紛了不知露井甘寒初浚
後小山葱蒨乍晴時粗餐豈復須鮭菜蓬戶何曾設
展屨幸有床頭藤杖在登臨未遽數吾衰

感物

提壺勸客飲架犁課農畊鳩方喜婦還蟻又以族行
大化職兩賜我窗更晦明芸芸觀萬物一笑了此生
園中把酒示鄰曲

畏途半世困風波老返家山得已多野餉雖無食指
動村醅也解醉顏酡夢殘正欲還君枕棋罷那知爛

客柯松菊未荒風月在應容老子且婆娑

又

煮豆烹蔬當果穀固應盃酌盡陶匏池塘激激荷浮
葉門巷陰陰筍放梢三畝荒園存故業一編蠹簡得

深交弊廬經雨穿將徧欲向村東自割茅

書憂

時人應怪我何求白盡從來未白頭磅礴崑崙三萬里不知何地可蘊憂

門外獨立

朝看出市莫看歸數盡行人尚倚扉要見先生無盡

興少須高樹挂殘暉

感事六言

老去轉無飽計醉來暫豁憂端雙鬢多年作雪寸心至死如丹

又

黑犢養來純白睡蛇死後安眠但有漉籬可賣不妨到處隨緣

又

五尺童知大義三家市有公言但使一眠得熟自餘萬事寧論

又

麥熟與人同喜虜驕為國私憂身似五更春夢家如一宿山郵

又

早歲已歸南陌莫年常在東籬短衣幸能掩脛長劍何須拄頤

又

高岸眼看為谷寸根手種成陰一卷楚騷細讀數行晉帖閑臨

又

李白嶽崎歷落嵇康潦倒粗疎生世當行所樂巢山喜遂吾初

又

有飯那思肉味安居敢厭茅茨未論顏淵陋巷老農自是吾師

幽居記今昔事十首以詩書從宿好林園無俗

情為韻 總角入家塾學經至爾詩治道本畊桑此理在不疑

今茲垂九十謝事居海涯戴星理農業未歎筋力衰

四月築麥場五月瀟稻陂乘火去螟蝗磨刀翦棘茨西成大作社歌鼓樂聖時

又

上世本為農輟耕業詩書我少學不成固應返其初

冥冥不自揣鄉校參羣居中歲偶拔擢清班久趨超

典奏入南宮細書長石渠及其乞身歸舊業已丘墟

衰疾或小閒力尚給荷鋤寄聲謝故人毋為笑迂疎

又

我昔揮短楫終年釣吳松亦嘗攜長鏡采藥玉霄峯

為計晚大繆朝路偶見容晨趨大明班夜聽長樂鐘

白髮迫歸休居然鮮歡棕上恩許乞骸一日收孤蹤

又

蓬茅略補葺甌確勤炊春故交零落盡歲晚當誰從

又

還鄉老未死舉目少耆宿邑屋亦或非所餘但喬木

巽時列鼎家今不飽半菽盛衰迭變遷何者非陵谷

羸然九十翁世故見已熟偶能達一理萬事等破竹

又

布縫一稱衣藜藿半釜粥餘年更何為枕藉糟與麴

癸亥辭修門拜賜故人號一出非本心歡喜歸祭竈

故鄉多名山幸得遂所好舟輿雖難具信步亦可到

清溪無塵滓奇峯有雲冒雨墊林宗巾風落孟嘉帽

豈惟狂故在望遠亦未眊一醉倘可謀敢愛將軍告

入蜀過匡廬秋風宿東林月出斷山口滿窗松竹陰

裊裊一枝燭道人語夜深亦設麩果供慰此羈旅心

又

猶恨非遠公無酒遣我斟明日下山去歎息難重尋

回首四十年駒隙何駸駸舊遊不可到悵望空長吟

昔戍西陲時憑高望中原願欲乘天風往吊綺與園

有志莫能遂，悵望商山魂。遙想山中人，歲時奠芳蓀。
夕陽簫鼓散，高柳擁廟門。老來更事多，考古見本根。
乃知當時事，禍福未易言。千載信悠悠，浩歎掩綠尊。
又

客舟挂煙帆，千里過楚都。七澤渺無際，大不數具區。
浪翻出長蛟，雲拆浮天吳。我來如山碎，船不須臾。
江行幸已盡，三峽尤畏途。槎牙人，鏃釜小失，即見屠。
叩頭禱鬼神，已脫猶號呼。願君勤自勵，憂患何時無。
又

昔自京口歸，卜居得剡曲。地偏無市人，民淳有古俗。
陋屋僅結茆，粗飯財脫粟。典衣以沽酒，九月未能贖。
寧負翁子薪，取售卜和玉。老身已如此，兒子亦碌碌。
藏書幸無恙，自計不啻足。拾穗且浩歌，行矣墮鬼錄。
又

少小喜讀書，終夜守短檠。其實無甚解，不幸誤有聲。
勞苦亦何得，空失東臯畔。莫年乃小黠，告歸學養生。
采藥作遠遊，把釣適幽情。高樓笛數曲，小軒棋一枰。
餘年置勿憂，不卿何由烹。

喜雨
入夏久不雨，旱勢已岌岌。蛙蛤徒自喧，蛟龍臥如蟄。
何由白水滿，但守青秧泣。上天忽悔禍，川雲起呼吸。
虛簷雨競瀉，平野苗盡立。兒停蹋溝車，婦免憂谷汲。
人言雨非雨，乃是傾玉粒。移床亦細事，敢嘆屋漏溼。
初夏雜興

老子今朝不用扶，雨涼百病一時蘇。扇題杜牧故園賦，
屏對王維初雪圖。把釣溪頭蹋湍瀨，煎茶林下置風爐。
箇中莫謂無同賞，逋客能從折簡呼。
又

中脫冠欹八尺床，竹陰槐影有餘涼。隨風花墮殘棋上，
引睡書拋倦枕傍。水長沙鷗向人熟，雨餘巢燕哺雛忙。
尚嫌未愜幽情在，又喚漁舟渡野塘。
又

自斷殘年莫問天，吾儕何處不隨緣。家貧却得身差健，
夜短何妨晝熟眠。未歷名山采靈藥，且從同社樂豐年。
賣絲羅麥償逋負，猶有餘錢買釣船。
又

緣算狂言悔莫追，杜門省事不妨奇。軟傾淡墨詩成後，
縹緲烏巾浴出時。筇杖閑行穿密篠，繩床移坐照清漪。
眼邊好景真須惜，漸近浮生結局時。
又

趁雨東園去，荷鉏歸養却。展讀殘書，幸能胸著雲夢澤，
何恨家無擔石儲。水泛時須借，篷艇山行亦或命。中車懶心，
惟怕遊城市，非向交親故作疎。
又

終日頽然蠹簡中，門前煙水浩無窮。百年等是一枯塚，
四海應無兩放翁。栗玉長枝挑苦筍，胭脂小把翦防風。
地偏日永閑無事，擬著珍蔬譜一通。
對酒作

飲酒豪如卷白波，遣愁難似塞黃河。多聞只解爲身累，
後死空令見事多。未試神仙餐玉法，且廣壯士入關歌。
此心不道無人識，雪鬢蕭蕭奈老何。
獨坐閑詠

書生亦有功名願，與世無緣每背馳。一寸丹心空許國，
滿頭白髮却緣詩。
又
深掩柴荆謝世紛，南山時看起孤雲。殘年所幸身猶健，
閑事惟求耳不聞。
水亭

水亭不受俗塵侵，葛帳筠床弄素琴。一片風光誰畫得，
紅蜻點點綠荷心。
又

莫道山翁老病侵，靜中理得舊傳琴。朝來有喜君知否，
雨展芭蕉二尺心。
書興

占得溪山卜數椽，飽經世故氣猶全。入門明月真堪
友，滿榻清風不用錢。便死也勝千百輩，少留更過二
三年。湖橋酒美能來醉，一棹何妨作水仙。

書感

翟公冷落客散去，蕭尹譴死人所憐。輪與桐君山下
叟，一生散髮醉江天。

又

驪山不障東逝波，一尊莫惜醉顏酡。斜風細雨蒼溪
路，我是後身張志和。

暑雨

欲雨未雨雷車奔，欲睡不睡人思昏。蠻童正報煮茶
熟，忽有野僧來叩門。

又

草茂水長蛙羣鳴，深路壞人斷行。故侯老退守瓜
壘，翠蔓黃花偏眼明。

池亭夏晝

造物寧非念老生，池亭幽事悉施行。羣魚聚散忽無
迹，孤蝶去來如有情。小磴落花紛雪片，寒泉得火作
松聲。曲肱假寐偷然寤，不為敲門夢不成。

又

茅舍蘆藩枕小灘，蕭森那復畏炎官。醉床酒解香初
過，燉架書橫夢未殘。饒愛流匙菰米滑，渴便滿杓粟
漿酸。兒孫幸有團欒樂，未覺浮生一笑難。

賦

昔戍蠶叢北，頻行鳳集南。烽傳戎壘密，驛遠客程貪。
春盡花猶拆，雲低雨半含。種畬多菽粟，執木雜松栴。
婦汲惟陶器，民居半草菴。風煙迷棧閣，雷霹起湫潭。
城郭秦風近，村墟蜀語參。快心逢曠野，刮目望浮嵐。
考古時興感，無時日每慚。嘉陵最堪憶，迎馬柳花殘。

掃除小園未竟歸臥

竹葉掃仍落，莎根鋤更生。陰陽常代謝，今昔各施行。

勛業須時至，衰榮忌力爭。徑歸差省事，高枕聽蟬聲。
暑中北窗晝臥有作

禦疾如治河，但當導之東。下流既有歸，自然行地中。
養生如執木，培植要得宜。常使無天傷，自有干雲時。

我少本多疾，屢亦頻危殆。皇天實相之，警告意有在。
中年棄嗜慾，晚歲節飲食。中堅却外慕，魔盛有定力。

死生雖天命，人事常相參。茫茫九衢中，百禍起一貪。
郊虛暑雨餘，巾墮腳不襪。高臥北窗涼，超然寄疎豁。

羈懷

羈懷不復耐，悲歡清鏡朝。朝雪鬢繁，謝傅畏逢親友。
別龐公思遺子，孫安殘骸累歲歸。民伍半俸，今春上
縣官閉戶，惟須學堅坐，不知更敗幾蒲團。

自貽

寒暑衣一稱，朝脯飯數匙。錢能禍撲滿，酒不負鴟夷。
又

家風本韋布，生事但漁樵。慣就下鄉食，莫煩東閣招。
又

癡孫護雀雞，僮僕放池魚。懷藥問鄰疾，典衣收舊書。
又

退士憤驕虜，閑人憂旱年。耄期身未病，貧困氣猶全。

劍南詩稿卷第七十六終

劍南詩稿目錄
卷第七十七

得雨霑足遂有豐年意欣然口占 浴罷閒步
門外而歸 初晴 枕上二首 讀史 今歲

六月望後一日立秋比常年涼意差早 獨坐
二首 貧病 涉溪 卽事四首 野性 閒

行 伏中熱不可過中夜起坐作詩寄五郎
暑中自遣 夜坐中庭 夜坐門外示子通

夜坐小飲 閒思 書村店壁 幽居 立秋
前九日大雨涼甚二首 寄太湖隱者 讀史

四首 病戒 夏夜納涼 銘座 異夢 初
秋驟涼 新涼 書幸 獨遊 記夢 初秋

自述 秋暑夜起追涼二首 小築 喜雨二首
秋夜 白鷗 靜室 秋興 欲雨二首

雜感十首以野曠沙岸淨天高秋月明爲韻
秋思十首 雞犬二首 秋來瘦甚而益健戲

作 秋夜 秋興 閒詠 人壽至耄期 訪
野人 蠹蟲劾宛陵先生體 吹笛 書幸

感事 晚晴 農家 寓歎二首 雨夜 秋
懷四首 小室 贈道侶 舟中醉題二首
出遊莫歸 園中作

劍南詩稿卷第七十七

宋陸游務觀

得雨霑足遂有豐年意欣然口占

人事銷沉渺莽中此身元合付天公儒生可逐惟求
忘社酒常辭不怕鬢鬱鬱稻苗欣出穗汪汪陂水告
成功老民莫道渾無用能為明時祝歲豐

浴罷閑步門外而歸

兩扇荆扉數掩籬幽人浴罷得娛嬉南臨大澤風來
遠東限連山月出遲沙上無泥藤屨健水邊弄影葛
巾款徑歸却就東窗臥要及蟬聲未歇時

初晴

暑雨初收體為輕遠山盡出眼偏明詩憑寫興忘工
拙酒取燒愁任濁清綠樹有陰休倦步澄溪無滓濯
塵纓老人本少周年感不奈江城暮角聲

枕上

青絲玉井轆轤聲露葉風枝鴨鳴鳴造物未容閑到
死又從枕上得詩情

冥冥梅雨暗江天汗浹衣裳失夜眠商略明朝當少
霽南簷風珮已鏘然都下新作藥玉風響如古玉珮珞璫瑤瑤
悉備

讀史

馬周浪迹新豐市阮籍興懷廣武城用捨雖殊才氣
似不妨也是一書生

今歲六月望後一日立秋故比常年涼意差早

九衢車馬困炎曦正是山中散髮時秋近梧桐已搖
落陰生蟋蟀最先知稻陂水白寧憂早竈突煙青辛
續炊誰謂吾廬太岑寂茶瓜亦有野人期

異夢

山中有異夢重鎧奮雕戈敷水西通渭潼關北控河

淒涼鳴趙瑟慷慨和燕歌此事終當在無如老死何
貧病

貧至今年劇真無地置雖判愁停黃酒忍病罷迎醫
性懶非關老天窮豈坐詩秋風還欲到便可數期頤

涉溪

揮汗欲成雨聚盞真若雷山翁在何許赤腳步溪來

卽事

身向人間閱事多杜門聊得養天和盛衰莫問蕭京
北壯老空悲馬伏波日莫城樓傳戍角風生嶺路下
樵歌君知此段神通否豈拂能降百萬魔

又

唐虞千載仰巍巍太息儒生每背馳經未盡亡君更
考古無不死我何悲釣耕本是求賢地宵旰今逢願
治時寄謝公卿各努力為吾君築太平基

又

我愛湖山清絕地抱琴攜鶴住茆堂藥苗自采盤蔬
美菰米新春鉢飯香南浦風煙無限好北軒雷雨不
勝涼舊交散落無消息借問黃塵有底忙

又

放翁老去未忘情鏡裏森然白髮生一片常愁見花
落三聲最怕聽猿鳴年年雙隻路傍埃夜夜短長城
上更晚悟一條差似可孤舟漁火看潮平

野性

野性從來與世疎俗塵自不到吾廬醉中往往得新
句夢裏時時見異書稚子那偷服藥酒家僮尚護放
生魚今朝更有欣然處引得清泉灌晚蔬

閑行

出戶莽悠悠東西本不謀阻溪因小涉逢店得中休
鳥沒千山暝蟬吟一院秋詩成還自笑信筆媿冥搜
伏中熱不可過中夜起坐作詩寄五郎

衆星若銀礫老桂臥海底中夜熱不解病叟推枕起
悲蟲號草根孤螢照野水樹頭風急生喘汗真一洗

追憶總角初學古頗自喜祝身願者老常恐抱志死
豈知才術疎空自凋髮齒功名永無期祿不飽妻子
歸耕力又憊得粟半糠粃詩書不可賴如倚折足几
大兒逾六十逐食走千里路途况難梗累月書一紙
豈不念歸省屢請輒見扼幸吾未極衰汝行姑少止
暑中自遣

名山處處得幽尋破硯時時出苦吟上藥和平無近
効古詩簡淡有遺音蘇門隱去聞孤嘯栗里歸來弄
素琴尚恐俗塵除未盡每思雪夜宿東林

夜坐中庭

蕭散坐中庭三更月未生遶風涼醉頰汲井濯塵纓
草露沾衣冷天河隔樹明裴回不能睡鼓角下高城

夜坐門外示子適

秋意遽如許體中殊未佳難深無宿驚草茂有鳴蛙
棲遯從吾好吟哦與汝偕雲門漸可到剩判幾青鞋

夜坐小飲

零落槐花已滿溝江湖又見一番秋水輪有轍凌空
上銀漢無聲接地流丹荔甘寒勞遠致玉醅醇冽喜
新筍移床坐對西南電好雨心知不待求

閑思

畢世為農不復疑還東六見歲陰移閉門旋了和詩
債賣藥不償沽酒資意倦投床効龜息齒疎嚼飯類
牛呵兀然過日君無怪一念功名恐過悲

書村店壁

裹茶來就店家煎手解驢鞍古柳邊寺閣重重出山
崎漁舟兩兩破溪煙近秋漸動尋幽與絕倖難營覓
醉錢到處不妨閑著句他年好事或能傳

幽居

毒暑流金石吾廬乃爾幽松棚香帶露竹簟冷生秋
盪槩蘋花浦垂竿杜若洲非關遺世事聊以解吾愁

立秋前九日大雨涼甚

天暑正三伏雨來俄九秋寒聲入簷戶爽氣襲巾襦

山色疑深黛溪流戰怒虬身輕更何苦處處可閑遊

又

雨暗初疑莫雲開已變秋有風生枕簟無汗漬衣襟
漉酒嘗浮蠟題詩走黑虬呼兒治書笈吾欲剡中遊

寄太湖隱者

青松伐作薪白玉碎作塵雖云質已毀見者猶悲辛
孫珂任棟梁溫潤中琮璧豈以捐空山遂比凡木石
酈生吏高陽馬周客新豐從來豪傑士大指亦略同
具區古大澤煙水渺千里可望不可到中有隱君子
圖書兼河維成毀窮乾坤有時跨蛟鯨指搗雷雨奔
嗟我獨何人乃許望顏色逝將從之遊變化那得測
讀史

細帙牙籤滿架書流泉泱泱竹疎疎人生得志寧無
命一室何妨且掃除

又

王侯到底虛名何物能為我重輕徒步出關胡不
可向來常笑棄縲生

又

男子胸中正要奇立談能立太平基君王玉鉞無窮
恨千載茫茫誰復知

又

自古功名亦偶諧胸中要使浩無涯可憐赫赫丹陽
尹數顆檳榔尚繫懷

病戒

憂身如憂國畏病如畏亂此身雖幸健敢作無事看
禍福在呼吸恐懼兼寢飯人所忽不省我思嘗熟爛
夜臥不安席晨起寧待日雖云親藥石得失每參半
人情喜一快往往觸剽悍收功寧使遲覆敗不可玩

夏夜納涼

河漢微茫月漸低風聲正在草堂西莎根唧唧蟲相
吊木末翻翻鶻未栖屯甲近聞如積水聞淮壩近募雄
淮軍數萬守關不假用九泥孤臣報國嗟無地只有東

鼻更飽犂
銘座

身退仍懷退心平更欲平直嫌繩尚曲重覺鼎猶輕
力學能除翳深居可息黥聖門初豈遠妙處在躬行

獨坐絕句二首

蛙鳴乃是怒鵙嘯固非妖獨宿空山夜何妨伴寂寥
輕雷不成雨闕月却穿雲獨倚南齋柱長吟到夜分

初秋驟涼

我比嚴光勝一籌不教俗眼識羊裘滄波萬頃江湖
晚漁唱一聲天地秋飲酒何嘗能作病登樓是處可
消憂名山海內知何限準擬從今更爛遊

新涼

家住山陰剡曲傍一番風雨送新涼亦知病得清秋
健無奈愁隨獨夜長日落川原橫慘淡月明洲渚遠
蒼茫老民無復憂時意齒豁頭童只自傷

書辛

才薄無能役窮途不意全得書娛晚莫遇藥起沉痾
漂母能分食偷兒肯恕舊不知從此去更度幾流年

獨遊

地僻少人跡身閑思獨遊荒村更阻雨衰鬢不禁秋
斷續呼牛笛橫斜放鴨舟殘年澹無事隨處送悠悠

記夢

夢遊異境不可識翠壁蒼崖立千尺樓臺縹緲出其
上揮手直登無羽翼門楣扁榜作八分奇勁非復人
間迹主人鹿弁紫綺裘相見歡如有疇昔探懷示我
數紙書妙句玄言皆造極我即鈔之雜行草主人憮
恍如其惜夢中亦復知是夢意恐覺時無處覓自量
強記可不忘鷄唱夢回空數息

初秋自述

平生偶有愛山僻垂老常無沽酒資破屋頽垣吾已
矣大冠長劍汝爲誰郵亭歷歷關河遠鬢髮蕭蕭歲
月移殘暑不禁隨手過東籬又近菊花時

秋暑夜起追涼

漱罷寒泉弄月明浩然風露欲三更曲闌干畔踟躕
久靜聽空廊絡緯聲

又

道士磯邊瀕蹴天郎官湖上月侵船莫年自度無因
到且與沙鷗作後緣

小築

小築竝湖堤茅茨不厭低引泉繞藥圃碎竹樹雞棲
夕靄山常淡秋蕪路欲迷平生草玄手老去學鉏犁

喜雨

黑雲橫絕天漢津父老僉言候當雨未論秋稼縣千
里且喜滂沱洗殘暑我起呼兒扶再拜汗垢得涼真

一快枯樗抱甕兩置之日日齋王孟飽菘芥

又

雨聲蕭蕭集庭樹雨氣森森入窗戶王川茆屋久不
葺破漏無復施床處我於萬事本悠悠危坐讀書志
百憂明朝秋水增三尺且復沙邊弄釣舟

秋夜

大枕空床夢不成草堂悄悄四無聲月明漸見天窗
白風起忽聞簷珮鳴客子未忘悲故里老人無念到
浮名江村歲歲先涼冷且復尋盟向短檠

白鷗

平生崖異每自笑一接俗人三被除惟有白鷗真我
客爾來底事向人疎

靜室

靜室床橫一素琴爾來殊覺道根深喚回倦枕功名
夢洗盡浮生幻妄心兩屨雲煙游少室一窗風雪宿
東林細思却是關身事無奈殘年老病侵

秋興

秋眠怯簟冷晨飯喜蔬香寧使衣百結肯儲錢一囊
杜門雖局促負氣尚軒昂死去真無憾曾孫似我長

欲雨

徙穴中庭蟻爭巢後圃鳩物情猶慮患人事得忘憂

又

荷鋤決新渠芟茅補舊廬共知秋必雨有備即安居
雜感十首以野曠沙岸淨天高秋月明為韻

呂鈞涓水濱說築傅巖野雖曰古盛時得士蓋亦寡
天將啓治亂人才有用舍向非萬牛力熟與成大廈

又

殊泗日已遠儒術日已喪學者稱孔墨為國雜伯王
書生幸有聞力薄不能倡默默世俗間汝職無乃曠

又

我昔下三峽百丈堆兩車初發公安城已過長風沙
早知世路惡恨不常浮家至今清夜夢雙艫聞謳啞

又

斗杓運四序寒暑忽已換人生知幾何去日難把玩
憑高望煙海青山忽中斷秋風肺病蘇為子巾一岸

又

磨鏡要使明拭几要使淨奈何視吾心不若几與鏡
垢汗倘未除秋毫即為病吾曹亦聖徒可不學顏孟

又

天人本一理禍福常昭然人衆何足恃妄謂能勝天
適燕當北轅調瑟當解弦五行未可忽洪範禹所傳

又

鏡湖一何清稽山一何高浙江百里遠夜枕聞驚濤
子胥死吳下千載無人豪遺魂招不來我欲續楚騷

又

歸耕無襪襖出戰無兜鍪已失西疇春空懷北平秋
提攜一束書踏踏至白頭罽中有轅飯一飽吾何求

吳人謂飯不炊者為轅飯轅音勞

又

我昔遊劍南爛醉平羌月一盃玻璃春萬里望吳越
豈知有天幸故山得歸骨扁舟小江上夜半看月沒

又

入東多名山天台連四明路窮寺門出林闕溪橋橫
豈無一月間結束與子行會揀最幽處煨芋聽雪聲

秋思

秋雲易簇日常陰西望山村每欲尋屏掩數峯臨峭
絕地蟠一徑入幽深

又

山步溪橋入早秋飄然無處不堪遊僧廊偶為題詩
入魚市常因施藥留

又

臨海銅燈喜夜長斬春笛簟怨秋涼世間生滅無窮
境盡付山房一炷香台州白銅燈繁絕妙

又

才不才間未必全胸中元自要超然黃金不博身強
健且醉江湖萬里天

又

牙齒漂浮欲半空此生已付有無中一盃藜粥楓林
下時與鄰翁說歲豐

又

疏泉洗石誇身健試墨燒香破日長若得三山安樂
法不須更覓玉函方

又

傍縣人來涕泗翻蝗災暴虎不堪言天心似為衰翁
地飽食安眠獨北村

又

閑愁正可資詩酒小疾安能減食眠一畝旋租畦菜
地千錢新買釣魚船

又

眼明尚見蠅頭字暑退初親雁足燈歷歷胸中千載
事莫將輕比住菴僧

又

虛極靜篤道乃見仁至義盡餘何憂名山采藥恐未
免策蹇孰能從我遊

雞犬

鄉村年久競農務秋歛春耕恐失時我老元無風與
事懶雞啼曉恰相宜

貧家也復謹朝昏小犬今年乞近村糠粃無多深媿
汝信信終夜護籬門

秋來瘦甚而益健戲作

莫笑形羸不自支清虛正與老人宜矛頭浙米誰能
食甌裏生塵却自奇獨釣又逢秋晚後安眠常到日
高時邇來久雨牆垣壞碎竹東岡自作籬

秋夜

岸嶺蕭然病體輕雨餘郊館已涼生微風掠面酒無
力明月滿窗眠不成葉底涓涓秋露滴草根咽咽暗
蛩鳴屏居未免傷孤寂賴有鄰翁約耦耕

秋興

巢燕無情不更回門庭日日落秋槐新涼漸喜償碑
債多病還憂欠藥材社近家方蕩濁酒客來身自掃
蒼苔道心已熟機心盡寄語鷓鴣莫苦猜

閑詠

莫笑結廬魚稻鄉風流殊未減華堂茶分正焙新開
箬水挹中灑自候湯小几研朱晨點易重簾掃地晝
焚香個中富貴君知否不必金貂侍紫皇 青城丈人祠

畫仙官有服貂蟬者

人壽至耄期

人壽至耄期如位至王公非以德將之往往不克終
非必皆大惡過取固多凶吾今垂九十追逐羣衆中
筋骸勝拜起耳目未盲聾強健天所借正與富貴同
一念媿屋漏一言誑孩童老無朋友規日夜勤自攻

訪野人

我行城西西南適茲素秋時風露雖已高草木鬱未衰
敲門尋野人一笑萬事非拂榻意何勤酒釀雁鶩肥
新涼天所賜盡醉不足辭擊壤歌堯年瞑目以為期

熏蟲效宛陵先生體

澤國故多蟲乘夜吁可怪舉扇不能却燔艾取一快
不如小忍之驅逐吾已隘寧聞大度士變色為蜂蠹
吹笛

吳江楚澤閑遊徧未豁平生萬里心醉裏獨攜蒼玉
筍岳陽樓上作龍吟

書幸

破屋頽垣鬼笑窮暗中調護賴天公頻年得疾身猶
健百種無營飯不空

感事

已醉猩猩猶愛屐入秋燕燕尚爭巢老夫看盡人間
事欲向山僧學打包

晚晴

雨如塵點送新涼雲作魚鱗襯夕陽蓬戶清閑貧亦
好荷與安穩病何傷

農家

寂寂江村數掩籬吾廬又及素秋時橫林未脫色已
盡孤鳥欲棲鳴更悲小釜尊羹初下豉矮瓶豆粉正
燃其為農幸有家風在百世相傳更勿疑

寓歎

白首還鄉厭葳蕤自歎欲疇依門庭不掃稀迎
客礎杵無聲未贖衣達士共知生是贅古人嘗謂死
為歸疇疇幸可期中熟又報殘蝗接翅飛

又

憶昔建炎南渡時兵間脫死命如絲奉親百口一身
在許國寸心孤劍知坐有客瘖堪共醉身今病忘莫
求醫出門但畏從人事臨水登山却未衰

雨夜

病多漸減燈前課老甚都忘枕上愁一段高情誰會
得臥聽簷雨瀉清秋

秋懷

火食非初志衣塵每自哀危途觸灑瀕歸與薄蓬萊

逋客傳琴調高僧乞藥裁人間豈不好病眼自慵開

又

苦雨無時止幽人空復情少眠知夜永久病喜秋清
螢傍疎簾度蛩依壞甃鳴流年那可挽又見曉窗明

又

獨立離人境幽居察物情蟻知軍陣法蟲作緯車聲
身老惟貪睡兒癡亦情咍騰騰復兀兀何以報時平

又

寓世久成贅忘家生若浮安能三太息惟有四宜休
屋壞無全堵船輕每信流鴟夷幸無恙賴爾可消憂

小室

窗几窮幽致圖書發古香古香見米元章書畫史尺池魚
鰕鱖拳石樹蒼蒼老去身猶健秋來日自長養生吾
豈解懶或似嵇康

贈道侶

惡笑人多有惟君獨造微丹成河自塞吟罷劍俱飛
酒市尋差易雲山覓更非何時醉攜手為我發玄機

舟中醉題

風吹蘆荻聲颼颼晚潮入港浮孤舟老民已掃市朝
迹造物全付江湖秋項里廟前是魚市禹會橋邊多
酒樓醉來且復過此日莫為礎杵悲無裘

又

鮑郎山前煙雨昏疎燈小市愁偏門上船初發十字
港鼓棹忽過三家村孤鸞對鏡空自感老龜搯床何
足論但願諸公各戮力上助明主憂元元偏門十字港
三家村皆地名

出游莫歸

東行西行日莫歸川雲漠漠雨霏霏蝗餘場上禾收
薄酒貴街頭客醉稀買犢躬畊空自力灼龜占歲又
成非稚孫索飯殊關抱憐汝何時得瓠肥

園中作

紗巾一幅立斜陽本尚無閑況有忙雞犬往來空自

得禽魚翔泳各相忘欲衰莎草無多緣未落梧桐已
半黃徂歲匆匆成絕嘆瓦溝行復見新霜

劍南詩稿目錄
卷第七十八

感舊 東園 秋夜 驛壁偶題三首 夜起
思子處 秋日次前輩新年韻五首 仲秋書

事十首 步屨 後死 思剡 故里 野意
意行至神祠酒坊而歸 訪村老 戲題僧

巷 書意二首 南塘晚步記鄰里語 稽山
道中二首 讀近人詩 琴劍 戲題 溪上

小雨 晚聞庭樹鴉鳴有感 秋夜齋中二首
識媿 秋雨 秋來益覺頭健時一出遊意

中甚適雜賦五字十首 遊近山僧菴 喜晴
阿通自閩中歸甫九歲頗有老成之風作此

詩示之 農家六首 讀老子有感 鄰人送
菘菜 書喜 秋日徙倚門外久之 雙蝶

法雲孚上座求詩 詹仲信出示卜居詩佳甚
作二絕句謝之 夜雨 晚秋出門戲作二首

消搖 堅頑 遺懷四首 初寒 閒行至
西山民家 夜與子通說蜀道因作長句示之

村舍七首 登山西望有懷季長 山行
二樂 村女 示子通 聞新雁有感二首

山村獨酌 小園獨酌

劍南詩稿卷第七十八

宋陸游務觀

感舊

莫笑山翁老欲僵，壯年曾及事高皇。雕戈北出成窮塞，華表東歸悲故鄉。萬事固難輕付度，百年猶有未更嘗。紛紛謗譽何勞問，但覺邯鄲一夢長。齊民要術曰：魯如禹湯不如更嘗。

東園

車馬無聲客到稀，荷鋤終日在園扉。斷殘地脈疏泉過，穿透天心得句歸。對鏡每悲鸞獨舞，繞枝誰見鶻南飛。悠然自遣君無怪，文史如山薶解圍。

秋夜

局促人間每鮮歡，秋來病骨愈酸寒。夾衣尚典雁聲過，斷簡未收雞唱殘。退士鬢毛紛似雪，老臣心事炳如丹。燈前握臂無交舊，聊喚清尊少自寬。

驛壁偶題

纍纍驛門埃，杳杳寺樓鐘。葉落陰薄雲生，山掩重交親窮未棄。父子老相從，惟待新粳熟。高眠聽夜春。

又

去去投山驛，悠悠解橐裝。斜陽穿破廡，落葉滿空廊。舞簡村巫醉塗朱，野女粧近行。吾亦倦假寢，據胡床。

又

過市未十里，入山知幾重。幽林聞格磔，淺瀨見唼喁。小瓮家家酒，衡門世世農。班生定癡絕，辛苦覓侯封。

夜起思子虞

我久依班慵，兒方吊戰場。臥聞風浩蕩，起視月蒼茫。老境緜袍暝，貧家菜粥香。惟愁殺風景，無酒作重陽。

秋日次前輩新年韻

孤生雖永棄，要亦是黎元。渺渺煙中路，冥冥海上村。小難看鷺立，平野送鴉翻。即欲掩關臥，南山猶未昏。

舊交多雋傑，離散各何之。騏驥志千里，鷓鴣巢一枝。青雲迷故步，白首負明時。幸有殘書卷，猶堪付小兒。

又

老人常獨處，一笑比河清。終日無來客，三年不入城。高眠聽酒滴，危坐對雲生。矯首羲皇世，吾其享大羹。

又

浮家久居蜀，下峽晚還東。天際孤帆遠，花前百榼空。旅遊渾似夢，年運遂成翁。欲話峨眉月，無人可與同。

又

殘年垂九十，雪鬢不勝繁。賣屨糶炊米，典衣租廢園。山深雲滿屋，夜靜月當門。鄰曲時相過，扶行賴稚孫。

仲秋書事

秋風社散日，平西餘昨。殘壺手自提，賜食敢思烹。細項家庖仍禁擘，團臍昔為儀曹郎。兼領膳部，每蒙賜食與王公略等食品，中有羊細項，甚珍。予近以惡殺不食蟹。

又

天心那得與人同，社家家禱歲豐。料理蝗餘猶十，五殘年亦未委溝中。

又

斷雲歸岫雨初收，茅舍蕭條古渡頭。短褐老人垂九十，松枯石瘦不禁秋。

又

客來深窺里閭情，近為衰殘罷送迎。旋置風爐煎顧渚，劇談猶得慰平生。

又

舉家食粥顏平原，坐客無氈鄭廣文。不是有心輕富貴，偶然看破是浮雲。

又

書生習氣盡驅除，酒興詩情亦已無。底怪今朝親筆硯，村鄉來請辟蝗符。

又

靈府不搖神泰定病根已去脈和平金丹妙處無多
子只要先生兩眼明

又
省身要似晨通髮止殺先從莫拍蚊老負明時無補
報惟將忠敬事心君

又

杖得輕堅餘可略酒能醇勁更何求二君最是平生
舊白首相從萬事休

又

心明始信元無佛氣住何曾別有仙領取三山安樂
法蒲團紙帳過年年

步屨

名山有志未能酬步屨東岡當出遊小閣捲簾驚鷺
起清池投餌看魚浮西風吹葉空多感落日銜山尚
小留兒老戍邊歸未得淮南新雁又經秋

後死

後死非初望餘生只自悲舊交孤劍在壯志短檠知
行步雖依杖光陰未付棋為農自當力不為學齋詩

思剡

羸疾無休日清秋適此時節存旄盡落帶賸眼頻移
吾與復不淺俗人那得知會當遊剡去支許有深期

故里

漏盡鐘鳴有夜行幾人故里得歸耕摧傷自喜消前
業疾恙天教學養生鄰曲新傳秧馬式房櫳靜聽緯
車聲羊糞菰首君無笑老子看來是大烹

野意

久忝明恩返故鄉全家衣食出畊桑詩纔適意寧求
好醉即成眠不暇狂小兩荷鋤分藥品乍涼扶杖看
優揚此身已作農夫死却媿時賢獨未忘

意行至神祠酒坊而歸

雨收霽色滿川原獨曳枯藤出里門陌上微風搖柳
穉溝中殘水出籬根繫柱廟柱悲刀几醜酒村場滿

盜益興盡還家殊不遠漁燈續火鬧黃昏

訪村老

強健如翁舉世稀夜深容我叩門扉大兒叱犢戴星
出稚子捕魚乘月歸骨肉團欒無遠別比隣假貸不
相違人間可羨惟農畝又見秋燈照搗衣

戲題僧巷

致虛守靜氣常全家付兒孫命委天夢事只堪高臥
看危途誰校疾行先獨轆短棹聊乘興野草幽花自
鬪妍數字漫留僧壁去與身閑作後身緣

書意

秋江菰菜喜新嘗鹽酪親調七箸香但有長腰吳下
米豈須細肋大官羊青衫昔悔塵中老白髮今宜靜
處藏一事尚須深自咎街頭兒女識韓康

又

物我年來已兩忘蕭然湖曲一茆堂身閑自與俗子
遠睡美不知秋夜長餘祿正應藿蠶在宿醒時臥酒
壘傍老人肘後長生藥檢盡千金無此方

南塘晚步記鄰里語

喚舟欲泛湖出門日已莫顧景遂輟行老病畏風露
不如上南塘蕭然散予步季子挾書卷仲孫奉杖屨
夏秋多杜門一出驚行路鄰里相與言穡事凜可懼
羣蝗飛蔽日殘蠶到竹樹惟茲數里間若有神物護
天蓄幸獨薄豈以此老故老人亦自笑病骨日欲仆
鬼神彼何為與世殊好惡相期勤自修此幸豈可屢

稽山道中

文章事業初何有鐘鼎山林本自同昨莫釣魚天鏡
北今朝采藥石帆東

又

禹陵草木初霑露謝墅人家已閉門八十年間幾來
往癡頑不料至今存

讀近人詩

琢磨自是文章病奇險尤傷氣骨多君看大羹玄酒

味蟹螯蛤柱豈同科
琴劍

流塵冉冉琴誰鼓
漬血斑斑劍不磨
俱是人間感懷事
豈無壯士爲悲歌

戲題

莫輕凡骨未飛騰
要勝人間粥飯僧
山路近行猶百里
酒盃一舉必三升

溪上小雨

我是人間自在人
江湖處處可垂綸
掃空紫陌紅塵夢
收得煙蓑雨笠身

晚聞庭樹鴉鳴有感

烏鵲棲我庭
將日輒散去
此豈厭所棲
亦以飲啄故
一飢能驅人
擾擾無晨莫
不然亦已矣
豈樂塵土汗
我有疇三間
自少鮮外慕
力畊自足食
雞豚亦可具

晚雖誤收召疾走如脫兔
六年楓林下不知歲月度
殘骸幸強健沽酒徧山步
鄉語謂湖山間小聚爲山步
醉歸每自笑不負此芒屨
平生愛方外雖老冀有遇
秋風送片帆更上剡溪路

秋夜齋中

木落煙深江上村
莫秋蕭瑟不堪論
雁如著意頻驚枕
月似知愁故入門
營道數峯新石友
近得道石數峯
廣陵一曲古桐孫
亦知長物終安取
聊與兒曹洗睡昏

又

殘年冉冉返丘園
敗屋蕭蕭長子孫
久悔文辭妨大學
偶因憂患得玄門
扶持後死知天幸
容養無能荷國恩
急雨打窗秋又晚
旋挑野菜助盤飧

識媿路逢野老共語歸舍賦此詩

幾年羸疾臥家山
牧豎樵夫日往還
至論本求編簡上
忠言乃在里閭間
私憂驕虜心常折
念報明時涕每潛
二句實書其語寸祿不沾能及此
細聽只益厚吾顏

秋雨

莫秋木葉已微丹
小雨蕭蕭又作寒
日送斷雲歸谷口
身隨新雁寄江干
濁醪易負尋常債
退士難叨本分官
謝盡浮名更無事
燈前兒女話團圓

秋來益覺頑健時一出遊意中甚適雜賦五字

旬日雨頻作
一年秋又殘
光陰不少貸
懷抱若爲寬
小盃聊尋醉
疎砧已戒寒
定知清夜夢
又過石闌干
剡溪道中佳處

又

何許是吾廬
南臨古鏡湖
園林垂橘柚
門巷落楸梧
牀穩龜無息
巢新鶴有雛
鄰翁殊耐久
有酒卽相呼

又

原筮無閑土
鄉閭有老人
疾平行已健
秋晚醉差頻
啄黍黃雞嫩
迎霜紫蟹新
百年元任運
一笑却關身

又

糞食筋骸憊
林廬歲月侵
道窮思故友
力盡悔初心
浩浩天知我
悠悠後視今
飄零君勿嘆
古瑟有遺音

又

輕裝雨衣笈
假寢一胡床
喚渡江樓下
逢僧懸驪傍
橫林生夕靄
孤蝶弄秋光
老慣人間事
無詩寄斷腸

又

渡水得魚舍
乞漿敲竹扉
地偏花帶恨
林暝鳥忘歸
獨往非違世
幽居自息機
晚來清興極
更喜雨霏霏

又

窮阮非由命
從來作計疎
妄營資鬼笑
多愛奪狐書
何事能陶寫
惟當盡破除
霜晴宜著屐
不敢笑無驢

又

寓世年雖住
安心疾已平
每思丹竈冷
宜覺世緣輕
布被難催曉
蓬窗鶻噪晴
呼兒淨洗硯
書帖寄青城
萬古無窮夢
餘年欲散雲
身雖迫衰謝
學未廢鉏耜
開卷多新得
逢人有舊聞
伏生雖九十
猶冀與斯文

又

斯世本無事古人誰與歸屏除閑塵尾收拾舊蓑衣
浩浩觀空劫拳拳訟昨非雲開天萬里遼鶴正孤飛

遊近山僧菴

臥看香穗嘆吾衰起著芒屨信所之十里溪山最佳
處一年寒煖適中時眼明竹院如曾到心許沙鷗卜
後期不是詩人託高興日長真付一枰棋

喜晴

三日雨不止意謂無復晴泥深不可出臥聽空堦聲
事有未易料南風起三更陣陣浮雲歸杲杲初日明
穡事既竭作機杼比屋鳴天公真老手談笑功皆成
家家有新釀歡言相送迎蝗孽幸掃空努力謀春畊
阿通自閩中歸甫九歲頗有老成之風作此詩
示之

通子還家已九齡從師衿佩兩青青長成勉作功名
計勿學衰翁老一經

農家

大布縫袍穩乾薪起火紅薄才施畝畝朴學教兒童
羊要高為棧雞當細織籠農家自堪樂不是傲王公

又

盜息無排甲兵消不取丁頻過鬪雞舍閑學相牛經
江浦漁歌遠人家績火青遶遊無定處隨意宿丘亭

又

東舍女乘龍西家婦夢熊翁誇酒重碧孫愛果初紅
栗烈三冬近團樂一笑同營生無繆巧百事仰天公

又

租犢畊耨地呼舩取菽薪蒼頭供井臼赤腳解縫紉
僧乞銘師塔巫邀賽土神心常厭多事謝病又經旬

又

新作地爐成蓬窗亦自明油香麪餌脆人靜布機鳴
縣吏催科簡豪家督債輕小康何敢望生計且支撐

又

諸孫晚下學髻脫繞園行互笑藏鉤拙爭言鬪草贏
爺嚴責程課翁愛哺餽錫富貴寧期汝他年且力畊

讀老子有感

左史倚相讀皇墳學者尚得窺全渾孰為武成二三
策寧取道德五千言巢居結繩事益遠堯淳散朴忍
復論安得深山老不死坐待古俗還羲軒

鄰人送菘菜

張蒼飲乳元難學綺季餐芝未免飢稻飯似珠菘似
玉老農此味有誰知

書喜

莫謂家貧厭舊醅一尊聊對桂花開天苗已過無蝗
孽海船舶通有藥材剩借涼風吹醉頰況逢急雨洗
浮埃入秋腰脚增強健山麓從今日日來

秋日徙倚門外久之

舍前煙水似瀟湘白首歸來愛故鄉五畝山園鬱桑
柘數椽茅屋映菘蔣翻翻小織船歸郭渺渺長歌月
滿塘却掩柴荆了無事篆盤重點已殘香

雙蝶

庭草何離離清晨露猶溼草頭兩黃蝶為我小佇立
秋光亦已晚行見霜霰集方春不盡狂汝海尚何及
吾生更堪笑去日如電急功名竟何在惆悵劍峯澀

法雲孚上座求詩

老人癡鈍避嫌猜終日柴門閉不開堪笑山僧能好
事乞碑纔去覓詩來近有淨慈僧訥來求銘其師塔亦寓法雲
幾年

詹仲信出示卜居詩佳甚作二絕句謝之

十里相望亦未遙何由頻得慰無聊老來萬事慵開
眼獨喜詩盟不寂寥

又

年來阻闕動經時忽見新篇乃爾奇安得齊紈翦團
扇為君小草卜居詩

夜雨

夜雨有殘滴秋礎無絕聲得詩旋已忘覓睡固難成
壯志悲垂老歸咄願太平發春纔屬爾歲事又崢嶸

晚秋出門戲詠

病叟倘伴古澤邊橫林搖落莫秋天鳴鳩雨後却呼
婦飛雀霜前著縣抱被每投僧榻宿卷書時當酒
家錢秋風想像芝房熟北望南山一悵然

又

閑愁那到野人邊萬事元知合付天盡醉僅能三餽
酒新寒未辦一鉢縣鄰僧每欲分齋鉢廟史猶來索
社錢無地置雖真細事不妨胸次日超然

消搖

莫笑茆檐陋消搖遂野情遇魔增道力因病悟浮生
謀食憑長鏡論交得短檠不知從此去幾見雁南征

堅頑

小市朝行藥明燈夜讀書雖殊帶箭鶴要是脫鈎魚
有飯已多矣無衣亦晏如堅頑君勿怪豈失遂吾初

遣懷

息倦登研隴乘閑弄釣舟安能書咄咄且復送悠悠
窮巷誰來往村醪自獻酬何妨晏平仲歲晚一狐裘

又

窮每占周易閑惟讀楚騷病隨災漸退懶與拙相遭
投枕燈初上披衣日已高清愁亦可剪無處買并刀

又

有志師千載無方起九原山園菜常瘦村店酒多渾
衰疾形詩句窮愁入夢魂傍觀任嘲笑吾道始應尊

初寒

雲族初疑雨風生忽快晴半窗松竹影繞舍烏鳥聲
看劍心猶壯開書眼漸明餘年真已矣不復問君平
日月誰能駐風霜忽已高公孫分布被范叔共絺袍
穠稂吹香甌蒲萄壓小槽所慚才已盡孤詠不能豪
閑行至西山民家

秋林半丹葉秋草多碧花隔山五六里臨水兩三家
罾魚與伐荻各自有生涯平池散雁鶩繞舍栽桑麻
客至但舉手土釜煎秋茶城中不如汝切莫慕浮夸
夜與子通說蜀道因作長句示之

村舍

無懷葛天古遺民種畬歸來東澗薪亭長聞名不識
面豈知明府是何人

又

雞鳴犬吠相聞地穴處巢居上古風飽飯不為明日
慮酣歌便過百年中

又

露草乾時兒牧羊朝日出時女采桑一床絮被千萬
足不解城中有許忙

又

山高正對燒畬火溪近時聞戽水聲破屋已斜猶可
住老牛雖瘠尚能耕

又

莫笑山家拙治生正緣亦足得身輕滿爐葑火渾家
暝一盃松肪徹夜明

又

故絮五更偏覺冷薄糜未午已先飢誰知人不堪憂
處正是降魔奏凱時

又

氣全自可忘憂患心動安能敵死生若論老人真受
用已多稗飯與藜羹

登山西望有懷季長

行年垂九十舉世少輩行敢言貧非病要是老益壯
平時懶書疏有答未始倡張卿獨所敬夙昔推直諫

迹雖隔吳蜀相憶每慘愴使者交道中萬里問亡恙
忽焉奉赴告斯文豈將喪腰經不撫棺執紼不會葬
送子珉山下想見車百兩我徒哭寢門淚盡氣塞吭
年雖不耄期仕誰不將相神明司禍福于職豈亦曠
霜風九月初憑高極西望江原在何許安得鍊壘嶂

山行

五尺桃榔杖二寸楸欄冠往來山谷中髮白面渥丹
初非乳石力所得懷抱寬入寺不尋僧自愛松風寒
松風晚少靜我意殊未闕却尋歸村路白石明青巖

二樂

遊山恨不遠讀書恨不博天下多名山何處無芒屨
束書飽蠹魚於汝寧不怍日月如過燒老病將何若
眼猶給開卷足尚供尋壑少勞君勿辭是中有真樂

村女

白襦女兒繫青裙東家西家世通婚采桑餉飯無百
步至老何曾識別村

示子通

我初學詩日但欲工藻繪中年始少悟漸若窺宏大
怪奇亦間出如石漱湍瀨數仞李杜牆常恨欠領會
元白纔倚門温李真自節正令筆扛鼎亦未造三昧
詩為六藝一豈用資狡獪晉人謂戲為狡獪今閩語尚爾汝
果欲學詩工夫在詩外

聞新雁有感

才本無多老更疎功名已負此心初鏡湖夜半聞新
雁自起吹燈讀漢書

又

新雁南來片影孤冷雲深處宿菰蘆不知湘水巴陵
路曾記漁陽上谷無

山村獨酌

腰劍如今不換牛固應萬事一時休孤舟慣作瀟湘
夢駿馬寧思鄂杜遊毀譽要須千載定功名已向隔
生求石帆山下秋風晚買酒看雲自獻酬

小園獨酌

橫林搖落弄微丹深院蕭條作小寒秋氣已高殊可
喜老懷多感自無歡鹿初離母班猶淺橘乍經霜味
尚酸小酌一卮幽興足豈須落佩與頽冠

劍南詩稿卷第七十八終

劍南詩稿目錄
卷第七十九

秋思四首 覽鏡 雨晴 秋盡自遣二首
晝臥 獨坐 書感 舟中夜賦 舍傍晚步

二首 自詠二首 初冬 霜晴 初寒 題
傳神 書感 宋都曹屢寄詩且督和答作此

示之 獨飲 簡湖中隱者 初冬雜詠八首
老歎 小園 冬夜思里中多不濟者愴然

有感 宿近村 梅村野人家小憩 寄陳伯
子主簿 夜坐憶剡溪 道上見村民聚飲

道中有感 寄子虞兼示子適 一年老一年
道中有感 寄子虞兼示子適 一年老一年

自東岡繚繞出舍北 有客 陳伯子見過喜
子強健戲作 東陽郭希呂呂子益送酒 夜

坐 兩日意殊不憚作短歌自遣 戲書日用
事 獨立 夢中江行過鄉豪家賦詩二首既

覺猶歷歷能記也 病中夜思 得子虞書言
明春可歸 雜賦十二首 散懷 書壁二首

冬日齋中即事六首 冬日排悶二首 法雲
寺 自法雲歸 枯菊 聞吳中米價甚貴二

十韻 寒夜偶懷壯遊書感 夢曾文清公
睡覺 湖邊小聚 兩二首 雨後快晴步至

湖塘 兩日寒雨作雪不成夜忽大雨遂晴
歲窮 凍坐 古意二首 雪意復作 醉書

劍南詩稿卷第七十九

宋陸游務觀

秋思

湖邊一夜霜庭樹無秋聲懶不近筆硯何以紓幽情
但有一睡耳展轉無由成起擁地爐暝坐待天曉明

又

弊衣但故絮糲食惟黃蘗餘年如登山步步勤攀躋
從子念寂寞千里致鹿麕秋風石帆下伴我扶青藜

又

稽山九十翁病起無氣力擁杖牧雞豚乃是老人職
一盃芋糲羹孫子喚翁食既飽負朝陽自愧爾何德

又

今日鶻噪蒼鷹邢趙芻父去華別我西老懷易感慨近別
亦慘懷自我臥孤村海內無輪蹄垂虹秋愈佳不得

同裝齋

覽鏡

鏡中老翁誰非復少年我誦書如布穀拈出無一可
又非富貴逼棄去自不果無功博一飽有辜當萬坐

老境最堪笑作計日益左正似鳩拙巢不及蠶自裹
霜寒衣未贖瑟縮附殘火作詩數十年所得良瑣瑣
弱松困蔓纏何日見磊砢洞庭可遠遊秋風思振梳

雨晴

小雨初增氣慘悽新晴差解病沉迷虛廊靜院聽松
籟細草甘泉養鹿麕寒靄細分山遠近野歌相應路

高低孰知倦客蕭然意水品茶經手自攜

秋盡自遣

息駕江湖上推移歲又殘雨添苔暈紫霜染柏林丹
貧歎咩疇薄狂依禁網寬遊山攜一鉢到寺即開單

又

老健非頤攝羈窮為折除人情看已慣身在不論餘

席下錢雖盡餅中粟有儲行歌混樵牧吾計未全疎

晝臥

我意殊昏然一日三就枕目前幸未病病勢亦凜凜
偶拈一卷讀美若鳩食甚雖云嗜好篤自計亦已審

聖門未能窺詎敢希在寢所求養根原常恐蠶蠶品
死期誠已迫尚可支數稔蕪蕪不廢功吾其享高廩

獨坐

博山香霧散辭辭袖手何妨靜掩扉六十年前故人
盡紹興中往還朋舊今乃無一人在八千里外寄書稀
自張季長下世蜀中書問幾絕 昨朝送客桐江去今日逢僧剡

縣歸欲作小詩還復懶海鷗與我兩忘機

書感

衰顏非復昔年朱幾過黃公舊酒壚成敗只堪三太
息是非終付一胡盧連天煙草迷歸夢動地風波歷

畏途辛苦一生成底事躬耕猶得補東隅

舟中夜賦

問天乞得不貲身常作東阡北陌人買酒不澆胸礪
魄憂時空覺膽輪困寓居尚復能栽竹羈宦懸知正

憶尊那似石帆山下客釣船載月泊煙津

舍傍晚步

蒲團初起定藤杖偶閑行鳥語如相命魚浮忽自驚
麥苗經雨綠楓葉得霜頰野老淳風在悠然不送迎

又

養疾便居僻尋幽喜雨晴偶因將鹿出遂作放魚行
木落塔初見瘳收難自生霜清念遊衍漸擬問山程

自詠

紛紛世態但堪悲一念蕭然我亦奇醉裏猖狂醒自
笑夢中虛幻覺方知江湖重複風波惡齒髮凋零歲

月馳安得中原路如砥涓川釣伴待多時

又

茅舍蕭條似寶坊老人終日對爐香學荒自笑身空
在祿盡誰知壽更長陂水蕪隄常灑灑麥苗覆塊已

蒼蒼經行更有欣然處四野鉏耨滿夕陽

初冬

初冬常憶宴梁州百炬如椽滿畫樓三十七年猶未死茅簷霜冷一燈幽

霜晴

萬瓦新霜白一窗朝日晴破裘身亦暝細字眼猶明
老喜諳諳語衰常蹉跎行登封書不草力穡報時平

初寒

新雁來時歲又殘丹楓數樹照江干前山雲起忽成
暝陋屋雨來初變寒身退已收清禁夢里居終出上

恩寬作詩老恨無奇思時取囊中斷稿看

題傳神

溼雲生兩履細雨暗孤蓬悔不桐江上從初作釣翁

書感

伐性戕生豈一端莫年贏得是衰殘齒牙零落畏大
截毛髮蕭疎便小冠惜日每驚新歷換怯寒尚覺弊

盧寬華山阻絕岷山遠安得冥鴻借羽翰

宋都曹屢寄詩且督和答作此示之

古詩三千篇刪取財十一每讀先再拜若聽清廟瑟
詩降為楚騷猶足中六律天未喪斯文杜老乃獨出

陵遲至元白固已可憤疾及觀晚唐作令人欲焚筆
此風近復熾隙穴始難窒淫哇解移人往往喪妙質

苦言告學者切勿為所怵杭川必至海為道當擇術

獨飲

肅肅霜風勁蕭蕭木葉聲殘年如寄爾冷坐太憎生
就市沽新釀呼兒洗破觥獨斟還獨醉無月配長庚

簡湖中隱者

十里隔天鏡一菴依翠屏甘泉勝牛乳靈藥似人形
處處筇枝健年年鬢色青客星猶不作肯應少微星

初冬雜詠

重陽已過二十日殘菊纔存三四枝對酒插花君勿
笑從來不解入時宜

又

古壽書來言得堦東陽人到報生孫一家三處俱強
健且撥閑愁近酒尊

又

兒時愛書百事廢飯冷藏乾呼不來一生被誤終未
醒老作蠹魚吁可哀

又

微風颯水靴文浪薄日烘雲卯色天但恨世間閑客
少江湖底處欠漁船

又

書生本欲輩莘渭踏踏乃去為詩人囊中略有七千
首不負百年風月身

又

俗緣已斷寧容續幽事雖多不厭增折簡迎醫看病
鹿春粳炊飯供遊僧

又

夜窗父子共煎茶一點青燈冷結花村落盜清無犬
吠園林月上有啼鴉

又

老去胸中百事真同遊無復白頭新鶻從熟後頻分
食鹿漸馴來不避人

老歎

齒髮衰殘久退休衡茅荒寂更禁秋一無用力身猶
倦百不關心夢亦愁遠浦臥看鳧泛泛深林時聽鹿
呦呦天台日有遊僧過白木黃精不待求

小園

誰為閑愁撥不開小園也復有池臺清泉白石皆吾
友綠李黃梅盡手栽衝雨芟雞時上下近人栗鼠不
驚猜自憐兩屨猶輕捷不待兒扶日日來

冬夜思里中多不濟者愴然有賦

大耋年光病日侵久辭微祿臥山林雖無數老嗟卑
語猶有哀窮悼屈心力薄不能推一飯義深常願散

千金夜闌感概殘燈下皎皎孤懷帝所臨
宿近村

病齒漂浮短髮稀此身猶墮亂書圍
邯鄲倦枕晨炊熟昌谷空囊晚醉歸
久困厭從人乞貸力畊頻遇歲凶饑
行年九十窮彌甚旅舍燈前自綻衣

梅村野人家小憩

正遣清詩覓菊栽穿雲涉水又尋梅
萬牛不挽新愁去一鳥還驚午夢回
老媿逢人說幽憤窮能隨事學低摧
江邊漂母何爲者無食王孫未易哀

寄陳伯予主簿

今年閏餘時令早十月霜風吹客倒
老夫畏寒不出門數步隣家迹如掃
此時陳子獨何勇飢僅瘦馬長安道
絕知涵養與人別吐氣如虹失衰老
老孟軻浩然正應爾豈比區區養梨棗
萬鍾于子本何加一官未免從人討
世誰不達子獨窮熱念令人惡懷抱
石渠天祿正須才往乞楊雄太玄草

夜坐憶剡溪

早睡苦夜長晚睡意復倦斂膝傍殘燈
拭背展書卷時時搔短髮稍稍磨凍硯
更闌月入戶皎若舒白練便思泛樵風
溪名次第入剡縣名山如高人豈可久
不見

道上見村民聚飲

霜風利如割霜葉淨如掃正當十月時
我行山陰道場功俱已畢歡樂無壯老
野歌相和答村鼓更擊考市墟酒雖薄
羣飲必醉倒雞豚治羹蔬魚蟹雜鮮蔬
但願時太平鄰里常相保家家了租稅
春酒壽翁媪

小江

出郭四十里孟冬天尚和風生帆力健
木落月明多小市人聲散長橋炬火過
吾生幾來往撫枕獨悲歌

短歌行

富貴得意如登天自計一跌理不全
晝食忘味夜費眠渠過一日如一年
春蠶得衣畊得食農功初成各

休息賣酒墟邊紛鼓笛我過一年如一日
二者求兼勢安可與我周旋寧作我
春城桃李豈不妍雪澗未妨松磊砢
人生禍福難遽論廟犧烏得爲孤豚
君不見獵徒父子牽黃犬歲歲秋風下
蔡門

初寒

重雲蔽白日陂港日夜涸秋風纔幾時
已見霜雪作人生各有分豈必衣狐貉
吳中冬蔬茂盤飭不寂寞搏泥治牆屋
伐篠補籬落薄酒亦醉人問子胡不樂

對鏡

鏡中衰顏失數腴綠鬢已作霜蓬枯
兩肩聳聳似山字曳杖更有蠻童扶
自驚何以致此老亟欲修敬問起居
徐徐熟視乃大笑但記昔我忘今吾
今吾雖億頗神王飛仙正可折簡呼
遠遊縱未從谿父醉眼猶能隘具區

書劍

書劍當年徧兩川歸來垂釣鏡湖邊
老皆有死豈獨我士固多貧寧怨天
物外勝遊攜鶴去琴中絕譜就僧傳
莫言白首詩才盡讀罷猶能意爽然

城南道中有感

行李蕭然一束書城南觸目更愁予
市門乞食僧持鉢關路哦詩客跨驢
殘髮無多真已矣名山未去獨何歟
芒屨可買身猶健紅樹青霜十月初

寄子虞兼示子通

書生賦命難舉步得憂患敢論得意事
一笑亦有限南征度閩嶺西戍歷蜀棧
吳江聽唳鶴淮浦送歸雁歸來畊故山
莫雨泥沒斫羣鴉下空陂黃犢鳴絕岸
索飯閔兒啼乞播虞妾覩一裘三十年
破裂不受綻欲添一把茅百計亦未辦
大兒急親養辛苦就遠宦間出冒虜塵
短甲中夜擐小兒奉親驩野果采溪澗
勉使就微祿未對涕先潛觀汝兄弟意
豈復厭藜藿兄歸弟不出定省同夜日
一年老一年

一年老一年一日衰一日譬如東周亡豈復須大疾
癩情已廢書冊久病來亦復疎盃酒朝車小住固自
佳拂袖便行亦何有下床擁火暖有餘鹹豆數粒粥
一孟平生常笑愚公愚欲栽墮齒染白鬚

自東岡練出舍北

年光豈不好老境獨無歡百步未為遠一尊聊自寬
澤枯波尚綠霜薄葉初丹矯首問來雁中原應苦寒
有客

有客南山至相攜飯野亭傾籃魚白白出籠菜青青
米滑溪春確醅渾草塞瓶從今同保社日醉不煩醒
陳伯予見過喜予強健戲作

寒無甑坐甑生塵此老年來乃爾貧兩頰如丹君會
否胸中原自有陽春

東陽郭希呂呂子益送酒

山崦尋香得早梅園丁又報水仙開獨醒坐看兒孫
醉虛負東陽酒擔來

夜坐

家家績火夜深明處處新舍雨後畊常媿老身無一
事地壚堅坐聽風聲

兩日意殊不憚作短歌自遣

一月得笑纔四五十事敗意常八九國中謾說無雙
士天下元無第一手平生愛酒恨小戶半世為文真
弊帚劫灰處處吊興亡宿草年年哭交友君看丈夫
得意時大冠如箕印如斗一朝棄去豈復論衣破何
妨露雙肘有時采藥二室間亦或釣魚五湖口死來
萬古一熟眠安用虛名傳不朽

戲書日用事

衰病時時作閑愁日日生寒添沽酒興因喜磴茶聲
琴廢還重理詩成更細評殘年那望進且復暢幽情
獨立

上書不上登封書乘車但乘下澤車夕陽獨立衡門
外閑看村童學釣魚

夢中江行過鄉豪家賦詩二首既覺猶歷歷能
記也

築屋傍江臯牆垣締結牢深門蔭楊柳高架引蒲葦
黍酒歡迎客麻衫旋束條兒孫勿遊惰常念起家勞

又

蒲席乘風健江潮帶雨渾樹餘梢纜迹崖有刺篙痕
酒醉湘君廟歌招屈子魂客途嗟草草無處采芳蓀
病中夜思

一病輒兼旬百憂集雙鬢藥裹堆床滿生意垂欲盡
時間雀翻更鄉中有栖雀夜鳴為翻更頻看燈落燼平生
學六經白首頗自信拳拳服仁義念念去驕吝所覲
未死間猶有分寸進

得子虞書言明春可歸

白首相依飽蕨薇吾家父子古來稀春秧出水柔桑
綠正是農時望汝歸

雜賦

地爐夜熱麻藍煖瓦甌晨烹豆粥香不是有心輕富
貴從來吾亦愛吾鄉

又

病叟胸中一物無夢遊信脚到華胥覺來忽見天窗
白短髮蕭蕭起自梳

又

終日纔堪米一升生涯略似草菴僧溼薪不管晨炊
晚留得松肪代夜燈

又

出門信步作閑遊野廟村坊到處留每伴樵夫嘗半
舍更隨牧豎采沿溝半舍沿溝皆果名

又

體不佳時看周易酒痛飲後讀離騷騎驢太華三峯
雲鼓棹錢塘八月濤

又

昔人莽莽荒丘裏陳迹紛紛朽簡中畢竟是非誰辨

得舉盃吾欲問虛空

又

百億須彌理固有八九雲夢何足吞天下廣居君識否一間茆屋寄孤村

又

夢裏曾作南柯守少時元是東陵侯今朝半醉歸草市指點青帝上酒樓

又

七十八十古來稀行年九十固應衰已興工部耳聾歎更和文公齒落時

又

中年畏病盃行淺晚歲修真食禁多謝客杜門殊省事一盃香飯養天和

又

齊民讓畔不爭桑和氣橫流歲自穰君看三山百家聚更無一塊有遺蝗今年蝗孽獨三山過而不下遂不為災

又

得雨郊原已徧畊東家西舍多逢迎前山雲起樹無影別浦潮生舳有聲

散懷

小疾便幽翳孤懷抱鬱陶遺文誦史漢奇思探莊騷談笑寬吟苦經行慰作勞東岡聊一往突兀古臺高

書壁

稻草高茨屋繩樞窄作門漁樵皆結友鄰曲自通婚留客秋茶苦醺人社酒渾餘年尚何歎一飯亦君恩

又

故里還初服明恩念老農方蒙鏡湖賜又忝渭川封炊粟猶支日藏蔬可御冬霜天病益減高枕聽隣鐘

冬日齋中即事

讀書雖所樂置之固亦佳燒香袖手坐自足紆幽懷我生本從人豈願終不諧其如定命何生死一茆齋

又

一帚常在傍有暇即掃地既省課童奴亦以平血氣按摩與導引雖善亦多事不如掃地法延年直差易

又

夙與人尚默衆鳥相與言小語豈不可何至爾啾啾吾獨擁燎爐宿火有餘溫澹然以自適喧寂何足論

又

詰朝澹無營百事付童子拂我架上書注我硯中水覓睡不復成取衣乃徐起卒歲如一朝底處著愜喜

又

我老苦寂寥誰與娛晨莫狸奴共茵席鹿麕隨杖屨歲薄食無餘恨使鳥雀去安得粟滿囷作粥餽行路

又

東園二畝地重重作藩籬我豈婦女哉避客門不窺要當盡徹去來往無他歧飯罷忌久坐時須曳筇杖

冬日排悶

老欲躬畊力弗強但應賣藥似韓康陳編時見古成敗舊友不知今在亡已返山林遺世事尚憑詩酒答年光此身自笑如稊米加損寧能繫太倉

又

地爐微火伴寒灰垂野江雲暝不開欲睡手中書自墮半酣窗外雪初來渡頭照影聞征雁籬角吹香得早梅佛粥春盤俱不遠離離斗柄欲東回

法雲寺主僧妙湛方作鐘樓未成

勾踐舊國古會稽南山擁郭分東西城門大路引繩直西走百里皆平堤客行欲曉到梅市啞啞尚聽城中雞法雲古寺臨大澤風皺百頃青玻璃迎來送往

此其地素壁時見前人題乖離會合浩莫計歷觀名氏空含悽山僧慣見為客歎榮悴從來如夜日明年

吾樓插天半世事君須倚闌看

自法雲歸

落日疎林數點鴉青山闕處是吾家歸來何事添幽致小竈燈前自煮茶

枯菊

龍山落帽未多時陳迹依然使我悲
粲粲菊花何似

好堦前惟見束枯枝

聞吳中米價甚貴二十韻

千錢得斗米一斛當萬錢嗟汝蚩蚩民何恃以自全
我欲告父老食為汝之天勿結迎神社勿飾杭湖船
築室勿斲削但取垣屋堅婦女省釵澤野樵何用妍
趨利常處薄衆役常在前歲時相勞苦盛饑一豚肩
近市可致酒雖薄亦醺然切勿慕公卿早朝妨熟眠
亦勿謀高貲貪吏不汝憐有負固吹毛無罪亦株連
豈暇論曲直挺繫如登仙短褐與飯豆温飽可終年
草廬挂葦箔乃可數世傳朱門雖赫赫文化如飛煙
為農最得策本無祿與權時平自逸樂奉牲祭其先
不幸有散徙均為寓民編吾詩不足徵請讀七月篇

寒夜偶懷壯遊書感

疇昔西遊萬里還狂吟散落滿人間買空綠水橋邊

酒看徧青城縣裏山梅蕊疎疎春欲動川雲漠漠雪
猶慳偶思五十年來事顧影燈前自笑頑

夢曾文清公

有道真為萬物宗嶮然使我歎猶龍晨雞底事驚殘

夢一夕清談恨未終

白日悠悠喜意平夢中歷歷覺魂清覺時不落晨雞
後靜待天窗一點明

湖邊小聚

小聚遠塵羈淳風獨未澆鳴機燈煜煜飲犢雨蕭蕭
異味常交致新醪亦苦邀人間交道絕令我慕漁樵
雨

秋冬久不雨氣濁喜雲生麥壟崇朝潤苜蓿徹夜聲
初來斷幽徑漸密雜疎更賴有牆陰薺離離已可烹

又

薄晚初占灑清晨更慘悽魚寒拋餌去鴉溼就蒼栖

幽澗濺濺溜長隄淺淺泥一盃持自賀吾事在鋤犁
雨後快晴步至湖塘

齒豁從教道字訛負薪陌上且行歌古人亦自逢時
少吾輩何疑忤俗多山掃黛痕如尚溼湖開鏡面似

新磨亦知大有掀髯處無奈西流白日何

兩日寒雨作雪不成夜忽大雨遂晴

折木翻濤一夜風浮雲吹盡日行空天公豈是真慳
雪三白留來付臘中

歲窮

困阨身如寄推遷歲忽窮百年均昨夢萬古一飛鴻

夜甕鳴春酒晨畦擷晚菘屬饜童子笑便腹負吾翁
凍坐

湖海淒涼地風霜慘淡天吾其去道近無酒亦陶然

古意

千金募戰十萬里築長城何時青塚月却照漢家營
又

夜泊武昌城江流千丈清寧為雁奴死不作鶴媒生
雪意復作

前日作雪風敗之今日濃雲雪復作一寒未暇自為
計宿麥懸知天已諾灑橋策驢愁露手新豐買酒聊

輒胸中正著九雲夢廊廟何加一丘壑上書陳事
固可笑服藥求仙亦成錯不如醉踏一劍騰風雲跨

海東謁青童君

醉書

天公賦與五湖秋風月雲煙處處留損食一年猶可
健無詩三日却堪憂

劍南詩稿卷第七十九終

劍南詩稿目錄

卷第八十

排悶 湖山尋梅二首 作雪寒甚有賦 書

懶 讀唐人愁詩戲作五首 讀書至夜分感

數有賦 擁爐 隱趣 冬夜舟中作 湖山

九首 齒髮 古謂不如意事十常八九雖出

于好功名者之言閒中亦未免此數戲作七字

一首 幽居歲莫五首 過湖上僧菴 夜坐

戲作短歌 書歎 夜莫自湖上歸 晚步湖

隄 夜寒 感舊 小雪 十二月十日莫小

雪即止二首 遣興 貧居時一肉食爾戲作

臘月十四日雨 節物 讀書 春近 讀

陶詩 夜雨寒甚 寄趙昌甫 稽山雪 招

隣父啜菜羹 讀論語 晨起 雪後 示福

孫并示喜曾 微疾 簡僧求秦望山拄杖

遊山步二首 雪晴欲出而路澀未通戲作二首

春日 示兒輩 雪後煎茶 夢中作 破

屋歎 戊辰歲除前五日作新歲八十有五矣

晨起復睡 梅二首 小疾治藥偶書二首

子通讀書常至夜分作此示之 歲莫作

除夕 己巳元日 初春 新年書感 開歲

連日大雪 飲酒 詩酒 入日雪 春寒二

首 雨雪久無來客亦不能出作長句排悶

書老 初春遣興 讀書 雜興四首 後雜

興四首 自詠二首 晚窗

劍南詩稿卷第八十

宋陸游務觀

排悶

造物冥冥中與我無一面不知獲罪由動輒被訶譴
又若哀其愚救以藥瞑眩我亦揣此心安受不敢怨
中間成蜀漢十載困郵傳騎盛蒙隴千陣雲暗秦甸
齋糧雜沙塼掬水以三噉傳烽東路谷倏忽若流電
歸吳獲小休餘喘僅一綫意言在故鄉終勝客異縣
夫何命大謬魔事每交戰友離同一波平地肆蹈踐
么然性命微日畏讒口煽舊書不暇視鼠跡上几硯
負病不即死遂作諸老殿却觀所更歷殆是金百鍊
人誰不愛身悔作青紫棺短劫入空翠小艇破江練
漁歌隔浦聞續火傍林見苦貧雖至骨未肯受客陪
君看投林猿終異巢幕燕有山皆可耕焉往失貧賤

湖山尋梅

鏡湖渺渺煙波白不與人間通地脈騎龍古仙絕火
食慣住空山鬻冰雪東皇高之置度外正似人中巢
許輩萬木僵死我獨存本來長生非返魂

又

小雪湖上尋梅時短帽亂插皆繁枝路人看者竊相
語此老胸中常有詩歸來青燈耿窗扉心鏡忽入造
化機墨池水淺筆鋒燥笑拂吳箋作飛草

作雪寒甚有賦

雲暝風號得我驚硯池轉盼已生冰窗間頓失疎梅
影枕上空聞斷雁聲公子早貂方痛飲農家黃犢正
深畊老人別有超然處一首清詩信筆成

書癩

我性本迂疎養生又無術憂患自外至疾病由中出
屏居絕造請冀補東隅失今觀世間事如僧視沐櫛
閑身嶺上雲睡味蜂房蜜惟思茅簷下一席臥朝日

讀唐人愁詩戲作
少時喚愁作底物老境方知世有愁忘盡世間愁故
在和身忘却始應休

又

清愁自是詩中料向使無愁可得詩不屬僧窗孤宿
夜即還山驛旅遊時

又

天恐文人未盡才常教零落在蒿萊不為千載離騷
計屈子何由澤畔來

又

我輩情鍾不自由等閑白却九分頭此懷豈獨騷人
事三百篇中半是愁

又

飛雪安能住酒中閑愁見酒亦消融山家有力參天
地不放清尊一日空

讀書至夜分感歎有賦

老人世間百念衰惟好古書心未移斷碑殘刻亦在
檣時時取玩忘朝飢推尋點畫到曲折想見落筆縱
橫時豈惟鸞鳳九霄上景鍾大鼎森陸離雖然欲學
則曷敢驚馬仰看驕驄馳正如志士才不稱心慕伊
傅終何施爾來亦復強點染手不隨意徒嗟咨懸知
明日天將雨中夜寒蒸紫玉池

擁爐

急雨狂風莫不收燎爐薪硬復何憂如傾激灑鵝黃
酒似擁蒙茸狐白裘大澤羈鴻來萬里高城傳漏過
三籌明朝會看稽山雪莫為衝寒怯上樓

隱趣

歸老家山一幅巾俗間那可與知聞舉盃每屬江頭
月贈客時緘谷口雲行采菖蒲綠蘚磴臥浮舴舨入
鷗羣力營隱趣君無怪作得閑人要十分

冬夜舟中作

夜榜孤舟掠岸行村墟頻過不知名繞枝倦鵲寒無

影脫網奔魚遠有聲兩紙忽驚殘歷盡一盃聊慰旅
懷情還家自笑身猶健又付生涯與短檠

湖山

逐鹿心雖壯乘驪勢已窮終全蓋世氣絕意走江東

項羽廟

又

湖上多甘井磴泉尤得名何時枕白石靜聽轆轤聲
磴山泉

容山

又

山崦桑麻路柴門鳥雀聲老巫祈社雨小婦餉春畊

花徑小嶺

又

坡陁度小嶺軒豁見平湖但醉梅花下民家酒可沽

項里民家

又

淺井供茶竈分流浣布沙此泉吾所愛百用給山家

古城

又

故堞無遺跡蕭然數十家茶煙映山起酒旆傍隄斜

柳姑廟

又

汀月生眉黛溪梅試額粧幽閨元不出莫道嫁彭郎

東跨湖橋

又

城邊小市聚煙水淡秋容南走蘭亭路迢迢雲外鐘

西跨湖橋

又

東西二十里相望兩平橋傍水多投釣穿雲有負樵

齒髮

莫境侵尋歲月適齒搖髮脫又經秋此身要是歸衰
謝外物何須更固留阜白從來憎了了登臨且復送

悠悠嗣宗痛飲圖南睡萬事輸君此一籌

古謂不如意事十常八九雖出于好功名者之

言閑中亦未免此數戲作七字一首

歸志初諧老遽催良辰常與病俱來酒雖已熟恨無

菊雪苦不成空見梅朋舊乖離心每折山川悠邈首

頻回人生敗意無窮達莫厭相逢笑口開

幽居歲莫

冉冉忘年往紛紛厭事來庭除多草莽几硯亦塵埃

園為畦蔬到門因汲水開偶聞林鳥語太息又春回

又

却醫翻少疾辭祿不加貧嘉木移俱活村醪釀輒醇

悠悠還過日益益又逢春狂舞君毋笑梅花插滿巾

又

老去轉無事室空惟一床臥時幽鳥語行處野花香

巷北觀神社村東看戲場誰知屏居意不獨為畊桑

又

燃薪代秉燭煮茗當傳盃但恨朋儕少那知日月催

衣裘任穿穴芋栗且燔煨不為殘年迫吾心久矣友

又

古井年年浚荒疇日日犁刈茅苦鹿屋插棘護雞栖

閑賴書遮眼愁須酒到臍斜陽有常課緩步上湖隄

過湖上僧庵

西庵每過未嘗開澗近清言始此回陶令巾車尋壑

去已公茅屋賦詩來奇香炷罷雲生岫瑞茗分成乳

泛盃便恐從今往還熟入門猿鳥不驚猜

夜坐戲作短歌

畏事如畏虎避人如避寇結廬三家村百事喜寒陋

身閑自為貴飯足豈非富素心憎狐妖老愈惡銅臭

視之若寒氣可使客膚腠即今知免矣終歲塞門竇

始知松倒壑殊勝雲出岫聊持不動心更養未盡壽

夜讀南華篇欣然發吾覆

書歎

世事紛紜汝所知欣然領略尚何疑窮居自是長年
術魔境常爲定力資人但與遊無德怨酒皆可醉略
醇醪蘭亭賓主今何在修竹依然似曩時

又

尺椽不改結茅初薄粥猶難卒歲儲獨子解迎門外
客狸奴知護案間書深林閑數新添筍小沼時觀舊
放魚自笑從來徒步慣歸休枉道是懸車

日莫自湖上歸

我生本亦與人同緣薄才疎剩得窮細水自鳴沙渚
外亂山時出雲雲中僧歸獨趁殘鐘去人散遙憐晚
渡空造物陳詩信奇絕忽忽暮寫不能工

晚步湖隄

縮裘桐帽野人裝又上湖隄步夕陽貧甚不爲明日
計興來猶作少年狂殘樽倒酒無餘瀝幽圃尋梅認
暗香時有行人數頑健黑絲點破額間霜

夜寒

江雲作雪暗郊原竟夜風聲萬馬奔槁面暫未知酒
釀曲身成直賴爐温幼與正復宜巖石倚相猶能讀
典墳米貴僅供糜粥用自傷無力濟元元

感舊

早參太史筆晚典石渠書孤立如羈雁微生等蠹魚
虛名真忝竊定理有乘除九十稽山下荒畦日荷鋤

小雪

夜臥風號野晨興雪擁籬未言能壓瘴要是欲催詩
跨蹇雖堪喜呼舟似更奇元知剡溪路不減灞橋時
十二月十日莫小雪即止

夜來急雪打船窗今夜推窗月滿江堪恨無情一枝
艣水禽驚起不成雙

又

夜來一雪苦忽忽千里濃雲忽掃空換得月明良不
惡未須過計慮蝗蟲
遣興

野鬻魚鹽市迢迢桑麥村山家薪炭足野叟袴襦温
置兔殘蕪盡又魚積水渾詩書老無効猶擬付兒孫
貧居時一肉食爾戲作

臘月十四日雨

身老便居僻山寒喜屋低時猶賴僧米那惜貸鄰醴
湯餅挑春齋盤發設凍齏怪來食指動異味得豚蹄
歲晚深居懶出遊小窗終日寄悠悠雨聲到枕助詩
律花氣襲衣生客愁殘齒不堪添脆瘦肩轉復覺
颼颼春前一雪猶關念安得瓊瑤積瓦溝

節物

節物猶關老病身鄉鄰佛粥一年新檐間百舌還多
事探借園林十日春

讀書

力不扶微學心猶守舊聞壁間科斗字秦火豈能焚
春近
層授人時後天回斗柄初農疇與耒耜家塾盛詩書
縹緲雙鳧鳥啞啞一鹿車山翁喜春近隨處狎樵漁

讀陶詩

陶謝文章造化侔篇成能使鬼神愁君看夏木扶疎
句遙許詩家更道不

夜雨寒甚

萬籟號風如戰鼓雪意垂垂先作雨庭中棲鳥驚屢
起窗下殘燈翳還吐老翁聳膊高過頂童子觸屏低
不語時聞鄰舍起飯牛亦有歸樵說逢虎去年雪薄
蝗害稼今年望雪如望赦行當二白兆豐年牲酒如
山作秋社

寄趙昌甫

杳杳雙鷗鳴庭除東陽吏傳昌甫書紙窮乃復得傑
作字字如剗造化爐爾來此道苦寂莫千里一士如
隣居小兒得祿在傍邑我貧初辦一鹿車過門剗琢
亦奇事拜起幸未須人扶君看幼安氣如虎一病遽
已歸荒墟吾曹雖健固難恃相覓寧待折簡呼餘寒

亦奇事拜起幸未須人扶君看幼安氣如虎一病遽
已歸荒墟吾曹雖健固難恃相覓寧待折簡呼餘寒

亦奇事拜起幸未須人扶君看幼安氣如虎一病遽
已歸荒墟吾曹雖健固難恃相覓寧待折簡呼餘寒

更祝勤自愛時寄新詩來起予

稽山雪齋隱者作

高人采藥來禹穴骨瘦巉然鬢眉白結茅分得野鹿場一夜北風三尺雪明朝過午勢愈惡虎兇交迹人聲絕虛窗縱橫叢竹入幽欄荒寂孤松折凍吟孰窺袁安戶僵臥秃盡蘇武節人生飢寒固亦有養氣不動真豪傑希名後世吾所恥姓字寧與身俱滅班馬復生無自書我作此歌空激烈

招鄰父啜菜羹

老境遺人事窮居世有茅簷聽雪滴瓦鼎蒸松肪不願封侯印惟求煮菜方盃羹頰及熱剩欲喚君嘗讀論語

壯歲貪求未見書歸常充棟出連車晚窺闕里親傳妙數簡方知已有餘

晨起

殘夢悠颺不復成鎗然已有百禽鳴山童來報溪流長幽事從今日日生

雪後

雪消已斷虛簷溜日暝初催百草生射的山前春水綠笙歌又滿會稽城

示福孫并示喜曾

北商久不通梨棗罕登盤山舍惟有橋瑣細如彈丸此外則柿栗收拾猿鳥殘雖無龐翁話兒孫亦團樂今歲兩雪晚歲莫始大寒二雅乃可憐不訴衣襦單地爐有微火誦書到更闌我老多感概積汝差自寬

微疾

微疾經旬近藥囊往來巷陌未全妨時時小雨知春近處處閉身覺日長林外鼓歌聞賽廟懷中茶餅識租桑兩京梅發今何似送老流年只自傷

簡僧求秦望山拄杖

老病龍鍾不自持飽知藤杖可扶衰明朝欲入天台去試就高人□□□

遊山步

蹇驢渺渺過雲邊旋了三生物外緣平日視家真逆旅此行出戶若登仙飢從野店烹葵飯困就僧床借枕眠所恨莫年交舊盡佳時無與共聯翩

又

南出平橋十里餘湖山處處可成圖水邊更覺梅花瘦雲外誰憐雁影孤時喚行僧同煮茗亦逢樵叟問迷途破裘不怕春寒峭小市疎燈有酒墟

雪晴欲出而路薄未通戲作

欲覓溪頭路春泥不可行歸來小窗下袖手看新晴

又

雪消重作雨冰釋又成泥已敗筇枝興高眠聽午雞

春日

冷餅細生菜老翁殊未衰仍尋舊橋勝一笑伴諸兒窮居懷抱久無權猶賴吾兒得少寬謹視雞豚供老疾力營薪炭備春寒舊書綴緝編無絕小甕調停味不酸坐使乃翁無一事高眠常到日三竿

雪後煎茶

雪液清甘漲井泉自攜茶竈就烹煎一毫無復關心事不任人間住百年

夢中作

久向人間隱姓名看花幾到武昌城一壺春色常供醉萬里煙波懶問程斜日挂帆堤外影便風擊鼓驛前聲丈夫入手皆勛業廊廟江湖未易評

破屋數

我年四十時築舍受一廛歲月不貸人殆將五十年初非椽桷材既久理豈全慘淡窳風雨亦復補破穿竹椽與繩樞豈敢求牢堅今朝忽自顧衰疾方沉羸不知此殘軀與屋誰先顛粥藥幸粗給兒稚滿目前歛藏雖甚薄猶勝死道邊一笑推枕起無酒亦陶然戊辰歲除前五日作新歲八十有五矣

灰深火可宿，小燈耐久長。流故不腐，易成必速朽。我昔遊青城，聞道巢居叟。躬行雖不力，年少過九九。固知適天幸，自養亦差厚。傳家六兒子，其四今皓首。寧聞澗底松，鬱鬱慕蒲柳。大兒新年六十二，仲子六十季亦近六十。

晨起復睡

衰翁卯飲易，上面澤國春。寒偏著人下，榻一盃還就。枕不嫌新睡，晤比隣。

梅

三十三年舉眼非，錦江樂事祇成悲。溪頭忽見梅花發，恰似青羊宮裏時。

又

俗事常妨把一盃，等閑開過小園梅。自傷惟有尋春夢，百舌無情又喚回。

小疾治藥偶書

禦戎虛上策，治疾闕全功。安得如神禹，常行無事中。

又

握苗農害稼，過劑藥傷人。此理君能造，無為萬物春。

子適讀書常至夜分作此示之

我為無才老，把鉏汝窮亦復坐。迂疎夜燈詠史蟲吟，草朝几。陳書懶祭魚未至，苦飢依馬磨不妨相守臥。蝸廬業成自有能，知賞家世從來典石渠。先太傅先楚公皆久在三館，予亦入館二十年。晚忝大蓬之命。

歲莫作

魚貫長條兔臥盤，往來聊續里閭歡。舊符又擬新年換，殘曆都無半紙看。梅影橫斜春尚淺，角聲悲壯夜將闌。堅頑敢望今如許，戲說期頤強自寬。

除夕

熾炭爐中百藥香，屠蘇煎酒代椒觴。明朝積是無來客，雪後泥深一尺強。

己巳元日

曾孫新長奉椒觴，兒女冠笄各綴行。身作太翁垂九

十醉來堪喜，亦堪傷。

初春

裝罷桃符又剪燈，新年光景捷飛騰。老翁掃盡兒童事，却學禪床入定僧。

新年書感

早歲西遊賦子虛，莫年負未返鄉閭。殘軀未死敢忘國，病眼欲盲猶愛書。朋舊何勞記，車笠子孫幸不廢。舊畬新年冷落如常日，白髮蕭蕭悶自梳。

開歲連日大雪

開歲大雪如飛鷗，轉盼已見平簷溝。村深出門風裂面，況復取醉湖邊樓。從來春雪不耐久，臥聽點滴無時休。去年久旱縣千里，犁不入土蝗蟲稠。今年冬春足膏澤，天意似欲滋農疇。豈惟養豬大作社，更賣寶劍添耕牛。

飲酒

我酒本小戶，痛飲乃有時。意氣不相值，終日持空巵。醉或能齋莊，不醉或狂逸。乃知老子狂，非自麴蘖出。今日雪始晴，行歌官道傍。超然醒醉間，非莊亦非狂。

詩酒

我生寓詩酒，本以全吾真。酒既工作病，詩亦能窮人。每欲兩忘之，永為畊樵民。周旋日已久，棄去終無因。齒髮益衰謝，肝膽猶輪囷。吟哦撼四壁，蒐菽頹烏巾。江上處處好，風月年年新。正爾豈不樂，浩歌終此身。

人日雪己巳元日至人日雨雪間作

病臥江村不厭深，貂裘無奈曉寒侵。非賢那畏蛇年至，多難却愁人日陰。嬾嬾孤雲生翠壁，霏霏急雪灑青林。一盃飯罷無餘事，坐看生臺下凍禽。

春寒

滔天來海水，震瓦戰昆陽。此敵猶能禦，春寒不可當。

又

高樓墜綠珠，惡客碎珊瑚。未抵春寒夜，貧翁喪故襦。雨雪久無來，客亦不能出。作長句排悶。

造物無情豈我私從來不使墮危機青雲路近常排
去白派堆高亦脫歸殘稿尚存空自許故人略盡欲
誰依新春雪暗山村路且復焚香獨掩扉

書孝

我老耄已及終日惟冥行鄰里少間闌便若昧平生
家人每過前亦或忘其名昏昏等作夢兀兀如病醒
不知張睢陽何以記一城愚知各自適得失未易評

初春遣興

閑愁長與病相依晨起梳頭感髮稀春事鼎來風更
惡晨光已滿雪猶飛江梅有恨論年別旅雁無情計
日歸剩欲湖邊踏青去憑誰為解亂書圍

讀書

少從師友講唐虞白首襟懷不少舒舊謂皆當付之
酒今知莫若信吾書朱黃參錯雞鳴後鐵帙從橫月
墮初撫几欣然時有得此翁作計未全疎

雜興

灰中火如螢燎原從此始元氣一點存危疾亦不死

又

炷香火要深作墨手當緩淺士務成速所以多後患

又

庖丁悟養生輪扁議讀書彼特一技爾聖智有不如

又

鏗爾捨瑟作曝然放杖笑浩浩太古音與俗不同調

後雜興

臘雪瑞我麥春雨嘉我穀老農無他求一飽萬事足

又

日上明我窗月出縮我庭朝莫得佳時一榼醉復醒

又

會合惜日短別離愁夜長人老愛吾廬客歸悲故鄉

又

俚醫刀七藥老巫半榼酒拜況不敢忘淡薄最耐久
自詠

道本治吾身緒餘方及人神清緣食少事簡為家貧
薄酒如重醞寒蔬抵八珍村村花柳動且復岸綸巾

又

謝事客誰過閑遊吏不訶家人爭稗粥鄰叟和禽歌
靜夜詩成祟新春睡有魔年光本無盡未用數蹉跎

晚窗

一塢梅花已盡空數領春雪未全融晚窗忽有題詩
興落筆縱橫半醉中

劍南詩稿卷第八十終

劍南詩稿目錄
卷第八十一

遠遊二十韻 對酒 夜雨 己巳正月十八
九間雪復大作不止 寄子虞 書夢 示子

通 對食有感二首 雪夜三首 初春 春
日雜興十二首 小霽乘竹輿至柳姑廟而歸

春曉 肩輿歷湖桑堰東西過陳灣至陳讓堰
小市抵莫乃歸二首 書適 陳讓堰市中遇

吳氏老自言七十六歲與語久之及歸送子過
市猶戀戀不忍去 午炊 古風二首 肩輿

至石堰村 睡起遣懷 春晴 書感 野興
野步二首 稽山 緋桃開小酌 夜中獨

步 春寒復作 大雨排悶 室中屏去長物
戲作 對酒 曝舊畫 予以淳熙戊戌歲自

蜀歸時年五十四今三十有二年矣猶然強健
得小詩自賀 花下小酌二首 夜酌 數日

不作詩 幽居示客二首 春日登小臺西望
醉賦 卽事 落花 春日 戲詠園中春

草二首 二月二十四日夜大風異常 雨夜
與隣翁飲用前輩韻 雜感四首 讀史二首

出遊二首 夜興戲作 酒熟書喜 湖上
春晚 食酪 六言六首 書意示子孫

莫春龜堂卽事四首 莫辭酒 懷友 蘭亭
道上四首 殘年 春老 睡起 自規 夜
聞雷雨大作

劍南詩稿卷第八十一

宋陸游務觀

遠遊二十韻

早歲志遠遊萬里攜孤劍所至必吊古如疾得鍼砭
荒寒過吳宮摧剝觀禹空及仕揚濶間挂席度天塹
梁宋不可遊北望每懷歎會有蜀漢役奇嶮日窺規
築壇訪遺址燒棧想烈炤轅門俯清渭徹底綠可染
舊史所登載一一嘗考驗胡羊美無敵黍酒實醇醲
枕戈南山下馳獵久不厭比參劍南幕壯志就收斂
卜鄰楊雄宅遂欲老鉛槧但愛古柏青肯顧海棠豔
人生不易料白首東歸剡稽山秋義我鏡水春激激
餘俸買扁舟月下采菱芡湖山最奇處容我釣石占
婚嫁幸已畢百事不關念但當勤醉歌一死不汝欠

對酒

社醅又借醉顏酡手挽鄰翁作浩歌江月偏能照蓬
戶京塵終不汙漁蓑苦吟且復歌吾帽對奕真當爛
汝柯回首紛紛俱夢耳人間何處有天魔

夜雨

正看飛雪暗江天不覺新春已粲然花氣襲人娛獨
夜雨聲遶舍送豐年樵風未改山川舊禊事空悲歲
月遷一榼可營身尚健故應先治下湖船
己巳正月十八九間雪復大作不止

寄子虞

汝官南壽春我居東會稽疋馬護秋塞兩犢翻春泥
淮天沙雁過江村雪雲低書來動半年相望常愴悽
父子不共畊此悔真噬臍明年城西社爛醉相扶攜

書夢

我夢舉有司雞唱起裹飯又夢趁早朝漏舍坐待日

既寤兩無有撫枕徒浩歎今雖去為農飯牛亦夜半
何曾得放慵美睡到日肝一笑俱置之浮生固多難

示子適

家貧不學儉物理有固然要是善用短足以終其年
我家稽山下稟賦良奇偏敢言中人產日或無炊煙
有兒更耐窮伴翁理遺編短繫幸能繼竟夜可忘眠

對食有感

盃酌以助氣七筓以充腹沾醉與屬饜其害等嗜慾
歡醖有餘歡食淡百味足養生所甚惡旨酒及大肉
老翁雖無能更事嗟已熟勿嘆苑二間養汝山林福

又

我老雖無家其實如客耳食至舉七箸飽則捨而起
厨人有勤情我豈形慍喜園畦摘青蔬地確春赤米
勞人固已多坐享額常泚作詩本自規亦以告閭里

雪夜

荒郊質質行斷壘危危咄咄常情所藉躡豈復懷不平
歸來臥破屋中惟一牀橫且燒生柴火靜聽溼雪聲

又

今年春苦寒風雪塞戶隔况我窮閭士袴敝衣見肘
正須小忍之此事豈得久努力辦一壺西村看花柳

又

瓦疎雪墮簷窗破風吹燭短裘不及斂手脚盡皸痲
猶勝南鄰叟一褐竟未贖薄酒城中來清夜聊相屬

春日雜興

柳拂朱橋湖水生園林處處聽新鶯亦知人世當行
樂無奈春陰不肯晴走馬章臺身縱老看花社曲眼
猶明只應詩思年來減預怯同遊議罰觥

又

方塘盎盎帶泥渾遠草青青沒燒痕只道雨晴春晝
永歸時不覺已黃昏
南村北村鼓擊擊剗羊刺豕祭潭龍一生衣食財取

足百世何妨常作農

又

小甌有米可續炊紙鷲竹馬看兒嬉但得官清吏不橫卽是村中歌舞時

又

夜夜燃薪煨絮衾禺中一飯直千金身爲野老已無責路有流民終動心聞有流移人到城中

又

出仕常騎秃尾驢歸休自駕折轅車今朝偶遇村夫子借得齊民一卷書

又

更事多來見物情世間常恨太忙生花開款款寧爲晚日出遲遲却是晴

又

一枝筇杖一山童買酒行歌小市中莫笑摧頽今至此當年萬里看春風

又

四十餘年學養生誰知所得亦平平體孱不犯寒時出路溼常尋乾處行

又

攪睡禽聲曉傍蒼泥人花氣午穿簾懽情老去年年薄困思春來日日添

又

陰晴不定春猶淺困健相兼病未蘇見說市樓新酒美杖頭今日一錢無

又

乍晴乍雨忽經旬半醉半醒還過春春臥不知蒼外事閑吟聊適夢中身

又

行人陌上思悠悠十里斜陽古渡頭一片落花無覓

處只教芳草管閑愁

小霽乘竹輿至柳姑廟而歸

殘雲斷處漏斜陽草滿平隄柳著行旣旣畫船來北港翻翻青繖度南塘行人相賀新年健逃戶雖窮舊業荒感物興懷空絕嘆才衰無語付詩囊

春曉

初見天窗一點明旋看曉色到簷楹衾裯温煖留殘夢鳥雀呼鳴報快晴雖喜心隨年愈老却愁事與日俱生平川漫漫煙蕪綠筋力猶堪給耦耕

莫乃歸

堤遠沙平草色勻新晴喜得自由身芋羹豆飯家家樂桑眼榆條物物春野店茶香迎倦客市街犬熟傍行人牆頭婦女更相語認到先生折角巾

又

貪看西南一面山不知信步到陳灣未言散釋經旬病且要消磨半日閑蔬糲過寒常鬱鬱鳥聲迎曉已關關斜陽不爲行人駐十里鐘來翠靄間

書適

疇昔花前醉放顛卽今不飲亦陶然太平固自多遺老獨往何妨是斥仙扶杖每觀南畝盪解衣時作北窗眠人間賢俊方雲集我遇龍蛇豈厄年

陳讓堰市中遇吳氏老自言七十六歲與語久之及歸送予過市猶戀戀不忍去

就店煮茶古堰邊偶逢父老便忘年嗟予空忝十年長聞道慚無一日先壯子當門能碌碌諸孫承業亦翩翩熟思遊宦終何得悔不從公曝背眠

午炊

江路初晴日煙蕪古廢城青鍼秧稻出黑螿稚蠶生山際牛羊路林間雞犬聲午炊聊小憩野老解逢迎

古風

犧象薦清廟餘材棄溝中二者雖甚遠殘生其實同人當貴其身豈復論窮通寧爲原上草一寸搖春風

又

木生雖拱把鮮不因斧斤枯朽亦可全又以蘇故焚
嘉禾終銜艾豈獨草見耘此理講已熟要當尊所聞

肩輿至石堰村

偶上籃輿踏夕陽醉魂困思兩俚俚潤薪旋拾供茶
竈詩稿初成寄藥囊村舍藝麻驅鳥雀牧童隨草放
牛羊歸來徒倚衡門久始覺中春已日長

睡起遣懷

百事不能能荷鋤不鋤菜畦鋤芋區身存那用十年
相破壤且為凶歲儲百事不學學作詩不作白紵作
竹枝黃陵廟前風浪惡青衣渡口行人悲老病閉門
常憤憤芋不復鋤詩亦廢客來剝啄喚不磨一味人
間占閑退今朝一日三倒床歎息春晝如年長摩挲
困睫喜湯熱小瓶自拆山茶香

春晴

柳未吹絲筍未抽春郊風日正清柔疎疎簾影供高
臥曼曼與竿懶出遊無客共謀良夜醉有花空動故
年愁雲生祇恐還成雨自向園頭聽鶉鳩

書感

鴨子波頭看水生蜂兒園裏按歌聲天公用意誰能
測未許吾曹醉太平

野興

莽莽寬野間悠悠曠達身氣從林下吐言向醉中真
社稷元當壽江鷗豈易馴興來無遠近隨處岸綸巾

野步

堤上淡黃柳水中花白鵝詩情隨處有此地得偏多
又

稽山

我識康廬面亦撫終南背平生愛山心於此可無悔
晚歸古會稽開門與山對奇峯縮髻鬢橫掃眉黛
豈亦念孤愁一日變萬態風月娛朝夕雲煙閱明晦
一洗故鄉悲更益吾廬愛東偏得山多寢食鮮不在

寧無度世人談笑見英概御風倘可留為我傾玉壺
緋桃開小酌

緋桃開小酌

我廬城南村家無十金產種花雖歷歲名品終有限
頗欲及暇時著譜書之簡今朝緋桃開歡喜洗酒瓊
鄰翁亦喜事為我一笑莞但恨首藉盤蔬薄欠佳饌
往來見已熟勸揖忘媿報一事粗可言似具識花眼

夜中獨步

春半寒初退更闌睡不成寒裳偶獨起曳履得徐行
月上鳥未宿水深鼃亂鳴踟躕忽已久殘漏下高城
春寒復作

春寒復作

春寒已解忽復作病思不堪當語誰青燈煖煖耿欲
滅殘雨滴滴休無期故人已死夢中見壯志未忘心
自知青絲玉井聲輕轆又是窗白鴉鳴時

大雨排悶

地潤礎流水氣蒸人脫裘前知暴雨至孰解老農憂
又

又

三日斷行路東新無處求床頭周易在且復送悠悠
室中屏去長物戲作
久從昭代乞殘骸荷鍤隨行偶未種四壁盡空君勿
怪纔留一物即關懷

對酒

酒非攻愁具本賴以適意如接名勝遊所挹在風味
庸子墮世紛但欲斬一醉麴生絕俗人笑汝非真契

曝舊畫

故篋開緘一愴情斷縑殘幅尚知名翻翻戲鶴如相
語洵洵驚濤覺有聲柳暗正當煙未斂花穠仍值雨
初晴百年手澤存無幾蟲蠹塵侵祇涕橫

予以淳熙戊戌歲自蜀歸時年五十四今三十

有二年矣猶復強健得小詩自賀

入玉門關到酒泉昔人想望若登天豈知萬里西征

客歸臥家山三十年

花下小酌

柳色初深燕子回，猩紅千點海棠開。
鯨魚蕪菜隨宜具，也是花前一醉來。

又

雲開太華插遙空，我是山中採藥翁。
何日胡塵掃除盡，數數溪道上醉春風。

夜酌

我有一瓢酒，與君今夕同。
鳴簷社公雨捲夜沛歌風，
閱世花開落，觀身却壞空。
北邙丘壠盡，太息幾英雄。

數日不作詩

吾詩鬱不發，孤寂奈愁何。
偶爾得一語，快如疏九河。
黃流舞浩蕩，白雨助滂沱。
門外無來客，花前自浩歌。

幽居示客

嗜睡疎茶盃，逢春愛麴車。
聊將枕流耳，靜聽屬私蛙。
林下閑成癖，人間懶莫加。
孫登欲長嘯，四座且無譁。

又

齒髮雖俱弊，神明尚有餘。
幽扉鍊奇藥，細字錄仙書。
野水鳴苔徑，長松蔭草廬。
客來多謝病，深媿問何如。

春日登小臺西望

九十衰翁身尚健，流年過眼如奔電。
憶昔初來對行在，衫鬢青青接英彥。
中間亦嘗走梁益，萬里憑高望鄉縣。
散關驛近柳迎馬，駱谷雪深風裂面。
東歸却尋書生事，誤長諸儒集賢院。
乞身七年罪未除，君恩尚許寬嚴謹。
癡頑亦復病不死，春到故園家釀美。
雨餘草長四野青，日落煙生半山紫。

醉賦

我疾多自愈，初非遇奇方。
我生固多難，欲慮忽已忘。
頽然亂書中，不知歲月忙。
有時或得意，災冷不暇嘗。
乃今又大悟，萬事付一觴。
書中友王績，堂上祠杜康。

即事

我本區中士，偶來湖上居。
時尋一枕夢，閑展數行書。
得醉常歡甚，無炊亦晏如。
今朝好天氣，一笑命柴車。

落花

山杏溪桃次第開，狂風正用此時來。
未妨老子凭欄興，滿地殘紅點綠苔。

春日

春來日日困春醒，徂歲如馳得我驚。
山寺餽茶知穀雨，人家插柳記清明。
登階勃窣長難老，侵路縱橫野草生。
堪數筋骸猶健在，強隨丁壯事深耕。

戲詠園中春草

離離幽草自成叢，過眼兒童採擷空。
不知馬蘭入晨俎，何似燕麥搖春風。

童子爭尋鶉鴝飯，醫翁日曝蝦蟆衣。
欲賡楚客詠，殮菊却媿周人歌。
采薇

二月二十四日夜大風異常

天青無雲星錯落，大風忽自西南作。
壽藤老木不自全，門外豈容存略約。
翁媪驚呼兒女泣，屋瓦飛空吁可愕。
巢傾共閃烏鶻死，空黑還疑鬼神惡。
南鄰僅有瓜牛廬，轉盼卷去無遺餘。
腐儒自笑獨耐事，一燈熒熒猶讀書。

兩夜與隣翁飲用前輩韻

老人閱世真悠哉，八十已過九十來。
茆檐參差映煙樹，蕭條雞犬三家聚。
一樽鄰翁送賓主，醉語豈憂多謬誤。
我作吳歌君起舞，舞夜雨莫辭泥沒屨。

雜感

壯遊回首海茫茫，默數方驚歲月長。
舊事莫論齊柏嶺，殘軀方似魯靈光。

又

天際晴雲舒復卷，庭中風絮去還來。
人生自在常如此，何事能妨笑口開。

又

射的山前花柳新，典衣買酒過殘春。
但甘身作曾等伍，莫信人間髯絕倫。

禍福雖云不可猜人生要豈願爲才鬻體正使非王樂儀象何疑是木災

讀史

蕭相守關成漢業穆之一死宋班師赫連拓跋非難取天意從來未易知

又

顏良文醜知何益關羽張飛死何傷等是人間號驍將太山寧比一毫芒

出遊

社近頻逢雨春深却喜晴畚煙傍山起神鼓隔林鳴客駐觀農鋤兒歸遺母羹豐年多樂事何以報時平

又

綠樹魚鹽市青蕪雉兔場采桑村女集入學幼童忙戶賽祈蠶願家藏問孝章村坊多美酒爛醉答年光

夜興戲作

遙夜寂無譁江城鼓屢揭傍牆行蹀躞脫帽髮鬢影詩和玲瓏韻燈開頃刻花會心有佳處不寐到啼鴉

酒熟書喜

小槽春夜壓春醪天與龜堂慰作勞喜似繫囚聞縱釋快如苛糴得爬搔未陳尊杓心先醉傍晚江山氣已豪久厭羶葷愁下筋眼明湖上得雙螯

湖上

寒食初過穀雨前輕衫短帽影翩翩獨轆碾破新堤路雙犁犁殘古廟孺萬事不禁劉毅擲諸人誰著祖

生鞭市墟處處誇新釀且就花陰一醉眠

春晚

落絮飛花又滿城年光大半付春醒蹇驢閑後詩情減陣馬拋來醉肉生少日雕蟲真小技莫年畫餅更

虛名囊中幸有黃庭在安得高人與細評

食酪

南烹北饌妾相高常笑紛紛兒女曹未必鱸魚莖菹菜便勝羊酪薦櫻桃

六言
愛馬能成一癖結髦可忘百憂我亦時時自笑開編萬事俱休

又

遇合生封萬戶阨窮不值一錢此是由來事爾正須到處欣然

又

豪士以妾換馬畊農賣劍買牛我看浮雲似夢却貪山水閑遊

又

風細飛花相逐林深啼鳥移時客至旋開新茗僧歸未拾殘棋

又

覓飽如籌大事擁書似墮重圍誤喜敲門客至出看啄木驚飛

又

香煙觸簾不散燈焰無風自搖獨倚蒲團寂寂忽聞山雨蕭蕭

書意示子孫

我閱人間久深知理惡盈孳孳訓來裔董董作儒生仕勿卑曹掾書纔記姓名茆茨不啻足此外盡浮榮

莫春龜堂卽事

風日和晝漏長蕭然巾屨集茆堂雨餘千疊莫山綠花落一溪春水香斷簡檣中塵委積故人墓上草荒涼爾來幸有寬懷處病退牀頭減藥囊

又

躑躅花開照眼明緩扶藤杖繞廊行流年又見一春過苦雨略無三日晴覓句未應妨熟睡漱泉聊足解

餘醒鹿麝雉子常追逐誰識山翁及物情

又

日月無根去若馳故園又見落花時盃中綠酒不肯飲鏡裏蒼顏應自知千丈新堤湖水滿五更殘漏角

聲悲莫年父子難乖隔淮蒲書來苦覺遲

又

東皇促駕又天涯一片難尋墮地花瘦策穿林數新
筍素屏圍枕聽鳴蛙蠶房已裏清明種茶戶初收穀
雨芽欲把一盃壺已罄謾搜詩句答年華

莫辭酒

勸君莫辭酒酒能解君愁勸君勤采藥藥可使疾瘳
此外莫廢書書亦豈君誤古來敗人事正以不學故
愁去疾亦平便腹如瓠壺努力貯萬卷無此令君愚
懷友

酒家旗下分攜久山驛燈前感慨頻人事已隨雙鬢
改柳條又見一年新

蘭亭道上

湖上青山古會稽斷雲漠漠雨淒淒籃輿晚過偏門
市滿路春泥聞竹雞

又

蘭亭步口水如天茶市紛紛趁雨前烏笠遊僧雲際
去白衣醉叟道傍眠

又

陌上行歌日正長吳鸞捉績麥登場蘭亭酒笑逢人
醉花塢茶新滿市香蘭亭官帖名也花塢茶名

又

箭箠弓殺小獵回壯心自笑未低摧前身家近盤閩
路曾看吳王射雉來

殘年

殘年光景易駸駸屏迹江村不厭深新麥熟時蠶上
簇晚鶯啼處柳成陰短檠已負觀書眼孤劍空懷許
國心惟有雲山差可樂杖藜誰與伴幽尋

春老

春色垂垂老山家處處忙園丁賣菰白蠶妾采桑黃
候雨占秧信催兒築麥場醉眠官道上人為護牛羊
睡起

睡起披衣弄素琴房櫳槐柳綠成陰春殘鴨鴨如多
恨雨惡醱醱欲不禁羸病強行常蹉跎躑躅多慮每
噫嗔行年九十猶賒死誰測高高厚厚心

自規

立志當如塞決河犀編鐵硯未為過文難稱意古所
恨學不盡才今亦多四海交朋常隔關一生光景易
蹉跎老年尚欲鞭吾後太息無人為詆訶

夜聞雷雨大作

暗空霧雨無時已卷地風雷却是晴九十老翁更事
久寄言兒女不須驚

劍南詩稿卷第八十一終

劍南詩稿目錄
卷第八十二

賞小園牡丹有感 山居 閒詠五首 讀樂
天詩 讀許渾詩 時鳥 齒髮歎 送春
初夏二首 初夏卽事 古壽人至聞五郎頗
有老態作長句自遣 郊行 小園 初夏雜
興五首 思子處 偶思蜀道有賦 書意
贈倪道士二首 哭李孟達 送黃文叔守福
州 初夏雜詠五首 卽事 漁扉 山行見
三十年前題名悵然有賦 山房 縱筆四首
窗下戲詠三首 埭西小聚 老歎 衰甚
書感 山行過僧菴不入 山行 夜窗 送
邢芻甫入閩二首 從邢芻甫求桃竹拄杖
老雞 還東 行東山下至南巖 書幸 放
言 晚步門外 夏夜 甕池 種菜四首
白首 東窗遣興三首 北窗 小酌 夏日
十二首 睡起 雨中作 感物二首 舟中有
賦 晨起獨行綠陰間 獨至澗菴避暑菴在
大竹林中二首 短歌行 山寺 明日復欲
出遊而雨再用前韻 暇日登東岡 暴雨
幽事二首

劍南詩稿卷第八十二

宋陸游務觀

賞山園牡丹有感

維陽牡丹面徑尺，鄰時牡丹高丈餘。世閒尤物有如此，恨我總角東吳居。俗人用意苦侷促，目所未見輒謂無。周漢故都亦豈遠，安得尺箠驅羣胡。山陰距長安三千七百里，距維陽二千八百九十里。

山居

平生絕愛山居樂，老去初心亦漸償。直道本知天可恃，曠懷真與世相忘。徑穿脩竹衣巾爽，盤設靈苗匕箸香。但恨相逢無魯叟，浩歌小試接輿狂。

閑詠

蕭蕭華髮映烏巾，五十年前故史臣。正使老來無老伴，未妨閑處作閑人。按行池水知增耗，點檢庭花見故新。更有菴中策勛事，投床鼻息聒比鄰。

又

事業無聞負聖時，滄波自照角巾欹。養成林下無窮賴，占盡人間徹底癡。小麥繞村苗鬱鬱，柔桑滿陌樹纍纍。醫翁箬叟真堪友，搜索殘尊與共持。

又

謝事歸來一把茅，村深樵牧日論交。未言客路塵衣化，最恨書窗鐵硯凹。戀戀故袍誰復念，便便癡腹敢辭嘲。卜居雖僻吾猶悟，失却岷山理鶴巢。

又

白頭羈客更堪論，身寄城南桑竹村。一榻琴書春寂寂，四山霧雨晝昏昏。常情共笑門庭冷，好事虛推輩行尊。燒筍炊粳真過足，兒曹不用致魚飧。

又

危途九折浩無津，晚幸收身作散人。俸祿既空憂患少，酒穀雖薄笑歌頻。多添布褐方知老，淨掃茆衡不

覺貧南陌東阡元在望，柴車懶駕動經旬。讀樂天詩

放姬鬻駱初何有，常笑香山恨不據。輸與此翁容易死，一身之外更無餘。

讀許渾詩渾居丹陽丁卯橋其詩丁卯集

裴相功名冠四朝，許渾身世落漁樵。若論風月江山主，丁卯橋應勝午橋。

時鳥

日出鳴布穀，月落鳴子規。一氣之所感，彼亦不自知。架壑最晚至，適當農事時。丁壯戴星出，力作孰敢遲。鳴者既有警，聞者得以思。乃知失時輩，強聒終何為。百舌亦能言，今默乃其宜。我作時鳥篇，用繼幽人詩。

齒髮歎

樂天悲脫髮退之歎墮齒，吾年垂九十此事已晚矣。髮脫妨危冠，齒墮廢大嚼。晨興對清鏡，何以慰寂莫。造物本無心，豈欲使汝衰。曷不望長空，兩曜無停時。

送春

新葉張翠幄，落花作紅茵。山蔬旨且柔，家釀清而淳。以我垂老境，送此將歸春。我固惜流年，春亦記陳人。江山處處佳，風月日日新。蹇驢度松岡，短檝橫煙津。蘭亭人已遠，遺韻猶清真。却下木柵市，天風吹角巾。

初夏

新綠陰中燕子飛，數家煙火自相依。童誇犢健浮溪過，婦閔蠶飢負葉歸。地煖小畦花永長，泥融幽徑藥苗肥。却居樂事何勝數，一醉旗亭又典衣。

又

江鄉初夏暑猶輕，霽日園林有晚鶯。聊置尊罍師北海，盡除屏障學東平。綠槐露溼單衣爽，紅藥風翻病眼明。每感流年成絕歎，白頭自笑未忘情。

初夏即事

夏景遽如許，先從草木知。朱櫻連蒂翦，紅藥帶花移。病起單衣怯，身閑晝漏遲。空齋無長事，簾影看參差。

古壽人至聞五郎頗有老態作長句自遣
齒落髮斑兒亦老志衰力惰我寧悲埋盆便可為池
看折竹何妨作馬騎點誦內篇莊叟語長歌半格白
公詩此身未死須安頓除却山村百不宜

郊行

春郊無處不堪行滿路人家笑語聲賣劍買牛知盜
息乞漿得酒喜時平西村日落川雲暝東嶺虹收海
氣清農事方興戒遊惰為君來往主齊盟

小園

小園草木手栽培表丈清池數尺臺拄杖倦時閑倚
壁芳醪熟後喜傳盃春蕪滿地鹿忘去夏木成陰鷺
自來堪笑山童慚飽食時時走報一花開

初夏雜興

隱趣與誰論深居湖上村避蘭寧改路惜筍不開園
庭草饒生意溪沙記漲痕愁來時淺酌隨事有雞豚
又

避寂諸緣息安貧百慮寬懶如常抱疾退似本無官
皎潔鶴翎扇嗟我龜屋冠何勞問唐舉徹屋是清寒

又

咄咄無窮事騰騰暫寓身月生知改朔花盡覺經春
市闕朝沽酒巫歌夜樂神興來隨衆出一笑不妨新
又

移花得微雨晒藥遇新晴悶裏家書到貧時糴價平
身方抱沉疾天乃相餘生莫恨村醪薄燈前與細傾

又

倦甚惟思睡閑來却要行疏泉入幽圃映樹現流鶯
藥品從僧問琴材就客評轉頭還一日正爾送餘生
思子虞

里埃迢迢阻問津年光冉冉苦催人未能免俗予嗟
老豈不懷歸汝念親家釀湖蕪誰共醉江雲淮月又

經春新詩題罷無從寄獨倚危闌一愴神
偶思蜀道有賦

天回驛畔江如染鳳集城邊柳似搓萬事已隨流水
去一尊將奈夕陽何是非無定言何益窮達徐觀得
孰多幸有漁蓑歸故里不妨高枕且酣歌
書意

養得山林氣麤全此懷無處不超然日長琴奕茆檐
下歲晚江湖箬帽前天上本令星主酒俗間妄謂世
無仙今年茶比常年早笑試西峯一掬泉今年清明前
數日山中已有新茶

贈倪道士

羽衣暫脫著戎衣坐定方驚語入微歸隱玉霄應不
出他年容我扣巖扉
又

我坐虛名剝得窮百年身墮畏途中看君一棹煙波
樂悔不常為采藥翁

哭李孟達

舊交多已謝明時孟達奇才最所思晚歲立朝雖小
試平生苦學竟誰知尊前一笑終無日地下相從却
有期慟絕痕門霜日莫短篇聊為寫餘悲

送黃文叔守福州

黃公天下士遇主紹熙年議論前修似聲名九牧傳
巨舟夷險濟拱壁始終全勇退先諸老榮歸總十連
旌旄照關路冠蓋盛離筵內閣恩光重宸毫墨色鮮
任方分斧鉞歸即珥貂蟬病叟難為別臨期一悵然
初夏雜詠

又

揮袖謝人間一窗如海寬鹿麕為老伴松屑當朝餐
自悟達生理儘容非意干却嫌孤寂甚支龜學燒丹
病退身仍健年侵趣更高芳醪溢蠻榼短褐束鄒緇
本不營三窟何由控一毫煙帆幾時掛長嘯破秋濤
又

屐路緣虛壁棋軒枕小難玄言不媿藉熟睡却輸博
咄咄書常懶便便腹本寬山園時節好杏子已微丹

又
去日驚鑽燧窮途困負薪故人天未遠薄俗眼邊新
躑躅飄零客悠悠臘長身寸心知已矣端欲爲誰陳

又
昔日江湖上飄然無定居頻傾京口酒亦食武昌魚
北首心空壯東歸憤不據豈知牙齒落送老一茆廬

卽事
萬里山河拱至尊羽林鐵騎若雲屯羣公先正不復
作故國世臣誰尚存河洛可令終左袵芻蕘何自達
脩門王師一日臨榆塞小醜黃頭豈足吞

漁扉
蜻蜓浦上一漁扉回首人間萬事非賣藥山城攜鶴
去看碑野寺策驢歸偶因束帶悲腰減常爲梳頭感
髮稀午睡定知無客攪曲肱閑看雨霏霏郊居遇雨作
則無客至

山行見三十年前題名悵然有賦
百年村落半丘墟垂老經過一柅車金石闕訛秦漢
舊謂秦始皇刻石及禹空上漢隸山川勝絕晉唐餘醉題墨
淡塵昏壁詩社人亡淚濺裾名宦半生成底事早時
恨不學犁鋤

山房
柴門不掩俗人稀成就山房一段奇木葉最宜新雨
後鳥聲更勝莫春時家貲屢罄綠鮑酒宿習猶存爲
愛詩別有一條差自慰木苗芎苗正離離

縱筆
兀兀一無爲冥冥百不知倦多惟嗜睡食晚遂忘飢
開卷渾如夢逢人不省誰何須見知識木石卽吾師

又
一點湛空明居然萬事輕菜元勝肉食車豈異徒行
幻境終何在金丹本自成信能如是解土苴亦長生
又
雜草除枯葉勞人亦動心無愁疎把酒習懶罷彈琴

又
濯垢臨溪水追涼就木陰常尋省力處外物孰能侵

又
夢事飽曾經靈臺了不驚寃親同一妄魔佛兩皆平
應物如風過投床卽鼾聲晨興拂几硯猶恨太勞生

窗下戲詠
飛來山鳥語惺惚却是幽人半睡中新竹成陰無彈
射不妨同享北窗風

又
三尺清池鏡面平翦刀葉底戲魚行吾曹安得如渠
樂傍渚跳波過此生

又
何處輕黃雙小蝶翩翩與我共徘徊綠陰芳草佳風
月不是花時也解來

隸西小聚
瓦盎盛蠶蛹沙耐煮麥人三家小聚落兩姓世婚姻
父老衣冠古閭閻風俗淳不應陶靖節獨號葛天民

老歎
步遲腰偃僂面瘦骨嶙嶙貧病消前業畊樵樂太平
有歌悲易水無酒醉湖城何許容身得門前釣艇橫

衰甚書感
髮殘不勝冠齒墮欲廢嚼譬如亭臯木秋至葉自落
豈惟形骸變意氣已非昨床隅倚拄杖壁上挂雙屨

經旬不出戶薄飯羹藜藿居然遠霜露因得養腰腳
年衰固應死延促未可度人之生實難壽終固爲樂

開卷思千載閱世等六博志士有蹈海儒生亦投閣
何如釀濁醪遇興時獨酌半酣望青天萬事付一噱

山行過僧菴不入
垣屋參差竹塢深舊題名處賴重尋茶壚煙起知高
興碁子聲疎識苦心淡日暉暉孤市散殘雲漠漠半
川陰長吟未斷清愁起已見橫林宿暮禽

山行
閑人日日得閑行況值今朝小雨晴水淺遊魚渾可

數山深蘂草半無名臨溪旋喚留船渡過寺初聞浴
鼓聲小醉未應風味減滿盤青杏伴朱櫻

夜窗

性中汝本具光明蔽障除時道自成手刈茆苦數椽
屋身鉏菜煮一盃羹天人送勝誰能測禍福無常不
待評惟有吾心終可恃夜窗袖手聽松聲

送邢芻甫入關

兩窮相值每相憐聞子南遊一愴然莫道此行非久
別衰翁何敢望明年

又

君行正及荔枝丹想見臨觴為破顏此外但宜烹茗
雪傷生不用擘壕山

從邢芻甫求桃竹拄杖

拄杖當年盛得名一枝尚覺百金輕老人不復須春
草只要攜渠處處行

老雞

老雞擁腫不良行將日猶能効一鳴確下糠粃幸不
乏何妨相倚過餘生

還東

還東寒暑幾推移漸近黃梅細雨時窗下興闌初掩
卷花前技癢又成詩囊錢不貯還成癖官事都捐未
免癡癡是病軀差勝舊一盃藜粥且扶衰

行東山下至南巖

穿林了不厭崎嶇邂逅幽懷得少據昔媿出山成小
草今知流水羨遊魚叻叻鹿隨輕策決決流泉入
野渠坐覺塵襟真一洗正如頭垢得爬梳

書辛

謀身從昔本迂疎豈料餘年却晏如盤箸無時闕鮭
菜道途隨事有舟車故衣已敝月三浣短髮雖殘日
一梳里巷浮沉亦何憾見賢猶及渡江初

放言

酒熟固可喜酒盡亦陶然有客則劇談無客枕書眠

飢啜羹不糝閑玩琴無絃捕嗅砌下花擲弄欄底泉
啄木抱蠹拊搏黍鳴桑顛欣然為一笑世故何足捐
無人罵鄭虔亦無嘲孝先回顧三角童吾與汝忘年

晚步門外

槐葉已成陰楸花亦離離日莫門無人迨我消搖時
左持漆園書右披栗里詩風從湖面來成此一役奇
石路雖甚狹雅稱拖筇杖少頃山月明照我角巾欹

夏夜

風便更漏明室虛蠶蚋靜筋骸日益衰厭事樂幽屏
清燈北窗下突兀寫孤影進學無新功賦詩聊自警

甕池

甕甕東階下澗澗一石水買魚畜其間鱖鯉三十尾
力微思及物為惠止於此無風水不搖得志魚自喜
涵泳藻與蒲永不畏刀几飯罷時來觀相娛從此始

種菜

菜把青青間藥苗豉香鹽白自烹調須臾徹案呼茶
碗盤箸何曾覺寂寥

又

老農飯粟出躬耕捫腹何殊享大烹吳地四時常足
菜一番過後一番生

又

白苣黃瓜上市稀盤中頓覺有光輝時清閨里俱安
業殊勝周人詠采薇

又

引水何妨執芥菘圃功自古補三農恨君不見岷山
芋藏蓄猶堪過歲凶

白首

白首歸來老故園索居情味更堪論關河悠邈夢魂
到親舊凋零書札存身病自憐詩思退家貧客笑酒
醅渾昏昏只欲投床睡兒勸孫扶強出門

東窗遣興

巷陌過從少園林景物新羣魚時戲藻馴雉每依人

映戶槐陰密堆盤麥餌珍殘春又陳迹撫事一傷神

又
中履長閑客簾櫳薄暑天巢空重乳燕葉密未鳴蟬
壺箭看多算圖書理斷編悠然已日夕却上采菱船

又
夏淺清陰滿村深白日長言多思寂默酒醒悔猖狂

老馬漫知路鈍雖寧出囊此翁真老矣懶放亦何傷

北窗
晏嬰長不滿五尺淳于飲能至一石老無功名未足
歎滑稽玩世亦非昔當年交友傾一時誰料蓬門今

寂寂陳山李石千載士早死當為天下惜斯文顯晦
端有命道悠運促非人力我今稽山一老農百歲不

死知何益後生可畏要有人誰能隱若一敵國狂言
勿發心自驚歸臥北窗還默默

小酌

偶向東園把一盃不辭團坐掃蒼苔野花經雨自開
落山鳥穿林時去來皂白正非天欲辨青黃要與木
為災今年秋後猶能健賸乞梅栽與李栽

夏日

暑雨初晴晝漏遲江鄉樂事有誰知村村墉麥登場

後戶戶吳蠶拆簇時

又
齒髮凋零奈爾何年光暗裏易消磨街槐正喜清陰
密巷柳還驚蠹葉多

又
竹根斷作眠雲枕木癭剝成貯酒尊怪怪奇奇非著
意自無俗物到山村

又
動身尚懶那堪事學古無成罷讀書枕上側眠聽語
燕池邊小立看遊魚

又
悶欲遠遊身苦懶病思閑語客誰過北窗一枕差堪

樂無奈茶盃作祟何

又
黃葛蚊廚睡欲成高槐陰轉暑風清倚床奴子垂頭
坐搖手孫兒小步行

又
斷取溪藤便作香煉成崖蜜旋煎湯蕭然巾履茅堂
上不畏人間夏日長

又
謝客捐書日日閑行穿密竹臥看山巖前恨欠煎茶
地安得芡茨一小間

又
蘋生洲渚微風起梅熟園林細雨來咫尺柴門常懶
出不教拄杖損蒼苔

又
側臥橫眠百不知軒窗寂寂雨絲絲豈無布襪青鞋
興過却梅天出未遲

又
幽花姪焙開還斂小蝶翩翩去復留貪睡畸翁俱不
領被人錯喚作閑愁

又
山下柴荆晝不開苔生古井暗楸槐新詩哦罷閑無
事移取藤床睡去來

又
不恨無人到野堂惟將美睡當年光風經荷葉翻翻
綠雨溼松枝細細香薄俗空成土龍笑長歌未盡接
興狂掬泉弄石儵然晚又得今年一夏涼

又
湖曲雨淒淒茆檐觸額低衡門元少客窮巷況多泥
解渴黃梁粥嘗新白苣齏吾生真自足不恨老鉏犁

又
物情豈類歲時道一氣潛移不自由日出鷓鴣還喚
雨夏初蟋蟀已吟秋今年四月聞蟋蟀鳴

又

小園清曉岸綸巾物態年光日日新綠葉自生黃自落不應秋至始愁人

舟中有賦

一枝柔艣聽吟啞炊稻來依野老家山寺日中齋鼓動江樓風急酒旗斜綠梢嫋嫋搖新竹翠蔓離離熟早瓜閑客去留隨所遇不知何處送棲鴉

晨起獨行綠陰間

楸槐陰裏漏朝暉芳草離離露漸稀不恨過時嘗煮酒且欣平日著生衣病逢鍼藥如差減貧比簞瓢尚庶幾惟是未能忘習氣亂書隨日又成圍

獨至蕪菴避暑菴在大竹林中

赤日黃塵厭垢紛竹林深處寄幽欣如聽嵩雒風前笛似看瀟湘雨後雲國鹿知時新解角池魚得意自成羣悠然一笑誰能識坐勝天魔百萬軍

又

世俗元非不汝忘汝歸安取醉為鄉藥苗野藪山家味栢子松房道室香一卷隱書為日課數聲啼鳥謝年光客來莫笑茆茨陋占盡炎天一味涼

短歌行

上樽不解散牢愁靈藥安能扶死病千鈞強弩無自射虛空六出奇計終難逃定命人生斯世無別巧要在遇物心不競憂忘寢食怒裂皆孰若憑高寄孤詠炎天一葛冬一裘藜羹飯糗勿豫謀耳邊閑事有何極正可付之風馬牛

山寺

路盡初逢寺行行獨叩扉民貧稀送供僧老少完衣日正樓鐘動溪深藥草肥吾衰亦久矣捨此欲嚙依

明日復欲出遊而雨再用前韻

小艇爭浮浦幽人獨倚扉新泥添燕壘細雨溼鸞衣甚紫桑新暗秧青水正肥欣然語鄰父投老得相依暇日登東岡

雙屨青芒滑輕衫白苧涼雲生半巖潤麝過一林香童子持碁局廚人饋粟聚歸來更清絕淡月滿林塘

暴雨

黑雲如龍爪白雨如博棋老屋處處漏此夕將何之豈惟移床避殆欲懸釜炊擾擾舍中人具食不以時兒女乃可憐赤腳啼午飢語兒姑少忍開霽會有期

幽事

衰翁喜幽事闔戶不升堂酒僅二蕉葉琴纔一履霜東坡自能飲三蕉葉范文正公酷好琴止彈履霜一曲時謂之范履霜好遊力不給愛客病相妨獨有詩情在年來亦漸忘

又

野館多幽事畸人無俗情靜分書句讀豆戲習酒章程藥楮藏難見棋枰算未成悠然寄孤歎吾豈固逃名

劍南詩稿卷第八十二終

劍南詩稿目錄

卷第八十三

病起雜言 雨後二首 示客 蒸海作雨排
悶 夏中雜興六首 卽事八首 夏日幽居

枕上 題望海亭亭在臥龍絕頂 露坐小
隱 小憩臥龍山亭 晚涼 夏日六言四首

招客看山 舟中作 清暑 五月下旬大
熱晦日夜得雨明日涼甚 黃氏冲和堂 暴

雨 書意三首 浴罷 水鄉泛舟二首 閒
詠 江樓夜望 連日作雨苦熱 門外追涼

夏夜泛溪至南莊復回湖桑歸 雨後殊有
秋意 寓規三首 新涼二首 追涼至安隱

寺前 湖上夜賦二首 書適 羸老 卽事
晚興 郊行 喜雨 劉道士贈小葫蘆四

首 自傲 雨中 書歎二首 題畫薄荷扇
二首 秋興四首 晝睡 得子虞濠上書

庭草 文章 秋日遺懷八首 自傲二首
生世 秋雨 思蜀 病思 術家言予今歲

畏四孟月而秋尤甚自初秋小疾屢作戲題長
句 秋夕書事二首 小疾三首 病中作

縱筆二首

劍南詩稿卷第八十三

宋陸游務觀

病起雜言

國不可以無菑昔身不可以無疾疾無菑之國亂或更速無疾之身死或無日昆夷獫狁無害於周之王闢土富國無救于隋之亡壯夫一臥多不起速死未必皆羸厄古來惡疾棄空谷往往更得度世方我年九十理不長況復三日病在床天公念之亦已至儼戒不使須臾忘起居飲食每自省常若嚴師畏友在我傍躋民仁壽則非職且為老僮鍼膏肓

雨後

小築濤江外微涼暑雨餘傾囊致歡伯信脚到華胥芳草翩翩蝶清池潑潑魚此翁雖耄矣作計未全疎

一夜茅簷雨晨興乃爾涼禽魚皆遂性草木自吹香微潤生琴薦纖塵避筆床悠然北窗興真欲傲羲皇

示客

久泛煙波不問津騰騰且復養吾真每持盃酒呼江月殊勝征衣化路塵半枕何人遊蟻垤立談為汝脫孤身挂帆莫恨瀟湘遠是處相逢一笑新

蒸溽作雨排悶

柱礎生微潤簾櫳轉薄陰蟻遷都邑改鳩逐怨恩深齒若新離水芭蕉半展心掩屏惟熟睡誰與續愁吟

夏中雜興

梳髮高春後投床甲夜初語難愁對客手倦怕催書美睡那思覺甘餐不願餘更應慚造化無事到幽居

又
小響風吹葉微痕雨點池興來閑弄笛客散自收棋忽忽尋殘夢時時足小詩出門俄已莫忘却野人期

出赴盟鷗社歸尋夢蝶床愚為度世術閑是養生方休歇書中癖消磨酒後狂遠遊亦已矣不復解輕裝

又

處世如灰冷持心似砥平盤殮無宿戒香火有常程樵父供藜杖陶人售瓦礫經旬常苦雨嘯傲送餘生

又

心慕羲農世躬行黃老言采椽聊築舍橫木即為門短髮冠龜屋空床枕竹根從來薄世味染指肯嘗龜

又

遺信邀隣父隨宜具小殮草燔豚肉美食壓酒醅渾易致商山皓難招楚澤魂嗟予亦衰矣心事與誰論

即事

翁自析薪兒負薪一生不似此年貧折除却得常強健天定方知果勝人

又

楸垂落索槐吐花溪女採蓮童抱瓜一年光景又將半愈老愈知生有涯

又

煙雨淒迷晚不收疎簾曲几寄悠悠一雙蚊蝶來何許點盡青青百草頭

又

生來骨相本酸寒天遣沙頭把釣竿但稱山人擺耳帽敢希楚客切雲冠

又

魚鱗羣出天將雨龜龜爭鳴草滿庭莫道歸休便無事時時襪襪伴園丁

又

幽鳥飛鳴翠木陰小魚游泳綠波心滿前好句無人領堪笑寒窗費苦吟

又

小閣憑欄望遠空天河橫貫斗牛中他年鼓角榆關路馬上遙看與此同

又

幽鳥呼人出睡鄉層層露葉漏朝陽臨池只欲消殘
醉無奈鵝兒似酒黃

夏日幽居

赤日黃塵一點無負山臨水是幽居爽如瑞露零仙
掌清似寒水貯玉壺孤艇過時驚宿鷺溼煙深處亂
風蒲條然欲棄人間去天際聯翩誰與俱

枕上

小疾知閑樂微涼與睡宜曹騰如欲覺展轉復多時
四壁人聲寂疎簾日影移詩囊與藥裹一步不相離

題望海亭亭在臥龍絕頂

瑞龍千丈何蜿蜒蒼鱗翠鬣翔江邊路逢鏡湖乃下
駐玩珠不去知何年七州元帥擁畫戟全家終日樓
居仙霜笳一曲入銀漢碧瓦萬疊浮嵐煙其間望海

最傑觀疎豁坐占蓬萊先風雲變化几席上蛟鼉出
沒闌干前手捫心房倚北斗眼中萬象俱森然尚書
喚客共領略遠坊十里聞管絃從容賦詩出妙思超
絕欲拍微之肩坐中有客垂九十追逐無路空自憐

夜闌客散公歸院笙歌隱隱在半天向來老客今何
處菱唱三更起釣艖

露坐小飲

寂寂柴門閉嫩苔門前有路走天台近秋河漢西南
落欲雨風雲東北來旋摘甘瓜青帶蔓新筠玉醴冷
傳盃亦知野外無供給且復相逢笑口開

小憩臥龍山亭

山高風浩浩堂豁海冥冥綠李分猿噉蒼苔墮鶴翎
松寒詩思健茶爽醉魂醒安得丹青手傳摹入素屏

晚涼

笛簟平鋪八尺床脫巾高臥對疎篁近村得雨知何
處此地無風亦自涼

夏日六言

退士自應客少幽居不厭椽低未說盤堆玉膾且看

白搗金蕖

又

醉面貪承夕露釣竿喜近秋風借問孤舟何處深入
芙蓉浦中

又

溪漲清風拂面月落繁星滿天數隻船橫浦口一聲
笛起山前

又

我是百年遺老掃空一夢浮名未到終南二華且入
天台四明

招客看山

今日清明宜看山約君來上釣魚船微雲點破尚堪
恨何況城中塵漲天

舟中作

平生剩有煙波興釣瀨時時小艇橫欲莫山光先慘
淡未秋河漢已分明捕魚時見連江網迎菽菘聞過
埭聲想得今宵清絕夢又攜猿鶴上青城

消暑

穿竹清我魂散髮吹我頂虛窗聽鳴蟬小檻看汲井
掃地長物空漱泉齒頰冷廚人具漿粉童子鬻山茗

微雲未必雨且喜收樹影殘書置不視樂此清晝永
既夕即榜舟門外綠千頃世事何足論平生慕箕穎

五月下旬大熱晦日夜得雨明日涼甚

一雨蕭然洗睡昏清晨屣履自開門豈惟爽氣生山
袂坐覺涼颼入髮根浦口魚多來野鶴林梢果熟下
山猿吾廬清絕君知否釣雪寒江不足言

黃氏冲和堂

冲和堂中和氣襲堆笏滿床羣從集宜州太史一紙
書百年筆墨猶山立使君所學何超然要是胸中不
負天王畿奉使纔廿日忠厚風流天下傳國家多事
民力困正要設施先百郡但令一念與天通河南南
陽亦可問

暴雨

蒼龍挂東南天矯擎萬仞雖然雜雲氣爪尾略可認
明日暴雨來繼以雷大震平地成江河吞卷纔一瞬
吾慮久傾壞不壓真董董所欣顛顛中一飽天不吝
餘功到場圃草木皆綠潤蕭然岸角巾三數撫庭楯

書意

策蹇若華駟歡滴如上尊人皆可堯舜身自有乾坤
逢客亦共語無人還閉門千年道術裂誰復見全渾

又

養生慕黃老為治法唐虞者壽緣憂懼危亡坐燕娛
大川宜利涉蔓草戒難圖退士惟身慮銘膺豈敢無

又

委順天知我經營鬼笑人定知窮至死敢恨病經旬
愛酒陶元亮還鄉賀季真扁舟吾事畢遺世亦遺身

浴罷

浴罷淡無事出門隨意行相如知渴減叔寶覺神清
新月參差影殘蟬斷續聲躊躇遠志去風露欲三更

水鄉泛舟

終朝流汗浹衣襟悵望何時枕算秋作雨未成徒益
熱舉盃不醉更添愁悲歌易水輕燕俠對泣新亭笑
楚囚別有生涯君會否煙波無際弄孤舟

又

赤日黃塵不自聊泛溪且用沃枯焦隔林犬吠村墟
近掠面風來酒力消遠火微茫知夜績長歌斷續認
歸樵扁舟不盡凌風興却著青鞵踏野橋

閑詠

平生到處足間關天遣殘年樂故山社日連村饜酒
肉豐年無盜伏茆菅秋來梁燕將雛去雨過林鳩喚
婦還我亦葛衣新浴罷為君滿意說清閑

江樓夜望

江樓百尺倚高寒上盡危梯宇宙寬秋近漸看河落
角天回更覺斗闌干茫茫浦口煙帆遠坎坎城頭漏

鼓殘要得故人同躡屐一尊相屬話悲歡

連日作雨苦熱

天地一氣爾陰陽司閩開鬱蒸以為雨回薄以為雷
久鬱無所泄造化安在哉方其欲雨時雖天不能回
此豈降自天其實有自來所以屈宋輩千載有餘哀

門外追涼

羽扇綸巾一味涼曠懷非醉亦非狂橫林點點莫鴉
集平蕪離離新稻香山月出時閑弄影水風清處旋

移床學仙到此無餘說更覺金丹墮批糠

夏夜泛溪至南莊復回湖桑歸

不求奇骨可封侯但喜枯腸不貯愁數點殘燈沽酒
市一聲柔艣採菱舟元知澤國偏宜夜已就天公探

借秋歸過三更風露重紗巾剩覺髮颯颯

雨後殊有秋意

天地新秋入苦吟詩書萬古付孤斟愛君憂國孤臣
淚臨水登山節士心只數鼻端無妙斲豈知絃外有
遺音剡中勝踐今猶昔安得高人支道林

寓規

百疾皆有源雖愚猶自知惟其忽不念所以悔莫追
微隙為無傷一壞誰能支宴安比鳩毒先民不吾欺

又

分量各有窮升餽不受斗滿盈靡懷懼覆敗乃自取
衣笥無複禪食案有三韭貧狹雖可嗤比汝差耐久

又

人生孰無疾治疾惟欲瘳疾瘳藥不止乃有過劑憂
節食戒屬饜養氣常致柔金丹無此功往哉勤自修

新涼

儘道新涼好無如晝漏長奇文窺楚屈妙理玩蒙莊
靜臥貧猶樂高歌醒亦狂翩翩雙蝶子也似惜年光

又

月入楸梧徑風生蘆菽林脫巾涼入髮臨水爽披襟
寒暑推移久江湖感慨深功名雖已矣猶得寓孤吟

追涼至安隱寺前

枕石何妨更激流一涼之外豈他求寺樓無影月卓
午橋樹有聲風變秋殘曆半空心悄愴岸巾徐步髮
颯颯定知從此清宵夢常在沙邊伴白鷗

湖上夜賦

冉冉秋將至沉沉夜向晨河隨天漸轉露洗月如新
瘦竹過眉杖輕紗折角巾漁歌四面起煙水浩無津
又

書適

萬事罷經營悠然心太平甘餐隨日足美睡等閑成
處處佳風月人人好弟兄神仙不須學券內有長生
羸老

即事

羸老幸未死敢嗟生理微牛閑牧童臥犬吠市船歸
月落見收網燈青聞踏機時時語鄰里井臼幸相依
臯夔無近用芝朮少奇功上壽當徐致沉疴忌力攻
醫傳三世久事歷百年中畏與庸人說終身托病軀
晚興

並簷幽鳥語瓊瓏一榻蕭然四面風客散茶甘留舌
本睡餘書味在胸中浮雲變態吾何與腐骨成塵論
自公剩欲與君談此事少須明月出溪東

郊行

凄風吹雨過江城緩策羸驂並水行古路初驚秋葉
墮荒郊已放候虫鳴壯心耿耿人誰識往事悠悠恨
未平斜日半竿羌笛怨西陵寂寞又潮生

喜雨

雨氣侵人暮不休雨聲逼枕冷颼颼方欣草木有生
意已報溝池無涸流避溼入簷憐病鶴爭巢逐婦歎
鳴鳩老農自喜知時節夜半呼兒起飯牛

劉道士贈小葫蘆

葫蘆雖小藏天地伴我雲山萬里身收起鬼神窺不
見用時能與物為春

又
貴人玉帶佩金魚憂畏何曾頃刻無色似栗黃形似
繭恨渠不識小葫蘆

又
短袍楚製未為非況得藥瓢相發揮行過山村傾社
看絕勝小劍壓戎衣

又
箇中一物著不得建立森然却有餘盡底語君君豈
信試來跳入看何如

自做
學當盡力去浮華從事文辭但可嗟造道淺深看應
物修身勤情驗齊家

雨中
孤村風雨連三日秋暑如焚一洗空睡覺房櫳燈漸
暗却尋殘夢雨聲中

書歎
遺蝗出境樂秋成多稼登場喜雨晴暗笑衰翁不解
事猶懷萬里玉關情

又
兩夜孤舟宿鏡湖秋聲蕭瑟滿菰蒲書生有淚無揮
處尋見祥符九域圖祥符中曾詔王曾等修九域圖

題畫薄荷扇
薄荷花開蝶翅翻風枝露葉弄秋妍自憐不及狸奴
點爛醉籬邊不用錢

又
一枝香草出幽叢雙蝶飛飛戲晚風莫恨村居相識
晚知名元向楚辭中

秋興
誰敢輕他萬戶侯一生賦分在滄洲屋穿沉值雨騎
月俗謂二十四五間雨為騎月兩主霖霖不止路惡更堪風打

頭此世極知同逆旅吾身亦自是懸疣乞錢買取青
芋屢爛醉三條二華秋

又

飲盡殘雲見夕陽門前穉穉漸登場經年都得幾回
醉一雨頓驚如許涼耐事尚能心似鐵放歌仍忘髮
成霜頭生底用從人問此是山翁肘後方

又

五十年來住鏡湖白頭仍是一臞儒朝眠每恨妨書
課秋穫先令入酒通江路伶俜形吊影草菴寂默我
忘吾兩窗忽有高談興簪叟醫翁亦可呼

又

世事何曾挂齒牙只將放浪作生涯有時搦米引馴
鹿到處入林求野花鄰父築場收早稼溪姑負籠賣
秋茶等閑一日還過却又倚柴扉數莫鴉

晝睡

體中小不佳惟睡可以休睡美自成夢去爲萬里遊
萬里遊尚可乃復有得喪漂搖一葉舟掀舞千重浪
午雞忽驚起向夢安在哉童子解原夢篝火茶具茶盃

得子虞濠上書

日莫坐柴門懷抱方煩紆鈴聲從西來忽得濠州書
開緘讀未半喜極涕泗俱父子老惜別況經患難餘
羈旅易生疾霜露行載塗思歸雖甚苦且復忍須臾
時濠州軍亂子處適來攝通判身率將士力戰平之

庭草

階前西風搖百草鬱鬱逢秋殊未槁雪霜要當次第
來恰似人生怕衰老百草榮悴則有時人於養生當
自知金丹九轉儻未辦簡斂冲默真吾師攝調小失
豈遽死二豎眉端先溢喜但令神氣常守形莫畏夢
中呼起起

文章

文章本天成妙手偶得之粹然無疵瑕豈復須人爲
君看古彝器巧拙兩無施漢最近先秦固已殊淳漓

胡部何爲者豪竹雜哀絲后夔不復作千載誰與期
秋日遣懷

又

離離上藥苗鬱鬱靈芝榮我昔逢異人瑣細皆能名
擊石以取火薪桂持煎烹五雲夜覆鼎談笑得長生
胸中何所有世界如河沙區區吞雲夢何至爲客誇

又

初見賣苑冰青門已無瓜天河正不遠秋風乘客槎
西來浮濤江東眺俯鏡湖其中縣千里鬱鬱桑麻區
禹葬有遺窆粵亡無故墟秋風吹短褐望古空躊躇

又

野風聲如潮溪水色可染浮雲時翳日亦作雨數點
行歌雖放浪未至越繩檢蕭然茅三間送老此山崦
秋夜坐東窗殘雨時一滴四壁無人聲心境兩虛寂
吾方遊物初超然謝形役一毫儻未盡何往非勅敵

又

自我歸故山不知歲月徂念雖迫霜露憂國猶區區
老不能上疏泰階陳六符安得子元子同歌于爲于

又

今年秋氣早風露應時令晨起換熟衣殘暑已退聽
松聲滿庭戶蕭然失衰病人衆何足言天固不可勝
晨几手作墨午窗身禮茶豈惟要小勞亦以禦百邪

又

兒童不解此傾心逐紛華君看如山禍萌在一念差
自傲
惡石從來豈汝仇安居無患却堪憂不須更守庚申
夜留取三彭傲情偷

又

世事如雲日日新瓦盆黍酒却關身細思只有窮居
好寄語玄翁莫逐貧
生世

乾坤成毀由來事，生世真同黍一炊。嗟我已過三萬日，餘年有幾自應知。

秋雨

山深草木久已荒，晝昏風雨殊未止。看書不覺向壁臥，煎茶欲罷推枕起。清心正付竹籬香，漱齒每挹巖泉水。與世不諧元有命，閉門自適差可喜。少年癡絕晚乃悟，束縛珠襦均一死。悠然袖手倚蒲團，洗盡玉關心萬里。

思蜀

西遊陳迹浩無窮，回首真同一夢中。柳拂驛牆思鳳集，鼓喧市里憶蠶叢。故人丘壟秋蕪碧，舊隱園林夕照紅。自閔未能忘感慨，浩歌彈劍送飛鴻。

病思

短髮蕭蕭不滿簪，更堪衰疾日侵尋。數匙淡飯支殘息，一篆清香印本心。小徑古苔遺鶴毳，空堂壞甃有蟲吟。悠然更起扁舟興，秋水門前五尺深。

術家言子今歲異，四孟月而秋尤甚。自初秋小疾屢作，戲題長句。

一生強半臥窮閭，糲飯藜羹似蜜甜。老齒覺衰嗟已晚，孟秋屬疾信如占。危途本自難安步，惡石何妨更痛砭。堅忍莫為秋雨歎，牽蘿猶足補茅苫。

秋夕書事

垂老雖堪歎為謀，亦未疎悶賒鄰巷。酒閑讀後身書大，嚼寧須肉徐行可。當車秋來歡喜事，菽粟有新儲。

又

點點秋燈晚，翻翻宿鳥還。雨添羈枕睡，書伴小窗閑。僧閣荒寒外，漁村縹緲間。畫工今代少，誰為寫家山。

小疾

小疾有根柢，忽之當日深。養苗先去草，省事在清心。蟻夢能看破，狐妖可坐擒。一盃藜粥罷，聽雨擁秋衾。

又

老不禁當病，經旬臥一床。亦知非疥癬，幸未至膏肓。

水落灘初出，秋深草漸黃。非關畏人事，晚歲合深藏。

又

避人便小疾，省事喜閑身。並海魚鹽聚，入秋風雨頻。元知器苦窳，空有胆輪囷。轉斂聊同飽，知君不笑貧。此事明明在，默存一身元。有一乾坤不憂豎子居，有上已見真人出面門。力守誰能發底火，深潛自足美靈根。用功若到無功處，千載乘雲不足言。

縱筆

天下本無事，吾生行且休。關心惟酒盞，入眼獨漁舟。雁過三湘曉，雲開二華秋。慙勤驛樓柱，小草記曾遊。

又

相馬失之瘦，知人良獨難。雖居環堵室，未廢切雲冠。莫雨潼關暗，秋風渭水寒。深蕪埋壯士，千古為悲歡。

劍南詩稿卷第八十三終

劍南詩稿目錄
卷第八十四

自立秋前病過白露猶未平遺懷二首 聖門

書齋壁 病後小健戲題 新晴 夢中作

二首 疾小愈縱筆作短章 病少愈偶作二首

書生 古驛 夜讀劉伯倫傳戲作 湖上

晚望 村居即事三首 夜興 夢華山 寓

歎四首 嘉定己巳立秋得膈上疾近寒露乃

小愈十二首 病中臥聞春聲二首 病小減

復作三首 病思六首 病中自遣三首 八

月二十三夜夢中作 病少間作 秋晚幽居

病中思出遊 九月初作 四日夜雞未鳴

起作 臥病雜題五首 讀華陀傳 家山

九月十一日疾小間夜賦二首 一病七十日

西郊 蔬食 乙巳秋莫獨酌四首 秋晚

病中遺懷六首 六言二首 野興 遠遊

反遠遊 病著 梅市 梅市書事 病減

幽居即事二首 羸疾 九月二十五日雞

鳴前起待日 秋夕排悶十韻 宴坐二首

小室 舟次浦口 開爐 散懷二首

劍南詩稿卷第八十四

宋陸游務觀

自立秋前病過白露猶未平遣懷

門冷荒車轍囊空別醉鄉懶行眠亦好倦話默何傷
野叟占幽夢山僧送秘方病懷雖忽忽隨事答年光

又

飢能堅志節病可養精神不動成羸臥微勞學鳥伸
功名知幻境憂患笑前身藥裹吾何厭秋燈作夢新

聖門

聖門妙處不容思千古茫茫欲語誰
髮庭中新沐後舞雩沂上詠歸時
研求豈足窺微指博約何由遇
碩師小疾掃空身尚健蓬窗更作數年期

書齋壁

幅巾短褐野人裝洗盡黃塵早莫忙地僻漁扉常隱
翳身閑靈府自清涼雨中鬱鬱垣衣綠澗底纖纖石
髮長老憊只思眠踞壁一尊到手又成狂

病後小健戲題

行年九十未龍鍾慚愧天公久見容
醉解病人詩解瘦不如世世作春農

新晴

雨葉玲瓏曉日明經旬風雨得初晴
敬眠歇盡人間念時聽幽禽一兩聲

夢中作

征途遇秋雨數士集郵亭酒拆官壺綠
山圍草市青劇談猶激烈瘦影各伶俜
四海皆兄弟悠然共醉醒

又

一客若蜀士相逢意氣豪偶談唐夾寨
遂及楚城隍二者皆所論事頓洗風塵
惡都忘筆耨勞蟬嘶笑餘子

辛芒學離騷

疾小愈縱筆作短章

治疾如治盜要使復其常藉曰用戈矛全之寧欲傷
彼盜皆吾民初非若胡羗奈何一朝忿直欲事歐攘
歐攘雖快心少忍理則長華陀古神醫煎沉到肺腸
取効雖卓犖去死真毫芒君審欲除盜惟當法龔黃
撫摩倘有道四境皆耕桑我亦以治疾不減玉函方
病少愈偶作

蕭條白髮臥蓬廬虛讀人間萬卷書
遇事始知聞道晚抱病方悔養生疎
高門赫赫何關我薄俗紛紛莫問渠
羸疾少蘇思一出夕陽門巷駕柴車

又

病入秋來不可當便從此逝亦何傷
百錢布被斂首足三寸桐棺埋澗崗
但恨著書終草草不嫌徂歲去堂堂
今朝生意纔絲髮便擬街頭醉放狂

書生

書生事業苦難成點檢常憂害至成
夢寐未能除小忿文辭猶欲事虛名
聖言甚遠當深考古義雖聞要力行
漢世陋儒吾所斥若為青紫勝歸耕

古驛

古驛橋邊艇子橫每因羈旅愜幽情
窗間月落無花影枕上潮來有鶻聲
舊友凋零歸夢想新詩邂逅得天成
今朝有喜君知否秋雨晴時小疾平

夜讀劉伯倫傳戲作

生本無心死可知徐徐掩骨未為遲
一奴僅可供薪水那得閒人荷鋤隨

湖上晚望

閑人無處破除閑待得漁舟一一還
峯頂夕陽煙際水分明六幅巨然山

村居即事

西成東作常無事婦盥夫晁萬里同
但願清平好官府眼中歷歷見幽風

又

炊甑生塵榻長苔柴門日晏未曾開
載醪問字今牢

落猶有鄰翁裹飯來

又

長笛圓聲曲調新東家西舍送迎神不因豐歲人情樂
淡殺溪頭老病人

夜興

夜闌扶策繞中庭雲罅三三兩兩星安得南風卷雲

盡爛然河白映天青

夢華山

路入河潼喜著鞭華山忽到帽帶邊洗頭盆上雲生
壁腰帶鞋前月滿川丹竈故基誰復識白驢遺跡但
相傳夢魂妄想君無笑尚擬今生得地仙

寓歎

窮居詰世故了了不如昏萬事慵挂眼終年思杜門
雲閑志出岫葉落喜歸根熟計惟當醉單論社食渾

又

小隱終非隱休官尚是官早知農圃樂不見道途難
故國雞豚社貧家菽水歡至今清夜夢猶覺畏濤瀾

又

事外癡頑老人中曠長身開顏時積酒閉口不言貧
淡話常終夕閑遊動歷旬漁翁偶相遇疑是武陵人

又

老閱市朝久紛紛長厭看人紆綬紫艾家擁轂朱丹
不羨官曹熱惟憐眼境寒東塗與西抹感舊一長歎

嘉定己巳立秋得膈上疾近寒露乃小愈

獨立溪橋看落暉殘蕪漠漠蝶飛飛從來澤國秋常
晚歎息衰翁已衲衣

又

今年病老遂難禁一豎奔逃豈易尋風雨三更僮僕
睡自持殘燭檢千金

又

窮銷壯歲功名志病過新秋賞詠時自古世間如意
少天公寧肯為君私

又

小詩苦思憑誰賞綠酒盈尊每獨傾老境情踪例如
此不須惆悵感餘生

又

一枕鳥聲殘曉夢半窗竹影弄新晴屏深室煖秋垂
老粥美蔬香疾漸平

又

半飢半飽隨時過無客無書盡日閑童子貪眠呼不
省狸奴戀煖去仍還

又

粥香可愛貧方覺睡味無窮老始知要識放翁真受
用大冠長劍只成癡

又

小詩閑淡如秋水病後殊勝未病時自翦矮牋騰斷
稿不嫌墨淺字傾欹

又

八月吳中風露秋子鵝可炙酒新篘老人病愈鄉閭
喜處處邀迎共獻酬

又

清泉白米山家有鹽酪猶從小市求寸步須扶本常
事細書妨讀却閑愁

又

束書不觀萬事休誰令識字惹閑愁胸中作祟如何
物不是當年老督郵

又

客疾無根莫浪憂今朝掃盡不容留飯囊酒盞非吾
事只貯千巖萬壑秋

病中臥聞春聲

丘嫂羹存先戛釜山僧齋竟始鳴鐘孰知造物獨憐
我一日未嘗無夕春

又

妄想說梅猶止渴真聞春米固忘飢未論炊熟香生

甌已覺抄來雪滿匙

病小減復作

一身真臘長兩月抱沉縣吟作楚人語聳成山字肩
災從季主卜藥欠宋清錢彌老彌堪笑藜羹且信緣

又

衛養元無術衰殘只自悲扶行十步地強坐一炊時

枕籍漆園語呻吟栗里詩災年未易過那敢望期頤
卜者言今秋來春皆災過此壽未艾

又

晨粥半茶碗秋衣一布裘酒惟詩裏見山向夢中游

卜繇兒能測藥方僧為求重陽無半月尚泥菊花不
病思

又

水碓春粳滑勝珠地爐燔芋軟如酥老來自愛盤殮
美安得高人共破除

又

殺物求君舌本肥是非豈復待深思即今不足何時

足小甌香粳日兩炊

又

江上秋風蘆荻聲魚蝦日日厭煎烹病來作意停鮮
食留得青錢買放生

又

行攜馴鹿寄消搖共飽山蔬與藥苗本自入山緣服
玉不應忘味待聞韶

又

西山雪外巢松客南岳巖前洗鉢僧平日寄懷常在
此秋風剩欲辦行滕

又

窗扉寂寂秋將晚燈火昏昏夜向闌不是莫年能耐
病道人心地本來寬

又

孤燈如露螢熠熠北窗下我亦氣僅屬厭厭迫衰謝
平生更是熱生死等晝夜行年八十五八十九已化

又

病道人心地本來寬

病中自遣

孤燈如露螢熠熠北窗下我亦氣僅屬厭厭迫衰謝
平生更是熱生死等晝夜行年八十五八十九已化

雖云病惱侵處此亦閑暇人扶時出門清溪帶菊舍

又

一鴉振羽鳴窗色忽已歸衆鳥次第來各矜語言好
病夫正擁被宛若兒在襁旣婢職衣襦了童謹除掃
紅日已入簾吾豈尚恨早悠然一盃粥頑鈍聊自保

又

少時揣無才一意守貧賤窮閭依馬磨小石寫驢券
中年更可笑顛顛客異縣何曾得一飽塵土空滿面
即今況已病百衰相俱見雖然亦自重未忍悲秋扇

八月二十三夜夢中作

道士上天鶴一隻老僧住菴雲半間去來盡向無心
得癡點相除到處閑江山千里互明晦魚鳥十年相
往還高巖縹緲人不到醉中為子題其顏

病少間作

身如水有漚病如雲無根方其未散間妄謂有我存
漚壞水渺然雲滅寧遺痕回首乃可笑妄想生怨恩
念我曩昔時一笏朝帝闈既老復何為釣魚石帆村
今年病臥久慘痛不可言一念忽超詣二豎皆狂奔
吾居本廣大談笑決其藩還持一尊酒往醉湘水魂

秋晚幽居

吳中秋晚氣猶和疾豎其如此老何鳥語漸稀人睡
美木陰初薄夕陽多掃園日日成幽趣撫枕時時亦
浩歌車轍久空君勿數文殊自解問維摩

病中思出遊

病境雖猶在秋天已自清閑思尋酒伴賴畏主詩盟
煙艇桐江去籃輿剡縣行會心隨處住便足了餘生

九月初作

莫笑衡茆陋幽情得細論客疎慚歡醴僧熟認敲門
杳杳煙中剝昏昏雨外村登高負今歲老病易消魂

四日夜難未鳴起作

放翁病過秋忽起作醉墨正如久蟄龍青天飛霹靂
雖云墮怪奇要勝常憫默一朝此翁死千金求不得

又

病道人心地本來寬

又

孤燈如露螢熠熠北窗下我亦氣僅屬厭厭迫衰謝
平生更是熱生死等晝夜行年八十五八十九已化

又

病道人心地本來寬

又

孤燈如露螢熠熠北窗下我亦氣僅屬厭厭迫衰謝
平生更是熱生死等晝夜行年八十五八十九已化

又

病道人心地本來寬

又

孤燈如露螢熠熠北窗下我亦氣僅屬厭厭迫衰謝
平生更是熱生死等晝夜行年八十五八十九已化

臥病雜題

吟咀初成藥呿啞半掩扉病知身健樂閑覺宦遊非
小澗看猿飲枯筇擁鶴歸今朝更堪喜書札得淮淝
是日得五郎廬州書

又

鷗鷺馴亭沼琴書悅性靈身叨鄉祭酒孫爲國添丁
煙浦收菰菜秋山刷茯苓虛名吾所薄未應少微星

又

陋室施床作窮閭問疾疎加餐惟是粥弄筆不成書
益益新筍酒青青小摘蔬客來邀襦帶聊示小勤渠

又

終日常辭客經秋半在床愛窮留伴伴諸病與相忘
竈婢工烹粥園丁習寫方久病家人作粥遂佳蓋朝夕常爲
之也又有山僕本不識字因久合藥遂能寫藥方數大篇 今朝有
奇事久雨得窗光

又

人間跛男子物外病維摩 病中遂牽聊病右足 但可妨
趨拜何因廢歡歌菜羹醯醬薄村巷棘茨多舉手謝
鄰父非君誰肯過

讀華陀傳

六籍雖殘聖道醇中更秦火不成塵華陀老點徒驚
俗吾豈無書可活人

家山

鹿食草時猶命侶鶴冲霄後尚思歸家山不忍何山
隱稽首虛空懺昨非

九月十一日疾小間夜賦

清夜房櫳燈火微此心病起更依依空驚床下莎蟲
語不見梁間巢燕歸蒼硯有池殘墨在白頭不憚亂
書圍可憐未遽忘風月猶夢華鶴插羽飛

又

病後衣巾盡覺寬挈提裘領喟然歎孤燈不焰熒熒
碧小雨無聲慘慘寒只道清心災自退豈知非意病

相干平生最愛秋搖落惆悵今年怯倚欄
一病七十日

一病七十日共疑無復生隄全河漸復師濟寇將平
縹緲香雲散颺颺藥鼎鳴庭前有殘菊自笑尚關情

西郊

七十辭北闕五畝寄西郊泳水魚依藻摩雲鶴結巢
巧僧時問疾卜叟或論交社櫟天全汝寧當數繫匏
蔬食

肉食從來意自疑齋盂況與病相宜老瓶昔作春蔬
崇斷稿今無晚釣詩陌上煙苔誰采采牆陰風葉正
離離人生飢飽初何校一斛橫榔笑汝癡

乙巳秋莫獨酌第一首六韻

孤雲繫不定野鶴籠難馴賣藥句曲秋沽酒天台春
中原幾流血四海一閑人邀月對我影折花插我巾
花月成三友江海爲四隣何敢忘吾君巢由稱外臣

又

安期與羨門秦漢迹已陳不如東平公一劍隱紅塵
醉歌題市樓墨色粲如新叱咤興風雲約束山川神
從我者誰歟夜渡黃鶴津

又

山陰老道士寄情魚鳥中幽戶綠蘿月孤舟白蘋風
豈無小瓮熟尊杓誰與同邂逅得知心一見數猶龍

又

湖中有隱士或謂千歲人大兒嚴子陵小兒賀季真
姓名莫能知況可得疎親有竿不釣魚秋晚香梗新

秋晚

春將愁並至秋與病相終過望猶賒死扶衰又入冬
撥香開社瓮帶睡聽晨鐘懶放君無謂天公儘見容

病中遣懷

人生長短無百歲八十五年行九分堪笑癡翁作點
計欲將繩子繫浮雲

放生何足爲愛物施藥因行聊結緣山舍老翁無事業只將閑事占流年

又

鮮肥莫事膚寸舌蕭散何辜七尺軀山路豈無孤店宿渡頭亦有小舟呼

又

家貧不與身添業病久寧非天做予掃盡世間閑忿愆小園煙雨種春蔬

又

菘芥蕘羹甘勝蜜稻梁炊飯滑如珠上方香積寧過此慚媿天公養病夫

又

開皺紫栗如拳大帶葉黃柑染袖香天與山家講隣好江天昨夜有新霜

六言

滿帽秋風入剡半帆寒日遊吳問子行裝何在帶間笑指葫蘆

又

不慕生爲柱國何須死向揚州但願此身無病天台剡縣閑遊

野興

著草晨占大易爻松肪夜借隱書抄飢時每就猿分果宿處時從鶴寄巢旋賣荆薪持取醉偶逢野叟卽論交類然坐閱人間事耐辱禁愁却自嘲

遠遊

壯年不作故山歸老去方知浪走非挂日片帆吳赤壁嘶風疋馬蜀青衣交遊雖廣知心少香火徒勤願力微堪笑只今成底事青燈無恙且相依

反遠遊

賣却貂裘買釣舟久將身世付悠悠行歌西郭紅橋路爛醉東關白塔秋皆山陰近郊地各夜泊驛亭觀月上曉登僧閣聽猿愁一生身屬官倉米剩喜殘年得

自由

病著

病著今年劇衰來次第新茅茨安久處芻豢罷前陳零落閑邊句逍遙事外身村東褚草草一笑得常珍

梅市

小雨長堤古寺西不容羸馬惜障泥時平道路鈴聲少歲樂坊場酒價低煙樹淺深山驛近野歌斷續客魂迷殘軀不料重來此一首清詩手自題

梅市書事

羸馬孤愁不可勝小詩未忍付夢騰一聲客枕江頭雁數點商松雨外燈

病減

病減停湯慰身衰積按摩書虧平日課睡比故年多龜卜占休泰醫方較闕訛有時還一笑隔浦起漁歌

幽居卽事

山庵可伐薪稻壠可負未但令二事集一飽已有在霜林兩株橘春圃數畦菜仁哉造物心乞我曾不愛炊烹付樵青鉏灌賴阿對乃翁亦自爲高枕聽晨碓

又

書几積流塵硯池漬淺墨老夫自省事童子豈不力人生適可爾過計亦何得胡爲棄梨棗日夜長荆棘洗汝侈汰心去汝驕吝色一菜飽有餘奚取萬錢食

羸疾

羸疾止還作已過秋莫時但當名百藥那更謁三醫強飯幸如昨清遊元有期新霜宜野店行矣不須疑九月二十五日雞鳴前起待旦

堪笑枯腸漸畏茶夜闌坐起聽城笳爐温自撥深培火燈暗猶垂半結花斷夢不妨尋枕上孤愁還似客天涯掃塵拾得殘詩稿滿紙風鴉字半斜

秋夕排悶十韻

湖海雙歸棹蓬蒿一病翁幽居天鏡北別墅石帆東雲岫翻孤鶴煙汀渺斷鴻一從生白髮幾見落丹楓

獨立中庭月，歇眠滿院蛩。藜羹晨糝白，葑火夜爐紅。
物外緣雖薄，塵中念已空。放魚從長者，累塔伴羣童。
野寺觀冬臘，叢祠禱歲豐。行歌與坐睡，處處現神通。
宴坐

氣住即存神，心安自保身。誰欺二豎子，卓爾一真人。
氣泝如潮上，津流若酒醇。幽居幸無事，莫玩物華新。

又

周流惟一氣，天地與人同。天道故不息，人爲斯有窮。
蛟龍上雲雨，魚鳥困池籠。宴坐觀茲理，吾其若發蒙。

小室

術淺難醫忘，文疎不送窮。詩囊逢厄運，藥裹少新功。
小室香凝碧，明窗日射紅。鄰翁來問疾，少話莫匆匆。

舟次浦口

吾孽本自作，此生元有涯。三江去浩蕩，一艤任嘔啞。
賣藥村中市，炊粳處處家。相逢喜上恙，不敢厭喧譁。

開爐

餘疾三分在，閑愁一點無。書能伴孫讀，身欲却人扶。
霽日鴉鳴樂，清霜草蔓枯。南山送僧炭，隨事且開爐。

散懷

東行西行一日過，深酌淺酌萬事休。亦知衣食將不
繼，老甚安能懷百憂。

又

中年絕慾不復念，今日肉食夫何難。天公賦與本來
薄，一概掃空方少安。

劍南詩稿目錄
卷第八十五

子虞當以十月離澗上喜而有作 病來 舟
中晨起 江村 兀兀 道懷 柯山道上作

病後自詠 十月九日 三三孫十月九日
生日翁翁為賦詩為壽 江路 初冬二首

夜坐二首 殘菊 久病 病小愈喜晴 租
稅 初寒 呻吟 山墅 十月二十四日夜

夢中送廬山道人歸山 病後晨與食粥戲書
贈僧二首 遊山三首 農圃歌 贈拄杖

贈猫 宮詞 病中雜詠十首 雪 自笑
絕句 題藥囊 未題二首 病中示兒輩

夢中行荷花萬頃中 示兒

劍南詩稿卷第八十五

宋陸游務觀

子虞當以十月離肥上喜而有作
十月霜侵客子衣片帆計已發淮淝山林獨住我何
敢州縣徒勞兒未非傳舍方寒索調護里門終日待
來歸解裝且共燈前語萬事真當付一秋

病來

抱病雖可驗應接每安徐正使須彈塞寧當快掃除
寡言防禍始省事養災餘一飽吾何欠香粳薦笑蔬
舟中晨起

天宇清寒病體輕煙波聊復事宵征艣橫舟尾霜如
抹犬走籬根葉有聲蕭尹威名空赫赫班侯智略本
平平不如歸結迎神社長笛圓聲送此生

江村

江村連夜有飛霜柿正丹時橋半黃轉枕却尋驚斷
夢撥爐偶見燕殘香醫無絕藝空三易死與浮生已
兩忘拈得一書還嬾看臥聽孫子誦琅琅

兀兀

兀兀心非睡惺惺口不言齒津生頰舌鼻息撼牆垣
書媿兒童問年叨里巷尊貧家有喜事黍酒帶醅渾

道懷

織罷化吾梭棋終爛汝柯藥靈刀七足語妙立談多
植浦吹橫笛桐江買短蓑白鷗真可友萬里渺煙波

柯山道士作

道路如繩直郊園似砥平山為翠螺繡橋作彩虹明
午酌金丸橘晨炊玉粒粒江村好時節及我疾初平

病後自詠

狂豪掃去得衰殘數啜芳醪興亦闌閉戶交朋疎索
盡捐書日月破除難盤盤除鮮食生蔬美衣聲吟肩束
帶寬賴有一條差自慰高眠常到日三竿

十月九日

酒開甕面撲入香菊折霜餘滿把黃我是化工君信
否放遲一月作重陽

三三三孫十月九日生日翁翁為賦詩為壽

正過重陽一月時龜堂驩喜抱孫枝棄襦已足驚關
吏堆笏寧惟取世資落筆千言猶細事讀書萬卷要
深期汝翁豪傑非今士不用擔簦更覓師

江路

江路最初程飄然兩屨輕少留雲際宿徐待月明行
雁起平沙影泉輕斷岸聲誰知遊剡興不減上青城

初冬

落葉紛紛十月時今年霜比去年遲山猿引子飲幽
澗野鶻結巢爭墮枝嶺北片雲生峭絕橋東殘水漾
淪漪病衰自怪詩情盡造物撩人乃爾奇

又

落葉窗前已作堆地爐微火撥殘灰夢中無祟敗蔬
圃飯後有歌誇芋魁裊裊清笳催日晚蕭蕭新雁帶
寒來更寬十日可閑出會挈一壺尋早梅

夜坐

餅餌支遙夜薪蒸禦早寒臥聞風浩蕩起視斗闌干
雞怯飛霜重鴉驚出月殘挑燈搔短髮顧影發吾歎

又

藥裏關心處篝燈照影時文書用遮眼棗栗可無飢
素業存農圃頽齡迫耄期蓋棺萬事已唯負國恩私

殘菊

殘菊一枝香未殘夜窗拈起百回看過時只恐難相
笑我是三朝舊史官

久病

臥疾閱三時冥冥不自持婢諳曾製藥犬識舊迎醫
質貸交親厭呻吟里巷知有時推枕起清歡尚能奇

病小愈喜晴

雲邊采藥喜身輕燈下觀書覺眼明擾擾已空浮世

事依依還作苦吟聲又為天地幾年客頓覺軒窗三日晴深婉山童憐寂莫風爐傳法煮蕪菁

租稅

占星起飯犢待月出輪租遇嶮頻呼侶扶轆數戒奴畏飢懷餅餌愁雪備薪樗意象今誰識當年賦兩都

初寒

雨霽林猶滴泥新路易乾蕭條山步晚顛顛客衣單小女收魚笱童兒放鴨欄初寒豈不好衰病自無歡

呻吟

呻吟半歲掩柴扉性命惟存氣力微夙業豈能逃馬麥窮居賴是慣牛衣濁清且復分賢聖今昨誰能論是非一段光明君記取要知無念是真歸

山墅

煙水煙林老結廬人間用短更誰如輒蒲穩背供危坐小幟障燈便細書莫欺衰病歸山墅曾領諸儒上石渠貞觀開元嗟已遠為君試說紹興初

十月二十四日夜夢中送廬山道人歸山

平生不到三公府晚歲歸來五老菴夙士極知成殿後吾曹所賴作司南孤舟夜泊灘聲惡小瓮晨香雪意酣笑語淋瀝拄杖子即今惟汝是同參

病後晨興食粥戲書

蝴蝶莊周安在哉達人聊借作嘲談不知自此隨緣住更把晨窗粥幾盃

贈僧

松間數語淡交成不喜將身上行安得北窗風雪夜地爐相對煮蕪菁

又

長明燈下三更雨且過寮前萬里身正使未能超佛祖也應小勝市朝人

遊山

一生萬里著行滕抖擻塵埃尚未能不怕語音時帶剡敢辭生計略如僧疎梅漸動清溪曲霽雪遙看古

塔層喚起故年清絕夢數聲柔艣下巴陵

又

蕭然破帽伴枯藤逢著青山不厭憎家似江淮歸業戶身如湖嶺罷參僧煨柴夜宿寒爐火洗脯晨敲古澗冰果向此中能得趣宦途捷徑不須曾

又

九十衰翁心尚孩幅巾隨處一悠哉偶扶拄杖登山去却喚孤舟過渡來酒市擁途觀鬼峨僧廬借榻寄哈臺吾生清絕煩君看不任人間夢一回

農圃歌

我不如老農占地畝一鍾東作雖有時力耕在茲冬張燈觀夜織高枕聽晨春時時喚鄰里旨蓄亦可供我不如老圃父子日相從一鉏萬事足不求定遠封春泥翦綠韭秋雨畦青菘放筋有餘味豈不烹噉嚼乃者半年病清鏡滿衰容塵生一鞠屐壁倚一枝筇惟有呻吟聲和合牀下蛩青燈照兀兀布衲聊自縫

贈拄杖

歷險橫空捷有神得來元自剡溪濱同為萬里江湖客共見三生風月身不怕雲中伴鳧鳥只愁雨後長龍鱗何妨更悟無生理露柱燈籠一話新

贈貓

執鼠無功元不劾一簞魚飯以時來看君終日常安臥何事紛紛去又回

宮詞

秋露蕭蕭洗秋月夢斷陳宮白銀闕臨春結綺底處所回首已成狐兔穴

病中雜詠十首各四韻第八首二韻

半年不讀書顧影疑非我乃知百年中如此過亦可書能作汝崇識字果非福明年倘未死樂哉駕黃犢

又

伐性無蛾眉腐腸無旨酒齋居亦得疾果無第一手才不如嵇康疎懶則過之雖有絕交書不作幽憤詩

又
華陀囊書久已焚思邈玉函祕不聞從醫火攻固下
策遣化飯香方普熏觸人正自坐愚直學道今當輸
拙勤勿言將智耄已及後死或可與斯文

又
擊壤林間送此生欣欣東作到西成泥深宿麥苗初
長葉落柔桑眼已生枹鼓無聲盜衰息文書簡出吏
清平西遊攜得蹲鴟種具共山家玉糝羹

又
身是人間一老樵城南煙水寄迢迢尋人偶到金家
暖取米時經杜浦橋小市孤村雞嗉啞斷山幽谷雨
蕭蕭吾曹自養無能爾楚客應無隱可招

又
身似頭陀不出家杜陵歸老有桑麻茶煎小鼎初翻
淚燈映寒窗自結花殘藥漸離愁境界亂書重理淡
生涯等閑一事還超俗斷紙題詩字亂斜

又
天遠不可問將如此老何老驚詩思退貧欠藥錢多
剡縣尋僧宿桐江買酒歌市橋新柳色又是一年過

又
半黃半綠柳滿城欲開未開梅有情放翁一病又百
日回視新春如隔生

又
久病身猶困閑遊性已成未停湯熨事即理水雲程
投宿忘街陌論交失姓名醉憐花塢好恐是牡丹坪

又
自我居湖曲漁樵日往來只知年屢改不覺老相催
小浦潮痕長長隄草色回逢春心自在莫道已成灰

又
一夕山陰道真成白玉京衰殘失壯觀擁被聽窗聲
左車第二牙辭去見韓文公詩團坐無生話又新堪笑

按摩并洗沐未忘貪愛夢中身臘月五日湯沐按摩幾半日
是早左車第二牙脫去

絕句
山遮水隔重重埃雨練風柔處處花一病半年能不
死又將此恨醉天涯
題藥囊

末題
殘暑纔屬爾新春還及茲真當名百藥何止謁三醫
半夜噉朝日晨興欽上池金丹有門戶草木爾何知
平日尤閑老更閑一毫世事豈相關孤雲不散來歸
岫細水無聲自出山支徑過僧纔百步小樓藏藥可
三間客來不肯通名姓熟視吾廬爲破顏

又
一身只付雞樓上萬卷真藏椰子中嘉定二年正月
後不知幾度醉春風
病中示兒輩

去去生方遠冥冥死即休狂思攘鬼手危至服丹頭
有劍知誰與無香可得留惟應勤學謹事事鑑恬侯
夢中行荷花萬頃中
天風無際路茫茫老作月王風露郎只把千尊爲月
俸爲嫌銅臭雜花香
示兒

死去元知萬事空但悲不見九州同王師北定中原
日家祭無忘告乃翁

劍南詩稿卷第八十五終

跋

先君太史晚自號曰放翁紹興辛巳間及事高宗

皇帝累遷樞密院編脩官孝宗皇帝嗣位之初召

對便殿賜進士第時始置編類太上皇帝聖政所

妙東時髦先君首預其選擢檢討官久之以忤貴

倖自免去五爲州別駕西泝夔道樂其風土有終

焉之志蜀之名卿巨儒皆傾心下之爭先挽留晁

公子止侍郎欲捐其別墅以舍之先君諾焉而未

之決也嘗爲子虞等言蜀風俗厚古今類多名人

苟居之後世子孫宜有興者宿留殆十載戊戌春

正月孝宗念其久外趣召東下然心固未嘗一日

忘蜀也其形于歌詩蓋可考矣是以題其平生所

爲詩卷曰劍南詩稿以見其志焉蓋不獨謂蜀道

所賦詩也後守新定門人請以銀梓遂行于世其

戊申己酉後詩先君自大蓬謝事歸山陰故廬命

子虞編次爲四十卷復題其籤曰劍南詩續稿而

親加校定朱黃塗攬手澤存焉自此至捐館舍通

前稿凡爲詩八十五卷子虞假守九江刊之郡齋

遂名曰劍南詩稿所以述先志也其佗雜文論著

季弟子適亦已刊之溧陽會子虞上乞骸之請日

莫且去故有所未暇初先君在新定時所編前稿

于舊詩多所去取其遺詩存者尚七卷念先君

之遺之也意或有在且前稿行已久不敢復雜之

卷首故別其名曰遺稿云嘉定十三年十二月旣

望男朝請大夫知江州軍州事借紫子虞謹書

孝宗一日御華文閣問周益公曰今代詩人亦有

如唐李太白者乎益公以放翁對由是人競呼爲

小太白篇什富以萬計今古無雙或評如怒猊扶

石渴驥奔泉或評如翠嶺明霞碧溪初月何足盡

其勝概耶近來坊刻寡陋不成快劉須溪本子亦

十僅二三甲子秋得翁子虞編輯劍南詩稿又吳

錢兩先生嚴訂天天者真名秘本也亟梓行之以

公同好其命名次第具載跋語云湖南毛晉記

放翁逸稿目錄

成材將還盱江幕以詩四章為賦次韻其二以

識別歲在改元孟夏二十有三日書于臥龍方丈之西壁二首 送李舍人赴闕 寄鄧志宏

五首 大溪難折掩二首 羅山平雲閣 中閣 冲虛宮 羅浮山 寶積寺 祈雨二首

秋日山居四首 戲作三首 余邦英惠小山新芽作小詩三首以謝 寄彥成 榮歸

翠微堂 閑居七首 夜坐 新秋晚歸 懷王美 感事 客舍對梅 春日

續添 聞婆餅焦 種桑 夜聞鶻聲 離家示妻子

伯 黃山塔 送三兄赴秦邸 聞角 寄楊濟 幽事 葺圃 幽事 北檻 贈徐相師

寄姜梅山雷字詩 採菊 吳娃曲四首 過江至蕭山縣驛東軒海棠已謝

放翁逸稿

宋陸游務觀

成材將還肝江幕以詩四章為賦次韻其二以識別歲在改元孟夏二十有三日書于臥龍方

丈之西壁

漂泊干戈到粵山不妨還正七雲冠乾坤策內窺真象龍虎爐中養舊丹靜愛白雲歸遠岫時邀明月下層巒此身已作長閑計祇願朝廷四海安

又

文場妙譽古推高卜仕尤從州縣勞野鶴未應羣雁驚幽蘭終不做蓬蒿歲寒挺節無霜霰海運搏風有羽毛好去江南吐奇策從來功業屬吾曹

送李舍人赴闕

執簡曾聞侍玉螭謫仙才調盡推奇能將苦語康時病更遣丹誠動主思北闕親朋瞻舊德東吳山水入新詩知公自有經綸術會見飛翔集鳳池

寄鄧志宏五音

二徑從來半草萊席門那為故人開自慚不是梧桐樹安得朝陽鳴鳳來

又

彭澤思歸意未成折腰五斗謾勞生何如張翰秋風起便憶鱸魚蓴菜羹

又

厭從薄宦思蓮幕思見故人映玉山須信人生貴適志相逢樽酒且開顏

又

筆下文章信有神西來避地不無因要看銀漢從天落一洗人間萬古塵

又

中原回首涕沾裳誰是當時柱石強會喚謫仙天上

去扶將日轂出扶桑

大溪灘折柂

舟行至大溪而折柂中流危甚舟人皆懼作

絕

笑謂德夫兄曰吾輩豈當死于此耶已而幸獲濟處因成二戲從來忠信任風濤

又

暮江初漲浪翻狂一葉輕舟泛渺茫我愧人非跛男子安能與世作津梁

羅山平雲閣

上方高閣與雲齊臘屐穿雲步步躋却恐此身生羽翼不從平地作階梯九門路接青霄近四望山連碧海低徙倚闌干重回首疎林煙暝野猿啼

中閣

萬仞仙山插太空山腰依約見蓮宮人寰隔絕無人到洞府深沈有路通石隙生雲埋柱礎海光浮日映簾櫳野僧齊罷憑闌久千里秋毫入望中

沖虛宮

林館松門白晝扃參鸞人去已千齡基存舊宅樓臺古地有遺丹草木靈滿洞曉雲春釀雨一池秋水夜涵星麻姑仙馭今何在檻外孤峯晚更青

羅浮山

十里山光翠障開重遊何事意徘徊石樓自向雲中見仙島誰知海上來丹竈尚能含日月龍潭還解起風雷天涯為郡空華髮十二年間到兩迴

寶積寺

偶來遊古寺景逐眼前生巖上高僧坐林間野客行望窮滄海遠吟久暮雲平此境真難到登臨暫適情

祈雨

折腰為米顏常醜負耒躬耕意自甘積谷千牛多骨

又

相年年禱雨到雲菴

至德無私不我欺精神未効莫輕疑但令葵藿勤傾
向會有風雲感會時

秋日山居

晏起

年年睡債苦相關好夢長隨苦角殘作意歸來償宿
負透牕遮莫已三竿

野步

漠漠秋園暮景孤綸巾羽服從奚奴風流畫手無摩
詰寫作龍山野步圖

午枕

茗椀兵休戒老兵客來剝琢急須應為言余正理公
事半落烏紗枕曲肱

夜坐

老癩開編早欠伸強搔短髮照青燐蠶鹽二十年前
夢尚想長郎撼夜鈴

戲作

鵬鷗松韻生魚眼洶洶雲濤湧兔毫促膝細論同此
味絕勝痛飲讀離騷

又

束書舊隱棋巖下慣碾春風傲北牕喚起□生塵土
夢賴君圭壁一雙雙

又

建苑誇豪如貴胄棋巖晦迹類臞仙倘憑闕定人
物耕野釣溪難自賢

余邦英惠小山新芽作小詩三首以謝

家園破社得鷹爪舌本初參便到眉忽喜雲腴來建
苑坐令渴肺生華滋

又

正焙如觀詩大雅小山當似變風論脫今風格不類
古終有先王禮義存

又

平時共語不成些癡坐空彫藜莧腸誰遣春風入牙

頰詩成忽帶小山香

寄彥成

交舊天涯曉宿稀年來獨子付心期滿牀文史對談
處萬里風霜並轡時雨滴空階憐夜榻吟牽芳草夢
春池合沙橋下東流水雙鯉何時上釣絲

榮歸

車馬填門撥不開吾宗得雋凱歌回折將蟾苑一枝
桂泛入萱堂百歲杯雅望素欽山疎岳岳芳名中占斗
中魁先登賴子光邦族繼踵行看袞袞來

翠微堂

萬頃青山只一溪此中聊欲效真栖尋深巧被閑雲
到破靜時聞幽鳥啼羞有卑功追管晏慚無高節比
夷齊困眠飢食真吾事寶篆香殘日又西

閑居

小隱輕華屋深山自結茅亂苔侵石磴疎竹映花梢
泉瀨含清韻風來慰淡交閉門燒柏子好把道書抄

又

溪透桃源路門連小華峯虹霓橫水檻羽蓋偃巖松
日月詩魂迴煙霞道氣濃欲尋鍾呂去世外說從容

又

廚給胡麻粒山供鹿脯盤掃門遲客至入郭借書看
種竹添風韻留松老歲寒一生無別事雞犬戀劉安

又

自得窮通樂而無寵辱驚韜光聊混俗去知默陶情
毛竹蒼龍瘦雲衣白鶴輕時敲朝斗磬林外玉聲清

又

野水明牕几通渠遶屋流鷺衝煙織素魚避月沉鈎
草闌蚊蚋市林昏蝙蝠秋開懷覺清曠萬象入冥搜

又

生計淡無味終焉樂有餘灌畦親抱甕種秫學拈鋤
擇木翔歸鳥臨淵聚戲魚地偏心更遠靖節愛吾廬

又

剪葉霜風勁關門謝遠遊深村梅映雪前浦水明樓
蜜熟蜂衙放羶殘蟻陣收地爐無獸炭炙背補衣裘

夜坐

懷抱何蕭爽涼風掃鬱蒸寒蛩喧敗草飢鼠嚙枯藤
蝶入誰家夢花殘半夜燈無人論道德長嘯愧孫登

新秋晚歸

玉粒嘗新稻金風作好秋鴈回沙漠信蟬噪夕陽愁
立久雲生岫歸遲月滿樓吟余露華冷砧杵起江頭

懷王笑

理髮侵霜白酡顏借酒紅故人千里別何日一樽同
魂夢徒勞蝶音書不見鴉抱琴雖有意無語倚西風

感事

今古成何事興亡迹已陳千時無上策避世且全真
就日思明主看雲憶老親到頭垂白早徑醉曲生春

客舍對梅

野迥林寒一水傍密如疎藥正商量半霜半雪相仍
白無蝶無蜂自在香月過曉牕移影瘦風傳殘角引
聲長還憐客路龍山下未折一枝先斷腸

春日

平生過眼萬芳菲晚景收心與世違枯槁形骸元自
瘦膏腴田土為誰肥

據放翁子于跋云先君編前稿于舊詩多所去
取其遺存者尚七卷別名遺稿惜今不傳余刻劍
南詩稿成復從牧齋師案頭見續稿二冊又得未
刻律詩八句者二十三首四句者二十首但春日
一章雖編入斷句而語意未了疑亦八句而缺其
後遂詮次作逸稿聊補劍南之遺云湖南毛晉識

續添

聞婆餅焦

黃泥嶺松森森幽鳥穿枝時一吟汝聲一何悲汝語
惻我心連郵麥熟餅餌香我母九泉那得嘗

黃泥嶺松森森幽鳥穿枝時一吟汝聲一何悲汝語
惻我心連郵麥熟餅餌香我母九泉那得嘗

放翁逸稿

種桑

孔明百畝桑景略十具牛豈無子孫念飽暖自可休
種桑吾廬西微徑出南陌三月葉暗園四月甚可摘
戴勝枝上鳴倉庚葉間飛飛鳴各自□人生□不歸
歸家力農桑慎莫愁貧賤婚嫁就比鄰死生長相見

夜聞櫓聲

咿啞雙櫓聲淒切遊子情豈無一杯酒孤舟誰與傾
清愁不可耐霜月照潮平

離家示妻子

明日當北征竟夕起復眠悲蟲號我傍青燈照我前
婦憂衣裳薄紉線重敷綿兒為檢藥籠桂薑手炮煎
墩埃默可數一念已酸然使憂能傷人我得復長年
同生天壤間人誰無一塵傷哉獨何辜遠連長可憐
破屋不得住風雨走道邊呼天得聞否賦與何其偏

黃山塔

風吹旗脚西南開掛帆槌鼓何快哉轉頭已失望如
石黃山孤塔迎人來黃山勸汝一杯酒送往迎來殊
耐久明年我作故鄉歸還對黃山一搔首

送三兄赴秦邸

兄年十七弟始生弟今白髮森千莖所期相就畢此
世一尊濁酒得共傾往年雖窮猶半菽兩年糠覈苦
不足書生志欲及天下貧賤不得收骨肉過悲復恐
兄意傷忍涕不覺涕已滂早朝霜露戒衣薄願書此
語歡或忘閉門病衰百無用日望兄歸有餘俸早從
丞相乞湖州莫待異時思少游

聞角

小閣柴門近黃昏畫角聲時時逐風散嬾嬾伴愁生
天地清秋暮關河歲月明湖南賊未破獨立久含情

寄楊濟伯

聞道皇華使來從萬里回五溪春薺老二峽暮猿哀
昔日文昌省頻年灑灑堆問君何地險斟酌寄聲來

幽事

聞道皇華使來從萬里回五溪春薺老二峽暮猿哀
昔日文昌省頻年灑灑堆問君何地險斟酌寄聲來

日日營幽事時時有好懷
雨園殘竹粉風砌落花釵
伴蝶行苔徑聽蛙傍水涯
窮通了無謂不必更安排

葺圃

種樹書頻讀齊民術屢窺曾
求竹醉日更問柳眠時
盧橘初非橘蒲葵不是葵
因而辨名物甘作老樊遲

幽事

幽事春來早晨興即啓閣
掃梁迎燕子插援護龍孫
數日招賓友先期辦酒尊
淋漓衣袖溼不管漬春痕

北檻

北檻近中堂綠堦物自芳
晨清花拱露地僻藓侵廊
坐久時開卷吟餘或炷香
終朝無客至一枕到羲皇

贈徐相師

許負遺書果是非子憑何處
說精微使君豈必如柳
大丞相元來要瓠肥袖闊日
常籠短刺肩寒春未換
單衣半頭布袋挑詩卷也道
遊京賣術歸

寄姜梅山雷字詩

章臺官柳映宮槐寶馬蹄輕
不動埃只怪好詩無與
敵誰知古學有從來江山常
逐客帆遠歲月不禁衙
鼓催剩約東林投淨社高情
千載有宗雷

采菊

秋花莫插鬢雖好亦淒涼
采菊還接却空餘滿袖香
吳娃曲友有妾而內不容
戲爲作此因得不去

滿地花陰不閉門琵琶抱恨
立黃昏妾身不似天邊
月此夜此時重見君

又

忘憂石榴深淺紅草花紅紫
亦成叢明年開時不望
見只望郎君不著儂

又

二月鏡湖水拍天禹王廟下
鬪龍船龍船年年相似
好人自今年異去年

又

臂上燒香拜佛前願郎安穩
過新年多情已是長多

病莫要留心在妾邊

過江至蕭山縣驛東軒海棠已謝

星星兩鬢怯年華幽館無人
江月斜惆悵過江留一夕
曉風吹盡海棠花

先君刻逸稿後六十餘年展
購得別本渭南集五十二卷
其前後與家刻略同祇少入
蜀記六卷而

多詩八卷細檢劍南集中除
其重複又得未刻詩二十首
并續添於後云汲古後人毛
辰識

放翁逸稿終

渭南文集

四部備要

集部

上海中華書局據汲古閣

本校刊

桐鄉 陸費逵 總勘

杭縣 高時顯 輯校

杭縣 吳汝霖 監造

版權所有不許翻印

傳

陸游字務觀越州山陰人年十二能詩文蔭補登仕郎鎖廳薦送第一秦檜孫墳適居其次檜怒至臯土司明年試禮部主事復置游前列檜顯黜之由是爲所嫉檜歿始赴福州寧德簿以薦者除敕令所刪定官時楊存中久掌禁旅游力陳非便上嘉其言遂罷存中中貴人有市北方珍玩以進者游奏陛下以損名齋自經籍翰墨外屏而不御小臣不體聖意輒私買珍玩虧損聖德乞嚴行禁絕應詔言非宗室外家雖實有勤勞毋得輒加王爵頃者有以師傅而領殿前都指揮使復有以太尉而領閣門事瀆亂名器乞加訂正遷大理寺司直兼宗正簿孝宗卽位遷樞密院編脩官兼編類聖政所檢討官史浩黃祖舜薦游善詞章諳典故召見上曰游力學有聞言論剴切遂賜進士出身入對言陛下卽卽位乃信詔令以示人之時而官吏將帥一切翫習宜取其尤沮格者與衆棄之和議將成游又以書白二府曰江左自吳以來未有捨建康他郡者駐蹕臨安出於權宜形勢不固饋餉不便海道逼近凜然意外之憂一蘇之後盟誓已立動有拘礙今當與之約建康臨安皆係駐蹕之地北使朝聘或就建康或就臨安如此則我得以暇時建都立國彼不我疑時龍大淵曾親用事游爲樞臣張燾言觀大淵招權植黨熒惑聖聽公及今不言異日將不可去燾遽以聞上詰語所自來燾以游對上怒出通判建康府尋易隆興府言者論游交結臺諫鼓唱是非力說張浚用兵免歸久之通判夔州王炎宣撫川陝辟爲幹辦公事游爲炎陳取進之策以爲經略中原必自長安始取長安必自隴右始當積粟練兵有釁則攻無則守吳璘子挺代掌兵頗驕恣傾財結士屢以過誤殺人炎莫誰何游請以玠子拱代挺炎曰拱怯而寡謀遇敵必敗游曰使挺遇敵安保其不敗就令有功愈不可駕馭及挺子曦僭叛游

言始驗范成大帥蜀游爲參議官以文字交不拘禮法人譏其頽放因自號放翁後累遷江西常平提舉江西水災奏撥義倉賑濟檄諸郡發粟以予民召還給事中趙汝愚駁之遂與祠起知嚴州過闕陛辭上諭曰嚴陵山水勝處職事之暇可以賦詠自適再召監紹熙元年遷禮部郎中兼實錄院檢討官嘉泰二一年以孝宗光宗兩朝實錄及三朝史未就詔游權同修國史實錄院同修撰免奉朝請尋兼祕書監三年書成遂陞寶章閣待制致仕游才氣超逸尤長於詩晚年再出爲韓侂胄撰南園閱古泉記見譏清議朱熹嘗言其能太高迹太近恐爲有力者所牽挽不得全其晚節蓋有先見之明焉嘉定二年卒年八十五

前輩有欲補詩史一字之闕終莫適其當者夫發言寓意未必惟一字之工或者窮思畢慮之弗逮人才相去乃爾遠耶

太守山陰陸先生劍南之作傳天下眉山蘇君林收拾尤富適官屬邑欲錄本爲此邦盛事迺以纂次屬師尹亦旣斂衽肅觀則浩渺閱肆莫測津涯掩卷太息者久之獨念吾儕日從事先生之門間有疑闕自公餘可以從容質正幸來者見斯文大全用是不敢辭劍南詩彙六百九十四首續彙三百七十七首蘇君於集外得一千四百五十三首凡二千五百廿四首又□七首釐爲□十卷總曰劍南因其舊也文字傳襲失真類不滿人意其如此書得之所見有以傳信而無疑若夫發乎情性充乎天地見乎事業忠憤感激憂思深遠一念不忘君先生之志且有當世巨公爲之發揮非師尹敢任淳熙十有四年臘月幾望門人迪功郎監嚴州在城都稅務括蒼鄭師尹謹書

宋板翻雕

跋

先太史之文於古則詩書左氏莊騷史漢于唐則韓昌黎于本朝則曾南豐是所取法然稟賦宏大造詣深遠故落筆成文則卓然自爲一家人莫測其涯涘蓋今學者皆熟誦劍南之詩續彙隆家藏世亦多傳寫惟遺文自先太史未病時故已編輯而名以渭南矣第學者多未之見今別爲五十卷凡命名及次第之旨皆出遺意今不敢紊乃鈔梓溧陽學宮以廣其傳渭南者晚封渭南伯乃自號爲陸渭南嘗謂子適曰劍南乃詩家事不可施於文故別名渭南如入蜀記牡丹譜樂府詞本當別行而異時或其散失宜用廬陵所刊歐陽公集例附于集後此皆子適嘗有疑而請問者故備著于此嘉定十有三年十一月壬寅幼子承事郎知建康府溧陽縣主管勸農事子適謹書

故翁富于文辭諸體具備惜其集罕見于世馬氏通考載渭南集三十卷今不傳邇來吳中士夫有抄而秘其本者亦頗無詮次紹興郡有刻本去入蜀記溷增詩九卷據翁命于云詩家事不可施于文况十僅一二耶旣得光祿華君活字印本渭南文集五十卷乃嘉定中翁幼子適編輯也跋云命名次第皆出遺意但活板多謬多遺因嚴加讎訂并付剞劂自秋徂冬凡六月而書成湖南毛晉記

渭南文集總目

卷第一

表二十首

卷第二

南宮表牋二十五首

卷第三

劉子十首

卷第四

劉子十二首

卷第五

奏狀八首

卷第六

啓十二首

卷第七

啓十六首

卷第八

啓十六首

卷第九

啓十六首

卷第十

啓十七首

卷第十一

啓二十三首

卷第十二

啓十五首

卷第十三

書九首

卷第十四

序十七首

卷第十五

序十七首

卷第十六

牋七首

碑六首

卷第十七

記十三首

卷第十八

記十一首

卷第十九

記十首

卷第二十

記十首

卷第二十一

記十首

卷第二十二

銘七首

卷第二十三

傳三首

卷第二十四

疏二十一首

卷第二十五

疏二十九首

卷第二十六

勸農文三首

卷第二十七

跋四十首

卷第二十八

跋四十九首

卷第二十九

跋四十一首

卷第三十

跋四十一首

卷第三十一

跋四十首

卷第三十一

青詞六首

贊二十四首

祝文二十三首

雜書十二首

跋四十七首
卷第三十二

墓誌銘四首
卷第三十三

墓誌銘五首
卷第三十四

墓誌銘四首
卷第三十五

墓誌銘三首
卷第三十六

墓誌銘六首
卷第三十七

墓誌銘五首
卷第三十八

墓誌銘四首
卷第三十九

墓誌銘二首
擴記一首

卷第四十
槍銘八首

卷第四十一
祭文二十一首

卷第四十二
天彭牡丹譜

致語六首
卷第四十三

入蜀記第一
卷第四十四

入蜀記第二
卷第四十五

入蜀記第三
卷第四十六

入蜀記第四
卷第四十八

入蜀記第五
卷第四十九

入蜀記第六
詞六十七首

卷第五十
詞六十三首

渭南文集目錄

卷第一

天申節賀表

會慶節賀表
瑞慶節賀表

又
光宗冊寶賀表
皇太子受冊賀表

皇帝御正殿賀表
賀明堂表

謝明堂赦表
謝賜曆日表

謝赦表

又
福建到任謝表
嚴州到任謝表

江西到任謝表
除寶護閣待制謝表

轉太中大夫謝表
落職謝表

謝致仕表
逆曦授首稱賀表

光宗冊寶賀太皇太后牋
皇帝御正殿賀皇后牋

皇帝御正殿賀皇太子牋
皇太子受冊賀皇后牋

賀皇太子受冊牋
逆曦授首賀太皇太后牋
逆曦授首賀皇后牋

渭南文集卷第一

宋陸游務觀

天申節賀表

化國之日舒以長運啓千齡之盛天子有父尊之至
心均萬寓之驩敢即昌期虔申壽祝中實恭惟太上
皇帝陛下宅心清靜受命溥將協氣熏爲太平華夷
銜莫報之德孫謀以燕翼子宗社後無疆之休誕敷
錫於下民丕靈承於上帝臣方馳使傳阻綴朝班望
睥表於雲霄敢恨微蹤之遠被頌聲於金石尚希薄
技之陳

會慶節賀表

有王者興爰啓不平之運使聖人壽敢忘胥戴之誠
中實恭惟皇帝陛下蕩乎無名建其有極于戈載戢
恩加遼碣之區固圉一空沿格成康之上斂時百福
享國萬年臣迹滯遐陬心馳魏闕紀虹渚電樞之慶
莫厠諸儒演龍宮葢笈之文徒修故事

又

帝生商而立子有開必先民戴舜以同心無遠弗屆
乾端肇開嶽貢交修中實臣早以湖海之微生親見
唐虞之盛典蓬轉逾二十年之久每注想於冕旒嵩
呼上千萬壽之時獨阻陪於簪笏茲膺郡寄復在王
畿日瞻佳氣之鬱葱耳聽驩聲之洋溢永言疎賤已
極光榮恭惟皇帝陛下煥乎其有竟文粲然而興周
道三朝圖籍將還榮河温洛之都萬里車書已軼碣
石榆林之壤以仁政廣華夷之德澤以豐年奉郊廟
之牲牲凡曰含齒戴髮之儔均被淪肌浹髓之賜光
御無疆之曆益培有永之年臣猥以分符莫遑造闕
簫韶方奏徒傾就日之心歌頌可陳尚刻齊天之石

瑞慶節賀表

虹流電繞適當聖作之辰鼂抃嵩呼共效壽祺之祝

敢傾丹悃仰扣睿聰中實恭惟皇帝陛下德當乾符
躬有聖瑞東漸西被偉聲教之混同上際下蟠極仁
恩之滲漉帝生商而立子民戴舜以同心歷考前聞
孰逾盛際臣生逢千載仕歷四朝獻貢川珍猥預駭
奔之末焉飛魚躍永依洪造之中

光宗冊寶賀表

龜食簞從考廟方嚴於典冊仗全樂備都人咸覲於
禮容聖教茂昭驩聲旁達中實恭惟皇帝陛下道參
穹壤德肖祖宗稽周王小慈之求躬虞帝終身之慕
父傳歸子有光盛舉於兩朝天定勝人果見太平於
今日乃咨元老大臣之參訂兼采議郎博士之討論
勒崇垂鴻極高蟠厚臣在列觀龍飛之日紬書奏麟
趾之篇際遇特殊等夷罕及既莫預曲臺之議又阻
從屬車之塵徒有悃誠形於夢想

皇帝御正殿賀表

肅傳清蹕端御昕朝德上際而下蟠澤東漸而西被
中實恭惟皇帝陛下體天廣覆如日正中率禮無違
永敷歲月遷流之速嚮明而洽勉富臣民愛戴之心
諏太史涓吉之辰采奉常縣蕤之議對揚宗社之福
爰舉公卿之觴兩曜清明四方抃舞臣農疇齒耄帝
所夢遙華衣光臨雖莫望火龍黼黻之盛黃麾備設
尚想聞金石絲竹之音

皇太子受冊賀表

明詔建儲永爲宗社之本正衝發策顯畚神祇之心
國勢奠安輿情闡澤中實恭惟皇帝陛下若稽古訓
駁惠先猷壽考億年誕膺不蔽之福本支萬世坐擁
無疆之休存心養性以事天修身齊家而治國迨舉
有邦之慶益昭知子之明臣跡遠周行心馳魏闕命
太史卜日之吉徒聞播告之傳遺上公持節以行莫
預觀瞻之盛儻未辭於聖代尚自力於聲詩

賀明堂表

農扈屢豐協氣方流於縣宇合宮大享曠儀遂舉於

中天輝置星馳嵩呼雷動伏以聖神在御祈報間行肆嚴長至之祠一舉上辛之典惟茲宗祀實在季秋既得萬國之驩心宜罄一精之嘉薦中賀恭惟皇帝陛下範圍元化斧藻太平采皇祐之舊章茂建中和之極稽紹興之新制用適古今之宜上帝顧歆殊休叢委臣官庶遐徵心繫明廷考漢家汶上之圖嗟莫陪於潤色繼周頌我將之作尚自力於形容

謝明堂赦表

明堂總章舉曠儀於路寢鈞陳羽衛敷大號於端闈德協穹祇春回海縣中謝恭惟皇帝陛下道繩祖武政酌民言乾文仰法於房心肇稱鉅典解澤默符於雷雨一洗衆愆統和天人空虛囹圄臣適乘使傳遠在遐陬奉五百里之驛書徒深龍抃上千萬年之聖壽莫綴鳧趨

謝赦表

宣布仁慈發揚孝治觀人心之鼓舞知天意之協從中謝恭惟皇帝陛下躬舜禹之資履曾閔之行損又損而至道老吾老以及人一日三朝雖極寧親之大養四方萬里尚憂庶獄之亡辜內廣惠心旁流霈澤雨露所被囹圄一空臣適以守藩恭聞孚號雖與民欣戴如瞻咫尺之天然受命禱祈實勞方寸之地

謝賜曆日表

春秋以王而次春不顯體元之妙閏月定時而成歲適當頒曆之辰洽象一新歡聲四溢中謝恭惟皇帝陛下道兼倫制化被堪輿念王業之艱難每急農桑之務察天心之仁愛尤深水旱之憂誠意既孚嘉生並應呼嵩高之萬歲幸觀昌期陳泰階之六符不勝大願

又

詔班新曆雖舉彝章地近清都獨先下拜恩光旁燭小已知榮中謝臣聞堯授人時實前民用漢得天統克協帝心方當重熙累洽之盛時宜謹體元居正之

大典恭惟皇帝陛下凝圖丕赫受命溥將齊七政於璿璣昭示太平之象調四時之玉燭用待來歲之宜爰勅有司以幸天下臣偶叨牧養獲與布宣職思其憂勸課蕃碑於綿力年運而往功名更感於初心

福建到任謝表

咸造在廷甫遂朝宗之願奉使有指遠叨臨遣之榮大造難名餘生曷報中謝伏念臣么然薄命起自窮閭偶以元祐之黨家獲與紹興之朝士真人有作景運方開適當守數息人才之實難顧一時豪傑號召而未至首蒙引對面錫殊科遭逢稀闊之知聳動遐之聽豈期蹇薄旋困沈綿卒繫全度之恩俾獲退藏之分侵尋半世轉徙兩川三為別乘之行再忝專城之寄五十之年已過非復壯心八千之路來歸况如昨夢數陳淺拙應對參差惟謹黜之是宜豈超遷之敢望此蓋伏遇皇帝陛下道兼倫制澤被堪輿念臣留落有年尚未除於狂態憐臣馳驅無地空竊抱於愚忠顧雖末路之孤蹤猶玷外臺之高選臣謹當力思守道深戒疎官禮樂遠有光華既大踰於素望靖共好是正直庶少奮於鴻私

江西到任謝表

疏恩趣召靡待一人之言改命遣行猶備四方之使丹衷欲敘雪涕先傾中謝伏念臣稟資迂愚立身羈縻偶竊犁鉏之餘暇妄窺述作之淵源曩然自力於簡編老之將至過矣見稱於流輩轉而上聞頃入對於燕朝實親承於睿獎然而異恩賜第弗由場屋之選掄特旨造廷非出公卿之論薦已分亟投於閑散豈期重累於生成此蓋伏遇皇帝陛下立賢無方用人唯一洗拘攣之積弊廣收魁傑之遺才施及妄庸亦蒙省錄甫停追詔還男使禮凡曰自結於上知皆俾無蹈於後害海嶽之內纖塵墜露何所用之父母之愛幼子童孫蔑以加此驅馳入境感懼填膺重念臣樸學守株孤身吊影素乏蚍蜉蝥子之助孰為

輪困蟠木之容愴餘日之安歸抱微誠而永歎方天子建中和之極用告成功雖文史近卜祝之間亦思自效尚憑長育不遂棄捐所願預草漢家檢玉之文未敢遽同堯民擊壤之作劓肝自訴伏鑽何辭疾痛飢寒仰而呼天誓靡求於世俗齋戒沐浴可以事帝冀終望於清光

嚴州到任謝表

穿延和之細仗面只尺天佩新定之左符秩二千石叨塵過分感懼交懷中謝臣聞明主恩深書生命薄唐帝之知李白一官不及於生前漢皇之念相如遺稿徒求於身後況如臣輩莫望昔人猥緣一技之卑嘗綴百僚之末雖簪笏久違於昕謁乃姓名猶在於淵衷乘傳來歸兩奉召還之旨懷章欲上亟蒙趣對之榮親降玉音俯憐雪鬢勞其久別蓋寵嘉近侍之所宜勉以屬文實臨遣守臣之未有茲蓋伏遇皇帝陛下睿謀冠古英斷如神肆筆成書千載獨高於聖學刺經作制諸儒絕企於清光以臣夙被化於明時憐臣未廢書於晚歲將激昂其素志故闢略於往愆臣敢不戴使憑使過之恩念有社有民之寄懇棠陰而聽訟期無墜於家聲及瓜戍而代歸尚少酬於君賜

除寶謨閣待制謝表

陪衆雋以登瀛已慙薄陋尾六飛而上雍遽踐高華恩重命輕感深涕實中謝伏念臣材非異稟家本至寒蒼雅遺書守先臣之孤學莊騷奇作誦諸老之舊聞竊慕隱居求志之風尤恥譁世取名之事年運而往道阻且長仕止爲貧適遇四朝之盛際老猶不死遂爲六聖之遺民豈期垂盡之時更被非常之遇置之儒館命以信書特寬尸素之重誅不待汗青而加賞茲蓋伏遇皇帝陛下道兼倫制學備誠明體穹穹厚厚之仁躋蕩蕩魏魏之治風行雷動號令靡隔於幽遐魚躍鳶飛人材不遺於疏賤雖耄期之已迫尚

覆育之愈深臣敢不口誦訓辭心銘德澤入預甘泉之筆稟儻效微勞歸尋杜曲之桑麻終祈洪造

轉太中大夫謝表

信史奏篇獲紀兩朝之盛恩書馳驛躋躋四品之崇方醴賞之既行欲牢辭而弗敢始終忝幸俯仰兢慙中謝伏念臣身出窮閭家承孤學披肺肝而自力雖有素懷賜骸骨以歸休已更累歲昨被出綸之命起參載筆之遊強耗昏廢忘之餘均筆削討論之責食常忘事但憂尸素之當誅成本因人乃以汗青而受寵茲蓋伏遇皇帝陛下奉先思孝守位曰仁夙受命於皇天克肖其德肆纂圖於列聖無疆惟休永懷弓劍之藏每切羹墻之慕爰求遺老俾誦舊聞而臣猥以耄期恭承訓愴愴大父詩書之業久已寂寥讀元豐文獻之言至於感泣雖迫蓋棺之日敢忘結草之酬

謝致仕表

持橐甘泉已竊逢辰之幸挂冠神武又叨歸老之榮加恩俯念於耄年延賞特頒於申命伏讀絲綸之語曷勝犬馬之情中謝伏念臣家本窮閭世承孤學雖遇千齡之盛際初無一日之微勞白首光陰躡冠登臆之選青雲步武亟陪上雍之班屬預奏於信書遂祈歸於故里奉祠雖伏竊食靡安茲涖貢於忱辭始恭承於俞旨至於特捐異數增貴衰門顧令么微獲被榮耀茲蓋伏遇皇帝陛下仁參化育道極範圍繼粟繼肉以養賢才祝嘏祝噓以禮耆耄思正元之朝士寤寐不忘念山陰之老人生存無幾越拘攣於令甲聳觀聽於薦紳簡編有光世類知勤而臣抱病牀第絕望闕廷賤息何能亦忝及親之祿素風未墜豈無報國之期

落職謝表

叨榮罪大念舊恩深僅鐫筆臺之華猶保桑榆之景仰蕙鴻造下愧公言中謝伏念臣本出故家初無他

技每自求於遠宦豈有意於虛名命之多難動輒為
累強起僅餘於數月退歸又閱於六年齒豁頭童心
勦形瘵叫閣請命蒙恩久許其乞骸飾巾待終視世
已同於逆旅敢謂寬平之邦憲尚令漸盡於里居此
蓋伏遇皇帝陛下勵精大猷惠養遺老念臣生當全
盛被六聖之涵濡憐臣仕遇中興荷三宗之識拔雖
名薄責益示殊私臣敢不祗誦訓詞痛懲宿負尸居
餘氣永無再瞻軒陛之期老生常談莫敘仰戴丘山
之意

逆職授首稱賀表

天無私覆實均父母之仁邦有大刑爰下風雷之令
英斷若神明之速成功無辱刻之淹氛稜澄清頌聲
洋溢中賀臣伏以高皇有作王室中興方犬戎窺蜀
以憑陵積驍將奮身而守衛念功無已分闔相承仰
累朝寵數之非常雖舉族糜捐而曷報豈圖小醜自
取參夷僭服自如攻元無憚受封割地已北通獯鬻
之庭置戍奪符欲東扼瞿唐之險罪不勝於擢髮誅
孽貸於闔門肆推曠蕩之恩實自聖神之造恭惟皇
帝陛下德配天地功光祖宗覽圖籍而動容每念兩
京之未復奉廟祧而貫涕不忘九世之深讎蠹茲難
卵之微自投鼎鑊之地人情共憤天討遂加蒞臨以
賜諸侯雖特寬於漢法頭顱之行萬里已大震於戎

莫趨鸛鷺之班

光宗冊寶賀太皇太后牋

諏穀日於清臺著龜九協奉鴻稱於考廟典冊有嚴
慶襲重闈驩騰函寓恭惟太皇太后殿下道同先后
德著累朝閱天下義理之深體坤元光大之盛密扶
睿斷纂修列聖之治功備述先猷啓迪一人之達孝
舉時大典紹國成規臣斂迹還東馳心拱北紳綏雜
逖遙瞻濟濟之賀班宮闕岩巖徒寄區區之夢境

皇帝御正殿賀皇后牋

聖治聿新爰正路朝之御邦儀丕舉實繫內助之功
盛典告成函生胥慶恭惟皇后殿下道隆任奴化洽
邦家方當守之朝羣臣惟聖時克宜中壺之介萬壽
與天同休內騰六寢之驩外副萬方之望臣久違近
著獲遇昌辰聽九賓之臚傳莫陪抃舞望五雲之宮
闕徒極傾輸

皇帝御正殿賀皇太子牋

清蹕肅九賓之儀方臨當寧寶觴奉萬壽之祝允屬
諸宮邦家有光華裔同慶恭惟皇太子殿下道隆孝
友性極誠明以大學為家傳一洗俗儒章句之陋以
密贊為子職豈獨寢門櫛縱之恭相此多儀實先百
辟某久嬰沉疾已迫頹齡想廣殿之崇嚴莫陪禮翼
占前星之明潤徒極傾馳

皇太子受冊賀皇后牋

壺政憂勤協贊上聖登三之治母慈顧復遂開東宮
明兩之祥汗簡光華函生鼓舞恭惟皇后殿下道光
圖史化被宮闈嗣先后之徽音體柔祇之厚載鸛鷺
之降二女允謂盛時周臣之止九人實資內助迨此
建儲之命益知儷極之尊臣自去通班久安故里類
齡耆矣莫陪執玉之趨鉅典煥然不勝拭目之喜

賀皇太子受冊牋

父慈子孝集大慶於我家日吉時良發正衙之顯冊
國勢重於九鼎驩聲達於四方恭惟皇太子殿下秉
德淳明宅心虛靜英姿達識事洞照於幾先強記博
聞言必稽於古訓躬守累朝仁恕之訓日侍兩宮粹
穆之顏歷考古初寶為創見某夙叨四品垂及九齡
為國老農莫筵濟濟鸛鷺之列逢時盛典尚懷區區
犬馬之心

逆職授首賀太皇太后牋

叛臣干紀敢萌負固之心密詔行誅不待崇朝之久
慶關宗社喜溢宮庭臣伏以參井之墟古今重地方

高帝東巡之始寶羣胡南牧之秋爰有驍雄服勞疆
圍惟列聖念功之意每示優隆度故臣誓報之心豈
有窮已蠢茲微孽亦荷異恩入居宿衛之聯出任師
干之寄天所助者順乃懷悖逆之圖人不食其餘自
撥殲夷之譴尚全遺族實出上恩恭惟太皇太后殿
下坤厚資生母儀燕翼每道先朝之家法助成聖主
之性仁慰在天之靈故誅其孥而無赦廣及物之澤
故宥其族而弗疑臣久屏窮閭猶叨近待用三有宅
欣逢湯德之寬於萬斯年莫預堯封之祝

逆曦授首賀皇后牋

逆臣負固上貽正守之憂密詔行誅不待靈旗之指
勳高古昔喜溢宮庭伏以分閭專征本倚世臣之舊
野心叵測輒干邦憲之嚴妖禽自取於覆巢靡草獨
枯於長夏尚加矜貸曲示涵容故雖同產之親止用
徙鄉之典恭惟皇后殿下道光矯納德配坤元待膳
慈闈克謹晨昏之奉焦心中壺每分宵旰之勞及此
成功允爲大慶聳裔夷之觀聽增竹帛之光華臣久
已歸耕莫陪入賀身修家齊國治實由內助之功天
時地利人和行觀外攘之烈

渭南文集卷第一

渭南文集目錄

卷第二

丞相率文武百僚請建重明節表

又

又

立皇后丞相率文武百僚稱賀壽皇表
賀皇帝表
賀皇太后表

賀壽成皇后表
賀皇太后表
文武百僚謝春衣表

重明節明慶寺丞相率百僚啓建道場疏
開起

滿散
進疏

會慶節明慶寺丞相率百僚啓建道場疏
開起

滿散
進疏

文武百僚謝冬衣表
會慶節丞相率文武百僚賀壽皇表

丞相率文武百僚賀至尊壽皇聖帝冬至表
丞相率文武百僚賀皇帝冬至表

丞相率文武百僚請皇帝聽樂表
丞相率文武百僚賀皇太后受冊表

丞相率文武百僚賀壽成皇后受冊表
丞相率文武百僚上皇帝賀三殿受冊表

丞相率文武百僚賀壽皇正日表
丞相率文武百僚賀皇帝正日表

渭南文集卷第二

丞相率文武百僚請建重明節表

飛龍在天方仰君臨之德流虹繞諸實開聖作之祥
宜紀昌辰用彰盛際恭惟皇帝陛下承謨不顯受命
溥將致養三宮備本朝之家法參決萬務得率土之
民心正守初臨積陰頓解於赫明離之象益昭出震
之符臣等不勝大願請以九月四日為重明節伏望
皇帝陛下俯察羣情亟頒俞旨施尊名建顯號修穹
昊發祥之期披皇圖稽帝文伸臣民歸美之報著之
令甲副在有司邦家增光天下幸甚

又

受命若帝之初宜邦彝之悉舉盛德如天之覆豈人
欲之或違比罄忱辭願標令節未回聰聽曷慰羣情
伏以紀千秋之名雖由唐舊允長春之請則在宋興
況今非獨循累代之成規蓋亦以此侈重華之大慶
顯號缺而未講盛日鬱而弗彰謙雖益光禮則未稱
伏望皇帝陛下茂昭鉅典亟發德音漢殿尊榮親奉
玉卮之壽周行扞蹈各陳金鑑之書豈惟光簡冊之
傳寶以副天下之望

又

淵聽未回確爾執謙之意忱辭屢叩歎然歸美之誠
彝典不可以久稽衆心不可以屢拂敢控喁喁之請
再干穆穆之光竊以民之戴君自古有訓禮之飾治
後世尤詳惟大德得其名故因誕彌而紀節雖先王
未之有亦容增益之隨時當渚虹樞電之辰受岳貢
川珍之集乃同常日夫豈人情今者博士議郎固執
於廷秩宗奉常各揚其職必期得請疇敢自安伏望
皇帝陛下聖度兼容大明委照帝辭三祝足昭挹損
之懷臣同一心終冀允俞之命

立皇后丞相率文武百僚稱賀壽皇表

北宮移仗方瞻與子之明中禁止名復奉齊家之訓

化行縣宇驩動羣心中實恭惟至尊壽皇聖帝陛下
盛德日新聖圖天廣雖名持守躬創業垂統之難不
憚憂勤示詒謀燕翼之法乃者獨觀道妙將就葆頤
猶崇朝親發於德音謂初政莫先於內治茂建壺則
所以垂萬世之典常大明人倫所以移四方之風俗
臣等獲塵朝著親奉睿謨發冊昕廷共仰光華之典
稱觴廣殿益深抃舞之情

賀皇帝表

寶運紹開椒塗首建典冊以時而告具著龜協吉而
弗違慶集宮庭懽傳海宇中實伏以聖人有作追參
堯舜禹之盛時壺範增光上配姜任姒之至德矧惟
內助始自初潛稽女史彤管之言廣周南關雎之化
茲正中宮之位號實出壽皇之訓謨玉音誕敷汗簡
登載求於前世邈矣未聞顧家國之榮懷宜神祇之
安樂恭惟皇帝陛下仁參蒼昊德被黔黎永惟大學
齊家之端先誠其意推原春秋謹始之義以御于邦
故當天臨之初務先坤載之厚臣等身逢華旦目覩
彌文燕至祀謀行慶則百男之祐雞鳴問寢敢祝於
萬年之休

賀皇太后牋

聖子問安方極蘭陔之養神孫正內肇新椒掖之華
母道彌尊人情溢喜中實恭惟皇太后殿下抱神以
靜藏心於淵德修蠅娟蠓濩之中化行崑崙磅礪之
外唐虞盛際迺出一家父子之親任姒徽音仍見三
朝婦姑之法方且享宗社奠安之福視本支蕃衍之
祥於古有光與天無極臣等幸逢熙運獲綴清班至
哉坤元寶首彝倫之敘養以天下益觀孝治之隆

賀壽成皇后牋

盛德繼承爰本親傳之妙中宮崇建式光就養之尊
慶集禁庭驪傳海宇中實恭惟壽成皇后殿下婦功
飭備母道含洪躬老氏之儉慈享周家之福祿密贊
乾剛之斷神器有歸助成離照之明天心允當惟每

思於靜順故備極於安榮衰龍兼綵服之紆綸翟煥
玉后之奉貴無倫敵日以舒長簡冊燁其有光風俗
為之不變臣等偶逢熙運獲相多儀坤順承天喜徵
音之克嗣孫又有子知壽祉之無窮

賀皇后牋

誕受丕基方正宁凝旒之始協修陰教舉路朝發冊
之儀厚載有光羣情咸悅中實恭惟皇后殿下慶鍾
勳闕道媿皇家輔佐積勤實自龍潛之日休祥有衍
早符熊夢之占壽皇所以親發於德音聖主所以深
資於內助副筭奉三殿之養大練受六宮之朝震耀
簡編感移風俗臣等預聞鉅典實激歡欣法地所以
法天仰戴坤儀之至德事母同之事父曷勝鰲抃之
微誠

文武百寮謝春衣表

寶運紹開方謹人時之授寵光下逮俾均春服之成
榮被簪紳歡騰拜舞中謝恭惟皇帝陛下凝圖丕赫
撫運重熙租稅所儲靡專一己之奉寒暑有賜式厚
羣臣之恩所以恤其淋濯之私蓋將責其忠嘉之報
雖舊章之是舉實初政之當先臣等獲綴班聯恭承
錫予去女工之蠹已觀府庫之充遺天下之衣願廣
乾坤之施

重明節明慶寺丞相率百僚啓建道場疏

開起
乾端澄肅時爰及於杪秋離照光明運方隆於中夏
敢輸誠悃仰祝壽齡皇帝陛下恭願宜君宜王時萬
時億泰元增漢帝之筵配天其休洪範錫神禹之疇
與民同福

滿敬

肅霜協令方觀萬寶之成繞電告祥實契千齡之會
飭供既周於月律殫誠爰集於廷紳冀憑薰被之勤
仰報照臨之德皇帝陛下恭願政敷有截壽格無疆
天地人之三才共扶興運堯舜禹之一道永庇函生

進疏

大易明兩作離允符繼照之盛太極函三為一誕擁
無疆之休壽何待於禱祠運自臻於熙洽恭演仙真
之秘旨實輸臣子之至情皇帝陛下恭願化旨羣倫
洽偕邃古奉親備天下之養履位處域中之尊至誠
之道可以前知方卜億萬年之永命諸福之物莫不
畢至豈止百千所之上聞

會慶節明慶寺丞相率百僚啓建道場疏

開起
有開必先天地肇興於景運無遠弗屆華夷畢効於
貢琛況在周行敢稽壽祝至尊壽皇聖帝陛下伏願
道超古昔化洽黔黎端居無黃屋之心既高揖遜萬
樂致綵衣之養彌極尊榮

滿敬

電樞肇紀適逢震夙之期月琯告周沆罄延鴻之禱
雖嘉祥之自至願歸美之敢稽至尊壽皇聖帝陛下
伏願福等河沙壽踰劫石堯仁舜孝洽功永煥於青
編天大佛尊睟表長臨於黼辰

進疏

天為羣物之祖可謂極尊壽居五福之先實歸上聖
脫屣親傳於大寶頤神方御於殊庭敢率羣倫恭培
睿算至尊壽皇聖帝陛下伏願誕膺戩穀端拱穆清
以八千歲而為春永享舒長之景卜七百年而過曆
茂隆貽燕之祥

文武百僚謝冬衣表

霜露既降著孟冬始裘之文法制具存舉九月授衣
之令進趨襜翼拜舞光華中謝恭惟皇帝陛下大度
并包至仁滲漉及是月初有祁寒之虞念無衣兮
俾膺好賜之厚疏恩榮於在列斥府庫之餘藏臣等
誤荷選掄獲霑錫予親萬里農桑之業共樂時平誦
羣臣幣帛之詩誓圖忠報

會慶節丞相率文武百僚賀壽皇表

錫羨無疆不顯生商之日成功不處適當命禹之時
熙運親逢羣情胥慶中賀恭惟至尊壽皇聖帝陛下
仁涵動植道配堪輿詩書所稱何有加卓爾規模之
大唐虞之際斯爲盛超然揖遜之風積勤致王業之
成端拱視天民之阜豈特極高而蟠厚固已勒崇而
垂鴻臣等誤寘周行久陶聖化蓬萊隔弱水三萬里
獲進謁於殊庭上古有大椿八千秋冀默符於睿算

丞相率文武百僚賀至尊壽皇聖帝冬至表

化國之日舒以長一陽初復天子之父尊之至萬壽
維祺亞歲肇新羣心胥悅中賀恭惟至尊壽皇聖帝
陛下道兼倫制化極範圍剛長而亨周測土圭之景
功成則退亮無黃屋之心薰然慈孝之兼隆允矣古
今之莫及方且內享視膳問安之大養外騰重熙累
洽之頌聲風動華夷光昭竹帛臣等幸逢盛際獲造
昕廷斗建子以定時是爲嘉會星拱辰而在列同罄
丹誠

丞相率文武百僚賀皇帝冬至表

一之日以授時黃鐘合律萬斯年而介福亦伏膺符
慶集邦家驩騰海寓中賀恭惟皇帝陛下仁同乾覆
道協時葉日復日以重光邦圖有永新又新而不倦
帝德難名默觀造化之機自得財成之妙清心省事
成歸根反本之功任賢去邪體進陽消陰之象臣等
幸逢熙運獲邁威顏和氣先回豈待葭灰之應豐年
已兆敢陳雲物之占

丞相率文武百僚請皇帝聽樂表

祖廟寧神歲游更於燧火禮經有制時當備於簫韶
敢控微衷上千淵聽伏以中月而禱壽皇已循不易
之規逾年改元聖主方受惟新之命儻未舉鈞天之
奏何以慰率土之懷伏望皇帝陛下俯察忱辭仰稽
故典欲聞五聲八音六律以復朝廷之常親帥三公
九卿諸侯共致慈闈之請笙鏞以間而人神喜琴瑟
在御而心體安茂昭庶政之惟和孰謂太平之無象

奉萬年之觴於廣殿及此首春撞千石之鐘於大庭
震於四海

丞相率文武百僚賀皇太后受冊牋

獻歲發春太史奏元龜之吉展案錯事東朝慶大典
之成佳氣一新驩聲四溢中賀恭惟壽皇聖太后殿
下聰明睿智壽富康寧踐履艱難佐高廟廓清之烈
遵行恭儉啓壽皇詒燕之圖肆因初元祗奉顯冊璽
篆蟲魚之古樂陳鐘磬之和內而百官有司方屏息
而觀盛事外則萬方黎獻咸拜手而頌閑休載稽前
聞可謂盡美臣等偶叨在列獲際升平有子而又有
孫共仰本支之盛視今猶之視昔前知竹帛之傳

丞相率文武百僚賀壽成皇后受冊牋

宮壺塗椒德配重華之盛冊書鏤玉禮行路寢之嚴
聖孝益隆輿情交慶中賀恭惟壽成皇后殿下儉慈
性稟柔順躬行至哉坤元象服早光於內治養以天
下寢門方奉於母儀今者稽參六籍之文博盡諸儒
之議建此顯號邁於前聞仰惟貴無敵而富無倫是
謂仁之至而義之盡臣等偶緣在列獲遂逢時紀媿
泐塗山之興幸窺簡牘繼生民思齊之作尚播聲詩
丞相率文武百僚上皇帝賀三殿受冊表

重慶有光仰東朝之慈愛雙親竝奉極北內之尊榮

正歲肇新彌文告備邦家之喜夷夏所同中賀伏以
堯舜禹之相承蓋非一姓姜任奴之善繼又不同時
參稽前聞孰擬昭代恭惟皇帝陛下奄有萬寓統和
三靈由至公大義膺寶運之傳講授威盛咨仲天下
之養太史灼龜而獻兆曲臺縣籙而具儀黃麾之仗
夙陳警紳在列白玉之冊時舉金石充庭既已隆孝
道而通神明固將禮高年而厚風俗新又新而進德
老吾老以及人臣等誤被選掄獲塵班著雖潤色討
論於大典每慙稽古之疎然登降跪拜於路朝實竊
逢辰之幸

丞相率文武百僚賀壽皇正旦表

道妙混成太極著兩儀之本天端更始三朝受萬國
之歸慶集有邦歡騰率土中賀恭惟至尊壽皇聖帝
陛下睿哲稽古清明在躬握乾符闡坤珍難名蕩蕩
之德系唐統接漢緒誕受丕丕之基以海宇之富而
蹈巢由高世之風以父子之親而行堯舜曠代之事
迨此獻歲發春之日實繫攷圖數貢之時史冊增華
摺紳太息臣等幸承睿獎獲親昌期鵬行畢集於大
庭共喜威顏之近龍袞恪趨於小次更知榮養之尊

丞相率文武百僚賀皇帝正旦表

堯授舜舜授禹方瞻繼照之明正次王王次春茂舉
履端之慶乾坤開闢日月光華中賀恭惟皇帝陛下
德上際而下蟠化東漸而西被改元定號稽列聖之
舊章發政施仁撫重熙之景運內有可封之俗外無
不讓之戎方且采諸儒之議以制朝儀陳九奏之音
以爲親壽頌朔靡殊於遐邇受圖克拱於穆清治功
卓然海內幸甚臣等誤膺睿獎獲綴通班勩力同心
永惟春秋五始之義拜手稽首敢奏天子萬年之詩

渭南文集目錄

卷第二

蠟彈省劄

論選用西北士大夫劄子

代乞分兵取山東劄子

上二府論事劄子

又 上殿劄子

又

擬上殿劄子

上二府乞勿受慶雲圖劄子

子

上二府論都邑劄子

渭南文集卷第三

蠟彈省劄 癸未二月二府請至都堂撰

朝廷今來特悖大信明大義於天下依周漢諸侯及唐藩鎮故事撫定中原不貪土地不利租賦除相度於唐鄧海泗一帶置關依函谷關外應有據以北州郡歸命者即其所得州郡裂土封建大者爲王帶節度鎮撫大使賜玉帶金魚塗金銀印其次爲郡王帶節度鎮撫使賜笏頭金帶金魚塗金銅印仍各賜鐵券旌節門戟從物元係蕃中姓名者仍賜姓名各以長子爲節度鎮撫留後世世襲封永無窮已餘子弟聽奏充部內防團刺史亦令久任將佐比類金人官制升等換授其國置國相一員委本國選擇保奏當降真命餘官准此七品以下聽便宜辟除土地所出並許截留充賞給軍兵祿養官吏等用更不上供每歲正旦一朝三年大禮一助祭如有故聽遺留後或國相代行天申會慶節止遣國官一員將命應刑獄生殺並委本國照紹興勅令參酌施行更不奏案合行軍法者自從軍法四京各用近畿大國兼充留守朝廷惟於春季遣使朝陵餘時止用本處官吏侍祠每遇朝貢當議厚給茶紙香藥等充回賜以示撫存遇一國有警急諸國迭相救援如開斥生地俘獲金寶並就賜本國仍永不置監司帥臣及監軍等官候議定各遣子弟一人入覲當特賜燕勞畢即時遣回機會之來時不可失各宜勇決以稱朝廷開納之意

論選用西北士大夫劄子

臣伏聞天聖以前選用人才多取北人寇準持之尤力故南方士大夫沉抑者多仁宗皇帝照知其弊公聽並觀兼收博采無南北之異於是范仲淹起於吳歐陽修起於楚蔡襄起於閩杜衍起於會稽余靖起於嶺南皆爲一時名臣號稱聖宋得人之盛及紹聖崇寧間取南人更多而北方士大夫復有沉抑之數

陳瓘獨見其弊昌言於朝曰重南輕北分裂有萌嗚呼瓘之言天下之至言也臣伏觀方今雖中原未復然往者衣冠南渡蓋亦衆矣其間豈無抱才術蘊器識者而班列之閒北人鮮少甚非示天下以廣之道也欲望聖慈命大臣近臣各舉趙魏齊魯秦晉之遺才以漸試用拔其尤者而任之庶上遵仁祖用人之法下慰遺民思舊之心其於國家必將有賴伏惟留神省察取進止

代乞分兵取山東劄子

臣等恭觀陛下特發英斷進討京東以爲恢復故疆牽制川陝之謀臣等獲待清光親奉睿旨不勝欣抃然亦有惓惓之愚不敢隱默者竊見傳聞之言多謂虜兵困於西北不復能保京東加之苛虐相承民不堪命王師若至可不勞而取若審如此說則弔伐之兵本不在衆偏師出境百城自下不世之功何患不成萬一未至盡如所傳虜人尚敢旅拒遺民未能自拔則我師雖衆功亦難必而宿師於外守備先虛我猶知出兵京東以牽制川陝彼獨不知侵犯兩淮荆襄以牽制京東邪爲今之計莫若戒敕宣撫司以大兵及舟師十分之九固守江淮控扼要害爲不可動之計以十分之一遴選驍勇有紀律之將使之更迭送入以奇制勝俟徐鄆宋毫等處撫定之後兩淮受敵處少然後漸次擢大兵前進如此則進有闢國拓土之功退無勞師失備之患實天下至計也蓋京東去虜巢萬里彼雖不能守未害其疆兩淮近在畿甸一城被寇尺地陷沒則朝廷之憂復如去歲此臣所以夙夜憂懼寢不能瞑而爲陛下力陳其愚也且富家巨室未嘗不欲利也然其徒欲賈于遠者率不肯以多貲付之其意以爲山行海宿要不可保若傾囊而付一人或一有得失悔其可及哉此言雖小可以喻大願陛下留神察焉臣等誤蒙聖慈待罪樞筦攻守大計實任其責伏惟陛下照其愚忠臣等不勝幸

甚取進止

上二府論事劄子 壬午六月五日

某伏見大理寺奏北界蒙城縣官邢珪罪狀竊緣有司之議據其侵犯邊城殺害義旅雖置極典未足當罪然既已具奏則當有特旨恐與有司之議不可同日而語何者有司謹守律令朝廷當斷以大義故也按邢珪生於涿易非祖宗涵養之人仕於僞界非國家祿使之吏身有官守一日危急力雖不及猶能死守雖憎於逆順不知革面然春秋之義天下之善一也若遂誅之恐非所以勸天下之為人臣者奏陳之際儻為一言貸其草芥微命以示中國禮義實非小補又慮議者以謂張安國殺耿京事與此略同恐啓寬貸之路無以慰歸附之人則某謂不然張安國中國人又嘗受旗勝招安見利而動賊殺耿京反覆姦猾罪惡明白與珪實為不類兼邢珪所犯在未被大赦蕩滌之前張安國所犯在已受旗勝招安之後伏乞鈞察

上殿劄子二首 壬午十一月

臣恭惟陛下天縱聖智生知文武御極之初內出大號所以加惠於海內甚渥猶以為未足也乃八月戊子寬恤之令繼下至誠惻怛纖悉備具歡欣之聲達於遠邇可謂盛矣然今既累月不知有司皆已推而致之民乎若猶未也是不免為空文而已無乃不可乎又有大不可者陛下初即大位乃信詔令以示人之時前日數十條或曰當實典憲或曰當議根治或曰當議顯戮可謂丁寧切至赫然非常之英斷也若復為官吏將帥一切翫習漫不加省一日國家有急陛下詔令戒敕之語將何加此而欲使人捐肝腦以衛社稷乎周官冢宰以正月之吉始和布治於邦國都鄙垂象之法徇以木鐸曰不用法者國有常刑正月周正今之十一月也正歲夏正今之正月也自十一月至正月若未甚久而申敕告戒俟以刑辟已如

此其嚴今命下累月而有司或恬然不以為意臣竊惑之欲望聖慈以所下數十條者申論中外使恪意奉行毋或失墜仍命諫官御史及外臺之臣精加考覈取其尤阻格者與衆棄之不惟聖澤速得下究亦使文武小大之臣聳然知詔令之不可慢如此實聖政之所當先也伏惟留神省察取進止

又

臣聞夏尚忠商尚質周尚文三者迭用非以為異因時制宜有不得不然者臣竊觀太祖太宗之世法度典章廣大簡易律令可以禁奸無滋彰之患文移可直誠意洞達所詳者大所略者小事易舉功易成其氣象風俗人物議論至於今可考也太平既久日趨於文放而不還末流愈遠浮虛失實華藻害道雖號為粲然備具而文移書判增至數倍居官者窮日之力實不暇給猾吏奸人乘隙以逞其始也所詳者小所略者大其極也并小者不復能詳則一切鹵莽聽吏之所為而已太上皇帝中興大業當寧數息思有以救之於是漸加訂正以還其舊兩省復通為一以革迂滯之風寺監裁省其半以去支離之害簡禮容刪律令規模措置蓋欲悉除繁文復從祖宗之質而後已有司奉承未能盡如本指此陛下今日所當力行不可緩也臣愚欲望聖慈明詔輔臣使帥其屬因今六曹寺監百執事所掌講求祖宗舊制以趨於廣大簡易之域繁碎重複無益實事者一皆省去使小大之臣咸有餘力以察奸去蠹修舉其職則太平之基自此立矣元祐中司馬光請改三省職事一如昔日中書之制蘇轍亦請收昔日三司之權悉歸戶部則臣所謂因今所掌以求祖宗舊制誠不為難願陛下力行何如爾干冒天聽伏深戰慄取進止

又

臣竊觀周自后稷公劉以來積德深遠卜世長久為

之子孫者宜皆取法焉然而獨曰儀刑文王又曰儀式刑文王之典漢自高帝創業其後嗣亦多賢君然史臣獨曰漢言文景美矣至武帝之功烈猶以不遵文景之恭儉爲恨唐三百年一祖三宗皆號盛世而太宗正觀政要之書獨傳寶以爲大訓元祐中學士范祖禹亦曰祖宗畏天愛民子孫皆當取法惟仁宗在位最久德澤深厚結於天下誠能專法仁宗則成康之隆不難致也嗚呼祖禹之言天下之至言也迨我太上皇帝躬履艱難慨然下詔專法仁祖之政且竊聞燕閑惟考觀仁祖政事是以於萬斯年無疆惟休亦享仁祖垂拱之福可請盛矣陛下紹休聖緒正當師太上專法仁祖之意申命邁英進讀之臣日以寶訓反覆敷繹以究微意仍命輔臣政事法度一以仁祖爲法臣將見陛下福祿川至治效日見年穀屢豐四夷率服慶曆皇祐之盛復見於今雖遐方絕壤皆當梯航而至矣況中原故地其有不復者哉臣不勝至願伏惟聖慈留神省察取進止

擬上殿劄子 壬午准備輪對會內禪遂不果上

臣觀小豨之詩見成王孜孜求助特在初載意其臨天下之久閱義理之多則當默識獨斷雖無待於羣臣可也及考之書然後知其不然舜伐三苗年九十有三聞伯益一言則退而敷文德舞干羽無一毫自用之意武王受貢鬻年九十有一召公作訓累數百言武王納之不以爲過嗚呼爲人臣而不以舜武王望其君者不恭其君也伏以陛下生知之聖度越百王稽古之學博極墳典歷試諸難身濟大業更事閱理多矣自公卿大臣皆陛下四十年教養所成況於小儒賤士見聞淺陋曾何足以仰清光備顧問哉然其所陳則未必無尺寸之長何者舉吏部之籍搢紳之士幾人其得見君父者幾人白首州縣而不得一望闕門者多矣則凡進見之人固宜夙夜殫思竭誠以幸千載之遇雖其間有論事梗野不達大體者究

其設心亦願際會犯威顏以徇俗捨富貴以取名臣竊謂無是理也欲望陛下昭然無置疑於聖心克己以來之虛心以受之不憚捨短而取長以求千慮之一得庶幾下情得以畢達羣臣無伯益召公之賢陛下以舜武王之心爲心則是聖德巍巍過於舜武王矣如其屈萬棄之尊躬日昃之勞顧於疎遠之言無大施用姑以天地之度容之而已是獨言者一身之幸也干冒天威臣無任惶怖俟罪之至

上二府乞勿受慶雲圖劄子 癸未春

伏觀尚書省劄子知閩州呂游問奏慶雲見并圖一軸奉聖旨降付編類聖政所仰見主上聖孝推美太上皇帝之心然竊聞太上皇帝建炎之初京東進芝草親詔却之盛德煌煌光映簡冊今乃以慶雲見爲聖政恐非太上皇帝之本意兼閩州所奏專以慶雲見於普安郡及在主上卽位前一日爲受命之符諛佞牽合不識大體政與京東芝草相類若受而不却雖不報行其誰不知深恐自此草木之妖氛氣之怪緯候之說歌頌之文紛紛來上却之則自啓其端不却則遂將成俗欲望鈞慈以太上皇帝却芝草故事委曲奏陳主上剛明英斷必有以處此矣干冒鈞嚴不勝恐怖之至

上二府論都邑劄子

某自頃奏記迨今累月自顧賤愚不肖無尺寸可以上補聰明而徒以無益之事上勤省閱實有罪焉故久不敢以姓名徹左右今者偶有拳拳之愚竊謂相公所宜聞者伏冀少留觀覽幸甚幸甚伏聞北虜累書請和仰惟主上聖武相公威名震疊殊方足以致此而天下又方厭兵勢且姑從之矣然某聞江左自吳以來未有捨建康他郡者吳嘗都武昌梁嘗都荆渚南唐嘗都洪州當時爲計必以建康距江不遠故求深固之地然皆成而復毀居而復徙甚者遂至於敗亡相公以爲此何哉天造地設山川形勢有不可

易者也車駕駐蹕臨安出於權宜本非定都以形勢則不固以餽餉則不便海道逼近凜然常有意外之憂至於讖緯俗語則固所不論也今一和之後盟誓已立動有拘礙雖欲營繕勢將難難某竊謂及今當與之約建康臨安皆係駐蹕之地北使朝聘或就建康或就臨安如此則我得以閑暇之際建都立國而彼既素聞不自疑沮黠虜欲借以爲辭亦有不可者矣今不爲後且噬臍至於都邑措置當有節目若相公以爲然某且有以繼進其說不一二年不拔之基立矣某智術淺短不足以議大計然受知之深不敢自以疎遠爲疑干冒鈞聽下情恐懼之至

渭南文集卷第三

渭南文集目錄
卷第四

又 上殿劄子

又 乞祠祿劄子

又 上殿劄子

又 又

又 除修史上殿劄子

又 乞致仕劄子

渭南文集卷第四

上殿劄子

臣聞善觀人之國者無他惟公道行與否爾書曰毋
虐於獨而畏高明詩曰柔亦不茹剛亦不吐此為國
之要也若夫虐於獨畏高明茹柔吐剛而能使天下
治者自古未之有也朝廷之體責大臣宜詳責小臣
宜略郡縣之政治大姓宜詳治小民宜略賦斂之事
宜先富室征稅之事宜覈大商是之謂至平是之謂
至公行之一邑則一邑治行之一郡則一郡治行之
天下而治不逮於古者萬無是理也伏見朝廷頃因
人言必顯有功狀乃畀職名行之數年而大臣近侍
不得職者幾人帥臣監司之加職者又比比而有至
於銓曹格法所以厄小官者則未嘗少弛張也慶典
之行所及至廣貼職以上例皆甄復雖阿附秦氏得
罪者亦在焉至於常調孤遠固多久挂刑憲者今更
赦令雖使皆得霽被銓法拘擥必不如是之曠蕩也
無乃責大吏反略而責小臣反詳乎郡縣之吏不能
自立觀望揣摩惟強是畏豪右雖犯重辟官吏貪者
黠者則公與之為市廉者懦者則又自營曰得無反
為所害乎凡嫁禍平人誣罪僮奴者皆有司為之道
地也凶年饑歲雖貧富俱病然富者利源至多貧者
惟守田畝孰為當恤視郡縣之庭鞭笞流血扭械被
體者皆貧民也吳蜀萬里關征相望富商大賈先期
遣人懷金錢以賂津吏大舸重載通行無苦終更小
官造廷進士垂橐蕭然齋糧有限而稽留苛暴略不
之恤如是謂之平可乎謂之公可乎臣味死伏望陛
下推至平至公之道自朝廷始然後下詔戒赦四方
而繼之以誅賞不過歲月治效自見惟在陛下執之
重如山嶽堅若金石爾苟卿論闢國之說曰兼并易
能也堅凝之難夫豈獨兼并哉凡為政施行之甚易
堅凝之甚難臣區區之言陛下或以為萬有一可采

焉敢併以堅凝為獻取進止

又

臣伏讀御製蘇軾贊有曰手抉雲漢韓造化機氣高
天下乃克為之嗚呼陛下之言典謨也軾死且九十
年學士大夫徒知尊誦其文而未有知其文之妙在
於氣高天下者今陛下獨表而出之豈惟軾死且不
朽所以遺學者顧不厚哉然臣竊謂天下萬事皆當
以氣為主軾特用之於文爾趙普氣蓋諸國故能成
混一之功寇準氣吞醜虜故能成却敵之功范仲淹
氣壓靈夏故西討而元昊款伏狄青氣懾嶺海故南
征而智高殄滅至於韓琦富弼文彥博之勳勞唐玠
包拯孔道輔之風節大抵以氣為主而已蓋氣勝事
則事舉氣勝敵則敵服勇者之鬪富者之博非有他
也直以氣勝之耳今天下才者衆矣而臣猶有憂者
正以任重道遠之氣未能盡及古人也方無事時亦
何所賴此一日或有非常陛下擇羣臣使之假鉞而
董二軍擁節而論萬里雖得賢厚篤實之士氣不素
養臨事惶遽心動色變則其舉措豈不誤陛下事耶
伏望萬機之餘留神於此作而起之毋使委靡養而
成之毋使沮折及乎人才爭奮士氣日倍則緩急惟
陛下所使而已且吳蜀閩楚之俗其渾厚勁朴固已
不及中原矣若夫日趨於拘窘怯薄之域臣實懼國
勢之寢弱也不勝私憂犯分獻言恭惟陛下裁赦取
進止

又

臣聞天下有無窮之變而有必然之理惟默觀陰察
能得其理則事變之來雖千態萬狀可以坐制而無
虞矣天下之變最幽眇倉卒不可測知者莫如雷震
鬼物然雷震冬伏而春作鬼物晝隱而夜見則其理
之必然有不待智者而知之矣今朝廷內無權家世
臣外無強藩悍將所慮之變惟一金虜虜禽獸也謫
詐反覆雖其族類有不能測而臣竊以謂是亦有可

必知者夫何故寬猛之相繼如寒暑晝夜之必相代也故自金虜猖獗以來靖康建炎之間窮凶極暴則有紹興之和通和既久則有辛巳之寇寇而敗亡則又有隆興之和今邊陲晏然袍鼓不作逾二十年與紹興通和之歲月略相若矣不知此虜終守和約至數百年而終不變邪將如晝夜寒暑必相代也且虜非中國比也無若臣之禮無骨肉之恩惟制之以力劫之以威則虜能少定今力備勢削有亂而已其亂不起於骨肉相殘則起於權臣專命又不然則奸雄襲而取之耳三者有一焉反虜酋之政以悅其國人且何為哉雖陛下聰明英睿自有所處然臣竊觀士大夫之私論則往往幸虜之懦以為安不知通和已二十餘年如歲且秋矣而謂衣裘為不必備豈不殆哉大抵邊境之備方無事時觀之事事常若有餘一日有變乃知不足伏望陛下與腹心之臣力圖大計宵旰弗怠繕修兵備搜拔人才明號令信賞罰常如羽書狎至兵鋒已交之日使虜果有變大則掃清燕代復列聖之讎次則平定河洛慰父老之望豈可復如辛巳倉卒之際斂兵保江凜然更以宗社為憂邪臣世食君祿且蒙陛下省錄姓名已二十餘年念無以報天地父母之大恩故其陳於陛下者惟懼不盡而不知狂愚之為大罪也取進止

乞祠祿劄子 戊申四月

照對某昨任主管成都府玉局觀將滿陳乞再任蒙恩差知嚴州於淳熙十三年七月三日到任郡政乖刺雨澤不時上勞宵旰死有餘責賴蒙朝廷哀矜山郡瘠土之民重賜蠲放廣行賑恤上格和氣下安衆心入秋得雨陸種倍收六縣並無流徙人戶今春以來雨暘尤為調適二麥繼熟民間亦以為所收倍於常年賑濟訖事稍紓吏責某雖去替不遠實緣年歲衰邁氣血凋耗夏秋之際痼疾多作欲望鈞慈特賜矜憫許令復就玉局微祿養病故山及天氣尚涼早

得就道實為至幸

上殿劄子

臣恭惟陛下躬聖人之資履天子之位而致養三宮承顏左右盛事赫奕冠映千古尚何待塵露之增山海哉願臣竊抱惓惓之愚不敢輒默伏惟陛下聖孝純至稟於天性昔在潛邸及登儲宮以來夙夜孜孜何嘗頃刻不以壽皇為心壽皇罷朝而悅進膳而笑則陛下欣然喜動於色壽皇罷朝而不悅進膳而少味則陛下愀然憂見於色方是時徒能喜之憂之而已今則致親之悅者責在陛下其可以不深念乎所謂悅親之道非薦旨甘奉輕暖也非晨昏定省冬夏溫清也非千門萬戶之宮鈞天簫韶之樂也惟在陛下得天下之愛戴以寧壽皇之心而已雞鳴而攬衣辨色而視朝必曰此昔者問安之時也今以萬機之繁不能日朝重華歉然於懷豈有限極然闕問安之常禮之小也致天下之治孝之大也吾其力為其大者乎此固壽皇所望於陛下亦天下所望於陛下也治功已成中外無事陛下時備法駕率羣臣上萬年之觴豈非天下之大慶不然太史或以災異上聞四方或以寇盜來告壽皇聞之萬分有一微輟玉食陛下雖居萬乘之貴孰與解憂哉臣昧死願陛下於進退人才罷行政事之際率以是為念自三思十思以至百思不為過也自一日五六日至於旬日不為緩也謀及卜筮謀及卿士謀及庶人不為廣也一有小失豈獨上勞宵旰壽皇亦與焉故陛下今日憂勤恭儉百倍於古帝王乃僅可耳譬如臣民之家上有尊親則所以交四隣訓子弟備饑饉禦盜賊比之他人自當謹戒百倍何則彼亦懼憂之及其親也犬馬小臣貪於增廣聖孝不知言之涉於狂妄犯天威伏候斧鉞

又

臣聞詩曰上天之載無聲無臭人君與天同德惟當

清心省事澹然虛靜損之又損至於無爲大臣不得而窺所好則希合苟容之害息小臣不得而窺所好則諂諛側媚之風止不以從其所好而加賞則儉人伏不以逆其所好而加罪則端士進玩好無益之物不好則不接於目詎諧敗度之言不好則不聞於耳大抵危亂之根本讒巧之機芽奸邪之罅隙皆緣所好而生臣下雖有所偏好而或未至大害者無奉之者也人君則不然絲毫之念形於中心雖未嘗以告人而九州四海已悉向之矣況發於命令見於事爲乎且嗜好之爲害不獨聲色狗馬宮室寶玉之類也好儒生而不得真則張禹之徒足以爲亂階好文士而不責實則韋渠牟之徒足以敗君德其他可推而知矣昔者漢文帝及我仁宗皇帝所以爲萬世帝王之師者惟無所嗜好而已恭惟陛下龍飛御極之初天下傾耳拭目之時所當戒者惟嗜好而已無有作好遵王之道天之所以錫神禹也伏惟陛下留神省察實天下幸甚取進止

上殿劄子 己酉四月十二日

臣聞王者以一人之身臨制四海人情錯出事變遂至惟靜以俟之則心虛而明惟重以持之則體大而正無偏聽之過無輕舉之失天何言哉舜何爲哉後世士大夫學術卑陋識慮褊淺顧謂王者得位必有以聳動天下於是厭常喜新之論興飾智駭俗之政作衆人之所喜而君子之所深憂也臣伏見陛下自在潛邸以至龍飛御宇三十年間天下之事何所不習雖日出百令固亦易爾乃謙恭退託而安靜無爲沉潛淵默而聰明不作上則承壽皇之睿謨下則盡羣臣之公議及乎議有未決徐而斷之政有當行從而舉之理愜事允出臣下思慮之表有心者誠服有口者頌歎則所謂靜與重者陛下既得之矣嗚呼一郡一邑之長視事之始尚且以新奇眩衆以敏速釣名陛下有天下之利勢而不用有聖智之絕識而不

施超越羣倫奚啻萬億而或者方以聳動天下爲獻此固兒童之見而陛下所不取也竊恐羣臣獻此說者寢多雖陛下決不取然臣不勝惓惓愛君之愚忠思有以堅聖心而廣初政昔魏鄭公憂正觀之政漸不克終蘇轍亦謂但如元祐之初足矣若夫進銳退速能動耳目之觀聽而無至誠惻怛之心以終之如明皇之焚錦繡德宗之放馴象實陛下之龜鑑也故臣願陛下圖事揆策不厭於從容行賞議罰無取於快意兢兢業業常如此三月之間則成康文景之盛復見於今日矣犬馬小臣出位妄言冒犯天威臣無

任 又

臣聞天下有定理決不可易者飢必食渴必飲疾必藥暑必簑豈容以他物易之也哉臣伏觀今日之患莫大於民貧救民之貧莫先於輕賦若賦不加輕別求他術則用力雖多終必無益立法雖備終必不行以臣愚計之朝廷若未有深入遠討犁庭掃穴之意能於用度之間事事裁損陛下又躬節儉以勵風俗則賦於民者必有可輕之理緩急之備固不可無姑以歲月徐爲之可也如是則和氣浹洽必無水旱之災驩聲洋溢必無盜賊之警何慮國用之不足邪設使裔夷弗賓侵犯王略所謂率其子弟攻其父母直可舞干羽而格之爾頃者建炎紹興戡定變亂之日一切賦斂有非承平之舊者高宗皇帝宵旰焦勞每欲俟小定而悉除之故詔令布告天下曰惟八世祖宗之澤豈汝能忘顧一時社稷之憂非予獲已止俟捍防之隙首圖蠲省之宜臣幼年親見民誦詔至於感泣雖傾貲以助軍興而不敢愛旋屬國家多故逆亮畔盟雖所蠲已多終未仰稱聖意壽皇聖帝臨御以來所以節用裕民者皆繼承高宗蠲省之指也則陛下今日豈可不以爲先務哉臣昧死欲望聖慈恢大度明遠略詔輔臣計司博盡論議量入而用量

用而取可獨者獨可省者省富藏於民何異府庫果有非常孰不樂輸以報君父淪肌浹髓之恩哉若有事之時既竭其財矣幸而無事又曰儲積以為他日之備也雖恢復中原又將曰邊境日廣矣屯戍日衆矣則斯民困弊何時而已邪瀆犯天威罪當萬死惟陛下裁赦取進止

除修史上殿劄子

臣伏見真宗皇帝至道三年冬修太宗實錄至明年咸平元年八月而畢甫九閱月修書者錢若水柴成務宗度吳淵楊億五人而已書成又詔重修太祖實錄至明年六月而畢亦甫九閱月修書者王元之梁灝趙安仁李宗諤四人而已臣竊考之太祖討澤潞取楊州平吳滅蜀定荆楚下五嶺太宗撫有吳越蕩定汾晉用師薊門問罪夏臺皆大舉動業廣事叢議論煩委兵機戎政攻守餽餉功罪黜陟之事可謂夥矣至於制禮作樂明刑治曆修廢官舉墜典革五季之弊復漢唐之盛側席求治可謂勤矣宜其摹寫日月形容造化雖累歲不成而奏書之速不淹三時上足以慰羹牆之思下足以厭薦紳之望非獨此數人者畢精竭思之力也意者當時命令重刑賞必尊君體國之俗成凡史官紬繹之所須者上則中書密院下則百司庶府以至四方萬里郡國之遠重編累牘如水赴海源源而集然後以耳目所接察隧碑行述之諛辭以衆論所存刊野史小說之謬妄取天下之公去一家之私而史成矣九閱月而奏書臣誠未見其為速也臣乞身累年忽蒙聖恩起之山澤之間使與聞大典既不累以他職又特寬其朝謁責委之意可謂重矣然臣之愚慮有欲陳者未敢遽以仰瀆天聽而略具梗槩於前欲乞聖慈明詔大臣俟臣供職有所陳請擇其可者出自朝廷主張施行如臣不能自力曠職守負聖知則竄殛之刑所不敢避取進止

乞致仕劄子

癸亥

臣輒冒重誅仰干洪造伏念臣生逢千載仕歷四朝晚蒙旒辰之知爰錫弓旌之召濫司汗簡擢長僊蓬曾未幾時亟躋近列雖願輸於塵露顧已迫於桑榆記問荒疎文辭衰退重負夜行之責難貪晝接之榮又況與奏成書獲經睿覽時則可矣敢少緩於控陳天寶臨之冀俯從於懇款伏望聖慈許臣守本官職

依前致仕

又癸亥

臣近緣實錄院進書已畢具奏乞守本官職依前致仕準尚書省劄子奉聖旨不允者伏念臣學緣病廢志與年衰步蹇弗支髮存無幾出入鶴行之內惕然有矚於面顏追參豹尾之間觀者亦為之指目豈容冒昧久竊寵榮敢干咫尺之威游貢再三之請萬籟黃卷悵已負於初心十具烏健冀獲安於故里伏望聖慈特賜開允

又甲子

臣輒傾愚懇仰達聖聰伏念臣衰頽餘齡已開九秩遭逢盛際逮事四朝擢實周行初出高皇之獨斷進登法從晚蒙陛下之異知期歲強顏秋毫無補及瀝乞身之請更蒙優老之除久此叨塵豈勝危懼雖天地之恩未報而犬馬之力已窮杜曲桑麻儻遂扶犁之初願灞橋風雪更尋策蹇之舊遊誓教訓於子孫用報酬於君父伏望聖慈許臣守本官職致仕

渭南文集卷第四

渭南文集目錄
卷第五

又 天申節進奉銀狀

辭免賜出身狀
條對狀七條

奏筠州反坐百姓陳彥通訴人吏冒役狀
除寶謨閣待制舉曾黯自代狀

辭免轉太中大夫狀
薦舉人材狀

渭南文集卷第五

天申節進奉銀狀

效頌祝於萬年適逢盛際備貢輪於九牧敢竭微誠
前件銀祗率典章獲參包篋大庭旅百愧非梯山航
海之琛神嶽呼二但切就日望雲之意

辭免賜出身狀

准尚書省劄子奉聖旨賜進士出身者孤遠小臣比
蒙召對從容移刻褒稱訓諭至於再三仰惟天地父
母之恩固當誓死圖報惟是科名之賜近歲以來少
有此比不試而與尤為異恩揣分量材實難忝冒欲
望敷奏特賜追寢以安冗散之分

又

近蒙恩賜進士出身嘗具狀乞行追寢以謂科名之
賜近歲以來少有此比不試而與尤為異恩揣分量
材實難忝冒今月六日准尚書省劄子奉聖旨不許
辭免蠲蠲至微曲煩申諭雷霆在上其敢飾辭然義
有未安若不自列強顏冒寵獲罪愈大蓋特賜科名
雖有故事必得非常之人乃副非常之舉甚非所以
重儒科杜倖門也重念某一介疎賤行能亡取比蒙
召對面加訓獎退而感激至於涕泗今者但使獲安
冗散之分以效尺寸之勞則於上報主恩不敢憚死

條對狀

准今月六日詔書節文令侍從臺諫取當今弊事悉
意以聞退率其屬極言毋諱臣恭依詔旨條具下項
一有國之法當防其微人臣之戒尤在於偏異姓
封王偏之尤者也蓋封王始於漢初天下未定權
宜之制然韓彭英盧皆以此敗漢亦幾至大亂遂
與羣臣盟曰非劉氏不王後世懲創其失魏晉隋
唐皆起草昧有天下豈無功臣止於公侯而已國
初趙普有社稷大功亦未嘗生加王爵也唐將封
王始於安祿山而本朝則始於童貫此豈可法而

比年以來寢以為常識者莫不憂之欲乞聖慈明
詔有司自今非宗室外家雖實有勳勞毋得輒加
王爵藏之金匱副在有司永為甲令寶宗社無疆
之福

一伏見比來朝廷間遣小臣幹辦於外既銜專命
又無統屬造作威福矜詫事權所在騷然理有必
致如措置酒坊招捕海賊未有毫髮成効而擾害
之事已鑿滿聞聽則此事害多利少可以無疑若
以輕君命失國體言之則雖有厚利亦不可行臣
謂如此二事之類止當專委戶部長貳轉運司及
安撫使提點刑獄措置如其不職自有典憲誠不
足一一上煩聖慮昔祖宗置走馬承受本欲便於
奏報耳而小人恃勢日增歲長及改稱廉訪使者
則監司帥守反出其下敗亂四方危及社稷實走
馬承受之末流也可不畏哉此事乞陛下與輔臣
長慮遠計亟行廢罷若止如近日改易其人及令
聽安撫使節制之類根本未除終必為害若朝廷
或有大事勢須遣使即乞於廷臣中遴選材望庶
幾不負任使不啓弊端實天下之幸

一自古有國設官分職非獨下不得僭上上亦不
得侵下所以正名分也公師之官將相之位人臣
之至貴天子所尊禮非百官有司比也方宣和間
王黼以太宰而行應奉司蔡攸以三孤而直保和
殿紊亂之事遂為禍萌中興以來所宜痛革而頃
者遂有以師傅而領殿前都指揮使者天下固已
怪矣近復有以太尉而領閣門事者閣門古之中
涓太尉服章班列蓋視二府瀆亂名器莫此為甚
欲乞聖慈詔輔臣議之例加訂正著為定制亦革
弊所當先也

一伏覩詔書委監司條具部內知州治行仰見陛
下撫恤百姓欲使各安田里之意然臣竊謂惟賢
乃可以知賢而無瑕者乃可以議人不審今之監

司皆已賢乎若猶未也日夕臧否來上而按行黜陟無乃未可乎雖使諫官御史劾奏其不當者然人之識見自有分限若本無才智又無學術乃使品藻賢否而勅其不當是猶強盲者使察秋毫而責其不見也臣欲望聖慈令三省具諸路監司姓名精加討論其不足當委寄者例皆別與差遣選有才智學術之士代之則前日之詔不爲空文既一清監司之選又審知郡守之政實今日先務也一伏觀律文罪雖甚重不過處斬蓋以身首異處自是極刑懲惡之方何以加此五季多故以常法爲不足於是始於法外特置凌遲一條肌肉已盡而氣息未絕肝心聯絡而視聽猶存感傷至和虧損仁政實非聖世所宜遵也議者習熟見聞以爲當然乃謂如支解人者非凌遲無以報之臣謂不然若支解人者必報以凌遲則盜賊蓋有滅人之族者矣蓋有發人之丘墓者矣則亦將滅其族發其丘墓以報之乎國家之法奈何必欲稱盜賊之殘忍哉若謂斬首不足禁姦則臣亦有以折之昔三代以來用肉刑而隋唐之法杖背當時必亦謂非肉刑杖背不足禁姦矣及漢文帝唐太宗一日除之而犯法者乃益稀少幾致刑措仁之爲效如此其昭昭也欲望聖慈特命有司除凌遲之刑以明陛下至仁之心以增國家太平之福臣不勝至願

今道路之言咸謂員已倍冗司局皆溢而日增歲加未聞限止誠恐非陛下愛人恤物蕃育羣生之意也臣伏觀太祖皇帝開寶四年詔內待官年三十無養父聽養一子并以名上宣徽院違者抵死真宗皇帝咸平中復申前詔仁宗皇帝嘉祐四年又詔入內侍省權罷進養子三聖詔令炳如丹青遵而行之實在陛下且方今聖政日新入無苑囿之觀出無逸遊之好諸軍無承受諸路無走馬中人所領不過兩宮掃除之職而已顧久弛成憲以從其私干犯至和虧損仁政臣雖甚愚猶知其不可也伏惟聖慈少留聽焉

一自古盜賊之興若其因水旱饑饉迫於寒餓嘯聚攻劫則措置有方便可撫定必不能大爲朝廷之憂惟是妖幻邪人平時誑惑良民結連素定待時而發則其爲害未易可測伏緣此色人處處皆有淮南謂之二禳子兩浙謂之牟尼教江東謂之四果江西謂之金剛禪福建謂之明教揭諦齋之類名號不一明教尤甚至有秀才吏人軍兵亦相傳習其神號曰明使又有肉佛骨佛血佛等號白衣烏帽所在成社僞經妖像至於刻板流布假借政和中道官程若清等爲按勘福州知州黃裳爲監雕以祭祖考爲引鬼永絕血食以溺爲法水用以沐浴其他妖濫未易概舉燒乳香則乳香爲之貴食菌蕈則菌蕈爲之貴更相結習有同膠漆萬一竊發可爲寒心漢之張角晉之孫恩近歲之方臘皆是類也欲乞朝廷戒敕監司守臣常切覺察有犯於有司者必正典刑毋得以習不根經教之文例行闊略仍多張曉示見今傳習者限一月聽齋經像衣帽赴官自首與原其罪限滿重立賞許人告捕其經文印版令州縣根尋日下焚毀仍立法凡爲人圖畫妖像及傳寫刊印明教等妖妄經文者並從徒一年論罪庶可陰消異時竊發之患

奏筠州反坐百姓陳彥通訴人吏冒役狀

臣近因民間詞訴勘會到本路筠州百姓陳彥通因訴事夾帶稱高安縣押錄陳諒經兩次徒杖罪斷罷不合冒役事其本州於淳熙六年十月內以爲陳彥通所論冒役不實遂引用乾道六年八月二日臣僚陳請妄訴冒役科反坐刑名仍引在法諸州縣公人會因犯罪勒停謂於法不該收斂及未該收斂者放罷編配再行投募充役者許人告諸州縣收斂公人於令格有違者徒二年公人依法不該收斂而隱落過犯或改易姓名別行投募者准此將百姓陳彥通決脊杖十三臣竊詳反坐之法本謂如告人放火而實不曾放火告人殺人而實不曾殺人誣詔善良情理重害故反其所坐然有司亦不敢即行多具情法奏取聖裁今愚民無知方其爲奸胥猾吏之所屈抑中懷冤憤訴之於官但聞某人曾以罪勒罷又有許告指揮則遂於狀內夾帶冒役之語村塾小民何由身入官府親見案牘小有差誤亦當未減以通下情縱使州郡欲治其虛妄驚越之類亦自有見行條法笞四十至杖八十極矣與反坐之法有何干涉若一言及吏人冒役便可搖撼置之徒罪則百姓被苦豈復敢訴吏何其幸民何其不幸也自昔善爲政者莫不嚴於馭吏厚於愛民今乃反之事屬倒置兼見今諸處冒役吏人雖究見是實亦不過從杖罪科斷罷役而已未有卽置之徒罪者豈有百姓訴吏人冒役却決脊杖之理臣本欲卽按治筠州官吏又緣有上件乾道六年八月二日臣僚陳請到指揮顯見因此陳請致得州郡憑藉用法深刻臣蒙恩遣使一路出自聖知拔擢苟有所見不敢隱默欲望聖慈更賜詳酌如以臣所奏爲然卽乞特降睿旨寢罷乾道六年八月二日因臣僚陳請所降指揮庶使百姓不致枉被深重刑責且下情獲通胥吏稍有畏憚天下幸甚除實謨閣待制舉會黯自代狀

准令侍從授告訖限三日內舉官一員充自代者右臣伏觀從政郎總領淮東軍馬錢糧所準備差遣會黯克承家學早取世科操行可稱文詞有法臣實不如舉以自代

辭免轉太中大夫狀

中大夫充實謨閣待制提舉江州太平興國宮陸某狀奏臣以修進兩朝實錄今月二十三日伏准告命授臣太中大夫依前充實謨閣待制提舉江州太平興國宮者序進一階雖循故事擢登四品實出殊私勞薄賞醜人微恩重而况臣遭逢頗異涉歷浸深四朝嘗綴於廷紳八十更持於從橐惟寵光之永絕庶視息之少延敢控愚衷冀同鴻造

薦舉人材狀

太中大夫充實謨閣待制致仕臣陸某近承紹興府牒備承尚書吏部符准都省劄子奉聖旨節文令前侍從各舉人材三兩人臣爲已致仕累年竊慮與在外侍從見任藩郡及宮觀人事體不同遂具申審今准都省劄子照得實謨閣待制致仕俞徵薦舉萬夢實等訖劄送臣照會者臣切見宣教郎知臨安府臨安縣鞏豐材識超卓文辭宏贍從政郎前隨州州學教授王田學問淹貫議論開敏以上並可備文字之職文林郎監潭州南嶽廟趙蕃力學好修杜門自守入仕以來惟就祠祿今已數任若將終身或蒙朝廷稍加識拔足以爲靜退之勸抑躁競之風於聖時不爲無補如或不如所舉甘坐責罰

渭南文集卷第五

渭南文集目錄

卷第六

謝解啓

賀台州曾直閣啓

賀曾祕監啓

賀謝提舉啓

賀禮部曾侍郎啓

賀辛給事啓

賀福州察推啓

賀何正言除左司諫啓

賀湯丞相啓

除刪定官謝丞相啓

謝內翰啓

謝諫議啓

渭南文集卷第六

謝解啓

倦遊場屋分已歸耕首置賢書出於過聽得非其分榮不蓋慚伏念某行己迂疎稟資窮薄生逢聖代豈願老於漁樵性嗜古文了不通於世俗因息四方之志專爲一壑之謀比遊都城適睹明詔復踴躍而自獻信習氣之難除內負初心外慙舊友然而廢放已久盡忘科舉之章程得失既輕頗有山林之氣象譬之進昌歎於玉食陳侏儒於燕朝方以怪而見珍故雖樸而不廢恭惟某官行爲世表經爲人師早學長安識子雲之奇字晚遊吳會得中郎之異書心術正而無邪文章簡而有法憤彫蟲之積弊疑草莽之可收遂致庸虛輒先豪俊自知不稱敢辭同進之爭名所懼流言竊謂主司之好異其爲愧悚實倍尋常

賀台州曾直閣啓

恭審寵辭使節移鎮便藩上待老成惟恐弗當其意士聞靜退自消競進之心凡有識知誰不驩喜恭惟某官淵乎似道清而有容古學名家鬱爲諸儒之領袖高文擅世坐還兩漢之風流蚤踐清華屢當要劇民依愷悌之政吏畏道德之威不言而令已行寡欲而人自化好直無矯枉之過爲善無近名之嫌歷考平生追配古人而奚愧中更俗吏益知儒者之有功此由真館之宴閑起奉外臺之委寄翔而後集汎然敢辭子房避三萬戶之封曼容至六百石而去當宁爲之太息舉朝仰其高風故擇名邦示優者德然而公議所屬久安實難第恐賜環之來弗容坐席之暖某早嘗問道晚益受知春服方成悵又違於師範郡齋猶冷冀深衛於生經

賀曾祕監啓

恭審趣登文陛進冠蘭臺簡冊光華孰謂太平之無象薦紳歎息共欣大老之來歸誠爲中外之榮觀非

復門闌之私慶竊嘗聞諸耆舊昔在祖宗朝有道德魁偉之臣士鄙刑名功利之學政術既斥夫卑陋國勢自極於尊安豈惟右文飾治之方是亦折衝消萌之要至於主盟儒道典領書林必求名勝之宗尤極清華之選不圖近歲頓異前規老吏亦驚茲豈膏梁之地遺編何罪至遭鋒鏑之腥廷範之汗清流哥奴之非時望較之於此誠何足言天未墜於斯文上眷求於舊德恭惟某官文貴乎道氣合於神學稽古以知天心集虛而應物舊聞入洛之盛事疑於古人追數過江之諸賢屹然獨在雖身居湖海之遠而名滿覆載之間友化人而遊帝居顧肯復求於外物登泰山而小天下蓋嘗俯陋於諸儒昨者法宮決事之初起於琳館燕居之際力歸使節自乞守符觀其勇退於急流真若無意於斯世迫功名之不赦凜風節之愈高姑復領袖館閣之遊行卽几杖廟堂之上某自惟幸會最辱知憐識度關之雲距今十載從浴沂之樂終後諸生孤蹤愈遠於師門精意空馳於夢想

賀謝提舉啓

伏審顯膺帝制起擁使華雖輿論歉然謂未究大賢之蘊然用人如此誰不知公道之行恭惟某官躬真獨簡貴之資蘊篤實誠明之學早並遊於洛下晚獨步於江東談笑多聞文章爾雅履常應變雖與時而偕行據古守經蓋絕世而獨立風采聞於天下勞烈簡於上心自去清班久安真館付功名於昨夢若無意然顧富貴之迫人恐不免耳迨法宮之決事付便郡以優賢曾未踰年已聞報政入膺三接之寵出臨千里之畿明詔始傳吾黨相慶以謂名流之施設當有前輩之規摹班超之策平平陽城之考下下至於俗吏乃求奇功所願一洗簿書之塵庶幾少稱臺閣之望此自明公之所及豈須賤子之具陳冒瀆之深慚惶無措

賀禮部曾侍郎啓

恭審顯奉制書進司邦禮所養既厚萬鍾亦何足言
 衆望所歸九遷猶以為緩惟是老成之用式昭至治
 之符凡有識知誰不驩喜竊考六官之制本皆三代
 之餘惟宗伯之清華極近臣之遴選誠使此地常得
 其人則朝廷日尊自弭未形之患論議守正亦折羣
 邪之萌一昨多難寢忘大體刑名錢穀獨號劇曹文
 物筭常僅同虛器蓋道由時而升降官以人而重輕
 苟凡材非據於其間則舊章何恃而不廢孰謂斯文
 之幸復聞公議之伸恭惟某官直哉惟清淵乎似道
 心至虛而善應名弗求而愈高紬繹六經推明上世
 之絕學度越兩漢追配先秦之古文早並遊於洛中
 晚獨步於江左人誦其德家有其書使少貶於諸公
 已亟升於華貫顧久幽而彌厲凜自信之不回上屢
 與見晚之嗟公猶懷勇退之志勉收功業於無復意
 之後起踐富貴於不得已之餘黃髮皤然德容穆若
 昔者慶曆之盛側席而致衆賢元祐之初加璧而聘
 諸老今茲盛事可謂無慚然猶漸進於省中未足大
 慰於天下竊謂德齒之貴宜登師保之崇入則几杖
 三雍之間出則卷繡百工之上使勳貴斂衽畏楊縮
 之清朝墊洗心化毛公之儉紀話言於竹帛肖形像
 於丹青垂之無窮然後為稱某頃陶善誘嘗辱異知
 雖借勢於王公大人非迂愚之敢及惟侍坐於先生
 長者尚夢寐之不忘遂聞綸綍之傳獨阻門闌之慶
 仰懷曩遇不勝下情

賀辛給事啓

恭審光奉制書就升鉅鎮用人惟己上方詢事而考
 言知我其天公豈枉尋而直尺世不容而何病道有
 命而後行雖殿藩猶屈於經綸然親擢益知於眷注
 措紳頌敷道路驩欣伏聞先王相我後人上天為生
 賢佐若時大任之降將啓非常之元故必雍容回翔
 以養其康濟之才排擯斥疎以積夫邇遐之望遺之
 險難以勵其志待之耆老以全其能周公居東歸相

成王之善治謝傅高臥晚為江表之宗臣勳名卒至
 於偉然物理殆非於偶爾恭惟某官氣守剛大性資
 方嚴其在朝廷有金玉王度之益其位歡牧有股肱
 帝室之勞指朋黨於蔽蒙膠漆之時發奸蠹於潛伏
 機牙之始庭叱義府面折公孫可否一語而不移利
 害十年而後驗人服其識家誦其言皓首來朝方共
 推於宿望丹心自信寧少貶於諸公洗鄙夫患失之
 風增善類敢言之氣頰仰無媿進退兩高不可誣者
 忠邪之情不可揜者是非之實出守未幾見思已深
 惟是謀帥之難孰先舊德之舉然而方政機之虛席
 宜召節之在途開慰斯民始自今日某迂愚不肖窮
 薄多奇雖道德初心之已非猶節義大閑之可勉側
 聞休命深激懦衷輒忘奏記之狂蓋出執鞭之慕仰
 祈閱量曲貸嚴誅

會福州察推啓

識面卜鄰固常懷於鄙志杜門掃軌殊未接於英游
 於此相逢慨然永歎恭惟某官城南舊望江左名流
 高韻照人清言絕俗過眼不再真讀五車之書落筆
 可驚倒流三峽之水豈有如公之人物猶令隨牒於
 海邦政恐驛召之行弗容席暖之久某奔馳斗粟流
 落二年久親柱後之惠文高束牀頭之周易政頌名
 理之語一洗簿書之塵

賀何正言除左司諫啓

恭聞親詔登用大賢以白首魁偉之臣膺明時諫諍
 之任善類相慶公道遂行竊以逆指犯顏人疑於甚
 難而君子謂之易盛朝治世衆安於無事而識者以
 為憂然非身居獻替之官與夫素著中外之望雖抱
 此識何自而言邈乎太平之難逢考之前史而可見
 以正人遺聖主實惟祖宗敷佑之心而公議在朝廷
 豈非廟社無疆之福恭惟某官心潛百聖學貫羣經
 老成之風師表一世直養之氣充塞兩儀立朝寬大
 而持平論事雍容而守正虛舟觸物此自信其無心

怒髮衝冠彼安知夫有體居多聖政之助始明儒者之功非獨誠僞不可以欺要之忠邪久而自判上眷既厚人望又歸遂當登四輔之聯豈久置七人之列某頃以樸學嘗預諸生雖在泥塗猶是門闈之舊物竟無名第亦竊場屋之虛聲敢俟明公勳業之成勉繼輿人歌頌之作不足爲報姑盡此心

賀湯丞相啓

恭審顯膺典冊進冠公台拜告未終播紳相慶郵傳所及夷夏歸心煥君臣嘉會之逢後廟社無疆之福恭惟某官民之先覺國之宗臣精義探繫表之徽英辭鼓天下之動至誠貫日歷萬變而志意愈堅屹立如山決大事而喜愠不見一昨力辭重任之降屈居次輔之聯三年有成九功惟敘方當詔令之誕布孰測謀謨之所從凡有大政事之慰斯民咸曰右丞相之告於上雖家置一喙以頌德士予千金而示恩竊揆其情未至於此蓋廟堂之寄代天而理物惟懼之算經遠而折衝平居用小大之材欲其披肝膽以自盡一日付疆場之事欲其捐性命而不辭自非有以素服衆心則將誰與共濟大業晉文側席於子玉同紇下拜於汾陽王商以忠譽立朝則單于不敢仰視平津以煇炯充位則淮南謂若發蒙自昔論世之盛衰莫如置相之當否譬猶震風凌雨之動地夏屋愈安鴻流巨浸之稽天方舟獨濟人望所屬國體自尊今者大明弼亮之勳正席辯章之任守文致理將見隆古極治之時應變制宜必有仁人無敵之勇聖主以此屬元輔學者以此望真儒行或使之天所命也某猥以孤遠辱在記憐如其少道衣食之憂猶能頌中興之盛德必也遂老江湖之外亦自號太平之幸民窮達皆出於恩私生死不忘於報稱

除刪定官謝丞相啓

收置鈞陶固已踰於素望責功鉛槧仍俾効其寸長神觀頓還塵埃一洗欲敘丹衷之感不知危涕之橫

伏念某獨學寡聞倦遊不遂瀾翻記誦愧口耳之徒勞跌宕文辭顧雕蟲而自笑低回久矣感歎悽然使有一人之見知亦勝終身之不遇然而稟資至薄與世寡諧在鄉閭則里胥亭長之所叱訶任州縣則書佐鈴下之所蹈藉聲名湮晦衣食空無方所向而輒窮已分甘於永棄侵尋末路邂逅殊私招之於衆人鄙遠之餘挈之於半世浮沉之後既賞音於一旦又誦句於諸公豈料前史之美談乃獲此身之親見茲蓋伏遇某官斯民先覺吾道宗師大學誠明上下同流於天地至仁溥博遠近一視於華夷和氣行禮樂之間治道出政刑之外惟公故無所不取惟大故無所不容詔令頑鈍之資亦預甄收之數重念某家世儒學非有旂常鍾鼎之勳交友漁樵又無金張許史之助特緣薄技獲齒諸生形顧影以知歸口語心而誓報死而後已天實臨之

謝內翰啓

來自遠方驟參要局知其愛閑而多病故爲滯俗吏之塵勇於悼屈而哀窮故使汗清流之末繫禁近吹噓之過蒙廟堂選拔之優俯仰以思愧懼交至伏念某讀書有限識字不多歲月供簿領之勞衣食奪山林之志窮雖已甚狂不自懲性本懦孱輒妄希於骨體任由資蔭乃深惡於膏粱坐此湮阨而莫收未忍依違而少貶比遊輦轂久困氛埃望見車騎之雍容傳誦文章之闕麗不勝慕鄉求備使令門墻纔許其一登聲價已增於十倍夫富貴外物惟事賢可謂至榮父子雖親然相知猶或不盡曾是疎遠至孤之迹又無瓌奇可喜之能不自省其何繇乃遽叨於斯遇非常之幸從古罕聞此蓋伏遇某官自明而誠養氣以直行著四方之防範文專一代之統盟勤於教人務傳聖師之道廣於求士用報睿主之知豈謂孤生亦蒙至意稱於天下曰知己誰復間然雖使古人而復生未易當此惟誓堅於名節庶不辱於恩私

謝諫議啓

來自遠方驟參要局因書生鉛槧之業使效尺寸之
長脫俗吏簿領之煩曲從疏墊之性儻非恩舊每賜
揄揚自顧孰然何以得此伏念某讀書有限識字不
多歲月供道路之勞衣食奪山林之志窮雖已甚狂
不自懲材本懦庸輒妄希於骨鯁仕由資蔭乃深嫉
於膏梁衆惡所叢孤生餘幾自頃竝遊於場屋亦嘗
辱遇於宗師徒竊虛聲莫贖真賞一斤遂甘於踏蹬
殘年絕望於騫騰此在常情所宜顯棄豈謂并容之
度未移宿昔之私既許瞻君子盛德之容淵乎似道
又使知大人接物之際歡然有恩訖致庸虛誤蒙甄
錄此蓋伏遇某官養氣以直自誠而明大學中庸發
揮千歲之旨生民清廟主盟一代之文吾道由此而
復傳善人有恃而不恐施及區區之舊物不忘眷眷
之深情求纍稱於門墻惟益堅於名節死而後已天
實臨之

渭南文集目錄
卷第七

謝曾侍郎啓

刪定官供職謝啓
除編修官謝丞相啓

謝參政啓

謝賜出身啓

畬人賀賜第啓

賀張都督啓

問候洪總領啓

畬鈐轄啓

問候葉通判啓

畬吳提宮啓

賀葉提刑啓

賀呂知府啓

上陳安撫啓

上史運使啓

渭南文集卷第七

謝會侍郎啓

結綬彈冠既過尋常之望懷鉛抱槧獲輪尺寸之長
 永言卵翼之恩忽焉涕淚之集伏念某讀書有限與
 世無緣吟梁甫於草廬倒天吳於短褐借助於金張
 許史既家世之不為從事於米鹽簿書又生平之未
 學一昨奔馳薄宦流落殊方土風頓異於中州宿疾
 遽侵於壯歲食有蠱蠅之異醫無鍼石之良凜然懷
 性命之憂不暇計飢寒之迫毀車殺馬逝從此以徑
 歸賣劍買牛分餘生之永已豈謂始終之不棄俯憐
 緩急之誰投出泥塗而濯清風披泉扃而起白骨稱
 於天下曰知己顧豈在於他門雖使古人而復生亦
 難勝於此賜茲蓋伏遇某官盡心知性惟道集虛氣
 塞天地之間辭編詩書之策授業解惑務廣先師之
 傳揚善進賢用為聖主之報廣則或至於雜恕則不
 責其全是致庸虛亦汗題品然而仰觀明公之勇退
 每蹈前哲之難能超軼絕塵優游卒歲雖賢愚之甚
 遠顧師慕之敢忘誓當力戒它岐益堅素守禍福有
 命豈其或置於胸中名節儼全是則不辱於門下終
 期末路可復斯言

刪定官供職謝啓

拔茅以征盲處清流之末及瓜而往曾無累月之淹
 恩重如山感深至骨伏以刑措不用邈矣成康之隆
 法家者流肆於秦漢之際以吏為師而先王之澤熄
 以律為書而聖人之道微是以鄙夫深文而不知還
 儒者高談而靡適用惟我國家之制克合古今之宜
 置局而總以弼臣拔材而列之官屬必有遠關盛衰
 之法以授有司故非深達體要之人不預此選豈容
 情甚亦在數中茲蓋伏遇某官學極誠明才全經緯
 道樞善應萬變不外於吾心仁風遠翔庶物悉陶於
 和氣矜憐墜緒收拾遺材致茲流落之餘被此生成

之賜某敢不討尋廢志激勵懦庸念彼三尺法安於
 哉要必通於古誼否則一獄吏所決耳尚奚取出諸
 生冀收毫髮之勞庶逃俯仰之愧

賀黃樞密啓

恭審顯膺制書進貳樞府威望之重宗社所憑天其
 相有求之圖日以冀中興之治竊以朝廷之政屬在
 帷幄之臣方無事之時雍容坐談則夫人而皆可應
 一旦之變酬酢曲當非有道者不能歷觀昔人蓋鮮
 全美王導之襟量而學不至德裕之術略而器未優
 故晉卒安於江東唐莫追於正觀有志之士太息於
 斯恭惟某官心正意誠任重道遠躬躬卓行於苟且自
 恕之俗推絕學於散缺不全之經凜然一家之言發
 乎千載之閱加之博極墳史得與士治亂之由綜練
 典章識沿革始終之際氣足以懾姦慝明足以察忽
 微其在掖垣惟公議是達其待經幄惟王道是陳果
 由師錫之同入總本兵之寄然而方時多故為計實
 難夷狄鴟張肆猖狂不遜之語邊障狼顧懷震擾弗
 寧之心東有淮江之衝西有楚蜀之塞降附踵至人
 心雖歸而強弱尚殊踊躍請行士氣雖揚而勝負未
 決堅壁保境則曷慰后來之望闢國復土則又有兵
 連之虞竊惟明公素已處此某頃聯官屬獲侍燕居
 每妄發其懇愚輒誤蒙於許可雖輟食竊憂於謀夏
 而荷戈莫効於防秋敢誓糜捐以待驅策

除編脩官謝丞相啓

揆才無似得祿已優不知何取於聖時顧使輒塵於
 清選既難稱塞但有慚惶伏念某學術空疏文詞朴
 拙頃遊場屋未能絕出於原夫久返山林但欲追酬
 於款乃至於手編簡冊身綴鸞鸞豈惟志魏闕之心
 固已息邯鄲之夢敢圖一日輒越稠人與聞國典之
 權輿猥備樞廷之掾史此蓋伏遇某官斯民先覺盛
 世元臣亮天以格物之誠化俗用修身之道雖江海
 至廣固無待於細流念燕雀兼容亦何傷於大厦故

令濫進以廣旁求然而某天賦甚窮自量尤審層臺起於累土雖深知獎拔之心浮屠成於合尖冀終遂迂愚之分敢忘惕勵用對陶成

謝參政啓

揆才無似得祿已優不知何取於聖時願使輒塵於清選既難稱塞但有慚惶伏念某至拙無能下愚不肖分章析句於蓬樞瓊牖之下學但慕於俚儒煥爨憂紆悲於山巔水涯之旁文不供於世用比坐啼號之迫浪為衣食之謀投檄無緣強顏可笑橋踰准而為枳竊自慨然泥出井而作塵望胡及此手編簡冊身綴鸛鸞筆研重尋氛埃一洗茲蓋伏遇某官至仁無間大德有容文兼衆作而不以窮人識高一代而樂於成物雖江海至廣本無待於細流念燕雀兼容亦何傷於大厦致茲久困遂得少通然而某天賦甚窮自量尤審層臺起於累土雖深知獎拔之心浮屠成於合尖冀終遂迂愚之分敢忘惕勵用對陶成

謝賜出身啓

明廷錫對晨趨甲帳之嚴親札疏恩莫拜丙科之寵感深涕隕媿極汗流竊以國家取士之方固非一路學者進身之始又惡多岐故祖宗非私於俊造之科而公卿罕出於選舉之外至膺特詔尤號異人頌詩足以配絃歌則梅堯臣出於皇祐文章足以垂竹帛則王安國起於熙寧或支朋借譽而不以為私或兄弟當塗而莫之或議厥絲至當故可無慙如某者才樸拙而無奇學迂疏而寡要自悲薄命久擯名場敢謂一朝遂叨賜第門外之袍立鶴恍記少時詔中之字如鴉猶疑夢事茲蓋伏遇某官股肱王室領袖儒林以謂設一目之羅蓋非得爵之道至於售千金之骨抑明市駿之心寧借妄庸以風四方不忍拘擥而廢一士某敢不討尋舊學企慕前修儒者之弊勞而無功誓少求於實效聖君所行即是故事將時得於遺材敢仰賀公道之興非獨敘私情之謝

富人賀賜第啓

比對明廷猥塵特舉兩章控避莫回天地之恩一紙來臨復拜友朋之賜未知稱塞積有慚惶伏念某才本迂疎識尤淺暗頃遊場屋首犯貴權既憎糠播之偶前復惡瓦樞之輒巧訟劉蕢之下第空辱公言與李賀而爭名幾成奇禍敢期末路復齒清流晨趨甲帳之嚴莫拜丙科之寵此蓋伏遇某官學窮游夏文婉卿雲槐花黃而並遊每記帝城之舊荔子丹而共醉未忘閩嶺之歡特假溢言俾膺異選千名記佛雖叨學者之光榮一日看花寧復少年之意氣但懷感佩未易敷陳

賀張都督啓

恭審誕膺冊書首冠樞府運籌決帷幄之勝遂定廟謨假鉞督中外之軍仍專閩寄傳聞所逮欣抃惟均恭惟某官降命應期自天生德許國本事親之孝化民用克己之仁早際聖神徧居將相書虞淵取日之績恍若古人詠東山零雨之詩適當初政屬邊烽之尚警煩幕府之親臨元黃之篋爭歸赤白之囊幾息果游膺於徵數用卒究於宏規仰惟列聖之恩實被中原之俗耕田鑿井舉皆涵養之餘寸地尺天莫匪照臨之舊豈無必取之長算要在熟講而緩行顧非明公誰任斯事不惟衆人引頸以歸責固亦當守虛心而仰成某獲預執鞭欣聞出綈斗以南仁傑而已知德望之素尊陝以東周公主之宜勳名之益大雖不敢紀殊尤於竹帛尚或能被一二於絃歌冒瀆之深震惶無措

問候洪總領啓

借勢於王公大人夙懷志願侍坐於先生長者適有賁緣仰偉度之兼容撫孤蹤而知幸伏念某至愚不肖甚拙無能一官初迫於飢寒百慮更成於疾疢綴鴛鴦會朝之列自傷勸鶴之推頽望魚龍變化之塗獨類寒龜之藏縮比求祠廟歸掃丘墳猶出佐於近

藩實大踰於素望始終微倖進退慚惶恭惟某官材擅國華德推世美崇論欲議實諸鬼神而不疑大冊高文編之詩書而無愧歷風波並起之嶮挺金石可開之誠雍容回翔而愈高康濟之資排擯斥疏而彌積邇遐之望天將降於大任上惟圖於舊人荷從臺於西清方俟論思之益擁使膺於北固猶煩道德之威某竊觀頌與欽承約束快威鳳景星之觀幸孰過焉辱高山流水之知儻其自此

會鈐韉啓

列屬樞廷自不安於清選佐州京峴猶誤被於明恩方修候問之恭已拜絨膝之賜情文甚寵感愧兼深伏惟某官胄出山西書傳圯上綠沉金鎖雖勇略之無前緩帶輕裘亦風流而自命茲膺帝眷暫總兵符遂容顛顛之餘獲厠遊從之末春容方麗戎幕多閑冀加衛於寢興用大符於頌禱

問候葉通判啓

列屬樞廷自不安於清選佐州京峴猶誤被於明恩敢謂窮途獲親者德恭惟某官性資直諒學術淵源愷悌宜民固已高於治績忠誠許國會未究於遠猷行膺召節之嚴趣上禁途之峻雖仰觀翔翥鳳凰方覽於德輝然猶幸須臾虎鼠同稱於相屬春容方麗燕寢多閑冀調興止之宜用副傾依之素

會吳提宮啓

伏蒙講修拜禮惠示函書溫乎其容若加親粲然有文以相接雖快景星之觀終慙明月之投伏惟某官華國英材通家舊好未嘗少貶於公卿勢位之地顧乃獨厚於江湖顛悴之人賣劍買牛念即歸於農畝藥車戴笠尚永記於交盟

賀葉提刑啓

伏審顯奉璽書改臨畿服坐於廟朝而施利澤雖尚鬱於遠猷送以禮樂而有光華寶寢隆於睿眷傳聞之始開慰實深恭惟某官學造宮庭行尊防範閱議

兩朝之望高文百世之師入踐掖垣有斧藻聖謨之益出乘使傳有宣道王意之勞周旋百為終始一節鳳凰之翔千仞雖瞻仰詠數之實同虎豹之守九關終排擯斥疎而莫進竊惟大任之降將啓非常之元必使備歷於阻難所以終成其器業今者承邊鄙宿兵之後加夏秋積潦之餘疾厲相熏流逋未止憂軫上煩於宵旰撫摩方屬於忠賢伏聞親奉尺一之書下慰億兆之望坐席未暖握節遠行蓋將訪災診之由施寬平之政挈之溝壑之內厝諸祗席之安老稚聚觀感涕相屬迨及嘉猷之告宜膺共政之求某久去門墻寢疎賤牘樞衣函文每懷問道之誠負弩前驅卽下望塵之拜其為欣抃未易數陳

賀呂知府啓

恭審光膺中詔濟界左符協於師言出自上意凡在部封之內舉同抃舞之情恭惟某官襟量恢闊文辭卓偉飛書走檄名早震於華夷仗節擁旄功每書於竹帛比屬邊烽之靜力辭宮鑰之嚴雖北闕之書至於屢上然東山之志寧許遽從果被睿知復膺重寄仁風穆若方同比屋之春威望凜然先破巨奸之膽某自欣末路得附餘光不汝疵瑕固荷包荒之度令公喜怒敢招越分之尤惟禱惕勵之誠用對眷知之好

上陳安撫啓

佐州北固麥甫及於再嘗易地南昌瓜未期而先代雖千里困奔馳之役幸一官託覆護之私伏念某孤學背時福心忤物方牽聯而少進已恐懼而遽歸偶充振鷺之廷自知非稱不失屠羊之肆其又奚言比自列於私嫌遂再汗於除目始終微倖俯仰慙惶恭惟某官道極誠明器函康濟閱議兩朝之望高名百世之師經術淵源造大學中庸之妙文章簡古在先秦兩漢之間久以臺省之英出試蕃宣之績雖弗容而君子乃見公初無欣戚之殊然必進而朝廷始尊

國寶繫安危之重佇聞休命大慰衆心某再掃餘塵增光末路顧才能之有限加疾疢之未平先生琴瑟書冊在前願卒門人之業小子洒掃應對則可敢晞別駕之功

上史運使啓

佐州北固麥甫及於再嘗地易南昌瓜未期而先代雖千里困道途之役幸一官在部封之中伏念某學本小知器非遠用昨侵尋於薄宦偶比數於諸公除目雖頻不出百僚之底駭機忽發首居一網之中謂宜永放於窮閭猶得出丞於近郡復緣私請更冒明恩超超空凡馬之羣實非能辦默默反屠羊之肆其又奚言僥倖非常慚惶莫諭恭惟某官英姿山立大度淵渟不媿於天而不忤於人卓矣誠身之學有考於前而有驗於後大哉致主之言顧自信之甚明雖不容而何病使事有指姑少試於澄清治具畢張要終煩於經濟某小舟已具漫刺將前雖多病懷歸徒費虛枯之力然至仁逮下實寬束溼之憂

渭南文集目錄

卷第八

會發解進士啓

會廖主簿發解啓

上二府乞官祠啓

賀吏部陳侍郎啓

賀莆陽陳右相啓

謝王宣撫啓

通判夔州謝政府啓

謝洪丞相啓

上王宣撫啓

謝晁運使啓

謝夔路監司列薦啓

會薛參議啓

會衛司戶啓

與何蜀州啓

會交代楊通判啓

與趙都大啓

渭南文集卷第八

會發解進士啓

都騎來臨方快景星之先觀雄文授贊更懸明月之
暗投藏去爲榮幸甚過望伏惟解元先輩材高衆雋
學富三餘將鴻漸於天廷姑龍驤於學海豈圖羈宦
適與榮觀萬里搏風莫測雲程之遠一第溷子行聞
桂籍之傳欣佩兼懷數言罔既

倉廖主簿發解啓

都騎來臨方快景星之先觀雄文授贊更懸明月之
暗投藏去爲榮幸甚過望伏惟某官文高藝圃行著
鄉評雖數奇如李廣之封猶強飯有廉頗之志賈勇
千人之敵策勳百戰之餘豈意羈遊與觀盛事故將
軍羨妄技刷知久鬱於壯圖新天子用老舍人宜卽
膺於顯擢其爲贊喜莫究占言

上二府乞宮祠啓

白首而困下吏久安佐郡之卑黃冠而歸故鄉輒冀
奉祠之樂恃廊廟并容之度忘江湖遠屏之蹤敬布
忱誠仰干造化伏念某讀書有限與世無緣歲月供
簿領之勞衣食奪山林之志拊心自悼顧影知慙儻
少適於飢寒誓永投於閑散頃以牽聯而少進惕然
恐懼而弗寧亟辭振鷺之廷徑返屠羊之肆優游食
足敢陳楚些之窮衰疾土思但抱越吟之苦伏望某
官因材授任與物爲春察其愚無所能乏細木侏儒
之用哀其窮不自活捐太倉紅腐之餘特假閑官使
安晚節棄寶憲如孤雛死鼠寧足矜憐譬杜牧以白
骨遊魂少加恤養某謹當收身末路沒齒窮山玩仙
聖之微言樂唐虞之盛化杜門掃軌固莫望於功名
卻粒茹芝冀羸成於道術雖無以報猶不辱知

賀吏部陳侍郎啓

恭審顯膺帝睴進貳天官成命甫行羣情交慶若用
人每皆如此則公論寧復間然竊以自昔撫運而有

邦孰不好賢而願治然賢能之進常齟齬而不合治
安之會亦稀闕而難遭京房事漢則見謂小忠孔子
去魯則自以微罪有志之士太息於斯方今主上嗣
無疆之慶基恢有爲之遠略思求人傑俾代天工當
饋數無蕭曹共傳斯訓恥君不及堯舜今得其人采
四海之公言寘六卿之要地將期共政以責奮庸恭
惟某官道大而氣剛才全而業鉅方登臺閣則已挺
然稱輔相之器及試岳牧則又卓爾著藩垣之勞福
及京師名震天下使能少貶久已趣還顧乃周旋四
鎮之間淹歷五年之久積排擯斥疎而莫置殆難難
險阻之備更道之將興理不輕畀豈惟論思獻納陳
萬世之策遂將經綸康濟致三代之隆某早出門墻
晚依幕府誨言在耳盛德銘心駕下澤之車雖已安
於微分磨悟溪之石尚擬頌於中興

賀蒲陽陳右相啓

恭審廷颺大號位冠羣公識者咨嗟益信道行之有
命聞而興起共知天定之勝人某嘗因故老之言竊
考昭陵之治乾坤大度固兼容而罔間日月之照實
無隱而弗臨小人雖有侍進而善類常多諛論亦或
抵熾而公議終勝故士氣屢折而復振邦朋既久而
自消諤諤昌言天下誦道輔仲淹之直巍巍成績史
臣書韓琦富弼之賢固嘗端拜於遺風豈意親逢於
盛日恭惟某官名蓋當代材高古人瑰偉之器足以
遺大而投轉精微之學足以任重而道遠方孤論折
羣邪之銳蓋一身爲衆正之宗徇國忘家惟天知我
論去草者絕其本宜無失於事機及驅龍而放之菹
果不動於聲氣卓矣回天之力孰曰拔山之難積此
茂勛降時大任豈獨明公視嘉祐之良弼初無間然
亦惟聖主享仁祖之治功殆其自此某孤遠一介違
離累年登李膺之舟恍如昨夢遊公孫之閣尚覲茲
時敢誓糜捐以待驅策

謝王宣撫啓

杜門自屏誤膺物色之求開府有嚴更辱招延之指
銜恩刻骨流涕交頤伏念某獨學寡聞倦遊不遂瀾
繲誦說愧口耳之徒勞跌宕文辭顧雕蟲而自笑頃
預朋來之列適逢聖作之辰玉音親錫於儒科奎翰
特嘉於樓學曾未乾於詔墨已亟遠於周行病骨支
離遭塗顛沛驚馬空思於十駕沉舟坐閱於千帆方
所向而輒窮已分甘於永棄侵尋末路邂逅賞音招
之於衆人鄙遠之餘挈之於半世奇窮之後夫富貴
外物唯事賢可謂至榮父子雖親然相知猶或不盡
曾是疏遠至孤之迹又無瓌奇可喜之能不知何由
坐竊殊遇稱於天下曰知己誰或間然雖使古人而
復生未易當此此蓋伏遇某官民之先覺國之宗臣
精義探繫表之微英辭鼓海內之動至誠貫日踐危
機而志意愈堅屹立如山決大事而喜愠不見雖裴
相請行於淮右然蕭公宜在於關中姑訪外庸即登
魁柄凡一時之薦寵極多士之光華豈謂迂疎亦加
采錄某敢不急裝俟命碎首爲期運筆颯颯而草軍
書才雖盡矣持被刺刺而語婢子心亦鄙之尚力著
於微勞庶少伸於壯志

通判夔州謝政府啓

貧不自支食粥已踰於數月幸非望及彈冠忽佐於
名州孰知罪戾之餘猶在憫憐之數銜恩曷報撫己
知慙伏念某少也畸人長而獨學好莊周齊物之說
樂以忘憂讀嵇康養生之篇慨然有志秉心不固涉
世寢深兒女忽其滿前藜藿至於併日屢求吏隱冀
代躬耕亦嘗辱記其姓名固欲稍畀之衣食費元化
密移之力不知幾何悼孤生一飽之艱迺至如此卒
叨薄祿實謂殊私此蓋伏遇某官黼黻帝猷權衡國
論開公孫之東閣共欣多士之稟征解晏子之左駮
不忍一夫之獨廢召來和氣力致隆平惟是魚復之
故城雖號烏蠻之絕塞乃如別駕實類閑官況憚憚
方起於徒中宜凜凜過虞於意外固弗敢視馬曹而

不問亦每當占紙尾而謹書豈有功勞能自表見念
昔竝遊於英俊頗嘗抒思於文辭既嗟氣力之甚卑
復恨見聞之不廣今將窮江湖萬里之嶮歷吳楚舊
都之雄山巔水涯極詭異之觀廢宮故墟弔興廢之
迹動心忍性庶幾或進於豪分娛憂紆悲亦當勉見
於言語儻纒傳於後世猶少奮於深知過此以還未
知所措

謝洪丞相啓

薄技効官曾是青袍之朝士明恩起廢更爲朱綬之
山人雖莫與於鴻鈞猶竊陶於盛化敢修尺牘敬布
寸心伏念某承學孤生輟耕漫仕頃輸勞於鉛槧嘗
廁迹於紳綬再歲京華每有鳧雁少多之數一時士
類或爲草木臭味之同因遭衆口之鑠金孰信淡交
之如水訖由寬貸得遂退藏幸未抵於投荒乃復汚
於除吏茲蓋伏遇某官應期降命同德格天以淵源
之學潤色皇猷以直大之氣折衝世變彝鼎方書於
偉績濤瀾忽起於畏塗際嘉會之風雲將開平治界
凶人於豺虎亟正讒誣乃顧近藩暫勞臥護鋤稷競
勸流逋已見於四歸致誦相聞風俗殆期於一變俯
念編氓之賤嘗居部吏之閒假之餘光使不終廢而
某自安隱約久困沉緜和堯民擊壤之歌徒欣末路
刻唐士齊天之頌尚俟他時

上王宣撫啓

薄命遭回阻竝遊於簪履丹誠精確猶結戀於門墻
敢辭蹈萬死於不測之途所冀明寸心於受知之地
伏念某稟資凡陋承學空疎雖肝膽輪囷常慕昔賢
之大節迺齒牙零落猶爲天下之窮人撫劍悲歌臨
書浩數每感歲時之易失不知涕泗之橫流昨屬元
臣暫臨西鄙獲厠油幕衆賢之後實輕玉關萬里之
行奮厲欲前驚馬方思於十駕羈窮未慙沉舟又閱
於千帆傷弱植之易搖悼鴻鈞之難報心危欲折髮
白無餘如輪勞効命之有期願隕首穴胸而何憾茲

從剗曲來次夔關雖未規於光驪已少紆於志願此蓋伏遇某官應期降命生德自天器宇魁闔鍾太行黃河溫厚之氣文章鉅麗有慶曆嘉祐太平之風取人不棄於小材論事每全於大體念茲虛薄奚足矜憐然遭遇異知業已被展前之薦使走趨遠郡豈不爲門下之羞儻同曩昔之恩俾叨分寸之進窮子見父可量悲喜之懷白骨成人盡出生全之賜過此以往未知所裁

謝晁運使啓 救火後發舉狀

事出權宜弗及先言而後救恩加慰藉乃煩竝蓄而兼收甫定驚魂已橫感涕伏念某灰心賤士焦尾餘生學纔比於聚螢智莫階於束緼偶緣驛官獲託餘光別駕治中已負曠疎之責祝融回祿更慙備禦之疎方炎官熱屬之鼎來實杯水與薪之弗救煙埃蔽日綆缶交塗鬱攸遽駭於黔廬倉卒僅知於顧府焦頭爛額本資衆力之同露蓋暴衣至屈使華之重惟當治罪寧可論功此蓋伏遇某官造道精深宅心誠敬曲記熒熒之迹特收赫赫之威憐巢燕之幾焚脫池魚於必死弗用玉瓚方勤人事之修等與牛車俾離火宅之怖某敢不仰思難稱俯愧無勞深念客言更謹徙薪之戒廣儲水器嘗如濡膜之時過此以還未知所措

謝夔路監司列薦啓

意象曩然揣分方安於下吏寵光異甚文章遽上於公車莫測何由但知難稱伏念某久嬰醫病見謂散材偶從諸老先生之遊麤得前言往行之略可咨今事少年誤竊於虛名力洗陳言晚節方慙於大學一來楚碛再閱王春惟體重於藩方故職均於曹掾占名惟謹幸逃有蟹之嘲竊祿甚微屢起無魚之歎豈期僉論驟及孤蹤遂令枯槁之餘漸有敷榮之望此蓋伏遇某官器函魁磊議極崇猷雖持秋霜夏日之嚴每廓滄海洪河之量大呼相和或容醉吏之狂重

聽何傷曲如孽丞之老雖深知其無用亦竝采而不遺某敢不强恕求仁質直好義庶幾夙夜或免小人之歸猶有鬼神尚圖國士之報

畚薛參議啓

伏審光奉制書來參戎幙山川信美久嗟人物之寂寥車騎甚都一聳吏民之瞻視極知趣召之在邇猶幸小留而後東恭惟某官器度清真風規高亮驥行千里騰驥本結於主知虎拒九關排斥遂收於朝蹟惟是雄豪之氣寓於鉅麗之文南弔沉湘西賡論蜀顧臥龍之遺蹟有化鶴之故城雖左官共歎於滯淹然絕景政煩於彈壓某久疏塵尾之誨喜聞鷓首之來聯遠遊之詩固莫追於大手續郊居之賦猶小異於庸人

畚衛司戶啓

彈冠巫硤早欽三語之賢振旄蜀江首拜尺書之寵情文兩厚感忤兼深伏惟某官自立修名收蚤上第千人所見共推高明練達之才一座盡傾行接醞藉雍容之論豈獨有光於吾黨固將增重於此州至於痛懲文法之疎一振廉隅之壞非俗吏所爲也微君子其能乎願疾其驅用諧所冀

與何蜀州啓

漂流萬里可知已老之頭顱贊貳一城復得本來之面目將就脂車之役敢稽削牘之恭伏念某小智自私大惑莫解自收朝蹟久困宦遊冒別駕治中者三州假軍諮祭酒者數月老驥伏櫪雖未歇於壯心逆風撐船終不離於舊處志栖栖之可笑復挈挈以此來恭惟某官曠度清真高標峻潔體道自得見於參倚之間受氣至剛不移於毀譽之際顧公言之允穆知追詔之方行敢意窮途猥塵上佐然某比緣多病深願少閑歲計之有餘當守平生之素志治行其無事更歸長者之餘風

畚交代楊通判啓

瓜戍及期幸仁賢之爲代萍蹤無定悵候問之未遑
敢謂勞謙特先榮翰伏惟某官淵乎似道直哉惟清
風致雖高不廢應酬於衆務文詞甚麗要皆原本於
六經所宜問津於黃扉青瑣之間何至涉筆於赤甲
白鹽之下卽聞號召遂陟清華某猥以陳人偶叨未
契道途迫遽僅能占報於記曹舟楫軻峨弗獲往迎
於市暨歸依之素敷敘奚殫

與趙都大啓

泮被臺移攝陪幕辯方刻章而俟報輒懷檄以徑前
迫於奇窮作此頑鈍言世俗之所憫笑賴門下以爲
依歸伏念某下愚無知大惑不解罪宜永斥朝蹟已
收者十年身困遠遊車轍幾環於萬里比官巴硤旋
客塞垣歲月不知其再周形影相顧而自悼支離病
骨無毀而亦消羈旅危魂雖招而未返念惛惛之安
往復挈挈以此來豈志慙羞實恃矜憫老馬已甘於
伏糞敢望長途窮猿方切於投林況依依茂蔭斯蓋伏
遇某官資函英達學蘊淵源早奮奇謀蓋處囊而立
見晚更劇任真遊刃以無前寶儲直中禁之嚴玉節
寄西陲之重曲憐狂簡自致漂流每假借於餘談爲
經營其一飽致茲小憩盡出大恩某敢不痛洗昨非
姑休疲役松陵笠澤雖賒故國之歸期錦江草堂聊
竊老師之補處

渭南文集目錄
卷第九

與成都張閣學啓

龔鈞簡州啓

與蜀州同官啓

賀薛安撫兼制置啓

與李運使啓

上鄭宣撫啓

賀葉樞密啓

除制司參議官謝趙都大

啓

賀龔參政啓

龔交代陳太丞啓

與錢運使啓

龔南劍守林少卿啓

與建寧蘇給事啓

與本路郡守啓

福建謝史丞相啓

渭南文集卷第九

與成都張閣學啓

薄遊萬里最爲天下之窮攝守一官猥與幕中之辯將攜拳而就食敢削牘以告行伏念某下愚難移大惑莫解光陰晚晚已逾不惑之年簿領沉迷猶在無聞之地嗟征途之可厭捨舊館而疇依爲晏平仲執鞭旣云素願就謝仁祖乞食寧復自疑茲承行省之移遣備大藩之屬雖刻章之未報輒懷檄以徑前言行世俗之譏訶實恃門闈之知獎老馬已甘於伏櫪敢望長途窮猿方切於投林况依茂蔭恭惟某官學函經濟洞極誠明秉心無邪不媿於頹仰之際體道自得自見於參倚之間學倡諸儒惠加多士雖困窮之自取亦提挈而不遺照隱察微每能得之濠上哀窮悼屈幾若推之溝中施及孤生亦叨異顧某敢不暫休疲役痛洗昨非陪蓮幕之英遊雖知遲莫居草堂之補處尚竊光華

舍勾簡州啓

近被臺移來陪幕辯以海內孤寒之迹假天涯獨冷之官但虞譏訶誰肯慰藉忽奉華箋之況豈勝末路之榮伏念某性資冥頑問學衰廢留落殊方者累歲奇窮舉世而一人雖夢寐思歸類澤國春生之雁而中瓶無定如雲堂日過之僧比叨閩屬之招實過塗人之分方刻章而待報忽捧檄以徑前久矣倦遊幸茲小憩此蓋伏遇某官風猷凝粹志節清真念俛俛淚迹之安歸假豐饜餘談而借助遂容萍梗暫息適途惟此意之甚恩實衰俗之創見而某自侵晚景久歇壯心理刻曲之歸舟方從此日卜浣花之絕境敢傲先賢

與蜀州同官啓

去國十年鮑作江湖之夢佐州萬里又寬溝壑之憂伏惟某官材術清通風猷凝粹雖小試尚淹於遠業

而盛名已著於僉言俯念孤蹤方厄黃楊之閏特誌妙翰俾生枯朽之春靖言留落之餘曷副吹噓之意感慙交集敷敘奚禱

賀薛安撫兼制置啓

恭審璽封綠底疏恩遙下於霄宸幙建碧油開府全臨於井絡周邦咸喜舊觀復還民望息肩之期士知託命之所竊以江淮駐蹕勝人在天定之時梁益宿兵擊首有尾應之勢儻事權之少削則脈絡之不通宜得股肱之良用增臂指之重至於旁連荆豫外撫戎蠻亭障騫騰東軼巴渝之阻關河重複西當秦隴之衝蓋有應變於立談之間豈容稟令於千里之外維時詔旨實契事機恭惟某官淵博有傳方嚴不撓欲言崇議卓爲百世之師傑作雄辭散落四夷之遠入則首處六官之長出而遍膺十乘之華進用雖速而人猶恨其滯淹位望愈崇而心益持於挹損涵湖海胸懷之大負廟堂器業之優將究顯庸果膺隆委關中既留蕭丞相上遂寬西顧之憂江左自有管夷吾人共望中興之盛而況絲綸之命適茲孤矢之期維嶽降神而生申丕應風雲之會夢帝賚弼而得說遄觀衰繡之歸某去國十年佐州萬里縛袴服弓刀之役雖恨迫於衰遲曳裾陪簪履之塵尚欣承於閑燕歸依之至敷繹奚禱

與李運使啓

伏審抗章力請優詔曲從雖暫勞論蜀之行然益見回天之力恭惟某官致知格物學道愛人親承西洛之正傳獨殿中朝之諸老至於盤礴遊戲之翰墨嬉笑怒罵之文章過黃初而有餘嗟正始之復見飛騰捷路恥煩狗監之吹噓散落遐荒寧付鷄林之鑑裁比下九天之號召已傾四海之觀瞻不俟駕行命義雖存於大戒可以理奪忠孝果得而兩全方帥閩之猶虛以計司而兼莅仰惟臺省清華之宿望加以山林高逸之雅懷一琴一龜預想鈴齋之靜三熏三沐

尚陪藥市之遊過此以還未知所措

上鄭宣撫啓

伏審顯膺大號出董成師自陝以西咸舞歌於德化
從天而下即震疊於威靈豈惟翰海玉關馳奏捷之
音將見博士議郎上策勳之典士心闡懌國勢尊安
竊以當今秦蜀之權重無與比中原祖宗之地久猶
未歸既天定而勝人宜王明之受福非得太行黃河
山川所鍾之傑誰復慶曆嘉祐華夏太平之基先王
克相後人上帝為生賢佐雖遠猷辰告暫違帳殿之
深巖然大臣暑行式慰轅門之僕望復河關其自此
知龜筮之悉從恭惟某官氣壓羣公才周萬務識若
著龜之先見論如山嶽之不搖湖海襟懷正在大床
之獨臥廟堂風采未妨一壑之初心茲輟近司來恢
遠略弼臣同德何難運帷幄之籌真儒為邦寧止學
俎豆之事已慶登壇而授鉞端觀推轂而出師先天
下而深憂方遠同於文正即軍中而大拜豈專美於
熙寧某流落無歸棲遲可歎青衫去國十載於茲白
首佐州一人而已顧尚賒於委骨猶復覲於伸眉仰
跂光躔雖阻服弓刀之役鋪張勳業或能助金石之
傳過此以還未知所措

賀葉樞密啓

恭審顯膺明詔進貳鴻樞道大材全固視功名為餘
事任隆位重蓋倚精神之折衝衆志交孚太平可冀
伏聞今昔有不移之形勢華夷有一定之土疆故彼
不可越燕薊而南侵猶我不能跨遼碣而北守堯舜
尚無冠帶百蠻之理天地豈忍羶腥諸夏之區又况
以本朝積累而當荒陋崛起之小夷以陛下神武而
討衰弱僅存之虜虜重以軍民之憤切加之廟祏之
威靈當一震於雷震宜坐消於氛祲夫何玩寇久使
逋誅九聖故都視同棄屣兩河近地進若登天莫宣
方叔之壯猷更類棘門之兒戲坐殫民力孰奮士心
上方撫髯而喟然公宜出身而任此恭惟某官負沈

雄邁往之略躬英發絕人之姿撫卷慨慷夙有四方
之大志立朝開濟晚收九牧之重名果副簡求肆當
柄任以元龍湖海之氣參子房帷幄之籌北斗以南
一人誰其倫儼長安之西萬里行矣清夷某識面莫
先託身最早側聽延登之渥自悲淪落之餘雖意氣
摧藏非復雕鷲離風塵之望然飢寒蹙迫猶懷驚馬
戀棧豆之思敢敬布於微誠觀少回於曩睇

除制司參議官謝趙都大啓

攝郡壘之左符已逾素望備賓僚之右席復玷明恩
雖可知已老之頭顱猶幸得本來之面目伏念某下
愚不肖至拙無能陪蓬嶠之後塵最為薄命省桃源
之昨夢恍若前身泛然不繫之舟莫知稅駕之地豈
圖末路更汚除書蓋將問道質疑求備老聃之役豈
獨雙屐染翰預廣嚴武之詩樂哉斯行幸甚過望茲
蓋伏遇某官學窺聖域望冠冠時髦根於高明用以忠
恕執詩書之正印司翰墨之衆盟富貴不驕有偉周
宗之百世誠明自得屢班漢詔之六條方當日有九
遷之榮何難身兼數器之地施及萍蓬之孤迹亦叨
俎豆於羣英但不稱之是虞豈辱知之敢望已遵臺
檄即發山城紀文鏡戎幕之談當從茲日窺逸少蘭
亭之帖或在莫春過此以還未知所措

賀葉丞相啓

恭審誕告大廷延登真相永惟夷夏戴宋之舊思見
太平時則祖宗在天之靈為生賢佐海內幸甚國勢
巋然某少從史氏之遊羣習星官之說去歲之杪垂
象有開太微紫垣忽一新於景氣神州赤縣將復
於提封曾未閱時遽聞休命昭哉天人精授之際見
於君臣會遇之初恭惟某官鍾河嶽英靈之姿應乾
坤開泰之運器函魁碩論極崇欲萬卷讀書盡是經
綸之蘊十年遇主獨高康濟之功比邇井絡之歸式
贊斗樞之重俄進陪於大政果首建於永圖股肱良
哉取君不及堯舜期月可也致治庶幾成康方將修

未央長樂之故宮築馬邑雁門之絕塞與植禮樂於
僮仆之後整齊法制於搶攘之餘威憚殊鄰玉輦受
渭橋之謁治借邃古金泥增岱嶽之封然後遨遊謝
傅之東山偃息蕭何之甲第委成功而不處享眉壽
於無窮某遠寄殊方久孤隆眷驥老伏櫪知難効命
於馳驅狐死首丘但擬祈哀於造化

賀龔參政啓

恭審光膺明詔進貳政機爲治不難其道顧何如耳
用人若此吾國其庶幾乎傳聞四方驩喜一意某聞
公論未嘗盡廢常恐不在於朝廷小人豈必無材惟
患與聞於國事誠使元臣大老守紀綱而不紊近習
外戚保富貴而有終政一出於廟堂權弗移於貴倖
豈獨坐消於外侮固將馴致於太平孰成伊尹格天
之功其在孟子敬王之學恭惟某官材負超軼器局
恢闕造道深故能泛應而不窮進身正故敢盡言而
無諱建久安之勢成長治之業已收効於立談開衆
正之路塞羣枉之門曾不勞於變色薦紳相賀史冊
有光然而仁人先天下而憂重矣自任賢者備春秋
之責韜哉克終某十年獨荷於異知萬里敢虛於忠
告輒因尺牘罄寫寸誠未死殊方或見丕天之偉績
猶期末路終爲盛世之幸民

畬交代陳太丞啓

撫銅人而歎息方感舊遊拾竹馬之棄遺偶叨新命
曾馳書之未暇愧飛翰之鼎來恭惟某官鴻漸賢關
鳳儀朝著傑作紀永和之會逸矣風流清言繼正始
之音超然名勝初叱乘輅之馭已勤側席之思峻陟
容臺覆階清禁某自憐末路獲踵後塵君遣使而有
光華卽載驅於原塹匠誨人而以規矩尚竊望於門
墻

與錢運使啓

奔走九年僅補州麾之選來歸萬里遽叨使傳之華
踰分已多置慙無所伏念某稟資甚陋賦命多難跌

宕文辭本是書生之常態蹉跎名宦獨爲天下之畸
人此由西蜀之歸獲俟東華之對進趨梗野占奏空
疎謂擯斥之是宜豈超逾之敢望此蓋伏遇某官道
參聖域學擅經邦愛惜人材每陰借之餘論維持公
道尤深憫於窮途致此妄庸亦叨臨遣某服膺已久
擁篲有期大匠之規矩可師方日親於函丈小夫之
竿牘自見姑少述於萬分

畬南劍守林少卿啓

比解邊城狼叨使傳顧惻惻之寡助宜挈挈而亟行
揣分已踰置慙靡所伏念某百罹薄命九折窮途跌
宕文辭已困諸生之小技沉迷簿領又無俗吏之能
聲乃者來歸頽然遲莫進趨梗野占奏空疎宜居擯
斥之科敢辱光華之命茲蓋伏遇某官道該聖蘊學
擅經邦獨倡諸儒躬伊尹天民之先覺與憐末路念
正元朝士之無多致此妄庸亦叨臨遣某方圖馳問
已辱詒書墨妙筆精雖喜窺於近製頭童齒豁更自
感於殘年

與建寧蘇給事啓

奔走九年僅補州麾之選來歸萬里遽叨使傳之華
忝冒過優慙惶莫喻伏念某多奇薄命予立孤生小
智自私守紙上區區之糟粕大惑不解蹈人間洶洶
之風波比由隴蜀之歸獲奉宣溫之對樸學不足以
恭承清問蕪辭不足以罄寫丹衷謂擯斥之是宜何
超踰之敢望此蓋伏遇某官材高而善下道峻而兼
容哀元祐之黨家今其餘幾數紹興之朝士久矣無
多曲借餘光少伸末路某逖違燕語喜望提封大匠
之規矩可師方亟趨於函丈小夫之竿牘自見姑少
述於萬分

與本路郡守啓

比奉宸綸躡乘使傳方懼誤恩之及敢勤流問之先
伏念某潦倒寒生沉迷薄宦曲江禁柳早旅食於京
華東閣官梅晚狂吟於蜀道偶然不死復此來歸豈

期顛顛之餘亦玷光華之選此蓋伏遇某官天資甚茂朝望素高俯憐萍梗之孤蹤每借齒牙之餘論遂令留落忽有超逾某弛擔云初登門尚阻川途悠邈敢辭叱馭之行風度清真先想凝香之地

福建謝史丞相啓

大鈞播物萬化悉付之無心小己便私一官獲從於所欲可謂難遭之會空懷莫報之恩伏念某早出門闈嘗塵班綴士於知己寧無管鮑之情人之多言誣爲牛李之黨既逡巡而自引因委棄而莫收晚參戎幕之遊始被邊州之寄知者希則我貴矣何嫌流俗之見排加之罪其無詞乎至以虛名而被劾甫周歲律復畀守符曾未綰於印章已遠膺於號召行能士取資望尚輕便朝纔畢於對揚使指遂叨於臨遣此蓋伏遇某官兩朝元老千載真儒以道德性命訓迪人材以禮義廉恥維持國勢哀窮悼屈如伐木故舊之不遺懷昔感今異積薪後來之居上遂容孱瑣猶被甄收某敢不斂散視豐凶之宜阜通去農末之病觀近臣以其所主期無負於深知非俗吏之所能爲或纍施於素學過此以往未知所裁

渭南文集目錄
卷第十

上趙參政啓
賀泉州陳尚書啓

上安撫沈樞密啓
會建寧陳通判啓

會漳州石通判啓
謝趙丞相啓

江西到任謝史丞相啓
謝王樞使啓

謝錢參政啓

謝侍從啓

謝臺諫啓

與本路監司啓

會本路郡守啓

會寄居官啓

賀葛正言啓

賀周參政啓

賀謝樞密啓

渭南文集卷第十

上趙參政啓

造于王廷既盡除於宿負試以事復躡被於明恩
豈惟寬溝壑之憂遂亦有桑榆之望大鈞難報末路
知榮伏念某固陋不通迂疎寡合雖抱宿道鄉方之
志了無赴功趨事之能迨從幕府之遊始被邊州之
寄方漂流於萬里望飽暖於一麾豈圖下石之交更
起鑠金之謗素無實用以為額放則不敢辭橫得虛
名雖曰僥倖而非其罪甫周歲律再畀守符曾未縮
於印章已遽膺於號召遂以羈旅入朝之始首預光
華遣使之行此蓋伏遇某官造德精微宅心忠厚念
錦里十年之卜築已是蜀人憐萍蹤萬里之來歸特
捐漢節爾然遲莫被此恩榮某敢不斂散視豐凶之
宜阜通去農末之病觀近臣以其所主期無負於深
知非俗吏之所能為或纒施於素學過此以往未知
所裁

上安撫沈樞密啓

造于王廷既盡除於宿負試以事復躡被於明恩
豈惟寬溝壑之憂遂亦有桑榆之望大鈞難報末路
感涕至於交頤伏念某固陋不通迂疎寡合雖抱宿
道鄉方之志了無赴功趨事之能自屏跡於寬閑已
頽心於榮進徒中起廢方蒙焚道之除望外召還忽
奉燕朝之對然而進趨梗桡論奏空疎徒叨三接之
榮莫陳一得之慮循名責實所宜伏司敗之誅含垢
匿瑕特俾玷外臺之寄茲蓋伏遇某官望隆而善下
道峻而兼容哀元祐之黨家今其餘幾數紹興之朝
士久矣無多曲借餘光少伸末路某敢不求民疾苦
絕吏竝緣斂散視時益廣倉箱之積阜通助國庶無
農末之傷過此以還未知所措

賀泉州陳尚書啓

恭審顯奉璽書起臨藩府廟堂虛位固宜大老之遂

歸嶽牧得人聊見太平之有象恭惟某官道參聖域
德冠民彝下視諸公負元龍湖海之豪氣獨尊九牧
擅諸葛宇宙之大名風雲自際於明時金石靡渝於
素履超然去國之久綽有高世之風雖力避寵名亟
欲急流而勇退顧眷求舊德未容袖手而旁觀姑暫
起於名邦即延登於政路某久違德宇喜聽除音承
顏接辭恍不殊於曩日質疑問道尚自慰於窮途

福建寧陳通判啓

伏審顯膺新渥出貳潛藩邀聞旌旆之臨宜有神明
之相伏惟某官風規高秀德宇粹夷含英咀華早預
蓬萊道山之選飛英騰茂暫為治中別駕之行雖澹
然克守於家風顧籍甚難淹於國器即聞追詔遂陟
顯途某託契至深開緘竊喜自憐下客久孤國士之
知猶冀殘年及見郎君之貴

會漳州石通判啓

伏審被命佐州涓辰視印士心甚鬱謂斂經濟以惠
小邦天意孰知蓋儲名望而須大用伏惟某官好是
正直擇乎中庸崇論欲言挺松柏貫四時之操高文
大冊擅江河流萬古之名謂宜凌厲以橫翔乃復逡
巡而小卻使為治中乃展驥耳雖暫試於外庸不有
君子其能國乎當亟還於近列某未遑馳問先辱寄
聲祭竈而請比鄰數高懷之莫測烹魚而得尺素藏
妙語以為榮

江西到任謝史丞相啓

詣行在所方承命以北馳駕使者車復改轆而西上
訓詞甚寵地望加優本宜使之省循乃更增其僥倖
伏念某性資鄙陋學問荒唐雖慕長者之餘風豈聞
君子之大道早親函丈偶竊緒餘曾未免於鄉人乃
見待以國士知憐覆護殆塵沙曠劫之難逢願墮摧
藏無絲髮微勞之上報昨者甫還吳會即使甌閩超
躡既多便安尤極徒以久違於公袞悵然願事於師
門山川間之日月逝矣方坐馳於夢想忽祇奉於詔

追深惟幸會之非常但懼奔馳之弗及夫何奇蹇更累生成方仇怨造言投鼠不思於忌器乃保全極力舍牛寧廢於蠶鍾此蓋伏遇某官偉量包荒深仁篤舊念招之來而麾之去若匪近於人情謂舍其短而取其長猶可勝於官使故推餘潤以及枯芟而某筋力疲於往來疾恙成於憂異質疑問道自憐卒業之何時認過戴思尚冀收身於末路

謝趙丞相啓

詣行在所方承詔以北馳駕使者車復改轅而西上仰戴公朝之寬大重爲遠吏之光華伏念某拳曲散材犖牙未學衣食不繼自竄夔楚之邦齒髮衰倦遊隴蜀之境惟習氣未忘於筆硯每苦心自力於文詞藏之名山本欲麤傳於後世待以國士豈期親遇於鉅公記憶不忘詔除屢下雖復顛隳於薄命要爲比數於明時而況仍皇華臨遣之榮易江表清閑之處優游甚適僥倖難名此蓋伏遇某官誕保民彝堅持國是致君密勿偉治具之必張望古慨懷閔道術之擇地更令破萬卷之讀或可成一家之言某敢不開益舊聞激昂懦意稍竊簿書之暇日試求學問之新功穉櫛侏儒儻未捐於大匠雕蟲篆刻尚少進於故時庶仰答於聖知亦冀酬於鈞播過此以往未知所裁

謝王樞使啓

詣行在所方承詔以北馳駕使者車復改轅而西上訓詞甚寵地望加優伏念某拳曲散材遭回末路浪遊山澤不知歲月之屢遷篤好文辭自是書生之一癖斐然妄作本以自娛流傳偶至於中都鑒賞遂塵於乙夜既閱期年之久兩膺召節之頒雖改命於半途尚乘輅於名部始終僥倖進退光榮茲蓋伏遇某官謨明弼諧任重道遠以國士待我卓爲特達之知於古人求之每極吹噓之論詔除屢下器使不遺雖

云薄命之顛隳要是公朝之記省某敢不竊簿書之暇日求學問之新功穉櫛侏儒儻未捐於大匠雕蟲篆刻尚少進於曩時庶仰答於上恩亦冀酬於鈞播過此以往未知所裁

謝錢參政啓

詣行在所方承詔以北馳駕使者車復改轅而西上訓詞甚寵地望加優伏念某少苦賤貧長更憂患名場蹭蹬幾白首以無成宦海漂流顧青衫而自笑不圖遠戍乃誤明恩一麾在巴蜀之間萬里促宣溫之對清光只尺睿獎再三略有司資格之常備奉使詢謀之選方虞官謗又辱詔追半道遺行雖歎棲遲之薄命頻年記錄要爲比數於公朝茲蓋伏遇某官培植衆材主張公論憐其跋前疐後姑令全進退之宜謂其尺短寸長或可責馳驅之効曲加技拭俾竊便安某謹當增所不能修其可願侵尋遲莫雖嗟已失於東隅激勵衰疲尚及未先於朝露

謝侍從啓

祈天請命冀循省於叢祠便道之官復馳驅於近甸始終僥倖俯仰就慙伏念某鄙朴不材荒唐寡學生逢盛際無尺寸之可稱久戍遠方乞斗升而自活昨蒙臨遣已劇超逾但虞薄祜之難勝寧復異恩之敢望未溫坐席遽辱賜環初疑誤報者再三俄乃真承於尺一文詞吏事何者羸堪物論人情居然不允非賴密加於覆護固難終道於顛隳此蓋伏遇某官義薄九天量容百輩念器盈則覆推轂無所復施然令出惟行反汗豈其得已遂容末路獲忝優除雖愧愧招麾之頻亦驚吊賀之速而某昨緣奔走積困沉綿顧影獨悲豈久堪於從宦服勤不怠尚少贖於空餐

謝臺諫啓

祈天請命冀循省於窮閭便道之官復馳驅於近甸始終僥倖俯仰就慙伏念某鄙朴不材荒唐寡學生逢盛際無尺寸之可稱久戍遠方贖斗升而自活昨

蒙臨遣已劇超逾但虞薄祐之難勝寧復異恩之敢
望未溫坐席遽辱賜環初疑誤報於姓名俄乃真承
於詔命人才吏事何者巖堪自計旁觀居然不允敢
謂并包之廣大更令進退之從容此蓋伏遇某官山
立英姿海涵偉量盡言劇論雖震聳於朝端用恕持
平每保全於士類遂容末路獲忝優除俯伏以思論
報何所而某昨緣奔走積困沉綿顧影獨悲豈久堪
於從宦服勤不怠尚少贖於空餐

與本路監司啓

詣行在所方奉詔以北歸駕使者車復改轅而西上
稍息道途之役獲全溝壑之身揣分已踰置慙靡所
伏遇某類然遲莫久矣漂流戎隴十年形容盡變還
吳萬里交舊半空騎馬而聽朝雞已冥心於昨夢賣
刀而買耕犢將掃軌於窮閭敢謂頻年屢膺嚴召既
衆知其不可亦自揆之甚明所期獨住於山林乃得
本來之面目此蓋伏遇某官英姿山立大度海涵愛
惜人材每陰借之餘論維持公道尤深憫於窮途施
及妄庸未忘記省某登門維舊擁篲有期大匠之規
矩可師即趨函丈小夫之竿牘自見姑致萬分

畬本路郡守啓

末路賜環本出聖知之舊半途畀節尚承寵命之新
揣分實逾置慙靡所伏念某易搖弱植無用散材輟
環天下而老於行寧非薄命舟近神山而引之去殆
有宿緣方力巧於退藏乃更叨於臨遣此蓋伏遇某
官指南公議推轂時髦顧雖流落之餘亦在揄揚之
末某方勤馳傳未卜登門頌詠之私敷宣罔既

畬寄居官啓

賜環半道易節回轅去閩中瘴癘之區得江表清閑
之地優游甚適僥倖難名此蓋某官義重壙枯情深
推轂每假揄揚之助俾叨臨遣之榮黃撫幹晏老夫
耄矣而無能寧有澄清之効君子居之而何陋尚陪
名理之餘提云尺素驚傳喜論交之未替一樽相屬

悵道舊之何由陳檢法云汨沒簿書敢冀澄清之効
從容談笑尚為衰晚之光

賀葛正言啓

恭審保直北扉方演出綸之命拾遺西省遂輪補袞
之忠上虛佇於嘉言士共歸於碩望恭惟某官英辭
擅世偉識絕人諸老先生聞名而願交學士大夫望
風而知敬辭書羣玉之府視草承明之廷比傳夜對
之從容屢動天顏之忻懌主聖臣直共知千載之逢
言聽諫行獨任七人之責木從繩而必正石投水以
奚難某屬以乘軺阻陪賀慶比年十漸必盡告於吾
君一日九遷將孰先於門下其為抃躍罔罄敷陳

賀周參政啓

恭審顯奉廷揚進陪國論號令渙焉可述乃專討論
潤色之功疇咨若時登庸遂處輔弼疑丞之位國有
隆儒之盛士知稽古之榮伏以典謨實列於六經臣
主難逢於千載高文大冊或託之不得其人老師宿
儒有死而莫見於世維時鴻碩之彥早冠清華之途
成功告於神明大業刻之金石發德音下明詔大哉
王言建顯位施尊名震於方外一變猥讓枝駢之體
復還雄深灑噩之風摺紳竊誦而得師夷狄傳觀而
動色顧於昭代可謂殊勳雖箕頴之志屢陳然莘渭
之求焉往恭惟某官任重而宏毅謀明而弼諧以窮
深測遠之才坐酬衆務以極高蟠厚之氣陰折遐衝
至於擅世之英辭本皆全德之餘事僅少施於一二
已見謂於崇滋豈容卷懷經濟之圖遂欲袖手寬閑
之地公毋困我初誦留行之言上誠知人亟下延登
之命然易問者聖君之眷難居者天下之名方仰對
於寵光願益思於挹損茂迪謙尊之吉永為善類之
依

賀謝樞密啓

恭審顯膺出綽進貳本兵蠻夷奪氣而息謀朝野動
容而相慶恭惟某官英猷經遠敏識造微秉心如金

石之堅論事若權衡之審主知千載際聖世之風雲
言責三年極人才之涇渭士恃公平而不恐上嘉孤
直之無朋遂由常伯之聯進貳中樞之任較一時之
同進得喪孰多付四海之僉言忠邪自見固將力回
薄俗盡見明謨網漏吞舟示大平之寬大雲興膚寸
澤庶物之焦枯豈惟康濟於茲時固足儀刑於後世
某早迂記省晚荷甄收雖知薄命之多奇猶復誦言
而不置使駑馬妄思於十駕而沉舟未羨於千帆求
之古人可謂曠世難逢之會報以國士敢忘終身自
勵之心

渭南文集卷第十

渭南文集目錄

卷第十一

賀禮部鄭侍郎啓

會撫州發解進士啓

賀施中書啓

上丞相參政乞宮觀啓

知嚴州謝王丞相啓

謝梁右相啓

謝周樞使啓

謝黃參政啓

謝施參政啓

謝臺諫啓

謝葛給事啓

會交代陳判院啓

嚴州到任謝王丞相啓

謝周樞使啓

謝梁右相啓

謝監司啓

謝臺諫啓

賀王提刑啓

會方寺丞啓

與沈知府啓

與汪郎中啓

賀蔣中丞啓

賀留樞密啓

賀蔣中丞啓

渭南文集卷第十一

賀禮部鄭侍郎啟

恭審筆臺陞華資論思於禁路絲綸出令兼潤色於
皇猷共知儒術之益尊孰謂太平之無象恭惟某官
好是正直擇乎中庸大冊高文固已寫之琬琰崇言
欲議皆可質於鬼神殆將與日月而爭光奚止當雷
霆而獨立惟上聖克勤於總攬察羣臣各盡於才能
謂其代予言既久煩於鴻碩求能典朕禮宜無易於
老成況以南省之要司仍寓西垣之舊直惟時異數
實冠清途然而文關國之盛衰官以人而輕重籲俊
尊上帝豈止在玉帛鐘鼓之間斂福錫庶民其必有
典謨訓誥之盛視古無愧非公而誰所冀復如三代
禮樂大備之時抑亦追還兩漢文辭爾雅之體顧雖
老矣尚及見之

會撫州發解進士啟

士論推賢方恨定交之晚鄉書擢秀遽勤授贊之恭
恭惟某官與學海涵英姿玉立山川信美生大儒名
世之邦絃誦相聞陶聖主右文之化將鵬搏於宦海
姑鴻漸於名場某偶此乘輅遂叨勸駕宸廷射策豈
惟慶榜帖之馳藏室讎書尚及見雲霄之舉 解魁云
籍甚聞名方恨定交之晚褒然擢秀遽勤授贊之恭

賀施中書啟

伏審蓬壺清閱早冠羣仙之遊詞掖高華旋觀一佛
之出得人之盛吾道有光恭惟某官秉德醇明宅心
夷粹高文大冊非復騷人墨客感寓之詞崇論欲言
盡得宗廟朝廷嚴重之體久矣絕世而獨立固難袖
手而旁觀況今聖政之新方建太平之業推明天子
惻怛愛民之指開慰海內奔走鄉化之心德意達於
四夷號令婉乎三代清議所屬匪公而誰且甘泉均
號於從臣而西省獨稱於政本國僑潤色雖概取儒
學之長山甫將明必深通天下之務正官名者蓋已

百祀稱職業者凡有幾人戛乎其難理若有待動心
矚目自茲觀大手筆之傳削牘濡毫又當慶真學士
之拜

上丞相參政乞宮觀啟

年運而往益知涉世之艱職思其憂獨幸侍祠之樂
倦倦微志懇懇自陳伏念某擁腫凡材聳牙曲學既
無甚高論足以譁世豈有它繆巧用以致身隨牒半
生問津萬里雖誓圖微報不勝狗馬之心而俯迫頽
齡已罹霜露之疾壯志曩然而欲盡殘骸碎爾以難
支拉朽推枯競為排陷哀窮悼屈孰借聲光敢圖廊
廟之尊未棄門闈之舊曲憐不逮力謂無他至於跌
宕之文辱在褒稱之域二百年無此作矣固難稱愜
於獎知萬戶侯豈足道哉私亦激昂於衰懦然而揣
數奇之薄命懼徒費於鴻鈞與其度越羣材留朱雲
於東閣曷若稍捐薄祿置陶令於北窗伏望某官仁
風朝及物之恩赫日照覆益之陋念前跋胡而後臺
尾惟當自屏於江湖方上昭天而下漏泉忍使獨擠
於溝壑假以毫端之潤寵其林下之歸某謹當刻骨
戴恩剝心慕道誦丹臺之葦笈少尉素懷拜玉局之
冰銜用華晚景

知嚴州謝王丞相啟

故里浮沉竊玉局再期之祿公朝披拭付桐江千里
之民瓜戍非遙竹符甚寵感淪病骨愧溢衰顏伏念
某元祐黨家紹興朝士池魚儼澗本思自放於江湖
社樂支離久已難施於斤斧絲治生之素拙因從宦
以忘歸頃自吳中久留劍外顧彼衣冠之所萃頗以
文字而相從方深去國之悲敢有擇交之意流偶殊
於涇渭風自隔於馬牛睚眦見憎本出一朝之忿排
擠盡力幾如九世之讎孰是羈孤孰為別白縱免投
荒之大罰亦宜置散以終身且定遠未歸惟望玉關
之生入輕車已老猶護北平之盛秋豈有朝為閭閻
廢斥之人莫竊畿輔承宣之寄茲蓋伏遇某官學窮

突與勳塞堪輿南山巖巖冠公師之重任赤烏几几同宗社之閱休念人才之實難悼士氣之不振挺陶至廣收拾無遺方與物以皆春憫向隅之獨泣燮和輿論闕略彝章起安國於徒中較恩未大還管寧於海外為力尚輕而某少非列於通才晚徒專於樸學棄雞肋而猶惜雖仰戴於深仁續鳧脛則自悲恐難逃於薄命

謝梁右相啓

故里投閑久竊奉祠之祿清時起廢遽叨出守之榮挈於九折之途置之一飽之地感深至骨涕溢交頤伏念某鄉校孤生京塵下吏學徒盡力徐而察之則鷄退飛仕已冥心非敢後也而馬不進頃者南遊七澤西上三巴驟見推於文辭因頗交其秀傑愛憎遂作譽毀相乘肆為部黨之讒規動朝端之聽雖漸能忍事聽垂面之自乾猶競起浮言至擢髮而莫數頰洞風波之上流離道路之旁幸逢曠日之中天固宜潦水之歸壑矧此江山之郡介於吳越之間先世嘗臨尚有召伯憩棠之愛提封甚邇僅同買臣衣繡之歸蕞爾何堪居然非稱此蓋伏遇某官身扶昌運手幹化鈞一氣鳶魚咸遂飛潛之性衆材采擢各安小大之宜俯憐囊下之餘嘗沐筆端之潤摧頽雖久省錄未忘謂人士舍之則藏固當慕昔賢顯晦之節然朝廷養非所用何以待異時緩急之求既啓迪於淵衷遂變和於輿論而某年齡抵此意氣蕭然律召東風雖幸春回於寒谷手遮西日敢希身到於修門

謝周樞使啓

起由散地付以名州朝迹久疎忽喜長安之近戌期未及先寬方朔之飢靖言孤蹤可謂過望伏念某簞瓢窮巷土木殘骸早已孤危馬一鳴而輒斥晚尤顛沛龜六鑄而不成羽翮摧傷風波震蕩薄祿作無窮之祟虛名結不解之讎鄙生自謂非狂甚矣見知之寡韓愈何恃敢傲若為取怒之深乘下澤之車忽過

半生掛神武之冠今無多日偶然未死得此少伸制出西垣地連右輔顧視必恭之梓阡陌相望封培勿翦之棠鄉閭太息此蓋伏遇樞使丞相學優域道覺民先卓爾為衆正之宗毅然開孤進之路自太公已久望子仰關宗廟之靈有夷吾可無復憂盡釋薦紳之慮方廣求於雋傑乃首記其姓名生物功深奚啻吹律召東風之妙回天力大未覺挾山超北海之難而某少頗激昂老猶矍鑠志士弗忘在溝壑固當堅馬革裹尸之心薄福難與成功名第恐有援臂不侯之相

謝黃參政啓

病餘揣分斷續食於叢祠望外疏恩俾牧民於近郡感深雪涕慙劇駢頤伏念某早歲多難晚途益困岷嶓嶮絕身行禹貢之書雲夢蒼茫口誦楚騷之句未葬支離之骨辱招羈旅之魂八千之路雖還五十之年已過視荒荒而益廢髮種種以堪哀斷港絕潢徒有朝宗之願朽株枯木何施造化之功雖存溝壑之餘生已是簪紳之棄物驚宿愆之盡洗知孤迹之少安如絲如綸命出西垣之潤色有民有社地連右輔之封圻矧復嚴瀨遺祠桐山故隱企高風之如在顧俗狀以自慙此蓋伏遇參政相公黼黻皇猷權衡國是衆仰規模之大天知議論之公謂設廉恥以遇羣臣士斯自好且蹈仁義則為君子人亦何常務與惟新不求其備某謹當銘膺感德擢髮思愆弱羽遶枝姑低回於晚景靈丹點磔儻邂逅於初心

謝施參政啓

起由散地畀以專城命出詞垣仰戴絲綸之寵名居節鎮俯敷章綬之華僂僂拜恩諱諱敘感伏念某薄才綿力多病早衰竊慕長者之餘風每思砥礪未聞君子之大道徒益顛危零丁稷下之遊寂寞漳濱之臥尚無漂母哀王孫而進食況有故人憐范叔而贈袍牛欲覺鐘誰其弗忍婦非束緼何以自還敢期累

年不振之蹤忽有一日殊常之遇光生分表喜溢情
涯惟茲山水之邦自昔詩書之俗脩門在望曾無日
近之嗟先世嘗臨獲慰露濡之感此蓋伏遇參政相
公至仁善下盛德兼容一引坐一解顏士託終身之
重三吐哺三握髮墊無片善之遺賢能借勢以薦騰
孤遠望風而傾屬自悲蓬梗獨遠門闈向使不為萬
里之行固亦久在諸生之末誦文章於方冊竊喜得
師聞道義於薦紳亦嘗願學既積精誠之至果歸甄
冷之公旅進無階歎空馳於清夢餘年有幾懼終負
於初心

謝臺諫啓

貧念代耕之祿懇乞奉祠恩開使過之門復令洽郡
方窮閭之待盡非公議而疇依慙極辭顏感深雪涕
伏念某邇回薄命顛顛餘生肄業荒唐小學僅通於
蒼雅屬辭卑弱奇文徒慕於莊騷髮種種以將童心
搖搖而欲折食粥動逾於累月陳綿或至於隆冬不
能引分以掛冠廉隅已喪更復貪榮於懷綬愧懼可
知況此名城今爲近輔九霄嘉氣日未邇於長安千
載遺祠星嘗從於帝座孰爲之地使有此行茲蓋伏
遇某官偉量海涵英姿山立 正言云義急嗷枯仁先念舊
衆惡之而必察俯憐久困於風波今老矣而無能尚
使少紓於溝壑爲國廣旁求之路示人無終棄之才
曾是妄庸曲蒙全護除書已下徒叨滌洗之恩羸疾
益侵無復激昂之日

謝葛給事啓

杜門訟六十年之非久安散地起家忝二千石之重
忽奉明恩驚費垢之漸除扶衰殘而下拜 舍人云起自
窮閭叨臨近郡爲農爲圃三年之冗不治如絲如綸一字之衰過寵
伏念某學由病廢仕以罪歸冥心鷓鷯之行投迹雞
豚之社海三山之縹渺釣鼈已媿於初心楚七澤之
蒼茫瘴咒亦成於昨夢但欲負耒慕許行之學豈復
叩角歌甯戚之詩偶逢公朝使過之時躡界近郡承

流之奇所蒙過矣自揆茫然天際鬱蔥望九重之雲
氣道周蔽帝掃四世之棠陰得遂此行孰爲之地此
蓋伏遇侍講給事道本文王之正學師孟氏之醇騰
茂實而蜚英聲久隆上瞻息邪說而距詖行遂擅儒
宗方與萬物而皆春不忍一夫之獨泣某偶偕未契
遂借餘光 舍人云議論四方之望文章百世之師餘談激水之斗
升窮鱗悉遊麗藻生雲於膚寸甘澤無窮方與萬物而皆春不忍一夫
之獨泣而某適有懷章之幸首叨泚筆之榮 雖飯豆羹藜不敢
望功名於老大然書紳銘座右尚思復玷缺之難難

富交代陳判院啓

病求玉局但懷優游卒歲之心恩昇桐廬獲繼超軼
絕塵之迹方自嫌於通問乃遽辱於移書公真快哉
我則陋矣伏念某少而落魄老益迂疎顛顛關河萬
里客岷嶓之境馳驅節傳三年使閩楚之郊迨此退
歸頽然遲莫投饋已安於蟹舍起家忽奉於魚符此
蓋伏遇某官秉節以貫四時瑞世而翔千仞經行早
推於庠序謀猷晚著於朝廷謠誦上聞豈獨最列城
之課規模甚遠又足爲來者之師某偶幸懷章遂將
接武雖取棄竹馬望英躅以增慙然獲舊青氍在衰
門而甚寵發春伊始坐獻多閑願遵輔養之宜即慶
禁嚴之拜

嚴州到任謝王丞相啓

懇求祠祿乃叨便郡之除甫及戍期亟奉燕朝之對
身既復歸於鈞播衆知未棄於明時伏念某淺智福
能薄才綿力棲遲屏迹但欲射猛虎以終殘年辛苦
著書不足藏名山而俟後世偶爲貧而求仕旋觸罪
以免歸雁食無儲鷄衣不補凡百君子悠悠非特達
之知平生故人往往處嫌疑之際欲言誰聽投老奚
歸豈期廟堂任使之公挈出溝壑漂流之地此蓋伏
遇某官孟韓道統伊呂王功黼黻聖猷謂言之不文
則行之不遠甄陶士類每捨其所短而取其所長慨
念孤生已侵莫境儻使抱所聞而不試則將齋遺恨

於無窮何止屢陳於斧屨之前蓋亦昌言於搢紳之上故雖久斥亦復漸收而某已知悔童子之雕蟲未免守古人之糟粕決無可用寧不自知續鍾釜之祿以待掛冠嘗面祈於大造効尺寸之勞而垂汗簡悵承負於初心

謝梁右相啓

玉局二年已竊代耕之祿桐廬千里復叨起廢之恩望辟表之顯昂撫編氓之繁夥退惟忝言徒積兢慙伏念某四壁寒家一篋賤士刻舟求劍固匪通材懲羹吹壘已消壯志比由蟹舍起領魚符永言久斥之餘亦有少伸之望然而察簿領稽違之細擿吏胥隱伏之微一皆非其素知又不可以遽習淵明之寄事外已迫頽齡安國之權徒中曷勝煩使此蓋伏遇某官才全經緯氣塞堪輿博取衆材屢抗延英之論宏開公道靡須光範之書施及妄庸未忘夙昔溫飽一門之衣食洗滌累歲之罪愆使爲全人以畢餘日某敢不好是正直擇乎中庸戒舞智以賊民寧取椎魯少文之誚務盡心於折獄庶無冤枉失職之嗟苟不辱知其敢言報

謝周樞使啓

入望清光出臨近郡天威不遠只尺既諧就日之心父命惟所東西況被牧民之寄感恩至矣揣分茫然伏念某下愚難移大惑莫解不能高飛遠舉求避橫目之民乃復直情徑行自撥噬臍之悔永言窮薄數蹈遭回毀靡待於德高災非由於福過斷雲零落敢懷出岫之心病鶴襪袂忽忝乘軒之寵此蓋伏遇某官道窮突與氣塞堪輿南山之石巖巖帝資宿望緝袍之意戀戀士感誠言哀細德之嶮微開鴻鈞之坱圮念茲積譴雖擢髮而有餘察彼衆議亦吹毛之已甚未加顯棄聊復少收雖不在於英材樂育之中實創見於薄俗相挺之際而某扶衰自笑迫老宜歸無復入關西日舉釣竿之手惟希度世東封謁玉輅之

塵傾倒具陳慙惶無措

謝臺諫啓

挂洪景之衣冠宜還故里懷買臣之印綬尚冒明恩觸熱即途扶衰領郡伏念某身常短褐家本衡門一官惟妻子之謀萬里極關河之遠景翳翳以將入餘日幾何芳菲菲其彌草素心空在比者竊冰銜於玉局築雲屋於鏡湖惟俟引年遂將沒齒散地方斬於因任除書忽畀於專城宮闕中天有就日望雲之幸鄉間接壤逾過家上冢之榮此蓋伏遇某官望重朝綱學通國體收真才於水落石出之後坐銷浮僞之風察定理於舟行岸移之時盡黜譏誣之巧稍收久廢用示至公某謹當勉効微勤堅持素守吏犯法而法在先務去奸政近民則民歸敢忘用恕或竊逃於大譴庶少答於深知

謝監司啓

挂洪景之衣冠宜還故里懷買臣之印綬尚冒明恩觸熱即途扶衰領郡伏念某身常短褐家本衡門一官惟妻子之謀萬里極關河之遠景翳翳以將入餘日幾何芳菲菲其彌草素心空在比者竊冰銜於玉局築雲屋於鏡湖惟俟引年遂將沒齒散地方斬於因任除書忽畀於專城宮闕中天有就日望雲之幸鄉間接壤逾過家上冢之榮此蓋伏遇某官學貫經邦望隆國器繡衣持斧姑小試於使輅豹尾屬車即超登於禁路尚容衰頽之迹暫託澄清之餘某謹當勉効微勤堅持素守吏犯法而法在先務去奸政近民則民歸敢忘用恕或竊逃於大譴庶少答於深知

富方寺丞啓

年運而往悵久隔於英遊道阻且長忽恭承於榮問情文甚寵衰晚增光伏念某笠澤漁家紹興朝士捫參歷井久困客遊衰海摘山屢乘使傳旣罪愆之未洗復衰疾之相乘骨相宜窮頭顱可揣穿延和之細仗恍若隔生分新定之左符更叨起廢此蓋伏遇某

官義存推轂德重匪瑕哀其顛顛之百罹借以揄揚之一諾遂叨共理之寄亦及歸耕之餘而某緣病廢書迫貧隨牒能古文何用於今世徒慙長者之見知居是邦不非其大夫殊匪小人之所望佇奉丁寧之誨用寬瘵曠之虞

賀王提刑啓

恭審繡衣玉節肅王畿風憲之嚴寶畫奎文新內閣圖書之直方攬澄清之轡已騰謠誦之聲恭惟某官學道愛人至誠格物德秉民彝之粹才推國器之英中外踐揚自際風雲之會始終操履靡移金石之堅將階言語侍從之除游被禮樂光華之遺欽恤副九重之指平反奉一笑之春始訖外庸即躋近列計乘輶之未幾旋頌詔以趣歸某意廣才疎心勞政拙伏櫪志在千里悵莫景之已侵巢林不過一枝幸卑棲之有託

與汪郎中啓

去蜀歸吳已侵尋於晚境乞祠得郡尚記錄於明時夙戒行轡已臨弊邑方竊依仁之幸敢稽告至之恭伏念某笠澤農家紹興朝士捫參歷井久困客遊黃海摘山屢乘使傳既罪愆之未洗復衰疾之相乘骨相宜窮頭顛可揣穿延和之細仗恍若隔生分新定之左符更叨起廢恭惟某官義存推轂德重匪瑕哀其顛顛之百罹借以揄揚之一諾遂容共理之寄亦及歸耕之餘而某扶憊以來罔功是懼快景星之先覩雖尚阻於瞻承分隣燭之餘光遂密依於覆護其爲慰幸曷究敷陳

與沈知府啓

乘傳江臯偶同一道分符畿內復幸鄰邦公將假道於虞僕其得御於李胡交臂而失此亟削牘而布之恭惟某官厚德鎮浮英姿邁往富貴固有命矣未嘗枉尺以自謀將相豈無種哉方且搏風而直上雖仰急流之勇退寧容袖手而旁觀果奉明綸起臨近甸

豐年高廩想謠誦之已聞燕寢清香知文書之益簡願精調於列鼎即歸覲於凝旒瞻詠之私數官曷既

賀留樞密啓

恭審行玉關之萬里方喜遄歸陳泰階之六符亟聞殊瞻地禁處承明之邃任崇參宥密之嚴成命誕揚師言允穆切以藝祖鑒五代之弊不偏重於中書裕陵新六官之名亦旁開於西府豈獨竝隆於文武固將兼注於安危至以明詔特預於訃謨尤爲本朝久虛之盛舉中原多故首用種忠憲之偉人聖政方新則有虞雍公之近事或名光於竹帛或位極於廟堂恭惟某官躬閱深魁碩之資負剛大直方之氣早推雅望履歷近班以至公服小人故雖疎而不怨以大節事明主故既去而見思世方譴譴以自營公固落落而難合迨此寵光之自至益知熾險之徒勞淵乎一心應彼萬事七擒七縱已成服遠之功三起三留果有處中之命方且端委冠鈞衡之位挽河洗夷虜之塵復列聖在天之鮮據遺民泣血之憤某幸身未死見國中興材館旁招雖莫陪於下士活溪深刻尚自力於斯文

賀蔣中丞啓

伏審顯膺帝制進總臺評公道大開在廷爲之相賀正人益進吾國殆其庶幾仰惟廟社之休非復門闈之慶某聞人情不遠立朝誰樂於枰彈仕者自謀于世本求於遇合皆使從容而徐進自非怨嫉之所歸一居三院七人之官遂任四海九州之責至於諫大夫之助成主德中執法之振肅朝綱知不可以不言言不可以不盡雷震在上獨立自如鼎鑊當前直趨不避始也負當世之名而人不我捨今也居得言之地則責將誰歸卓乎偉人更此重任恭惟某官英姿邁往與學造微論必盡忠得堪與剛大之氣仕常思退有耕釣高逸之風位逾達而謙有加權益隆而量莫測姑小煩於繩肅即進與於病諧豈惟斯民被化

於春風和氣之中亦使多士吐氣於青天白日之下
今其始矣幸孰甚焉某嘗辱王翰卜隣之榮妄懷貢
禹彈冠之喜崇言欲議已觀魁磊光信史之傳過計
私憂妄有一二爲執事之獻儻少寬於斧鑕尚願布
於腹心

渭南文集卷第十一

渭南文集目錄
卷第十二

賀賈大諫啓

賀謝殿院啓

賀周丞相啓

賀施知院啓

賀丘運使啓

賀蔣尚書出知婺州啓

除直華文閣謝丞相啓

賀謝丞相除少保啓

修史謝丞相啓

除寶謨閣待制謝丞相啓

賀張參政修史啓

致仕謝丞相啓

謝費樞密啓

會胡吉州啓

會權提刑啓

渭南文集卷第十二

賀賈大諫啓

恭審顯膺一札之敬首冠七人之選主賢臣直國勢
 歸然言聽諫行天下幸甚某聞昔在本朝之官制參
 稽前代之舊章南臺不置大夫中憲任紀綱之重寄
 北省久虛常侍諫坡率遺補以盡規選求既難昇託
 尤重故政在中書而常開言路事由獨斷而不廢爭
 臣仰觀十一聖家法之傳茲為二百年治功之本繼
 昔之盛非公而誰恭惟某官學造精微器函閱遠許
 國弗渝於夷險憂時如抱於渴飢造膝告猷浩浩江
 河之決傾心愛土拳拳涇渭之分慨然死生禍福不
 入於中常若天地鬼神實臨其上以今日陳善閉邪
 之效成異時贊元經體之功同出此心夫孰能禦某
 侵尋莫景踳躑孤生迹本甚疎妄欲依歸於公道分
 當永棄特蒙杖拭於窮途何以仰荅門闈特達之知
 惟有稍陳郡縣利病之實儻少寬於斧鑕尚嗣布於
 腹心

賀謝殿院啓

恭審顯膺帝制進貳臺端手縮衷以逡巡久已抱獨
 立無朋之操髮衝冠而憤切自茲皆盡言不諱之時
 在庭聳觀有識相慶伏以御史分職本以論事任耳
 目之司忠臣設心蓋欲去邪為宗社之福抗雷震而
 獨立凜山嶽之不搖非以近名固將竭節天子為之
 改容而垂聽大臣不敢持必而自私國有紀綱治自
 形於四海九州之遠士篤名義效或見於數世百年
 之餘今茲執配於古人識者固歸於門下恭惟某官
 道德醇備議論正堅灰寒木槁而譽益高鯁擊鷹搏
 而才乃見默究朝廷之利病盡得源流徐觀天下之
 是非若指白黑放斥者有愧心而無怨更革者雖害
 己而謂然太平之功指日可待某侵尋莫景踳躑孤
 生迹本甚疎妄欲依歸於公道分當永棄特蒙杖拭

於窮途何以仰奮一見特達之知惟有稍陳千里利
 病之實儻少寬於斧鑕尚嗣布於腹心

賀周丞相啓

恭審夢卜襲祥揚王庭而渙號典冊備物熙帝載以
 宅師國其庶幾民以寧壹實惟宗社無疆之祐非復
 門闈旅賀之常竊以時玩久安輒生天下之患國無
 遠略必有意外之虞方今風俗未淳名節弗勵仁聖
 焦勞於上而士夫無宿道嚮方之實法度修明於內
 而郡縣無赴功趨事之風邊防浸弛於通和民力坐
 窮於列戍每靜觀於大勢懼難待於非常至若靖康
 喪亂而遺平城之憂紹興權宜而蒙涇橋之恥高廟
 有盜環之通寇乾陵有斧柏之逆傳江淮一隅夫豈
 仗衛久留之地梁益萬里未聞腹心不貳之臣文恬
 武嬉戈朽鉞鈍謂宜博采眾謀之同異然後上咨廟
 論之崇嚴非素望之偉然誰出身而任此恭惟某官
 降神維嶽生德自天居安資深學洞六經之韞探蹟
 索隱識窮萬務之微蓋嘗獨立以當雷霆何止貴名
 之揭日月運籌帷幄每當上心端委廟堂遂持國柄
 玉燭肇時和之慶雲龍協聖作之辰清未央長樂之
 宮將肅六飛之御築碣石榆林之塞永奠四夷之封
 於古有光自今以始某側聞盛舉實抃歡悰恤百口
 之飢寒豈無竊覲拔四方之英俊願付至公庶未死
 之餘生觀太平之盛際

賀施知院啓

恭審誕布明綸進專籌幄用真儒而無敵翊扶宗社
 之基得大老以來歸開慰華夷之望恭惟某官英姿
 邁往精識造微居安資深韞六藝淵源之學任重道
 遠炳兩朝開濟之心明辯足以折遊衡果敢足以斷
 幾事自初拔用迄此延登大節全名松柏挺歲寒之
 操同心一德風雲協聖作之期堪與清夷星緯明潤
 致太平其自此將魁柄之焉歸曩暫入於脩門竊有
 聞於行路謂明公之得政以人物為最先自隆師尹

南山之瞻復見平津東閣之盛揚庭薦拔造膝開陳
凡人所難以身獨任今雖總本兵之地願益尸善類
之盟公能以士而報國家士亦以身而歸門下某侵
尋莫境顛顛偏州志氣已衰無復獻狗盜雞鳴之技
文辭自力尚能助稗官野史之傳過此以還未知所
措

賀丘運使啓

恭審上印帥藩乘輅幾甸得人若是則吾國其庶幾
乎先聲隱然非俗吏之所能也公論爲之慰愜大用
此其權輿伏以寬猛異施古今莫一子產號衆人之
母用於鄭而弗救陵夷申商爲法家者流弊至秦而
卒以顛覆歷考簡編之跡莫先儒術之功惟蹈君子
之時中斯得古人之大體方其尊瞻視正顏色教化
固已有成雖使空囹圄畫衣冠法令其誰敢犯恭惟
某官英姿邁往敏學造微夷途早踐於高華隆委偏
當於繁劇所臨輒治雖千變萬化而不窮自守弗阿
終特立獨行之如此上將引而自近公其有以告猷
某早陪談燕之餘誤辱賞知之異敢圖莫境獲備屬
城閭里士聊每攬涕下催科之筆事功靡著更忍慙
修候問之賤尚加惠於始終俾羸全於進退歸依之
切數繹奚禪

賀蔣尚書出知婺州啓

恭審解中執法以暫均勞佚拜大宗伯而入侍禁嚴
雖若不得其言固亦未爲弗用乃抗投閑之請力勸
就養之榮詔諭靡從藩條初布上倚承宣之績士高
廉退之風恭惟某官直哉惟清淵乎似道懷欵許國
肝膽凜其輪困慷慨疾邪山嶽爲之震動進率由於
獨斷節早見於盡言未移桑蔭之淹入總柏臺之峻
國方增九鼎之重身已如一葉之輕魯人獲麟以爲
不祥雖愛憎之叵測塞翁失馬未必非福抑倚伏之
何常某幸託里門獲趨賓席身世等廟管之棄孰閑
餘生姓名託甄冶之公尚須異日

除直華文閣謝丞相啓

秩視大蓬已竊垂車之寵恩加邃閣更叨出綈之榮
初聞道路之傳猶謂姓名之誤迨茲被命重以懷慙
伏念某承學迂疎稟資最陋幼生京洛尚爲全盛之
編氓長綴班聯曾是中興之朝士福未容於盈昔崇
已駭於燒城西征至岐鳳之間南戍掠甌閩之境晚
僅升於省闈旋即返於鄉關鶴歸遼天狐死丘首蓬
戶十移於歲律幔亭四閱於祠官久遂屏居非始挂
冠之日盡捐半俸真爲納祿之人豈期垂盡之光陰
忽玷殊常之惠澤復緣詔札併竊身章里巷聳觀共
仰恩光之下燭兒孫扶拜不知衰涕之橫流茲蓋伏
遇某官降命應期奮庸熙載神無方易無體心獨運
於道樞尺有短寸有長士悉歸於鈞播雖迫崦嵫之
景亦歸塊坳之公而某意氣空存筋骸已憊草具明
堂辟雍之禮雖遭甚盛之時塗竄清廟生民之詩其
在方來之雋

修史謝丞相啓

七十告老誓待盡於山林尺一召還恍復瞻於觀闕
內祠祿厚信史事嚴容孤迹於其間知鴻鈞之有自
恭以高皇之盛德大業雖號中興而實同開創之艱
孝廟之內修外攘躬享太平而不忘恢復之志治躋
古昔威震裔夷俄屬鼎成之悲肆修麟止之緒固已
網羅軼事潤色皇猷備述巍巍蕩蕩之功曲盡業業
兢兢之指豈繫遲莫能與討論伏念某天子散材家
承孤學生逢盛日蒙六聖之涵濡身綴清班被四朝
之識拔常恐倏先於朝露遂將莫報於秋毫豈期及
耄之餘齡猥得効勤於大典茲蓋伏遇某官材全經
緯氣塞堪輿平生陳謨決策之言煥乎可誦十載知
人安民之績底於有成殊鄰款塞而奉琛多士鄉風
而釋屬內而臺閣極稽古禮文之選外而郡縣有宜
民體悌之風肇闢大公至正之途不棄偏能一曲之
士故如某輩亦在數中謹當益廣見聞更勤采掇老

驥伏櫪脩途已非其所堪小草出山薄効尚期於自見

賀謝丞相除少保啓

恭審命出淵衷廷揚顯冊人主之論一相方寄腹心少保茲爲二公益隆體貌傳聞所逮雖頌惟均恭以某官謨明稱諧任重道遠協天心於岷崙旁魄之際動必有成隆主眷於蠅螭雙護之中言無不用自登近輔允迪大猷疇咨雖首於羣公謙畏不殊於一日每稽首而遜稷契終選衆而舉伊臯三年有成四海用又農扈告豐登之候戎韜臻偃息之期熙運方興周召並爲於師保衆心所繫平勃均任於安危是宜大號之繼敷昭示元臣之同體羣生成遂協氣橫流謹乃憲而屢省則成孰測化鈞之妙本無事而庸人實擾始知靜治之功某獲綴清班欣逢盛事無好無惡而遵王路共欣聖政之大成不愆不忘而由舊章更冀廟謨之無倦敢効涓塵之助輒干礎斧之誅言瀆實深兢惶罔措

賀張參政修史啓

恭審誕布明綸總提鉅典固已動鷓鷯行之喜色而況在牛馬走之後塵不能自己於寸誠是敢言陳於尺牘恭惟某官自天生德降命應期闡溫厚爾雅之文經緯萬象蘊超軼絕塵之識鎮撫四夷位居台鼎而有山澤清臞之容禮絕摺紳而無王公驕泰之意心虛靜而觀復道冲用而不盈周公太公方隆夾輔之望堯典舜典更專點竄之功實以袞衣黃閣之尊下兼蘭臺石室之事在天三后魏乎下臨作宋一經信矣無憾某偶蒙簡拔獲預討論已侵投老之殘年何補不刊之信史仰傳巖之霖雨幸預在廷歸杜曲之桑麻尚勞泚筆想典刑於諸老已媿空疎竭精力於是書敢忘策勵

除寶謨閣待制謝丞相啓

冊府秩清偶至鼂峯之頂禁途地密遂穿豹尾之中

雖造化之至公寶恩憐之曲被欲敘丹衷之感莫知雲涕之橫伏念某雖起耕疇廩傳家學書藏屋壁尚擯斥而不容跡遯園廬豈榮華之敢望虛名作崇聚誇成雷幸於先狗馬塞溝壑之前遂其賜骸骨歸卒伍之請任子以世其祿寓直以華其行固已負未學耕飾中待盡身還民服口誦農書從故里漁樵之遊拜高年羊酒之賜忽從旣置欲奉詔除所愧忝大門之官敢愧奪匹夫之志惟俟奏篇之御即伸告老之誠簡牘未終絲綸已降半生淹泊沉舟真閱於千颿一日遭逢開印適當於三日已扶衰而拜命旋曳蹇以造庭茲蓋伏遇某官德懋忱恂化均坱圉作成土類兼小大而不遺勸相皇家派異同於無迹澤東漸而西被功上際而下蟠才或取於寸長罪不捐於一肯故雖么麼亦被生成某敢不頂踵知恩冰霜勵節少不自力坐沉廢者半生老當告休悵報酬之無地

謝費樞密啓

猥被恩綸躡持從臺處內閣諷咨之地繼大門揚歷之榮揣分奚堪置慚靡所伏念某百罹薄命九折窮途迹久困於多言年已侵於大耋都門屢入壯遊恍似於前身冊府再來衆吏多非其舊識扶衰殘而就列刮瞽膜以紬書非徒莫辨於旁觀每亦不勝其自媿惟埃奏篇之御即伸請老之誠敢謂遭逢曲蒙識拔茲蓋伏遇某官道尊皇極學統聖傳雖吐哺握髮之勞曾靡遺於一士然引坐解顏之遇顧豈在於他人每屈崇巖不移疇昔爰自東壁圖書之府俾躋西清鷓鷯之班驥伏櫪以悲鳴曩誰念者犬砥丹而仙去今乃似之某燈火尚親筆瓢未厭修世官而不墜益體上恩繼家學於履衰或傳來裔庶幾瞑目無媿

致仕謝丞相啓

優詔許歸已荷乾坤之造異恩及幼更霑雨露之私非公台力假於敷陳則草野何從而甄錄感銘刻骨

涕泗交頤伏念某少乏通材晚嬰羸疾史闡八月常懷渴日之慙祠祿三時滄上引年之請初但虞於煩瀆旋曲被於矜從而況從中明降於德音任子特逾於常制桑榆已迫俾華垂白之年豚犬何能遽有拾青之幸里閭歎息門戶敷榮茲蓋伏遇某官降命應期奮庸熙載告猷於內時已措於太平祝鯁在前禮每加於諸老疊疊誠明之學巍巍忠厚之風坐格華裔之寧有光簡冊之載故推餘澤俯及衰門重念穉兒雖非異稟善和之書幸在敢虛棄於光陰太常之第可收尚仰酬於長育

舍權提刑啓

伏審抗章請外攬轡入東謂宜因對而復留故欲馳書而未敢遽先垂問莫喻愧心恭惟某官英識造微宏材經遠學術得前言行之要議論有羣公先正之風踐揚早歷於清華雖能自見寄任靡辭於叢委刃每有餘茲乃勇退急流旁觀袖手明刑以弼五教誦詩而使四方雖暫試於外庸顧豈符於僉矚還節旆於少府行被詔追司筆橐於甘泉孰居公右某退依耕隴密邇臺綱躬豈第以宜民旣蒙賜矣用春秋而決獄行且見之頌詠惟深敷陳罔旣

舍胡吉州啓

伏以累疏乞歸旣拜賜骸之命華賤贊喜更煩泚筆之勞異書憐老學之勤厚幣篤嘉賓之禮顧惟衰悴曷稱眷私伏惟某官絕識超然英聲籍甚簡編插架早推師友之淵源紳佩在廷旋慶君臣之際遇茲暫煩於共理即歸告於嘉猷而某已返農疇愈賒門戟壑枯甚寵徒藏櫝以爲榮詠德雖深愧占辭之莫旣

渭南文集目錄

卷第十三

代二府與夏國主書

上執政書

上虞丞相書

上辛給事書

倉刑司戶書

倉劉主簿書

與尉論捕盜書

倉陸伯政上舍書

倉王樵秀才書

渭南文集卷第十三

代二府與夏國主書 癸未正月二十一日二府讀至都堂撰

隆興元年正月二十二日特進尚書左僕射同中書門下平章事兼樞密使信國公陳康伯等謹致書夏國主殿下昔我祖宗與夏世修盟好豈惟當無事時共享安平之福亦惟緩急同休戚恤哉患相與為無窮之託中更變故壤地阻絕雖玉帛之聘弗克往來然朝廷未嘗忘祖宗之志也乃者皇天悔禍輿圖寢歸會今天子紹登寶位慨然西顧宣諭大臣曰夏二百年與國也豈其不念舊好而忘齊盟哉某等恭以國主英武聰哲聞於天下是敢輒布腹心於執事願留神圖之惠以報音當告於上議所以申固歡好者同心協慮義均一家永為善鄰傳之萬世豈不美歟有少幣儀具如別幅伏惟昭察不宜某等謹白

貼黃 前件事宜臣等雖已面陳緣利害至大陛下反覆省覽政取輒具此奏

上執政書 辛巳四月

某官閣下文人之在天下用之徒以為治世之觀大平之飾不用則亦已耳非如兵刑錢穀之吏不可一日無也然為國者每每收取不忍棄去豈固為是不急哉蓋天下之事惟此為最難非誠好之捐三二十年之勤耗心疲力彫瘁齒髮飲食寢夢悲歡得喪一在於是者殆未易可以言工信工矣然且高不足以為功名下不足以得財利塵編蠹簡束而藏之幸世有知此道者數息稱工嗚呼可謂鈍哉以天下之至勤苦為天下之至鈍待千萬中一二人之知此賢公卿以人物為己任者所以不忍棄也某小人生無他長不幸束髮有文字之愚自上世遺文先秦古書晝讀夜思開山破荒以求聖賢致意處雖才識淺闇不能如古人迎見逆決然譬於農夫之辨菽麥蓋亦專

且久矣原委如是派別如是機杼如是邊幅如自六經左氏離騷以來歷歷分明皆可指數不附不絕不誣不紊正有出於奇舊或以為新橫鶩別驅層出間見每考觀文詞之變見其雅正則纓冠肅衽如對王公大人得其怪奇則脫帽大叫如魚龍之陳前臬盧之方勝也間輒自笑曰以此娛憂舒悲忘其貧病則可耳持以語人幾何其不笑且罵哉誠不自意諸公聞之或以為可書生所遭如此雖窮死足以無憾矣然師慕下風而未得一望履寫此心款然不敢違寧恭惟明公道德風節師表一世當功名富貴之會而不矜踐山林鐘鼎之異而不變非大有得於胸中其何以能此文文章小技耳然與至道同一闢振惟天下有道者乃能盡文章之妙此某所以忘其賤且愚而願有聞於左右也

上虞丞相書

某聞才而見任功而見錄天下以為當君子曰是管仲相齊衛鞅執相秦之法耳有人於此才不足任功不足錄直以窮故哀之天下且以為過君子則曰是三代之俗周公孔子之政也何也彼有才吾賴其才因以高位處之彼有功吾藉其功因以厚祿報之上持祿與位以御其下下挾才與功以望其上非市道乎故齊秦用之雖足濟一時之急而俗以大壞君子羞稱焉若夫三代之俗周公孔子之政則不然無才也無功也是直無所用也無所用之人雖窮而死者百千輩何損於人之國哉自薄者視之尚奚恤君子顧深哀之視其窮若自我推以與之之不敢安也矜憐撫摩衣之食之曰彼有才有功者何適而不遇吾所急者其惟無所用而窮者乎此心父母也推父母之心以及於天下無所用之人非聖賢孰能哉謂之三代之俗周公孔子之政則宜故王霸之分常在於用心之薄厚而昧者不知也恭惟大丞相道學精深力量廣大庶幾以周公孔子之政而復三代之俗者渾

渾巍巍不可窺測平時挾功恃才錙銖較計者皆自
失退聽若某之愚不才無功留落十年乖隔萬里而
終未敢自默特曰身之窮大丞相所宜哀耳某行年
四十有八家世山陰以貧悴逐祿於夔其行也故時
交友釀緡錢以遣之破中俸薄某食指以百數距受
代不數月行李蕭然固不能歸歸又無所得食一日
祿不繼則無策矣兒年三十女二十婚嫁尚未敢言
也某而不為窮則是天下無窮人伏惟少賜動心捐
一官以祿之使粗可活甚則使可具裝以歸又望外
則使可畢一二婚嫁不賴其才不藉其功直以其窮
可哀而已此氣象自秦以來世以功利相高沒不見
者累二千年今始見於門下所願持之不搖行之不
疑則豈獨某之幸哉

上辛給事書

某官閣下君子之有文也如日月之明金石之聲江
海之濤瀾虎豹之炳蔚必有是實乃有是文夫心之
所養發而為言言之所發比而成文人之邪正至觀
其文則盡矣決矣不可復隱矣爍火不能為日月之
明瓦釜不能為金石之聲潢汙不能為江海之濤瀾
犬羊不能為虎豹之炳蔚而或謂庸人能以浮文眩
世烏有此理也哉使誠有之則所可眩者亦庸人耳
某聞前輩以文知人非必鉅篇大筆苦心致力之詞
也殘章斷藁憤譏戲笑所以娛憂而舒悲者皆足知
之甚至於郵傳之題詠親戚之書牘軍旅官府倉卒
之間符檄書判類皆可以洞見其人之心術才能與
夫平生窮達壽夭前知逆決毫芒不失如對棊枰而
指白黑如觀人面而見其目衡鼻縱不待思慮搜索
而後得也何其妙哉故善觀晁錯者不必待東市之
誅然後知其刻深之殺身善觀平原津侯者不必待淮
南之謀然後知其阿諛之易與方發策決科時其平
生事業已可望而知之矣賢者之所養動天地開金
石其胸中之妙充實洋溢而後發見於外氣全力餘

中正閱博是豈可容一毫之僞於其間哉某束髮好
文才短識近不足以望作者之藩籬然知文之不容
僞也故務重其身而養其氣貧賤流落何所不有而
自信愈篤自守愈堅每以其全自養以其餘見之於
文文愈自喜愈不合於世夫欲以此求合於世某則
愚矣而世遂謂某終無所合某亦不敢謂其言為智
也恭惟閣下以臯陶之謨周公之誥清廟生民之詩
啓迪人主而師表學者雖鄉殊壤絕百世之下猶將
想望而師尊焉某近在屬部而不能承下風望餘光
則是自絕於賢人君子之域矣雖然非敢以文之工
拙為言也某心之為邪為正庶幾閣下一讀其文而
盡得之唐人有曰士之致遠先器識而後文藝是不
得為知文者天下豈有器識卑陋而文詞超然者哉
狂妄冒犯死有餘罪

會邢司戶書

五月二十六日笠澤陸某頓首再拜復書司戶迪功
足下某辱賜書及聖人之道與古作者之文章又以
世之稱師弟子而徒事科舉求利祿者為羞卓乎偉
哉非某所敢仰望萬一也某少之日學文而不工及
其老妄意於道亦未敢謂得也身且弗給而何以及
人及庸衆人且弗能其況有以助足下乎惶恐惶恐
雖然足下顧我厚某其敢有所弗盡吾曹有衣食祭
祀婚嫁之累則出而求祿恐未為非既不免求祿則
從事於科舉恐亦未為可憾科舉之文固亦尊王而
賤霸推明六藝而誦說古今雖小出入要其歸亦何
負於道哉若言之而弗踐區區於口耳而不自得於
心則非獨科舉之文為無益也近時頗有不利場屋
者退而組織古語剽裂奇字大書深刻以眩世俗考
其實更出科舉下遠甚讀之使人面熱足下謂此等
果可言文章乎尚不可欺僕輩安能欺足下哉故自
科舉取士以來如唐韓氏柳氏吾宋歐氏王氏蘇氏
以文章擅天下者莫非科舉之士也此無他徒以在

場屋時苦心耗力凡陳言淺說之可病者已知厭棄如都市之玉工珉玉雜治積日既久望而識之矣一日取荆山之璞以爲黃琮蒼璧萬乘之寶珉其可復欺邪凡今不利場屋而名古之文者往往多未嘗識珉者也又安知玉哉乃如足下識之可謂精矣當棄珉剖玉而已至於聖人之道足下往昔朝夕所講習者豈外於是言之而必踐焉心之而不徒口耳焉無餘道矣某文既不工聞道又甚淺則今所以進於左右者其果近乎一讀置之無重吾過不宣

富劉主簿書

某才質愚下又兒童之歲遭罹多故奔走避兵得近文字最晚年幾二十始發憤欲爲古學然方是時無師友淵源之益凡古人用心處無所質問大率以意度或中或否或始疑其非終乃大信或初甚好之已而徐覺不可者多矣然亦竟不知所謂是且非者卒何如也方竊媿歎不意如足下學術文章足以雄長一世者乃不鄙其愚而欲與之交惠然見臨賜之以言以爲可與言古學者文詞偉麗讀之惕然夫道遇乞人責之千金足下固過矣然遂謂足下爲非則不可往者前輩之學積小以成大以所有易所無以能問於不能故其久也汪洋浩博該極百家而不可涯涘如足下所稱諸公蓋皆如是也至中原喪亂諸名勝渡江去前輩尚未甚遠故此風猶不墜不幸三二十年來士自爲哇咿甚狹己所未知者輒訕薄之以爲不足學排抑沮折惟恐不力詆窮經者則曰傳註已盡矣詆博學者則曰不知無害爲君子嗚呼陋哉夫世既未有仁智之足如孔孟而師焉則亦各出所長相與講習從其可者去其不可者自六經百氏歷代史記與夫文詞議論禮樂耕戰鍾律星曆官名地志姓族物類之學今四方之士亦不可謂無人雖不能兼該衆長要爲各有所得往往皆捐數十年之功耗心疲力彫頽齒髮而爲之豈可易哉如足下之

所已得者某願就學焉其未者頗願與足下從諸君子歷探其所有足下亦宜盡發所亭蓄以與朋友共之某所聞誠最淺薄亦願再拜以進惟足下與諸君子之所決擇使前輩風俗由吾輩復少振而狹陋之病不遂沉痾豈細事哉屬兩日苦眩未得面陳而先以書布謝惶恐惶恐

與尉論捕盜書

某昨莫聞以逐盜遽出雖小事亦有難處置者此十許人皆負重辟相與竄伏山林中昏夜伺便小劫比官知之則已分散跳匿無次舍旗鼓可以物色求無偏裨部伍可以策畫破無糧可燒無巢穴可窮驟集忽散如鬼物然又實小盜官兵計其不能爲甚害所以久不獲也今未言能萬一馴至大盜但無辜之民時時遭劫亦不可云細事方其劫時執縛恐迫計民之冤與遭大盜亦有何異今日偶見一退卒說此事頗若可采不敢效庸人以非職事故默默不以告卒言此十許人雖出沒合散不常似難遽獲然晝必食夜必息得金帛必賣劫掠往來至近亦須行四五里豈有都無一人見之之理蓋自頃民言見賊官輒意其與賊通捕繫答掠久之無所得始釋去是官自塞耳目爲賊計則多爲捕賊計則疎矣一二年來民間懲創此事雖與賊交臂而過歸家噤默不敢以語比鄰而況於告官乎故官兵動息賊皆先知而賊雖近在十步內官兵終不得知某思其言實中事情亦嘗竊度之環三縣弓手土兵爲人幾何逐捕十許賊連歲弗獲不可不思其故也四境無事秋稼如雲誰肯爲賊囊橐者縱有亦不應人人皆然吾輩儒者當有大略願足下曠然無疑於胸中不當效武夫俗吏但知守故常也夫戰而獻誠自三代以來用之不可謂非古然近世至賊殺平人以爲功靖康建炎間不勝其弊始更制凱還勿獻誠使將校列上功最而已由是妄殺之禍十去八九然則三代聖人之遺法尚可

改以便事而況近歲妄庸者所爲乎自今有言見盜者當一切慰籍遣去卽度其不妄或竊有補則又稍旌別之雖目前未得力但使人人敢言見賊賊蹤跡益露勢益窮蹙遠不過數月獲矣足下試熟策之秋暑野次自愛

舍陸伯政上舍書

九月六日某再拜復書伯政學士宗友兄閣下卽日初寒伏惟尊候萬福春中蒙見顧衰疾無聊不得款承絕塵邁往之論至今悒悒忽賢郎上舍構所賦書及新詩來已深開慰又得雜著詩文一編置百事讀之所以開益殆非一端古聲不作久矣所謂詩者遂成小技詩者果可謂之小技乎學不通天人行不能無愧於俯仰果可以言詩乎僕紹興末在朝路偶與同舍二三君至太一宮聞中有高士齋皆名山高逸之士欣然訪之則皆扁戶出矣裴回老松流水之間久之了鬢童負琴引鶴而來風致甚高吾輩相與言曰不得見高士得見此童亦足矣及揖而問之則曰今日董御藥生日高士皆相率往獻香矣吾輩遂一笑而去今世之以詩自許者大抵多太一高士之流也不見笑於人幾希矣而望其有陶淵明杜子美之餘風果可得乎雜文數篇多甲寅以來所著言論風旨皆非同乎俗合乎世者與平甫書用意尤至則石守道李泰伯氣格相上下而師友淵源未可以望吾伯政也然所以告平甫者尚恐有所含蓄不欲盡發此非面莫究昨日兒子自城中來知方伯暮已卒天乎有是哉計老兄亦同此哀也賢子表表超絕當爲名士不止取科第而已奉爲宗家贊喜無已黃精奇妙感激千萬箇箇不旣所欲言者亦坐老憊耳漸寒珍重珍重

舍王樵秀才書

十一月二日山陰陸某再拜復書先輩足下貢舉之法擇進士入官者爲考試官官以考試名當日夜專

心致志以去取士不可兼蒞他事則又爲設一官謂之監試監試羸官不復擇蓋夫人而可爲也甚至法吏流外平日不與清流齒者亦得爲之故又設法曰監試毋輒與考拔則所以待監試可知矣某鄉佐洪州適科舉歲當以七月到官遂泊舟星子灣幾月間已鎖院不敢進非獨畏監試事煩實亦羞爲之今年在夔府府以四月試試前嘗白府帥願得移疾已見許矣會部使者難之某驚弱畏以避事得罪遂龜勉入院某與諸試官皆不相識惴惴恐其以侵官犯律令見詬自命題至揭榜未嘗敢一語及之不但與也間偶見程文一二可愛者往往遭塗抹疵詆令人氣湧如山然歸臥室中財能向壁歎息蓋再三熟計雖復強聒彼護短者決不可回但取詬耳若可回雖詬固不避也如足下之文又不止可愛誠可敬且畏者而一旦以疑黜此豈獨足下不能無言雖試官與拔解諸人亦嘖嘖稱屈某至是直欲以羸官不與考試自恕其可乎將因紹介再拜請罪於門牆而未敢也不圖足下容之察之更辱賜書講修朋友之好而以前者不能無言爲悔方是時使足下遂能無言固大善然士以功名自許非得一官則功名不可致雖決當黜尚悒悒不能已況以疑黜乎某住在朝見達官貴人免去不憂沮者蓋寡彼已貴雖免貴固在其所失孰與足下多然猶如此今乃責足下以不少動心亦非人情矣前輩有錢希白少時試開封得第二希白豪邁自謂當第一乃詣闕上書詆主司當時不以爲大過希白卒爲名臣夫科舉得失爲重高下細事耳希白不能忍其細而責足下默默於其重者不可不邪是皆已往事不足復言區區仰歎足下才氣思有以奉廣故詳及之某吳人凡吳之陸皆同譜所謂四十九枝譜是也如龍圖公雖差遠顧尚可紀則於足下亦有瓜葛蒙教篤尤感日莫詰見先此爲謝

渭南文集卷第十三

渭南文集目錄

卷第十四

容齋燕集詩序

京口唱和序

送關漕詩序

雲安集序

送范西叔序

東樓集序

范待制詩集序

持老語錄序

師伯渾文集序

晁伯咎詩集序

長短句序

徐大用樂府序

呂居仁集序

佛照禪師語錄序

趙祕閣文集序

方德亨詩集序

會稽志序

渭南文集卷第十四

容齋燕集詩序

廉宣仲葺其燕居之室曰容齋既成置酒落之舉觴屬客曰吾聞東郭順子之為人人貌而天清而容物吾雖不能而竊慕焉諸君以為何如或曰方公盛壯時以郡文學高第入為博士公卿盡傾名流彥士執贄求見者肩摩而袂屬車騎雍雍容行者趨避議論英發聞者傾聽傲色不至於目慢言不接於耳方是時容物固無甚難也及轉徙江湖白首下吏舍於邸者爭席遇於途者相誰何則公之容固難矣至於罹口語絀吏議少年之喜謗前輩者闕然成市公猶容之則豈不甚難哉敢問所以能此者何也宣仲笑曰是亦有道焉可容者吾以其情容之不可容者吾以其人容之故吾遇客而雖然遇酒而醺然遇怒而罵姍姍如風葉之過吾前候蟲之鳴吾旁也子欲聞其說乎方子之飲酒也俳諧者箕倨角觶者裸裎子何以不怒豈不以其為此者非慢耶此吾所謂以其情容之也世有服讒蒐慝習於為惡勇於為不義者誠若可疾矣吾則徐思之曰彼君子邪固不至此彼小人邪此固小人之常而吾以動心則去彼亦無幾何耳此又吾所謂以其人容之也二者可容何所不容而子獨何怪於是坐客媿且歎曰吾儕誠小人哉某在衆人中尤號褊率蓋屢數也酒酣客皆賦詩而屬某為敘既不得辭則因以識其媿將覽觀之以自傲焉

京口唱和序

隆興二年閏十一月壬申許昌韓無咎以新番陽守來省太夫人於潤方是時予為通判郡事與無咎別蓋逾年矣相與道舊故問朋遊覽觀江山舉酒相屬甚樂明年改元乾道正月辛亥無咎以考功郎徵念別有日乃益相與遊遊之日未嘗不更相和答道羣居之樂致離闕之思念人事之無常悼吾生之不留

又丁寧相戒以窮達死生毋相忘之意其詞多宛轉深切讀之動人嗚呼風俗日壞朋友道缺士之相與如吾二人者亦鮮矣凡與無咎相從者六十日而歌詩合二十篇然此特其略也或至於酒酣耳熱落筆如風雨好事者從旁掣去他日或流傳樂府或見於僧窗驛壁恍然不復省識者蓋又不可計也潤當淮江之衝予老益厭事思自放於山巔水涯與世相忘而無咎又方用於朝其勢未能遽合則今日之樂豈不甚可貴哉予文雖不足與無咎並傳要不當以此廢而不錄也二月庚辰笠澤陸某務觀序

送關漕詩序

李固杜喬臧洪之死士以同死為榮范文正之貶士以不同貶為恥今著作之免歸也御史以風聞言之天子以無心聽之與前事固大異而坐客賦詩或危之何也風俗異也某既列名衆詩之次又承命作序二罪當併按矣乾道六年十二月七日笠澤陸某序

雲安集序

濟南治歷城漢故縣也帶滌水而表歷山其山川雜見於春秋孟子史記諸書舜之遺迹蓋至於今可考士生其間多通儒名卿秀傑之士而以筆墨馳騫相高往往多清麗雄放警絕之詞與山川稱若今夔府連帥王公是已公自少時寓祕閣直晚由尚書郎長三院御史出牧於夔實督破中十五郡資忠厚故政令簡心樂易故民夷親乃因暇日登臨矚望徘徊太息弔丞相之遺祠想拾遺之高風醉墨淋漓放肆縱橫實為一代傑作顧夔雖號大府而荒絕瘴癘戶口寡少曾不敵中州一下郡如某輩又以憂患留落九死之餘才盡志衰欲強追逐公後而不可得向使公當承平時為并為雍為鎮為定盡得四方賢士大夫以為賓客相與覽其河關之勝以聘筆力則公衆作森列豈特此而已哉雖然猶未也必極公之文致歌而薦郊廟典冊而施朝廷然後曰宜今乃猶嘯詠

於荒山野水之濱追前世放逐羈旅之士而與之友雖小夫下吏或幸得之於瘁是可歎歎公以乾道七年八月移牧永嘉行有日奉節令右從政郎普慈安高哀公在郡文章若干篇為雲安集且屬通判州事左承議郎山陰陸某為序十月二十六日序

送范西叔序

乾道壬辰二月予道益昌始識范東叔後月餘遂與東叔兄西叔為僚於宣威幕府又三月西叔以樞密使薦趣召詣行在所二君皆中書侍郎榮公孫也昔榮公對制策於治平爭詔獄於熙寧論河事邊事刑名赦令於元祐雖用舍或小異而要皆不合故用不極其材以沒沒又列黨籍其門戶為世排詆諱惡者幾四十年又四十年而西叔兄弟始復奮發為蜀知名士世之論盛衰者謂人衆勝天天定亦勝人予獨鄙此說夫盛衰皆天也人何與焉天將禍人之國則小人得志而君子廢其將福之也則君子見用而小人絀國有禍福而君子無屈伸彼區區者乃誠謂天與人以衆寡疾徐為勝負豈不可悲也哉九月丁丑西叔始東下同舍相與臨漾水置酒賦詩而屬予為序夫吾曹之望於西叔所以繼榮公者豈獨爵位隆赫文辭行中朝而已哉雖然予與西叔皆黨籍家也既以勵西叔亦以自勵且勵吾東叔云

東樓集序

余少讀地志至蜀漢巴夔輒悵然有遊歷山川攬觀風俗之志私竊自怪以為異時或至其地以償素心未可知也歲庚寅始泝碛至巴中聞竹枝之歌後再歲北遊山南憑高望鄂萬年諸山思一醉曲江漢陂之間其勢無繇往往悲歌流涕又一歲客成都唐安又東至於漢嘉然後知昔者之感蓋非適然也到漢嘉四十日以檄得還成都因索在笥得古律二十首欲出則不敢欲棄則不忍迺斂藏之乾道九年六月二十一日山陰陸某務觀序

范待制詩集序

石湖居士范公待制敷文閣來帥成都兼制置成都潼川利夔四道成都地大人衆事已十倍他鎮而四道大抵皆帶蠻夷且北控秦隴所以臨制捍防一失其宜皆足致變故於呼吸顧盼之間以是幕府率窮日夜力理文書應期會而故時巨公大人亦或不得少休及公之至也定規模信命令弛利惠農選將治兵未數月聲震四境歲復大登幕府益無事公時從其屬及四方之賓客飲酒賦詩公素以詩名一代故落紙墨未及燥士女萬人已更傳誦被之樂府弦歌或題寫素屏團扇更相贈遺蓋自蜀置帥守以來未有也或曰公之自桂林入蜀也舟車鞍馬之間有詩百餘篇號西征小集尤雋偉蜀人未有見者蓋請於公以傳屢請而公不可彌年乃僅得之於是相與刻之而屬某為序淳熙三年上巳日朝奉郎成都府路安撫司參議官兼四川制置使司參議官山陰陸某序

持老語錄序

持禪師明州鄞人世為士一旦棄髮鬚學佛得法於白牛卿初住餘姚法性數年忽謝去越牧欲以雍熙邀致疑不就試一問之師欣然曰願即得檄牧大喜師懷負包笠即日徒步入院秉節如金石說法如雷霆雖從之遊者不過四五十輩而名震吳越盡交一世名卿賢大夫予先君會稽公知之最深予時甫數歲侍先君旁無旬月不見師至今想其抵掌笑語瞭然在目前夷粹真率真山林間人也後又徙居雪竇護聖二山年德益高如徑山杲公輩皆以丈人行尊事之其滅也談笑如平時蓋以真率為佛事者邪得法弟子子詢行光如寂廣勳或出世說法或遁迹衆中皆不幸早逝去而法揚用璋獨在揚於是亦住護聖歸然為叢林耆宿璋老且病猶自力刻師語錄且合辭屬予為序師可謂有子矣予以先君故不敢辭

淳熙六年五月二十五日山陰陸某序

師伯渾文集序

乾道癸巳予自成都適健為識隱士師伯渾於眉山一見知其天下偉人予既行伯渾餞予於青衣江上酒酣浩歌聲搖江山水鳥皆驚起伯渾飲至斗許予素不善飲亦不覺大醉夜且半舟始發去至平羌酒解得大軸於舟中則伯渾醉書紙窮墨燥如春龍奮蟄奇鬼搏人何其壯也後四年伯渾得疾不起予懷祖集伯渾文章移書走八千里乞余為序嗚呼伯渾自少時名震秦蜀東被吳楚一時高流皆尊慕之願與交方宣撫使臨邊圖復中原制置使并護梁益兵民皆巨公大人聞伯渾名將聞於朝而卒為忘者所沮夫伯渾既決不肯仕即無沮者不過有司歲時奉粟帛牛酒勞問極則如孔叡徐復輩賜散人號書其事於史而已於伯渾何失得而忘已如此鄉使伯渾出而事君為卿為公則忘者當益衆排擊沮撓當不遺力徒比景輪左技殆未可知安得如在眉山躬耕婦織放意山水優游以終天年邪則伯渾不遇未見可憾或曰伯渾之才氣空海內無與比其文章英發鉅麗歌之清廟刻之彝器然後為稱今一不得施願退而為山巔水涯娛憂紆悲之言豈不可憾哉予曰是則有命識者為時惜不為伯渾歎也淳熙某月某日山陰陸某序

晁伯谷詩集序

傳密居士東里晁公伯谷詩四百六十有一篇其孫教授君百談集為四卷以授予請序卷首伯谷少以文學稱自其諸父景迂具茨先生皆數譽之諸公貴人亦往往聞其名顧黨家不敢取靖康之元黨禁解伯谷召為開封掾且顯用矣阻兵不能造朝比乘輿過江中原方兵連不解士大夫多以甲兵錢穀進故家名流乃見謂不切事機伯谷落江湖者數年久之雖起乘傳嶺海復坐微文斥卒棄不用以死而伯谷

傲晚憂患不少動心方扁舟往來吳松嘯歌飲酒益放於詩其名章秀句傳之士大夫皆以為有承平臺閣之風蓋晁氏自文元公以大手筆用於祥符天禧間方吾宋極盛時封泰山禮百神歌頌德業冶金伐石極文章翰墨之用汪洋滄溟五世百餘年文獻相望以及建炎紹興公獨殿其後又少時所交皆中州名勝講習磨礱之益深矣是豈囊書生聞見局陋者敢望其涯哉伯谷學問瞻博胸中恢疎勇於為義視死生禍福無如也至他文亦皆豪奇不獨其詩可貴尚力求而盡傳之伯谷諱公邁仕至某官淳熙七年十一月十七日山陰陸某序

長短句序

雅正之樂微乃有鄭衛之音鄭衛雖變然琴瑟笙磬猶在也及變而為燕之筑秦之缶胡部之琵琶篪篥則又鄭衛之變矣風雅頌之後為騷為賦為曲為引為行為謠為歌千餘年後乃有倚聲製辭起於唐之季世則其變愈薄可勝歎哉予少時汨於世俗頗有所為晚而悔之然漁歌菱唱猶不能止今絕筆已數年念舊作終不可捨因書其首以識吾過淳熙己酉炊熟日放翁自序

徐大用樂府序

古樂府有東武吟鮑明遠輩所作皆名千載蓋其山川氣俗有以感發人意故騷人墨客得以馳騁上下與荊州邯鄲巴東三峽之類森然並傳至於今不泯也吾友徐大用家本東武呼吸飲食飲於淇之津蓋有以相其軼思者故自少時文辭雄於東州比南歸以政事議論顯聞薦紳顧不肯輕出其文以沽世取富貴三十年猶屈治中別駕澹然莫測涯涘獨於悲權離合郊亭水驛鞍馬舟楫間時出樂府辭贍蔚頓挫識者貴焉或取其數百篇將傳於世大用復不可曰必放翁以為可傳則幾矣不然姑止予聞而歎曰溫飛卿作南鄉九闕高勝不減夢得竹枝訖今無深

賞音者予其敢自謂知君哉獨感東武山川既墮胡塵中而大用之才久伏不耀故為之一言紹熙五年三月庚寅笠澤陸某務觀序

呂居仁集序

天下大川莫如河江其源皆來自蠻夷荒忽遼絕之域累數萬里而後至中國以注於海今禹之遺書所謂岷積石者特記禹治水之迹耳非其源果止於是也故爾雅謂河出岷崙虛而傳記又謂河上通天漢某至蜀窮江源則自蜀岷山以西皆岷山也地斷壤絕不復可窮河江之源豈易知哉古之學者蓋亦若是推其上探處羲唐虞以來有源有委不以遠絕不以難止故能卓然布之天下後世而無媿凡古之言者皆莫不然自漢以下雖不能如二代盛時亦庶幾焉宋興諸儒相望有出漢唐之上者迨建炎紹興間承喪亂之餘學術辭猶不愧前輩如故紫微舍人東萊呂公者又其傑出者也公自少時既承家學心體而身履之幾三十年仕愈躋學愈進因以其暇盡交天下名士其講習探討磨礱浸灌不極其源不止故其詩文汪洋闊肆兼備衆體間出新意愈奇而愈渾厚震耀耳目而不失高古一時學士宗焉晚節稍用於時在西掖嘗兼直內庭草趙丞相鼎制力排和戎之議忤秦丞相檜秦公自草日曆載公制辭以為罪而天下益推公之正公平生所為詩既已孤行於世嗣孫祖平又盡哀他文凡若干首為若干卷而屬某為序某自童子時讀公詩文願學焉稍長未能遠遊而公捐館舍晚見曾文清公文清謂某君之詩淵源殆自呂紫微恨不一識面某於是尤以為恨則今得託名公集之首豈非幸歟慶元二年九月既望中大夫提舉建寧府武夷山冲佑觀山陰陸某謹序

佛照禪師語錄序

拙庵禪師以佛法際遇孝宗皇帝問會之語既刻金石傳天下久矣晚菴居阿育王山中其徒相與盡哀

五會所說法凡數萬言為五卷遺待者正球走山陰澤中請某作序某曰拙庵之道棟梁大法無語可也拙菴之語雷震百世無錄可也又何以序為哉然五會之外別有一會數萬言之外別有一句是可錄是不可錄諸人試下語若也道得老農贊數有分慶元三年九月壬子陸某謹序

趙秘閣文集序

漢孝武帝好文淮南王安以高帝孫為諸侯王而學問文辭在漢庭諸儒甲乙中其所著大小山至與雅頌離騷並魏陳思王唐太白長吉則又以帝子及諸王孫落筆妙古今冠冕百世河出岷崙虛首四瀆經天下以入于海彼源委固自不同無足異也宋興宗室深居宮中不與外庭接故雖博學軼材不得著見然以詩文飛白書詔藏秘府者亦不乏人熙寧元豐間始與羣臣並進於朝積數十年而德麟伯山屬文英妙履見推於諸公間矣漢王五世孫秘閣公諱不拙字若拙少以進士奮主司及流輩皆伏其工初苦貧無以養乃教授諸生以自給其勤苦殆有非寡人子所堪者既得第猶不廢也晚入蜀為州遂持使者節學益不厭文益妙予行南充闕中小益至成都歷山郵津亭及浮屠老子之廬見穹碑巨板多公遺文每觀之至忘食已而故尚書孫公仲益端明汪公聖錫侍御王公龜齡文益出於世往往見公名字於其間許與甚至然後知天下自有公論也公之子善發善零皆取世科善發字正己尤以文學稱其為漢州判官也囊公之文萬里請予於山陰澤中曰願有以冠篇右顧公平生知己久已凋落予材下徒以後死不得讓媿可量哉慶元六年三月丁巳中大夫直華文閣致仕賜紫金魚袋山陰陸某序

方德亨詩集序

詩豈易言哉才得之天而氣者我之所自養有才矣氣不足以御之淫於富貴移於貧賤得不償失榮不

蓋婉詩由此出而欲追古人之逸駕詎可得哉予自少聞蒲陽有士曰方德亨名豐之才甚高而養氣不撓呂舍人居仁何著作摺之皆屈行輩與之遊德亨晚愈不遭而氣愈全觀其詩可知其所養也既沒若干年待制朱公元晦以書及德亨之詩示予於山陰曰子爲我作德亨集序住時有方响者與德亨同族爲予言德亨遇疾卒於臨安逆旅垂困猶能起坐正衣冠手自作書與其族人官臨安者使買棺棺至乃歿色辭不異平日非養氣之全能如是乎請以是爲序慶元六年四月丁酉山陰陸某序

會稽志序

昔在夏禹會諸侯於會稽歷二千歲而我高宗皇帝御龍舟橫濤江應天順動復禹之跡駐蹕彌年定中興之業羣盜削平強虜退遁於是用唐幸梁州故事陞州爲府冠以紀元大駕旣西幸而府遂爲股肱近藩稱東諸侯之首地望蓋視長安之陝洛汴都之陳許所命牧守皆領浙東安撫使其自丞相執政來與去而拜丞相執政者不可遽數而又昭慈聖烈皇后及永祐以來四陵攢殿相望於鬱葱佳氣中朝謁之使轡銜轂擊中原未清今天下鉅鎮惟金陵與會稽耳荆揚梁益潭廣皆莫敢望也則山川圖謀宜其廣載備書顧未暇及者縣數十年大卿沈公作賓待制趙公不迹繼爲守皆慨然以爲己任乃與通判軍事施君宿安撫司幹辦公事李君兼韓君茂卿及郡士馮景中邵持正陸子虞王度朱鷄等上參禹貢下考太史公及歷代史金匱石室之藏旁及爾雅本草道釋之書裨官野史所傳神林鬼區幽怪恍惚之說秦漢晉唐以降金石刻歌詩賦詠殘章斷簡靡有遺者若父老以口相傳不見於文字者亦間見層出積勞累月乃成是雖本之圖經圖經出於先朝非藩郡所可附益乃用長安河南成都相臺之比名會稽志會稽爲郡雖遷徙靡常而郡本以山得名又禹所巡也

故卒以名之而屬某爲之序嘉泰元年二月庚子中大夫直華文閣致仕陸某謹序

渭南文集卷第十四

渭南文集目錄

卷第十五

施司諫註東坡詩序

達觀堂詩序

梅聖俞別集序

楊夢錫集句杜詩序

陸伯政山堂類稿序

普燈錄序

澹齋居士詩序

傅給事外制集序

聞鞞錄序

周益公文集序

宣城李虞部詩序

曾裘父詩集序

送巖電道人入蜀序

邢芻甫字序

曾溫伯字序

天童無用禪師語錄序

陳長翁文集序

渭南文集卷第十五

施司諫註東坡詩序

古詩唐虞慶歌夏述禹戒作歌商周之詩皆以列於經故有訓釋漢以後詩見於蕭統文選者及高帝項羽章孟楊惲梁鴻趙壹之流歌詩見於史者亦皆有註唐詩人最盛名家者以百數惟杜詩註者數家然槩不為識者所取近世有蜀人任淵嘗註宋子京黃魯直陳無已三家詩頗稱詳贍若東坡先生之詩則援據闕博指趣深遠淵獨不敢為之說某頃與范公至能會於蜀因相與論東坡詩慨然謂予足下當作一書發明東坡之意以遺學者某謝不能他日又言之因舉二三事以質之曰五畝漸成終老計九重新掃舊巢痕遙知叔孫子已致魯諸生當若為解至能曰東坡竄黃州自度不復收用故曰新掃舊巢痕建中初復召元祐諸人故曰已致魯諸生恐不過如此耳某曰此某之所以不敢承命也昔祖宗以三館養士儲將相材及官制行罷二館而東坡蓋嘗直史館然自謫為散官削去史館之職久矣至是史館亦廢故云新掃舊巢痕其用字之嚴如此而鳳巢西隔九重門則又李義山詩也建中初韓會二相得政盡收用元祐人其不召者亦補大藩惟東坡兄弟猶領宮祠此句蓋寓所謂不能致者二人意深語緩尤未易窺測至如車中有布乎指當時用事者則猶近而易見白首沉下吏綠衣有公言乃以待妾朝雲嘗歎黃師是仕不進故此句之意戲言其上僭則非得於故老殆不可知必皆能知此然後無憾至能亦太息曰如此誠難矣後二十五年某告老居山陰澤中吳興施宿武子出其先人司諫公所註數十大編屬某作序司諫公以絕識博學名天下且用工深歷歲久又助之以顧君景蕃之該洽則於東坡之意蓋幾可以無憾矣某雖不能如至能所託而得序斯文豈非

幸哉嘉泰二年正月五日山陰老民陸某序

達觀堂詩序

朝請郎致仕吳公景先少嘗從洛川先生朱公希真問道朱公為名所居堂曰達觀手書以遺之且賦詩一章屬之曰子為人深靜簡遠不富貴必壽考故吾以此事相期景先出仕五十年不求速化不治生產位僅至二千石晚為東諸侯客遂引年以歸距八十年不遠望其容貌不腴不瘠視聽步趨如五六十人非得朱公密傳親付殆不能爾朱公之逝甚異世以為與尹先覺譙天授蘇養直俱解化偃去則吾景先亦其流亞歟自朱公賦詩後士大夫繼作凡若干篇屬予為序嘉泰二年十一月癸丑放翁陸某務觀序

梅聖俞別集序

宛陵先生遺詩及文若干首實某官李兼孟達所編緝也先生當吾宋太平最盛時官京洛同時多偉人巨公而歐陽公之文蔡君謨之書與先生之詩三者鼎立各自名家文如尹師魯書如蘇子美詩如石曼卿筆豈不足垂世哉要非三家之比此萬世公論也先生天資卓偉其於詩非待學而工然學亦無出其右者方落筆時置字如大禹之鑄鼎鍊句如后夔之作樂成篇如周公之致太平使後之能者欲學而不得欲贊而不能況可得而譏評去取哉歐陽公平生常自以為不能望先生推為詩老王荆公自謂虎圖詩不及先生包鼎畫虎之作又賦哭先生詩推仰尤至晚集古句獨多取焉蘇翰林多不可古人惟次韻和陶淵明及先生二家詩而已雖然使本無此三公先生何歉有此三公亦何以加秋毫於先生予所以論載之者要以見前輩識精論公與後世妄人異耳會李君來請予序故書以予之嘉泰三年正月己卯山陰陸某序

楊夢錫集句杜詩序

文章要法在得古作者之意意既深遠非用力精到

則不能造也前輩於左氏傳太史公書韓文杜詩皆熟讀暗誦雖支枕據鞍間與對卷無異久之乃能超然自得今後生用力有限掩卷而起已十亡三四而望有得於古人亦難矣楚人楊夢錫才高而深於詩尤積勤杜詩平日涵養不離胸中故其句法森然可喜因以暇戲集杜句夢錫之意非為集句設也本以成其詩耳不然火龍黼黻手豈補綴百家衣者邪予故為表出之以告未深知夢錫者嘉泰三年正月丁亥笠澤陸某序

陸伯政山堂類稿序

古之學者始於家塾鄉校而貢於天子之辟雍始於抱關擊柝而至於公卿始於賦物銘器師旅會盟之辭而至於陳謨作誥其所遇雖不同然於明聖人之道闡性命精微之理則一也周衰道術裂於百氏士各以所見著書授徒於是稽之堯舜禹文王周公孔子之遺書始有大不合者今六經散缺不全而諸子之書則往往具在又其辭怪偉辯麗足以動蕩世之耳目乃欲學者之文辭一合於道而不悖戾於經可謂難矣吾宗伯政諱煥之唐丞相文公希聲之九世孫文公上距丞相元方五世中間子孫遇五季之亂獨不失譜至今世次皆可序述伯政家世為儒力學篤行至老不少衰所為文皆本六經無一毫汨於釋老雖其徒有從之求文者伯政尊所聞猶毅然不為之貶至如楊公時近世名儒獨以立論少入釋老伯政正色斥之不遺餘力使死而有知吾伯政有以見周公孔子矣其孤集遺文為二十卷來請余為序伯政之文可稱述者衆余獨言其學術文辭之正以序之尚不失斯人之本意又進其子孫云嘉泰四年二月丁巳笠澤陸某謹序

普燈錄序

粵自曠大劫來至神應迹開示天人未有不以文字語言相授者今七佛偈是其一也至於中夏則二十

萬年之前包犧氏作已畫八卦造書契矣釋迦之興固亦無異今一大藏教可謂富矣乃獨於最後舉華示其上足弟子迦葉迦葉欣然一笑不立文字不形言語謂之正法眼藏師舉華而傳弟子一笑而受既書之木葉旁行之間矣亦未見其與古聖異也豈謂之文而非文謂之言而非言邪昔有景德傳燈三十卷者蓋非文之文非言之言也此門一開繼者相望其尤傑立者續燈廣燈二書也然皆草創簡略自為區別雖聖君賢臣之事有不能具載者獨旁見間出於諸祖章中識者以為恨吳僧正受始著普燈凡十有七年成三十卷前日之恨毫髮無遺矣而尤為光明崇顯者我祖宗之明詔睿藻哀集周悉一一皆有據依足以傳示萬世實為大訓其有功於釋門最大方且上之御府副在名山而又以其副示某俾得紀述梗槩於後某自隆興距嘉泰五備史官今雖告老待盡山澤猶於祖宗遺事思以塵露之微仰足山海不自知其力之不逮也嘉泰四年三月乙酉太中大夫充寶謨閣待制致仕山陰縣開國子食邑五百戶賜紫金魚袋陸某謹序

澹齋居士詩序

詩首國風無非變者雖周公之幽亦變也蓋人之情悲憤積於中而無言始發為詩不然無詩矣蘇武李陵陶潛謝靈運杜甫李白激於不能自己故其詩為百代法國朝林逋魏野以布衣死梅堯臣石延年棄不用蘇舜欽黃庭堅以廢紕死近時江西名家者例以黨籍禁錮乃有才名蓋詩之興本如是紹興間秦丞相檜用事動以語言罪士大夫士氣抑而不伸大抵竊寓於詩亦多不免若澹齋居士陳公德召者故與秦公有學校舊自揣必不合因不復與相聞退以文章自娛詩尤中律呂不怨不怒而憤世疾邪之氣凜然不少回撓其不坐此得禍亦僅脫爾及秦氏廢始稍起為吏部郎為國子司業祕書少監遽沒於官

後四十餘年有子知津爲高安守最其詩得三卷屬某爲序某少識公於山陰方公召還嘗以詩贈別及公爲郎時故相湯岐公一日語公曰陸務觀別君詩方傳世非公之賢何以發其語如此時紹興己卯歲也因高安之請重以感歎某於是年八十有一矣開禧元年九月太中大夫寶謨閣待制致仕山陰縣開國子食邑五百戶賜紫金魚袋陸某序

傅給事外制集序

國家自崇寧來大臣專權政事號令不合天下心卒以致亂然積治已久文風不衰故人材彬彬進士高第及以文辭進於朝者亦多稱得人祖宗之澤猶在黨籍諸家爲時論所貶者其文又自爲一體精深雅健追還唐元和之盛及高皇帝中興雖披荆棘立朝廷中朝人物悉會於行在雖中原未平而詔令有承平風識者知社稷方永太平未艾也故給事中傅公以是時典西省文書得名尤盛公天資忠義絕人自東夷寇逆滔天建炎中大駕南渡虜吞噬不遺力幾犯屬車之塵公眇然書生位未通顯獨涕泗感激請提孤軍橫過虜衝乘輿論功埒諸大將及駐驛會稽公遂爲浙東帥始隱然有大臣望雖擯斥不容而士論愈歸及在東省御史力詆去之然猶知公爲一代大儒蓋公論不可揜如此公遺文百餘卷嗣孫穉貧甚手自鈔錄以傳後世未能竟乃先緝外制數百篇屬某爲序公之文固天下所願見而取法某未成童時公過先少師每獲出拜侍立被公教誨詎今七十餘年幸猶後死得論序公文亦幸矣某聞文以氣爲主出處無媿氣乃不撓韓柳之不敵世所知也公自政和訖紹興閱世變多矣白首一節不少屈於權貴不附時論以苟登用每言虜言畔臣必憤然扼腕裂皆有與俱生之意士大夫稍有退縮者輒正色責之若讎一時士氣爲之振起今觀其制告之詞可槩見也公諱崧卿字子駿於康賢哉開禧元年九月

某日太中大夫充寶謨閣待制致仕山陰縣開國子食邑五百戶賜紫金魚袋陸某謹序

聞聲錄序

元豐初置武學先太師以三館兼判學事今學制規模多出於公而策問亦具載家集中後百餘年某從子朴作聞聲錄若干篇論孫吳遺意欲上之朝且乞序於某某懦且老非能知武事者朴許國自奮之志亦某所愧也乃從其請開禧元年十一月丁卯陸某

序

周益公文集序

天之降才固已不同而文人之才尤異將使之發冊作命陳謀奉議則必畀之以閱富淹貫溫厚爾雅之才而處之以帷幄密勿之地故其位與才常相稱然後其文足以紀非常之事明難喻之指藻飾治具風動天下書黃麻之詔鏤白玉之牒藏之金匱石室可謂盛矣若夫將使之闡道德之原發天地之秘放而及於鳥獸蟲魚草木之情則畀之才亦必雄渾卓犖窮幽極微又畀以遠遊窮處排擯斥疎使之磨礪齟齬頽於寒餓以大發其藏故其所賦之才與所居之地亦若造物有意於其間者雖不用於時而自足以傳後世此二者造物豈真有意哉亦理之自然古今一揆也大丞相太師益公自少壯時以進士博學宏詞疊二科起家不數年歷太學三館予實定交於是時時固多豪雋不羣之士然落筆立論傾動一座無敢嬰其鋒者惟公一人中雖暫斥而玉煙劍氣三秀之芝非窮山腐壤所能湮沒復出於時極文章禮樂之用絕世獨立遂登相輔雖去視草之地而大詔令典冊孝宗皇帝猶特以屬公於虛聖主之心亦如造物非私公以富貴蓋大官重任不極不久則無以盡公之才也公既薨逾年公之子綸以公遺文號省齋文稿者屬予爲之序公在位久崇論徵議豐功偉績見於朝廷傳之夷狄者何可勝數予獨論其文者慕

有碑史有傳非集序所當及也開禧元年十二月甲子太中大夫寶謨閣待制致仕山陰縣開國子食邑五百戶賜紫金魚袋陸某謹序

宣城李虞部詩序

宣之為郡自晉唐至本朝地望常重來為守者不知幾人而風流吟詠謝宣城實為之冠生其鄉者幾人而歌詩復古梅宛陵獨擅其宗此兩公蓋與敬亭之山俱不磨矣故宣之士多工於文而五七字為尤工唐有李推官以詩名當代其家傳遺詩得數百篇以詩考之蓋與皮陸同時歟自推官後世世得能詩聲當元豐間有虞部公作詩益工推官清新警邁極鍛鍊之妙而虞部則規模思致宏放簡遠自宛陵出如劉子駿文學不盡與父同議者亦不能優劣之也予得其兩世遺編於虞部之曾孫臨海太守兼字孟達孟達固詩人蓋淵源二祖而能不愧者推官虞部之家世諱字與其學術行治蓋各見於其墓刻家牒子獨志其詩云開禧三年六月丙午太中大夫寶謨閣待制致仕渭南縣開國伯食邑八百戶賜紫金魚袋陸某謹序

曾裘父詩集序

古之說詩曰言志夫得志而形於言如臯陶周公召公吉甫固所謂志也若遭變遇讒流離困悴自道其不得志是亦志也然感激悲傷憂時閔己託情寓物使人讀之至於太息流涕固難矣至於安時處順超然事外不矜不挫不誣不對發為文辭冲澹簡遠讀之者遺聲利冥得喪如見東郭順子悠然意消豈不又難哉如吾臨川曾裘父之詩其殆庶幾於是乎予紹興己卯庚辰間始識裘父於行在所自是數見其詩所養愈深而詩亦加工比予來官臨川則裘父已沒欲求其遺書而予蒙恩召歸至今以為恨友人趙去華彥謙寄裘父擬立小集來曰願序以數十語然裘父得意可傳之作蓋不止此遺珠棄璧識者與歎

去華為郡博士尚能博訪之稍增編帙計無甚難者敢以為請裘父諱季狸及與建炎過江諸賢游尤見賞於東湖徐公嘉定元年二月丁酉山陰陸某序

送巖電道人入蜀序

王衍一生酣豢富貴乃以口不言錢自高巖電本張氏子施藥說相不受人一錢乃自稱姓錢以滑稽玩世古今相反有如此者忽來告放翁言將西入蜀乃書以遺之他日到青城大峨眉霧中鶴鳴諸名山見孫思邈朱桃椎張四郎余朱先生姚小太尉譙天授尹先覺輩有問放翁安否者可出此卷相與一笑

邢芻甫字序

衛詩美武公之德一章曰瞻彼淇澳綠竹猗猗終之曰有匪君子終不可諶兮淇大川也見淇而思武公可也王芻篇竹草之微者亦見而思焉則思之至矣此所謂終不可諶兮者歟吾友邢子名淇請字於予予復之曰士之仕者能使一國一邑之人安其政而無怨疾嘲譏亦已難矣况見其鄉閭而咨嗟追慕豈不甚難哉今衛人於武公見其地而思之見其草木而思之見其草之微者如王芻篇竹而思之況遇其子孫又將何如哉人不我忘於我何加然使人不怨疾嘲譏又咨嗟追慕久而不忘必有以得之矣故為士者於此不可不知勉也請字子曰芻甫芻甫勉之仕而使一國一邑之人不忘相處而使鄉閭黨友不忘相與記其行事以為法傳其言論風指誦習而勉於善豈不美哉嘉定元年四月己未山陰陸某序

曾溫伯字序

堯舜去今遠矣其言傳於今者蓋寡惟直而溫與寬而栗之言再見焉方是時教化之所覃人才之所慕全德如夔臯陶所言是豈戒其不足哉至商周之間始有得聖人之清聖人之和者清近直和近溫則既分而為二矣若漢汲長孺事君無隱天下為之直然去古之全德又益以遠賴川曾君黯方其入家塾也

大父大卿公用蘇子由張芸叟字其子孫劄字之曰
溫伯蓋以古全德訓之有其義而亡其說溫伯請於
予曰願有以補之以終大父之意予慨然歎曰自大
卿至溫伯三世傳嫡德亦克肖其有以承此訓矣序
其敢辭嘉定元年五月辛酉山陰陸某序

天童無用禪師語錄序

處義一畫發天地之秘迦葉一笑盡先佛之傳淨名
一默曾點一唯丁一牛刀扁一車輪臨濟一喝德山
一棒妙喜一竹篋子皆同此關捩但恨欠人承當天
童無用禪師蓋卓爾能承當者未見妙喜大事已畢
豈有住山示衆之語可累編簡哉放翁謂若不投之
水火無有是處惟韓退之所云火其書其語差似痛
快又恐退之亦止是說得耳五百年後此話大行方
知無用與放翁却是同參嘉定元年秋九月丙辰序

陳長翁文集序

漢之文章猶有六經餘味及建武中興禮樂法度粲
然如西京時惟文章頓衰自班孟堅已不能望太史
公之淳深崔蔡晚出遂墮卑弱識者累歎而已我宋
更靖康禍變之後高皇帝受命中興雖難難顛沛文
章獨不少衰得志者司詔令垂金石流落不偶者娛
憂紆憤發爲詩騷視中原盛時皆略可無媿可謂盛
矣久而寢微或以纖巧摘裂爲文或以卑陋俚俗爲
詩後生或爲之變而不自知方是時能居今行古卓
然傑立於頽波之外如吾長翁者豈易得哉其子師
文來乞予爲長翁集序乃寓吾歎以慰其子且以慰
長翁於地下云長翁高郵陳氏諱造字唐卿嘉定二
年三月丁巳渭南伯陸某務觀序

渭南文集卷第十五

渭南文集目錄

卷第十六

成都府江濱廟碑 行在寧壽觀碑

嚴州烏龍廣濟廟碑

德勳廟碑

祥殿碑

泰州報恩光孝禪寺最吉
洞霄宮碑

渭南文集卷第十六

成都府江瀆廟碑 淳熙四年五月一日

自古水土之功莫先乎禹紀其事莫備乎禹貢之篇禹貢之所載莫詳乎江漢曰蟠冢導漾東流爲漢又曰岷山導江某嘗登蟠冢之山有泉涓涓出兩山間是爲漢水之源事與經合及西遊岷山欲窮江源而不可得蓋自蜀境之西大山廣谷餘峒起伏西南走蠻夷中皆岷山也則江所從來尤荒遠難知而漢過三澗至大別之麓亦卒附江以達於海故江爲四瀆之首二代典祀秩視諸侯而楚大國亦以爲望有事必禱祠焉可謂盛哉成都自唐有江瀆廟其南臨江唐末節度使高駢大城成都廟與江始隔歷五代之亂淫昏割裂神弗受職廟亦弗治宋興乾德三年平蜀越八年當開寶六年有詔自京師繪圖遣工修大廟制傑閣廣殿脩廊邃宇聞於天下慶曆七年故太師忠烈潞公以樞密直學士來作牧則又築大堂並廟東南以爲徹祭飲福之所而廟益宏麗矣厥後雖屢繕治有司不力寢以大壞上漏旁穿風雨入屋支傾苴罅苟偷歲月淳熙二年六月今尹敷文閣待制范公之始至也躬執牲幣祗肅祀事既退讀開寶中修廟碑惕然改容曰此太祖皇帝之詔敢弗虔南出登堂見忠烈公之識則又嘆曰潞國予自出也敢弗嗣始有葺廟意矣會歲旱公潔齋以禱曰三日而雨且大治祠宇以報如期高下洽足歲以大穰公饒私餘蠻夷順服乃自二年某月庀工訖四年五月廟成總其費木以章計者八千一百二十有八竹以箇計者四萬九千四百七十甃甃釘以枚計者十八萬七千七百二十有四丹青黝堊以斤計者一萬八千有七梓匠役徒以口計者二萬三千八百爲屋二百有九間墻六千八百七十尺廟之制度復還開寶慶曆之盛而有加焉於是府之屬吏來請其刻文麗牲之

石且繫以詩詩曰

井絡之躔下應岷山蟠踞華夷江出其間奔蹙三峽放於荆揚我考禹跡九州茫茫千礎之宮肇自開寶史靡嚴恭庭有蒨草范公來止事神是力廟未克成當食太息江流東傾於海朝宗廟成公歸與江俱東壯哉湯湯環我蜀城萬古不竭亦配公名

行在寧壽觀碑

紹興二十年十月詔賜行在三茆堂名曰寧壽觀因東都三茆寧壽院之舊也初章聖皇帝建會靈觀實爲崇奉之始至是高宗皇帝方躋天下於仁壽之域尤垂意焉迺命道士蔡君大象知觀事蒙君守亮副之許其徒世守又命中貴人劉君敷典領置吏胥給清衛兵略用大中祥符故事後十年敷遂請棄官專奉寧壽香火詔如所請賜名能真改左右街都道錄仍領觀事實又用至道中內侍洪正一故事上心眷顧每示優假如此然迨今歲月寢久未有紀之金石以侈上賜者紹熙五年六月知觀事冲素大師邵君道俊始確石來請某爲文傳示後世某實紹興朝士屢得對行殿同時廷臣零落殆盡某適後死獲以草野之文登載盛事顧不幸歟伏觀寧壽觀實居七寶山之麓表裏湖江拱輔宮闕前帶馳道後枕崇阜盡得都邑之勝廣殿中峙脩廊外翼雲章寶室籤帙富麗浩浩乎道山蓬萊之藏也鐘經二樓翬飛霄漢飄飄乎化人中天之居也金符象簡羽流畢集進趨有容肅恭齋法濟濟乎茹靈芝飲沆瀣之衆也導以霓旌節以玉磬侍者翼從以登講席琅琅乎徹九天震十方之音也祐陵之御畫德壽重華之宸翰煥乎河雒之圖書也鴻鍾大鼎華蓋寶劍楮遂良吳道子之遺跡卓乎祕府之怪珍也榮光異氣夜燭天半所以扶衛社稷安鎮夷夏者於是乎在非他宮館壇宇可得而比永惟我高宗皇帝實與三茆君自渾沌溟滓開闢之初赤明龍漢浩劫之前俱以願力應世濟民

雖時有古今迹有顯晦其受命上帝以福天下則合若符券及夫風御上賓威神在天與三十六帝翺翔太虛二茆君亦與焉時臨熙壇顧享明薦用敷佑於我聖子神孫降福發祥時萬時億於虛休哉某既述觀之所繇興且繫之以銘曰

炎祚中否開真人以大誓願濟下民左右虛皇友三直坐令化國風俗淳乃營斯宮示宿因丹碧爰葉天與隣神君龍虎呵重闈鯨鐘橫撞震無垠錦旛寶蓋高嶙峋天華龍燭晝夜陳歷載九九符堯仁超然脫屣侍帝晨遺澤滲漉萬寓均歲豐兵偃無吟呻咨爾衆士嚴冠巾以道之真治子身服膺聖訓常如新冲霄往從龍車塵

嚴州烏龍廣濟廟碑

山川之祀自虞書以來見於載籍與天地宗廟並或謂山川與雲雨澤枯槁宜在秩祀非必有神主之以予考之殆不然維嶽降神生甫及申山川之神降而爲人與人死而爲山川之神一也豈幸而見於經則可信後世則舉不可信邪柳宗元死爲羅池之神其傳甚怪而韓文公實之張路斯自入爲龍廟於穎上其傳尤怪而蘇文忠公實之蓋二神者所傳雖不可知而水旱之禱卓乎偉哉不可泯沒則二公亦不得而揜也予適蜀見李水張惡子廟於離堆梓潼之山皆血食千載非獨世未有疑者蓋其靈響曩著亦有不咨置疑者矣嚴州烏龍山廣濟廟之神曰忠顯仁安靈應昭惠王舊碑以爲唐貞觀中人姓邵氏所記甚詳雖幽顯殊隔不可盡質然神靈動人如羅池變化不測如穎上歷數百年未嘗少替而朝廷之所褒顯吏民之所奉事亦猶一日此烏可以幸得哉至於紹興辛巳東海之師羣胡見巨人皆長丈餘戈戟麾旄出沒煙雲間則相告曰烏龍神兵至矣或降或遁去無敢枝梧者是又與東晉八公山及慶歷嘉嶺神之事相埒然彼皆在近境而此獨見於山海阻絕數

千里之外豈不尤異也哉不得韓蘇之文以修大其傳而邦人進士沈奐顧以屬筆於某辭卑事偉有足恨者適作送迎神詩一章使併刻之實慶元五年十月甲子也其辭曰

王之生兮值唐初基龍翔於天兮英雄是資獨沉草萊兮默不得施曉然萬仞兮胸中之奇使得小試兮冒白刃而舉朱旗丈夫戰死兮固亦其宜死於不遭兮精神曷歸王亦何憫兮人則爲悲烏龍之山兮跨空巍巍築傑屋兮奉祠釀桂兮羞芝彈篋兮吹參差王捨斯民兮逝何之錫以祉兮燕及惇後歲屢豐兮長無凶饑擁羽蓋兮駕玉躡時節來饗兮民之依國有征誅兮克相王師長戈大纛兮肅肅陰威掃平河維今前功弗隳隆名顯爵兮永世有辭

德勳廟碑

自古王者經綸草昧戡定亂略必有熊羆之士不貳心之臣內任心膂之寄外宣股肱之力而廟謨國論密績以決實兼將相之任者在我高宗皇帝時有若大師循忠烈王張公實維其人粵自高宗歷試於外開大元帥府總天下兵首以山西豪傑入侍帷幄龍飛順動避狄南渡公則有扶天夾日之功蕭牆釁起羣公暗拱公則倡勤王復辟之大策氛侵內侵戎馬豕突公則奮卻敵禦侮之奇略巨盜乘間羣兇和附公則建剪除安輯之成績由是不數年間國勢安強夷虜奪氣請和而一二重將未還宿衛論者咸以爲非長久計公則率先請罷宣撫使事奉朝請章再上引義慷慨於是議始定士大夫咸謂其得大臣體而高宗亦每謂之腹心舊將又曰從來待卿如家人又曰是人與他功臣相去萬萬蓋高宗蹈履難危身濟大業沉機獨智燭微察遠以爲方海內橫流巡幸四方屢衣露蓋周衛單寡非如中都高拱端頭雙護之居江流阻難海道貼危非如平時安行清蹕馳道之中不有如公者協心同德均禍福共安危譬之一家

父兄有急子弟不召而自至譬之一身頭目有患手足不令而自力則天下之計將以誰諉袁盎謂絳侯功臣非社稷臣則社稷臣與功臣果異建炎以來功臣則有矣至可名社稷臣者非公而誰故國家所以褒表崇異常出等夷之上非私恩也及配享高宗廟庭其次偶居其後或者疑焉是不然唐名將前曰英衛後曰李郭衛公汾陽之勳德魏如泰山終不以姓名次序爲歎欽宗皇帝下詔褒顯故老而范文正實次司馬文正之下司馬公之賢不過與范公等范公輔政先數十年聲詩所載以配夔高而顧乃居次世豈以此爲有抑揚之意哉公之曾孫鑑三世傳嫡長始築廟於居第之東廟成以高宗御書德勳二大字爲廟之名自忠烈以下爲二室忠烈之配曰秦國夫人魏氏漢國夫人章氏第二室曰少傅公諱子厚配曰漢國夫人蕭氏第三室曰少師公諱宗元配曰楚國夫人劉氏維忠烈王勳業之詳與夫世諱字系官爵葬有碑諡有誥史有傳此不復載顧廟祭宜有歌詩刻於麗牲之碑乃作詩曰

宋傳九聖高宗是承化龍渡江天開中興維忠烈王翼從帝旁捐身棄孥獨當豺狼煙塵未息變生肘腋首倡義師氣沮金石大業復隆退不矜功雪涕引罪身衛行宮國有大難我則出捍功成愈謙將士畏歎既空盜藪塵虜淮右柘臯之捷梁楚無寇河維將平虜畏乞盟亟上虎符就第王城茂勳明德爛然史冊燕及家國匪王孰克築廟作主三室同宇歲時奉享豐豆碩俎國有世臣家有元孫咨爾後人祗栗廟門

泰州報恩光孝禪寺最吉祥殿碑

天下無不可舉之事亦無不可成之功始以果終以不倦此事之所以舉而功之所以成也海陵通川之間自建炎後爲盜區戰場中雖息兵然猶鬼嘯狐嘯於藜莠瓦礫中自官寺民廬皆略具爾未幾復有紹興辛巳虜禍前日之略具者又踐蹂燔燒滌地而盡

乾道淳熙以來中外無事函養滋息且以國力興葺之迨今四十年而城郭邑屋尚未能復承平之舊至於浮圖之廬又非郡縣所急或盛或衰皆在仕者所不問則其舉事若尤難者嗚呼是特不遇浮圖之傑耳信有之未見其果難也泰州報恩光孝禪寺是已寺始爲天寧萬壽寺今名蓋用紹興詔書改賜亦火於辛巳之變有租彥師者復葺之未成而化中間屢易主者至紹熙中今長老德範師應轉運陳公損之請而至寺雖龐建而大役多未之舉有巨鐘千石方寺壞於兵時樓焚鐘墮扁而不壞範始至奮曰鐘不壞寺將興之符也吾舉事將自鐘始乃建樓百尺以棲鐘鐘始鑄歲在乙卯至是三乙卯矣而樓成人咸異之遂議佛殿殿之役最大度費錢數千萬見者縮頸曰使可爲豈至今日邪範曰不然吾當與有緣者力成之不敢以難故止已而有居士劉洪首施錢五百萬施者不勸而集積爲四千萬有奇乃伐木於黃岡蔽流而下方役之興以關征爲懼常平使者王公寧聞之曰斯殿以資永祐陵在天之福孰敢議者吾當任其事於是所至皆爲弛禁殿以崇成爲重屋八楹東西百三十六尺南北九十六尺高百一十尺佛菩薩阿羅漢三十有一軀會王公去而後使者韓公槩取華嚴經語書殿之顏曰最吉祥殿範又爲闕六楹以奉今天子昔在潛邸賜前住持覺深碧雲二大字閣之廣袤雄麗亦略與殿稱餘若方丈寢堂廚庫水陸堂兩廡累數十年不能成者皆不淹歲而備最其費爲緡錢二十萬在它人若寢食不遑暇範獨終日從容倡道以進其徒一警效一顧視皆具第一義學者往往得入而其師別峯之法遂盛行於江淮間矣凡一寺內外莫不粲然復興是殿實爲之冠慶元六年夏四月範使其書記蜀僧祖興來求予作碑予既盡述其始末且爲之銘銘曰

龍臣民薦福遐邇同是邦巍然千柱宮中有廣殿奉大雄瓊材蔽江西徂東波神呵護如雲從璇題藻井翔虛空丹碧髹堊無遺工劫火不能壞鴻鐘雷震鯨吼聲隆隆層閣闕奉龍鸞蹤榮光夜起騰長虹徽祖聖德齊天崇澤覃草木函昆蟲咨爾梵衆極嚴恭熙運共慶千載逢餘福漸被兼華戎長佑農扈消兵烽

洞霄宮碑

造化之初昆侖旁薄一氣既分天積氣於上地積塊於下明爲日月幽爲鬼神聚爲山嶽海瀆散爲萬物萬物之最靈爲人入之最靈爲聖哲爲僊真而道爲天地萬物之宗幽明鉅細之統此處羲黃帝老子所以握乾坤司變化也其書爲易六十四卦道德五千言陰符西昇度人生神之經列禦寇莊周關喜之書其學者必謝去世俗練精積神棲於名山喬岳略與浮圖氏同而篤於父子之親君臣之義與堯舜周公孔子遺書無異浮屠氏蓋有弗及也臨安府洞霄宮舊名天柱觀在大滌洞天之下蓋學黃老者之所廬其來久矣至我宋遂與嵩山崇福宮獨爲天下宮觀之首以龍輔相大臣之去位者亦有以提舉洞霄召拜左相者則其地望之重殆與昭應景靈醴泉萬壽太一神霄寶籙爲比它莫敢望在真宗皇帝時始制詔改宮名賜金寶牌又賜仁和縣田十有五頃奉齋醮悉除其租賦至政和間宮以歷歲久穿壞漫漶徽宗皇帝降度牒三百命兩浙轉運司復興葺之歲度童子一人爲道士建炎中又廢於兵火高宗皇帝中興大業聞之當寧太息乃紹興二十五年以皇太后之命建昊天殿鐘樓經閣表以崇閎廓以脩廡費出慈寧宮梓匠工役具於修內步軍司中使臨護犒賜踵至旣不以命有司而山麓之民亦晏然不知有役一日告成金碧之麗光照林谷鐘磬之作聲摩雲霄見者疑其天降地涌而神運鬼輸也可謂盛矣及上脫屣萬幾頤神物表遂以乾道二年自德壽宮行幸

山中駐蹕累日勅太官進蔬膳親御翰墨書度人經以賜自有天地卽有此山殊尤之迹未有若此者慶元六年九月葆光大師宮都監潘三華與知宮事高守中同知宮事水丘居仁以告山陰陸某曰願有紀以爲無窮之傳某以疾未能屬稿後三年同知宮事王思明與其徒李知柔杭濤江入東繼以請乃敘載其本末如此且爲之銘曰
在宋祥符帝錫之書乃作昭應比隆義圖元豐景靈列聖攸居元祐上清以祝帝儲棟宇煌煌煥於天衢徽祖神霄誕彌九區迨我高皇東巡於吳瞻言天柱鎮茲行都警蹕來臨神明翊扶乃御幄殿穆清齋居天日下照雨露普濡迨今遺民注望屬車三聖嗣興光紹聖謨千礎之宮鶩騰太虛寶磬鴻鐘震於江湖肆作頌詩用紀絕殊

渭南文集卷第十六

渭南文集目錄

卷第十七

雲門壽聖院記

寧德縣重修城隍廟記

澹亭記

煙艇記

復齋記

青州羅漢堂記

鎮江府城隍忠佑廟記

黃龍山崇恩禪院三門記

王侍御生祠記

東屯高公記

樂郊記

對雲堂記

靜鎮堂記

渭南文集卷第十七

雲門壽聖院記

雲門寺自晉唐以來名天下父老言昔盛時繚山並谿樓榭重複依巖跨壑金碧飛踊居之者忘老寓之者忘歸遊觀者累日乃徧往往迷不得出雖寺中人或旬月不相覲也入寺稍西石壁峯爲看經院又西爲藥師院又西繚而北爲上方已而少衰於是看經別爲寺曰顯聖藥師別爲寺曰雍熙最後上方亦別曰壽聖而古雲門寺更曰淳化一山凡四寺壽聖最小不得與二寺班然山尤勝絕遊山者自淳化歷顯聖雍熙酌煉丹泉闕筆倉追想葛稚川王子敬之遺風行聽難聲而坐蔭木影徘徊好泉亭上山水之樂饜飫極矣而亭之旁始得支徑逶迤如綫脩竹老木怪藤醜石交覆而角立破崖絕澗奔泉迅流噉呀而噴薄方暑凜然以寒正晝仰視不見日景如此行百餘步始至壽聖嶄然孤絕老僧四五人引水種蔬見客不知拱揖客無所主而去僧亦竟不知辭謝好奇者或更以此喜之今年予來南而四五人者相與送予至新谿且曰吾寺舊無記願得君之文磨刻崖石予異其朴樸而能知此也遂與爲記然憶爲兒時往來山中今三十年屋益古竹樹益蒼老而物色益幽奇予亦有白髮久矣顧未知予之文辭亦能少加老否寺得額以治平某年某月後九十餘年紹興丁丑歲十一月十七日吳郡陸某記

寧德縣重修城隍廟記

禮不必皆出於古求之義而稱揆之心而安者皆可舉也斯人之生食稻而祭先嗇衣帛而祭先蠶飲而祭先酒畜而祭先牧猶以爲未則凡日用起居所賴者皆祭祭門祭竈祭中霽之類是也城者以保民禁奸通節內外其有功於人最大顧以非古黜其祭豈人心所安哉故自唐以來郡縣皆祭城隍至今世尤

謹守令謁見其儀在他神祠上社稷雖尊特以令式從事至祈禳報賽獨城隍而已則其禮顧不重歟寧德爲邑帶山負海雙巖白鶴之嶺其高摩天其峻立壁負者股栗乘者心掉飛鸞關井之水濤瀾洶湧蛟鱗出沒登舟者涕泣與父母妻子別已濟者同舟更相賀又有氣霧之毒龜鼈蛇蠶守宮之蠱郵亭逆旅往往大署墻壁以道出寧德爲戒然邑之吏民獨不得避則惟神之歸是以城隍祠比他邑尤盛祠故在西山之麓紹興元年知縣事趙君說之始遷於此二十八年五月權縣事陳君據復增築之高明壯大稱邑人尊祀之意旣成屬某爲記某曰幽顯之際遠矣惟以其類可感故古之祭者必思其所嗜好夫神之所以爲神惟正直所好亦惟正直君儻無愧於此則擷瀾谿之毛挹行潦之水足以格神不然豐豆碩俎是詔以求福也得無與神之意異邪旣以勵君亦以自勵又因以勵邑人八月一日右迪功郎主簿陸某記

澇亭記

澇山道人廣勤廬於會稽之下伐木作亭苦之以弗名之曰澇亭而求記於陸子吾聞鄉居邑處父兄子弟相扶持以生相安樂以老且死者民之常也士大夫去而立朝散之四方功名富貴足以老而忘返矣猶或以不得車騎冠蓋雍容於途以夸其鄰里而光耀其族媼爲憾惟浮屠師一切反此其出遊惟恐不遠其遊之日惟恐不久至相與語其平生則計道里遠近歲月久暫以相高鳴呼亦異矣勤公之心獨不然言曰吾出遊三十年無一日不思澇而適不得歸未嘗以遠遊夸其朋儕其在澇亭語則澇也食則澇也煙雲變滅風雨晦冥吾視之若澇之山樵牧往來老稚嘯歌吾視之若澇之人疏一泉移一石栽一草木率以澇觀之恍然不知身之客也夫人之情無不懷其故者浮屠師亦人也而忘其鄉邑父兄子弟無

乃非人之情乎自堯舜周孔其聖智千萬於常人矣然猶不以異於人情為高浮屠師獨安取此哉則吾勤公可謂篤於自信而不移於習俗者矣故與為記紹興三十年十二月十二日記

煙艇記

陸子寓居得屋二楹甚隘而深若小舟然名之曰煙艇客曰異哉屋之非舟猶舟之非屋也以為似歟舟固有高明與麗踰於宮室者矣遂謂之屋不可邪陸子曰不然新豐非楚也虎賁非中郎也誰則不知意所誠好而不得焉麤得其似則名之矣因名以課實子則過矣而予何罪予少而多病自計不能效尺寸之用於斯世蓋嘗慨然有江湖之思而飢寒妻子之累劫而留之則寄其趣於煙波洲島蒼茫杳靄之間未嘗一日忘也使加數年男勝鉏犁女任紡績衣食麤足然後得一葉之舟伐荻釣魚而賣芟芡入松陵上巖瀨歷石門沃洲而還泊於玉笥之下醉則散髮扣舷為吳歌顧不樂哉雖然萬鍾之祿與一葉之舟窮達異矣而皆外物吾知彼之不可求而不能不眷眷於此也其果可求歟意者使吾胸中浩然廓然納煙雲日月之偉觀攬雷霆風雨之奇變雖坐容膝之室而常若順流放櫂瞬息千里者則安知此室果非煙艇也哉紹興三十一年八月一日記

復齋記

仲高於某為從祖兄某蓋少仲高十有二歲方某為童子時仲高文章論議已稱成材冠裳帶博車騎雖容一時名公卿皆慕與之交諸老先生不敢少之皆謂仲高仕進且一日千里自從官御史識者惟恐不得如仲高者為之及其丞大宗正出使一道在他人亦足稱美仕在仲高則謂之蹉跌不偶可也願曾不煖席遂遺口語南遷萬里凡七閱寒暑不得內徙與仲高親厚者每相與燕遊輒南望歎息出涕因罷酒去如是數矣然客自海上來言仲高初不以遷謫瘴

癘動其心方與學佛者遊落其浮華以反本根非復昔日仲高矣聞者皆悵然自以為不足測斯人之淺深也陸興元年夏某自都還里中始與兄遇視其貌淵乎似道聽其言簡而盡所謂落落浮華反本根者乃親見之嘗對榻語至丙夜謂某曰吾名吾燕居之室曰復齋子為我記某自念少貧賤仕而加甚凡世所謂利欲聲色足以敗志汨心者一不踐其境兀然枯槁似可學道者然從事於此數年卒無毛髮之得若仲高馳騁於得喪之場出入於憂樂之域而自得者乃如此非深於性命之理其孰能之某蓋將就學焉敢極道本末以為復齋記

青州羅漢堂記

陸興改元秋九月某訪故人奔公於青山之下與奔公別蓋十有餘年矣聞某至曳杖出迎松間黔瘠腊如殘雪覆頂相與握手訪問朋舊且悲且喜既至其居脩廊邃屋曲折皆有意已而入法堂之東室忽見欄壘巖竇飛泉迅流苦陸阿羅漢翔遊其中使人如身在峨眉天台應接不暇奔公從旁笑曰此吾使工人幻為之者也始王君某築是庵於墓左以資其先人之福而請吾居焉王君閉門讀書未嘗少貶於世顧於吾獨委曲周盡吾亦感其意為之留而弗去者十年凡此土木金碧以為像設供養之具者積費千金王君無絲毫計惜而吾之心志亦竭於是矣子為我記嗚呼某不天少罹閔凶今且老矣而益貧困每遊四方見人之有親而得致養者與不幸喪親而葬祭之具可以無憾者輒悲痛流涕愴然不知生之為樂也聞王君之事既動予心又况奔公勤勤之意乎記其可辭明年七月一日甫里陸某記

鎮江府城隍忠祐廟記

漢將軍紀侯以死脫高皇帝於滎陽之圍而史失其行事司馬遷班固作列傳弗載也維宋十一葉天子駐蹕吳會改元乾道正月甲子右中奉大夫直敷文

關知鎮江府方滋言府當淮江之衝屏衛王室號稱大邦自故時祠紀侯爲城隍神莫知其所以始然實有靈德以庇其邦之人禱祈禱昭答如響紹興隆興之間虜比入塞金鼓之聲震於江壩吏民不知所爲則惟神之歸雖虜畏天子威德折北不支退舍請盟府以無事至於流徙蔽野兵民參錯而居處弗驚疾癘以息則神實陰相之吏其敢貪神之功以爲己力乎謹上尚書願有以褒顯之以慰父兄弟之心越三月癸丑有詔賜廟額曰忠祐詔下而方公爲兩浙轉運副使右朝散大夫直徽猷閣呂公擢來知府事修上之賜五月癸亥大合樂盛服齊莊躬致上命神人協心霧雨澄霽靈風肅然來享來臨於是呂公以屬某曰願有紀焉某惟紀侯忠奮於一時而暴名於萬世功施於漢室而見褒於聖宋身隕於滎陽而血食於是邦士惟力於爲善而已豈有有其善而不享其報者乎吏之仕乎是邦者必將有事於廟有事於廟者必將有考於碑其尚知所勉焉毋爲神羞六月癸未記

黃龍山崇恩禪院三門記

自浮屠氏之說盛於天下其學者尤喜治宮室窮極後靡儒者或病焉然其成也無政令期會惟太平久公私競餘師與弟子四出巧乞積累歲月而後能舉其壞也無衛守誰何一日寇至則立爲草莽丘墟故天下亂則先壞治則後成予於是蓋獨有感焉黃龍山方南公時學者之盛名天下而其居亦稱焉中更夷狄盜賊大亂之後學者散去施者弗至昔之閎壯鉅麗者嘗委地矣自庚申訖丁亥二十餘年之間乃能粲然復興樓榭闕空翔地踴鐘魚之聲聞十餘里法席之盛殆庶幾南公時是非兵革之禍不作遠方之氓蕃息阜安得以其公賦私養之餘及於學佛者則此山且爲虎狼鸚魅之所宅矣而安能若是哉禪師升公於其寺門之成也屬予爲記予謂升公方

以身任道起其法於將墜兩蓋未足言獨書予所感使凡至山中者皆知前日之禍亂嘗如此而國家之覆燾函育斯民若是其深吏勤其官民力其業相與思報上之施焉升公豈不得所願哉乾道三年正月十四日左通直郎陸某記

王侍御生祠記

乾道七年二月知夔州濟南王公新作貢院成越三月夔歸萬施梁山六郡之士不謀同辭曰夔雖號都督府而僻在巴峽無贏財羨工公之爲是役也寸寸銖銖心計而手度之歲月乃成形容爲癯髮爲盡白其德於士豈有既邪蓋思所以報者乃相與築祠於院之東堂畫像惟肖又相與屬予記之予曰公之施厚矣祠未足報也士則曰吾等將日夜勉於學父兄詔子弟於家長老先生訓諸生於鄉期有以應有司之求如是足乎予曰未也郡國貢士於天子天子命近臣與館閣文學之士選其尤者而親策之於廷策既上天子爲親第其名謂之進士進士將相儲也自是而起於朝其任政事毋伏嘉言毋醜衆正其任言責毋比大吏毋置宵人其任百執事守節秉道宿道鄉方毋懷讓毋服讒使天下稱之史臣書之曰是夔州所貢士也士以是報公公以是報天子迺可無媿而予於記亦無愧辭矣若何皆曰唯敢不力乾道七年三月十五日左奉議郎通判軍州主管學事兼管內勸農事陸某記

東屯高公記

少陵先生晚遊夔州愛其山川不忍去二徙居皆名高公質於其詩曰次水門者白帝城之高公也曰依藥餌者瀘西之高公也曰見一川者東屯之高公也故其詩又曰高公非一處予至夔數月吊先生之遺迹則白帝城已廢爲丘墟百有餘年自城郭府寺父老無知其處者况所謂高公乎瀘西蓋今夔府治所畫爲阡陌裂爲坊市高公尤不可識獨東屯有李氏

者居已數世上距少陵財三易主大曆中故券猶在而高丘負山帶谿氣象良是李氏業進士名襄因郡博士雍君大椿屬予記之予太息曰少陵天下士也早遇明皇肅宗官爵雖不尊顯而見知實深蓋嘗慨然以稷禹自許及落魄巴蜀感漢昭烈諸葛丞相之事屢見於詩頓挫悲壯反覆動人其規模志意豈小哉然去國寢久諸公故人熟睨其窮無肯出力比至夔客於栢中丞嚴明府之間如九尺丈夫俛首居小屋下思一吐氣而不可得予讀其詩至小臣議論絕老病客殊方之句未嘗不流涕也嗟夫辭之悲乃至是乎荆卿之歌阮嗣宗之哭不加於此矣少陵非區區於仕進者不勝愛君憂國之心思少出所學佐天子與正觀開元之治而身愈老命愈大謬坎壈且死則其悲至此亦無足怪也今李君初不踐通塞榮辱之機讀書絃歌忽焉忘老無少陵之憂而有其高少陵家東屯不決歲而君數世居之使死者復生子未知少陵自謂與君孰失得也若予者仕不能無媿於義退又無地可耕是直有慕於李君爾故樂與為記

樂郊記

李晉壽一日圖其園廬持示余曰此吾荆州所居名樂郊者也荆州故多賢公卿名園甲第相望自中原亂始以吳會上流常宿重兵而衣冠亦遂散去太平之文物前輩之風流蓋略盡矣獨吾樂郊日加葺文竹奇石蒲菊來禽芍藥蘭茝菱芡菡萏之富為一州冠其尤異者住住累千里致之子幸為我記予官破中始與晉壽相識長身鐵面音吐鴻暢遇事激烈奮發以全軀保妻子為可鄙其意氣豈不壯哉及為客置酒出佳侍兒陳書畫琴奕相與嬉嬉則雍容都雅風味乃甚可愛雖梁宋間少年貴公子不能過蓋其多材藝知弛張如此然自少時不喜媒聲利有官不仕窮園林陂池之樂者且三十年每自謂泉石膏育

及來夔州諸公始大知之合薦於朝議者謂晉壽當以少伸於世為喜而晉壽顧不然獨眷眷於樂郊不忍暫忘嗚呼出處一道也仕而志歸與處而不能出者俱是一癖未易是泉石非鐘鼎諸公之薦蓋矜晉壽膏肓而使為世用異時晉壽成功而歸高牙在前千兵在後擅畫纘之榮以賁斯園荆楚多秀民尚有能賦其事者乎乾道七年六月十日笠澤陸某記

對雲堂記

巫故郡自秦以來見於史其後罷郡猶為壯縣杜少陵扁舟下白帝過焉為賦歸字韻五字詩詩傳天下由是巫縣名益重宋建中靖國之元黃太史始脫鉤黨自蜀之荆訪少陵遺迹客縣治之東堂留字壁間有坐臥對南陵雲山陰晴變態之語距乾道辛卯逾一甲子無舉出者郢城李德修來為令風流儒雅翩翩佳公子因廢址作堂與客落之舉酒屬山陰陸務觀曰子為予名且記復興之歲月務觀既取太史語名之且曰僕行年五十閱世故多矣所謂朝夕百變者奚獨雲山哉一日進此道幻覺消情塵滅真實相見雖魏乎天地浩乎古今變壞不停與浮雲遊塵空華青暈初無少異也德修方吏退時清坐堂上試以僕言觀之德脩名普務觀名某臘月乙卯之夕大醉中秉燭梅花下記

靜鎮堂記

四川宣撫使故治益昌樞密使清源公之為使也始徙漢中郎以郡治為府郡自兵火滌地之後一切草創公至未幾凡營壘廐庫吏士之廬皆築治之使堅壯便安可以支久而府獨仍其故西偏有便坐日受羣吏謁見與籌邊治軍燕勞將士靡不在焉而其壞尤甚公既留三年官屬數以請始稍加葺易其傾撓徹其蔽障不費不勞挾日而成會上遣使持親詔賜黃金匱寶熏珍劑以彰殊禮公遂撫詔中靜鎮坤維之語名新堂曰靜鎮而命其屬陸某記之某辭謝不

獲命則再拜言曰以才勝物易以靜鎮物難以靜鎮物惟有道者能之泰山喬嶽之出雲雨明鏡止水之照毛髮則靜之驗也如使萬物並作吾與之逝衆事錯出吾爲之變則雖弊精神勞思慮而不足以理小國寡民況任天下之重乎歲庚寅某自吳適楚過廬山東林山中道人爲某言公嘗憩此院閉戶面壁終夏不出老宿皆愧之則公之剗心受道蓋非一日矣世徒見公馳騁於事功之會而不知公枯槁澹泊蓋與山棲谷汲者無異徒見公以才略奮發不數歲取公輔而不知公道學精深尊德義斥功利卓乎非世俗所能窺測也而上獨深知之故詔語如此傳曰知臣莫若君詎不信哉雖然某以爲今猶未足見公也虜暴中原久腥聞於天天且悔禍盡以所覆昇上而公方弼亮神武紹開中興異時奉鑿駕奠京邑屏符瑞之委抑封禪之請却涇橋之朝謝玉關之質然後能究公靜鎮之美云乾道八年七月二十五日門生左承議郎權四川宣撫使司幹辦公事兼檢法官陸某謹記

渭南文集卷第十七

渭南文集目錄
卷第十八

藏丹洞記

籌邊樓記
彭州貢院記

撫州廣壽禪院經藏記
成都犀浦國寧觀古楠記

書巢記

景迂先生祠堂記
能仁寺捨田記

常州開河記

渭南文集卷第十八

藏丹洞記

漢嘉郡治之西偏望雲樓東有石穴天將雨輒出雲氣予疑而發之則石室屹立室之前地中獲瓦缶耀矮貯丹砂雲母奇石或爛然類黃金意其金丹之餘也悉斂而積藏輸諸府庫誠識惟謹予嘗讀丹經言古得道至人藏丹留於名山非當僊者輒不見雖見亦輒變化今是丹不藏名山而近在官寺之側予以塵垢衰病之餘又輒見之是與丹經之說大異或謂丹藏於此遠矣方上古未爲城邑時西望三裁東帶大江山川秀傑蓋宜爲僊真鍊藥騰舉之地至予輒見之者豈神物隱見有時而予適逢其時與丹之伏而不見者常多見者常寡雖嵇叔夜葛稚川不免齋恨以蛻而予顧得見焉茲非幸與乾道九年秋八月辛未山陰陸某記

籌邊樓記

淳熙三年八月既望成都子城之西南新作籌邊樓四川制置使知府事范公舉酒屬其客山陰陸某曰君爲我記按史記及地志唐李衛公節度劍南實始作籌邊樓廢久無能識其處者今此樓望健爲雙道黔中越雋諸郡山川方域皆略可指意者衛公故趾其果在是乎樓旣成公復按衛公之舊圖邊城地勢險要與蠻夷相入者皆可攷信不疑雖然公於邊境豈真待圖而後知哉方公在中朝以洽聞強記擅名一時天子有所顧問近臣皆推公對莫敢先者其使虜而歸也盡能道其國禮儀刑法職官宮室城邑制度自幽薊以出居庸松亭關並定襄五原以抵靈武朔方古今戰守離合得失是非一皆究見本末口講手畫委曲周悉如言其闔內事雖虜者老大人知之不如是詳也而況區區西南夷距成都或不過數百里一登是樓在目矣則所謂圖者直按故事而已

請以是爲記公慨然曰君之言過矣予何敢望衛公然竊有幸焉衛公守蜀牛奇章方居中每排沮之維州之功旣成而敗今予適遭清明寬大之朝論事薦吏奏朝入而夕報可使衛公在蜀適得此時其功烈壯偉詎止取一維州而已哉某曰請併書公言以詔後世可乎公曰唯唯九月一日記

銅壺閣記

天下郡國自譙門而入必有通達達於侯牧治所惟成都獨否自劍南西川門以北皆民廬市區軍壘折而西道北爲府府又無臺門與他郡國異考其始蓋自孟氏國除矯霸國之僭侈而然至蔣公堂來爲牧乃南直劍南西川門西北距府五十步築大閣曰銅壺事書於史崇寧初以火廢政和中吳公拭因其矩復修大之雄傑閎深始與府稱淳熙二年夏六月今敷文閣直學士范公以制置使治此府始至或以閣壞告公曰失今不營後費益大於是躬自經畫趣令而緩期廣儲而節用急吏而寬役一日崇成人徒駭其山立羣飛業然摩天不知此閣已先成於公之胸中矣夫豈獨閣哉天下之事非先定素備欲試爲之事已紛然始狼狽四顧經營勞弊其不爲天下笑者鮮矣方閣之成也公大合樂與賓佐落之客或舉觴壽公曰天子神聖英武蕩清中原公且以廊廟之重出撫成師北舉燕趙西略司并挽天河之水以洗五六十年腥羶之污登高大會燕勞將士勒銘奏凱傳示無極則今日之事蓋未足道識者以此知公舉大事不難矣其可闕書四年四月己卯朝奉郎主管台州崇道觀陸某記

彭州貢院記

國家三歲一貢士天子先期爲下詔書與郊祀天地埒及試於禮部旣中選矣天子親御殿發策詢天下事第其高下又親御殿賜以科名其禮可謂重矣蓋以爲所與共代天理物而守宗廟社稷於無窮者實

在是也然則郡國貢士顧可不重邪彭州舊無貢院每科舉輒寓佛祠乃在城外士不以爲便淳熙二年知州事王公敦詩通判州事鄧公樞始采進士穆滂陳仲山楊倫蘇松等議取廢驛故地爲貢院凡郡之士奔走後先肩袂相屬號堅材良山積雲委自正月壬子至七月癸亥訖事用緡錢萬五千六百有奇役工稱是重門大堂高閣邃深繚以脩廡沈沈翼翼分職庀事各有攸處既成王公徙利州路轉運判官書來屬予爲記鄧公又繼以請明年正月朝奉大夫王公序來知州事則又以請予發書歎曰俗壞久矣上下相戾後先相傾者天下皆是也今彭之士大夫與王公鄧公謀同心協若出一人固已異矣後王公事不出己而不忘其成不揜其能惟懼後之無傳可不謂賢哉使士之貢於朝而仕者揆時之宜從人之欲以舉萬事如王公鄧公視人之善若己有之如後王公則利澤被元元勳業垂竹帛將孰禦焉士尚知所勉哉四年五月丁未朝散郎主管台州崇道觀陸某記

撫州廣壽禪院經藏記

淳熙己亥冬十二月予使江西治在撫州其東是爲廣壽禪院每出輒過焉僧守璞方爲輪藏予之始至也纔屹立十餘柱其上未瓦其下未甃其旁未垣經未甃其止山立其作雷動神呵龍負可怖可愕丹堊金碧殆無遺功而守璞儼然燕坐爲其徒說出世間法土木梓匠之問不至丈室若未嘗有是役者比明年冬十一月予被命詣行在所璞乃礪石乞予爲記予慨然語之曰子棄家爲浮屠氏祝髮壞衣徒跣行乞無冠冕軒車府寺以爲尊也無官屬胥吏徒隸以爲奉也無鞭笞刀鋸囹圄桎梏與夫金錢粟帛爵秩祿位以爲刑且賞也其舉事宜若甚難今顧能不動聲氣於期歲之間成此奇偉壯麗百年累世之迹予切怪士大夫操尊權席利勢假命令之重耗府庫

之積而翫歲愒日事功弗昭又遺患於後其視子豈不重可愧哉既諾其請又具載語守樸者以勵吾黨云是月十九日朝請即提舉江南西路常平茶鹽公事賜緋魚袋陸某記

成都犀浦國寧觀古楠記

予在成都嘗以事至沉犀過國寧觀有古楠四皆千歲木也枝擾雲漢聲披風雨根入地不知幾百尺而陰之所庇車且百兩正晝日不穿漏夏五六月暑氣不至凜如九秋成都固多壽木然莫與四楠比者予蓋愛而不能去者彌日有石刻立廡下曰是仙人蘧君手植予歎曰神仙至人手之所觸氣之所呵羸疾者起盲聵者愈榮茂枯朽而金玉瓦石不難況其親所培植哉久而不槁不死固宜欲爲作詩文會多事不果嘗以語道人蘧昌老真叟以爲恨予既去蜀三年而昌老以書萬里屬予曰國寧之楠幾伐以營繕郡人力全之僅乃得免懼卒不免也君爲我終昔意予發書且歎且喜夫勿翦憩棠恭敬桑梓愛其人及其木自古已然姑以蜀事言之則唐節度使取孔明祠柏一小枝爲手板書於圖志今見非詆蔣堂守成都而有美政止以築銅壺閣伐江瀆廟一木坐謠言罷亦書國史且王建孟知祥父子專有西南窮土木之侈沉犀近在國城數十里間而四楠不爲當時所取彼猶有畏而不敢者況今聖主以恭儉化天下有夏禹卑宮室漢文罷露臺之風專閩方面皆重德偉人豈其殘滅千歲遺迹侈大棟宇爲王孟之所難哉意者特出於吏胥梓匠欺罔專恣以自爲功而已使有以吾文告之者讀未終篇禁令下矣然則其可不書

山陰陸某記

書巢記

淳熙九年六月一日朝奉大夫主管成都府玉局觀陸子既老且病猶不置讀書名其室曰書巢客有問曰鵲巢於木巢之遠人者燕巢於梁巢之襲人者鳳

之巢人瑞之巢之巢人覆之雀不能巢或奪燕巢巢之巢者也鳩不能巢伺鵲育雛而去則居其巢巢之拙者也上古有有巢氏是為未有宮室之巢堯民之病水者上而為巢是為避害之巢前世大山窮谷中有學道之士棲木若巢是為隱居之巢近時飲家者流或登木杪酣醉叫呼則又為狂士之巢今子幸有屋以居牖戶墻垣猶之比屋也而謂之巢何邪陸子曰子之辭辯矣顧未入吾室吾室之內或栖於櫺或陳於前或枕藉於床俯仰四顧無非書者吾飲食起居疾痛呻吟悲憂憤歎未嘗不與書俱賓客不至妻子不覲而風雨雷雹之變有不知也間有意欲起而亂書圍之如積槁枝或至不得行則輒自笑曰此非吾所謂巢者耶乃引客就觀之客始不能入既入又不能出乃亦大笑曰信乎其似巢也客去陸子數曰天下之事聞者不如見者知之為詳見者不如居者知之為盡吾儕未造夫道之堂與自籓籬之外而妄議之可乎因書以自警淳熙九年九月三日甫里陸某務觀記

景迂先生祠堂記

明州船塢新作故侍讀晁公祠成監場事襄陽王君鉛因通判州事丹陽蘇君玘移書某為之記自春徂秋凡十許書請不勸某於公為彌甥方踉蹌學步時已獲拜公則今於為記誠不當以薄陋辭謹按公諱說之字以道一字伯以父自號景迂生元豐元祐間已為知名士崇寧後坐上書邪等斥不得立朝臨民故連為祠廟堯庫吏其為船塢則大觀政和間也寓舍直桃華渡而官寺有亭曰超然公方為世僇人士夫遇諸途噤莫敢語況有拜牀下者簿書稍暇則以讀書為樂時時見於文章如汪伯更哀辭祭鄒忠公文皆傳天下亦間與為佛學者延慶明智師遊論著所謂天台教至今其徒以為重雖然此猶未足言公也公之學深且博矣於易自商瞿下至河南邵先生

於書自伏生下至泰山姜先生於詩雜以齊魯韓三家不格於毛鄭於春秋攷至賈誼董仲舒不膠於啖趙其所引據多先秦古書藏山埋冢之秘卓乎獨立確乎自信雖引天下而與之爭不能奪卒成一家之說與諸儒並傳向非擯斥疏置於荒遠寂寞之地如在船塢時則雖公之敏此功未易成也於處士之棄日豈皆馳騫於富貴功名哉弊精神於事為之未謀衣食於涯分之外忽焉不知老之至者多矣登堂而望公之風采讀記而稽公之學術其亦可自省哉公之文章本二百卷中原喪亂後其家復集之益以南渡至歿時所作纔得六十卷而士大夫猶未盡見也郡人能言公舊事者曰一日部使者來治船事詬責甚峻公從容對曰船待木乃成木非錢不可致今無錢致木則無船適宜使者為發愧去觀公平生大節一言折庸人之驕蓋不足書而郡人所願書故亦不敢略云淳熙十年九月丁丑朝奉大夫主管成都府玉局觀山陰陸某記并書

圓覺閣記

淳熙十年某月某日徑山興慶萬壽禪寺西閣落成會是歲某月某日詔賜住持僧寶印御注圓覺經且命某為之序於是道俗咸曰賜經與閣成同時宜勝曰圓覺之閣且刻石以侈盛事於是又咸曰陸某宜為記寶印以衆言來論某於山陰大澤中某蹴然不敢辭恭惟聖天子以聰明睿智之資體堯蹈舜深造道妙悟一心於萬法之中既已博極皇墳帝典義圖魯史之秘而象胥所傳木葉旁行亦莫不究極以大圓覺為我世界悼士之陋多岐私智昧乎大同乃以萬機之餘親御訓釋凡十二士之所問調御之所說佛陀波羅之所譯宗密之所注裴休之所言皆水釋縷解於宸筆之下十日並照物無遁形百川東歸海無異味如旣望月無有缺減如大寶鏡莫不照了東夷南蠻西戎北狄霜露所墜日月所照莫不共此大

圓覺中魯之逢掖楚之黃冠竺乾之染衣祝髮平時相與為矛盾為冰炭者亦莫不共在此大圓覺中不偏不欠不迷不謬垂之千萬億世亦莫不然而寶印以山林枯槁之士名徹九重得以大覺禪師懷璉入侍仁宗皇帝故事觀清光承聖問受好賜序鉅典又此閣壯麗首冠一山費至三十萬錢其落成也適當賜經之時山川動色神龍踴躍於虛盛哉方閣之未建也東偏有千僧閣紹興中大慧禪師宗杲法門之傑方住山時衆溢千數故以是名閣然自今觀之雖阿僧祇衆猶為有限量也豈若圓覺之廣大無邊也哉顧某衰且病學問廢落文思局溢而名山盛事本未闕闕非區區筆力所能演述實以為愧懼云淳熙十年十一月十四日朝奉大夫主管成都府玉局觀陸某記

能仁寺捨田記

淳熙十三年三月乙巳承節郎河東薛純一詣紹興府自言生長太平蒙被德澤念亡益縣官不勝懷懼報國之心願以家所有山陰田千一百畝歲為米千三百石有奇入大能仁禪寺祝兩宮聖壽安撫使龍圖丘公視牒異之問所以然純一曰昔漢卜式上書願輸家財半助邊且曰天子誅匈奴愚以為賢者宜死節有財者而輸之如此可滅也今天子垂拱穆清北虜警服歲時奉貢純一弗獲傾貲備軍興一日費故因像教為兩宮祈年誠愚不識法令罪死不宥願言之朝即伏斧鑕不敢悔於是龍圖公嘉其意為上尚書戶部純一乃因寺之住持僧子昕來告予請撰次本末為記予辭謝不可則語之曰子雖列在勇爵曩嘗舉進士試禮部繼今能益修其業以致於顯榮則所以報國者豈若是而已雖然是已足以勵風俗助教化使貪冒者廉怠忽者奮享祿賜而忘報者愧豈不可書也哉田之頃畝賦役及別以錢權其子本以待凶歲則具書於碑陰俾後有改焉五月十

三日記

常州開河記

隋疏大渠自今京口毗陵姑蘇嘉興以抵於臨安初以備巡幸而後世因為漕運大利故得不廢渠貫毗陵城中徐行東注獨南水門受荆溪之水為惠明河醜為二股皆會於金斗門慶曆中太守國子博士李公餘慶始疏顧塘河益引惠明水注之漕渠顧塘地勢在漕渠後故俗又謂之後河崇寧初太守給事中朱公彥復增濬之方是時毗陵多先生長者以善俗進後學為職故儒風蔚然為東南冠及余公中霍公端友皆策名天下士第一則說者遂歸之後河曰是為東南文明之地鄒忠公方居鄉士所尊事而化服者忠公避不敢居因以後河實之而為作記淳熙十四年今太守林公下車逾年既尊禮其諸老先生延見其秀民所以表勵風俗而激勸儒學者日夜不敢少怠弦歌之盛殆軼於承平時矣而或以後河告者亦不廢也後河自崇寧後不治者積數十年中更兵亂民積瓦礫及治家棄滓故地益堅確夏六月林公乃蒐閑卒捐羨金分命其屬治之不淹旬渠復故道表若干深若干脩若干乃以書屬予曰願記其事予謂渠之興自為一郡之利不必為士之舉有司者設然城南衣冠以杜固鑿而頓滅則後河成廢與士之舉有司者相為盛衰亦自有理太王遷岐成王都洛皆觀川原咨卜筮其由來蓋尚矣則林公兼取焉顧不可哉士益勉之以毋負公之意公名祖洽字子禮明州鄞人世以經行顯云渠成之歲十二月二日記

渭南文集卷第十八

渭南文集目錄
卷第十九

明州育王山買田記
建寧府尊勝院佛殿記

紹興府修學記
嚴州重修南山報恩光孝寺記

會稽縣重建社壇記
廣德軍放生池記
鎮江府駐劄御前諸軍副

都統廳壁記
法雲寺觀音殿記
會稽縣新建華嚴院記

渭南文集卷第十九

明州育王山買田記

紹興元年高皇帝行幸會稽詔明州阿育王山廣利禪寺上仁宗皇帝賜僧懷璉詩頌親札念無以鎮名山慰衆志乃書佛頂光明之塔以賜又申以手詔特許買田贍其徒逾五十年未能奉詔佛照禪寺德光以大宗師自靈隱歸老是山慨然曰僧寺毋輒與民質產令也今特許勿用令高皇帝恩厚矣其可弗承且昔居靈隱時壽皇聖帝召入禁闈顧問佛法屢賜金錢其敢爲他費乃盡以所賜及大臣長者居士脩供之物買田歲入穀五千石而遺學者義銛求記於陸某某方備史官其紀高皇帝遺事職也不敢辭惟茲四明表海大邦自嘉祐紹興兩賜宸翰雲漢之章下飾萬物於是山君波神効珍受職龜鼉蛟鰐珥伏退聽惡氣毒霧收斂澄廓萬里之舶五方之賈南金大貝委積市肆不可數知陂防峭堅年穀登稔於虜盛哉今德光又廣上賜斬兩宮之壽植天下之福無疆惟休時萬時億刻之金石於是爲稱咨爾學者安食其間明己大事傳佛大法報上大恩將必有在不然不耕而食既飽而嬉厲民以自養豈不甚可愧哉淳熙十六年十一月二十四日朝議大夫尚書禮部郎中兼實錄院檢討官陸某記

建寧府尊勝院佛殿記

建寧城東永安尊勝禪院成於唐僖昭間壞於建炎之末稍葺於紹興之庚申自佛殿始方是時院大壞塗地趣於復立以慰父老心故不暇爲支久計未四十年遽復頽圯適懷素者來爲其長老乃慨然曰殿大役也舍是弗先吾則不武乃廣其故基北南西東各三尺意氣所感助者四集瓌材珍產山積雲委其最巨者石痕村之杉脩百有三十尺圍十有五尺其餘蓋稱是凡費錢三百萬有奇而竹木輒變黜堊之

施者工人役夫之樂助者不在是數其成之歲月淳熙戊申冬十一月庚子也越四年紹熙辛亥五月予友入方君伯謨移書爲懷素求文爲記予爲之言曰世多以浮屠人之舉事誚吾士大夫以爲彼無尺寸之柄爲其所甚難而舉輒有成士大夫受天子爵命挾刑賞予奪以臨其吏民何往不可而熟視蠹弊往往憚不敢舉舉亦輒敗何邪予謂不然懷素之來爲是院固非有積累明白之効佛殿方壞而院四壁立今日食已始或謀明日之食懷素坐裂瓦折桷腐柱未有一錢儲也使在士大夫語未脫口已得狂名有心者疑有言者誘逐而去之久矣浮屠人則不然方且出力爲之先後爲之輔翼爲之禦侮歷十有四年如一日此其所以歸然有所成就非獨其才異於人也以十四年言之不知相之拜者幾人免者幾人將地作士善俗與夫貨財刑獄足用而弼教藩翰之臣古所謂侯國者大抵倏去忽來吏不勝紀彼懷素固自若也則其有成曷足怪哉且懷素之爲是院不獨致力於佛殿凡所謂堂寢之未備者廊廡之朽敗者皆一新之今老矣無他徒意使不死復十四年或過十四年皆未可知也則是院之葺又可前知邪而士大夫凜凜拘拘擇步而趨居其位不任其事護藏蠹萌傳以相諉顧得保祿位不蹈刑禍爲善自謀其知恥者又不過自引而去爾天下之事竟孰任之於虛是可歎也已懷素三衢人少從道行禪師游能得其學伯謨名士蘇蒲陽人六月甲申中奉大夫提舉建寧府武夷山冲佑觀陸某記

紹興府脩學記

八卦有畫三墳有書經之原也典教有官養老有序學之始也歷世雖遠未之或異不幸自周季以來世衰道微俗流而不返士散而無統亂於楊墨賊於申

韓大壞於釋老爛漫橫流不可收拾始有重編余簡樓以巨輪象龍寓人飾黃金珂璧怪珍之物誘駭愚稚而六經寢微穹閣傑屋上摩霄漢黜聖髡丹窮極工技其費以億萬計而學校弗治自周衰至五代幾二千歲而後我宋誕受天命崇經立學以為治本十二聖一心罔或怠忽然竊嘗考之方周盛時天子所都既建四代之學而又黨有庠遂有序畿內六鄉鄉有黨百五十六遂遂有鄙如黨之數遂序黨庠蓋互見之則是千里之內為序十有二為庠三百何其盛也今畿內之郡皆僅有一學較於周不及百之二而又不治則為之牧守者得無任是責邪會稽拱行在所為東諸侯之冠宜有以宣聖化倡鄰國而學未稱給事中括蒼王公信來為是邦政成令行民物和樂臺榭弗崇陂池弗廣而惟學校是先燕遊弗親廚傳弗飾而惟養士是急下車未久與殿崇閣邃宇脩廊講說之堂絃誦之舍以葺以增不日訖事以其饗發未足也則為之售常平之田以其見聞未廣也則為之求四方之書食有餘積書罕未見然公猶以為嫌曰上丁之禮服器未復古也又為之新冕弁衣裳尊彝豆籩簠簋之屬自始奠至受胙各以其所宜用無一不如禮式公西齋心脩容來宿於次質明陟降揖遜進退踈起俯首屏氣如懼弗克禮成士僉曰公以躬行先我我處於鄉弗篤於孝悌忠信出而仕弗勉於廉清正直不獨不可見公仰天俯地其何心見父兄長老其何辭教授陳君自強與諸生以其言來告曰願有紀某老病不獲季俎豆以從公後喜士之能承公也於是乎書紹熙二年九月癸酉中奉大夫提舉建寧府武夷山冲佑觀陸某記

重修天封寺記

淳熙丙午春予以新定牧入奏行在所館於西湖上日與物外人遊多為予言淨慈有慧明師者歷抵諸

方如汗血駒所至蹴躡萬馬皆空方是時知其得法而不知其能文後四年予屏居鏡湖上明來訪予談道之餘縱言及文辭卓然僑偉非凡子所及方是時知其能文而不知其有才明既從予遊彙日乃曳杖負笠入天台山為天封主人是山也巖嶂蕪絕為天台四萬八千丈之冠林麓幽邃擅智者十二道場之勝然地偏道遠遊者既寡施者益落明居之彌年四方問道之士以天封為歸植福樂施者踵門遲至雖卻不可於是自佛殿經藏阿羅漢殿鍾經二樓雲堂庫院莫不畢葺敞為大門繚為高垣周為四廡屹為二閣來者以為天宮化成非人力所能也又哀其餘庸道人日夜走衢路丐聚畜蓋未必能辦此明方為其徒發明大事因緣錢帛穀粟之問不至丈室而其所立乃超卓絕人如此豈非一世奇士哉予嘗慮今世局於觀人妄謂長於此者必短於彼工於細者必略於大自天封觀之其說豈不淺陋可笑也哉會明以書來求予文記其寺之廢興因告以予說使併刻之庶幾覽者有所徵焉紹熙三年三月二日中奉大夫提舉建寧府武夷山冲佑觀山陰縣開國男食邑三百戶陸某記

嚴州重修南山報恩光孝寺記

浙江自富春浙而上過七里瀨桐君山山益秀水益清烏龍山崛起千仞鱗甲八鬣蜿蜒盤踞嚴州在其下有山直州之南與烏龍為賓主烏龍以雄偉南山以秀邃形勢壯而風氣固是為太宗皇帝高宗皇帝受命賜履之邦登高四望則樓觀雉堞鸞騰縈帶在鬱葱佳氣中兩山對峙紫翠重複信天下名城也南山報恩光孝禪寺實為諸刹之冠質於地志及父老之傳唐末有僧結廬於山之麓名廣靈養慶曆中始斥大之為廣靈寺紹聖中易禪林佛印大師希祖實為第一代始徙寺於山巔今寺是也崇寧中賜名天

寧萬壽紹興中易今名初郡長者江氏爲塿七級與寺俱燬於宣和之盜厥後文則來居而寺復法琦來助而塿建及得智廓仲圮而學者雲集廓不期年示滅凡今之營繕崇成者皆圮也如來大士有殿演法會齋有堂安衆有寮棲鍾有樓寢有室遊有亭浴有泉又以餘力爲門爲廡爲庫爲垣爲磴路爲禦侮力士之像未五六年百役踵興無一弗備郡人童天祐天錫方珍出貲爲最鉅老僧智貴傾其衣囊助施爲尤難若夫以宿世願力來爲外護取郡之積木以終成之者太守殿中侍御史冷公世光也寺之役旣成冷公適有歸志遂奉祠以去豈非緣法哉予亦嘗來爲守廓及圮皆予所勸請則於是山不爲無夙昔緣故圮來求予爲記予行天下多矣覽觀山川形勝考千載之遺迹未嘗不慨然也晚至是邦觀烏龍似赤甲白鹽南山似錦屏一水貫其間紆餘澄澈似渭水而南山崇墉廣殿層軒脩廊山光川靄鍾鳴鯨吼遊者動心過者駭目又甚似漢嘉之凌雲蓋兼天下之異境而有之騷人墨客將有徒倚太息援筆而賦之者予未死尚庶幾見之紹熙四年二月庚申記

會稽縣重建社壇記

古者侯國地之別三爵之等五皆有宗廟社稷秦黜封建置郡守縣令於是古之命祀惟社稷尚存陵夷千餘載士不知學古吏不知習禮其祀社稷徒以法令從事畿封壇墮服器牲幣一切苟且取便於事無所考法宋興文物廢盛自朝廷達於下州叢邑社稷之祀略皆復古不幸中更犬戎之亂兵氛南被吳楚中興七十年郡縣之吏往往惟餉軍弭盜簿書訟獄爲急及吏以期告漫應曰如令至期又或移疾弗至雖朝廷所班令式或未嘗一視況三代之舊典禮乎會稽之爲邑實奉陵寢且在安撫使提點刑獄提舉常平治所有將迎造請之役有符檄期會之煩敕使內家及宗室近屬一歲屢至亭傳道路舟車徒役一

有不治責在會稽者十居七八故令於祀事尤不違暇縣社在禮神坊曰社曰稷曰風師曰雨師曰雷神凡五壇皆弗不治祀則芟舍以爲次凡祀之費一出於吏雨則寓於吳越王祠之門承議郎四明王君時會之來爲令始至周視壇所喟然歎曰幸爲政於此得有人民社稷事孰大於是者迺卽其地爲垣八十大築屋四楹有門以時其啓閉有庫以儲其器物用宋之襍豐之粉榆故事藝松五十又稽合制度稟積莞席幣篚樽俎豆籩簠簋勺罍莫不如式棗盛酒醴牲牢莫不共給獻有次祝有位齊有禁省饌食爵奠幣飲福望燎望瘞有儀祝事各以其日王君祇敬齊栗與其僚從事禮成而退無違者會稽歲比不登及是雨暘時若歲以大豐民歌於途農扞於塹皆曰吾令致力於神神實響會吾其可忘於是父老子弟相與告子請記其事予曰爲政之道無他知先後緩急之序而已王君設施知所先急如此雖欲不治得乎雖然皆朝廷以班郡縣者王君特能舉之爾後來者顧獨不能邪故予詳記始末所以告無窮也慶元二年五月二十日中大夫提舉建寧府武夷山冲佑觀山陰縣開國男食邑三百戶陸某記

廣德軍放生池記

古者臣之愛其君何其至也其禱祈之辭曰受天百祿曰子孫千億曰如南山之壽一話言一飲食未嘗忘君然不聞有以羽毛鱗介之族祈其君之福者蓋先王盛時山澤有虞川林有衡漁獵有時數罟有禁洋洋乎浩浩乎物各遂其生養之宜所謂施陂竭澤者蓋無有也所謂相响以溼相濡以沫者蓋未見也至於後世德化弗行厲禁弗施廣殺厚味彘珍天物放而不知止舍耒耜而事網罟者曰以益衆於是有益於世宋興十三聖相繼以深仁盛德極高蟠厚鳥獸魚鼈咸若矣而四方郡國猶相與築陂儲水修放生

故事所以廣聖澤之餘有不敢忽者惟廣德軍舊以郡圍後池為之地隘水泉淺涸不與事稱承議郎會侯桌以慶元二年來領郡事顧而太息會以事至子城西稍南得巨溪者延袤百步泓渟澄澈蒲柳列植藻荇縈帶水光天影盪摩上下為一郡絕景侯因其故而加治焉築屋於其會名曰溪堂民不勞財不費煥然告成重明節率僚吏放鱗介千計望行在拜手稽首禮成而退父老童穉縱觀興數以為廣德為郡以來逾二百年所未之有侯移書笠澤陸某碑為記某復之曰侯奉天子詔來為守於此一賦役非其時一訟獄非其清窮僻下里匹夫匹婦有一愁歎侯之責也能不負此責然後足以對揚天子休命而致歸美報上之意放生之舉蓋賢守善其職之一事爾豈特是而止哉期年政成將屢書之中大夫提舉建寧府武夷山冲佑觀山陰縣開國男食邑三百戶陸某記

鎮江府駐劄御前諸軍副都統廳壁記

鎮江府駐劄御前諸軍副都統武功大夫和州防禦使淄川夏侯君書來諗予於山陰澤中曰吾軍有都統為一軍大將內以屏衛行在外以控扼梁楚隱然一長城也又置副都統一員以佐其長智勇相資寬猛相濟有事則或居或行更出迭歸無事則同籌共畫於帳中而制敵於千里之外其任可謂重矣而副都統自設官以來今三十有八年歷官十人再至者一人未有壁記後將無所攷質子為我書而刻其姓名可乎予與夏侯君南北異鄉東西異班出處壯老異致然每見其撫劍抵掌談中原形勢兵法奇正未嘗不太息恨不與之周旋於軍旅間也君亦謂予非齷齪老書生以兄事予甚敬則今日之請尚何辭然今天子神聖文武承十二聖之傳方且拓定河洛規恢燕趙以卒高皇帝之武功則宿師江淮蓋非久計夏侯君亦且與諸將移屯玉關之西天山之北矣予

雖老尚庶幾見之慶元四年正月甲子陸某記
法雲寺觀音殿記

浙東之郡會稽為大出會稽城西門循漕渠行八里有佛刹曰法雲禪寺寺居錢塘會稽之衝凡東之士大夫仕於朝與調官者試於禮部者莫不由寺而西錢往迎來常相屬也富商大賈揆施挂席夾以大牘明珠大貝翠羽瑟瑟之寶重載而往者無虛日也又其地在鏡湖下灌漑瀆泄最先一邦富比封君者家相望也故多施者寺易以興然建炎庚戌胡虜之既亦以近官道首廢於火一瓦不遺主僧曰道亨為一方所信度弟子三十二人慨然自任以興復之事未成者十七而沒其後有自修者始為三門法堂經藏等予適得華嚴般若涅槃寶積數百卷以施之草創未畢而修謝去自是寺以不得人又廢木剪竹伐鐘鼓不鳴白衣棲居之屠牛牧豕莫敢孰何初先楚公為尚書左丞請於朝以證慈及法雲為功德院歲度僧一人三年間證慈得其二法雲得其一故太傅與楚公祠堂肖像具存予自蜀歸始言於府請逐白衣而命契葬者主之葬與亨俱東陽人人固已喜而葬又有器局才智居之且二十年創佛殿及像設費甚厚談笑而成重建三門翼以兩廡巍然大刹矣葬沒予以告府牧尚書葉公以其弟子道澤繼之澤少年志節清苦言議英發人皆畏其嚴而服其公於是予以大屋四楹施以為觀音大士殿雖然尚未易成也澤即日走四方謀之三年遂建殿殿之雄麗冠於一刹予又施以禪月所畫十六大阿羅漢像龜於兩壁觀者起敬施者踵至自火於庚戌及今庚申實七十載殆若有數然卒成之者繫葬與澤父子積勤不懈之力也予嘗謂事物廢興數固不可逃而人謀常參焉予遊四方凡通都大邑以至遐陬夷裔十家之聚必有佛刹往往歷數百千歲雖或盛或衰要皆不廢而當時朝市城郭邑里官寺寺多已化為飛埃鞠為茂

草過者吊古興懷於狐嘯鬼嘯之區而佛刹自若也豈獨因果報應之說足以動人而出其財力亦其徒堅忍強毅不以豐凶難易變其心子又有孫孫又有子必於成而後已彼之不廢固宜予因彝與澤之事而有感焉併載其說士大夫過而稅駕者讀之其亦有感也夫慶元五年秋七月庚午記

會稽縣新建華嚴院記

會稽五雲鄉有山曰黃琢山之麓原野曠水泉冽岡巒抱負崑嶂森立而地蕪不治者不知幾何年或謂古嘗立精舍以待天衣雲門遊僧之至者有石刻具其事其後寺廢石亡獨龜趺猶在父老類能言之慶元三年有信士馬君正卿聞而太息乃與其弟崧卿以事親收族之餘貲買地築屋擇僧守之凡僧若士民之道出於此者皆得就憩猶以爲未廣也則爲堂殿門廡倉庖廡凡僧居之宜有者悉備而殖產使足以贍足其徒猶懼其不能久也告於府牧丞相葛公以華嚴院額徙置焉可謂盡矣而其意猶未已也曰年運而往或者歎有司而寓其孥則院廢矣家世隆替不可常萬分一有子孫以貧故規院之產侵院之事則僧散矣於是因其同學於佛者朝奉郎致仕曾君迅叔遲來請予文刻之石庶來者知此院經理之艱勤則不忍寓其孥子孫知乃祖乃父志願之堅確則不忍規其產侵其事設若有之而至於有司則賢守善令必有以處此雖至於數百千歲此院猶不廢也予報之曰僧居之廢興儒者或謂非吾所當與是不然韓退之著書至欲火其書廬其居杜牧之記南亭盛贊會昌之毀寺可謂勇矣然二公者卒亦不能守其說彼浮圖突兀三百尺退之固喜其成而老僧挈衲無歸寺竹殘伐牧之亦賦而悲之彼二公非欲納交於釋氏也顧樂成而惡廢亦人之常心耳則君之志叔遲之請與予之記之也皆可以無愧矣慶元五年八月甲子中大夫致仕山陰縣開國男食邑

三百戶陸某撰并書丹

渭南文集卷第十九

渭南文集目錄

卷第二十

居室記

邵武縣興造記

諸暨縣主簿廳記

婺州稽古閣記

智者寺興造記

常州犇牛闌記

盱眙軍翠屏堂記

上天竺復菴記

東籬記

嚴州釣臺買田記

渭南文集卷第二十

居室記

陸子治室於所居室之北其南北二十有八尺東西十有七尺東西西北皆爲窗窗皆設簾障視晦明寒燠爲舒卷啓閉之節南爲大門西南爲小門冬則析堂與室爲二而通其小門以爲與室夏則合爲一而闢大門以受涼風歲莫必易腐瓦補罅隙以避霜露之氣朝哺食飲豐約惟其力少飽則止不必盡器休息取調節氣血不必成寐讀書取暢適性靈不必終卷衣加損視氣候或一日屢變行不過數十步意倦則止雖有所期處亦不復問客至或見或不能見間與人論說古事或共盃酒倦則亟捨而起四方書疏略不復遣有來者或亟報或守累日不能報皆適逢其會無貴賤疎戚之間足跡不至城市者率累年少不治生事舊食奉祠之祿以自給秩滿因不復敢請縮衣節食而已又二年遂請老法當得分司祿亦置不復言舍後及旁皆有隙地蒔花百餘本當敷榮時或至其下尚羊坐起亦或零落已盡終不一往有疾亦不汲汲近藥石久多自平家世無年自曾大父以降三世皆不越一甲子今獨幸及七十有六耳目手足未廢可謂過其分矣然自計平昔於方外養生之說初無所聞意者日用亦或默與養生者合故悉自書之將質於山林有道之士云慶元六年八月一日山陰陸某務觀記

邵武縣興造記

大平興國五年詔卽建州邵武縣置邵武軍而縣爲屬其治在軍之東建炎三年盜起閩縣邵武亦被兵焚官寺民廬略盡紹興十年作譙門十六年作守丞治所於是學宮軍壘囹圄倉廩以次皆復其舊獨縣故地廢爲教場而縣寓尉廨至二十一年知縣事葉邃始復縣治未及成安撫使用兵官王存之請卽日

撤除廢地皆盡而縣徙寓武陽驛乾道六年知縣事尤昂始作縣門它猶未暇及慶元四年宣義郎史君定之來爲縣始至而歎曰縣古子男國也因時之治忽政之善否以爲盛衰自建炎己酉訖今歲在戊午凡七十年自高宗皇帝至今天子歷四聖寬賦薄征休養元元歲且屢豐公饒私餘生齒繁滋考之九域圖郡戶八萬七千九百有奇今增五萬四千二百有奇爲戶十四萬二千一百有奇可謂盛矣而邵武一邑獨當戶五萬六千四百有奇爲郡境十之四則吾邑顧不又盛哉而反寓其治於傳舍詔勅法令圖志符檄護藏不嚴棲列無所決訟問囚延見丞佐與賓客之來者其地皆褊迫庫陋仰漏旁穿非所以宣布德澤示民以上下之分也念非所先姑置弗議比爲政期年家無弗伸之寃庭無弗直之訟善無濫刑惡無佚罰太守趙侯不諳知君爲深君所設施郡未嘗以勢撓焉以故君之政成民之俗變有所爲輒共成之於是始有意於新縣治矣會得吏蠹與用度之餘爲錢百餘萬自五年七月甲午鳩工至十月己巳落成出令有所燕息有次勞賓有館胥吏徒役咸有寧宇貨布器物各司其局事立令行老稚舞歌視承平舊觀有加焉而木章竹箇瓦甍鞞丹悉視時低昂交手界予梓匠朽鏹百工之來者得直皆如私家訖事民不及知吏不得訟以爲奸非君之才有餘顧能若是哉堂之名有九曰晝簾曰無私曰近民曰仁平曰居敬樓曰瞻雲軒曰讀書曰如水亭曰海棠其扁榜多君自書有筆法其命名之意卽其地可知故不詳著君蓋故丞相太師魏公之孫子魏公客也故君與趙侯皆以記縣之興造爲請予受知魏公時甫壯歲爾俯仰四十餘年同時賓客凋喪略盡而予偶獨後死見君以才稱於世且猶能秉筆有所紀述亦可謂幸矣故不復辭慶元六年九月癸酉中大夫直華文閣致仕陸某記并書

諸暨縣主簿廳記

建炎紹興間予爲童子遭中原喪亂渡河涇汴涉淮絕江間關兵間以歸方是時天子縵衣露蓋櫛風沐雨巡狩四方曾不期月休也大臣崎嶇於山海阻險之地草行露宿不敢告勞亦宜矣況於州牧郡守以降簾篔一廈以治其事者相望又況降而爲縣令丞簿者哉及王室中興內外羈定然郡縣吏寓其治於郵亭民廬僧道士舍者尚比比皆是積累六七十年四聖相授天下日益無事兵寢歲登用度饒餘然後皆得稍復承平之舊至於縣則有迨今苟且因循者主簿在縣官中卑於令丞而冷於尉非甚有才則其舉事爲尤難若諸暨主簿丁君崑者可謂才矣君海陵人也今居吳世有顯人爲吏精察而平恕學工文辭而不忽簿書期會之事嘗兼攝丞久之得添給不取一錢皆用以新主簿之弊諸暨舊無丞元豐間置丞徙主簿以居之而主簿更得解乃故鹽廡藉涇支傾殆不可居然閱百二十年爲主簿者凡幾人至君乃更新之不亟不徐不侈不陋不費於公不斂於民竹箇木章瓦甃丹堊不蠹不苦窳不漫漶堂後舊有池自君來比二歲產異蓮駢附邑人謹傳以爲君且通貴之祥相與名其池上之亭曰雙蓮君故不喜怪而邑人之意如此亦足知其得民也君與予之子子虞遊乃因子虞請記歲月予不得辭也昔我藝祖肇造區夏當乾德六年二月癸亥嘗詔郡縣吏代歸者皆上其官舍敝壞或興葺之數於有司以爲殿最於淳祖宗明詔具在汗簡而近世乃有相戒以爲非急務且徒速謗者獨安取此哉予嘗備太史牛馬走獲窺金匱石室之藏故敢併記之以曉他在仕者嘉泰元年十月二十七日中大夫直華文閣山陰縣開國男食邑三百戶致仕陸某記

婺州稽古閣記

大觀二年九月乙丑天子既大興學校舉經行之士

於是詔天下州學經史閣皆賜名稽古婺州稽古閣者本以閣之下爲講堂而閣用大觀詔書易名紹興中學廢於火及再建講堂雖復其故不暇爲閣至嘉泰元年太守丁公逢乃卽講堂後得舊直舍地以爲閣而請於今參知政事許公大書其額公書宏偉有漢法於是閣一日而傳天下丁公旣代去曾公桌來爲郡閣之役尚未旣也於是窗戶闌楯瓦甃髹丹粲然皆備又爲兩廡達於講堂高廣壯麗無遺力南山在其上雙谿縹緲其下煙雲百變朝莫獻狀閣之後有仰高堂舊祠資政宗公澤尚書梅公執禮中書舍人潘公良貴三公皆郡人有忠義大節而祠庠陋且弗葺曾公微而大之始奕奕與閣稱曾公以邦人之請及州學教授潘君夢得所敘移書史官山陰陸某願記其始末時方修孝宗光宗兩朝實錄業大事叢而奏篇有程久乃能如曾公之請夫堯舜禹臯陶書紀其事雖不同然未嘗不同者稽古也稽古必以書前乎堯舜之書其易之始畫與典墳乎易之畫幸在至今而三墳五典自楚倚相以後不聞有能盡讀者世所共歎也雖然今讀易不能知伏羲之心讀典謨不能知堯舜禹臯陶之心雖典墳盡在亦何益於稽古故予以爲士能玩易之畫與身親見處義等反覆盡心於典謨與身親見堯舜禹臯陶等能親見聖人而不能佐其君與聖人之治理豈有是哉士之放逸惰偷不力於學者固所不論學而不親見聖人猶未學也親見不疑而不用於天下則有命焉進則不負所學退則安吾命而無愠斯可仰稱大觀詔書與賢守復閣之意矣士尚勉之嘉泰二年閏月二十五日中大夫直華文閣提舉佑神觀兼寶錄院同修撰兼同修國史陸某謹記

智者寺興造記

婺州金華山智者廣福禪寺浮圖氏所謂梁樓約法師道場國朝開寶九年始爲禪寺自淨悟禪師全肯

傳三十七代二百餘年至慶元之五年而仲玘實來方是時事廢不舉地蕪不糞棟桷柱腐垣斷甃缺若不可復爲者玘植杖而四顧曰智者之爲寺天造地設者至矣而人事不能充焉故廢壞至於此天其使我興此地歟乃諷諸爲地理學者則其言與玘略合蓋寺在金華山之麓峯嶂屹立林岫間出日月映蔽風雲吞吐而前之形勢無以留之如王公大人南嚮坐帷幄中宜其前有列鼎大牲之養盛禮備樂之奉賓客進趨擯相瞻翼將吏武士執棨執何然後爲稱今乃巍然獨坐而侍衛者皆奔趨而去則其威重無乃少損乎於是始議鑿大池儲水於門梁其上通大路而增門之址高於故三之二異時所謂奔趨而去者皆肅然就列恪然執事則王公大人之尊於是始全則其施置建立號令賞罰亦何可少訾邪方議之初或謂門有大木數十必盡去乃可興池役而木所從來久以是未決忽一夕大風木盡拔若有鬼神相其役者其亦異矣玘之來百役皆作修廊傑閣虛堂廣殿至於棲衆養老之室庖福帑庾之所竊爲垣牆引爲道路莫不美於觀而便於事後雖有能者無以加焉玘有道行爲其徒所宗而才智器局又卓然不凡如此故薦紳多喜道之予又與有夙昔且嘗記其嚴州南山興造之盛故玘今又從予求作智者興造記而予友人寧遠軍節度使提舉佑神觀姜公邦傑復以手書助之請未及屬稿而邦傑歿予尤感焉雖毫不敢詞也今茲之役池爲大故書之特詳嘉泰三年十月二十九日記

常州犇牛關記

岷山導江行數千里至廣陵丹陽之間是爲南北之衝皆疏河以通鐔鮑北爲瓜州關入淮汴以至河洛南爲京口關歷吳中以達浙江而京口之東有呂城關猶在丹陽境中又東有犇牛關則隸常州武進縣以地勢言之自柵爲鐔河時是三關已具矣蓋無之

則水不能節水不節則朝溢莫涸安在其爲鐔也蘇翰林嘗過犇牛六月無水有仰視古堰之數則水之苦涸固久地志概述本末而不能詳也今知軍州事趙侯善防字若川以諸王孫來爲郡未滿歲政事爲畿內最考古以驗今約己以使人裕民以束吏不以難止不以毀疑不以費懼於是郡之人僉以關爲請侯慨然其言會知武進縣丘君壽雋來白事所陳利病益明侯既以告於轉運使且亟以其役專界之丘君於是凡關前後左右受水之地悉伐石於小河元山爲無窮計舊用木者皆易去之凡用工二萬二千石二千六百錢以緡計者八千米以斛計者五百皆有奇又爲屋以覆關皆宏傑牢堅自鳩材至訖役閱三時其成之日蓋嘉泰二年八月乙巳也明年正月丁卯侯移書來請記予謂方朝廷在故都時實仰東南財賦而吳中又爲東南根柢語曰蘇常熟天下足故此關尤爲國用所仰遲速豐耗天下休戚在焉自天子駐蹕臨安牧貢戎費四方之賦輸與郵置往來軍旅征戍商賈貿遷者途出於此居天下十七其所繫豈不愈重哉雖然猶未盡見也今天子憂勤恭儉以撫四海德教洋溢如祖宗時齊魯燕晉秦雍之地且盡歸版圖則龍舟仗衛復泝淮汴以還故都百司庶府熊羆貔虎之師翼衛以從戈旗蔽天軸體相銜然後知此關之功與趙侯爲國長慮遠圖之意不特爲一時便利而已侯吾甥也請至四五不倦故不以衰耄辭三月丙子太中大夫充寶謨閣待制致仕山陰縣開國子食邑五百戶賜紫金魚袋陸某記

盱眙軍翠屏堂記

國家故都汴時東出通津門舟行歷宋毫宿泗兩隄列植榆柳槐楸所在爲城邑行千有一百里汴流始合淮以入於海南舟必自盱眙絕淮乃能入汴北舟亦自是入楚之洪澤以達大江則盱眙實梁宋吳楚之衝爲天下重地尚矣粵自高皇帝受命中興駐蹕

臨安歲受朝聘始詔盱眙進郡除館治道以為迎勞宿餞之地而王人持尺一牘懷柔殊鄰者亦皆取道於此於是地望益重城郭益繕治選任牧守重於曩歲及吳興施侯之來為知軍事也政成俗阜相地南山得異境焉前望龜山下臨長淮高明平曠一目千里草木蔽虧鳧雁翔泳蓋可坐而數也乃築傑屋衡為四楹縱為七架前為陳樂之所後有更衣之地而傍又有麗牲擊鮮與夫吏士更休之區翼室修廊以陪以擁斷削髹丹皆極工緻最二十有六間而堂成既取米禮部芾之詩名之曰翠屏且疏其面勢於簡繪其棟宇於素走騎抵山陰澤中請記於予侯與予故相好也予聞方國家承平時其邊郡遊觀有雅歌之堂萬柳之亭以地勝名天下雖區脫間猶能詠數以為盛事然嘗至其地者皆謂不可與淮水南山為比翠屏之盛又非雅歌萬柳可及則亦宜有雄文傑作以表出之而予之文不足稱也雖強承命終以負媿侯名宿字武子於是為朝散郎直祕閣開禧元年春正月癸酉記

上天竺復菴記

嘉泰二年上天竺廣慧法師築退居於寺門橋南名之曰復菴後負白雲峯前直獅子乳竇二峯帶以清溪環以美箭嘉木凡屋七十餘間寢有室講有堂中則為殿以奉西方像設殿前闢大池兩序列館以處四方學者炊爨滷浴皆有其所床敷巾鉢雲布鱗次又以為傳授講習梵唄之勤宜有遊息之地以休其暇日則又作園亭流泉以與學者共之既成命其弟子了懷走山陰鏡湖上從予求文以記歲月予告之曰進而忘退行而忘居知趨前而昧於顧後者士大夫之通患也故朝廷於士之告歸每優禮之而又命有司察其尤不知止者以勵名節而厚風俗士猶有不能決然退者又況物外道人初不踐是非毀譽之途名山大眾以說法為職業愈老而愈尊愈久而人

愈歸之雖一坐數十夏何不可者如法師道邁三朝名蓋萬衲自紹熙至嘉泰十餘年間詔書褒錄如日麗天學者歸仰如泉赴壑非有識其後者而法師慨然為退居之舉傾竭囊裝無所顧惜雖然以予觀之師非獨視天竺之衆不啻弊屣加以歲年功成行著遂為西方之歸則復菴又一弊屣也死生去來無常予老甚矣安知不先在寶池中俟師之歸語今日作記事相與一笑乎開禧元年三月三日記

東籬記

放翁告歸之三年闢舍東蕪地南北七十五尺東西或十有八尺而贏或十有三尺而縮插竹為籬如其地之數種五石盃瀦泉為池植千葉白芙蓉又雜植木之品若干草之品若干名之曰東籬放翁日婆娑其間撥其香以嗅擷其穎以玩朝而灌莫而鋤凡一甲坼一敷榮童子皆來報惟謹放翁於是考本草以見其性質探離騷以得其族類本之詩爾雅及毛氏郭氏之傳以觀其比興窮其訓詁又下而博取漢魏晉唐以來一篇一詠無遺者反覆研究古今體制之變革間亦吟諷為長謠短章楚調唐律訓會風月煙雨之態度蓋非獨娛身目遣暇日而已昔老子著書未章自小國寡民至甘其食美其服安其居樂其俗鄰國相望雞犬之聲相聞民至老死不相往來其意深矣使老子而得一邑一聚蓋真足以致此於虜吾之東籬又小國寡民之細者歟開禧元年四月乙卯記

嚴州釣臺買田記

嘉泰四年詔以嚴州久不治命朝散郎直祕閣浙西路安撫司參議孫公叔約為知州事公至數月州以大治聞獄無滯繫庭無滯訟僕府閑暇符檄簡少榜笞之聲不聞於屏外向之逋賦佚罰皆以時舉倉有餘粟府有餘帛公天資近道不樂燕遊歌舞優戲之奉又不喜以土木無益之事勞其民治事少休則宴

坐別室自夜至旦鹽醜而出終歲如一日獨念初赴郡過七里瀨漢嚴先生釣臺下讀唐興元中崔儒釣臺記以爲上有平田百畝足以力耕下臨清流足以垂釣今投釣之地具在而田則亡有乃以屬縣令訪之則田亦具在旁有流泉雖大旱不竭可給灌溉而或者輒有之公乃遺語以當歸田直而取田以爲先生歲時祭享之奉其人難之公歎曰光武欲與先生共天下而先生不屑也千有餘歲後吾乃欲必取百畝之田以奉祀事乎且吾教化未孚而遽望人以輟耕遜畔難矣因置不問會有沒官田又從傍買民田足百畝除其泛科斂以畀浮屠之奉祠者又卽祠之右創爲佛院棲鐘於樓匱經於室僧廬客館略皆有所度歲入可以食其徒七人而樵汲之役又在其外則先生之祠可以永世不廢乃龔美石請記於予予曰嚴名城也自大駕巡幸臨安以朝士出守者與夫入對行殿被臨遣而來者大抵多取道於富春入謁祠下有高山仰止之歎而恨祠屋弊壞椒桂不以時薦往往咨嗟躊躇久而後去及其下車則日困於簿書米鹽將迎燕勞之事忽焉忘前日之言寒暑再更復上車去則又過祠下負初心戴媿面而去者袂相屬也聞孫公之舉得無少自咎哉予二十年前蓋嘗來爲此邦亦自咎者之一也故喜道孫公之舉且以勵來者云開禧元年十二月辛未太中大夫寶謨閣待制致仕山陰縣開國子食邑五百戶賜紫金魚袋

陸某記

渭南文集卷第二十

渭南文集目錄
卷第二十一

仁和縣重修先聖廟記

湖州常照院記 法慈藏殿記

東陽陳君義莊記 廬帥田侯生祠記

吳氏書樓記 靈祕院營造記

橋南書院記 心遠堂記

萬卷樓記

渭南文集卷第二十一

仁和縣重修先聖廟記

聖人之道位天地育萬物可謂大矣然常寓之於宮室祭祀器服度數之間非如後世佛老子廢禮棄樂掃除名分務為玄默寂滅浩然不可致詰也夫子生於周故其尊以為師者文王周公也使夫子生於今有不奉孔子顏子孟子以為先聖先師者乎則今之即學校以春秋舍奠於先聖先師者非獨甲令也方先朝學校盛時縣有學與郡等後以海內多事縣學往往廢壞而所以奉先聖先師者亦苟而已知臨安不敢安捐己之公租錢二十萬以經始會得廢寺當沒官錢以佐其費又取吏舍以益其址自開禧元年十二月至二年正月廟乃告成最其費為錢五十萬吾夫子被袞服冕巍然當坐既悉如舊制配享從祀亦皆就列出入有門陟降有階設燎有庭三獻及受昨瘞幣皆有位儲峙祭器則又有庫是歲二月上丁將有事於廟吏言異時惟丞以下執事令以劇劇率不行謝君曰豈有是哉於是告於府肅恭齋明以時訖事且來告請記其始末天子中興大業講太平典禮方自學校始學校之設方自兩赤縣始則茲廟又學校之權輿也其可闕書三年正月戊寅太中大夫寶謨閣待制致仕渭南縣開國伯食邑八百戶賜紫金魚袋陸某記

湖州常照院記

昔在高宗受命中興全功至德聖神文武昭仁憲孝皇帝龍興河朔克濟大業祀宋配天三十有六年涵養生齒其數無量遺弓故劍羣臣皆當追慕號泣思所以報在天之靈至千萬世無怠無斁而況山林外臣以道藝供奉仗內嘗被異禮厚賜者乎鎮江府延慶寺僧梵隆以異材瞻學高操絕藝自結上知不由

先容得對內殿先是隆師固已結廬於湖州菁山號無住精舍一時名士如葉左丞夢得葛待制勝仲汪內翰藻陳參政與義皆為賦詩勒銘傳於天下矣至是詔賜養居於萬松嶺金地山江濤湖光暎帶几席壽藤老木岑蔚天矯隆師方力辭願歸故巢既至悅其地且侈上賜幡然願留久之示化上為悵然不憚賜金歸葬故山及孝宗皇帝嗣位又命創常照院於無住故址以隆師弟子上首至叶嗣其事賜田以贍其徒又命充丁亥丁未本命道場以祈兩殿之福高宗皇帝御德壽宮賜御書寂而常照照而常寂八字以示名院本指且賜天申金剛無量壽閣扁榜及紫檀刻佛號如來閣榜悉御書也又一再賜萬機暇日所臨晉王羲之帖二十二紙唐陸東之蘭亭詩一卷及米芾史略帖一卷題團扇二柄又賜白金助建立於是院悉崇成有釋迦文殊普賢十六阿羅漢殿左則觀音大士道場右則法輪藏室食息有堂鐘經有樓熏浴炊爨儲積各有其所鍵椎鼓鐘器亦備足至於遊息臨眺種藝蔬擊莫不極思致區處之妙而西巖尤為勝絕曠快之地叶師以老疾請罷院事屏居西巖今皇帝詔從之且命改院為禪院專以仰薦高宗神遊世擇其徒有道行者嗣任持事而本澄首被是選實嘉泰四年甲子歲之四月也叶師乃來告曰願有述焉某實紹興朝士歷事四朝三備史官名列策府諸儒之右則與隆師及其子孫雖道俗迹異而被遇則同今叶澄父子晨香夜燈梵唄禪定雖世外枯槁亦有以伸其圖報萬一之意某則不然飽食而安居日復一日飾巾待終而已視叶澄豈不有媿哉故遂秉筆而不敢辭上以紀三朝眷遇山林學道者之盛德下以識某媿云開禧三年二月壬子謹記

法慈職殿記

東出慶元府五十里曰小溪有僧舍曰法慈院院創於唐咸通中舊號鳳山院歷五季至宋興院常不廢

拾平二年始賜今名雖世以院僧主之然其徒多出遊四方學經論問祖師第一義或終其身不歸淳熙十四年老宿及後來者始議作觀殿而如戒等十輩願盡力營之久而不成十人或死或緣不偶獨如戒智玻行慈誓不怠廢必遂其始願行乞勞苦積細微以成高大於是施者墻立助者麇至聞者興歎見者起敬木章竹箇山積雲委伐石於山陶甃於甕丹漆黝聖致於四方以紹熙壬子三月癸酉始土工明年八月庚申始匠事十一月土木皆告成南北八丈六尺東西五丈八尺而棟之高四丈一尺耽耽奕奕窮極藝巧雖慶元多名山巨剎然觀堂之盛未有加法慈者奉釋迦於中而左則彌勒右則無量壽又以天地鬼神之像陪擁四旁於序亦盛矣院僧因餘姚普明院僧則華求予爲記則華嘗遊蜀予識之於成都今三十餘年以故舊不忍拒也乃爲之書而刻施者姓名於碑陰云

東陽陳君義莊記

東陽進士陳君德高因吾友人呂君友德來告曰德高不幸早失先人舉進士又輒斥念昔先人進德高輩於學蓋將使之事君使之字民以廣我先人之志今雖自力而不合於有司之繩尺如其遂負所期望付託生何面以奉祭享死何辭以見吾親於地下不獲施於仕進爲時雨爲豐年矣獨不可退而施於宗族乎於是欲爲義莊略用范文正公之矩度而稍增損之以適時變敢求文於執事者且載其凡於碑陰予復之曰美哉吾子之志也人之情於其宗族遠則疏之彌遠則益疏而至於忘之蓋以身爲親疏而不以先人爲親疏也視兄之子已或不若己之子己之子與兄之子自吾父視之有異乎能以父之心爲心則己之子與兄之子且不知其同異矣推而上之大父之孫爲從父兄弟會大父之曾孫爲從祖兄弟又推而上之至於無服雖天下長者不能無親疎之殺

矣於庠制服不得不若是也若推上世之心愛其子孫欲使之衣食給足婚嫁以時欲使之爲士而不欲使之流爲工商降爲皂隸去爲浮圖老子之徒則一也死而有知豈以遠而忘之哉義莊之設蓋基於是然舉天下言之能爲是者有幾非以爲不美而不爲也力不足也若陳君者自其先人勤勞節約以致饒餘而陳君不敢私有之其地在陞頭昭福寺之傍初期以千畝今及十之七而吾地在陞頭者止此比鄰感其義皆欲期年間貿易以成之又植桑畜牛築陂以豐衣食之源其詳見碑陰又有最當慮者吾子之心則盡矣後人或貪而專利或嗇而吝出或夸而廣費或挾長挾短仕挾有力之助而敗約非有司者別白之則莊且壞不支府牧邑長丞掾曹吏及鄉之卿大夫先生處士其必綱維主張之使久而如一日陳氏布衣也其貲產非能絕出一鄉之上而義倡於鄉如此吾徒仕於朝於四方雖未必皆厚祿然聞陳氏之風而不知媿且慕者豈人情也哉於是併書以遺焉君之先君子蓋諱士澄字彥清云開禧二年七月辛丑記

廬帥田侯生祠記

開禧二年八月詔以開封田侯琳爲淮南西路安撫使兼知廬州節制淮西軍馬時虜方入塞侯既受命謂廬州爲淮西根本而古城又爲州之襟要堅守廬州則淮西有太山之安修復古城則廬州有金城湯池之固異時議者知守南城而已古城不復繕治一日有警如有太阿之利而不持鐔柄七尺之軀而授人腰領幾何其不敗也古城雖不甃而其實峭堅利以禦寇且西北堅城多止用土雖潼關及赫連氏統萬城亦土爾乃躬臨視之芟夷草棘則城果屹如石壁戈戟皆廢衆始駭服於是增障浚壕大設樓櫓又有月城亦得地利而卑不可恃則又爲築羊馬城厚六尺高倍之且爲重壘設釣橋而月城亦不可復犯

矣然自興役至訖事不三閱月將士爭奮民不與知
一日巍然若役鬼神可謂奇偉不世之功矣城甫畢
虜果大入道執鄉民問知侯在是相顧曰殊不知乃
鐵面將軍也蓋虜自王師攻蔡州時已習知侯名未
戰氣先奪矣棄城拒守甚力夜遣偏將自屯所攻其
營殺傷數千人萬戶死者二人侯聞捷曰是且伏兵
東門夜攻吾水柵以幸一勝乃提親兵隨所向禦之
莫不摧破虜知廬州不可近遂解而趨和州侯又亟
遣親信間道督光州戍將斷橋梁燒賊艦絕其饋道
奪俘虜復取安豐軍又遣萬騎由梁縣援和州會和
州亦堅壁虜窮乃盡邀侯又出兵濠州以戰車敗虜
屯兵戰車久不用侯以意爲之果取勝策勳真拜達
州刺史且以車制頌之諸軍侯猶不敢自以爲功方
益修水門之備濬河深二丈乃得昔人撒星椿橫巨
兩城間始知昔固有此舉遂益植新椿而城之其崇
五丈有奇樓櫓稱焉將吏士民聚而謀曰侯之所立
如此郡人無以報萬一則不可相與築生祠於城中
而移書於予請書歲月予以衰疾辭比書復來則侯
捐館舍矣請既益堅予亦痛若人之不淑而不獲卒
大勳業也故采之僉論以敘其始末昔劉滬城水洛
趙立城山陽滬所遇非堅敵立雖死事而不能全其
城猶皆廟食載在祀典況如侯之功光明卓絕如此
則祀典之請必有任其事者尚繼書之以垂示後世
爲忠義之勸云嘉定元年春二月己巳謹記

吳氏書樓記

天下之事有合於理而可爲者有雖合於理而不可
得爲之者士於可爲者不可不力力不足則合朋友
鄉閭之力而爲之又不足告於在仕者以卒成之成
矣又慮其壞則吾有子子又有孫孫又有子雖數十
百世吾之志猶在也豈不賢哉彼不可得爲之者則
有命焉有義焉不知命義徒嗷嗷紛紛奚益故君子
不爲也然爲此者寡也或易之爲彼者輒可以得名

於流俗故士之爲此者寡也吾友南城吳君仲與其
弟倫初以淳熙之詔建社倉其詳見於待講朱公元
晦所爲記其後又以錢百萬辦爲大樓儲書數千卷
會友朋教子弟其意甚美於是朱公又爲大書書樓
二字以揭之樓之下曰讀書堂堂之前又爲小閣閣
之下曰和豐堂旁復有二小閣左則象山陸公子靜
書其顏曰南瞻右則艮齋謝公昌國書其顏曰北瞻
堂之後榮木軒則又朱公實書之於序亦可謂盛矣
蓋吳君未命之士爾爲社倉以惠其鄉爲書樓以善
其家皆其力之所及自是推而上之力可以及一邑
一郡一道以至謀謨於朝者皆如吳君自力而不媿
則民殷俗儉兵寢刑厝如唐虞三代可積而至也吳
君兄弟爲是迄今已十五六年使皆壽考康寧則倉
與樓皆當益治鄉之民生業愈給足安樂日趨於壽
富而君之子弟孝悌忠信亦皆足以化民善俗是可
坐而俟也然年運而往天人之際有不可常者則又
當有以垂訓於無窮予讀唐李衛公文鏡平泉山居
記有曰鬻平泉者非吾子孫也以平泉一木一石與
人者非佳子弟也平泉特燕遊地木石之怪奇者亦
奚足道而其言且如此況義倉與書樓乎後之人讀
吾記至此將有渙然汗出霰然涕下者雖百世之後
常如吳君時有不難者矣嘉定元年五月甲子記

靈祕院營造記

出會稽城西門舟行二十五里曰柯橋靈祕院自紹
興中僧海淨大師智性築屋設供以待遊僧名接待
院久而寢成始徙廢寺故額名之海淨年九十坐入
十三夏而終以其法孫德恭領院事恭少嘗學於四
惟衆事是力夕思晝營心揆手畫施者自至魔事不
作用能於二十年間或改作或增葺光明偉麗毫髮
無憾上承先師遺志下爲子孫基業閱堂傑閣房奧
廊序樓鐘之樓檀經之堂館客之次下至庖廚漏浴

無一不備爲屋僅百間自門而出直視旁覽道路繩直而原野砥平一遠山在前孤峭奇秀常有煙雲暎帶其傍卜地者以爲在法百世不廢且將出名僧今院纔一傳其興如此後烏可量哉院之崇成也恭來請記曰先師之塋公實與之銘今院當有記非公誰宜爲哉予報之曰子慮於此凡東之會稽四明與西入臨安者風飄日相屬也彼其得志於仕宦獲利於商賈者寧可計邪有能家世相繼支久不壞如若之爲父子者乎有能容衆聚族變和安樂如若之處兄弟者乎至於度地築室以奢麗相誇斤斧之聲未停丹堊之飾未乾而盛衰之變已遽至矣亦有如若之安居奠處子傳之孫孫又傳之子者乎此無他彼其初與若異也雖曰有天數然人事常參焉人事不盡而談之數於虛其可哉嘉定元年夏五月庚申記

橋南書院記

吾友西安徐載叔豪雋人也博學善屬文所從皆知名士方其少壯時視功名富貴猶券內物一第直浼我爾然出遊三十年蹭蹬不偶異時知己零落且盡家貲本不薄載叔常糞壤視之權衡俯算籌衡縱一切不能知惟日夜從事於塵編蠹簡中至食不足不問也中年卜居城中號橋南書院地僻而境勝屋庫而人傑清流笑竹秀木芳草可玩而樂者不一而足載叔高臥其中裾不曳刺不書客之來者日益衆行者交跡棄者結轍訶殿者籠坊陌雖公侯達官之門不能過也名不可妄得客不可強致載叔蓋有以得此於人矣乃者數移書於予請記所謂橋南書院者嗟乎漢梁伯鸞入吳賃舂於臯伯通庶下至今吳有臯橋蓋以伯鸞所寓得名載叔之賢不減伯鸞而橋南乃其居則後世不蕪沒決矣尚何待記然載叔之請不可終拒也乃爲之書嘉定元年夏六月庚寅

山陰陸某務觀記

心遠堂記

大卿朱公以開禧元年築第於昭武城東取陶淵明詩語名其堂曰心遠既成與士大夫落之而以書來告曰子爲我記始嘉泰壬戌予蒙恩召爲史官朱公丞祕書日相從甚樂公去爲御史予領監事閑劇異趣會見甚疏然每與同舍焚香煮茶於圖書鐘鼎之間時時言及公未嘗不相與興懷絕歎也明年國史奏御之明日予乞骸骨而歸俄而公亦自寺卿得請外補不復相聞者累歲比書來予方臥病作而言曰朱公真可人哉士得時遇主施其才於國退居閭里閑暇之日爲多樽俎在前琴奕迭進欣然自得悠然遐想問醜宴樂以修親舊夙昔之好講解誦說以垂後進無窮之訓進退兩得可謂賢矣予獨相望累千里不得持一觴爲公壽且慶斯堂之成顧方以爲歎今乃得以不隲之文自託於後世亦可謂幸矣夫嘉定元年秋七月甲子記

萬卷樓記

學必本於書一卷之書初視之若甚約也後先相參彼是相稽本末精麤相爲發明其所關涉已不勝其衆矣一編一簡有脫遺失次者非考之於他書則所承誤而不知同字而異詁同辭而異義書有隸古音有楚夏非博極羣書則一卷之書殆不可遽通此學者所以貴夫博也自先秦兩漢訖於唐五代以來更歷大亂書之存者既寡學者於其僅存之中又鹵莽焉以自便其怠惰因循曰吾懼博之溺心也豈不陋哉故善學者通一經而足藏書者雖盈萬卷猶有憾焉而近世淺士乃謂藏書如鬪草徒以多寡相爲勝負何益於學嗚呼審如是說則秦之焚書乃有功於學者矣昭武朱公敬之粹於學而篤於行早自三館爲御史爲寺卿出典名藩尊所聞行所知亦無負於爲儒矣然每愜然自以爲歉益務藏書以棲於架藏於櫝爲未足又築樓於第中以示尊閣傳後之意而移書屬予記之予聞故時藏書如韓魏公萬籍堂歐

陽充公六一堂司馬溫公讀書堂皆寶萬卷然未能
絕過諸家也其最擅名者曰宋宣獻李邕鄆呂汲公
王仲至或承平時已喪或遇亂散軼士大夫所共歎
也朱公齒髮尚壯方爲世顯用且澹然無財利聲色
之奉儻網羅不倦萬卷豈足道哉予聞是樓南則道
人三峯北則石鼓山東南則白渚山煙嵐雲岫洲渚
林薄更相映發朝莫萬態公不以登覽之勝名之而
獨以藏書見志記亦詳於此略於彼者蓋朱公本志
也嘉定元年秋七月甲子記

渭南文集卷第二十一

渭南文集目錄
卷第二十二

梅子真泉銘

司馬溫公布被銘

金崖硯銘

延平硯銘

蠻谿硯銘

錢侍郎海山硯銘

桑澤脚磚硯銘

崔伯易畫像贊

東坡像贊

王仲信畫水石贊

鍾離真人贊

呂真人贊

又

僧師源畫觀音贊

宏智禪師真贊

大慧禪師真贊

又

塗毒策禪師真贊

卍菴禪師真贊

佛照禪師真贊

又

中巖園老像贊

大洪禪師贊

奉聖淳山主年八十有四放翁為作真贊

又

芋菴宗慧禪師真贊

廣慧法師贊

敷淨人求僧贊

又

放翁自贊

又

記太子親王尹京故事

渭南文集卷第二十二

梅子真泉銘

距會稽城東北七里有山曰梅山山之麓有泉曰子真泉遊者或疑焉智者及道人求笠澤漁父爲之銘銘曰

梅公之去漢猶鴟夷子之去越也變姓名棄妻子舟車所通何所不闕彼吳市門人偶傳之而作史者因著其說儻信吳市而疑斯山不幾乎執一而廢百梅公之去如懷安於一方則是以頸血丹莽之斧鉞也山麓之泉甘寒澄澈珠琲玉雪與子徘徊酌泉飲之亦足以盡公之高而歎其決也

司馬溫公布被銘

公孫丞相布被人曰詐司馬丞相亦布被人曰儉布被可能也使人曰儉不曰詐不能也此銘予二十歲時作今傳以爲秦少游非也

金崖硯銘

我遊三硤得硯南浦西窮梁益東掠吳楚揮灑淋漓鬼神風雨百世之下莫予敢侮

延平硯銘

延平雙龍去無迹收斂光氣鍾之石聲如浮磬色蒼璧予文日衰愧匪敵

蠻谿硯銘

斯石也出於漢嘉之蠻谿蓋夷人佩刀之礪也琢於山陰之鏡湖則放翁筆墨之瑞也質如玉文如篆則黠龍尾之羣從而溜韞玉之仲季也

錢侍郎海山硯銘

雲濤三山飾此怪珍誰其寶之天子侍臣煌煌繡衣福我遠民一字落紙活億萬人勿謂器小其重千鈞從公遄歸四海皆春

桑澤卿磚硯銘

古名硯以瓦今名硯以甃瓦以利於用甃以全其天

甄乎甄乎寧用之鈍而保其全乎尚無媿之日陳於前 放翁銘桑塲澤卿硯紹熙二年六月九日老學庵書

崔伯易畫像贊

崔公名公度字伯易高郵人劉相沆舉賢良方正不赴以任爲三班差使韓魏公薦之詔易文資爲國子監直講亦辭元祐中再召爲郎又皆固辭補外郎諸公力白於朝強起爲國子司業訖不肯復出爲郡以起居郎祕書少監召亦不肯起紹聖中復以爲祕書少監辭如初遂請宮觀尋致仕予喜其白首一節乃求畫像於高郵而爲贊曰

古之君子學以爲己可行則行可止則止仕以行義止以遠恥世衰道微豈復知此蚩蚩始學青紫思拾萬馬竝馳孰能獨立始雖弗急後亦汲汲我思崔公涕泗橫集

東坡像贊

我遊鈞天帝之所都是老先生玉色敷腴顧我而數閱世垢濁笑謂待僊昇以靈藥稽首徑歸萬里天風碧山巉然月墮江空

王仲信畫水石贊

亡友王仲信爲予作水石一壁仲信下世二十年乃爲之贊恨仲信之不及見也其詞曰

導江三硤神禹之蹟王子寫之洵洵撼壁後三十年塵暗苔蝕澹墨色之欲盡尚觀者之慘慄或曰是學蜀兩孫者非邪放翁曰吾但見其有歐陽信本柳誠懸之筆力也

鍾離真人贊

五季之亂方酣於兵叱嗟風雲卓乎人英功雖不成氣則莫奪煌煌金丹批糠陶葛

呂真人贊

一粒之粟有國有民二升之釜浩渺嶙峋我遊巴陵始識公面青蛇鏗然求之不見

又

天下家家畫呂公衣冠顏鬢了無同勸君莫被丹青誤那有長繩可繫風

僧師源畫觀音贊

三世如來同一闕大士亦作補陀夢佛子無財可修供尺紙寸毫俱妙用寶纓天冠儼四衆長年造極筆愈縱唯師魯公爲作頌十方世界俱震動

宏智禪師真贊

死諸葛走生仲達死姚崇賣生張說看渠臨了一著子諸方倒退三十里

大慧禪師真贊

爲昭覺文老作平生嫌遮老子說法口巴巴地若是靈利阿師參取畫底妙喜

止庵禪師真贊

爲處良長老作灑灑落落五十年一句不說祖師禪妙喜堂中正法眼等閑滅在瞎驢邊

塗毒策禪師真贊

骨相瓌奇風神蕭散貌肅而和語盡而簡畫得者英氣逼人畫不得者頂門上一隻眼

又

塗毒不自讚留待三山老試問卿上人讚好莫讚好海中忽起劫初風北斗柄折頰彌倒

佛照禪師真贊

名動三朝話行四海撒手歸來雲山不改人言大覺同龕師云老僧掩彩

大洪禪師贊

髮長無心剃衣破無心補大洪山上有賊大洪山下有虎非但白刃殺盡兒孫更能一口吞卻佛祖

中巖圖老像贊

我遊中巖拜師於床巍巍堂堂鳳舉龍驤公住無爲訪我成都雄辯縱橫玉色敷腴別未十日梁木告摧我如飛蓬萬里南來孰謂窮山乃瞻儀形墻壁說法況此丹青

奉聖淳山主年八十有四放翁爲作真贊兩住名山一老禪目光如電照人天行藏不用占著草卦氣全來二十年

羊庵宗慧禪師真贊

煨爛殘芋打塗毒鼓舌本雷霆毫端風雨廣慧法師贊

東土震日西方極樂一緇草鞋到處行脚

敷淨人求僧贊

光雍頭淨洗鉢頭頭拈起頭頭活有時與有時奪受用現前活鱖鱖敷道者一短褐欠箇什麼更要惡水發將錯就錯也不妨只在檀那輕手撥道敷淨人求伽陀見施主求買度牒爲說此數語嘉泰辛酉四月十日放翁書

錢道人贊

拚欄冠青芒屨上天下天不騎鶴喚作神仙渠不肯道是凡人我又錯會稽城中且賣藥

放翁自贊

遺物以貴吾身棄智以全吾真劍外江南飄然幅巾野鶴駕九天之風瀾松傲萬木之春或以爲跌宕湖海之士或以爲枯槁隴畝之民二者之論雖不同而不我知則均也 淳熙庚子務觀自贊時在臨川年五十有六

又

名動高皇語觸秦檜身老空山文傳海外五十年間死盡流輩老子無才山僧不會

又

皮葛其衣巢穴其居烹不糝之藜羹駕秃尾之草驢聞雞而起則和寧戚之牛歌戴星而耕則稽泥勝之農書謂之瘁則若腴謂之澤則若壟雖不能草泥金之檢以紀治功其亦可挾兔園之冊以教鄉閭者乎

周彥文令畫工爲放翁寫真且來求贊時年八十

又

進無以顯於時退不能隱於酒事刀筆不如小吏把鋤犁不如健婦或問陳子何取而肖其像曰是翁也

腹容王道輩數百胸吞雲夢者八九也 陳伯子命畫工為放翁記顏且屬作讚時開禧丁卯翁年八十三

記太子親王尹京故事

隋齊王暕尹河南唐秦公世民尹京北衛王重俊為洛州牧皆親王尹京故事也然尚未甚以為重俊唐秦王從榮以長子為河南尹又為天下兵馬大元帥故當時遂以尹京為儲貳之位至晉天福中鄭王重貴周廣順中晉王榮皆尹開封用秦王故事也國朝太祖皇帝建隆二年七月以太宗皇帝為開封尹開寶末太宗嗣位纔八日即以齊王廷美為開封尹後封秦王 太平興國七年秦王出為西京留守自是開封不置尹止命近臣權知府而已 權知府自李符始雍熙二年始以陳王元僖為開封尹蓋是時太宗元子楚王元佐被疾廢則陳王亦儲君也淳化三年薨後二年真宗皇帝自襄王為開封尹 後封壽王 至道元年正東宮議者謂尹有品秩非太子所宜兼領乃改判府事自後唐以來雖以尹京陰為儲副之位然皆藩王以太子判京府則自至道始也故事開封尹之上有牧雖具員而初未嘗置國朝惟親王乃除尹餘但為權知府事自太祖至徽宗八朝百七十年未嘗改蔡京為相始建議置尹尹非獨故事須親王乃除又太宗真宗潛藩所領人臣所宜避天下皆罪京之不學其後宣和末欽宗皇帝自東宮為開封牧是時已有尹尹之上惟有牧故以命之然牧故事序位在太子少保之下御史大夫六曹尚書之上亦非太子所宜兼蓋有司失考至道判府之制也尹之下故事有少尹位在少府將作少監之下太子少詹事之上後唐秦王時嘗以劉陟為之而建隆以來率不置惟置判官推官各一員或二員通掌府事竝以常參官充親王為尹則判官以給諫充 今太中大夫以上推官差降焉真宗為尹時判官二員推官三員蓋特置也或問太宗以來尹京則謂之南衙何也曰開封府治

所本在正陽門南街東然太宗為尹乃就晉邸視事晉邸又在大內及府治之南故曰南衙亦曰南宮秦王許王因之及真宗為尹太宗以秦王許王皆不利始命還就府治焉

渭南文集卷第二十二

渭南文集目錄
卷第二十三

姚平仲小傳

族叔父元燾傳

陳氏老傳

紹興府衆會黃錄青詞

江西祈雨青詞

謝雨青詞

嚴州祈雨青詞

謝雨青詞

保安青詞

天申節樞密院開啓道場

疏

滿散道場疏

天申節功德疏

又

瑞慶節功德疏

又

又

又

又

祈雨疏

謝雨疏

道宮謝雨疏

嚴州祈雨疏

又

又

嚴州施大斛疏

嚴州謝雨疏

嚴州謝雪疏

嚴州久雪祈晴疏

渭南文集卷第二十三

姚平仲小傳

姚平仲字希晏世為西陲大將幼孤從父古養為子年十八與夏人戰滅底河斬獲甚眾賊莫能枝梧宣撫使童貫召與語平仲負氣不少屈貫不悅抑其賞然關中豪傑皆推之號小太尉睦州盜起徽宗遣貫討賊貫雖惡平仲心服其沉勇復取以行及賊平平仲功冠軍乃見貫曰平仲不願得賞願一見上耳貫愈忌之他將王淵劉光世皆得召見平仲獨不與欽宗在東宮知其名及即位金人入寇都城受圍平仲適在京師得召對福軍殿厚賜金帛許以殊賞於是平仲請出死士斫營擒虜帥以獻及出連破兩寨而虜已夜徙去平仲功不成遂乘青驃亡命一晝夜馳七百五十里抵鄧州始得食入武關至長安欲隱華山顧以為殘奔蜀至青城山上清宮人莫識也留一日復入大面山行二百七十餘里度采藥者莫能至乃解縱所乘驃得石穴以居朝廷數下詔物色求之弗得也乾道淳熙之間始出至丈人觀道院自言如此時年八十餘紫髯鬱然長數尺面奕奕有光行不擇崖塹荆棘其速若奔馬亦時為人作草書頗奇偉然秘不言得道之由云

族叔父元燾傳

族叔父元燾名宦一字居安自山陰徙家餘姚性恭謹純厚閉門力學不妄與人交尤好樂律每言樂所以成人人才今世所用皆胡部雖鄭衛亦不得聞況韶濩乎因考按古關雝鹿鳴諸詩抑揚皆合音律時時自歌之中正簡古聞者興起欲上書請用之鄉飲酒會疾病不果所居瀕江一室蕭然數十年間几席書冊琴樽之屬皆未嘗易好飲酒然不肯自釀或餽以家所醞亦辭不取曰法不可也其謹如此有子洙登進士第為鹽官尉迎養官舍期年洙卒元燾護其喪

歸亦能自釋久之以疾卒年七十與元燾同時有鄭從革者名鼎之丹徒人自三舍法行已在鄉校能自刻苦口誦手鈔日常兼數人然試有司輒黜從革亦不以黜故少怠終始如一日事父篤孝建炎中客山陰遇寇從革欲奉父避之父不聽從革乃束帶立床前警糜粥奉湯液悉如平時寇至則迎門拜泣曰父老不能去惟哀憐之寇為感動乃署其門使其屬勿犯終亂定父子俱得全年六十餘貧益苦比卒衣衾不能具而一鄉皆推其賢云

陳氏老傳

會稽五雲鄉陳氏老年近八十生三子有孫數人皆業農惟力耕致給足凡兼并之事抵質賈販以取贏者一切不為耕桑之外惟漁樵畜牧而已子孫但略使識字不許讀書為士婚姻悉取農家非其類皆拒不與通室廬不妄增一椽器用皆朴質堅壯不加漆飾衣惟布襦裙取適寒暑之宜行之四五十年如一日子孫亦皆化之無違陳氏所居在剡渚山下地名曰南溪云 陸子曰予嘗悲士之仕者若苟名位而已則為負國必無負焉則危身害家憂其父母有所不免耕稼之業一捨而去之復其故甚難予先世本魯墟農家自祥符間去而仕今且二百年窮通顯晦所不論竟無一人得歸故業者室廬桑麻果樹溝池之屬悉已蕪沒族黨散徙四方蓋有不知所之者過魯墟未嘗不太息與懷至於流涕也聞陳氏事因為述其梗概傳之庶觀者有感焉

紹興府衆會黃錄青詞

上帝福善禍淫雖各繇於類應大道回骸起死或俯徇於哀祈敢露忱詞仰千聰鑒伏念臣等所居紹興府地連三輔人雜五方任職居官當閭閻之太半鮮衣美食味稼穡之所從習俗莫還神明積譴方凶饑之薦至加疫癘之相乘疾痛呻吟未及三醫之謁煮蒿淒愴已悲萬鬼之隣念升濟之無方敢號呼而有

請伏望少回洪造一洗衆辜逝者脫泉路之冥冥生者安王民之皞皞天職生覆地職形載敢忘夙夜之歸冬無愆陽夏無伏陰永冀生成之賜

江西祈雨青詞

天惟至仁久寬水旱之譴吏實有罪仰累陰陽之和既閔雨之歷時敢叩閣而請命伏念臣濫膺上指出使近畿深惟冥頑固陋之資莫副惻怛丁寧之訓徒積勤於夙夜冀無負於幽明然而風采不足以警服豪強惠愛不足以撫綏繆寡政輸竭日田疇曠陂澤之修訟積淹時困囹困術楊之繫務均力役而或蔽於所見思廣賑恤而或緣以爲奸既莫致於善祥懼卒罹於饑饉是用誦辰之吉稽首以陳伏望推善貸之慈霽曲成之惠雖有司曠職宜伏雷霆之誅然比屋何辜流爲溝壑之瘠若復未回於洪造遂將絕望於有秋敢殫皇皇哀迫之誠冒貢懇懇吁嗟之禱庶格九霄之澤少紓一道之憂稼穡順成儻僅蒙於中熟里閭疾苦誓靡墜於上聞

謝雨青詞

旱大甚以是虞不違啓處天蓋高而可叩思罄精誠方祗被於齋場已亟霑於膏澤尚懼豐凶之未決敢忘祈報之交修仰企叢霄少回冲馭伏願哀黎民之匱食宥衆吏之疎官申救有神更終大惠一穀不升謂嗛豈勝夙夜之憂三日以往爲霖實賴乾坤之造

嚴州祈雨青詞

歲律肇新農功伊始居者慮陰淫陽伏之寇耕者懷旱乾水溢之虞仰惟上穹職是元化俯遂羣黎之育式均六氣之平敢即熙壇恭陳薄薦所冀歲豐民樂寬九重宵旰之憂賦足刑清道衆吏簡書之責敢忘

惕勵仰對生成

謝雨青詞

天九關之在上精誠可以徹聞雨三日而成霖枯槁爲之盡起恭陳薄薦冒貢丹衷伏念臣領此偏州迨

今累月上無以布宣寬大而道屯膏之咎下不能撫摩凋瘵而格解澤之施踟躕靡遑吁嗟上訴敢謂叢霄之應會無披日之淹月離畢以示期山出雲而劫職風震下擊瀾壑交流井汲如初家享一瓢之樂粟儲可繼士寬半菽之憂商旅通行道途鼓舞彼有遺秉此有滯穗方將均惠於惇養冬無愆陽夏無伏陰更冀默消於疾癘敢忘兢惕仰對生成

保安青詞

道垂光而下濟罔不與慈情至敬則無文惟當直訴伏念臣少多罪垢晚乏功能寓形屢迫於九齡定著遂階於四品先世被追榮之典已冠三孤諸兒荷延賞之恩例霑寸祿首坐滿盈之久自擬災釁之來時涉夏秋疾生經絡有藥必試靡神不祈呻吟之聲晨莫不絕惟歸誠於洪造或少逭於往愆么然微衷亟以自列伏望曲回聰聽俯佑殘軀俾耆及之餘生獲奠居於故社耕桑安樂父子團樂天寶無私敢汲汲希望外之福人誰不死願熙熙須數盡之期

天中節樞密院開啓道場疏

得道者上爲皇帝圖之廣大有德者得其壽當化日之舒長率籲衆情虔伸善祝光堯壽聖太上皇帝伏願三靈介祉九廟儲休無黃屋之心雖退藏於淵默如南山之壽冀茂對於天祺

滿散道場疏

惟天其申命用休誕御無疆之曆有德者必得其壽共輪歸美之誠敢叩梵宮仰申善頌光堯壽聖太上皇帝陛下伏願頤神物外布澤寰中福祿萬年不介厖鴻之祉本支百世永奉詒燕之謀

天中節功德疏

得吾道而上爲皇算自齊於箕翼有天下而傳之子福方履於華夷敢因震風之期申致延鴻之祝恭惟光堯壽聖太上皇帝陛下聰明時憲清淨無爲黃屋非心共仰堯仁之大玉卮爲壽益瞻漢殿之尊光堯

壽聖太上皇帝恭願茂對昌辰丕承景貺以聖傳聖增光奕世之休為天中天永享萬方之奉

又

得道上為皇誕受素元之冊重華協於帝光臨孝治之朝敢禱向日之誠仰祝後天之算尊號陛下恭願又新湯德不顯文謨日舒以長燕處益探於衆妙道冲而用陰功廣被於羣生

瑞慶節功德疏七

有開必先天地肇開於景運無遠弗屆華夷畢效於貢珍矧備邇聯敢稽壽祝皇帝陛下伏願誕膺載穀端拱穆清以八千歲而為春永御舒長之景卜七百年而過曆用符愛戴之誠

又

誕彌厥月丕昭震夙之期長發其祥共致厯鴻之祝皇帝陛下恭願後天難老如日正中紹十二聖之睿暮開三百年之景運金泥玉檢肇修稀闕之儀恪矢石磬永享貢輸之盛

又

叨榮禁路千齡獲遇於聖明歸老故山一飯敢忘於君父敬脩梵供仰祝堯年皇帝陛下恭願光照大千壽踰時萬繼統燕無為之洽御邦躋有道之長上際下蟠永享化國舒長之日東封西祀嗣修太平稀闕之儀

又

節紀千秋寶睡開元之盛神呼萬歲游膺嵩嶽之祥顧雖遯迹於丘園敢忘馳誠於軒陛皇帝陛下伏願道極高而蟠厚治咸五而登三碣石河源盡復輿圖之舊泰山梁甫嗣修檢玉之儀

又

惟皇之極欣逢熙洽之辰於萬斯年共效雁鴻之祝敢趨淨域薦控丹衷皇帝陛下伏願允叶帝心誕膺神策化東漸而西被功上際而下蟠降德於衆北民

坐致唐虞之治上瑞至千百所永符箕翼之祥

又

聖恩念舊猶切四品之崇景運開先敢後萬年之祝皇帝陛下恭願當守撫盈成之業垂衣紹積累之休綱易南訕綿鋤獲於率土東漸西被會玉帛於中朝

又

恩霑遺老幸聯上雍之班身遇明時敢後祝堯之請皇帝陛下恭願乾端廣日啟正中髦鬢奉九譯之琛農扈告三登之候應帝王之運故聰明睿智足以有臨集天地之祥皆算數譬喻所不能及

祈雨疏

九秋伊始百穀將登念零雨之稍愆率羣情而致禱仰惟慈蔭曲鑿丹誠三日為霖俯慰雲霓之望大田多稼上寬宵旰之憂

謝雨疏

諸佛願心本常存於澤物衆生業果或自召於凶年民愚無良吏情不職駭驕陽之作害閔零雨之弗時內罄寸誠方吁嗟而通禱起瞻四野已枯槁之一蘇自惟莫格於太和乃至上勤於慧力敢志祗報用舍鴻慈

道宮謝雨疏

上帝至仁本不忘於澤物下民胡罪幾坐致於凶年由官吏之情偷致政刑之疵癘驕陽作害零雨弗時內罄寸誠方吁嗟而仰禱起瞻四野已枯槁之盡蘇自惟莫格於太和迺至輒干於鴻造敢志祗報用舍好生

嚴州祈雨疏

倬彼雲漢尚愆霖雨之期害於柔盛俯劇淵冰之懼敢輸丹悃仰叩真覺慈雲占離畢之祥少道屯膏之咎

又

時雨少愆上勞宵旰詔音亟下恭致禱祈敢冀 覺慈

洪恩 誕敷惠澤

又

龜占墨而尚違凜有屯膏之懼龍蟠泥而未舉方繫
解澤之施冀軫覺瀾慈曲成樂歲俯慰闔境雲霓之
望上寬淵衷宵旰之憂

嚴州施大斛疏

早魃為虐念莫釋於衆憂飯香普熏敢恭陳於淨供
伏願雲從龍而效職月離畢以告祥解澤亟行屯膏
一洗如來施無量食既靡聞於聖凡史臣書大有年
庶上寬於宵旰

嚴州謝雨疏

時雨愆期方軫焦勞之慮 天心佛慈 從欲遽蒙霽澤
之施敢擇良辰敬伸昭報

嚴州謝雪疏

萬邦屢豐幸際中天之熙運平地尺雪鬱為嗣歲之
嘉祥敢忘 淨供薄薦 之修陳少謝 覺慈兼霽 之貺尚
祈 垂佑洪達 益介純禧

嚴州久雪祈晴疏

時雪屢應已占嗣歲之登春氣未和寧免祈寒之怨
敢趨秘梵 宇仰叩 真覺慈冀日麗於層霄俾民安於
比屋上寬旰食俯慰輿情

渭南文集目錄
卷第二十四

法雲寺建觀音藏殿疏
開元寺重建三門疏

安隱寺修鐘樓疏
圓通寺建僧堂疏
重修光孝觀疏
重建大善寺疏

道像五藏疏
重修大慶寺疏
鷲峯寺重建三門疏
福州請仁王堅老疏

福州請九峯圓老疏
福州請聖泉頴老疏

能仁請昕老疏
鄉士請妙相講主疏
雍熙請最老疏

千秋觀修造疏
雍熙請機老疏
光孝請廓老疏
雍熙請錫老疏

求僧疏
又
紫霄宮女童徐居慶求披戴疏

成都大聖慈寺念經院僧法慧為行者雷印定
求度牒疏

雍熙請倫老疏
孫餘慶求披戴疏
梁氏子求僧疏
陶山養行者求化度牒疏

傅妙蘇求僧疏
鎮江謁諸廟文
葉可忻求僧疏
祭富池神文

福建謁諸廟文
福州城隍昭利東嶽廟祈雨文

福州謝雨文
福州準赦禱諸廟文
福州歐冶池龍鐔溪河口五龍祈雨祝文

福州閩王閩忠懿王祈雨祝文
謁大成殿文

謁社稷神文
嚴州秋祭祝文

又
嚴州祈雨祝文
又
嚴州馬目山祈雨祝文
嚴州祈晴祝文

嚴州謝雪祝文
嚴州廣濟廟祈雨祝文
嚴州久雪祈晴祝文
嚴州戊申謝蠶麥祝文

渭南文集卷第二十四

法雲寺建觀音藏殿疏

補落伽之道場蒸蕪已久修多羅之妙典函甌僅存先師每志於經營四衆亦思於協助天時默定佛事將成伏望巨公大人居士長者深戒著鞭之後共合浮圖之尖庶得萬瓦鱗差修梁虹舉紺容輝日梵唄陵雲結難值之勝因作無窮之壯觀

開元寺重建三門疏

巍然古刹寶居大府之喉衿卓爾高閣復爲一寺之眉目歷數百載極祗園之盛乃七十年猶劫火之殘伏望大發積藏亟成鉅麗榮髹丹於久廢偉扁榜之一新雨霽塵清碧瓦勢凌於霄漢霧開日出金鋪光射於康莊還壯觀於承平垂美名於不朽

安隱寺修鐘樓疏

金鐘大鑪蓋以聲爲佛事雄樓傑閣宛在水之中央歷歲既深頌人乃復敢徧投於信士祈同結於勝緣浮翠流丹儻復還於鉅麗撞昏擊曉實大警於沉冥

重修光孝觀疏

天覆地載之間欽啄皆由於道蔭歧行喙息之類涵濡悉荷於國恩豈獨忠義之心人人具有抑亦生成之賜物物皆同永惟光孝之道場實薦徽皇之威御神祠佛刹尚營繕之相望琳館珍臺豈修崇之可後某等叨恩冠褐庇職宮庭敢忘夙夜之勤冀復規模之舊既修先朝之遺迹遂新大府之榮觀

圓通寺建僧堂疏

如來香飯取時已遣化人開鉢單展處又須得所營茲華屋延我勝流念非極棟宇之功何以稱龍象之衆木魚哮吼千僧閣也在下風露柱證明九梁星直須退步

重建大善寺疏

劫火之壞大千雖云有數長者之施億萬要豈無時

儻阿練若獲了大緣則窄塔波亦還舊觀可謂非常之舉惟須不退之心

道像五藏疏

道雖與貌固非耳目口鼻之施天本無心尚何肝膽肺腸之有既云肖像蓋亦同人願共發於信心不須疑著庶亟成於盛事垂示無窮

鷲峯寺重建三門疏

建寺年深築門役鉅雖不下禪牀相接用此何爲然倒騎佛殿出來少它不得伏望念古阿蘭若之勝地結檀波羅密之大緣或備土木甄甃之材或施勸墾髹髹丹之費初發心處已有諸聖證明一落筆時自然大地震動

重修大慶寺疏

佛出本爲一大緣初無差別越城昔有六尼寺五已丘墟惟大慶之名蓋實故唐之遺址茲蒙賢牧命復舊規方廣募於衆財冀亟成於偉觀魔王魔民魔女盡空蜂蟻之區法鼓法炬法幢一新龍象之衆儻承金諾敢請水銜

福州請仁王堅老疏

勇退急流雖具衲子參尋之眼旁觀袖手要非邦人嚮慕之誠爰擇名藍往迎高士某人芙蓉正派真歇諸孫默觀已得於本心自重每輕於外物不合則去蹈儒士之難能知我者希得老氏之所貴付越山於昨夢聽石嶺之儻來竺鶴溪雲豈有去留之迹齋魚粥鼓一隨宿昔之緣

福州請九峯圓老疏

開籃裏入頭不妨奇特懸崖邊撒手只要承當須遇作家方了此事某人參臨濟正法眼得補陀大辯才雖則跛跛挈挈走諸方不認昭昭靈靈作自己伏請如雲出岫似月印潭放下鉢袋衣囊打起齋魚粥鼓直到佛祖不知處猶是半塗且向父母未生前試道一句

福州請聖泉穎老疏

少室玄機陽岐正脈最端的處只要言下承當有多
少人盡向面前踉過某人談鋒峻峭心地圓明當初
向竹篋子頭偶然築著磕著而今踞寶華王座選甚
胡來漢來便須拈起鉗鎚打開窠臼以鐵酸疎普供
大眾與木上座同演宗風鐘鼓鏗鏘幡幢炳煥豈惟
流輩知不由免徑之高要使師翁發撞破煙樓之歎
能仁請听老疏

雍熙請最老疏

視世如菴摩勒果雖外物之本輕說法如優曇鉢華
要應時而出現久已名行於海內豈容身隱於雲根
敬虛金布之園往致空飛之錫某人材高龍象辯震
雷霆潛閩嶺者十年遇寒巖而一笑始初數賞明窗
下特地安排最後慙慙鉢子親自分付幸念先師
之遺語亟為故人而遠來要傳無盡燈當觀第一義
山陰道中萬壑水依舊潺湲雲門寺裏一爐香久成
寂寞忽於旁邑得此高人某人立雪飽參隔江大悟
通威音以前消息踞毗盧向上機關血指汗顏諸方
不供一笑搏風擊水萬里始自今朝豈惟續且庵家
傳更喜得可齋道伴

鄉士請妙相講主疏

雜華設教猶日照山士應緣如雲出岫某人英姿
邁往雋辯絕倫早集布金之園久造笑雲之室伏望
俯從衆志來繼道場且要於談笑間取上方香積之
飯然後以神通力成夜摩觀史之宮
千秋觀修造疏

一曲澄湖千秋古觀瓊樓玉宇正須月斧之修葺
瓊函未極雲章之奉至於傑閣翬飛於天半長橋虹
臥於波心皆擬繕營用成絕勝況丞相肇新於真館
與邦人仰禱於帝齡覆載之間共陶化日髮膚之外
皆是聖恩願垂不朽之名更效無疆之祝
光孝請廓老疏

孤峯頂上一口吞三世如來七里瀨邊隻手接十方
衲子既是隨緣自在便須信手承當某人號真作家
有大力量拈起拂子且與陸大夫同舉宗風放下鉢
囊不妨陳尊宿暫為隣舍

雍熙請機老疏

諸方到處只解抱不哭孩兒好漢出來須會打無類
傅託舉起一枝拂子勘破四海禪和某人心地超然
談鋒備甚最初遊歷倒却門前刹竿末後承當分付
先師鉢袋十年涵養一日闡揚請木上座作先馳拈
鐵酸疎施大眾鯨鐘鼉鼓無非塗毒家風蘿月谿雲
盡是放翁供養

雍熙請錫老疏

瞿唐峽激湍堆萬里不生寸草若耶谿雲門寺三人
卽是叢林要看雲居錫上座點檢諸方須與宣城陸
大人激揚此事某人得來孤峻用處縱橫巍巍堂堂
灑灑落落半月崑戴起箕子好泉亭脫下草屨水宿
山行平日只成露布刀耕火種從今別是生涯
求僧疏

掀禪床拄杖杖雖屬具眼厮兒搭袈裟展鉢手盃却要
護身符子伏望尊官長者達士通人共燃續慧命燈
不惜判虛空筆起難遺想結最勝緣向僧堂前喝參
幸離俗諦以比丘身得度敢負厚恩

又

佛有八萬四千法門出家最勝僧受二百五十大戒
利物無邊方今雲門諸山莫如淨智一境必度優婆
塞俾成比丘僧巍巍堂堂聿觀龍象之衆雍雍肅肅
不塊旃檀之林儻許結緣願垂淑筆
紫霄宮女童徐居慶求披戴疏

雲山棲隱雖從金門羽客之遊冠珮焚修尚欠白水
真人之力敢輪微懇仰叩高閣伏望推博施之心植
衆妙之本仙桂乞得支機石既遇有緣天風飄下步
虛聲是為報德

成都大聖慈寺念經院僧法慧爲行者雷印定求度牒疏

拈華會上正法眼雖是自明刻草殿前護身符少伊不得故鄉踰八千里路空手要七十萬錢欲辦大緣莫嫌俗氣從此鉢盂兩度溼受賜不貲忽然平地一聲雷酬恩有在

雍熙請倫老疏

修竹茂林久作蘭亭之客青鞵布韉忽尋秦望之盟此有宿因寧容力避某人渡河香象跋浪長鯨初得法於室中耳聾三日晚抽身於林下壁觀九年道價雖高世緣未契方公言之共數亦勝地之將與百草頭祖師本來知見一毫端寶刹今日神通但辦肯心必無難事

梁氏子求僧疏

名家有千里駒本意折一枝桂忽厭魯章甫擬著僧伽黎可謂人英堪承佛種長者若能成就放翁爲作證明

孫餘慶求披戴疏

孤雲墊鶴山林自屬閑身布襖青鞵巾褐本來外物伏念心久游於塵外迹尚寄於人間傳翕雖然頭戴道冠王恭終要身披鶴氅直須白水真人力共了青谿道士緣

陶山養行者求化度牒疏

昔於如來所發心蓋非一世今以此丘身得度夫豈小緣况貞白先生昇僊之區實文昌左轄植福之地遍投信施庶獲圓成七條九條二十五條儻無魔障一佛二佛百千億佛當共證明

傅妙蘇求僧疏

四十劫前記作佛已定出家百尺竿頭坐底人正須進步茲述懷懷之請敬趨赫赫之門伏望王公大臣長者居士揮雲煙於紙上運財寶於庫中出現優鉢曇花成就僧伽黎相十方諸佛同聲讚可謂勝緣一

日鉢盂兩度開敢志大施

葉可忻求僧疏

七寶布施作福止屬有爲一人發心歸源方名大事非賴賢豪之助曷弘清淨之緣所冀見聞各懷喜捨續佛壽命成茲勳不壞之身為國焚修効芥石無疆之祝

鎮江謁諸廟文

某以隆興改元夏五月癸巳自西府掾出佐京口明年春二月己卯至郡洪惟上恩不可量數敢不夙夜祗惕圖稱所蒙區區之心神其監之

祭富池神文

某去國八年浮家萬里徒慕古人之大節每遭天下之至窮登攬江山裴徊祠宇九原孰起孤涕無從雖薄奠之不豐冀英魂之來舉

福建謁諸廟文

某聞聰明正直神之所以爲神也堵共爾位好是正直吏之所以事神也一戾於此神且殛之其何福之敢望某蒙恩出使一道告至之始祗慄於祠下

福州城隍昭利東嶽廟祈雨文代

閩之風俗祭祀報祈比他郡國最謹以故祠廟之盛甲於四方斧斤丹堊靡有遺巧重門傑閣煥然相望則神之所以福其人者亦宜與他郡國異而自夏訖秋驕陽爲害水泉淺涸草木焦卷多稼彌野將茂而槁夫幽顯之際雖遠然豈有享其奉而不恤其害者

惟神聰明宜動心焉

福州謝雨文代

吏受命天子牧養百姓神受命上帝保衛一方其實則均然而祠宇貌像孰與府寺之雄犧牲醪幣孰與廩餼之厚巫覡尸祝孰與官屬之盛吏隋政紀無以格豐年之祥不自責而望神宜拒而弗享矣區區之禱曾未信宿雲興東山之麓雨被千里之內雷發而不怒風行而不疾祁祁霢霂如哺如乳起視四野莫

不霑足愁歎之聲變為歡謠嗚呼吏之愧於神多矣
酒列牲肥樂歌送迎匪報也以識吏之愧也

福州準赦禱諸廟文代

乙未詔書慈寧殿服藥數大有於四方分命郡國禱

山川神元之在典祀者惟神受職欽承上意

福州歐冶池龍鐸谿河口五龍廟祈雨祝文代

諒垣闕宇瀦水灌木窈然而幽陰者龍之神也升天
御雲濟世澤物霽然而成功者龍之仁者也聰明正
直有禱必應者又其所以食於民也歷時不雨柔盛
將害則龍亦何心視民之窮如越人之視秦也變化
呼吸轉災為豐在龍之力其易如指之屈伸也犧牲
醪幣吏之所以報龍者其敢怠而弗親也

福州閩王閩忠懿王祈雨祝文代

維神之生禦災捍患有功德於此邦之人沒而祀之
非獨父老子弟不忘神之功德意者神亦眷眷於此
邦沒而不已也歷時不雨稼穡將害吏雖不言神其
忍安視弗拔邪雖然敢不以告

嚴州謁諸廟文

新定為郡地陋民貧而同祿馮夷數見謹告市邑蕭
然至今未復某蒙恩來守是邦宜知所報如或黷貨
以厲民淫刑以飾怒事燕遊以廢政納請謁以撓法
是宜即罪於有神死不致悔使其能蠲踐今茲之言
則神亦宜哀矜之調節雨暘驅逐癘疫使與吏民仰
戴明神之休性酒鼓歌以時來報豈不幽顯各得其
職哉

謁大成殿文

某聞之夫子曰言不忠信行不篤敬雖州里行乎哉
某家世山陰被命來守不三舍而至殆與古之仕於
其國者無以異然一於忠敬有所不力則吏與民且
合其智詐澆浮以欺其守豈不殆哉視事之始款謁
先聖先師非獨以令甲也敢告夙夜祗懼之意

謁社稷神文

某蒙上恩來守新定邦雖小有社稷焉其敢不恪以
獲戾於神敬以到郡之三日周視壇壝

嚴州秋祭祝文

秋有祀國之典也筮日之良爰舉祀事牲酒樂歌靡
敢不飭惟爾有神來格來歆惠我吏民神亦永饗典
祀

嚴州祈雨祝文

新定為郡介於谿山之間雨暘少愆輒能病稼戊申
水溢方禱於神曾未再旬復以旱告吏政無以格陰
陽之和而惟神之瀆羣趨廟庭僕僕亟拜神固不以
吏罪而棄斯民吏獨無愧於神乎尚力厥事以蓋茲
媿神其監臨之

又

甲辰詔旨以閔雨命郡守致禱惟神受職欽承上命

又

某被命來守幸及終更不敢以去郡有期念荒厥事
屏逐暴吏慰安疲民稽於幽明儻道咎責而嘉穀方
秀時雨未渥維神正直宜監於茲敢列忱辭恭俟嘉
澤

嚴州馬目山祈雨祝文

維神有祠茲山尚矣唐刺史韓泰以禱雨獲應載新
廟貌今又四百餘年而未列命祀無以慰父老祝史
之心今茲旱勢已極某雖愚蒙恩假守得以專達於
朝敢與爾神期以三日甘澤霑足槁苗復興當列奏
乞封以後神之威靈願以守郡不獲親行謹遣迪功
郎建德縣主簿汪仲儀即事祠下而某帥郡僚望拜
於軍門僱以俟命

又

考於圖志得神之威靈而致禱焉既累日矣誠弗能
格雖間得小雨地不及濡塵不及斂而赫日復出矣
然父老之言以為比夕雲物多起神之祠傍意者神
哀憫斯民終有以活之也敢復以請博博之誠神尚

暨之

嚴州祈晴祝文

雨勢未止溪流暴溢民廬官寺倉庫獄戶皆有意外之憂惟神聰明亟俾開霽約束漲水以時返壑某與吏民其敢忘報

嚴州謝雪祝文

四時冬爲元英閭里毋虞於孺疫平地尺爲大雪麥禾預卜於豐穰敢忘薄薦之陳少奮明神之賜尚祈孚佑永保安寧

嚴州久雪祈晴祝文

雪雖嘉瑞過則爲災春氣未和民屢告病郡政乖刺惟神之歸尚祈興哀以卒大賜牲酒之報其敢弗虔

嚴州廣濟廟祈雨祝文

不雨且再旬矣井泉涸竭蔬菽告病閭巷講救焚之備郡庭決爭汲之訟秋陽益熾疾癘將作吏雖愚猶知恐懼豈神之聰明而忘之乎出雲興雨以一洗之神之德於斯民豈有既哉

嚴州謝雨祝文

比承詔旨致禱靈祠果遂感通沛然甘澤敢涓吉日祇報靈休

嚴州戊申謝蠶麥祝文

乃者蠶老而未繭麥秋而未穫天作靈雨將害於成惟神降康陰沴消弭牲登於俎酒湛於觴維以薦誠匪敢言報

渭南文集卷第二十四

渭南文集目錄
卷第二十五

夔州勸農文

丁未嚴州勸農文

戊申嚴州勸農文

書通鑑後

又

書郭崇韜傳後

書賈充傳後

書空王青集後

書浮屠事

書涓橋事

書包明事

書神僊近事

書屠覺筆

書二公事

渭南文集卷第二十五

夔州勸農文

仰惟天子臨遣牧守每以務農勸課之指丁寧訓教雖遐陬僻邑如在畿甸惟懼一穀之不登一夫之失職也破中之郡變為大其於奉明詔以倡屬郡慰齊民者尤不敢不勉繼自今不縱培克不長罷訟不傷爾力不奪爾時爾父兄弟其亦恭承天地惠澤毋為惰遊毋怠東作毋失收斂毋慢蓋藏勤以殖產儉以足用有司與民交致其愛使公私之蓄日以富饒無貽朝廷宵旰之憂豈不遘哉

丁未嚴州勸農文

蓋聞農為四民之本食居八政之先豐歉無常當有儲蓄吾民生逢聖世百穀順成仰事俯育各遂其性太守幸得以禮遜相與從事於此故延見高年勞問勸課致誠意以感衆心非特應法令為文具而已今茲土膏方動東作維時汝其語子若孫無事末作無好終訟深鄙廣耜力耕疾耘安豐年而憂歉歲太守亦當寬期會簡追胥戒興作節燕遊與吾民共享無事之樂而為後日之備豈不美哉

戊申嚴州勸農文

蓋聞為政之術務農為先使衣食之麤充則刑辟之自省當職自蒙朝命來剖郡符雖誠心未格於豐穰然拙政每存於撫字觴酒豆肉曷嘗妄蠹於邦財銖漆寸絲不敢輒營於私利所冀追胥弗擾墾闢以時春耕夏耘仰事俯育服勞南畝各終蕪菘之功無犯有司共樂舒長之日今者土膏既動穡事將興敢延見於耆年用布宣於聖澤清心省事固守令之當為曠土游民亦父兄之可恥歸相告戒恪務遵承上以寬當守之深憂下以成提封之美俗

書通鑑後

司馬丞相曰天地所生財貨百物止有此數不在民

則在官其說辯矣理則不如是也自古財貨不在民又不在官者何可勝數或在權臣或在貴戚近習或在強藩大將或在兼弁或在老釋方是時也上則府庫殫乏下則民力窮悴自非治世何代無之若能盡去數者之弊守之以悠久持之以節儉何止不加賦而上用足哉雖捐賦以予民吾知無不足之患矣彼桑弘羊輩何足以知之然遂以為無此理則亦非也

又

周世宗既服江南諭使修守備通鑑以為近於大邦畏其力小邦懷其德是比之文王也方是時世宗將有事於燕晉其謀以為若南方有變雖不能為大害然北伐之師勢亦不得不還故先思有以安江南之心又疲其力於大役使不得動比北伐成功江南折簡可致矣此世宗本謀也遽謂之近於文王豈不過哉然世宗之謀則誠奇謀也蓋先取淮南去腹心之患不乘勝取吳蜀楚粵而舉勝兵以取幽州使幽州遂平四方何足定哉甫得三關而以疾歸則天也其後中國先取蜀南粵江南吳越太原最後取幽州則兵已弊於四方而幽州之功卒不成故雖得諸國而中國之勢終弱然後知世宗之本謀為善也

書賈充傳後

言一也情則三也其惟論兵乎自古惟用兵最多異論以其有是三者也禍機亂萌伏於隱微人知兵之利不知其害有識者焉逆見而力止之王猛之於秦是也投機之會轉盼已移而常人闇於事機私憂過計馮道之於周是也猛固賢矣道雖闇猶有憂國之心焉至於賈充當晉武時力沮伐吳之舉至請斬張華則何說哉自漢之季百數十年閒庸人習見南北分裂謂為故常赤壁之役以魏武之雄乘破竹之勢而大敗塗地終身不敢南鄉充之心蓋竊料吳未可下因為先事之言以徼後日之福而不料天下之遂一也要之戰危事也以舜為禹出師不能一舉而

定三苗以唐太宗自將李勣在行不能遂平區區之高麗故爲充之說者常有不利焉此人臣之陰爲身計者所以多出於此也馮道不足言矣王猛賈充之論所謂差毫釐而謬千里者可不察哉

書郭崇韜傳後

後唐莊宗初得天下欲立愛姬劉氏爲后而韓夫人正室也伊夫人位次在劉氏上莊宗雖出夷狄又承天下大亂禮樂崩壞之際然顧典禮人情亦難其事未知所出羣臣雖往往阿諛士學術然亦無敢當其議者豆盧革爲相郭崇韜爲樞密使崇韜功高迹危思爲自安計而革庸懦無所爲惟詔崇韜以自安因相與上章言劉氏當立於是莊宗遂立劉氏爲后劉氏既立黷貨蠹政殘賊忠良天下遂大亂莊宗以弑崩李氏之子孫殲焉嗚呼革不足言矣崇韜佐命大臣忠勞爲一時冠其請立劉氏非有他心也不過謂天子所寵昵而自結焉將賴其助以少安而已然唐之士實由劉氏是亡唐者崇韜也後唐之先皆有勳勞於帝室晉王克用百戰以建王業莊宗因之遂有天下同光之初海內震動幾可指麾而定矣而崇韜顧區區之私引劉氏以覆其社稷而滅其後嗣宗廟之靈其肯赦之乎崇韜卒以盡忠赤其族革亦無罪誅死豈非天哉昔唐高宗欲立武昭儀爲后大臣褚遂良等力爭以爲不可者皆得禍獨李勣勸成之窮極富貴而死自謂得計矣及武氏得志唐高祖太宗之子孫誅戮幾盡而勣雖已死亦卒以孫敬業故發墓剖棺夷其宗族遂良等雖得禍不至此也天理之不可逃如此雖然豈獨天理哉彼勣與崇韜皆武夫烈士勇於報德乃以此心揣婦人以爲自安之奇策安知婦人之性陰狡忍毒果於背德方其得志自肆若豺虎然豈復思得立之所自哉然則二人之禍雖微天理固有不可逃者矣悲夫

書安濟法後

當安濟坊法行時州縣醫工之良者憚於入坊越州有庸醫曰林彪其技不售乃冒法代它醫造安濟今日傳容平當來則林彪也明日丁資當來又林彪也又明日僧寧當來亦林彪也其治疾亦時効遂以起家然里巷卒不肯用比安濟法罷林彪已爲溫飽家矣年八十餘乃終開禧乙丑四月七日務觀書

書空青集後

建中靖國元年景靈西宮成詔丞相曾公銘於碑以詔萬世碑成天下傳誦爲宋大典且數曾公耆老白首而筆力不少衰如此建炎後仇家盡斥曾公文章始行於世而獨無此文或謂中更喪亂不復傳矣淳熙七年某得曾公子寶文公遺文於臨川然後知其寶文公代作蓋上距建中八十年矣嗚呼文章鉅麗闕偉至此使得用於世代王言頌成功施之朝廷薦之郊廟孰能先之而終寶文公之世士大夫莫知也汪翰林平生故人及銘其墓惟曰始爲家賢子弟中爲時勝流晚爲能吏是豈足以言公哉公家世固以文章名天下又自少時所交皆諸父客天下偉人出入試用亦數十年朋舊滿朝然世猶不盡知之如此況山林之士老於布衣所交不出閭巷其埋沒不耀抱材器以死者可勝數哉可勝數哉九月十九日山陰陸某書

書浮屠事

浮屠師宗杲宛陵人法一汴人相與爲友資皆豪傑負氣好遊出入市里自若已乃折節同師蜀僧克勤相與磨礮浸灌至忘寢食遇中原亂同舟下汴杲數視其笠一怪之伺杲起去亟視笠中果有一金釵取投水中杲還亡金色頗動一叱之曰吾期汝了生死乃爲一金動邪吾已投之水矣杲起整衣作禮曰兄真宗杲師也交益密於虛世多詆浮屠者然今之士有如一之能規其友者乎藉有之有如杲之能受者乎公卿貴人謀進退於其客客之賢者不敢對其不

肖者則勸之進公卿亦以適中其意而喜謀於子弟亦然一日得禍其客其子弟則曰使吾公早退可不至是而公卿亦歎曰向有一人勸吾退豈至是哉然亦晚矣

書渭橋事

中大夫賈若思宣和中知京兆櫟陽縣夏夜以事行三十里至渭橋夜漏欲盡忽見二三百人馳道上衣幘鮮華最後車騎旌旄傳呼甚盛若思遽下馬避於道傍民家且使從吏詢之則曰使者來按視都城基漢唐故城王氣已盡當求生地此十里內已得之而水泉不壯今又舍之矣語畢馳去如飛時方承平若思大駭明日還縣亟使人訪諸府則初無是事也若思河朔人自櫟陽從蔡靖辟為燕山安撫司管勾機宜文字靖康中自燕遼歸入尚書省為司封郎而卒陸某曰河渭之間輿區沃塹周秦漢唐之遺跡隱隱故在自唐昭宗東遷廢不都者三百年矣山川之氣鬱而不發藝祖高宗皆嘗慨然有意焉而羣臣莫克奉承予得此事於若思之孫逸祖豈關中將復為帝宅乎虜暴中原積六七十年腥聞於天王師一出中原豪傑必將響應決策入關定萬世之業茲其時矣予老病垂死懼不獲見故私識若思事以示同志安知士無脫輓輅以進說者乎

書包明事

包明者不知其鄉里少為兵事湯岐公自樞密至左相明常在府紹興末岐公以御史論罷故劄一府之人皆罷遇拜執政則往事焉久之御史中丞汪公澈拜參知政事一府皆往汪公蓋前日劾岐公者也於是明獨不肯往曰是嘗論擊吾公者持何面目事之雖妻子飢寒不之顧未幾以病死方岐公貴時所薦達士大夫多矣至其失勢不反噬以媚權門者幾人且岐公平日待明非有異於衆人也汪公之拜一府俱往非獨明也明而往事汪公非有負也泥塗賤隸

又非清議所及而其自信毅然不移如此蓋有古烈士之風矣書其始末使讀者有感焉

書神僊近事

昔道士侯道華喜讀書或問其意答曰天上無凡俗神僊後果騰舉而去呂洞賓陳搏賀元施肩吾皆本書生近歲有譙定雍孝閔尹天民亦皆以儒士得道定今百二十餘歲故在青城山中采藥道人有見之者讀易尚不輟也孝閔或自稱木先生往來沔鄂間天民客青城儲福宮一日大罵所與往來道士即閉門睡道士明日相率謝之而門不啓壞壁視之危坐死矣方相與驚歎俄失所在此三人者皆顯人故其事傳聞巷山澤之士名迹湮晦本不為人知者又可悉數哉予從子慧綽為浮屠為子言豫章西山香城寺之傍有堊人身被綠毛每兩霽多坐石上曩日見人輒避去追之不可及有識者曰此馬祖弟子亮座主者乃知長生久視之道人人可以得之初不必老氏之徒也因書置座右以自勵云

書屠覺筆

建炎紹興之間有筆工屠希者曩得名是時大駕在宋都在廣陵又南渡幸會稽錢塘希嘗從駕自天子公卿朝士四方士大夫皆貴希筆一筒至千錢下此不可得晁侍讀以道作詩稱譽之有吳先生師中字茂先得其筆以一與先少師希之技誠絕人入手即熟作萬字不少敗莫能及者後七十餘年予得其孫屠覺筆財價百錢入手亦熟可喜然不二百字敗矣或謂覺利於易敗而速售是不然價既日削矣易敗則人競趨它工覺固不為書者計獨不自為計乎乃書希事庶覺或見之

書二公事

鄭介夫名俠以剛直名天下晚居福清自號一拂居士布衣糲食而雜植華木於舍傍鴈詠自適客至必與飲多不過五爵蔬果之外一肉而已遇貧士過者

亦薄臚之止於千錢飲具皆白蠟或遺以銀盃辭不
取好強客弈碁有辭不能者則留使旁觀而自以左
右手對局左白右黑精思如真敵白勝則左手斟酒
右手引滿黑勝反是如是幾二十年如一日謝昌國
名諤嘗聞道於頤正郭先生居臨江名其廬曰良齋
晨興烹豆腐菜羹一釜偶有肉則縷切投其中客至
亦不問何人輒共食有貧士及醫卜之類飯已輒語
之曰吾無錢予君豈欲詩乎取幅紙作絕句贈之以
爲常二公皆予所鄉慕也予貧甚欲學介夫辦五盃
千錢亦復未易又不解弈碁或可力貧學昌國耳書
之座右當徐圖之紹熙之元十二月八日九曲老樵
書

渭南文集卷第二十五

渭南文集目錄
卷第二十六

真廟賜馮待中詩
高宗賜趙延康御書
高宗聖政草
高宗御書二

又

書崇道菴額

今上皇帝賜包道成御
跋尹耘師書劉隨州集

跋唐御覽詩

跋文武兩朝獻替記

跋杲禪師蒙泉銘

跋修心鑑

跋邵公濟詩

跋坐忘論

跋查元章書

跋高象先金丹訣

又

跋造化權輿

跋天隱子

跋卮菴語

跋老子道德古文

跋關著作行記

跋武威先生語錄
跋司馬子微解松菊法

跋周茂叔通書

跋岑嘉州詩集

跋二賢像

跋山谷先生三榮集

跋硯錄香法

跋唐修撰手簡

跋蔡君謨帖

跋陸鶴銘

跋西峴酬唱集

跋歷代陵名

跋溫庭筠詩集

跋王君儀待制易說

跋崔正言所書書法要訣

跋後山居士詩話

跋佛智與升老書

跋古柏圖

渭南文集卷第二十六

真廟賜馮侍中詩

某家舊藏孝嚴殿繪像先正侍中馮公在焉冠劍偉然與太行黃河氣象相埒每稽首歎曰侍中輔相兩朝更天下大變而社稷尊安夷狄讐服鉏耰萬里無犬吠之警有以也夫晚待罪新定公之孫頌出示章聖皇帝賜詩又以想見一時盛事恨不生其時俯伏沙隄旁窺望風采云

高宗聖政草

某被命修光堯皇帝聖政草初凡例網羅放逸雖寢食間未嘗置也然不敢以稿留私篋暇日偶追記得此命兒輩錄之隆興二年十月一日左通直郎通判鎮江軍府事陸某記

高宗賜趙延康御書

右知金壇縣趙君師舉錄高宗賜其大父延康公書及延康移偽楚書共為一編以示史官陸某某曰延康在宣和靖康間聲望風采震曜一時及守宛丘百戰禦狂虜卒全其城視唐代張巡許遠顏真卿皆過之來朝行在高皇蓋欲以左韃命之議者謂宗室輔政非故事遂止方公之南徙也謝表有云臣本支百世侍從三朝又云堅壁以保近畿慨前功之俱廢登壇而陪盛禮懷曩遇以自憐讀者悲之某又嘗於公從孫師嚴有翼家見公建炎奏議稿一編皆人所至難言者不知此稿皆在鑑堂集中否或可訪於有翼院中以補逸遺敢併以告嘉泰癸亥歲三月丙申臣某謹識

高皇御書一

臣某少時與胡尚書之子杞同學於雲門山中見高皇帝賜尚書御題扇曰文物多師古朝廷半老儒蓋黃體也與此手詔絕相類後數年蒙收召得面天顏距今四十四年矣伏讀寶涕不知所云嘉泰癸亥五

月一日史官臣陸某謹題

臣某伏觀高皇帝御天下幾三十年進用諫官御史皆出聖選故往往往躋至相輔其不合者猶為侍從乃去如施公財任遺補即出守小郡蓋無幾人則其犯顏指不撓於權倖可以想見而上之知人受盡言有仁祖用范仲淹唐介之風矣惜乎施公遽逝去不及召用於虛悲夫開禧乙丑九月一日故史官陸某謹書

今上皇帝賜包道成御書崇道菴額

開禧某年某月甲子皇帝親御翰墨書崇道菴三字賜妙行先生臣包道成以示故史官臣陸某將刻之石具載歲月及被賜之由示天下後世臣某竊聞臣道成寶晉陵人少學黃老之說以劬身濟眾為事寓跡都城三十餘年築堂以居凡以黃冠褐衣至者靡不館之往來千人蓋嘗有神僊異人混於眾中道成獨默識之而不言會稽光孝觀故名乾明天聖間章獻明肅皇后遣中使築之久壞不葺道成談笑復其舊凡都城橋梁道路皆力治之費至緡錢百餘萬建東嶽廟吳山上既成又即其傍築室以奉真武左江右湖氣象雄麗而道院屹立於蕪外鐘磬步虛之聲在雲霄間都人為之心駭神竦於是皇帝聞而異之故有扁榜之賜臣某犬馬之年駸駸九十獲在聖主仁壽域中且嘗獲紬繹三朝金匱石室之藏今雖篤老猶幸未病廢得以紀稀闊盛事豈非幸哉開禧二年歲在丙寅三月某日太中大夫充寶謨閣待制致仕山陰縣開國子食邑五百戶賜紫金魚袋臣陸某昧死稽首再拜謹書

跋尹耘師書劉隨州集

傭書人韓文持束紙支頭而睡偶取視之劉隨州集也乃以百錢易之手加裝褫紹興二十五年正月八日陸某記

尹耘師耕鄉里前輩與九伯父及先君游此集蓋其手抄云紹熙元年七月望某再跋

跋唐御覽詩

右唐御覽詩一卷凡三十人二百八十九首元和學士令狐楚所集也按盧綸墓碑云元和中章武皇帝命侍臣采詩第名家得三百一十篇公之章句奏御者居十之一今御覽所載綸詩正三十二篇所謂居十之一者也據此則御覽為唐舊書不疑然碑云二百一十篇而此纔二百八十九首蓋散逸多矣姑校定訛謬以俟完本御覽一名唐新詩一名選集一名元和御覽云紹興乙亥十一月八日吳郡陸某記

跋文武兩朝獻替記

學者當以經綸天下自期此書不可不見也但傳本繆誤幾不容讀以它書尋繹之十得四五云紹興丙子臘日務觀題

跋吳禪師蒙泉銘

右妙喜禪師為良上人所作蒙泉銘一首住予嘗晨過鄭禹功博士坐有僧焉予年少氣豪直據上坐時方大雪寒甚因從禹功索酒連引徑醉禹功指僧語予曰此妙喜也予亦不辭謝方說詩論兵旁若無人妙喜遂去其後數年予老於憂患志氣摧落念昔之狂痛自悔責然猶冀一見作禮懺悔孰知此老遂棄世而去邪雖然良公蓋一世明眼衲子不知予當時是即今是試為下一轉語隆興政元十一月五日笠

澤漁隱陸某書

跋修心鑑

右高祖太傅公修心鑑一篇初公生七年家貧未就學忽自作詩有神僊語觀者驚焉晚自號朝隱子嘗退朝見異人行空中足去地三尺許邀與俱歸則古僊人嵩山栖真施先生肩吾也因受鍊丹辟穀之術尸解而去然其術秘不傳今惟此書尚存某既刻版傳世并以七歲吟及自贊附卷末庶幾篤志方外之

士讀之有所發焉亦公之遺意也隆興二年七月二日元孫某謹書

跋邵公濟詩

先子入蜀時與邵子文遇於長安同遊興慶池有詩倡酬相得雖甚夜讀公濟詩超然高逸恨未嘗得講世舊與文盟也乾道元年五月十八日笠澤漁隱陸某書

跋坐忘論

司馬子微師體玄先生潘師正體玄師昇玄先生王遠知昇玄師貞白先生華陽隱居陶弘景故體玄語子微曰吾得陶隱居正一法逮汝四世矣乾道二年天慶節借玉隆藏室本傳漁隱子手記

跋查元章書

李份事士大夫謹以故得書帖多不可數然閱其書至不敢與他札借藏者元章吏部一人而已份一吏耳知敬元章如此豈知元章仕於朝既不容去而居幙府又不容自引於數千里外赤甲白鹽之間乃少安嗚呼亦可數也夫丙戌上元後三日漁隱書

跋高象先金丹歌

右玉隆萬壽觀本序言有注解而不傳亦不知序者為何人也丙戌二月八日務觀書

又

國初有高象先淳化中為三司戶部副使少從戚同文學與宗度許驥陳象與郭成範王礪膝涉齊名不言其所終亦不知其鄉里恐即此人然序言名先字象先又似別一人神仙隱顯不可必知聊記之耳辛亥炊熟日書

跋天隱子

最後易簡漸門二說非天隱子本語他日錄本當去之丙戌三月中休傳本於玉隆萬壽宮漁隱東坡先生以為天隱子真司馬子微所著也傳本後二十五年紹熙庚戌冬至日書

跋造化權輿

先楚公著埤雅多引是書然未之見也乾道二年孟夏十八日傳自玉隆藏室甫里陸某謹題

跋老子道德古文

右漢嚴君平著道德經指歸古文此經自唐開元以來獨傳明皇帝所解故諸家盡廢今世惟此本及貞觀中大史令傅奕所校者尚傳而學者亦罕見也予求之踰二十年乃盡得之玉笈藏道書二千卷以此為首漁隱陸某題乾道二年十月十日

跋已菴語

乾道庚寅十月入蜀舟過公安二聖見祖珠長老得此書珠自言南平軍人得法於已菴云

跋武威先生語錄

豐清敏公為中執法論事上前曰司馬光呂公著皆忠賢何為引赦復官赦當及有罪耳無罪何赦也徽祖曰光等變先帝法度非罪乎清敏公頓首曰誠當變無可罪者方元符建中間衆正畢集於朝天下喁喁想望太平清敏公與陳忠肅公俱極諫官御史之選而所以言則有婉直之異吾先大夫楚公每以為二公之論皆不可廢蓋忠肅似孟子說齊而清敏似伯夷諫周其歸一也今觀武威先生之論又甚似清敏百世之下志士仁人得此書讀之當有太息流涕者矣乾道七年立秋日山陰陸某書

跋關著作行記

著作關公出使破中風采峻甚仕者人人震慄莫敢仰視某以孤生起臯籍萬里佐州淺闇滯拙自期且汰去而關公獨厚遇之舉酒賦詩談臺閣舊事志其位之重也公免歸之明年某以事至臥龍山咸平寺長老惠璉言公往有行記今將刻之石因屬某書其末某曰方關公之門可炙手時此書伏不出今公歸臥青城山中賓客解散形勢一變而璉方刻其書為不朽計嗟乎足以愧士大夫矣乾道七年七月七日

左奉議郎通判夔州軍州主管學事陸某謹識

跋司馬子微餌松菊法

乾道初予見異人於豫章西山得司馬子微餌松菊法文字古奧非妄庸所能附託八年又得別本於蜀青城山之丈人觀齋戒手授傳之同志十二月六日笠澤漁翁陸務觀書於玉華樓

跋周茂叔通書

濂谿之生也世但以佳士許之耳既死蒲左轄作誌黃太史作詩其稱述亦不過如此向使無二程先生後世豈知濂谿為大儒傳聖人之道者邪以此知士之埋沒無聞者何可勝計乾道壬辰十二月十五日成都驛南窗書

跋岑嘉州詩集

予自少時絕好岑嘉州詩往在山中每醉歸倚胡床睡輒令兒曹誦之至酒醒或睡熟乃已嘗以為太白子美之後一人而已今年自唐安別駕來攝犍為既畫公像齋壁又雜取世所傳公遺詩八十餘篇刻之以傳知詩律者不獨備此邦故事亦平生素意也乾道癸巳八月三日山陰陸某務觀題

跋二賢像

右孟貞曜歐陽率更二像皆唐人筆墨北湖者吳則禮子傳也無悔者劉蕡無言也最後實先君會稽公茶山先生曾文清公書萬里驛旅不自意全撫卷流涕乾道九年九月既望刻石置漢嘉月榭上山陰陸某識

跋山谷先生三榮集

予集黃帖得贈元師及王周彥三詩甚愛之有黃淑者家三榮見而笑曰紹興中再刻本也舊石方黨禁時已磨毀矣乃出此卷曰是舊石本其筆力精勁蓋如此因錄藏之淳熙之元二月二日務觀書

跋硯錄香法

硯錄舊有本而亡之香法蓋未之見師房者濟南衛

昂也娶婆婆先生崔德符女晚官巴硤死焉乾道辛卯冬予得此編於巫山縣師房手鈔也已腐敗不可讀乃錄藏之後三年淳熙之元二月三十日蜀州漱玉南窗務觀書

跋唐修撰手簡

某之曾外大父質肅唐公守并州故給事中呂公實為幕客質肅為人方嚴少許可或面折人臨川王和甫同時在幕中每言見唐公退輒汗滿握然遇呂公特歡他客莫敢望也淳熙元年某在蜀州得質肅仲子修撰公與給事手帖讀之蓋元祐初修撰使河北給事為御史時也書論黃河市易辭指激烈無一語及其私與世俗責報父客至有違言者何其遠哉修撰字君益元祐中建議棄渠陽城紹聖初坐貶團練副使元符建中之間起守許昌方治事得報召蔡京撫案憤咤即日疽發背卒某不及拜公而先夫人為言公大節如此敢併記之以遺給事之孫教授君云七月二十三日山陰陸某謹書

跋蔡君謨帖

近歲蘇黃米芾書盛行前輩如李西臺宋宣獻蔡君謨蘇才翁兄弟書皆廢此兩軸君謨真行草隸皆備石在仙井可寶也淳熙元年九月八日蜀州手裝

跋瘞鶴銘

瘞鶴銘予親至焦山摹之止有此耳殘璋斷珞當以真為貴豈在多邪淳熙之元九月一日蜀州重裝

跋西峴酬唱集

通直郎張玠河陽人呂汲公家外甥藏書甚富淳熙二年正月八日夜讀此集燈架忽仆壞書時傳畢方一日豈歐尹諸人亦有靈邪記之為異時一笑

跋歷代陵名

三榮守送來近世士大夫所至喜刻書版而略不校讎錯本書散滿天下更誤學者不如不刻之愈也可以一歎淳熙乙未立冬可齋書

跋溫庭筠詩集

先君舊藏此集以華清宮詩冠篇首其中有早行詩所謂雞聲茅店月人跡板橋霜者久已墜失得此集於蜀中則不復見早行詩矣感歎不能自已淳熙丙申重陽日某識

跋王君儀待制易說

王公易學雖出於葆光張先生然得於心者多矣建炎間胡騎在錢塘明越俱陷王公端居於嚴曰虜決不至此且狼狽而歸自此窮天地不復渡江矣其妙於易數蓋如此淳熙丁酉元日山陰陸某書於錦官閣下

跋崔正言所書書法要訣

德符詩名一代書則未之見也觀此編中字瘦健有神采亦類其詩乃知前輩未易以一技名也戊戌重午務觀書

跋後山居士詩話

談叢詩話皆可疑談叢尚恐少時所作詩話決非也意者後山嘗有詩話而亡之妄人竊其名為此書耳後山二子豐登登過江為會稽曹官李鄴降虜登亦被驅以北悲夫淳熙戊戌十月二十四日可齋

跋佛智與升老書

此一編佛智禪師與其法子寒巖升公書也議論超卓殆非世儒所及三復歎仰淳熙己亥三月九日建安雙清堂書

跋古柏圖

此圖吾家舊藏予居成都七年屢至漢昭烈惠陵此柏在陵旁廟中忠武侯室之南所謂先主武侯同閭宮者與此略無小異則畫工亦當時名手也淳熙六年龍集己亥六月一日陸某識

渭南文集卷第二十六

渭南文集目錄
卷第二十七

跋中和院東坡帖
跋漢隸
跋陵陽先生詩草

跋荆公詩
跋續集驗方
跋朝制要覽

跋東坡問疾帖
跋東坡詩草
跋蘇魏公百韻詩

跋孫府君墓誌銘
跋家藏造化權輿
跋三蘇遺文
跋鄭虞任昭君曲

跋兼山先生易說
跋傅正議至樂菴記
跋齊驅集

跋中興間氣集
跋說苑
跋釣臺江公奏議

跋柳柳州集
跋章氏辨誣錄
跋高康王墓誌
跋李深之論事集

先太傅遺像
跋半山集
跋之眾先生稿
跋松陵集

跋李莊簡公家書
跋吳夢予詩編
跋之眾先生稿
跋金奩集

跋王仲言乞米詩
跋韓非子
跋却掃編
跋陝西印章
跋祕閣續帖張長史率意

跋郭德誼墓誌銘
跋郭德誼書
跋王深甫先生書簡
又

跋郭德誼書

跋郭德誼書

跋郭德誼書

渭南文集卷第二十七

跋中和院東坡帖

此一卷皆蘇仲虎尚書所藏鑒定精審無一帖可疑者刻石在成都大聖慈寺中和勝相院淳熙六年六月十七日陸務觀題

跋漢隸

漢隸十四卷皆中原及吳蜀真刻淳熙己亥集於建安公署友人莆陽方士繇伯蕃親視裝褱故無一字差謬者六月二十一日山陰陸某書

跋晁百谷字敘

名者士所願也而或懼太早何哉吾測之審矣少而得名我不能不矜人不能不忌以滿假之心來譏應之口幾何其不蹟也吾元歸年甫二十筆力扛鼎不患無名患太早耳雖然洪道方力張其名而吾獨欲其退避揜覆元歸未必樂也異時出入朝廷更歷世故會當思吾言也夫淳熙庚子二月三日山陰陸某書

跋陵陽先生詩草

右陵陽先生韓子蒼詩草一卷得之其孫籍先生詩擅天下然反覆塗乙又歷疏語所從來其嚴如此可以為後輩法矣予聞先生詩成既以予人久或累月遠或千里復追取更定無毫髮恨迺止則此草亦未必皆定本也大歇菴詩一章徐師川作而先生手錄之亦足見其無昔人爭名之病矣故附見卷中淳熙庚子四月二十二日笠澤陸某書

跋荆公詩

右荆公手書詩一卷前六首贈黃慶基後七首贈鄧鑄石刻皆在臨川淳熙七年七月十七日陸某謹題

跋續集驗方

予家自唐丞相宣公在忠州時著陸氏集驗方故家世喜方書予宦遊四方所獲亦以百計擇其尤可傳

者號陸氏續集驗方刻之江西倉司民為心齋淳熙庚子十一月望日吳郡陸某謹書

先左丞使遼語錄

右先楚公使遼錄一卷三十八伯父手書伯父自幼被疾以左手書然筆力清健如此平生凡鈔書至數百卷云淳熙八年四月五日某謹識

跋朝制要覽

先君會稽公晚歲喜觀此書問為子弟講論因革率至夜分先君捐館舍三十有四年統得此於故廬伏讀悲哽敬識卷末淳熙八年龍集辛丑十一月二十五日山陰陸某書

跋東坡問疾帖

東坡先生憂其親黨之疾委曲詳盡如此則愛君憂國之際可知矣其曰勿使常醫弄疾天下之至言讀之使人感歎彌日淳熙九年五月乙未甫里陸某書

跋東坡詩草

東坡此詩云清吟雜夢寐得句旋已忘固已奇矣晚讀惠州復出一聯云春江有佳句我醉墮渺莽則又加於少作一等近世詩人老而益嚴蓋未有如東坡者也學者或以易心讀之何哉淳熙九年五月二十六日玉局祠吏陸某書於鏡湖下鷗亭

跋孫府君墓誌銘

方五代割裂時自一郡以上非其國子弟則大將功臣也士大夫仕為令掾者已為達官錢氏土境尤盛而孫公至專城蓋其國顯人也觀杜公所述亦誠有以得之矣淳熙壬寅立秋日甫里陸某

跋蘇魏公百韻詩

右首一卷丞相魏公謝事歸第且八十時所作也蘇端明賀趙清獻公得謝啓云念平生之百為一無可恨某於魏公亦云淳熙壬寅立秋日吳郡陸某謹識

跋家藏造化權輿

右造化權輿六卷楚公舊藏有九伯父大觀中題字

淳熙壬寅得之故第廢紙中用別本繅校而闕其不可知者兩本俱通者亦具疏其下六月四日山陰陸某謹記

後十有四年慶元元年八月十二日重校凡三日而畢時年七十一

跋三蘇遺文

此書蜀郡呂商隱周輔所編周輔入朝為史官得唐安守以歸未至家暴卒可悲也淳熙十一年正月十一日務觀識

跋兼山先生易說

郭立之從程先生遊最久程先生病革猶與立之有問答語著於語錄而尹彥明獨謂立之自黨論起即與程先生絕死亦不吊祭蓋愛憎之論也立之子雍字子和屏居峽中屢聘不起亦著易說得其家學蓋程氏易學立之父子實傳之淳熙甲辰二月三十日甫里陸務觀云

後六年得謝昌國所贈頤正先生辨尹公說乃知予此言纔合也頤正即雍也己酉八月二十八日某書

跋鄭虞任昭君曲

自張文潛下世樂府幾絕吾友鄭虞任作昭君曲如羊車春草空芊芊及重瞳光射搔頭偏之類文潛殆不死也但願夕烽長不驚甘泉妾身勝在君王前能道昭君意中事者淳熙甲辰三月二十三日甫里陸某書

跋傅正議至樂菴記

伏波將軍困於壺頭曳病足土室中以望夷賊左右哀之莫不為流涕定遠侯在西城三十年老思土上書自言願生入玉門關詞指甚哀彼封侯富貴矣然戚戚無聊乃如此其他盈滿馳脆畏禍憂誅願為布衣不可得者又何可勝歎然則富貴果不如貧賤之樂邪曰此自富貴者言之耳貧賤之士任則無路處則無食自非有道君子其憂又有甚者矣正議傳

公在學校二十年聲震京師同舍生去為公卿者袂相屬而公始僅得一第既仕矣適時艱難妄男子往往起閭巷取美官公又棄不用則亦何自樂哉及讀所作至樂菴記自道其胸中恢疎磊落所以樂而忘憂者文辭辯麗動人有列禦寇莊周之遺風然後知公蓋有道者或曰使天以富貴易公之樂公其許之乎予曰公所以處貧賤者則其所以處富貴也顏回之簞瓢周公之衮纁一也觀斯文者盍以是求之淳熙十一年七月十六日山陰陸某謹書

跋中興間氣集

高適字仲武此乃名仲武非適也評品多妄蓋淺丈夫耳其書乃傳至今天下事出於幸不幸固多如此可以一數淳熙甲辰八月二十九日放翁書

高適字仲武此集所謂高仲武乃別一人名仲武非適也議論凡鄙與近世宋百家詩中小序可相甲乙唐人深於詩者多而此等議論乃傳至今事固有幸不幸也然所載多佳句亦不可以所託非其人而廢之

跋齊驅集

此集刻版於宣和三年方是時黨禁猶未解文士蓋僅有見者故本多謾然好事者冒法刻之亦奇矣淳熙甲辰重午日陸務觀書

跋柳州集

此一卷集外文其中多後人妄取他人之文冒柳州之名者聊且哀類於此子京右三十一字宋景文公手書藏其從孫最家然所謂集外文者今往往分入卷中矣淳熙乙巳五月十七日務觀校畢

跋說苑

李德芻云館中說苑二十卷而闕反質一卷曾鞏乃分修文為上下以足二十卷後高麗進一卷遂足淳熙乙巳十月六日務觀書

跋章氏辨誣錄

徽宗皇帝盛德大度自秦漢以來人主莫能及者尤在支愛蔡王寬貸章惇而史臣不能發明可為太息淳熙丙午十月望陸某謹題

跋鈞臺江公奏議

某乾道庚寅夏得此書於臨安後十有七年蒙恩守桐廬訪其家復得三表及贈告墓志因併刻之以致平生尊仰之意淳熙十三年十一月十有六日笠澤陸某書

先太傅遺像

先太傅皇祐中以吏部郎中直昭文館自會稽移守新定期年請老得分司西京以歸迨今百四十年而某自奉祠玉局起為是邦實繼遺躅於是知建德縣事蘇君林以父老之請築祠宇於兜率佛寺淳熙十四年春正月丙辰備車旗儀物大合樂奉遺像於祠且以公自贊道帽羽服像刻之堅珉慰邦人無窮之恩朝隱子蓋公自號云元孫朝請大夫權知嚴州軍州事陸某謹書

跋高康王墓誌

王岐公文章閎麗有西漢風而宋常山公書法森嚴實傳鍾張古學方裕陵致孝寶慈極天下養故竝命兩公彰顯高氏先王功烈以詔萬世可以為寵光矣中更亂離而墨本寶藏如新殆有神物護持云淳熙十四年二月三日笠澤陸某謹識

跋半山集

右半山集二卷皆荆公晚歸金陵後所作詩也丹陽陳輔之嘗編纂刻本於金陵學舍今亡矣淳熙戊申上巳日笠澤陸某書

跋李深之論事集

唐丞相司空李公深之論事集有兩本其一本七卷無序其一本一卷史官蔣偕作序然以序考之則偕所序蓋七卷者也淳熙戊申四月十九日笠澤陸某

識

跋李莊簡公家書

李丈參政罷政歸鄉里時某年二十矣時時來訪先君劇談終日每言秦氏必曰咸陽憤切慨慷形於色辭一日平日來共飯謂先君曰聞趙相過嶺悲憂出涕僕不然謫命下青鞵布襪行矣豈能作兒女態邪方言此時目如炬聲如鐘其英偉剛毅之氣使人興起後四十年偶讀公家書雖徙海表氣不少衰丁寧訓戒之語皆足垂範百世猶想見其道青鞵布襪時也淳熙戊申五月己未笠澤陸某題

跋之罘先生稿

肩吾文忠公四世孫博學工文章與予蓋莫逆也晚來行在諸公貴人頗知之欲引置要津有毀之者肩吾既不偶乃調桂陽令去客姑蘇未繫舟暴疾一夕死哀哉嘉父健為人肩吾沒後數年始以進士起家淳熙戊申秋社日放翁書

跋吳夢予詩編

山澤之氣為雲降而為雨勾者伸秀者實此雲之見於用者也予嘗見旱歲之雲乎嵯峨突兀起為奇峯足以悅人之目而不見於用此雲之不幸也君子之學蓋將堯舜其君民若乃放逐顛顛頽頽悲舒憂為風為騷亦文之不幸也吾友吳夢予彙其歌詩數百篇於天下名卿賢大夫之主斯文盟者翕然歎譽之末以示余余慨然曰子之文其工可悲其不幸可吊年益老身益窮後世將曰是窮人之工於歌詩者計吾吳君之情亦豈樂受此名哉余請廣其志曰窮當益堅老當益壯丈夫蓋棺事始定君子之學堯舜其君民余之所望於朋友也娛悲舒憂為風為騷而已豈余之所望於朋友哉淳熙十五年十一月二十六日甫里陸某書

跋松陵集三

淳熙十六年四月二十六日車駕幸景靈宮予以禮

部郎兼膳部檢察賜公卿食訖事作假會陵陽韓籍寄此集來云東都舊本也欣然讀之時寓甄街巷街南小宅之南樓山陰陸某務觀手識

此集蔡景繁舊物復嘗歸韓子蒼子蒼之孫籍以遺子蓋百年前本也

景繁元豐中嘗為開封推官此所題開封南司者是也景繁二子居厚居易此題居厚者其長也景繁臨川人而韓子蒼居臨川故得此書務觀手記

跋王仲言乞米詩

仲言貸米本自欲就魯肅輩人而良齋又戒以勿取陶胡奴米仲言治己可謂嚴而良齋告之亦可謂忠矣數年來仲言以貧甚客長安中豪子資給殊厚今春忽捨去主人叩首乞少留不可豈獨能踐初言亦不負良齋期待矣淳熙己酉四月二十七日陸某務觀書

跋金奩集

飛卿南鄉子入闋語意工妙殆可追配劉夢得竹枝信一時傑作也淳熙己酉立秋觀於國史院直廬是日風雨桐葉滿庭放翁書

跋韓非子

右韓非子一卷紹興丁卯先君年六十時傳吳棫才老本後四十有二年淳熙己酉某重裝而藏之時年六十有五十月九日史院東閣手識

跋却掃編

此書之作敦立猶少年故大抵無紹興以後事淳熙己酉十一月十四日書於儀曹直廬

跋彩選

紹興甲戌七月三日子宅過此彩選畢景丙子二月五日同季思訪務觀雲門山草堂復為此戲子宅記紹興十九年正月十有七日友人王仲言父自京江來以是書為贈醮醮菴記官制左右丞不為平章事自侍郎拜者皆躡遷尚書

此書蓋失之

子宅季思下世忽已數年予今年六十有七覽此太息然予方從事金丹丹成長生不死直餘事耳後五百年過雲門草堂故趾思昔作彩戲豈非夢邪紹熙元年上元日放翁書去子宅題字時三十年矣

跋陝西印章二

紹熙庚戌正月十九日夜閱故書得此追思在南山時已二十年同懷惟周元吉閻才元章德茂張季長及余五人尚亡恙爾附卷累欲放翁題

又十有五年當嘉泰之四年歲在甲子因彙書再觀則元吉才元德茂又皆物故數年矣季長在蜀累歲不得書存亡有不可知者而予年已八十感歎不能已八月十六日務觀書

跋詩稿

此予丙戌以前詩二十之一也及在嚴州再編又去十之九然此殘稿終亦惜之乃以付子聿紹熙改元立夏日書

跋秘閣續帖張長史率意帖

此一帖在故簽書樞密王倫家倫出使時得之故都予少日嘗見之紹熙改元五月甲子甫里陸某識時年六十有六距初見時四十有五年矣

跋王深甫先生書簡二

深甫先生以治平二年七月二十八日卒而此卷未答其弟容季書是年六月一日相距無兩月矣悲夫紹熙元年六月望陸某書

此書朝夕觀之使人若居嚴師畏友之間不敢萌一毫不善意

跋郭德誼墓誌銘

仲晦先生識郭公墓或恨其太簡然吾夫子銘季札曰於虜有吳延陵季子之墓財十字耳至今傳以為寶彼賣菜求益之論可付一數紹熙二年正月二十三日陸某謹書

又

顏魯公麻姑壇記東坡先生經藏記皆有大字小字
兩本蓋用羊叔子峴山故事千載之後陵谷變遷尚
冀其一存爾德誼之名固自不朽然吾元晦爲斯人
計亦至矣豈希呂兄弟孝愛篤至有以發之邪紹熙
二年正月壬申笠澤陸某識

跋郭德誼書

予童子時嘗避兵東陽山中距今六十年予長德誼
三歲計其年可以相從而不及也觀此遺墨爲之太
息紹熙二年正月二十三日笠澤老漁陸某謹書

渭南文集卷第二十七

渭南文集目錄
卷第二十八

跋後山居士長短句
跋蘇氏易傳
跋資暇集
跋法帖

又
王帖
跋蘭亭樂毅論并趙岐
跋蔡肩吾所作蘧府君

墓誌銘
跋京本家語
跋李徂徠集

跋劉文老使君義居遺戒
跋無逸講義
跋東坡帖

跋東坡祭陳令舉文
跋劉凝之陳令舉騎牛
跋東坡七夕詞後
圖

跋張監丞雲莊詩集
跋淵明集
跋陸史君廟籤
跋巴東集

跋呂侍講歲時雜記
跋許用晦丁卯集
跋李涪刊誤
跋歸去來白蓮社圖

跋釋氏通紀
跋毛仲益所藏蘭亭
跋魏先生草堂集
跋王輔嗣老子

跋前漢通用古字韻編
跋曉師顯應錄
跋胡少汲小集

跋范巨山家訓
跋張安國家問
跋坐忘論
跋唐盧肇集

跋居家雜儀
跋皇甫先生文集
跋南堂語
跋注心賦

跋朱新仲舍人自作墓誌
跋黃魯直書

渭南文集卷第二十八

跋後山居士長短句

唐末詩益卑而樂府詞高古工妙庶幾漢魏陳無已詩妙天下以其餘作辭宜其工矣顧乃不然殆未易曉也紹熙二年正月二十四日雪中試朱元亨筆因書

跋蘇氏易傳

此本先君宣和中入蜀時所得也方禁蘇氏學故謂之毗陵先生云紹熙辛亥七月二十日陸某識

跋資暇集

吾家舊有此本先左丞所藏書字簡樸疑其來久矣首曰隴西李巨文濟翁編序字猶成文也久已淪墜忽尤延之寄刻本來為之愴然紹熙二年十一月二十九日陸某識

跋法帖

此本嘗見之清勁可愛及移之石乃爾失真拙工誤人如此乾符元年十一月乃改元此云三月何邪蔡君謨用端字穎字俱非是又何邪紹熙三載正月二十二日三山下漚亭書

又

魯公書殊不類紙乃煙熏周副之語尤俚俗羅紹威用羅氏世寶印犯唐諱益可疑跋語詩句亦鄙甚也君謨豈至是哉惟錢希白字奇古可喜然非題顏帖乃翦它軸附卷後耳

跋蘭亭樂毅論并趙歧王帖

某恭聞太宗皇帝天縱聖學跨軼百王萬幾之餘尤留神翰墨文昭武穆世受筆法有若歧簡獻王得稿書之妙蓋其為學上稽三代兩漢以象其高古下專以晉右將軍王羲之為法以極其變化所藏魯公作文王尊彝伯禽祀文王之器紹聖間詔取藏秘閣宣和博古圖亦列於他周器上又政和中關中發地得

竹簡皆東漢討羌書檄字作草草好事者爭取而王獨多獲之則王之窮深造微豈寒寒書生所及哉至蘭亭脩禊序樂毅論又王所愛玩天下名本王之於書名尊一代固無足異今周器漢札雖不可復見而修禊序樂毅論如魯靈光巋然獨存意有神物護持非適然也王遺墨藏家廟者今雖僅存某嘗獲觀皆奇麗超絕動心駭目往時米芾於書少許可獨推王以為能學古人語在芾所著書畫史王之孫不流以從官長東諸侯懼書家不能盡見是奇蹟迺誼良工併刻樂石置會稽郡齋而屬某書其後惟王歷事累朝典司宗盟嘉言善行不可勝載文章尤長於詩有唐人餘風此特論其書而已紹熙四年正月辛卯中奉大夫提舉建寧府武夷山冲佑觀山陰縣開國男食邑二百戶陸某謹書

跋蔡肩吾所作蓮府君墓誌銘

蔡途肩吾與予同官健為郡文辭字畫皆過人自蜀入吳持予書見友人許昌韓无咎无咎時為吏部侍郎薦之甚力且有除命矣蜀士有排之者肩吾遂從銓部得桂陽令行至吳門暴死舟中每念之未嘗不流涕也不識肩吾者讀此文亦足知其不凡矣蓮昌老字真叟亦佳士蓋與肩吾為方外友云紹熙癸丑立夏日笠澤陸務觀書

跋原隸

故吏部郎宇文卷臣所著卷臣為郎數月坐口語或去晚守臨印廣漢有能名然亦以謗絀遂卒於家可哀也紹熙癸丑四月二十一日老學菴書

跋京本家語

本朝藏書之家獨稱李邕鄴公宋常山公所蓄皆不減三萬卷而宋書校讎尤為精詳不幸兩遭回祿之禍而方策掃地矣李氏書屬靖康之變金人犯闕散亡皆盡收書之富獨稱江浙繼而胡騎南騫州縣悉遭焚劫異時藏書之家百不存一縱有在者又皆零

落不全予舊收此書得自京師中遭兵火之餘一日於故篋中偶尋得之而蟲齧鼠傷殆無全幅綴緝累日僅能成秩乃命工裁去四周所損者別以紙裝背之遂成全書嗚呼予老賴目昏雖不復讀然嗜書之心固未衰也後世子孫知此書得存之如此則其餘諸書幸而存者為予寶惜之紹興戊午十月七日雙清堂書

後五十有七年復脫壞不可挾子聿亟裝緝之持以相示方先少保書此時某年十四今七十矣不覺老淚之濡睫也紹熙甲寅閏月四日第三男中大夫某謹識

跋李徂徠集

中野去魯歸周二詩可以追婉退之琴操而世不甚傳使予得見李公當百拜師之不特願為執鞭而已

紹熙甲寅六月二日書

跋劉文老使君義居遺戒

祥符中天子封禪講墜典以文太平詔求孝義之門於是天下以名聞者數十家遠不過十世獨吾鄉裘承詢自齊梁以來十九世如一日郡國莫先焉吾七友劉文老歿當上一子世其祿而長子復辭以予其季蓋文老所未嘗命者於未嘗命者如此況其所命者乎將見世世守遺訓不墜十九世豈足道哉紹熙甲寅中秋日陸某識

跋無逸講義

按實錄元祐五年二月壬寅適英閣講畢無逸篇詔詳錄所講以進今後具講義次日別進壬寅是月七日也與此卷首所云面奏乞候講畢錄進乃不同恐當以此為正紹熙五年八月十日陸某謹識

跋東坡帖

此碑蓋所謂橫石小字者邪頃又嘗見豎石本字亦不絕大數簡行筆尤奇妙可貴與成都西樓十卷中所書郭熙山水詩頗相甲乙也紹熙甲寅十月二十

三日務觀題

跋東坡祭陳令舉文

東坡前後集祭文凡四十首惟祭賢良陳公辭指最哀讀之使人感歎流涕其言天人予奪之際雖若出憤激然士抱奇材絕識沉壓擯廢不得少出一二則其肝心疑為金石精氣去為神明亦烏足怪彼憤憤者固不知也紹熙甲寅十二月二十九日笠澤陸某謹書

跋劉凝之陳令舉騎牛圖

公卿貴人方黃金絡馬傳呼火城中時欲如二公騎牛山谷蕭散遺物固不可得若予者仕既齟齬及斥歸欲買一黃犢代步其費二萬有畸作欄蓄童又在此外遂一笑而止徒有此生猶著幾兩屐之數乃知一公風流亦未易追也紹熙甲寅十二月二十九日陸某識

跋東坡七夕詞後

昔人作七夕詩率不免有珠櫳綺疏惜別之意惟東坡此篇居然是星漢上語歌之曲終覺天風海雨逼人學詩者當以是求之慶元元年元日笠澤陸某書

跋張監丞雲莊詩集

虜覆神州七十年東南士大夫視長淮以北猶愴荒也以使事往者不復黍離麥秀之悲殆無以慰倉父老心今讀張公為奉使官屬時所賦歌詩數十篇忠義之氣鬱然為之悲慨彌日慶元改元九月二十七日陸某書

跋淵明集

吾年十二四時侍先少傅居城南小隱偶見藤床上有淵明詩因取讀之欣然會心日且莫家人呼食讀詩方樂至夜卒不就食今思之如數日前事也慶元二年歲在乙卯九月二十九日山陰陸某務觀書於三山龜堂時年七十有一 跋陸史君廟籤

昔者龐德公未曾入州府襄陽者舊間處士節獨若豈無濟時策終竟畏罹罟林茂鳥有歸水深魚知聚舉家隱鹿門劉表焉得取

射洪陸史君廟以杜詩爲籤極靈余自蜀被召東歸將行求得此籤後十四年乃決意不復仕宦媿吾宗人多矣紹熙辛亥十二月十日山陰陸務觀書

跋巴東集

予自乾道庚寅入蜀至淳熙戊戌東歸九年間兩過巴東登秋風白雲二亭觀萊公手植檜未嘗不悵然流涕恨古人之不可作也又十有七年慶元丙辰六月二十四日山陰陸某書時年七十二

跋呂侍講歲時雜記

承平無事之日故都節物及中州風俗人人知之若不必記自喪亂來七十年遺老凋落無在者然後知此書之不可闕呂公論著實崇寧大觀間豈前輩達識固已知有後日邪然年運而往士大夫安於江左求新亭對泣者正未易得撫卷累欷慶元二年二月乙卯笠澤陸某書

跋許用晦丁卯集

許用晦居於丹陽之丁卯橋故其詩名丁卯集在大中以後亦可爲傑作自是而後唐之詩益衰矣悲夫慶元丁巳六月四日放翁識

跋李涪刊誤

王行瑜作亂宗正卿李涪盛陳其忠必悔過及行瑜傳首京師涪亦放死嶺南疑卽此人也丁巳七月十六日識

跋歸去來白蓮社圖

予在蜀得此二卷蓋名筆規模龍眠而有自得處季子子聿手自裝褱藏之慶元丁巳中秋前三日放翁識

跋釋氏通紀

予少時避兵東陽山中有沈師者丞相恭惠公之裔

近有僧來往天衣山自言歐陽文忠公家今又得脩公所著釋氏通紀觀之則建炎樞臣盧公諸孫也近世不以世類求人名門大家散而爲方外道人者多矣如脩公旣棄衣冠猶能博學強記寓史氏法於是書亦賢矣夫慶元丁巳重九日放翁陸某務觀識

跋毛仲益所藏蘭亭

龍乘雲氣而上天鳳凰翔於千仞吾見舊定本蘭亭其猶龍鳳邪慶元丁巳十一月二十日笠澤陸某務觀書

跋魏先生草堂集

按國史野陝人沈存中筆談以爲蜀人居陝州不知何所據也予在蜀十年亦不聞野爲蜀人筆談蓋誤也慶元戊午得之書肆十月十九日龜堂病叟手識時年七十有四矣

跋王輔嗣老子

晁以道謂王輔嗣老子題曰道德經不析乎道德而上下之猶近於古此本乃已析矣安知其他無妄加竄定者乎慶元戊午十月晦書

跋前漢通用古字韻編

古人讀書多故作文時偶用一二古字初不以爲工亦自不知孰爲古孰爲今也近時乃或鈔綴史漢中字入文辭中自謂工妙不知有笑之者偶見此書爲之太息書以爲後生戒己未三月二十四日龜堂識

跋胡少汲小集

少汲之兄名僧孺字唐臣在元祐紹聖間亦知名士也少汲十詩中一篇所謂阿兄驚世才者是也周秀實名蔚予亡姑之子及與元祐前輩游紹興十六七年猶士恙有文集數十卷王性之作序少汲倡酬最多班班見於此集秀實有子名曇文者乃翁每稱其穎異自先少師捐館兩家相去地遠不復相聞每爲之惻愴於懷也因讀少汲小集併書之慶元己未七月一日老學菴書

跋曉師顯應錄

法華之為書天不足以喻其大海不足以喻其深利根之士一經目一歷耳自不能捨雖舉天下沮之彼且不動尚何勸相之有哉然人之根性利鈍蓋有如天淵者善知識諄諄告語誘之以福報懼之以禍罰亦有不得已者譬之世法道德風化固足坐致唐虞三代之治矣而賞以進善罰以懲惡亦烏可廢哉觀曉師顯應錄者當作是觀慶元己未立秋日山陰陸某書

跋范巨山家訓

人莫不愛其子孫愛而不知教之猶弗愛也人莫不思其父祖思而不知奉其教猶弗思也使為人父祖者皆如范氏之先為人子孫者皆如吾友巨山世其有不興者乎吾所謂興者天地鬼神與之鄉人慕之學者尊之是為興不然雖門列戟床堆笏德弗稱焉何興之有巨山之子既以文章擢高科公卿將相之儲也故予思廣其意而書其家訓後如此巨山父子不以予為老悖則將有感也夫巨山名中立其子名薰慶元己未八月晦山陰陸某謹書

跋張安國家問

東坡先生書遍天下而黃門公所藏至寡蓋常以為易得雖為人持去不甚惜也紫微張舍人書帖為時所貴重錦囊玉軸無家無之今大宗伯兄弟自為知己家書往來蓋以百計矣相稱相勉期以遠者亦何可勝計而今所存財五紙耳方紫微亡恙時豈亦以為易得故多散逸邪某昔者及為紫微客今老病臥家而大宗伯猶以世舊寄此卷命寓姓名於後某自浮玉別紫微二十六年之間摧頽抵此紫微若尚在而見之且不能識則大宗伯尚何取哉援筆至此慨然不知衰涕之集也慶元五年十一月戊申笠澤陸某書

跋坐忘論

此一篇劉虛谷刻石在廬山以予觀之司馬子微所著八篇今昔賢達之所共傳後學豈容置疑於其間此一篇雖曰簡略詳其義味安得與八篇為比兼既謂出於子微乃復指入篇為道士趙堅所著則堅乃子微以前人所著書淵奧如此道書仙傳豈無姓名此尤可驗其妄予故書其後以祛觀者之惑己未十一月二十一日放翁書

跋唐盧肇集

子發嘗謫春州而集中誤作青州蓋字之誤也題清遠峽觀音院詩作青州遠峽則又因州名而妄竄定也前輩謂印本之害一誤之後遂無別本可證真知言哉病馬詩云塵土臥多毛已暗風霜受盡眼猶明足為當時佳句此本乃以已為色猶為光壞盡一篇語意未必非妄校者之罪也可勝歎哉慶元庚申二月三日放翁燈下書

跋居家雜儀

王性之言熙寧初有朝士集於相藍之燒朱院俄有一人未至問之則王元澤也時荆公方有召命眾人問舍人不堅辭否元澤言大人亦不敢不來然未有一居處眾言居處固不難得元澤曰不然大人之意乃欲與司馬十二丈卜鄰以其修身齊家家事可為子弟法也某聞此語六十年矣偶讀居家雜儀遂識之慶元庚申五月四日書

跋皇甫先生文集

右一詩在活溪中興頌傍石間持正集中無詩詩見於世者此一篇耳然自是傑作近時有容齋隨筆亦載此詩乃云風格殊無可采人之所見恐不應如此或是傳寫誤爾慶元六年五月十七日龜堂書

跋南堂語

予入蜀時南堂入滅已久獨有一二弟子在然皆破齋犯律諸禪皆詆訾之子亦以眾毀意薄其為人及其死也乃卓然穎脫人亦不得而議是誠未易測也

庚申五月壬戌書於龜堂

跋注心賦

世之未通佛說者觀此亦得其梗概矣慶元庚申七月庚申龜堂老人書

跋朱新仲舍人自作墓誌

秦丞相擅國十九年而朱公竄嶠南者十有四年僅免僵仆於炎瘴中耳以此胸中浩然無愧將終自識其墓辭氣山立向使公諂附以苟富貴至莫年世事一變方憂愧內積惟恐聞人道其平日事其能慨然奮筆自敘如此乎慶元六年秋社日笠澤陸某謹書

跋黃魯直書

老子曰豫兮若冬涉川猶兮若畏四鄰山谷此卷蓋有得於此慶元庚申重九日笠澤陸某書

渭南文集卷第二十八

渭南文集目錄
卷第二十九

跋蘭亭序
跋樂毅論

跋李少卿帖
跋李朝議帖

跋東方朔畫贊
跋范文正公書

跋李虞部與范忠宣公啓
跋東坡帖

跋盧衷父絕句
跋王右丞集

跋四三叔父文集
跋歐陽文忠公疏草

跋盤湖圖
跋東坡諫疏草

跋爲琛師書維摩經
跋東坡代張文定上疏草

跋楊處士村居感興
跋朱氏易傳

跋晁以道書傳

跋嵩山景迂集
跋洪慶善帖

跋任德翁藥桴集
跋蒲郎中易老解

跋陸子彊家書
跋火井碑

跋子聿所藏國史補
跋韓晉公牛

跋畫橙
跋米老畫

跋臨帖
跋潘函老帖

跋蘇林帖
跋蔡忠懷送將歸賦

跋陳魯公所草親征詔

跋東坡書髓
長短句後

跋范元卿舍人書陳公寶
跋謝師厚書

跋雲丘詩集後
跋韓忠獻帖

跋呂舍人九經堂詩
跋高大卿家書

渭南文集卷第二十九

跋蘭亭序

觀蘭亭當如禪宗勘辨入門便了若待渠開口堪作什麼識者一開卷已見精蘊或者推求點畫參以耳鑑瞞俗人則可但恐王內史不肯爾余平生見佳本亦多然如武子所藏不過三四真可寶也慶元庚申重九日笠澤陸某書

跋李少卿帖

宣城李氏自推官至今八九世詩人不絕蓋時有如少卿者振起之也慶元庚申九月二十日笠澤陸某書

跋樂毅論

樂毅論縱橫馳騁不似小字瘞鶴銘法度森嚴不似大字此後世作者所以不可仰望也庚申重九陸某書

跋李朝議帖

胡唐臣僧孺少汲直孺兄弟為江西名士其朋友亦皆知名朝議公蓋其一也慶元庚申重九日陸某書

跋東方朔畫贊

元豐間有德州士人攜畫贊示東坡自言二百年前本家藏數世矣東坡為題之曰畫贊世多本惟德州者第一君所藏又為德州第一或曉之曰此言君是德州人耳其人雖不伏亦大笑止因觀武子所藏聊識卷末慶元六年九月甲子陸某務觀書

跋李虞部與范忠宣公啓

某家藏先大父遺書其積背多當時士大夫賤啓刺字不過曰尚書左丞或曰左丞中大而已數十百人無一人異者此建中靖國之元也上距元祐又十餘年風俗淳厚可知況丞相忠宣公與虞部李公之相與親厚者乎宜其不為詔也諸公或以今日耳目求之過矣夫慶元庚申九月二十一日陸某書

跋范文正公書

觀文正范公書札如欲與韓魏公同薦李泰伯見其進賢之誠戒余安道石守道避禍見其愛惜人材之意於虜賢哉然泰伯卒棄不用安道守道俱陷患難或至死不解志士仁人至今以為數信乎明節保身之難也慶元庚申九月二十九日笠澤病叟陸某書

跋東坡帖

成都西樓下有汪聖錫所刻東坡帖三十卷其間與呂給事陶一帖大略與此帖同是時時事已可知矣公不以一身禍福易其憂國之心千載之下生氣凜然忠臣烈士所當取法也予謂武子當求善工堅石刻之與西樓之帖並傳天下不當獨私囊褚使見者有恨也

跋盧衷父絕句

客懷耿耿自難寬老傍京塵更鮮歡遠夢已回窗不曉杏花同度五更寒
盧衷父絕句衷父名蹈青社人今寓健為郡夾江縣佳士也

跋四三叔父文集

先楚公捐館時叔父未成童已從章貢黃先生安時學喪禮覆講無小差蓋天資精敏如此謹附書於遺文之後以示後人

跋王右丞集

余年十七八時讀摩詰詩最熟後遂置之者幾六十年今年七十七永晝無事再取讀之如見舊師友恨間闕之久也嘉泰辛酉五月六日龜堂南窗書

跋歐陽文忠公疏草

慶曆之盛蓋庶幾漢文景矣而賢人君子猶如是之難文忠公之奏議非獨不明諸公之議也身亦墮排陷中滁州之謫是已於虜悲夫嘉泰二年人日笠澤陸某書

跋盤壩圖

紹興己卯庚辰之間予為福州決曹延平張仲欽為
閩縣大夫朝莫相從後四年予佐京口仲欽佐金陵
數以檄往來於鍾阜浮玉間把酒道舊甚樂又二十
年予使閩中仲欽間居延平數相聞方約相過而予
蒙恩召還遂有死生之異言之悵然仲欽之子為西
和守寄此軸來求詩蓋又二十餘年予年七十有七
矣嘉泰改元歲辛酉五月十九日陸某書時予納祿
已三年居會稽山陰之三山

跋為琛師書維摩經

鄉僧琛上座求予書維摩詰所說法欲刻石施四衆
以薦其母會予病不能即如其請琛十返不厭孝哉
此僧吾徒所樂從也乃力疾為書嘉泰壬戌正月二
十一日放翁書

跋東坡諫疏草

天下自有公論非愛憎異同能奪也如東坡之論時
事豈獨天下服其忠高其辯使荆公見之其有不撫
几太息者乎東坡自黃州歸見荆公於半山劇談累
日不厭至約卜鄰以老焉公論之不可揜如此而紹
聖諸人乃遂其伎心投之嶺海必死之地何哉此疏
藏馮氏三世八十年矣真可寶哉嘉泰壬戌二月七
日笠澤陸某謹書

跋東坡代張文定上疏草

張安道實一時偉人以其論新法諫用兵則不得不
為忠以其力排異育深懸石介歐陽文忠公司馬文
正公斥之於前呂正獻公抑之於後則似有可議者
然東坡此疏則自與日月爭光安道之為人與不與焉
元祐初盡起舊老安道獨置不問近臣請加恩禮亦
不報更奪其官徽使議者以為多出正獻公之意云
嘉泰壬戌二月七日笠澤陸某謹書

跋楊處士村居感興

一壺村酒膠牙酸十數胡歛徹骨乾隨著四婆孀子
後杖頭挑去賽蠶官

右畢仲荀景儒所記楊處士詩也四婆即處士之配
也蘇轍季直家有處士夫妻像壘逸如生恨不曾傳
摹得之它日見蘇氏子孫尚可畢此志也嘉泰癸亥
放翁書於三山老學菴北窗

跋朱氏易傳

易道廣大非一人所能盡堅守一家之說未為得也
元晦尊程氏至矣然其為說亦已大異讀者當自知
之嘉泰壬戌四月十二日老學庵識

跋晁以道書傳

晁以道著書專意排先儒故其言多而不通然亦博
矣凡予家所錄本多得於以道孫子闔子闔本自多
誤予方有吏役故所錄失誤又多不暇校定及謝事
居山陰欲得別本參攷又不能致可恨也壬戌四月
十八日老學菴記時年七十八

跋嵩山景迂集

景迂鄭時排悶詩云莫言無妙麗土稚動金門蓋腳
人善作土偶兒精巧雖都下莫能及宮禁及貴戚家
爭以高價取之喪亂隔絕南人不復知此句遂亦難
解可數嘉泰壬戌四月二十四日放翁識

跋任德翁藥桴集

德翁感遇篇云言行身不用無迺我所欲長沙地卑
溼正可高閣足其議賈生可謂善矣所抱如此排擯
至死天下之不幸也壬戌五月一日老學菴書

跋洪慶善帖

某兒童時以先少師之命獲給掃洒丹陽先生之門
退與子威講學則兄弟如也每見子威言洪成季慶
善學行然皆不及識今獲觀慶善遺墨亦足少慰衰
病廢學負師友之訓如媿何嘉泰二年五月丁卯陸
某謹題

跋蒲郎中易老解

易學自漢以後淺微自晉以後與老子並行其說愈
高愈非易之舊宋興有酸棗先生以易名家同時种

豹林亦開門傳授傳至邵康節遂大行於時然康節欲以授伊川程先生乃拒弗受而伊川每稱胡安定王荆公易傳以爲今學者所宜讀惟此二家王公乃自毀其說以爲不足傳著論悔之易之難知如此夜讀蜀蒲公易傳老子解喟然歎曰公於易與老子蓋各自立說述若與晉諸人同而實異也書以遺其族孫申仲試以予言請問信何如也嘉泰二年九月丁卯笠澤陸某書

跋陸子彊家書

吾友伯政持其先君子家問來讀之累日不厭使學者皆能如此孰得而訾病之雖有訾者吾可以無愧矣乃令子聿鈔一通置篋中時覽觀焉嘉泰壬戌十月二十三日宗人某書

跋子聿所藏國史補

子聿喜蓄書至輟衣食不少吝也吾世其有與者乎嘉泰壬戌閏月幾望放翁記時年七十有八以同修國史兼祕書監居六官宅第六位

跋火井碑

予昔在征西幙府嘗得小校言火山軍地枯燥不可耕鋤犁入地不及尺烈火隨出今江吳間穿地尺餘則見水北人聞之亦未必信也夜讀蜀彭君火井碑乃知天地間何所不有亦喜彭君之善記事也嘉泰壬戌閏月十有五日山陰陸某務觀書

跋韓晉公牛

予居鏡湖北渚每見村童牧牛於風林煙草之間便覺身在圖畫自奉詔紬史逾年不復見此寢飯皆無味今行且奏書矣奏後三日不力求去求不聽輒止者有如日嘉泰癸亥四月一日笠澤陸某務觀書

跋畫橙

嘉泰癸亥四月十六日兩朝寶錄將進書予以史官兼祕書監宿衛於道山堂之東直舍茶罷取此軸摩挲久之覺香透指爪此物著霜時予歸鏡湖小園久

矣山陰陸某務觀書

跋臨帖

此書用筆瀟灑多態度如雙鉤鍾王遺書可寶藏也笠澤陸務觀跋時年七十九當嘉泰癸亥四月二十八日居於六官宅老學行庵

跋米老畫

畫自是妙迹其爲元章無疑者但字却是元暉所作觀者乃并畫疑之可歎也嘉泰癸亥四月二十九日陸務觀書

跋潘鹵老帖

潘鹵老詩妙絕世恨不見其字今見此卷無復遺恨矣癸亥五月一日笠澤陸某書

跋薊林帖

先少師使淮南實與薊林向公爲代薊林作雍熙堂於解中堂之前有井泉甘寒宜茶洪駒父聞之寄詩云何如喚取陸鴻漸石鼎風爐來試茶詩與除代堂帖同日到薊林大以爲異手書報先少師今尚在也伏觀公移文委牘稿大節貫金石然諸公所書已可傳世贊書之亦屋下架屋耳而某家世所傳尺補薊林逸事者則不可不書以遺後人嘉泰三年五月十日陸某謹書

跋陳魯公所草親征詔

紹興辛巳壬午之間某由書局西府據親見丞相魯公經綸庶務鎮服中外有人所不可及者然猶不知此詔爲出於公也後四十有三年某行年且八十偶幸未先犬馬獲見公手稿於虜公之謙厚不伐與露才揚己者相去何啻千萬哉追懷盛德大度如巨山喬嶽凜然猶在目前爲之實涕嘉泰三年五月十二日門人前史官陸某謹書

跋蔡忠懷送將歸賦

予讀送將歸之賦爲之流涕不爲蔡氏也宋興百餘年累聖致治之美庶幾三代熙寧元祐所任大臣蓋

有孟楊之學稷禹之忠而朋黨反因之以起至不可復解一家之禍福曲直不足言也為之子孫者能力學進德不為偏諛則承家報國皆在其中矣嘉泰三年五月十五日山陰陸某書於浙江亭

跋東坡書髓

成都西樓下石刻東坡法帖十卷擇其尤奇逸者為一編號東坡書髓三十年間未嘗釋手去歲在都下脫敗甚乃再裝緝之嘉泰二年歲在癸亥九月三日務觀老學菴北窗手記

跋范元卿舍人書陳公實長短句後

紹興庚申辛酉間予年十六七與公實遊時予從兄伯山仲高葉晦叔范元卿皆同場屋六人者蓋莫逆也公實謂予小陸兄後六十餘年五人皆已隔存歿予年七十九而公實即君寤字伯廣者出此軸恍然如與公實元卿聯杖屨均茵憑也為之太息彌日因識其末雖然使死而有知吾六人者安知不復相從如紹興間乎會當相與挈手一笑尚何歎嘉泰癸亥十月二十九日笠澤釣叟陸某書

跋謝師厚書

謝師厚早歲與歐陽充公王荆公梅直講江記注諸人遊名甚盛晚更踳躓居穰下二十餘年學愈進文章愈成獨後諸公死子惜惘惘黃魯直皆知名天下然年運而往士大夫鮮能知師厚者今觀吾友傅漢孺所藏其上世墓刻寶師厚遺文至送行詩雜之宛陵詩中殆不可辨字則宋宣獻父子之流亞也為之太息嘉泰癸亥立春後四日笠澤陸某書時年七十

九

跋雲丘詩集後

宋興詩僧不愧唐人然皆因諸巨公以名天下林和靖之於天台長吉宋文安之於凌雲惟則歐陽文忠公之於孤山惠勤石曼卿之於東都祕演蘇翰林之於西湖道潛徐師川之於廬山祖可蓋不可殫紀潛

可得名最重然世亦以蘇徐兩公許之太過為病餘則徒得所附託故聞後世非能巋然自傳也予觀雲丘詩平淡閑暇蓋庶幾可以自傳者政使不遇呂居仁蘇養直朱希真王性之范至能亦決不泯沒況如予者烏足為斯人重哉其徒覺淨以遺稿來求題其後十款吾門不厭故為之書嘉泰四年二月乙巳笠澤陸某書

跋呂舍人九經堂詩

前輩以文章名世者名愈高則求者愈衆故其間亦有徇人情而作者有識之士多以為恨如呂公九經堂詩蓋自少時與昭德尊老諸公師友淵源講習漸漬所得又為其子孫而發故雄筆大論如此於虛凜乎其可敬畏也哉嘉泰四年六月庚子陸某書

跋韓忠獻帖

方曩霄犯邊時忠獻王首當禦戎重任功冠諸公後入輔帷幄陳謀畫策駕馭人材鎮服虜情自曾集賢以降皆協贊而已觀此帖可槩見也嘉泰四祀六月辛丑故史官山陰陸某謹識

跋高大卿家書

子長大卿娶予表從母之女故自少時相從後又同入征西大幕情分至厚讀此數書如見其長身蒼髯意象軒舉也嘉泰甲子歲夏六月壬寅放翁陸某書

渭南文集卷第二十九

渭南文集目錄

卷第三十

跋諸晁書帖

詩文後

跋南城吳氏社倉書樓
跋六一居士集古錄跋

尾

跋米元暉書先左丞海岱樓詩

跋林和靖詩集

跋蘇丞相手澤

跋韓幹馬

跋義松

跋林和靖帖

跋東坡集

跋陶靖節文集

跋三近齋餘錄

跋望江麴君集

跋吳越備史

又

跋僧帖

跋御師帖

跋松陵倡和集

跋潛虛

跋呂成未和東坡尖叉韻雪詩

跋花間集

又

跋韓晉公字母牘

跋韓立道所藏蘭亭序

跋龔氏金花帖子

跋曾文清公奏議稿

跋曾文清公詩稿

跋魚計賦

跋徐待制詩稿

跋周益公詩卷

跋樊川集

跋周侍郎奏稿

跋周侍郎尋姊妹帖

跋鮑參軍文集

跋南華真經

跋與周監丞書

再跋皇甫先生文集後

跋漢文帝後元年三月詔

跋張魏公與劉察院帖

跋世父大夫詩稿

渭南文集卷第三十

跋諸晁書帖

某之外大母清豐君實巨茨先生女兄而墓刻則景迂先生所作故某每見昭德及東眷中表每感愴也况今行年八十飾巾待盡伏讀此卷其情可知嘉泰甲子六月既望山陰陸某謹識

跋南城吳氏社倉書樓詩文後

南城吳君子直兄弟作社倉略倣古者斂散之法築書樓用爲子孫講習之地其設意深遠流俗殊未易測也或者乃謂吳氏捐貲以爲社倉凶歲免民於死徙其有德於人甚大後世當有興者子孫不學則不足以承之此其築書樓之意使吳氏之意信出此乃市道也市道不可以交鄉黨自好之士其可以與天交乎吳君之意蓋曰吾爲是舉非一世也吾兄弟他日要當付之後人人不可知吝則齎出貪則漁利怠荒則廢事雖面命之或不聽於遺言何有惟學則免是三者之患而社倉雖百世可也此吾兄弟之本指若夫富貴貧賤我且不能自知乃爲後人謀而責報於荒忽不可致詰之地亦愚矣吳君遺書行千餘里示予以社倉本末因及諸公書樓紀述予慨然數以爲知吳君兄弟心者莫予若也故書之嘉泰四年六月某日山陰陸某書

跋六一居士集古錄跋尾

始予得此本刻畫精緻如見真筆會有使入蜀以寄張季長及再得之纔相距數年訛闕已多知古人欲傳遠者必託之金石有以也夫嘉泰甲子六月二十二日笠澤陸某謹識

跋林和靖詩集

和靖人物文章初不賴東坡公以爲重況黃秦哉若李端叔者尤不足錄讀竟使人浩歎書之所以慰和靖於泉下也嘉泰甲子六月二十四日放翁識

跋米元暉書先左丞海岱樓詩

右米侍郎元暉書先大父題海岱樓詩一首春秋公羊傳曰山川有能潤於百里者天子秩而祭之觸石而出膚寸而合不崇朝而徧雨乎天下者惟泰山爾故大父云起爲霖雨從膚寸蓋言徧雨天下之澤自膚寸而始也米所書誤以從爲成遂失本意可爲太息嘉泰四年秋八月壬寅山陰陸某書於三山老學菴

跋蘇丞相手澤

某之先大父左丞平生所尊事願學者惟丞相魏公每爲門生言國朝輔相德量巋然莫如魏公與王文貞公日所謂築太平之基壽宗社之脈養天下之氣者他相雖賢莫敢望觀此奏稿可概見也嘉泰四年秋八月丙辰山陰陸某謹識

跋韓幹馬

大駕南幸將八十年秦兵洮馬不復可見志士所共歎也觀此畫使人作關輔河渭之夢殆欲實涕矣嘉泰甲子十月二十一日山陰陸某書

跋義松

黃子邁之爲蓮城以最聞予以相距遠不能知其詳然草木無知造物無心太平無象其所感猶如此則是邑之民其有以不友不敬至庭造獄者乎予將求諸邑人而紀之未暇也嘉泰甲子歲十一月甲子山陰陸某書

跋林和靖帖

祥符天禧間士之風節文學名天下者陝郊魏仲先錢塘林君復二人又皆工於詩方是時天子修封禪告太平有二人在天下麟鳳芝草不足言矣君復書法又自高勝絕人予每見之方病不藥而愈方飢不食而飽忽得觀上竺廣慧法師所藏二帖不覺起敬立法師能捐一石刻之山中使吾輩皆得墨本以刮目散懷亦一奇事也嘉泰甲子歲十二月丁卯山陰

陸某務觀書

跋東坡集

此本藏之三十年矣嘉泰甲子歲十二月遺燼幾焚之子緝成編比舊本差狹小乃可愛遂目之曰焦尾本云十四日山陰陸某書

跋陶靖節文集

張績季長學士自遂寧寄此集來道中失調護前後皆有壞處遂去之而存其偶全者未有年譜辨正別緝為編云開禧元年正月四日務觀書

跋二近齋餘錄

右外兄元城王正夫所作正夫名從元豐中書舍人震字子發之子仕至上饒守云開禧改元正月庚申務觀識

跋望江麴君集

徐常侍鼎臣送望江張明府詩云無使千年後空傳麴令名則麴令之名在唐著矣開禧改元歲乙丑二月二十七日山陰陸務觀書時年八十有一

跋吳越備史

錢氏諱佐故以左為上凡官名左字者悉改為上此書所謂上右者乃左右也

又

吳越在五代及宋興最為安樂少事然廢立誅殺猶如此方斯時吾家先世守農桑之業於魯墟梅市之間無一人仕於其國者真保家之法也開禧乙丑九月四日山陰陸某書於三山書巢

跋僧帖

方外之士發揚其先德累世不懈吾輩亦可少愧矣開禧乙丑九月五日陸某書贈觀師余年八十一識其家四世矣安得不為陳人乎因以寓歎

跋卿師帖

本朝小楷至宋宣獻後僅有道士陳碧虛一人今見吾里中前輩卿師所書則蕭散小不逮碧虛而法度

森嚴無媿者亦名筆也後人善藏之開禧元年乙丑歲九月丁亥山陰陸某務觀題時年八十有一

跋松陵倡和集

皮襲美當唐末遷於吳越死焉有子光業為吳越相子孫業文不墜家聲至襲美四世孫公弼以進士起家仕慶曆嘉祐間為韓魏公所知雖不甚貴顯亦當世名士也方吳越時中原隔絕乃有妄人造謗以謂襲美隱節於巢賊為其翰林學士新唐書喜取小說亦載之豈有是哉比唐書成時公弼已死莫與辨者可歎也開禧元年九月十四日山陰陸某務觀書於

松陵倡和集之後

跋潛虛

學者必通易乃能以其緒餘通玄玄既通矣又以其餘及虛非可以一日驟得也劉君談虛如此則其於易與玄可知矣司馬丞相乃謂己學不足知易故先致力於玄蓋謙云耳開禧乙丑十一月十八日笠澤陸某書

跋呂成未和東坡尖叉韻雪詩

古詩有倡有和有雜擬追和之類而無和韻者唐始有之而不盡同有用韻者謂同用此韻耳後乃有依韻者謂如首倡之韻然不以次也最後始有次韻則一皆如其韻之次自元白至皮陸此體乃成天下靡然從之今蘇文忠集中有雪詩用尖叉二字王文公集中又有次蘇韻詩識者謂非二公莫能為也通判澧州呂文之成未乃頓和百篇字字工妙無牽強湊泊之病成未詩成後四十餘年其子棫乃以示予予固好詩者然讀書有限用力勤薄觀此集有愧而已乃書集後而歸其本呂氏開禧元年乙丑十一月丙

申笠澤陸某務觀書

跋花間集

花間集皆唐末五代時人作方斯時天下岌岌生民救死不暇士大夫乃流宕如此可歎也哉或者亦出

於無聊故邪笠澤翁書

又

唐自大中後詩家日趣淺薄其間傑出者亦不復有前輩闕妙渾厚之作久而自厭然格於俗尚不能拔出會有倚聲作詞者本欲酒間易曉頗擺落故態適與六朝跌宕意氣差近此集所載是也故歷唐季五代詩愈卑而倚聲者輒簡古可愛蓋天寶以後詩人常恨文不迨大中以後詩衰而倚聲作使諸人以其所長格力施於所短則後世孰得而議筆墨馳聘則一能此不能彼未易以理推也開禧元年十二月乙卯務觀東籬書

跋韓晉公于母墳

予平生見三尤物王公明家韓幹散馬吳子副家薛稷小鶴及此子母牛是也不知未死間尚復眼中有此奇偉否開禧二年四月甲子陸務觀老學菴北窗書

跋韓立道所藏蘭亭序

觀此本蘭亭如見大勳業鉅公於未央庭中大冠若箕長劍柱頤風采凜凜雖單于不覺自失況餘子有不汗洽股栗者哉開禧丙寅歲四月十有三日陸某年八十二

跋龔氏金花帖子

右龔氏家藏其先世金花帖子嘉泰中陳翰林考質史謀以為先書姓名散報始於端拱中宋太素尚書知貢舉時自建隆至端拱取士已久始克舉此故事然予按宋公有追念策名時詩凡千言略云吉音來碧落帖子報紅牋清夜驚神王瞻明到省前風中宮漏盡日出勝繩懸宋公蓋建隆二年進士則國初已有前一夕報帖之事唐制初未嘗廢若曰五代草創止用紅牋至端拱初乃加金華如唐時則亦細事耳不得云始舉唐故事也世必有知者予復書此於後以待博洽君子云開禧丙寅夏四月丙寅山陰陸某

書

跋曾文清公奏議稿

紹興末賊亮入塞時茶山先生居會稽禹跡精舍某自勅局罷歸略無三日不進見見必聞憂國之言先生時年過七十聚族百口未嘗以為憂憂國而已後四十七年先生曾孫黯以當日疏稿示某於今某年過八十忝忝近列又方王師討殘虜時乃不能以塵露求補山海真先生之罪人也開禧二年歲在丙寅五月乙巳門生山陰陸某謹書

跋曾文清公詩稿

河南文清公早以學術文章擅大名為一世龍門顧未嘗輕許可某獨辱知無與比者士之相知古蓋如此方西漢時專門名家之師衆至千餘人然能自見於後世者寡矣揚子惟一侯芭至今誦之故識者謂千人不為多一人不為少某何足與乎此讀公遺稿不知衰涕之集也開禧丙寅歲五月乙巳門生笠澤陸某謹識

跋魚計賦

某恭聞徽祖宣和未將下罪己詔學士王孝迪當直不召願謂輔臣曰非小字不能作遂召肅愍公公初不在北門既至辭以非職守不許遂授以聖意下筆聲不數刻進御今載在國史與三代訓誥並驅蓋千百年間詔令所未有也晚讀魚計堂賦瞻麗超軼如此則施之大手筆固宜絕人遠甚某嘗見公遺像於友人趙恬家英氣如生恨不得獨拜牀下致欣慕之意今得記所聞於賦後亦幸矣開禧二年六月己巳笠澤老民陸某謹書

跋徐待制詩稿

予以乾道庚寅入蜀幾十年而歸故人在朝者惟許昌韓无咎握手道舊因相與論當世知名士无咎獨稱待制徐公以為文辭辨論有貞元元和間諸賢之遺風恨予不及識因誦其詩句信奇作也後三十年

徐公之子植以遺稿一編示予屬以序引予與待制雖出處不同時然嘗歎愛其筆墨則亦願託名卷首而待制之文既於火所餘財百之二則序亦無自作乃姑書此附於後它日得全書紬繹其妙處而論載之尚未晚也開禧二年六月某日山陰陸某書

跋周益公詩卷

紹興辛巳予與益公相從於錢塘去題此詩時十一年予年三十七益公少予一歲後二年相繼去國自是用捨分矣今益公捨我去所不知者相距幾何時耳開禧丙寅九月二十五日山陰陸某謹識

跋樊川集

唐人詩文近多刻本亦多經校讎惟牧之集謾繆特甚予每欲求諸本訂正而未暇也書以示子通尚成吾意開禧丙寅十一月二十七日放翁書

跋周侍郎奏稿

某生於宣和末未能言而先少師以畿右轉輸饑軍留澤潞家寓滎陽及先君坐御史徐秉哲論罷南來壽春復自淮徂江間關兵間歸山陰舊廬則某少長矣一時賢公卿與先君遊者每言及高廟盜環之寇乾陵斧栢之憂未嘗不相與流涕哀慟雖設食率不下咽引去先君歸亦不復食也伏讀侍郎周公論事勝子猶想見當時忠臣烈士憂憤感激之餘風於虜建炎紹興間國勢危蹙如此而內平羣盜外捍強虜卒能披草莽立社稷者諸賢之力為多某故具載之以勵士大夫儻人人知所勉則北平燕趙西復關輔實度內事也開禧丁卯歲正月丁亥故史官陸某謹書

跋周侍郎尋姊妹帖

方建炎多故羣盜如林士大夫家罹禍有盡室不知在亡者觀周公所書可為流涕六七十年來在仕在野皆安其生養老者字幼者藏死者可不知所自邪尚勉思所以報開禧二年正月丁亥山陰陸某書

跋鮑參軍文集

鮑明遠宋元嘉中人比陶淵明謝靈運差為晚出然與靈運詩名相埒體製亦頗相類故世稱鮑謝云開禧三正九放翁書

跋南華真經

南華真經并音二冊籤題皆友人莆陽方伯謨書伯謨下世已二年矣哀哉開禧丁卯二月四日老學菴識

跋與周監丞書

某頃得監丞公書作報如此後二十餘年公家持以來屬以題數字於後乃為記歲月公諸子多賢不幸有早世者今惟主簿君以力學承其緒他日仕途有斬然頭角者必吾主簿君恨耄期已迫不及見之耳開禧三年三月丙子渭南伯陸某書於山陰澤中老學菴

再跋皇甫先生文集後

司空表聖論詩有曰愚嘗覽韓吏部詩其驅駕氣勢掀雷決電撐挾於天地之垠物狀其變不得鼓舞而徇其呼吸也其次皇甫祠部文集外所作亦為道逸非無意於深密蓋或未違爾據此則持正自有詩集孤行故文集中無詩非不作也正如張文昌集無一篇文李習之集無一篇詩皆是詩文各為集耳表聖直以持正詩配退之可謂知之然猶云未違深密非篤論也予讀之蓋累歎云開禧丁卯四月二十一日某再書

跋漢文帝後元年三月詔

漢文此詔與詩之七月書之無逸何異吾以此知文景太平之有自也雖然豈獨為天下哉十室之邑十金之產儻能思是言其有至於喪敗者乎庚申五月十七日陸某書

跋張魏公與劉察院帖

與人同功人用而已捨君子不敢言勞與人同鼻人

免而已窮君子不敢逃責非能異夫人也理固如是也
也不然則士恥已使御史公無恙得予此說其將以
爲能知言乎

跋世父大夫詩稿

世父大夫公自幼得末疾以左手作字性喜鈔書嘗
鈔王岐公華陽集百卷筆筆無倦意豈特其書可貴
重哉亦可見其爲人矣

渭南文集卷第三十

渭南文集目錄

卷第三十一

跋魯直書大戴踐阼篇

跋唐昭宗賜錢武肅王鐵券文

跋司馬端衡畫傳燈圖

跋呂伯共書後 跋張敬夫書後

跋劉戒之東歸詩 跋秦淮海書

跋柳書蘇夫人墓誌

跋朱希真所書雜鈔

跋爲子通書詩卷後

跋呂文靖門銘 跋傅給事竹友詩稿

跋陳伯予所藏樂毅論

跋伯予所藏黃州兄帖

跋詹仲信所藏詩稿

跋陳伯予所藏蘭亭帖 跋山谷書陰真君詩

跋坡谷帖

跋呂尚書帖 跋傅給事帖

跋熊舍人四六後 跋臨汝志

跋尼光語錄 跋程正伯藏山谷帖

跋張待制家傳 跋柳氏訓序

跋祠部集 跋消災頌

跋肇論 先楚公奏檢

跋宗元先生文集 跋韓子蒼語錄

跋孟浩然詩集 跋出疆行程

跋李衛公集 跋徐節孝語

跋趙渭南詩集 跋石鼓文辨

跋西峴酬唱集 跋兼山家學

跋淮海後集 跋張季長中庸辨釋

跋法書後 跋李太白詩

跋重廣字說 跋巖壑小集

跋王元澤論語孟子解

渭南文集卷第三十一

跋魯直書大戴踐阼篇

上古之文幸不泯者率非後世所可及不必壞魯壁發汲冢而得之乃可信也丹書之辭如此武王之銘如此雖微大戴禮載之可置疑哉某鄉先生傳公子駿為學者言洪範自無偏無黨至歸其有極三十二字皆古所傳為人君之常訓箕子申以告武王吳棫才老著尚書裨傳以為得此說於虞仲琳少崔少崔學於傅公此三十二字與丹書二十九字一傳於箕子一傳於師尚父武王敬受力行之卜世卜年之永有所自矣開禧三年五月辛卯故史官陸某識於黃太史所書踐阼篇後以遺廬陵彭君孝求

跋唐昭宗賜錢武肅王鐵券文

某按唐昭宗乾寧四年遣中使焦楚錚賜吳越武肅王鐵券以八月壬子至國是歲武肅始兼領鎮東節出師大敗淮南兵十八營定娶睦蘇湖州而鐵券適至蓋其國始盛時也及忠懿王入朝以其先王所藏玉冊鐵券置之祖廟不敢以自隨淳化元年杭州悉上之於朝時忠懿王已薨太宗皇帝復以冊券賜王之子安僖王惟濬安僖王薨券歸文僖公惟演文僖公薨券傳仲子霸州防禦使晦霸州侍仁宗皇帝燕間帝問先世所賜鐵券欲見之霸州并三朝御書以進帝為親識御書之末復賜焉文僖之孫開府公景臻尚秦魯國大長公主某年十二三時嘗侍先夫人得謁見大主鐵券寶藏臥內狀如箭瓦今七十餘年乃得見錄本於武肅諸孫樞家後十字蓋文僖手書某家舊藏文僖書帖亦有押字皆與此同武勝軍節度使印則文僖尹洛時所領鄧州節鉞也開禧三年六月乙巳山陰陸某謹書

跋司馬端衡畫傳燈圖

司馬六十五丈抱負才氣絕人遠甚方少壯時以黨

家不獲施用於時欲有以寓其胸中浩浩者遂放意於畫落筆高妙有顧陸遺風某嘗以通家之舊親聞其論畫衰終日如孫吳談兵臨濟趙州說禪何其妙也每恨是時不能記錄一二以遺後之好事者今獲觀傳燈圖况如接言論風指時稽首太息不能自已開禧丁卯歲十月丁未山陰陸某謹題

跋呂伯共書後

紹興中某從曾文清公遊公方館甥呂洽先日相與講學洽先有子未成童卓然穎異蓋吾伯共也後數年伯共有盛名從之學者以百數不幸中道奄忽而子幾九十尚未死攬其遺墨大抵忠信篤敬之言也為之涕下開禧丁卯歲十二月乙巳山陰陸某書

跋張敬夫書後

隆興甲申某佐郡京口張忠獻公以右丞相督軍過馬先君會稽公嘗識忠獻於豫南鄭時事載高皇帝實錄以故某辱忠獻顧遇甚厚是時敬父從行而陳應求參贊軍事馮國仲查元章館於予廨中蓋無日不相從迄今讀敬父遺墨追記在京口相與論議時真隔世事也開禧丁卯十二月乙巳山陰陸某書

跋劉戒之東歸詩

乾道中予與戒之同在宣撫使幙中同舍十四五人宣撫使召還予輩皆散去范西叔宇文叔介最先下世其餘相繼凋落至開禧中獨予與張季長猶存今春季長復考終於江原予年開九秩獨幸未書鬼錄偶得戒之郎君市征君所藏送行詩觀之恍然如隔世事也為之流涕丁卯十二月乙丑渭南伯陸某書於山陰老學菴

跋秦淮海書

黃豫章秦淮海皆學顏平原真行豫章晚尤自稱許淮海則退避不肯以書自名亦各行其志也嘉定改元四月己酉山陰陸某書

跋柳書蘇夫人墓誌

近世注杜詩者數十家無一字一義可取蓋欲注杜詩須去少陵地位不大遠乃可下語不然則勿注可也今諸家徒欲以口耳之學揣摩得之可乎書家以鍾王為宗亦須升鍾王之堂乃可置論耳爾來書法中絕求柳誠懸輩尚不可得書其可遽論哉然予為此言非獨觸人亦不善自為地矣覽者當粲然一笑也嘉定元年四月己酉陸某書

跋朱希真所書雜鈔

朱先生與諸賢當建炎間裔夷南牧羣盜四起時猶相與講學如此吾輩生平世安居鄉里乃欲飽而嬉可乎嘉定之元四月乙酉陸某書於山陰老學菴時年八十有四

跋為子適書詩卷後

子適持正紙求錄詩期年矣以乃翁衰疾不忍迫處予更以此念之為寫終此卷然此兒近者時時出所作皆大進論建安黃初以來至元和後詩人皆有本未歷歷可聽吾每為汗出因併記之嘉定戊辰歲五月乙巳放翁書時年八十有四

跋呂文靖門銘

一言可以終身行之者其恕乎此聖門一字銘也詩三百一言以蔽之曰思無邪此聖門三字銘也其簡且盡如此學者苟能充之雖入聖域不難矣丞相申國文靖呂公作門銘自忠孝十有八字廣吾夫子之訓以遺後人某得本於公元孫祖平敢再拜書其後致願學之意嘉定元年夏五月辛亥山陰陸某謹識

跋傅給事竹友詩稿

王逸少寫經換鵝給事傅公籠鵝換竹二者皆山陰勝絕事然換鵝事人皆能道之換竹事未甚著鄉人以為恨獨某曰是不足怪也逸少志在物外不肯輕為世用故換鵝事易傅給事方南渡之初忠義大節為一時稱首雖困於讒誣用之不盡然至今聞其風者可立衰懦則換竹事固應不傳蓋所見於世者大

也給事遺文百卷今藏秘閣某領策府時見之嘉定元年七月庚申陸某謹識

跋陳伯予所藏樂毅論

世傳中山古本蘭亭之流帶右天五字有殘闕處於是士大夫所藏蘭亭悉然又謂樂毅論古本至一海字止於是凡樂毅論亦至海字而亡其餘妄偽亂真大抵如此今伯予此軸皆佳後一本尤數腴可愛未可以海字為定論也嘉定戊辰歲七月己未山陰陸某務觀書時年八十有四

跋伯予所藏黃州兄帖

某之從父兄故黃州使君遺墨伯予書其後發揚大節至矣伏讀感涕不知所云先兄諱沈字子東仕至朝奉大夫嘉定元年七月己未山陰老民陸某謹書

跋詹仲信所藏詩稿

予平生作詩至多有初自以為為可他日取視義味殊短亦有初不滿意熟觀乃稍有可喜處要是去古人遠爾詹仲信何處得予斷稿以見示為之屢歎乃題其後歸之嘉定改元六月壬辰山陰陸某務觀書於

三山老學菴年八十四

跋陳伯予所藏蘭亭帖

予監定此本自是絕佳然亦不必云唐舊刻也卷末數跋皆吾友王君玉所錄黃太史魯直語竊恐未必然蓋周孔無過蘭亭筆法亦無過學者步亦步趨亦趨猶或失之豈可以輕心慢心觀之哉若以夫子嘗自謂有過孟子云周公之過遂據以為周孔有過乃醉夢中語也嘉定改元十月庚午陸某書

跋坡谷帖

先大父左轄元祐中自小宗伯自請守穎逾年移南陽而蘇公自北扉得穎與大父為代此當時往來書也書三幅前後二幅藏叔父房其一幅則從伯父彥遠得之亡兄次川又得於伯父此是也傳授明白可以不疑而或者疑其出於摹倣識真者寡前輩所數

嘉定元年十二月乙亥山陰陸某謹識

跋山谷書陰真君詩

此石刻在夔州漕司白雲樓下黃書無出其右者嘉定己巳四月辛卯放翁書

跋呂尚書帖

右尚書呂公給事傅公往來書二卷書曰昔先正保衡作我先王語曰起予者商也蓋臣當有以作其君弟子當有以起其師而況朋友之際乎二公可謂無負於古道矣使此書廣傳安知百世之下無興起者嘉定己巳秋七月辛亥山陰陸某謹識

跋傅給事帖

紹興初某甫成童親見當時士大夫相與言及國事或裂皆嚼齒或流涕痛哭人人自期以殺身翊戴王室雖醜裔方張視之蔑如也卒能使虜消沮退縮自遣行人請盟會秦丞相檜用事掠以為功變恢復為和戎非復諸公初意矣志士仁人抱憤入地者可勝數哉今觀傅給事與呂尚書遺帖死者可作吾誰與歸嘉定二年七月癸丑陸某謹識

跋熊舍人四六後

裕陵見伯通外制手批付中書曰熊本文詞朕自知之荆公亦曰讀熊君奏報如面相語

跋臨汝志

歐陽澈字德明撫州臨川人徙崇仁金虜犯闕上書請身使虜庭馭親王以歸不報建炎初伏闕上書論大臣誤國太學生陳東亦上書所言略同遂併誅二人年三十一車駕渡江贈承事郎紹興初贈朝奉郎祕閣修撰官其二子賜田十頃

跋尼光語錄

予登豫章西山其上蓋有光禪師塔焉及來成都又得師所說法要博辯奇偉雷震一世猶有蜀忠文公立朝堂堂不撓於死生禍福之遺風信其為范氏女子也笠澤漁隱陸某

跋程正伯所藏山谷帖

此卷不應攜在長安逆旅中亦非貴人席帽金絡馬傳呼入省時所觀程子他日幅巾筇杖渡青衣江相羊喚魚潭瑞草橋清泉翠樾之間與山中人共小巢龍鶴菜飯掃石置風爐煮蒙頂紫茁然後出此卷共讀乃稱爾

跋張待制家傳

待制公蹟於仕宦晚途僅得一郎吏而感激國難冒兵渡河北行忠義之氣可沮金石方其客死靈丘寓骨雲中時雖夷狄異類亦為賈涕也今其家寢微一孫未去天官侍郎選公卿大夫乃未有表出之以為忠義勸者誠某所不識也

跋柳氏訓序

方拙之為是書也璫已長矣詩曰誨爾諄諄聽我藐藐悲夫

跋祠部集

祠部叔祖詩文至多今皆不傳此小集得之書肆蓋石氏所藏也某謹識

跋消災頌

高道傳言此頌蓋武陵張尊師作尊師亦號白雲子豈以此故遂誤為子微乎玉笈齋書

跋肇論

高僧傳肇公化時年三十一耳所著書乃傳百世吾曹老而無聞可愧也

先楚公奏檢

舊有海陵時錄白元本巨編大字有先左丞親書更定處今不復存此本紹興中先少師命筆史傳錄者某識

跋宗元先生文集

宗元先生吳貞節唐史有傳以歌詩名天寶中此一卷蓋見雲章寶室云放翁書

跋韓子蒼語錄

此故人范季隨周士所記也周士沒後數年得之於其子然余舊聞周士道韓公語極多尚恐所記不止於此當更訪之

跋孟浩然詩集

此集有示孟郊詩浩然開元天寶間人無與郊相從之理豈其人偶與東野同姓名邪晁伯以謂岳陽樓止有前四句亦似有理

續考之伯以之說蓋不然大抵浩然四十字詩後四句率覺氣索如洞庭寄閩九歲莫歸南山之類皆然杜少陵評浩然詩云新詩句句盡堪傳豈當時已有此論故少陵為揜之邪

適越留別譙縣張主簿詩初云得與故人會後云浮雲去吳會此亦是吳與會稽也

跋出疆行程

此一書蓋陳魯公出使時官屬所記不知為何人也文詞雖鄙淺事頗詳洽故錄之

淳熙己酉秋錢愷之子端忠為金部外郎予在儀曹與之同廊日會食嘗問此書誰所作端忠云刁雍也雍字文叔頗有文不應鄙淺如此恐未必然也故翁書

跋李衛公集

章執誼之為人順宗實錄及唐書載之甚詳正人所唾罵也今觀李衛公祭文稱譽之乃如此衛公之言固過矣史官所書無乃亦有溢惡者乎毀譽之可疑如此者多矣可勝歎哉執誼作相時實錄言嘗遷中書侍郎同平章事而史不書衛公又以為僕射雖小節亦聊附見於此

跋徐節孝語

仲車名在天下孰不知尊仰者雖無蘇公所云可也况它人乎此集前後所載悉當削去陸某識

跋趙渭南詩集

唐人如章蘇州五字趙渭南唐律終身所作多出此

故能名一代云

跋石鼓文辨

予紹興庚辰辛巳間在朝路識鄭漁仲好古博識誠佳士也然朝論多排詆之時許至三館借書故館中尤不樂云

跋西峴酬唱集

祥符中嘗下詔禁文體浮豔議者謂是時館中作宣曲詩宜曲見東方朔傳其詩盛傳都下而劉揚方幸或謂頗指宮掖又二妃皆蜀人詩中有取酒臨邛遠之句賴天子愛才士皆置而不問獨下詔諷切而已不然亦殆哉

跋兼山家學

予始得此書時猶未識昌國後五年始同朝詳觀其為人誠法度之士間相與論學輒忘昏目乃知其得於子和先生者深矣昌國名其所居曰艮齋亦以嗣兼山之學歟

跋淮海後集

悼王子開五詩賀鑄方回作也子開名蘧居江陰既死返葬趙州臨城故有和氏干將之句方回詩今不多見於世聊記之以示後人放翁

跋張季長中庸辨擇

此書大槩似陳瑩中初著尊堯集識者當自得之

跋法書後

法書一編付子通能熟觀之亦可得筆法之梗槩矣

跋李太白詩

此本頗精今當塗本雖字大可喜然極謬誤不可不知也

跋重廣字說

字說凡有數本蓋先後之異此猶非定本也

跋巖壑小集

朱希真夜熱坐寺庭五字一篇及病虎過酒樓二古詩皆出同時諸人上

跋王元澤論語孟子解
元澤之歿詔求遺書荆公視篋中得論語孟子解皆
細字書於策之四旁遂以上之然非成書也

渭南文集卷第三十一

渭南文集目錄
卷第三十二

右朝散大夫陸公墓誌銘

陳君墓誌銘

費夫人墓誌銘

曾文清公墓誌銘

渭南文集卷第三十二

右朝散大夫陸公墓誌銘

陸氏自漢以來為天下名族文武忠孝史不絕書比
唐亡惡五代之亂乃去不仕然孝弟行於家行義修
於身獨有古遺法世世守之不以顯晦易也宋興歷
三朝數十年秀傑之士畢出太傅始以進士起家楚
公繼之陸氏衣冠之盛復復如晉唐時往往各以所
長見於世而材略偉然可紀者如公是也公諱案字
元珍曾祖吏部郎中直昭文館贈太傅諱翰太傅兩
子伯曰萬載縣令諱琪縣令生宿州符離縣主簿贈
朝奉大夫儼仲曰國子博士贈太尉諱珪實生楚公
仕至尚書左丞諱佃公楚公第五子大夫早卒無嗣
子楚公命公後焉任為假承務郎調台州寧海縣丞
行令事遇事立決老吏宿奸畏懾縮粟不敢輒動巫
以淫祀惑民悉捕寘於法習俗為變會省丞官父老
送公出境爭贖金帛公拒之不可至或泣下乃取絲
一鈎歷杭州仁和縣尉越州司工曹事以舉為蘇州
長洲縣縣號繁劇且久不治公至從容如無事而縣
以大治以最遷郎就命通判真州事發奸伏申冤枉
號稱神明州多大陂澤用事者方興水利官吏人人
懷希聖意謂且得厚賞公獨不肯與人莫測也而覆
覈多誕謾遂置詔獄惟公獨免盜起青溪張甚至出
大兵監司知公長於治劇共薦為隨軍勘計官軍食
漕浙江公建議潮汝贏縮不可必請令士卒各持二
日糧舟至龍山果失期賴以無乏而主將怒護舟吏
欲立斬之莫敢爭者公獨慨然曰江行與平地異非
吏罪且戮二人眾必大駭怯者求死強者委舟竄立
敗事矣乃議分所載募民陸輦以行舟遂輕皆以時
會雖沙磧湍瀨無害也眾多其謀而主將終以戾其
意不說凡與軍事者皆超擢獨公更為通判登州徙
制置發運司幹當公事未赴除江南東路轉運判官

實代兄中散公實當時以為榮部中畿公便宜留上
供米六十萬石損直予民而糴於他郡官無所亡失
而民賴以濟避親嫌移提舉京畿常平等事與轉運
提點刑獄皆置司陳留會金人犯京師遊騎突至轉
運提點刑獄倉卒避去故事兩司皆兼提舉將兵及
保甲而常平司弗與也及是公獨不動以便宜招集
燕山戍卒數千雜以保甲日夜部勒習教命舊將張
憲統之扼據要害虜既不能犯而潰卒亦不為亂措
置號令赫然有大將風采因間道上章自劾且乞犒
軍詔釋罪從所請方是時虜剽掠四出陳留適當其
衝微公幾殆議者謂宜出入兵間以盡其材而公罷
歸矣屏居常州無錫縣讀書賦詩以自適初甚貧約
公才具高既不仕因治產業甫數年家大贍足然取
予有大略不務苛碎凶年賑貸至傾倉庾無少計惜
鄰里疾病嫁娶喪葬有弗給者不待告而調之然必
以莫夜曰吾畏人知也蓋公雖退而家居然有所為
猶卓卓如此使得盡其材於多故時視古所謂功名
之士豈遠哉初太傅遇異人得秘訣服氣仙去公晚
而嗣其學起居康寧齒髮不衰疾已革猶不亂以紹
興十八年閏八月四日卒年六十有一官至右朝散
大夫遺命葬太湖之東大浮山之原以宜人徐氏祔
宜人尚書禮部員外郎君平之女有賢德善筆札文
辭先公二十有九年卒四男子濱某官仕以廉直稱
亦以故不得志後公十一年卒宗某官按某官道某
官一女子適某官段彬孫若公既葬十有五年宗等
始屬公從子某為銘銘曰
以公之材遭時艱虞馳騁功名公蓋有餘世方尚法
豪傑斥疎亦或知之旁晚欵獻卒斂智略老於里閭
二十三年燕及憚孤大浮之原其下震澤春秋奉祠
世世無斁

陳君墓誌銘

建炎四年先君會稽公奉祠洞霄屬中原大亂兵侵

南及吳楚謀避之遠避而所在盜賊充斥莫知所鄉有惟悟道人者東陽人為先君言同邑有陳彥聲名宗譽其義可依其勇可恃彥聲事親孝父死貲百萬悉推以予弟脫身躬耕復致富饒宣和中盜發旁郡東陽之民有將應之者賴彥聲為言逆順禍福得不從亂安撫使劉忠顯公因命悉將其鄉之兵彥聲設方略明部伍盡出家貲激使用命者有潰卒阻林莽且數百人彥聲馳一馬自往招之皆感泣願効死東陽當橫潰中而能獨全不為盜區者彥聲之力也劉公奇其材欲官之辭不肯受至建炎初羣盜四合州縣復以禦賊事屬彥聲方是時所立尤壯偉及論賞則又固辭先君聞之大喜曰是豪傑士真可託死生者也於是奉楚國太夫人間關適東陽彥聲越百里來迎旗幟精明士伍不諱既至屋廬器用無一不具者家人如歸焉居三年乃歸彥聲復出境餞別泣下露襟已而先君捐館舍予兄弟遊宦四方念無以報之每惕然不自安乾道二年予歸自豫章一日有衰經來見者則彥聲之子愔也泣曰先君晚歲竟以前功補承信郎遇登極恩遷承節郎肝胎軍守嘗奏為沿淮巡檢不赴不幸以去年三月某日歿矣享年七十四將以今年十一月某日葬於猿騰山之原遺言求銘嗚呼是蓋嘗有德於予家者義不可辭彥聲曾大父用之大父希觀父妻娶羅氏以子回授恩封孺人六男子恂忱懌懌懌懌皆吉州助教懌成忠郎新差監光化軍在城都酒稅女一人適貴州助教盧敏求孫男二十二入博泳源淮汜湜深潛泌澹淳浚汲瀟涓皆業進士滋汪潭準淇濤洋尚幼孫女二十人適進士王宦范庭艾胡詠保義郎路光祖進士葛少伊晏剛中左迪功郎婺州武義尉應振曾孫男女三十二人元孫一人予聞彥聲既得官赴銓離立庭中吏操牘唱姓名彥聲大不樂即日棄去其自愛重又有士大夫所愧者則其得銘亦不獨以與之有

推素而已銘曰

亂能全其鄉功名非其願也富能燕其族公侯非其羨也一辱於銓吏而揜耳疾走終身弗見則吾儕區區釋耕而干祿者非可賤也夫

費夫人墓誌銘

故建平守蜀費公樞有女子子曰法謙字海山年十有七歸於今右宣教郎晉張君琬三十有八年年五十五而沒沒百二十三日而葬葬再歲而銘銘之歲實乾道八年而作銘者君之友吳陸某也君少為進士有場屋聲既壯屢屈於禮部乃以從父任入官又踏蹬幾二十年故時同為進士者今丞相葉公自大司馬使西鄙奏君為其屬君顧太夫人春秋高將辭不行夫人曰行矣妾在側君奚憂於是盡斥奩中之藏具滄髓滑甘以時進饋奉盥授悅比平日加謹雖有疾強自持不怠至疾平太夫人或終不知君得夙夜王事而無內憂者夫人力也君嘗自楚歸蜀上忠州獨珠難觸石舟敗舟人皆失魂魄夫人獨不動徐謂君曰與君平生皆俯仰無媿何至溺死已而果全上下交慶而夫人乃澹然無甚喜色某曰夫人篤孝而不以動心則雖學士大夫有弗及者然求其所以能至是者亦自孝敬始而已夫人生四子男曰宗望宗康女曰海月海雲海雲先夫人四十餘日卒孫祖義銘曰嗚呼有宋孝婦費夫人之墓

曾文清公墓誌銘

公諱幾字吉父其先賴人徙河南之河南縣曾祖識泰州軍事推官妣祖氏寧晉縣君李氏祖平衢州軍事判官贈朝散大夫妣慈利縣君劉氏考準朝請郎贈少師妣魏國太夫人孔氏公有器度舅禮部侍郎孔武仲秘閣校理平仲數譽以為奇童未冠從兄官鄂州補試州學為第一教授孫榘亦賴人異時讀諸生程試意不滿輒曰吾江西人屬文不爾諸生初未

論及是持公所試文矜語諸生曰吾江西人之文也
乃皆大服已而入太學屢中高等聲籍甚會兄弼提
舉京西南路學事按部溺死無後特恩補公將仕郎
公以太夫人命不敢辭試吏部銓中優等賜上舍出
身擢國子正兼欽慈皇后宅教授選辟雍博士兼編
修道史檢閱官時禁元祐學術甚厲而以剽剝積闕
熟爛爲文博士弟子更相授受無敢異一少自激昂
輒擴弗取曰是元祐體也公獨憤歎思一洗之一日
得經義絕倫者而他場已用元祐體見黜公爭之不
可明日會堂上出其文誦之一坐聳聽稱善爭者亦
奪氣及啓封則內舍生陳元有也元有遂釋褐文體
爲少變學者相賀改宣義郎入祕書爲校書郎道士
林靈素以方得幸尊寵用事作符書號神霄錄自公
卿以下羣造其廬拜受獨故相李綱故給事中傅崧
卿及公俱移疾不行出爲應天少尹尹故相徐處仁
敬待公公嘗決疑獄徐公謝曰始徒謂君儒者乃精
吏道如是邪一日有中貴人傳中旨取庫金而不齎
文書徐公用府寮議將姑許之公力爭至謁告不出
徐公雖不果用而尤以此服公丁內艱服除主管南
外宗室財用靖康初提舉淮南東路茶鹽公事女真
入寇都城受圍太府鹽鈔無自得商賈不行公乃便
宜爲太府鈔給之比賊退得緡錢六十萬喪亂之餘
國用賴是以濟而公不自以爲功也改提舉荊湖北
路茶鹽公事羣盜大起湖北諸郡皆破獨辰沅靖三
州僅存有封樁鹽公以與蠻獠貨易得錢數鉅萬間
道上行在所賊孔彥舟據鼎州川陝宣撫使司幕官
有傳雋者輒假彥舟湖北副總管彥舟因自稱官軍
而殺掠四出自若也俄以總管檄徵公求鹽給軍食
官屬震恐請與以紆禍公卒拒不許其後有爲鼎澧
鎮撫使者怙權暴橫復欲得鹽公曰使吾畏死則輸
彥舟矣亦卒不予以疾乞閑主管臨安府洞霄宮起
爲福建路轉運判官未赴改廣南西路廣南支郡賦

入悉隸轉運司歲度所用給之吏緣爲奸公獨親其
事吏不得與文書下諸郡愜服徙江南西路提點刑
獄公事改兩浙西路故太師秦檜用事與虜和士大
夫議其不可者輒斥公兄爲禮部侍郎爭尤力首斥
而公亦罷時秦氏專國柄未久猶憚天下議復除公
廣南西路轉運副使以慰士心徙荆湖南路賊路科
起郴州宜章縣郴道桂陽皆警且度嶺詔湖北宣撫
司遣將逐捕賊引歸宜章之臨武峒宣撫司遂以平
賊聞公獨奏其實朝廷始命他將討平之主管台州
崇道觀起提舉湖北茶鹽未赴改廣西轉運判官公
雖益左遷然於進退從容自若人莫能窺其涯復主
管崇道觀寓上饒七年讀書賦詩蓋將終焉紹興二
十五年檜卒太上皇帝當寧慨然盡斥其子孫淵鄩
而取用者舊與一時名士十一月起公提點兩浙東
路刑獄公老矣而精明不少衰去大猾吏張鎬一路
稱快明年知台州公娶錢氏有郡酒官者夫人族子
也大爲奸利且恣橫患苦里閭公亟捕繫獄奏廢爲
民黃巖令用兩吏爲囊橐以受賂吏持之令不勝怒
械吏置獄一夕皆死公發其罪或以書抵公曰令左
丞相客也公治益急亦坐廢踰年召赴行在所力以
疾辭除直秘閣歸故官數月復召既對太上皇帝勞
問甚渥曰聞卿名久矣公因論士氣不振既久陛下
興起之於一朝矯枉者必過直雖有折檻斷鞅牽裾
還笏若賣直沽名者願皆優容獎激之時太上懲秦
氏專政之後開言路獎孤直應詔論事者衆公懼或
有以激訐獲戾者故先事反覆極論以開廣上意太
上大悅除祕書少監先是少監選輕士至不樂入館
公既以老臣自外超用名震京都及入朝鬢須皓然
衣冠甚偉雖都人老吏皆感欬以爲太平之象於是
公去館中三十有八年矣舉故事與同舍賦詩飲酒
縱談前輩言行臺閣典章從容每竟日故相湯思退
嘗語客曰恨進用偶在前不得當斯時從曾公遊也

其爲薦紳歆慕如此擢尚書禮部侍郎初公兄楙歷禮部侍郎至尚書兄開亦爲禮部侍郎至是公復繼之衣冠尤以爲盛事二十七年吳越大水地震公極論消復災變之道及言賑濟之令當以時下太上皆嘉納時將郊祀公力請對言臣老筋力弗支矣陛下郊天若禮官失儀亦足辱國太上帝曰卿氣貌不類老人姑爲朕留公再拜謝曰臣無補萬分一惟進退有禮尚不負陛下拔擢不然且爲清議罪人乃以集英殿修撰提舉洪州玉隆觀又三歲除敷文閣待制元顏亮盜塞下詔進討已而虜大入或欲通使以緩其來公方病臥聞之奮起上疏曰遣使請和增幣獻城終無小益而有大害爲朝廷計當嘗膽枕戈專務節儉整軍經武之外一切置之如是雖北取中原可也且前日陛下詔諸將傳檄數金人君臣如罵奴耳何詞復和邪今上初受內禪公又上疏累數千言大槩如前疏而加詳既封奏具衣冠遡闕再拜乃發公自宣義郎十一遷爲左中大夫至是以卽位恩遷左太中大夫執政欲起公入侍經筵度不可致乃以公子逮爲提點浙西刑獄以便養隆興二年公上章謝事遷左通議大夫致仕莊文太子立羣臣爲父後者得加封其親公子逢請於朝而有司疑公官高詔特遷左通奉大夫乾道二年五月戊辰卒於平江府逮之官舍享年八十三爵至河南縣開國伯食邑至七百戶公平生燕居莊敬如齋至沒不少變九月辛酉逢等葬公於紹興府山陰縣鳳凰山之原詔贈左光祿大夫有司謚曰文清娶故翰林學士錢鏐之孫朝請郎東美之女封魯國太夫人男三人逢朝散大夫尚書左司郎中逮朝奉大夫充集英殿修撰知湖州迅通直郎主管台州崇道觀女一人嫁右朝散郎知吉州呂大器孫男七人槩迪功郎監戶部贍軍烏盆酒庫稟承務郎新知平江府長洲縣梁從政郎監戶部贍軍諸暨酒庫梁迪功郎監建康府提領所激賞

酒庫稟宣教郎葉修職郎監明州支鹽倉棠迪功郎新湖州長興縣尉孫女九人長適從事郎衢州江山縣丞李孟傳次適通直郎新通判楊州軍州事朱輅次適宣義郎新浙東提舉常平司幹辦公事詹徽之次適從政郎新婺州金華縣丞邢世材次適宣教郎幹辦行在諸軍審計司葉子強次適修職郎呂祖儉次適文林郎湖州長興縣丞丁松年次適迪功郎前明州慈谿縣主簿王中行次適迪功郎監衢州比較務張震曾孫男女十三人公貫通六經尤長於易論語夙興正衣冠讀論語一篇迨老不廢孝悌忠信剛毅質直篤於爲義勇於疾惡是非非終身不假人以色詞少師捐館舍公才十餘歲已能執喪如禮終喪不肉食及遭內艱則旣祥猶蔬食凡十有四年至得疾顛胸乃已每生日拜家廟未嘗不流涕也平生取與一斷以義三仕嶺外家無南物或求沉水香者雖權貴人不與守台州以屬縣並海產蚶菜比去官終不食初佐應天時元祐諫臣劉安世亡恙鄰禁方厲仕者不敢闖其門公獨日從之遊論經義及天下事皆不期而合避亂寓南嶽從故給事中胡安國推明子思孟子不傳之絕學後數年時相倡程氏學凡名其學者不歷歲取通顯後學至或矯託干進公源委實自程氏顧深閑遠引務自晦匿及時相去位爲程氏學者益少而公獨以誠敬倡導學者吳越之間翕然師尊然後士皆以公篤學力行不諱世取寵爲法公治經學道之餘發於文章雅正純粹而詩尤工以杜甫黃庭堅爲宗推而上之蘇黃初建安以極於離騷雅頌虞夏之際初與端明殿學士徐俯中書舍人韓駒呂本中游諸公繼沒公歸然獨存道學旣爲儒者宗而詩益高遂擅天下有文集三十卷易釋象五卷他論著未詮次者尚數十卷某從公十餘年公稱其文辭有古作者餘風及疾革之日猶作書遺某若永訣者投筆而逝故公之子以銘屬某會某客巴

蜀久乃歸銘之歲實淳熙五年去公之歿十二年矣
銘曰

聖人既沒道裂千歲士誦遺經用鮮弗戾孰如文清
得於絕傳耄期躬行知我者天秉禮蹈義篤敬以終
病不情媮大學之功仕豈不逢施則未究刻銘於丘
維以詔後

渭南文集卷第三十二

渭南文集目錄

卷第三十三

青陽夫人墓誌銘 陸孺人墓誌銘

浙東安撫司參議陸公墓誌銘

山陰陸氏女女墓銘

傅正議墓誌銘

渭南文集卷第三十二

青陽夫人墓誌銘

有宋蜀人天池先生諱公諱篆字拂雲之夫人青陽氏井研人大父知歸州事泰實生五丈夫子以幼子古繼其弟春是為夫人之考夫人歸諱氏不及事舅獨事君姑太安人太安人則歸州之女子子於夫人為姑夫人夙夜婦道不以親故少懈天池與其考陸山先生諱望字勉翁皆以文章名一代取友皆天下士亦繼以進士起家然得年皆不盈五十志遠年局未嘗問家人產業方天池歿時一子曰季壬甫生十年然獨立而天池亦無兄弟諱氏不絕如錢太安人傳家事已久夫人幼讀書了大義於是行其所知自處儉薄而不以貧憂其姑躬履艱難而不以事累其子外父母家而一意立諱氏門戶太安人饋服非其手調毫縫紉不以進親客至夫人視庖廚刀匕惟謹及即席則立侍姑側終日不休酒殺潔豐果蔬芳甘奉盥授悅肅祇無譁客歸皆太息祝其女婦願庶幾夫人萬一而夫人歎然常愧力不足也斥賣簪襦遣季壬就學夜課以書必漏下三十刻乃止間則為道隆山天池言行以磨礪之及季壬稍長與人交則誨之曰某可師某可友某當絕勿與通故季壬名其堂曰願學室曰勝己私皆夫人所以訓也夫人享家廟如養姑之孝字孤嫠如愛子之恩蓋其節行法度士君子莫能加焉季壬舉進士拔解太安人尚無恙夫人不自喜而為太安人喜及擢第拜廟夫人猶涕泣曰先姑不及見矣觀者皆感動惻愴後以德壽宮慶壽恩得封亦以是不敢樂也初季壬解褐為崇慶府府學教授凡四年徙成都府吏部以僑寓格不下執政為奏復還崇慶以便養命至而夫人棄其孤矣初命教成都今樞密使周公貳大政知予與季壬友以書來告曰石室得人矣季壬有學行為諸公大人

所知蓋如此以故士皆慕與之交而夫人墓道之碣乃萬里來屬予於山陰鏡湖上義不可辭夫人諱字及年與其他在法當書者皆已見內誌懼於再告故獨述其大節而已自周以降禮教日衰為女子者不聞姆師之訓圖史之戒閭巷尼媪交煽其間非天資淑柔則悻驚器昏貪黷悍驕不復知供養祭祀為婦職者固其所也夫人奮乎千載之下獨不移於俗矯矯自立如此於庠賢哉予與季壬實兄弟如也故述孝子之意以作銘其辭曰
淳熙十祀冬十月丙申孤季壬奉先夫人之柩附於天池先生之藏平生相倚為命今未嘗輕去吾親之傍日將夕而未返則倚門其皇皇今也山空無人凜乎欲霜鳥獸紛其號鳴木葉實兮草黃吾親不見其孤兮悲生死之茫茫兒不能奉養於泉塗兮肝心裂而涕滂茹哀忍死兮庶其顯揚維友予銘今後百世而彌芳
陸孺人墓誌銘
孺人山陰陸氏曾大父某國子博士贈太尉大父某承奉郎考某迪功郎明州司法參軍母同郡齊氏孺人年若干嫁為承議郎知梧州高郵桑公莊之妻端靖淑柔讀書略知大義自其在父母家已得孝名見治絲枲輒趨與共事法曹與齊夫人皆異之建炎間法曹避兵天台而承議適攝縣主簿事故時兩家已繼為婚姻情好甚篤因以孺人歸焉承議既罷主簿以亂故不克北歸因寓近縣山中凡四十年間雖出仕歲滿輒歸居山之日多於在官衣食嘗不足孺人處之超然自幼奉佛法戒擊鮮終身不犯嘗舟行沂汴遇老桑門丐錢孺人亟施之且問曰師何許人老如此尚行乞邪對曰居天台兄第十八人我獨好遠遊故抵此汝與我有宿契他日當為鄰及是寓居適近石橋一日登應真閣修茶供至第三尊者驚歎曰此吾沐舟所見也承議嘗為西安令有娠婦以事繫

獄念釋之未果孺人夢白衣人告曰囚且字子矣日以告承議呼乳醫脈之而信即脫械予假使歸果以是夕產孺人事佛之驗至如此然奉家廟盡孝盡敬朝夕定省如事生凡祭祀烹飪滌濯皆親之至累夕不寐承議平生所與遊多知名士每客至輒信宿留孺人執刀七白首無倦色曰此婦職也近世閨門之教略妄以學佛自名則於祭祀賓客之事皆置不顧惟私財賄以徇其好曰吾微福於佛也於虐娶婦所以承先祖主中饋顧乃使之微佛福而止耶安得以孺人之事告之承議有兄之子妻士人陳汝翼貧無以生孺人力贊承議挈之歸同爨十五年使其子與己子俱就學遂中名第而孺人諸子皆好修世昌從諸公問學不以貧奪其志人以爲積善之報孺人得年七十有四以淳熙十二年正月己丑卒丈夫子二人長之瑞早卒次則世昌次世茂女子子四人徐廷煥顧淵陳寬吳植其甥也明年某月甲子葬於天台之太平鄉朴塢附承議之墓世昌寔來請銘孺人於予爲從祖姊其敢辭銘曰

廟祭賓享維婦之職嫗驚狼驕蠹我壺則孰如孺人耆老益恭名山崇崇閱此幽宮

浙東安撫司參議陸公墓誌銘

紹興初詔修元祐故事命大臣近侍以十科舉士翰林學士承旨知制誥孫公近首舉右迪功郎陸靜之文章典麗可備著述科方詔之下也孫公一時辭宗主盟翰墨自三館諸儒與進士高第願得一言者袂相屬也公年財二十餘以門蔭入官初未爲人知而孫公獨歎譽稱薦之一日出千百人右於是中朝名勝士莫不知陸伯山慕與之交而公仲弟升之仲高亦以文章有名號二陸仲高遂登進士丙科公業春秋及賦再試禮部乃輒斥因不復踐名場而一意欲以才略致通顯然愈不偶以老豈非命邪公會稽山陰人曾大父珪國子博士贈太尉大父似中大夫考

長民左朝請大夫尚書右司員外郎兩世皆贈金紫光祿大夫公以父任補將仕郎調信州上饒縣台州天台縣主簿皆不赴監潭州南嶽廟從措置戶部贍軍酒庫所幹辦公事又不赴徙江南東路轉運司淮南西路轉運司幹辦公事知台州寧海縣部使者挾私憾中公以法鍛鍊累月無所得然猶坐微文衝替起知臨安府臨安縣主管台州崇道觀通判隆興府建康府資當守郡會得重聽疾不能奉臨遣乃爲浙東路安撫司參議官官至朝散大夫服三品淳熙十四年六月癸酉卒享年七十七娶季氏先公二十年卒贈宜人子二人子墨前台州寧海縣主簿子堃當以公納祿恩補官女子二人長適承議郎新權知台州軍州事司馬億次適從政郎趙善价孫男三人立達立言立柔孫女五人長適鄉貢進士石正大餘尚幼子墨子堃將以九月丙午葬公於會稽縣上辜尚書塢以季宜人附實來請銘公平生不大試於事故可傳載者少然在寧海有嫗訴子不孝二十條公遽呼嫗問之情不能置一辭逮問爲書者則嫗之女婿實爲之案驗辭服一邑驚以爲神佐建康會久旱力請於府爲火備已而火屢作皆以有備不爲災士民至今誦之晚既久不仕日誦左氏傳史記前漢書率盡兩卷不以寒暑疾恙少廢有疑義客至輒講之前五年忽作治命百餘言戒家人勿用浮屠法及厚葬比終無大疾疾已亟猶起坐堂上觀書如平生徐闔書危坐遂逝於庫亦奇矣銘曰

士患不材材患莫知既或之知又弗克施在昔所歎天嗇其壽耄耄不試將孰歸其咎

山陰陸氏女女墓銘

淳熙丙午秋七月予來牧新定八月丁酉得一女名閨孃又更名定孃予以其在諸兒中最穉愛憐之謂之子女而不名姿狀瓌異疑重不妄啼笑與常兒絕異明年七月生兩齒矣得疾以八月丙子卒鼓於城

東北澄谿院九月壬寅即葬北岡上其始卒也予痛甚灑淚棺衾間曰以是送吾女聞者皆慟哭女女所生母楊氏蜀郡華陽人銘曰

荒山窮谷霜露方墜被荆榛兮於瘞吾女孤豕歸然四無鄰兮生未出房輿死棄於此吾其不仁兮

傅正義墓誌銘

公諱某字疑遠其先爲北地清河著姓後徙光州爲固始人唐廣明之亂光人相保聚南徙閩中今多爲大家而傅氏之祖曰府君實與其夫人林氏始居泉州晉江縣生五子長子卒謀葬有異人告以葬聖姑山之右而徙其居仙遊隸興化軍而傅氏鉅公顯人始繼用其言宋興仙遊隸興化軍而傅氏鉅公顯人始繼出矣若夫德修於家教行於鄉而身不及用者亦在其子孫如公是也公之大父程父嵩以累舉進士推恩閉門教子不肯仕累贈奉直大夫公奉直第二子幼有美質讀書日數千言學爲文輒驚其長老崇寧中甫年十八入太學聲名籍甚試中高第然猶幾二十年乃以上舍登第調滄州無棣縣主簿會女真陷全燕樂虛南下兩河皆震吏士相顧無人色或委官去郡檄公餉軍公南方書生平生不習金鼓初咸意公難之而公得檄卽行不暇秣馬冒兵往來軍糧以無乏虜出塞會公亦遭奉直憂始南歸終喪得南劍州順昌縣尉時所在盜起縣民亦相挺爲亂公素得士心徐設方略窮其窟穴未幾悉平部使者欲言之朝公辭而出弓手有謀叛者語其徒曰奈累傅公何比公罷去盜遂作殺掠暴甚邑人以不留公爲悔調泉州安溪縣丞改宣教郎猶安其官不求徒有自吏部擬注來代者始徙南安縣丞其恬於仕進如此南安大饑民棄子者相屬公請於州出常平錢米設安養院於延福僧舍乳湩糜粥湯液皆不失其宜明年歲豐悉訪其所親歸之曩時縣之貧民鬻業者輒減其戶產以求速售或業盡而賦獨存官責之急至死

徙相踵公旣得其弊一切以肥磽定賦民之冤失職者皆得直治最一路遷知晉江縣會詔造戰艦他郡縣吏多並緣煩擾事亦不時集公獨不以談吏躬督其役勞費視他邑省殆半而事獨先期辦安撫使張忠獻公聞於朝特減磨勘年遂爲茶事司幹辦公事公於是行能已爲時所知秩滿造行在所顧不數見公卿赴銓得通判南劍州而歸將之官以紹興二十一年六月十一日感疾不起享年六十有八積奇祿官至左朝奉大夫累贈正義大夫公亡恙時自發書卜葬於白石之南雖月日莫不有治命至歿悉遵用焉娶林氏正義大夫豫之女封宜人今累封太淑人六子濼奉議郎知漳州漳浦縣汶朝散郎江南西路提舉常平茶鹽公事淇朝散大夫直龍圖閣兩浙西路提點刑獄公事洵凌洵舉進士奉議莖官有法不幸與洵凌皆早世常平以材望擢使一道而龍圖嘗位列卿實中朝宿德皆且柄用矣士大夫以爲公積行累功之報四女長適進士林維次適龍溪縣尉陳希錫次適進士林若思次適進士林若公初龍圖使浙東實治會稽而某爲郡人始從龍圖遊獲觀公文章豪邁絕人而其詩尤工龍圖又爲某言公當官至廉爲縣時有小吏持官燭入中闕公顧見立遣出仕官三十年先疇無一壘之增老猶力學不厭行其所知未嘗以窮達累心飢者輟食濟之病者治藥療之所居之傍有路達泉州而林谷阻險者四十餘里行旅告病公率親黨塹山伐石易爲夷途人至今誦焉疾革猶戒諸子曰吾平生無愧類仰歿後汝曹居官主清治家主嚴奉先主敬收族主恩造次顛沛必主忠信能用吾言雖貧賤猶爲有德君子不然獵取光顯奚爲哉語終遂瞑方龍圖言此時固已屬某以發揚潛德會徙節浙西後逾年乃以狀來請銘銘曰築野肖夢相武丁死不泯亡騎列星後世繼起三千齡峨冠相望立漢廷公入太學奮由經躡蹀晚乃駕

箒篁抱才不試歸泉扃二妙山立尚典刑公雖埋玉
有餘馨印綬二品告諸冥馬鬣之封柏青青咨爾雲
來視斯銘

渭南文集卷第三十三

渭南文集目錄
卷第二十四

尚書王公墓誌銘
陸郎中墓誌銘
楊夫人墓誌銘
知興化軍趙公墓誌銘

渭南文集卷第二十四

尚書王公墓誌銘

竇謨閣直學士正議大夫致仕贈銀青光祿大夫王公既葬之二年孫宿來請於公之里人陸某願次公出處請諡於有司某辭不獲既以狀授其家宿復來泣且言曰古之葬以碑封因識於碑則碑固在墓外後世隧葬識於隧中非古也吳會稽之葬弗隧則雖已葬刻石墓旁實為近古惟丈人予之銘某辭以既嘗狀公之行願更求名卿巨人以信後世宿復泣言近世固有既為狀而復為之碑者丈人何獨謂謙某用是不果固辭惟公諱佐字宣子會稽山陰人曾大父諱仁大父諱忠世有隱德考諱俊彥以進士起家經行尊顯為時醇儒仕至左宣義郎太平州州學教授贈至特進兩娶同郡葉氏追贈同安永寧郡夫人同安實生公幼而穎異不羣七歲特進為講孟子即能復講不遺一言退無矜色特進歎曰吾家積善百年當有興者是子其當之乎十八補太學生二十有一以南省高選奉廷對為第一方唱名時趨拜進止詳華中度高宗皇帝喜動玉色授承事郎簽書平江軍節度判官廳公事未赴召為祕書省校書郎時秦丞相檜專政其子燿以前執政提舉祕書省館中或趨附以為捷徑公獨簡默嚴重未嘗妄交一語嘗語同舍曰唐三館故事丞相與赤縣尉均為學士安得妄自屈哉燿聞不能平喉言者論去之逾年請祠祿為主管台州崇道觀丁特進憂服除會秦丞相死燿亦斥逐起家拜祕書郎兼玉牒所檢討官遷尚書吏部員外郎右司郎闕以公兼領秦丞相夫人王氏陳乞舊所得恩數之未用者自稱冲真先生公持白執政曰婦人安得此名向者誤恩有司不能執為失職今當追正然王氏封兩國夫人蓋祖宗以寵親王之配及外家尊屬者何可輒引以階僧素當併奪之執

政不能聽但寢其請而已後王氏死卒奪先生號識者猶恨不盡用公初議同安夫人墓在山陰為盜所發公即日不待命奔赴至墓一日獲盜公與母弟左雖恥不雪乃告於有司公既斂葬猶不忍去墓所朝旨趣還不得已造朝逾月獄成盜不死左司公憤切手戮盜挈其首詣郡自繫待罪公迺乞盡納官以贖弟罪詔給舍議給事中楊公椿等共議曰春秋之義義復離公哀無罪佐納官之請可勿許詔曰給舍議是於是趣公就職如初紹興二十九年二月拜起居郎遇事直前獻納多所裨益未兩月以臺評罷然言者詆公甚峻至請投竄而上終保全之命守外郡遂知永州公自初仕即在館閣未嘗一日歷州縣到郡每決事吏皆抱牘立數步外不呼不敢輒進公親與民語有冤者得盡其言誕護者一再詰皆詞窮折服自謂當受罰公迺延見諸生勞問者年凡可美民俗勵士節者舉之無遺又言永之士衆於道州而解名財及道四之一願詔有司稍均之庶無失士徙知吉州廬陵號江西劇郡人疑公且困於事不得復閑暇公至為政如零陵時不知有閑劇之異而事亦頓省治聲聞於行在詔直寶文閣逾年徙知明州仍命入奏而張丞相浚力薦公及王侍郎十朋張舍人孝祥以為可大用既對壽皇聖帝諭以且有親擢既退除中書門下省檢正諸房公事兼權戶部侍郎公力辭且言臣昨面奏乃者戶部以江東歲歉有江西和糴之令臣在江西實見一路決不能獨出百五十萬石而關子茶藥乳香之屬既不能售必至抑配其為民病且甚於江東之饑今臣若不自揆貪榮冒受而實未有以為策他日固不敢逃譴然民力國計將何以支願復補外或止供檢正職事詔不允仍兼侍講湯丞相思退以首相領江淮都督請公參其軍謀公為湯公言虜方議和而以兵入吾境此非其曾本指蓋

用事者幸一勝以遂所求當選驍將精卒棄其驕惰急擊之彼以敗聞則用事者且得罪吾可從容制之矣會湯公去位公亦罷參謀方是時疆場未靖調兵遣戍用度日窘且諸路歲頗不登公從容應變室漏察欺事無不集而民間泰然如無事時會永寧夫人臥疾懇求奉祠改權吏部侍郎請不已乃復以直寶文閣知宣州徙知建康府行宮留守建康自車駕行幸建爲別都居守多執政及侍從久次者惟公以威望被親擢中外皆知上任屬之意妖人朱端明崔先生挾左道與軍中不逞輩謀不軌且久及公至相與謀曰是不可欺少緩必敗不如先事發乃共約以春大閱日起事雖極詭秘而公已盡得其陰謀一日坐帳中決事命捕爲首者至前略詰數語卽責短狀判斬之而流其徒數人於嶺外餘置不問僚屬方候見於客次無一人知者見公擲筆乃異之而妖人已誅矣公方閱案牘治他事如平時良久延見賓僚乃退無一毫異於常日又徙知平江隆興二府未赴會知上元縣李允升坐賄前事未作已巧尋醫去而讒者謂公縱有罪坐削官居建昌軍讒者去上察守臣連坐未有公比且數思其才復官主管台州崇道觀俄起知饒州又復直寶文閣知楊州入對勞問甚渥留爲宗正少卿兼權戶部侍郎上祀南郊命公玉輅執綬凡所顧問占對瞻敏上甚悅有褒嘉語於是疾公者益衆史侍郎正志爲發運使坐奏課不實謫有欲爲史分謗者乃併罷公而發運司事公始末未嘗與且嘗論其徒擾無補至是乃併得罪逾年主管台州崇道觀起爲福建路轉運判官徙知潭州連進秘閣修撰集英殿修撰淳熙六年正月彬州宜章縣民陳峒竊發俄破道州之江華桂陽軍之藍山臨武連州之陽山縣旬日有衆數千彬道連永桂陽軍皆警公奏乞荆鄂精兵三千未報公度不可待而見將校無可用者流人馮湛適在州公召與語曰君能有功不

特雪前舉且遂爲朝廷用北鄉恢復自此始矣湛請行公曰請行易耳今當不俟奏報以兵相付既受此命卽以羣盜授首爲期一有弗任軍法非某敢貸也遂檄湛帶元管權湖南路兵馬鈐轄統制軍馬卽日令湛自選潭州廂禁軍及忠義寨凡八百人卽教場誓師遣行仍命凡兵之分屯諸州縣者皆聽湛調發違慢皆立誅又出軍令牌付湛軍士所過秋毫無擾民及臨敵不用命或旣勝而攘賊金帛使得竄逸者皆必行軍法上奏以擅遣湛待罪且請亟發荆鄂軍又私念湛有善戰名賊必遽入廣南思得勁兵遏其衝而廣南非所部未有以爲計會受命節制討賊軍馬而前一日又奉詔會合諸路兵乃合二命爲一稱節制會合諸路兵馬檄廣南摧鋒軍兵官黃進張喜分屯要害賊知湛至而廣南守備已嚴乃驅載所掠輜重由間道歸宜章轉運司聞之卽移諸州以爲賊已窮蹙自守巢穴毋以備禦妨農公得報曰是不獨害捕寇且必惑朝廷乃檄轉運司及諸州以爲賊未嘗敗何謂窮蹙其巢穴旁接三路七郡林菁深阻出入莫測何謂自守復奏言遣馮湛之後事方有緒若遽弛備賊必更猖獗愚民且有附和而起者非細事也因堅乞前所請荆鄂軍從之已而果聞賊方作箭鏃甚盛遣入溪峒買毒藥之可爲藥箭者公赫然以蕩滅爲期且奏向者連州受賊首李晞降賞犒備足未幾復亡去爲賊今陳峒之次首領是也以此知不一意討捕容其不死湖廣之憂未艾俟誅賊首而貸脅從未爲晚也樞密院猶謂當先招降上獨是公策命公躬至軍前節制公卽日戒行師徒不諱耕隴市肆之人莫有知者既至宜章命湛以四月二十二日移屯何卑山湛請進兵日不食惟給以合符曰符至卽行耳二十九日夜半始發兵符命湛及鄂州軍統領夏俊五月朔日詰日分五路進兵賊初詐降實欲繕治寨柵阻險以抗官軍公得其情督兵甚峻及馳入

隘口賊果立寨柵未及成聞官軍至狼狽出戰既敗
又退失所憑乃皆潰走是日奪空岡寨駐兵十二渡
賊之起也假唐源淫祠以誑其下日殺所虜一人祭
神至是斬像焚其祠湛遂誅陳峒函首來獻已而李
晞以下誅獲無遺宥其脅從發倉粟振貸安輯之案
功行賞悉如初令且上其事於朝振旅而還詔以公
忠勞備著起拜顯謨閣待制湛亦由此復進用俄徙
公知揚州平江遂知臨安府公力辭曰人各有能有
不能天府臣所不能爲也方祖宗時用人莫重於三
司開封高選賢傑號將相之儲豪右憚其威望莫不
斂避故得人爲多巡幸以來用人益輕惟能媚奉權
貴則爲稱職沿襲非一日矣若使方拙自守者爲之
猶推舟於陸決不可行縱臣欲降心下氣周旋其間
賦性既定如燥溼之不可移終有不能自抑者徒速
顛隲而已奏三上不得請遂就職入對上褒勉甚寵
特賜金帶進工部侍郎兼知臨安府進權工部尚書
而尹京猶如故兼侍講久之進侍讀遂權戶部尚書
知淳熙十一年貢舉公尹京逾三年又兼版曹故時
以冗劇日夜不得休公處之超然閑暇事皆立辦貴
臣權家斂手不敢干以私民間利病無巨細罷行之
或可施於四方者則疏其事以聞多見施行歲饑畿
內小民或以農器蠶具抵粟於大家苟紆目前明年
皆有失業之憂公乃出令斷自東作之日先以還之
俟蠶麥訖事而歸其子本大家不遵令小民負約不
以時償皆坐罪令下農家相慶識者以爲與呂文靖
公建請不稅農器事相埒他日且爲名相上亦自器
異之嘗因夜直召對出御書三都賦序以賜蓋倚以
拓定中原之事會長子病卒公力乞奉祠上察其不
可留命以寶文閣直學士出守公復力申前請得提
舉江州太平興國宮以歸執承寧夫人喪服除提舉
隆興府玉隆萬壽觀鳳翔府上清太平宮紹熙元年
八月自製擴記又爲治命凡沐浴斂葬之節莫不備

具時公方康強無疾人或怪之二年二月十一日晨
起猶讀書理家事如平時俄暴感風眩遂卒享年六
十有六寄祿官自承事郎積遷至正奉大夫封自山
陰縣開國男至開國伯食邑自三百戶至九百戶致
仕進正議大夫遺表上贈銀青光祿大夫以卒之歲
十一月四日葬于山陰縣天樂鄉竺里峯之原公娶
同郡高氏早卒繼室括蒼季氏亦先公若干年卒皆
追封碩人子男二人履常承奉郎監淮西總領所建
康府西酒庫克常承奉郎知台州天台縣丞皆前卒
女四人長適温州平陽縣主簿梁叔括叔括卒再適
提舉湖北路常平茶鹽張孝曾次適通判建康府曾
槩今存者惟適曾氏女而槩卒矣孫男二人宿承務
郎某某官孫女二人尚幼公以英傑邁往之資自學
校科舉時已卓然出千萬人上仕雖至侍從所施設
曾未究一二閑居九年憂患或出意表而公所養愈
剛大不爲事變之所折困人莫窺其涯一日嘗語某
曰里中或謂僕以誅殺衆故多難不知僕爲人除害
也湖湘鄉者盜相踵今遂掃迹者二十年綿地數州
深山窮谷之氓得以滋息而僕以一身當旣譴萬萬
無悔於虛公可謂知命者銘曰

維宋中興三聖相承公聽竝觀以出賢能公奮於幽
有德有勳知我者天用我者君蹈義秉節迄至耆艾
山立在庭以道進退大夏方建拱把毓材豈茲棟梁
萬牛莫回生或忌之亦歎其死我銘弗誣用諗太史
楊夫人墓誌銘

鄆爲東方大邦宋興以來多名公卿雖擯不仕及仕
而不顯者如穆參軍脩士兵部建中學易劉先生跋
皆既死而言立化行於家至今學者尊焉建炎南渡
人物寢衰矣而山堂鞏先生諱庭芝經爲人師行爲
世範德義之化自家人始凜然克配前數公先生之
仲子處士諱灋之夫人曰武義楊氏年二十有一而
嫁二十有三而字二十有六而寡寡四十有三年年

六十有八而卒卒一年而葬望處士之墓實紹熙五年十一月丙申也夫人自爲鞏氏婦事山堂及君姑錢夫人一步趨一話言悉皆鞏氏家法耳目濡染又皆天下長者事故行成德進山堂以爲稱吾家婦宗黨媼戚隣里皆取法焉處士先山堂不祿當是時夫人尚盛年也遂誓不再行二子伯始學步踉蹌不踰閩仲尚襁褓及能言夫人皆親授以孝經論語毛詩國風爲之講聲形正章句具有師法二子未從外塾而於幼學之事各已通貫精習卓然爲奇童矣其後子益長夫人身任家事不以荒其子之業故皆舉進士中其科然夫人不喜子之得祿所以教而進之者父師莫加焉於虛非是母固不能成其子非鞏氏家法亦不能成是婦也予少時猶及見趙魏秦晉齊魯士大夫之渡江者家法多可觀雖流離九死中長幼遜悌內外嚴正肅如也距今未五十年散處四方處不能如故時久而不變如鞏氏者蓋鮮矣夫人曾大父瓊大父彬父伸卿皆不仕子曰豐從事郎江南東路提點刑獄司幹辦公事燦奉議郎知徽州歙縣事孫復亨慈孫陽孫耦孫孫女七皆處豐來請銘銘曰鞏氏之先化行閨門我觀夫人典則具存夫人之賢實應圖史有如不信視其二子東有茂檟處士所藏雖不克耐鬱乎相塋

陸郎中墓誌銘

公諱沅字子元會稽山陰人曾大父珪國子博士贈太尉大父佃中大夫尚書左丞贈太師楚國公考寘右中散大夫贈少師公於某爲從父兄某蓋少公十五歲方爲童子時公已學成行著以兩浙轉運司進士試禮部不中試博學宏詞又不中乃以世賞試禮部再爲第一人所與交多一時知名士每見某必諄諄道其所與共學日夜磨礪浸灌以希古人者曰時然進之時然莊氏名革早死不顯而進之則故相湯岐公也及岐公以文章事業相高皇帝公猶沉浮州

縣久之乃得監行在都進奏院監尚書六部門岐公每見必留公道往昔相從講習時事抵掌笑語公輒俛首踧踖自引去岐公亦歎息以爲不可親疎後輩躡進至大官者相望公顧處百僚底自若也岐公免相門下士多牽聯以鼻斥未去者亦不自安公獨澹然如平時人亦莫指議者初少師自山陰徙四明已數十年婚姻皆在焉蓋四明人也會史魏公入爲參知政事爲右丞相與公實姻家少相從魏公亦器待公而公未嘗數謁見朝士亦莫知其相國親且厚也監門歲滿遷太府寺丞權尚書戶部郎久次當爲真矣而公亟求歸養得提舉兩浙市舶權知舒州提舉福建市舶遭母益國夫人憂以歸初通判泉州者嘗有所請以法拒之公去而提點刑獄兼權舶司事通判者因欲提點刑獄以危法中公公平日以恭謹聞又方以舉職被賞遷一官朝論右之公雖得舉猶傳輕比於是公殿門絕交遊誦佛書以夜繼日多至萬卷不復言再仕亦絕口不及仇家對客清談而已自束髮至老無一日廢書尤長於詩閑澹有理致在場屋時以賦稱老猶自喜子孫及族黨從之講貫皆有師法公爲人夷雅曠遠與人言惟恐傷之然遇事必力行所知無所撓屈嘗爲丹徒丞朝廷用言者遣使籍江上沙田立稅額使指甚厲吏莫敢違亦或從而張虛數以爲功使者至郡聞人人稱公詳練乃檄與偕往公旣極論其不可又爲詩陳民情詩流傳至朝廷遂止不行沙人礪石刻其詩今猶可考其使福建也有中貴人所親皇甫甲者輒諷公以珍貨別進公正色拒之戒典客者他日謁至勿復通其不阿類如此公仕自修職郎至朝奉大夫而廢二十三年以紹熙五年四月六日卒享年八十有五娶盧氏封宜人先公十二年卒享年亦八十有五子曰梓通直郎知寧國府宣城縣先公十二年卒曰格舉進士曰之瑞國學免解進士曰橈曰橈曰之祥皆舉進士一女

適文林郎監淮東總領所糧場樓鈞六孫曰炳曰煥曰炎曰熿曰燮曰燾四孫女諸孤以慶元元年九月二十五日遵治命返葬於會稽瀝塢塢望少師墓百步且來屬某爲銘銘曰

仕蹟於時年登耄期孰奪孰執與理莫可推銘識於幽孰知我悲

知興化軍趙公墓誌銘

慶元二年八月辛亥朝請郎新知興化軍事趙公以疾卒於第越十月庚午葬於會稽會稽五雲鄉湯家畝之原明年九月乙卯諸孤某夫等墨其哀見予於郡西南澤中泣且言曰先君之葬將請銘於執事以大事之日迫方伏苦塊間不能自通今幸踰年未即死敢以承事郎簽書平江軍節度判官廳公事莫君子純之狀來告惟公幸許之某等即死無憾予以老疾辭請益牢維公文學治行皆應銘法而某夫實娶子從孫女與其弟同時中進士科爲鄉里后來之秀乃卒與銘謹按公諱彥真一名彥能以淳熙新制改今名曾出宣祖昭武皇帝之後曾大父諱叔澹贈武康軍節度使洋川郡公大父諱賚之武經大夫浙東路兵馬鈐轄贈右朝請大夫考諱公懋左朝請大夫知臨江軍贈太中大夫公少純篤從故侍御史王公十朋學王公嘗得中書舍人張公孝祥書不欺室榜持以遺公所以期公者甚遠公益自奮雖舉進士蓋不止爲科舉而已然同時爲進士亦皆推之遂中其科調撫州錄事參軍以太中公喪解官歸除喪起爲信州弋陽縣丞終更調建寧府觀察推官薦者如格改宣教郎知寧國府宣城縣未赴以內難罷除喪知平江府吳縣通判袁州知興化軍朝廷知公者寢多謂且用矣而得郡未及赴遽至大故公之將赴撫州錄事參軍也太中公戒之曰汝任治獄人死生所繫也可不勉乎公再拜受教既就職束吏甚嚴視囚之寒暑飢渴慘然不啻在己囚以故皆輸其情曰不忍

欺吾父也會部使者以事付獄有寃狀而使方怒風指甚厲人皆謂乖其意且得譴吏尤惶恐即欲捶掠成之公叱吏去具列其寃使者爲屈因欲薦公公亦終不就也太中聞之太息曰吾有子矣及在建寧幕南劍州將樂沙縣諸寨軍食不時給羣卒空壘來訴於轉運司趙公公碩謝公師稷爲使乃檄公行公馳至沙縣與其令調財得三千緡明日召卒於庭閱籍自下給之軍吏及卒長皆不得一搖手衆乃大服比至將樂給之如沙縣亦皆大服於是議者謂公所試者小然猶能表表如此他日功名事業詎可測哉郡守鄭公伯熊知公最深有疾不以郡事屬其貳而言於使者請檄公攝守疾革獨延公至臥內屬以草乞致仕奏其知之如此高宗皇帝永思陵攢宮事與公適爲吳縣轉運司調取洞庭青石期會迫不可遽辦公即日涉湖至其地召石工泣諭之曰先皇帝櫛風沐雨惡衣菲食爲天下攘強虜除大盜輕賦薄役汝曹數十年安居樂業亦知所自乎今官取此石欲何用而汝曹尚可顧望不竭力哉於是民趣役不待督責先期告畢使者欲上其勞於朝公力辭曰此臣子職也袁州積彫弊公佐其守窮利病根源一切罷行之郡爲一振民困於坊場官弊於護運皆久不能革公奮曰小民知目前之利不知後日之害一陷於坊場則富者貧貧者大壞非死徙不得免乃取尤者白守請於戶部蠲除之挺繫收檄一日幾空郡人驩呼以爲昔所未有護運異時多以所遣官非其人故多蠹害公一切精擇才吏其以權貴請託來者皆力拒絕之抵公去所發漕運四十萬緡不費一錢造朝得知興化軍未及到郡而卒享年五十有四公篤學工文辭有集五卷易集解五卷他所著未成編者尚多初太中通判饒州有江州統軍官王益者坐事下吏更江州鄂州鞠治獄成而家以寃聞由是復命太中鞠之得寃狀明白益賴以不死而太中以決疑獄

進秩除郡未幾捐館舍益之家人懷太中之德無已
乃厚載金帛以助葬爲請公固辭不受曰非吾先人
之志也益家人泣而去蓋公之清德類此然常畏人
知故予亦不得而悉書也公娶李氏馮氏皆早世贈
安人今皆從葬徐氏封安人四子二女皆李出康夫
迪功郎隆興府武寧縣主簿先公十一年卒某夫從
政郎隆興府南昌縣丞某夫從政郎臨安府於潛縣
尉某夫未仕女長嫁從事郎新平江府常熟縣尉劉
祖邁次未行二孫時敏時哲銘曰
以公之才何適不宜晚始專城政弗克施天嗇其報
子孫是貽匪筮匪龜眎我銘詩

渭南文集卷第三十四

渭南文集目錄
卷第二十五

夫人孫氏墓誌銘
中丞蔣公墓誌銘

奉直大夫陸公墓誌銘

渭南文集卷第三十五

夫人孫氏墓誌銘

夫人孫氏會稽山陰人四世祖沔觀文殿學士戶部待郎諡威敏有傳國史曾祖之文朝議大夫主管杭州洞霄宮累贈正奉大夫祖延直奉議郎通判盱眙軍贈朝散郎考綜宣義郎致仕母同郡梁氏夫人幼有淑質故趙建康明誠之配李氏以文辭名家欲以其學傳夫人時夫人始十餘歲謝不可曰才藻非女子事也宣義奇之乃手書古列女事數十授夫人夫入日夜誦服不廢既笄歸今文林郎寧海軍節度推官蘇君瑑速事舅姑左右就養唯謹凡組織縫紉烹飪調祭之事非出其手舅姑弗悅舅姑歿夫人執喪哀終喪事家廟如生祭薦豐潔中度疾已革猶修秋祭不知其力之憊推官女兄實朝議大夫直顯謨閣呂公正己之夫人性堅正善持家法凡家人必責以法度不知者以為過嚴至夫人能事之則終身怡怡未嘗少忤宗黨間既稱譽夫人之賢又以知呂夫人非難事者也紹熙四年從推官官臨安以其年七月辛巳疾終於官舍夫人平生奉浮圖氏能信踐其言及處生死之際盥濯易衣泰然不亂世外道人有所不逮亦賢矣享年五十有二五子癡太學生汭洞濱潞皆卓然自立能世其家蓋推官與夫人善訓督之力也二女長適修職郎通州錄事參軍王易簡次尚幼孫男二人曰暹幼未名字予世家山陰先太尉邊夫人實與威敏夫人為女兄弟予與宣義外兄弟也少時交好甚篤今夫人年逾五十而歿予乃及銘其隧則予安得不老銘曰

倚與夫人率德不情舅姑宜之曰善事我移其事姑以奉女公雍雍肅肅既和且恭相夫以正教子以嚴施於先後以遜以謙一病不復奄其告終我作銘詩用詔亡窮

奉直大夫陸公墓誌銘

吳郡陸氏方唐盛時號四十九枝太尉枝最盛唐末自吳之嘉興東徙錢塘吳越王時又徙山陰魯墟宋祥符中贈太傅諱軫以進士起家仕至吏部郎中直昭文館太傅生國子博士贈太尉諱珪太尉生尚書左丞贈太師楚國公諱佃太師生中散大夫贈少師諱實少師八子皆以文學政事自奮公諱洸字子光少師第四子紹興初以蔭補登仕郎調右迪功郎浦江縣尉歷筠州司法參軍徽州司法參軍湖北路轉運司幹辦公事知玉山縣江淮等路坑冶司主管文字通判通州知荆門軍提舉江南西路常平茶鹽公事江南西路提點刑獄公事主管建寧府武夷山冲佑觀遂致仕積官至奉直大夫賜紫金魚袋封陳留縣開國男食邑三百戶以慶元元年十月丙寅卒於私第享年七十有二初少師避建炎之亂益東徙居明州鄞縣之橫溪猶返葬山陰至公兄弟遂有卽葬鄞縣者故公以三年十二月庚午葬於縣之豐樂鄉西嶼之原諸孤請銘於公從第某某則少公一歲兒時分梨共棗稍長同入家塾實知公比他人為詳公天資穎異數歲能屬文舉進士連拔兩浙轉運司解又為江東轉運司解首然卒不第公不以對有司治經考古益不少懈為吏窮日夜勤其官未嘗事燕遊所至上官委以事公至忘寢食寒暑以趨事赴功在玉山時剗剔蠹弊根原窟穴毫髮必盡正俸外他增給悉棄不取比代去計其數凡六十餘萬故諫官尹穡有別業在縣歲往來邑中尹為人喜議論仕者多憚之公不為動尹顧敬公每曰子光清足以肅吏惠足以養民諸邑求其比殆未見也自荆門回奏事殿上所陳合指皆即日施行明日孝宗皇帝對輔臣稱公之才丞相王魯公力薦之遂擢江西常平使者到官治便坐於廳事之後治事退足迹不履中闕揭所治錢穀出納之最於壁列案皆簿書終日坐臥其間

目閱手披空罅漏嚴期會官屬吏胥奔走承命不暇不旬月事大治一道肅然歲早公一先事爲備得米百萬斛吏不能一毫爲奸五州之民訖無流殍於是特進一官遂除提點刑獄且進用於朝會有臨江軍民習儀卿爲其奴所殺獄成則謂儀卿弟宣卿實使之宣卿既服復以冤告凡八移鞠皆然最後特以命公公始得其情宣卿實無使之迹奴亦無異辭遠近稱神明事上刑部刑部以爲疑言諸朝移大理寺窮治久自卿以下亦不能與公異宣卿竟不死公既以自請得奉祠而歸矣於是益知奉法守官之難不復有仕進意甫七十卽上書告老始終進退之際可謂無媿矣公娶林氏吏部侍郎保之女三男子桂修職郎監秀州蘆雁鹽場已卒椿迪功郎臨安府臨安縣主簿棟迪功郎徽州歙縣西尉二女子長適迪功郎平江府司戶參軍詹馱次女適從政郎監楚州鹽城縣鹽場耿開孫男焯焯焯焯皆進士孫女適文林郎新監台州支鹽倉宋安雅餘尚幼銘曰

中丞蔣公墓誌銘

公諱繼周字世修初周公相成王封元子伯禽於魯是爲魯公別子伯齡封於蔣其後子孫因以國爲氏至漢有蔣詡十世孫休自樂安徙義興陽羨縣始爲吳人裔孫仲相唐宣宗僖宗故蔣氏益大宋興有堂爲仁宗侍臣之奇執政徽宗初帝相孝宗皆不去陽羨而公之先獨益東徙家處州青田縣曾祖球贈通奉大夫祖裡父仔宣教郎致仕贈中散大夫公天資警邁七歲賦牧童詩有奇思遂精詞賦十四棄其業習戴氏禮期年輒通貫諸老先生自謂莫及一日先生有欲勉成之者期以間處曰吾將有以發子公先

時往俟之甚謹先生喜曰子誠可教士當務學才不足恃也子於書能博觀而得要則善如其未也當勉之毋以才自足蹈吾所悔公再拜謝自是窮日之力無所不讀人罕見其面遂舉進士中其科調衢州常山縣主簿試教官中選歷太平州州學臨安府府學教授改宣教郎入爲太學正會省官添差簽書鎮東軍節度判官廳公事復入爲司農寺主簿召試館職擢秘書省正字進校書郎秘書郎兼國史院編修官實錄院檢討官遭中散公憂服除起知舒州陞辭改宗正丞初公在館中得對所論甚衆其間因論和糴省運孝宗皇帝大悅曰卿文絕類陸贄省運誠不難行又曰朕將用卿卿果有趨事赴功之意乎公遂巡退避久之上亦默然方是時士大夫銳於進取者衆得上一語自謂結主知往往遂投合以取大官公獨若不敢當上意者故至是財得補郡然上終賢之辭日上問卿往年論事朕謂似陸贄今七年矣卿尚能記否舒州待次幾年公以三年對上曰卿家貧母老豈得待遠次當除卿行在職事官公謝曰臣事君猶子事父固願朝夕膝下然幹蠱於外亦子職也敢有所擇上益察公靜退乃大悅卽有是命改祕書丞兼國史院編修官權吏部郎官公還朝逾二年杜門絕造請諸公貴人以爲簡我將假他事出之會熒惑犯氏公因對言氏者邸也驛傳宜備非常不淹旬都進奏院果災上諭輔臣曰蔣某博學善論事卿知其人否皆對以不詳知上乃自禁中索班簿閱之將作監闕卽命除公已而命下則少監也蓋有密以資淺爲言者上終不快未幾遷將作監遂兼太子侍讀然所以屬公者顧不在是方試太學諸生未出院除右正言實淳熙十年九月也十一年正月同知貢舉有禮記義絕出流輩已見黜公力主之拔置高等及啓封則吳人衛涇也已而廷對遂爲第一十二年二月兼侍講八月遷右諫議大夫十三年九月遷御史中丞

公任諫官中執法凡五年知無不言初上受內禪收召四方名士舉集於朝其間議論或過爲激昂貴近不便之於是妄言方秦檜當國時遜於除授一人或兼數職亦未嘗廢事又可省縣官用度於是要官多不補而收召絕稀公首論之曰往者權臣用事專進私黨廣斥異己故朝列多闕至有一人兼數職者今獨何取此朝臣俸祿有限侍從卿監郎中以至百司月計其俸棄除百緡而已假使省二十員不過月省二千緡是特一二節度使俸耳其省幾何而遺才乏事上下交病且一官治數司而收其稟裴延齡用以欺唐德宗也孰倡此議者請得其人詰之其言蓋指責臣人服其敢言時著令職吏必坐舉官既屢施行矣有將億者以職坐擢而舉官獨置不問公劾之曰此非有所避則有所庇耳同舉異罰法且由是廢上悅命有司舉行如初詔進士黃光大上書送台州聽讀公極論其不可且曰臣既樸愚不長於言人之有言又不能開導以廣言路實有愧焉太史奏日中有黑子公言日象君德豈容陰隱棄之大臣之蒙蔽外夷之侵軼後宮之私謁宦者之用事下民之困窮皆其應也願陛下仰觀天文俯察人事以消羣陰之萌會地震公復反覆論奏而加詳焉將行郊禮上春秋寢高或以陟降拜跪爲勞公言今距冬至則踰半年願陛下清心省事養性導和毋強疲勞毋過燕樂飲酒以和氣不可以無節而飲過度之酒服藥以養生不可以無疾而服伐性之藥自今以往宜若神祇在其上下祖宗臨其左右誠意所加幽明竝助將不勞而成禮矣上悉嘉納議者亦翕然以爲得耳目之體有女冠請於皇太子妃以久廢上清宮額徙置其居因爲住持祝妃本命女冠入謝禁輿適有他女冠祝中宮本命者同列庭中爭長舊例以住持者爲首事聞上取文書毀之初不知有舊額也皇太子皇恐不敢入朝羣臣不知所爲公乃抗言徙廢額置他寺觀

天下皆有之然女冠自不應入宮今當一切禁絕僧尼道士女冠勿使得入而已上悅曰卿此奏善處朕父子間矣封以付東宮明日皇太子入謝上歡甚皇太子今太上皇帝也亦遣人謝曰非公慮不及此方是時上以暇日時御佛書間召其徒入對或自內東門賜肩輿以入故公因以爲諫自是遂無所召士論歸重都下喧傳遊奕軍統制官答百姓娠婦至墮胎公上章彈之詔大理寺鞠治同時又有故內人陸觀姬者訴其夫特爲閣門官無故棄逐且據有其貲公請窮治其人自計下吏詞且窮乃遣人妄誅公曰日莫且除簽書樞密矣公叱遣之論愈力會考試進士此兩人者相與合力於是大理具獄以爲所答乃軍妻公爲風聞不實即日統制官者復還故官且賜金帶而觀姬所訴亦得不治考試畢公方再抗章詔遷禮部尚書辭不拜出知婺州未幾以母喪解紹熙元年除喪復還徙寧國府加煥章閣待制徙太平州比四年易三郡適遇水旱公力行賑恤之政寢食不置所條上者皆盡利害之實其大略曰臣夙夜訪求荒政言者萬端然大指不過廣儲畜一事爾有備則拙者亦能集事不然雖智何益中外服其論故奏多見聽其以常平椿管通融賑民蓋得請乃行又旋已補足且災傷五分許賑糶方高宗時已屢著之春秋頌矣常平使者顧劾以爲罪或曰是爲其所親報宿怨公盍自言於朝公曰吾初不計此人臣奉行寬大詔令寧過無不及天下豈無公論會使者召用公卒以口語罷歸卜居嚴州得屋僅鹿風雨頽垣壞甃悠然而自適讀書日莫不輟時從其耆老而訓其子弟若未嘗貴達者初公任言責累年排擊不避權豪至士大夫有以誣得謗傷者輒語同舍曰夷考其人平日恐不至此及廣詢之果不合故一時在朝寒遠孤進之士得以自保而四方賢牧伯皆得究其設施不爲怨仇所搖及公治郡善政爲一路最所遭乃如此人

爲公憤悒而公未嘗見之色辭於瘁非學問之力疇克至此居巖逾年稍起提舉江州太平興國宮俄感疾以通議大夫致仕遂卒實慶元二年十一月二十一日也享年若干娶梁氏故戶部尚書汝嘉之孫封碩人五男子綸修職郎台州司法參軍緯宣義郎知徽州休寧縣丞繹承奉郎維將仕郎紳承務郎二女子朝散郎通判温州湯宋彥進士梁至其婿也五孫男一孫女皆幼諸孤將以某年某月某日葬公於處州某縣某原以某獲從公遊屬以銘不敢以衰耄辭銘曰

孝宗龍興大哉爲君聖意圖回羣才駿奔於時語公爾朕自知今且巨用欽哉勿違公屹如山却立弗前曰臣實愚敢先衆賢帝初不怡久乃太息是予所求忠厚諒直乃長諫垣乃承御史陳謨誇國論所倚一去不復白首外藩晚躡於讒浩然丘園維始及終進德彌劬勒銘墓隧萬世是詔

渭南文集目錄
卷第三十六

呂從事夫人方氏墓誌銘

夫人陳氏墓誌銘 承議張君墓誌銘

朝奉大夫石公墓誌銘

方伯暮墓誌銘 留夫人墓誌銘

渭南文集卷第三十六

呂從事夫人方氏墓誌銘

維申國呂氏自五代至宋歷十二聖常有顯人忠孝
文武克肖先世婚姻多大家名胄婦姑相傳以德先
後相勉以義富貴不驕汰雖甚貧喪祭猶守其舊養
上撫下恩意曲盡雖寓陋巷環堵之屋鄰里敬化服
之猶在京師故第時於虛盛哉從事即諱大同之夫
人方氏嚴州桐廬人曾大父楷尚書駕部員外郎大
父蒙朝散郎尚書屯田員外郎父元矩朝散郎知建
州建州之歿夫人尚幼事母已為宗黨所稱年二十
有一來歸生一男一女而從事不祿夫人能篤禮孝
義哀死字孤為子求師擇友日夜進其業而教其女
以婦事皆訖於成不幸得年不長四十有九而卒於
淳熙三年祖平猶未仕也及祖平通朝籍以宗祀恩
贈從事通直郎夫人亦追封孺人故祖平每言輒寔
涕曰祖平不天不得以斗升之祿養吾親視斯世尚
何聊惟圖所以慰親於九原者在墓隧之文乎遂來
告某於山陰澤中曰願有述某亦早失先親與吾子
之憾無異也行年八十每思之殆欲忘生則吾子之
悲哀某實能深知之其敢愛一日之勞不以成吾子
之悲乎初從事葬於信州上饒縣明遠鄉之德源山
以潦水齧墓趾改卜於舊墓少東二百步實慶元二
年十二月庚申而夫人初沒時祖平寡不能以柩附
從事墓乃即婺州武義縣明招山祖墓之旁葬焉自
改葬從事諷日奉夫人歸附而筮未得吉祖平於是
為承議郎知興化軍仙遊縣事女嫁朝請郎添差通
判鎮江府曾棐孫男樛年孫女萊孫銘曰

卜吉

夫人陳氏墓誌銘

紹熙慶元之間予以故史官屏居鏡湖上有東陽進
士呂友德自太學來與予遊問學論議文辭皆有源
流而衣冠進趨甚偉予固異之訪於東陽人則曰是
清潭呂君紹義之子呂君蓋賢有德而其配陳夫人
又賢生三子孟則友德仲定夫季友之孟固奇士仲
季亦有聲學校場屋間能稱其兄者也自是友德不
閱歲必一過予過必見其進予老病謝客無貴賤多
不能接獨友德來欣然倒屣不知疾痛之在體也歲
戊午十月壬午忽墨其衰經叩予門哭且言母夫人
不幸以八月戊子歿矣得年六十有五卜用十二月
壬申葬於孝順鄉蟠谷之原以其家君之命徵銘於
予予方病亦不勝悲不敢以病為解乃按從事即陳
君黼狀序次為銘夫人與呂君同邑人曾大父懿大
父嚴父子淵皆鄉長者夫人幼孤女功不待教而能
稍長佐其母經紀家事如成人夫猶無恙奇之為
擇所歸得呂君既嫁事舅姑以孝聞女妹適人傾其
嫁時囊裝無少靳積勤儉以裕財隆祭享以盡孝厚
振施以立義呂氏之興夫人之助為多處事明果雖
呂君有不能回者諸子獻疑亦堅守初意不為變曰
後當如是及事定一如夫人言人人數服其後呂氏
家益康大第千礎堂寢尤宏麗而夫人顧自挹損齊
居玩道即東偏汛掃一室蕭然如老釋之廬或終日
不出闕如是歷十餘年呂君與諸子屢勸其歸堂中
皆不可然絲案緘縷之事至老猶自力暇日勉諸子
以學授諸婦以家事諄諄不惰雖古賢婦殆無以加
不幸一日不疾而臥醫藥至皆却之曰吾固無疾也
已而遂不復語諸子方就試馳歸省疾領之而已神
宇泰定超然就蛻及有司以友德名上禮部報至夫
人不及見矣可哀也已夫人三女嫁吳一夔徐僑徐
蕓皆良士孫男四人銘曰

山盤水紆龜食簞從吉日壬申宅是幽宮表表三子
奮繇詩書維夫人之賢有以基之

承議張君墓誌銘

君諱鎮字深父年三十有八慶元三年十一月壬辰病卒以四年九月庚申孤某葬君於臨安府西湖佛首山之原因其伯父寺丞功父鑑以君之友太學內舍生陳公道原狀請銘予與功父交二十年信重其言而陳君所敘文亦甚美可考據遂與為銘君家秦之三陽曾大父安民靖難功臣太師靖江寧武靜海軍節度使清河郡王追封循王謚忠烈配饗高宗皇帝廟庭大父諱子厚左武大夫康州刺史帶御器械贈少傅考諱宗元通議大夫敷文閣待制贈少師君幼而穎異強記好學少師遇郊祀恩任為承事郎稍長主管建昌軍仙都觀禮少師憂未除而母夫人繼卒君執喪累年毀瘠幾不可識族人以不勝喪為憂共論勉之始稍自抑然終喪猶羸甚歷兩浙轉運司明州造船場簽書安豐軍判官廳公事江淮荆浙福建廣南路都大提點坑冶鑄錢司檢踏官監總領准西江東軍馬錢糧所太平惠民局積官承議郎君之為船場人或喧其非勳閩所宜處君謝之曰景迂晁以道先生所嘗為也吾處之懼弗稱敢薄之邪訖代去不以卑冗怠其事自守以下皆數譽之晚官藥局尤號閑冷顧無所施其才又素簡儉遠聲色獨以書自娛時屬文辭見志然未嘗妄出以示人所居帷屏壁門皆有銘以自警戒其文尤高沒後始或見之皆驚其才服其識以為使未死得享中壽其所至詎可量哉孰謂不幸年止於此君嘗以進士試禮部見黜不以對有司亦遂不復踐場屋諸公貴人多知之然仕常從銓與寒士並進至終其身其靜退乃天性娶楊氏太師和王存中之孫繼室以潘氏少保安慶軍節度使邵之孫皆封孺人子男一人渥將仕郎有賢稱女一人與孫伯東皆幼銘曰

君家勳德奕世傳圖像麟閣待甘泉佳哉公子何翻翻才當用世不承年有美樂石可磨鑄百世之下知

此賢

朝奉大夫石公墓誌銘

公諱繼曾字興宗周武王之弟康叔封於衛五世生靖伯邑於石是為石氏之始祖而會稽新昌之石實自青之樂陵南徙距公二十三世其詳見於世譜左朝議大夫累贈正奉大夫諱端中朝散大夫大理正出為福建路參議諱邦哲迪功郎温州平陽縣主簿累贈朝奉大夫諱祖仁公之三代也公幼穎異入家塾日誦千言過目不再寺正築堂名博古藏書二萬卷每撫公歎曰吾是書以遺爾無恨矣客至待左右進退應對唯謹客悚然不敢童子視之曰石氏與未艾也朝議捐館舍時公尚未生遺言吾致仕得任子恩當以子適曾孫公既生補明州文學調黃州黃陂縣尉以便養親監潭州南嶽廟歷臨安縣新城縣主簿楚州司理參軍監行在編估打套局門監建康府戶部贍軍西酒庫知饒州德興縣兩浙轉運司主管文字提轄行在文思院未及造朝以疾卒於家享年五十有八自迪功郎十遷至朝奉大夫公事親孝執喪如禮毀瘠幾不可識除喪久之乃復居官守家法以廉自勵俸入可以受可以無受必辭餽贖可以取可以無取必却徇公而忘私約己而裕物捐利而篤義為主簿新城時謹簿書扼吏奸以善其職聞移於潛丞邑民謹於境上曰奈何奪我主簿久乃涕泣辭去在楚州治獄尤詳明屬縣尉一日獲盜十輩意且得贖賞同僚為言君雖怒然不可縱盜公正色對曰盜誠不可縱罪亦不可入囚辭亦不可不盡同僚退相顧曰尉賞不諧矣然憚其正不敢復言獄成真盜財伍人餘破械遣去部使者趙公思尤賢公一路有疑獄滯訟輒以委公公治之無遺察雖受罰者皆稱其平德興壯縣俗喜負氣健鬪而終訟公始下車數曰是不可以柱後惠文治也於是為政一本於教化有兄弟宗族爭訟者輒對之泣下多感懷而去俗為

一變繕治學宮聚經史豐饒羞尊延耆老而賓友其
秀民又創小學以誘進其童子誦書之聲聞於行路
會科詔下德興與薦送者二十有三人比他邑爲最
盛縣之遠郊貧民憚多子或不能全公舉行胎養之
令置保伍以察之甚悉而盜攘因不得輒發其政大
抵類此郡以上聞勢孤無爲援者不報還朝從吏部
得兩浙漕司屬官公澹然無滯留色浙江西陵渡舊
設官護舟楫歲久不復擇人其弊叢出歲有覆溺公
建言請各命文臣一員察其勤惰以爲陞黜且渡舟
一置備舟二以翼之雖有惡風怒濤可無大害江之
津官舊爲築舍數十區爲待渡之所後輒廢往來有
暴衣露蓋之患公亦請以官廢屋復之事有施行者
皆至今爲利而議者惜其不盡用也公雖以任子入
仕然志在繼世科嘗貢禮部不合有司退而力學著
書比卒遺稿可次第者數十卷多可行世娶郭氏封
安人先公一歲卒丈夫子三曰正大正誼正權皆舉
進士而正大亦嘗至禮部女子子九已嫁者五鄉貢
進士郭溪修職郎新邵武軍司戶參軍趙善隸從政
郎新隆興府府學教授王益之國學進士孫之淵國
學進士劉敏文其婿也諸孤將以卒之明年慶元六
年正月丙午葬於山陰縣謝墅之原以安人祔前葬
來請銘銘曰

噫大夫秀而文學自強仕有聞秩中郎返蒿煮我作
銘賁其墳後百世仰遺芬

方伯蕃墓誌銘

伯蕃甫姓方氏名士繇一名伯休莆陽人曾大父會
事徽宗皇帝出入榮顯顯謨閣待制贈少師大父昭
左朝請大夫嘗入尚書省爲駕部郎中父豐之右迪
功郎監建州豐國監中書舍人呂公居仁著作郎何
公晉之皆屈年輩與之遊紹興間有名士方德亨者
是也子嘗序其文今行於世伯蕃甫所自出曰兵部
尚書呂公安老尚書以臨大節不撓死淮西之難載

在國史伯蕃甫遭父憂時財十二歲從太夫人依外
家居邵武軍執喪已能無違禮而事太夫人及庶祖
母以孝謹稱入小學與他童子從師授經既退意不
滿爲朋儕剖析義理師聞之悚然自失既冠遊鄉校
試屢在高等聞待講朱公元晦倡道學於建安往從
之朱公之徒數百千人伯蕃甫年少而學甚敏不
數年稱高第因徙家從之於崇安五夫籍谿之上所
巨熏陶器質涵養德業磨礱浸漬以至於廣大高明
者蓋朱公作成之妙而伯蕃甫有以受之也伯蕃甫
既見朱公卽厭科舉之習久之遂自廢不爲進士專
以傳道爲後學師六經皆通尤長於易亦頗好老子
嘗歎曰老子之言蓋有所激者生於衰周不得不然
世或黜之以爲申韓慘刻原於道德亦過矣又曰釋
氏固夷也至於立志堅決吾亦有取焉其博學兼取
不以百家之駁揜所長如此亦足見其資之寬裕忠
厚與世俗異也伯蕃甫晚得脾弱之疾春夏之交輒
作不能食者彌月乃已慶元五年夏病如常歲至五
月庚申忽命家人爲之總髮既畢取鏡自照正冠危
坐而歿得五年十有二娶黃氏曹氏男女各三男曰
丕曰立曰平女嫁張峯劉學稼幼未行明年卜葬於
武夷山石門寺之原六月丕書來請銘其辭指甚哀
予雖老病昏眊亦重違孝子之意且伯蕃甫之賢固
願有所述遂不敢辭初德亨之文豪邁警絕人莫能
追及而伯蕃甫之作則閑澹簡遠有一唱三歎之音
世莫能優劣之也工於書自篆籀分隸行草諸體皆
極其妙又能講其時世之變與圖方腴瘠之法聽之
終日忘倦遺稿數百篇與它著書甚衆不等方輯之
未成好方技治疾有奇驗能逆決生死著傷寒括要
亦未成嘗謂予曰士貧惟賣藥可爲然子孫繼爲之
有怠且欺則不免害人不若不爲之愈也大抵伯蕃
甫多才藝所能輒過人其思慮精詣又若此然在伯
蕃甫皆不足言故不詳著銘曰

方氏三徙而不出閩君從朱公始爲建人武夷山麓鬱有封樹車過必式曰是爲伯蕃甫之墓

留夫人墓誌銘

慶元六年十月余之友信安徐賡赴告其母夫人之喪於山陰澤中曰賡不天早失先人先人無他子賡於母氏相恃爲命稍長娶婦韓賡出游獲從一時知名士學問母氏與婦韓治家事以待賡歸賡雖游不敢甚遠母氏壽而康間有小疾則馳歸省到家往往已愈母氏見賡所與諸公論議辨質文章則大喜曰使汝嘗在吾傍詎有是哉今年六月賡客都下得報母氏有疾賡卽日歸行二日而遭大變至家已無及矣俯仰天地豈能生存大事未終不敢致毀惟是幽隧之銘敢請於執事賡忍死以須執事忍却乎按狀夫人姓留氏常山之馬廐人曾大父唐大父永父師古世爲儒夫人適西安人徐君諱國潤徐君一鄉善士其卒也故尚書謝公諤狀其行而內相洪公邁誌其葬不知徐君者以二公許與可信其賢夫人資端重色莊言厲然遇慢己者輒退自省曰吾其有以致之舅姑御家嚴夫人左右無違嫁女妹凡已嫁時服飾粧澤無所惜與先後處自始逮終歡如一日凡徐君行事見稱於族黨閭里者多夫人相之而賡之學識卓然聞於世者抑又夫人教誨之力也是可以得銘矣夫人享年七十生丈夫子一賡也女子子三知武當縣劉鎔新知樂安縣劉壽前監太平縣稅韓朴其甥也孫男曰魯孫女長適進士翁時敏餘二尚處卒之歲某月某日葬於清平鄉官樓山附徐君之墓

銘曰

三代益遠世廢女史豈無淑人曾莫之紀埋玉於泉孰知貞堅我文尚傳夫人與焉

渭南文集卷第三十六

渭南文集目錄
卷第二十七

朝議大夫張公墓誌銘
王季嘉墓誌銘
石君墓誌銘
夫人陸氏墓誌銘
程君墓誌銘

渭南文集卷第三十七

朝議大夫張公墓誌銘

於厚土有才足以任重責成謀足以折衝經遠而不見知於人不獲用於時者世固有矣人猶未以為憾也至於知之而不盡用之而不極利安元元之功卒不克見則後世讀其事至於悲傷歎息有不能自己者某自壯歲客遊四方獲識其豪傑如朝議大夫張公其殆是已公諱郊字知彥和州烏江人曾大父諱延慶大父諱補著德深厚然皆不仕父諱幾才尤高以子貴贈金紫光祿大夫公少用兄待制邵出使恩授右迪功郎調開化尉兼主簿歷平江府西比較務監南嶽廟平江府錄事參軍全椒令復監南嶽廟監行在激賞酒庫所糯米場樞密院編修官通判建康府主管台州崇道觀主管淮西轉般倉監登聞檢院太府寺丞知真州鄂州提舉江南東路常平茶鹽公事復主管崇道觀建寧府武夷山冲佑觀積九遷至朝奉大夫遂請老以子遇郊祀恩積四封至朝議大夫公為人魁磊不凡學問識其大者臨事前見逆決若燭照龜卜無秋毫疑滯他人極思慮不能可否者公一言處之常有餘裕初為編修官公府吏素容養習為奸利無所畏忌視核屬無如也公因事時白發其甚不可者羣吏縮栗至相語以公白事為憂未幾坐臺評免歸孝宗皇帝受內禪虞猶窺江淮上慨然思却虜復中原廟堂共謀拔擢人材分任兩淮事築城浚隍什伍民兵漕上江之粟以儲兵食乃自椒地起公主管淮西轉般倉然初議乃欲槩付以淮西邊事不獨治倉庾也會更用大臣所議不果行乃以公監鹽院丞大府無深知公者求試外出守儀真得對言臣疎賤歷州縣頗熟民間事今蒙恩使治郡不敢不力惟淮南新被虜禍民被徙未還臣當體聖意安輯撫摩察其蠹弊一皆上聞惟陛下省察如臣不任

職固不敢逃罪前守員琦獻羨緡入萬皆文具實不有一金公到郡悉以實聞訖得免輸俄詔兩淮郡守及部使者各上用錢券利害公力言券用於四蜀全盛之地故能流轉然猶有弊今兩淮凋瘵如此諸郡賴以給用度者不過酒稅新為戰場無復土產可以貿易獨賴錢幣而已若用券商賈且不行何以為郡時議者多妄揣時事謀開邊隙公密奏虜盟固不足恃然其主孱懦懲故曾敗盟之失方幸無事其任事之臣又皆齷齪日事琴奕無遠略可知我若惑浮言遠動不惟力有未給又激彼使生事朝廷且旰食矣上頗採用其說公因言真為楊楚之衝當城此郡以固人心度費緡錢十萬米三千斛而郡有上供與經制羨數可得大半止乞給降三萬緡發衛近屯兵二千人臣身自督役不再閱月可成既得請果以四十四日告畢樓櫓屹立而民不與知上聞益知公可用代歸入對所陳又合上指乃有武昌之命入辭上慰諭曰卿真州之政不苟鄂上游重地是以委卿卿便宜體此意到郡有事第奏來御前當遣金字牌報卿公感奮益盡力鄂為江湖間一都會總領轉運及都統制三司鼎立異時多縱肆雖幙府僚屬皆下視郡守公素剛介難犯人固已震畏其名及視事衣冠視瞻甚偉號令設施皆當人心由是莫不敬憚而軍中猶倔強自如縱羣卒入市視民及郡兵有長身中度程者輒毆以往公捕至郡庭呼吏作奏軍吏羅拜請後不敢自是訖公去無敢犯都統入朝有營卒夜挾刃貸於富室脅使不敢言公廉得之馳入提舉軍事張平家平素以兄事公呼家人置酒公曰我來正欲飲但當得劫富民者行軍法乃快飲爾平惶恐立捕盜者唐青厚資給之且授以方略遣行而方士皇甫坦挾禁輿勢為私請公弗聽俄獲輿以獻及公還朝上首問獲輿之狀公謝曰妖人在郡境不即置法

至煩詔命臣乃有辜然唐青實盡力賞未償勞敢昧死以爲請蜀士以喪歸遇名盜破舟殺人又欲斫其棺公厚賞捕之竟伏法由是江路清夷有誤觸舟者枕師大言曰今張公在此汝尚敢爾邪歲大疫公爲之營醫藥以全否爲醫殿最餓給之食死予之轄民家一牛死貸錢三萬以買犢治聲聞於行在及使江東公言部中旱饒南康尤甚濟之當如救焚拯溺今當奏事往返且兩月請先馳至部議所以賑卹者又條上其事甚悉上皆從其請事略定乃入對且以聞上惻然曰何以使吾民得食至麥熟邪公又具以計畫對上勞勉遣行會詔諸路諸郡陳事之不便於民者公因言歲饑民流去年渡江而北者殆數百萬至淮南亦無所得食死者相枕藉今僅中熟而郡縣不度民力督常賦及私負甚厲加之造寨屋教民兵行和糴糊馬糊鑄錢幣未見其利已不勝其擾願發德音一切罷之此數事有主之者施行方力而公盡言乃如此武臣提點刑獄怙權侵官公略不爲屈職業所及必力爭得直乃已至甚不可者又以互察法劾上之其人懼乃與池州守相附結排公賴上素知公諸姪仲兄祕閣公祁辭不取以予公之子初不告也公聞亦固辭而乞官孤姪孝嚴寓家蕭山收養孤廢與同甘苦視所居之鄉如其宗黨進善人誨責其有過者俗爲一變門當吳越大道有病於旅死於行公以私財療治斂瘞之無遺力歲惡飢民爭歸公公爲設食不可數計然用度初不給足食或不肉也間無事時出門尚羊扶一童立里巷老稚遙見稽首祝之曰願吾父壽百千歲爲窮民歸淳熙十六年八月七日晨闢戶有方外士二人來謁公接之如平時將食曰吾今日病不能同汝食家人請命醫公不許且麾使去家人行數步回視之奄然逝矣享年八十有七娶余氏進士帝之女封恭人贈碩人先公三年卒諸

孤以公捐館之明年十月二十有八日奉公之喪與碩人合葬於慶元府鄞縣桃源鄉西山之原子六人孝伯朝請大夫權禮部尚書兼侍講兼寶錄院同修撰孝仲承議郎京西南路安撫司幹辦公事孝叔孝季未官而卒孝穉從事郎監嚴州神泉監孝聞從事郎新差管押紹興府石堰慶元府鳴鶴鹽場袋鹽女四人修職郎高得中進士王孝友其婿也其二早卒孫六人守之宜之約之及之即之能之孫女十有五入初公兄弟皆負異材惟待制稍顯榮然皆不得盡行其志祕閣之子中書舍人孝祥以進士第一起家出入朝廷二十年文學議論政事隱然號中興名臣亦未四十而卒公晚遇主又壽最高亦竟不用識者謂天嗇其報將大興張氏後而公之陰德在人其後亦當大今尚書公忠孝文武方極柄用公既以通議大夫告第矣追榮且繼下然後知識者之言爲驗某生晚不及拜待制之門若祕閣及中書則辱知厚甚晚始識公於武昌公又特期之遠不惟以祕閣中書故也時方葺南樓公朝夕召與燕飲慨然語曰吾南樓天下壯觀要得如子者落之子之來造物以厚我也謝不敢當今尚書之容皆一時賢傑其巨筆鴻藻皆足以慰公於九泉而尚書獨以誌墓屬某豈猶以公遺意邪用是不敢辭銘曰

世患無才才大輒棄萬里之塗方駕而稅若時張公表表國器入掾樞庭謗讒亟至兩城一節所至大治抱負萬億出微一二猶或忌之竟以讒躓言歸江濱風雨財蔽聃然耄期化被閭里天其知我報在享子教忠之榮四品告第尚有寵褒震耀一世爰勒斯銘式黃幽隧

王季嘉墓誌銘

予自尚書郎罷歸屏居鏡湖上郡牧部使者多不識面至縣大夫以耕釣所寄尤避形迹弗敢與通惟兩人曰山陰張君橐會稽王君時會相從驩然如故交

張君端亮英達不幸卒於官王君尤淵粹有守官滿造朝來別予悵然語之曰贈行當以言願足下自愛毋以用舍媿初心敗晚節君曰是我志也及見除書從天官銓調湖南轉運司主管文字以去方是時大臣多知君賢近臣或奏疏薦君而揚歷久且嘗爲邑以最聞近比當得美官君一不顧方上書論進退人才當考實不宜以近似斥善士已而迂道來過予喜津津見眉宇曰某於是粗能不負公所期矣予作而奮曰僕不失言足下不失己皆可賀也及卒予聞訃歎驚爲朝廷惜此一士亦竊喜君仕雖蹟而志達也會其子前葬來求銘因敘而銘之君字季嘉慶元府奉化縣人曾大父起大父元發皆布衣考中立以君有列於朝再贈至宣教郎君自少時事親孝事兄悌處鄉里學校從師擇友甚嚴言語舉動忠敬有法與兄時敘同登乾道五年進士第仕自台州司戶參軍歷袁州州學教授監行在左藏西庫知紹興府會稽縣最後終於長沙自迪功郎七遷至朝散郎賜緋魚袋初魏惠憲王判明州累年君移書丞相史魏公言國家早建儲宮以定天下之本而魏王偃藩在外天下皆以爲當然者父子異宮天下爲家東藩之守猶異宮也然父子兄弟之情終若有間雖曲加恩禮豈若用故事使得日奉朝謁外庭濟濟示天下以公內庭熙熙從家人之樂哉史公讀之太息稱善會魏王薨言不果行觀君此書使得居中任用其補國家化天下必有大過人者矣有識之士恨君之不遇也會稽歲霖潦郡方督已蠲之賦甚急君持不可守不聽乃袖告身易服立庭中力爭守爲之奪氣民賴以紓遂修社倉之政因立保伍以察不孝不悌情遊不逞者風俗一變會營奉永阜陵吏按舊比抱文檄如山環築立君徐視去十之七餘不可已者召民面給錢粟與爲期會於是民不知役而事悉集君所至設施多可稱述論事亦多識大體予所書特其章章可備

史官之求者若廉於貨財簡於自奉不納妾媵不受羨俸此在君爲不足言故皆略之君銳意經學有易詩書論語訓傳鄉飲酒辨疑凡數十百卷文辭簡古尤喜爲詩與范文穆公及尤延之楊廷秀倡酬諸公皆推之有泰養存稿三十卷病已亟猶強起拱手端坐無情容顧家人曰吾學易晝夜之理甚明遂卒享年六十有四慶元六年正月丙申也娶楊氏封安人淑柔孝恭晚益好靜安於死生有學士大夫所難者先君一歲卒男女各五男宗廣以君遺恩入官宗大太學生宗朴早卒宗野宗愚女長嫁進士楊琪迪功郎沈黯進士杜思問進士孫之穎幼尚處孫男五人與點與回與賜與文與求孫女七人皆尚處諸孤將以十二月甲午奉君及安人之柩合葬於某地之原銘曰

君才雋偉天所授早篤於學晚益富年過六十是亦壽道悠運促志弗究子孫森然敏而秀如芝在庭驥在廐築丘植檀日高茂盛德表表宜有後

石君墓誌銘

會稽之姓石爲大君諱允德字迪之會稽剡人梁開平中分刻爲新昌君之籍在焉爲新昌人五世祖開府儀同三司待旦以學行爲范文正公所禮子孫又多賢爲聞人而石氏益爲名家君曾祖景恭祖端怡父圖南獨皆不列仕籍然邑人皆推以爲賢長者至君繼以好學謹行事後母至孝舉鄉進士亦每在選中然卒不遇以死吾嘗觀一邦一邑之士其犯法觸禁流離困陪者非必皆其身不善也問其先往往喪節而貴者也否則不義而富者也否則養交黨事頰舌飾詐售僞以取名譽者也其仕而達處而給足且有才子令孫者非必皆其身之賢也問其先往往正直而不遇者也否則廉讓而貧者也否則篤學守道而不爲人知者也若君之家世庶幾於正直廉讓篤學守道者歟君又能繼之而滋不遇初君先世寡兄

第至君亦予立而君乃生四子皆不墜詩書之業天之報將有在矣君薄於自奉厚於賓友所居財蔽風雨而作東園有大堂方池為宴客之地客至把酒賦詩奕棋投壺或終日酒休平居尤樂施惠嘗葬不舉之喪遺失時之女晚與族人吏部公畫問議同作義莊以給族之貧者會吏部下世君乃與其子提刑宗昭將終為之而君又歿提刑亦歿善之鮮克舉如此於瘞悲夫君歿以慶元六年四月癸丑享年四十九娶許氏朝散郎知辰州從龍之女子孝本孝施孝聞孝積皆進士女孟嫁太平州司戶參軍趙時儒仲季未行諸子將以嘉泰元年十二月甲申葬君於仙桂鄉大燒山之原實附大墓來請銘銘曰

維石畜德世克嗣至君宜顯迺復躡報不在身在後裔天之昭昭其可恃

夫人陸氏墓誌銘

夫人陸氏吳興人曾大父某大父某皆為薦紳士大夫父某有學行為進士母劉氏同郡戶部侍郎劉公岑之女劉公蓋與進士君遊甚久夫人幼有美質懿行既笄嫁金谿人故通直郎黃君齊黃君仕至靖州軍事判官以歿夫人持家教子有法度廟享賓燕合禮嫁娶不苟里中多稱之遇疾雖篤不亂起坐鹽櫛正衣冠乃歿其歿以慶元六年十一月己未享年六十七上距黃君捐館舍二十六年初葬以嘉泰二年十月壬午實附黃君之墓夫人三男子曰甲曰庚曰丙一女嫁陸祺四孫自勉自得自立自防一孫女子與夫人皆吳人夫人之先徙吳興而予家徙山陰其實一族也而祺又予從子故其孤以朝奉郎通判江州黃君榮之狀來請銘銘曰

生若溪嫁汝水夫善士又有子家方與孫疑疑葬得銘永弗毀

程君墓誌銘

君諱宏濟字志仁兵部尚書諱瑀之子尚書鄉里世

次家有譜墓有碑國史有傳君生於宣和六年客有得古劍於武夷山中以獻尚書已而君生遂以劍命之幼讀書記誦博敏號奇童十二能為詩有老成氣紹興初尚書以給事中勸講適英殿敷繹古義開廣上聽以濟中興之業者甚眾君槩聞其說輒嘆息不已一夕夢道君皇帝大駕南還且以告尚書尚書悲慨為賦詩他日以示中書舍人傅公崧卿傅公抱負大節常思捐肝腦死國家與尚書尤厚讀詩感歎曰忠義出天資非勉強可至吾輩老矣使後生皆如此兒寤寐不忘國事尚何慮離取之不雪哉十年以宗祀恩授右承務郎久之不調官或勸之仕皆不從秦丞相檜亦嘗以問尚書君尤不謂可凡再為監南嶽廟法不許復請乃命以江南西路安撫司屬官尚書壽終君哀慕過人除喪監通州金沙鹽場秦丞相用事久數起羅織獄士大夫株連被禍者袂相屬也廉得尚書所著論語說體近似語以為訕禍且巨測母夫人憂懼不知所為君侍左右無俄頃捨去且慰解言先人逮事三朝上所眷禮必且蒙矜宥願毋戚戚母夫人賴以少安君雖竟坐罷官然母子居家如平日同時得罪莫得與比蓋高宗皇帝終保全之如君所料久之起家為江南西路轉運司幹辦公事時李莊簡公光自海南歸舟下瀟湘而病君曰吾先友也且兒時蒙公知得一見死不恨亟謁告往遊兼程抵江州則李公至蘄州薨矣君吊祭盡哀歷江南西路提舉常平司幹辦公事遭內難除喪監建康府榷貨務乾道元年六月丙戌以疾卒年財四十有二官止通直郎明年五月庚申葬於番陽縣鑿山之原夫人臨川黃氏吏部郎季岑之女六男子有功宣教郎故通判秀州有孚朝散郎戶部稿賞酒庫所主管文字有元進士有徽太學內舍生充國子監小學教諭當赴殿試正委名有初有大皆進士二女子長適進士鮑庭按次適黃州黃岡縣尉滅誨一孫蒞始予自蜀

召歸出爲江南西路常平使者進士程君有章字文
若以五字詩爲贊卓然有元和遺風予刮目視之自
是二十餘年間數相見及見於臨安程君已入太學
更名有徽字晦之才名動一時卽君第四子也來屬
予銘君墓不獲以衰病辭銘曰
古士奚學惟忠暨孝君雖不試志稱名教中蹈嶮難
凜不回撓咨爾後人是則是慙

渭南文集卷第三十七

渭南文集目錄
卷第二十八

朝奉大夫直祕閣張公墓誌銘

山堂陸先生墓誌銘 監丞周公墓誌銘

夫人樊氏墓誌銘

渭南文集卷第三十八

朝奉大夫直祕閣張公墓誌銘

公諱瑄字子律寧州真寧縣人其先為邠寧望族世以學行著或居邠或居寧居邠之後故吏部侍郎兼侍讀舜民為元祐名臣居寧者則公之大父太中大夫也諱居擢元祐六年進士第元符三年徽宗皇帝嗣位下詔求言太中時為黔州彭水令上疏切直出數百人上而數百人者得其副亦數以為不可及會蔡京入相取奏疏次第之置奸黨上等特降官衝替永不許改官數年遂卒於沉廢後以子仕登朝累贈至今官實生朝請大夫通判永州事諱適則公之考也亦累贈至中奉大夫中奉遭亂南渡從大將岳少保飛為之屬身先將士屢與金虜鏖戰走其名王大酋策功進官方慨然以功名自許會朝廷與虜和中奉去懷府調知岳州巴陵縣有異政久之佐永州以歿識者謂用不究其才後當有興者公始以郊祀恩入官調贛州會昌縣主簿未幾以材選攝事與國丞信豐令皆閱歲會昌與梅州比境梅移文捕逃卒卒已亡去巡檢司乃發卒圍其所親李杞舍杞雄其鄉以為恥詬聚謀亂令託辭委縣去以印屬公公不為動械巡檢卒繫獄親為檄諭杞以禍福杞皇恐聽命縣賴以無事與國有婚訟久不決公察其婦人不類良家一問引服信豐俗悍輸賦率不以時吏亦以此擾之至相率抱嶮自固吏計窮即以民拒官為言公曰豈有是哉馳至近村憩僧廬中以善言招其鄉之為士者及父老與之酒食從容曰稅賦豈可終負然已失時姑使吾得十二藉手若何皆踊躍而去更相告即日皆集如約公去而之他鄉悉如之旬日歸報太守洪公邁異其能方薦於朝而忌者聞之於部使者遂止調潭州右司理參軍有老卒夫婦居牙城中白晝為何人所屠而掠其貲卒有義子兵官疑之執

送州且以同處之卒及牧羊兒為證既繫獄公親詰之皆詞服公察其冤他日取牧羊兒實壁間引義子者與他重囚雜立庭中出兒問孰為殺老卒者愾無以對乃入白州請揭厚賞募告真盜不閱日獲之則卒王青也捕至具伏且得其貲於市庫無遺即日釋義子去湘鄉縣械鋪卒張德上州以為手刃其叔祖公引至前語之曰茲罪十惡赦宥所不及汝兄與叔祖同居汝暫自外來有何憾而戕之德泣曰囚來省叔祖不得見兄以疾告就視則死而非疾也方愕眙兄與里正及鄰人共謀執誣之且以言脅誘謂決不死亡今乃知死矣因稱冤不已公亟呼其兄與對兄情得語塞遂伏辜他死囚類此得不死者十有七人終不言賞府帥林公栗以直得名臨事剛果小人揣知之有榜於州治門言提轄官者為帥謀將稱兵林公怒闔門徧呼吏卒驗其書一兵典者與榜出一手親詰不服乃以付僉廳苛慘雖至終不服乃屬公即僉廳鞫問公寬之而諭使以情言且許以不死始具言提轄官橫甚為所患苦之狀度不可訴故出下策為此榜以為不及帥則無以激其怒不知乃陷重辟公問於六局兵人人言同公乃白帥且求寬其罪林公大怒嘻笑必誅之公一日凡十餘進力爭曰帥所以屬某者欲得其情也今得其情而失信則有司自是不復可鞠獄矣爭至莫林公亦悟黥隸嶺外而已民有訴一冤死而十年不見理者訴於提點刑獄馬公大同馬公以屬公公閱其獄皆謂震死公獨得其死狀實以鬪毆非震也公曰舉固有所歸然歲月久屢更赦令當從末減馬公強果自信下吏莫敢與爭公獨不為屈又有訟者馬公直判委公勘某罪公力陳其不可馬公皆霽威嚴如公請識者兩善之公每白事姓名歲月及事之名數曲折皆成誦在口無一遺者馬公始亦疑因強記一條驗之牘皆合乃大數服自謂不逮又調常德府武陵縣丞政事益明習攝縣

及府從事者凡再閱歲紹熙中武陵大水犯縣城不沒者三版門不得闔水且入城公時方攝縣亟命實土於布囊以窒門俄而水定乃設方略募舟救民且親載粟戶給之泥行露宿無所憚獨閣賦輸一切必以實吏不得一搖手民忘其災縣三里港灌漑甚廣久弗治數遇枯旱公爲築之不愆期訖事因治他陂塘無遺利迨今賴焉以薦者及格改宣教郎知隆興府奉新縣縣有營田征賦比他爲最薄民競耕之久而營田罷以鬻於民履畝取稅比舊已增俄而復命折粟帛以緡錢其低昂或至十百民皆破家不能輸令屢以病告不見聽公力請又不聽則欲棄官去會帥張公杓來是公言始奏蠲之戶千有九十皆若更生楊公萬里記其事他與除利害勸農桑築陂防興學校不可勝載所部及府俱以其事論薦於朝而王公大人亦自知公乃命主管官告院進將作監主簿太府寺丞方公在朝子右史舍人朝翔三館俄擢從班父子相望於班列中客至門見公便坐從容聞國朝故事前輩履行後生所未聞者人人鑿足退而見舍人碩大雋傑之資同時進用爲國光華史冊所載殆無以進焉而公了不自滿方勤其官如仕州縣時文思院火告身綾無在者士大夫不以時得告身公時在告院建言援故例便宜以雜華綾紵目前從之藥局舊隸太府積奸弊至衆公日夜窮極弊原髮櫛而縷析之郡人無貴賤皆得善藥方擢實要官而近比厄於未爲郡公亦小疾思彷彿外藩力請去乃知嘉興府中貴人藍氏殖產於崇德縣名田過制而役不及有鍾淳者糾之藍迫期去產以規免官吏欲許之公判曰兩家物力相去遠甚而藍又白腳必如法乃可一郡稱快故人子棗舟方醉縱從者與將官朱樗年忿爭交訴於府公察故人子不直治其從者不少貸民張璠得臨安營妓與之歸遂欲棄妻出子其兄止之復憐兄兄以告官公爲逐妓歸臨安且以

大義開諭之於是璠爲兄弟夫婦父子如初其爲政有古循吏風類如此且摘發隱伏照了如神良民雖相與化服而奸豪之譏作矣改主管建寧府武夷山冲佑觀公怡然命駕去郡人錢公攷鄉之老成人嘗以書抵其舅妻公機曰張公廉直有守近時鮮及今乃遽去此無他吾鄉士民福薄耳歸過國門右史方請外乃檣舟北關需同載而歸會右史被命使金國右史將懇奏辭行公不許曰使事不可辭我留此待汝自薊門回乃偕去未晚也遂寓錢塘門外張氏園甫再旬右史旣渡淮而北公女孫醜老生十歲暴得疾醜老慧而孝公甚愛之朝莫親撫視因亦感疾比其天家人不敢告而公揣知之曰吾與此孫偕逝矣遂卒享年六十有四上始聞公疾革以子方遠使加直祕閣蓋異思也公自宣教郎七遷至朝奉大夫賜緋魚袋娶韓氏魏忠獻王元孫通直懿胄之女封恭人三子嗣真從事郎新新州新興縣尉先公七年卒嗣祖苦學得心疾未能任其季則朝散大夫侍立修注官兼實錄院檢討官國史院編修官資善堂小學教授嗣古也一女適宣教郎新知太平州蕪湖縣趙汝鏗三孫烜煜舉進士幼未名公資磊落恢疎與人交洞然無城府而默察其賢否邪正無能逃者善則稱之不遺餘力不善則苦言規之雖愠不恤也初中奉公遭亂去秦生公於襄陽遂卜居宜春公仕宦五十年先疇之外不增一壘比右史奉公喪歸至無屋可廬其清約如此右史卜以開禧元年八月丙申葬公於袁州宜春縣歸化鄉宜化里大富嶺趙家衝之原以王君克勤之狀來屬某爲銘某與舍人同爲史官因得從公遊義不可以耄疾辭銘曰

彭原之張與邠相望邠遷杜城元祐之英彭原綿綿獨處不遷至太中公得譴以忠中奉履難有功兵間傳家禾興益以才稱剛不容世方用而躓是生記注麟儀鳳翥父子在廷國有典刑子聘於幽公逝不留

上聞歎息加錫祕職生誰不終賁耀無窮刻銘隧道百世是告

山堂陸先生墓誌銘

陸氏之遺譜曰漢太中大夫賈生仕爲豫章都尉葬於吳胥屏亭始爲吳人至晉侍中贈太尉玩生始始生萬載萬載生子真子真生惠澈惠澈生閑閑生兒生丘公丘公生探探生山仁山仁生玄之玄之生元生元生生景融景融後四世曰文公希聲仕唐爲戶部侍郎同中書門下平章事文公生崇崇生德遷猶居吳遭唐季之亂始徙家撫州之金谿德遷生有程有程生演演生處士諱戩配曰周氏處士生贈宣教郎諱賀配曰孺人饒氏宣教生從政郎諱九思配曰孺人賜冠帔彭氏從政生山堂先生諱煥之字伯章一字伯政生而穎異端重五歲入家塾坐立語默悉有常度讀書自能質問出長者意表與季父象山先生九淵生同年學同時先生不敢以年均狎季父象山則朋友視之磨礱浸灌甚至十三學爲進士卽有聲十六諸父開以大學先生一聞輒窮深造微極其指趣而文章機杼自成一家宿士見之多自貶以爲不可及屢貢禮部皆不合學益成文章益奇閱世學多淪於異端尤務自拔出以張吾道意所不可雖名儒顯人爲時所宗者必力斥之恨力之不足也諸父雖繼以進士起家亦不用於時象山晚爲朝士陸陸百寮底旋復斥死先生滋信其道之窮蓋將退耕於野著書傳世而未及也以嘉泰三年十月戊子卒年六十有四諸孤以是年十二月乙酉葬先生於某鄉之福林娶陳氏鄱陽人有賢行先十八年卒子男二洽濬浹洽篤於養先生出遊賴以經理家事無後憂濬遊太學有雋才而器度淵粹可喜浹方就學女五項點朱日邁鄧文子其婿也皆良士餘二尚處先生葬日迫幽隧之銘未刻既葬二年濬以先生之友晁君百談之狀來請銘某以既嘗序先生文章所謂

山堂集者而先生多朋游不應併以銘見屬因辭焉連三年請益勤乃敘而銘之銘曰

陸姓入漢祖好時今迨及豫章始南徙兮吳晉至唐世見史兮斷自文公三百祀兮傳世八九皆可紀兮雖不公卿世爲士兮後乃浸大名實偉兮培養既久產杞梓兮維時伯章繼以起兮白首篤學未見止兮攘斥異端正而不詭兮天不少留使耄齒兮伯章之志在其子兮我銘於隧亦以誅兮

監丞周公墓誌銘

公諱必正字子中曾祖諱衍朝奉郎祖諱說左朝散大夫皆贈太師秦國公曾祖妣郭氏祖妣潘氏李氏張氏俱贈秦國夫人考諱利見左朝請郎贈金紫光祿大夫妣尚氏贈鄴郡夫人世居鄭州管城縣祖秦公通判吉州遇亂不能北歸因家焉光祿與弟秦公諱利建皆世以進士擢第公與從父弟丞相益公諱必大成童俱入家塾學行修立俱以世科自期已而遺澤補將仕郎易迪功郎監潭州南嶽廟亦嘗貢至禮部久之調袁州司戶參軍適歲旱盜起分宜尉巡檢捕之皆不能獲安撫龔公茂良聞公至召問計公曰此皆飢民羣聚貸粟以自活耳桀黠爲之倡者財一二輩可以計取餘必自散龔公乃檄公往捕至則諭以禍福解散其黨而陰募鄉豪授之策俾擒致盜首於是盜盡得坐誅者二人而已龔公復委公以荒政當是時自郡至屬邑流民盈集公日夜行視凡累月全活鉅萬諸司共薦於朝孝宗皇帝召對便殿論奏合上指諭以將褒用遂改宣教郎知建昌軍南豐縣南豐劇邑也公遇事明敏常若有餘民柏氏夜被盜併殺守藏奴賊逸去公物色求之果獲面詰猶不承搜其家得白金器一篋既至倒奩出之囚聞其聲卽引服淨梵寺有盜夜斬關入既獲公察其非盜挺出之立賞捕真盜僧恨甚以公爲故出訴之郡郡方

以他事怒公即逮所縱囚繫鞠甚峻囚不能自伸并
邑吏皆重坐未幾獲真盜送郡拒不肯治公乃以白
諸司雖治猶久不決御史聞之奏徙大理乃得實如
公所言邑賦色目極繁以入償出不足者猶四萬緡
率苛征預借苟道吏責公至一切罷之且以其實言
於轉運司得稍賤邑賴以蘇鄉校久不治公凡可以
補弊起仆者一切爲之甫滿秩詔赴郡堂審察除主
管官告院進軍器監丞會益公參知政事公請外知
舒州陞辭所陳又合指命公卹民隱修武備開田萊
并究鼓鑄利害先是同安宿松兩監歲鑄鐵錢三十
萬緡言者以爲擾既損其半而監亦遽廢亟復會歲
薦饑又命罷鑄故臨遣及之公至郡乃知地產鐵炭
民以不售爲患而兵工失業亦或轉而爲盜故當饑
歲尤宜鼓鑄以聚民條上便宜詔命復鑄且省宿松
監入同安公奉行尤有術公私皆便又奏自昔鼓鑄
未始殺以鉛止因議者謂入鉛之錢不可爲兵始殺
鉛以鑄臣嘗親視之鉛之精者爲飛煙其滓惡下墜
鑪底與鐵初不相爲用亦嘗以入鉛不入鉛錢較其
堅脆及治爲兵初無異徒使處信兩州歲歲輓運謂
宜廢夾鉛之制又奏郡歲輸上供緡錢五萬八千舊
皆倚辦於常賦不足則取征權之贏以補之乾道間
守臣偶以羨餘爲民代輸租稅一年而來者因踵爲
例會征權之贏不能當其半餘三萬趣辦於坊渡二
十九所今諸場舊餘鐵炭及民所貸錢凡一萬五千
緡若取以爲鑄本可歲得二萬緡代舒民上供悉罷
坊渡之征百世利也事俱施行大修學宮如在南豐
時又立文翁廟於學立周將軍廟於城南皆舒人也
復故隄城北以禦溝渠漲溢民田數千畝復爲膏腴
因作四橋於北西東門之外其一公自捐俸爲之州
民號周公橋郡東南有烏石陂分其流旁則爲石塘
陂烏石之民欲專其利乃壅水使不得行石塘之田
歲以旱告公命懷寧令丞視之得實圖上於州公按

圖自以意定水門高下甫去壅水未尺餘得古舊迹
與所高下不少差陂利始均石塘民喜至感泣乃歌
曰烏石陂石塘陂流水濺濺有盡時思公無盡時徒
知贛州過闕上諭曰聞贛兵悍驕死徙之餘今亦無
幾可勿復補儻尚循故習卿當便宜行事朕將以他
郡兵更戍公對守臣古號郡將今結銜云知軍州事
苟有過臣自當臨幾應變不敢勞聖慮上喜明日語
宰相曰周必正有器識似其弟謂益公也至郡江西
副總管錢卓本起行伍暴人也入境下令諸校將以
翼日部肄其子弟選補軍額初不以告郡會卓請見
公詰其率意力止之且微諭以上指錢驚謝然意不
悅乃漏公言於諸校將激使詣郡訴公徐曉之如所
以告卓辭指明辯卒皆帖服無敢譴者章貢二水來
自郡南夾城東西流皆有浮梁以濟而城南獨以舟
渡溪惡或至覆溺公始作南橋又治道路以石易甃
最數百丈與國縣之安陂溉田六十頃水勢自上奔
突故難築而易壞壞且五十年公命復之費不及民
擢提舉江東常平茶鹽公事入奏還道玉山縣縣有
徐田陂其渠瀕江數決將徙渠則地主不可將徙陂
而下則柘陂居下流懼爲己害復不可交訟於公公
諭徐田民買地鑿渠倍離其直拓陂民遂幡然無靳
色不三日渠成溉田三百餘頃民大感悅江自陂而
下避礙析爲兩支其一掠縣壩而去歲久岸潰民居
其濱者聞公修渠以利民乃遮道自言公爲相水之
衝爲石隄民欣賴之相與繪公像祠於玉虹橋側歲
時奉牲酒抵今不懈舊法沒官之產以畀民耕而歸
其租於常平及是議臣請鬻田以價充糴本公言如
此則常平儲愈匱請除新令光宗皇帝從之因并行
於諸路池州舊試貢士率寓景德寺隘不能容士病
之會關守公兼領郡事始作貢院植八桂於門名其
門曰擢桂是歲貢士五人而三奏名士以爲公之賜
言者誅於間言誣玉山之役以爲擾罷歸主管建寧

府武夷山冲佑觀上章納祿不許再命武夷祠而公歸志已決告老益力乃許致仕公自江東還闔門屏外事讀書賦詩者累年益公少公一歲亦謝事歸第相與置酒高會無少間時人比漢二疎益公薨公哭之慟不復有世間意開禧元年十一月日感疾不起享年八十一娶向氏文簡公五世孫封恭人前公一年卒男二人縉蚤天綱今爲修職郎前潭州醴陵主簿一女適進士胡榆孫男二人頌穎皆將仕郎孫女一人尚幼恭人之歿也葬廬陵縣膏澤鄉金鳳山祔大墓之東至是乃以十二月庚申奉公柩合葬焉維公仕自迪功郎積遷至奉直大夫爵管城縣開國男服三品公孝友最篤歸自龍舒築第於永和鎮聚族共爨弟姪蚤世育其孤如己子伯氏宜春守出妾之子世修流落贛境公訪得之爲治產築室於永豐蓋伯氏志也其處閨門率如此鄭人有寓旁近者皆歲饋之剛介有守不以進退累心方家居時前後當國數公多與公有雅故數問公安否公應之泊然益公屢推恩數以賤公亦辭不受善屬文尤長於詩孝宗皇帝嘗訪當代詩人於胡忠簡公銓忠簡首稱公敷文閣直學士程公大昌亦稱公文學操行之美晚取莊周息黥補劓之說名其堂曰榮成因以自號有文集三十卷書有古法四方豐碑巨扁多出公筆旣葬綱以朝奉大夫新知真州郭君贊之狀來求銘某與益公定交五十年且嘗遇公於臨川適重九日同集擬岷臺風度話言尚可想也而女孫又歸公之從子紀情好厚矣銘其敢辭銘曰

夫人樊氏墓誌銘

廬陵隱君子宣溪王英臣之夫人樊氏同郡永新人曾大父佐大父仲文學行皆見推於其里中父才字子明尤以賢著聞敬其里之長老而教其子弟環數

縣從之決曲直雖所不與亦皆厭服往往內省而從義爲善士矣二男五女獨奇夫人以爲吾門亦將賴焉及少長女工婦儀未習而能事親左右無違及笄歸英臣君舅南鵬交友傾一世食客塞門君姑不幸早沒二長子亦不得年冢婦孀居悲傷齋居不能與賓祭事亞婦又父母奪志獨夫人佐英臣仰事俯育凡祭祀燕享將迎慶吊婚姻之事一皆身任之英臣隱操達識見於楊公廷秀誌銘先夫人十五年捐館舍夫人不以家事累諸子使皆得用其力於學暇則勉以道義名節不獨責其仕進起家也及琳以進士策名又嘗有列於朝出爲大縣文章得盛名然後薦紳間愈知英臣及夫人之賢夫人母壽百歲夫人無一日不遣人問起居珍膳良劑必出其手終身不少怠又請於朝得封卒如子明之言夫人以宣和五年五月某日生以開禧二年十一月甲辰卒享年八十有四卒之明年三月甲申葬於廬陵縣膏澤鄉山寺岡之原子男四人長卽琳也宣教郎新知潭州衡山縣次揚杲揚烈揚暉皆進士女二人迪功郎辰州敘浦縣主簿張履免解進士會需二女及履皆已卒孫男八人霽之彬之勝之濛之得之冲之隆之豐之嘗試吏部孫女九人婿則迪功郎新道州江華縣主簿張淵進士左利見戴元崇會克寬易應龍彭舜牧劉侃劉洽元會克愿利見克寬亦皆嘗貢禮部曾孫女各七人尚幼琳予友也遣一介行千七百里持書抵予於山陰澤中以臨安府府學教授危君積之狀來求銘予年八十三不敢以老疾辭銘曰

渭南文集卷第二十八

女也而行則士毫也而志不惰敏而好修靜以寡過持身如畏趨義則果我銘之悲維以代些

渭南文集目錄
卷第二十九

求志居士彭君墓誌銘
吏部郎中蘇君墓誌銘

陸氏大墓表

孫君墓表

孺人王氏墓表

詹朝奉墓表

何君墓表

令人王氏擴記

渭南文集卷第三十九

求志居士彭君墓誌銘

廬陵太和有士曰彭君惟孝字孝求曾大父述大父
琮父汝弼三世皆篤於為善鄉人過其門槩車者式
放驚者肅忿爭者解去蓋古所謂一鄉之善士歿而
可祭於社者至君不幸甫冠而孤服喪致毀族姻憂
其不勝喪共以大義寬譬之乃少自抑而事母盡子
道鄉人皆喜曰是稱其家子也稍長力於學聚書萬
餘卷號彭氏山房延老師宿士主講說命子姪執第
子禮惟謹君亦造其席日莫不懈每自勵曰學而不
施於事猶不學也於是凋鄉閭之急赴公上之難必
行其志乃已鄉士當試禮部而以道遠食貧未能駕
者君不待其求亟饋之蓋非一人其他館寓客藥疾
癘藏死字孤多至不可數造梁以濟涉鬻鬻以夷途
周其鄉百里無不以身任之退無夸辭矜色以人不
知為喜識者謂且享天報然舉進士輒阨於命乃浮
江東遊遂詣行在所上書言天下事自丞相以下多
稱其言議英發將推挽之而卒報聞公即日南歸自
誓老於故鄉築第閔壯園林臺沼為一邦之盛自號
求志居士或曰玉峯老人日置酒觴客笑談不倦間
則賦詩多警邁之思以開禧三年五月癸未考終於
新第享年七十有三明年嘉定改元正月甲申葬於
石陂東岡之原初君從良齋平園誠齋三先生遊君
之下築也三先生賦詩屬文以表之一日而傳天下
由是無遠近皆知彭孝求國士也及君之葬將求銘
而三先生皆已歿於是諸孤與君之友會君之謹謀
曰然則捨陸渭南將安歸乃以曾君之狀來請銘君
之配倪氏婉嫺有法度先君九年卒丈夫子五一飛
前卒一鳴一德太學生一愚禮部進士一遵皆有學
行女子子二周瓌曾焯其婿也孫樸果案架案菜案
榮案槩案模案槩皆繼君卒女孫七已嫁者二其婿曰

吳克勤李憲周銘曰
有蘊不逢以布衣終世數其窮孝以事親惠以及人
世與其仁冠弁峨峨後從前訶憂媿則多積書充宇
行必稽古孰予敢侮於虛孝求學講行修言歸於丘
我作銘詩百世是貽匪君之私

吏部郎中蘇君墓誌銘

公諱玘字訓直泉州同安人其高大父翰林侍讀學
士諱某曾大父觀文殿大學士太子太保諱某兩世
皆贈太師封魏國公大父諱某朝請即贈金紫光祿
大夫考諱某中散大夫贈正議大夫兩魏公皆厚德
重望仕至公卿登載國史至光祿正議仕雖不甚通
顯而學術風節皆挺挺為時聞人游公定夫銘光祿
墓而正議之銘則韓公无咎作兩公皆重許可然於
稱述猶歉然若不能盡者正議三子公最長而正議
之配碩人歐陽氏實充文忠公之孫公生出既異於
人又天資嗜學恂恂孝悌才雖高而不以驕人處羣
衆中退然若不能者及遇事奮發切中事機於古有
考於後可傳而公色辭愈謙下衆或不知其出於公
也初以叔祖待制致仕恩補將仕郎調右迪功郎嚴
州遂安尉會正議通判平江府正議嘗為樞密院計
議官同僚胡公銓上書詆斥時相胡公既貶竄正議
亦株連去國不調者久之及來平江適王昉為守揣
時相意日窺伺正議正議廉且公無所肆壽既去而
正議權府事適中丞常公同卒於海鹽公為文歡之
語頗及時相响得之曰此奇貨可以逞即為告密之
舉時相大忿嗾御史劾奏且曰常同師德之友婿且
其子玘之婦翁遺玘致祭以庫金二千緡賻之雖究
得誣狀正議猶徙汀州公坐停官及時相死正議起
於久廢公亦復官調台州黃巖縣主簿台四邑黃巖
為大縣地百萬畝吏與豪民為市戶籍惟出鄉有秩
手官莫能稽考公日夜紬繹吏不得欺雖數十年蠹
弊皆洞見貪下始得職徙淮西安撫司書寫機宜文

字又以辟書從寡侍郎方公某使金國裨助既多又以其暇繫日爲書凡山川城邑人情風俗登載詳密史官蓋有取焉歸而知衢州常山縣其治抑豪右伸貧弱下令簡而信用刑明而寬前日輸公上不以時者皆期而至又因定陽一鄉民病於役與義役厝置井井有理至今爲利它鄉人不病者亦置之其虛心裕民如此歲饑出倉粟振糶不待上命民賴以不死徙徐遺吏市米於吳視常平舊藏悉如其故政旣成顧縣學久葺不治乃力葺之進秀民於學以禮延鄉老先生爲之表倡士亦自知勉勵儒風益盛至於橋梁道路廐置委積產蓐醫藥莫不爲之經理而於掩骼殮死長養孩幼尤篤後數十年士民追論之猶感涕也召赴都堂審察監行在推貨務都茶場公事親盡孝惟恐毫髮不當親意繼遭家難執喪毀瘠注血食米不擊鹽酪蔬果皆不御終喪期如一日朋友規以於禮爲過輒痛哭以對規者亦爲慘愴至除喪久之容貌猶不能復故通判明州在官二年歷兩守政事獄訟不苟合亦不爲崖異然有一燬事士民輒譁曰此出於蘇公也城東有造船場晁公以道坐元符上疏錮不許親民來爲船官所著書及文章最多邦人至今言晁朝散公慨然爲築祠立碣致其師尊之意陳忠肅公嘗講於明而豐清敏公明人也公又言於郡立二公祠於學宮風勵學者其所建類非庸衆人所及如此會歲歉常平使者朱公元晦檄公屬以一郡荒政客米自海道至者多公請於朱公請發積錢廣糴以爲後備朱公爲聞於朝如其請又建築定海縣崇丘河灌四千頃公爲之親駕不避風雨歷五月而後成還朝除知衡州大臣薦公才可用乃改常州常股肱郡守符蓋不輕畀及入對所陳皆當上意且行矣會有間言乃改知秦州秦亦名城也公下車已六十殊無倦意祀社稷陟降監薦恪敬不懈學校釋奠器服有不如禮令者一皆正之盡買國子監書

以惠諸生王公明寔墓在郡境遣郡僚致奠人士爲之興起旣擢爲尚書吏部郎分職侍郎西銓吏畏縮不敢肆孤遠微眇悉得自伸譽望日著以紹熙二年五月某甲子遇疾捐館舍享年六十有四寄祿至朝請大夫八月庚申葬於會稽陶山西塢附正議墓娶常氏封宜人以賢稱於族黨先公一年卒丈夫子二人溱文林郎新知衢州常山縣有志節執喪如公喪考妣時濂將仕郎女子二人長嫁承直郎常州晉陵縣丞徐邦傑次尚處孫男女二人男曰隨與其妹皆尚幼公家世顯於累朝天資穎異讀書一過目輒不忘尤長考訂異同其於官名地里軍制民賦雖甚細微皆能講畫窮盡無所放軼屬文有體制筆法簡遠其尺牘尤爲時所珍愛往往往藏去少從張公子韶徐公端立汪公聖錫遊皆期之甚遠晚學於朱公元晦盡門人禮元晦亦稱其善學初公從父有著魏公談訓者未及成或附益之正義嘗以爲有可更定者而未及書公卒成之藏之家塾又著魏公年譜一卷累歲乃成識者貴之公旣歿之年溱乃以呂君祖儉狀來請銘某曾大父太尉隧銘實出魏公而正義之銘則某實書之又少時獲獨拜正義於床下退而與公相從甚久山陰之居又俱在城西南相望煙水間扁舟往來交好不薄故爲之銘銘曰

維相魏公克有全德蓄畬三世是生訓直事賢友仁政則宜民晚纔爲郎志不盡信陶山之腋松栝孔碩峨峨高丘過者必式

陸氏大墓表

山陰陸氏大墓九里袁家嶼曰二評事諱忻配李氏附是爲某之七世祖九評事諱郇配范氏附是爲某之六世祖光祿卿贈太子太保諱昭配福昌縣君贈昌國夫人李氏附是爲某之五世祖九評事家前少右有小冢或以爲殤子昌國家傍又有冢差小或以爲其婦不可考也四世祖太傅公始別葬焦塢而元

配靖安縣君贈崇國夫人吳氏猶祔大墓紹聖九年先大父楚公懼遠失傳墓上皆立石表自是距今又九十五年中更兵亂惟大保冢可識餘皆迷不知處歲時祭於太保冢前而已淳熙十二年三月或爲某言鄉民鋤麥得石表艸間蓋陸氏祖墳亟往視之則二評事冢也幸不毀乃從父老參訂不三日盡得之石表皆在封識如新而地多爲人言沒聞某至迭相質證於是侵地皆歸培冢築垣闢道藝木而陸氏大墓皆復其故某老矣羣從有曾孫行其視二評事已十世世益遠則大墓守護或益怠故具書始末於石以告後之人淳熙十五年正月日朝請大夫權知嚴州軍州事某謹書

詹朝奉墓表

新定遂安縣詹氏爲郡望族自光祿公諱良臣以死勤事被褒顯書其事於國史少保公諱大方純誠質厚爲中興賢輔薰陶漸漬子孫皆以學行顯聞雖未必皆至貴仕而學行淵粹論議堅正師友稱其賢鄉閭服其化身歿而不泯若故朝奉郎諱靖之字康仲及其子承奉郎諱長民字子齊者是矣某謹按家傳及質之鄉人所傳朝奉公以少保遇郊祀恩補承務郎歷浙東安撫司主管機宜文字監潭州南嶽廟婺州金華常州宜興縣丞浙東提舉常平司幹辦公事通判靖州卒於官舍年五十二葬淳安縣仁壽鄉拜山之陽初將赴金華而代者以私故欲遷延而重於自言既遣吏來迓公始聞之亟出避吏至家人告以適他郡後數月乃往郡委以受輸而公所親有居部內者貧不能及期公亟代之輸民間之莫敢後矧有筮者徐生嘗倉卒繫獄無妻孥有田數畝預書券屬其友鬻之友鬻而有其直徐生出訟於有司久不決公詰以數語得其情宜與到官纔再閱月會兄得疾甚篤巧歸視疾郡不許乃棄官歸郡督還甚厲公卒不可曰寧坐法不忍有負於孝悌也人服其決郡亦

卒無以罪浙東茶鹽司同僚有嬖公者公置不較及其人遇疾卒妻前死男女皆幼稚貧甚斂具歸裝一切皆出公力又爲營其葬及嫁孤女之費無憾而後已公雖閑居無厚積餘藏然勇於爲義有婚姻不能舉及疾病死喪之急慨然助之忘其力之不足也所親鄭椿年官於嚴公以嫌不數見一日椿年卒有子在在外名以似宗而未及以歸及卒有致仕恩族子自其鄉來衰絰而入將冒取官公力排出之求得似宗卒官之公所爲大率類此不可概舉古所謂可以屬孤託死者公真其人也公娶王氏封安人賜冠帔後公四年卒子七人長民承奉郎前公三年卒阜民文林郎新寧海軍節度推官表民出繼公弟徽之任至從事郎常州無錫縣丞卒定民少有疾亦已卒又民從事郎前楚州司戶參軍養民仁民未仕女子二人朝請郎前通判湖州曾槃朝散大夫直華文閣前淮南轉運副使石宗昭其壻也孫七人強學好學好問好禮好謙好修好信承奉君以少保遺表恩補承務郎遷承奉郎歷監紹興府都稅院鎮江府排岸兼拆船公事卒於家享年二十七葬祔世墓之次君所至勤其官在紹興時府遣官檢察所遺者無以爲功則肆爲侵刻行道爲之咨嗟君與爭不聽即自劾去故時鎮江排岸官兼掌總領所逋欠綱運官吏君至閱視凡八九十輩皆飢寒疾病或父死而督其子君慨然爲之言皆得挺繫以去未幾屬疾謁告歸省郡持不可比得請則疾已篤矣朝奉公見其癯瘠驚問故以實告且曰懼爲親憂故不敢左右聞者皆感歎自是疾遂不可爲而君每見父母輒以有廖告痛楚則忍不發聲懼親之聞也君從吾友呂祖謙伯恭學伯恭門人數百君以孝謹好學屢見稱歎比卒伯恭哀之見於歎辭雖位下而年不遐亦可不泯矣娶馮氏子一人強學初朝奉公之子阜民以父兄遺事屬予爲墓表且曰願共爲一碑而疑古未有此予謂石元

懿公熙載及其子文定公中立實同一碑故相蘇魏公所為也是為比後世尚有改焉慶元某年某月某日中大夫直華文閣致仕山陰縣開國男食邑三百戶賜紫金魚袋陸某撰

孫君墓表

會稽餘姚縣有士曰孫君名椿年字永叔其先山陰人當仁宗皇帝時有諱沔者仕至樞密副使有忠直名諡威敏威敏之弟曰洞洞生儼始東徙餘姚儼生璣璣生繹繹生述君之考也以君貢南省遇慶壽恩補修職郎實始聚書館士人以善其子弟子弟多自奮於學而君尤知名間遊四方從老師宿儒受學尤好左氏春秋班氏漢書司馬氏通鑑平居至忘寢食遇其得意時時著說以發明三家奧指多世儒所不及又從長老及有識者講國家兵興以來理亂得失之故某事可法某事可戒至於淮江以北極於司并幽薊山川險要及前代用師餽糧道路所出言之莫不詳盡聽者忘倦使君得至人主前口論手畫極利害是非之實以感悟上聽安知不見拔用而成功名哉士固有幸不幸未易以成敗論也晚預特奏名人皆謂公且遇合乃復以不合有司意入下第時有詔例補獄祠君辭焉然君年未六十識者以為學識如此安知終不合而君不幸死矣君雖終不合以死然居家可紀者多尤篤於孝友兄早死諸孤猶襁負父母哀之君曰某在兄不亡也父母為損哭泣君於是奉養嫂撫孤姪盡敬盡愛父母既終視平日加篤立義居法度寬裕而密察可久不廢兩院子弟分授諸經擇名師遣從學朋遊亦謹擇以故皆有學行可稱姊適里中胡氏夫婦皆早卒君撫孤恩意甚備不幸其孤又早夭君益哀憐之復為立後胡氏之祭繫君力得不絕晚做范文正公義莊之制贍其族長幼親疎咸有倫序歲以為常有餘又以及媼戚故舊無遺力紹熙中歲旱米價日翔君悉發廩貸里人明年稼

登糶賤來償者止受其米如初貸之數有鬻屋廬將散而之四方者君必貸之以錢如鬻屋之數曰所得幾何奈何捨鄉里而去以此旁近無流徙者縣並海隄防數決在任者欲泆湖募人耕其中積粟為築隄費君爭不可曰捍海固利矣泆湖則無以灌漑歲且饑利不補害請出私金率鄉里共營之隄可成卒如君言而湖利亦得不廢君之所為大概類此觀者可知其磊落不凡矣君享年五十有九以慶元五年二月壬申卒卜以明年十二月甲申葬於龍泉鄉澄清之原娶吳氏子四人之宏之亮之望之穎皆有學行之宏之亮嘗同試禮部女一人歸迪功郎衢州州學教授史彌忠亦知名士既納銘窆中又來請文以表墓上於虛義修而命室施豐而報嗇維報不忒亦不在亟尚其後人克肖君德慶元六年十月中大夫直華文閣致仕陸某表

何君墓表

詩豈易言哉一書之不見一物之不識一理之不窮皆有憾焉同此世也而盛衰異同此人也而壯老殊一卷之詩有淳漓一篇之詩有善病至於一聯一句而有可玩者有可疵者有一讀再讀至十百讀乃見其妙者有初悅可人意熟味之使人不滿者大抵詩欲工而工亦非詩之極也鍛煉之久乃失本指斲削之甚反傷正氣雖曰名不可幸得以名求詩又非知詩者纖麗足以移人夸大足以蓋眾故論久而後公名久而後定嗚呼難哉予固不足為知此道者亦致其意久矣顧每不敢易於品藻蓋彼皆廣求約取極數十年之力僅得其所謂自喜者以示人而我乃欲一覽而盡其可乎何君名逮字思順能詩終身不自足而卒卒後予友人曾樂道輩仲至始介思順之子羨以遺稿屬予表墓且言思順平生欲見予而不果故有斯請予年近九十病臥鏡湖上凡以文章來者積架上不能省一日取思順詩讀之不覺起坐太息

曰今世豈無從事於此者如思順蓋未易得也不以字害其成句不以句累其全篇超然於世俗毀譽之外予之恨不一見其人甚於其人之願見予也思順曾大父諱粹中大父諱汝能父諱松東陽東陽人以嘉泰三年九月十一日卒年五十有一兩娶郭氏皆先卒以開禧元年十一月二十日合葬於仁壽鄉陂頭山之原子一人女長適進士郭概次尚幼開禧二年四月戊寅太中大夫寶謨閣待制致仕山陰縣開國子食邑五百戶賜紫金魚袋陸某表

孺人王氏墓表

孺人王氏名中字正節澶州北海人曾大父諱競朝議大夫直祕閣大父諱慎修迪功郎贈中奉大夫父諱嶠贈承事郎字季夷負天下才名孺人嫁司馬文正公元孫龍圖閣待制諱伋之仲子通直郎新權發遣信州軍州事遵司馬君亦有文學政事稱其家登用於朝孺人實相之人謂季夷雖坎壤不偶以死而三子皆知名士夫人復以賢婦稱天所以報善人亦昭昭矣司馬君簽書寧海軍節度判官公事孺人不幸遇疾卒時嘉泰三年二月初二日也得年四十有四司馬君來赴告曰亡婦不逮事君姑其事舅及少姑皆盡孝執喪中禮而哀有餘至除喪猶不能自抑司馬大族也孺人承上接下肅敬慈恕既歿哭之皆哀以開禧二年十二月壬申葬於會稽山陰清灣北塢之原三子拓棟操二女尚幼予與待制及季夷少共學情好均兄弟兩公又皆娶子中表孫氏則表孺人之墓宜莫如予乃泣而書之太中大夫寶謨閣待制致仕山陰縣開國子食邑五百戶賜紫金魚袋陸某書

令人王氏壙記

於虞令人王氏之墓中大夫山陰陸某妻蜀郡王氏享年七十有一封令人以宋慶元丁巳歲五月甲戌卒七月己酉葬附君舅少傅君姑魯國夫人墓之南

岡有子子虞烏程丞子龍武康尉子淡子坦子布子率孫元禮元敏元簡元用元雅曾孫阿喜幼未名

渭南文集卷第三十九

渭南文集目錄
卷第四十

祖山主塔銘

定法師塔銘

良禪師塔銘

高僧猷公塔銘

別峯禪師塔銘

海淨大師塔銘

松源禪師塔銘

退谷雲禪師塔銘

渭南文集卷第四十

祖山主塔銘

嘉州天王禪院景倫師有二弟子孟曰紹覺仲曰紹祖倫且老歎曰孰能問法南方以大吾門者乎於是覺請行曰不可使師有恨祖請留曰老人不可以莫養也覺南遊得法居蘆州五祖山而祖左右就養先意承志終身不去倫欲新其廬祖則雨濡日炙出入閭巷累年崇成鬱為寶坊倫飲食往來者祖則高困大庖床敷潔溫凡至者如歸焉皆曰倫師可謂有子矣祖既老亦有二弟子曰海慧海澄慧萬里走閩中求大藏經以歸祖不及待而澄實送終其撰次祖行實以求予銘者慧弟子法琳也是倫師不獨有子子又有孫何其盛哉世所謂學士大夫蹈義秉禮終其身者或鮮矣況至四世閱百年而不失者乎予於是有感焉祖姓楊氏字繼遠世居龍游歿以乾道四年十月某甲子年七十五葬以五年二月某甲子銘曰峨嵋之麓鬱鬱方墳維爾有承以弋吾文

定法師塔銘

淳熙四年予自梁益還吳蓋西遊九年矣耆老凋落朋舊散徙無與晤語而少年學問日新議論鋒出亦莫與顧為之懽悅不樂一日有叩戶者攝衣迎之則所謂惠定法師也風骨嶢嶢如太華之立雲表議論袞袞如黃河之行地中為予談諸經辭指精詣往輒破的窮日夜不休予作而曰公生肇一輩人予懼不足以為公友也會予復出仕又三年迺還屏居鏡湖之西略無十日不過予霰雪風雨往往留不去予方以譴斥退亦安於不遇意者相從湖山間以老而師不幸死矣其徒來乞銘師字寧道姓王氏世為紹興山陰人幼歲從錢清保安院子堯道人得度出遊四方從道隆師會景崇三師授華嚴義盡得其說至超然自得出入古今不妄隨不苟異三師蓋莫能屈也

衆請住戒珠省院未幾棄去時大慧禪師宗杲說法阿育王山師慨然住造其居所聞益廣學者宗之起住妙相徒觀音復還省院皆蕭然小剎羹藜飯豆人不堪其枯槁然著書不少輟若金剛般若經解法界觀圖會三歸一章莊嚴論已盛行於世餘在稿者猶數十百篇以淳熙八年十二月二十四日焚香說偈示滅年六十八僧夏四十八九年十二月十八日葬於錢清得法弟子妙定了洪了悅得度弟子了知了端了達初師著金剛解成持以示予語之曰昔德山見龍潭言下悟盡焚金剛疏鈔公見大慧而歸更著此解與德山孰優師笑不答豈魯之善學柳下惠者歟銘曰

木葉旁行九譯而東維此雜華衆經之宗肇自有唐世以名家師如巨舟極其津涯著書至死此亦奚求承其師傳以絕為羞我徂弔之遺書滿室喟然作銘用婉逢掖

良禪師塔銘

禪師處良字遂翁會稽山陰劉氏子紹興五年甫九歲以童子得度十三歲遊諸方僅勝衣笠路人為之驚歎初為妙喜禪師宗杲侍者又從止菴禪師道顏為書記遂翁英邁玉立遊二師間皆受記刻餘事能文詞善筆札諸方翁稱良書記然亦以議論傲核不少假借不為諸方所容妄一比丘輒得名山壯剎遂翁獨陸陸衆中嘗居嘉興法喜院舉香為止菴嗣蕭然數僧食財半菽再歲退廬會稽海上今太常尤公延之守臨海起遂翁領紫纓復以縣大夫不樂棄去久之領岷山薦嚴資福寺遂以疾逝淳熙十四年六月戊寅也遺言藏骨廬山智林寺寺已養與遂翁所同建也逝之日手書求銘於予銘曰山棲谷汲利欲靡及孰擗使躡道成謗集廬阜峨峨浮屠岌岌吾識其封身沒名立

高僧猷公塔銘

宋山陰有高僧曰子猷字脩仲晚自號笑雲老人宏材博學高行達識卓然出一世之表雖華嚴其宗而南之天台北之慈恩少林之心法南山之律部莫不窮探歷討取其妙以佐吾說雖浮屠其衣百家之書無所不讀聞名儒賢士雖在千里之遠必往交焉篤行義勵風操嚴取與一得喪接物簡而峻不屈於富貴有以供施及門者苟禮不足雖累百金輒拒不取於禪賢哉脩仲出陳氏生七歲從同郡大善寺晏時為童子十有二歲祝髮受具習華嚴經論於廣福院擇交得其學又遊錢塘見惠因院師會博盡所疑二師皆自以為弗迫遂還山陰說法於城東妙相院僅二十年學者常百餘人脩仲厭其近城市思居山林乃捨衆遊於梅山上方學者不肯散去而院隘不能容相與言於府願迎脩仲還妙相於是法席加盛於昔所著書大行於世院亦益葺號為壯刹大慧禪師宗呆過而異之為留偈壁間然脩仲竟棄去學者猶不捨又說法者三最後住姜山閱三年喟然歎曰老矣將安歸邪亟稟書歸梅市結菴以老淳熙十六年八月二十有六日忽命舟遍別平日所往來者明日晨起說法遂坐逝壽六十有九又三日火化得舍利五色粲然弟子即菴之西建塔奉靈骨及舍利以葬脩仲度弟子四人戒海戒先戒明戒堅戒先傳家學而四方之學者得法出世又有十有七人隱於衆者蓋以百數脩仲之道其傳又可涯哉戒明來乞銘銘曰予嘗觀古高僧窮幽闡微能信踐之不為利諫不為勢撓未嘗不與學士大夫同也考脩仲之為人可謂有古高僧之風矣吾予之銘非獨以厚故人蓋亦天下之公也

別峯禪師塔銘

南山自長安秦中西南馳為嶓為嶮東行紆餘起伏歷蠻夷中跨軼且千里然後秀偉特起為二峯摩星辰蒼雲雨龍蟠鳳翥是名峨嵋山通義健為二郡

實在其下人鍾其氣為秀民傑士出而仕者固多以功業文章擅名古今至於厭薄紛華棄捐衣冠木食澗飲自放於塵垢聲利之外而不幸為人知不能遂其隱操亦卒至於光顯榮耀者如別峯禪師是也師名寶印字坦叔生為龍游李氏子世居峨嵋之麓少而奇警日誦千言然不喜在家乃從德山院清遠道人得度自成童時已博通六經及百家之說至是復從華嚴起信諸名師窮源探蹟不高出同學不止論說雲興泉湧衆請主講席謝不可圓悟克勤禪師有嗣法上首安民號密印禪師說法於中峯道場迺挈一笠往從之一日密印舉僧問巖頭起滅不停時如何巖頭叱曰是誰起滅師豁然大悟自是室中鋒不可觸密印恨相得之晚會圓悟自南歸成都昭覺乃遣師往省因隨衆入室圓悟舉從上諸聖以何法接人師舉起拳圓悟曰此是老僧用者孰為從上諸聖用者師即揮拳圓悟亦舉拳相交大笑而罷圓悟歎異之曰是子他日必類我師留昭覺三年密印猶在中峯以堂中第一座致師師辭密印大怒曰我以法得人人不我傳尚何以說法為欲棄衆去衆皇恐亟趨昭覺羅拜懇請圓悟亦助之請始行道望日隆學者爭歸之雖圓悟密印不能辨也久之南遊見馮山佛性泰福嚴月菴果疎山草堂清皆目擊而契或以第一座留之師潛逝以免最後至徑山見大慧杲大慧問曰上座從何處來師曰西川來大慧曰未出劍門關與汝三十棒了也師曰不合起動和尚時徑山衆千七百雖者宿名衲以得棲笠地為幸願為師獨掃一室堂中皆驚大慧南遷師亦西歸始住臨印鳳皇山舉香嗣密印歷住廣漢崇慶武信東禪成都龍華眉山中巖復還成都住正法道既盛行士大夫亦喜從之遊築都不會菴松竹幽邃暇日名勝畢集聞師一言皆自謂意消稍或間關輒相語曰吾輩鄙吝萌矣其道德服人如此俄復下峽抵金陵應菴華方

住蔣山館師於上方白留守張公燾舉以代己師聞即日發去會陳丞相俊卿來爲金陵以保寧延師俄徙京口金山學者傾諸方金山自兵亂後雖屢葺莫能成至是始復大興如承平時而有加焉異時居此山鮮踰三年者師獨安坐十五夏潭帥張公孝祥嘗延以大瀉山師與張公雅故念未有以却而京口之人自郡守以降力爭之卒返潭使魏惠憲王牧四明虛雪竇來請師度不可辭迺入東凡住四年樂其山林有終老之意而名益重被敕住徑山淳熙七年五月也七月至行在所至尊壽皇聖帝降中使召入禁中以老病足蹇賜肩輿於東華門內賜食於觀堂引對於選德殿特賜坐勞問良渥師因舉古宿云透得見聞覺知受用見聞覺知不墮見聞覺知上悅曰此誰語師曰祖師皆如此提倡亦非別人語上爲微笑時秋暑方熾師再欲起上再留使畢其說迺退後十餘日又命開堂於靈隱山中使齋賜御香恩禮備至十年二月上製圓覺經注遣使馳賜且命作序師迺築大閣秘奉以修上恩師老益厭住持事門人懼其遠遊不返相與築菴於山北俟其歸今上在東宮書別峯二字榜之十五年冬奏乞養疾於別峯得請明年上受內禪取向所賜宸翰識以御寶復賜焉紹熙元年冬十一月忽往見今住山智策告別策問行日師曰水到渠成歸取幅紙大書曰十二月七日夜雞鳴時如期而化奉蛻質返寺之法堂留七日顏色精明鬚髮皆長頂溫如沃湯是月十四日葬於別峯之西岡壽八十有二臘六十有四得法弟子梵牟宗性道奇智周慧海宗璨等得度弟子智穆慧密等百四十有七人有慧綽者山陰陸氏子當以蔭得官辭之從師祝髮又得記薊遼迹巖岫終身不出師既示寂上爲敕有司定諡曰慈辯且名其塔曰智光菴曰別峯極方外之寵師說法數十年所至門人集爲語錄晚際遇壽皇被宸翰咨詢法要皆對使者具奏將

化說偈尤奇偉已別行於世此不悉著三年三月法孫宗愿走山陰鏡湖屬某銘師之塔某與師交最久嘗相約還蜀結茆青衣喚魚潭上今雖老病義不可辭銘曰

圓悟再傳是爲別峯坐十道場心法之宗淵識雄辯震驚一世矯乎人中龍也海口電目旆期稱道卓乎淵壑松也叩而能應應已能默渾乎金鐘大鑪也師之出世如日在空升於陽谷不爲生隱於庵巖其可

海淨大師塔銘

乾道中史魏公以故相牧會稽嚴重簡貴士大夫非素負才望莫得登其門顧每召靈祕院僧智性與語有大興造輒以付之性公時年且七十亦輒受命不詞已而事皆井井有條理邦之人始服魏公之知人雖方外道人任之亦能舉其事如此又歎性公之不足負所知也及淳熙末予還朝典南宮賤奏兼領祠部而會稽守言靈祕院本遺條表丈地智性以孤身力成之今爲名剎請以其徒世守之報可予雖會稽人然自魏公去不復見性公乃驚歎曰是道人尚在邪又五年予臥疾鏡湖上性公法孫德恭來告曰公以紹熙三年六月五日示化將奉遺骨塔于小夾山且來請銘性公本會稽山陰蔡氏子七歲從廣福院崇教大師慧超祝髮九歲賜紫方袍號海淨大師坐八十三夏住靈秘五十一載年九十度弟子七人覃承宗慶宗亮宗振宗懋宗寶宗一孫四人德和德恭德興德椿曾孫二人行昭行聞銘曰

松源禪師塔銘

龜食簞從宅此山阿陵谷有遷吾銘不磨松源禪師名崇岳生於處州龍泉之松源吳氏故因以自號自幼時已卓犖不羣處羣兒中未嘗嬉宕稍長聞出世法慕嚮之年二十三棄家衣掃塔服受五戒於天明寺首造靈石妙禪師繼見大慧杲禪師於

徑山久之大慧陞堂稱蔣山應菴華公爲人徑捷師聞之不待日而行既至入室未契退愈自奮勵中夜自舉狗子無佛性話豁然有得卽以扣應菴舉菴世尊有密語迦葉不覆藏師云鈍置和尚應菴厲聲一喝自是朝夕咨請應菴大喜以爲法器說偈勸使祝髮棟梁吾道隆興二年師始得度於臨安西湖白蓮精舍自是徧歷江浙諸大老之門罕當其意乃浮海入閩見乾元木菴永禪師一日辭木菴欲往黃檗木菴舉有句無句如藤倚樹師云裂破木菴云瑯琊道好一堆爛柴嚮師云矢上加尖如是應酬數反木菴云老兄下語老僧不過如此祇是未在他日拂柄在手爲人不得驗人不得師云爲人者使博地凡夫一超入聖域固難矣驗人者打向面前過不待開口已知渠骨髓何難之有木菴舉手云明明向汝道開口不在舌頭上後當自知逾年見密菴於衢之西山隨問卽答密菴微笑曰黃楊禪爾師切於明道至忘寢食密菴移住蔣山華藏徑山皆從之一日密菴入室次問傍僧不是心不是佛不是物師侍側豁然大悟乃云今日方會木菴道開口不在舌頭上自是機辯縱橫鋒不可觸木菴又遷靈隱遂命師爲堂中第一座旋出世於平江澄照爲密菴嗣遷江陰之光孝無爲之冶父鏡之薦福明之香山平江之虎丘皆天下名山惟冶父最寂寞又以火廢師一臨之四方名衲踵至棟宇亦大興人謂師能使所居山大慶元丁巳年適靈隱虛席僉曰安得岳公來乎果被旨以昇師離聲如潮居六年道盛行得法者衆法席爲一時冠而師有棲隱之志卽上章乞罷住持事上察其誠許之退居東菴俄屬微疾猶不少廢倡道忽垂一則語以驗學者曰有力量人爲甚麼撞腳不起開口不在舌頭上又貽書嗣法香山光睦雲居善開傳以大法因書偈曰來無所來去無所去警轉玄關佛祖罔措跣趺而寂實嘉泰二年八月四日也得年七十有一

坐夏四十奉全身塔於北高峯之原塔成之四年香山遺其侍者道孚以銘屬某某方謝事居鏡湖上年過八十病臥一榻得書不覺起立曰亡友臨川李德遠浩實聞道於應菴蓋與密菴同參李德遠每與某談參問悟入時機緣言句率常達日今讀師語峻峭齒萃下臨雲雨如立千仞之華山蹴天駕空駭心眩目如錢塘海門之濤虎豹股栗屋瓦震動如漢軍昆陽之戰追思德遠所言然後知師真臨濟正宗應菴密菴之真子孫也銘曰

臨濟一宗先佛正傳應菴父子以一口吞金圈栗蓬晚授松源松源初心論切參禪於一笑中疾雷破山坐入道場衆如濤瀾金鐵脫手碎首裂肝彼昏何智萬里鐵關後十大切摧山湮川法力所持此塔巋然退谷雲禪師塔銘

佛照禪師有嗣子曰淨慈報恩光孝退谷禪師名義雲生於福州閩清黃氏世爲士禪師幼入家塾成童入鄉校穎異有聲旣冠遊國學因讀論語中庸有所悟入後聞龜峯山堂淳禪師說法遂自斷出家從山堂祝髮徧遊江湖至吳見鏡菴一大禪爲侍者一日室中問國師三喚侍者師師亟舉手掩其口又問曰侍者三應又作麼生師拂袖徑出鏡菴大喜時佛照倡道靈隱師往依之及佛照移育王師從其行歷十年爲堂中第一座佛照聞其說法歎曰此子提倡宛如雲堂行和尚吾鉢袋有所付矣遂出住香山居五年徙台州光孝又徙鎮江甘露會平江虎丘萬壽皆欲延師師聞萬壽頗廢卽欣然就之淮南轉運使虞公傳又以長蘆來招師與虞公有雅故又從之會育王虛席朝命師補其處時佛照方居東菴父子日相從發明臨濟正宗學者雲集會有魔事師卽捨衆退居香山蓋將終焉而朝命又起師說法淨慈恩光赫奕都邑聳動一日領衆持鉢畿邑是夕寺災無遺宇比師歸獨三門巋然在瓦礫中師不動容曰成壞相

尋亦豈有常今日之壞安知不爲四衆作福之地哉
天子聞之出內庫金以賜自重臣貴戚以下傾橐鞶
金惟恐居後未期年廣殿邃廡崇閣傑閣蓋愈於前
日矣於是上爲親御翰墨書慧日閣三六字賜之開
禧二年五月師示微疾六月朔日辛亥作偈別衆曰
意烏猝嗟萬人氣索佛法向上何曾踴著臨行業識
茫茫一任諸方卜度遂寂後九日弟子處約等奉全
身塔於寺之東北隅世壽五十八僧夏三十五住山
十九載度弟子四十有畸學者集師語爲七會錄行
於世師初欲以復佛殿屬子記之未及而棄世於是
處約等以西堂可宣禪師之狀來求予銘適予老疾
弗克就宣公又以書來固請而師之侍僧處訥者留
逾年不肯去辭指懇款予爲之歎曰師之在育王也
將新僧堂而陰陽家以爲法所禁將不利於主人師
奮不顧排衆說力爲之堂成而魔果作遂去陰陽家
之說使人拘而多畏然其法本出流俗不待師之明
知其妄決矣雖或適中終爲不足信也又師在淨慈
遭火患滌地皆盡度非金錢累億萬且假以歲月必
不能成師談笑盡復舊觀議者或以爲師之才用絕
人見於此者則亦陋矣此事若澄觀輩則可稱大善
知識直遊戲爾師所以獨立一世者豈直以此哉師
示衆有曰烏道孤危玄關妙密在曹洞宗旨亦奇矣
若較臨濟直是天地懸隔此足以知師能繼圓悟妙
喜佛照之大作用者自有所在也銘曰

猗歟雲公自儒衣奮爲東菴子無示無問上距圓悟
四世而近龍象蹴踏獅子奮迅或造其室目不容瞬
丹碧南山蓋其游刃於談笑頃變化煨燼以此論師
其殆未盡譬如觀海測以尺寸我銘不磨百世其信

渭南文集卷第四十

渭南文集目錄
卷第四十一

皇太后靈駕發引祭文

祭龔參政文

祭魯國太夫人文

祭王侍御令人文

祭祝永康文

祭劉樞密文

祭蔣中丞夫人文

祭趙提刑文

祭勤首座文

祭許辰州文

祭韓無咎尚書文

祭胡監丞文

祭丘運使母夫人文

祭會原伯大卿文

祭大姪文

祭十郎文

祭朱元晦侍講文

祭方伯謨文

祭張季長大卿文

祭周益公文

尤延之尚書哀辭

沈子壽母趙夫人哀辭

渭南文集卷第四十一

皇太后靈駕發引祭文

風御上賓玉衣永闕生堯鈞弋尚懷帝武之祥從禹
會稽遠奉陵園之下母慈罔極坤載無疆方同軌之
畢來悵東朝之已遠然而難難契關歸慰聖主問安
之誠壽考康寧躬享先后莫致之福陰功陽德上際
下蟠歷邃古而罕聞知聖心之無憾臣藩維有守槍
慕徒深目斷柏城神馳翼御敢修饋奠之禮少致攀
號之心

祭梁右相文

人之生世如雲之出於山川雲不自用用之者天降
為甘澤散為豐年抑有時而弗用則輪困磅礪或卷
或舒以自適於墊水之涯荒山之巔彼雲無心豈有
用舍之異出處之偏哉公之在朝道大材全不為世
變不為物遷顯相廟郊華袞金輝太平之功溢於簡
編謝病而歸大節愈堅從容邇英抗議慨然曰我非
堯舜之道不敢以陳於前孰謂萬鍾之祿不足顧留
遂委之而僂乎抑公之學得聖所傳視生死為一區
等華屋於荒阡乎又豈如雲之既散廓然太虛則前
日用舍初不足以為愚賢乎酒不盈觴肉不揜豆獨
區區之詞寫其肺肝者公豈捐之乎

祭龔參政文

某官劍南公在廊廟書從驛來如奉色笑哀窮悼屈
忘其不肖歲戌戌春某辱號召歸未及都公歿荒徼
山川阻脩萬里孤旆官事有守不遑往弔寓哀一觴
公乎來酌

祭魯國太夫人文

嗚呼昔先太師遜世懷寶播慶於家生我元老維少
傅公秉德逢辰長養成就則繫夫人少傅在朝袞衣
繡裳帝錫夫人御醴宸章少傅在藩約尾玉節帝錫
夫人兼金重帛僉曰盛哉其榮則多夫人曰嘻其報

伊何帝虛元弼方屬少傅於時夫人以疾卸路煌煌
安輿少傅實從天祐德人華其初終某受恩門闈義
均子姓晚偕婦息升堂修敬萬里羈宦忽承哀音東
望永懷碎裂寸心送車麟麟傾動鄉鄰隕涕羞奠形
留神往

祭王侍御令人文

惟靈生自大家來嬪德門象服有輝娣媵如雲相我
御史克勤藻蘋諸子甚材頎然薦紳世所願懷孰如
夫人惟是孤生實忝外姻萬里焉依如在鄉鄰遭此
不淑慘然酸辛尊御之微侑以斯文

祭祝永康文

嗟我與公萬里羈單人孰知之所恃者天庶幾白首
相從鄉關追談梁益把酒笑歡云胡不淑一病莫還
遺孤孑立未逮冠婚謂天可恃公宜百年玉裂竹折
喟其永歎公守導江鬻藥飲泉凜凜色詞請謁莫干
人或謗嘲公守益堅雖昔君子終此實難云持此歸
何憾九原公喪之東丹旆翩然我病莫與撫枕涕漣
矢辭羞奠尚慰營魂

祭劉樞密文

嗚呼公乎有文有武有仁有智立朝無助以直自遂
聲氣不動而折萬里之衝從容一言而決盈庭之議
蓋人所難公之所易仰天俯地一念不愧秋毫未安
寢食忘味輕失富貴而重朋友之責自屈達尊而伸
白屋之士蓋人之所忽公之所畏昔歲癸未某始去
國見公西省凜然正色顧雖不肖竊師公直流落得
歸公與有力舟過金陵公疾已亟命之不淑旋聞易
簣祭不及時實負盛德尚想平生出涕橫臆

祭蔣中丞夫人文

維靈出由德閩克配儒先從容圖史之規肅敬蘋蘩
之薦是生者哲來瑞明時大邦開賜沐之封列鼎極
循陔之養奄聞不淑靡究遐齡窈窕有期川途云邈
雖莫綴千車之盛顧敢稽一酌之恭仰冀靈魂俯歆

誠意

祭趙提刑文

惟靈早以茂異起膺簡求逢時休明為國壽雋建牙
淮服擁節王畿方期來朝遽以疾診挂冠決去共高
靜退之風易簣亟聞何勝殄瘁之感某早託通家之
好晚逢攬轡之行揮塵軒昂恍如昨日拊棺推痛莫
喻孤懷敢陳一奠之恭少敘九京之訣

祭勤首座文

我之與公義則師友情骨肉也相從十年談道賦詩
藝松菊也別雖數月使來自東書相續也比獨怪公
書詞諄諄若予屬也嗟哉已矣頽然野鶴尚在目也
卯槍告成欲往不果身極楛也上愧道義下負交情
淚可掬也龍文之茗沉水之薰薦甘馥也懷舊之心
有如丘山此一粟也

祭許辰州文

惟靈笑操懿行達識英辭筆陣掃千人軍早擢太常
之第胸中吞九雲夢恥裁光範之書抱沉英之數者
十年分共理之憂者兩郡人之不淑生也有涯旅館
招魂一朝今古孤舟反葬萬里風濤豈知故里之交
遽作夜臺之別魂兮未遠鑒此哀誠嗚呼哀哉

祭韓无咎尚書文

兄之初載甚蹟而難逢亂客吳萬里孤壽文方日衰
蕩為狂瀾組織纖弱各自謂賢士晚莫救兄勇而前
陋巷一室日肝未饒誦書鼓琴志操益堅落筆天成
不事雕鑄如先秦書氣充力全壯年相從顧憫我孱
曰是有志許以周旋我自蜀歸兄與三銓邂逅都門
擊手歡然兄牧東陽我走閩山曠不相值今五六年
我病早衰顧未及泉兄之壽康一朝先顛餉酒睡門
乃醅柩前嗟嗟造物孰尸此權豈其好惡亦與俗遷
微官有守喪車莫攀尊躑之奠敘訣終天

祭胡監丞文

惟公文學足以發身政事足以宜民人則不合何罪

於神乃者起家住守宜春臨別慨然握手江津曾未
逾月乃以計聞舟載銘旌返其鄉粉臺省袞袞公獨
逡巡室家嚶嚶公獨悲辛我雖晚交甚知公真適苦
斷腸奠弗及親尚想平生寓哀斯文

祭丘運使母夫人文

昔先大夫懷寶里閭沒世不耀乃以其孤屬之夫人
道德是詔故河圖公文學政事望在廊廟榮養五鼎
眉壽百年其德彌劭高識超然朱門畫戟視若蓬壺
再入都城曾未温席翻其歸旆方歲之惡公私交病
冀寬賦調而河圖公遽以憂歸道路相吊我登門闕
情均甥姪宜送宅兆官守所糜矢辭傷悲薦此清醴
祭會原伯大卿文

惟靈淵乎似道敏而好學韋編鐵硯雪窗螢几不足
以言其勤冢書壁簡銅牆鬼炊不足以名其博文辭
典輿論議超卓不使直承明之庭猶當置諸天祿之
閣時方越拘擥以用人公奚彼之不若而乃老於惠
文之冠弗預甘泉之臺痛結慈闈悲纏華墓凡閭巷
之故交想話言之如昨聞計相吊摧然涕落羞一醴
以徂行冀九原之可作

祭大姪文

汝實先少傅之長孫岳州使君之嫡子早列仕籍垂
五十年夫婦二人更相為命嶺海萬里淪謝不還收
骨於灰燼之中藏椁於松楸之次煩冤痛酷實涕何
言歿而有靈歆此薄醴

祭十郎文

自汝不幸早世將二十年乃克祔葬於先少師魯國
夫人塋光之南岡距汝母令人墓尤邇汝而不泯豈
不得所願哉感念疇昔悲痛何言

祭朱元晦侍講文

某有捐百身起九原之心有傾長河注東海之淚路
脩齒耄神住形留公歿不士尚其來饗

祭方伯謨文

予與伯謨別於武夷予五十有五齒髮未衰伯謨蓋方壯耳顧後日猶長未知別之悲也俯仰二十有一年卒不相遇而伯謨遂捨我而何之乎予年垂八十如朝露之將晞與伯謨別尚復幾時生也相遇猶不可必死遊地下果可期乎予言之及茲涕不可止伯謨尚能有知也乎

祭張季長大卿文

於虛世之定交有如某與季長者乎一產岷下一家山陞遷近南鄭異體同心有善相勉闕遺相箴公醉巴歌我病越吟大笑劇談坐客皆瘖公既造朝衆彥所欽我南入蜀九折欽崐公以憂歸我亦陸沉久乃相獨垂涕霑襟宿好未遠舊盟復尋驚言造公公已來臨我倡公和如鼓瑟琴送我東歸握手江潭欲行復尼頓足噫暗是實古道乃見於今公還爲卿華路駸駸我方畏讒潛恐不深公去我召如商與參渺邈天涯一書萬金我自史闡進長書林迫老亟退突不暇黔亦嘗挽公力微弗任比乃聞公請投華簪旋又聞計天乎難湛玉樹永闕壘柏已森何時復聞正始遺音漬酒絮中不及手斟英魂如生豈忘來歆於虛哀哉

祭周益公文

某紹興庚辰始至行在見公於途欣然傾蓋得居連牆日接嘉話每一相從脫帽襦帶從容笑語輪寫肝肺鄰家借酒小圃鉏菜熒熒青燈瘦影相對西湖吊古並轡共載賦詩屬文頗極奇怪淡交如水久而不壞各謂知心絕出流輩別二十年公位鼎鼐我方西遊荷戈窮塞歸得臺郎旋又坐廢公亦策免久處於外見不可期使我形瘵斯文日卑公則崧岱士昏于智公則著蔡公老不衰雷震百代每得手書字細如芥癡兒駭女問及瑣碎孰爲一病良醫莫差赴告鼎來震動海內奔赴不遑涕泗澎湃豈無尊罍致此薄醅辭則匪工聊寄悲慨

尤延之尚書哀辭

帝藝祖之初造兮紀號建隆煥乎文章兮躡揖遜之遐蹤詔冊施於朝廷兮萬里雷風灑灑噩噩兮始掃五季之雕蟲閱世三傳兮車書大同黃麾纒仗兮駕言東封繼七十二后於邃古兮勒崇垂鴻吾宋之文抗漢唐而出其上兮震耀無窮柳張穆尹歐王曾蘇名世而間出兮魏如華嵩雖宣和之盡弊與建炎之軍戎文不少衰兮殷殷噩噩太平之象兮與六龍而俱東余自梁益歸吳兮槍故人之莫逢後生成市兮摘裂剽掠以爲工遇尤公於都城兮文氣如虹落筆縱橫兮獨殿諸公晚乃契遇兮北扉南宮塗改雅頌兮蹈躡軻雄余久擯於世俗兮公顧一見而改容相期江湖兮斗粟共春別五歲兮晦顯靡同書一再兮奄其告終於虛哀哉孰抗衣而復公兮呼伯延甫於長空孰誦此以招公兮使之捨四方而歸徠乎郢中孰醉荒丘兮露草霜蓬孰闖虛堂兮寒燈夜蛩文辭益衰兮奇服龍茸天不憖遺兮黼黻火龍嗟局淺之一律兮彼寧辨夫瓦釜黃鐘話言莫聽兮孰知我哀患難方殷兮孰恤我躬煮蒿不返兮吾黨孰宗死而有知兮惟公之從

沈子壽母趙夫人哀詞

嗚呼人孰無母母孰無子母以壽終子克終養亦可紆無窮之悲矣維吾子壽自初遭難晝夜號泣匪淚伊血羸乎莫支陞堂吊祭者不忍聞其聲得書赴告者不忍觀其辭子壽蓋曰不孝孤少罹閔凶父喪母嫠無壘可耕母子相依及遊太學母客京師冬兮母寒晝兮母飢飢無一囊之粟寒無一襲之衣不孝孤雖食於學官羹餼在前歎息而靡撫所讀書而與之誓曰編絕則輯字渝則補寧死於書傍不敢畏難苟止以負吾母之慈如是十年幸賜第於太常歸而拜母相持以泣淚盡目萎母前子後告於先墓庶幾吾父聞之而寬其九泉之思也於虛此子壽之既言而

其未言者蓋可推矣奉身以道義發身以書詩文章傳於不朽節行全而無虧士患無志不患無位士患無才不患無恃子壽之志所以事親者蓋其所以事君子壽之才顧猶屈而未施親則日遠時節奉祀如將見之一言一行足以顯揚吾親者苟有怠忽是以吾親爲歿而亡知也子壽之令名與天壤同弊則親實與焉刻誅千字置守萬家蓋不足進於斯也子壽之存於胸中而未言者予得陳之非獨慰吾子壽蓋以爲天下孝子之詒哀哉

渭南文集卷第四十一

渭南文集目錄
卷第四十二

花品序第一
風俗記第三
天申節致語

又
徐稚山給事慶八十樂語
致語
又

花釋名第二
又

渭南文集卷第四十二

天彭牡丹譜

花品序第一

牡丹在中州洛陽為第一在蜀天彭為第一天彭之花皆不詳其所自出土人云曩時永寧院有僧種花最盛俗謂之牡丹院春時賞花者多集於此其後花稍衰人亦不復至崇寧中州民宋氏張氏蔡氏宣和中石子灘楊氏皆嘗買洛中新花以歸自是洛花散於人間花戶始盛皆以接花為業大家好事者皆竭其力以養花而天彭之花遂冠兩川今惟三井李氏劉村毋氏城中蘇氏城西李氏花特盛又有餘力治亭館以故最得名至花戶連畛相望莫得而姓氏也天彭三邑皆有花惟城西沙橋上下花尤超絕由沙橋至棚口崇寧之間亦多佳品自城東抵濛陽則絕少矣大抵花品近百種然著者不過四十而紅花最多紫花黃花白花各不過數品碧花一二而已今自狀元紅至歐碧以類次第之所未詳者姑列其名於後以待好事者

- 狀元紅 祥雲 紹興春 燕脂樓 金腰樓
- 玉腰樓 雙頭紅 富貴紅 一尺紅 鹿胎紅
- 文公紅 政和春 醉西施 迎日紅 彩霞
- 疊羅 勝疊羅 瑞露蟬 乾花 大千葉
- 小千葉 右二十一品紅花
- 紫繡毬 乾道紫 潑墨紫 葛巾紫 福嚴紫
- 右五品紫花
- 禁苑黃 慶雲黃 青心黃 黃氣毬
- 右四品黃花
- 玉樓子 劉師哥 玉覆盂
- 右二品白花
- 歐碧
- 右碧花

- 轉枝紅 朝霞紅 灑金紅 瑞雲紅 壽陽紅
- 探春毬 米囊紅 福勝紅 油紅 青絲紅
- 紅鶴毛 粉鶴毛 石榴紅 洗粧紅 慶金毬
- 間綠樓 銀絲樓 六對蟬 洛陽春 海棠容
- 膩玉紅 內人嬌 朝天紫 陳州紫 袁家紫
- 御衣紫 斬黃 玉抱肚 勝瓊 白玉盤
- 碧玉盤 界金樓 樓子紅
- 右三十三品未詳

花釋名第二

洛花見紀於歐陽公者天彭往往有之此不載載其著於天彭者彭人謂花之多葉者京花單葉者川花近歲尤賤川花賣不復售花之舊裁曰祖花其新接頭有一春兩春者花少而富至三春則花稍多及成樹花雖益繁而花葉減矣狀元紅者重葉深紅花其色與輕紅潛排相類而天姿富貴彭人以冠花品多葉者謂之第一架葉少而色稍淺者謂之第二架以其高出眾花之上故名狀元紅或曰舊制進士第一人即賜黃袍此花如其色故以名之祥雲者千葉淺紅花妖豔多態而花葉最多花戶王氏謂此花如采雲狀故謂之祥雲紹興春者祥雲子花也色淡佇而花尤富大者徑尺紹興中始傳大抵花戶多種花子以觀其變不獨祥雲耳燕脂樓者深淺相間如燕脂染成重趺累萼狀如樓觀色淺者出於新繁勾氏色深者出於花戶宋氏又有一種色稍下獨勾氏花為冠金腰樓玉腰樓皆粉紅花而起樓子黃白間之如金玉色與燕脂樓同類雙頭紅者並蒂聯萼色尤鮮明出於花戶宋氏始秘不傳有謝主簿者始得其種今花戶往往有之然養之得地則歲歲皆雙不爾則間年矣此花之絕異者也富貴紅者其花葉圓正而厚色若新染未乾者他花皆落獨此抱枝而槁亦花之異者一尺紅者深紅頗近紫色花面大幾尺故以一尺名之鹿胎紅者鶴領紅子花色紅微帶黃上有

白點如鹿胎極化工之妙歐陽公花品有鹿胎花者乃紫花與此頗異文公紅者出於西京潞公園亦花之麗者其種傳蜀中遂以文公名之政和春者淺粉紅花有絲頭政和中始出醉西施者粉白花中間紅暈狀如醜顏迎日紅者與醉西施同類淺紅花中特出深紅花開最早而妖麗奪目故以迎日名之彩霞者其色光麗爛然如霞疊羅者中間瑣碎如疊羅紋勝疊羅者差大於疊羅此三品皆以形而名之瑞露蟬亦粉紅花中抽碧心如合蟬狀乾花者粉紅花而分蟬旋轉其花亦富大千葉小千葉皆粉紅花之傑者大千葉無碎花小千葉則花萼瑣碎故以大小別之此二十一品皆紅花之著者也紫繡毬一名新紫花蓋魏花之別品也其花葉圓正如繡毬狀亦有起樓者為天彭紫花之冠乾道紫色稍淡而暈紅出未十年發墨紫者新紫花之子花也單葉深黑如墨歐公記有葉底紫近之葛巾紫花圓正而富麗如世人所戴葛巾狀福嚴紫亦重葉紫花其葉少於紫繡毬莫詳所以得名按歐公所紀有玉版白出於福嚴院土人云此花亦自西京來謂之舊紫花豈亦出於福嚴邪禁苑黃蓋姚黃之別品也其花閑淡高秀可亞姚黃慶雲黃花葉重複郁然輪困以故得名青心黃者其花心正青一本花往往有兩品或正圓如毬或層起成樓子亦異矣黃氣毬者淡黃檀心花葉圓正向背相承數腴可愛玉樓子者白花起樓高標逸韻自然是風塵外物劉師哥者白花帶微紅多至數百葉纖妍可愛莫知何以得名玉覆孟者一名玉炊餅蓋圓頭白花也碧花止一品名曰歐碧其花淺碧而開最晚獨出歐氏故以姓著大抵洛中舊品獨以姚魏為冠天彭則紅花以狀元紅為第一紫花以紫繡毬為第一黃花以禁苑黃為第一白花以玉樓子為第一然花戶歲益培接新特閭出將不特此而已好事者尚屢書之

風俗記第三

天彭號小西京以其俗好花有京洛之遺風大家至千本花時自太守而下往往即花盛處張飲奔幟車馬歌吹相屬最盛於清明寒食時在寒食前者謂之火前花其開稍久火後花則易落最喜陰晴相半時謂之養花天栽接剔治各有其法謂之弄花其俗有弄花一年看花十日之語故大家例惜花可就觀不敢輕翦蓋翦花則次年花絕少惟花戶則多植花以俾利雙頭紅初出時一本花取直至三十千祥雲初出亦直七八千今尚兩千州家歲常以花餉諸臺及旁郡蠟蒂筠籃旁午於道予客成都六年歲常得餉然率不能絕佳淳熙丁酉歲成都帥以善價私售於花戶得數百苞馳騎取之至成都露猶未晞其大徑尺夜宴西樓下燭焰與花相映發影搖酒中繁麗動人嗟乎天彭之花要不可望洛中而其盛已如此使異時復兩京王公將相築園第以相誇尚予幸得與觀焉其動蕩心目又宜何如也明年正月十日山陰陸某書

天申節致語

得吾道而上為皇方探真詮之妙有天下而尊歸父適當孝治之隆肆均湛露之恩用修流虹之瑞恭惟皇帝陛下德高邃古澤被縣區神武應期三紀撫紹開之運希夷玩志兆民傾愛戴之誠爰輯上儀式彰華日山呼萬歲靡已浹於神人花覆千官慶更同於中外巨獲預梨園之法部遙瞻鳳闕於丹霄敢采民謠恭陳口號

宮殿紅雲捧紫皇河清電繞擁休祥壺中常占青春在物外方知浩劫長晝立龍旗風不動曉開瓊笈遠飄香堯年豈特封人祝動地驩聲遍萬方

又

樞電効祥不顯生商之日需雲示惠肆均在鑄之恩喜溢鸞鸞光生俎豆伏惟皇帝陛下聖神廣運垂拱

無爲躬堯舜之性仁致成康之刑措克肖其德天惟
申命用休非求於民人皆同心以戴號令雷風之鼓
舞文章日月之昭明後甲觀之昌期疏瑤池之廣宴
山呼萬歲花覆千官激灑上樽味挹金莖之露悠颺
法曲聲留玉宇之雲臣等生值聖時身參樂府敢緣
歸美之義賡載太平之詩

廣殿遙聞警蹕音
觚稜曉色尚沉沉
半空瑞靄爐香
覆一點紅雲黼座深
夷夏羅聲歸羽舞
乾坤和氣入薰琴
欲知聖德齊堯舜
邈闕爭傾萬國心

又

有王者興應繞電流虹之瑞使聖人壽實敷天率土
之心欣逢震夙之期恭致鹿鳴之祝伏惟皇帝陛下
聰明稽古歷數在躬聖澤上際而下蟠睿化東漸而
西被追景德祥符之治萬寓丕平御紫宸垂拱之朝
四夷入貢爰錫需雲之宴用均湛露之恩臣等端遇
清時遙瞻丹闕聽虞帝簫韶之奏同極驩情綴漢家
樂府之詩敢陳薄技

嘉會千齡豈易逢
珮聲俱集未央宮
九重鳳闕瞳矐矐
日百尺龍旗掩萬風
奇瑞屢書圖課上
太平長在詠歌中
區區擊壤雖無取
意與生民既醉同

徐稚山給事慶八十樂語

伏以就第而賜安車爰及常珍之歲爲酒以介眉壽
宜伸善頌之誠恭惟致政龍學給事東省近臣西清
宿望體鍾和氣生元祐之盛時道合聖君贊隆興之
初政抗議每先於諸老遺榮靡顧於萬鍾雖容疎傳
之歸行見謝公之起至若籛金比訓庭玉生輝出將
使指之榮入奉色難之養膺茲全福屬我耆英維降
嶽之嘉辰當發春之令月廟堂舊弼紆華袞以臨觴
臺閣名卿煥繡衣而在席式歌且舞俾熾而昌上對
台顏敢陳口號

欲知主聖本臣忠
傾盡嘉謨沃舜聰
同載方如周呂
尚安車不數漢申公
日烘益益花光暖
燭暎鱗鱗酒

浪紅白首同朝各強健
莫辭爛醉答春風
致語

伏以碧油紅旆有嚴幕府之容璫俎華觴用飾輿情
之喜恭惟某官西清禁從東省名臣據古守經凜北
斗泰山之望黜浮崇雅榮銘鍾篆鼎之辭行表縉紳
言書簡冊雖弗容然後見君子顧未起何以慰蒼生
適茲謀帥之辰誰處者英之右佩麟符而就鎮猶屈
經綸穿豹尾以還朝佇聞趣召某官爰申宴樂式奉
笑談士民踴躍而仰瞻將吏奔馳而卽事諧金石鏗
鏘之奏盛魚龍曼衍之觀上對台堦敢陳口號

曾立蛾眉禁省班至今風采照金鑿縱橫筆陣千人
廢浩蕩辭源萬頃寬落紙煙雲紛態照人冰玉峙
高寒從容坐嘯香凝寢說與賓僚拭目觀

又

西顛司辰素商紀節涓日初開於莫府肆筵式奉於
皇華恭惟某官節槩清真風規簡亮過眼不再盡讀
五車之書落筆可驚早冠萬人之勇文久傳於後學
名疑覩於昔賢凜臺柏之生風煥使星之下燭繡衣
持斧威聲方肅於列城豹尾屬車趣召行參於法從
某官爰開燕豆款奉談犀畫棟珠簾納九秋之爽氣
金樽玉酒醉一道之歡聲仰對台堦敢陳口號
涼月參差白露溥溥請看賓主罄清歡麟符玉節交相
映鳳竹鸞絲殊未闌百穀方登倉庾足七州無事里
闈安樽前莫惜山頽玉四者能兼自古難

渭南文集卷第四十二

渭南文集目錄
卷第四十三

入蜀記 乾道五年十二月六日起六年六月三十日止

渭南文集卷第四十三

入蜀記

乾道五年十二月六日得報差通判夔州方久病未

堪遠役謀以夏初離鄉里

六年閏五月十八日晚行夜至法雲寺兄弟餞別五

鼓始決去

十九日黎明至柯橋館見送客已時至錢清食亭中

涼爽如秋與諸子及送客步過浮橋橋堅好非昔

比亭亦華潔皆史丞相所建也申後至蕭山縣憩

夢筆驛驛在覺苑寺旁世傳寺乃江文通舊居也

有大碑葉道卿文寺頌及佛殿榜皆沈睿達所書

有碑亦睿達書尤精古又有毗陵人戚舜臣所畫

水蓋佛後座大壁也卒然見之覺濤瀾洶湧可駭

前輩或謂之死水過矣縣丞權縣事紀旬尉曾槃

來會原伯逢招飲於其子槃廨中二鼓歸原伯復

來共坐驛門月如畫極涼四鼓解舟行至西興鎮

二十日黎明渡江江平無波少休仙林寺寺僧為開

館設湯飲遂買小舟出北關登槽司所假舟於紅

亭稅務之西夜無蚊

二十一日省二兄

二十二日至二十四日皆留兄家

二十五日晚葉夢錫侍郎衡招飲案間設礬山數盆

望之如雪

二十六日晚芮國器司業擘招飲同集仲高兄詹道

子大著亢宗張叔潛編修淵坐中國器云頃在廣

東作槽有提舉茶鹽石端義者性殘忍每捕官吏

繫獄輒以石鹽木枷枷之蓋木之至堅重者每曰

木名石鹽天生此為我用也其後石坐罪竟荷校

云

二十七

二十八日同仲高出關門買小舟泛西湖至長橋寺

子不至臨安八年矣湖上園苑竹樹皆老蒼高柳

造天僧寺益葺而舊交多已散去或貴不復相通

為之絕數

二十九日沈持要檢正樞招飲邂逅趙德莊少卿彥

端晚出湧金門並湖繞城至舟中

三十日

六月一日早移舟出關幾盡一日始能出三關船舫

櫂比熱甚午後小雨熱不解泊糴場前

二日禺中解舟鄉僕來言鄉中閔雨村落家家車水

比連三年頗稔今春父老言占歲可憂不知終何

如也過赤岸班荆館小休前亭班荆者北使宿頓

及賜燕之地距臨安三十六里晚急雨頗涼宿臨

平臨平者太師蔡京葬其父準於此以錢塘江為

水會稽山為案山形如駱駝葬於駝之耳而築塋

於駝之峯蓋葬師云駝負重則行遠也然東坡先

生樂府固已云誰似臨平山上塋亭亭迎客西來

送客行則臨平有塋亦久矣當是蔡氏葬後增築

或遷之耳京責太子少保制云託祝聖而飾臨平

之山是也夜半解舟

三日黎明至長河堰亦小市也魚蟹甚富午後至秀

州崇德縣縣令右從政郎吳道夫丞右承直郎李

植監秀州都稅務右從政郎章湜來舊聞戴子微

云崇德有市人吳隱忽棄家寓旅邸終日默坐一

室室中惟一臥榻客至共坐榻上或載酒過之亦

不拒清談竟日隱初不學問至是問與人言易數

皆造精微亦能先知人吉凶壽夭見者莫能測也

因見吳令問之云皆信然今徙居村落間矣是晚

行十八里宿石門火雲如山明日之熱可知也

四日熱甚午後始稍有風晚泊本覺寺前寺故神霄

宮也廢於兵火建炎後再修今猶甚草創寺西廡

有蓮池十餘畝飛橋小亭頗華潔池中龜無數聞

人聲皆集駢首仰視兒曹驚之不去亭中有小碑

乃郭功甫元祐中所作醉翁操後自跋云見子瞻所作未工故賦之亦可異也

五日早抵秀州見通判權郡事右通直郎朱自求員外通判右承事郎直祕閣趙師夔方務德侍郎滋務德留飯飯罷還舟小憩極熱謁樊自強主管樊自牧教授廣抑皆茂實吏部子聞人伯卿教授阜民

茂德剛定子二樊居城外居第頗壯茂實晚歲所築尚未成也隔水有小園竹樹脩茂荷池渺瀰可喜池上有堂曰讀書堂遊寶華尼寺拜宣公祠堂有碑缺壞磨滅之餘時時可讀蘇州刺史于頔書大略言祕書監陸公齊望始作尼寺於此其後灑陸

禮兄弟又新之後又有賢妹字意者陸氏嘗有女子爲尼云然不言宣公所以有祠者家譜灑陸此謬諱灑者則宣公之父也老尼妙濟大師法淳及其弟子居白留啜茶且言方新祠堂也移舟北門宣化亭晚復過務德飯

六日右奉議郎新通判荆南呂援來援字彥能進士聞人綱來綱字伯紀方務德館客自言識毛德昭德昭名文衢州江山縣人居於秀子兒時從之甚久德昭極苦學中年不幸病盲而卒無子綱言其盲後猶終日危坐默誦六經至數千言不已可哀也赴郡集於倅廨中坐花月亭有小碑乃張先子野雲破月來花弄影樂章云得句於此亭也晚赴方夷吾導之集於陳大光縣丞家二樊呂倅皆在大光字子充瑩中諫議孫居第潔雅末利花盛開

七日早遍辭諸人赴方務德素飯晚移舟出城泊禾興館前館亦頗闊壯終日大雨不止招姜醫視家人及媼

八日雨霽極涼如深秋遇順風舟人始張帆過合路居人繁夥賣鮓者尤衆道旁多軍中牧馬運河水泛溢高於近村地至數尺兩岸皆車出積水婦人兒童竭作亦或用牛婦人足踏水車手猶績麻不

置過平望遇大雨暴風舟中盡溼少頃霽止宿八尺聞行舟有覆溺者小舟叩舷賣魚頗賤蚊如蠶董可畏

九日晴而風舟人懲昨夕狼狽不敢解舟日高方行自至崇德行大澤中至此始望見震澤遠山午間至吳江縣渡松江風極靜癯庵竹樹益茂而主人

死矣知縣右承議郎管統尉右迪功郎周邠來縣治有石刻曾文清公漁具圖詩前知縣事柳楹所刻也漁具比松陵倡和集所載又增十事云託周尉招醫鄭端誠爲統絢脰脈皆病暑也市中賣魚

鮓頗珍晚解舟中流回望長橋層塔煙波渺然真若圖畫宿尹橋登橋觀月

十日至平江以疾不入泐城過盤門望武丘樓塏正如吾鄉寶林爲之慨然宿楓橋寺前唐入所謂半夜鐘聲到客船者

十一日五更發楓橋曉過泚墅居人極多至望亭小憩自是夾河皆長岡高壟多陸種菽粟或灌木叢篠氣象窘隘非楓橋以東北也近無錫縣始稍平曠夜泊縣驛近邑有錫山出錫漢末識記云有錫天下兵無錫天下清有錫天下爭無錫天下寧至今錫見輒拚之莫敢取者

十二日早謁喻子材郎中樗子材來謝以兩夫荷轎不持胡床手自授謁云知縣右奉議郎吳澧來晚行夜四鼓至常州城外

十三日早入常州泊荆谿館夜月如晝與家人步月驛外綯始小愈

十四日早見知州右朝奉大夫李安國通判右朝奉郎蔣誼員外倅左朝散郎張堅堅文定公綱之子教授左文林郎陳伯達員外教授左從政郎沈瀛司戶右從政郎許伯虎來伯達字兼善瀛字子壽皆未識子壽仍出近文一卷伯虎字子威余兒時筆硯之舊也至東嶽廟觀古檜數百年物也又小

憩崇勝寺納涼遂解舟甲夜過犇牛關宋明帝遣沈懷明擊孔覲至犇牛築壘卽此也關水湍激有聲甚壯遂抵呂城關自祖宗以來天下置堰軍止四處而呂城及京口二關在焉

十五日早過呂城關始見獨轆小車過陵口見大石獸偃仆道傍已殘缺蓋南朝陵墓齊明帝時王敬則反至陵口慟哭而過是也余頃嘗至宋文帝陵道路猶極廣石柱承露盤及麒麟辟邪之類皆在柱上刻太祖文皇帝之神道八字又至梁文帝陵文帝武帝父也亦有二辟邪尚存其一爲藤蔓所纏若繫縛者然陵已不可識矣其旁有皇業寺蓋史所謂皇基寺也疑避唐諱所改二陵皆在丹陽距縣三十餘里郡十蔣元龍子雲謂予曰毛達可作守時有賣黃金石榴來禽者疑其盜捕得之果發梁陵所得夜抵丹陽古所謂曲阿或曰雲陽謝康樂詩云朝日發雲陽落日到朱方蓋謂此也

十六日早發丹陽汲玉乳井水井在道旁觀音寺名列水品色類牛乳甘冷熨齒并額陳文忠公所作堆玉八分也寺前又有練光亭下闕練湖亦佳境距官道甚近然過客罕至是日見夜合花方開故山開過已月餘氣候不齊如此過夾岡有二石人植立岡上俗謂之石翁石媪其實亦古陵墓前物自京口抵錢塘梁陳以前不通漕至隋煬帝始鑿渠入百里皆關十丈夾岡如連山蓋當時所積之士朝廷所以能駐蹕錢塘以有此渠耳沐與此渠皆假手隋氏而爲吾宋之利豈亦有數邪過新豐小憩李太白詩云南國新豐酒東山小妓歌又唐人詩云再入新豐市猶聞舊酒香皆謂此非長安之新豐也然長安之新豐亦有名酒見王摩詰詩至今居民市肆頗盛夜抵鎮江城外是日立秋

十七日平日入鎮江泊船西驛見知府右朝散郎直祕閣蔡洸子平都統慶遠軍節度使成閔通判右

朝奉大夫章汝右朝奉郎陶之真府學教授左文林郎熊克總領司幹辦公事右承奉郎史彌正端叔

十八日右奉議郎簽書節度判官廳公事葛郇觀察推官右文林郎徐務滋司戶參軍左迪功郎楊冲焦山長老定園甘露長老化昭來

十九日金山長老寶印來字坦叔嘉州人言自峽州以西難不可勝計白傅詩所謂白狗到黃牛灘如竹節稠是也赴蔡守飯於丹陽樓熱特甚堆冰滿坐了無涼意蔡自點茶頗工而茶殊下同坐熊教授建寧人云建茶舊雜以米粉復更以薯蕷兩年來又更以楮芽與茶味頗相入且多乳惟過梅則無復氣味矣非精識者未易察也申後移舟出三關至潮關而止

二十日遷入嘉州王知義船微雨極涼

二十一日
二十二日郡集衛公堂後園比舊唯增染香亭飲半登壽丘普照寺終宴壽丘者宋高祖宅有故井尚存寺本名延慶隆興中復泗州有普照寺僧奉僧伽像來歸寓焉因賜名普照寺僑置僧伽道場東望京山連巨抱合勢如練牆官寺樓觀如畫西闕大江氣象極雄偉也

二十三日至甘露寺飯僧甘露蓋北固山也有狼石世傳以爲漢昭烈吳大帝嘗據此石共謀曹氏石亡已久寺僧輒取一石充數遊客摩挲太息僧及童子輩往往竊笑也拜李文饒祠登多景樓樓亦非故趾主僧化昭所築下臨大江淮南草木可數登覽之勝實過於舊邂逅左迪功郎新太平州教授徐容容字子公泉州人此山多峭崖如削然皆土也國史以爲石壁峭絕誤矣

二十四日
二十五日早以一稀壺酒謁英靈助順王祠所謂下

元水府也祠屬金山寺寺常以二僧守之無他祝史然勝云賽祭豬頭劍歸本廟觀者無不笑初紹興末元顏亮入寇樞密葉公審言督視大軍守江禱於水府祠請事平奏加帝號既而不果隆興中虜再入有近臣申言之議者謂四瀆止封王水府不應在四瀆上乃但加美稱而已廟中遇武人王秀自言博州人年五十一元顏亮寇邊時自河朔從義軍攻下大名以待王師既歸朝不見錄且自言孤遠無路自通獻歎不已是晚欲出江舟人詞以潮不應遂宿江口

二十六日五鼓發船是日舟人始伐鼓遂游金山登玉鑑堂妙高臺皆窮極壯麗非昔比玉鑑蓋取蘇儀甫詩云僧於玉鑑光中坐客踞金鼇背上行儀甫果終於翰苑當時以爲詩識新作寺門亦甚雄翟者年伯壽家額然門乃不可泊舟凡至寺中者皆由雄跨閣長老寶印言舊額仁宗皇帝御飛白張之則風波洶湧蛟鼉出沒遂藏之寺閣今不復存矣印住山近十年興造皆其力寺有兩塔本會子宣丞相用西府俸所建以薦其先者政和中寺爲神霄宮道士乃去塔上相輪而屋之謂之鬱羅霄臺至是五十餘年印始復爲塔且增飾之工尚未畢山絕頂有吞海亭取毛吞巨海之意登望尤勝每北使來聘例延至此亭烹茶金山與焦山相望皆名藍每爭雄長焦山舊有吸江亭最爲佳處故此名吞海以勝之可笑也夜風水薄船聲有聲

二十七日留金山極涼冷印老言蜀中梁山軍驚鷺爲天下第一

二十八日夙興觀日出江中天水皆赤真偉觀也因登雄跨閣觀二島左曰鶴山舊傳有栖鷗今無有右曰雲根島皆特起不附山俗謂之郭璞墓季使金國起居郎范至能至山遣人相招食於玉鑑堂

至能名成大聖政所同官相別八年今借資政殿大學士提舉萬壽觀侍讀爲金國祈請使云午間過瓜洲江平如鏡舟中望金山樓觀重復尤爲鉅麗中流風雷大作電影騰擊止在江面去舟財丈餘急繫纜俄而開霽遂至瓜洲自到京口無蚊是夜蚊多始復設帳

二十九日泊瓜洲天氣澄爽南望京口月觀甘露寺水府廟皆至近金山尤近可辨人眉目也然江不可橫絕放舟稍西乃能達故渡者皆遲回久之舟人以帆弊往姑蘇買帆是日方至檣高五丈六尺帆二十六幅兩日間閱往來渡者無慮千人大抵多軍人也夜觀金山塔燈

渭南文集卷第四十三

渭南文集目錄

卷第四十四

入蜀記 七月一日起十六日止

渭南文集卷第四十四

入蜀記

七月一日黎明離瓜洲便風掛帆晚至真州泊鑿遠

亭州本唐揚州揚子縣之白沙鎮楊溥有淮南徐

溫自金陵來觀溥於白沙因改曰迎鑿鎮或謂周

世宗征淮時諸將嘗於此迎謁非也國朝乾德中

升爲建安軍祥符中建玉清昭應宮卽軍之西北

小山置冶鑄玉皇聖祖太祖太宗四聖像旣成遣

丁謂李宗諤爲迎奉使副至京車駕出迎肆赦建

軍曰真州而於故冶築儀真觀政和中修九域圖

志又名曰儀真郡舊以水陸之衝爲發運使治所

今廢

二日見知州右朝奉郎王察市邑官寺比數年前頗

盛攜統游東園園在東門外里餘自建炎兵火後

廢壞滌地漕司租與民歲入錢數千昔之閼壯巨

麗復爲荆棘荒墟之地者四十餘年乃更葺爲園

以記考之惟清醮堂拂雲亭澄虛閣巖復其舊與

右之清池北之高臺尚存若所謂流水橫其前者

故當時樂章曰范金肖像申嚴奉宮館狀羣飛萬

靈拱衛瑞煙披堤柳映黃麾道士又言賜號瑞應

福地則史所不載也今所謂儀真觀者昔黃冠入

城休憩道院耳晚大風舟人增纜

四日風便解纜挂帆發真州岸下舟相先後發者甚

衆煙帆映山縹緲如畫有頃風愈厲舟行甚疾過

瓜步山山蜿蜒蟠伏臨江起小峯巒巉峻絕頂有

元魏太武廟廟前大木可三百年一井已智傳以

爲太武所鑿不可知也太武以宋文帝元嘉二十

七年南侵至瓜步建康戒嚴太武鑿瓜步山爲蟠

道於其上設壇廬大會羣臣疑卽此地王文公詩

所謂叢祠瓜步認前朝是也梅聖俞題廟云魏武

敗志歸孤軍駐山頂按太武初未嘗敗聖俞誤以

佛狸爲曹瞞耳山出瑪瑙石多虎豹害人往時大

將劉寶每募人捕虎於此周世宗伐南唐齊王景

達自瓜步渡江距六合二十里設柵亦此地也入

來行數里沿岸園疇衍沃廬舍竹樹極盛大抵多

長蘆寺莊出來望長蘆樓塔重複自江淮兵火官

寺民廬莫不殘壞獨此寺之盛不減承平至今日

常數百衆江面渺瀰無際殊可畏李太白詩云維

舟至長蘆目送煙雲高是也晚泊竹篠港有居民

二十餘家距金陵三十里

五日大風將曉覆袂衾晨起淒然如莫秋過龍灣瀨

湧如山望石頭山不甚高無峭立江中繚繞如垣

牆凡舟皆由此下至建康故江左有變必先固守

石頭真控扼要地也自新河入龍光門城上舊有

賞心亭白鷺亭在門右近又創二水亭在門左誠

爲壯觀然賞心爲二亭所蔽頗失往日登望之勝

泊秦淮亭說者以爲鍾阜艮山得庚水爲宗廟水

秦鑿淮本欲破金陵王氣然庚水反爲吉天下事

信非人力所能勝也見留守右朝請大夫祕閣修

撰唐瑋通判右朝散郎潘恕建康行宮在天津橋

北橋琢青石為之頗精緻意其南唐之舊也晚小
兩右文林郎監大軍倉王烜來王言京口人用七
月六日為七夕蓋南唐重七夕而常以帝子鎮京
口六日輒先乞巧翌日馳入建康赴內燕故至今
為俗云然頃太宗皇帝時嘗下詔禁以六日為七
夕則是北俗亦如此此說恐不然

六日見左朝散大夫太府少卿總領兩淮財賦沈夏
武泰軍節度使建康諸軍都統郭振右宣教郎知
江寧縣何作善右文林郎觀察推官褚意來作善
字百祥意字誠叔晚見秦伯和侍郎伯和名□故
相益公檜之孫延坐畫堂棟宇闕麗前臨大池池
外即御書閣蓋賜第也家人病創託何令招醫劉
仲寶視脈

七日早遊天慶觀在冶城山之麓地理家以為此山
脈絡自蔣山來不可知也吳晉間城壘大抵多因
山為之觀西有忠烈廟下壺廟也以嵇紹及壺二
子眇盱配食紹死於惠帝時在壺前且非江左事
而以配壺非也廟後叢木甚茂傳以為壺墓墓東
北又有亭頗疎豁曰忠孝亭亭本南唐忠貞亭後
避諱改焉忠貞壺諡今日忠孝則并以其二子死

父難也雲堂道士陳德新字可久姑蘇人頗開敏
相從登覽久之遂出西門游清涼廣慧寺寺距城
里餘據石頭城下臨大江南直牛頭山氣象甚雄
然壞於兵火舊有德慶堂在法堂前堂榜乃南唐
後主撮襟書石刻尚存而堂徙於西偏矣又有祭
悟空禪師文曰保大九年歲次辛亥九月皇帝以

香茶乳藥之奠致祭於右街清涼寺悟空禪師按
南唐元宗以癸卯歲嗣位改元保大當晉出帝之
天福八年至辛亥實保大九年當周太祖之廣順
元年則祭悟空者元宗也建康志以為後主非是

長老寶餘楚州人留食贈德慶堂榜墨本食已同
登石頭西望宣化渡及歷陽諸山真形勝之地若

異時定都建康則石頭當仍為關要或以為今都
城徙而南石頭雖守無益蓋未之思也惟城既南
徙秦淮乃橫貫城中六朝立柵斷航之類緩急不
可復施然大江天險都城臨之金湯之勢比六朝
為勝豈必依淮為固邪左迪功郎新湖州武康尉
劉焯右迪功郎監比較務李膺來焯秦伯和館客
也言秦氏衰落可念至屢典質生產亦薄問其歲
入幾何曰米十萬斛耳

八日晨至鍾山道林真覺大師塔焚香塔在太平興
國寺上寶公所葬也塔中金銅寶公像有銘在其
膺蓋王文公守金陵時所作僧言古像取入東都
啓聖院祖宗時每有祈禱啓聖及此塔皆設道場
考之信然塔西南有小軒曰木末其下皆大松髯
甲天矯如蛟龍往往數百年物木末蓋後人取王
文公詩木末北山雲冉冉之句名之建康志謂公
自命此名非也塔後又有定林菴舊聞先君言李

伯時畫文公像於菴之昭文齋壁著帽束帶神彩
如生文公沒齋常扃閉遇重客至寺僧開戶客忽
見像皆驚覺生氣逼人寫照之妙如此今菴經
火尺椽無復存者予乙酉秋嘗雨中獨來遊留字
壁間後人移刻崖石讀之感歎蓋已五六年矣歸
途過半山少留半山者王文公舊宅所謂報寧禪

院也自城中上鍾山此為中途故曰半山殘毀尤
甚寺西有土山今謂之培塿亦後人取文公詩所
謂溝西顧丁壯擔土為培塿名之也寺後又有謝
安墩文公詩云在冶城西北即此是也

九日至保寧戒壇二寺保寧有鳳皇臺攬輝亭臺有
李太白詩云三山半落青天外二水中分白鷺洲
今已廢為大軍甲仗庫惟亭因舊趾重築亦頗宏
壯寺僧言亭勝本朱希真隸書已為俗子易之法
堂後有片石瑩潤如黑玉乃宋子嵩詩題云鳳臺
山亭子陳獻司空鄉貢進士宋齊丘司空者徐如

誥也後改姓名曰李昇是爲南唐烈祖而齊丘爲大臣後又有題字云昇元三年奉勅刻石蓋烈祖既有國追念君臣相遇之始而表顯之昇齊丘雖皆不足道然當攘奪分裂橫潰之時其君臣相遇不如是亦不能粗成其功業也戒壇額曰崇勝戒壇寺古謂之瓦棺寺有閣因岡阜其高十丈李太白所謂鍾山對北戶淮水入南榮者又橫江詞一風三日吹倒山白浪高於瓦棺閣是也南唐後主時朝廷遣武人魏丕來使南唐意其不能文卽宴於是閣因求賦詩丕攬筆成篇末句云莫教雷雨損基肩後主君臣皆失色及南唐之亡爲吳越兵所焚國朝承平二百年金陵爲太府寺觀競以崇飾土木爲事然閣終不能復紹興中有北僧來居講惟識百法論誓復興造求偉材於江湖間事垂集者屢矣會建宮闕有司往往輒取之僧不以此動心愈益經營卒成廬舍那閣平地高七丈雄麗冠於江東舊閣基相距無百步今廢爲軍營秦伯和遣醫柴安恭來視家人瘡柴邢州龍岡人晚楮誠叔來誠叔嘗爲福州閩清尉獲盜應格當得京官不忍以人死爲己利辭不就至今在選調又有爲它邑尉者亦獲盜營賞甚力卒得京官將解去入郡過刑人處輒掩目大呼數日神志方定後至他郡見通衢有石幢問此何爲從者曰法場也亦大駭叫呼幾墜車自此所至皆迂道以避刑人之地人之不可有媿於心如此移舟泊賞心亭下秦伯和送藥

十日早出建康城至石頭得便風張帆而行然港淺而狹行亦甚緩宿大城岡金陵岡隴重復如梅嶺岡石子岡余讀如蛇婆岡尤其著者也居民數十家亦有店肆

十一日早出夾行大江過三山磯烈洲慈姥磯采石鎮泊太平州江口謝玄暉登三山還望京邑李太白

白登三山望金陵皆有詩凡山臨江皆曰磯水湍急篙工併力撐之乃能上然今年閏餘秋早水落已數尺矣則盛夏可知也三山自石頭及鳳皇臺望之杳杳有無中耳及過其下則距金陵財五十餘里晉伐吳王濬舟師過三山王渾要濬議事濬舉帆曰風利不得泊卽此地也是日便風擊鼓挂帆而行有兩大舟東下者阻風泊浦瀨見之大怒頓足詬罵不已舟人不倉但撫掌大笑鳴鼓愈厲作得意之狀江行湓速常也得風者矜而阻風者怒可謂兩失之矣世事蓋多類此者記之以寓一笑烈洲在江中上有小山曰烈山草木極茂密有神祠在山巔慈姥磯磯之尤巉絕峭立者徐師川有慈姥磯詩序云磯與望夫石相望正可爲的對而詩人未嘗挂齒牙故其詩云離鸞只說閨中恨砥礪誰知目下情然梅聖俞護母喪歸宛陵發長蘆江口詩云南國山川都不改傷心慈姥舊時磯師川偶忘之耳聖俞又有過慈姥磯下及慈姥山石崖上竹鞭詩皆極高奇與此山稱采石一名牛諸與和州對岸江面比瓜洲爲狹故隋韓擒虎平陳及本朝曹彬下南唐皆自此渡然微風輒漲作不可行劉賓客云蘆葦晚風起秋江鱗甲生王文公云一風微吹萬舟阻皆謂此磯也磯卽南唐樊若冰獻策作浮梁渡王師處初若冰不得志於李氏詐祝髮爲僧廬於采石山鑿石爲竅及建石浮圖又月夜繫繩於浮圖棹小舟急渡引繩至江北以渡江面既習知不謬卽亡走京師上書其後王師南渡浮梁果不差尺寸予按隋煬帝征遼蓋嘗用此策渡遼水造三浮橋於西岸旣成引趨東岸橋短丈餘不合隋兵赴水接戰高麗棄岸上擊之交鐵杖戰死始斂兵引橋復就西岸而更命何稠接橋二日而成遂築以濟然隋終不能平高麗國朝遂下南唐者實天意也若冰何力之有方若冰

之北走也江南皆知其獻南征之策或請誅其母妻李煜不敢但羈置池州而已其後若冰自陳母妻在江南朝廷命煜護送煜雖憤切終不敢違厚遺而遣之然若冰所鑿石竅及石浮圖皆不毀王師卒用以繫浮梁則李氏君臣之暗且怠亦可知矣雖微若冰有不亡者乎張文潛作平江南議謂當縛若冰送李煜使甘心焉不然正其叛主之辜而誅之以示天下豈不偉哉文潛此說實天下正論也予自金陵得疾是日方小愈尚未能食夜雨十二日早移舟泛姑熟溪五里泊閱武亭初詢舟人云江口泊船處距城二十里須步乃可入及至閱武乃止在城闌之外微猷閣直學士左朝請郎知州周元特操聞予病與醫郭師顯俱來視疾自都下相別迨今八年矣太平州本金陵之當塗縣周世宗時南唐元宗失淮南僑置和州於此謂之新和州改爲雄遠軍國朝開寶八年下江南改爲平南軍然獨領當塗一邑而已太平興國二年遂以爲州且割蕪湖繁昌來屬而治當塗與興國軍同時建置故分紀年以名之

十三日通判右朝請郎葉焚員外通判左朝奉郎錢同仲耕軍事判官左文林郎趙子觀知當塗縣右通直郎王權來午後入州見元特呼郭醫就坐間爲予切脈且議所用藥州正據姑熟溪北土人但謂之姑熟水色正綠而澄澈如鏡纖鱗往來可數溪南皆漁家景物幽奇兩浮橋悉在城外其一通宣城其一可至浙中姑熟堂最號得溪山之勝適有客寓家其間故不得至又有一酒樓登望尤佳皆城之南也往時溪流分一支貫城中湮塞已久近歲嘗浚治然惟春夏之交暫通今七月已絕流矣李太白集有姑熟十詠予族伯父彥遠嘗言東坡自黃州還過當塗讀之撫手大笑曰質物敗矣豈有李白作此語者郭功父爭以爲不然東坡又

笑曰但恐是太白後身所作耳功父甚愜蓋功父少時詩句俊逸前輩或許之以爲太白後身功父亦遂以自負故東坡因是戲之或曰十詠及歸來乎笑矣乎僧伽歌懷素草書歌太白舊集本無之宋次道再編時貪多務得之過也

十四日晚晴開南窗觀溪山溪中絕多魚時裂水面躍出斜日映之有如銀刀垂釣挽罟者彌望以故價甚賤僅使輩日皆饜飮土人云此溪水肥宜魚及飲之水味果甘豈信以肥故多魚邪溪東南數峯如黛蓋青山也

十五日早州學教授左文林郎吳博古敏叔員外教授左文林郎楊恂信伯來飯已遊黃山東嶽廟廣福寺遂登凌歊臺嶽廟棟宇頗盛本謂之黃山大監廟大監者不知何神蓋淫祠也今旣爲嶽廟而大監反寓食廡下廣福本壽聖寺以紹興壬午詔書改額敗屋二十餘間殘僧三四人蕭然如古驛主僧惠明温州平陽人凌歊臺正如鳳皇雨花之類特因山巔名之宋高祖所營面勢虛曠高出氛埃之表南望青山龍山九井諸峯如在几席龍山卽孟嘉登高落帽處九井山有桓玄僭位壇稍西江中二小山相對云東梁西梁也北戶臨和州新城樓櫓歷歷可辨蓋自絕江至和州財十餘里李太白有黃山凌歊臺送族弟泛舟赴華陰詩卽此地也臺後有一塢塢之後又有亭曰懷古云余初至當塗飲姑熟溪水喜其甘滑已而遍飲城中水皆甘蓋泉脈佳也

十六日郡集於道院歷遊城上亭榭有坐獻亭頗宜登覽城濠皆植荷花是夜月白如畫影入溪中搖蕩如玉塢始知東坡玉塢臥微瀾之句爲妙也

渭南文集目錄
卷第四十五

入蜀記 七月十七日起八月七日止

渭南文集卷第四十五

入蜀記

十七日郡集於青山李太白祠堂二教授同集祠在青山之西北距山尚十五里墓在祠後有小岡阜起伏蓋亦青山之別支也祠莫知其始有唐劉全白所作墓碣及近歲張真甫舍人所作重修祠碑太白烏巾白衣錦袍又有道帽整裘侑食於側者郭功甫也早飯罷遊青山山南小市有謝玄暉故宅墓今為湯氏所居南望平塹極目而環宅皆流泉奇石青林文篠真佳處也遂由宅後登山路極險巖凡三四里有兩道人持湯飲迎勞於松石間又里許至一菴老道人出迎年七十餘姓周濰州人居此山三十年顛頰如丹鬚鬢無白者又有李媪八十矣耳目聰明談笑不衰自言嘗得異人秘訣菴前有小池曰謝公池水味甘冷雖盛夏不竭絕頂又有小亭亦名謝公亭下視四山如蛟龍奔放爭赴川谷絕類吾鄉舜山但舜山之巔豐沃夷曠無異乎陸此所不及也亭北望正對歷陽周生言元顏亮入寇時戰鼓之聲震於山中云夜歸舟次已一鼓盡矣坐間信伯言桓溫墓亦在近郊有石獸石馬製作精妙又有碑悉刻當時車馬衣冠之類極可觀恨不一到也

十八日小雨解舟出姑熟溪行江中江溪相接水清濁各不相亂挽行夾中三十里至大信口泊舟蓋自此出大江須風便乃可行往往連日阻風兩小

山夾江即東梁西梁一名天門山李太白詩云兩岸青山相對出孤帆一片日邊來王文公詩云崔嵬天門山江水遶其下梅聖俞云東梁如仰蠶西梁如浮魚徐師川云南人北人朝莫船東梁西梁今古山皆得句於此也水澗小兒賣菱芡蓮藕者甚衆夜行堤上觀月大信口歐陽文忠公于役志

謂之帶屋口未詳孰是于役志蓋謫夷陵時所著也

十九日便風過大小碣山磯奇石巉絕漁人依石挽醫宛如畫圖間所見過臯磯在大江中聳拔特起有道士結廬其上政和中賜名寧淵觀舊說臯磯有臯能害人故得名方郡縣奏乞觀頌時惡其名因曰磯在水中水常沃石故曰澆磯今觀屋亦二十餘間然止一道人居之相傳有二人則其一輒死故無敢往者至蕪湖縣泊舟吳波亭知縣右通直郎呂昭問來按漢丹陽郡有蕪湖縣吳陸遜屯蕪湖又杜預注春秋楚子伐吳克鳩茲亦云在蕪湖至東晉乃改名于湖不知所自王敦反屯于湖今故城尚存又有玩鞭亭亦當時遺迹唐温飛卿有湖陰曲敘其事近時張文潛以為晉書所云帝至于湖陰察營壘當以于湖為句飛卿蓋誤讀也作于湖曲以反之劉夢得歷陽書事詩敘道中事云望夫人化石夢帝日環營蓋夢得自夔州移牧歷陽過此邑也邑人云數年前邑境有盜發大墓棺槨已壞得鏡及刀劍之屬甚衆發塋有大將軍墓四字或疑為敦墓云

二十日寧國太平縣主簿左迪功郎陳炳來見泛小舟往謝之則寓寧淵觀下院以提刑司檄來督大禮錢帛寧淵在臯磯隔大江故置下院於近邑道流十餘壇宇像設甚盛有觀主何守誠者今選居太一宮矣炳字德先婺州義烏人自言其從姑得道徽宗朝賜號妙靜練師結廬葛仙峯下平生不火食惟飲酒啗生果為人言禍福死生無毫釐差每風日清和時輒掩關獨處或於戶外竊聽之但聞若二嬰兒聲或歌或笑往往至中夜方止莫有能測者年九十正日自言四月八日當遠行果以是日坐逝每為德先言汝有仙骨當遇異人後因得疾委頓有皖山徐先生來餌以藥即日疾平徐

因留教以絕粒訣德先父母方望其成名固不許然自是絕滋味日食淡湯餅及飯而已如此者六年益覺身輕能日行二百里會中第娶妻復近輩血徐遂告別臨行語德先曰汝二紀後當復從我究此事德先送至谿上方呼舟欲渡徐褰裳疾行水上而去呼之不復應德先至今悵悵有棄官入灤皖之意予遂遊東寺登王敦城以歸城並大江氣象宏敞邑出綠毛龜就船賣者不可勝數將午解舟過三山磯磯上新作龍祠有道人半醉立蘚崖峭絕處下觀行舟望之使人寒心亦奇士也江中江豚十數出沒色或黑或黃俄又有物長數尺色正赤類大蜈蚣奮首逆水而上激水高三二尺殊可畏也宿過道口

二十一日過繁昌縣南唐所置初隸宣城及置太平州復割隸焉晚泊荻港散步堤上遊龍廟有老道人守之台州仙居縣人自言居此十年日伐薪二束賣之以自給雨雪則從人乞未嘗他營也又至一菴僧言隔港即銅陵界遠山嶄然臨大江者即銅官山太白所謂我愛銅官樂千年未擬還是也恨不一到最後至鳳凰山延禧觀觀廢於兵燹者四十餘年近方興葺羽流五六人觀主陳廷瑞婺州義烏縣人言此古青華觀也有趙先生荻港市中人父賣茗先生幼名王九年十三疾亟父抱詣青華願使入道是夕先生夢老人引之登高山謂曰我陰翁也出栢枝啗之及覺遂不火食後又夢前老人教以天篆數百字比覺悉記不遺太宗皇帝召見度爲道士賜冠簡易名自然給裝錢遣還遂爲觀主祥符間再召至京師賜紫衣改青華額曰延禧先生懇求還山養母得歸一日無疾而逝門人葬之山中行半途棺忽大重不可舉其母曰吾兒必有異命發棺果空無尸惟劍履在耳遂即其處葬之今塚猶在謂之劍塚自然國史有傳大

槩與廷瑞言頗合惟劍塚一事無之荻港蓋繁昌小墟市也歸舟已夜矣

二十二日過大江入丁家洲夾復行大江自離當塗風日清美波平如席白雲青嶂遠相映帶終日如行圖畫殊志道途之勞也過銅陵縣不入晚泊水洪口江湖間謂分流處爲洪王文公詩云東江木落水分洪是也

二十三日過陽山磯始見九華山九華本名九子李太白爲易名太白與劉夢得皆有詩而劉至以爲可兼太華女几之奇秀南唐宋子嵩辭政柄歸隱此山號九華先生封青陽公由是九華之名益盛惟王文公詩云盤根雖巨壯其末乃修纖最極形容之妙大抵此山之奇在脩纖耳然無含蓄敦大氣象與廬阜天台異矣岸傍荻花如雪舊見天井長老彥威云廬山老僧用此絮紙衣威少時在惠日亦爲之佛燈珣禪師見而大噴云汝少年輒求溫暖如此豈有心學道邪退而問兄弟則堂中百人有荻花衣者財三四皆年七十餘矣威愧恐亟除去泊梅根港巨魚十數色蒼白大如黃犢出沒水中每出水輒激起沸白成浪真壯觀也

二十四日到池州泊稅務亭子州唐置南唐嘗爲康化軍節度今省又嘗割青陽隸建康今復故惟所置銅陵東流二縣及改秋浦爲貴池今因之蓋南唐都金陵故當塗蕪湖銅陵繁昌廣德青陽并江寧上元溧陽溧水句容凡十一縣皆隸畿內今建康爲行都而纔有江寧等五邑有司所當議也李太白往來江東此州所賦尤多如秋浦歌十七首及九華山清溪白筍陂玉鏡潭諸詩是也秋浦歌云秋浦長似秋蕭條使人愁又曰兩鬢入秋浦一朝颯已衰獲聲催白鬢長短盡成絲則池州之風物可見矣然觀太白此歌高妙乃爾則知姑熟十詠決爲贗作也杜牧之池州諸詩正爾觀之亦清

婉可愛若與太白詩並讀醇醞異味矣初王師平南唐命曹彬分兵自荊州順流東下以樊若冰爲鄉導首克池州然後能取蕪湖當塗駐軍采石而浮橋成則池州今實要地不可不備也

二十五日見知州右朝議大夫直祕閣楊師中通判右朝奉郎孫德芻遊光孝寺寺有西峯聖者所留鐵笛聖者生當吳武王楊行密時陽狂不羈好吹笛能役鬼神蛟龍嘗寓池州乾明寺乾明卽光孝也及去留笛付主事僧笛似銅鐵而非色綠而瑩潤如綠玉不知何物僧懼爲好事者所奪郡官求觀之輒出一凡鐵笛充數予偶與監寺僧有舊獨得一見有石刻沈叡達所作西峯銘文辭古雅可愛恨非其自書也僧言貴池去城八十里在秀山下江之一支別匯爲池四隅皆因山石爲岸產鯉魚金鱗朱尾味極美本以此得貴池之目秀山有梁昭明太子墓拱木森然今池州城西有神甚靈者曰九郎或云九郎卽昭明晚登弄水亭杜牧之所賦詩也亭殊不葺然正對清溪齊山景物絕佳州雖瀕江然據岡阜上頗難得水

二十六日解舟過長風沙羅刹石李太白江上贈竇長史詩云萬里南遷夜郎國三年歸及長風沙梅聖俞送方進士遊廬山云長風沙浪屋許大羅刹石齒水下排歷此二險過湓浦始見瀑布懸蒼崖卽此地也又太白長干行云早晚下三巴預將書報家相迎不道遠直到長風沙蓋自金陵至此七百里而室家來迎其夫甚言其遠也地屬舒州舊最號湍險仁廟時發運使周湛役三十萬夫疏支流十里以避之至今爲行舟之利羅刹石在大江中正如京口鵲峯而稍大白石拱起其上叢篠喬木亦有小神祠旛竿不知何神也西望羣山靡迤巖嶂深秀宛如吾廬南望鏡中諸山爲之累欹宿懷家狀懷姓也吳有尚書郎懷敘見顧雍傳

二十七日五鼓大風自東北來舟人不告棄便風解船過雁翅夾有稅場居民二百許家岸下泊船甚衆遂經皖口至趙屯未朝食已行百五十里而風益大乃泊夾中皖口卽王師破江南大將朱令贄水軍處趙屯有戍兵亦小市聚也是日大風至莫不止登岸行至夾口觀江中驚濤駭浪雖錢塘八月之潮不過也有一舟掀簸浪中欲入夾者再三不可得幾覆溺矣號呼求救久方能入北望正見皖山太白江上望皖公山詩云巉絕稱人意巉絕二字不刊之妙也南唐元宗南遷豫章舟中望皖山愛之謂左右曰此青峭數峯何名奮曰舒州皖山時方新失淮南伶人李家明侍側獻詩曰龍舟千里颺東風漢武潯陽事正同回首皖公山色好日斜不到壽盃中元宗爲悲憤歎歎故王文公詩云南狩皖山非故地北師淮水失名王計其處當去此不遠也夜雨

二十八日過東流縣不入自雷江口行大江江南羣山蒼翠萬疊如列屏障凡數十里不絕自金陵以西所未有也是日便風張颿舟行甚速然江面浩渺白浪如山所乘二千斛舟搖兀掀舞纔如一葉過獅子磯一名佛指磯巖壁百尺青林綠篠倒生壁間圖畫有所不及猶恨舟行北岸不得過其下旁有數磯亦奇峭然皆非獅子比也至馬當所謂下元水府山勢尤秀拔正面山巒直插大江廟依峭崖架空爲閣登降者皆自閣西崖腹小石徑捫蘿側足而上宛若登梯飛甍曲檻丹碧縹緲江上神祠惟此最佳舟至石壁下忽晝晦風勢橫甚舟人大恐失色急下颿趨小港竭力牽挽僅能入港繫纜同泊者四五舟皆來助牽早間同行一舟亦蜀舟也忽有大魚正綠腹下赤如丹躍起極旁高三三尺許人皆異之是晚果折檣破帆幾不能全亦可怪也入夜風愈厲增十餘纜迨曉方少定

二十九日阻風馬當港中風雨凄冷初御袂衣有小舟冒風濤來賣薪菜豕肉亦有賣野蔬肉者云獵蘆場中所得飯已登南岸望馬當廟北風吹人動甚至不能語既莫風少定然怒濤未息擊船終夜有聲

八月一日過烽火磯南朝自武昌至京口列置烽燧此山當是其一也自舟中望山突兀而已及拋江過其下嵌巖竇穴怪奇萬狀色澤瑩潤亦與它石迥異又有一石不附山傑然特起高百餘尺丹藤翠蔓羅絡其上如寶裝屏風是日風靜舟行頗遲又秋深潦縮故得盡見杜老所謂幸有舟楫遲得盡所歷妙也過澎浪磯小孤山二山東西相望小孤屬舒州宿松縣有戍兵凡江中獨山如金山焦山落星之類皆名天下然峭拔秀麗皆不可與小孤比自數十里外望之碧峯巖然孤起上干雲霄已非它山可擬愈近愈秀冬夏晴雨姿態萬變信造化之尤物也但祠宇極於荒殘若稍飾以樓觀亭榭與江山相發揮自當高出金山之上矣廟在山之西麓頌曰惠濟神曰安濟夫人紹興初張魏公自湖湘還嘗加營葺有碑載其事又有別祠在澎浪磯屬江州彭澤縣三面臨江倒影水中亦占一山之勝舟過磯雖無風亦浪湧蓋以此得名也昔人詩有舟中估客莫漫狂小姑前年嫁彭郎之句傳者因謂小孤廟有彭郎像澎浪廟有小姑像實不然也晚泊沙夾距小孤一里微雨復以小舫遊廟中南望彭澤都昌諸山煙雨空濛鷗鷺滅沒極登臨之勝徙倚久之而歸方立廟門有俊鶻搏水禽掠江東南去甚可壯也廟祝云山有棲鶻甚多

二日早行未二十里忽風雲騰湧急繫纜俄復開霽遂行泛彭蠡口四望無際乃知太白開帆入天鏡之句爲妙始見廬山及大孤大孤狀類西梁雖不

可擬小姑之秀麗然小孤之旁頗有沙洲葭葦大孤則四際渺瀰皆大江望之如浮水面亦一奇也江自湖口分一支爲南江蓋江西路也江水渾濁每汲用皆以杏仁澄之過夕乃可飲南江則極清澈合處如引繩不相亂晚抵江州州治德化縣卽唐之潯陽縣柴桑栗里皆其地也南唐爲奉化軍節度今爲定江軍岸土赤而壁立東坡先生所謂舟人指點岸如頰者也泊滄浦水亦甚清不與江水亂自七月二十六日至是首尾財六日其間一日阻風不行實以四日半泝流行七百里云

三日移泊琵琶亭見知州左朝請郎周昇強仲通判左朝散郎胡适發運使戶部侍郎史正志志道發運司幹辦公事程垣履道察推左支林郎蔡哉定夫始得夔州公移

四日遊天慶觀李太白詩所謂潯陽紫極宮也蘇黃詩刻皆不復存太白詩有一石亦近時俗書見觀主李守智問玉芝亦不能奮觀皆古屋初不更兵燹而遺迹掃地獨太清殿老君像乃唐人所塑特爲奇古真人女真仙官力士童子各二軀又有唐明皇帝金銅像衣冠如道士而氣宇粹穆有五十年安享太平富貴氣象李守智者滁州來安人自言家故富饒遇亂棄家爲道人大將岳飛以度牒與之始爲道士至今畫岳氏父子事之史志道招飲於發運廨中登高遠亭望廬山天氣澄霽諸峯盡見志道出新鼓鑄鐵錢

五日郡集於庾樓樓正對廬山之雙劍峯北臨大江氣象雄麗自京口以西登覽之地多矣無出庾樓右者樓不甚高而覺江山煙雲皆在几席間真絕景也庾亮嘗爲江荆豫州刺史其實則治武昌若武昌南樓名庾樓猶有理今江州治所在晉特柴桑縣之溢口關耳此樓附會甚明然白樂天詩固已云潯陽欲到思無窮庾亮樓南溢口東則承誤

亦久矣張芸叟南遷錄云庾亮鎮潯陽經始此樓其誤尤甚

六日甲夜有大燈毬數百自湓浦蔽江而下至江面廣處分散漸遠赫赫然如繁星麗天土人云此乃一家放五百碗以禳災祈福蓋江鄉舊俗云

七日住廬山小憩新橋市蓋吳蜀大路市肆壁間多蜀人題名並溪喬木往往皆三二百年物蓋山之麓也自江州至太平興國宮三十里此適當其半是日車馬及徒行者憧憧不絕云上觀蓋往太平宮焚香自八月一日至七日乃已謂之白蓮會蓮社本遠法師遺迹舊傳遠公嘗以一日借道流故至今太平宮歲以爲常東林寺亦自作會然來者反不若太平之盛亦可笑也晚至清虛菴菴在撥雲峯下皇甫道人所居皇甫名坦嘉州人出遊旁郡獨見其弟子曹彌深登紹興煥文閣寶藏光堯皇帝御書又有神泉清虛堂皆宸翰題榜宿清虛西室曹君置酒堂中炙鹿肉甚珍酒尤清醇夜寒可附火

渭南文集卷第四十五

渭南文集目錄
卷第四十六

入蜀記 八月八日起二十六日止

渭南文集卷第四十六

入蜀記

八日早由山路至太平興國宮門庭氣象極闊壯正殿爲九天采訪使者像袞冕如帝者舒州灊山靈仙觀祀九天司命真君而采訪使者爲之佐故南唐名靈仙曰丹霞府太平曰通玄府崇奉有自來矣至太宗皇帝時嘗遣中使送泥金絳羅雲鶴幘仍命三年一易神宗皇帝時又加封應元保運真君及賜塗金殿額兩壁圖十真人本吳生筆建炎中李成何世清二盜以廬山爲巢宮屋焚蕩無餘先是山中有太一宮摹吳筆於殿廡及太平再興復摹取太一本所託非善工無復髣髴憩於雲無心堂蓋冷翠亭故趾也溪聲如大風雨至使人毛骨寒慄一宮之最勝處也采訪殿前有鍾樓高十許丈三層累塼所成不用一木而欄楯暈飛雖木工之良者不能加也但鍾爲塼所揜蔽聲不甚揚亦是一病觀主胡思齊云此一樓爲費三萬緡鍾重二萬四千餘斤又有經藏亦佳扁曰雲章瓊室有古趣爲勝也遂至東林太平興龍寺寺正對香爐峯峯分一支東行自北而西環合四抱有如城郭東林在其中相地者謂之倒掛龍格寺門外虎溪本小澗比年蠶以塼但若一溝無復古趣予勸其主僧法才去塼使少近自然不知能用吾言否食已羨觀音泉啜茶登華嚴羅漢閣閣與盧舍閣鍾樓鼎峙皆極天下之壯麗雖閩浙名藍所不能逮遂至上方五杉閣舍利塼白公草堂上方者自寺後支徑穿松陰躡石磴而上亦不甚高五杉閣前舊有老杉五本傳以爲晉時物白傳所謂大十尺圍者今又數百年其老可知矣近歲主僧了然輒伐去殊可惜也塼中作如來示寂像本宋佛馱

跋陀尊者自西域持舍利五粒來葬於此草堂以白公記考之略是故處三間兩注亦如記所云其他如瀑水蓮池亦皆在高風逸韻尚可想見白公嘗以文集留草堂後屢亡逸真宗皇帝嘗令崇文院寫技包以班竹帙送寺建炎中又壞於兵今獨有姑蘇版本一帙備故事耳草堂之旁又有一故趾云是王子醇樞密養基蓋東林爲禪苑始於王公而照覺禪師常總實第一祖總公有塑像殿重

英特人也宿東林

九日至晉慧遠法師祠堂及神運殿焚香憩官廳堂中有耶舍尊者劉遺民等十八人像謂之十八賢遠公之側又有一人執軍持待立謂之辟蛇童子傳云東林故多蛇此童子盡拾取投之斬州神運殿本龍潭深不可測一夕鬼神塞之且運良材以作此殿皆不知實否也然神運殿三字唐相裴休書則此說亦久矣官廳重堂邃廡廚廢備設壁間有張文潛題詩寺極大連日遊歷猶不能徧唐碑亦甚多惟顏魯公題名最爲時所傳又有聰明泉在方丈之西卓錫泉在遠公祠堂後皆久廢不汲不可食爲之太息食已游西林乾明寺西林在東林之西二林之間有小市曰雁門市傳者以爲遠公雁門人老而懷故鄉遂髣髴雁門邑里作此市漢作新豐之比也西林本晉江州刺史陶範捨地建寺紹興十五年間方爲禪居福小非東林比又絕弊壞主僧仁聰閩人方漸興葺然流泉泠泠環遶庭際殊有野趣正殿釋迦像著寶冠他處未見僧云唐塑也殿側有慧永法師祠堂永公蓋遠公之兄像下一虎偃伏又有一居士立侍不知何人方丈後有塼塼不甚高制度古朴予登二級而止東廂有小閣曰待賢蓋往時館客之地今亦頽弊東西林寺舊額皆牛奇章八分書筆力極渾厚西林亦有顏魯公題名書家以爲二林題名顏書

之冠冕也舊聞廬山天池墀墻初成有僧施經二匣未幾墻震一角經亦失所在是日因登望以問僧僧云誠然或謂經乃刺血書故致此異又云今年天池火尺椽不遺蓋旁壑火所及也晚復取太平宮路還江州小憩於新亭距州二十五里過董真人煉丹井汲飲味亦佳董真人者奉也

十日史志道餉谷簾水數器真絕品也甘腴清冷具備衆美前輩或斥水品以爲不可信水品固不必盡當然谷簾卓然非惠山所及則亦不可誣也水在廬山景德觀晚別諸人連夕在山中極寒可擁爐比還舟秋暑殊未艾終日揮扇

十一日解舟吳發幹約待夔州書因小留江口望廬山自到江州至是凡十日皆晴秋高氣清長空無纖雲甚宜登覽亦客中可喜事也泊赤沙湖口東北望猶見廬山老杜潭州道林詩云殿腳插入赤沙湖此湖當在湖南然岳州華容縣及此皆有赤沙湖蓋江湖間地名多同猶赤壁也

十二日江中見物有雙角遠望正如小犢出沒水中有聲晚泊騰騰狀隔江大山中有火兩點若鏡開闔久之問舟人皆不能知或云蛟龍之目或云靈芝丹藥光氣不可得而詳也

十三日至富池昭勇廟以壺酒特豕謁昭毅武惠遺愛靈顯王神神吳大帝時折衝將軍甘興霸也與霸嘗爲西陵太守故廟食於此開寶中旣平江南增江淮神祠封爵始封褒國公宣和中進爵爲王建炎中大盜張遇號一窩蜂擁兵過廟下相率卜攻一攻騰空中不下一攻躍出戶外羣盜惶恐引去未幾遂敗大將劉光世以聞復詔加封岳飛爲宣撫使大葺祠宇江上神祠皆不及也門起大樓曰卷雲有釘洲正對廟故廟雖俯大江而可泊舟釘洲者以銳下得名神妃封順祐夫人神二子封紹威紹靈侯神女封柔懿夫人皆有像而後殿復

有王與妃像偶坐祭享之盛以夜繼日廟祝歲輸官錢千二百緡則神之靈可知也舟人云若精虔致禱則神能分風以應往來之舟廡下有關雲長像雲長不應祀於興霸之廟者豈各忠所事神靈共食皆可以無媿邪徹奠自祠後步至旌教寺寺爲酒務及酒官廨像設斂置一屋盡逐去僧輩亦事之已甚者富池蓋隸興國軍

十四日曉雨過一小石山自頂直削去半與餘姚江濱之蜀山絕相類拋大江過一木棧廣十餘丈長五十餘丈上有三四十家妻子雞犬白碓皆具中爲阡陌相往來亦有神祠素所未覩也舟人云此尚其小者耳大者於棧上鋪土作蔬圃或作酒肆皆不復能入夾但行大江而已是日逆風挽船自平旦至日昧纔行十五六里泊劉官磯旁蘄州界也兒輩登岸歸云得小徑至山後有陂湖渺然蓮芰甚富泓湖多木芙蓉數家夕陽中蘆蓼茅舍宛有幽致而寂然無人聲有大梨欲買之不可得湖中小艇采菱呼之亦不應更欲窮之會見道旁設機疑有虎狼遂不敢往劉官磯者傳云漢昭烈入吳嘗機舟於此晚觀大龜浮沉水中

十五日微陰西風益勁挽船尤艱自富池以西泓江之南皆大山起伏如濤頭山麓時有居民往往作棚持弓矢伏其上以伺虎過龍眼磯江中拳石耳磯旁山上有龍祠哺後得使風次斬口鎮居民繁錯蜀舟泊岸下甚衆監稅秉義郎高世棟來舊在京口識之言此鎮歲課十五萬緡雁翅歲課二十六萬緡夜與諸子登岸臨大江觀月江面遠與天接月影入水蕩搖不定正如金虬動心駭目之觀也是日買熟藥於斬口市藥貼中皆有煎煮所須如薄荷烏梅之類此等皆客中不可倉卒求者藥肆用心如此亦可嘉也

十六日過新野夾有石瀨茂林始聞秋鶯沙際水牛

至多往往數十爲羣吳中所無也地屬與國軍大
冷縣當是土產所宜爾晚過道士磯石壁數百尺
色正青了無竅穴而竹樹迸根交絡其上蒼翠可
愛自過小孤臨江峯嶂無出其右磯一名西塞山
卽玄真子漁父辭所謂西塞山前白鷺飛者李太
白送弟之江東云西塞當中路南風欲進船必在
荆楚作故有中路之句張文潛云危磯插江生石
色擘青玉殆爲此山寫真又云已逢斌媚散花峽
不泊艤危道士磯蓋江行惟馬當及西塞最爲湍
險難上拋江泊散花洲洲與西塞相直前一夕月
猶未極圓蓋望正在是夕空江萬頃月如紫金盤
自水中涌出平生無此中秋也

十七日過回風磯無大山蓋江濱石磧耳然水急浪
湧舟過甚難過蘭溪東坡先生所謂山下蘭芽短
浸谿者買鹿肉供膳晚泊巴河口距黃州二十里
一市聚也有馬祈寺吳大帝刑馬壇傳云吳攻壽
春刑白馬祭江神於此自蘭谿而西江面尤廣山
阜平遠兩日皆逆風舟人以食盡欲來巴河糴米
極力牽挽日皆行八九十里蘇黃門謫高安東坡
先生送至巴河卽此地也張文潛亦有巴河道中
詩云東南地缺天連水春夏風高浪捲山

十八日食時方行晡時至黃州州最僻陋少事杜牧
之所謂平生睡足處雲夢澤南州然自牧之王元
之出守又東坡先生張文潛謫居遂爲名邦泊臨
臯亭東坡先生所嘗寓與秦少游書所謂門外數
步卽大江是也煙波渺然氣象疎豁見知州右朝
奉郎直祕閣楊由義通判右奉議郎陳紹復州治
陋甚廳事僅可容數客伴居差勝晚移舟竹園步
蓋臨臯多風濤不可夜泊也黃州與樊口正相對
東坡所謂武昌樊口幽絕處也漢昭烈用吳魯子
敬策自當陽進住鄂縣之樊口卽此地也
十九日早游東坡自州門而東岡壟高下至東坡則

地勢平曠開豁東起一壟頗高有屋三間一龜頭
曰居士亭亭下面南一堂頗雄四壁皆畫雪堂中
有蘇公像烏帽紫裘橫按筇杖是爲雪堂堂東大
柳傳以爲公手植正南有橋勝曰小橋以莫忘小
橋流水之句得名其下初無渠澗遇雨則有涓流
耳舊止片石布其上近輒增廣爲木橋覆以一屋
頗敗人意東一井曰暗井取蘇公詩中走報暗井
出之句泉寒澁齒但不甚甘又有四望亭正與雪
堂相直在高阜上覽觀江山爲一郡之最亭名見
蘇公及張文潛集中坡西竹林古氏故物號南坡
今已殘伐無幾地亦不在古氏矣出城五里至安
寺國亦蘇公所嘗寓兵火之餘無復遺迹惟堯寺
茂林啼鳥似猶有當時氣象也郡集於棲霞樓本
太守閻丘孝終公顯所作蘇公樂府云小舟橫截

春江臥看翠壁紅樓起正謂此樓也下臨大江煙
樹微茫遠山數點亦佳處也樓頗華潔先是郡有
慶瑞堂謂一故相所生之地後毀以新此樓酒味
殊惡蘇公齋湯蜜汁之戲不虛發郡人何斯舉詩
亦云終年飲惡酒誰敢憎督郵然文潛乃極稱黃
州酒以爲自京師之外無過者故其詩云我初謫
官時帝問司酒神曰此好飲徒聊給酒養真去國
一千里齊安酒最醇失火而得兩仰戴天公仁豈
文潛謫黃時適有佳匠乎循小徑窺州宅之後至
竹樓規模甚陋不知當王元之時亦止此邪樓下

稍東卽赤壁磯亦荊岡爾略無草木故韓子蒼待
制詩云豈有危巢與栖鶻亦無陳迹但飛鷗此磯
圖經及傳者皆以爲周公瑾敗曹操之地然江上
多此名不可考質李太白赤壁歌云烈火張天照
雲海周瑜於此敗曹公不指言在黃州蘇公尤疑
之賦云此非曹孟德之困於周郎者乎樂府云故
壘西邊人道是當日周郎赤壁蓋一字不輕下如
此至韓子蒼云此地能令阿瞞走則真指爲公瑾

之赤壁矣又黃人實謂赤壁曰赤鼻尤可疑也晚復移舟菜園步又遠竹園三四里蓋黃州臨大江了無港澳可泊或云舊有澳郡官厭過客故塞之二十日曉離黃州江平無風挽船正自赤壁磯下過多奇石五色錯雜粲然可愛東坡先生怪石供是也挽行十四五里江面始稍狹隔江岡阜延袤竹樹菽蒨漁家相映幽邃可愛復出大江過三江口極望無際泊咸磯港

二十一日過雙柳夾回望江上遠山重複深秀自離黃雖行夾中亦皆曠遠地形漸高多種菽粟蕎麥之屬晚泊楊羅洲大隄高柳居民稠衆魚賤如土百錢可飽二十口又皆巨魚欲覓小魚飼猫不可得

二十二日平日微雨過青山磯多碎石及淺灘晚泊白楊夾口距鄂州三十里陸行止十餘里居民及泊舟甚多然大抵皆軍人也

二十三日便風掛帆自十四日至是始得風食時至鄂州泊稅務亭買船客舫不可勝計銜尾不絕者數里自京口以西皆不及李太白贈江夏韋太守詩云萬舸此中來連帆過揚州蓋此郡自唐爲衝要之地夔州逐兵來參見知州右朝奉郎張郊之彥轉運判官右朝奉大夫謝師稷市邑雄富列肆繁錯城外南市亦數里雖錢塘建康不能過隱然一大都會也吳所都武昌乃今武昌縣此州在吳名夏口亦要害故周公瑾求以精兵進住夏口而晉武帝亦詔王濬唐彬既定巴丘與胡奮王戎共平夏口武昌順流長驚也自江州至此七百里沔流雖日得便風亦須三四日韓文公云益城去鄂

諸風便一日耳過矣蓋退之未嘗行此路也二十四日早謝漕招食於漕園光華堂依山亭館十餘不甚葺晚郡集於奇章堂以唐牛思黯嘗爲武昌節度使也

二十五日觀大軍教習水戰大艦七百艘皆長二三十丈上設城壁樓櫓旗幟精明金鼓鞀鞞破巨浪往來捷如飛翔觀者數萬人實天下之壯觀也

二十六日與統紆同遊頭陀寺寺在州城之東隅石城山山嶺繞如伏蛇自西巨東因其上爲城缺壞僅存州治及漕司皆依此山寺毀於兵火沐僧舜

廣住持三十年興葺略備自方丈西北躡支徑至絕頂舊有奇章亭今已廢四顧江山井邑靡有遺者李太白江夏贈韋南陵詩云頭陀雲外多僧氣

正謂此寺也黃魯直亦云頭陀全盛時宮殿梯空級藏殿後有南齊王簡棲碑唐開元六年建蘇州刺史張庭圭溫玉書韓熙載撰碑陰徐錯題額最

後云唐歲在己巳武昌軍節度觀察留後知軍州事楊守忠重立前鄂州唐年縣主簿祕書省正字

韓夔書碑陰云乃命猶子夔正其舊本而刊寫之以是知夔爲熙載兄弟之子也碑字前後一手又

作溫字不全蓋南唐尊徐溫爲義祖而避其名則此碑蓋夔重書也碑陰又云皇上鼎新文物教被

華夷如來妙旨悉已徧窮百代文章罔不備舉故是寺之碑不言而與按此碑立於己巳歲當皇朝

之開寶二年南唐危蹙日甚距其亡六年爾熙載大臣不以覆亡爲懼方且言其主鼎新文物教被

華夷固已可怪又以窮佛旨舉遺文及輿是碑爲盛誇誕妄謬真可爲後世發笑然熙載死李主猶

恨不及相之君臣之感如此雖欲久存得乎唐制節度使不在鎮而以副大使或留後居任則云知

節度事此云知軍州事蓋漸變也唐年縣本故唐時名梁改曰臨夏後唐復晉又改臨江然歷五代

鄂州未嘗屬中原皆遙改耳故此碑開寶中建而猶曰唐年也至江南平始改崇陽云簡棲爲此碑

駢儷卑弱初無過人世徒以載於文選故貴之耳自漢魏之間駸駸爲此體極於齊梁而唐尤貴之

天下一律至韓吏部柳州大變文格學者翕然慕從然駢儷之作終亦不衰故熙載錯號江左辭宗而拳拳於簡棲之碑如此本朝楊劉之文擅天下傳夷狄亦駢儷也及歐陽公起然後掃蕩無餘後進之士雖有工拙要皆近古如此碑者今人讀不能終篇已坐睡矣而況効之乎則歐陽氏之功可謂大矣若魯直云唯有簡棲碑文章巋然立蓋戲也

渭南文集卷第四十六

渭南文集目錄
卷第四十七

入蜀記 八月二十七日起十月五日止

渭南文集卷第四十七

入蜀記

二十七日郡集於南樓在儀門之南石城上一曰黃鶴山制度閎偉登望尤勝鄂州樓觀為多而此獨得江山之要會山谷所謂江東湖北行畫圖鄂州南樓天下無是也下闕南湖荷葉彌望中為橋曰廣平其上皆列肆兩旁有水閣極佳但以賣酒不可住山谷云凭欄十里芙蓉香謂南湖也是日早微雨晚晴

二十八日同章冠之秀才甫登石鏡亭訪黃鶴樓故址石鏡亭者石城山一隅正枕大江其西與漢陽相對止隔一水人物草木可數唐沔州治漢陽縣故李太白沔州泛城南郎官湖詩序云白遷於夜郎遇故人尚書郎張謂出使夏口沔州牧杜公漢陽令王公觴於江城之南湖其後沔州廢漢陽以縣隸鄂州周世宗平淮南得其地復以為軍太白詩云誰道此水廣狹如一疋練江夏黃鶴樓青山漢陽縣大語猶可聞故人難可見形容最妙黃魯直嘗征江夏縣睡起漢陽城亦此意老杜有公安送李晉肅入蜀余下沔鄂及登舟將適漢陽詩而卒於未水可恨也漢陽負山帶江其南小山有僧寺者大別山也又有小別謂之二別云黃鶴樓舊傳費禕飛升於此後忽棄黃鶴來歸故以名樓號為天下絕景崔灝詩最傳而太白奇句得於此者尤多今樓已廢故址亦不復存問老吏云在石鏡亭南樓之間正對鸚鵡洲猶可想見其地樓榜李監篆石刻獨存太白登此樓送孟浩然詩云孤帆遠映碧山盡惟見長江天際流蓋帆檣映遠山尤可觀非江行久不能知也復與冠之出漢陽門遊仙洞止是石壁數尺皆直裂無洞穴之狀舊傳有仙人隱其中嘗啓洞出游老兵遇之得黃金數餅

後化為石東坡先生有詩紀其事初不云所遇何人且太白固已云頗聞列仙人於此學飛術一朝向蓬海千載空石室今鄂人謂之呂公洞蓋流俗附會也有道人澶州人結廬洞側設呂公像其中洞少南即石鏡山麓巖頭石也色黃赤皴駁了不能鑑物可謂浪得名者由江濱堤上還船民居市肆數里不絕其間復有巷陌往來憧憧如織蓋四方商賈所集而蜀人為多

二十九日早有廣漢僧世全左縣僧了證來附從人舟日昃移舟江口回望堤上樓閣重複燈火歌呼夜分乃已招警趙隨為靈照視脈

三十日黎明離鄂州便風掛帆沿鸚鵡洲南行洲上有茂林神祠遠望如小山洲蓋禰正平被殺處故太白詩云至今芳洲上蘭蕙不敢生梁王僧辯擊鄧陵王綸軍至鸚鵡洲即此地也自此以南為漢水禹貢所謂蟠冢導漾東流為漢者水色澄澈可鑑太白云楚水清若空蓋言此也過謝家磯金雞狀磯不甚高而石皆橫裂如累層巒得縮項鱸魚重十斤狀中有聚落如小縣出鱸魚居民率以賣鮓為業晚泊通濟口自此入沌沌讀如篆字書云水名在江夏過九月則沌涸不可行必由巴陵至荆渚

九月一日始入沌實江中小夾也過新潭有龍祠甚華潔自是遂無復居人兩岸皆葭葦彌望謂之百里荒又無挽路舟人以小舟引百丈入夜財行四十五里泊叢葦中平時行舟多於此遇盜通濟巡檢持兵來警邏不寐達旦

二日東岸葦稍薄缺時見大江渺瀰蓋巴陵路也曠時次下郡始有二十餘家皆業漁釣蘆藩茅屋宛有幽致魚尤不論錢自此始復有挽路登舟背望竟陵遠山泊白有莊居數家門外皆古柳侵雲三日自入沌食無菜是日始得菘及蘆服然不肯斷

根皆刈葉而已過八疊狀口皆有民居晚泊歸子
係亦有十餘家多桑柘榆柳

四日平日始解舟舟人云自此陂澤深阻虎狼出沒
未明而行則挽卒多爲所害是日早見舟人焚香

祈神云告紅頭須小使頭長年三老莫令錯呼錯
喚問何謂長年三老云梢工是也長讀如長幼之

長乃知老杜長年三老長歌裏白晝攤錢高浪中
之語蓋如此因問何謂攤錢云博也按梁冀能意

錢之戲注云卽攤錢也則攤錢之爲博亦信矣過
網步有二十餘家在夕陽高柳中短籬晒罾小艇

往來正如畫圖所見沌中之最佳處也泊畢家池
地勢爽塏居民頗衆有一二家雖茆茨結廬而窗

戶整潔藩籬堅壯舍傍有果園甚盛蓋亦一聚之
雄也與諸子及二僧步登岸遊廣福永固寺圓然

無一人東偏白雲軒前橙方結實雖小而極香相
與烹茶破橙抵莫乃還舟中畢家池蓋屬復州玉

沙縣滄浪鄉云
五日泊紫湄

六日過東場址水皆茂竹高林隄淨如掃雞犬閑暇
鳧鴨浮沒人往來林樾間亦有臨渡喚船者使人

恍然如造異境舟人云皆村豪園廬也泊雞鳴
七日泊澗江

八日早次江陵之建寧鎮蓋沌口也晉王澄棄荊州
別駕郭舒不肯從澄東下乃留屯沌口陳侯安都

討王琳至沌口皆此地也阻風大魚浮水中無數
凡行沌中七日自是泛江入石首縣界夜觀隔江

燒蘆場煙焰巨天如火城光照舟中皆赤
九日早謁后土祠道旁民屋苦茆皆厚尺餘整潔無

一枝亂挂帆拋江行三十里泊槍子磯江濱大山
也自離鄂州至是始見山買羊置酒蓋村步以重

九故屠一羊諸舟買之俄頃而盡求菊花於江上
人家得數枝芬馥可愛爲之頽然徑醉夜雨極寒

始覆絮衾

十日阻風雨遣小舟橫絕江面至對岸買肉食得大
魚之半又得一烏牡雞不忍殺畜於舟中俄有村

翁持莢頭一束來餉不肯受直遣人先之夔晚晴
開船窗觀月

十一日舟行望西南一角水與天接舟人云是爲潛
軍港古嘗潛軍伺敵於此遙見港中有兩點正黑

疑其遠樹則下不屬地久之漸近可辨蓋二千五
百斛大舟也又有水禽雙浮江中色白類鵝而大

楚人謂之天鵝飛鷺絕高有弋得者味甚美或曰
卽鵝也泊三江口水淺舟行甚難自此遂不復有

山太白詩山隨平野盡江入大荒流蓋荆渚所作
也

十二日過石首縣不入石首自唐始爲縣在龍蓋山
之麓下臨漢水亦形勝之地杜子美有送石首薛

明府詩卽此邑也泊藕池
十三日泊柳子夜過全證二僧舟中聽誦梵語般若
心經此經惟蜀僧能誦

十四日次公安古所謂油口也漢昭烈駐軍始更今
名規模氣象甚壯兵火之後民居多茆竹然茆屋

尤精緻可愛井邑亦頗繁富米斗六七十錢知縣
右儒林郎周謙孫來湖州人遊二聖報恩光孝禪

寺二聖謂青葉髻如來妻至德如來也皆示鬼神
力士之形高二丈餘陰威凜然可畏正殿中爲釋

迦右爲青葉髻號大聖左爲妻至德號二聖三像
皆南面予按藏經駒字函娑羅浮殊童子成道爲

青葉髻如來青葉髻如來再出世爲樓至如來則
二如來本一身耳有碑言邑人一夕同夢二神人

言我青葉髻妻至德如來也有二巨木在江干我
所運者俟鄴行者來令刻爲我像已而果有人自

稱鄴行者又善肖像邑人欣然請之像成人皆謂
醜類所夢然碑無年月不知何代也長老祖珠南

平軍人寺後有廢城髣髴尚存圖經謂之呂蒙城然老杜乃曰地曠呂蒙營江深劉備城蓋玄德子明皆屯於此也老杜曉發公安詩注云數月憩息此縣按公移居公安詩云水煙通徑草秋露接園葵而留別公安太易沙門詩云沙村白雪仍含凍江縣紅梅已放春則是以秋至此縣莫冬始去其曰數月憩息蓋爲此也泊弭節亭馴鷗低飛往來竟日不去

十五日周令說縣本在近北枕漢水沙虛岸推漸徙而南今江流乃昔市邑也又云縣有五鄉然共不及二千戶地曠民寡如此民耕尤苦隄防數壞歲歲增築不止晚攜家再遊二聖寺衆寮有維摩刻木像甚佳云沙市工人所爲也方丈西有竹軒頗佳珠老說五祖法演禪師初住四面山孑然獨處凡二年始有一道士來問道乃請作知事又三年僧寶良來與道士朝夕參叩皆得法於是演公之道灑爲人知而四方學者始稍有至者雖其後門人之盛稱天下然終身不過數十衆珠聞此於其師已養顏禪師荆州絕無禪林惟二聖而已然蜀僧出關必走江浙回者又已自謂有得不復參叩故語云下江者疾走如煙上江者鼻孔撩天徒勞他二佛打供了不見一僧坐禪

十六日過白湖渺然無津拋江至升子舖有天鵝數百翔泳水際日入泊沙市自公安至此六十里自此至荆南陸行十里舟不復進矣老杜詩云買薪猶白帝鳴鶻已沙頭劉夢得云沙頭檣干上始見春江闊皆謂此也

十七日日入後遷行李過嘉州趙青船蓋入峽船也沙市堤上居者大抵皆蜀人不然則與蜀人爲婚姻者也

十八日見知府資政殿學士劉恭父珙通判右奉議郎權嗣衍左宣教郎陳孺荆南圖經以爲楚之郢

都梁元帝亦嘗都焉唐爲江陵府荆南節度今因之然牧守署銜但云知荆南軍府與永興河陽正

同初無意義但訟舊而已

十九日郡集於新橋馬監監在西門外四十里自出城卽黃茅彌望每十餘里有村墮數家而已道遇數十騎縱獵獲狐兔皆繫鞍上割鮮藉艸而飲云襄陽軍人也是日極寒如窮冬土人云此月初已嘗有雪

二十日倒檣竿立艣牀蓋上峽惟用艣及百丈不復張帆矣百丈以巨竹四破爲之大如人臂予所乘

千六百斛舟凡用艣六枝百丈兩車

二十一日劉帥丁內艱分送兵之半負肩輿自山路先歸夔州是日重霧四塞

二十二日五鼓赴能仁院建會慶節道場中夜後舟人祀峽神屠一豨

二十三日奠劉帥母安定郡太夫人卓氏劉帥受吊禮與吳人同

二十四日見左朝奉郎湖北安撫司主管機宜文字牛達可右奉議郎安撫司幹辦公事湯衡右朝奉郎安撫同幹辦公事趙蘊

二十五日右文林郎知歸州興山縣高祁來

二十六日修船始畢骨肉入新船祭江瀆廟用壺酒特豕廟在沙市之東三四里神曰昭靈孚應咸惠

廣源王蓋四瀆之一最爲典祀之正者然兩廡淫祠尤多蓋荆楚舊俗也司法參軍右迪功郎王師

點錄其叔祖君儀待制設卦講義來君儀嚴州人師事先大父精於易然遺書不傳講義止存一篇而已然亦其少作也

二十七日解舟擊鼓鳴艣舟人皆大噪擁堤觀者如堵牆泊新河口距沙市三四里蓋蜀人修船處

二十八日泊方城有嘉州人王百一者初應募爲船之招頭招頭蓋三老之長顧直差厚每祭神得昨

肉倍衆人既而船戶趙清改用所善程小八爲招頭百一失職快快又不決去遂發狂赴水予急遣人拯之流一里餘三汲三踊僅得出一招頭得喪能使人至死況大於此者乎

二十九日阻風

十月一日過瓜洲壩倉頭百里洲泊沱滙皆聚落竹樹鬱然民居相望亦有村夫子聚徒教授羣童見船過皆挾書出觀亦有誦書不輟者沱江別名詩江有沱禹貢岷山導江東別爲沱是也滙則爾雅所謂春秋夏有水冬無水曰滙也

二日泊桂林灣全證二僧陸行來云沿路民居大抵多四方人士著財十一也舟人殺猪十餘口祭神謂之開頭

三日舟人分胙行差晚與兒輩登隄觀蜀江乃知李太白荆門望蜀江詩江色綠且明爲善狀物也自離槍子磯至是始望見巴山山在松滋縣泊雅子口蓋松滋枝江兩邑之間松滋晉縣自此入蜀江枝江唐縣古羅國也江陵九十九洲在焉晉柳約之羅述甄季之聞桓玄死自白帝至枝江卽此地也歐陽文忠公有枝江山行五言二十四韻蓋文忠赴夷陵時自此陸行至峽州故其望州坡詩云崎嶇幾日山行倦卻喜坡頭見峽州雅子口一名松滋渡劉賓客有詩云巴人淚應援聲落蜀客船從爲道回

四日過楊木寨蓋松滋有四寨曰楊木車羊高平稅家云治龍灣

五日過白羊市蓋峽州宜都縣境上宜都唐縣也謁張文忠公天覺墓殘伐墓木橫道幾不可行天覺之子直龍圖閣茂已卒二孫一有官病狂易一白丁也初作墓江濱已而不果葬改葬山間今墓是也而舊墓亦不復毀啓隧道出入中可容數十人坐有道人結屋其旁守之道人出一石刻艸書云

莫將外物尋奇寶須問真師決汞鉛寄入瓊張子高鍾離權始自王屋遊都下弟子浮玉山人來乞此字今又將西還丹元子再請書卷之末紹聖元年仲冬望日權卽世所謂鍾離先生子高卽天覺丹元子卽東坡先生與之隣倡者後有魏泰道輔跋云天覺修黃籙醮法成浮玉山人謂之曰上天錄公之功爲須彌山入瓊洞主宜刻印謝帝而佩之天覺不以爲信故浮玉又出鍾離公書爲證後丹元子又爲天覺求書卷末又有徐注者跋云天覺舟過真州方出謁有布衣幅巾者徑入舟中索筆大書閑人呂洞賓來謁張天覺十字擲筆卽去而天覺適歸墨猶未乾注真州人云親見之墳前碑樓壁間有詩一篇云秋風十驛望台星想見冰壺照坐清霖雨已回公日駕挽鬚聊聽野王箏三朝元老心方壯四海蒼生耳已傾白髮故人來一別卻歸林下看昇平蓋魏道輔贈天覺詩後人所題者唐立夫舍人亦有一詩末句云無碑堪墮淚著句與招魂宜都知縣右文林郎呂大辨來泊赤崖

渭南文集目錄
卷第四十八

入蜀記 十月六日起二十七日止

渭南文集卷第四十八

入蜀記

六日過荆門十二碛皆高崖絕壁巖突兀則峽中之險可知矣過碛望五龍及雞籠山嵯峨正如夏雲之奇峯荆門者當以險固得名碛上有石穴正方高可通人俗謂之荆門則妄也晚至峽州泊至喜亭下峽州在唐為硤州後改峽而印文則為陝州元豐中郎官何洵直建言陝與陝相亂請改鑄印文從山事下少府監而監丞歐陽發言湖北之陝州從阜從夾夾從兩入陝西之陝州從阜從夾夾從兩人偏旁不同本不相亂恐四方謂少府監官皆不識字當時朝士之議皆是發而卒從洵直言改鑄云至喜亭記歐陽公撰黃魯直書

七日見知州右朝奉大夫葉安行字履道以小舟遊西山甘泉寺竹橋石磴甚有幽趣有靜練洗心二亭下臨江山頗疎豁法堂之右小徑數十步至一泉曰孝婦泉謂姜詩妻龐氏也泉上亦有龐氏祠然歐陽文忠公不以為信故其詩曰叢祠已廢姜祠在事迹難尋楚語訛又此篇首章云江上孤峯蔽綠蘿初讀之但謂孤峯蒙藤蘿耳及至此乃知山下為綠蘿谿也又至漢景帝廟及東山寺景帝不知何以有廟於此歐陽公為令時有祈雨文在集中東山寺亦見歐陽公詩距望京門五里寺外一亭臨小池有山如屏環之頗佳亭前冬青及柏皆百餘年物遂至夷陵縣令見縣左從政郎胡振廳事東至喜堂郡守朱虞部為歐陽公所築者已焚壞柱礎尚存規模頗雄深又東則祠堂亦簡陋肖像殊不類可歎聽事前一井相傳為歐陽公所浚水極甘寒為一郡之冠井旁一榭台抱亦傳為公手植晚郡集於楚塞樓遍歷爾雅臺錦障亭亭前海棠二本亦百年物爾雅臺者圖經以為郭景

純註爾雅於此又有絳雪亭取歐陽公千葉紅梨詩而紅梨已不存矣

八日五鼓盡解船過下牢關夾江千峯萬嶂有競起者有獨拔者有崩欲壓者有危欲墜者有橫裂者有直圻者有凸者有窪者有罅者奇怪不可盡狀初冬草木皆青蒼不彫西望重山如闕江出其間則所謂下牢谿也歐陽文忠公有下牢津詩云入峽山漸曲轉難山更多即此也繫船與諸子及證師登三游洞躡石磴二里其險處不可著腳洞大如三間屋有一穴通人過然陰黑峻險尤可畏嶺山腹偃僂自巖下至洞前差可行然下臨溪潭石壁十餘丈水聲恐人又一穴後有壁可居鍾乳歲久垂地若柱正當穴門上有刻云黃大臨第庭堅同辛絃子大方紹聖二年三月辛亥來遊旁石壁上刻云景祐四年七月十日夷陵歐陽永叔下缺一字又云判官丁下又缺數字丁者寶臣也字元珍今丁字下二字亦髣髴可見殊不類元珍字又永叔但曰夷陵不稱令洞外溪上又有一崩石偃仆刻云黃庭堅弟叔向子相姪檝同道人唐履來游觀辛亥舊題如夢中事也建中靖國元年三月庚寅按魯直初謫黔南以紹聖二年過此歲在乙亥今云辛亥者誤也泊石牌峽石穴中有石如老翁持魚竿狀略無少異

九日微雪過扇子峽重山相掩政如屏風扇疑以此得名登蝦蟆碛水品所載第四泉是也蝦蟆在山麓臨江頭鼻吻領絕類而背脊跑處尤逼真造物之巧有如此者自背上深入得一洞穴石色綠潤泉冷冷有聲自洞出垂蝦蟆口鼻間成水簾入江是日極寒巖嶺有積雪而洞中溫然如春碛洞相對稍西有一峯孤起侵雲名天柱峯自此山勢稍平然江岸皆大石堆積彌望正如濬渠積土狀晚次黃牛廟山復高峻村人來賣茶菜者甚眾其中

有婦人皆以青斑布帕首然頗白誓語音亦頗正
茶則皆如柴枝草葉苦不可入口廟靈感神封嘉
應保安侯皆紹興以來制書也其下卽無義難亂
石塞中流望之可畏然舟過乃不甚覺蓋操舟之
妙也傳云神佐夏禹治水有功故食於此門左右
各一石馬頗卑小以小屋覆之其右馬無左耳蓋
歐陽公所見也廟後叢木似冬青而非莫能名者
落葉有黑文類符篆葉葉不同兒輩亦求得數葉
歐詩刻石廟中又有張文忠一贊其詞曰壯哉黃
牛有大神力輦聚巨石百千萬億劍戟齒牙礮砲
江側壅激波濤險不可測威脅舟人駭怖失色到
羊鬪酒千載廟食張公之意似謂神聚石壅流以
脅人求祭饗使神之用心果如此豈能巍然廟食
千載乎蓋過論也夜舟人來告請無擊更鼓云廟
後山中多虎聞鼓則出

十日早以特豕壺酒祭靈感廟遂行過鹿角虎頭史
君諸灘水縮已三之二然湍險猶可畏泊城下歸
州稀歸縣界也與兒曹步沙上回望正見黃牛峽
廟後山如屏風疊嵯峨插天第四疊上有若牛狀
其色赤黃前有一人如著帽立者昨日及今早雲
冒山頂至是始見之因至白沙市慈濟院見主僧
志堅問地名城下之由云院後有楚故城今尚在
因相與訪之城在一岡阜上甚小南北有門前臨
江水對黃牛峽城西北一山蜿蜒回抱山上有伍
子胥廟大抵自荆以西子胥廟至多城下多奇石
如靈壁湖口之類

十一日過達洞灘難惡與骨肉皆棄轎陸行過難難
際多奇石五色粲然可愛亦有文成物象及符
書者猶見黃牛峽廟後山太白詩云三朝上黃牛
三算行太遲三朝又三算不覺鬢成絲歐陽公云
朝朝算算見黃牛徒使行人過此愁山高更遠望
猶見不是黃牛滯客舟蓋諺謂朝見黃牛暮見黃

牛一朝一算黃牛如故故二公皆及之歐陽公自
荆渚赴夷陵而有下牢三游及蝦蟆碓黃牛廟詩
者蓋在官時來游也故憶夷陵山詩云憶嘗祗吏
役鉅細悉經觀其後又云荒煙下牢戍百仞塞溪
漱蝦蟆噴水簾甘液勝飲酎亦嘗到黃牛泊舟聽
猿狖也晚泊馬肝峽口兩山對立修聳摩天略如
廬山江岸多石百丈縈絆極難過夜小雨

十二日早過東瀾灘入馬肝峽石壁高絕處有石下
垂如肝故以名峽其傍又有獅子巖巖中有一小
石蹲踞張頤碧草被之正如一青獅子微泉冷冷
自巖中出舟行急不能取嘗當亦佳泉也溪上又
有一峯孤起秀麗略如小孤山晚抵新灘登岸宿
新安驛夜雪

十三日舟上新灘由南岸上及十七八船底爲石所
損急遣人往拯之僅不至沉然銳石穿船底牢不
可動蓋舟人載陶器多所致新灘兩岸南曰官漕
平擊北曰龍門龍門水尤湍急多暗石官漕差可
行然亦多銳石故爲峽中最險處非輕舟無一物
不可上下舟人冒利以至此可爲戒云遊江濱北
廟廟正臨龍門其下石罅中有溫泉淺而不涸一
村賴之婦人汲水皆背負一全木盎長二尺下有
三足至泉旁以杓挹水及八分卽倒坐旁石束盎
背上而去大抵峽中負物率著背又多婦人不獨
水也有婦人負酒賣亦如負水狀呼買之長跪以
獻未嫁者率爲同心髻高二尺插銀釵至六隻後
插大象牙梳如手大

十四日留驛中晚以小舟渡江南登山至江濱南廟
新修未畢有一碑前進士曾華日撰言因山崩石
壅成此難害舟不可計於是著令自十月至二月
禁行舟知歸州尚書都官員外郎趙誠聞於朝疏
鑿之用工八十日而難害始去皇祐二年也蓋江
絕於天聖中至是而復通然難害至今未能悉去

若癸十二月正月水落石盡出時亦可併力盡鑿去鏡石然難上居民皆利於敗舟賤賣板木及帶留買賣必搖沮此役不則賂石工以爲石不可去須斷以必行乃可成又舟之所以敗皆失於重載當以大字刻石置驛前則過者必自懲創二者皆不可不講當以告當路者

十五日舟人盡出所載始能挽舟過灘然須修治遂易舟離新灘過白狗峽泊舟與山口肩輿遊玉虛洞去江岸五里許隔一溪所謂香溪也源出昭君村水味美錄於水品色碧如黛呼小舟以渡過溪又里餘洞門小纔袤丈既入則極大可容數百人宏敞壯麗如入大宮殿中有石成幢蓋幡旗芝草竹筍仙人龍虎鳥獸之屬千狀萬態莫不逼真其絕異者東石正圓如日西石半規如月予平生所見巖竇無能及者有熙寧中謝師厚岑巖起題名又有陳堯咨所作記敘此洞本末云唐天寶中獵者始得之比歸已夜風急不可秉燭炬然月明如晝兒曹與全師皆杖策相從殊不覺崖谷之險也十六日到歸州見知州右奉議郎賈選子公通判左朝奉郎陳端彥民瞻館於報恩光孝寺距城一里

許蕭然無僧歸之爲州纔二四百家負臥牛山臨江州前卽人鮪壘城中無尺寸平土灘聲常如暴風雨至隔江有楚王城亦山谷間然地比歸州差平或云楚始封於此山海經夏啓封孟除於丹陽城郭璞註云在秭歸縣南疑卽此也然史記成王封熊繹於丹陽裴駘乃云在枝江未詳孰是

十七日郡集於望洋堂玩芳亭亦皆沙石犖确之地賈守云州倉歲收秋夏二料麥粟秬米共五千餘石僅比吳中一下戶耳

十八日初得騰船羗小然底闊而輕於上灘爲便十九日郡集於歸鄉堂欲以是晚行不果訪宋玉宅在秭歸縣之東今爲酒家舊有石刻宋玉宅三字

近以郡人避太守家諱去之或遂由此失傳可惜也

二十日早離歸州出巫峯門過天慶觀少留觀唐天寶元年碑載明皇夢老子事巴東太守劉瑀所立字畫頗清逸碑側題當時郡官吏胥姓名字亦佳又有周顯德中荆南判官孫光憲爲知歸州高從讓所立碑從讓蓋南平王家子弟光憲亦知名國史有事迹蓋五代時歸峽皆隸荆渚也殿前有柏數百年物觀下卽叱難亂石無數飯於靈泉寺遂登舟過業難亦名難也水落舟輕俄頃遂過

二十一日舟中望石門關僅通一人行天下至險也晚泊巴東縣江山雄麗大勝秭歸但井邑極於蕭條邑中纔百餘戶自令廨而下皆茅茨了無片瓦權縣事秭歸尉右迪功郎王康年尉兼主簿右迪功郎杜德先來皆蜀人也謁寇萊公祠堂登秋風亭下臨江山是日重陰微雪天氣颼颼復觀亭名使人悵然始有流落天涯之歎遂登雙柏堂白雲亭堂下舊有萊公所植柏今已槁死然南山重複秀麗可愛白雲亭則天下幽奇絕境羣山環擁層出間見古木森然往往二三百年物欄外雙瀑瀉石澗中跳珠濺玉冷入人骨其下是爲慈溪奔流與江會予自吳入楚行五千餘里過十五州亭榭之勝無如白雲者而止在縣解聽事之後巴東了無一事爲令者可以寢飯於亭中其樂無涯而闕令動輒二三年無肯補者何哉

二十二日發巴東山益奇怪有夫子洞者一竇在峭壁絕高處人迹所不可至然髣髴若有欄楯不知所謂夫子者何也過三分泉自山竇中出止兩派俗云三派有年兩派中熟一派或絕流饑饉泊夜石夜雨

二十三日過巫山疑真觀謁妙用真人祠真人卽世所謂巫山神女也祠正對巫山峯巒上入霄漢山

脚直插江中識者謂太華衡廬皆無此奇然十二峯者不可悉見所見八九峯惟神女峯最為纖麗奇峭宜為仙真所託祝史云每八月十五夜月明時有絲竹之音往來峯頂山猿皆鳴達旦方漸止廟後山半有石壇平曠傳云夏禹見神女授符書於此壇上觀十二峯宛如屏障是日天宇晴霽四顧無纖翳惟神女峯上有白雲數片如鸞鶴翔舞裴徊久之不散亦可異也祠舊有烏數百送迎客舟自唐夔州刺史李貽詩已云羣鳥幸昨餘矣近乾道元年忽不至今絕無一鳥不知其故泊清水洞洞極深後門自山後出但懸閣水流其中鮮能入者歲旱祈雨頗應權知巫山縣左文林郎冉徽之尉右迪功郎文庶幾來

二十四日早抵巫山縣在峽中亦壯縣也市井勝歸峽二郡隔江南陵山極高大路如綫盤屈至絕頂謂之一百八盤蓋施州正路黃魯直詩云一百八盤攜手上至今歸夢繞羊腸即謂此也縣廨有故鐵盆底鏡似半磨狀極堅厚銘在其中蓋漢永平中物也缺處鐵色光黑如佳漆字畫淳質可愛玩有石刻魯直作益記大略言建中靖國元年予弟叔向嗣直自涪陵尉攝縣事予起戎州來寓縣廨此益舊以種蓮余洗滌乃見字云遊楚故離宮俗謂之細腰宮有一池亦當時宮中燕遊之地今湮沒略盡矣三面皆荒山南望江山奇麗又有將軍墓東晉人也一碑在墓後跌陷入地碑傾前欲壓字纔半存

二十五日晡後至大谿口泊舟出美梨大如升二十六日發大谿口入瞿唐峽兩壁對聳上入霄漢其平如削成仰視天如足練然水已落峽中平如油盎過聖姥泉蓋石上一罇人大呼於旁則泉出屢呼則屢出可怪也晚至瞿唐關唐故夔州與白帝城相連杜詩云白帝夔州各異城蓋言難辨也

關西門正對灑灑堆堆碎石積成出水數十丈土人云方夏秋水漲時水又高於堆數十丈肩輿入關謁白帝廟氣象甚古松柏皆數百年物有數碑皆孟蜀時所立庭中石筍有黃魯直建中靖國元年題字又有越公堂隋楊素所創少陵為賦詩者已毀今堂近歲所築亦甚宏壯自關而東即東屯少陵故居也

二十七日早至夔州州在山麓沙上所謂魚復永安宮也宮今為州倉而州治在宮西北甘夫人墓西南景德中轉運使丁謂薛顏所徙比白帝頗平曠然失關險無復形勢在灑之西故一曰灑西土人謂山間之流通江者曰灑云州東南有八陣磧孔明之遺迹碎石行列如引繩每歲江漲磧上水數十丈比退陣石如故

渭南文集卷四十八

渭南文集目錄
卷第四十九

赤壁詞
青玉案

浣沙溪二首
水調歌頭

浪淘沙
南鄉子二首

定風波
滿江紅二首

感皇恩二首
鷓鴣天七首

好事近十二首
驀山溪二首

木蘭花
臨江仙

朝中措梅三首
蝶戀花三首

釵頭鳳
水龍吟

清商怨
秋波媚二首

采桑子
沁園春三首

卜算子
憶秦娥

漢宮春二首
烏夜啼八首

月上海棠二首
真珠簾

好事近

渭南文集卷第四十九

赤壁詞 招韓無咎遊金山

禁門鐘曉憶君來 朝路初翔鸞鶴西府中臺推獨步
行對金蓮宮燭感繡華鞦韆葩寶帶看即飛騰速人
生難料一尊此地相屬 回首紫陌青門西湖閑院

鎖千梢脩竹素壁棲鴉應好在 殘夢不堪重續歲月
驚心功名看鏡短鬢無多綠 一散休惜與君同醉浮

玉

浣沙溪 和無咎韻

懶向沙頭醉玉瓶 喚君同賞小窗明 夕陽吹角最關
情 忙日苦多閑日少 新愁常續舊愁生 客中無伴
怕君行

又 南鄭席上

浴罷華清第二湯 紅綿撲粉玉肌涼 娉婷初試藕絲
裳 鳳尺裁成猩血色 螭奩熏透麝臍香 水亭幽處
捧霞觴

青玉案 與朱景參會北嶺

西風挾雨聲 驟浪恰洗盡 黃茆瘴 老慣人間齊得喪
千巖高臥五湖歸 棹替却 凌煙像

故人小駐平戎帳 白羽腰間氣何壯 我老漁樵君將
相 小槽紅酒晚香丹荔記 取蠻江上

水調歌頭 多景樓

江左占形勝 最數古徐州 連山如畫 佳處縹渺著危
樓 鼓角臨風悲壯 烽火連空明滅 往事憶孫劉 千里
耀戈甲 萬竈宿貔貅 露霑草 風落木 歲方秋 使君
宏放 談笑洗盡古今愁 不見襄陽登覽 磨滅遊人無
數 遺恨黯黯難收 叔子獨千載 名與漢江流

浪淘沙 丹陽浮玉亭席上作

綠樹暗長亭 幾把離尊 陽關常恨不堪聞 何況今朝
秋色裏 身是行人 清淚泥羅巾 各自消魂 一江離
恨恰平分 安得千尋橫鐵鎖 截斷煙津

定風波 進賢道上見梅贈王伯壽

軟帽垂鞭送客回 小橋流水一枝梅 衰病逢春都不
記 誰謂幽香却解逐人來 安得身閑頻置酒 攜手
與君看到十分開 少壯相從今雪鬢 因甚流年羈恨
兩相催

南鄉子

歸夢寄吳檣 水驛江程去路長 想見芳洲初繫纜 斜
陽煙樹 參差認武昌 愁鬢點新霜 曾是朝衣染御
香 重到故鄉交舊少 淒涼却恐它鄉勝故鄉

又

早歲入皇州 鱗酒相逢盡勝流 三十年來真一夢 堪
愁 客路蕭蕭兩鬢秋 蓬嶠偶重遊 不待人嘲我自
羞 看鏡倚樓俱已矣 扁舟月笛煙蓑萬事休

滿江紅

危堞朱欄登覽處 一江秋色人正似 征鴻社燕幾番
輕別 繡綉難忘當日語 淒涼又作它鄉客 問鬢邊都
有幾多絲 真堪織 楊柳院秋千陌 無限事成虛擲
如今何處也 夢魂難覓 金鴨微温香縹緲 錦茵初展
情蕭瑟 料也應紅淚伴秋霖 燈前滴

又 夔州催王伯禮侍御尋梅之集

疎莖幽香禁不過 晚寒愁絕那更是 巴東江上楚山
千疊 軟帽閑尋西瀼路 鞦韆笑向南枝說 恐使君歸
去上鑿坡孤風月 清鏡裏 悲華髮 山驛外 溪橋側
悽然回首處 鳳凰城 闕顛顛 願如今 誰領略 飄零已是
無顏色 問行廚何日 喚賓僚 猶堪折

感皇恩 伯禮立春日生日

春色到人間 絲幡初戴 正好春盤細生菜 一般日月
只有 僊家偏耐雪 霜從點鬢朱顏在 温詔鼎來延
英 催對鳳閣鸞臺 看除拜 對衣裁 穩恰稱 毬紋新帶
箇時方旋了 功名債

又

小閣倚秋空 下臨江渚 漠漠孤雲未成雨 數聲新雁

回首杜陵何處壯心空萬里人誰許 黃閣紫樞築
壇開府莫怕功名欠人做如今熟計只有故鄉歸路
石帆山下菱三畝

好事近 寄張真甫

羈雁未成歸腸斷寶箏零落那更凍醪無力似故人
情薄 瘴雲蠻雨暗孤城身在楚山角煩問劍南消
息怕還成疎索

又

風露九霄寒侍宴玉華宮闕親向紫皇香案見金芝
千葉 碧壺仙露醒初成香味兩奇絕醉後却騎丹
鳳看蓬萊春色

又 次宇文卷目韻

客路苦思歸愁似蠶絲千緒夢裏鏡湖煙雨看山無
重數 尊前消盡少年狂慵著送春語花落燕飛庭
戶數年光如許

又

歲晚喜東歸掃盡市朝陳迹揀得亂山環處釣一潭
澄碧 賣魚沽酒醉還醒心事付橫笛家在萬重雲
外有沙鷗相識

又

華表又千年誰記駕雲孤鶴回首舊曾遊處但山川
城郭 紛紛車馬滿人間塵土汗芒屨且訪葛仙丹
井看巖花開落

又

揮袖別人間飛躡峭崖蒼壁尋見古僊丹竈有白雲
成積 心如潭水靜無風一坐數千息夜半忽驚奇
事看鯨波噉日

又

隘口放船歸薄莫散花洲宿兩岸白蘋紅蓼暎一菱
新綠 有沽酒處便為家菱芡四時足明日又乘風
去任江南江北

又 登梅仙山絕頂望海

揮袖上西峯孤絕去天無尺拄杖下臨鯨海數煙靄
歷歷 貪看雲氣舞青鸞歸路已將夕多謝半山松
吹解慙慙留客

又

小倦帶餘醒澹澹數橋斜日驅退睡魔十萬有雙龍
蒼壁 少年莫笑老人衰風味似平昔扶杖凍雲深
處探溪梅消息

又

覓箇有緣人分付玉壺靈藥誰向市塵深處識遼天
孤鶴 月中吹笛下巴陵條華赴前約今古廢興何
限數山川如昨

又

平日出秦關雪色駕車雙鹿借問此行安往賞清伊
脩竹 漢家宮殿劫灰中春草幾回綠君看變遷如
許況紛紛榮辱

又

秋曉上蓮峯高躡倚天青壁誰與放翁為伴有天壇
輕策 鏗然忽變赤龍飛雷雨四山黑談笑做成豐
歲笑禪龕柳粟

鷓鴣天 送葉夢錫

家住東吳近帝鄉平生豪舉少年場十千沽酒青樓
上百萬呼盧錦瑟傍 身易老恨難忘尊前贏得是
婁涼君歸為報京華舊一事無成兩鬢霜

又 袁萌釋作

看盡巴山看蜀山子規江上過春殘慣眠古驛常安
枕熟聽陽關不慘顏 慵服氣嬾燒丹不妨青鬢戲
人間祕傳一字神仙訣說與君知只是頑

又

梳髮金盤剩一窩畫眉鸞鏡暈雙蛾人間何處無春
到只有伊家獨占多 微步處奈嬌何春衫初換麴
塵羅東鄰鬪草歸來晚忘却新傳子夜歌

又

家住蒼煙落照間，絲毫塵事不相關。對殘玉壘行穿竹，卷罷黃庭臥看山。貪嘯傲，任衰殘，不妨隨處一開顏。元知造物心腸別，老却英雄似等閑。

又
插脚紅塵已是顛，更求平地上青天。新來有箇生涯別，買斷煙波不用錢。沽酒市，採菱船，醉聽風雨擁蓑眠。三山老子真堪笑，見事遲來四十年。

又
懶向青門學種瓜，只將漁釣送年華。雙雙新燕飛春岸，片片輕鷗落晚沙。歌縹緲，嘔啞酒，如清露，鮮如花。逢人問道歸何處，笑指船兒此是家。

又 薛公肅家席上作
南浦舟中兩玉人，誰知重見楚江濱。憑教後苑紅牙版，引上西川綠錦茵。纔淺笑，却輕嚔，淡黃楊柳又催春。情知言語難傳恨，不似琵琶道得真。

又 蕩山溪 送伯禮
元戎十乘出次高，唐館歸去舊鷓行。更何人齊飛霄漢，瞿唐水落，惟是淚波深。催催疊鼓起牙樯，難鏤長江斷。春深鼇禁，紅日宮甍，暖何處望音塵。黯消魂，層城飛觀，人情見慣，不敢恨，相忘梅驛外，蓼灘邊，只待除書看。

又 遊三榮龍洞
窮山孤壘臘盡春，初破寂寥掩空齋。好一箇無聊底我，嘯臺龍岫，隨分有雲山。臨淺瀨，瀨長松，閑據胡床坐。二盃徑醉不覺紗巾墮，畫角喚人歸，落梅村籃輿，夜過城門，漸近幾點妓衣紅，官驛外，酒壚前，也有閑燈火。

木蘭花 立春日作
二年流落巴山道，破盡青衫塵滿帽。身如西漢渡頭雲，愁抵瞿唐關上草。春盤春酒年年好，試戴銀幡判醉倒。今朝一歲大家添，不是人間偏我老。

朝中措梅

幽姿不入少年場，無語只淒涼。一箇飄零，身世十分冷淡，心腸。江頭月底，新詩舊夢，孤恨清香。任是春風不管，也曾先識東皇。

又 代譚得稱作
怕歌愁舞懶逢迎，粧晚託春醒。總是向人深處，當時枉道無情。關心近日，啼紅密訴，剪綠深盟。杏館花陰，恨恨淺畫堂銀燭，嫌明。

又
擊鼓離鼓，錢流年燭，焰動金船。綵燕難尋，前夢酥花空點春妍。文園謝病，蘭成久旅，回首凄然。明月梅山笛夜，和風禹廟鷺天。

臨江仙 離果州作
鴻雨催成新綠，燕泥收盡，殘紅春光還與美人同。論心空眷眷，分袂却匆匆。只道真情易寫，那知怨句難工。水流雲散，各西東。半廊花院月，一帽柳橋風。

蝶戀花 離小益作
陌上簫聲寒，食近雨過園林，花氣浮芳潤。千里斜陽鍾欲暝，憑高望斷南樓信。海角天涯行略盡。三十二年，間無處無遺恨。天若有情終欲問，忍教霜點相思鬢。

又
桐葉長飄，蛩夜語，旅思秋光黯黯。長安路，忽記橫戈盤馬處，散關清渭應如故。江海輕舟今已具。一卷兵書，數息無人付。早信此生終不遇。當年悔草長楊賦。

又
水漾萍根，風卷絮情，笑嬌嬾忍。記逢迎處，只有夢魂能再遇。堪嗟夢不由人做。夢若由人，何處去短帽輕衫，夜夜眉州路。不怕銀缸深燼戶。只愁風斷青衣渡。

釵頭鳳
紅酥手，黃藤酒，滿城春色宮牆柳。東風惡，歡情薄，一

懷愁緒幾年離索錯錯 春如舊人空瘦淚痕紅
泥蛟緒透桃花落閑池閣山盟雖在錦書難託莫莫

清商怨 馮明輝作

江頭日莫痛飲乍雪晴猶凜山驛淒涼燈昏人獨寢
駕機新寄斷錦數往事不堪重省夢破南樓綠雲
堆一枕

水龍吟 榮南作

樽前花底尋春處堪數心情全減一身萍寄酒徒雲
散佳人天遠那更今年瘴煙蠻雨夜郎江畔漫倚樓
橫笛臨窗看鏡時揮涕驚流轉 花落月明庭院悄
無言魂消腸斷憑肩攜手當時曾效畫梁栖燕見說
新來網絮塵暗舞衫歌扇料也羞顛顛慵行芳徑怕
啼鴛兒

秋波媚 七月十六日晚登高興亭望長安南山

秋到邊城角聲哀烽火照高臺悲歌擊筑憑高酌酒
此興悠哉 多情誰似南山月特地莫雲開灞橋煙
柳曲江池館應待人來

又

曾散天花葢珠宮一念墮塵中鉛華洗盡珠璣不御
道骨仙風 東遊我醉騎鯨去君駕素鸞從垂虹看
月天台采藥更與誰同

采桑子

寶釵樓上粧梳晚懶上鞦韆閑撥沉煙金縷衣寬睡
髻偏 鱗鴻不寄遼東信又是經年彈淚花前愁入
春風十四絃

卜算子 詠梅

驛外斷橋邊寂寞開無主已是黃昏獨自愁更著風
和雨 無意苦爭春一任羣芳妬零落成泥碾作塵
只有香如故

沁園春 三榮橫閣閣小宴

粉破梅梢綠動萱叢春意已深漸珠簾低卷筇枝微

步冰開躍鯉林暖鳴禽荔子扶疎竹枝哀怨濁酒一
尊和淚斟憑欄久數山川冉冉歲月駸駸 當時豈
料如今漫一事無成霜鬢侵看故人強半沙堤黃閣
魚懸帶玉貂映燁金許國雖堅朝天無路萬里淒涼
誰寄音東風裏有灞橋煙柳知我歸心

又

一別秦樓轉眼新春又近放燈憶盈盈倩笑纖纖柔
握玉香花語雪暖酥凝念遠愁腸傷春病思自怪平
生殊未曾君知否漸香消蜀錦淚漬吳綾 難求繫
日長繩況倦客飄零少舊朋但江郊雁起漁村笛怨
寒缸委燼孤硯生冰水繞山圍煙昏雲慘縱有高臺
常怯登消魂處是魚牋不到蘭夢無憑

又

孤鶴歸飛再過遼天換盡舊人念曩曩枯塚茫茫夢
境王侯螻螻畢竟成塵載酒園林尋花巷陌當日何
曾輕負春流年改數圍腰帶剩點鬢霜新 交親散
落如雲又豈料如今餘此身幸眼明身健茶甘飯軟
非惟我老更有人貧躲盡危機消殘壯志短艇湖中
閑采蓴吾何恨有漁翁共醉豁友為隣

憶秦娥

玉花驄晚街金轡聲瓊瓏聲瓏閑敲烏帽又過城
東 富春巷陌花重重千金沽酒酬春風酬春風笙
歌圍裏錦繡叢中

漢宮春 張園賞海棠作園故蜀燕王宮也

淚迹人間喜聞猿楚峽學劍秦川虛舟汎然不繫萬
里江天朱顏綠鬢作紅塵無事神仙何妨在鬢花海
裏行歌閑送流年 休笑放慵狂眼看閑坊深院多
少嬋娟燕宮海棠夜宴花覆金船如椽畫燭酒闌時
百炬吹煙憑寄語京華舊侶幅巾莫換貂蟬

又 初自南鄭來成都作

羽箭雕弓憶呼鷹古壘截虎平川吹笳莫歸禁裏雲
壓青氈淋漓醉墨看龍蛇飛落蠻牋人談許詩情將

略一時才氣超然 何事又作南來看重陽藥市元
夕燈山花時萬人樂處歌帽垂鞭聞歌感舊尚時時
流涕尊前君記取封侯事在功名不信由天

月上海棠 成都城南有蜀王舊苑多梅皆二百餘年古木

斜陽廢苑朱門閉吊興亡遺恨淚痕裏淡淡宮梅也
依然點點翦水凝愁處似憶宣華舊事 行人別有
淒涼意折幽香誰與寄千里佇立江皋杳難逢隴頭
歸騎音塵遠楚天危樓獨倚 宣華故蜀苑名

又

蘭房繡戶厭厭病歎春醒和悶甚時醒燕子空歸幾
曾傳玉關邊信傷心處獨展團窠瑞錦 熏籠消歇
沉煙冷淚痕深展轉看花影漫擁餘香怎禁他峭寒
孤枕西窗曉幾聲銀瓶玉井

烏夜啼

金鴨餘香尚煖綠窗斜日偏明蘭膏香染雲鬢膩釵
墜滑無聲 冷落鞦韆伴侶闌珊打馬心情繡屏驚
斷蕭湘夢花外一聲鶯

又

簷角楠陰轉日樓前荔子吹花鷓鴣聲裏霜天晚疊
鼓已催衙 鄉夢時來枕上京書不到天涯邦人訟
少文移省閑院自煎茶

又

我按丹臺玉宇君書葢殿雲篇錦官城裏重相遇心
事兩依然 攜酒何妨處處尋梅共約年年細思上
界多官府且作地行儂

又

世事從來慣見吾生更欲何之鏡湖西畔秋千頃鷗
鷺共忘機 一枕蘋風午醉二升菰米晨炊故人莫
訝音書絕釣侶是新知

又

素意幽棲物外塵緣浪走天涯歸來猶幸身強健隨
分作山家 已趁餘寒泥酒還乘小雨移花柴門盡

日無人到一徑傍谿斜

又

園館青林翠樹衣巾細葛輕紈好風吹散霏微雨沙
路喜新乾 小燕雙飛水際流鶯百轉林端投壺聲
斷彈棋罷閑展道書看

又

從宦元知漫浪還家更覺清真蘭亭道上多脩竹隨
處岸綸巾 泉冽偏宜雪茗菴香雅稱絲蓴儵然一
飽西窗下天地有閑人

又

紈扇嬋娟素月紗巾縹渺輕煙高槐葉長陰初合清
潤雨餘天 弄筆斜行小草鈎簾淺醉閑眠更無一
點塵埃到枕上聽新蟬

真珠簾

山村水館參差路感羈遊正似殘春風絮掠地穿簾
知是竟歸何處鏡裏新霜空自憫問幾時鸞臺鼂署
遲莫謾憑高懷遠書空獨語 自古儒冠多誤悔當
年早不扁舟歸去醉下白蘋洲看夕陽鷓鴣菰菜鱸
魚都棄了只換得青衫塵土休顧早收身江上一蓑
煙雨

好事近

混迹寄人間夜夜畫樓銀燭誰見五雲丹竈養黃芽
初熟 春風歸從紫皇遊東海宴賜谷進罷碧桃花
賦賜玉塵千斛

渭南文集卷第四十九

渭南文集目錄
卷第五十

柳梢青 二首

夜遊宮 二首

安公子

玉蝴蝶

木蘭花慢

蘇武慢

齊天樂 二首

望梅

洞庭春色

漁家傲

繡停針

桃園憶故人 五首

極相思

一叢花 二首

隔浦蓮 近拍 二首

昭君怨

雙頭蓮

南歌子

豆葉黃 二首

醉落魄

鵲橋仙 三首

長相思 五首

菩薩蠻 二首

訴衷情 二首

生查子 二首

破陣子 二首

上西樓

點絳脣

謝池春 三首

一落索 二首

杏花天

太平時

戀繡衾 二首

風入松

真珠簾

風流子

雙頭蓮

鷓鴣天

蝶戀花

渭南文集卷第五十

柳梢青

故蜀燕王宮繡葉之威爲成都第一今屬張氏

錦里繁華環宮故邸疊萼奇花俊客妖姬爭飛金勒
齊駐香車 何須悞障帷遮寶盃浸紅雲瑞霞銀燭
光中清歌聲裏休恨天涯

又 乙巳二月西興贈別

十載江湖行歌沽酒不到京華底事翩然長亭煙草
衰鬢風沙 憑高目斷天涯細雨外樓臺萬家只恐
明朝一時不見人共梅花

夜遊宮 記夢寄師伯渾

雪曉清笳亂起夢遊處不知何地鐵騎無聲望似水
想關河雁門西青海際 睡覺寒燈裏漏聲斷月斜
窗紙自許封侯在萬里有誰知鬢雖殘心未死

又 宮詞

獨夜寒侵翠被奈幽夢不成還起欲寫新愁淚濺紙
憶承恩數餘生今至此 蕙蕙燈花墜問此際報人
何事只尺長門過萬里恨君心似危欄難久倚

安公子

風雨初經社子規聲裏春光謝最是無情零落盡薔
薇一架況我今年顛顛幽窗下人盡怪詩酒消聲價
向藥爐經卷忘却鷺窗柳樹 萬事收心也粉痕猶
在香羅帕恨月愁花爭信道如今都罷空憶前身使
面章臺馬因自來禁得心腸怕縱遇歌逢酒但說京

都舊話

玉蝴蝶 王忠州家席上作

倦客平生行處墜鞭京洛解佩瀟湘此夕何年來賦
宋玉高唐繡簾開香塵乍起蓮步穩銀燭分行暗端
相燕羞驚妬蝶擾蜂忙 難忘芳樽頻勸寒新退
玉漏猶長幾許幽情只愁歌罷月侵廊欲歸時司空

笑悶微近處丞相嗔狂斷人腸假鏡相送上馬何妨

木蘭花慢 夜登青城山玉華樓

閱邯鄲夢境歎綠鬢早霜侵奈華岳燒丹青谿看鶴
尚負初心年來向濁世裏悟真詮秘訣絕幽深養就

金芝九碗種成琪樹千林 星壇夜學步虛吟露冷

透瑤簪對翠鳳披雲青鸞遶月宮關蕭森琅函一封

奏罷自鈞天帝所有知音却過蓬壺嘯傲世間歲月

駭駭

蘇武慢 唐西安湖

澹靄空濛輕陰清潤綺陌細塵初靜平橋繫馬畫閣
移舟湖水倒空如鏡掠岸飛花傍簷新燕都似學人
無定歎連年戎帳經春邊壘暗凋顏鬢 空記憶杜

曲池臺新豐歌管怎得故人音信羈懷易感老伴無

多談塵久閑犀柄惟有翛然筆床茶竈自適筍與煙

艇待綠荷遮岸紅蕖浮水更樂幽興

齊天樂 左綿道中

角殘鐘晚關山路行人乍依孤店塞月征塵鞭絲帽
影常把流年虛占藏鴉柳暗數輕負鬢花謾勞書劍
事往關情悄然頻動壯遊念 孤懷誰與強遣市壚

沽酒酒薄怎當愁釀倚瑟妍詞調鉛妙筆那寫柔情

芳豔征途自厭況煙斂蕪痕雨稀萍點最是眠時枕

寒門半掩

又 三樂人日遊龍洞作

客中隨處閑消悶來尋嘯臺龍岫路斂春泥山開翠
霧行樂年年依舊天工妙手放輕綠萱芽淡黃楊柳
笑問東君爲人能染鬢絲否 西州催去近也帽簷

風軟且看市樓沽酒宛轉巴歌淒涼塞管攜客何妨

頻奏征塵暗袖漫禁得梅花伴人疎瘦幾日東歸畫

船平放溜 望梅

壽非金石恨天教老向水程山驛似夢裏來到南柯
這些子光陰更堪輕擲戍火邊塵又過了一年春色
數名姬駿馬盡付杜陵苑路豪客 長繩漫勞繫日

看人間俯仰俱是陳迹縱自倚英氣凌雲奈回盡鵬

程鍛殘鸞翮終日憑高情不見江東消息算沙邊也
有斷鴻倩誰問得

洞庭春色

壯歲文章暮年勲業自昔誤人算英雄成敗軒裳得
失難如人意空喪天真請看邯鄲當日夢待炊罷黃
梁徐欠伸方知道許多時富貴何處鬪身 人間定
無可意怎換得玉鱸絲蓴且釣竿漁艇筆牀茶竈閑
聽荷雨一洗衣塵洛水秦關千古後尚棘暗銅駝空
愴神何須更慕封侯定遠圖像麒麟

漁家傲 寄仲高

東望山陰何處是往來一萬二千里寫得家書空滿
紙流清淚書回已是明年事 寄語紅橋橋下水扁
舟何日尋兄弟行徧天涯真老矣愁無寐鬢絲幾縷
茶煙裏

繡停針

數半紀跨萬里秦吳頓覺衰謝回首鷓行英俊並遊
只尺玉堂金馬氣凌嵩華負壯略縱橫王霸夢經洛
浦梁園覺來淚流如瀉 山林定去也却自恐說著
少年時話靜院焚香閑倚素屏今古總成虛假趁時
婚嫁幸自有湖邊茅舍燕歸應笑客中又還過社

桃園憶故人 并序

三榮郡治之西因子城作樓觀曰高竈三下臨
山村蕭然如世外余留七十日被命參成都
戎幟而去臨行徒倚竟日作桃源憶故人一

首

斜陽寂歷柴門閉一點炊煙時起雞犬往來林外俱
有蕭然意 衰翁老去疎榮利絕愛山城無事臨去
畫樓頻倚何日重來此

又 應靈道中

欄干幾曲高齋路正在重雲深處丹碧未乾人去高
棟空留句 離離芳草長亭暮無奈征車不住惟有
斷鴻煙渚知我頻回顧

又 一彈指頃浮生過墮甌元知當破去去醉吟高臥獨
唱何須和 殘年還我從來我萬里江湖煙舸脫盡
利名韞鏤世界元來大

又

城南載酒行歌路冶葉倡條無數一朶輕紅凝露最
是關心處 鶯聲無賴催春去那更兼旬風雨試問
歲華何許芳草連天暮

又 題華山圖

中原當日三川震關輔回頭煨燼淚盡兩河征鎮日
望中興運 秋風霜滿青青鬢老却新豐英俊雲外
華山千仞依舊無人問

極相思

江頭疎雨輕煙寒食落花天翻紅墜素殘霞暗錦一
段凄然 惆悵東君堪恨處也不念冷落樽前那堪
更看漫空相趁柳絮榆錢

一叢花

樽前凝佇漫魂迷猶恨負幽期從來不慣傷春淚為
伊後滴滿羅衣那堪更是吹簫池館青子綠陰時
回廊簾影畫參差偏共睡相宜朝雲夢斷知何處倩
雙燕說與相思從今判了十分顛顛圖要箇人知

又

仙姝天上自無雙玉面翠蛾長黃庭讀罷心如水平
朱戶愁近綠窗窗明几淨閑臨唐帖深炷寶奩香
人間無藥駐流光風雨又催涼相逢共話清都舊數
塵劫生死茫茫何如伴我綠萼青籟秋晚釣瀟湘

隔浦蓮近拍

飛花如趁燕子直度簾櫳裏帳掩香雲暖金籠鸚鵡
驚起疑恨慵梳洗粧臺畔蘸粉纖纖指寶釵墜 才
醒又困厭厭中酒滋味牆頭柳暗過盡一年春事鬢
畫高樓怕獨倚千里孤舟何處煙水

騎鯨雲路倒景醉面風吹醒笑把浮丘袂寥然非復
塵境震澤秋萬頃煙霏散水面飛金鏡露華冷 湘
妃睡起鬢傾釵墜慵整臨江舞處零亂塞鴻清影河
漢橫斜夜漏永人靜吹簫同過綠嶺

昭君怨

畫永蟬聲庭院人倦懶搖團扇小景寫瀟湘自生涼
簾外蹴花雙燕簾下有人同見寶篆拆宮黃炷薰
香

雙頭蓮

呈范至能待制

華鬢星星驚壯志成虛此身如寄蕭條病驥向暗裏
消盡當年豪氣夢斷故國山川隔重重煙水身萬里
舊社凋零青門俊遊誰記 盡道錦里繁華歎官閑
晝永柴荆添睡清愁自醉念此際付與何人心事縱
有楚梅吳檣知何時東逝空悵望歸美菰香秋風又
起

南歌子

送周機宜之益昌

異縣相逢晚中年作別難暮秋風雨客衣寒又向朝
天門外話悲歡 瘦馬行霜棧輕舟下雪灘烏奴山
下一林丹爲說三年常寄夢魂間

豆葉黃

春風樓上柳腰肢初試花前金縷衣嬾嬾娉娉不自
持曉粧遲畫得蛾眉勝舊時

又

一春常是雨和風風雨晴時春已空誰惜泥沙萬點
紅恨難窮恰似衰翁一世中

醉落魄

江湖醉客投盃起舞遺烏帽三更冷翠露衣溼嬾嬾
菱歌催落半川月 空花昨夢休尋覓雲臺麟閣俱
陳迹元來只有閑難得青史功名天却無心惜

鵲橋仙

華燈縱博雕鞍馳射誰記當年豪舉酒徒一一取封
侯獨去作江邊漁父 輕舟八尺低篷三扇占斷蘋

洲煙雨鏡湖元自屬閑人又何必君恩賜與
又

一竿風月一蓑煙雨家在釣臺西住賣魚生怕近城
門况肯到紅塵深處 潮生理權潮平繫纜潮落浩
歌歸去時人錯把比嚴光我自是無名漁父

又 夜闌杜鵑

茆簷人靜蓬窗燈暗春晚連江風雨林鶯巢燕總無
聲但月夜常啼杜宇 催成清淚驚殘孤夢又揀深
枝飛去故山猶自不堪聽況半世飄然鬢旅

長相思

雲千重水千重身在千重雲水中月明收釣筒 頭
未童耳未聾得酒猶能雙臉紅一尊誰與同

又

橋如虹水如空一葉飄然煙雨中天教稱放翁 側
船篷使江風蟹舍參差漁市東到時聞暮鐘

又

面蒼然鬢皤然滿腹詩書不直錢官閑常晝眠 晝
凌煙上甘泉自古功名屬少年知心惟杜鵑

又

暮山青暮霞明夢筆橋頭艇子橫蘋風吹酒醒 看
潮生看潮平小住西陵莫較程蓴絲初可烹

又

悟浮生厭浮名回視千鍾一髮輕從今心太平 愛
松聲愛泉聲寫向孤桐誰解聽空江秋月明

菩薩蠻

江天淡碧雲如掃蘋花零落蓴絲老細細晚波平月
從波面生 漁家真箇好悔不歸來早經歲洛陽城
鬢絲添幾莖

又

小院鸞眠春欲老新巢燕乳花如掃幽夢錦城西海
棠如舊時 當年真草草一權還吳早題罷惜春詩
鏡中添鬢絲

訴衷情

當年萬里覓封侯，正馬戍梁州。關河夢斷，何處塵暗，舊貂裘。胡未滅，鬢先秋。淚空流。此生誰料，心在天山，身老滄洲。

又

青衫初入九重城，結友盡豪英。蠟封夜半，傳檄馳騎，諭幽并。時易失，志難成。鬢絲生。生平章風月，彈壓江山，別是功名。

生查子

還山荷主恩，聊試扶犁手。新結小茆茨，恰占清江口。風塵不化衣，鄰曲常持酒。那似宦遊時，折盡長亭柳。

又

梁空燕委巢，院靜鳩催雨。香潤上朝衣，客少閑談麈。鬢邊千縷絲，不是吳鸞吐。孤夢泛瀟湘，月落聞柔艣。

破陣子

仕至千鍾良易，年過七十常稀。眼底榮華元是夢，身後聲名不自知。營營端為誰。幸有旗亭沽酒，何妨蘭紙題詩。幽谷雲蘿朝採藥，靜院軒窗夕對棋。不歸真箇癡。

又

看破空花塵世放，輕昨夢浮名。蠟屐登山真率飲，筠杖穿林自在行。身閑心太平。料峭餘寒猶力，廉纖細雨初晴。苔紙閑題谿上句，菱唱遙聞煙外聲。與君同醉醒。

上西樓 一名相見歡

江頭綠暗紅稀，燕交飛。忽到當年行處，恨依依。灑清淚，歎人事，與心違。滿酌玉壺花露，送春歸。

點絳脣

采藥歸來獨尋芳，店沽新釀。暮煙千嶂，處處聞漁唱。醉弄扁舟，不怕黏天浪。江湖上，遮回疎放，作箇閑。

人樣

謝池春

壯歲從戎，曾是氣吞殘虜。陣雲高，狼烽夜舉。朱顏青鬢，擁雕戈西戍。笑儒冠自來多誤。功名夢斷，却泛扁舟吳楚。漫悲歌傷懷，弔古煙波無際。望秦關何處，歎流年又成虛度。

又

賀監湖邊初繫放翁歸棹，小園林時時醉倒。春眠驚起，聽啼鶯催曉，歎功名誤人堪笑。朱橋翠徑不許京塵飛到，挂朝衣東歸欠早。連宵風雨，捲殘紅如掃。恨樽前送春人老。

又

七十衰翁不減少年豪氣，似天山淒涼病驥。銅駝荆棘灑，臨風清淚甚，情懷伴人兒戲。如今何幸，作箇故谿歸計。鶴飛來，晴嵐暝翠，玉壺春酒約羣僮同醉。洞天寒露，桃開未。

一落索

滿路遊絲飛絮，絮韶光將暮。此時誰與說新愁，有百轉流鶯語。頰仰人間，今古神仙何處。花前須判醉扶歸，酒不到劉伶墓。

又

識破浮生虛妄，從人譏謗。此身恰是弄潮兒，曾過了千重浪。且喜歸來無恙，一壺春釀。雨衰煙笠傍漁磯，應不是封侯相。

杏花天

老來駒隙駸駸度，算只合狂歌醉舞。金盃到手君休訴，看著春光又暮。誰為情柳條繫住，且莫遣城笳催去。殘紅轉眼無尋處，盡屬蜂房燕戶。

太平時

竹裏房櫳一徑深，靜悄悄亂紅飛盡。綠成陰，有鳴禽臨罷蘭亭無一事，自修琴銅爐裊裊，海南沉洗塵襟。

戀繡衾

不惜貂裘換釣篷嗟時人誰識放翁歸權借樵風穩
數聲聞林外暮鐘 幽棲莫笑蝸廬小有雲山煙水
萬重半世向丹青看喜如今身在畫中

又

無方能駐臉上紅笑浮生擾擾夢中平地是冲霄路
又何勞千日用功 飄然再過蓮峯下亂雲深吹下
暮鐘訪舊隱依然在但鶴巢時有墮松

風入松

十年裘馬錦江濱酒隱紅塵萬金選勝鸞花海倚疎
狂驅使青春吹笛魚龍盡出題詩風月俱新 自憐
華髮滿紗巾猶是官身鳳樓常記當年語問浮名何
似身親欲寄吳棧說與這回真箇閑人

真珠簾

燈前月下嬉遊處向笙歌錦繡叢中相遇彼此知名
纔見便論心素淺黛嬌蟬風調別最動人時時偷顧
歸去想閑聽深院調絃促柱 樂府初翻新譜漫裁
紅點翠閑題金縷燕子入簾時又一番春暮側帽燕
脂坡下過料也記前年崔護休訴待從今須與好花
為主

風流子 一名內家嬌

佳人多命薄初心慕德耀嫁梁鴻記綠窗睡起靜吟
閑詠句飄離合格變玲瓏更乘興素紈留戲墨纖玉
撫孤桐蟾滴夜寒水浮微凍鳳棧春麗花研輕紅
人生誰能料堪悲處身落柳陌花叢空羨畫堂鸚鵡
深閉金籠向寶鏡鸞釵臨粧常晚繡茵牙版催舞還
慵腸斷市橋月笛燈院霜鐘

雙頭蓮

風卷征塵堪歎處青鸞正搖金轡客襟貯淚漫萬點
如血憑誰持寄佇想豔態幽情壓江南佳麗春正媚
怎忍長亭匆匆頓分連理 目斷淡日平蕪煙濃樹
遠微茫如著悲歡夢裏奈倦客又是關河千里最苦

唱徹驪歌重遲留無計何限事待與丁寧行時已醉

鷓鴣天

杖屨尋春苦未遲洛城櫻筍正當時三千里外歸初
到五百年前事總知 吹玉笛渡清伊相逢休問姓
名誰小車處士深衣叟曾是天津共賦詩

蝶戀花

禹廟蘭亭今古路一夜清霜染盡湖邊樹鸚鵡杯深
君莫訴他時相遇知何處 再冉年華留不住鏡裏
朱顏畢竟消磨去一句丁寧君記取神僊須是閑人
做

渭南文集卷第五十

南唐書

四部備要

集部

上海中華書局據汲古閣
本校刊

桐鄉 陸費達 總勘

杭縣 高時顯 輯校

杭縣 吳汝霖 校

丁輔之 監造

版權所有不許翻印

南唐書序

天曆改元余待罪中執法監察御史王主敬謂余曰公向在南臺蓋嘗命郡士戚光纂輯金陵志始訪得南唐書其於文獻遺闕大有所攷證裨助良多且爲之音釋焉因屬博士程熟等就加校訂鈔板與諸史並行之越明年余得告還金陵書適就光來請序按南唐本紀李昇系出憲宗四世間關困阨纔有江淮之地僅餘三十年卒不復振而宋滅之雖爲國褊小觀其文物當時諸國莫與之並其賢才碩輔固不逮蜀漢武侯而張延翰劉仁贍潘佑韓熙載孫忌徐錯之徒文武才業忠節聲華炳耀一時有不可揜矧其間政化得失興衰治亂之跡有可爲世鑒戒者尤不可泯也竊謂唐末契丹雄盛虎視中原晉漢之君以臣子事之惟謹顧乃獨拳拳於江淮小國聘使不絕嘗獻橐駝并羊馬千計高麗亦歲貢方物意者久服唐之恩信尊唐餘風以唐爲猶未亡也邪宋承五季周統目爲僭僞故其國亡而史錄散佚不彰然則馬元康胡恢等迭有所述今復罕見至山陰陸游著成此書最號有法傳者亦寡後世有能秉春秋直筆究明綱目統緒之旨者或有所攷而辯之姑識其端以俟君子余前忝史館朝廷嘗議修宋遼金三史而未暇他日太史氏復申前議必將有取於是書焉集賢大學士奎章閣大學士光祿大夫知經筵事趙世延序

鍾護第四沾沾自街沾沾音瞻輕薄也漢魏其傳沾

朱匡業第五朱元叛元宗議親征按元本傳烈祖今

朱令贊賀宗見元紀

江文蔚第七捨爵策勳舍出左氏捨

馮延巳第八顏見上柴延魯玄武湖在金陵近事城湖北

映如畫十數里幕府雞籠山環筆左右名國勝境掩

言開焉田今成平陸安石

孫忌豆盧北姓出

彭師曷曷字通

韓熙載第九梅嶺岡在城南郡志謝公墓上慕容紹宗

澄用之故曰神武遺言實表知人之鑒

劉仁贍第十壽州北本漢壽春縣今安豐路也

潘佑元康見上馬

嚴續肺附相見漢書劉向通青傳肝肺

張易菟我魏古通菟音烏

郭廷謂第十筆橋通也字笮又音昨以竹索為

林仁肇擿揚音剔擿也字笮又音昨以竹索為

盧絳新淦淦水出焉淦從水金聲古暗切江軍

陳喬脫屣屣音從孟不躡根也屣所寄切

李元清第二趨音驕走

魏岑怵紀見上怵元

元宗子從善第三悁蓋緣切悁委之悁

雜藝方士吳廷紹第四鈺錫也

潘辰紫極宮南唐近事辰後欲傳其法於人夢其

耿先生燭作火乾也亦方山在仙翁所居有丹井一

節義史漢志披圖牒札也

吳媛字媛又音媛女婿也

浮屠第十身南今音呼天竺音蓋身毒音轉為天大夏東

契丹旃禮俗作

高麗倭音丘慈○己上加詳者幸觀者審焉

龜茲音丘慈○己上加詳者幸觀者審焉

牛頭山在城南三

南唐書音釋

南唐書音釋

南唐書目錄

卷一

烈祖本紀

卷二

元宗本紀

卷三

後主本紀

卷四

宋齊丘列傳

卷五

周徐查邊列傳

卷六

周柴何王張馬游刁列傳

卷七

徐高鍾常史沈三陳江毛列傳

卷八

三徐三王二朱胡申屠喬睦列傳

卷九

劉高盧陳李廖列傳

卷十

張李皇甫江歐列傳

卷十一

馮孫廖彭列傳

卷十二

孟陳韓朱列傳

卷十三

劉潘李嚴張龔列傳

卷十四

郭張林盧蒯二陳列傳

卷十五

周鄭李三劉江汪郭伍蕭李盧朱王魏列傳

卷十六

后妃諸王列傳

卷十七

雜藝方士節義列傳

卷十八

浮屠契丹高麗列傳

南唐書卷第一

宋陸游務觀

烈祖本紀第一

烈祖光文肅武孝高皇帝名昇字正倫小字彭奴徐州人姓李氏唐憲宗第八子建王恪之玄孫恪生超早卒超生志仕為徐州判司卒官因家焉志生榮榮性謹厚喜從浮屠遊多晦跡精舍時號李道者帝以光啓四年十二月二日生於彭城六歲而孤遇亂伯父球攜帝及母劉氏避地淮泗至濠州乾寧二年淮南節度使楊行密見而奇之養以為子行密長子渥惡帝不以為兄弟行密乃以與大將徐溫曰是兒狀類非常吾度渥終不能容故以乞汝遂冒姓徐氏名知誥帝事溫盡子道溫妻李氏以其同姓鞠養甚至及長身七尺方顙隆準脩上短下語聲如鍾精采鑠人常緩步而從者疾行莫能及溫有疾與其婦晨夜侍旁不去溫益愛之行密亦謂溫曰知誥雋傑諸將子皆不逮也天祐六年六月自元從指揮使遷昇州防遏使兼樓船軍使治戰艦于昇七年五月授昇州副使知州事九年副柴再用平宣州以功遷昇州刺史時江淮初定守令皆武夫專事軍旅帝獨褒廉吏課農桑求遺書招延四方士大夫傾身下之雖以節儉自勵而輕財好施無所愛吝以宋齊丘王令謀王翊主論議曾禹張洽孫飭徐融為賓客馬仁裕周宗曹棕為親吏十一年加檢校司徒始城昇州十四年五月城成溫來觀喜其制度壯麗徙治焉而以帝為檢校太保潤州團練使帝本意在宣州不悅時溫子

知訓以內外馬步都軍副使專制楊氏驕淫失衆宋齊丘納說曰知訓日暮且敗是行天所贊也十五年朱瑾殺知訓馬仁裕自蒜山渡馳告帝帝即日帥師入廣陵定亂遂代知訓為淮南節度行軍副使內外馬步都軍副使勤儉寬簡盡反知訓之政上下悅服吳王建國以帝為左僕射參政事國人謂之政事僕射藥刺亂之後曾未期歲紀綱憲度粲然並舉溫雖遙執國政而人情頗已歸屬于帝有徐玠者事溫為金陵行軍司馬工揣摩掉闔密說溫曰居中輔政豈宜假之它姓請更用嫡子知詢帝刺知皇恐表乞罷政事出鎮江西表未上而溫疾亟遂止溫卒知詢嗣為金陵節度使諸道副都統數與帝爭權帝乃使人誘之來朝留為左統軍悉奪其兵而帝以太尉中書令出鎮金陵如溫故事吳命帝開大元帥府置僚屬進封齊王用天子制度改名誥

昇元元年冬十月吳帝禪位乎我甲申即皇帝位改吳天祚二年為昇元元年國號齊以十二月二日為仁壽節尊吳帝為高尙思玄弘古讓皇帝上冊稱受禪老臣誥追尊考溫為太祖武皇帝丙申以平章事張延翰為右僕射兼門下侍郎同平章事門下侍郎張居詠中書侍郎李建勳皆為同平章事以建康為西都廣陵為東都改尙書省為尙書都省東都尙書省為留守院丙戌改齊明門為朝元門丁亥封弟知證為江王知諤為饒王戊子降吳太子璉為弘農郡公辛卯降吳建安王珙江夏王璘等十一人爵一等而加官增戶邑詔獄訟未經本處論決者毋得詣闕

訴乙未降吳公主為國君甲午立王后宋氏為皇后
 丙申封女弟杞國君為廣德長公主庚子遣使如漢
 閩吳越荆南告即位辛丑追封吳歷陽公濛為臨川
 王諡曰靈以禮改葬戊申封子景通為吳王諸道副
 元帥判六軍諸衛事十一月庚戌朔改東都舊第為
 崇德宮癸丑改承宣院為宣徽院丙辰追冊故妃魏
 國君楊氏為順妃丁巳追封長子景遷為高平郡王
 長女為豐城公主改辭狀司為清訟院立姪景邁為
 晉陵郡公景遜為上饒郡公景邈為桂楊郡公景逸
 為平陽郡公封女五人為盛唐太和永興建昌玉山
 公主戊午立子景遂為吉王景達為壽陽郡公以景
 遂為東都留守江都尹赴東都已未陞東都海陵縣
 為泰州割鹽城泰興如臯興化縣屬焉丁卯高從誨
 表請置邸建康從之己巳吳越王使將軍袁韜來賀
 即位乙亥追封故高平王景遷妃吳上饒公主為燕
 國君諡貞莊十二月庚寅上太祖武皇帝陵曰定陵
 追尊高祖以下皆為公王而稱宗配皆稱國君及妃
 墓皆稱陵惟武皇帝之配李氏曰明德皇后丙午有
 星孛北方
 昇元二年春正月己酉朔日有食之避殿停朝賀甲
 子高從誨使龐守規來賀即位甲戌詔臣僚三品以
 上追贈父母將相贈三世二月壬戌閩使內客省使
 朱文進來賀即位夏五月讓皇屢請徙居南平王李
 德誠等亦引漢隋故事有請戊午改潤州州治為丹
 陽宮以平章事李建勳充迎奉讓皇使己未漢使集
 賢殿學士鄒禹謨來賀即位甲寅徙讓皇居丹陽宮

丁卯廣濟倉災焚米二十萬石作渾天儀六月庚辰
 月入太微西華門犯右執法辛巳犯東垣上相甲申
 陞池州為康化軍是月高麗使正朝廣評侍郎柳勳
 律來朝貢秋七月壬申以左丞相宋齊丘為平章事
 八月戊寅陞洪州瀟灘鎮為清江縣不隸州丁亥契
 丹使梅里祿盧古來聘冬十月丙子立太學命刪定
 禮樂癸未新羅使來朝貢壬辰命吳王璟勒步騎八
 萬講武銅駝橋十二月辛丑讓皇殂詔不視朝二十
 七日帝率百官素服舉哀是歲徙吳王璟為齊王
 昇元三年春正月庚戌江王知證饒王知諤表請帝
 復姓李氏不許癸亥右丞相齊丘平章事居詠建勳
 樞密使同平章事宗等表請復姓甲子御札詳議復
 姓乙丑齊丘等議宜如所請從之丙寅至壬申齊王
 璟等三上尊號曰應乾紹聖文武孝明皇帝不許詔
 曰迺者干戈相尋地蕪而不藝桑殞而弗蠶衣食日
 耗朕甚閔之民有嚮風來歸者授之土田仍給復三
 歲二月乙亥改太祖武皇帝廟號義祖己卯帝御興
 祥殿復姓為考妣發哀與皇后皆服斬縗居廬如始
 喪禮服考妣喪各二十七日凡五十四日不視朝旦
 算臨詔國事委宋齊丘惟軍旅以聞羣臣固諫詔以
 墨纒聽政帝初欲更名昂以犯文宗諱乃名晃或云
 朱全忠名也又更名坦御史王鵠言字從旦犯睿宗
 諱庚寅詔更名昇甲午月犯南斗第六星乙未契丹
 使曷魯來以兄禮事帝蜀使來賀即位追尊高祖建
 王恪曰定宗孝靜皇帝貞妃程氏曰貞靜皇后曾祖
 超曰成宗孝平王配崔氏曰平貞妃祖志曰惠宗孝

安王配盧氏曰安莊妃考榮曰慶宗孝德皇帝配劉氏曰德恭皇后庚午作南郊行宮于閏夏四月庚辰朝享于太廟辛巳有事于南郊以高祖神堯皇帝配用上辛也大赦百官進位將士勞賜有差民三年藝桑及三千本者賜帛五十疋每丁墾田及八十畝者賜錢二萬皆五年勿收租稅詔曰朕以眇躬託于民上常懼弗類以羞高祖太宗之遺業羣公卿士顧欲舉上尊號之禮朕甚不取其勿復以聞戊子進封李德誠趙王徐知證韓王知諤梁王辛亥進封景遂壽王景達宣城王丙寅以齊王璟為諸道兵馬大元帥丁未吳越王使左武衛上將軍沈韜文荆南高從誨使王崇嗣來賀南郊作北郊于玄武湖西熒惑犯月秋七月丙午放諸州所獻珍禽奇獸于鍾山命有司作昇元格與吳令竝行甲寅歲星晝見自五月不雨至于閏七月冬十月丁丑御後樓閱戰馬

昇元四年春二月詔罷營造力役毋妨農時三月丁未頒中正曆曆官陳承勛所撰也丙戌漢人閩人來聘夏五月晉安州節度副使李金全來降六月癸亥罷宣州歲貢木瓜雜果太師中書令趙王李德誠卒秋八月立齊王璟為皇太子仍兼大元帥錄尚書事璟固讓從之丁卯月掩歲星九月戊辰契丹使梅里掠姑米里來聘獻狐白裘冬十月癸巳朔日熒惑填歲星聚于南斗壬寅以齊王璟讓儲貳赦殊死以下京師賜脯內外諸軍給優賜禁表奏言聖曆二字違者以大不敬論乙巳詔幸東都命齊王璟監國庚戌帝自保德門御舟辛亥次迎鑾鎮甲寅至東都入建

元門帝感念疇咎泫然流涕不已遣使問東畿士民不能自存者己未高麗使廣評侍郎柳兢質來貢方物十一月乙丑宴羣臣于崇德宮故第也以聽事為光慶殿庚辰改東都文明殿為乾元殿英武殿為明光殿應乾殿為聖拱殿朝陽殿為福昌殿積慶宮為崇道宮西都崇英殿為延英殿凝華內殿前為昇元殿後為雍和殿興祥殿為昭德殿積慶殿為穆清殿乙酉賜東畿高年疾苦憚獨米人二石漢使都官郎中鄭翺閩使客省使葛裕吳越使刑部尚書楊嚴來賀仁壽節十二月丙申帝至自東都昇元五年春二月己未殺泰州刺史褚仁規五月戊辰契丹使來秋七月詔曰右僕射兼中書侍郎同平章事監脩國史李建勳幸處台司且聯戚里靡循紀律敢贖彝章其罷歸私第八月有星孛于天市長數尺七十日沒遣使振貸黃州旱傷戶口是歲吳越水民就食境內遣使振恤安集之

昇元六年春正月甲子月犯填星退行在畢閏月甲申朔改天長制置使為建武軍庚寅漢使區延保來聘癸巳閩使尚食使林弘嗣來聘都下大水秦淮溢東都火焚數千家二月己丑以左丞相太保宋齊丘知尚書省事初齊丘累求預政帝許中書視事又以兩省事多委給事舍人劇務多在尚書省又求知省事許之夏五月左丞相太保宋齊丘罷為鎮南軍節度使六月常宣歙三州大雨漲溢漢使蕭規來告哀廢朝三日庚午契丹使掠姑米里來聘獻馬五駒大蝗自淮北蔽空而至辛未命州縣捕蝗瘞之庚辰熒

威犯房次將辛巳禁節度刺史給攝署牒秋八月甲申漢使法物使公孫惠來謝襲位九月庚寅頒昇元刪定條冬十月詔曰前朝失御四方崛起者衆武人用事德化壅而不宣朕甚悼焉三事大夫其爲朕舉用儒者罷去苛政與吾民更始十二月閩使徐弘績漢使滕紹英吳越使右武衛大將軍蔣璠來賀仁壽節

昇元七年春正月契丹使達羅千等二十七人來聘獻馬三百羊三萬五千二月庚午帝崩于昇元殿年五十六十一月壬寅葬永陵帝臨崩謂齊王璟曰德昌宮儲戎器金帛七百萬汝守成業宜善交鄰國以保社稷吾服金石欲延年反以速死汝宜視以爲戒帝生長兵間知民厭亂在位七年兵不妄動境內賴以休息性節儉常躡蒲履用鐵盆盜暑月寢殿施青葛帷左右官婢裁數人服飾樸陋建國始卽金陵治所爲宮惟加鴟尾設闌檻而已終不改作元宗爲太子欲得杉木作板障有司以聞帝曰杉木固有之但欲作戰艦以竹作障可也江淮間連年豐樂兵食盈溢羣臣多請恢拓境土帝歎息曰吾少在軍旅見兵之爲民害深矣誠不忍復言使彼民安吾民亦安矣吳越國大火焚其宮室帑藏甲兵幾盡將帥皆言棄其弊可以得志帝一切不聽遣使厚持金幣唁之仁厚恭儉務在養民有古賢主之風焉

論曰昔馬元康胡恢皆嘗作南唐書自烈祖以下元康謂之書恢謂之載記蘇丞相頌得恢書而非之曰夫所謂紀者蓋摘其事之綱要繫於歲月屬於時君

秦莊襄王而上與項羽皆未嘗有天下而史遷著於本紀范曄漢書又有皇后紀以是質之言紀者不足以別正閏陳壽三國志吳蜀不稱紀是又非可法者也蘇丞相之言天下之公言也今取之自烈祖而下皆爲紀而用史遷法總謂之南唐紀云

南唐書卷第一

南唐書卷第二

元宗本紀第二

元宗明道崇德文宣孝皇帝名璟字伯玉烈祖長子母曰宋皇后初名景通風度高秀幼工屬文起家駕部郎中累進諸衛大將軍烈祖為齊王立為王太子固讓昇元初烈祖受禪封吳王徙齊王四年八月立為皇太子復固讓曰前世以嫡庶不明故早建元夏示之定分如臣兄弟友愛尚何待此烈祖為下詔稱其守廉退之風師忠貞之節有子如此予復何憂赦殊死以下臣民奉踐齊王如太子禮七年二月烈祖病疽秘之人皆莫知庚午疾亟大醫吳廷紹密遣人告帝帝馳入宮侍疾於東閣是夕烈祖崩秘不發喪而下詔命帝監國大赦頒賚有差丙子始宣遺詔保大元年春三月己卯朔烈祖殂己旬日帝猶未嗣位方泣讓諸弟奉化節度使周宗手取袞冕衣帝曰大行付陛下神器之重豈得固守小節是日即皇帝位大赦改元不待逾年遽改元識者非之百官進位二等將士皆有賜蠲民逋負租稅賜繅算孤獨粟帛尊皇后為皇太后立妃鍾氏為皇后以鎮南軍節度使宋齊丘為太保兼中書令奉化軍節度使周宗為侍中徙封壽王景遂為燕王宣城王景達為鄂王閩使來吊祭升濠州為定遠軍秋七月徙燕王景遂為齊王鄂王景達為燕王仍以景遂為諸道兵馬元帥居東宮景達為副元帥仍詔中外以兄弟傳國之意八月乙卯立弟景揚為保寧王冬十月庚戌有星孛于東方嶺南妖賊張遇賢犯虔州詔遣洪州營屯都

虞候嚴恩帥師討之以通事舍人邊鎬監其軍其後擒遇賢及其黨黃伯雄曹景全斬于金陵市十二月以太保中書令宋齊丘為鎮海軍節度使保大二年春正月侍中周宗罷為鎮南軍節度使左僕射兼門下侍郎平章事張居詠罷為鎮海軍節度使辛巳詔齊王景遂總庶政惟樞密副使魏岑查文徽得奏事餘非召對不得見初烈祖尤愛景遂帝奉先志欲傳以位故有是詔宋齊丘蕭儼皆上書切諫未見聽侍衛都虞候賈崇叩閣請見曰臣事先帝三十年孜孜詢察下情猶患壅隔陛下始即位所委何人而頓與臣下疎絕如此因嗚咽流涕帝感悟命坐賜食遂收所下詔夏五月閩將朱文進弒其君曦自稱閩王遣使來告帝囚其使將討之議者謂閩亂由王延政當先討乃釋閩使遣還秋九月庚午朔日有食之冬十二月樞密院使查文徽請討王延政詔以文徽為江西安撫使往覘建州文徽固請乃以邊鎬為行營招討共攻延政敗績于蓋竹保大三年春二月以何徽洙為福建道行營招討祖全恩為應援使姚鳳為諸軍都監會查文徽進討秋七月星見而風雨八月甲子朔日有食之克建州執王延政歸于金陵拜羽林大將軍升建州為永安軍冬十月皇太后宋氏殂是歲升建州延平津為劍州以建州之劍浦汀州之沙縣隸焉保大四年春正月以青陽公宋齊丘為太傅兼中書令昭武軍節度使李建勳為右僕射兼門下侍郎及中書侍郎馮延巳皆平章事夏五月以樞密使陳覺

為福建宣諭使使諭李弘義入朝不克覺擅發汀建撫信州兵趨福州帝遂命王崇文魏岑馮延魯會攻福州秋九月淮南蟲食稼除民田稅冬十月庚辰圍福州改漳州為南州

保大五年春正月立齊王景遂為皇大弟徙燕王景達為齊王拜諸道兵馬元帥徙南昌王弘冀為燕王副元帥晉密州刺史皇甫暉棣州刺史王建來歸契丹耶律德光以滅晉來告捷且請會盟於境上帝不從遣工部郎中張易聘之請命使者如長安脩奉諸陵契丹亦不從三月己亥吳越救福州兵自海道至我師與之戰敗績諸營皆潰夏四月壬申詔即軍中斬陳覺馮延魯餘將帥皆赦不問已而復詔械覺延魯還都既至貸死覺流蘄州延魯流舒州五月帝聞契丹棄中原遁歸詔曰乃眷中原我之故地以李金全為北面行營招討使六月聞漢入汴兵遂不出而金全猶不罷秋閏七月丁丑夜有彗出東方近濁其尾迹近側掃少微及長垣至八月壬辰乃沒八月太傅兼中書令宋齊丘罷為鎮南軍節度使

保大六年夏六月庚寅朔日有食之九月漢護國軍節度使李守貞間道表求援師以鎮海軍節度使李金全為北面行營招討使救河中師次沂州冬十一月退保海州

保大七年春正月淮北盜起以神衛都虞候皇甫暉將軍張巒蕭處實監軍散騎常侍張義方帥師萬人出海泗招降納亳州蒙城鎮將咸師朗等以歸夏六月癸酉朔日有食之冬十月我師度淮攻正陽敗績

十二月泉州刺史劉從効兄南州刺史從願殺刺史董思安據南州自稱刺史我不能問因升泉州為清源軍以從効為節度使

保大八年春正月李金全始罷北面行營招討使二月福州遣諜者詣建州留後查文徽告吳越戍卒亂殺李弘義棄城去文徽信其言襲福州大敗被執而別將建州刺史陳誨以戰棹敗福州兵執其將馬先進俘於金陵秋七月歸馬先進於吳越而求查文徽八月尚書郎周濬等三人奔漢九月楚朗州節度使馬希萼表請師詔加同平章事賜以鄂州今年租稅命楚州團練使何徽洙帥師援之冬十月越歸查文徽十一月甲子朔日有食之十二月馬希萼攻陷潭州弒其君馬希廣楚將李彥溫劉彥瑤各以千人來歸

保大九年春二月楚王希萼使掌書記劉光翰來貢方物三月壬戌朔以右僕射孫晟客省使姚鳳為楚王策禮使又以洪州營屯都虞候邊鎬為湖南安撫使便宜進封淮南饑夏五月辛未有星大如五升器自西南流墜西北光燭地聲如雷六月楚靜江軍指揮使王達執朗州節度使馬光惠歸於金陵推辰州刺史劉言為朗州留後來請命秋九月楚將徐威等廢其君希萼命邊鎬出萍鄉以討楚亂冬十月壬寅武安留後馬希崇請降鎬入潭州癸丑武昌節度使劉仁贍帥舟師取岳州湖南遂平南漢來攻陷郴州周兗州節度使慕容彥超來乞援師從之
保大十年春正月陞洪州高安縣為筠州以清江萬

載上高三縣隸焉援兗州之師敗績于沐陽周人執我指揮使燕敬權二月周人歸敬權使來言曰吾賊臣背叛爾國助之豈長計哉且使潁州郭瓊遺我壽州劉彥貞書曰自古有國皆惡叛臣貴邦何爲常事招誘吳中多士無乃淺圖帝頗愧其言以翰林學士江文蔚知禮部貢舉放進士王克貞等三人及第旋復停貢舉三月以太弟太保馮延巳爲左僕射前鎮海節度使徐景運爲中書侍郎及右僕射孫忌並同平章事帝以南漢乘楚亂據桂宜等州將取之以知全州張巒兼桂州招討使夏四月丙戌朔日有食之命統軍侯訓帥五千人會張巒攻桂州敗績于城下訓死之巒收餘衆保全州周興順指揮使白進福以族來歸秋九月召朗州劉言入朝冬十月劉言將王逵周行逢攻潭州壬辰拔益陽寨戍將李建期死之丙申潭州節度使邊鎬棄城遁辛丑劉言將蒲公益攻岳州刺史宋德權監軍任鎬棄城遁十一月劉言盡據故楚地詔流邊鎬于饒州斬宋德權任鎬于太社斬裨將申洪泰尹建于都門外平章事馮延巳孫忌皆罷爲左右僕射十二月零都令趙暹奔周洪州大都督楚王馬希萼來朝留不遣是歲大旱保大十一年春三月以左僕射馮延巳同平章事金陵火逾月焚官寺民廬數千間復設貢舉夏六月不兩井泉竭涸淮流可涉旱蝗民饑流入周境冬十月築楚州白水塘以溉屯田遂詔州縣陂塘湮廢者皆脩復之於是力役暴興楚州常州爲其帝使親吏車延規董其役發洪饒吉筠州民牛以往吏緣爲姦強

奪民田爲屯田江淮騷然百姓以數丈竹去節焚香於中仰天訴冤者不可勝數知制誥徐鉉因奏事白之帝曰吾國兵數十萬安肯不食捍邊事有大利則舉國排之奈何鉉又力陳其弊帝乃遣鉉行視利害鉉至楚州悉取所奪田還民詰責車延規欲榜之百姓感悅而帝左右交譖以爲擅作威福帝大怒趣歸將沉之江中既至怒少解流舒州而白水塘等役亦賴以止

保大十二年春正月有大星貫于西北聲如雷二月命吏部侍郎朱鞏知禮部貢舉自十一年六月至于今年三月大饑疫命州縣鬻粥食餓者秋七月契丹使其舅來聘夜宴清風驛盜斬契丹使亡去捕之不得或以爲周人也自是契丹遂不至

保大十三年春二月以中書侍郎知尚書省嚴續爲門下侍郎平章事夏六月周攻秦鳳蜀使閒使來告難周下詔罪狀我遣將李穀王彥超韓令坤等侵我淮南攻自壽州帝乃以神武統軍劉彥貞爲北面行營都部署帥師三萬赴壽州奉化節度使同平章事皇甫暉爲北面行營應援使常州團練使姚鳳爲應援都監帥師三萬屯定遠縣召鎮南節度使宋齊丘入朝謀難冬十二月以安定郡公從嘉爲沿江巡撫使是歲天裂東北其長二十丈

保大十四年春正月壬寅周帝親征劉彥貞與周師戰于正陽敗績彥貞戰死二月周師兼道襲清流關皇甫暉敗保滁州周師破城俘暉及姚鳳以歸壬戌有星孛于參芒東南指帝遣泗州牙將王承朗奉書

至徐州求成于周稱唐皇帝奉書于大周皇帝願以
兄事歲獻方物大弟景遂亦移書周將帥皆不報己
卯遣翰林學士鍾謨文理院學士李德明使周奉表
至下蔡行在貢金器千兩銀器五千兩錦綺紋帛二
千疋及御衣犀帶茶藥又奉牛五百頭酒二千石犒
軍請罷兵乙酉周師陷東都執副留守馮延魯丁亥
左神衛使徐象等十八人自壽州奔周天長制置使
耿謙以城降于周遣園苑使尹廷範護遷讓皇之族
于潤州廷範殺其男子六十人誅廷範以謝國人周
師陷泰州刺史方訥棄城遯帝遣間使求援于契丹
至淮北爲周人所執吳越侵常州宣州靜海制置使
姚彥洪奔吳越三月遣司空孫晟及禮部尚書王崇
質使周削去帝號奉表請爲外臣猶不許光州兵馬
都監張延翰以城降于周刺史張紹遯還丁酉周師
陷舒州刺史周弘祚赴水死蘄州將李福殺知州王
承雋降于周戊戌天成軍使蔡暉自壽州奔周周師
陷和州詔斬李德明於都市坐奉使請割地也吳越
陷常州之郭執團練使趙仁澤燕王弘冀遣龍武都
虞候柴克宏救常州壬子大敗吳越兵于常州斬獲
萬計俘其將數十至潤州弘冀悉斬之壬戌壽州軍
校陳延貞等十三人奔周是月命諸道兵馬元帥齊
王景達拒周夏四月復泰州五月周帝北還秋七月
復東都舒蘄光和滁州惟壽州之圍愈急冬十月周
人害我行人孫晟從者二百人皆死獨貸鍾謨以爲
耀州司馬是歲詔省淮南屯田之害民者
保大十五年春二月乙亥周帝親征齊王景達自濠

州遣邊鎬許文稹朱元帥兵數萬援壽州景達用監
軍使陳覺言謀奪朱元兵以楊守忠代之元遂舉寨
降周裨將時厚卿獨不從見殺壬辰周師盡破我諸
寨執邊鎬許文稹楊守忠餘衆悉奔潰景達亦遯歸
金陵是役也所喪四萬人三月誅朱元妻子丁未壽
州劉仁贍病革副使孫羽等代仁贍署表降于周辛
亥晝晦雨沙如霧夏四月周帝北還冬十一月周帝
復親征十二月濠州刺史郭廷謂泗州刺史范再遇
皆舉城降帝知東都必不守遣使焚其官私廬舍徙
其民于江南周師入揚州丁丑周師攻陷泰州都城
大火一日數發
交泰元年春正月改元中興丙戌周師陷海州壬辰
周師陷靜海軍丁未陷楚州防禦使張彥卿兵馬都
監鄭昭業死之周師屠其城焚廬舍殆盡周師次雄
州刺史易文贊舉城降州天長縣也三月大赦改元
交泰以皇太弟景遂爲天策上將軍晉王立燕王弘
冀爲皇太子參治朝政丁亥周帝次揚州辛卯遂至
迎鑾鎮壬辰耀兵江口帝懼周師南渡遣樞密使陳
覺奉表貢方物請傳位太子弘冀以國爲附庸周帝
始采唐報回紇可汗故事答帝璽書稱皇帝致書敬
問江南國主帝遣閣門承旨劉承遇上表稱唐國主
盡獻江北郡縣之未陷者鄂州漢陽汧川二縣在江
北亦獻焉歲輸土貢數十萬乞海陵鹽監南屬不許
後歲給贍軍鹽三十萬石庚子周帝賜書許帝奉正
朔罷兵而不許傳位太子甲辰遣平章事馮延己等
使周犒軍及買宴夏五月下令去帝號稱國主去交

泰年號稱顯德五年置進奏邸于汴都凡帝者儀制皆從貶損改名景以避周信祖諱告于太廟告廟之日金陵大霧通夕不解左僕射平章事馮延巳罷爲太子太傅門下侍郎平章事嚴續罷爲太子少傅己酉周帝遣太府卿馮延魯衛尉少卿鍾護賜國主御衣金玉帶錦帛羊馬及犒軍帛十萬凡士卒俘于周者皆遣還凡五千七百五十人冬十月甲午周帝歸我臣馮延魯許文稹邊鎬周廷構國主皆不復用十一月己亥暴宋齊丘陳覺李徵古罪放齊丘歸九華山覺安置饒州徵古削官爵覺徵古尋皆賜自盡齊丘明年正月亦幽死

顯德六年秋七月鑄大錢文曰永通泉貨一當十與舊錢並行又鑄唐國通寶錢二當開通錢之二九月丙午太子弘冀卒冬十一月建洪州爲南都南昌府建隆元年春正月遣何莅誅鍾護于饒州誅張巒于宣州大宋太祖皇帝受周禪放江南降將三十四人來歸二月始鑄鐵錢三月遣使朝賀于京師秋七月遣禮部郎中龔慎儀朝于京師貢乘輿服御自是貢獻尤數歲費以萬計冬十月宋楊州節度使李重進叛來求援不許十一月丁未太祖平李重進國主遣右僕射嚴續犒軍蔣國公從鎰戶部侍郎馮延魯朝貢

建隆二年春二月國主遷於南都立吳王從嘉爲太子留金陵監國國主舟行旌麾仗衛六軍百司凡千餘里不絕所過勞問高年疾苦大宴于當塗至宋家泖暴風飄國主舟幾至北岸翼日從官皆棄輕舟奔

問三月國主至南都太祖以國主遷都遣通事舍人王守貞來勞問南都迫隘羣下皆思歸國主亦悔遷北望金陵鬱鬱不樂澄心堂承旨秦承裕常引屏風障之復議東遷未及行國主寢疾不復進膳惟啜蔗漿嗅藕華六月己未疾革親書遺令留葬西山累土數尺爲墳且曰違吾言非忠臣孝子夕有大星貫于南都庚申殂于長春殿年四十六後主不忍從遺令迎喪還秋八月至金陵丁未殯于宮中萬壽殿告哀于京師且請追復帝號太祖許之

三年正月戊寅葬順陵元宗多才藝好讀書便騎善射在位幾二十年慈仁恭儉禮賢睦族愛民字孤裕然有人君之度少喜栖隱築館于廬山瀑布前蓋將終焉迫于紹襲而止然自以唐室苗裔詠於斥大境土之說及福州湖南再喪師知攻取之難始議弭兵務農或曰願陛下十數年勿復用兵元宗曰兵可終身不用何十數年之有會周師大舉寄任多非其人折北不支至於蹙國降號憂悔而殂悲夫

論曰元宗舉閩楚之師境內虛耗及契丹滅晉中原有隙可乘而南唐兵力國用既已弗支熟視而不能出世以爲恨予謂不然唐有江淮比同時割據諸國地大力強人材衆多且據長江之險隱然大邦也若用得其人棄閩楚昏亂一舉而平之然後東取吳越南下五嶺成南北之勢中原雖欲睥睨豈易動哉不幸諸將失律貪功輕舉大事弗成國勢遂弱非始謀之失所以行之者非也且陳覺爲延魯輩用師閩楚猶喪敗若此若北鄉而爭天下與秦晉趙魏之師戰

于中原角一旦勝負其禍可勝言哉故予具論其實
如此後之覽者得以考觀焉

南唐書卷第三

後主本紀第三

後主名煜字重光元宗第六子初名從嘉母曰光穆皇后鍾氏從嘉廣額豐頰駢齒一目重瞳子文獻太子惡其有奇表從嘉避旤惟覃思經籍歷封安定郡公鄭王文獻太子卒徙吳王以尚書令知政事居東宮建隆二年遂立為太子元宗南巡太子留金陵監國以嚴續殷崇義輔之張洎主牋奏六月元宗殂太子嗣立于金陵更名煜居喪哀毀幾不勝赦境內尊鍾后曰聖尊后以后父名太章也立妃周氏為國后徙信王景揚為江王鄧王從善為韓王立弟從鎰為鄧王從謙為宜春王從信為文陽郡公從度為昭平郡公從度景遷子也令諸司四品至九品無職事者日二員待制於內殿以右僕射嚴續為司空平章事餘進位有差遣中書侍郎馮延魯于京師奉表陳龔位太祖賜詔答之自是始降詔秋九月太祖遣鞍轡庫使梁義來吊祭冬十月太祖遣樞密承旨王文來賀龔位初元宗雖臣于周惟去帝號他猶用王者禮至是國主始易紫袍見使者使退如初服十二月置龍翔軍以教水戰

建隆三年春三月遣馮延魯入貢京師泉州節度使中書令晉江王劉從効卒子紹鑑自稱留後四月泉州將陳洪進執紹鑑歸金陵推副使張漢思為留後六月遣客省使翟如璧入貢京師太祖放降卒千人南還冬十一月遣水部郎中顧彝入貢京師

乾德元年春正月太祖遣使來賜羊馬橐駝三月太

祖出師平荆湖國主遣使犒軍夏四月泉州副使陳洪進廢張漢思自稱權知軍府來告國主即以洪進為節度使秋七月太祖詔國主遣還顯德以來中朝將士在江南者及令揚州民遷江南者還其故土十月二月國主表乞罷詔書不名之禮不從

乾德二年春三月行鐵錢每十錢以鐵錢六權銅錢四而行其後銅錢遂廢民間止用鐵錢末年銅錢一直鐵錢十比國亡諸郡所積銅錢六十七萬緡命吏部侍郎脩國史韓熙載知貢舉放進士王崇古等九人國主命中書舍人徐鉉履試舒雅等五人雅等不就國主乃自命詩賦題以中書官蒞其事五人皆見黜秋八月太祖於江北置折博務禁商旅過江九月立子仲寓為清源郡公仲宣宣城郡公十月甲辰仲寓卒國后周氏已寢疾哀傷增草遂亦卒十一月太祖遣作坊副使魏丕來吊祭

乾德三年夏五月司空平章事嚴續罷為鎮海軍節度使秋九月兩沙聖尊后鍾氏殂冬十月太祖遣染院使李光圖來吊祭

乾德四年秋八月國主遣龔慎儀持書使南漢約與俱事中秋九月慎儀至番禺被執

乾德五年春命兩省侍郎諫議給事中中書舍人集賢勤政殿學士更直光政殿召對咨訪率至夜分

開寶元年春三月戊申以樞密使右僕射殷崇義為左僕射同平章事境內旱太祖賜米麥十萬石冬十一月立國后周氏

開寶二年三月以游簡言為左僕射兼門下侍郎同

平章事夏五月簡言卒是歲右僕射同平章事殷崇義罷爲潤州節度使同平章事

開寶三年夏太白晝見二日相觸

開寶四年冬十月國主聞太祖滅南漢屯兵于漢陽大懼遣太尉中書令鄭王從善朝貢稱江南國主請罷詔書不名從之有商人來告中朝造戰艦數千艘在荆南請密往焚之國主懼不敢從

開寶五年春二月國主下令貶損儀制改詔爲教中書門下省爲左右內史府尙書省爲司會府御史臺爲司憲府翰林院爲文館樞密院爲光政院大理寺爲詳刑院客省爲延賓院官號亦從改易以避中朝初金陵殿闕皆設鳴吻元宗雖臣于周猶如故乾德後遇中朝使至則去之使還復設至是遂去不復用降諸弟封王者皆爲公從善楚國從鎰江國從謙鄂國內史舍人張佖知禮部貢舉放進士楊遂等三人清耀殿學士張洎言佖多遺才國主命洎考覆遺不中第者於是又放王倫等五人閏月癸巳太祖命進奉使楚國公從善爲泰寧軍節度使留京師賜第汴陽坊示欲召國主入朝也國主遣戶部尙書馮延魯謝從善爵命延魯至京師疾病不能朝而歸

開寶六年夏太祖遣翰林院學士盧多遜來國主聞太祖欲興師上表願受爵命不許以司空殷崇義知左右內史事冬十月內史舍人潘佑上書切諫佑素與戶部侍郎李平交厚國主以爲事皆由平始先以平屬吏遣使收佑佑自殺平縊死獄中皆徙其家外

郡

甲戌歲秋國主上表求從善歸國不許太祖遣閣門使梁迥來使從容言曰天子今冬行柴燎之禮國主宜往助祭國主不答九月丁卯復遣知制誥李穆爲國信使持詔來曰朕將以仲冬有事園丘思與卿同閱犧牲且諭以將出師宜早入朝之意國主辭以疾且曰臣事大朝冀全宗祀不意如是今有死而已時太祖已遣潁州團練使曹翰率師先出江陵宣徽南院使曹彬侍衛馬軍都虞候李漢瓊賀州刺史田欽祚率舟師繼發及是又命山南東道節度使潘美侍衛步軍都虞候劉遇東上閣門使梁迥率師水陸並進與國信使李穆同行冬十月國主遣江國公從鎰貢帛二十萬疋白金二十萬斤又遣起居舍人潘慎修貢買宴帛萬疋錢五百萬築城聚糧大爲守備閏十月王師拔池州國主於是下令戒嚴去開寶紀年稱甲戌歲辛未王師進拔蕪湖及雄遠軍吳越亦大舉兵犯常潤國主遺吳越王書曰今日無我明日豈有君一旦明天子易地賞功王亦大梁一布衣耳吳越王表其書于朝王師次采石磯作浮橋成長驅渡江遂至金陵每歲大江春夏暴漲謂之黃花水及王師至而水皆縮小國人異之國主以軍政委皇甫繼勳機事委陳喬張洎又以徐元瑀刁衍爲內殿傳詔而遽書警奏日夜狎至元瑀等輒屏不以聞王師屯城南十里閉門守陴國主猶不知也初烈祖有國凡民產二千以上出一卒號義軍分籍者又出一卒號生軍新置產亦出一卒號新擬軍客戶有三丁者出一卒號拔山軍元宗時許郡縣村社競渡每歲重

午日官閱試之勝者給綵帛銀椀皆籍姓名至是盡取爲卒號凌波軍民奴及贅壻號義勇軍募豪民以私財招聚亡賴亡命號自在軍至是又大蒐境內自老弱外皆募爲卒號排門軍民間又有自相率拒敵以紙爲甲農器爲兵器號白甲軍凡十三等皆使捍禦然實皆不可用奔潰相踵

乙亥歲春二月壬戌王師拔金陵關城三月丁巳吳越攻我常州權知州事禹萬誠以城降誅神衛都指揮使皇甫繼勳彗出五車色白長五尺夏六月轉見西方犯太微六十日滅王師及吳越圍潤州留後劉澄以城降吳越遂會王師圍金陵洪州節度使朱令贇帥勝兵十五萬赴難旌旗戰艦甚盛編木爲棧長百餘丈大艦容千人令贇所乘艦尤大擁甲士建大將旗鼓將斷采石浮橋至皖口與王師遇傾火油焚北船適北風反焰自焚我軍大潰令贇及戰權都虞候王暉皆被執外援既絕金陵益危蹙王師百道攻城晝夜不休城中米斗萬錢人病足弱死者相枕籍國主兩遣徐鉉等厚貢方物求緩兵守祭祀皆不報冬十一月白虹貫日晝晦乙未城陷將軍高彥馬承信及弟承俊帥壯士數百力戰而死勤政殿學士鍾稭朝服坐于家亂兵至舉族就死不去光政使右內史侍郎陳喬請死不許自縊死國主帥司空知左右內史事殷崇義等肉袒降于軍門明年正月辛未至京師乙亥授右千牛衛上將軍封違命侯太宗卽位加特進改封隴西公太平興國三年七月辛卯殂年四十二是日七夕也後主蓋以是日生贈太師追封

吳王葬洛陽北邙山後主天資純孝事元宗盡子道居喪哀毀杖而後起嗣位之初屬保太軍興之後國削勢弱帑庾空竭專以愛民爲急蠲賦息役以裕民力尊事中原不憚卑屈境內賴以少安者十有五年憲司章疏有繩糾過訐皆寢不下論決死刑多從末減有司固爭乃得少正猶垂泣而後許之常獵于青山還如大理寺親錄繫囚多所原釋中書侍郎韓熙載奏獄訟有司之事因圍非車駕所宜臨幸請罰內庫錢三百萬以資國用雖不聽亦不怒也殂問至江南父老有巷哭者然酷好浮屠崇塔廟度僧尼不可勝算罷朝輒造佛屋易服膜拜以故頗廢政事又置澄心堂于內苑引能文士及徐元機元榆元樞兄弟居其間中旨由之而出中書密院乃同散地兵興之際降御札移易將帥大臣無知者皇甫繼勳誅死之後夜出萬人斫營招討使但署牒遣兵竟不知何往蓋皆澄心堂直承宣命也長圍既合內外隔絕城中之人惶怖無死所後主方幸淨居室聽沙門德明雲真義倫崇節講楞嚴圓覺經用鄱陽隱士周惟簡爲文館詩易侍講學士延入後苑講易否卦賜惟簡金紫羣臣皆知國亡在旦暮而張洎猶謂北師已老將自遁去後主益甘其言晏然自安命戶部員外郎伍喬于圍城中放進士孫確等三十八人及第其所施爲大抵類此故雖仁愛足以感其遺民而卒不能保社稷云

南唐書卷第四

宋齊丘列傳第一

宋齊丘字子嵩世爲廬陵人父誠與鍾傳同起兵高駢表傳爲洪州節度使以誠副之卒官因家洪州齊丘好學工屬文尤喜縱橫長短之說烈祖爲昇州刺史齊丘因騎將姚克瞻得見暇日陪燕游賦詩以獻曰養花如養賢去草如去惡松竹無時衰蒲柳先秋落烈祖奇其志待以國士從鎮京口入定朱瑾之難常參祕畫因說烈祖講典禮明賞罰禮賢能寬征賦多見聽用烈祖爲築小亭池中以橋度至則徹之獨與齊丘議事率至夜分又爲高堂不設屏障中置灰爐而不設火兩人終日擁爐畫灰爲字旋即平之人以比劉穆之之佐宋高祖然齊丘資躁褊或議不合則拂衣徑起烈祖謝之乃已義祖獨惡其爲人每欲進拔輒不果浮沉下僚十餘年義祖末年議者多請以徐氏諸子執國政烈祖聞之亟欲自請出鎮齊丘請徐之俄而義祖自殿直軍判官擢右司員外郎進右諫議大夫兵部侍郎居中用事且倚以爲相齊丘自以資望尙淺或不爲國中所服乃告歸洪州改葬因入九華山累啓求致仕不許時元宗已爲大將軍烈祖以吳主命元宗躬往迎之於是齊丘託不得已而起遂拜中書侍郎遷右僕射平章事烈祖出鎮金陵以元宗入輔委齊丘左右之初烈祖權位日隆舉國皆知代謝之勢吳主謙恭無失德烈祖懼羣情未協欲待嗣君與齊丘議合已而都押衙周宗揣微指請急至都以禪代事告齊丘齊丘默計大議本

自己出今若遽行則功歸周宗欲因以釣名乃留與夜飲亟遣使手書切諫以爲時事未可後數日馳至金陵請斬宗以謝國人烈祖亦悔將從之徐玠固爭纔黜宗爲池州副使玠乃與李建勳等遂極言宜從天人之望復召宗還舊職齊丘由是頗見疎忌留爲諸道都統判官加司空無所關預從容而已數請退烈祖以南國給之俄而齊國建猶以勳舊爲左丞相而不預事李德誠周本自廣陵持吳帝詔來行傳禪齊丘謂德誠子建勳曰尊公吳室元勳今日掃地矣獨稱疾臥家不預勳進烈祖既受禪徐玠爲侍中李建勳爲中書侍郎同平章事周宗爲樞密使齊丘但遷司徒中懷不平及宣制至布衣之交忽抗聲曰臣爲布衣時陛下亦一刺史耳今爲天子可不用老臣矣烈祖優容之嘗夜燕天泉閣李德誠曰陛下應天順人惟宋齊丘不悅因出齊丘諷止勳進書烈祖卻之曰子嵩三十年故人豈負我者齊丘頓首謝自是爲求媚計更請降讓皇爲公侯絕吳太子璉婚久之表言備位丞相不當不聞國政又自陳爲人所間烈祖大怒齊丘歸第白衣待罪而烈祖怒已解謂左右曰宋公有才特不識大體爾孤豈忘舊臣者命吳王璟持手詔召見遂以丞相同平章事寢復委任兼知尙書省事與張居詠李建勳更日入閣議政契丹耶律德光遣使來齊丘陰謀間契丹使與晉人相攻則江淮益安密請厚其原幣遣還至淮北潛令人刺殺之契丹與晉人果成嫌隙齊丘親吏夏昌圖盜庫金數百萬特判傳輕典烈祖命斬昌圖齊丘慙稱疾求

罷省事許之遂不復朝謁帝遣壽王景遂勞問許鎮故鄉始入朝因召與宴飲齊丘酒酣輒曰陛下中興實老臣之力乃忘老臣可乎烈祖怒曰太保始以游客干朕今爲三公足矣齊丘詞色愈厲曰臣爲游客時陛下亦偏裨耳今不過殺老臣遂引去烈祖頗悔明日手詔曰朕之性子蒿所知少相親老相怨可乎拜鎮南節度使至鎮起大第窮極宏麗坊中居人皆使修飾垣屋民不堪其擾有逃去者初赴鎮烈祖曰衣錦晝行古人所貴賜以錦袍親爲著之遂服錦袍視事元宗卽位召拜太保中書令與周宗竝相齊丘之客最親厚者陳覺元宗亦以爲才馮延巳延魯魏岑查文徽與覺深相附結內主齊丘時人謂之五鬼相與造飛語傾周宗泣訴于元宗而岑覺又更相攻於是出齊丘爲鎮海軍節度使齊丘怏怏力請歸九華舊隱從之賜號九華先生封青陽公食青陽一縣租稅元宗欲傳位齊王景遂詔景遂總庶政惟魏岑查文徽得奏事餘非特召不得見國人大駭齊丘自九華上疏極論不可會言者衆元宗乃收所下詔或謂齊丘先帝勛舊不宜久弃山澤遣馮延巳召之不起遣燕王景達再持詔往乃起拜太傅中書令封衛國公賜號國老奉朝請然不得預政益輕財好客識與不識皆附之薦陳覺使福州諭李弘義入朝覺至福州不敢言而專命出兵敗事僉謂必坐誅齊丘上表待罪置不問覺亦不死齊丘方且怒韓熙載議其黨與黜之元宗不悅復使鎮洪州周侵淮北起齊丘爲太師領劍南東川節度使進封楚國公與謀難

齊丘固讓仍爲太傅建議發諸州兵屯淮泗擇偏裨可任者將之周人未能測虛實勢不敢輕進及春水生轉鑿道阻彼師老食匱自當北歸然後遣使乞盟度可無大喪敗元宗惶惑不能用又力陳割地無益與朝論頗異及明年暑雨周弃所得淮南地北歸議者謂扼險要擊可以有功且懲後齊丘乃謂擊之怨益深不如縱其歸以爲德由是周兵皆聚于正陽而壽州之圍遂不可解終失淮南方是時陳覺李徵古同爲樞密副使皆齊丘之黨躁妄專肆無人臣禮自度事定必不爲羣臣所容若齊丘專大柄則可以無患覺乃窺間言宋公造國于艱危如此陛下宜以國事一委宋公元宗意謀出齊丘大銜之會鍾謨使還挾周以爲己重所言率見聽而謨本善李德明欲爲報仇屢陳齊丘棄國危殆竊懷非望且黨與衆謀不可測元宗遂命殷崇義草詔曰惡莫甚于無君罪莫深於賣國放歸九華山而不奪其官爵初命穴墻給食俄又絕之以餒卒諡醜繆覺徵古皆誅死未幾元宗燕居見齊丘爲厲叱之不退遂遷南都後主立召其家還金陵廩給甚厚方齊丘敗時年七十三且無子若謂窺伺謀篡竊則過也特好權利尙詭譎造虛譽植朋黨矜功忌能飾詐護前富貴滿溢猶不知懼枉於要君闇於知人釁隙遂成蒙大惡以死悲夫論曰世言江南精兵十萬而長江天塹可當十萬國老宋齊丘機變如神可當十萬周世宗欲取江南故齊丘以反間死方五代之際天下分裂大亂賢人君子皆自引於深山大澤之間以不仕爲得而馮道有

重名於中原齊丘擅衆譽於江表觀其人可以知其
時之治亂矣周師之犯淮南齊丘實預議論雖元宗
不盡用然使展盡其籌策亦非能決勝保境者且世
宗豈畏齊丘機變而間之者哉蓋鍾謨自周歸力排
齊丘殺之故其黨附會爲此說非其實也予論序齊
丘事盡黜當時愛憎之論而錄其實覽者得詳焉

南唐書卷第五

周徐查邊列傳第二

周宗字君太廣陵人少遇亂孤窮事烈祖爲給使閑於擯相辭令方時艱難每使四方輒稱職端敏可仗恩顧日治烈祖鎮金陵爲都押衙時用宋齊丘議迎吳讓皇都金陵繕府治爲宮馬步都虞候蔡弘業爲宮城營奉使徙都統府于古臺城使都教練使孔昌祚營之都統府成凡二千四百間環一千五百步烈祖已徙居且迎讓皇矣宗請問曰若主上西遷則公當東駕勞費方始怨嗟將日聞矣烈祖納之託以歲不利而止自是宗益預議論齊丘始忌之一日烈祖臨鏡理白鬚太息曰功業成而吾老矣奈何宗適侍側悟微指乃請如廣陵諷讓皇以禪代事亦請諭齊丘齊丘心忌大議自宗發及其將還留與飲酒而遣騎以手疏切諫烈祖得之大悔懼後數日齊丘馳至金陵爲險語動烈祖請斬宗以謝國人烈祖將從之徐玠固爭事乃已但黜宗爲池州副使玠又與李建勳等言天人之望已集密定大計復召宗還舊職烈祖受禪宗躡進至內樞使同平章事遷侍中時以樞密爲內樞者猶避吳武王諱也烈祖常召宗及宋齊丘馬仁裕宴於崇英院歡燕道舊爲樂他將相莫預然待宗尤親厚不甚以職務嬰之宗亦能澹然畏遠權勢居家節儉俸賜皆積不用故齊丘黨雖日讒之不能害久之乃罷爲江州節度使有俞文貞者早遊烈祖幕府宗及馬仁裕皆趨走執事左右及宗出鎮文貞仕宦蹭蹬猶爲其州巡官方旅見輒越次問曰

馬押衙亡恙宗曰馬相公已鎮廬州文貞顧同列匿笑而退他日預公設宗勸以酒文貞俛首曰下官小戶令公所熟知也聞者大駭而宗怡然不動其寬厚如此徙宣州節度使入覲賜宴元宗親爲摺襍頭腳以表殊禮復出留守東都請老以司徒致仕歸金陵馮延魯代爲留守會周師陷廣陵延魯自髡而逃見執于周人束縛桎梏僅得免死時人益以宗享福終始爲異俄而宗病卒年七十餘宋齊丘時以太傅奉朝請撫其棺哭曰君大黠來亦得時去亦得時元宗聞之不平宗二女皆爲後主后

徐鍇字楚金會稽人父延休字德文風度淹雅故唐乾符中進士昭宗狩石門無學士草詔延休來調官適在旁近逆旅左右言其工文詞卽召見命視草昭宗善之及還長安不得用梁蔣玄暉辟爲其佐延休奔去依鐘傳於洪州吳取江西得延休仕至光祿卿江都少尹卒二子鍇鍇遂家廣陵鍇四歲而孤母方教鍇就學未暇及鍇自能知書稍長文詞與鍇齊名昇元中議者以文人浮薄多用經義法律取士鍇恥之杜門不求仕進鍇與常夢錫同直門下省出鍇文示之夢錫賞愛不已薦于烈祖未及用而烈祖殂元宗嗣位起家祕書郎齊王景達奏授記室時殷崇義爲學士草軍書用事謬誤鍇竊議之崇義方得君誣奏鍇泄禁省語貶爲江尉歲餘召還授右拾遺集賢殿直學士論馮延魯有罪無才人望至淺不當爲巡撫使重忤權要以祕書郎分司東都然元宗愛其才復召爲虞部員外郎後主立遷屯田郎中知制誥

集賢殿學士改官名拜右內史舍人賜金紫宿直光政殿兼兵吏部選事與兄鉉俱在近侍號二徐初錯久次當遷中書舍人游簡言當國每抑之錯乃詣簡言簡言從容曰以君才地何止一中書舍人然伯仲並居清要亦物忌太盛不若少遲之錯頗快快簡言徐出妓佐酒所歌詞皆錯所爲錯大喜乃起謝曰丞相所言乃錯意也歸以告鉉鉉歎息曰汝癡絕乃爲數闕歌換中書舍人乎錯凡四知貢舉號得人後主哀所製文命爲之序士以爲榮錯酷嗜讀書隆寒烈暑未嘗少輟後主嘗得周載齊職儀江東初無此書人無知者以訪錯一一條對無所遺忘其博記如此既久處集賢朱黃不去手非莫不出少精小學故所讎書尤審諦每指其家語人曰吾惟寓宿于此耳江南藏書之盛爲天下冠錯力居多後主嘗數曰羣臣勤其官皆如徐錯在集賢吾何憂哉李穆來使見錯及鉉歎曰二陸之流也嘗夜直召對論天下事因及用人才行孰先後主曰多難當先才錯曰有人才如韓彭而無行陛下敢以兵十萬付之乎後主稱善時國勢日削錯憂憤鬱鬱得疾謂家人曰吾今乃免爲俘虜矣開寶七年七月卒年五十五贈禮部侍郎諡曰文著說文通釋方輿記古今國典賦苑歲時廣記及他文章凡數百卷錯卒逾年江南見討比國破其遺文多散逸者

查文徽歙州休寧人幼好學能自刻苦手寫經史數百卷稍長任氣好俠聞人困乏雖不識必濟之家本富坐是窮空不悔也或遺以金帛一夕盜入其家盡

取去文徽不言雖隣里莫知者久之盜敗于旁邑移文訊驗人始知之咸推其量烈祖輔政初入謁烈祖召與語偉其論宋齊丘亦稱薦之徐知諤領浙西以文徽爲其判官或獻玉盃知諤喜酌以錢百萬趣開宴出盃行酒至文徽偶墮地碎一坐皆驚而文徽自若烈祖受禪入爲監察御史元宗立進諫議大夫中書舍人樞密副使閩主延義與其兄延政相攻延政以建州建國稱殷而延義爲其下所殺推立大將朱文進元宗欲討文進文徽以爲延政首亂當先致討有翰林待詔臧循者與文徽同里巷少嘗爲買入閩習知其山川險易爲陳進兵之策文徽本好言兵遂請行元宗乃以爲江西安撫使令至境上審觀可否文徽銳于成功至上饒復命盛言必克詔發洪州屯兵以邊鎬爲將從文徽攻建州建人厭王氏之亂伐木開道迎我師行次蓋竹遇建州兵至又聞泉漳汀州皆歸延政恐懼退保建陽時臧循亦爲別將屯邵武延政襲破之獲循斬于建州軍聲大劉元宗遣何敬洙等來援敬洙鎬與建州兵相持文徽得建之降將孟堅使潛師出其後擊之建州兵大敗潰去遂傳其城雖下建州諸軍無紀律殺掠不禁民始失望有叛志矣元宗知而置不問策功遷撫州觀察使又拜建州留後由是文徽益自用時李弘義挾吳越兵據福州僞遣謀來告福州亂文徽喜率劍州刺史陳誨赴之誨將舟師至福州城下擊敗其兵執吳越將馬先進等三人文徽以步騎繼至弘義陽遣卒數百人出迎而設伏西門以待文徽傳令徑入其城陷伏中

大敗墜馬被執送錢塘將士死者萬人元宗遣使歸馬先進于吳越而求文徽吳越王遣還將發爲置酒實毒歸至金陵毒始作元宗使醫視之醫以珠置口中頃珠色變黑醫曰疾不可爲然猶十年乃死文徽遂病瘖以工部尙書致仕朱元降周坐親黨安置宣州卒年七十距遇毒之歲正十年云諡曰宣子元方元規元素元範元賞元方事後主爲水部員外郎吉王從謙掌書記從謙朝京師太祖命知制誥盧多遜燕從謙於館多遜弈棋次顧元方曰江南竟何如元方歛衽曰江南事大朝十餘年極君臣之禮不知其他多遜推枰媿謝曰勿謂江南無人使還通判建州盧絳據歙州傳檄至建元方立斬其使及絳平太祖聞元方所爲大悅擢殿中侍御史知泉州卒官元方子道龍圖閣待制始徙家海陵純厚長者以文行稱於時道從兄陶及事後主國亡入朝仕至秘書少監知審刑院與道尤極友愛自金陵破士族流離多貧困失職惟道兄弟盡力收恤聚食常數十百人得任子恩皆以與族人以少長爲先後無親疎之間異姓亦分俸給之時其婚姻由是常苦貧而查氏至今爲海陵望族許國籥皆其後也

洞衆十餘萬元宗遣洪州營屯都虞候嚴思率所部討之鎬爲監軍虔有書生白昌裕沉密有謀鎬引與定計刊木開道襲白雲洞會遇賢所事神棄去不復降語賊衆遂潰其裨將李台執之以降策功遷洪州營屯諸軍都虞候二年查文徽以樞密副使出師伐建州詔鎬爲行營招討洪撫饒信歙等州諸指揮都虞候從文徽行然衆纔數千戰敗退舍元宗聞之遣何敬洙祖全恩姚鳳來援敬洙與鎬進兵奪其險要自崇安進次赤嶺與建兵方相持爲背水陣文徽使騎繚出建兵之後與敬洙鎬夾擊大破之遂取建州降王延政復取漳州事平諸將皆爭功鎬獨無一言七年楚馬氏兄弟相攻希萼雖勝而尤無道元宗知楚難方殷以鎬爲信州刺史領屯營兵兼湖南安撫使駐袁州萍鄉有警許便宜從事楚人果復廢立鎬自萍鄉帥師入潭州遷馬氏之族及文武將吏于金陵遂拜潭州節度使南漢將潘崇徹攻彬州鎬出兵爭之敗績遂失彬州鎬懼南漢寇邊未已請除道全二州刺史詔以廖偃爲道州刺史張巒權知全州然湖湘之憂實不在南漢也自馬氏廢立以來帑藏空竭土地既歸我馮延己爲相矜平楚之功不欲取費於國專掬斂楚人以給經費人心已離鎬柔而無斷日飯沙門希福紀綱頹弛不之問初成師朗來歸以其所部爲奉節軍從鎬入楚廩給薄于楚之降卒偶語怨望而糧料使王紹顏每給奉節糧輒刻削之軍校孫朗欲殺紹顏紹顏匿困下得免官屬請斬紹顏以謝將士鎬不聽朗乃謀殺鎬及紹顏據湖南歸中

原夜率所部取草燒府門火輒不發良久傳漏者覺之以告鎬出衝兵與鬪勝負未決鎬命吹角亂兵少以爲將旦亟斬關奔朗州盡以潭州虛實告劉言言久懷叛志得朗言大喜遣其將王進遠周行逢來攻鎬亦備言已而聞人謂忠順傾意信之及言兵已拔益陽遂夜棄城出奔列城皆潰盡喪楚地坐削官流饒州而他將棄城者皆斬湘中謠言馬去不用鞭至是而驗十四年周師大入齊王景達爲元帥出兵援壽州起鎬爲大將戰敗被執世宗命爲右千牛衛上將軍及元宗割淮南地請盟世宗乃歸鎬卒于金陵

南唐書卷第六

周柴何王張馬游刁列傳第三

周本舒州宿松人漢南郡太守瑜之後瑜葬宿松即墓爲祠子孫居其旁者猶數十家本少孤羈貧有勇力嘗獨格虎殺之吳武王起隸帳下勇冠三軍每奮躍先登攻堅摧鋒蒙犯矢石身無完膚戰罷輒自燒鐵烙其創食飲言笑自如累遷至淮南馬步使武王取江西撫州刺史危全諷率諸州兵十萬來爭其地屯象牙潭楚人圍高安以援全諷江西守將劉威警書至武王謀可將者列官嚴可求薦本時本從軍取蘇州不能下恥之稱疾臥家可求自往強起本本曰吳門之役非賊果強徒以我將帥權輕下皆專命故無功今必見起勿用偏裨乃可許之得精卒七千晨夜兼行武王初命之解高安圍本曰楚人非欲下高安第爲全諷聲援爾今先敗全諷楚人必棄高安走何足擊哉乃馳至象牙潭急擊之大破其軍擒全諷楚人亦避吉州刺史彭玕信州刺史危仔昌皆棄城去江西之地始定本之初至也卽揮兵進劉威欲留宴犒不許或曰敵兵盛宜審觀形勢何遽如此本曰賊衆加我十倍使我兵知之戰先奪氣矣急乘其鋒用之乃可有功已而果如所料武王奇其能遂用爲信州刺史吳越將陳璋據衢州歸款越人圍之武王遣本迎璋越人解圍出璋而列兵不動本遂以璋還裨將呂師造曰越有輕我心必怠請擊之本不可越人躡我軍至中道宿夜半本陽驚棄輜重走而設伏于旁越人果急追伏發前後夾擊盡殲其衆唐莊宗

入洛吳遣司農卿盧蘋往聘還言莊宗知本名由是召爲威武統軍俄出鎮壽州改廬州加安西大將軍大尉中書令西平王本不知書然能尊禮儒士遇僚屬以禮士民愛之性朴拙無他才惟軍旅之事若生知者烈祖將受吳禪徐玠周宗等以本及李德誠名位隆重諷之使率羣臣勸進本已昏老其子祚懼家禍代署表上之本初不知猶謂所親曰我受吳室厚恩老矣復能推戴異姓乎吳宗室臨川王濛廢居歷陽聞將傳禪乃殺監守者與親信兩人走詣本本卽欲出見之祚固執不可本怒曰我家郎君也奈何不使我一見祚拒閉中門令外人執濛告之濛遂誅死本愧恨屬疾數月卒年七十七本晚好飲酒樂施予或曰公春秋已高宜少儲積爲子孫計本曰吾繫芒屨事吳武王位至將相何人所遺乎旣卒太常言準令廢朝三日烈祖以本舊將命有司講求優典禮官言前朝嘗爲汾陽王郭子儀廢朝五日詔用之諡恭烈葬給鹵簿子鄴

鄴本長子也少驍勇每從其父征討本爲信州刺史略地至建州道經嶮阨被圍垂困鄴躍馬救之手殺數十人翼本而出建人駭懼潰去事烈祖典親軍出爲滁州刺史暴猛戾常蓄飛揚之志烈祖以本故優容之聞歷陽公楊濛被執數憤逾月國人亦以此稱其好義本卒後仕至廬州節度使昇元六年卒

柴克宏父再用事吳有功至德勝軍節度使克宏以父仕爲郎將嘗爲宣州巡檢使初至城塹皆堙圯不治吏云自田頰王茂章李遇相繼叛無敢爲守備者

克宏嘻笑曰豈有是哉大加營繕後吳越兵至賴以得全積遷泗州刺史罷歸爲龍武軍都虞候好施予不事產業故家常窮空然性豪舉博奕縱酒自若也時元宗自謂唐後規取中原復舊業羣臣多爲大言以迎合主意克弘獨未嘗一語及軍旅人亦不以爲知兵以故不遷久之出爲撫州刺史時淮南交兵吳越伺間來寇克宏乃請効死行陣元宗嘉之授右衛將軍遣與右衛將軍袁州刺史陸孟俊同救常州精兵悉在江北克宏所將財贏卒數千樞密副使李徵古給戈甲皆朽鈍克宏言於徵古曰卒已非素練得器械堅利猶可用奈何所給乃此等徵古嫚罵之見者皆忿克宏知徵古狂生不足與較是非怡然不少動至潤州徵古終不快白召克宏歸以神武衛統軍朱匡業代之燕王弘冀獨以爲克宏可任卒遣行克宏帥師至常州徵古猶遣使趣其歸克宏曰吾計日破寇爾何爲者必錢氏所遣奸人也命斬之使者曰受李樞密命來克宏曰李樞密來吾亦斬之遂斬使者以狗然後勒兵進大破吳越兵于常州斬萬級獲其將數十人自保大來邊事大起克敵之功莫先克宏者拜奉化軍節度使復上疏請援壽春行至泰興發瘍數日卒國人莫不痛惜諡威烈或云初克宏母自表其子可爲將徵古抑之母又言克宏有父風苟不勝任分甘孛戮元宗始用焉及徵古誅死詔暴其罪亦以折辱克宏爲言云

何敬洙廣陵人幼遇亂吳將楚州刺史李簡得之給事左右簡酷暴僕使有小過率置之死不少貸敬洙

與其伍戲小廳下有持簡所寶硯過焉顧曰孰敢毀此者敬洙時被酒奮曰死生有命何不敢之有奪硯擲石階上碎之翼日簡視事退聞硯毀詰主者具以實對卽命擒至皆謂必死矣簡妻素奇敬洙匿之堂奧旬日簡謂已逃去亦置不問會有烏逐簡而噪避之亦隨至大怒曰恨何敬洙不在此敬洙善射命中無所遺故思之語未畢敬洙挾朱彈鐵丸拜于前拜起一發斃之簡大喜不復詰毀硯事有善相者簡使相諸子曰雖皆善然無及公者獨指敬洙曰此人殆過公簡由是益愛之及長用爲軍校簡卒事烈祖爲裨將進天威軍都虞候建州之役爲行營招討長步軍都指揮使會查文徽進討敬洙堅謂閩地僻陋不足勞大兵文徽開譬之不得已而行及平建州敬洙功最諸將然以功推王建封無吝色拜楚州團練使敬洙自以初事李簡於是州尤自感勵常微服遊里巷察民疾苦有科調輒先爲經畫民不知勞坐聽事與賓佐譚讌民有訴事者立引入親自剖折曲直皆厭服而出保大八年楚朗州節度使馬希萼來附且乞師元宗命敬洙援之遷武昌軍節度使周人侵淮南命武安軍節度使王進逵領所部州師入江南境進逵奉詔行且遣部將潘叔嗣爲先鋒取鄂州長山寨殺三千人元宗命敬洙清野入保敬洙格詔出城除地爲戰場曰敵至吾與丘民俱死於此丈夫豈能惴惴閉門自守邪會叔嗣自長山回戈襲朗州進逵狼狽而去人重其決加鎮國將軍中書令後主嗣位以病足乞解官授右衛上將軍芮國公致仕給全俸

第門列戟乾德二年二月卒年七十七廢朝三日命
樞密使中書侍郎朱翬持節冊贈鄂州大都督左衛
上將軍諡威烈

王會廬州廬江人本名安少事吳武王王嘗臨戰升
高冢望敵安捧唾壺侍側左右皆注目前視忽有卒
持稍徑趨王莫能禦者會置壺于地引弓射之一發
而殪徐納弓歿中復捧壺立色不變王喜撫其背曰
汝器度如此他日必富貴積功至袁州刺史烈祖代
吳用爲百勝軍節度使虔州與嶺南地接南漢使者
往來節度使當燕勞問遺而會故名犯漢王祖諱乃
賜今名昇元五年卒年七十三

張延翰字德華宋州睢陽人故唐之末任爲陝州司
馬從父慎思擢徐州留後延翰往省之告以北方將
亂欲避地江淮以全家祀慎思是其言慨然遣之入
吳爲鹽城令有治績烈祖以平章事領江州封潯陽
侯表延翰爲江州觀察巡官通判軍府事烈祖代吳
入爲侍御史判臺事張宣爲左衛使恃功驕暴延翰
廷劾之強豪屏跡進禮部侍郎自以起疏遠遭時被
知得盡己才感槩自盡時未設貢舉士有獻書論事
者第其優劣選用烈祖悉以委延翰號爲精覈稱職
兼選事務進孤貧吏不敢爲奸利元宗輔政謂人曰
張君議論公正處事悉有條理吾得傾心聽之由是
六司綜領殆遍時望歸重拜中書侍郎同平章事時
年財五十餘人猶以爲柄用晚屬疾益侵不復能治
事烈祖以爲國器方一意任之不許其去遣使勞問
賜良藥旁午于道卒年五十七贈太傅

馬仁裕徐州人唐北平王燧裔孫世爲武寧軍校仁
裕母方娠夢傳呼北平王來歸及生紫氣充庭數歲
學兵法通解若素習遇亂南奔事烈祖爲昇州牙吏
烈祖領潤州仁裕監蒜山渡首聞朱瑾之亂馳入白
之烈祖卽日渡江定亂以功遷左領軍將軍歷楚州
刺史右金吾衛大將軍烈祖代吳拜潤州節度使徙
廬州爲政寬簡廉平甚得民心昇元六年卒于鎮初
烈祖左右小臣親信者惟周宗及仁裕兩人任遇略
等宗力贊禪代事遂輔政其後富盛冠一時仁裕資
長者獨退然安于外鎮晚益貧窶不悔也卒年六十
三諡曰匡

游簡言字敏中建安人父恭吳駕部員外郎知制誥
簡言少孤力學起家祕書省正字烈祖鎮金陵以爲
戶曹參軍典元帥府書檄遷觀察推官烈祖代吳爲
中書舍人元宗嗣位遷翰林學士禮部侍郎貞介獨
不附權要元宗頗重其爲人命判中書省兼吏兵部
選事裁抑僥倖憎疾者衆選人邵唐試判不中上書
言簡言父恭嘗爲鄂州林洪掌書記洪獎成朱温篡
弑恭預其謀簡言逆臣子當斬請正國法元宗怒唐
挾私忿謗譴決杖流饒州及淮南交兵吳越亦伺釁
攻常州執團練使趙仁澤歸于錢塘仁澤見吳越王
貴以敗盟吳越王怒挾其口至耳方議遣使詰責吳
越羣臣畏懼莫敢往元宗以命簡言簡言不辭見其
子慈爲千牛備身將發拜中書侍郎未出境召還及
遷都豫章立吳王爲太子留西都監國以簡言爲輔
簡言力辭言久備近臣不忍去帷幄元宗嘉其一心

事主無徵後福意即從其請更用嚴續而後主亦由是賢之拜吏部尚書知省事簡言親治簿書督責嚴峻人或以事請托必固違拂雖直亦不得伸議者譏其過拜左僕射兼門下侍郎同平章事疾已篤不及視事卒年五十七

刁彥能字德明上蔡人父禮遇亂徙家宣州彥能少孤事母篤孝家貧無以養乃事節度使王茂章茂章叛吳歸吳越彥能以帳下當從乃使家人扶其母俟于道左彥能泣告茂章曰彥能有老母在此不能捨而從公敢請死茂章哀其意許之乃馳還宣州而城中已亂彥能登城以劍招之曰我從王府來大軍已近爾輩無妄動衆信之稍定義祖聞而嘉之以爲軍校事其子知訓于廣陵知訓狂恣彥能每切諫不聽然亦不加罪牙將馬謙以衆擁吳主登宮門將殺知訓彥能從朱瑾入手斬謙以獻賞賚甚厚然彥能警敏觀知訓必敗而人望在烈祖心常附焉知訓忌烈祖數欲害之嘗與烈祖飲酒而伏劍士室中彥能行酒以爪語烈祖烈祖悟亟起去又嘗從知訓宴烈祖於山光寺復欲加害弟知諫摘語烈祖烈祖亦馳去知訓取佩刀授彥能使追殺之及于途舉刀示先主乃還以不及告及知訓死義祖見彥能諫書數異復使事知諫于潤州遷裨將烈祖代吳入爲環衛遷至天威軍都虞候左衛使金陵數大水秦淮溢東關尤被害彥能請築隄爲斗門疏導之水患稍息元宗嗣立出爲饒州節度使徙信州又徙建州留後撫州節度使彥能好讀書在鎮委任文吏頗有治稱好作詩

嘗與李建勳相答贈建勳因燕見及之元宗笑曰殊不知彥能乃西班學士也性矜莊燕居容服不少惰時貴宴飲或蓬首裸袒彥能在坐則皆肅然保大未卒年六十八子衍事後主爲祕書郎集賢校理以文翰見知擢直清輝殿閣中外章奏國亡入朝仕至兵部郎中直祕閣崇文院檢討淳淡夷粹恬於仕進暇日鼓琴圍碁不交人事行孫約亦名士久在三館晚築室潤州號藏春塢王安石蘇軾皆尊愛之

南唐書卷第七

徐高鍾常史沈三陳江毛列傳第四

徐玠字蘊圭彭城人事帥崔洪爲軍吏洪避朱全忠南奔遣玠先見吳武王因得事吳累居右職師出江西爲糧料使江西平授吉州刺史玠初爲小校以幹敏稱及治郡貪猥不治烈祖輔政罷之而義祖悅其善事人引以爲副使遂見親狎玠挾宿怨且希義祖意每與嚴可求言烈祖疎財結士不宜久執國權請以嫡子知詢代之事垂行而義祖知詢繼立玠本詭譎多智善揣摩非能爲徐氏計也至是察知詢必敗反持其長短自結於烈祖烈祖亦遂愛之盡忘前事鎮金陵以爲行軍司馬與周宗李建勳孫忌等參代吳秘計遂以佐命拜右丞相出爲宣州節度使徙洪州兼中書令復召爲司徒右丞相然徒崇以各位不復預政老而益貪鄙所至人患苦之好神仙之說嘗以下價市丹砂惡者治丹人以爲笑保太元年五月卒年七十六贈高平郡王

高審思失其家世鄉里少以饒勇事吳武王從劉信平虔州有功爲人重厚沉默烈祖愛之用爲神武統軍出鎮壽州兼侍中在鎮治守備常如有警或曰以公威略守堅城何太懼邪審思曰事變無常不可不過爲之備及保太末周人來侵諸郡往往一鼓而下惟壽州能堅守以世宗英武將士皆精練然逾年極兵力不可取雖劉仁贍善守亦審思之遺績也卒於鎮年七十五廢朝三日贈太師諡曰忠初術者悉言審思位不至刺史嘗受命刺常州固辭不敢行而其

後位兼將相終始富貴術之不足信有如此

鍾謨字仲益會稽人徙建安李德明失其家世鄉里保大中俱爲尚書郎敏於占對元宗愛之而天資皆浮躁沾沾自銜反覆嶮巇朝士側目號爲鍾李時魏岑已斥復用茲諛彌甚謨德明雖與岑若不同至爲惡則合若符券戶部員外郎范冲敏擢使軍帥王建封上書歷詆之請選用正人元宗大怒謂建封武人握兵不當輒議國政流建封池州未至殺之冲敏棄市謨德明自謂君寵可怙愈縱肆旁若無人德明嘗奏事別殿取元宗所御筆記事元宗不能堪曰卿它日自可持筆來德明亦自若謨遷翰林學士戶部侍郎德明遷工部侍郎文理院學士元宗雅稱兩人有詞辨欲令說周罷兵遣如壽州城下貢御服及犒軍牛酒世宗前知其欲以口舌游說大陳兵衛戈戟以見之謂曰江南自謂唐室苗裔衣冠禮樂異於它國與朕隔一水未嘗遣使修好惟航海通北虜此何禮也今又比朕六國愚主謂可說使罷兵何其不知朕也歸語若主必臣事我則兵可罷不然徑往金陵借府庫犒軍若君臣得無悔乎兩人股栗不敢出言惟曰寡君震畏天威願獻壽濠泗楚光海六州及歲輸方物世宗以淮南諸州繼陷欲盡取江北地不許德明見周師急攻壽州度旦暮且下乃曰寡君未能知大國兵力乃爾願寬臣數日之誅歸國取表盡獻江北郡縣世宗遣德明歸以書諭江南君臣語多諂讓陵肆國人已不堪而德明方盛稱世宗威德請必割地元宗惡其言宋齊丘力詆割地爲亡益陳覺言德

明賣國以悅敵不可赦德明佻薄語多過實知割地之說不行攘袂大言謂周師必克元宗益怒遂斬德明於都市不復議割地謨因留不得歸及孫忌之死也謨亦在召中得不死貶爲耀州司馬及元宗割地稱臣如謨德明初議世宗乃召謨至京師授衛尉卿賜黃金五百兩遣諭指於元宗往復數四謨既矜肆以爲世宗聽其言江左可籍以無恐元宗亦方賴其力心雖憾之體貌皆厚以爲禮部侍郎尙書省而三省之事靡不預之勢焰赫然宋齊丘陳覺李徵古之死皆出其計又白請雪德明之罪贈光祿卿謚曰忠太子弘冀參總庶政謨薦其客閭式爲司議郎百司關啓必由之俄而世宗崩謨自揆無所恃頗若有失元宗遇之亦寢薄初李德明被誅唐鎬預其事至是鎬懼修怨不自安會鎬以納賄聞謨面詰其狀鎬愈懼信州刺史張巒入爲天威軍都虞候謨素與之善每屏人共語或至中夜又嘗請使巒帥帳下兵巡都城鎬廉得之因密言謨往來兩國挾周人以脅制朝廷今與典兵者交結又請令巡徼輦下其包藏殆不可測謨微聞之念無以爲奇貨會弘冀卒後主以母弟當立而謨嘗與元宗愛子從善同使周相與親厚乃言後主器輕志放無人君之度因盛稱從善才不知元宗建儲之意已決更以此忤旨乃暴其交結張巒等罪貶國子司業又貶著作佐郎安置饒州遣中使領侍衛軍十人卽日督促乘驛而去謨時方病風眩在途賦詩十章語皆悽愴巒出爲宣州副使建隆元年正月元宗聞太祖受周禪乃遣使如饒州賜

謨死問曰卿昔與孫忌使周忌死而卿獨生還何也謨頓首伏罪遂縊殺之巒亦坐誅謨有女感家禍不嫁爲道士名守一博通孔老書尤善講說端拱中京師建洞真宮召守一爲道職云
常夢錫字孟圖扶風人或曰京兆萬年人也岐王李茂貞不貴文士故其俗以狗馬馳射博弈爲豪夢錫少獨好學善屬文累爲秦隴諸州從事茂貞死子從儼襲父位承制補寶雞令後唐長興初從儼入朝以夢錫從及鎮汴爲左右所譖遂來奔烈祖輔吳召置門下薦爲大理司直及受禪擢殿中侍御史禮部員外郎益見獎遇遂直中書省參掌詔命進給事中時以樞密院隸東省故機事多委焉夢錫重厚方雅多識故事數言朝廷因楊氏霸國之舊尙法律任俗吏人主親決細事煩碎失大體宜修復舊典以示後代烈祖納其言頗議簡易之法元宗在東宮有過失夢錫盡言規正無所撓始雖不悅終以諒直多之及卽位首召見慰勉欲用爲翰林學士以自近宋齊丘黨惡其不附己坐封駁制書貶池州判官及齊丘出鎮召爲戶部郎中遷諫議大夫卒以爲翰林學士復置宣政院於內庭以夢錫專掌密命而魏岑已爲樞密副使善迎合外結馮延己等相爲表裏夢錫終日論諍不能勝罷宣政院猶爲學士如故乃稱疾縱酒希復朝會鍾謨李德明分掌兵吏諸曹以夢錫人望言於元宗求爲長史拜戶部尙書知省事夢錫恥爲小人所推薦固辭不得請惟署牘尾無所可否延己卒文致其閨門罪貶饒州團練副使夢錫時以醉得疾

元宗憐之留處東都留守周宗力勸夢錫止酒治疾從之乃少瘳召爲衛尉卿改吏部侍郎復爲學士交泰元年方與客坐談忽奄然卒年六十一卒後財逾月齊丘黨與敗元宗嘆曰夢錫平生欲去齊丘恨不使見之贈右僕射諡曰康夢錫文章典雅有承平之風歌詩亦清麗然絕不喜傳於人剛褊少恕每以直言忤物嘗與元宗苦論齊丘輩元宗辯博曲爲解釋夢錫詞窮乃頓首曰大姦似忠陛下若終不覺悟家國將爲墟矣元宗不答而心善之及割地降號之後公卿在坐有言及周以爲大朝者夢錫大笑曰汝輩嘗言致君堯舜何故今日自爲小朝邪衆皆默然散去每公卿會集輒暗嗚大咤驚其坐人以故不爲時所親附然旣沒皆以正人許之雖其仇讎不敢訾也史虛白字畏名世家齊魯虛白隱居嵩少著書中原喪亂與北海韓熙載來歸時烈祖輔吳方任用宋齊丘虛白誦言曰吾可代彼齊丘不平欲窮其技能召與宴飲設倡樂奕棊博戲酒數行使製書檄詩賦碑頌虛白方半醉命數人執紙口占筆不停綴俄而衆篇悉就詞采磊落坐客驚服虛白數爲烈祖言中原方橫流獨江淮豐阜兵食俱足當長驅以定大業毋失事機爲他日悔烈祖不能從虛白乃謝病去南遊至九江落星灣因家焉常乘雙犢版轅掛酒壺車上山童總角負一琴一酒瓢以從往來廬山絕意世事保大初熙載爲史館修撰薦虛白可用元宗召見訪以國事對曰草野之人漁釣而已安知國家大計賜宴便殿醉溺於殿陛元宗曰真隱者也賜田五頃放

還山及元宗南遷豫章次蠡澤虛白鶴裘藜杖迎謁道旁元宗駐蹕勞問曰處士居山亦嘗有所賦乎曰近得谿居詩一聯使誦之曰風雨揭却屋渾家醉不知元宗變色厚賜粟帛上樽酒徐鉉高越謂之曰先生高不可屈肯使二子仕乎虛白曰野人有子賢則立功業以道事明主愚則負薪捕麋以養其母僕未嘗介意也不敢以累公鉉越媿歎卒年六十八將終謂其子曰官賜吾美酒飲之略盡尙留一榼吾死置藜杖及此酒於棺中四時勿用祭享無益死者吾亦不敢子皆從之孫温天聖中仕爲虞部員外郎獻虛白文集仁宗皇帝愛之追號虛白冲靖先生

沈彬洪州高安人唐末浪迹湖湘隱雲陽山好神僊喜賦詩句法清美烈祖輔吳表授祕書郎與元宗遊俄懇求還山以吏部郎中致仕元宗遷南都彬年八十餘來見曰臣久處山林不預世事臣妻曰君主人郎君今爲天子何不一往臣遂志衰老而來元宗命毋拜厚賜粟帛以其子爲祕書省正字彬先歲嘗策杖郊原手植一樹識之語其子曰吾當藏骨於此及卒伐樹掘地至丈餘得一石槨製作精麗光潔可鑑蓋上有篆云開成二年壽榔舉棺就之廣袤中度次子廷瑞有道術嗜酒却粒寒暑一單褐數十年不易跣行日數百里林棲路宿多在玉笥浮雲二山老而不衰後不知所終

陳況閩人性夷澹隱於廬山四十年衣食乏絕不以動心苦思於詩得句未成章已播遠近元宗聞其名召見時方祁寒元宗見其衣單薄降手札曰欲以綾

綺衣賜卿卿必不受今賜朕自服紬縑衣三十事俄授江州士曹掾固辭歸卒於山中年七十餘

陳曙蜀人嘗舉進士唐末避地淮南多遜於蘄州山中鄉人有會集或祭神曙不待召而至醉飽乃辭去由是人多設虛座陳酒肴以俟之同日或至數家舍中惟一榻素書數卷與蛇虎雜居不設牖戶雨雪滿室亦自若人有乘其出往闕之者曙必自外來凡數十年顏鬢不少異元宗命書舍人高越召之不肯起後徙居鄂渚及洪之西山不知所終

陳陶嶺南人少學長安昇元中南奔將求見烈祖自度不合乃隱洪州西山歎曰世豈無麟鳳國家自遺之耳保大末有星孛於參芒指東南陶語人曰國其幾亡乎果失淮南元宗南遷豫章至落星灣將訪以天象恐陶不肯盡言以其素嗜鮓乃使人僞言賣鮓至門陶果出啗鮓喜甚賣鮓者曰官舟至落星矣處士知之乎陶笑曰星落不還元宗聞之不憚遂不復問是歲果晏駕西山產靈藥陶與妻日斲而餌之不知所終開寶中南昌市有一老翁了結被褐與老嫗賣藥得錢則沽酒市鮓相對飲啗既醉歌舞道上其歌曰藍采和藍采和塵世紛紛事更多何如賣藥沽美酒歸去青崖拍手歌或疑爲陶夫婦云

江夢孫字聿修潯陽人烈祖輔吳表爲祕書郎夢孫數自言迂儒無裨益平生讀書欲小試於治民求爲縣令方是時士之客於烈祖者率以功名富貴自許而夢孫言獨如此烈祖以爲不情不之許也求不已乃補天長令烈祖先持告身示之曰今日受此明日

趨走庭下矣曰此素志矣庸何傷乃授之至天長吏白縣署正寢有淫厲不可居夢孫不從是夕果有怪並出夢孫起焚香曰夢孫受命爲令常治事於此鬼神有祠廟丘壘胡不各歸其所吾行不欺暗室奚畏君等語訖皆斂迹夢孫治縣寬簡吏民安之逾年棄官去縣人號泣送之數十里還家事繼母盡孝早暮潔衣冠視膳羞母食旣徹爲諸生講禮凡至疑義輒斂衽曰此科先儒猶多異同夢孫安敢輕言諸君自擇所長可也保大中卒年八十五贈國子司業

毛炳洪州豐城人隱居廬山時爲諸生講得錢卽沽酒嘗醉臥道旁有里正掖起之炳瞋目呵之曰醉者自醉醒者自醒亟去毋撓予睡後徙居南臺山數年忽書齋壁曰先生不住此千載惟空山因大醉一夕卒與炳同時又有酒禿者焉酒禿姓高氏駢族子棄家祝髮博極羣書善講說而脫略跌宕無日不醉後主召講華嚴梵行一品賚金帛甚厚女寂卽日盡送酒家日夜劇飲醉則從小兒數十浩歌道中歌曰酒禿酒禿何榮何辱但見衣冠成古丘不見江河變陵谷一日醉死石子岡

南唐書卷第八

三徐三王二朱胡申屠喬睦列傳第五

義祖生六子知訓知詢知誨知諫知證知諤及烈祖開國惟知證知諤在餘皆前卒

徐知證義祖第五子也事吳歷州刺史至節度使烈祖初尊義祖為太祖復姓改義祖封拜徐氏與李氏同知證王江改王魏元宗嗣位尤見尊禮內宴用家人禮起舞拜跪為壽知證亦以叔父自處無所讓卒年四十二

徐知諤義祖第六子在吳亦為節鎮代知詢為金陵尹烈祖初封饒王進王梁鎮潤州兼中書令好奇寶怪物所蓄不可計有蜀估持鳳首至自言得之徼外蠻夷狀如雄雞廣五寸冠上正平可用為枕朱冠金喙文彩煥爛如生人咸異之一日遊蒜山除地為場連虎皮為大帷號虎帳與賓僚會飲其中忽暴風至裂帳盡碎如飛蝶知諤懼而歸屬疾數日卒平生常語客曰人生七十為大限吾生長王家窮極歡樂一日可敵世人二日年三十五其死乎至是如其言廢朝七日烈祖悲悼復詔不視朝者七日斂以衮冕及上方秘器諡曰懷十子皆貴顯國中所著文賦歌詩十卷號閣中集

徐遊知誨子也初名景遊避元宗名去景字知誨於元宗有舊恩故元宗待遊及兄汝南郡公遼尤親厚出入宮省備顧問預籌畫專典宮室營繕及浮屠事當時言蠹政者以兩人為首後主嗣位好為文章遊復以能屬文見昵封文安郡公燕飲則流連酣咏更

相倡和雖后妃在席不避也昭惠后好音時出新聲或得唐盛時遺曲遊輒從旁稱美有三閣狎客之風閒居講論古今得失後主設問遊具以所聞對或遊有疑以請後主亦引經義或古事稱制答之君臣相矜至國亡不悟也遊有巧思敬器之制久不傳人無知者遊獨以意創製皆合古法太平興國中蘇易簡為學士得之暇日試於玉堂太宗皇帝聞而取視之歎賞不已方金陵之將亡也徐錯屬疾忽夢巨人持大鐵篋取己及兄鉉并遊同納篋中篋之錯與遊皆墜地而鉉獨否俄錯遊皆以疾卒云

王建封上元人少從軍以任俠驍勇知名元宗取建州建封為先鋒橋道使焚建州外郭克之王延政降何敬洙功最諸將建封忿曰我縱火先登克城諸軍乃能入我功當第一敬洙因推之曰君言是也具以聞諸朝第賞拜信州刺史人皆多敬洙而薄建封陳覺馮延魯魏岑攻福州李弘義圍之敗吳越援兵福州接絕危蹙且拔矣而覺延魯岑各欲功在己不相應接偏裨莫肯用命故未能克覺奏請建封濟師建封率五千人會之破福州版寨入東武門而建封亦與諸將爭功遽斂兵先退弘義乘之我軍復敗遂潰而歸元宗深銜建封顧方治覺等擅興未及治也建封內不自安元宗懼其作亂召為天威軍都虞候付以親軍建封遂泰然恃恩僭侈無復顧憚戶部員外郎范冲敏疾魏岑鍾謨李德明用事詆建封上書歷詆岑等請更用正人元宗遂發怒謂建封武臣握精兵敢干國政謀進退柄臣其漸不可長流池州未至

殺之冲敏棄市未幾岑見冲敏爲厲請道士上章訴天數月竟死云

王彥儔蔡州上蔡人少爲州軍校唐同光末諸郡多亂彥儔亦樂禍思奮會同列六人者來與謀曰四郊恟恟能者得富貴我輩不可後人彥儔許諾且曰今夕吾直府中公等可持兵來吾亦裊甲爲內應既夜六人者如約俱至彥儔伏壯士盡捕斬之持其首叩帳門告刺史曰姦盜竊發幸已伏誅懼有佚黨爲變願公亟號令以安衆心刺史驚喜而出彥儔卽斬之歸其罪於六人者翼日悉族六家據蔡州無敢動唐兵來討彥儔自計不能守匿其妻子於村舍奉父母來奔烈祖輔吳以爲都押衙歷和州刺史始遣間使迎妻子南歸彥儔有政績善撫境內和遂爲富州入拜統軍自以發迹兇亂於是務爲恭謹烈祖嘉之嘗陞堂拜其父開國以爲池州節度使常夢錫自給事中以直諫貶判官彥儔事之如在朝廷人士稱之卒於鎮

朱匡業廬州舒城人父延壽以姊爲吳武王夫人故自少得幸從征討摧堅陷陣功冠諸將好以寡擊衆不勝而返者必盡戮之嘗與梁戰遣二百人持大劍斫陣將行指一卒留之卒請行延壽以違命立斬之其令出必行皆類此然每得賞賜悉分賚其下無以入家者唐昭宗在岐下聞其名遣使間道授延壽蔡州節度使武王疑其難制誘殺之出夫人使更嫁然猶以舊功貸其妻子時匡業尙幼稍長授以官烈祖輔吳拔爲軍校積功至諸軍都虞候嗜酒使氣烈祖

優容之出爲歙州刺史有政績改建州留後還朝授神衛統軍周侵淮南中外震駭盜投鱗多竊發以匡業爲內外巡檢使嚴而無私犯令無所貸中外肅然夜戶不閉正陽喪師朱元叛元宗議親征召匡業及統軍劉存中問以方略匡業輒對曰運數之興天地皆助大事若去雖英雄亦無如之何存中從旁贊之元宗怒貶匡業撫州團練使流存中饒州後主襲位召拜神武統軍加中書令卒子崇俊短陋羸瘠而妙於騎擊馳突若神早卒

朱令贇大將軍業從子少從軍椎額鷹目趨捷善射積遷至鎮南節度使開寶中後主見討王師兵已圍金陵召令贇赴難軍至湖口與諸將謀曰今爲前進則北軍據我後上江阻隔進未破敵退絕餽饟奈何乃檄南都留守柴克貞赴軍欲俟其至使代拒湖口及發而後主危急飛書督兵者接踵令贇不能守初議乃與戰棹都虞候王暉乘流而前自潯陽湖編木爲大棧長百餘丈大艦至容千人將突下斷采石浮梁會江水涸舟楫艱阻王師得設備比至虎蹲洲合戰令贇所乘艦尤大建大將旗鼓王師舟小聚攻之令贇以火油縱燒王師不能支會北風反焰自焚水陸諸軍十五萬不戰皆潰令贇惶駭赴火死糧米戈甲俱焚無孑遺烟焰不止者旬日自是金陵外援遂絕以至於亡是時王師上露布稱生獲令贇則非也論曰金陵之被圍也以守備任皇甫繼勳以外援付朱令贇繼勳旣懷貳心而令贇孺子復非大將才其亡宜矣使林仁肇不以間死盧絳得當攻守之任胡

則申屠令堅輩宣力圍城中雖天威臨之豈易遽亡哉然則江南雖弱曹彬等所以成功者獨乘其任人乖刺而已吾以此知伐國之難也

王崇文父綰吳大將崇文以門地選尚烈祖妹廣德公主歷百勝永安二鎮廬陵民尙氣喜訟以先止爲怯素號難治崇文一以法治之不少貸訟爲衰息建州初平崇文安集之民忘其亂又涉武昌自南唐興崇文內典禁兵出更藩任位兼將相終始富貴而平居被服儒雅風度夷曠在武昌方閱騎士於鞠場傍古屋數十間崩壞聲震數里聞者莫知所爲崇文指揮使令訖事不失常度竟亦不問後主初立上疏歷陳朝政賜書褒之加中書令卒

胡則不知其世家後主末爲江州指揮使金陵陷曹彬喻後主以手書命郡縣悉以城降書至江州刺史謝彥寶集將佐視之謀納款則憤形於色亟出謂其下曰吾屬世受李氏恩安可負之且都城久受圍此書真僞不可知刺史不忠欲污吾州爾輩能從我死忠義乎衆皆曰善乃帥同列宋德明等大譁入攻彥寶彥寶懼逃管霽中執而殺之衆推則爲刺史號令肅然莫敢不聽則嘗爲壽州裨將從劉仁贍城守累年盡得其方略乃日夜閱丁壯勒部伍爲堅壁死守計太祖命南面行營招安巡檢使曹翰攻之城帶江負山樓櫓高險堅不可破屢遣使諭降則誓死不從翰軍死傷者衆詔書切責督戰會則疾革不能起城始陷衆猶巷鬪雪涕奮擊不少退翰軍尤多死則臥牀上翰執之數其違命之罪對曰犬吠非其主爾何

怪也卽昇置木驢上將磔之俄死腰斬其屍以狗弁殺宋德明而隳其城七尺使後不可守時右補闕張霽被命知江州與翰偕行旣入城翰軍士掠民家民訴於霽霽按誅軍士翰因發怒屠城死者數萬人取其屍投井坎皆滿溢餘悉投江流因誣奏霽太祖薄霽罪徙知饒州民家貨貨鉅萬翰悉取之初太祖聞江州城垂破遣使持詔賜翰使勿多殺使者至獨樹浦大風斷渡比至已無噍類矣

申屠令堅山東人少無賴勇敢絕人晉漢間嘗爲盜被獲以計脫來歸保大末禦周師於壽春破城南大皆有功擢神武都虞候劉茂忠吉州安福人本名徹或謂之曰劉徹乃漢武帝也非人臣所能名乃改焉少亦爲羣盜會赦書募盜爲兵茂忠出應募且請擒盜自洗滌乃詐亡命入盜中自言工風雲占盜信之乃密約吏爲內應悉擒戮無遺者惟廬陵鷓鴣洞賊帥吳先狡有謀且據巖險不可捕茂忠鞭二卒使伴爲得罪奔先示以鞭創先乃納之月餘斬先其黨皆潰積功爲吉州兵馬都押衙開寶中令堅爲吉州刺史茂忠爲袁州刺史金陵破後主歸京師兩人者相約不以主存亡易節誓死報國前二年令堅寐則夢與人鬪大呼而寤乃聚侍婢歌舞喧笑達旦始能寤至是若與人搏擊於帳中者踰時而卒茂忠度不能獨奮遂降將行悉燔州縣軍輿料斂文籍所留田稅簿而已袁人德之入朝舟次淮口謁關吏稱袁州刺史史擲刺於地曰此亡國之俘何刺史也叱令執杖庭參至京師授登州刺史關吏抵罪適編管登州茂

忠見之曰乃汝耶日責拜謁兩衙必令植立庭下吏
慚憤死茂忠還朝病金瘡卒

喬匡舜字亞元高郵人弱冠能屬文以典贍稱烈祖
輔吳用爲秘書省正字開國宋齊丘辟置幕中十餘
年歷大理評事屯田員外郎齊丘喜人諛己而匡舜
真率故雖賞其文藝未嘗薦拔烈祖獨知之嘗詔公
卿舉可親民者意齊丘且舉匡舜奏上竟不及烈祖
喟然謂常夢錫曰吾不意其捨匡舜也夢錫與韓熙
載素惡齊丘每相語曰宋公誤識亞元正可怪也久
之齊丘出鎮豫章始表爲節度掌書記保大中召爲
駕部郎中知制誥進中書舍人周侵淮南諸將無功
元宗議親率六軍拒之匡舜上疏切諫帝怒坐以沮
國動人心流撫州然亦卒不能親行也後主嗣位復
起爲司農少卿歷殿中監修國史給事中兼獻納使
知貢舉放及第樂史輩五人多久滯名場者時稱得
人而少年輕薄子嘲之謂之陳橋成榜遷刑部侍郎
老病乞骸骨歸後主憫其貧給俸終身開寶五年卒
年七十五諡曰貞

睦昭符金陵人不知所以進保大中爲常州縣刺史
當吳越之衝屢交兵城邑荒殘昭符爲政寬簡招納
逋亡未幾遂富實一日坐廳事雷雨暴至電光如金
蛇遶案吏卒皆震仆昭符不懼撫案叱之雷電遽散
及舉案惟得鐵索重百斤昭符亦不變色徐命舉索
納庫中顯德五年元宗旣稱藩於周秋八月命昭符
爲進奏使置邸大梁太祖受周禪昭符乃更名後主
嗣位御宮門立金雞竿降赦如天子禮太祖聞而怒

召昭符詰之色甚厲昭符徐以鄙語對太祖爲笑因
置不問然昭符常往來金陵時後主數貢奉帑藏空
竭昭符市於富民石守信家得絹十萬後主大悅太
祖已遣李穆召後主入朝因問昭符曰汝度汝主來
否對曰君命召不俟駕安有不來及後主稱疾王師
致討昭符又言於太祖曰臣主必死社稷已而後主
降罷奏邸不得調卒初名匡符建隆初改以避上名
云

南唐書卷第九

劉高盧陳李廖列傳第六

劉彥貞兗州中都人父信初爲羣盜戰敗奔吳事武王數有功王遇之厚嘗召信計事醉不能言王嬖罵之信卽仗一劍棄去左右請追之王曰信醉耳醒當復來明日果至積功至鎮南軍節度使宣王建國加征南大將軍唐莊宗滅梁遣諫議大夫薛昭文使閩假道洪州信燕勞之謂昭文曰皇帝知有信否昭文曰主上新平河南未知公之名信曰漢有韓信吳有劉信一等人也因指牙旗銀首舉酒屬昭文曰幸而中此願爲我飲一發中之烈祖受禪以舊故贈太師彥貞信第四子以父任爲大理評事遷屯田員外郎父喪起復將軍連刺海楚二州善騎射矢不虛發軍中號曰劉一箭吏事亦以強濟見稱遷濠州節度使移壽州始贖貨自殖市肆不問貧富槩出資助之而收其贏州有安豐塘溉田萬頃以故無凶歲彥貞託以浚城濠決水入濠中民田皆涸而督賦益急皆賣田去彥貞擇尤膏腴者以下價售之乃復瀦塘水如初歲入不可勝計時南唐政衰用事者多貪墨彥貞廣賂遺以致聲譽於是魏岑等雜然推倡其用兵治民之能以爲一面長城在鎮久疑當受代輒妄造邊遽以固其位久之乃入爲神武統軍及周師侵淮南拜北面行營都部署帥三萬人援壽州次來遠鎮兵車旗幟巨數百里戰艦銜尾蔽淮而上周將李穀慮我師斷浮橋腹背受敵燒營退保正陽彥貞雖名將家子生長富貴初不練兵事裨將武彥暉張延翰成

師朗皆鬪將無籌略見周師退以爲快惟恐不得速戰士未及朝食卽督以進遇周將李重進於正陽東彥貞置陣橫布拒馬聯貫利刃以鐵繩維之刻木爲猛獸攫拳狀飾以丹碧立陣前號捷馬牌又以革囊貯鐵蒺藜布於地周兵望而笑其怯銳氣已增一戰我師大敗師朗等皆被擒彥貞死于陣南唐喪地千里國幾亡其敗自彥貞始雖死王事議者不與也後數年贈中書令諡曰壯亦不復錄其孤云

高越字冲遠幽州人精詞賦有名燕趙間盧文進鎮上黨具禮幣致之初以客從及文進徙安州越又從之遂爲其掌書記文進仲女有才色能屬文號女學士因以妻越文進奔吳亦與俱行吳以爲祕書郎烈祖受禪遷水部員外郎改祠部浙西營田判官與江文蔚俱以能賦擅名江表時人謂之江高保大初文進卒有欲傾其家者越上書訟之黜爲蘄州司士參軍語在文進傳就遷軍事判官與隱士陳曙爲物外交淡然不志榮利久之仍徙廣陵令還判吏部歷事御史知雜元帥府掌書記起居郎中書舍人淮南交兵書詔多出越手援筆立成詞采溫麗元宗以爲稱職不徙官者累年後主立始遷御史中丞勤正殿學士左諫議大夫兼戶部侍郎修國史卒年六十二諡曰穆貧不能葬後主爲給葬費世歎其清兄子遠遠字攸遠父操袁州別駕遠少孤爲人夷雅冲淡而遇事有奇節杜門力學不交人事烈祖受禪招來四方秀傑得遠以爲祕書省正字保大初遷校書郎兼太常修撰遂爲太常博士淮南兵興元宗召見賜金

紫使典戎府書檄歷禮部員外郎樞密判官侍御史知雜史館修撰起居郎知館事遂爲勤政殿學士國初命兵部尚書陳濬修吳史未成而卒其後領史職者多貴游或新進少年纂述殆廢遠自保大中預史事始撰烈祖實錄二十卷敘事詳密後主嗣位遠猶在史館與徐鉉喬匡舜潘佑共成吳錄二十卷遠又自撰元宗實錄十卷未及上會屬疾取史稿及他所著書凡百餘卷悉燔之卒年五十七贈給事中諡曰良後主欲修國史訪稿于其家無復在者遠有精識方邊鎬入潭州湖南悉平百官入賀遠獨曰我棄楚亂取之甚易觀諸君之才守之實難聞者愕然以爲過及後如所料乃皆服其先見

盧文進字大用幽州人事後唐明宗至安州節度使事具五代史晉高祖起晉陽與契丹耶律德光約爲父子文進少嘗事契丹娶虜公主爲其平州刺史明宗時率衆數萬來歸至是不自安且本燕人尙氣不能屈於晉乃決計歸吳時烈祖輔吳爲齊王將受禪吳遣將祖全恩以兵二千陣於安州近境俟文進出殿之而至拜天雄統軍宣潤節度使委任賓佐政績甚美潤州市大火文進使馬步使救之益熾文進怒自出府門斬馬步使傳聲而火止人皆異之召還以左衛上將軍兼中書令苑陽郡王奉朝請猶給藩鎮俸卒馮延巳惡文進亦以素貴不少下及卒乃誣以陰事盡收文進諸子欲籍其家文進以女妻高越越乃上書訟文進冤指延巳過惡詞氣甚厲時延巳方用事人頗壯之元宗怒以越屬吏貶蘄州司士

參軍而盧氏亦賴以得全文進在金陵爲客言昔陷契丹嘗獵於郊遇晝晦如夜星緯燦然大駭偶得一胡人問之曰此謂之筮日何足異頃自當復良久果如其言日方午也又嘗至無定河見人脛骨大如柱長可七尺云

陳覺揚州海陵人烈祖以東海王輔吳作禮賢院聚圖書萬卷及奕奕游戲之具以延四方賢士政事之暇多與之講評古今覺亦預焉烈祖居金陵以次子景遷留東都爲同平章事知左右軍使輔政命覺爲之佐謂曰吾蚤算與賢士相接今老矣尙未達天下事景遷年少當國故屈君子無憚也景遷卒還朝爲宣徽副使烈祖晚多暴怒近臣多得譴罰覺心懼稱疾家居累月以宣遺詔日入朝判大理寺蕭儼劾之元宗不從遷光政院副使太僕少卿覺有兄居鄉里時海陵已爲泰州覺兄犯法刺史褚仁規笞之覺挾私怨密譖仁規貪殘侍御史王仲璉亦劾之元宗薄其罪止罷刺史仁規忿上章自訴元宗命覺馳往鞠之仁規惶恐伏罪覺還條其罪狀甚衆詔賜死覺之竊弄威福蓋始于此覺與李徵古皆宋齊丘客徵古者袁州宜春人於齊丘有中外事齊王景達爲宮官齊丘告歸九華逾年不召徵古使其僚謝仲宣諷景達言于元宗曰齊丘先帝布衣之舊雖不用不當棄之齊丘旣召歸益以腹心寄覺欲使立功以取柄任時唐兵初得建州諸將請用其鋒攻取福州齊丘獨薦覺爲宣諭使召節度使李弘義入朝可不勞寸刃盡得閩地元宗意方向覺遂遣之旣至弘義倨甚覺

氣折不敢言歸至劍州恥于無功矯詔召弘義自稱
權福州事擅興汀建撫信州兵及戍卒命馮延魯將
之攻福州敗績衆潰而歸死者萬計亡失金帛戈甲
之類不可勝數朝論謂必死元宗亦怒欲寘軍法齊
丘上表待罪實營救覺等馮延己助之於是財貶斬
州逾年復起任事始與徵古爲死黨相倡和如出一
口淮南兵興我師屢北度不可復支元宗遣鍾謨李
德明孫忌王崇質使周世宗請獻壽濠泗楚光海六
州以罷兵世宗不許而壽州日危蹙德明懼乃白世
宗言願寬臣數日之誅歸白寡君盡獻淮南地周乃
遣德明王崇質先還德明至金陵盛稱周兵之彊請
必割地元宗不悅齊丘覺徵古素惡忌及德明摘語
王崇質使異其詞覺徵古因極言德明賣國德明徧
忿知見排攘袂大言周師必克元宗遂斬德明于都
市覺徵古勢焰益熏灼道路以目德明既誅不復議
請盟乃命齊王景達率大兵拒周而以覺爲監軍使
軍政皆出覺聚兵五萬無決戰意朱元數有功覺忌
之奪其兵元遂叛降周諸軍悉潰覺歸爲樞密使如
故而徵古爲副使不以敗事自咎方相與挾齊丘爲
耐久計議事元宗前橫甚元宗嘗言及家國感慨泣
下徵古輒曰陛下當以兵力拒敵涕泣何爲飲酒過
量耶乳保不至耶帝色變左右股栗而徵古驚然自
若司天言天文變異人主宜避位祈禳元宗曰此固
吾意第不知孰可付耳覺徵古遽以爲誠言輒曰天
命如此宜使宋公攝政陛下深居禁中俟國事定歸
政未晚元宗亟召中書舍人陳喬草詔實出于憤怒

喬固陳不可元宗嘻笑而止周師益進世宗駐迎鑾
鎮元宗遣覺奉表貢方物覺至迎鑾見周之戰艦陳
列江津且南渡矣大懼請遣人取本國畫江爲界表
世宗可之覺頓首謝退遣其屬劉承遇南還以告畫
江稱藩奉正朔之議遂決周亦班師遣覺還錫賚豐
渥覺將發獻詩一首敘感別賜金器百兩初覺徵古
以德明請割地爲賣國誅死及是覺身自爲之使還
以兵部尚書致仕徵古先出爲洪州節度副使時晉
王景遂爲帥不堪徵古之傲狠常欲斬之自拘於有
司左右力諫乃已鍾謨自周還屢言齊丘覺徵古之
罪不可容覺嘗傳世宗之語告元宗曰聞江南拒命
謀出其相嚴續當殺續以謝我元宗知覺與續有宿
怨疑之謨請至周覆實其事元宗遣謨行以手表引
咎且言非續之罪世宗省表大驚曰嚴續能拒命乃
忠臣朕爲天下主其肯教人殺忠臣乎謨還具奏之
元宗大怒齊丘既斥覺亦責授國子博士饒州安置
遣殺之徵古削奪官爵賜自盡于洪州

李德誠廣陵人少事宣州節度使趙鏜爲給使吳攻
宣州鏜出降德誠與韓球俱從之不去城中復推立
裨將周進思以拒吳鏜使德誠入城說進思降將行
暴得疫疾委頓不克往乃改命球球既至進思斬之
擲其首城外德誠是日即愈人皆異之鏜死事吳武
王常從征討積功爲江南馬步軍使與諸將圍潤州
安仁義諸將每見仁義臨城督戰必嫚罵之德誠獨
否及城破仁義操弓矢坐城上衆莫敢近德誠至仁
義忽顧曰汝見我獨不失禮且有奇相他日將大貴

吾以爲汝功卽擲弓矢就執武王卽拜德誠潤州刺史歷撫虔洪三鎮節度使平南大將軍中書令烈祖受禪拜太師封南平王進封趙王德誠事吳最久至南唐之興又爲佐命首與周本勸進初無大勳勞特以際會至高位富貴壽考世罕及者然爲人謙恭沉厚終始如一自洪州入覲烈祖命宮人逆勞于途百官班謁于都門入對日朝堂設次以待之昇元四年卒年七十八廢朝五日諡忠懿子二十八人第四子建勳

建勳字致堯少好學能屬文尤工詩德誠在潤州嘗秉燭夜出候者以告義祖疑有變徙江州德誠猶慮讒間遣建勳入謁義祖見之釋然妻建勳以女所謂廣德公主也建勳家世將相又娶于徐氏爲其國貴游然杜門不預世事所與交皆寒賤裘馬取具而已烈祖鎮金陵用爲副使預禪代之策拜中書侍郎同平章事加左僕射監修國史領滑州節度使自開國至昇元五年猶輔政比他相最久烈祖鑒吳之亡由權在大臣意頗忌之而建勳無引退意會建議政事當更張者且言事大體重不可自臣下出請以中旨行之烈祖雖從之未有命也建勳遽命舍人草制給事中常夢錫劾奏建勳擅造制書歸怨于上烈祖得奏適會本意乃降制放還私第廣德宮主剛果有智入謂烈祖曰吾父亡恙時兄亦嘗求見與李郎書今何見負烈祖曰此自國事吾與李郎骨肉之情固無間也召見慰勉焉未幾復相元宗嗣立以開國勳勞又聯姻戚尊遇之與宋齊丘埒每謂爲史館而不名

聽朝之暇多開延英殿召公卿議當世事人皆欣然望治建勳獨謂所親曰上寬仁大度優於先帝但性習未定宜得方正之士朝夕獻替不然恐未必能守先朝基業也出爲撫州節度使建州之役諸將無復紀律建勳請官出金帛贖俘掠還其家見聽及出師平湖南國人相賀建勳獨以爲憂曰禍始於此矣召拜司空稱疾乞骸骨以司徒致仕賜號鍾山公營別墅於山中放意泉石或謂之曰公未老又無大疾恙遽爲此舉欲復爲九華先生耶建勳曰吾平生笑宋公輕出處何至效之自知不壽欲求數年閑適爾疾革遺令曰時事如此吾得全歸幸矣勿封樹立碑貽他日毀斷之禍保大十年五月卒贈太保諡曰靖及南唐亡公卿塚墓鮮不發者惟建勳不知葬所宋齊丘當國深忌同列少所推遜然獨稱建勳曰李相清談不待潤色自成文章

論曰李建勳非不智也知湖南之師必敗知其國且上皆如著龜然其智獨施之一己故生則保富貴死猶能全其骸於地下至立於羣枉間一切無所可否唯諾而已視覆軍亡國君父憂辱若己無與者方區區請出金帛以贈俘虜真婦人之仁哉

廖居素將樂人仕烈祖元宗之間爲人堅正不爲當國者所喜困校書郎二十年始得大理司直後主嗣位稍遷至瓊林光慶使檢校太保判三司後主羸昏而羣臣方充位保富貴國益削居素獨慷慨驟諫冀後主一悟終不見聽乃閉門却食服朝衣冠立死井中已而得手書大字于篋笥曰吾之死不忍見國破

也徐錯爲文弔之以比屈原伍員後幾百年將樂父
老猶叩頭稱之盱江李觀爲之傳云

南唐書卷第十

張李皇甫江歐列傳第七

張義方不知其所以進烈祖代吳用為侍御史義方既就職即上疏曰古之任御史者非止平獄訟肅班列也有怙威侮法棄忠賊義樹朋黨蔽聰明者得以糾彈至於人主好遊畋聲色說奢侈佞媚賞非功罰非罪得以論爭使諸侯不敢亂法百司不得盜權則御史為不失職今文武材行之士固不為乏而貪墨陵犯傷風教棄仁義者猶未革心臣欲奉陛下德音先舉忠孝潔廉請頒爵賞然後繩糾垂戾以正典刑小則上疏論列大則對仗彈奏臣每痛國家之敗非獨人君不明蓋官卑者畏罪而不言位尊者持祿而不諫上下苟且至于淪亡今臣誠不忍忘君親之義有所不盡惟陛下幸赦之疏奏烈祖親札曰孤始受禪任義方以風憲乃能力振朝綱詞皆謹切可宣示朝野賜義方衣一襲以旌直言義方始名元達烈祖方倚以肅正邪慝取前朝王義方名以易之故義方得盡忠焉後之議者謂義方為御史彈劾奸邪諫正過失則可若請舉善頒爵賞則為奪輔相權矣然所言凜然守正有漢唐名臣之風惜其事跡散落不得盡載云

李金全其先吐谷渾人事唐明宗為廝養以戰功貴事具五代史晉高祖時為安州節度使任中門使胡漢榮漢榮貪戾專政失軍民心高祖遣賈仁沼代歸京師金全奏漢榮病不任行仁沼至酖殺之事聞高祖乃以馬全節代金全鎮安州漢榮懼給告日邸吏

劉珂密遣人馳報朝廷召公有異處分金全懼使其從事張緯奉表詣金陵請降烈祖命鄂州屯營使李承裕段處恭帥兵三千人逆金全陳于城外俟金全出殿之而東承裕等至之夕金全帥數百人來奔而承裕違命輒大掠城中得金帛不可計數乃還晉將安審輝追敗之于馬黃谷處恭死於陣承裕帥餘兵扼雲夢橋復為審輝所敗執而殺之金全至拜天威統軍出為潤州節度使漢隱帝時李守貞以河中叛來乞師魏岑查文徽議宜為出師劉彥貞以攻取自任元宗欲籍金全宿將威望以為北面行營招討使救河中彥貞副之文徽為監軍使岑為沿淮巡檢使師出沐陽次沂州金全曰諸君以河中在何處而欲自此轉戰以前耶勢必不相及徒為國生事爾嘗會食帳中候騎告北兵數百竝澗皆羸弱諸將欲掩擊之金全下令曰敢言過澗者斬及募伏兵四起旗幟蔽日金鼓聲聞十餘里諸將乃服金全善料敵逾月退保海州遂引歸金全曰吾全軍而還不得為無功矣拜右衛聖統軍領義成軍節度使兼侍中保大八年八月卒於金陵年六十多內寵子男女凡三十二人元宗命少府監王仲連持節冊贈中書令諡曰順金全卒後閩楚之役興用事者皆少年不更軍旅覆敗相踵周人棄我罷弊攻取淮南國遂衰削不復能振人始思金全恨其已卒云

皇甫暉魏州人事唐晉事具五代史契丹入中原暉時為密州刺史與棣州刺史王建俱來奔元宗遣使具舟檝逆之將至暉念本起盜賊不自安至秦淮赴

水不死舟人援出之自言如履大石入朝歷歙州刺史神衛軍都虞候江州節度使加同中書門下平章事周師攻淮南爲北面行營應援使會劉彥貞姚鳳兵以行彥貞舉動躁撓人測其必敗暉獨持重部分甚整士亦樂爲用周人頗憚之及彥貞敗死暉鳳退保清流關周世宗親帥衆盡銳攻壽州而分兵襲清流暉陳山下周兵出山後要擊暉大敗猶收兵且戰且行入滁州滁州刺史王紹顏已委城避暉無所歸方斷橋自守周兵涉水踰城而入執暉鳳送壽州行在見世宗曰臣力憊欲暫坐及坐曰欲暫臥不俟命而臥神色自若曰臣非不盡力國事南北勇怯不敵臣在晉屢與契丹戰安能如今日大朝兵甲之盛昨退保滁州城不意大軍攀堞如飛而入臣智力俱殫故被擒耳世宗賜之馬及衣帶數日創甚暉不肯治而死子繼勳

繼勳少從暉兵間爲軍校以父死難擢將軍歷池饒二州刺史頗以吏事稱入爲神衛統軍都指揮使諸老將繼死繼勳雖尙少且無戰功徒以家世遂爲大將資產優贍名園甲第冠于金陵多蓄聲妓厚自奉養及開寶中大兵傳城繼勳保惜富貴無効死之意第欲後主亟降聞諸軍敗績則幸災見于詞色偏裨有募死士謀夜出奮擊者輒鞭而囚之自度罪惡日聞稀復朝請後主召議事亦辭以軍務不至內結傳詔使一切蔽塞及後主登城見王師旌旗壘柵彌徧四郊始大駭失色繼勳從還至宮乃以屬吏始出宮門軍士雲集鬱之斯須皆盡

江文蔚字君章建安人博學工屬文後唐明宗時擢第爲河南府館驛巡官坐秦王重榮事奪官南奔烈祖輔吳用爲宣州觀察巡官歷比部員外郎知制誥國初改主客郎中拜中書舍人烈祖殂元宗以喪亂之後因恤舊典散亡命文蔚以給事中判太常卿事與韓熙載蕭儼共加討論時稱其精練保大初遷御史中丞持憲平直無所阿枉馮延巳當國與弟延魯魏岑陳覺竊弄威福及伐閩敗績詔斬覺及延魯以謝國人而延巳岑置不問文蔚對仗彈奏曰賞罰者帝王所重賞以進君子不自私恩罰以退小人不自私怒陛下踐阼以來所信重者馮延巳延魯魏岑陳覺四人皆擢自下僚驟升高位未嘗進一賢臣成國家之美陰狡圖權引用羣小陛下初臨大政常夢錫居封駁之職正言讜論首罹譴逐棄忠拒諫此其始也奸臣得計欲擅威權於是保有保大二年正月八日敕公卿庶僚不得進見履霜堅冰言者恟恟再降御札方釋羣疑御史張緯論事忤傷權要其貶官敕曰罔思職分傍有奏論御史奏彈尙爲越職況非御史孰敢正言嚴續國之戚里備位大臣不附奸險尙遭排斥張義方上疏僅免嚴刑自是守正者得罪朋邪者信用上之視聽惟在數人雖曰接羣臣終成孤立陛下深思遠慮始信終疑復常夢錫宥密擢蕭儼侍從授張緯赤令羣小疑懼與酷吏司馬正彝同惡相濟迫脅忠臣高越之于盧氏義兼親故受其寄托痛其侵陵訴於君父乃敢蔽陛下聰明枉法竄逐羣凶勢力可以回天在外者握兵居中者當國師克在和

而三凶邀利迭爲前卻天生五材國之利器一旦爲
小人忿爭妄動之具使精銳者奔北饋運者死亡穀
帛戈甲委而資寇取弱鄰邦貽譏海內同列之中有
敢議論則馮魏毀之於中正彝持之於外構成罪狀
死而後已今陳覺延魯雖已伏辜而魏岑猶在本根
未殄枝幹復生馮延己善柔其色才業無聞憑恃舊
恩遂階任用蔽惑天聰斂怨歸上高審知累朝宿將
墳土未乾逐其子孫奪其居第使輿臺竊議將率狐
疑陛下方以孝理天下而延己母封縣太君妻爲國
夫人與弟異居捨棄其母作爲威福專任愛憎咫尺
天威敢行欺罔以至綱紀大壞刑賞失中風雨由是
不時陰陽以之失序傷風敗俗蠹政害人蝕日月之
明累乾坤之德天生魏岑道合延己蛇豕成性專利
無厭逋逃歸國鼠奸狐媚讒疾君子交結小人善事
延己遂當樞要面欺人主孩視親王侍燕誼譁遠近
驚駭進俳優以取容作淫巧以求寵視國用如私財
奪君恩爲己惠上下相蒙道路以目征討之柄在岑
折簡帑藏取與繫岑一言先帝卑宮勤儉陛下守之
勿失而岑營建大第廣役丁夫孽子之居過于內殿
亭觀之侈踰于上林前年建州勞還文徽入覲西苑
會燕捨爵策勳岑披猖無禮狂悖妄言與延己用意
多私行恩不當俾軍士懷恨怒之志受賞無感勵之
心將校爭功誼動京邑奸謀詭計誑惑國朝致漳州
屠害使者福州遠拒朝命百姓肝腦塗地國家帑藏
空虛福州之役岑爲東南面應援使而自焚營壁縱
兵入城使窮寇堅心大軍失勢軍法逗遛畏懦者斬

律云主將守城爲賊所攻不固守而棄去及守備不
設爲賊掩覆者皆斬昨敕赦諸將蓋以軍威政令各
非己出岑與覺延魯更相違戾互肆威權號令並行
理在無赦烈祖孝高皇帝櫛風沐雨勤勞二紀成此
慶基付之陛下比諸鄰邦我爲強國奈何賞罰大柄
肆奸宄之謀軍國資儲爲凶狡所散昨天兵敗軀統
內震驚將雪宗廟之羞宜醢奸臣之肉已誅二罪未
塞羣情盡去四凶方祛衆怒今民多饑饉政未和平
東有伺隙之鄰北有霸強之國市里訛言遐邇危懼
陛下宜軫慮殷憂誅鉏虺延己不忠不孝在法難
原魏岑同罪異誅觀聽疑惑請行典法以謝四方文
蔚將上疏先具小舟載老母以待左降元宗果怒貶
延己雖斃旋復柄用方宣延己制百官在廷常夢
錫大言曰白麻雖佳要不如江文蔚疏耳逾年召還
南唐建國以來憲度草創言事遇合卽隨材進用不
復設禮部貢舉至是始命文蔚以翰林學士知舉略
用唐故事放進士盧陵王克貞等三人及第元宗問
文蔚卿知舉取士孰與北朝文蔚曰北朝公薦私謁
相半臣一以至公取才元宗嘉歎中書舍人張緯後
唐應順中及第大銜其言執政又皆不由科第進相
與排沮貢舉遂復罷矣保大十年卒年五十二諡曰
簡

歐陽廣吉州吉水人保大中詣闕上書曰臣近遊潭
州伏見節度使邊鎬偶逢聖代初非將才措置乖刺
大失人心致奉節兵棄夜呼噪共焚譙門會明而遁

不然幾致大變是仁不足惠下也朗陵近在肘腋曾
不爲虞乃圖桂林以取奔敗是智不足謀遠也與監
軍使昌延恭不相協和動輒疑阻是義不足和衆也
幕府無賢才是禮不足得士也號令朝出夕改是信
不足使人也五者無一長考之前古未或不敗請擇
帥濟師以全境土書入不省及失湖南元宗思廣言
命授以官執政請召試廣言非人主尊賢待士之意
不肯就試乃授本縣令亦辭不受而卒

南唐書卷第十一

馮孫廖彭列傳第八

馮延己字正中一名延嗣廣陵人父令頽事烈祖至吏部尚書致仕嘗爲歙州鹽鐵院判官刺史滑言病篤或言已死人情頗詢延己年十四入問疾出以言命謝將吏外賴以安及長以文雅稱白衣見烈祖起家授祕書郎元宗以吳王爲元帥用延己掌書記與陳覺善因覺以附宋齊丘同府位高者悉以計出之於是無居己右者元宗亦頗悟其非端士而不能去延己負其材執狎侮朝士嘗謂孫忌曰君有何所解而爲丞郎忌憤然答曰僕山東書生鴻筆藻麗十生不及君談諧歌酒百生不及君諂媚險詐累劫不及君然上所以賓君於王邸者欲君以道義規益非遣君爲聲色狗馬之友也僕固無所解君之所解者適足以敗國家耳延己慚不得對給事中常夢錫屢言延己小人不可使在王左右烈祖感其言將斥之會晏駕元宗立延己喜形於色未聽政屢入白事元宗方哀慕厭之謂曰書記自有常職餘各有司存何爲不憚煩也乃少止保大初拜諫議大夫翰林學士遷戶部侍郎翰林學士承旨又進中書侍郎四年同平章事集賢殿大學士罷爲太子少傅頃之拜撫州節度使以母憂去鎮起復冠軍大將軍召爲太弟太保領潞州節餼以左僕射同平章事延己數居柄任揣元宗不能察其奸遂肆爲大言謂己之才略經營天下有餘而人主躬覽庶務大臣備位安足致理元宗果謂然悉委以政凡事奏可而已延己初以文藝

進實無他長紀綱頽弛吏胥用事軍旅一切以委邊帥無所可否愈欲以大言蓋衆而惑人主至譏笑烈祖戢兵以爲齷齪無大略嘗曰安陸之後喪兵數千輟食咨嗟者旬日此田舍翁安能成天下事今上暴師數萬於外宴樂擊鞠未嘗少輟此真英雄主也九年湖南平而朗州劉言叛勢張甚元宗亦知用兵之難謂延己與孫忌曰湖湘之役楚人求息肩吾之出師不得已耳今若授劉言旄節使和其民吾亦得休養衡湘之民國其庶幾乎忘卽欲奉行延己方以克楚爲功乃曰本朝出偏帥平一國寓縣震動今一旦三分棄其二傷威毀重非所以示天下且諸將行奏功矣持不下又不欲緣軍興取資于國以損其功遣使于長沙調兵賦苛征暴斂重失民心言遂取長沙盡據故楚地周人亦伺釁而動朝論籍籍延己力求去而元宗待之如初及周師大入盡失江北地始罷延己猶爲太子少傅數月復相會疾改太子太傅建隆元年五月乙丑卒年五十八謚忠肅延己工詩雖貴且老不廢如宮瓦數行曉日龍旗百尺春風識者謂有元和詞人氣格尤喜爲樂府詞元宗嘗因曲宴內殿從容謂曰吹皺一池春水何干卿事延己對曰安得如陛下小樓吹徹玉笙寒之句時喪敗不支國幾亡稽首稱臣于敵奉其正朔以苟歲月而君臣相謹乃如此延己晚稍自厲爲平恕蕭儼嘗斥其罪及爲大理卿斷軍使李甲妻獄失入坐死議者皆以爲當死延己獨揚言曰儼爲正卿誤殺一婦人卽當以死君等今議殺正卿他日孰任其責乃建議儼素

有直聲今所坐已更赦宥宜加弘貸儼遂免人士尤稱之弟延魯

延魯字叔文一名謚少負才名烈祖時與兄延己俱事元帥府元宗立自禮部員外郎爲中書舍人勤政殿學士有江州觀察使杜昌業者聞之歎曰封疆多難駕御賢才必以爵祿延魯一言合指遽寘高位後有立大功者當以何官賞之然元宗愛其才不以爲躡進嘗內宴出寶器貯龍腦數斤賜羣臣延魯曰臣請効陳平均分之比遍賜猶餘其半輒曰救賜錄事馮延魯拜舞懷之元宗爲驩笑而罷保大中師出平建州以延魯爲監軍使諸將欲乘勝遂取福州樞密使陳覺欲自爲功乃請銜命宣慰召李弘義入朝既見弘義不敢發還至劍州矯詔起邊兵命延魯將之元宗雖怒覺之專兵業已行因命延魯爲南面監軍使陳覺及王崇文魏岑會攻福州取其外郭會吳越將余安援兵自海道至白蝦浦將捨舟而漣淖不可行方布竹簣登岸我軍曹射之簣不得施延魯曰弘義不降恃此援耳若麾我軍稍退使吳越兵至半地盡勦之城立降矣裨將孟堅爭曰援兵已陷死地將盡力與我戰勝負殆未可知延魯不聽頃之吳越兵至岸鼓噪奮躍而前與城中夾擊我延魯敗走俘賊五千人孟堅戰死諸軍遂大潰死者萬計委軍實戎器數十萬國帑爲之虛耗延魯引佩刀自刺人救之不殊朝廷議卽軍中斬延魯及覺既有命矣會宋齊丘以嘗薦覺使福州自効乃詔械延魯覺還金陵屬吏皆止流竄延魯流舒州會赦復少府監元宗擇廷

臣爲巡撫使分按諸州延魯在焉右拾遺徐鍇上疏論其多罪無才不足辱臨遣不聽使還遷中書舍人以工部侍郎出爲東都副留守周師南侵分兵下東都延魯窘蹙自髡衣僧服而逃被執世宗釋之賜衣冠授給事中問江南事占奏詳華賜予加厚留大梁累年遷刑部侍郎得還拜戶部尚書宋興揚州節度使李重進叛伏誅元宗遣延魯朝于行在太祖將棄兵鋒南渡旌旗戈甲皆列江津厲色詰延魯曰爾國何爲敢通吾叛臣延魯色不變徐曰陛下徒知其通謀未知其事之詳也重進之使館于臣家國主令臣語之曰大丈夫失意而反世亦有之但時不可耳方宋受禪之初人心未定上黨作亂大兵北征君不以此時反今內外無事乃欲以數千烏合之衆抗天下精兵吾寧能相助乎太祖初意延魯必恐懼失次及聞其言乃大喜因復問曰諸將力請渡江卿以爲何如延魯曰重進自謂雄傑無與敵者神武一臨敗不旋踵况小國其能抗天威乎然亦有可慮者本國侍衛數萬皆先主親兵誓同死生固無降理大國亦損數萬人乃可况大江天塹風濤無常若攻城未下鑣道不繼事亦可虞太祖因大笑曰朕本與卿戲耳豈聽卿遊說哉會捕重進叛卒日戮數十人延魯因奏事言曰叛者獨一重進乎亦衆人乎謂衆人則陛下應天順人烏有此理獨一重進則脅從者何罪太祖感悟後獲者皆貸不誅厚賜遣延魯歸南渡之師由是亦輟後主嗣位延魯頗自伐奉使之功嘗晏內殿後主親酌酒賜之飲固不盡誦詩及索琴自鼓以侑

之延魯猶自若後主優容不責也楚國公從善入朝太祖授旄節留之闕下後主復遣延魯入謝疾作不能朝太祖待之素厚至是尤憐之遣使挾太醫護視詔放還金陵卒于家子僕韓熙載知貢舉放及第履試被黜後與其弟侃儀价伉入宋繼取名第南唐公卿家莫能及者价仕至殿中丞知福州至道咸平間歷典藩郡以政績聞延魯銳于仕進然喜言高退事嘗早朝集漏舍數曰元宗賜賀監三百里鏡湖非僕所敢望得賜玄武湖亦遂素意徐鉉笑答曰上於近臣豈惜一玄武湖恨無知章爾延魯不能對

孫忌高密人一名鳳又名晟少舉進士始濟陽爲進士者例修邊幅尚名檢忌豪舉跌宕不能蹈繩墨遂去渡河客趙魏間唐莊宗建號以豆盧革爲相革雅知忌辟爲判官遷著作郎明宗天成中與高鞏同事素王從榮從榮敗忌亡命至正陽未及渡追騎奄至亦疑其狀偉異睨之忌不顧坐淮岸捫弊衣齧蝨追者乃捨去渡淮至壽春節度使劉金得之延與語忌陽瘖不對授館累日忽謁漢淮南王安廟金先使人伏神座下悉聞其所禱乃送詣金陵時烈祖輔吳四方豪傑多至忌口吃初與人接不能道寒暄坐定辭辯鋒起人多憎嫉之而烈祖獨喜其文辭使出教令輒合指遂預禪代秘計每入見必移時乃出尤務謹密人莫窺其際烈祖受禪歷中書舍人翰林學士中書侍郎元宗立齊王景遂排之出爲舒州節度使治軍嚴有歸化卒二人正晝挺白刃入府求忌殺之入自西門吏士倉卒莫能禦適忌間行在東門聞亂

得民家馬棄之奔桐城叛卒不得忌乃殺都押衙李建崇而逸忌坐貶光祿卿元宗素重之不以爲罪累遷右僕射與馮延巳竝相每鄙延巳侮誚之卒先罷保大十四年周師侵淮南圍壽州分兵破滁州擒皇甫暉江左大震以忌爲司空使周奉表請爲外臣忌見延巳曰此行當屬公然忌若辭則是負先帝也旣行知不免中夜歎息語其副禮部尙書王崇質曰吾思之熟矣終不忍負永陵一坏土周世宗以樓車載忌于壽州城下使招仁瞻仁瞻望見忌戎服拜城上忌遙語之曰君受國恩不可開門納寇世宗詰之忌謝曰臣爲唐大臣豈可教節度使外叛於是遣王崇質歸而留忌會暑雨班師忌亦從至大梁館都亭驛遇入閣使班東省官後屢召見飲以醇酒問江南事忌但言寡君實北面無二心周將張永德與李重進不相能倡言重進且反唐人聞之以爲有間可棄遣蠟丸書招重進重進表其書于世宗皆斥瀆反間之言世宗遂發怒時鍾謨亦奉使在館俱召見責讓忌正色請死無撓辭又問江左虛實終不肯對比出命都承旨曹翰護至右軍巡院猶飲之酒數酌翰起曰相公得罪賜自盡忌怡然整衣索笏東南望再拜曰臣受恩深謹以死謝從者二百人亦皆誅死于東相國寺世宗性暴急莫敢救者忌已死乃始追悔元宗聞之流涕贈太傅追封魯國公諡文忠厚恤其家擢其子爲祠部郎中賜名魯嗣

論曰南唐之衰劉仁瞻死于封疆孫忌死于奉使皆天下偉丈夫事雖敵讎不敢議也區區江淮之地有

國僅四十年覆亡不暇而後世追考猶爲國有人焉蓋自烈祖以來傾心下士士之避亂失職者以唐爲歸烈祖於宋齊丘字之而不敢名齊丘一語不合則挈衣笥望秦淮門欲去追謝之乃已元宗接羣臣如布衣交間御小殿以燕服見學士必先遣中使謝曰小疾不能着幘欲冠帽可乎於虛是誠足以得士矣苟舍血氣各人類者烏得不以死報之耶傳曰君之視臣如手足則臣視君如腹心詎不信夫

廖偃彭師曷皆楚馬殷之臣偃虔州虔化人祖爽父匡圖仕皆至刺史偃少倜儻喜奇節通左氏春秋班固漢書馬殷有國自祕書郎爲裨將戍衡山縣殷子希萼與弟希崇爭國希萼敗見執師曷不知其世家自殷時爲將與希萼有舊怨希崇避殺兄各於是命師曷幽希萼於衡山使甘心焉師曷歎曰留後欲使我弑君耶吾豈爲是哉至衡山偃在焉相與護視希萼甚謹未嘗失人臣禮希崇意不快復遣召希萼歸長沙終欲加害偃擇勇士百人執兵衛希萼晝夜擊柝以警非常遂築行府與師曷奉希萼爲衡山王請命于金陵元宗爲出師定楚亂希萼遂入朝偃師曷俱從行而偃爲部署輜重指揮使尤勤瘁希萼流涕曰吾逐於逆豎非偃盡忠豈能免禍至金陵元宗召見兩人嘆獎之授偃左殿直軍使萊州刺史師曷殿直都虞候而使偃守道州以備南漢會朗州叛潭州亦潰偃所部多潭人中夜作亂偃率親卒力戰不能支極罵而死元宗下制哀悼贈右領衛大將軍寧州刺史諡曰節而師曷不見用卒於金陵後主時徐鉉

爲史官有豐城令劉虛己移書明偃大節云論曰史之失傳者多矣廖偃彭師曷之事可謂盡忠所事者而五代史則以爲馬希崇遣師曷偃囚希萼而師曷奉希萼爲衡山王是偃亦同受囚希萼之指而師曷獨能全之也江表志則以爲師曷且從希崇害希萼偃百計誘諭而寢其謀及衛希萼也師曷之計乃無所施是師曷實欲害希萼獨賴偃以全耳嗚呼何其異也惟十國紀年言兩人者俱有功差可考信故多采之大抵忠于故君兩人實同而偃功爲多不可誣也張巡許遠之事著若日星兩家子弟猶有異論况偃師曷耶

南唐書卷第十二

孟陳韓朱列傳第九

孟堅始事建州王延政為將保大初查文徽討王氏之亂堅來降文徽即以兵付之出奇鏖擊有功及馮延魯之攻福州也堅亦在兵間吳越援兵自海道至阻淖不得登岸延魯不知兵急於破敵欲斂兵誘而感之堅諫曰吳越兵進退俱不能方致死于我使得至平地未見可勝也延魯大言曰吾自擊之無預君事吳越兵得平地果不可制李弘義兵自城中出盡銳夾擊延魯大敗棄軍遯堅力戰以死延魯雖貶而其黨方盛故堅之死事不見錄國人哀之

陳誨建州人生數月趨健能馳走其父異之名之曰阿鐵長事王延政為將唐師攻建州傳其城誨數出挑戰先鋒橋道使王建封克外郭擒誨將斬之已解衣伏鑽忽脫身絕馳追者數十百輩莫能及自歸大將查文徽文徽駭異用為戰棹指揮使領故部曲從攻福州馮延魯敗走諸營皆潰死者萬計委軍實戎器不可勝計誨獨殿後收所棄金帛二十萬以歸文徽鎮建州誨為劍州刺史諜者告吳越戍兵棄福州遯文徽暗而貪功即率誨俱進誨以戰艦入閩江適春兩江水暴漲一夕七百里抵城下擊敗福州兵獲其將馬先進葉仁安鄭彥華始知福州未嘗有變誨親故多在城中方遣間使招之文徽勒步騎亦至福州來迎文徽傳令入城誨以所聞告且曰僕閩人也豈不能料閩人之情宜先立寨整衆俟所招親故來得其實徐圖之文徽曰狐疑且生變棄機據城上策

也遂入誨知其必敗植旗鳴鼓列兵江干以須之文徽果敗被執誨全軍還劍州獻馬先進于金陵用鄭彥華為將唐兵兩敗福州皆大取塗地誨在兵間皆有功號名將遂為建州節度使兼侍中訓兵積穀隱然為大鎮嘗破福州兵于南臺江軍聲大震由是朝廷委以南方事而名其軍曰忠義及周兵入淮南誨遣子德誠率鎮兵赴難諸將多敗惟德誠頗有戰功拜和州刺史建隆三年六月誨引病求罷朝論難其代乃以弟劍州刺史謙為留後召誨還都後主親臨視七月卒諡忠烈閩之亂士民幾殲焉惟誨之宗族益感謙與德誠後亦繼領建州旄節諸子悉至顯官韓熙載字叔言北海人少隱嵩山唐同光中擢進士第父光嗣平盧節度副使軍中逐其帥符習推光嗣為留後明宗即位討亂光嗣坐死熙載來奔時烈祖輔吳方修明法令熙載年少放蕩不守名檢補和常滁三州從事時人士自中原至者多以介意烈祖受禪召為祕書郎使事元宗於東宮諭之曰以卿早奮名場疎篤未更事故使歷州縣之勞今用卿矣宜善自修飭輔吾兒也熙載亦不謝在東宮談燕而已不嬰世務元宗即位拜虞部員外郎史館修撰兼太常博士乃慨然曰先帝知我而不顯用是以我為慕容紹宗也始數言朝廷事所當施行者展盡無所回隱宋齊丘馮延巳等皆側目元宗意獨嘉之命權知制誥書命典雅有元和之風與徐鉉齊名時號韓徐契丹入汴晉少帝北遷熙載上疏曰陛下有經營天下

之志今其時矣若戎主遁歸中原有主則不可圖矣不省陳覺馮延魯福州喪師初議軍法齊丘爲之請止削官遷外郡熙載上疏請無赦又數言齊丘黨與必基禍亂熙載不能飲酒齊丘誣以酒狂貶和州司士參軍徙宣州節度推官復入爲虞部郎中史館修撰遷中書舍人周太祖有天下用事者猶議北伐熙載曰北伐吾本意也但今已不可耳郭氏奸雄曹馬之流雖有國日淺守境已固我兵妄動豈止無功耶言雖切而朝廷闇於機會經營中原之意終不已周人果以籍口兵入淮南齊王景達以兵馬元帥臨邊陳覺爲監軍使熙載言出師大事也當先正名莫信於親王莫重於元帥安用監軍使哉亦不從熙載才氣逸發多藝能善談笑爲當時風流之冠尤長於碑碣他國人不遠數千里輦金幣求之然性忽細謹老而益甚蓄妓四十輩縱其出與客雜居物議闐然熙載密語所親曰吾爲此以自污避入相爾老矣不能爲千古笑端坐託疾不朝貶右庶子分司南都熙載盡斥諸妓後主喜留爲祕書監俄復故官欲遂大用之而去妓悉還後主數曰孤亦無如之何矣宿直宮中賜對多所弘益後主手教褒之進中書侍郎卒年六十九後主謂侍臣曰吾竟不得相熙載欲贈平章事古有是或對曰晉劉穆之贈開府儀同三司卽故事也乃贈右僕射同平章事廢朝三日諡文靖命葬梅嶺岡謝安故墓側著格言及後述三卷擬議集十五卷定居集二卷初熙載嘗使周及歸元宗歷問周之將相熙載曰趙點檢顧視非常殆難測也及

太祖受禪人服其識

朱元穎州沈丘人本姓舒少倜儻通左氏春秋與楊訥同爲河中李守貞客守貞叛俱來乞兵楊訥者李平也語在平傳元旣留事南唐以駕部員外郎待詔文理院數上書論事言今幸中原多故苟支歲月非所以爲國當取湖湘閩越錢塘以固基本且請專任軍旅以次討定用事者嫉其言共譖之以爲遠人謀握兵包藏莫測遂罷待詔元失意縱酒不事事朝廷亦優容之保大末周師入淮南元請對言兵事元宗大悅命從齊王景達救壽州元善撫士卒與之同甘苦每臨戰誓衆詞指慷慨流涕被面聞者皆有効死赴敵之意破舒和二州以功加淮南西北面行營應援都監與邊鎬許文績柵紫金山軍聲頗振益柵且及壽州元恃功時或違景達節制監軍使陳覺與元素有隙且嫉其能屢表元本學縱橫不可信不宜付以兵柄元宗乃命楊守忠代之守忠至元帥府景達檄元計事元憤怒欲自殺其客宋均曰丈夫何往不可乃爲妻子死耶遂舉寨萬餘人降周由是諸軍皆潰邊鎬許文績楊守忠皆被擒壽州不守遂畫江請盟矣元在江南娶查氏文徽女至是伏誅文徽累表乞貸死不從以珠桐覆尸於市哭之隕絕觀者皆爲垂泣元歸周復姓舒世宗愛其驍果以爲蔡州團練使其母猶在沈丘遂迎養焉太祖受禪遷汀州防禦使太平興國初卒

論曰亡國之君必先壞其紀綱而後其國從焉方是時疆場之臣非皆不才也敗於敵未必誅一有成功

讒先殺之故強者玩寇弱者降敵自古非一世也南唐如陳覺馮延魯查文徽邊鎬輩喪敗塗地未嘗少正典刑朱元取兩州於周兵將遜之時固未爲雋功而陳覺已不能容此元之所以降也元降諸將束手無策相與爲俘纍以去而唐遂失淮南臣事于周雖未卽亡而亡形成矣欲知南唐之亡者當於是觀之

南唐書卷第十三

劉潘李嚴張龔列傳第十

劉仁瞻字守惠淮陰洪澤人父金事吳武王有戰功至濠州團練使長子仁規娶武王女貴於其國嘗爲清淮軍節度使仁瞻略通儒術好兵書有名於國中事烈祖歷黃袁二州刺史入爲龍衛軍都虞候拜鄂州節度使元宗伐楚仁瞻帥州師克已陵撫納降附甚得人心保大中湖湘戍兵潰歸復失故楚地上書者多謂周人有南侵之謀淮上石偶人言元宗聞而惡之斷其首自六月至冬不雨長淮可涉民流入周邊城遮殺之不能禁唐亦興屯田修邊備以壽州最爲要地十三年徙仁瞻爲清淮軍節度使自楊氏有吳歲暮淮涸輒增戍以備侵軼謂之把淺監軍吳廷紹以爲無事徒費糧糗罷之仁瞻表陳不可罷未及行周已遣將李穀王彥超韓令坤等帥師大入詔書暴我納李金全援李守貞慕容彥超結契丹太原之罪報至上下失色仁瞻獨部分號令宴勞吏士閒暇如平時十一月出兵破城南大柵殺周兵數千人元宗遣神武統軍劉彥貞將三萬人救壽州十四年正月彥貞至來遠鎮距壽州二百里軍容甚盛李穀燒營夜遁保正陽彥貞率戰艦數百艘泝淮而上仁瞻曰敵已畏君矣當持重養威以俟閒若遽求戰而不能勝則大事去矣彥貞不從仁瞻曰周人遯必設伏遇之將敗績乃率勵其下益兵固守彥貞果大敗沒於陣伏尸三十餘里亡戈甲三十萬周世宗自將攻城屯於城西北淝水之陽徵宋亳陳穎許秦徐宿州

丁夫數十萬備攻城雲梯洞屋下臨城中數道同時進攻填塹陷壁晝夜不休如是者累月每鼓角四發聲震牆壁皆動我援兵在外者見利輒進常陷伏中以故屢敗而終不悟仁瞻雖知外援之敗意氣益壯覘世宗在城下據胡牀督攻城仁瞻素善射自引弓射之箭去胡牀數步輒墮世宗命進胡牀於箭墮處後箭復遠數步而墮仁瞻知之投弓於地曰若天果不佑唐耶吾有死於城下耳終不失節於是世宗遣中使來諭曰知卿忠義然士民何罪又親駕臨城招之皆不從自正月至四月不可下世宗還京師楊泰滁和舒蘄諸州皆復爲唐守渦口定遠周兵戍守者亦皆爲我師龔破江左幾復振而壽州之圍獨不解元宗遣元帥齊王景達以兵數萬來援分重兵據紫金山列寨十餘處與城中傳烽相應築甬道抵城通餽餉六月仁瞻出兵殺周兵數百焚攻城洞屋甚衆周將李重進等兵力頗屈仁瞻因請乘世宗之歸以邊鎬守城自出決戰景達畏懦又方任陳覺固不許仁瞻憤鬱得疾少子崇諫夜泛小舟渡淮謀紓家禍爲軍校所執仁瞻命腰斬之監軍使文德殿使周廷構哭於中門又求救於仁瞻妻薛氏薛氏曰崇諫幼子固所不忍然貸其死則劉氏爲不忠之門促命斬之然後成喪聞者皆爲出涕十五年二月世宗復親征屢戰皆克唐軍被俘馘者四萬人餘衆不能復整朱元朱仁裕孫璘皆降周仁瞻聞之扼吭憤歎世宗知壽州且下心獨嘉仁瞻之忠恐城破殺之乃下詔諭使自擇禍福三月甲辰又耀兵城北而仁瞻已

困篤不知人監軍周廷構營田副使孫羽等爲仁瞻表請降戊申世宗次城北受之昇仁瞻至幄前撫勞嘉歎拜天平軍節度使兼中書令命還城養疾辛亥仁瞻卒年五十八州人皆哭偏裨及士卒自剄以殉者數十人世宗遣使弔祭追封彭城郡王錄其子崇讚爲懷州刺史賜莊宅各一區元宗聞仁瞻死哭之慟贈太師中書令諡忠肅嘆曰仁瞻有知其肯捨我而受周命耶是夕夢仁瞻若拜謝庭中加封衛王後主立進封越王開寶中仁瞻子崇諒爲進奉使太祖嘉其忠臣之後特命爲都官郎中仁瞻至今廟食壽春不絕

論曰政和中先君會稽公爲淮西常平使者實請於朝列仁瞻於典祀且名其廟曰忠顯後又嘗寓家壽春方世宗攻下壽州廢爲壽春縣而徙壽州於下蔡故壽春父老喜言仁瞻死時事言其夫人不食五日而卒今傳記所不載廟在邑中歲時奉祀甚盛乾道淳熙之間予遊蜀在成都見梓潼令金君所藏周世宗除仁瞻天平軍節度使告身白紙書墨色印文皆如新金君言仁瞻獨一裔孫賣藥新安市客死無後故得之其詞與王溥所修周世宗實錄皆合若歐陽氏五代史所稱盡忠所事抗節無虧前代名臣幾人可比予之南伐得汝爲多蓋摘取制中語載之本不相聯屬又頗有潤色也以仁瞻之忠天報之宜如何而其後於今遂絕天理之難知如此可悲也夫

潘佑幽州人祖貴事劉仁恭爲將守光殺之父處常

脫身南奔事烈祖爲散騎常侍佑生而狷潔閉門苦學不交人事文章議論見推流輩陳喬輩薦于元宗起家祕書省正字後主在東宮開崇文館以招賢佑預其間及嗣位遷虞部員外郎史館修撰議納后禮援據精博遷知制誥召草勸南漢書文不加點遷中書舍人後主以潘卿稱之酷喜老莊之言嘗作文曰莊周有言得者時也失者順也安時處順則哀樂不能入也僕佩斯言久矣夫得者如人之有生自一歲至百歲自少得壯自壯得老歲運之來不可卻也此所謂得之者時也失之者亦如一歲至百歲暮則失早今則失昔壯則失少老則失壯行年之去不可留也此所謂失之者順也凡天下之事皆然也達者知我無奈物何物亦無奈我何也其視天下之事如奔車之歷蟻蛭也值之非得也去之非失也燕之南越之北日月所生是爲中國其間含齒戴髮食粟衣帛者是爲人剛柔動植林林而無窮者是爲物以聲相命是爲名倍物相聚是爲利彙首而芸芸是爲事事往而記於心爲喜爲悲爲怨爲恩其名雖衆實一心之變也始則無物終復何有而於是強分彼我彼謂我爲彼我亦謂彼爲彼彼自謂爲我我亦自謂爲我終不知孰爲彼耶孰爲我耶而世方徇欲嗜利繫心於物局促若轅下駒安得如列禦寇莊周者焚天下之轅釋天下之駒浩浩乎復歸於無物歟此吾平昔所言也足下之行書以贈別開寶五年更官名改內史舍人初與張洎親厚及俱在西省所趨旣異情好頓衰每歎曰堂堂乎張也難與並爲仁矣時南唐日

衰削用事者充位無所爲佑憤切上疏極論時政歷
詆大臣將相詞甚激訐後主雖數賜手札嘉歎終無
所施用佑七疏不止且請歸田廬乃命佑專修國史
悉罷他職而佑復上疏曰三軍可奪帥也匹夫不可
奪志也臣乃者繼上表章凡數萬言詞窮理盡忠邪
洞分陛下力蔽姦邪曲容諂僞遂使家國惜惜如日
將暮古有桀紂孫皓者破國亡家自己而作尙爲千
古所笑今陛下取則姦回敗亂國家不及桀紂孫皓
遠矣臣終不能與姦臣雜處事亡國之主陛下必以
臣爲罪則請賜誅戮以謝中外詞既過切張洎從而
擠之後主遂發怒以潘佑素與李平善意佑之狂直
多平激之而平又以建白造民籍爲所排乃先收平
屬吏併使收佑聞命自剄年三十六徙其家饒州
處士劉洞賦詩弔之國中人人傳誦爲泣下及王師
南征下詔數後主殺忠臣蓋謂佑也子華仕宋至屯
田員外郎以疾致仕景德中真宗皇帝憐佑之忠起
華於家授故官

論曰佑學老莊齊死生輕富貴故其上疏縱言詆訐
若惟恐不得死者雖激於一時忠憤亦少過矣後主
非強憤雄猜之君而陷之於殺諫臣使佑學聖人之
道知事君之義豈至是哉不幸既死同時諸臣已默
默爲降虜矣猶醜正嫉言視之如仇誣以狂愚感溺
淫祀左道之罪至斥爲人妖雖後之良史有不能盡
察其說者於戲悲夫

李平本姓名曰楊訥少爲嵩山道士與汝陰布衣舒
元共學數年業成同游蒲中客於節度使李守貞守

貞叛漢使兩人懷表間行乞師於金陵元宗爲出師
數萬爲之聲援甫出境而守貞叛兩人無所復命且
唐遇之厚因留事唐而訥始自稱李平元亦易姓朱
元宗皆以爲尙書郎吳越侵常州欲以平爲將固辭
遷衛尉少卿周兵取蘄州不能有復棄而歸乃以平
爲刺史朱元宗以平本與元同歸唐慮其不自
安召還金陵使者失指械平以歸元宗大驚慰勉之
拜建州節度使召爲衛尉卿潘佑好老莊平少爲道
士習其說因相與遊平請復井田法造民籍復造牛
籍課民種桑後主本好古務農甚悅其言使判司農
寺平急於成功施設無漸人不以爲便後主亦中悔
罷之而佑歷詆一時公卿獨稱薦平請以判司會府
羣議益不平會佑以直諫得罪因坐以與平淫祀鬼
神事繫平大理獄縊死獄中

嚴續字興宗馮翊人祖實仕故唐爲江淮水陸轉運
判官徙家廣陵父可求爲吳武王謀臣及景王宣王
嗣立又皆有功宣王建國可求爲尙書左僕射同平
章事大和二年卒續十餘歲以父蔭補千牛備身遷
祕書郎尙烈祖女生長富貴而性恭謹歷兵部侍郎
尙書左丞元宗卽位進禮部尙書中書侍郎出牧池
州復拜中書侍郎兼三司使又出爲江州節度使數
年復入知尙書省遂爲門下侍郎同平章事初續之
未出池州也宋齊丘專國公卿多附之惟續持正不
爲屈翰林學士常夢錫嘗指言齊丘過咎元宗語之
曰大臣惟嚴續能自立然才短恐不能勝其黨卿宜
助之夢錫退諭指於續續因與夢錫親厚然不能盡

用其言也卒爲黨人所排與夢錫俱補外及爲相雖自以肺附盡忠不貳然寡學識聽用多非其人不能稱職或作螭蟹賦以譏切之是時以軍興百司政事往往歸樞密院續言多不見用求罷拜鎮海軍節度使屬疾還都已革猶不亂與客言論如平時後主使內夫人問之歷陳羣臣邪正某當進某當退辭氣慷慨不及其私翼日卒年五十七諡曰懿初續以不學見輕同列遂力教子弟諸子及孫舉進士者十餘人張易字簡能魏州元城人高祖萬福故唐金吾將軍後徙萊州掖縣易性豪舉尙氣少讀書於長白山又徙王屋及嵩山苦學自勵食無鹽酪者五歲齊有高士王達靈居海上博學精識少許可易從之遊數年入洛舉進士不中以昇元二年南歸授校書郎大理評事時方重赤縣拜上元令元宗立以水部員外郎通判歙州刺史朱匡業平居甚謹然醉則使酒陵人果於誅殺無敢犯者易至赴其宴先已飲醉就席酒甫一再行擲杯推案攘袂大呼詬責鋒起匡業尙醒愕然不敢對惟曰通判醉甚不可當也易巍峨喑鳴自若俄引去匡業使吏掖就馬自是見易加敬不敢復使酒郡事亦賴以濟太弟景遂初立高選官僚召爲贊善大夫景遂召飲以玉杯行酒因與坐客傳玩至易忽大言曰殿下有重寶輕士之意何耶抵於柱礎碎之坐皆失色其他規正皆類此景遂不爲忤待易益厚遷刑部郎中判大理寺周人南侵時江淮久安人不知戰我師屢北上下震恐易獨揚言朝路曰國家被山帶海守奕世之業昔者夫差以無道之兵

威陵齊晉孫權以草創之國勢逼曹劉今若上下併力敵何足畏哉元宗聞而異之召使宿直禁中議事然亦不能用也陳覺李徵古方用事朝野側目易一日朝退數曰吾忝廷尉職誅邪孽當手斃二豎以謝曠官俄以吳越犯邊出爲宣歙招諭使判宣州前刺史方築州城役徒數萬一切罷遣之曰自守者弱遠圖者強何以城爲吳越聞之懾服不敢復犯後主封吳王召易爲吳王司馬東宮建又爲左庶子後主卽位遷右諫議大夫復判大理寺尋乞解大理改勤政殿學士判御史臺采武德至寶曆君臣問對及臣下論奏骨鯁者七十事爲七卷曰諫奏集上之註太玄未成卒年六十一

龔慎儀後主時爲給事中開寶三年高祖欲封南漢未決詔後主諭劉鋹令奉正朔後主乃遣慎儀持書使南漢書曰僕與足下叨累世之盟雖疆畿阻闊休戚實同敢奉尺書敬布腹心昨大朝伐楚足下疆吏弗靖遂成釁隙初爲足下危之今弊邑使臣入貢皇帝幸以此宣示曰彼若能幡然改圖單車之使造廷則百萬之師不復出矣不然將有不得已者僕料大朝之心非貪土地也怒人不賓而已且古之用武不計強弱小大而必戰者有四父母宗廟之讐一也彼此烏合民無定心二也敵人進不捨我退無守路戰亦亡退亦亡三也彼有敗亡之勢我乘進取之機四也今足下與大朝無是四者而坐受天下之兵決一旦之命有國家利社稷者固如是乎夫疆則南面而王弱則玉帛事大屈伸在我何常之有違天不祥好

戰危事天方相楚尙未可爭而況今日之事耶地莫險於劍閣而蜀亡矣兵莫強於上黨而李筠失守矣竊意足下國中必有矜智好謀之臣獻尊主強國之策以謂五嶺之險非可遽前堅壁清野絕其鑿道依山阻水射以強弩彼雖百萬之兵安能成功不幸而敗則輕舟浮海猶足自全豈能以萬乘之主而屈於人哉此說士之常談可言而不可用異時王師南伐水陸並舉百道俱進豈暇俱絕其鑿道盡保其壁壘或用吳越舟師自泉州航海不數日至足下國都矣人情恟恟則舟中皆爲敵國忠義效死之士未易可見雖有巨海孰與足下俱行乎敢布腹心惟與大臣熟計之史館修撰潘佑之辭也銀得書怒囚慎儀不遣後主表聞太祖遂決興師南漢平乃得歸後主之亡也慎儀爲徽州刺史會昭武留後盧絳聞國破提兵自宣州欲入福建過歙慎儀閉城拒守絳怒曰慎儀吾故人何爲見拒遣裨將馬雄攻之慎儀朝服而出爲雄所害

南唐書卷第十四

郭張林盧蒯二陳列傳第十一

郭廷謂字信臣彭城人父全義仕爲濠州觀察使廷謂幼好學善書札騎射補殿前承旨出爲濠州中門使全義卒擢莊宅使卽爲州監軍周侵淮南廷謂與州將黃仁謹約以死守籍州民不逞者聚於僧寺嚴兵守之日給食隨所能使造守具故周師終不知城中虛實久不可下元宗歎其忠因大發戰糧命與林仁肇援壽州周世宗聞之徙下蔡浮橋於渦口築壘夾淮東西以護橋扼濠壽之衝暑雨淮漲廷謂掩不備輕舟泝流急趨渦口將麾兵斷笮周人覘知設伏待之廷謂將至揣得其情駐軍不進襲敗周將武行德周務勅於定遠斬首數百行德挺身遯卒焚浮橋周兵死者不可計遂盡焚軍資取良馬數百進武功殿使就遷州刺史猶以爲賞薄又遷團練使兼上淮水陸應援使及紫金山戰唐將帥多降於周廷謂獨還軍守濠州治壁壘繕戈甲爲守備世宗復南征廷謂表金陵請援且言周師日張願卑辭請和以俟機會夜出敢死士千餘襲破周營焚雲梯洞屋周人大驚相蹂踐死者甚衆然援師不至世宗親攻城焚戰艦數百艘殺二千人進攻羊馬城又殺數百人遣諜持詔諭降廷謂廷謂度不能支奉表於周懇言世受本國爵命家在江南欲遣使稟命國主世宗許之爲緩攻及廷謂使還知金陵卒不能救集將士於壘門南嚮慟哭再拜乃降世宗見廷謂賜宴勞之曰兵興以來江南敗亡相踵惟卿能犯渦口浮橋破定遠寨

足報國矣濠州小城使汝主自守豈能固哉賜襲衣金帶良馬及器皿萬餘拜亳州防禦使以其弟廷讚爲和州刺史因命帥濠州兵東攻天長下之遷樓櫓戰權左右廂都監入朝官至靜江軍節度觀察留後知梓州代歸賜第東都卒年五十四廷謂事母孝朝夕束帶立侍寒暑不變爲政亦有惠愛方廷謂降周時令其錄事參軍鄱陽李延鄒草降表廷鄒責以忠義不爲具草廷謂愧其言然業已降必欲得表以兵脅之延鄒投筆曰大丈夫終不負國爲叛臣作降表遂遇害元宗聞之召見延鄒子命以官

張彥卿史失其鄉里世家保大末周世宗南侵彥卿爲楚州防禦使周師銳甚旬日間海泰州靜海軍皆破元宗亦命焚東都官寺民廬徙其民渡江世宗親御旗鼓攻楚州自城以外皆已下發州民濬老鶴河遣齊雲戰艦數百自淮入江勢如雷霆烈焰彥卿獨不爲動及梯衝臨城鑿城爲窟室實薪而焚之城皆摧圮遂陷彥卿猶列陣城內誓死奮擊謂之巷鬪日暮轉至州廨長短兵皆盡彥卿取繩牀搏戰及兵馬都監鄭昭業等千餘人皆死之無一人生降者周兵死傷亦甚衆世宗怒盡屠城中諸民焚其室廬然得彥卿子光祐不殺也元宗下詔贈彥卿侍中天長縣時陞爲雄州刺史建武軍使易文贊亦固守聞楚州陷遂降彥卿馬元康書以爲彥能亦莫知孰是也論曰彥卿守楚州孤壘無援當百倍之師身可碎志不可踰雖劉仁贍殆不能過而史家傳載獨略至其名亦或不同於虜何其重不幸也

林仁肇建陽人事閩爲裨將沉毅果敢文身爲虎軍中謂之林虎子閩亡久不見用會周侵淮南元宗遣使至福建募勇士得仁肇及陳德誠鄭元華皆拔爲將仁肇率偏師援壽州攻城南大寨有功又破濠州水柵推淮南屯營應援使時周人正陽浮橋初成扼援師道路仁肇率敢死士千人以舟實薪芻乘風舉火焚橋周將張永德來爭會風回火不得施我兵少却永德鼓噪乘之遂敗仁肇獨騎一馬爲殿永德引弓射之屢將中仁肇輒格去永德驚曰此壯士不可逼也遂捨之而還及割地元宗以爲潤州節度使徙鄂州又徙南都留守開寶中密言於後主曰宋淮南諸州戍守單弱而連年出兵滅蜀平荆湖今又取嶺表往返數千里師旅罷弊此在兵家爲有可乘之勢請假臣兵數萬出壽春渡淮據正陽因思舊之民以復故境彼縱來援吾形勢已固必不得志兵起之日請以臣舉兵外叛聞事成國家饗其利不成族臣家明陛下不預謀後主懼不敢從時皇甫繼勳朱全贇掌兵柄忌仁肇雄略謀有以中之會朝貢使自京師回擿使言仁肇密通中朝見其畫像於禁中且已爲築大第以待其至後主方任繼勳等惑其言使人持酖往毒之仁肇少病風口氣常臭醫云肺掩不正及遇酖家人怪其不臭俄卒初仁肇尤爲陳喬所知至是喬歎曰國勢如此而殺忠臣吾不知所稅駕也然不能白其誣仁肇卒逾年後主遂見討又逾年國爲墟矣

盧絳字晉卿宜春人自言唐中書舍人歙州刺史肇

之後初名充慕晉魏絳更焉讀書略通大指喜論當世利病然脫略繩檢每以博弈角觝爲事舉進士不中爲吉州回運務計吏盜庫金事覺當伏危法乃更儒服亡去至新淦客於土豪陳氏與其子弟共學絳好縱橫兵書日夜讀之陳氏察其非士流謂曰朝廷方求賢豪吾子其可久留此乎因厚具裝遣行絳將還宜春中途飲博盡費其裝比至家母及兄弟皆鄙謂之絳乃入廬山白鹿洞書院猶亡賴以屠販爲事多脅取同舍生金又持推貨誣廬山中浮屠以邀賄謝人皆患苦之與諸葛濤蒯鼈號廬山三害朱弼爲國子助教將捕治其罪復亡去往來金陵丹陽間遇大寒平地躍起折簷桷爲薪以自濟守倉吏召歸使躍倉簷自氣樓入倉中盜米一夕往返數十久之乃上書論事未報詣樞密使陳喬口陳所上書詞辨從橫喬聳然異之用爲本院承旨授沿江巡檢募亡命習水戰使馬雄王川軍等分將之要吳越兵於海門屢獲舟艦以善戰聞開寶中密說後主曰吳越仇讎腹心之疾也他日必爲北兵鄉導以攻我臣屢與之角知其易與不如先事出不意滅之後主曰然則大朝且見討奈何絳曰臣請詐以宣歙叛陛下聲言伐叛且賂吳越乞兵吳越之兵勢不得不出俟其來拒擊之而臣躡其後國可覆也滅吳越則國威大振北兵不敢動矣後主不聽及王師來討以絳爲凌波都虞候沿江都郡署守秦淮水柵戰屢勝諸將忌其能共說後主遣絳出援潤州乃授昭武軍節度留後帥八千人陣於潤州城下北軍不敢逼入城拒守而節度

使劉澄謀因計事斬絳以城降絳覺之澄乃謂絳曰都城危甚萬一不守守此何爲絳曰君爲守不可棄城宜赴難者絳也是夕澄遣裨將出送降款絳帥部下馳出欲冒圍入金陵圍堅不可入乃走保宣州金陵城陷諸郡皆下絳獨不降謀南據閩中過歙州怒刺史龔慎儀不出迎殺之而行太祖使絳弟龔招絳絳初欲殺龔以明不屈已而卒降至京師授冀州團練使遇龔慎儀兄子贊善大夫穎於朝詬絳曰是殺我叔父者執至殿陛訴冤詔屬吏樞密使曹彬言其才略可用願宥其死使自効太祖曰是貌類侯霸榮券誓書招臣乎霸榮河東將嘗來降已而復叛歸弑其主劉繼恩者故太祖深惡之

蒯鼈宣城人善屬文南唐承唐末文體纖麗之弊士率不能自振鼈獨不事華藻以理趣爲本有承平餘風然居鄉飲博無行不爲人士所容迺去入廬山國學亡賴尤甚晚乃勵風操尚信義一言之出必復而後已嘗蓄龍尾硯友人欲之而不言鼈亦心許之未及子也一日友人不告而歸鼈悔恨徒步數百里追及授硯而還猶以素行爲有司所擯終國亡不仕久之遊京師擢進士第仕至殿中丞樊若水欲薦於朝鼈恥之亟致仕歸隱廬山數年卒

陳喬字子喬廬陵王笥人父濬事吳爲翰林學士烈祖時以兵部尚書卒喬幼敏悟文辭清麗事親以孝聞濬死撫恤族黨均財給之親疎無間起家爲太常寺奉禮郎歷屯田員外郎中書舍人淮南兵興元宗

憂蹙不知所爲陳覺李徵古請以宋齊丘攝政元宗怒度羣臣必持不可乃促召喬草詔如覺徵古言喬請對未報排宮門入頓首曰陛下旣署此則百官朝請皆歸齊丘尺地一民非陛下有陛下縱脫屣萬乘獨不念先帝中興大業之艱難乎讓皇幽囚丹陽宮陛下所親見也他日垂涕求爲田舍翁不可得矣元宗笑而止引喬入見后及諸子曰此忠臣也及齊丘黨與皆斥喬與齊丘尤親厚獨得不坐遷都豫章以喬輔太子留金陵後主嗣位歷吏部侍郎翰林學士承旨樞密副使遂以門下侍郎兼樞密使貶制度改右內史侍郎兼光政院使輔政喬風度淹雅小心守法度然短於才略吏胥多交通權倖侮文法不能察也太祖遣使召後主入朝後主欲往以喬爲介喬曰往必見留如社稷何後主懼見討喬曰陛下不得已當以臣爲解及兵圍金陵太祖又遣進奉使江國公從鎰諭指欲後主自歸且命曹彬緩攻以俟之而喬堅持不可劉澄以潤州降後主方惶惑欲置其家不問喬憤切曰人臣受重寄一旦開門迎敵此豈可容悉取其父母妻子斬之於是人皆知喬必死國事矣及城將陷後主自爲降款命喬與清源郡公仲寓詣曹彬喬持款歸府投承露中復入見云自古無不亡之國降亦無由得全徒取辱耳請背城一戰而死後主握喬手涕泣不能從喬曰如此則不如誅臣歸臣以拒命之罪後主又不從乃掣手而去至政事堂召二親吏解所服金帶與之曰善藏吾骨遂自縊二吏徹榻瘞之金陵平家人謀改葬求尸不獲或見一丈

夫衣黃半臂舉手障面及發瘞如所見云
陳起蘄州人性剛硬尤惡妖異昇元中以進士起家
爲黃梅令時縣境獨木村有妖人諸佑挾左道自言
數世不食肉能使富者貧貧者富俚民稍稍從之初
有徒數十人積數年從者至數百男女無別號曰忍
辱夜行晝伏取資於盜相與倡言佑有神術能升虛
空入水火州縣亦憚之不敢問起到官邑人畢賀佑
獨偃蹇不至起乃按戶籍取佑爲里正不服慢言曰
吾且斷令頭起告巡檢使周鄴出兵捕佑等獲之不
能神皆就執縛搜其家得乘輿服器遂斬之鄴欲宥
其婦女童稚起曰此皆瀆亂人倫不可使有遺育乃
併斬之起由是知名官至監察御史卒

南唐書卷第十五

周鄭李三劉江汪郭伍蕭李盧朱王魏列傳第

十二

周惟簡鄱陽人隱居明易後主聞其名召至金陵起
布衣爲集賢殿侍講以虞部郎中致仕還山金陵受
圍間道召還入後苑講否卦後主思得奇士能使兵
間者張洎薦惟簡可以譚笑和解乃授給事中副徐
鉉使京師後主手疏言惟簡託志妙門存心道典伴
臣修養不預公途蓋爲之聲價冀動朝聽比至太祖
召見詰責鉉猶懇奏不已惟簡惶恐反言曰臣本野
人未嘗仕宦李煜強遣來未嘗預聞使指伏聞終南
山多靈藥願得棲隱太祖許之金陵平命爲國子周
易博士判監事或謂曰終南之言不訓且得罪惟簡
不得已上表求解官以遂初志改虞部郎中致仕授
其子繕京兆鄠縣主簿使就養太平興國中復表求
仕授太常博士遷水部員外郎卒繕後舉進士中第
仕亦至尙書郎

鄭彥華福州人祖父世爲福建諸州刺史彥華少隸
節度使李弘義帳下常射殺乳虎以勇聞元宗出師
攻福州大將王崇文遣卒李興登樓車罵弘義弘義
不勝憤募生得興者彥華請行夜縋出城外伏壕傍
興猶慢罵不已彥華操長鉤鉤得興挾以登城城上
皆鼓譟弘義得興而甘心焉崇文不能下城遯去歲
餘劍州刺史陳誨以水軍來攻彥華適出屯候官以
所部降誨誨與語奇之署軍校南唐與周師相拒淮
南彥華大小百餘戰身被五十餘創累遷至鎮海軍

節度使加同平章事後主見討王師自采石作浮梁
渡江後主命彥華督舟師萬人又遣別將杜貞率步
兵萬人同逆戰後主親遣行戒之曰水陸兩軍相表
裏則吾事濟矣比與王師遇貞以所部力戰彥華擁
兵不救貞敗而潰金陵聞之喪氣遂閉壘自守以至
國破亦不能正彥華之罪矣彥華從後主入朝爲右
千牛衛將軍太宗征大原及幽州用彥華爲將無功
猶歷諸衛將軍至左千牛衛大將軍卒年七十三子
文寶初仕後主以文學選爲清源公仲寓掌書記遷
校書郎歸朝南唐故臣皆許錄用文寶獨不自言後
主以環衛奉朝請不納客謁文寶乃被篋荷笠作漁
者以見寬譬久之後主嘆其忠後中進士第仕至兵
部員外郎國史有傳

李貽業故唐時平章事蔚從曾孫父戴唐末第進士
奔吳爲起居郎貽業事烈祖至翰林學士烈祖晏駕
大臣欲奉宋后臨朝命中書侍郎孫忌草遺制貽業
獨奮曰此姦人所爲也大行常謂婦人預政亂之本
也安肯自爲此若果宣行貽業當對百官裂之會宋
后亦不許於是臨朝之議遂寢元宗語貽業曰疾風
知勁草於卿見之保大中以兵部侍郎卒諡曰簡初
戴爲人簡率無威儀貽業又甚於父平居頽然不言
是非國有大議必首斷之尤好飲酒常折簡招親友
曰今夕佳月能相過乎比客集貽業已大醉指酒壺
曰本用相待酒興忽來自倒之矣其疎豁大抵如此
劉崇俊字德修楚州山陽人祖全以功臣爲濠州刺
史有威名全卒子仁規繼其任爲政苛虐及卒崇俊

繼之盡反仁規之政人懷其惠數年漸專恣不法多
畜不逞使過淮剽掠獲美女良馬以自奉元宗陞濠
州爲定遠軍因拜崇俊節度使以其子節尙太寧公
主然元宗亦惡其爲人會壽州姚景卒崇俊厚賂權
貴求兼領壽州元宗乃陽若不解其意命移鎮壽州
而遣楚州刺史劉彥貞馳入濠州代之崇俊自悼失
計頗革心循法度未幾得疾卒年四十贈太尉諡曰
威

劉洞廬陵人隱居廬山二十年能詩長於五字唐律
自言得賈島法後主嗣位尤屬意詩人或以洞言者
洞遂獻詩百篇卷首石城篇其詞石城古渡頭一望
思悠悠幾許六朝事不禁江水流後主讀之感愴不
怡者久之因棄不復觀洞亦不復見省金陵受圍洞
猶在城中國亡洞過故宮闕徘徊賦詩多感慨悲傷
不以不遇故有怨懟語未幾卒與洞同時有夏寶松
者亦隱廬山相與爲詩友洞有夜坐詩寶松有宿江
城詩皆見稱一時號劉夜坐夏江城云

江爲宋人避亂徙閩元宗初設貢舉爲屢爲有司所
黜嘗有題白鹿寺詩元宗南遷過而愛之爲由是愈
自負傲睨一時卒無薦引者居懷憤憤束書欲東走
吳越爲同謀者所發按得其狀伏誅

汪召符歙人能屬文烈祖初嘗上書論事合指宋齊
丘頗抑之召符貽齊丘書誚其疾己才齊丘大怒密
使人誘召符乘舟痛飲至石頭蚶蛟磯下沉殺之

郭昭慶廬陵人博學能自力嘗著唐春秋三十卷保
大中獻所著治書補揚子尉辭不受後主時復獻經

國治民論播著作郎時方奉中朝凡歲慶賀貢方物
歲表及廷勞宴餞之辭率命昭慶爲之一日方晨起
造朝暴卒

伍喬廬江人居廬山國學數年力於學詩調寒苦每
有瘦童羸馬之數山中浮屠夢仰視見一大星芒色
甚異旁有人指之曰此伍喬星也既覺訪得喬乃傾
資奉之使入金陵舉進士及試畫八卦霽後望鍾山
詩故事中選者主司必延之陞堂置酒時有宋貞觀
者首就坐張洎續至主司覽其文揖貞觀南坐引洎
坐於西酒至數行喬始上卷主司數其傑作乃徙貞
觀處席北洎處席南以喬居賓席及覆考勝出喬果
爲首洎貞觀次之時稱主司精於衡鑑元宗亦大愛
喬程文命勒石以爲永式仕至考功員外卒

蕭儼廬陵人幼舉童子中其科稍長命爲祕書省正
字烈祖初歷大理司自刑部郎中以平恕稱烈祖晚
服金石藥多暴怒近臣數被譴罰宣徽副使陳覺不
自安稱疾在告者數月及聞遺詔即以其日造朝儼
劾奏覺傾耳私室以幸禍變宜重置於法不報烈祖
輔吳設法禁以良人爲賤至是馮延巳延魯欲廣置
妓妾輒矯遺制託稱民貧許賣子女儼駁曰昔延魯
爲東都判官已有此請大行以訪臣臣對曰陛下納
麓之初出庫金贖民孰不歸心今寶運中興人仰德
澤奈何欲使鷺子資豪家役使乎大行以臣言爲然
將罪延魯臣曰此但智識淺陋耳非有他也罪之且
塞言路大行乃斜封其奏抹三筆持入宮願求之宮
中既而果得留中章奏千餘皆斜封有一抹至三抹

者遂得延魯奏然大臣亦方以豪侈相高利於廣聲色因共謂遺制已宣行不當追改遂已元宗初以國讓景遂羣下持不可乃以景遂爲諸道兵馬元帥景達副之宣告國中以兄弟相傳之意儼極諫謂夏殷以來天下爲家父子相傳不易之典也景遂景達亦固讓不敢當然元宗意愈確不之聽江文蔚韓熙載典太常禮儀議烈祖稱宗儼獨建言帝王己失之己得之謂之反正非己失之自己復之謂之中興中興之君廟宜稱祖先帝興已墜之業不應屈而稱宗文蔚亦以儼議爲當遂用之保大二年元宗終欲傳位景遂下詔命總庶政惟樞密使魏岑查文徽許奏事餘非特召不得對儼上疏力爭會宋齊丘賈崇皆以爲不可遂收所下詔其後元宗於宮中作大樓召近臣入觀皆歎其宏麗儼獨曰比景陽但少一井耳元宗怒貶舒州副使孫忌爲觀察使遣州兵給儼實防衛之儼謂忌曰僕以言獲罪耳顧命之日君持異議幾危社稷君之罪豈不重於僕乎反見防何也忌慚卽撤去俄召還後主初嗣位數與嬖倖奕棋儼入見作色投局於地後主大駭詰之曰汝欲效魏徵耶儼曰臣非魏徵則陛下亦非太宗矣後主爲罷奕南唐亡儼以老病歸鄉里杜門數年卒年七十餘

劉承勳失其鄉里以善心計事烈祖爲糧料判官遷德昌宮使德昌宮者蓋南唐內帑別藏也自吳建國有江淮之地比他國最爲富饒山澤之利歲入不貲烈祖勵以節儉一金不妄用其積如山太子嘗欲一杉木作版障有司以聞烈祖書奏後曰杉木不貲但

欲作戰艦以竹代之可也然德昌宮簿煩委無由勾校承勳獨任其事盜用無算保大後貢奉事興倉猝取辦愈得以爲姦利畜妓樂數十百人每置一妓價數十萬教以藝又費數十萬而服飾珠犀金翠稱之又厚以寶貨賂遺權要故終無發其罪者太祖平荆湖詔江南具舟漕其米入京師承勳狡黠計後主終不能有其國欲預自結中朝爲異時計乃請行督巨艦自長沙抵迎鑾千柁相銜太祖覺其意而惡之及國亡承勳歸京師首自陳漕米事太祖曰此汝主勤王耳汝安得有勞吐出特命勿敘用久客無資裸袒乞食不勝凍餒而死

李元清濠州人徙金陵趨健善走能及奔馬常步入梁宋刺事開寶中後主以吉州永新與湖南隣命元清爲永新制置使每數月一託疾不坐銜輒微服入湖南境人無知者以故敵人動息皆知之累年邊障晏然國亡歸京師元清心不欲仕二國僞稱失明召驗之揮刃將及頸而目不瞬乃放歸濠州卒

盧郢金陵人工屬文有勇力好吹鐵笛乾德中後主命韓德霸爲都城烽火使警察非常怙權暴橫國人望其前驅莫不奔避郢嘗遇之調笛自若德霸叱左右捕執郢奮臂擊十餘人皆顛躓乃直前摔德霸墜馬毆之敗而傷目德霸入訴後主叱之出顧近侍笑曰我帥遇一措大不能自全面目尙敢訴耶遂罷其職從郢舉進士試王度如金玉賦擢第一徐鉉娶郢姊嘗受後主命撰文累日未就郢曰當試爲君杼思適庭下有石千夫不得舉郢戲取弄之有頃索酒頓

飲數升復弄如初忽顧筆吏口占使書不竄易一字鉉伏其工後主亦以爲適俊可愛國亡歸朝知金州卒

朱弼字君佐建州人舉明經第一授國子助教知廬山國學盧絳蒯鼈諸葛濤飲博不逞患苦諸生學官依違無敢問者及弼至一切繩以禮法每升堂講說座下肅然絳等亦愧服引去徒自四方來者數倍平時國亡補衡山縣主簿秩滿求爲南嶽廟令卒

王輿合淝人少與兄綰俱事吳武王輿初爲小校從周本攻危全諷臨戰本視賊水柵部分諸將指旁山頭一小營謂輿曰爾往爲我取彼輿唯唯而色不欲行本曰爾憚往耶輿曰公必不以輿爲不武請得此柵破之捨而趨彼何爲本大喜曰爾亦知此爲必爭之地耶吾本自行今爲爾功勞而遣之輿乘輕舟襲破其前鋒遂排柵入諸軍繼進賊大潰積功遷至諸軍都虞候烈祖輔吳以腹心所寄進控鶴都虞候持重有謀甚見倚任久乃出爲光州刺史初輿兄子爲海州刺史叛附梁聞輿在光山遣間使通問輿執以歸金陵因求罷郡入爲左宣威統軍歷鎮海節度留後金吾衛大將軍武昌節度使與監軍甄廷堅不相得會廷堅被誣告有貳志烈祖遣使械廷堅屬吏未至輿刺知之密告廷堅因爲謀曰今獨可即日乘輕舟歸闕待罪毋與中使遇廷堅恐懼不暇爲他謀即從其計至金陵遇赦且以其先自歸得免入推其長者元宗嗣位加同平章事保大二年卒年七十四輿少從軍攻潤州爲巨弩所射中右耳矢自左耳出又

中旁一人猶立死輿扶歸營臥百餘日復起耳至老不贖亦無癢痕攻潁州倚營門仗劍驅士卒登城城上機石發中營門及鎧之半皆糜碎而輿不傷莫不異之兄綰亦至虔州節度使

魏岑字景山鄆州須城人善詔諛學揣摩尤爲宋齊丘所知薦授校書郎保大中驟進至諫議大夫元宗自以唐子孫慨然有定中原復舊都之意有司請行南郊禮元宗曰俟天下爲一然後告謝天地岑遂與陳覺馮延巳延魯更相倡和爲拓境事嘗侍燕自言臣少遊元城樂其風土陛下還長安日乞爲魏博節度使元宗欣然許之岑趨下殿再拜謝侍衛皆竊笑覺延魯攻福州岑爲監軍應援使三人者暗懦專恣如一軍敗元宗初欲按軍法誅覺延魯而貸岑御史中丞江文蔚對仗彈奏請并岑誅之於是貶太子洗馬俄復還故官李守貞叛漢來乞師岑乃力請出兵赴救於是元宗從之因以岑爲浚淮巡檢使無功而還岑自復進姦詔彌甚鍾謨李德明亦用事其趨向與岑雖異而迷國則均戶部員外郎苑冲敏懷不平怵大將王建封上疏請盡逐之更用正人元宗怒併置冲敏建封於死岑自謂得主眷愈無所憚壽州節度使劉彥貞以厚賂結岑爲輿援岑所得不可數知遂肆言稱彥貞爲將如韓白治民如龔黃其敢爲誕欺如此元宗方倚以柄任會見冲敏爲厲召道士上章訴天未幾卒

南唐書卷第十六

后妃諸王列傳第十三

烈祖元敬皇后宋氏小名福金父韞江夏人后幼流離亂兵中昇州刺史王戎得后烈祖娶戎女后為媵得幸生元宗王氏早卒義祖命烈祖以為繼室封廣平郡君晉國君治內有法不妄言笑義祖殂於金陵烈祖在東都將奔喪后密以大計諫止焉烈祖為齊王封正妃及受禪立為后從容裨贊多所弘益烈祖嘗曰吾思有未達后已悟矣昇元末烈祖服金石藥多暴怒賴后以免譴者甚眾及殂中書侍郎孫忌懼魏岑馮延巳延魯以東宮舊僚用事欲稱遺詔奉后臨朝聽政后不許曰此武后故事吾豈為之元宗即位尊后為皇太后保大三年十月卒祔葬永陵

烈祖後宮种氏名時光性警惠年十六入宮列樂部中俄得幸生景暹烈祖以受禪後所得子甚愛之种氏寵日盛烈祖性嚴整嘗大怒聲如乳虎殿門環為震動左右皆喪魂魄种氏左手持食右手進匕從容如平時烈祖怒亦頓解他日烈祖幸齊王宮遇王親理樂器大怒數日未解种氏負寵輒乘間言景暹才過齊王烈祖正色曰子有過父教之常禮也若何敢爾叱下殿去簪珥幽於別宮數月命度為尼景暹愛亦弛終烈祖世獨不加封爵元宗即位始封景暹保寧王許种氏就養於景暹宮中封王太妃宋后挾舊怨屢欲加害元宗力解之乃止

元宗光穆皇后鍾氏父太章事吳為義祖裨將義祖謀誅張灝令嚴可求喻太章伏死士二十輩斬灝於

府太章許諾義祖疑其怯夜半往止之曰僕母老懼事不成欲徐圖之如何太章勃然曰言已出口豈有可已之理明日遂誅灝後頗恃功頗頗烈祖疑其難制義祖曰昔者吾赤族之禍間不容髮使無太章豈有今日富貴耶奈何以薄物細故疑之乃命以太章次女配元宗即后也昇元中封齊王妃元宗即位立為皇后後主即位為太后以父名改稱聖尊后后寢疾後主朝夕侍側衣不解帶藥必親嘗乃進乾德三年十月卒是日雨沙於金陵後主毀瘠骨立扶而後能起哀動左右葬順陵

後主昭惠國后周氏小名娥皇司徒宗之女十九歲來歸通書史善歌舞尤工琵琶嘗為壽元宗前元宗歎其工以燒槽琵琶賜之至於采戲奕棋靡不妙絕後主嗣位立為后寵嬖專房創為高髻纖裳及首翹鬢柔之妝人皆效之嘗雪夜酣燕舉杯請後主起舞後主曰汝能創為新聲則可矣后即命棧綴譜喉無滯音筆無停思俄傾譜成所謂邀醉舞破也又有恨來遲破亦后所製故唐盛時霓裳羽衣最為大曲亂離之後絕不復傳后得殘譜以琵琶奏之於是開元天寶之遺音復傳於世內史舍人徐鉉聞之於國工曹生鉉亦知音問曰法曲終則緩此聲乃反急何也曹生曰舊譜實緩宮中有人易之非吉徵也後主以后好音律因亦耽嗜廢政事監察御史張憲切諫賜帑三十疋以旌敢言然不為輟也未幾后臥疾已革猶不亂親取元宗所賜燒槽琵琶及平時約臂玉環為後主別乃沐浴粧澤自內舍玉卒於瑤光殿年二

十九葬懿陵後主哀甚自製誄刻之石與后所愛金屑檀槽琵琶同葬又作書燔之與訣自稱繆夫煜其辭數千言皆極酸楚或謂后寢疾小周后已入宮中后偶褰幔見之驚曰汝何日來小周后尙幼未知嫌疑對曰既數日矣后恚怒至死面不外向故後主過哀以揜其迹云

後主國后周氏昭惠后妹也昭惠卒未幾後主居聖尊后喪故中宮久虛開寶元年始議立后爲繼室命太常博士陳致雍攷古今沿革草具婚禮又命學士徐鉉史官潘佑參定文安郡公徐遊評其異同遊多是佑議遂施用之逾月遊病疽鉉對其不主己議戲語人曰周孔亦能爲厲乎后少以戚里間入宮掖聖尊后甚愛之故立焉被寵過於昭惠時後主於羣花間作亭雕鏤華麗而極迫小僅容二人每與后酌飲其中國亡從后主北遷封鄭國夫人太平興國二年後主殂后悲哀不自勝亦卒

後主保儀黃氏江夏人父守忠事湖南馬氏爲偏裨邊鎬入長沙得黃氏納後宮後主見其美選爲保儀以工書札使專掌宮中書籍二周后相繼專房燕暱故保儀雖見賞識終不得數御幸也元宗後主俱善書法元宗學羊欣後主學柳公權皆得十九購藏鍾王以來墨帖至多保儀實掌之城將陷後主謂之曰此皆先帝所寶城若不守汝卽焚之無爲他人得及城陷悉焚無遺者保儀亦從北遷卒於大梁又有宮人流珠者性通慧工琵琶後主演念家山破及昭惠后所作邀醉舞恨來遲二破久而忘之後主追念昭

惠問左右無知者流珠獨能追憶無所忘失後主大喜後不知所終

烈祖五子宋皇后生元宗楚王景遷晉王景遂齊王景達种氏生江王景湯

景遷字子通幼警敏讀書一覽輒不忘烈祖輔吳景遷尙吳公主爲駙馬都尉歷衙內馬步軍都指揮使海州團練使左右軍都軍使遂以左僕射參政事留東都輔政時甫成童尋加同平章事知左右軍使寢疾罷歸金陵爲諸道副都統以景遂代輔政景遷病逾年竟卒年十九諡曰定無子初術士皆謂景遷貴不可言故烈祖在諸子中尤愛之及是始悟術士之妄

景遂仕吳爲門下侍郎烈祖受禪封壽王純厚夷淡有士君子之操讓皇之喪景遂受命往護喪事望柩哀慟觀者聳歎烈祖元宗以位讓景遂大臣固持之而止明年又命景遂總庶政已降詔僉謂不可乃收所下詔久之又以爲太弟凡太子官屬皆改爲太弟官屬景遂固辭雖不得命終恐懼不敢安處乃取老子功成各遂身退之意自爲字曰退身以見志平居好客善屬文燕集無虛日贊善大夫張易峭直喜盡言景遂嘗賦詩頗纖麗易面規之景遂敬納又嘗怒碎玉杯於坐景遂亟推謝無讎色及易出使契丹景遂上言力諫以爲易國士也宜夙夜納誨今使航不測之淵報聘遠夷非國之利元宗報之曰易固奇士海神當畏之竟遣行景遂在東宮十三年屢乞歸藩交泰元年三月始改授天策上將軍江南西道兵

馬元帥洪州大都督太尉尚書令晉王以樞密副使李徵古爲鎮南節度副使佐之徵古習驕嫚至鎮專恣尤甚景遂積久不能堪欲斬之而自拘有司左右諫止初景遂之出鎮也弘冀爲太子弘冀嘗被譴於元宗有復立景遂之意景遂在鎮亦頗忽忽多忿謀嘗以忤意殺都押衙袁從範之子弘冀刺知之乃使親吏持醜遺從範使毒景遂景遂擊鞠而渴索漿從範毒漿以進之暴卒年三十九未歛體已潰元宗素友愛聞訃悲悼左右欲少慰釋之因妾曰太弟初得疾忽語人曰上帝命我代許旌陽元宗始少解故被醜之事竟不之知廢朝七日贈太弟諡文成

景達生於吳順義四年是歲大旱烈祖方輔政極於焦勞七月既望零而得雨景達以是日生烈祖喜故小名兩師稍長神觀爽邁異於他兒烈祖深器之受禪封信王烈祖欲以爲嗣難於越次故不果烈祖殂景遷已前死元宗稱疾固讓景遂欲以次及景達承先帝遺意既迫於羣下之議不得行乃立景遂爲太弟景達自燕王徙封齊王爲諸道兵馬元帥中書令景達孝友純至嘗從遊後苑泛舟池中元宗舟覆景達在他舟初不善泅遽躍入水中負元宗出人以爲精誠所感性剛正疾惡朝廷嚴憚之帝每召宗室近臣曲宴馮延巳延魯魏岑陳覺輩憑寵笑呼旁若無人景達屢訶詰之復極諫元宗他日宴於東宮延巳愧二弟之命不出於己欲以虛辭爲德陽醉撫景達背曰爾勿忘我景達不勝其忿拂衣入奏請斬延巳元宗諭解久之乃已張易語景達曰殿下力未能去

羣小而數面折之使之懼而自謀豈易測哉景達悟自是畏禍遇曲燕輒以疾辭保大末淮南交兵景達以元帥督師陳覺爲監軍使軍政皆決於覺景達署牘尾而已朱元叛壽州陷皆覺爲之景達亦不能詰初出師五萬而俘死亡叛者四萬景達及覺引殘兵歸金陵上還印綬元宗恐其無功自愧乃拜天策上將軍浙西節度使景達不敢當要鎮力辭改撫州大都督臨川牧在鎮十餘年後主嗣位加太師尚書令甚尊禮之卒於鎮年四十八在烈祖諸子中最爲壽矣贈太弟諡昭孝遺命留葬江州廬山初景達好神仙道家之說記室徐鉉獻述仙賦以諷行於世

景湯字宣遠烈祖初受禪以十二月二日爲仁壽節景湯以是日生故小名仁壽烈祖甚愛之母种氏得譴宋皇后鞠養景湯如己出元宗嗣位封保寧王徙封信王出爲虔州節度使簡易節儉虔人安其政賴令卒尉邵繼良攝令以令成喪日張樂宴飲景湯立奏黜之每有小過掌書記孫峴苦言規正之景湯大重之峴卒言及必流涕厚卹其孤後主立進封江王加兼中書令元宗後主皆酷好浮屠羣臣化之政事日弛景湯獨尊六經名教排斥浮屠不少撓在鎮十一年卒年三十一贈中書令諡昭順

元宗十子弘冀弘茂後主從善從鎰從謙從慶從信凡八人可見而從慶從信失其官封又二人并逸其名鍾皇后生弘冀後主從善從謙自弘茂以下皆不知其母

弘冀元宗長子故唐之末民間相傳讖曰東海鯉魚

飛上天而烈祖果育於徐氏因信符讖又有讖曰有一真人在冀川開口張弓向左邊元宗欲其子應之乃名之曰弘冀初封東平公徙王南昌元宗嗣位以弟景遂爲兵馬元帥景達爲副元帥誓於烈祖梓宮前約兄弟相傳而出弘冀留守東都及景遂爲太弟又徙鎮潤州封燕王弘冀爲人沉厚寡言周師陷廣陵吳越亦攻我常州元宗念弘冀尙少不習軍旅事遣使召還都部將趙鐸曰王雖富於春秋然元帥之重衆心所恃忽棄其師而歸則部下必亂歸欲何之弘冀善其言聞於元宗卽日大爲戰守之備部分諸將皆愜服士心元宗使龍武都虞候柴克宏右衛將軍陸孟俊救常州至潤州樞密副使李徵古白以神衛統軍朱匡業代克宏歸弘冀察克宏有才略謂曰君第前戰吾當拒守表言克宏決可破賊常州危在旦暮臨敵易將兵家所忌臣請以身保其功克宏亦感激思奮馳至常州果大破吳越兵斬首萬級獲其將佐數十人俘於潤州弘冀以時方艱危悉驅出轅門斬之人壯其決然元宗以其專誅殺不悅者久之及太弟景遂力請歸藩而景達爲元帥奔潰南歸獨弘冀有功遂立爲太子參決政事元宗仁厚羣下多縱弛至是弘冀以剛斷濟之紀綱頗振起而元宗復怒其不遵法度一日怒甚以打球杖笞之曰吾行召景遂矣弘冀大懼故景遂遇醜語在其傳元宗旣請盟於周以在位久恥於降屈屢遣使請於世宗欲傳位弘冀使爲大國附庸世宗賜書力止之其詞曰皇帝致書敬問江南國主茲睹來章備形緝旨敘此日

傳讓之意述向來高尚之心仍以數載以來交兵不息備陳追悔之事無非克責之辭雖古者省咎責躬因災致懼亦無以過也況君血氣方剛春秋鼎盛爲一方之英主得百姓之驩心豈可高謝君臨輕辭世務與其慕希夷之道孰若懷康濟之誠且天災流行國家代有昔之聖哲所不能逃苟盛德之日新斯景福之彌遠諒惟英敏必照誠懷書詞溫潤略似敵國元宗乃已世宗遣使至亦別賜弘冀國信以爲常顯德六年七月弘冀屬疾數見景遂爲厲九月丙午卒有司諡曰宣武句容尉張洎上書謂世子之德在侍鱗問安今標顯武功垂示後世非所以防微杜漸也洎知元宗猶銜弘冀專殺事其說蓋出於揣摩元宗果大以爲然改諡曰文獻而洎由此進用弘茂字子松元宗第二子幼穎異善歌詩格調清古年十四爲侍衛諸軍都虞候封樂安公騎射擊刺皆精習又領兵職然不喜戎事每與賓客朝士燕遊惟以賦詩爲樂初弘冀剛嚴人多憚之故時望歸弘茂保大九年七月卒追封慶王弘茂之幼有異僧言人壽夭禍福多驗元宗使視弘茂僧書九十一字以獻及卒年一十九從善字子師元宗第七子器度凝遠封紀國公使周會帝卽位厚其禮遣翰林學士王著送之初從善與鍾謨相附結謨輒請以從善爲嗣元宗雖不從然意亦自愛從善其遷南都也使主扈從諸軍元宗殂未御梓宮從善輒從徐遊求遺詔遊厲色拒之至金陵具以事聞後主素友愛略不以介意愈加輯睦進封

韓王及貶制度降南楚國公開寶四年遣朝京師太祖已有意召後主歸闕即拜從善泰寧軍節度使留京師賜甲第汴陽坊封其母凌氏吳國太夫人後主聞命手疏求從善歸國太祖不許以疏示從善加恩慰撫懷府將吏皆授常參官以寵之而後主愈悲思每憑高北望泣下霑襟左右不敢仰視由是歲時遊燕多罷不講常製却登高文曰玉甍澄醪金盤繡餠菜房氣烈菊蕊香豪左右進而言曰惟芳時之令月可籍野以登高矧上林之伺幸而秋光之待褒乎予告之曰昔予之壯也意如馬心如猿情繫樂恣驩賞志勞惰心志於金石泥花月於詩騷輕五陵之得侶陋二秦之選曹量珠聘妓紉綵維艘被牆宇以耗帛論丘山而委糟年年不負登臨節歲歲何曾捨逸邀小作花枝金翦菊長裁羅被翠爲袍豈知萑葦乎性忘長夜之靡靡宴安其毒累大德於滔滔今予之齒老矣心悽焉而切切愴家艱之如燬縈離緒之鬱陶陟彼岡兮歧予足望復關兮睇予目原有鷓鴣兮相從飛嗟予季兮不來歸空蒼蒼兮風淒淒心躑躅兮淚連洏無一驪之可作有萬緒以纏悲於戲噫嘻爾之告我曾非所宜從善妃屢詰後主號泣後主聞其至輒避去妃憂憤而卒國人哀憐之國亡改授右神武大將軍太平興國初改右千牛衛上將軍雍熙四年卒年四十八

從鎰元宗第八子初封舒國公改封蔣太祖親征揚州李重進遣從鎰朝行在進封鄧王出鎮宣州後主宴餞綺霞閣與近臣俱賦詩而後主自爲序及貶制度降江國公太祖以不朝來討後主遣從鎰貢帛二十萬疋白金二十萬斤大兵悉已南渡從鎰留京師館懷信驛捷奏至百僚稱賀閣門趣隨班入邸吏亦謂當有貢獻其介潘慎修以爲國被討瀕亡而使者旅賀非禮但奉方物以待罪太祖嘉其知禮爲易供帳加賜牲餼上樽命知制誥李穆送從鎰歸國諭指令後主亟自歸仍命曹彬等緩攻以俟之而後主卒不行以至城陷從鎰從後主北歸改名從浦卒

從謙元宗第九子數歲爲奕棋詩有思致後主賞歎之歷封鄂國公宜春王進吉王及貶制度降鄂國公歸朝爲右神武大將軍淳化五年九月以本官出爲安遠行軍司馬後不知其所終

從慶失其官封

從信逸其行實

後主二子仲寓仲宣皆昭惠后所生

仲寓字叔章初封清源郡公國亡北遷宋授右千牛衛大將軍居後主喪哀毀逾制太宗臨之遣使勞問終喪賜積珍坊第一區久之自言族大家貧求治郡拜郢州刺史在郡以寬簡爲治吏民安之淳化五年八月卒年三十七子正言好學亦早卒於是後主之後遂絕初江南聞後主凶問父老皆巷哭及是其嗣續珍絕遺民猶爲之興悼云

仲宣小字瑞保與仲寓同日受封仲宣封宣城公三歲誦孝經不遺一字宮中燕侍合禮如在朝廷昭惠后尤愛之宋乾德二年仲宣纔四歲一日戲佛像前有大琉璃燈爲貓觸墮地劃然作聲仲宣因驚癩得

疾竟卒追封岐王諡懷獻時昭惠后已疾甚聞仲宣
天悲哀更遽數日而絕

南唐書卷第十七

雜藝方士節義列傳第十四

吳廷紹爲太醫令烈祖因食飴喉中噎國醫皆莫能愈廷紹尙未知名獨謂當進楮實湯一服疾失去馮延己苦腦中痛累日不減廷紹密詰廚人曰相公平日嗜何等對曰多食山雞鷓鴣廷紹曰吾得之矣投以甘豆湯亦愈羣醫默識之他日取用皆不驗或扣之答曰噎因甘起故以楮實湯治之山雞鷓鴣皆食烏頭半夏故以甘豆湯解其毒耳聞者大服

潘辰往來江淮間自稱野客嘗依海州刺史鄭匡國不甚見禮館之馬廐旁一日從匡國獵近郊匡國妻行至廐中因視辰所居四壁蕭然葦席竹筒而已發筒觀二錫丸亦頗怪之辰歸大驚曰何物婦人觸吾劍賴吾攝其光芒不然身首殊矣或以告匡國匡國竦然曰殆劍客也求學其術辰曰姑一試之乃俱至靜院探懷出二錫丸置掌中俄而氣出指端如二白虹旋繞匡國頸有聲錚然匡國汗下如雨曰先生之術神矣觀止矣辰笑引手收之復爲錫丸匡國表薦於烈祖召居紫極宮數年卒

李冠善吹洞簫悲壯入雲元宗將召之會軍旅事興不暇司徒李建勳亦知音絕數賞之冠輒不遇周顯德中北遊梁宋每醉輒登市樓長嘯後不知所終某御廚者失其姓名唐長安舊人也從中使至江表未還聞崔胤誅北司遂亡命而某留事吳及烈祖受禪御膳宴設賴之略有中朝承平遺風其食味有鶯鷺餅天喜餅馳蹄餒春分餒密雲餅鐺糟灸瓏瓏餒

紅頭簽五色餛飩子母饅頭舊法具存

申漸高優人昇元中爲教坊部長時關征苛急屬畿內旱一日宴北苑烈祖顧侍臣曰近郊頗得雨獨都城未雨何也得非刑獄有冤乎漸高遽進曰大家何怪此乃雨畏抽稅故不敢入京爾烈祖大笑明曰下詔弛稅額信宿大雨霑洽周本自吳時有威望烈祖慮其難制因內宴引鴆酒賜周本本覺之輒取御杯均酒之半以進曰願以此上千萬壽庶明君臣一心烈祖失色左右莫知所爲漸高託俳戲舞袂升殿曰勅賜臣漸高併飲之納杯懷中而出烈祖密遣中人持藥解之不及腦裂而卒至元宗時又有李家明亦優人宋齊丘止一子輒死悲哭踰月齊王景達勉之不能從家明曰是易喻爾作紙鳶大書其上曰一子不能捨如讓皇百口何縱之墜其第中齊丘取觀爲拭淚而止元宗失江北遷豫章龍舟至趙屯舉酒望皖公山曰好青峭數峯不知何名家明對曰此舒州皖公山也因獻詩曰皖公山縱好不落御觴中元宗太息罷酒去

譚紫霄泉州人幼爲道士初有陳守元者亦道士劇地得木札數十貯銅盜中皆漢張道陵符篆朱墨如新藏去而不能用以授紫霄紫霄盡能通之遂自言得道陵天心正法劾鬼魅治疾病多效閩王王昶尊事之號金門羽客正一先生閩亡遁居廬山棲隱洞學者百餘人武昌節度使何敬洙嘗殺女奴投尸井中人無知者遇疾召紫霄中夜被髮仗劍考治見女厲自訴詰旦屏人以語敬洙乃丹篆符遣之疾即愈

廬山僧闢路有大石堅不可鑿紫霄往視曰此固易爾索杯水嘆之命工施鑿應手如粉後主聞其名召見賜官階辭不受俄無疾卒年百餘歲今言天心法者祖紫霄

史守冲潘辰皆不知何許人烈祖嘗夢得神丹既覺語左右欲物色訪求而守冲適詣宮門獻丹方展亦以方繼進烈祖皆神之以爲僊人使鍊金石爲丹服之多暴怒羣臣奏事往往厲聲色詰讓嘗以其藥賜李建勳建勳乘間言曰臣服甫數日已覺炎躁此豈可常進哉烈祖笑曰孤服之已久寧有是事諫者皆不從俄而疽發遂至大漸臨終謂元宗曰吾服金石求長年今反若此汝宜以爲戒也

耿先生者父雲軍大校耿少爲女道士玉貌烏爪常著碧霞帔自稱比丘先生始因宋齊丘進嘗見宮婢持糞埽謂元宗曰此物可惜勿令棄之取置鑊中烹煉良久皆成白金嘗遇雪擁鑪索金盆貯雪令宮人握雪成錠投火中徐舉出之皆成白金指痕猶在又能燭麥粒成圓珠光彩粲然奪真大食國進龍腦油元宗秘愛耿視之曰此未爲佳者以夾纈囊貯白龍腦數斤懸之有頃瀝液如注香味逾於所進遂得幸於元宗有娠將產之夕雷雨震電及霽娠已失矣久之宮中忽失元敬宋太后所在耿亦隱去幾月餘中外大駭有告者云在都城外二十里方山寶華宮元宗亟命齊王景遂往迎太后見與數道士方酣飲乃迎還宮道士皆誅死耿亦不復得入宮中然猶往來江淮後不知所終金陵好事家至今猶有耿先生寫

真云

古史官書忠義孝行列女各爲傳南唐偏方短世又史牒放逸不能盡見撫其僅可書者合爲節義傳段處常失其鄉里家世保大中爲兵部郎中周侵淮南元宗命處常浮海使契丹乞援處常爲契丹陳利害甚辨契丹本通南唐徒持虛辭利南方茶藥珠貝而已至是了無出師意而留處常不遣處常怨其無信誓死國事數面諫虜主虜主亦媿其言優容之以病卒於虜

趙仁澤失其鄉里家世保大中爲常州團練使周人來侵吳越乘間出兵攻常州仁澤戰敗被執歸之錢唐仁澤見吳越王不拜責之曰我烈祖皇帝中興首與先王結好質諸天地王今見利忘義將何面目入先王廟乎吳越王怒以刀抉其口至耳丞相元德昭嘉仁澤之忠以良藥傅瘡獲愈後不知所終

張雄失其鄉里家世周人來侵淮南民自相結爲部伍以拒周師謂之義軍而雄所將最有功元宗命爲義軍首領及割地徙之江南歷袁汀州刺史後主見討保大中舊將無在者乃擢雄統軍使雄謂諸子曰吾必死國難爾輩不從吾死非忠孝也諸子泣受命與田欽祚戰於溧水敗績他將皆遁士卒死者萬餘人雄與其子力戰俱死不同行者亦死於宅陳父子八人無生存者時金陵已危蹙不復議贈卹國人哀之

陳夔江州德安縣人唐元和中給事中京之後十世同居長幼七百人

不置奴婢日會食堂上男女異席

未冠笄者別又爲一席畜犬百餘共以一船貯食飼之一犬不至則羣犬皆不食築書樓延四方學者鄉鄰化其德獄訟爲之衰息昇元初州以聞詔復徭役表門閭同時見旌者尙數家皆五世同居云

永興公主烈祖女也嫁吳睿帝太子璉及禪代宋齊丘請離婚烈祖不聽公主自以爲吳室冢婦而國亡中懷憤悒聞人呼之爲公主輒悲傷流涕烈祖愧之乃以璉爲中書令池州節度使璉卒公主哭之過哀亦感疾卒

余洪妻鄭氏洪爲閩將唐師下建州裨將王建封得鄭氏以其有色而自持堅貞不撓不敢犯獻之大將查文徽文徽欲納之鄭大罵曰王師弔伐當褒錄節義以表勵風節建封出行伍尙知見憚君元帥也乃欲爲禍首耶文徽大慚亟訪其夫歸之

吳媛凌儀人唐史官兢之後父志野義不仕梁南遊吳遂家廬陵媛適段甲生子未晬段卒父母以媛少議嫁之媛癸面自誓事舅姑極備敬謹教所生子爲善士韓熙載使江南表其節云

南唐書卷第十八

浮屠契丹高麗列傳第十五

嗚呼南唐偏國短世無大淫虐徒以寢衰而亡要其最可爲後世監者酷好浮屠也初烈祖輔吳吳都廣陵而烈祖居建業大築其居窮極土木之工既成用浮屠說作無遮大齋七會爲工匠役夫死者薦福俄有胡僧自身毒中印土來以貝葉旁行及所謂舍利者爲贊烈祖召豫章龍興寺僧智玄譯其旁行之書又命文房書華嚴論四十部奩帙副焉并圖寫製論李長者像班之境內此事佛之權輿也然烈祖未甚惑後胡僧爲茲利逐出之國人則寢已成俗矣及其末年溧水大興寺桑生木人長六寸如僧狀右袒而左跪衣械皆備其色如純漆可鑑謂之須菩提縣提置龕中以仁壽節日來獻烈祖始大驚異迎置宮中奉事甚謹其徒因夸以爲感應而識者按譙氏五行書知且有大喪不三月烈祖殂及元宗後主之世好之遂篤幸臣徐遊專主齋祠事羣臣和附惟恐居後宮中造佛寺十餘出金錢募民及道士爲僧都城至萬僧悉取給縣官後主退朝與后頂僧伽帽服袈裟課誦佛經胡跪稽顙至爲瘡贅手常屈指作佛印僧尼犯姦淫獄成後主每曰此等毀戒本圖婚嫁若冠笄之是中其所欲命禮佛百而捨之奏死刑日適遇其齋則於宮中佛前焚燈以達旦爲驗謂之命燈未旦而滅則論如律不然率貸死富人賂宦官竊續膏油往往獲免上下狂惑不恤政事有諫者輒被罪歛州進士汪渙上封事言梁武惑浮屠而亡陛下所知

也奈何効之後主雖擢渙爲校書郎終不能用其言開寶初有北僧號小長老自言募化而至多持珍寶怪物賂貴要爲奧助朝夕入論天宮地獄果報之說後主大悅謂之一佛出世服飾皆縷金絳羅後主疑其非法答曰陛下不讀華嚴經安知佛富貴因說後主多造塔像以耗其帑庾又請於牛頭山造寺千餘間聚徒千人日給盛饌有食不能盡者明日再具謂之折倒蓋故造不祥語以搖人心及王師渡江卽其寺爲營又有北僧立石塔於采石磯草衣藿食後主及國人施遺之皆拒不取及王師下池州繫浮橋於石塔然後知其爲間也金陵受圍後主召小長老求助對曰北兵雖強豈能當我佛力登城一麾圍城之師爲小却後主真以爲佛力合掌歎異厚賜之下令軍民皆誦救苦菩薩聲如江濤未幾梯衝環城矢石亂下如雨倉皇復召小長老稱疾不至始悟其姦殺之羣僧懼併坐誅乃共乞授甲出鬪死國難後主曰教法其可毀乎弗許及國亡後主入朝過臨淮往禮普光王塔施金帛猶以千計其後弟從鎰之子祝髮爲僧名惟淨淨景德祥符中天下治安西域獻佛書甚衆惟淨博聞梵學繙譯精密莫能及者積官試光祿卿譯經三藏亦南唐之餘習云

契丹事見唐書本傳及五代史四夷附錄今取其事之繫南唐者爲傳

烈祖昇元二年契丹主耶律德光及其弟東丹王各遣使以羊馬入貢別持羊三萬口馬二百匹來鬻以其價市羅紈茶藥烈祖從之於是翰林院進二丹入

貢圖詔中書舍人江文蔚作贊其詞曰皇帝建西都之歲神功邁於三古皇風格於四裔華夷咸若駿奔結軌粵六月契丹使梅里捺盧古東丹使兵器寺少令高徒煥奉書致貢咸集都邑公卿庶尹拜手稽首稱賀以爲文德所服受命之符也若迺鴻荒以降驟步相侔耀武以信威有所不及任算以御物有所不從詩頌太原之師則用伐矣漢開朔方之地則崇力矣若我宣猷大麓儷德無私刑于朝廷以及于荒服旃裘左袵捧日分光殊方異產充庭納贖曰垂衣裳而天下治斯之謂矣有司紀美烈於績事傳曰主上明聖而德不聞有司之過也臣職在翰墨親覩隆平敢獻贊曰赫矣聖武纂堯之緒要荒之長駿奔臣附伏波之柱單于之臺遺鏃徒費獻琛靡來我后穆穆我網恢恢重譯日貢皇哉唐哉四年德光遣使獻馬百匹於是烈祖遣通事舍人副四方館事歐陽遇借鴻臚少卿使契丹假道於晉高祖不可遇及境而復元宗嗣位遣使者公乘鎔航海繼好既至而契丹主兀欲被殺弟述津遺元宗書曰大契丹天順皇帝謹致書大唐皇帝闕下貴朝使公乘鎔等自去秋以達東京海岸適遭國禍今年二月二十六日部署一行并諸儀物兵鎧已至燕京茲蒙敦念先朝踐修舊好既增推痛又切感銘貴國長直官王朗陳篆取間道先回用附咨報公乘鎔等已遣伴送使陳植等同回止俟便風卽令引道而公乘鎔亦以蠟封帛書其詞曰臣鎔自去年六月離罌油七月至鎮東關遣王朗奉表契丹九月乃有番官夷離畢部牛車百餘乘及

鞍馬治路置頓十月至東京留三日契丹主遣閑廐使王廷秀稱詔勞問兼述泰寧王燕王九月同行大事兀欲卽世母妻併命又遼東以西水潦壞道數百里車馬不通今年正月方至幽州館於愍忠寺先迎御容入宮言元欲識唐皇帝面乃引見如舊儀問國書中機事臣卽述奕世歡好當謀分裂之事契丹主喜問復有何事臣云軍機別有密書契丹主接置袖間乃云吾與唐皇帝一如先朝往來因置酒合樂又諭臣曰使人遠泛巨海而至不期骨肉間倏起此事道路所聞必亦憂恐手斟一玉鍾酒先自啜乃以勸臣令飲醕自旦至日晡始罷自是數遣使宣勞三日一賜食謹遣王朗齎殷號子歸聞奏殷號子不知何等語也初宋齊丘謀間晉會契丹使燕人高霸來聘歸至淮北唐陰遣人刺殺之霸有子乾從行匿之濠州於是契丹頗信以爲霸之死出於晉人保大十二年述律遣其舅來夜宴清風驛起更衣忽仆於地視之失其首矣厚賞捕賊不得久乃知周大將荆罕儒知契丹使至思遣客刺之以間唐乃下令能得吾枕者賞三百緡俄有劍客田英得之卽給賞如約仍屏人語之曰能得江南番使頭賞三千緡英果得之自是唐與契丹遂絕及世宗兵出淮南勅暴我罪曰蠢爾淮甸敢拒大邦跋扈飛揚垂六十載幸累朝多事與北虜交通厚起戎心誘爲邊患所罪狀我雖非一然首以通契丹爲興師之名方石晉以父事契丹而契丹每以兄事南唐蓋戎狄習見唐之威靈故聞後裔在江南猶尊之不敢與他國齒南唐亦頗恃以自

驕其實相結約撓中原皆虛辭非能爲南唐助也
高麗事具唐書及五代史四夷附錄今書南唐所載
異聞及高麗通南唐之見於傳記者

高麗至五代初國名曰大封其王高氏名躬又躬又
晚年果於誅殺吳順義二年當梁之龍德二年爲海
軍統帥王建所殺建自立去大封之名復稱高麗以
開州爲東京平壤爲西京吳天祚二年當晉之天福
元年敗新羅百濟於是倭耽浮驩於羅鐵勒東夷諸
國皆附之有二京六府九節度百二十郡內列十省
四部官朝服紫丹緋綠青碧青碧以年序遷綠以上
選才能賜之俸祿賦以田租尙冠禮略如古制婚姻
男女執手自相媒許俗重匾頭生男且日按壓其首
惟恐不匾也昇元二年遣使來貢方物所上書稱牋
大略云今年六月內當國中原府入吳越國使張訓
等回伏聞大吳皇帝已行禪禮中外推戴卽登大寶
者伏惟皇帝陛下道契三無恩涵九有堯知天命已
去卽禪瑤圖舜念歷數在躬遂傳玉璽逮夙惟庸陋
獲託生成所恨沃日波遙浮天浪闊幸遇龍飛之旦
阻申燕賀之儀無任歸仁戴聖鼓舞激切之至儀式
如表而不稱臣烈祖御武功殿設細仗見其使自言
代主朝覲拜舞甚恭宴於崇英殿出龜茲樂作番戲
召學士承旨孫忌侍宴三年又遣其廣評侍郎柳勳
律來貢方物其後史冊殘缺來與否不可攷矣

是書凡馬令胡恢陸游二本先輩云馬胡詮次
識力相似而陸獨道邁得史遷家法今馬本盛
行胡本不傳故翁書一十八卷僅見于鹽官胡

孝轅秘冊函中又半燼於武林之火庚午夏仲
購其焚餘板一百有奇斷絀不能讀曰簡家藏
抄本訂正附梓於全集逸稿之末至若與馬玄
康異同繁簡已詳見胡沈兩公跋語云湖南毛
晉識

